






16213/2

BURMANNUS, Petrus, the elder







SYLLOGES
EPISTOLARUM

A

VIRIS ILLUSTRIBUS
SCRIPTARUM

TOMUS II.

QUO

JUSTI LIPSI,

ET ALIORUM

VIRORUM ERUDITORUM,

MULTAE ETIAM MUTUAE

EPISTOLAE

CONTINENTUR.

BRISTOL ARUM
F. L. C. R. S.

WILLIAM LUTHER
WILLIAM LUTHER

WILLIAM LUTHER

WILLIAM LUTHER

WILLIAM LUTHER

WILLIAM LUTHER

WILLIAM LUTHER

WILLIAM LUTHER

WILLIAM LUTHER



LECTORI BENEVOLO

PETRUS BURMANUS.

PRODEUNT dicto tempore, duo iterum Sylloges nostrae volumina: Secundum, quod reliquas *Lipsii*, & ad eum virorum illustrium & doctorum epistolas complectitur. Quibus deinde Variorum & Insignium doctrina hominum, quas vel Academiae nostrae, vel privata scrinia suppeditarunt, Epistolas adjecimus. Quartum vero totum fere *Heinsii* & *Graevii*, animarum, quibus candidiores & infucatae amicitiae vinculo conjunctiores nullum seculum inter eruditos cognovit, mutuis Epistolis absolvitur, nisi quod in calce, ut voluminis modus foliorum justo numero absolveretur, *Perizonii* & *Heinsii* epistolas, varia & recondita eruditione refertissimas, subjecimus. Si votis & desideriiis eruditorum per omnem Europam, qui quam accepta & grata ante annum emissa volumina exstiterint, undique epistolis suis mihi testati sunt, & certatim collectas & in bibliothecis publicis & privatis servatas Epistolas Illustrium virorum obtulerunt huic Syllogae inferendas, satisfacere plene vellem, nullum fere finem labori meo prospicere possem. Sed & fastidii multorum, qui jam dapibus his saturati, se onerari tam continuis & longis ejusdem gustus epulis aegre ferre videntur, ratio est habenda. Me quoque ipsum jam taedium ingloriae & molestae industriae subire incipit, qui ab aliis, nec minus utilibus, studiis tantum temporis subduci mihi agnosco: quare satius visum fuit unicum tantum his quatuor volumen adjungere, quod *Nicolai Heinsii* cum Literatorum Principibus in Germa-

LECTORI BENEVOLO.

nia, Gallia & Italia commercii Epistolæ monumenta exhibebit, nec prioribus elegantia dictionis, & materiae dignitate, ullo modo concedet. cui etiam indices Virorum, quorum Epistolæ hîc dantur, aut in quinque his voluminibus mentio fit, & rerum & verborum, quæ hîc tractantur, & denique Auctorum veterum; quorum loca emendantur vel illustrantur, exhibebit, ut ita unusquisque, qui non omnes perlegere velit, seligere illas maxime epistolas possit, ex quibus studiis suis emolumentum accedere posse arbitretur. Intra vero anni decursum, & forte brevius, summam me laborioso huic magis, quam ad famam & nomen illustri, operi manum impositurum, si Deus vires & vitam dederit, spero. Vale, erudite & æque lector, & conatus hos laudabiles, & in usum rei literariae prompto & volenti animo susceptos, studio & favore prosequi perge. Leidae; Idibus Novemb. cıııccxxv.

JUSTI LIPSII,
ET
VIRO RUM ERUDITORUM
AD EUMDEM
EPISTOLAE.

EPISTOLA DCCXXVI.

J. LIPSIUS

Guilelmo Daffonvillio, Christophori filio.



Romissi mei nuper facti non immemor fidem libero, & quae mihi visa studiis tuis conducere, breviter & methodo quadam scripsi. habes eam hîc inclusam. Addo autem universæ & praemitto, duo mihi videri, in quibus vir talis, genere & instituto, & opibus, versetur atque se applicet; *Politica* & *Historica*. Ad rempublicam enim consilia tua spectare ac vergere mihi persuasum est, certe debent. & si non alius, pater tuus eo vocet. nec illud praecogitandum, & sibi objiciendum est, non praestabo in ea parte. haec & illa mihi desunt: quia, si quid natura non dedit, industria potest addere, quam Deus, januam & aditum ad claustra & penetralia sapientiae fecit. Igitur *Politica*, quae pars Philosophiae vel praestantissima & utilissima, *Ethicam* imprimis velut basim & fulcrum, cui innitantur, quae- runt. Haec legere te suadeo & discere: a quibus? ab ipso illo omnium artium Principe Aristotele, cujus libri exstant: sed & a nostro Seneca, quem in hoc genere non dicam vinci ab aliquo, sed venisse, quo nemo ivit aut ibit. Hunc serio lege, formabit animum imbuetque honestissimis & saluberrimis ad omnem vitam praeceptis. sed & quaedam ad Politicam ipsam dabit. Iisdem si jungis Hebraeam, id est, Orientalem Ethicam, quae est in libris Sapientiae Salomonis, Ecclesiastis, & Ecclesiastici, valde e re erit. Incredibile, quam multa ibi vere, prudenter, fortiter expressa. Post *Ethica* deinde ad *Politica* transi. id est a privata vita (quae stabiliri ante omnia debet) ad publicam, & concipe, quâ alios regas, postquam te coeperis. in his chorum omnem ducit idem ille Aristoteles, non legendus solum ea parte, sed pene ediscendus. Post eum, aut juxta, cen-

feo republ. aut leges addas, haud peccabis. imo & illic hauries, quae ad usum tuum apponas. Tertio, & firmatis jam melioribus judiciis, si venia tibi (ad Theologos spectat) legendi *Machiavelli* erit, haud improbem, aut dissuadeam, non quia illum ex animo probem: habet enim infinita falsa aut fallacia, habet & impia: sed quia juvat malitiae illas calles quoque nosse, non ad utendum, sed ad vitandum. Ire te per eas nolo, mane in splendida, tuta ac regia nostra via. sed videre cupio & nosse ac dijudicare errores, qui specie subtilitatis per senticosa illa incedunt. Quo fructu? sese compingunt aut impediunt, perdunt eos, quibus adhaerent & haec adsuadent. Vide igitur tantum: post haec autem ad *Historica* descende; ad amoenum illum & ridentem campum, in quo tot virtutum, tot consiliorum velut flores aut stirpes. Semina etiam multa occulta & per terram sparsa, quae eruenda sunt, & id est, in quo lectio maxime se exerceat, & fructus mox ferat. Nihili est res & eventa modo legere, inquirere oportet: in causas, in consilia, in adjacentia; & videre non solum, quid evenerit, sed etiam humanis rationibus cur evenerit, &nectere principia illa cum suo fine. Ille mihi vir erit, ille uberem messem referet, qui faciet, & ductores huic rei capiet ipsos historicos, qui a se causas saepe promferunt, & alibi veluti digito ad inveniendum praeiverunt. In eo genere Thucydides, Polybius, Tacitus, Guicciardinus, Cominaeus, & si qui tales. atque utinam multi! illorum labor de nostro demat, eorum prudentia valde nostram formet. sed ubi non illi, pro nobis faciendum est, & quomodo id commo-
modo in adjunctis habes. Praeivi enim tibi de tota historia subtilius fortasse, quam opus aut usus tibi sit, sed excerpes aut uteris quae voles. In ipsis Politicis hoc non praeceo. ipsa enim sibi methodus, & sive illa Aristotelis, sive nostra, sive alia placet; facile in tabulas redigere & praecepta. sed & hoc facile (cum lectio multa accedet) subnotare & seligere ex historiis monita aut exempla, quae huc & ad quamque partem conducent. Ista sunt, nobilissime Domine, quae visa monere breviter. faxit Deus, ut sic cum fructu tuo, sicut meo affectu, qui & tibi & amplissimo parenti sum addictissimus. Lovanii III. Id. Septemb. MDLXCVI.

¹ Ipsa methodus Studiorum, quae huic Epistolae adjuncta fuit, desiderabatur in codice epistolarum.

EPISTOLA DCCXXVII.

CHRISTIANUS BRUNONIUS

J. Lipsio. S. D.

Lovanium.

AD focum dederat matutinum me frigus, cum haut multo post acceper tuas. Mihi vero gratissimae fuerunt, ac perinde jucundae. Tenebamur desiderio nimisquam acri, singularumque expectatione horarum torquebamur. Amor id, immo ardor facit. quem tu Amorem non minus religiose sedulo-
que,

que, quam egomet, habes. Et subverere, me pudor a scriptione ac verecundia ut sistant? scriptione, inquam, libera. Ita scilicet hortatiunculae istuc, quod in extrema epistola tua, interpretor. Parum fortassis probe, vere tamen effabor, intra adfectum tuo-meum esse pudorem. Litterarum quidem usum ingerit amor, usus libertatem. quam non deferam ego aut destituam, non mehercule magis, quam studium hoc erga te fidemque nostram. Apud me fucus sit atque ambitio pura puta, siquid obtegas curiose aut similes in amicum. praesertim siquando hic ipse talis, id est, verus, simplex, apertus, & caput addo, firma stabiliq; fide. Ego autem, siquidem evaleret in me frontis mollities plus, quam comitas simplicitasque ingenii Lipsiani, & sim ingratus & depudero. Nec vero *Wiltzios* habeam, aut *Polliones*, aut *Leemputios* mille, quam unum Lipsium, potiores. Hos ego vix novi etiam. extimavi speciem illam si excipio notitiae. Tu autem ex me, isti ipsi in te quam adficiantur? Mihi vero tenebrae sunt hîc & caligo. Quid dicam? quid autem non dicam? Angor mediusfidius siquando alias, & torqueor: eo magis quod te haec ipsa haut sane leviter & a summo quaerere videam & sciscitari. Sumus, mi Lipsi, rerum *Wiltzii* atque etiam morum modice prudentes nos ac periti. Tum *Pollionem* etiam *Leemputiumque* vix libavimus. etsi illum aliquanto magis, quam istum. Hercule verum ut loquamur, Amicitiarum grande momentum vertitur in temporibus. Et vulgo quidem scenae serviunt in hoc benivolentiae, ut sic dixerim, teatro. Opinor, intelligis quid ipse velim. Ago circuitu etiam. sed tamen rectum rigidumque veri iter premam vis & insitam? Age. Temperat hos ipsos atque aurigatur Fortunae fraenum quantum caeteris in rebus, tantum, immo non paullo magis, in adfectu erga te, nec minus de te iudicio. Pugnant quidem, & acriter calideque pugnant in praecepta ritusque religionis antiquae & *Pollio* & *Wiltzius*. Nec injuria inter primores ponam & capita adversantium fidei propalam Christianae. *Wiltzium* ferunt, cum praetor ob coetus, ut sit, sacraque clandestina nonnullos postulasset, praeter ceteros fremuisse Adfessorum, adeo quidem, ut nec clamoribus temperarit acerbissimisque minaciis: inter silentium pene collegarum ac stuporem. Jam vero in circulis optimatum & sermonibus impurissimus, siquid hujus generis incidit, tuus ille *Pollio*. Sed hunc tamen ipsum quivis a moribus amet, atque ingenio alioquin ad modestiam facto, nisi si ita norit. In altero illo, ut damnes iracundiam ac tumorem, ita lenitatem comitatemque requiras. Haec de ipsis ego. exquiris, in te quid ipsi aut sentiant, aut loquantur? Tibi illud haut temere; hoc facilius, sed & verius, dicam. Constantiam ecce carpunt & adrodunt tuam, notumque olim *Lipsum* quaerunt, quod ajunt, in *Lipso*. Rides? sit id quidem firmitudinis hujusque ipsius Constantiae, quam hi nostrates suggillant inepte barbatuli. Gemis? opinor quod ad se tempora eos turbaeque adtraxerunt, quos Fides & Virtus debuit. Et exspectas scilicet, de *Leemputio* quid adferam. Ego vero, mi Lipsi, hunc differo. Haec adhuc immatura res atque importuna epistolae: huic sane omnino. Ero, ut confido, uberior, ubi plenius homi-

nem degustaro. Itaque ingenia vides haec temporaria, pendentesque animos, & quocumque tulit Fortuna, secutos. quid autem secuturos? perspicias, scio, & prospicias jam tu, qui Politicarum artium civiliumque gnarus. Sed haec haecenus. libenter his in rebus ἐναχολάζω σοι; magis etiam in privatis atque meis: & idipsum, te auctore, cum voluptate, atque etiam fructu. Et si utrumque nos subinde quo nescio animi fastidio destituit. Langor, inquam, premit, & prohibet valide qua stilo, qua libellis. Sed est, puto, ignavia. Mi Lipsi, incredibile est quam jaceam. Quis vero aut quid erigat ac confirmet? Tu quidem diffitus es, & alio tum coelo, tum etiam solo. At enim monitiunculis ac scripto suscitabis. Vereor ut imbecilliores hae, quam sint me restituendo, vel etiam firmando. At Honestas & Utilitas quo vocant, eundem. Est quidem: sed mihi gradus male agilis, istuc ut proferam. Tamen ne desim mihi aut obsim ipse, connitor inter utramque ac pauxillatim adsurgo. Certum est illud, valde jampridem, valde vigor ille pristinus flaccuit & imminuit. Tu, amabo mi Lipsi, juva & restitue. Sed tamen lente, non nihil etiam egimus. Epigrammata scito nobis pangi dudum, & (si dīs placet) ad exemplar Iberi quodammodo vatis. ita tamen ut nusquam quidquam libidinis aut lasciviae. Probene, obsecro te, in hac aetate? Nam quin hisce moribus adposite huicque aevo, nihil ambigo: quibus Catones pauci, plures Apicii. At illud etiam me mordet, quod vix satis intexere decenter ritus prisca nonnihil & consuetudinis videbamus. Lusimus nimirum pleraque (pleraque autem? immo universa) ad Romanos illos vetustosque mores. Sed quid haec loquimur? mihi scilicet ac Musis, siquid fecius. Et sunt, ne erres, tabellis imposita deletitiis, in spongiam, Ajacis Augustaci ritu, momento incubitura. De edictis, mediusfidius vere tu atque ex oraculo. Ego autem hīc haereo, nec moturum credo in triennium. Id parentibus visum, quibus me haut gravatim praebeo: quidquid hoc est temporis, scriptoribus terendis prolaturus. Post, cum bono Deo, in Italos cogitamus, doctrinae veteris cupidine. Ecquid placet? Utar enim tuo (nec blandior) iudicio. Nisi tamen hocipso abusus jamnunc, tam laciniosa praesertim epistola. Nec illud nescio ab imperitissimo quoque fieri, per adfectionem & delicias. Me autem fluxus nescio quis ac spiritus provehit ultra quam velim, non modo quam fas & decorum est. sed inhibeo. Valebis, mi Lipsi, & nos amabis. Ultra-jecti, ad xiv. Kal. Novembr. ∞. id. xvi.

Est responsio ad Lipsianam, inter Gudianas cxii. ubi *Bruningius* dicitur, & ita vocatur etiam *Valerio And. Bibl. Belg. pag. 133.* qui domesticum *Lipsio* fuisse dicit. hīc tamen expressis literis se *Brunionium* appellat. & credo nostra lingua *de Bruyn* vocatum fuisse.

Antonio Wingio, Priori in Abbatia Laetiensi.

E Pistolam tuam lubens vidi, ut nuper te ipsum, & in te veterem & non fictam probitatem. Atque eam cum modestia (nihil blandior) quae non solum vos inprimis decet, Deo & religioni sacros, sed etiam nos, quos alia studia & alia vita cum vanitate saepe habent. Ego vero apud te aperire me volo, & fateri nihil esse, quo magis nunc mihi placeo, quam quod non placeo, & quod recto oculo video & metior res humanas. Enimvero ridere mihi lubet, cum erectos & animi plenos quosdam video, ob nescio quid ingenii, doctrinae, scriptiunculae, quod ostenderunt & vulgarunt. Heu quae ista sunt? primum tenuia, nec quidquam ad illos, non dico veteres, sed nec medios, qui ante centum circiter aënos fuerunt. Quid nos hodie ad *Politianum*, & *Hermolaum* aliquem sumus? Et pone supra illos esse, a quo sumus? quid nostrum est? Ingenium, memoria, iudicium palam a Deo. nec scriptio quidem melior, nisi illo inspirante & dirigente. Quid ergo ut nostra jactamus? superna omnia & aliena sunt, aut vitiosa inhaerent, & semper haec inhaerent, ut terram etiam nostram in nobis & parvitatem ac pravitatem agnoscamus. Ego ita affectus sum, toto pectore hoc profiteor: non magna sunt, quae agimus, non nos magni, qui agimus. & siquid est melius, ab uno illo est auctore & fonte boni. sed ista quid ad rem, aut tuam epistolam? nihil, nisi quod lubet & juvat philosophari apud eos, qui Philosophiae ejus capaces sunt, & simul me aut exstimulare aut firmare. At nunc ad epistolam. Mittis Vegetium manuscriptum, videbo & utar, & iudicium meum scribam. etsi vereor, ut vix aliquid sit, praeter ea, quae jam visa & notata. Quaeris de notis, quibus dijudicari libri veteres possint? sunt triplices, a *materie*, *forma*, *modoque* scribendi. *Materie*, ut membrana, non charta sit, & quidquid in ista scriptum, scito per vetus non esse. *Forma*, quae est in modulo laterum, ut graviorum & conspiciuae sint, ac raro tenues illae & arctae habent aevum. In *modo* denique, ut rara compendia sint, ut exprimant litteras atque etiam diphthongos. nam quae crebris illis implexionibus constant & compendiariis notis, sunt aevi recentioris. facit & ipse aspectus librorum, & quaedam ab usu judicatio, quam scripto nemo promat. ita possum dicere; & de studiis meis, esse me in Politicis monitis & exemplis. Ita enim inscribo; & philosophamur & hinc aliquid, ut videtis. Deus mihi det studia & stilum dirigere ad ejus gloriam, commune & meum bonum. Reverendissime Domine Prior, vale, & fratrem ¹ D. Canonicum amanter saluta. Lovanii v. Kal. Decemb. c1610xcvi.

¹ Ad *Hieronymum Wingium*, Canonicum Tornacensem, etiam aliquot epistolae in Centuriis ad Belgas, & quem egregiis laudibus ornat *And. Catullus* in Tornaco pag. 114. Tertius Frater videtur *Philippus*, ad quem est Epistola I. Cent. ad Belg. 7. & qui Romae obiit, ut scribit *Lipsius* III. Cent. ad Belg. 7.

JOH. BAPTISTA SACCUS

*J. Lipsio S. D.**Lovanium.*

ET mihi parumper vaca. Litteras tuas postrid. Kal. Decembr. datas accepi, quarum lectione summa jucunditate perfusus sum: nisi quod moleste tui alteras periisse. inde enim duplex mihi jactura: tum quia carui ea voluptate, quam ex illis percepissem, tum quia praeterlapsa est occasio operae meae tibi citius navandae in eo, quod de Catapulta praesertim & Ballista requirebas. Quo avidius eandem nunc mihi iterum oblatam arripui, & angulos omnes hujus urbis, & arcem ipsam, (armamentarium enim aliud publicum non habemus) diligenter excussi: sed nihil, quod te juvare possit, reperi. Dum autem animo meditor undenam possim extra hanc urbem aliquid ejusmodi machinarum eruere, nuntiatur provinciae praefecto, me litteras abs te habere, de hisce machinis agentes. Qui, ut tui, & rerum tuarum studiosissimus est, confestim jubet me ad se cum litteris accersiri. accedo postridie: saluto: indico cur adeam, gaudet, & tu igitur, inquit, litteras a Lipsio cum mandatis? ajo, & promo. accipit exemplar idiographum: gestit legere, sed restitit ad manum minutiolem, facile tamen lecturus, si adniti voluisset, & nisi ego praevertens exemplum a me notioribus characteribus descriptum eidem exhibuissem, munus etiam legendi mihi deposcens, si permetteret. capit exemplum, operam meam nihil moratur. legit ipse: perlegit ore composito & placidissimo, & quidem tam expedite, facile ut intelligeres stilum tuum esse illi quam familiarissimum. Submissius tamen, quae de se ipso scripta erant, percurrentes, pudore quodam ingenuo suffusus. Perlectam epistolam servat: in qua cum scriptum animadvertisset, te opus tuum de Machinis ad me mittere parvisse, veritum, ne mihi gravis accideret impensa vecturae; nos, inquit, te sine jactura nostra hujusmodi codicis compotem faciemus, quippe qui alterum jam domi habebamus, emptum de bibliopola, priusquam Lipsius suum ad nos mitteret: & cum dicto codicem emptum promi jubet, quem dat ipse mihi humanissime in manus, eleganter sane compactum; addens, longe sibi chariorem esse eum, quem tu misisses, uti donum a te profectum, & aliquot verbis tua manu adscriptis insignitum. Accipio laetus, & illi tunc, ut tibi nunc, propter quem eo munere donatus sum, ingentes gratias ago. Mox addit, habere se quoque litteras a te gravissimas & humanissimas, quas vicissim promit, & mihi dat legendas. perlego scriptas eleganti forma, pendente interim Principe ab ore meo, & gravitatem illarum utroque admirante, quarum etiam exemplum petenti mihi Princeps non denegavit. Is multus deinde fuit in tuis laudibus, cum egregia amoris in te sui significatione, in qua tamen judicium non requireres. Aiebat, se plurimi quidem facere te ob excellentem multiplicemque doctrinam, sed multo hercle pluris propter animi candore-

dorem & virtutem, quam in te eximiam esse, multorum, qui te penitus nos-
sent, litteris & sermone cognovisset. Ostendebat se lucubrationes omnes
tuas magna cura pervolutasse, quarum indicem tua manu descriptum habebat
in iis litteris, quas ad ipsum dederas. Docbat in illis insignem quandam, &
praeclaram ubique eruditionem cerni: sed inprimis admirabatur acerrimum in-
genium iudiciumque tuum in monumentis veterum auctorum, praesertim hi-
storiarum, perscrutandis; quibus intelligendis magnam lucem praetulisses.
Addebat praeterea, te virum esse multarum rerum usu & cognitione praedi-
tum, qui ex ipsis etiam patriae turbinibus & procellis magnam tibi pruden-
tiam comparasses. Commendabat summopere, quae de Militia Romana supe-
riore anno edideras: ex quibus praecipua quaedam dogmata ad hodiernam mi-
litiam formandam transferri posse animadverterat, quae tecum libentissime
communicaturus esset, si tui praesentis copia daretur, quod non in postremis
votis sibi esse significabat. Probabat maxime iudicium munificentiamque Re-
gis nostri, qui te Historiographi sui titulo jure meritoque decorasset: de quo
tibi ex animo gratulabatur. & licet intelligeret esse te ingenio tam admirabi-
li, ut munus quodcumque litterarium egregie sustinere posses; tamen existi-
mabat te scribenda potissimum historia fore longe praestantissimum. auebat-
que in eo genere aliquid a te scriptum videre, quando non deesset seges & ma-
teria rerum a multis fortissimis Ducibus, his & superioribus temporibus tum
in Belgio, tum in Gallia & alibi gestarum, quas tu scribendo ab interitu ven-
dicare, & immortalitati asserere posses: felicemque omnino ducebat illum,
cujus tu egregia facta litterarum monumentis inseruisses. Ad extremum per-
contatur, ecquid de machinis, quas cuperes, explicarem? neganti mihi stu-
dium, operam auctoritatemque suam omnem ad eam rem perbenigne pollicetur
& defert: adjiciens, non dubitare se, quin in Hispaniis multa adhuc tela po-
liorctica reperiantur, quibus usa fuisset antiquitas, quorum etiam nonnulla in
aliquot oppidis suis asservari meminisset. Et quia spes erat, Comi, in aedi-
bus Jovianis aliquid cujuscumque cuperes inveniri, datum est negotium, man-
dante Principe, praefecto illius arcis, qui re diligenter curata nihil tamen in-
venit. Tandem cum intelligerem apud Allobrogum Ducem extare librum
luculentissimum de hujusmodi machinis manuscriptum, quem Urbinatum
Dux illius genitori quondam dono dedisset, Principem moneo: qui protinus
partes sibi sumit scribendi ad Allobrogem, ut ejus libri copiam ipsi faciat ad
aliquot dies, uti facturum spero. Interea ipse quoque per amicum studeo,
ut Urbino, ubi hujuscemodi rerum multae adhuc reliquiae (ut fertur) per-
manent, aliquid mittatur, quod in rem sit. Denique omnem lapidem moveo,
ut tuo desiderio satisfiat. quidquid erit, faciam te statim de eo litteris certio-
rem. Reliquum est, suavissime Lipsi, ut intelligas amari te plurimum &
aestimari in hac civitate, in primis vero a Principe & Gubernatore ipso: de
cujus erga te humanitate & affectu licet multa dixerim, velim tamen tibi per-
suadeas, me pauca pro rei magnitudine dixisse. Longum esset recensere eos
omnes, qui tibi animo sunt addictissimi: sed duos tantum viros virtute, no-

bilitate, gratia auctoritateque praestantes nominabo, qui te amantissime salutant, seque tibi totos devovent: *Camillum Trotum* Senatorem amplissimum, & *Federicum Quinctium*, fisci Regii patronum. Hos tu si invicem amaveris, & cum ad me scribes, resalutaveris, nihil alienum ab humanitate tua, & illorum merito feceris. Ego de honore tibi a Rege nostro habito gratulor. neque tibi tantum, sed Regi ipsi, & aevo nostro, quod per hanc occasionem magis etiam abs te illustratum iri video. Quod ais, non misisse te ad me opus de machinis, ne me gravares impensa, magnam in eo cum mihi, tum tibi ipsi injuriam facis; qui & me tam pusilli angustique animi esse censes, & tua scripta, quae non chara sunt auro contra, tam parvi aestimas. Ego meam non remifero, nisi quod primum opus edideris, illius exemplum statim per tabellarium ad me miseris. tu de tua videris. Vale, Lipsi integerrime. Mediolani. fex. Kal. Febr. ∞. 10. xcvii.

EPISTOLA DCCXXX.

JOH. BAPTISTA SACCUS

J. Lipsio S. D.

Lovanium.

Nihil amantius, nihil diligentius fieri potuit a Comestabile, Gubernatore nostro, quo tuo desiderio, in eo, quod de catapulta & ballista petis, satisfieret. Qui, ubi omnes totius fere Italiae angulos litteris quoque scriptis excussit, ut vestigium aliquod illarum machinarum reperiret, tandem ab ea spe undique dejectus, ad Allobrogum Ducem totus conversus, unis atque alteris litteris petiit, ut sibi de illo libro commodaretur, quem Urbinatium Dux olim Philiberto dono dedisset. Cumque liber is in infinita propemodum aliorum librorum multitudine lateret, nec facile erui posset, dato tandem negotio *Gabrio Buschio*, Mediolanensi, viro probo atque industrio, tui studio, & harum imprimis machinarum peritissimo, qui de illis etiam egregie scripsit, repertus est & allatus. Liber est ex membranis totus compactus, holoserico textu viridis coloris superindutus. Epistolam habet in fronte Latinam *Francisci Georgii Senensis*, operis auctoris, ad Urbinatium Ducem, manuscriptam. Deinde sequuntur plurimae variaeque machinarum formae, tum ad rem bellicam, tum ad caeteram architecturam pertinentes, stylo ipso diligenter depictae, non typis expressae: mutae tamen, ut quae nullo prorsus argumento, aut interpretatione explicentur. earum omnium Comestabilis vult sibi exempla desumi: sed prius exercerpi jussit eas, quae tibi usui esse possint. Id egregie praestitit idem, quem paullo ante nominavi *Buschius*; deditque mihi aliquot exempla jussu Comestabilis, additis Italico sermone argumentis, ac litteris ad me suis. quae omnia ad te mittuntur: ut intelligas amari te ex animo ab hoc principe, omniaque tibi ab ipso esse paratissima. Nec dubito, quin tu vicissim illum colas atque observes, daturusque operam sis, ut tanti he-

rois

rois virtus & humanitas monumentis litterarum tuis magis etiam illustretur. Is epistolam ad te scribit. Salutat te *Buschius*. ego in aere tuo totus sum. Vale. Mediolani Idibus Majis. ∞. 12. xcvii. mitto ad te exemplum earum litterarum, quas mense Februario tibi scripsi, quod nesciam an tibi redditae fuerint.

EPISTOLA DCCXXXI.

J. LIPSIUS

J. Baptistae Sacco S. D.

Mediolanum.

HAud ita pridem scripsi & respondi Illustrissimi Gubernatoris, tuisque literis, mi Sacce. nunc iterandi causa est; adolescens iste, quem vides *Ericus Puteanus*, ore, ingenio, doctrina, vita probus, & quem in Italiam vestram traxit cupiditas sola visendi & discendi. Scito ex optimo genere esse, & quos Prometheus (ut cum Poëta fabuler) de meliori luto formavit. Fac periculum si voles, in Graecis, Latinis, in Mathematicis, Astrologicis, Philosophicis, Musicis quoque. Videbis non tinctum his omnibus, sed imbutum. Itaque serio & libens eum tibi, & per te aliis commendo, notum mihi & ex disciplina hac mea profectum. Commendo inquam, sive quis Principum virorum uti eo quasi pro Secretario volet (nam & pingit scite) sive adolescentes nobiles pro magistro & rectore. Fortuna quidem ejus est, ut sine adminiculo consistere in locis exteris non possit. haec de *Puteano*: & de me quid opus est, cum illum habes? Pete, dicet omnia, quae amor aut curiositas velit scire. ad Connestabilem brevi, cui Militiam meam recusam mittam & castigatam. Vale. Lovanii Nonis Sextilis c1212xcvii.

Vid. ad Italos Epist. LVII. cui de *Puteano* testimonium *Lipsii* adjungitur, & in qua epistola *Sacc* mentio fit.

EPISTOLA DCCXXXII.

JOH. BAPTISTA SACCUS

J. Lipsio S. D.

Lovanium.

O Vir humanissime, & benignissime, quanto me beneficio nuper obstrinxisti, *Nicolaum Micaultium* litteris tuis mihi commendans! neque enim ita hebeo, quin intelligam, voluisse te ea commendatione apud illum, imo apud omnes meipsum commendare, uti dignum amicitia tua, & qui cum Lege illa Pythagoraea, omnia communia habeas: quo nihil mihi potest esse cum jucundius, tum honorificentius. Sed quemnam virum mihi commendasti? eum certe, qui ore ipso, sermone, moribus (ut nulla generis, & fortunae ratio habeatur) vel summo ipsi Pontifici, ad quem proficiscitur, sese com-

mendare possit. adde, comitatum aliquot viris præstantissimis, & adolescente uno nobilissimo, affine suo, quorum fulgore non domus nostra tantum, sed urbs haec tota mehercule radiabat. Satisne? nondum. virum, qui te mihi lingua prius diligenter effinxisse non contentus, tuam ipsius effigiem, penicillo; & coloribus ad vivum expressam ostendit: quam ego statim ori cum adpresissem osculabundus, is (ut me bearet) illam mihi inter pudorem, & cupiditatem fluctuanti ultro detulit, ac dimisit. Basilicum vero munus! quo & Princeps ipse, ad quem postea *Micaulium*, una cum affine, ac Lombardo deduxi, captus est: ita ut primum illud exemplum illico sibi destinaverit, potestate mihi facta alterum desumendi, quod ab artifice quodam eximio curatur, simul & aliud exemplum, quod Romam mittam, expingitur. Sed non erit hic finis expingendi: siquidem ad pictorem tota urbs (viros intelligo) confluit, spectatum, & petum. inter quos *Lodovicus Septalius*, medicus apud nos insignis, & tui nominis studiosus: qui ex ipsis oris tui lineamentis, & colore affirmat longe abs te abesse periculum tabis, aut phtyfis? polliceturque te (favente Deo) vivacem adhuc in multos annos fore. Quod ego cum tibi, tum aevo nostro gratulor: jubeoque te dehinc omnem non dicam sollicitudinem (non enim cadit hic affectus in tuam constantiam) sed suspicionem imminentis fati deponere, & hilariter vivere: quod ipsum amuletum optimum esse scito ad averruncandos ejuscemodi morbos. Caeterum uti ipse *Micaulium* exceperim, uti Princeps; malo te ex ejusdem *Micaulii* litteris accipere. Illud sane perincommode accidit, quod & Princeps discessum parabat, ut Reginae adventanti occurreret; & *Micaulius* ipse nimia festinatione gaudium nostrum corrupit. vix enim biduum hic peregit, pollicitus tamen se in reditu diutius mansurum. ei, & affini testimonia dedi meae in ipsos voluntatis, chirurgographo meo adnotata in utriusque eorum Albis. Illa inferius adscripsi, ut inde conjicias quaenam tibi gratiae pro amicitia talium virorum a me debeantur, & habeantur. Tu, si vis intelligam me tuae commendationi satisfecisse, fac ut alios mihi quamsaepissime commendes. Epistolarum tuarum novum foetum avide expecto, & si frontem ponere licet, ambitiose. quid ita? jam scis. immortales censeo, quos ibi tantum nominaveris. Admiranda tua quin acceperimus, dubitare te amplius non puto, de quibus iterum Princeps, ego iterum, atque iterum te monuerimus. Exemplum in primis ad Politica tua hic expetuntur. *Puteanus* adhuc cum reliquiis morbi luctatur, liberiore campo, nempe ruri, quo secessit una cum Comite *Altaempzio*, & ipso quartana laborante. Illi salutem a te per litteras nuntiavi; quam tibi, suavissime Lipsi, in hoc diversorio terrestri diuturnam, sed in coelesti domicilio aeternam voveo. Mediolani quinto Kal. Novembr. ∞. 15. 116.

Hoc amplius, quo nil amplius, amplissimo Lipsio debeo, *Nicolaë Micaulii*, decus Belgiae, quod amicitiam tuam, quam ego ut adipiscerer, libens in Belgium usque perreptassem, ultro ipse mihi in patria, atque in aedibus meis conciliavit. In hac igitur extrema pagina nomen do inter amicos tuos: ordine, si merita nostra spectes, praepostere, si adfectum, qui semper idem

*I, bone, quo virtus tua te vocat, i pede fausto,
Grandia laturus meritorum praemia Romam.*

Te, generose adolescens, *Engelberte Dubois*, opera humanissimi Lipsii, unaque nobilissimum affinem tuum *Nicolaum Micaultium*, Animas, quales neque candidiores Terra tulit, neque quæis me sit devinctior alter, cognovi; & merito vestro utrumque amo, æternumque amabo. Cujus promissi syngrapha manus hæc apud te esto.

Responsio ad Cent. ad Ital. Epist. LVIII.

EPISTOLA DCCXXXIII.

JOH. BAPTISTA SACCUS

V. C. J. Lipsio S. D.

Lovanium.

FAustissimus nobis fuit adventus Reginae nostrae, hoc etiam nomine, quod multos habuit in comitatu tibi perquam familiares, & recens istinc profectos: inter quos vir doctus *Petrus Pantinus*, quocum vetus erat antea mihi consuetudo, olim jam in aula Cath. Regis instituta, nunc vero tui nominis commemoratione validissime aucta. Quamdiu hîc mansit, mansit autem diu, frequenter una fuimus: aliquoties etiam conviximus, convivium ipsa sermonibus de te jucundissimis condientes, non sine solemnibus poculorum libatione salutis Lipsianae. Is de tuo statu, studiis consiliisque omnibus me erudit, & eandem spem, quam *Micaultius* de tuo in Italiam adventu nobis iniecit: quæ utinam ne nos fallat! Illud certe inter nos pactum velim, ut, si; imo cum in Italiam veneris (sic enim ominor) Mediolanum videas, & ad me recta venias, accepturum te si non laute, saltem laete, atque hilariter. Erit hoc nobis non modo gratissimum, verum etiam gloriosissimum: qui magis adduci debes, ut mihi obsequare. Adit me postremo *Petrus Crassus*, Belga, amicus tuus, ideoque meus; qui diu in Italia versatus istuc redit. commendavit mihi nescio quid negotii, quod ego diligenter curabo: petiitque num aliquid ad te vellem. non licuit per temporis angustias, & assiduas occupationes meas hominem diutius frui. tantum has ei litteras ad te dedi. Vale, clarissime Lipsi, & nos ama. Mediol. XIII. Kal. Martias ∞. 10. 10.

Responsio ad Centur. ad Ital. LXV. & ad hanc respondet Lipsius Epist. LXX.

JOH. BAPTISTA SACCUS

J. Lipsio S. D.

Lovanium.

Serius ad te scribo, sed seriofius, quia seriem ad te mitto rerum, quas Princeps noster fortiter, & feliciter apud vos gessit. Mitto inquam illius jussu. jubendi autem occasio haec fuit. Eram forte superioribus diebus in procubiculo Principis, negotii causa admittendus. Commodum ibi mihi redditur epistola tua, qua me de *Lampugnani* notis (vere notae sunt impuri illius hominis) admones, & de tuis disputationibus. vix ea perlecta introducitur negotio transacto tria inquam verba de rebus Belgicis a Lipsio habeo, quae te fortasse, Princeps, & pigeat, & juvet audire. Excitatus ipse ad nomen tuum, & ad nuntium; virum ait memoras insignem, & mihi charissimum: ecquid ab eo nuntias? tunc ego resoluta epistola postrema verba recito, nempe. ² *Publica nostra pessime habent, quam dispari facie ab illa, quam Praefectus vester vidit, aut fecit!* eaque e vestigio Hispane reddo non illubente Principe: qui nihil eo nuntio, uti non inopinato commotus, & neutiquam ea laudis significatione elatus de te statim & percontari, & amanter atque honorifice loqui coepit; magnopere gaudens (ut videbam) quod tui ornandi & augendi auctor ipse fuisset. Me vero dicente, quantum illi deberes te aeternis litterarum monumentis magna cum ipsius haude testatum reliquisse; audi, quaeso, quam praeclarum tibi dederit iudicii sui testimonium prudentissimus, idemque religiosissimus heros. Laudari quidem, inquit, a tanto viro non displicet; sed nae ego haud paulo malim illius precibus D. O. M. commendari, cui illas gratissimas fore existimo, ut hominis purissimi atque innocentissimi: idque per te eidem, cum scripseris, significari cupio. Pollicitus sum: addens, cupere me vocem illam exaudiri a nonnullis, qui te parum orthodoxum aliquando suspicati sunt. tum vero Princeps iterum, ac saepius testari, ac dejerare hominem neminem nosse, qui tibi sit animi pietate, morum sanctitate, vitaeque innocentia anteponendus. Quaesivit amplius, quid in ea epistola praeterea contineretur. narravi de notis, & disputationibus. utrasque postulavit. dixi me unas tantum habuisse, quas Comestabili Castellae misissem: utprimum alias habuissem, alaturum. Habui: attuli: discessi: redii post aliquot dies, mandata quaedam accepturus ad Rhoetos, quo me Princeps legat. dat; atque una commentariolum hunc rerum Belgicarum ad te mittendum. perlegi domi, & confestim illum cum his litteris ad te misi. Animadverti quidem in eo sermonis quandam densitatem parum distinctam: sed ea nihil oberit, quominus omnia percipias, disponas, illumines, atque amplifices, si usus venerit. nam licet Princeps nihil amplius injunxerit, quam ut mitterem, teque suo nomine salutarerem;

1 Responsio est ad v. Centur. Misc. Ep. xiv.

2 Haec verba in Epistola edita desunt.

rem; haud obscure tamen indicat, haec abs te aliquando illustratum iri. De *Lampugnano* scito illum (quisquis sit) toti Italiae stomachum movisse ineptiis suis, & sycophantiis. Sed quo magis invisae fuerunt nebulonis illius notae, eo gratiores & jucundiores tuae disputationes fuere. Sena, aut septena omnino earum exempla huc pervenere, quae ego omnia praestitavi, & amicis distribui: qui ea lectione adeo delectati sunt, paene ut exclament tanti fuisse blateronem illum in te scripsisse. *Puteanus* noster Lauretanam aedem, atque inde Romam cogitat. tempus, & com meatum a Senatu petiit, & obtinuit, redditum brevi pollicitus. proficiscendi causa votum est, & cura perquirendorum librorum insignium instruendae bibliothecae publicae, *Federici* Cardinalis *Borromaei* auspiciis & impensa instituendae. Favcat Deus, & te, vir clarissime, Reipublicae litterariae diu servet incolumem. Mediolani postridie Kal. Martias ∞. 15. CIII.

Solicitus ero de his litteris, donec rescribas: quia video cordi esse Principi, ut commentariolus suus ad te perveniat.

EPISTOLA DCCXXXV.

FABIANUS BIACOVIUS

J. Lipsio S. D.

Lovanium.

Janus Douza F. spes illa gentis Batavae, & amor tuus, mi Lipsi, fuerat anno superiore in Sarmatia nostra, gentemque illam, quam vipeream voluerunt esse illi,

Quis meliore luto finxit praecordia Titan

vidit. Gratulabar patriae meae, quod eam aestate adulta vidisset, qua non poterat illa non utique esse affabilior; quam si vidisset nunc gelu rigescentem; ipse profecto, ut ad Gorgonis caput, riguisset. Quid vero ipse de nobis sentiret, cum interrogarem; aut ille renidebat; aut non usquequaque vituperabat, aliquando, credo, ut mihi placeret & genti meae, laudabat. Gaudebam, & triumphabam judicio illius. Veniebant vero in mentem illa Sileni *ὑποκορυσματὰ* ad suum Cyclopem

ὦ κάλλιστον ὦ κυκλώπιον,

ὦ δεσπόησθε

eumque quod ita prudentia talium ex Ulyssē *πικνῶν* suaderet, non nimium reprehendebam, cum apud nos de nobis tacitus esse vellet. Sed gentem meam nil moror, ad te venio & ad tuos. Jamprimum illud nosti, quam aliena scrutamur potius, & malimus scire, quam nostra; itaque non miraberis, si quae de te ex illo quaesivi, tibi in aurem regessero, simulque gratulabere tibimet ipsi, quod famae tuae supervixeris, quod etiam & *οἱ Σκυθῶν ἐρημίαι* te norint & nosse velint. Tu interea *πρὸς πολυπραγμοσύνης* Plutarchum, nec *πρὸς λογοποιίας* Theophrastum leges, sed esto mihi magnus ille Demosthenes, & gaudeas:

deas etiam in Sarmatis *δακτυλοδείκτω* esse. Res ita se habuit. Quacerebam eruditissimum juvenem, ubinam locorum hoc tempore esses, & quando Lugdunum Batavorum reliquisses; promptissime ille utrumque retulit, referebatque annos, quibus te carere coepit sua Batavia, & locum, in quo nunc habitares. Sciebam ego istorum utrumque, antequam *Δουζα* mihi narraret, & fortasse eo ipso tempore, quando haec fiebant, sed quia a fama audieram, mihimetipsum diffidens *ἰφοθαλμὸς* ipsos tuos malebam de te interrogare. Cum vero hac in re promptissimum se mihi & lubentissimum dedisset, occoepe esse audacior, & fueram, si bene memini, *λεύκη στίθμη πρὸς τοὺς λόγους*, passimque & indiscriminatim interiorē etiam vitam tuam scrutabar, & tanquam aliquem a memoria, quacerebam. Dic sodes, cur Lugduno vestro discesserit Lipsius, cur amicos illos, quos inter magnum olim certamen fuit, quis illum magis amaret, deseruerit? ὃ *δυσχάριστον τῷ πυκνῶν φιλημάτων*; Quomodo vero ille potuit *ἀμφιδέξιον* parentem tuum relinquere? parentem, qui jure licet gloriatur

Εἴμι μὲν εὐθώρηκτω *Εὐναλὶς* πολεμιστῆς,

Εἴμι δὲ καὶ *θεράπων ἐλίκωνις* Ἀπόλλωνω.

Dii boni quae illae lacrymae fuere? qui discessus? qualia *πρὸς πεμπτικά*; Erubuerat jucundissimus ille juvenis, meamque curiositatem silentio puniit, ne tamen me contempsisse videretur, agebat, patriae tuae tibi amorem fuisse maximum, quem cum non posses humanitus ferre, horrendam istam secessionem cogitasti. At ego ille, cujus sitim non restinxerat tam brevissima responsio, quin potius magis incenderat, tristissimus illum sermonem de te abrui, & me ad alia retuli, nihil remittens de voluntate mea, quae fixa fuerat, omnia de te quacere, invenire. Destinatum erat *Δουζα* tuo tacere, & gratissimo rubore ora genasque pulcherrimas perfundere; ego vero, ne in me deinde apud suos postularer, ex interdicto unde vi, desieram *ἔτων ἀέκοντι* δὲ *θυμῶ*. Quid facerem? ardebam discendi causas cognoscere; at tuus *Δουζα* Sigalion alter erat, & nimium *ἄονα* ista *συνπόσια* fugiebat: bene certe imbutus praeceptis tuis, quae tu in Italiam discedenti cuidam dederas; quanquam ut inter Sarmatas Aeneadam dolos inveniret timendum non erat, *Ἀμαθῆς* eramus (ut dicebat Simonides de Thessalis) ἢ ὥς ὑπ' αὐτῶν *ἔξαπαταῶ*. Quievi tamen, & meam miseram sortem deplorabam, qui occasionem deinde dicerer habuisse; nec illa uti scivisse, sine dubio stultitiae condemnandus, qui pulcherrimum bolum faucibus amitterem meis, cogitabam insuper de leni aliquo, ut inquit Lyricus, tormento, at ille tanquam *δρύαντι* ἢ *κράτερῳ* *λυκόεργος* omnibus vineis fuit. Ultra nil poteram cogitare, mi Lipsi, hominemque Pythagoraei silentii ne mea garrulitate *εἰς πύρετον* caderet, vivum & integrum in Bataviam dimisi. Commodum ille discesserat, at ego omnes dolos artesque Pelasgas in fratrem illius, qui Cracoviae manserat, vertebam. Erat is *Georgius Douza* adolescens eruditissimus modestissimus. Ego igitur

Μίξας μελιχίη βαίον φόβον, ὅτι καὶ αὐτὴ

βομβήσῃ μέλισσι κορύσσεται ἐξ ἐκεντρώ.

Sic

Sic ad illum in Cyclopi antrum venisti, o Douza; Ulysses ergo si sapias imitare, & istum Polyphemum jucundissimo sermone *οἰνωμένον καθίζε*. Sua enim cuique voluptas est, & ego scio *τὴν μυσικὴν οἶνον μάλλον μεθύσκειν*. Quod si tu mihi, sodes, de tuis beatioribus terris, quae volo, narraveris, facies enimvero mihi jucundissimum acroama, & ego non jam cum Catullo nasus, aut cum Argo oculus, sed cum aliquo ex Persarum principibus auris esse volam. Quod vero palmarium erit & *ἀξιοθελιάμευον*, Sarmatam hunc vides, quem non aliter vinces, nisi Syrenum cantu, aut illo Baccho, non missurus certe sum, nisi cruoris plenus. Quare ut quaedam gens, referente Seneca, nubibus, quae grandinem ferebant, sanguine litabat, quem acuto graphio digito expunxerat; Sic tu fulmen istud irarum, aliquo sermone *ἀπορρήτω* places, simulque praesens periculum evita. Expalluerat meus Douza; sed tamen ut Martiam prolem agnosceres, iram non metum pallore condiderat, & ad me. Mira tua sedulitas est, mi Bircovi, & vereor ne inepta sit; at vero quam suavis & vafer es, cum te Sarmatam esse crepas; *ὅσα ἐστὶ ἐν σὶ Σαρμάτης, ὅσα ἐστὶ*, aut si est, ut Philippus pervicaciae, quam ex Macedonibus hauserat, astus Graecienfes cum magno malo Graeciae miscuerat: sic & tu *ἀδιατρεψίαν* istam callide & male cum Itala comitate miscuisti. Quid enim sunt tuae preces? nisi *πειθανάγκαι*, quid minae? nisi *ἀπειλαὶ μεμιγμέναι δέησιν*; Erubui ad hanc vocem, mi Lipsi, plenam nescio cuius dulcedinis; & quis ille est tam sui contemptor, qui non etiam affectet talem laudem, factusque animosior & plenissimus bonae spei, tanquam futurus voti mei compos, sic coepi. Italorum quidem nondum provinciam vidimus; & si aliquando dabitur illam videre, sequar *Lipsii* tui praeceptum, & faecem istam Gottorum, & Longobardorum, Simiarum & Vulpecularum in homines *μεταμορφῶσιν* fugiam; nonne audis principem vatum verissime praecinentem.

Ἐχθρὸς γάρ μοι κείνῳ ὁμῶς Ἄϊδαο πύλησιν

Ὅς χ' ἔτερον μὲν κείθει ἐνὶ φρεσὶν, ἄλλο ἢ β' ἄζει.

itaque & ego *μισέω τὰς δασυκέρκας ἀλώπεκας*. At tu, quaeso, quam in me astutiam vidisti? nae tu ipse callidus & malus es, qui *καλὸν μὲν τοῦτο ὄνειδος ἐξωνείδισας*, ut illa vulpecula Aesopi corvum laudando deludere voluisti: Sed quando te mihi das, & concinnas obedientem, spero me auditurum a te, quod volo. Age sodes narra mihi istud, quod a fratre tuo scire non potui

Quantois multa meis exiret victima septs.

Victima, inquam, a qua nec Mercurius ipse abhorruisset *ἐκ τῶν λιγῶν πολυτελεσιτῶν*. Quid istud est? ait Douza. Narra mihi, inquam, cur *Lipsius*, deliciae orbis Batavi, a vobis abierit? vestrique tanquam Pelopidarum oblivisci potuerit? at quomodo Lugdunum vestrum ficcis oculis abeuntem aspexit? cur non retinuit? cur aliquo Cupidinis clavo non fixit: nec dulces oculos parentis tui vidit, cum abiret *πᾶ τὰς φρένας ἐκπεπῶσται*; Videbar Douzae orationem aliquam parare, litaque abrupit. Ut Retiarius olim in arena cantabat. Non te peto, piscem peto; Sic & tu videris, non me petere, sed *Lipsium*; me tamen petis, haec in nostros fabricata est machina muros. Sed non cae-

labo te dulcissimum omnium, quos inter Sarmatas vidi, omnem rem, quam accipe. Lugdunum nostrum aegre carere coepit Lipsio, homine post homines natos doctissimo, humanissimo, optimo. Te, Bircovi, video in illius amorem absentis, ignoti, praecipitem ruere; quid faceres, si tibi nunc sese ille daret, si liceret jucundum os, oculosque suaviari. Sed, quod scias, non solos tangit Atridas iste dolor; id est illos, quos Musae nostrae amant, etiam principibus ille, ac illis, quibus Bellona magis amica est, jucundissimus esse solet; adeo omnes illum amant, admirantur; ut nihil illi magis timendum sit, quam Nemesis, comes illa fortunae filiorum, rebus laetis statuens modum crescendo. Quanquam nec ista nimis timenda est illi viro, qui novit faelicitatis propriae cumulum modestia sua diruere; & in tanto fortunae fastigio rerum adversarum non oblivisci. Itaque ut ad meos lares veniam, quod ille a nobis discesserit, talis vir, sive talis heros, doluimus universi: Et senserat ille ante futuras nostras preces, imminentesque lacrymas viderat; quibus illum prosequeremur, aut fortasse de sententia flecteremus: itaque sine supremis osculis, sine extremo vale, tanquam rediturus, iter illud longum, ne dicam perpetuum, suscepit. Sed nos hac in re, ah nimium securi; ille in amore nostro, quo illum efflictim deperibamus, *τρυφερός*, & tanquam imparium contemptor, at

Εἰ δὲ δίκῃς ὁφθαλμοῖς, εἰς τὰ πάντα ὄρα.

Postquam de reditu illius desperavimus, varias inibamus cogitationes de divortio isto Lipsiano. Resne nostras habere nobis iussit Lipsius? Lipsius ille, quo nullus nobis magis amabatur, quo nullus nos magis amabat? O Dî, o Musae, Dicebant quidam. quod & frater meus attigit, illum patriae suae desiderium ferre non potuisse, & imparem illi igni, quem intimas perurentem medullas in mediis undis senserat Vlysses; alii; sed digito labellum, melius ista taceri possunt. Impatiens ego tantae injuriae, non me continui, quin, & tu tergiversator eris, apage te cum isto silentio tam importuno, mihi que molesto. Heus taceo, inquit *Douza*. Pone metum, inquam ego, securus sis *ἐξ αὐδαμὴν κεῖτε νόω*. Non ego Tiberius, qui tua verba caviller, aut aliquis ex Sabini inimicis Latiaris, ut molles in calamitate animos tuos ad lacrymas deducam; jungam tecum questus, parem interea tectum inter & laquearia aliquos, qui non minus turpi latebra, quam detestanda fraude sese abstrudant foraminibus, & rimis aurem admoventes. Erexi juvenis animos omnemque caliginem metus dispuli, tum ille. Dicebant alteri, Lipsium religionis studio discessionem a nobis paravisse; nec enim poterat aequo animo illius vastitatem in nostra civitate aspicere, quanquam enim non procul erat quoddam oppidum, in quo religioni palam vacare possit; nolebat tamen adeo misere & *παρεργῶς* religioni suae studere, & apertum aliquod coelum, & liberum illi quaerebat, cogitabat. Paulo ante vivebat Diis hominibusque odiosissimus ille *Diodorus*, qui aciem sui calami in ejus Politicorum quaedam capita strinxerat: hominemque interrogatione publica perculit. vidisti forte librum? Non ego, inquam, vidi: At Lipsii adversus Dialogistam? Vidi istum, & legi. Vidisti igitur simul & animum illius candidum, niveum, ingenuum, quam tela alia contem-

ptu

ptu ipso spernat, alia levi declinatione vitet: sunt & illa, quae aperto pectore excipit, & spolia verecundiae suae ultro det. Vidi, jucundissime Douza, vidi, & ut ingenue fatear, quod sentio, ardentissime pugnam illam spectabam, & ut olim Scipio pugnam Massaniissae & Asdrubalis spectans, dicere solebat, quia ἄγωσι συνενεχθεῖς πικίλοις οὐποτε ᾧδε ἡδῆναι. sic & ego, numerabamque me (ô audax meum factum) quartum inter illos qui ἀφροντίδες similia praelia viderunt ἐν τῷ 1. μικρῷ πολέμῳ, τὸ Δία δὲ τὸ Ἰδῆς καὶ τὸ Ποσειδῶνα ἐν Σαμοθρακίᾳ, τὸν Σκιπῶνα ἐκ Λιβύης, καὶ Φαβιανὸν ἐκ τῆς Σαρματίας. At nobis, mi Bircovi (excepit Douza) non nimis amoenum hoc spectaculum fuit bellicum, ex illo enim omnia

In pejus ruere ac retro sublapsa referri

Spes Lugdunensis. Quomodo obsecro? Attende si lubet. Lipsius antea Lubentiae, & Vitulae operatus, totamque vitam superiorem in amoenitate transigens, repente tanquam pestifero sydere perculsus, incipit omne, quicquid in illo fuit jucundi & laeti, perpetua anxietate exurere atque tristissimos mores induere. Cum enim in politissimo illo & doctissimo Politicorum libro, unam in Regno debere esse religionem asseveranter pronunciaffet, atque ille turpissimus Diodorus, & infantissimus eum majestatis reum impudentissimo suo rictu proclamasset, tanquam eum, qui urendos secandosque illos, qui unionem religionis turbarent, suaderet; perdolitum est vehementer Lipsio, quod se apud amplissimos Ordines traduceret, tanquam illum, qui Bataviae sacros aliquos ignes inferret. Et cum illa impurissima bellua Granvellani quoque amicitiam Lipsio objiceret, quasi apud eum δόγματα ista περὶ μόναν didicisset: & hoc illi doluit, quod ignotas virtutes, & ignota bona, nova vitia & mala homo ille sincipitis vacui appellaret. Atqui alia mens erat pacatissimo Lipsio, nec ille inter eos ponendus erat, qui vel Aculeones vel Curiones erant; & Granvellani amicitia ille semper apprime delectabatur, quae tanti erat, ut omnibus, nedum Lipsio esset expetenda. Obstupui ad istos sermones, mi Lipsi, & ut τὴν σκαφὴν, σκαφὴν dicam, cuinam religioni, remoto sipario fores in Batavia addictus, incipio quaeritare. Haerebat hic aqua Douzae, & Proteus esse volebat, nunc in has, nunc in alias partes se vertens de suo corio ludebat; Sed Orci galea praesto non erat, effugere me non potuit. Acrius ergo pudorem illius aggredior; ille cum videret me obstinatum esse velle in quaerendo, novissimè, ait, Se omnino quae religio tua fuerat nescivisse; nec quenquam scire potuisse; at postquam impatientis Diodori contumelias ferre coepisti, & scriptione illa incanduisisti, suspicari omnes coepisse, te Catholicae Romanae Ecclesiae unum esse, quod bellorum illorum gravissimorum temporibus strenue dissimulasti. Atque ut me ex illius sermone efferam, narrabat, cum te omnium oculi diligentius designarent, quomodo viveres; multaeque jam tibi aures essent, quae tuorum dictorum arbitrae fuerant; non poteras diutius tam anxiam vitam degere; nec religionem volebas amplius dissimulare; sed repetito more ex veteribus Romanis, amicitia tua omnibus hostibus Catholicae religionis interdixisti, & libris tuis, internunciis luculentissimis mentis tuae,

primo quoque tempore adhaerere te Romanae Ecclesiae, statui faelici, testatus es. Ne mentiar, mi Lipsi, gratulabar mihi de isto colloquio *Douzae*, & amabam προδωσόμενον suorum, sed nec προδοτήν odi. Cur enim oderim? Scio digniorem commiseratione quam odio esse, praesertim in causa religionis, in qua verissimum illud oraculum de Sectis Galeni esse potest, a te olim relatum; Οὕτως ἄρα δυσάποτρεπτον τὸ κακὸν εἶναι ἢ περὶ τὰς αἱρέσεις Φιλοημία καὶ δυσέκνιπτον ἐν τοῖς μάλιστα καὶ ψώρας ἀπάσης δυσπατώτερον. Ad te nunc venio, mi Lipsi. Flos unice nostri aevi, cui unice gratulor & mecum omnes boni, tui nominis studiosissimi; quod lucem istam unius Religionis, quam hactenus premebas, orbi universo extulisti, & nos amplius dubitare non es passus.

Τίς πόθεν εἰς ἀνδρῶν; ποθὶ τοὶ πόλις, ἡ δὲ πενήτης;

Quaerebamus enim, quod scias in omnibus aureolis tuis scriptis, cujusnam religionis esses, & quia poteramus facile refelli, si te nostrum, id est, Catholicum asseveranter pronuntiarem, vehementer dolebamus, & verebamus, ne quid Andria, id est eruditissima illa Leyda tua, adferret tibi mali. Sciebamus enim illic pulcherrimum orbis atque unicum Athenaeum esse, & ut cum Comico dicam, σοφῶν ψυχῶν φροντιστήριον, quod cum splendore litterarum, & amore facile te in sui admirationem & amorem rapuisset; ne aliquid de scabie illa turpissima & foedissima haereseōs tibi allineret, non mediocriter pertimescebamus. Ipsa commoratio tua inter illos, quos tu politissimos, jucundissimos, tertio quoque verbo appellabas, cujus non animum suspiciorem paulo ante perfringeret? praesertim cum sciremus & Curatores illius Academiae & Professores magna ex parte haereticos esse. Timebamus ergo, mi Lipsi, de te μὴ τῇ ῥυμῇ τῆς φορέας καθάπερ ἀπὸ χειμαρρῶς βίας κατασπρῆναι, Imo quod ille senex de Menelao olim dixit Ἐκβαρβαρῶσαι χρόνῳ ὧν ἐν βαρβάροις, idem & de te coeperamus suspicari, Οὕτως ἄρα καὶ τὰ αἰδέα φοβέει τοῖς ἐρῶσι καὶ μονοῖς ὀφθαλμοῖς μαρτυροῦσι πτεύουσιν. Eve stigio enim cum nobilem & ingenuam vocem tuam audivimus, & plane oculis ipsis te Catholicum hominem agnovimus, amoris nostro gratulabamur, quod in eum hominem ferretur, qui illo quam maximo dignus esset. Etiam, mi Lipsi, quod mirere, imo quod indignere, ausus est non ita pridem *Niegessevi* noster, epistolam tuam ad facundissimum *Bentium*, quae inter duos perire debuerat, vulgare; & Calendis ipsis Januarii, quibus solemus omnes esse laetissimi, proceribus coram Regni nostri, de tua epistolari laetitia, quam haberes, quod Catholicus esses, triumphare. Ego ipse; mi Lipsi, postquam aspexi hanc, totus prae laetitia vix apud me eram, & indentidem illa Laconum ingeminabam, κοιμαδῶν οἱ νόμοι τήμερον, & ut hominibus nostrae fidei gratificarer; iras etiam tuas flocci pendebam; *Πειρηγίαν* tu appelles licet, & hominum fidem clames, tanti apud me erat tamen illa laetitia, & amor in te, mi Lipsi. Quod vero in te lubentissimi vidimus; idem in aliis avidissime spectaremus. Satis diu hoc jam saxum volvunt, quousque tandem Afranii simulantes erunt?

Quidve petunt? quae religio? aut quae machina belli?

Πολλοὶ quidem ἐν Ἀρκαδία βαλαινφάροι. Sed medius fidius omnes fungi non su-

sumus, nec ἰσχωρήτους παῖδες βλήχῃ τε τέκνα. Eruditionem, quam pulcherrimam Orbi universo ostendunt, in illis ingenue exosculamur, quod religionem suam dissimulent, probare non possumus. Cur enim probemus? Academia vetus desiit, de omnibus nunc dubitare non licet, & ut prudentissime eruditissimus & humanissimus inter meos, *Valentinus Pontanus* solet dicere, Qui adhuc dubitat, quae nam inter istas religio optima sit, eum ego stultissimum dixerim, nec capitis fani. Tot saeculis unica illa floruit, nec florescere desinet, ante supremam illam mundi totius, quam credimus, ἐκπύρωσιν. Tot illa gentes in gremio suo fovit, aluit, ex barbaris, impiis politas, Dei fcientes fecit; tot & nunc convertit, ipsa nunquam mutabilis, numquam concussa, mediis in undis tranquilla. Illa, de qua meritissimo jure possis dicere, Ὅτι ἐστὶ ἀγαθῆς κρείττων μίας ἐλκερινέστερα, καὶ μόνα δὲ ἀρχεγονώτερα. Et quis erit adhuc, qui ejus auctoritatem defugere audeat? qui tanquam ὠδύφρον ἄνθρωπος δεσπότης servus ἀρχαλέον πρᾶγμα esse clamet illi obedire, illius majestatem revereri? Dulcissimum & honestissimum omnibus saeculis fuit mori pro Catholica religione: caeterae quam ἐυωνηταὶ sint, vel inde cognoscimus, quod eas isti profiteri erubescant. Nescio quomodo profiteantur; cum nihil illis inconstantius, mutabilius, perversiusque sit. Pari ratione affectet pictor nebulam, aut sonum, aut bullam pingere, aut Polypi, aut Chamaeleontis pellem. *Lutherus* apud eos dux fuit, qui sibi fidens regebat examen; sequuti sunt illum plurimi, & spretis purissimis illis & sanctissimis Ecclesiae principibus, belluam illam secuti sunt, mancipium ventris, impurissimum transfugam, stygmatiam facerrimum. Iste mox exolevit, successit alter, κακὸς κίερακος κακὸν ὄν impiissimus *Calvinus*, sed & istum audio jam sperni. Succedunt alii mox spernendi. Viperarum partum esse jures, mi *Lipsi*, non sectarum; quarum nulla nascitur nova, nisi ante veteri sublata, eaque sua parente. Vulgus cum istam mutationem rerum, & religionum videt, nec intelligit, quid mirum? in Boeoto aëre illud ubique nascitur, & ἀναιθησίαν quandam innatam habens, ruit magis quam sequitur istos. Vos certe miror, eruditissimi viri, qui solem istum clarissimum unius Religionis orbi, dissimulatione vestra invidetis, imo tollitis. Ostenderetis vos libere & audacter quid in religione sequendum sit, mora nulla intercederet, tot animas, quae in peculio Orcus suo numerat, caelo vindicandi. Nunc cum Dissimulatiuncula ista vestra vobis unice placet, ignorantes & inscii non prudentiae opinionem nobis debetis, sed impietatis. Ego nescio, alter ille dubitat, cujusnam religionis sitis, ego opinor Catholicos, alter Calvinianos, tertius Atheos, ille Schismaticos; surgit aliquis Labeo incorruptae libertatis, & vos omnes impios. Certeque cera dignos pronunciat, ipsissimos Epicuros, qui omnia τὰ περὶ θεῶν χλῶην θησοῦσι, καὶ γέλωτα οἱ τοὺς κόμπους καὶ τὰς λόγων ὁμορφίας μεταδιώκοντες, εἰ κενοδοξίας αὐρα ὥσπερ ἀερίφῳσι τὰς τέχνας τρεφόμενοι, οἱ δοξῆς καὶ ματαιότητος ἄθλιοι δόλοι μὴ ὄναρ ἀληθοῦς θρησκείας γυνώσκοντες δυνάμενοι.

Κρήτες αἰεὶ ψεύσται, κακὰ θήερα, πηλυπόδες νῆες.

Videt ista vulgus, vident oculi aliqui prudentiae, illud non intelligit, isti,

aut damnant inconstantiae, impietatis, haereseōs; aut fannae aliquo genere percellunt, dignissimos utraque contumelia, quia & minores itis stultissimo vulgo, dum inconstanter; & Democriti pulmones meriti; tam stulti. Neminem hīc tango apud te, mi Lipsi, nolo nimium suspicax apud eos videri: nolo mihi illorum odia comparare; sed nosti illos qui sint, quid σὸν ὄνειρον σοι. Quae vero finis istius illorum εἰρωνείας, utinam ille, qui Socratis olim fuit, ut scurrae Attici vocentur; ferendum esset istud hercle, sed vereor ne excidant, & hoc cognomine, & pro scurris, impii, athei, impurissimi aliqui haeretici appellentur. Nonne audiunt Platonem ἰσθαίροντα libere intonantem, τὸ πλαγίον, καὶ πίκιλον ἀπατηλὸν ἢ θὸς ἀγενέσταν, ὥσπερ τὸ δού, καὶ ἀπλαστον, καὶ ἀκυστῆλον, λέγων βεβλήμασι, καὶ βεβλημάτων λογῶς συναδόντων. Mea sic est sententia, mi Lipsi, simulationem dissimulationemque in aliis utcunque ferendam, at in religione nunquam, laudoque illos, qui implacabiliter excanduerunt aliquando; cum haereseōs crimine involvebantur. Video enim quid sapientissimus Rufinus scribat. *Esse quidem (inquiens) gloriosum Christi exemplo patienter injurias tolerare: at unam notam haereseōs, qui ferat, vel dissimulet, non esse Christianum.* Idem quanta potest animi contentione, clarissima exclamat voce, sanctus ille Eremita Hieronymus. *Nolo in suspitione (ajens) haereseōs quenuquam esse patientem.* Tacebit ergo aliquis, & filebit tunc, cum haereseōs postulatur? nunquam, nunquam. Irascatur malo, excandescat, fulminet etiam, quam ut per patientiae suae ἀκαίριαν, nomini illius teterrimum illud dedecus inuratur. Eloquarne, Humanissime Lipsi, quod sentio, an mihi timendi erunt illi δεκακοντωδεῖς Ἑρηνύων παιδῆς, ne in me virulentos illos calamos stringant? Sed stringant illi licet, ego cum Dissimulationem vituperio, dissimulans non ero, & quae mala venerunt, aut porro venient ex ista ἀπεροσεξία quorundam (dissimulationem volui dicere) referam apud te, nec timeo illud magni Regis μάντι κακῶν ἐπέων. *Turnebus* tuus (cum *Turnebum* dixi, amores tuos & delitias, Galliarum solem, normam virtutis, βιβλιοθηκὴν ἐμψυχον intelligo) ille inquam, vir nonne fuerat καθολικώτατος? Heu fatum illius? Indulserat quibusdam in versiculis ingenio suo, & liberius in bonos viros luserat; illico reperti sunt, qui hominem jam demortuum in suspitionem haereseōs vocarent, & non Catholicum. (ô nefas, ô mores) appellarent. Scilicet si vincerent, atque quod concupierant haberent, consultum existimabant non male suis rebus; si absentem & qui ἔδάνει eodem periculo, quo se involve-runt, immiscerent. Sed debuerant utique parciores esse in manes viri innocentissimi, nec illos laedere, qui laeserunt neminem: Jura sepulchri violato-ribus infamiam irrogant; at isti μηχανορράφοι, in quibus omnia ἐλκτὰ καὶ ἐν ὄχλῳ, qui non jam sepulchrum Herois illius, sed innocentiam vitae aggressi sunt, & turpissimum, foedissimumque stygma sanctissimae illius memoriae inurere voluerunt, qua cruce, quo patibulo, qua scrobe digni sunt?

Ζεῦ, μὴ λάθοι σὲ τὸ δ' ὅς αἰτῶ κακῶν.

Praestiterat certe quicquid illud fuit versiculorum ἡφαιστῷ βορὰν ex illis face-re, quam istis polypis istam πύρρασιν relinquere. Sed ille quidem humanitus pec-

peccavit & suo exemplo ostendit, verum esse illud Cassiodori. *Nullam potestatem esse, quae qualitatem famae suae de ore hominum possit auferre.* Nuper vero cum audivimus funestum illud, & toti orbi deplorandum edictum, in innocentissimos viros in Galliis; cum iussa est abire in exilium ipsa virtus, Religio, pietas, ut nihil honesti oculis occurrere possit, ut sceleratissimi quique in caede atque incendiis bonorum grassarentur; an non vidimus similem ἀπροσέξιαν, ne dicam Πιχαιρεκακίαν Passeratii tui: Volebat scilicet vir ille, eruditione magnus, fama celebris, δεῦρ' ἐπεσούσης ζυλῶεας, & cujus lacrymas expectabamus, hujus amarulentiam ante vidimus. Atqui, mi Passerati, si auxilium illi a te litis illius habere non poterant, κρείσων γὰρ βασιλεὺς, haberent utique vel solatium: carerent utroque, vescerere genio, ingenioque tuo ex malo alieno laetanti; non haberent utique fannas illas, quae scurras aliquos magis ex trivio decent, quam viros eruditos. Dionysio olim quaerenti a Platone, quisnam foret status Atheniensium, nihil respondisse fertur ille, at nebulas Aristophanis illi misit; cognosceret ex illis, quid de illa Repub. sentiendum esset, in qua liceret scurrae illi talia; Nos vero etiam vobis tacentibus possumus cognoscere, quid de Lutetia, ocello illo Galliarum, sentiendum sit, in qua Passeratio tantum licuit. Sed heus tu redivive Aristophanes, occident tibi isti soles aliquando, Dii boni, quam luculentam materiam dederis omnibus Eumenidum natis, Haereticis inquam illis, de te suspicandi, convivias, libellos, publica, privataque complendi, clamitandi, te vixisse haereticum, communes illis te habuisse amicos, communes inimicos. Quo enim pacto melius de aliquo, aut verius judicatur? Scite jucundissimus Theophrastus, εἰ κοινὰ τὰ πάντα φίλων, μάλιστα δὲ νομίζειν φίλος εἶναι τὸ φίλων κοινός. At quanto melius & generosius, tu, Juste Lipsi, de illis judicasti, qui cum & antea nunquam illos verbo laeseras; nunc postquam emancipasti, te ex illa crudelissima servitute, PATRES SOCIETATIS JESU, non alias Catholicae fidei cohortes, quam PRAETORIAS nominare voluisti: nunc, Passerati, & verbis illude superbis; plus apud litteratissimos viros una litterula poterit Lipsi, quam illa tua Δασυρτικά universa. Sed nec nobilissimus Isacius Casaubonus, qui jure poterit dicere postea, cum canuerit, quod olim Augustus Ἀκέσατε νέοι γέροντες, ἔ νέε γέροντες ἤκον; Isacius ille, qui cum in quodam carmine Φιλοβασιλεὺς καὶ Φιλλέρρικος esse vellet; cum liceret, non tamen irae suae amplius permittit, quam ut Φεάγκον ἰβηρίζοντα illum appellaret, qui volebat occidere, (ut ait illius verbis)

Τον καὶ ἐν ὑσμίνης νέον ἔκτορα, ἡδ' Ἀχιλλῶα

καὶ Θέμιδ' ὀδύας μελίχιον πρὸς πόλιν.

Caeteros ne quidem verbo laesit. Mirumne optimi patris degenerem filium esse, aut probi praeceptoris discipulum improbum aspicere? plena vox illae animi perditae audacis Ερρέτω Φίλ' σὺν ἐχθρῶ, at illa melior.

Πημαινεῖν ἔ' πάντας ἐπίσταμαι, ἀλλὰ κακέρχους,

καὶ σωζεῖν ἀγαθὸς ἐξ ἀχέων δύναμαι.

Sed jacta est alea inquit ille. Te, Passerati,

— ἂ κατ' ὄρη μὲν μάτερ

Ἀρτεμισισμένα τοῖσι δαμάσασα

Ὀλέσκειν, ὅς ἐπ' ἔμον λόχον ἔβας περσῶν

At redibis fortasse cito ad te, &

Qui nunc is per iter tenebricosum,

Illuc unde negant redire quenquam.

ad dias luminis oras, & ad odium istius, quod nunc amare coepisti, venies. Fal-
lorne an jam audio iras illas defervescentes, & *Passeratium* meum occinentem
cum *Stefichoro*.

Οὐκ ἐστὶ ἔτυμ' λόγος πρὸς σὺν.

Sed de illo haecenus, & nescio quo me aestus ingenii mei & calami deduxit,
ut inducerem in animum *καλαμόεσας* esse, ista certe sacra aliter non constant,
vara vero, ut est in proverbio, vrbiam sequitur. Profuerit hoc illi nescio, illud
scio, quod elegantissime *Democritus* ad *Hippocratem* scripsit, ἑλλέβορ' ὕδασι
νῆσι μὲν δοθεὶς ἐπισκοτεῖ δῖανόισιν, μεμήνοσι δ' ἡ κάρτα ὠφελεῖν εἴωθεν. Ad te redeo,
clarissime *Lipsi*, gratulorque tibi δις καὶ τρίς, quia in vero tuo vultu tandem
apparuiisti; & *Neoptolemus* esse *Sophoclis* maluisti, quam *Ulysses*.

Οὐ γὰρ δοκεῖν ἄριστος, ἀλλ' εἶναι θέλεις,

βαθεῖαν αὐλακα διὰ φρέν' καρπόμεν.

Ἀφ' ἧς τὰ κερνὰ βλαστάνει βουλευματα.

Dum finio epistolam, semel eloquar, quod diu circumrodendum esset, liben-
tissime primo quoque tempore *Josepho Scaligero*, illi viro, de quo verissime il-
lud dici potest.

Πάν' ἐπ' ἀλαθείᾳ πεπλάσμενον ἐκ Δίος ἔργος,

illi, inquam, viro gratularer, si permetteret aliquando haereticos mendacia di-
cere, qui eum assidue pingunt finguntque suum, & palam (quod illius majores
factitarunt, qui maluerunt fortunarum detrimentum aliquod pati, quam
veritatis; veri & soli *Veronenses*) ostenderet se Religionem illam sequi, quam
illa urbs cum *Petri* & *Pauli* sanguine suscepit, ex qua nunquam deerunt co-
hortes illae sanctissimorum eruditissimorumque virorum; & verum illud effa-
tum *Aristidis*, licet non de tali milite, qualem nos intelligamus. Ὅτι ἔως ἀν τὴν
χώραν αὐτὴν μὴ δυνάμνται πινὲς ἐξέδρας ἀναστῆσαι, μηδὲ κενώσαντες, οἰχέσθαι, ἀλλ' ἀ-
νάγκη ἢ μένειν ἐφ' αὐτῆς τὴν οἰκουμένην ἀμυχάνον ἐπιλίπειν ἐκείνην πληθὴ στραπωπι-
κά. Et ne mentiar avidissime istud quaerebamus in illa luculenta epistola, in
qua imaginem suorum &

Αὐτὸς ἑαυτὸν ἐν εἰκόνι χράψεν ἄριστος Ἀπελλῆς

Sed nec desperamus illum brevi nos compotes voti nostri facturum δεῖν' εὐ-
γενείας χαρμικτῆρ. In quo omine utrique definamus, tu legendo, ego scriben-
do. Vale, Elegantissime *Lipsi*, & si quid inepta sedulitate offendi, stulti-
tiae nostrae ignosce; animum, qui in te pronus, agnosce. *Cracoviae*. Calend.
Febr. Millesimo Quingentesimo Nonagesimo septimo.

Εἰς τὸν Δικαίον Λιψιάδην
 Οὐκ ἔτι θελγομένῳ ἄξεις νεότητι Δίκαιε
 Λιψιάδα, ἧ πόλεων αὐτονόμους ἀγέλας,
 Οὐκ ἔτι κοιμάσεις πολέμων βρόμον, ἔχῃ χάλαζαν
 Πετροβόλων λέξεις, ἧ Σενεκᾶ πρᾶπιδας,
 Ὡλεο γὰρ. σὲ δ' πολλὰ κατωδύραντο μαθήται
 Σαρματικοὶ, ἔξαρχοι δ' ἔξοχα Πρῶχνικιαι,
 Μυρόμενοι κάρυν' ἀρετᾶς, γλύκερον σόμα κόσμῳ
 Χρυσολύρης μέσης, ἦν εὐσεφάνων.
 Αδ. Ιωάν. Εὐμήλῳ.

EPISTOLA DCCXXXVI.

GUILIELMUS BARCLAIUS J. C.

V. Cl. J. Lipsio S. P.

Lovanium.

Multi apud me multa honorifice & saepius de te praedicarunt: at nemo haecenus liberius, & libentius, quam hic juvenis cognatus meus, cui has ad te commisi. Alii effecerunt, ut ad genii & ingenii tui notitiam, brevi, & quasi compendiaria verarum laudum tuarum via, penetrarem: hic vero ut in eam, januis patefactis, plane pleneque ingrederer, amicior & familiari magis colloquio, perfecit. Ubi autem non pauca tua in se collata beneficia mihi commemoravit, quae ego in meipsum nec opinantem collata reputo, ita fui animo affectus, ut eum hinc discedere, sine aliquo studii erga te nostri testimonio, nefas ullo vix resolvendum piaculo judicarem. Amplector eruditionem tuam, nec minus mores: illa te scriptis orbi notum atque illustrem, hi bonis omnibus amabilem utique & charum reddiderunt. Est mihi in manibus opus, cui titulum dedi, *de Regno & regali potestate adversus Monarchomachos*, id se diuturna jam servitute pressum queritur, & manu ut mittam postulat: idem faciunt & ex amicis nostris multi: sed ego tantisper differo libertatem, dum testibus fide dignis, de me deque Repub. bene meritum se ostenderit: neque enim illi in sua causa testificanti fidem habeo, nec mihimet ipsi; caeca nos saepe *Φιλαυλία*, ut scis, occaecat: qualequale est, honorificam

¹ Hic liber editus antea Londini 1609. a filio Joanne, deinde Hanoviae A. 1612. simul cum libro de potestate Papae. Vide Bailii Lexicon de Patre & filio. contra librum ultimum scripsit Belarminus tractatum de summi Pontificis potestate in rebus temporalibus; cui Filius opposuit Pietatem, sive Vindicias publicas pro Regibus ac Principibus, & privatas pro Gul. Barclajo parente. & licet suspectus esset Romanensibus, tamen postea Romam cum vocatus esset, amplissimo honorario donatus est. vide Jan. a Costa ad Decretum lib. 11. Tit. 1. p. 343. Cambdenus Epist. cxxix. dicit a Paulo v. accepisse mille aureos, & filium 300. Vertisse librum Regis Angliae contra potentiam Papae scribit Lingelshemius Bongarsio Epist. cxix. De Barclajo praeter citatos a Bailio vide Conringiana pag. 199. & 306. & 309. & nuper J. F. Fellerum in monumentis ineditis Trimestri x. pag. 539. de ejus commentario in Statium non magnifice sentit Barthius ad Stat. iv. Theb. 796.

Tom. II.

D

cam de te mentionem ante biennium jam factam continet. Est mihi cum variis ingeniis conflictandum, sed plurimum malis, eorum nempe, qui Regna in respublicas, vel, quod verius est, Monarchias in Anarchias resolvere conantur. At bonis placere, quam non displicere improbis, multo mihi satius est. Remitto ad te hunc Cognatum & cognominem meum, qui licet, ut ex ipso didici, vix ulla apud te commendatione egeat, tamen hac nostrae commendationis accessione, erit, ut spero, tibi commendatior. Mitto & hoc amoris erga te mei pignus certissimum, missurus aliquando, si Deus voluerit, multo charissimum: meum nempe gnatum unicum, literis, ut in tam tenello aetatis flexu, Graecis ac Latinis probe instructum. Vix dum excessit ex ephebis, & philosophiam serio meditatur atque velut impetu quodam in id fertur, meque importune urget, ut te docentem audiat: audiet, ut spero, speque fruetur sua. Interim Vale. Pontimussi. XIX. Cal. Majas. CIO. IO. LXXXVII.

EPISTOLA DCCXXXVII.

GUILIELMUS BARCLAIUS

J. Lipsio.

Lovanium.

OBvius mihi venit nostras ille, qui nuper in Galliam. narravit mihi pericula, quae evasit in itione, pericula certe grandia, sed evasit certe, & fortuna. In reditione, viatici jacturam passus est, praeterea nihil. Quos consulo, incutiunt mihi metum, nihil juvant. sed *alea jacta est*, ibo; *fata viam inveniant*. Dedit mihi animum secretarius Domini Praefidis, suadetque Vervinum tutius eundum. cujus sententiam, nisi quid melius audiero, sequar. Harum lator cupit se mihi comitem adjungere, cujus causa distuli profectio- nem meam in diem crastinum. videtur non alienum rationibus meis, si vestro interventu vellet Bruxellae pauculos aliquot aureos ille D. Praefidis secretarius a me recipere, reddendos Vervini a servo aliquo ejusdem D. Praefidis. Res tanti non est, ut requirat scriptionem tuam, satis est si scripserit *Rube- nius*, quod vehementer velim, tuo jussu, haud dubie, ut ille scribat, & iste negotium curabit. scripsi audacius ad te etiam in negotiolo, ut videas velle me vel aliorum beneficia proficisci ab amore tuo. quo quaecunque finita sunt sua ipsa jocunditate mihi certe quidem jocundiora. Vale. persuadeas tibi velim, annum ante inversas ducturum vices,

Quam tua sub nostro mutetur pectore cura.

Iterum Vale. Bruxellae VIII. Idus April. CIO. IO. XCVIII.

EPISTOLA DCCXXXVIII.

J. L I P S I U S

*Guilielmo Barclajo.**Lutetiam.*

Litteras tuas, mi Barclaji (talis es, atque eris) aut fero reddi, aut non reddi, magis est ut doceam, quam mirer. Quis tempora, turbas, fraudes etiam nescit? eripiuntur, aperiuntur, abjiciuntur: & fit misellis, quod ipsis hominibus solet, ubi fides non est & candor. Sed beata pax, cujus plenam lucem certamque vidimus, haec atque alia restituet, & vias has missitandi muniet diu neglectas. Equidem etsi languens, & quod sequitur, ignavus, non parcam tibi scribere, quem verbis obligavi: sed & factis velim. non sumus τ χρησολόγων, ut semel hoc dicam. Ad rem igitur: tuas ternas paene eodem tempore accepi, & una ex iis me hilararunt. Erant enim de quiete aliqua jam tua, & loco certo apud *Paullum Moracum*, quem virum, praeter ingenii & doctrinae, hoc quoque nomine amo. Amo inquam, quia te non amat solum, sed curat. Ad eum ecce scripsi. Puto & ad *Stephanum Turnebum*, qui benevole & diserte sane scripsit. De *Thuano* quid dicam? solet me amare, nec causam equidem dedi cur mutaret. Siquid audies, scribes: imo & de aliis, siqui in nos in alterutram partem insigniter affecti. Etsi in bonam, spero plures. nec odia sane provocavimus, & nosti mite illud καὶ ἥπιον ingenii nostri. Quod ad *Marcilium*, amicum habeo, & litteris notum: neque nescio tamen liberiores iudicii, & linguae esse, quod vitem ipse magis, quam damnum. Cuique sui mores. Tu, mi Barclaji, si me audis (& debes ex animo monentem) ¹ modestiam inprimis indues, imo & animi quoddam frigus, si vivere, amari, provehi vis in externa illa gente. Quae nescio quomodo exterorum fovens, & insitam hanc benignitatem habet: ideoque & cedi, & fasces submitti ab exteris, suo jure cupit. Mei omnes valent, te salutant & amant: tu me, qui nunc praeter solitum languebam, an & deficiebam? Nescio, ille videbit, qui me fecit: & idem, cum volet, diffinget. Vale. Lovanii postr. Kal. Sextil. ∞. 10. xcviii.

Exemplar Testimonii mei, quod cupiebas, hîc habes.

¹ Idem monet Lipsius in epistola eodem anno scripta Centur. III. Misc. xxxiii.

EPISTOLA DCCXXXIX.

J. L I P S I U S

*Guilielmo Barclajo S. D.**Lutetiam.*

EGo vero libens ad te scribo, & in ea loca, quae amamus. Nolo mihi imputari hanc opellam: delector ipse, cum usurpo, & praesertim cum

vos tales video sic impetu ferri ad bona & honesta. maneat illa mens, crescat illa mens, & magis magisque incalescat a concepto igne. Gaudeo augeri illic non studiosorum tantum numerum, sed & doctorum. Quorum inter apices si *Casaubonus* illic stabilis est, vere dicam eos beatos; Sed & *Janum Wouwerium* amo jam olim, & placet eum ibi esse, & quidem familiarem tuum. Modestum ingenium est; Germana probitas, ut quidem novi. De Tacito nostro, una re dolet recudi, quod sunt in eo mihi non pauca, vel addenda vel immutanda. Cur Typographi non significant? vendibilior liber, & addo, utilior esset. Sed vos supplete. parum est, ego an alius moneat, si moneantur. *Josiam Mercerum* novi & os vidi in Batavis, & semper amavi. Saluta, saluta, una ¹ *Franc. Doufam*, amatum mihi inter omnes *Doufas*. unum excipio, qui utinam nunc esset! *Franciscum Pythaeum* bis amo. nam & ipse meretur, & a fratre aliquid in eum derivo, etsi externa hereditas ad liberos ivit. Sed ipse hanc affectus in parte cernat, imo ex asse, si volet. Mei te amant, & salvere jubent, ipsi brevi scripturi. *Gospaeano* nostro feliciter acclamamus & sophos. nam hinc audimus eum propitiis Venere & Gratia docere. Saluta, & redamare certo nuncia. Plura non possum, etsi libet: tabellarius abit, & heri vesperi demum tuas accepi. Lovanii, Nonis Octob. ∞. 10. xcviii.

1 Vide supra Epist. ccxxxiv.

EPISTOLA DCCXL.

J. L I P S I U S

Guilielmo Barclajo S. D.

Lutetiam.

Qui has dabit, filius Praefidis *Brullarii* est, egregii & amplissimi viri, nec indigna eo proles. Is cras abit, nec nunc inter vota & sacra satis vacat ad omnia distincte & κατὰ μέρος respondere. Gaudeo tamen, quia tibi bene satis & honeste est: ac voces ad nos etiam manant crescentis ibi tuae famae. Sit ita longum, imo magis magisque surgas; sed ita, ut eruditio tecum & virtus. Solida si spectes, superstrues famam firmam & subsidere metuentem. De Tacito nostro coepto excudi, iterum dico, vellem praescissem. Sed nunc numero quid mittam? Pergant cum bono Deo, si coeperunt: & haec tamen pauca, seorsim quae scripsi, tu videbis, & (nisi serum sit) intexes & rescribes. Statium etiam te docere, gratum est: alti & sublimis ingenii poetam, si quisquam fuit. Est apud me *Silvarum* liber manu descriptus, nec nimis tamen vetus. In eo lego, ubi est vulgatum: Equo Domitiani,

Qui fessus bellis assertae munere prolis,

Lego, inquam, *adscitae munere prolis*: & vox ea magis apta ad Adoptionem. Ibidem,

— *hinc Julia templa tuentur,*

Ha-

Habet is codex; *Julia testa*. quod rectum cenfeo, & *Basilicam Juliam* capiendum. Alias, duo haec templa Julia turbant. & mihi id factum in *Admirandis*. Ibidem

Aurea captivi crinem tegit ungula Rheni.

Credam aptius, *terit ungula*, ut habitum equi magis repraesentet, sublato pede quasi stringentis & adhaerentis caput Rheni. In Epithalamio Stellae

— *Et olenti spargere thymbra:*

bonum est, nec improbum quod in scripto, *spargere nimbo*. Jaculationes illas florum, fortasse & odorati imbris intellegit: quae, bona metaphora, sunt *Nimbi*. In Calendis Decembribus:

— *Jam bellaria adorea pluebant.*

Intellego, nec damno. quid tamen ita scriptus,

Jam velaria linea pluebant?

An ad vela amphitheatri sive theatri respectum, & quasi ex illis iste nimbus, an pluvia! Scripsi de iis in Amphitheatro. Ibidem

Molles Cajoli Lagunculique.

In scripto, *Lagunculique*. certum, *Lucunculique*. In Lacrymis Etrusci:

— *Et immitem potuit Phryga flectere supplex.*

Vetus *potuit Styga*. Sermo de Orpheo est, & notum Platonem ab eo exoratum in sua Eurydice. Ad Claudiam uxorem:

— *ter me vidisti Albana ferentem*

Dona comes sanctoque indutum Caesaris auro.

Vetus: *ter me nitidas Albana ferentem, dona comas*. Serta intelligit: nec ipsa uxor in Palladio certamine, opinor, ei comes. Sed avocor. vale: tecum Gosspeanus, quem amo, & gaudeo ad Hellenica se dare. a tuo juniore Barclajo nihil ego litterarum, videat cui datae. Lovanii Post. Kal. Novemb. ∞. 10. xcviii.

Alias ad *P. Moraeum* nostrum, nunc animo salutatum.

Hanc ex Autographo descriptam nuper edidit Jo. Mathias Gesnerus Duci Saxoniae Weimariensi a bibliotheca, in gratulatione ad Serenissimum Principem ac Dominum suum, quod natalem LXII. attigerit pag. 75. sed in quibusdam aberrasse virum doctum deprehendet lector, qui utramque epistolam conferet: edidit idem vir doctus alteram *Lipsii* epistolam ad *P. Wanerium* cognatum suum, quem ego plane ignoro, & nisi autographum *Lipsii* viderim, vix credam illam epistolam a *Lipso* exaratam: ita tota dictio a *Lipsii* scribendi consuetudine abhorrere videtur: argumentum etiam nescio quem alium auctorem fuisse indicat. judicent, qui possunt.

EPISTOLA DCCXLI.

J. L I P S I U S

Guilielmo Barclajo S. D.

Lutetiam.

Mirum est de tuis epistolis scriptis, & non redditis: certe ego, ubi ubi culpa, nullas a tribus mensibus accepi. At de te & cogitatio, & sermo tamen fuit. Quid si etiam brevi videamus? sed delibero an euntes in Ita-

D 3

liam,

liam, an ex ea redeunt. Tu in itu malles; & de reditu, quod nollem, pae-
ne desperas. Quis Phoebus tibi mentem movet? falsus, ut spero, & mei ac
patria me habebunt. Confide Genio & fato nostro, quod fraudes istas aut
scelera occulta vincet. Si tamen aliter, fiat quod futurum est: & ubicumque,
sine querela aut renifu cadam. Nonne & hîc mortalis sum? nonne satis etiam
naturae & famae, non dicam gloriae, vixi? Vixi, vixi, veni mea Parca quan-
do voles, & volentem ad meliora atque aeterna illa loca abduce. Sed ante
tamen, non nego, videre Galliam vestram gestio: vota igitur mecum inter-
pone ut fiat, & laetus ac libens libentes ibi amicos amplectar. Sed ut nunc
puto, in reditu & rationibus meis magis sic conducet. De Epistolis meis
edendis, o nefas! o Galli, non Galli, si permittitis! Ego publice damnabo,
ego ad Regem voce aut scripto accedam, si opus. Vides me indignari,
quidni in re tam indigna? Vale, & manibus pedibusque resiste & interpella.
Antverpiae, Kal: Jun: ∞. 10. xcix.

E P I S T O L A DCCXLII.

S C I P I O G E N T I L I S

Cl. V. J. Lipsio S. D.

Lovanium.

N Unquam antehac ad te scripsi; deterritus & verecundia quadam mea sub-
rustica, & aspectu magnitudinis tuae. Nam haec res, quae alios allie-
cere ad scribendum solet, me (ut dixi) deterruit ac revocavit semper. longis-
sime etiam ab eorum ambitione remoti sumus, qui se digito coelum putant
attingere, si, cum ad magnum aliquem virum nulla saepe ratione scripserint,
ab eo literarum aliquid sibi rescriptarum ostentare possint. Te & tua scripta
sane credas quenquam pluris fecisse ac facere, quam Scipionem Gentilem, glo-
riari quoque soleo, me unum de auditoribus tuis fuisse: quo tempore non
magis auditorium, quam domus mihi tua patuisset, si uti voluisssem. nec ta-
men vel colloquiorum tuorum vel humanitatis plane expers Lugduno discessi.
Postea nunquam tecum, perpetuo cum libris tuis fui. At tu me, quod ru-
borem mihi fere incussit, & Francofurto olim per popularem tuum humanis-
sime salutavisti, & nuper literis ad collegam meum datis eodem (sic accipio)
honore impertivisti, & quidem manu tua, cum essent caetera aliena scripta.
Veterem amicum appellavisti. ergo ego jam non verecundus & rusticus, sed
lapis aut caudex sim, nisi scripsero. Tacuisssem tamen & hoc tempore, nisi
Joachimus Camerarius his ipsis diebus ad me misisset Disputationes politicas
Scipionis Ammirati, sermone Italo scriptos in Cornelium tuum. qui etsi men-
tionem tui, quod sciam, nullam facit, tamen legi vel audiri Taciti nomen
non potest, quin tuum quoque simul (ut ita dicam) legatur & audiatur. &
quod in praefatione scribit (vidisse enim te arbitror) ea praecipue causa mo-
tum se, ut hunc authorem eligeret, quod in omnium jam manibus versaretur,

tur, id ad te unum pertinet, qui ut versaretur, effecisti. Nam ante te quis Tacitum legebat? non certe populus. De hoc igitur Politico immensum est, quam cupiam iudicium tuum intelligere. & num hunc innuere volueris in praefatione ad Tacitum tua. Nam *Annibal* quidem ille (siquid iudicii mei est) nihil ad hunc *Scipionem*. quanquam illum vix inspexi. nec operae erat. Hic mihi non multum nugari videtur aut ludere, nisi forte offendit prolixitas, quam tu commune vitium hujus aevi alicubi vocas, ego magis civitatis Florentinae. ne meum etiam videri possit, finem faciam. Bene vale, & si nos, id est literarum amantes omnes, valere vis, quamplurima scribe, remque Romanam, ut instituisti, illustra. Altorphii Kal. Maji. 1597. Hic, qui has literas ad te, ut opinor, perferet; adolescens est Norimbergensis VII viri filius honestissima familia natus. Gratissimum mihi feceris, vehementerque ad honorem meum pertinere putabo, si intelligat ex te me abs te diligere.

EPISTOLA DCCXLIII.

J. L I P S I U S

*Petro du Fardin S. D.**Athum.*

Consuetudo mihi tecum etsi non intercessit, tamen cum iis, in quorum locum successisti, & laudabiliter nunc tenes. Schola vestra Athenis alumnus me habuit, & salutari doctrinae succo puerum aut adolescentulum me pavit. Itaque jure faveo, & quanquam *Petrus Torrentius*, *Joannes Festuca*, veteres mei Professores obierunt, tamen manet affectus & inclinatio in successores. Atque in te jure, quem communi testimonio feliciter & utiliter regere audimus hanc juventutem. Deus porro prosperet, & animum viresque det perseverandi, & hac tam minima parte Ecclesiam & Rempub. juvandi. Ego toto animo juvo, & incrementa (si possum) procurem; uti nunc civis quidem noster filium eo cum matre mittit, quem ut commendatum a me habeas, amanter rogo, & me quoque utere, si quid commodum aut utile tibi a Lipsio esse potest. Lovanii VI. Kal. Junias CIOIOXCVII.

EPISTOLA DCCXLIV.

J. L I P S I U S

Nicolao Micaultio S. D.

Memorem te mei, sed & promissi tui, litterae loquuntur: quas legi equidem libens, & maxime ea parte, quae de reditu Praefecti maritimi Aragoniae (Graeci *Amir-balium* vocarunt, composita ex Arabico & Graeco voce) quae de ejus, inquam, reditu narrabat. Bono Deo venerit, bona attulerit, uti spero. Si rumoribus hinc nostris (scis officinam fabellarum esse) credas;

das; regna & nuptias affert. quae tamen non solum nostri hîc forenses & subrostrani jactitant, sed litterae ex Italia identidem confirmant. nolim haec temere de Principum rebus consiliisque spargi: sed quid agas? *Gazettae* Italorum haec non in aurem, sed palam & ubique gentium divulgant. Fiat, fiat, & vota nostra consonant, & ipsius merita: quae crescent in dies, ita virtus & prudentia ejus pollicetur. Ambianum sunt qui premi aut periclitari velint, sunt qui rident conatus hostium: & falli possum, sed inter hos sum ego. Rideo, inquam, si serio visum nostris subvenire: si pax non distinet, aut dissipat, de qua ipsa litterae sunt & sermones. Credere me iis dicam? mentiar, optarim veraces fortasse esse: sed magis optarim concordiam cum Batavis, & reliquum limitem liberum, augendo nostro Regi. Sed vota sunt: illi obdurant, nec nisi metu, minis, ferro, fortasse flectentur. Plura a te, cum redieris. nec enim ita clausa Aula est, ut non aliquid emanet: etsi probo mehercules clausam ab isto Prorege esse. Paucos in vulgus sermones de publicis esse, decorum est, & expedit: & aliarum, suarumque rerum, plebs esto. *Vanden Brandium* Consiliarium de silentio meo queri, gratum est: ergo amat, ergo desiderat. & quò magis, ego astu, ut fastuosae amicae, paullisper torquabo. Sed extra jocum, amo & scripturio, sed quod argumentum est? faciam tamen brevi, nunc salutem ipsi, & *Boisotto* optimo & tranquillissimo seni mitto. Sed ante omnes; adfini tuo Audientiaro, qui me inter beneficia habet, & *Praefecto Lingensi*, itemque *Canonico* fratribus. Salve & tu, mi amice Micaulti: Lovanii, cum ad sollennia mea, id est lectionem irem. VII. Kal. Julias. ∞. 15. XCVII.

Haec epistola ad *Micaultium* scripta paullo ante ejus iter Italicum, quod mense Augusto suscepisse docet Epistola *Lipsii* ad Italos LVIII. qua eum *Sacco* commendat, & genus & dotes ejus laudat. vide & sup. ad Epist. DCXXI.

EPISTOLA DCCXLV.

J. L I P S I U S

*Nic. Micaultio S. D.**Romam.*

INfelicem istam sortem, quae nec nunc litteras meas passa ad vos venire! Atqui iterato scripseram ad Illustrissimum illum, ut debebam, & ad te, ac misi per fratrem tuum Audientiarium, uti monebas. Misi & Antverpiensi via, quo securior res esset. Litterae illae datae erant VI. Kal. April: & interea tertias quoque misi, in quibus ad Illustrissimum *Columnam* item adjunctae. Ita tres jam ad nostrum Illustrissimum dedi; & in secundo fasciculo erant ad Illustrissimum *Baronium*, in tuam gratiam scriptae. Puto jam certe acceperis, & videbis nec amore nec scriptione ab eo victum. *Bersaeus* sive *Monmorantius* ad nos nondum appulerat: atque ita litteras Illustrissimi *Baronii* nondum vidi. Mitto tamen hîc juncta exemplaria iterum, si forte priores periissent. Itinerarium vestrum accepi. & o Principis illius benignitatem, & vestram

I Vid. sup. Ep. DCXXI.

stram item diligentiam! ego vero huic amorī respondebo, & quanquam multi (& praesertim Aula vel Schola nostra) dissuadcant, vano emanfionis metu: tamen veniam, & Principibus illis viris me sistam, jucundius vel victurus, vel etiam moriturus post hunc aspectum. Ex animo loquor & scribo. Quod ad monita vestra in Itinerario, pleraque omnia probō, & servabo. De pecunia autem transcribenda, mihi commodius videbatur in duas tantum partes dividi: & unam Antverpiae accipi, alteram Mediolani. Causa est, quia non possum (puto tamen quod via Germanica, sed puto.) firmiter decernere, qua via ad fines Italiae sim venturus: quia vel bellum & periculum, vel contagio & pestis in aliquo loco, possunt decreta nostra subito immutare. Itaque meo iudicio Antverpiae pecuniam si habeam, ego ipse subito in itinere jubebo eam Francofurtum vel Lutetiam (uti res erit) transcribi. Nam Lutetiam quod nomino, multi Gallicanum iter suadent, ut tutius & hospitiiis melius: & amici ibi valde me, ad transeundum saltem, invitant. Sed videbo, & D. Protonotarii etiam (si adhuc ibi) consilium audire velim, cui hac in re merito acquiescam. Haec ita minuta ad Principem non scribo, per te magis decore dicenda & curanda. Velim autem ut in tempore literas permutacionis sine cambii accipiam, quia tempus statim labitur, & ego me ad iter dabo (cum bono Deo) initio ipso mensis Septembris. Comites aliquot jam habemus honestos & idoneos; De *Richardotis* pater rem totam mei iudicii & sententiae fecit, quam nondum tamen tuli ob causas. Via nobis otiosa non erit, & Itinerarium struam, cui aliquid inaedificabo, quod & posteri legant ac spectent. Ex ipso itinere identidem ad Illustrissimum nostrum scribam, & de via reddam certiore. Itaque de lectica aut essedo ad Apennini transitus in tempore licebit videre. *Desboyfio* salutem & gratiam dicito, pro opera navata. Ad *Saccum* scribam jamnunc: & omnino Comestabilem videbo, qui mihi scripsit a Rege (nisi quid interea mutatum) in sua praefectura se confirmatum: quod non dolet, ut inquit, mei illic videndi causa. Vale, mi Micaulti, & quamprimum significa, quid mearum acceperis. Lovanii, Pridie Idus Majas. ∞. 10. XCIX.

EPISTOLA DCCXLVI.

MATTHAEUS RADERUS

V. Cl. J. Lipsio S. P. D.

Lovanium.

IGnosce, Lipsi doctissime, quod Davus ad Oedipum. Mihi sane verecundiae fuisset ad te scribere, nisi me *Andreae Schotti* nostri litterae impulissent, ut auderem, quod equidem optabam semper, sed retinebat pudor, ne per ambitionem affectare tuam amicitiam viderer. Nunc ejusmodi res est, ut nemo sanus, ubi causam cognoverit, factum meum jure possit reprehendere. Institui, voluntate majorum meorum, commentari aliquid ad Martialis

Tom. II.

E

lis

lis epigrammata, quod in usum sit gymnasiorum nostrorum, ea ratione, ut obscaenis detractis, nec meis vel alienis repositis (quod in epigrammatario facillimum est, cum epigramma non pendeat ab epigrammate) purus putus Martialis praelegatur: illud ne juventutis honestas violetur aut offendatur; nam:

Παῖδ' ἔτ' ἐόντα χρεὼν δὴ καλὰ διδασκέμεν ἔργα.

Hoc, ne vel nostra pro alienis venditemus, vel parum feliciter ingenio poetæ respondeamus, frigent enim plerunque aliena sensa, praesertim distorta a mente & sententia ipsius auctoris. Probavit nuper has cogitationes meas *Andreas Schottus* cum hac iter Antverpiam haberet, & hortatus est vehementer: ut susceptam curam urgerem, ad eamque rem, ex itinere, indicem copiosissimum in Martialem a *Josepho Langio* concinnatum, & Argentinae editum ad me transmisit, simulque per litteras docuit se Lovanii ex te cognovisse, collecta tibi quaedam & conscripta in eundem poetam, foreque, si peterem abs te, uti impetrarem. Quod ego, nisi ex aliorum sermone, qui te familiariter noverunt, spem concepissem, & vero tuam ipsius singularem & humanitatem & animi liberalitatem, scriptis tuis omnibus velut imaginem impressam, cognovissem, petere non tentassem. Quare ignosce, mi Lipsi, si, quod jam orbis terrarum facit, ego quoque faciam, & ad commune Musarum oraculum properem, atque consilium inde auxiliumque petam. Collegi jam haud pauca partim ex criticis tuis, partim aliis aeternis curis, quas in litteras misisti. Sed si quid repositum, quod nondum prodiit, habes, quaeso te, per communia Musarum sacra spemque publicam juventutis, communica nobiscum. Ad des commentario nostro singulare ornamentum, & efficies, ut vel hoc uno nomine liber omnibus gratior optatiorque exeat, ubi testimonio publico nostro constiterit, nos abs te plurimum adjutos esse. Vale. *Pontanus* noster, Collega meus, & tuorum laborum aeternus admirator, te plurimum salvere jubet. Augusta Vindelicorum e Collegio Societ. Jesu. 6. Cal. Augusti. M. DC. XCVII.

Respondet *Lipsius*. Centur. III. Misc. Epist. 30. & *Raderus* ex ineditis *Lipsii* epistolis fragmentum profert in judiciis doctorum virorum, quo eum *Lipsius* hortatur, ut properet editionem. profert & ex *Scaligeri* Epist. 159. ad *Velserum* elogium commentarii sui. sed vellem & horum virorum iudicia exhibuisset de castratione Poetae, (quem qui integrum nolit legere vel edere, elegantius faceret, si plane abstineret) quae legi possunt in *Lipsii* Satyra Menippea. pag. 640. & in *Scaligeri* Epist. 245. & 246. quibus adde epigrammata a *Crenio* producta Animad. Philol. tom. III. pag. 18. adde quod ostendere ipsis rebus liceret, edita a *Radero* & exposita esse epigrammata multo liberiora & obscaeniora illis, quae reseculit. Utilem vero ejus commentarium & doctum fatemur, & nihil impedit, quo minus *Barthii* iudicio, quod promit ad Stat. VI. Theb. 6. subscribamus. vid. *Claver*, ad Pers. Sat. IV. p. 188. & *Lingelsh.* Epist. in Actis Literar. *Struvii* Fasc. VI. p. 10.

EPISTOLA DCCXLVII.

J. L I P S I U S

*Philippo Ayalae, Curatori Aerari Regii.**Bruxellam.*

LEgi scriptum ¹fratris tui super pace; quam animo optat, re non sperat, eoque dissuadet. Volebas iudicium meum, breviter dabo. Scriptum vestrum probum prudensque est, bene dispositum & argumentis rationibusque satis firmum. Non tamen ea accuratatione aut fine scriptum (facile hoc video) ut edatur: & publica illa ejus scripta longe antecellunt. Enimvero principibus viris ostendi, non abs re sit: & peccatum in hac re semel iterumque censeo, cum pacem obtulimus, imo paene petiimus, quo fructu, nisi amissae aut certe labefactatae authoritatis. Atqui id fulcrum & basis est, cui magnitudo haec rerum est innixa: & frater tuus eam partem pulchre tractat. Ego vero nec a pace, nec a mentione ejus abhorreo: sed tunc denique cum maturitas erit, & spes probabilis aliquid conficiendi. Quae nunc ubi est? hostes in rebus laetis, & (ut ipsi putant) tutis agunt: quibus pacem ostendere, quid est nisi revelare metum? Vim & terrorem infer, & tum de pace denique confer: fortasse frangi sic pertinacia possit, & sanitas inferi ac modestia diu amissa. Sed haec alias, & cum iterum tempestivum erit: nunc adolescentem hunc Scotum genere, sed olim ex mea disciplina, commendatum tibi velim, ut consilio vel auctoritate juves, auxilio omnino dignum. Ingenium & doctrinam suae aetatis habet. Nobilis & Clarissime Domine vale, & serio atque in animo tuum esse me cense. Lovanii, III. Non. ∞. 15. xcvii.

¹ *Balthasaris Ayalae*, qui scripsit de jure, officiis bellicis & militari disciplina. vide Valer. Andr. Bibl. Belg. & Sweertii Athen. Belg. hic vero liber de pace non exiit.

EPISTOLA DCCXLVIII.

J O A N N E S M E U R S I U S

*J. Lipsio V. Cl.**Lovanium.*

QUae humanitas tua est, Vir magne, amorque erga literas eorumque studiosos, non aegre feres scriptionem hanc ab adolescente tui nominis amantissimo observantissimoque profectam. Amo enim venerorque jure viros magnos & ab eruditione claros; tu, spero, immo vero confido, non spernes hunc animum. Testandae itaque observantiae fructus studiorum meorum puerilium & παιδικὰ ἀθύματα mitto ad te, quae si grata fuisse intellexero, pretii abunde retulisse me judicabo. Velim autem (si inspicere modo has

E 2

nu-

² Respondet ad hanc, sed brevissime, Lipsius Ep. cxiv. inter Gudianas pag. 197.

nugas libebit) severe corrigas, atque id etiam a te peto. In proximis nundinas Auctarium dabimus, in quo retractationes aliquot emendationum, quae post editionem relegenti displicuerunt; siquidem, ut ajebat Crates, ἀδύνατον ἀδιάπτωτον εἶπεν. Dabimus & ad Macrobiū Curas Secundas, forte etiam Catonem de Re Rustica. In Augustino de Civitate Dei si quid item juvare potes, rogo ut facias. Vale, vir magne, & redamare me nominis tui amantissimum observantissimumque ne dedignere. Lugd. Bat. Prid. Kal. April: anno c15. 15. xcviii.

Hoc paene imprudens praeterieram. De² Germanico quid censes? versionemne istam Arateam & commentarium esse unius auctoris? non credo; nec mihi videtur: & ut illam Germanico libens assignarim, hunc tamen ut assignem non facile inducar. Testis mihi ecce insignitus unus ille locus in Prognosticis, ubi de Luna. *Eadem Luna, eadem Diana, eadem Proserpina vocatur. id est, coelestis, terrestris, & infernalis. De qua quidam.*

Denique cum Luna est, sublustri splendet amictu,

Cum succincta jacet calamis, Latonia Virgo.

Atqui versus isti Prudentii sunt e libro primo adversus Symmachum, quomodo itaque potuit citare Germanicus aetate tanto superior? Judica, vir clarissime, & rescribere dignator; meruit certe id, audenter dicam, mea in te observantia, quam non aspernabere, si te novi.

² Barthius id credidit lib. x. Adv. 21. & XLVII. 18. sed idem tamen suspicatur, forte *Fulgentium* esse auctorem commentarii. multa enim in *Fulgentio* ad verbum eadem reperiuntur: vide *Munckeri* Dissertat. de Hygino, qui ostendit Christianum fuisse.

EPISTOLA DCCXLIX.

J. O. A. N. N. E. S. M. E. U. R. S. I. U. S.

V. C. J. Lipsio. S. D.

Lovanium.

Literas tuas hodie accepi, vir maxime. Ego vero etsi vehementer te antea cum veneratione quadam mentis tacita amaverim, nunc tamen multo magis idipsum facio, cum dignum me habueris, cui responderes. Et animum profecto addidisti, quem detrahunt nimis, qui ea sectanda clamitant, quae ad farinas; & ab elegantioribus his litterarum studiis omnibus modis absterrent, certe conantur. Vix credas quam tardarit haec res impetum ingenioli mei, qui tamen regliscit paullulum, & vires resumit refocillatus tuo sole. utinam, utinam per tempora haec turbida, & patriae statum, complecti te liceret, & loquentis ab ore pendere, arrectisque auribus Musicum illud nectar haurire. Plane existimarem me quovis Crasso beatiorem. Vale, litterarum columnen, & me, quod facis; amare perge. Dom. Scaliger vicissim te salutatur, quem scito strenuum laudum tuarum praeconem. Lugd. Batav. Matralibus. 15. 15. xcviii. Deserto S. Theologiae studio, Juri me applicui: magis hoc

ar-

arridet, & Genio meo longe convenientius. Nec tamen ideo committam, spero, quin AETERNITATEM COGITANS Deum meum & pietatem constanter colam. Hoc volebam nescius ne esses. Iterum vale.

EPISTOLA DCCL.

JOANNES MEURSIUS

V. Cl. J. Lipsio S. D.

Lovanium:

CUM *Anskema* tuus, V. Cl. jam etiam meus, iter ad vos repeteret, & aliquid quoque a me peteret, nefas existimaui non parere homini amico, & in re tam mihi grata, & tibi debita. Vera enim voce: tantum est tuum in omnes litteratos, & literarum studiosos meritum, ut qui non, quicquid possint, id totum tibi semper debere se profiteantur, merito maximae ingratitudinis apud tribunal illud Gratiarum accusentur. Tu fortasse, quae est animi tui modestia, non agnosces; interim verum hoc esse nulli non constat. Atque utinam sane permutare saltem inter nos literas libere possemus, quando sermonibus frui non licet. quam vellem! & tu, confido, non nölles. o tempora, quando videbimus! *Jupiter, ut bellorum omne genus pereat!* Audi votum Deus, & fluctus hos patriae plusquam decumanos semel tranquilla: solus tu potes. Quid superest! praeter preces, & patientiam, nihil: & hae, spero, impetrabunt tandem, quod peccata nostra cogunt negare. Tu V. Cl. Vale, & me ama, ego te aetatem. De studiis quaeris aliquid? *De Gloria* nuper edidi, discipulorum causa; puto vidisse. Nunc poemata quoque: si tantum erunt, aut si placere posse animum induxero, mittam per occasionem, quae utinam mihi semper ex voto. Si illud *De Gloria* vidisti, quaeso iudicium: quo polles, & quod mihi supra omnia. Iterum Vale. viii. Kal. Junias. Hagae Comitum. clc. lcc. ii.

EPISTOLA DCCLI.

NICOLAUS RHEDIGER A STRISA

J. Lipsio.

Lovanium:

NOBILISSEME & CLARISSEME Vir. Prospere & pene supra votum mihi cecidit: praecipitata illa & iners ad *Monavium* de te scriptiuncula. Ego te quidem, Lipsi, a primis pene vitae ac studiorum incunabulis singulari quadam veneratione sum prosecutus. Amare quoque coepi non ita nuper. Illud publico tuo in rem literariam merito: hoc in me & meos privato & quasi domestico. Publicas tui colendi causas non recenseo. Hae enim mihi cum omnibus, qui literas amant vel tractant communes. Amandi duas has habui, amorem

primum illum tuum singularem in *Thomam Rhedigerum* agnatum meum: deinde etiam in meipsum; quorum illum publicis literarum monumentis consecrasti, hunc privatis ad Ill. *Dudithium* & nobiliss. *Monavium* scriptionibus non semel es contestatus. Cui quidem tuae in me affectioni ego pari semper animi cultu ac propensione respondi. Sed respondi tacite & ex dissimulato, neque sperare unquam vel potui, vel etiam debui, ut ex hoc quasi pusillo amoris semine solida haec & firma inter nos amicitiae stirps nasceretur. Nam cum ita existimarem interiorum magnorum atque illustrium virorum amicitiam non nisi a magnis expetendam, satis mecum feliciter agi putabam, si mihi quasi in vestibulo amicitiae tuae consistere, & communi illo tuo & vulgari in eos, qui te atque literas venerantur affectu frui liceret. Neque alia sane mente ego nuper ad *Monavium* de te scripsi, cum ille mihi salutem tuis verbis nunciavit, quam ut ostenderem tuum hunc in me affectum a me maximi fieri, & *Monavium* quasi testem mutuae meae erga te voluntatis atque observantiae advocarem. Verum tu, vir summe atque clarissime, nimis ambitiosus verecundiae meae interpretis hoc ita accipis, quasi ego te ad arctiorem inter nos amicitiae societatem contrahendam provocem, scriptisque ad me humanissimis literis non modo comiter ac prolixè te mihi offers, sed etiam causas, quae te ad me amandum impellant, commemoras. Ego vero, mi Lipsi, hoc tam benignae atque innoxiae interpretationis jus non modo libenter tibi in mentem meam concedo: verum etiam mirifice laetor me aliud agentem hoc consecutum, quod a summo studio dataque opera sperare vix potuissem. Nam etsi non ignoro, quam sit tua humanitas omnibus prona atque obvia, minimeque fastidiosa: tamen nunquam putavi futurum, ut tu me pene ante diligeres, quam deligeres, & cum maximorum hominum amicitias tu unus omnium maxime floreas atque adeo abundes, te in humilem istam & multis nominibus imparem amoris societatem atque conjunctionem dmitteres. Tu omnium mortalium aequorum & iniquorum iudicio inter summos maximus; & in quo natura ostendit, quousque progredi doctrina ac sapientia humana possit. In me, si literarum studium olim majori a me diligentia, quam successu cultum, nunc vero aliarum occupationum injuria an beneficio pene abjectum excipias, nihil est, quod magnopere probes aut commendes. Verum facile, qui amant, sibi amoris causas fingunt, & admittunt inter quosdam ad amicitiam, non quod ea digni sint, sed ut sint. Sive autem hac, sive alia mente me immerentem in amicorum tuorum numerum recipis; ego & errore & iudicio tuo pariter delector, & augustum illud amicitiae tuae sacrarium, quod mihi tam benigne aperis, lubens ingredior. Tu, quo me loco colloces, pro prudentia tua videris. Ego sane quemcunque nactus fuero, omni studio enitar, ut si alia re non possim, saltem augusta & sancta clarissimi nominis tui veneratione & gratiae pro hoc tam prono, & prolixo in me affectu referendis cupiditate ac promptitudine tibi satisfaciam. Literae meae cujus generis sint, vides. Si tamen his legendis aliquando vacare libuerit, faciam ut maiorem voluntatis tuae, quam pudoris mei rationem a me haberi intelligas. Publica e *Monavio* nostro, quem nihil

pene

pene rerum publicarum fugit, cognosces. In Hungaria vicina adhuc quidem omnia satis pacata & quieta. Metuimus autem ne *μαλακίαν* istam gravissimae paulo post tempestates consequantur. Fama enim est, atque utinam fama tantum! Turcarum Tyrannum Jaurini popularium tuorum ingenio ac virtute nuper recuperati, & Transylvaniae ac Walachiae jactura irritatum, tantas adversus nos copias adducere, quantas majorum ipsius nemo. Transylvanus Princeps, qui non ita pridem occulto fati decreto paterno Imperio se abdicavit, nunc apud nos vivit; pene privato similis, si praesentem ipsius condicionem cum praeterita fortuna compares. Missus est nuper in possessionem ditionum Oppoliensis ac Ratiboriensis, quas neque terrarum spacio neque fructibus valde amplas quasi, *γλῶ πρὸ γῆς*, in satisfactionem a Caes. accepit. E Transylvania, cui nunc Caes. nomine cum imperio praestitit *Istifanus* Baro Hungarus, nuper latrunculi quidam Poloni a Bathorianis Transylvaniae Imperium sibi ereptum dolentibus, ut ferunt, conducti magnam vim pecoris abegerunt, & gliscunt in ipsa quoque Transylvania factiones, quae, ut speramus, Serenissimi Archid. Maximiliani adventu propediem opprimuntur. Vale, Lipsi clarissime & Rhedigerum tuum amare perge. Datae e Strifano nostro Kal. Augusti 1598.

Est haec responsio ad Cent. ad Germ. xxxviii in qua *Thomam Rhedigerum* (de quo vide ad Epist. v.) vocat Fratrem hujus *Nicolai*, quem ipse *Nicolaus Agnatum suum* appellat, sed plures ex hac familia fuisse ejusdem nominis puto, & postea ex aliis epistolis videbimus.

EPISTOLA DCCLII.

FRANCISCUS SFORTIA,

S. R. E. Cardinalis,

J. Lipsio.

Lovanium.

Illuſtriffime Domine: Testimonium amoris erga te meū, quod ex *Fulvii Urſini*, aliorumque literis te intellexiſſe affirmas, ita verum eſt, ut veritatem ipſam pene ſuperet. Oritur autem laudibus ab iis, quas cum nomine Romano, ac rei militaris amatoribus promeritus es. Tu enim res Romanas e tenebris eruiſti, atque eas renovando illis, & militiae quandam quaſi formam dediſti. Ego vero, qui patria Romanus ſum, qui majorum meorum inſtituto, qui patris educatione, qui propria animi propenſione, licet praefens dies alios mores expoſtulet, rerum bellicarum ſtudioſiſſimus exſtiti, & vix adoleſcens in Belgiis iſtis tuis nonnulla Martis munera obivi, non poſſum non ſummopere laetari, nomen Romanum, militaremque diſciplinam tuis praecipue laudatis praeconiis extolli, ut mehercule maxime extolluntur libro illo, quem ad me miſiſti, quo ego mirifice delectatus ſum. Si enim ſtilum intueor, novum quendam Latini ſermonis candorem, atque leporem agnoſco. ſi res ipſas, quas praestringit, contemplor, omnia miro quodam ordine excogitata ac

ac digesta admiror, tibiue ideo sancte polliceor, cum Romae ero, me diligenter curaturum, ut Pop. Rom. tanti ornamenti non immemor, publicum aliquod specimen pro memoria tua conservanda, & tua dignitate augenda proferat. & licet multa, eademque optima a te sperare liceat, illud tamen maxime optandum est, ut postquam antiquorum monumenta instaurasti, ita imperatorum, ac Ducum, qui extincto Rom. Imperio floruerunt, illustrare non dubites: etenim tibi sese tales offerent, ut cum priscis illis jure optimo conferendos fore judices, & ex eorum praeclaris facinoribus aperte cognosces, aetatem nostram florentissimis Romanorum ac Graecorum saeculis non invidere; quod ego plane demonstrare posse considerem, si tu mecum esses. Hoc autem commode ut efficiatur, te proximo anno, quem vocant sancto, ut apud me Romae diverferis invito. Ego nanque ad te mittam, qui te istinc Romam adducant, & illinc cum libuerit in patram reducant. Apud me vero, cum liberaliter, tum honorificentissime tractaberis, & socios ac comites uti ipse voles habebis. Interea bene vale. Datum Ferrariae die 15. Novembris. 1598.

Est responsio ad Centur. ad Italos Ep. LII. & ad hanc respondet Lipsius ejusdem Centuriae Epist. LXIV.

EPISTOLA DCCLIII.

AEGID. SCHONDONCHUS

Cl. J. Lipsio.

Lovanium.

Illui diu. modo dolor arripit stylum, styli immemor. Scis Doctiss. JUSTE, aequum esse, Amicis τῶν Βάρετς μετὰ δίδοναι. Nunciabas mihi istic nuper mortem magni *Ortelii*, cui frustra adesse properabas morienti. Mors praevenit. Vicissim hinc alius ego obitum nuncio. Hac hora decessit *Livineius*. Percutio te, fat scio. Heri sub noctem sanus foco ad mensulam affidens, pecuniasque numerans, horrendo gelu crus linguamque occupante, subito ruit in ignem, quo pecuniae ceciderant & ipse ruiturus, ac in favillam vertendus, ni casum casu levasset adcurrentis vetulae manus. Haec una domi, absentem omni parte viciniam frustra magnis clamoribus vocare, quae lapsum, ut potuit, sustinens, tantum non igne correpta. Tandem Deo nescio quam mulierculam necessitati destinante, succursum est, ostio domus fortuito connivente. Nonnihil ad se reversus, sed sine voce, inunctus est. Hodie mane repente evocatur R. P. Rector. comitor, *P. Schotto* post horas aliquot sequente. Heu! quod spectaculum! neque vox, neque sensus. Illico opera nostra tres adesse jussi Doctores Medici. Incisae venae, stricti pedes, cucurbitae dorso & infra magno numero admotae. Nihil omnibus actum consiliis. Conati signum notitiae elicere, velletne absolutionem sibi a peccatis impendi, bis lenem manus motum obtinuimus. Absolvimus. Heu ut misere ἀσπερὶς ἐκείτω! Sub meridiem occubuit ei vitae sol, & ipse sol litteratorum. Deinceps

ceps ne dic, mi LIPSI, κλεινὸς Ἰωάννης θνητὸς λέγε. Occidit, occidit communis amicus *Livineius*. Commendo Animam tuis, Patrumque precibus, Multum enim valet deprecatio JUSTI assidua. En, ut vitae clepsydra sensim effluit, immo subito subinde infistit! Testamentum quaesitum. repertum anni xcii. Quare voluntas illa ultima minime ultima. Una occidet, metuo, Bibliotheca ejus Graeca (electa si qua alia) Ortelianae fato, quam quàm vidi distrahi! Tu, fero, sapientius. Tua vitabit Libitinam, par tuis, quae Orbi edidisti aeterna, judicio, ingenio, ordine, stylo, materia. Vidit id olim Romae (dum oreris) frater meus *Petrus Schondonchus Sirleto* Cardin. domesticus, perquam peritus Graec. & Histor. Ejus tum vox, *Oritur aeternum Astrum*. Ac sane providisti ne possis mori. Cantor jam cecinit. Immo, vix cecinit. Tacuit dum totus tandem conticuit τὼς καλάμωος εἴψας. Utinam haec Magno Theologo *Lessio* nostro curae. Tu, Amiciss. LIPSI, cura, & hominem commove. Det Ecclesiae, quod haecenus negat Famae. Scripsit sapientissime. Probo *Delrium*, qui profundum illud immensae Eruditionis cornu in dies effundit. Utrique a me salus, quibus, Tibi cum primis, Vir Clariss. Annum hunc aliosque felices precor. Vivamus ut vivamus. laboremus de viatico. parum restat viae. Alioquin εἰ πόσιν ἂν δειλοὶ καμᾶτως κ' εἰς ἔργα πνέουμες; Vale, mei subinde memor. Dies non effluit, quin in augusto Sacrificio LIPSI, huic animo insculpti, meminerim, cujus vultum colore expressum minuta tabella scribenti studentique perpetuo objicit. Antverpiae e Coll. Societ. JESU cIo. Io. xcix. xiiii. Januar.

Respondet ad hanc Lipsius Centur. III. ad Belgas XLVII.

EPISTOLA DCCLIV.

AEGID. SCHONDONCHUS

C. V. J. Lipsio S. D.

Lovanium.

Vocant sensim, Magne LIPSI, μίλια illa τερακόσια. Iter magnum etiam ἐνζώνω αἰετῶ. Dum ita vis, i; tantum redi. Des illud Pietati ac Romanis: hoc LIPSI ac Λιψιοφίλοις. Redi, inquam, in medio plausu, theatro adhuc sonante. Nosti Romam. Quid te teneat? Mensae Italiae, fugis. & hinc rariores boleti. καθήμερον illud χαῖρε; Pauxillum restat aevi. cur carpant? Italus aër? nec eum sui ferunt. Vim faciat illa anno seculari sacro in Urbem commeantium vis? plerumque e tanta colluvie lues. quis foris quaerat? nascitur domi. Assidua postulatio scriptionis? eris ἄβυσσος. Proinde si metuis uncum, ne te hinc move. Sufficiat Romam ulnas sustulisse, parasse amplexus. cognoscent posterii. Si vero is rediturus; salva res. Renunciet tum LIPSIUM ROMA ROMANUM. addat STATUAM, si volet. plus e te Gloriam hausit, quam refundet. Tu tantum redi. Ignosce Schondonchi calamo

Tom. II.

F

omnia

omnia metuenti. Timeo Principes illos Purpureos, quos offendas invitus, maxime Ducem Tarpeium. Sane facilius inibis, quam abibis. Roma. Viae porro molestias qua potes. leva. moestus siquidem audio corpori aegre fuisse. Eras hîc nuper Divus Augustus. forte Animae *σκαφίδιον* plus aequo faburrarint Antverpiensium *ἀρετα*, pene dixerim *ἀνάρετα*, & quae pridem nostri *μακροδείπνα*. Jam vide rem lepidam. Questus nuper es plures offerri viae comites. probavi paucitatem. modo rogor augere numerum. quî possim? quî ausim? Egone te, mi LIPSI, onerem, qui libens pro te opprimar? tamen rogor ac pene cogor. Proinde, si locus est & pluribus Umbris, En tersenis viae fociis, velut *ἀγεληδὸν* tributis, ire libeat, senis pridie praeceuntibus quasi Famae prodromis & epuli structoribus; totidem tecum assumtis; senis iterum porro consequentibus, qui pervolantis Famae quasi *λείψανα* colligant: en tibi comitem novum. Enixe rogat Nobilissimus Vir D. *Gaille* Burgensis una cum Coniuge, filium *Laurentium Deechbroot* Brugensem tuis adscribas. Si sine molestia fiet, assume, da id Patriae meae. Maturabit interea Duaci licentiae laurum. Sin assumi nequeat, sciar saltem efficaciter postulasse. Nam licet rogem, scis quî rogem. nolim oneri esse. Avent ex me mentem tuam cognoscere, ut *ὀδοιπορικὰ* parent. Grassus audio accedit. Quas Roma extulit, certe maturas reddet. Vivit noster *Pantinus*. num infulandus? Scis nuper thecae meae extortam ¹ SICAM TRAGICAM ea manu, quam pelli nefas. Velim Magni LIPSII de ea cognoscere iudicium. Nec enim vivit, quem Justo justius audiam. Tutius quidem laterem, sed ut Cacum quemdam e fede silentii protrahunt. Arripe quaeso calamum cygneum, candide mone, & Schondonchum tuum hoc etiam beneficii fune devinci. duc obsequentem. Deum solum spectro, cui his asparagis lito, ut tu Hecatombe. Vale, Vir Clarissime, aeternum care. Ego R. P. *Delrio*, Dominus *Hoins* etiam tibi multam salutem. Antverpiae e Collegio Societatis JESU, XVII. Julii, CIO. IO. IC.

¹ A. 1598. Junii XXII. Leidae ultimo supplicio animadversum est in *Petrum-Panne* Iprensen, qui a Jesuitis Duacensibus subornatum se in caedem Mauricii Nassovii confessus erat. quam Labem Jesuitis eximere tentavit *Franciscus Costerus* Jesuita, & alius edito libello sine nomine auctoris & typographi, quorum brevium videre est apud Borrium lib. xxxv. Hist. Belg. p. 27. noster etiam Jesuita vertit latine librum, *Sicam Tragicam* Comiti Mauritio, a Jesuitis, ut ajunt Calvinistae; Leidae intentatam, quam *Franciscus Costerus* Belgice edidit, & adversus calumnias Lugdunensium Batavorum defendit. vide Alegamb. Biblioth. Scriptorum Societatis Jesu. pag. 9. ubi vita *Schondonci* narratur. ut & apud Valer. Andr. in Bibl. Belgic. in hujus Sicarii cogitatum scelus numisma cuspum a Zelandiae rerum maritimarum curatoribus, quo *Petrus Panne* Mauritium petens conspicitur, dum Hispanus alter olivam praeferens pacem ostentat, cum his verbis *Pacem ostentat; sed hoc agitur.* ab altera parte, *Deus causam nostram agit.* vide Loonii Historiam Belgic. vide & Sander. de Claris Brugenfibz pag. 14. *Admiranda hujus seculi volebat edere, de quibus agit Lipsius.* v. Centur. Misc. 16. vid. & sup. ad Epist. LXXV.

EPISTOLA DCCLV.

AEGID. SCHONDONCHUS

Cl. V. J. Lipsio S.

Lovanium.

Postremis meis te Antverpiam invitabam. verum didici deinde ex Moreto ad Nervios abiisse. Scin' modo quae me tellus? Tenemus extremos hominum Morinos. Haecenus Antverpiae consuëram Italis & Hispanis: jam audio Anglus, datus Rector Collegio Anglorum, ubi mihi quotidie centum amplius capita in ἐστιαποιῶ. Ablegavimus diebus hisce Romam Juvenes selectos tres; sedecim Hispalim ac Vallefoletum; aliquot item in Angliam sacerdotes. postremum hesterno die. Ad lanienam, inquires. Abiere certe (utar sapientis voce) ut victimandi. Si quid subinde in Anglia per nos curatum voles, inde in familiam hanc nostram commeant ultro citroque. Abes quidem tu jam longius, mi Lipsi; at Schondoncho non abes. Amor, Ecstypoma liberique tui (Ψευδογεγραμῶν & libros scribam?) quos victuros edis, te mihi quotidie ob oculos. Modo vicinior quoque Jamotius. at pene intra teli jactum popularis noster Episcopus Blasaeus, Doctor Gioli, Ogerius, aliique φιλέλληνες. Inclusas accipio Roma. colligo e meis uspiam substituisse. Agnosces caram Hemelarii manum. Spectat Hagam, ut matri porrigat manum in Haeresium salo fluctuanti. Suadeas, vir Consultissime? vix credam. Multa me ab hoc consilio deterrent. Doce quaeso, qua mente sis, ut tecum optimo Adolescenti consuadeam ἰμοθυμαδόν. Docti tuum hîc Senecam mecum expectant. faveritne valetudo, ignoro. Vale, Vir Clariss. tecumque magnus Lessius. Audomaropoli ix. Octobris ipso D. Dion. Arcop. cıo. ıoıı.

ı Vid. supr. Epist. Hemelarii. dXLII. & Lipsii III. Centur. ad Belg. lxxix. & III. Cent. Misc. 81, quae est ad hanc responsio.

EPISTOLA DCCLVI.

AEGID. SCHONDONCHUS

J. Lipsio V. Cl.

Lovanium.

Vereor mihi succenseas, & parum officiose, qui fileo tam diu. Silui calamo, non affectu, quo toto totum amplector & circumfero Lipsium. Quotidie tecum loquor; & quocum in hac vita libentius? quid doctius tangam? pridem rapueras me scriptis & affectu, praesertim Stoicis, quod Opus visum mihi senilis judicii, sed viridium tibiarum. siquidem πολλά δ' ἀναπτῶ, κατὰ πάντα, πάρεχοντά τε, δοχμιάτ' ἦλθον. Multum in eo doctrinae, judicii, famae: sed in DIVA HALLENSI plus solidae, & non amplius humi ambulantis

gloriae. O, mi Lipsi, sic saepe, sic assurge, sic vitam fini. Ex quo Opus illud adspexit lucem, praeter quotidianam in Missae sacrificio tui memoriam, offero quothebdomadis ipso semper Sabbato sacrum B. V. pro D. T. faciamque dum vivam. Auxisti amorem, imo is septuplum accensus est quam accendi solet, postremo scripto D. V. ASPRIMONTANAE, quae te Illustrem suum Historiographum diu servet. Regis magnae Britanniae de Miraculis a te editis, quod accepi ex Anglia, iudicium jam aliunde cognoris. Vale, Schondonchi tui subinde memor. Audomar. e Coll. Anglorum, vir. Jul. M. DCV.

EPISTOLA DCCLVII.

J. L I P S I U S

*Aegidio Schondoncho...**Audomarum.*

Semper tu, mi pater, non benevolus tantum, sed beneficus, & munera etiam literae tuae secum ferunt. vel nunc uxori meae librum: quem carum habet, & talem etiam hospitem (scribere me iussit) saepe vovet, & jam nunc vocat. O si pareas, & ex intervallo nos visas. An te nondum meus Seneca? quem absolvi denique, Deus bone, quoties morbo aut occupatione alia interpellatum! sed absolvi: utinam condignus labor sit optimo scriptori! mitto & nunc alterum factum munusculum: velim de utroque liberum iudicium tuum. sed ad tuas literas. quaeris de illo nostro quid videatur, & an dignum censeam tali loco. Libere dicam καὶ ὅδ' ἐπικύσω, non est dignus. non solum ob vetera illa; quae obliterari possunt & debent. sed toto ingenio & indole est, ἀξέσαι, atque ut ita dicam Φρενὲς ἡλεός. porro facie familiae de isto (si me audis) file. At in sapienti illius iudicio risi. Cum tam dispari me componit: alia studia tractamus, & nisi fallor, magis seria; certe magis profutura huic & alteri aetati. solum illud poetari & argutari non est meum: displicet & Diva nostra. parum est de nostra, utinam non diva! & tamen multi hinc sunt, qui τὰ ἐνδοθεν aliter affectum illum esse censeant, & haec talia fuco, & προσποιήσαι quadam dici. O ita sit! nam quis Principum plus rei & religioni Christianae profit, si velit. Deum oro velit, & te, mi pater, haec facientem ac studentem servet, ac mihi tuum affectum. Lovanii Prid. Non. Decemb. 1605.

Innuat Regem Angliae Jacobum, de cuius Papismo magnam spem susceperant Lipsius & Jesuitae.

EPISTOLA DCCLVIII.

ANTONIUS POSSEVINUS

*J. Lipsio.**Lovanium.*

Vir Clarissime & in Christo Amantissime. Redditae mihi sunt literae tuae, Quarto Kal. Feb. datae. Et, o optimum Lipsium, cui ad reliqua dona istum candorem, & amorem contulit Deus, qui sit benedictus in secula. Tu vero mihi acutum calcar addis ad decurrendum hoc Apparatus mei non exiguum spatium. At quum, in variis provinciis VV. Cl. suis litteris me cohortati sint ad hoc ipsum, Unus tu unica brevi, sed plena fidei, & bonitatis epistola, plus omnibus effecisti. Ago igitur, quantas potest capere animus meus, gratias tibi. De solida pietate tua, dudum est cum certissimus sum. In ipso Pontificis Maximi Palatio, & Typographia Vaticana, quo tempore de tuis scriptis agebatur, testimonium illud reddidi sciens volens, quod Virtuti, doctrinae, & praestantibus tuis dotibus ab omnibus, qui sapiunt, vere debetur. Quin & qui extra Ecclesiam sunt, cum adversus te scripserint, ii & in hac re, praeter ipsam religionem, mihi fuere haeretici. De tuo in Italiam adventu, gaudeo. Quin & ipse, si annuat Deus, Germaniam cogito. Ea genio meo, labori, cui me addixi, & senio videtur commodior: sed ut a majoribus meis pendeo, agendum inprimis cum iis. Vale, meque juva vicissim apud Dominum Jesum, cui te non desinam offerre. Mantuae Octavo Kal. Aprilis. MDLXXXIX.

Responsio est ad Lipsii Epist. LXII. Centuriae ad Italos.

EPISTOLA DCCLIX.

J. L I P S I U S

*Joh. Woverio suo S. D.**Antverpiam.*

Nihil mihi aegre est, aegre tibi esse diffidium hoc nostri, imo volupe, ut rem meram dicam. Nam amoris hoc fidi signum est; quem servare te erga me & bonas artes, atque adeo, si licet, augere etiam optem. Itaque & dole in absentia, & stude jungi quantum potes: quod vereor ut ex tuo meoque voto (nam & ego cur dissimulem?) sic cito fiat. Nam Spadanum iter meum differtur, & praetentare libet medicinam, quam scis, Davidicam: utinam ita auxiliarem & bonam, ut aquis illis aeternum careamus. Hoc tenet: sed & terret etiam Mantuani Principis adventus cum ingenti comitatu, & qui vel pagum possit implere. Adde alios nobiles & advenas, Gallos Germanosque: ubi nobis locus? Tamen videbimus, & quod ex valetudine erit, fiet.

F 3.

In-

Interea habeat te urbs amata nobis, urbs urbium: & in qua semper esse potest quod doceat, aut quod delectet. Actiones intueri vanas plerasque aut circa vana, opum avaritiam & studium, aliorum ambitus; inter haec quorundam composita vota, aut mores: videbis, contemnes, applicabis, disces. De symbolo nostro, ad ipsas delineationes adscripsi, & videbis. Litteras ex urbe habeo, ad quam vocamur, omnia etiam bona, & in nos amica: sola transcriptio pecuniae expectatur. Haec votiva: vis quod mordeat? ad comitatum adspirat quem nollemus, filius viri amici & in sua urbe primarii: nec alius titulus est, quo filius commendetur. Rejice, inquires. Animo facio, ore vix facio: & qui possum in virum, ut alia omittam, certe nobis amicum? De Rep. quae exscripta mittis, ad pacem non eunt, sed nec ad victoriam eunt, quam discordia aut imperitia nostra, & utriusque mater superbia, corruperunt. Ille qui in Alto haec viderit, quem scio talium arbitrum, & ego non nisi auditione, vix alio animi motu, haec delibo. Tamen novisse juvat, sed ut norim. Vale mi Woveri, & parentes utrumque mihi saluta. Lovanii XI I. Kal. Jul. 1613. XCIX.

E P I S T O L A DCCLX.

J. L I P S I U S

*Joh. Woverio suo S. D.**Antverpiam.*

ET tu Antverpia ad me scribis, cum ego, indies aut horas te hîc expectarem? Et expectarem dico, atque adeo expeterem: ac juvisset videre te coram & affari: Nam etsi longum intervallum non est consuetudinis, tamen (libere dicam) amanti longum, & te inter omnes meos mihi probasti. Maneat communis hic affectus (de tuo enim quidni confidam!) dum nos manemus, & calcamus communem hanc teram. De aliena autem visenda, quod valde aves, quid tibi dicam? me nolle. mentiar. mutasse? nec id quidem; sed res & tempora mutarunt, ut ex iis, quae describi jussi, videbis. Est sane valetudo mea tenuis, nec pro tali fortassis itinere: sed animus tamen sustentasset, & vestra humanitas atque officia. Sed ecce morbus in ipsa Italia, & quae causam itineris nostri, id est, Jubilacum, fortasse tollunt. Verba censes? rem videbis in istis, & quae perscripta ad me jussu *Sfortiae* Cardinalis. Itaque & tu vide, ut minus calide agas, neu conjicias te in flammam, quam aqua poenitentiae non restinguas. Sera tunc ea sit. Sane peregrinari te, mihi adeo non displicet, ut suadeam etiam atque impellam: sed loca eligenda sunt, ad quae tuto & sine salutis noxa possis. Differ, differ, si me audis: aut de Gallia cogita, sive Germania, atque hiemem hanc illic age. Aestas deinde consilium dederit, in utram Hesperiam sit eundum. Ego tibi ex vero consulo, & paucae septimanae plura de Italia dicent. Haec ipsa ut cum *Baronio* nostro participes, a te peto. Ad fratrem tuum *Lafaillium* scripsi, sed latine &

meo

meo more. aut ipſus a ſe intellegat, aut te adminiculante. Italicas litteras ab *Hovio* non accipimus: quin tu ſubmones, & curas. Ego jamnunc etiam a Cardinale *Borromæo* & *Baronio*, quorum uterque invitat valde amanter; atque ille aedes offert, & dolet a *Sfortia* ſe praevenitum. Sed utraeque ſatis veteres, & nondum his a lue timor: quam luem Italos odiſſe, juxta atque orci janua, non neſcis. Vale, mi Woveri, & de conſilio tuo ſcribe, juvabimurque commendantes, aut (quod minimum) voventes. Lovanii, ix. Kal. Sextil. 1599. Utrique parenti ſalutem amicam dico. Habes adjunctum *Bernartii* libellum, huc miſſum, & tibi inſcriptum.

EPISTOLA DCCLXI.

ORDINIBUS BRABANTIAE.

Reverendi & Illuſtriſſimi Domini.

Officium & cultus, quem merito vobis debeo, adegit deferre ad ampliffimum conſeſſum veſtrum conſilium noſtrum; conſilium, quod de re mea cepi. Id autem eſt tale. Inſtante mox anno ſacro ſaeculari, quem Jubilaeum appellamus, Religio me impellit in Italiam & urbem ſanctam ire, & beneficium hoc ante obitum capere, quod divina benignitas nobis offert. Suadet etiam valetudo hoc iter, quae adſidue hîc adverſa, fortasſe motu & mutatione in melius, aut certe mitius ibit. Nec ſane, quamdiu ea ſic triftis, magno uſui publice vel legendo vel ſcribendo eſſe poſſim: imo nec diuturno uſui, ut vires iſtae deficientes mihi dicunt. Itaque ſpero & ſupplex etiam rogo, probatum hoc conſilium a duplici illa cauſſa Vobis iri, nec gravate veniam mihi, ſine ſalarîi mei diminutione aut ſuſpentione, ut in Profeſſoribus publicis, qui valetudine impediuntur, jure receptum eſt, daturos non emanſionis, ſed duntaxat peregrinationis in quinque aut ſex hibernos menſes. Quoniam firmiter & ſerio (Deus modo vitam mihi donet) ſtatui redire ſub vernum primum tempus, & patriae me reddere atque obſequiis veſtris. Quod ſi quid eſt, aut erit, quod etiam illic obire in cauſſa publica poſſim, ſive etiam privata aliquorum veſtrûm, ego vero, Reverendiſſimi & Illuſtriſſimi Domini, promptum volentemque me offero, meritis veſtris aeternum devinctus. Deum precor, ut vos, Culmina & Lumina patriae, diu ſervet. Lovanii c1010xcix.

Reverendiſſimis, Illuſtriſſimis &c.

Dominiſ

ſubjectiſſimus Cliens

Juſtus Lipſius.

An venia data fuerit neſcio, ſed non abiſſe in Italiam, ſuperſtitionis hujus, qua flagrabat, cauſſa: conſtat ex pluribus epiftolis, quae hîc & in editis exhibentur.

EPI-

GASPAR SCHOPPIUS EQ. FRANCUS

J. Lipsio.

Lovanium.

L Audabis, spero, hanc meam audaciam, quod diuturno tuo silentio nequaquam absterrear, quin vel nunc te compellem, hoc est, tibi feriis, vel gravioribus certe, curis occupato negotium facessam, adeoque in publica commoda peccem. Est enim hoc signum fiduciae de humanitate tua meae, quippe qui certus sum, silentium tuum nequaquam ex neglectu aut contemptu adulescentiae meae, sed ex iustis & rationabilibus causis proficisci, cujusmodi esse potest, quod coram potius, quam per literas interpretes mihi te respondurum credidisti, antequam consilium tuum de profectione Italica abjiceres. Ita sane accipio, quamvis non nesciam, non vacare semper LIPSIUS omnibus omnium literis respondere, & feria sua aliorum ludo posthabere. Qui etiam occupationis tuae respectus nunc quoque persuadere mihi potuit, ne compellatione iterata tibi odiosus essem, nisi se mihi offerrent rationes aliae, alia omnia suadentes. Primum enim amor in te meus, qui quo magis aetate progredior, in me auget, non patitur moram vel dilationem epistolici colloquii: quod scio te probe intellegere conjectura de tua olim adulescentia facta, in qua non potuit, quin idem te erga viros quosdam magnos affectus tenuerit. Deinde cotidiana fabulae & sermones, quos de te habemus, ego, *Micaeltius*, *Raphelegii Franciscus* & *Iustus*, alique nominis tui studiosiores, eodem me impellunt. Tandem Admiranda tua jubent, ne, quid de iis Romani nostri moliantur, clam te esse sinam. Ne enim nescias, primum auctor fui *Philippo Pigaphettae* Vicetino, amico meo, ut ea Italice converteret, ut Romani tuo, velut Varronis nostri beneficio discant, qui & ubi sint & quales fuerint: deinde jussu Illustrissimi & Reverendissimi *Bernardini Paullini* S. D. N. Datarii & tua & *Stapletoni* Admiranda simul recudenda dedi, praefatione ad ipsum Datarium praefixa. quod tibi confido non improbatum iri variis de causis: verbi gratia cum referat Romae librum tuum exstare venalem, & non sic abs re haereticorum, quales multi huc veniunt, ut non possint Lipsii de magnitudine Imperii Romani legere, nisi simul emant *Stapletoni* de Ecclesia Romana librum, etsi illum & stilo & gravitate tuo longe inferiorem: denique propter iudicium amicorum tuorum, ut *Velferi*, *Wackerii* aliorumque, & ipsius quoque Datarii, qui te certe colit & aestimat. Spero non displiciturum tibi eorum consilium; minus certe eo, quod praefationem ego praetexui, pannum purpurae. Sed velim tecum cogites, non eo consilio recudi libros illos vestros, ut in virorum recondite eruditorum manus perveniant: sed tantum ut Romanis hominibus & peregrinis, qui huc veniunt, innotescant, quibus vel Schoppiana opera satisfacere potest. Nihil profecto continet praefatio, quod eos, quos dixi, non melius sit scire, quam ignorare: ne illud hic addam, me, quantum

in

in me fuit, gratias, quas omnes bonarum literarum & historiae studiosi debemus, prolixè tibi istuc meminisse. Impressio quàmprimum fuerit absoluta, exemplar istuc mittam. De meis quoque studiis si non ingratum erit audire, sum jam paene totus in Theologicis: non quod nesciam, id studii alioquin a Germanis Equestri loco natis, & praesertim a Francis meis, esse paullo alienius: sed quod necessario mihi dicendum sit pro mea ad Catholicos migratione, ne me leviter fecisse putent illi, quorum parentes leviter ab Ecclesia se abruptè. Scripsi itaque & edidi epistolas nonnullas ad *Rittershusium* aliosque de praecipuis controversiis: nunc quoque mitto in Germaniam Erga Anni Jubilaei, hoc est, de Indulgentiis Commentarium, cui subjungam Parerga Anni ejusdem, hoc est, de rebus Romae visu & observatu dignis: quamvis hujusmodi a me forsàn neque expectentur, neque scribi debeant. Sed mihi nil aequè est cordi, quam omnia facere reducendis ad bonam mentem haereticis. Censuram postea meditor in Notas Tertullianæ *Francisci Junii*, qui vellem majori cum fide & veritate in tractandis antiquis Ecclesiae doctoribus versaretur, quam fieri ab ipso video, & tu non nescis. Notas *Rittershusii* in Guntherum simili examine indigere video, cui nihil est antiquius, quam in Romanos Pontifices debacchari. Utar autem ea moderatione, ut nequaquam vel illi ipsi Adversarii, vel lectores mei offendi possint. Superioribus septimanis Grutero operam amicam praestiti. Is enim cum paret editionem Inscriptionum antiquarum, quas altero tanto plures habet, quam in vestra Batava editione contineantur: a me facile, quamvis occupatissimo, perfecit, ut Autographum Smetianum (illud, inquam, quod descriptum erat, antequam ignis aedes Smetianas irrupisset) cum impresso compararem, & multo plurimos errores inde corrigerem: immo & integram Centuriam atque amplius ineditorum Inscriptionum ipsi miterem: alias quoque plures a *Fulvio* & *Horatio de Valle* Jcto Romono, & *Josepho Castalione* impetrarem, ut sperem Gruterum magnum libro illo facturum operae pretium. De Crucariis, *Wackerii* V. Illustris nuper scripsi. nondum puto ea prodixisse, impedito peregrinationibus *Wackerio*. Interim tuto tibi persuadere potes, nihil esse ibi, quod non sit summa cum laude tua conjunctum; & testari hoc idem tibi potest D. *Michault* communis noster, cui jam illa Wackeriana legenda dedi. Quod nuper a te petii, idem nunc peto, aperias nimirum animum tuum de opusculis meis Criticis, si ea modo vobis visa. Admoneas & corrigas, tamquam si discipuli tui res sit, qualem me L. M. fateor, tui quidem tanquam publici, & communis omnium doctoris: tametsi non tam volens propitiaque mihi fuerit fortuna, ut coram tibi auscultare possem. Simul doceas nos, quid de Thrasea, itemque Magno Politicorum opere polliceri nobis debeamus: quae quidem duo opera unice a nobis expectantur. Id quod ne diutius facere necesse habeamus, Deum precor, ut vitam diuturnam, & vires vegetas tibi indulgeat. Bene vale, Vir Clarissime, mihique tam libere, hoc est, secure & impolite ad te scribenti ignosce. Romae postridie Epiphaniae Anno M. DC.

Sunt & hîc nonnulli alii viri docti & Lipsiano nomini devoti, inter quos

est vestras *Job. Macarius* & *Henricus Gravius*, Card. *Madrucii* (in cujus Aula sum, etiamnum brevi in Vaticanum migraturus) Secretarius, itemque popularis meus *Leonhartus a Gutenstein* Jurisc. Bambergensis, inter primos studii nostri amatores, qui omnes se tibi insinuari suamque salutem cultus & amoris plenissimam nunciari cupiunt.

Respondet Lipsius Centur. ad Italos Epist. LXXXV.

EPISTOLA DCCLXIII.

GASPAR SCHOPPIUS EQ. FRANCUS

J. Lipsio.

Lovanium.

NUmquam ego quidem de humanitate tua, Vir Clarissime, dubitavi, quam scio te mutare non posse, nisi te ipsum mutes: tua tamen scriptio istaec nupera adeo me affecit, ut quo minus me amore tanti viri tam prolixo dignum comperio, tanto te ipso humanior evasisse videaris. Merito igitur te amo &, quod tibi quasi proprie debetur, colo: & ingratus sim, nisi quoties & ubi potero cumque, ostendam, me scire hunc affectum tuum aestimare & admonitiones sequi. Pro agnita veritate multum sane Deo debeo, immo tantum, ut haec humana, haec juvenilis mea tenuitas agnoscendo saltem beneficio nequaquam par esse queat. Hoc tamen, quod unum reliquum mihi factum video, sedulo curabo, ut ne talentum a Deo creditum fidei meae, abscondam: & laborabo, ut plures eodem, quo divinitus sum mactatus, bono potiantur. quam ad rem bene est, quod consilium subjicis, de modestia & humanitate. Ac ut videas, quam obsequentem habeas Schoppium tuum, denuo jam sumo in manus meum de Indulgentiis commentarium, deleturus aut mutaturus omnino, quae quovis modo Lutheranos nostros possint offendere. Invita forsan loco cedent, quae pro aetate mea, quae XXIII. constat annis, vel calidius nonnumquam scripsi, vel argutius: cedent tamen; quia cum sic velle video, cujus dicto audientem esse non possit non esse operae pretium. Unum autem te, mi Lipsi, oratum atque exoratum velim, quod est hujusmodi: Cum mea sive fors sive fatum non voluerit, ut coram te doctore uterer in literis nostris & vita civili: tu salutare aliquod consilium adolescentiae meae suppedites, quo Romae & Romanorum consuetudine nonnihil supra vulgum uti frui possim. In eo quidem singularem Dei (non enim ego dicam, Fortunae) faventiam experior, quod meo merito quidem nullo, omnium tamen magnorum hominum non amor tantum, sed & familiaritas ita me excipit, ut aemulos quidem nomine hoc non paucos mihi fore sciam, imitatores autem non multos. Simul enim Romam veni, nihil petenti tale Illustrissimus *Baronius* stipendium a Pontifice impetrat, xv. Scutorum in menses singulos: velut ei, qui honoris ergo inter equites D. Petri de more adoptatus. Postea idem offerentibus pluribus Cardinalium, *Caesio*, *Borromaeo*,
Ca-

Camerino, Ditrichstaenio, Madruccio, aliis: *Madrucium* praeoptavi, in cuius Aula viverem, quippe in qua summum mihi videbam otium paratum, ipso Cardinali ingenium potius meum (ut ait) quam operas & salutationes Aulicas aestimante. Interim stipendium mihi a Pontifice auctum, ut ad sexcentos florenos Rhenanos excreverit: Locus quoque, immo domus in Vaticano Pontificis palatio praebita, ut & ipse paullatim in Aula Aulam instituum. Et ne hac fini stet tanta Pontificis & Datarii humanitas, me cubicularium Pontificis facere cogitant, Typographiae simul Vaticanae praefectum. Quod si fiat, nimirum ego Picorum montes habeo, quos memorant esse aureos. Sed si faciant, sive non faciant: vel sic tamen optimo loco sunt res meae: nisi quod Lipsii mei consilium cupio, quo instructus prosperitate hac tanta non abutar prius, quam utar. Videris igitur, quae bono aliquo observanda sint ei, quem fide Germanica noris tibi addictissimum, hoc est, Schoppio. Ego non dicto solum tibi audiens, sed & gratus ac vocalis olim beneficii futurus praeco. Admiranda tua nondum recudimus: sed heri demum ab optimo *Baronio* nostro usum impetravimus secundae editionis, quam ut operae fideliter sequantur, fideliter curabo. Studia mea sunt ejusmodi, ut *παρρηγως* superioribus diebus spicilegium, an justam messim, notarum in Apulejum fecerim. Eas Lugdunum suam mittent *Raphelengii*. nescio si subjungam editionem novam Agellii, cujus MSS. in Vaticano sunt boni, apud *Fulvium* optimi. Sed numquid non merito scriptionem id genus omnem abhorrrere debeo, qui precibus meis toties iteratis iudicium de Suspectis & Critica mea Lipsianum nequiquam peto? quare ut scias, valere ego Crisin jubeo, si ita jubes: silentium autem imperii vicem habebō. Hac aestate proxima, si vivam, in Graecorum Collegium hīc migrabo, cum discendae linguae ergo in Graeciam ipsam non possim. Bene Vale, Vir (quod apud te liceat) aevo hoc nostro major, & me ama. Roma a. d. 4. Martii A°. ∞. 100.

In Apulejo de Mundo pag. 14. edit. Vulcanii. cum legitur: *nec occasibus fatigari, nec saeculis debilitari excussam*. MS. habet: *nec occasionebus fat. n. s. hamilitari*. quaero num tibi placeat legi: *anilitari* i.e. fenescere. ab *Anilitas, anilitari*, ut primo Metamorph. *Ut cum illa acquievi, ab unico congressu annosam ac pestilentem contrabo*. MS. *anatem ac pest*. Quid videtur? an *Anatem* dixit, quam Festus ait esse anuum ac vetularum morbum, ut puto? *Anatem ac pestilentem*. pro, anilitatem & quidem pestilentem. sicut Plaut. *Equid is homo habet in pectore aceti? atque acidissimi*. Sed judica. Lib. 2. metam. p. 34. *Dumque bibere solitarium postulant*. MS. *salutarias*. An, pro salute amicorum putare cupiunt? ita videtur. *salutaris & salutaris*. Lib. 4. *Sic ad instar Athracis, vel Pirithei, vel Protefilai dispectae disturbataeque nuptiae*. Lego cum MS. *ad instar Atridis vel Paridis vel Protefilai*. Ibid. *Sed ecce saevissimum omnium. nunc etiam redintegratur, immo vero cumulat infortunium meum*. Lego: *Sed ecce saevissimo somnio nunc etiam &c*: Lib. 5. pag. 85. *Sed ubi remigio plumae, captu maritum proceritas spatii fecerat alienum*. Corrigo: *ubi rem. plumae raptum maritum*. Lib. 6. pag. 103. *Vides istas ruinas proximas*. MS. *rupinas*. & pag. 115. ubi legitur:

Provolutosque in proximas ripas praecipites dedere. legendum similiter, rupinas. sic
 2. Florid. *Agrum scruposum, meras rupinas & senticeta miseri colunt. Pag. 104.*
Videt memorandi spectaculi scaenam, nec tauro, sed asino dependentem directe anicu-
lam. Corrigo: dependentem Dircen aniculam. Probabis. Lib. 7. pag. 111. Nam
procuratorem Principis ducenaria perfunditum, dehinc fortuna tristiore decussum, prae-
tereuntem coram fueram aggressus. Falsum hoc, quod coram fuerit eum aggres-
sus. Judicavi in Suspectis, Bertinianum codicem, quem Modius contulerat,
habere: praetereuntem Orato fueram agg. Idem est in Fulviano. Orato est Ma-
cedoniae civitas; de Macedonia autem hîc loquitur. Lib. 8. Spongiis macidatis
tumores comprimere. Legend. inacidatis. Lib. 9. pag. 160. Nec ad exemplum
machinae truculentae sulfuris te letali fumo necabo. MS. naetinae truculente. an na-
etina est naetae illius conjux adultera? Ibid. Adsuetos abjecta per agros exicare
cadavera. Flagitium librarii Itali! legend. esitare. Haec ex plurimis pauca
ad te mittere volui. Tu, vir clarissime, ignosce, si apud te adeo negligenter
& raptim agere audeo. cogita, tibi rem esse cum Aulico, qui hodie, occu-
patissimus licet, nolui D. Micaultii literas sine meis abire. B. V..

Responsio est ad Lipsii Centur. ad Italos Epist. LXXXV.

EPISTOLA DCCLXIV.

J. L I P S I U S

Gaspari Schoppio..

Romam:

Rubenius noster reversus, vir, quem nosti, & si nosti, amas: *Rubenius*, in-
 quam, multa mihi de te rettulit, & in me affectu, nec ipse sine suo af-
 fectu, quod utrumque volupe mihi fuit. Mi Schoppi, es in locis, ubi olim
 sedes doctrinae, elegantiae, prudentiae: excita, quantum in te est, & poste-
 ros illos ad majorum gloriam voca. Ingenium, cultum, usum habes: eo,
 quo dixi, dirige, & ipse ad metam illam triplicem veni. Nos jam affecti,
 & in regula ultima stantes, scriptis conamur ducere: & *Stoica* fortasse nostra
 videris, non poenitendum mihi aut posteris (cum fiducia dicam) opus. Atque
 haec in mediis turbis, fluctibus rerum conamur, cum Mars saevit, cum jus
 & fas periit, & quies ac securitas, non nisi nomine nobis blandiuntur. O quan-
 do temporum, & ubi locorum nati sumus! Sed ordinem mundi adspicio, &
 grata habere imbibi, quae aeterna lex jussit esse rata. Tu fruire Roma, & pa-
 ratissima, si unquam, Roma: & fac etiam otii tui ratio exstet, aut jam nunc
 dicam tibi in Areopago seribo. Lovanii, postrid. Idus Sextil. ∞. 100. IIII.
 Imaginem tuam *Rubenius* a te mihi dedit, ab aere expressam: libens vidi, li-
 bentius typum, si fata darent.

Edita a *Scioppio* in *Amphotid.* pag. 149. simul cum altera: quia vero liber hic rarior, & paucis no-
 tus est, volui & hîc legi.

EPISTOLA DCCLXV.

GASPAR SCHOPPIUS

V. Cl. J. Lipsio S.

Lovanium.

UTrum te *Rubenii*, an tua causa *Rubenium* magis amem, nequeo decernere: nisi quod ita commoda traditi a te nobis *Rubenii* curae habeo, ut quae mihi ipsi, eadem illi velim omnia. Atque haec me nunc causa impulit, ut quamvis a multis & gravibus negotiis districtissimus, ad te nihilominus scriberem, viamque, qua amicus ille noster ad vitam commode agendam perduciqueat, tamquam intento digito demonstrarem. Rectius autem id facere non posse videor, quam si meo exemplo id praestem: quod hoc pacto eadem opera statum rerum mearum intellecturus, & rationem, quam in juvando *Rubenio* sequendam tibi existimo, facilius probaturus sis.

Quaecumque *Paulinus* Clementis Octavi Datarius bene in me facere visus est, ea nunc didici non tam ulla ipsius in me prompta & sincera voluntate, quam propriae utilitatis respectu ab ipso profecta esse. Sed iis rem totam simulationum involucris textit, ut non me solum hominem scilicet *ἐναπαύτην*, sed multos etiam alios *τὰ τ' ἑσπερίων εἰδότες* recoctosque Aulicos egregie fefellerit. Accipe nunc Florentinorum insidias & crimine ab uno disce omnes. Cum rufum galerum & purpuram jam exploratam & domi conditam habere sibi videretur, majora, ut fit, animo jam concipiens, summam rationum, quibus in cathedram Pontificiam se collocare posset, coepit subducere. Ac quoniam nosset, suffragatione Regum atque Principum facillime illuc perveniri posse, quacumque potuit ratione (potuit autem plurimis, quod incerta sit summa fructuum Datariae, modo 40. modo 50. nonnumquam etiam sexaginta, numquam autem minus 30 aureorum millibus mensuris ad Pontificem ex ea redeuntibus, ut ita Datario facilem sit partem inde quantam velit delibare) Reges ac Principes, eorumque Oratores sibi devincire studuit, dum Regibus munera mitteret, Oratorum propinquos & amicos Sacerdotiis & Beneficiis Ecclesiasticis afficeret, uxores etiam Oratorum variis donis sibi conciliaret. Jamque adeo rem illuc perduxerat, ut certamen Gallis & Hispanis esset, utri magis hominem diligerent. Exinde Polonos, Scotos & Anglos complexus est, ita ut nonnullis nobilibus virginibus Scotis, quae Catholicae factae ex aula & Gynaecio reginae discesserant, dotem Avenione numerari curaret, & literas ab ipsa Regina hoc suo officio extorqueret. Restabat, ut Germanos quoque suos faceret, quod consecuturum se indicavit, si me ut ambitionis suae parario uteretur. nam ei nescio quid magni *Lamatta* Hispanus, qui unus ipsi erat omnia, de ingenio meo persuaferat, maxime si loco & habitu equestri Theologiae studia tractarem. Habuit autem rationem hanc, si aliquando Legatus Cardinalis in Germaniam iret, hanc sibi Legationem praerogativae loco ad Pontificatum futurum, si praesertim Germanorum Principum aliquem

Romanae Ecclesiae rursus adjungeret. Hoc itaque consilio me interprete cum plerisque adolescentioribus Principibus Saxoniae, Holsatiae, Hassiae, Wirtembergae, Pomeraniae, Brandenburgi, Anhaltinis, Palatinis, Nassoviis, Solmenfibus aliisque notitiam & hospitium constituit, & muneribus delinitos dimisit. Me interim ita habuit, ut nihil me aliis a se nequiquam petere pateretur, quod eam rem auctoritati & honori mihi fore judicaret, cujus cupiditate ipse me duci credebat: ceterum quamquam ei a Pontifice mandatum fuerat, ut ita me tractaret, ut non ipse solum aequissimo animo esse possem, sed alii etiam aequales mei ad imitandum exemplum meum incitarentur, tamen quia verebatur, ne si firmos & fixos redditus haberem, non satis ei postea ex sententia neque dicto audiens essem, numquam mihi pecuniam negavit, si ea mihi opus esse dicerem, sed proprios & perpetuos fructus ut mihi constitueret, adduci non potuit. Ac quoniam metuebat, ne si hoc sciret Pontifex, id indigne laturus esset, cavito sedulo, ne ad Pontificem admitterer. semel tamen, cum mihi, importunius id ipsum postulanti, refragari diutius non auderet, monuit ne Pontificem de stipendio docerem, tamquam scilicet plus jam habuissem, quam Pontifex dari mihi imperaverat. Etiam saeculari anno, cum coram Pontifice mentio de me forte injecta esset, & *Petrus Aldobrandinus* ipsi *Paulino* dixisset, locum se mihi in familia sua daturum sportulamque alendis tribus famulis: tametsi ipse meo consilio usus repudiare *Aldobrandini* liberalitatem cogitabam, quod inducere animum non possem, ut homini ejusmodi operas addicerem, ipsius tamen *Paulini* quoque suasu id ipsum feci facilius. Sed & cum intellexit Imperatorem jam jussisse literas pro me ad Regem Catholicum scribi, quibus jus indigenatus seu Naturalitatis (ut vocant) mihi dari a Rege postularet: serio me monuit, ne illis literis uti vellem, quod aegre hoc pacto Pontifici facturum essem, quippe quem ad benefaciendum mihi cogere vellem, aut non satis ad me juvandum vel animi vel virium habere crederem. Providit nimirum, si jus illud haberem, omnino sibi necessitatem fore liberalissime mihi ex beneficiis Hispanicis providendi, sicque me facile Coraci illi Petroniano similem, detractatorem videlicet ministerii futurum. Postea cum Imperatoris jussu literis Caesarianorum Pragam vocarer, *Pezzenius* quoque extraordinarius Caesaris ad Pontificem Orator omni vi me secum hinc abducere conaretur, stipendio liberalissimo 1200 florenorum proposito: id egit *Paulinus*, ut Romae me manere malle dicerem, & Caesarianos non mediocriter offenderem. Dicebat quippe, Pontificem, cui se literas Caesarianorum ad me scriptas ostendisse ajebat, respondisse sibi; si omnino discedere cogitem, nolle se commoda mea impedire: suadere se tamen, ne hinc moveam, pollicerique, si maneam, futurum, ut minime mansionis me poeniteret. At ego nunc quovis sacramento contenderim, cum ne verbulum de re mea cum Pontifice tunc fecisse. Fuit etiam, cum in Hispaniam studiorum sacrorum causa discederem, fuit, cum religiosum vitae genus amplecti vellem. Ab utroque callida *Paulini* dissuasio me revocavit, quod sibi occasionem opera mea ad rationes suas utendi nollet elabi. Ac quamvis spes cum purpurae frustrata fuerit,

non

non immemor tamen illius, quod ex Euripide petatum ab aliis forsan (nam ipse indoctior est, quam ullus mulio) audire potuit:

Οὐτ' ἔτι γὰρ ἐς' ἀρετῆς, ὅστις ἐλπίζει

Πέπειθεν αἰεὶ τὸ δ' ἀπρεῖν, ἀνδρὸς κακῶ:

etiamnum consilia apiscendi galeri agitat, velut nuper ex verbis ejus conjecit. aiebat enim gratissimum sibi futurum, si se Pontifex Cardinali, qui ad Comitia Germaniae Legatus iturus esset, comitem, ut solet, adjungeret. atque haec reliqua ipsius spes nuper eum impulit, ut Electoris Brandenburgici filio & numerofo ejus comitatu lautum daret prandium. Scit nimirum solere Imperatorem Praelatum illum, qui Cardinali comes est, literis suis Pontifici laudare, & purpuram ei ambire. quod ille pro se facturum hoc impensius putat, quod Principes illos, quos muneribus & xeniis hîc Romae affecit, eam rem ab Imperatore postulatu credit. Sed ego vereor, ne frustra futurus sit, maxime si ego aliis suspicionem hanc meam aperiam. Interim non desino meum negotium agere, ut quod *Paulini* astu e manibus amisi, nunc mea diligentia reprehendam & recuperem. Fuit superiore aestate Romae Excellentissimus *Raimundus Comes Turrianus*, qui prius ipsos duodecim annos Caesarem in Italia Oratorem egerat. Eum quod sic in me propensum intelligerem, ut mihi omnia sua arcana crederet, majoremque mihi in mensa & in curru, quam aliis Nobilibus & Baronibus, honorem haberet: rogavi, negotium meum impetrandi a Rege Catholico Juris illius ad curam suam pertinere existimaret, quod ille se summa cum fide & diligentia facturum recepit. Jamque adeo post proximos paschales dies ad Archiducem Ferdinandum abibit, cumque illo & matre ejus hoc nomine aget, ut illi scilicet literis suis hoc mihi a Rege & Regina Catholicis petant, ejusque negotii procurandi partes *Chevenhyllero* Caesareo in Hispania Oratori committant. sed & ipse *Turrianus* eidem *Chevenhyllero* amicissimo suo eandem rem diligentissime commendaturum promisit. Ac quamquam summa est *Turrianus* apud Archiduces auctoritate, nihilominus ut majori cum dignitate res geratur, visum est testimonio quoque Cardinalium *Sangeorgiani*, *Baronii*, *Seraphini*, *Giurii*, *Perronii*, *Saulii* & Vicecomitis niti: qui literis ad Archiducem & matrem datis fidem eis facient, me his aliquot annis de religione Catholica deque domo Austriaca optime esse meritum, & si me redire in Germaniam contingat, non mediocri me usui tam Austriacis, quam sedi Apostolicae futurum judicari. Ita spero me voto positurum facilius, ut mihi Pontifex sine ullo suo onere aut incommodo liberalissime providere possit.

Habes de meis consiliis, quae tibi putavi cognitu non injucunda fore. nunc vellem eandem rationem teneres in adjuvando *Rubenio*, hoc est, per amicos & patronos *Naturalezsam* (ita enim vocant) in Hispania ei conficeres, sicut sunt hodie non pauci, qui eandem non tam ullo suo merito, quam commendationibus Archiducum adjuti obtinuerunt, & rem ex ea fecerunt. quos enim Rex Catholicus Naturales Hispanos declarat, eosdem ad certam summam (verbi gratia 500, 1000, 1200, 2000 aut 3000 aureorum annuorum) ex beneficiis

&c

& Pensionibus Hispanicis capiendam habiles reddit. Rem quin confecturus sis, si calide id agas, nullus dubito: & *Rubenium* quod ames in filii loco, scio: videorque injuriam utrique facturum, si id precibus a te auferre coner, quod te saltim verbo admonitum prompte ac prolixè facturum certus sum. Hoc tantum monendum te mihi sumo, ut quicquid hujus acturus es, agas celeriter. Ceterum verbum sat est.

De studiis meis si quaeris, noveris multa me habere luce publica non indigna. Sed moratur me & lentum reddit typographorum penuria. Spero tamen Stoica mea, quae superioribus annis jam plane confecta habebam, proximo mercatu proditura. Symbolam quoque in Plautum forte manu mittam. Symmachum quaero qui Romae imprimat. De Cultu & Honore Dei, angelorum & hominum, Itemque de Justificatione hominis ex sententia tam haereticorum, quam Catholicorum novo ordine quaedam scripsi, & Elenchos de securitate Lutheranorum in religionis causa, itemque alios de auctoritate Lutheri & doctrinae ejus: quae omnia cuperem saltim a te inspicere, ubi exierint, ut videas, quam haec nullo genere infelicius a nobis, quam a Theologis, si usus veniat, tractari possint. Una hîc accipies *Sangeorgian* literas, cujus secretarius *Joan. Priamus* homo Gallus, vir non indoctus, per me tibi commendari fidemque sui in te studii fieri petiit. Vale, Vir Clariss. & carissime, meque ama. Roma a. d. 18. Martii A°. 1606.

EPISTOLA DCCLXVI.

GASPAR SCHOPPIUS

V. Cl. J. Lipsio S. P. D.

Lovanium.

REs est solliciti plena timoris amor, adeoque nullam diligentiam ac cautionem, quae in *Rubenii* carissimi capitis nostri negotiis adhibeatur, supervacuam puto. scripsi nuper, quam ego compendiosissimam & tutissimam ad honoratum otium hominem perducendi viam existimem, hancque meam sententiam, quam ex animo protuli, longoque usu, & partim etiam malo meo, didici, probatam tibi nullus dubito. Nunc denuo te admonere mihi visum est, non quod *Rubenio* amoris erga se tui poenitendum existimem, qui se tibi in filii loco carum esse sciat, sed quia me ingenio & naturae meae obsequi oportet, quae ejusmodi est, ut quicquid velim, valde velim: simul ut si quem forte habes hac in re scrupulum, quod fortassis rem impetratu difficiliorem putes, eum tibi ereptum eam confirmemque, si eodem exemplo, quo prius *Columnae*, nunc Regi Catholico *Rubenium* aut commendes, aut commendandum cures, illudque indigenatus jus pro capiendo sexcentorum aureorum redditu tribui postules, futurum certo, ut a te sibi *Rubenius* unctum & luculentum patrimonium confectum perpetuo sentiat. Pudet me, cum uterque Stoicorum & Socraticorum disciplina imbuti simus, in commendando tibi eo homi-

mine, quem tu mihi prior tradideris, plura verba sumere: tantum quod inchoato a te praeclaro operi finem ab eodem te impositum videre desidero; ut scilicet *Rubenius* noster, qui disciplina & cura tua talis in literis evasit, tua nunc porro opera commode & honorate vitam exigere queat. Intelligis, opinor, tuum jam esse cavere, ne mihi, cui usum rerum non mediocrem concedis, minus nunc prudentiae in perspiciendis adjuvandorum amicorum rationibus opinione tua attribuas, quam ego fiducia cum de prompta ac proluxa tua in *Rubenium* voluntate, tum de auctoritate ad conficiendum hoc negotium necessaria conceperim. Vale. Roma Kalend. April. A°. cıo ıccvi.

EPISTOLA DCCLXVII.

EMMANUEL SARMIENTO DE MENDOZA

Canonicus Gienn. Theol. Doctor Salmant.

J. Lipsio Viro doctissimo S.

Lovanium.

O Ptaveram (vir maxime) concupiscenti animo multis ab hinc diebus, ne mentiar si annis dixerō, meos in te affectus, cultusque litteris, quibus poteram, exprimere. Quamquam enim terrae, montes, longique tractus me teque intercedant: nomen vero tuum pectore penetrato, imo ultro cedente, intima cordis infederat. Affectus nobiliori in parte lectione attenta, avidoque haustu tuorum scriptorum (malo, nectaris beantis me) conceptos, eductos, adultosque intra me diu continui invitos, reluctantes. Sed ignem assiduo spirantem perpetuum comprimere, quis posset? eruptio necessaria fuit occupata oris janua, ad alios incendium pervenit, ad amicos, quibus cum mutuis de te & de tuis scriptis confabulationibus dies integros consumere nimis breve videbatur. Ac velut amantes cum absunt, spem amoremque cogitatione, & sermone alunt, & pascunt; haut aliter quos de te crebro sermones habeo, tui videndi imponunt votis, & fallunt tempora. Quis sanae mentis te non suspiciat, miretur, veneretur, si doctissimos percurrat labores? Ecquis grave iudicium, priscam doctrinam, effusam torrentemque eloquentiam, candidam libertatem, variam rerum cognitionem, imo comprehensionem, uberem denique foecunditatem effetis saeculis mirabilem non agnoscat, non amet? Te duce secors, qui viam sapientiae haecenus clusam, & salebris impeditam per te reſeratam, aequatamque non fuerit aggressus haut difficile ineundam. Nonne a te lux data clarissimis scriptoribus, qui longo ſitu ſordebant, & inacceſſi ſallebant? An non bonae artes manu tua extractae e profundo ignorantiae omnibus emerſere? nonne barbaries per tot graſſata ſaecula a ſede expulſa, deturbata? Haec, mi Lipſi (jure meum dico animo haerentem) haec inquam; & ſuper haec dulcis humanitas quae (ſi bene novi genium) in tuis ubique ſpirat monumentis, permoverunt me tandem, impulſura etiam ſi abuiſſem, tuam affectare bene-

volentiam, & inter novissimos amicos adscriptionem. De loco non contendo, dum tamen locus. dum mensis tuis accubem vel umbram agam: & si vocari, & ultro invitari veteri in te studio dignus. Cur tandiu filui? cur in hoc distuli tempus? quod multo ante assequi potuisse si ambigerem, injurius tibi essem? Pudor occupavit (fateor) & oppressit verba saepe erumpentia, indignum ratus, si tantum virum mei affectus, & amicitiae haut indigentem manibus vacuus, insuper ignotus adirem. At muneribus non caperis: scio. sed iis, quae a fortunae bonis: Ex literis, musisque, quamquam & iis abundas, admittis, accipis. Forfan inveni hujus secundi generis quod cupias, quodque ad te faciliorem mihi praebeat aditum. Cave magnum quid spectes: munusculum spondeo; ad uberem tuam segetem spicam addo: utinam haut vacuum granis.

Parvaeque coelestes pacavit mica, nec illis

Semper inaurato taurus cadit hostia cornu.

Ab ingeniis praestantibus ampla exoptes dona: ingenioli mei tenuitas, aequo animo patere, micas offerat. In culpa nostra (utar verbis Plinianis) tibi ignoscas. Audacem me fecit muneribus mittendis tua humanitas, inopem vero tua abundantia. Quidquid aquarum effundunt in Oceanum rivuli leve momentum, sed sinu amplissimo nihilominus accipit, quam flumina undantia. Unde quidam, — *in Oceanum rivi cecidere minores*. Sed quid te distineo tandem? cur non educo munus? moram petit, dum rubor abit. Sed dicam planè. ad Tacitum tuum, simul ad te donum pertinet. Temeritati (videri enim potest temeritas) da veniam. Si quid me vidisse in eo animadversione dignum dicam, quem perspicacissimis oculis lustraveris, & non una cura correxeris; ignosce. Quaedam enim non casu, omisisti, sed minutula, colligenda aliis. Velut vineae dominus, qui racemos pingues, succo dulci plenos domum asportari jubet, spretis rarioribus, & immitibus in cibos pauperum. Tacitum ab innumeris, quibus scatebat mendis, asseruisti, illustratum nobis exhibuisti, lucem illi, atque salutem attulisti: tuus totus ipse. quae superaverunt minima, commentariis tuis composita, scio non invidebis, si collegero. Anno 1596. serio (hactenus enim carptim, & sicut canis e Nilo degustaveram) Taciti lectioni me tradidi, ducentibus tamen commentariis, & curis tuis, sine quibus vasto, & scopuloso mari non me credidissem: certus nullis aliis velis, aut ventis ad portum perveniri posse. dulcius vehebar, quo interiora penetraveram. Stupui ad scriptoris magnitudinem, sententiarum pondus, sermonis puritatem, incorruptam historiae veritatem, lepidam, simplicemque in dicendo brevitatem, continuam eloquentiam. Inde cupido mihi nata regustare, quem semel gustaveram: Placuit iterum legere: nec quidquam aliud moliebar: sat reputans accurate & ad voluptatem, usumque legisse. Si quando offenderam, me non cepisse Taciti mentem suspicari: Si quum caperem sensum, verba parum constare persenseram, subtiliori censurae relinquere: me theologiam publice profitentem, & aliis implicatum negotiis tantae rei non sufficere; laborem timere, horrere. Scrupulum tamen nequicquam opprimere conatus reviviscentem.

Tan-

Tandem evicit, ut proxime praeteritam aetatem, quum in Academia nostra lectiones vacant, (tempus aliis animo relaxando statutum) huic labori impenderem. Sed adhuc nutantem impulit Doctor *Franciscus Sanctius* Brozensis, Rhetoricae primarius Salmantinus, & omnium bonarum artium, & literarum si dicerem, non mendax, fines Hispaniarum tenco, inter quos par illi ignotus nobis. Sed fama ejus, nomenque jam a multis annis Hispanos egressum per omnem celebratur Europam. & te non latet quantus sit vir hic Hispanus. Is igitur in familiari sermone (frequens inter nos, & amicitia incorrupta in dies aucta) inculcabat saepe scribentium ignorantia, & grammaticorum imperitia in optimum quemquem scriptorem plura inepta, barbara in Tacitum maxime irrepfisse: & adhuc nonnulla permanere. eo attentius, acriusque laborandum mihi existimavi, qui probe callebam nihil perperam loqui solitum Brozensem. Nonnulla principio subodoratus aliena a gravitate Cornelii, & ab ejus brevitate degenerantia. Et haec alia plura in suspicionem adduxere. Ut plurimum hac loquendi phrasi Tacito impositum ex notis, quas ad te mitto, discas. *Cuncta ad Senatum referendo: regendi cuncta; arma vitandi*: quae latina dixerit nemo. Docuit me *Sanctius*, & ejus *Minerva Referendo, regendi, vitandi*, passiva esse (ut ajunt gerunda) quibus accusandi casum adjungere non patitur passivorum natura. Hac de re Opusculum *Sanctii* ad te mitto, ad quod & haec remitto. Quid ergo? delenda ne omnia iis similia? censeo. Levius id peccatum (si tamen peccatum) quam frigide, & barbare loquutum existimare Tacitum. Si alias eisdem vocibus, ut decebat Latinum, eleganter utitur, cur non putem aliena, cum putide? Verba saepe addita esse res ipsa ostendit: sensus inversus, & eversus clamat: corrupta sententia dolet; quae ubique prompta, si verba intrusa tollas; Exemplum unicum, sed quod fidem faciat meae suspicioni. lib. 2. Histor. cap. 48. *Mox Salvium (inquit) Coccejum fratris filium prima juvenia trepidum, & moerentem ultro solatus est, laudando pietatem ejus, castigando formidinem.* Quinque verba postrema alienam manum sapere convinceris, si subjectam Othonis orationem legas, qua nec pietatem laudat, nec timorem castigat. Delenda igitur, delenda. sed unde mihi tanta licentia, ut nullis usus codicibus quidquam delere ausim? Tu mihi auctor. Exemplum dedisti, quod si sequar, non culpandus. lib. 11. Ann. cap. 30. verba illa, *Scilicet ut in Libonem ex servis salvo Senatus consulto quaereretur*: ais, ambigi posse an a Glossemate, nimis modesta censura. vellem asseveranter ableganda dixisses. Imperitus & molestus Glossographus causam inversi Juris supposuit, sed verbis hujus aevi, non illius. Alibi saepe voces superfluere notas, & merito. Fateor non quaecumque tibi, eadem licere mihi juveni, in iis praecipue parum experto. Ideo ad te nugas nostras mittimus, ut censeas, judices, & si meruerint, probes: haut aliter mihi probandas. quam cuperem easdem comitaretur *Spongia: muneribus convenit illa meis.* Duo exemplaria emendationum Taciti mittimus, forte illorum alterum ad tuas perventurum manus. Si non rescripseris, utrumque digno fato periisse, intelligemus. Parva certe illorum jactura, sed spei, quam de tua amicitia concepi, maxima. Pe-

nuria scriptorum tuorum valde laboramus: librariorum incuriam culpamus; temporum dolemus turbas: quae tantis thesauris vehendis impedimento sunt. Multi eorum avidi quovis praetio emerent. Fidem dederat amicus omnia, quae haecenus mandasti typis, se missurum. Vel non potuit, vel oblitus est; Utrumque mihi molestum. In spe sumus. Salus tua, de qua saepe quereris, nos tenet anxios. Utinam modo ex voto nostro. Nam

— — — — — *Tu Troica dignus*

*Saecula, & Euboici transcendere pulveris annos,
Nestoreosque situs.*

Sanctius te salutat ex animo. Vale, vir maxime, & me tui amantem redama: Salmanticae tertio Idib. Januar. 1600.

Respondet *Lipsius* Centur. ad Italos & Hispanos LXXXIX. fuit vero hic *Mendoza* Burgenfis patria, & in Schola Salmantina, cum ibi studiis operam daret, Rector, deinde Canonicus Magistralis in Ecclesia Hispalensi, ut nos docet *Nic. Antonius* in Bibliothec. Hispan. Scriptorum recentiorum tom. 1. pag. 272. ubi & *Lipsii* ad eum epistolam memorat.

EPISTOLA DCCLXVIII.

Molto Illustre, & Eccellentissimo Signor mio.

Lovanium.

DA quel tempo in quã, ch'io mi trovai à Parigi in casa del Signor *Piteo*, col famoso *Cujatio*, & col celebre *Scaligero* (Triumvirato d' huomini di robbà lunga, pari forse all' antico d' arme, & di Stato, peroche si come l' uno s' hebbe à compartire il dominio del' Universo, così questi quasi il senno delle Leggi, & delle Greche Lettere, & Latine) hò sempre bramato d' esser da vostra Eccellentia conosciuto per devotissimo delle sue virtù sublimi, & senza paragone. Quivi fù distesamente ragionato delli studii, & della dottrina esquisita di lei & de libri dettati, esaltando al Cielo ogni suo parto, sì nelle cose, & sì nelle parole monde, & Latine, & proprie; & sopra tutto lo stile breve, & arguto, & fuor dell' uso hodierno, à prischi sommiigliante, la primiera volta, ch'io andasse in Francia hebbi nello Studio di Parigi stretta conversatione (anzi fui lor auditore) col *Turnebo*, con l' *Aurata*, & *Lambino*, & col *Dureto*, heroi nelle loro professioni; & col *Ramo* ancora, Censore presuntuoso (per non appellarlo bestiale) d' Aristotele; nel qual tempo il *Turnebo* compilava i libri de suoi Averfarii, hora cotanto pregiati, compiacendosi assai sovente di comunicarmi diversi passaggi di quell' opera bellissima. vivean etiandio all' hora il *Vicomerato*, & il *Scaligero* Padre, suo amico, & l' *Hospitale* Grand Cancelliere di Francia, & altri scientatissimi, che hanno illustrate le lettere: & Vostra Eccellentia ancor giovane per avventura si trattenneva in Roma, apprestandosi à pareggiarli, anzi, per poco, ad avvanzarli tutti, come successivamente have poi mandato ad effecutione con gli scritti suoi di varie facoltà, & arti nobilissime & come dice Plinio, *ad condendum stili nasum*, & per certo, quantunque sian ottimi, & degni di solo il suo ingegno, tutta-

viam

via questi trè ultimi della *Militia Romana*; degli *ordegni Guerreschi*, & della *Grandezza maravigliosa di Roma*, & del suo Imperio, (eccettuando sempre gli scolii in Tacito) per mio avviso, tengono il grado primiero; & la terza opera delle predette, rispetto alle altre ben si puote rassembrare à Nausicaa di Corfù Reina, nel vi. dell' *Odissea* d'Homero cantata, che servita da molte damigelle tutte bellissime, ella in grandezza surmontava col capo, & con la faccia, mostrandosi più formosa di loro,

Πασάων δ' ὑπὲρ ἧς κάρη ἔχει ἡδὲ μέτωπα,
Ρεία δ' ἀριγνώτη πέλεται, καλαὶ δὲ τε πᾶσαι.

E'altra avanza col capo, & con la fronte

Molto ben riguardevol, & leggiadra.

Frà lor, che la seguian tutte formose.

Per la qual cosa con l'occasione di tanti Romei, che in quest' anno Santo corrono à Roma, & in secondando l'intentione del Cardinale *Cesi*, mio Padrone, (Mecenate infra pochi, de' Letterati, & Dottissimo) ch' è di accogliere, & carezzare d'avantaggio questi devoti, col presentar loro inanzi, oltra li trattati di religione, che per tutto si veggono, la grandezza de suoi Romani, rimase in queste ruine: io hò volgarizzato la predetta terza opera di V. E., in che mi sono studiato d'usar vocaboli scielti, & dicevoli alla materia, & pareggianti i Latini, per quanto m'è stato possibile; mà io confesso di non mi essere sodisfatto, colpa di me, ò pure de l'Idioma, posciache novello, nè ancor alla sua perfectione asceso, nè fornito d'autori buoni in queste materie, non abbonda di voci. Comunque accada, tosto farà stampata insieme contre miei discorsi, l'un *delle Monete*, & del *Sestertio* poco inteso dalla più parte degli huomini; il secondo *delle delitie Turchesche*, superanti forse le Romane, almen da loro introdottè per le medesme cagioni, le quali minaccian il fine della Tirannide, che ci afflige: & il terzo, *delli Porti della Piaggia Romana*. Perciò che vivendo già in Roma quattro milioni d'anime (come ben ella prova) & ricevendo le vittuaglie la più parte dal Pelago, fù necessario, che vi fossero posti da riceverli Vasselli, essendo la detta Piaggia per se stessa la più tempestosa, & priva di ricetto di tutta quanta la costa d'Italia. Attendevamo, che V. E. venisse à riveder la sua amata Roma, la qual, come Cittadino, & gradito figlio, & benefattor di essa, & che l'ha tratta dalle tenebre alla luce cò scritti; & insieme tutti questi Reverendissimi Cardinali, & Prelati, & letterati s'apparecchiavano di ricever, & honorar la persona sua. Mà poiche non torna indietro, ci rimarremo con questo desiderio, intanto pregando Iddio, che le accresca i contenti, & le prolunghi la vita in miglior sanità, per utile, & diletto degli amatori delle più polite lettere, & delle sane intelligentie degli autori. Ben la prego in conclusione, che infra le fatiche, le quali have in affetto per divulgare, la prima essa nelli *Commentarii* de Cesare, li quali insin' ad hora, insieme col Polibio sono stati abbandonati, & in quelle vece spese le vigilie, & li studii consumati sopra Vegetio, & altri, che men intesero la buona militia Romana antica. Quando comparrian dalla sua.

scola bene corretti, & si come hà per costume nel suo Tacito, adducendo le ragioni de' testi differenti, io pubblicherò l'annotationi mie sopra loro intorno alla militia, havendo di già posto in disegno tutti li fatti d'arme terrestri, & maritimi, cò siti de' luoghi, dove intervennero li più da me veduti. Dichiaro etiandio, secondo la capacità mia, l'ordinanza della legione, & la composition della Centuria, nelle quattro maniere de' Soldati, Veliti, Hastati, Principi, & Triarii & le schiere loro *σίχος*, onde nasce il *καταζυγός*, non da altri, ch' io sapia insin ad hora fatto, ovvero compiuto. Et con questo à V. E. mi raccomando, & profero cordialmente, & la prego a perdonarmi, s'io scrivo nel mio linguaggio, per ischivar tedio, & sapendo ch'ella & l'intende, & lo parla familiarissimamente.

Di Roma à 25. d'Aprile M. D. C.

Di vostra Signoria molto illustre

Servitore Filippo Pigafetta.

Respondit Lipsius Centur. ad Italos xciii. Pigafettae mentionem facit Pignor. in Symbol. Epist. xxi. & xxii.

' E P I S T O L A DCCLXIX.

EMMANUEL CORREA LUSITANUS

J. Lipsio, viro in re literaria praestantissimo S. P.

Lovanium.

STatueram jamdudum nominis tui celebritate, & scriptorum majestate permotus, Lipsi doctissime, quando aliter non poteram, te per literas invisere, convenire, alloqui; ac mea inprimis, totius deinde Lusitaniae voce gratulator tibi, & consiliator accedere. Huic operi millies jam manus apposuissem, evasissemque voti compos; nisi locorum distantia, tabellariorum caritas; nisi, quod certius est, hinc ingenii nostri tenuitas, illinc Lipsii detereret auctoritas. Continui igitur me, & in praesens aliquod, si quod forte incidisset, tempus hanc animi distuli propensionem. Atqui tandem justitia obtinet, Quid plura? allata est mihi nuper, tanquam e coelo, epistola Illustrissimi *Nuni Mendozii*, discipuli quondam nostri, mihiq; multis nominibus carissimi; &, si nobilitatis leges inspicias, dignissimi, quem litterati omnes plurimi faciant. Haec longe viae comitem, ac importuni maris levamen secum attulit¹ epistolam tuam ad eundem *Mendozium* missam, doctissimam profecto, & quae Lipsianam lucernam prae se ferat. Eam amicissime juxta & avidissime perlegi: multis amplexibus, multis excepi osculis: ac sinui meo

ut

¹ Respondet Lipsius Centur. ad Italos xcvi. Hic Correa memoratur a Nic. Antonio in Tom. I. Biblioth. Script. Hispan. recentiorum pag. 264. an fuerit ex eadem gente, qua Thomas Correa, Professor Humanioris disciplinae Bononiae, cujus mortui locum Lipsius fuit rogatus subire, (vid. Epist. DCXL. & alias) nescio. certe ille Conimbriae natus fuit. vide Ghilini Theatr. Literator. t. II. pag. 233.

² Centur. ad Italos & Hispan. LXXXIV.

ut veri amoris, veraeque fidei Symbolum amantissime inferui. Gratulor igitur tibi, vir doctissime, Lusitanorum nomine praeclarissimam animi tui indolem, largissimam in totum terrarum Orbem munificentiam, maximeque in hanc nostram extremae Hispaniae regiunculam; quae ita libris tuis pascitur, ita fruitur, & certo quodam modo alitur, & vivit, ut sibi tantum elucubrata, sibi tantum edita fuisse opera tua existimet. Adeoque in Lipsii nomen affecti sunt Lusitani, ut mihi suspicio sit, fore aliquando, ut originis nomine inmutato Lipsiani appellentur. Hos igitur vicissim ama; & quos mira doctrinae varietate erudire, selecta verborum venustate expolire non desinis, in gratiae etiam tuae partem admitte, amicissimos tui agnosce, & animo dignos reputa, quos animi thesauris accumulas. Me etiam in tuis colloca; quem, quoties voles, obsequio tuo paratissimum invenies. Quod autem semper velis, & confidentissime velis, nihil mihi gratius, nihil erit honorificentius. Vale. Olisipone, Calendis Junii ∞ 100.

EPISTOLA DCCLXX.

H. GROTIUS

*J. Lipsio literarum principi salutem.**Lovanium.*

Occasionem ad te, Vir Clarissime, scribendi, quae rara ob civiles hosce motus, oblatam non neglexi. Edideram hisce diebus Aratum cum triplici interpretatione, Ciceroniana, quam interpolavi, Caesaris Germanici, quae ex Manuscripto renovata, & Avieni, additis variis Notis. Id opus ad te misi, ut iudicium tuum, tu mihi vicissim, quem ego hac in re Iudicem agnosco ordinarium. Si qua sunt, quae tu ad istos authores observaveris, ut soles ad omnes, mihi, rogo, transcribas, ut eo Emblemate ormentur *δεύτεραι Φερσίδες*. Vidimus Panegyricum tuum ad Duces, & alterum Plinii paulo minus quam tuum, in quo tam varia, & te digna annotasse ab omnibus iudicaris, ut incredibile vobis, intolerabile nobis, fuscites desiderium tui, cui pares non essemus, nisi nos reficeret aura *Scaligerana*. Sumus omnes tui quam studiosissimi, praesertim vero pater meus *J. Grotius*, qui te semper coluit, maximique fecit, & nunc quam officiosissime salutatur. Vale, ut valeant literae, & nobis, ubi visum erit, rescribere ne dedigneris. XIII. Septem. 10100.

Respondet *Lipsius* Centur. III. ad Belgas Epist. LXIV.

EPISTOLA DCCLXXI.

H. GROTIUS

*J. Lipsio S.**Lovanium.*

Mitto tibi, Lipsi praeclarissime, Tragoediam Sacram. Inclamabis, scio, Periculosae plenum opus aleae. Fateor: Aliter haec sacra non constant. Scri-

Scripturum praevidere necesse est, nauseantes nonnullos, damnantes alios, convitiis proscindentes, quicquid legunt, plurimos. Ego certe, nisi ista omnia ante scripturae exordium praemeditando anticipassem, tam fallerer, quam qui maxime. Et tamen, ecce, profiteor palam, nihil dedisse alterutri partium. Toti Orbi Christiano haec vigilata sunt; nec haec tantum: sed quidquid a me unquam ejusmodi, & quantulumcunque proficiscetur, prima erit cautio, ne quid sit non καθολικὸν καὶ εὐκταμένικόν, ut antiqui Patres loquebantur. Tu judicabis quantum libet, & licet. Tanti enim esse non dubium. Nam abs quicunque scripta, & quovis modo, sacra sunt, & seria. De Tragoedia quoque ipsa sententiam tuam exspecto. Est enim haec tua jam ab antiquo provincia Theatris pulpitisque legem dicere, & nigrum vitiis praefigere Theta. Hoc olim Criticorum fuit. Nunc quo non nomen transfertur, nostro potissimum adulescentum vitio, qui calentes juvenia procul avectas volatu alites consequi temere conamur. Graece melius dicerem, πλεονάζομεν. Vale, vir maxime. Kal. Nov. Anni cιoιoι.

Respondet *Lipsius* Centur. III. Miscell. Epist. xcix.

EPISTOLA DCCLXXII.

HIERONYMUS FERRERIUS

J. Lipsio.

Lovanium.

Miraris, Lipsi, video, ad hujus epistolae inspectionem, ut quem per integrum biennium silentem animadvertisti, fortassisque inde vita privatum cum illis censueras, qui meae animae adversarium potentem insidiari certo sciunt, ita ex abrupto, & qua minime sperare debebas, tibi oblatum inspicias. Ecce quid in humanis rebus fortuna solet efficere. & ut is probus vir (nomen tibi cognitum) aliud faciendo, quam sponderat, quantum mihi bona fide secum agenti incommodi, sed & damni intulerit. Non tamen mirum, vel non immerito accidisse fateor, si & nos ipsi ea, quae redemptori nostro promissimus, nequaquam praestamus. At si silentium hoc inde profectum intelligas, quia scilicet ad longinquas partes, fortuna impellente, delatus sim, unde ad vestras nulla commercii ratione rectus pateret aditus. Certe jam admirari defines: tum maxime, si hoc intellexeris, nempe me interim continua spe detentum, quo minus ad vos propediem reverterer; & propterea quem brevi visurum rebar tibi literas dare superfluum, aut non necessarium judicarem. At vero quamquam notum sit, amicitias non ex literis, sed ex animo pendere, non diutius tamen producendum, quin imò interrumpendum silentium per hanc oblatam casu occasionem duxi, ne videlicet si diutius tacuisssem, me mortuum, vel longinquitate impeditum, fortunaeve adversae ictibus adeo exagitatum opineris, ut vel tui oblitus sim, cujus memoria benevolentiae

er-

1 Respondet *Lipsius* Cent. ad Gallos & Germanos Epist. LXXXI.

ergo & observantiae meae in te memor radices numquam perituras egit: simul & ut tibi caeterisque amicis, si quos istic adhuc superstites habeo, me inter vivos esse, sed &, quod ex Dei gratia est, bene habere notum fiat. Quamquam fortasse dices, quid amplius ad me infaelicis istius fortis hominis amicitia? si cum plebejis ad fortunae auram duceris; nihil quidem. At Lipsius meus altius sapit. & virtutem constanter ab adolescentia amplexus professusque Deae illius, fronte capillatae, motum si servat, non obliervat. Quid ni itaque si idem observantiae meae & amoris mei erga se memor, & quid de me sit, certior ex animo reddi aliquando optabit? sed & quaeret. Optabit equidem, & una quaecunque adversa mihi occurrerint, non jucundo; prospera vero hilari animo, si referre audierit, scio excepturum. Doleo interim, & quantum exprimere nequeo, calamitates indies apud vos, ut audio, augeri, nedum diminui: tantumque sanguinis ex tot viris caesis, & recenter effusum, & strati cadaveribus campi horribilem sui & penitus abhorrescendam faciem exhibuerint. Deus bone quamdiu tot ac tantis malis mites, placidosque Flandros vexari patieris, sed & quid inter nos temere digladiamur? quid bellamus alii cum aliis? (aureum os haec loquitur) quibus praeceptum est, ut & eos qui nos oderint amemus? non animadvertis? (nonnulli inquit) & τῆς ἀντικειμένην μερίδα ἐγγὺς οἱ πολεμικοὶ τὸν τρόπον, καὶ τὸ δόκιμον τῷ κοινῷ κακῷ θηρώμενοι τῇ ἑαυτῶν αἰσχύνῃ ἐγκαλλωπιζόμενοι, atqui subjunge tu, si placet illa Isocratica, Πεφύκασιν αἱ πονηρεὶ φύσεις, καὶ Φιλόνηκοι μὴ πρόπερον λήγειν τῆς διαμάχης καὶ ἔριδος, πρὶν ἢ καί τινι δέξασθαι τὴν πληγὴν, καὶ ἀνεπίλητον πικρίας πείραν λαβεῖν. Exsurge Deus, tu disperge gentes, quae bella volunt: sed hisce missis dolorem vel sola recordatione facientibus ad exhilarantia transeo: atque primum ad hoc, quod, etsi forsitan aliunde acceperis, gaudeo tamen me tibi in praefens referre, nempe nomen tuum in omnibus his oris Sarmaticis, & ultra Boristhenen celeberrimum esse: & quidem apud plurimos doctrina & gradu praestantissimos viros magno in pretio haberi, quos tuorum scriptorum aequae ac de tuo statu esse sollicitos cognovi. Quid si dicerem te, quamquam absentem reique ignarum, ut cum ipsis amicitiam contraherem, non parum contulisse? si id praestarem, de rei successu te certiores redderem: Siquidem nonnulli postquam me tibi familiariter notum intellexerunt, tanto libentius in suam me amicitiam attraxerunt: atque inter caeteros Illustrissimus ac Reverendissimus Archiepiscopus Leopoltanus, qui adeo te visendi studio tenetur; ut secundus senator Reip: amplissimae familiae praecipuus; nonum aetatis septenarium adimplens, de utinere ad Belgas non ob aliam occasionem suscipiendo, quam ut te conveniat, ac ex facie noscat, cogitare, sed & deliberare audeat. Voluptati non exiguae ipsius voluptas mihi est; quam ex tuorum scriptorum lectione jucundissima eum excerpere video, & ipsemet saepius est testatus vir pietate insignis, sanctus moribus, doctrinaque & humanitate, quae duo inter eminentes raro inveniuntur, etiam inter claros lucidissimus. Hic ille ² Joannes Demetrius Solicovius, qui pro componendis Principum supremorum in dissentientibus inter se animis, imo totius Reip. Christianae rebus ob varios casus dis-

Tom. II.

I

fo-

² Jo. Demetrii hujus Solicovii vita & elogium &c. sunt in Ghilini Theatro literat. Tom. II. pag. 144.

solutis ad summum Pontificem, Imperatorem, Reges & alios principes multis legationibus faeliciter est functus, quique (ut paucis ejus meritorum summam concludam) de tota Christianorum religione, de quiete & bono publico ita est meritus, ut paucos pares alibi, neminem vero, qui eum inter Sarmatas superiorem habere merito credatur. Quae res etiam effecerunt, ut non tantum in honore summo sit positus, sed probitate & prudentia admirabilis ab omnibus suspiciatur. neque affirmare ausim, an ab eo instituto itinere, de quo supra, abstinere volet: non volet profecto, nisi aetatis, atque instantium Reip: negotiorum gravitas, quibus valde premitur, nolentem desistere removeretur. idem literas ad te aliquando dedisse, quibus tecum notitiam contraheret, mihi retulit. nullum tamen responsum (quod maxime optare videtur) dolens se accepisse, conquestus est: quin imo an ejus epistolae in tuas manus redditae fuerint, nec ne, adhuc ignorare. Quod ea ratione tibi scribi existimes velim, ut tanti viri ac de tua amicitia maxime meriti, (quamquam fortassis hoc haecenus ignorasti) nomen & merita in posterum tibi innotescant. Illi, ut scivi, tuos mores aperui, quos etsi ex tuis monumentis, eosdem referentibus honestissimos, perspectos haberet, me tamen idem enarrante, & attentus jubebat repetere, quod gaudens saepius audivisset. te humanum, te comem, ut decet virum sapientem, & prudentum virorum congressu praeter caetera, quae virtutem sapiant & tibi cordi sunt; mirum in modum delectari, affirmavi: si de ejus desiderio, nedum meritis, tibi constitisset, prior ad ipsum scribendi provinciam libenter suscepisses, non ut ipse primus ad te scriberet, passus esses, qui hoc unum scilicet, ut plus aliis quam tibi sis natus, & ab ineunte aetate profitearis, & alia quae ex officio subaddenda existimavi, & qualis es circa eos, qui merentur, officiosum te esse intelligeret. Longiorem hanc epistolam, quam si ex more tibi grato exararetur, agnosco. tibi, inquam, qui brevitatis ac proprie doctaeque scribendi, sed & loquendi observantissimus doctrinam & methodum eam exactissime possideas, quae ad haec requiruntur: ut propterea non immerito nostro aevo te literarum principem ac parentem appellent, me autem neutrum capientem (quî caperem diversissima professus?) sicuti debiles oculi post radiorum solarium intuitionem solent, ad sermonis elegantiam potius caecutire, & te propterea (quum tantum ausus fuerim) cum primum Latine ad te scribentem animadvertes, & admiratum ire non dubito: tum maxime cum seposito per tot annorum spatium, vel ad tantos fragores & bellicos impetus, inter quos ut noris, sum continuo versatus, saltem corrupto, si non oblito Latino sermone, a quovis argui & merito possum, verumque illud sit viris doctissimis aut elegantissime, aut nequaquam scribendum; sed & hoc si fecerim, earum rerum numero adjungi meretur, quas necessitas producit. est enim haec idonea quandoque magistra, & boni institutoris saepius vicem gerit. nam causae nequaquam desunt, quibus ad sic scribendum impellat. Non verebor tamen nonnulla adhuc adjicere, & si quaesieris, (quod futurum puto,) quid toto hoc biennio egerim, intelligas. Bellum harum gentium inspicio ac Sueci pugnas, arma contra proprium Regem tractantis,

commiffas, & Valachi non laceffiti tamen contra Polonos, fed non impune moti, profpicio, & fi quid interim otii concessum fuit, id laetis sympofiiis venationibusque ac fimilibus exercitationibus, quibus Sarmatae per otium delectantur, est traditum. Sed & in militaribus studiis, dum armis sepositis quiete frui licebat, meo more aliquam operam impendere non sum oblitus: tabulas siquidem illas meas militares, Italico sermone quondam scriptas, Latinas reddidi, & in aliam formam redegi, quibus ad lucem addendam quibusdam in locis subjunxisse quaedam monita, sed & exempla non inutile judicavi. Haec Polemica ad tuorum Politicorum imitationem visum est appellare: quorum morem, ut potui, sum sequutus: utinam essem assequutus. In id tamen praecipue mihi incumbendum videbatur, ut currentes ad scopum imitarer, qui quamquam singuli capturos se cum non sperent, haud tamen a cursu abstinere, eo contenti, ut saltem vel inter priores visi sint cucurrisse, vel omnibus nervis contendisse, ut optatam metam attingerent: Nihilominus spero adhuc (si Deus me de regressu agitantem felici itinere frui volet) ex tua humanitate, mi Doctor, aliqua obtenturum, quibus haec mea elegantiora in publicum exire audeant. Hujus epistolae, longius quam oporteret, extensae quidquam praeterea de meis rebus singularius in praesens inferere mihi non licet, verito, ne ex hac importuna protractione te fastidio affici contingeret, cui interim satis sit, me Dei beneficio apud Sarmatas, inter vivos, sed & bene esse, tibi indicasse, alias, ut spero, & brevi & brevius scripturum; si tamen literarum mearum lectione, te gravissimis studiis occupatum, nequaquam taedio affici intellexero.

Et Vale, meque ut quondam mihi visum est, ama: faxitque Deus ut continuo optima valetudine fruaris, diutissimeque superstes sis, qui publicae utilitati tam suavissimos quam optatissimos fructus parias. Leopoli Idibus Decemb. MDC.

EPISTOLA DCCLXXIII.

Σοφώτατέ μοι κύριε Γεώργιε Λείψιε.

Αλλω ἐγὼ καὶ πρὸς τὴν εἰκόνα τῆς τοῦ νοῦς ὀφθαλμοῖς ἐθεώρου, τὴν θαυμαστῶν σὺν ἔντυγμα των πινάκων διελθὼν, καὶ μεγάλης χαρᾶς ἐμπλόμῳ, ὅταν πῶς ἐδόκω τῆς σὺν γλώττης ἐξακούειν τοιαῦτα φθελόμενης, οἷα ἐκείνη περιέχεται τοῖς τῷ δέ με καθεῖλε πόθῳ πρὸς σέ, ὥστε πολλάκις, τίς δώσει μοι πτέρυγας ὥστε περισεῖς, εἰρηκέναι με, καὶ πελαγήσῃ καὶ πρὸς τὸ σοφώτατον Λείψιον καταπαύσω, τῆς τοῦ ἀνδρός σοφίας τε ἀπολαυσόμενος καὶ ἀτίκιστος. ἔξεκαίε δέ μοι τὸ σπινθῆρα τῆς πόθου ὁ πανιερώτατος ἀρχιεπίσκοπος Λεοντοπόλεως κύριε Γεώργιος Δημήτριος Σολικόβις τὴν ἐπαίνον, ὡς ἀξίως εἰ συχνάκις διεξιών. ὅταν δ' αὖθις συνέβη μοι τῷ σοφώτατῳ κυρίῳ Γεωργίῳ τῷ φερρέριῳ ἐνωθῆναι, ἐκείνῳ ὁ ψαλμὸς δα-

I 2

νει-

i Respondet Lipsius Centur. ad Germanos Epist. lxxxiv. verbis Latinis Graeca plurima miscens; cum oportuisset totam Graecam scribere, si par pari reponere voluisset.

νεισάμεν^Θ χρώμα^αα, ποιουσί^Θ ῥόπως τὴν παρ' ἐμοὶ εἰκόνα ἐκείνῃ ἡυτρέπησεν, ὥστε ἔ-
μόνον τὴν ἐμὴν δ' Ὀφροσύνην εἰς τὸ μᾶλλον αὐξάνεας, ἀλλὰ καὶ σὺ τῇ Φιλίᾳ ἡνάγκα-
σε παρσιμύζεας. ἔδ' ἔγ' ὃ δωρηθεῖν ὑπομένειν ὑπερῆας, μόνον ἐμὲ τῆς σῆς Φιλίας,
τῇ γεωμετρικῇ μεμνημέν^Θ κανόν^Θ τῇ λέγοντος, τὸ, τὰ αὐτὰ τῷ αὐτῷ καὶ ἀλ-
λήλοις εἶναι δεῖ^{τα} αὐτὰ. Δεσπότην τοιγαροῦν ἔχοντός μου τ' ἐκλαμπρότατον ἀρχιε-
πίσκοπον, τ' ἔγω σὲ καθ' ὑπερβολὴν φιλοῦντα, ὥστε σὺ καὶ τὰ πονήματα εἰς τὴν
Εἰλάδα πέμπειν, ἵνα σὺ καὶ κεῖ διακύρητῇαι τῆνομα, καὶ τῆς μετὰ τὴν ἀγενεσιέτου-
κυρίᾳ Φερρέρι^ς Διατριβῆς ἐντυχόντα, λοιπὴν ἢ καὶ πρὸς τὴν σὴν γράφειν παιδείαν
μακρὰν ἀποῦσαν, τὴν τῆς ἐμῆς ψυχῆς διάθεις Φανερόντα, καὶ παροξύνειν τὸν
Φιλοῦντά σε ἀντιφιλεῖν Κύριλλον. ὃ Διὰ σῶν λογιωπάτων γραμμάτων ἀναγῆναι μὴ
ἀπολείπης, Δειψίε μοι σφώτατε καὶ παμφίλτατε: ἐν Λεοντοπόλει τετρακοσῇ Ἰαννα-
ρίᾳ μὲνός. α. χ. α.

Δεῖλ^Θ σὸς κατὰ πάντα

² Κύριλλ^Θ μέγας Ἀρχιμανδρίτης τῆς Ἀλεξανδρείας καὶ Ἐξάρχ^Θ.

² Hic est Cyrillus ille Lucaris, cujus fama totam Europam est pervagata, & de quo omnia colle-
git Cel. Fabricius Biblioth. Graecae Tom. x. pag. 499. cui addi possunt Acta Lips. A. 1687. pag. 95.
Clerici Biblioth. Univ. 1686. pag. 68. & Ephemerid. Parisien. tomo XLIII. in initio. fuisse vero Cy-
rillum hoc tempore Leopoli, missum a Meletio, apparet ex Smithi narratione de vita, studiis, &c.
Cyrilli pag. 12.

ΕΠΙΣΤΟΛΑ DCCLXXIV.

LUDOVICUS SEPTALIUS

Cl. V. J. Lipsio S.

Lovanium.

QUanti te faciam, semperque fecerim, Vir clarissime, facilius animo putare;
quam stilo exprimere possum. Tantum enim elegantiae doctrinaeque
tribuo, ut quo magis ipse ab iisdem absum, eo minus in earum possessoribus
amandis cuiquam concedam. Ac profecto ita tu quidem de universa re litte-
raria & Antiquitate meritis es, ut qui non in idem mecum certamen concur-
rat, parum ipse in litteras animatus videatur. Concurrent vero non in urbe
tantum nostra, sed in Italia universa magni & nomine praestantes viri: qui
cum in eo sedulo essent, ut quem affectum tibi ipsi exhibere non possent,
eundem in aliquo tuorum (quos velut Eruditionis alumnos ex intervallo nobis
submittis) exprimerent: ego pulcherrimam conatibus meis occasionem nactus
in Erycio Puteano tuo fui: quem ut acceperam Jo. Bapt. Sacco & per eum Prin-
cipi a te commendatum, fovere & ipse, & studiosa quadam aemulatione ob-
stringere re ipsa coepi, quanto magis id alii verbis profitebantur: eo etiam li-
bentius, quod in eodem Doctoris sui aliquam effigiem clare perspexi; animi
praeterea candor, modestia insignis, ac egregia quaedam indoles me ad eum
amandum quasi jure suo compellebant. Eidem non modo in acerrimo morbo
adfui, medicamque opem tuli, sed etiam in confinio bonae valetudinis con-
stituto auctor aëris mutandi fui. Cum perillustri Jo. Vincentio Pinello, ami-
cific-

cissimo meo, per litteras egi, ut in lare ejus in *Pauli Aicardi* doctissimi viri locum (qui paulo ante extinctus fuerat) susciperetur. susceptus est. Cum vero nec desiderium absentis ferre possem, simulque benefaciendi ansam e meis quasi manibus in *Pinellum* transtulissem; de revocando, & ad publicum Professionis munus permovendo cogitationem suscepi, ut aliquam tui partem hic publice audiremus. Quid multis, actum, transactum est, nec consilii poenituit. Illud vero accidit, ut quam laudem ille Panegyrico egregie dicto tibi peperisse putabat, ejus pars aliqua communi hominum voce in me collata sit, quam ne diutius injuria usurparem, hac ecce epistola in te universam refundo. etiam atque etiam te rogans; ut gratus acceptusque conatus affectusque meus sit, quem aeternum tibi spondeo, & voveo. Mediolani ix. Kal. Feb. CIO. IOL.

Scripserat *Lipsius* ad *Septalium* Epistolam, quae est in i. Centur. ad Belgas ix. sed ea non reddita *Septalio*, ad hanc respondet ibid. Epist. lxx. celeberrimus vero fuit & suae aetatis fere Medicorum princeps *Septalius*, qui immensistulis & honoribus auctus, & invitatus a multis regibus, civitatibus & Academiis & a Philippo iv. Protophysici honore totius status Mediolanensis ornatus, recusavit vero Historiographii Regii. vide *Ghilini* Theatr. literat. t. i. p. 150. & *Imperial.* mus. p. 189. qui obiisse 12. Sept. 1633. ait, quare perperam *Mercklinus* Anno 1630. mortem adscribit. nomen *Septalii* habuit gens illa a septem alis, quas pro insigni gerebat. vid. *Er. Putzan.* Promulsid. Epist. xxix. Filius ejus *Manfredus* memoratur a *Bosca* de origine Biblioth. Ambros. pag. 61. & alter *Martinus* Episcopus Dertonensis. in *Morerii* lexico bis memoratur, *Septalii* & *Settalae* nomine, & sub finem seculi xvi. natus dicitur, cum A. 1550. medio seculo prodierit in lucem. vide auctores ibi laudatos.

i. Vid. *Gualdi* vitam *Pinelli.* pag. 348. Edit. Londin.

EPISTOLA DCCLXXV.

JOHANNES ALNPECKIUS

J. Lipsio S. P. D.

Lovanium.

Fere stupidus musso, Doctissime & Clarissime Lipsi, has ad te exarans; dum ex eruditissimis Editionibus tuis, quibus magnopere delector, te unicum lumen Antiquae Latinitatis agnosco: Sed parce insolentiae hominis, quae prodit ex animo tui & editionum tuarum studiosissimo. Dominum *Joachimum Roggers*, dum sese tibi consanguineum diceret, tui causa magnopere colui, & ei, quantum ex me fieri potuit, praesto fui. Egit hinc causam cum pessimis Judaeis, & licet ipsa causa omnino clara & aperta fuerit, ut ex instrumentis litis, quae penes Dominum *Joachimum* sunt, patet: illi corruptis argento notariis, imo & Judicibus, perplexam eam reddiderunt, & ita perplexam, ut omnino ultra spe frustraremur. Et certe ni divinum auxilium, & tua creberrima fama, quae te universo orbi notum facit, ei subvenisset, causa cecidisset. Dum enim res esset in dubio; ecce repentinum auxilium divinum, Sacrilegi duo comprahensi, & tormentis expositi sunt, qui etiam Apellam hunc, cui dominus *Joachimus* dicam scripsit, postulaverunt. Praeterea rumor ultro citroque a nobis missitatus, ad multos Clarissimos viros tui

amantissimos pervenit, eum tibi esse consanguineum. Illustrissimus Archiepiscopus nolter, cui parem nunquam habuit Russia, & Dominus *Jacobus Pretwicz* Capitaneus Trembozoliensis, tui causa dederunt Domino *Joachimo* commendatitias litteras, ad Magnificum Dominum Palatinum Russiae, qui supremum Judicem Apellarum agit in Russia, qui senioribus Judaeis severe injunxit, ut Domino *Joachimo* damnum subito restituant. Judaei contra comminationem conniventes Dominum *Joachimum* indemnem reddiderunt. Id vero accidit praeter spem nostram. Tale enim haec gens invisa diis nacta est hic in regno Poloniae accrementum, ut vix privilegiis & libertatibus, nobiles (quibus hoc regnum constat) non superent, & saepenumero citius ex nobili, quam Judaeo iustitia administretur. Primae nobilitatis viris ultra modum assentantur, ut eis praedia villas & oppida locitent; & plerunque majori pretio, quam ipsi nobiles congregare possint, conducunt, & sic absente Domino, (nam praesenti clementia in subditos non concederet) hi nebulones gravia & intolerabilia quaeque e pauperrimis quibuscvis subditis corradunt, & extorquent. Eos autem nobiles, qui sunt tenuium fortunarum, & communem plebem intolerabili fœnore bonis exuunt, & in extremam pauperiem dant praecipites: nam licet pignus decuplo superet pecuniam mutuaticiam, si elapso anno & sex hebdomadis non reddunt mutuum cum fœnore (plerunque xxv & xxx pro centenis) non tenetur Judaeus ad pignus restituendum. tali fruitur haec bellua consumtrix pauperis vulgi privilegio. Mercatores Civitatum omnino depauperant: nam libere omnes mercaturas exercent, domi & foris in itinere sordidissime & parcissime vivunt, lucro tantum intenti. Civiles vero mercatores plus politiei & suo honori indulgentes, plerunque occidunt. Imo etiam & proventus annui Ecclesiarum, quas vulgo Plebanias vocant, in Volhinia illis locantur; sed vereor ne me aenigma loqui arbitreris, qui serio loquor. Judices Regionum, Urbium & oppidorum muneribus corrumpunt, Justitia rara & obscura, quam tu libro secundo Politicorum Capite x. velut solem facis, qui nisi imperiorum omne corpus illuceat, tenebrae in iis, tempestas, nimbi; quales autem jam jam sint tenebrae, ex instrumentis litis Domini *Joachimi* egregie experieris, & vereor ne etiam brevi tempestas, nimbi, hoc regnum obruant, opportune per hanc gentem nequissimam. quae etiam saepissime in hoc regno a Christianorum liberorum sanguine non abhorruit, sed tamen plerunque impune, ob quam licentiam fere ex omni Europa haec sordida, & vagabunda colluvies hominum nihili, ad nos confluit, ut vix prae tanta hominum otiosorum multitudine populares nostri respirare possint. Unde autem tanta licentia huic spurcissimae genti in hoc regno accedat, *Martinus Cromerus* gravissimus scriptor nationis Poloniae libro duodecimo Chronicorum commemorat. Ego vero arbitror, licet rex juramento confirmet universaliter omnia privilegia antecessorum suorum, tali juramento non esse adeo obstrictum ad tale privilegium, quod nactum est incestu Regis *Casimiri*, & quod est pestis universae Reipublicae Polonorum. imo libertate Christiana indignum. nonne melius est privari membro, quam toto corpore? Quid enim

potest esse absurdus? Judaeum non posse convinci testimonio Christianorum absque testimonio Judaeorum? dum Talmuth illorum, seu chaös sacrae scripturae, omnino eis prohibeat testificari Christiano contra Judaeum. Sed est mihi ad manus consilium cujusdam Jurisperiti, quod Clarissimo & Doctissimo Domino *Danieli Richio*, Andegavenfi Gallo, pro Domino *Joachimo* communicavit, quod ego gratum tibi fore haud diffidens, transmitto. Ut tibi liqueat, qualis sit abusus privilegii Judaeorum, qui nobis & universae Reipub. Polonorum summum portendit detrimentum. Praenominatus Dominus *Richius* hîc nobiscum fere quatuor menses, iter agens Constantinopolin, conjuncte amicitiae officiis vixit, & tui causa, (nam observantissimus tui est) plurimum Domino *Joachimo* praestitit auxilii. est enim homo omni liberali doctrina politissimus, in quo ego semper judicavi & in capiendo consilio prudentiam summam esse, & in dando fidem. Domino *Georgio Douzae* filio Doctissimi & Clarissimi *Jani* (ô dignum tali patre filium) qui mecum, dum Constantinopolin iter ageret, conjunctus erat familiaritate, salutem plurimam aut scribes aut nunciabis, quem diem suum obiisse nescio quae fama advolavit: utique nos homuli, mortales sumus. Dolerem tamen, adeo immature occidisse adolescentem apprime doctum, cujus etiam nactus sum Itinerarium. Vale, vir Doctissime, & Clarissime, summum Belgicae decus & ornamentum, & insolentiae meae ac temeritati ignosce, nec finas rudi & extemporali stilo scriptas literas pro tua humanitate apud te repulsam pati. pro qua tua erga me benevolentia a me iterum omnia summa in te studia officiaque expectata. Datae Leopoli Russiae Pridie Nonas Februarii MDCI.

Domini *Simonis Simonidae*, cujus ego sororis filiam mihi matrimonio junctam habeo, postremam editionem, tibi transmitto, gratam fore existimans.

Respondet Lipsius Centur. ad Germanos Epist. LXXXV.

EPISTOLA DCCLXXVI.

Illustre, & Eccellentissimo Signor mio Osservandissimo.

Lovanium.

IL Signor *Marco Velfero* m' hà fin d' Augusta donato il corporeo ritratto di vostra Signoria in bellissima stampa di rame, ch' hà di sopra la impresa di lei, & di sotto un tetrastico per elogio. In un medesimo tempo il Signor *Hercole Achilli*, ducal secretario di Mantua, m' ha gratiato delle opere Lipsiane, con le quali mi cibo l' intelletto con meraviglioso diletto, & giovamento insieme. Amendue come amici, & ammiratori della dottrina, & virtù di Vostra Signora, facendomi testimonio, che l' humanità fregia, & perfezionava le pregiatissime qualità sue, m' hanno invitato à scriverle, & così ad ordire feco servitù, & amicitia, sapendo essere costume hoggimai inveterato in me di procurarmi con ogni mezzo la gratia di quanti letterati, virtuosi, & scienziati fioriscano in questo secolo. Così hò preso ardire di scrivere la presente

à V. S. & di spiegar con un Sonetto la nobilissima sua Impresa, & con uno Epigramma trattando le sue laudi, honorarmi con esse il nome, & di rendermi non affatto indegno d'esser conosciuto da lei, cui riverisco, & ammiro in gran maniera. Piaccia à Dio, che cotal mio desir non habbia volato troppo alto, secondo il nostro Lirico Poëta; onde egli perciò non venga fulminato da V. S. & morto poi se ne giaccia. Mà che? mi sostentino detti Signori con la dignità loro, & con l'auttorità ch' hanno con V. S., insinuandomi per così dire nella gratia di quella, pregiata da Principi & ambita da peregrini ingegni. Col fenne della quale speranza, in bocca chiudole labra della mia penna, bacciando à V. S. la mano, con le cui dita scrive l'immortalità istessa; cupidamente aspettando sue lettere. Dalla *Pinlega* Castello Mantuano, di cui son Giudice, & Vicario, il dì xxv di Febraro MD. ci.

Di Vostra Signoria Illustre, & Excellentissima.

Divotissimo Servitore

Antonio Beffa Negrini.

Ad Clarissimum Virum, Bonarumque Artium omnium cultorem elegantissimum, omniumque scriptorum eruditissimum Dominum *Justum Lipsium*.

Antonius Beffa Nigrinus, ex Innominatorum Academia, cognomento *Fumidus*.

*Ut Coelo Lapsus Lipsi te suspicit omnis,
Artes qui callet, Palladiasque colit.*

*Sic tibi, quid factis, dictis, & nomine Justus
Omnibus & Justum est laudibus accinere.*

*Fumidus haec ideo, quae dat quoque carmina, fume,
Forte tua fumo hoc, lux magis eniteat.*

Al Signor *Giusto Lipsio*.

Dovunque guida Febo il suo dorato

*Carro, dovunque aggira i suoi destrieri,
O' sia nel nostro, ò negli altrù Emisperi,
Sotto l'adusto Ciel, sotto il gelato;*

Con mirabil saper, Lipsio, illustrato

*Hai già l'oscuro de' dubii sentieri
Con indefessa penna; E'l ver de' veri
Infin nel seno à Giove investigato.*

Tu il cammin dela mente hà sì bien retto,

*Solcando l'aria, il mar, la terra, e'l Cielo;
Ch' hai vinto, chi meglio habbia e scritto, e letto.*

Tu d'ogni antica nube hai tratto il velo,

*E rischiarato ogni più fosco detto
Tal ch' è homai tuo l' Altar d' Appello in Delo.*

Ant. Beffa Nigrini.

Antonius Beffa Nigrini ex Illustrissimo genere, quod a Nigris Romanis ducebat stirpem, Mantuae fere vixit. vide de ejus doctrina & scriptis *Ghilini* Theatr. Literar. t. II. pag. 24. Respondet ad hanc *Lipsius* Cent. I. ad Belg. 66.

EPI-

EPISTOLA DCCLXXVII.

FRIDERICUS TAUBMANNUS

J. Lipsio.

Lovanium.

Nam quid te celem? Lipsi; cum dolore haec scribo. superbia tibi nunquam innata est: quod e vita & scriptis tuis tam clarum mihi, mihi autem? immo toti orbi terrarum, quam lumen solis est mero hoc meridie. Et tu, quid causae sit non queo comminisci, cur toties per epistolam de re litteraria, de re, inquam, litteraria, cujus tu hodie cum *Scaligero* nostro principatum geris, a me rogatus, ne mu illo Lucilliano respondere dignatus sis; An nullas mearum accipis? Vix est ut credam, e ter meis litteris ne unas habuisse Mercurium faventem. An nostram abhorres Wittebergam? haud facies, opinor; nisi si oblitus es, quod olim publicasti, te doctos ubivis gentium amare. At ego non in doctis! fateor, & quid si tua culpa, qui discipulum semidoctum abs te amoves? nec umquam mihi dicis, quod adolescenti comico dicitur, *Remeato audacter*. Male peream, mi Lipsi, si ullum nostratium, quam te in his litteris pluris facio, impensius amo, frequentius in sermonibus usurpo: sive comitatis res est, qua tu facile palmam obtines, sive doctrinae, qua in humanis fastigium jam pridem excessisti humanum. Interim ego unus abs te negligor, nec in me experior, quod ad discipulos meos de te praedicare soleo. Amas illum Aesculapium Plauti, *Camerarium*. Da & mihi aliquid amoris, vel popularitatis causam: Immo fortasse & Plauti causam me amare potes, quem publice explicare in hac Academia post renatas litteras princeps ausus sum. Lipsi, Lipsi, Heracliti & Democriti habuissent tui, quo se exonerarent. nostri! Ausus quin etiam voces jactare per Umbram, & commentarium affectare, atque adeo perfeci: nec displicet *Grutero*, *Rittershusio*, *Scipioni Gentili*. e quorum palato, quod tui plurimum habent, quod sapiant, conjecturam facito. atque etiam, ubi vacas (si hoc verbum in te cadit) has pagellas perlustra. Et da, quod negatur; fragmenta in primis, vel abs te, vel ab optione & amico. Cuperem plura tecum fabulari, & haberem sexcenta, maxime Lipsi, sed quando recogito, quam misere priores illae perierint, videtur mihi omne tempus scriptioni harum impensum, egoque ipse una perire. Vale ergo, mi Lipsi, atque haec ex animo scripta in animum dimitte. Et me vel salute imperti: immo & responso: spero enim, aut potius certo scio, te Lipsium, hoc est, ipsam humanitatem non exuisse: quod quidam tamen factum palam clamitant. ii nimirum, qui etiam Ciceronem abs te contemni dicitant: cum tu ipsum facias deum, quod ego ad ravim disputo. Raptim Wittebergae xvi. Maji, Natali meo xxxiv. A°. Juliano MDCI.

1 Respondet ad has *Lipsius* 1. Centur. ad Belg. 100. alias ad *Taubmannum* dedit, quae sunt in Centur. v. Misc. 86. & duae in editione Offenbachiensis XLVI. & LX. quarum primam ut numquam editam inferuit suis Ephemeridibus Germaniae scriptis *Eccardus* A. 1700. pag. 1691. & ex eo *Crenius* tom. XIII. Animadvers. pag. 79. sed falsi fuere viri nimium diligentes.

Tom. II.

K

EPI-

EPISTOLA DCCLXXVIII.

NICOLAUS RIGALTIIUS

V. Cl. J. Lipsio S. D.

Lovanium.

IN votis meis jampridem hoc praecipuum fuit, clarissime *Lipsi*, occasionem aliquam nancisci, cujus nomine temeritatis hujusce culpam praetexere possem. culpam voco, tum quia ignotus ad te scribere audeo; tum quia exile munusculum in tuas manus pervenire cupio. Sed huic culpa tam prompta occasio est, ut facilem excusationi locum superfore confidam. Nec enim fas esse mihi puto, auctores ullos, qui de re militari scribserunt, attrectare, nisi petita prius a te venia: quando tam accurate omnia illa pertractasti, five *Tactica* sint, five *Poliorcetica*, five etiam *Mechanica*. Enimvero, ne quid tibi diffimulem, aurem mihi vellit admonitio, quae in tuis *Poliorceticis*, fecitque ut curiosa ambitione libros aliquot MSS. e variis bibliothecis eruerem, iisque quam potui diligentissime perlectis militaria vocabula recentioris illius seculi, quae obscura adhuc fuisse mihi videbantur, illustrarem. Quidquid illud est, mitto ecce tibi. emendatissimum autem fore spero, si iudicii tui certissimi limam subierit semel. Erit etiam, ut opinor, operae pretium, simile aliquid in ejusdem aevi scriptoribus Ecclesiasticis conari. & praecipua quidem in *Curopalate* cura. Sed ea provincia danda potius doctissimo *Gretsero*, qui tam feliciter *Junii σχολιαῖς ἀπείταις* obviam ire amat. Super hoc etiam iudicium tuum consiliumque exquiro. etenim *δίχα μοι νόϋ*. Vale, vir doctissime, & me tui studiosissimum ama. Lutetiae Parisiorum. vi. Kal. Jun. clō Io cl.

Respondet Lips. Centur. ad Gall. 95.

EPISTOLA DCCLXXIX.

J. LIPSIUS

*Jo. Baptistae Hansenio.**Romam.*

Quid de fato isto epistolarum (nam quomodo aliter appellem?) dicam, nescio: ita crebrae aut pereunt, aut certe ad alios eunt. In tuis ternis hoc noto factum, sed & recenter in iis, quibus inserta quaedam ad me Reverendissimi Vestri scribis, quod equidem doleo, tui causa, quem merito cum omnibus bonis amo. Itaque siquid est, rogo indica, vel iterari (si potest) cura: efficiam equidem, ut nec mea humanitas, nec mutuus affectus, imo nec officium requiratur. Martio jamnunc respondi, & dabis. Sed heus de *Pigafetta*, itane in Pannoniam? Deus donet & illum consulere optime, & alios exsequi, quae in rem nostram publicam erunt. Magnum enim ibi cer-
ta-

tamen certabitur: nisi pax tamen media dirimat, de qua & scribunt ex iis locis & sperant. Apud nos minuta, sed pertinacia nostra bella. Batavi ad omnem concordiam aures clausas habere, spernere Principatum omnem, & ad populare imperium inclinare. Berckam (Rhenanum opidum est) nunc obsidebant, quo si potiuntur, quod nolumus & detestamur, navigationem & commercia in Germaniam libera habent. Id inhiant, quia maritima in Hispaniam & occidentem navigatio, per edicta Regis & Principum nostrorum sublata aut impedita. Ipsi autem Principes ante quatrimum Brugae Flandriae iverunt, ut fama clamat, Ostendae premendae causa; ut peritiores susurrant, occultiore consilio in hostes eorumque insulas aliquid tentandi. Deus successum donet. Cum Gallis publice pax est, privatim aliqui ad hostes veniunt; & copias eorum augent. Haec in Belgica nostra. ego nuper in Nervii fui, animi & valetudinis causa, apud homines plane ad meum ingenium, comes, candidos, sed & in mensa, quod satis sit, geniales: modum, inquam, & hic servant, elegantes magis quam profusi. In studiis remissiores sumus, & aetas suadet, cogit valetudo. Senecam diu seposui, deseruisse non dicam. At tu & viri ibi magni, ut scribis, ad *magnitudinem Ecclesiae* me vocatis? non abhorream ab argumento, fateor, vel pietatis gratia: videbo, & siquid decreverim, scies. Etsi tam subito id non potest: & alia quaedam exorsa detexenda sint. Vale mi Hansenii, & tecum *Hemelarius* noster, a quo nihil in tuo fasciculo, quod videris indicare. Lovanii, postrid. Kal. Jul. ∞. 1661.

Jo. Baptista Hansenius Harlemensis fuit. vide ejus vitam breviter descriptam a *Valerio Andr.* Bibl. Belg. p. 453. vixisse Romae in contubernio summi alicujus viri, apparet ex *Lipsii* Epist. xc. ad Italos & hujus Sylloges DLXXXV. Edidit libellum, sive, ut vocat, caput singulare ex Electis suis, de Jurejurando Veterum, Tolosae 1614. qui liber insertus Thesauro Antiq. Roman. Tom. v.

EPISTOLA DCCLXXX.

J. BAPT. HANSENIUS J.C.

Perill. & Cl. V. J. Lipsio Belgicae Principibus consiliario S.

Lovanium.

P*Aulus Monelia* hospes meus collegit ex epistolis suis nonnullas, ut publicaret. Consilium hujus rei ab amicis est, a se obsequium. Imitatur, qua potest, tuam Musam, & libenter militare se fatetur in tanti Consulis castris. Acer est, apertus, varius, doctus; & quod tantopere tibi placet, eleganter brevis, & elegans breviter. Is duo abs te petit, primum, ut scriptionis hanc partem, ex visis, Archicensor aestimes, calculumque adjicias album auctori, si meretur. deinde, cum Tullios, Lipsios, Plinius, Apollinares,

K 2

res,

1 Ad hunc sunt quaedam Lipsii Epistolae in Centur. ad Italos. XIII. LV. & LXVII, officiosissimus vir fuisse videtur, & cui multa Lipsius in Italia curanda mandabat. aliquot ejus erant epistolae ad Lipsium; sed cum praeter verborum honorem nihil fere continerent, omittendas censeui.

res, Symmachos, aliorum litteras suis miscere videat; voluit idem imitari, sine offensione tamen, quae ei instar supplicii est, eorum, qui ad eum: imprimis autem *Lipsii*; qui apud hunc virum tanti est, ut in exilium ad Cimmerios deportari malit, quam displicere: Ego, etsi existimarem, te haec tam facile concessurum, quam pirus vulpes comest; tamen veritus ille, ne crimen incurreret, tunica dignum molesta, facultatem petit, tuas ad eum, ut imprimat; quod te infcio non audet. Memoria teneo, Magnum illum Annalium parentem, Cardinalem meum *Baronium*, *Stanislai Rescii* Poloni, viri diligentis & eruditi, audaciam sancte repressisse; cum iste, innoxia popularitate, litteras ejus publicasset. eumque recte *Rescium*, a rescindendis amicorum secretis appellasse: at *Stanislaum* modeste respondisse, nihil a se peccatum esse, imo hoc exemplo, multum nos Rufino debere, qui Hieronymi, utilissimi humano generi scriptoris, noctes sibi creditas promulgaverit. multum Timotheo, qui sacri illius pectoris arcana, summo omnium fructu publici juris effecerit. denique si Augustinos, Gregorios, Arnobios, Tertullianos scrinia occultassent; addo ego, si quid hac parte neglectum esset, foecundum hunc errorem fore, & non nisi multo emendam hanc audaciam non arcendam. Dices, legi alia a me, etiam in isto genere, & stilum non aequae te semper intendere. de illis, non dico. de isto, ubique *Lipsius*, *Lipsius*; ejusque sermo semper viridis, semperque gravatus. scribe itaque, quid placeat, sed cum recordatione, Animum hunc nostrum factum & solentem violare. Heri *Cl. Monelia* litterarium munus ad te misit; Carminum libros ² *J. Bapt. Pinelli*, Magni poetae, in parvo hoc mercatu litterarum lege, si videatur; & salve ab Hospite meo viro optimo, & a tuo *Hansenio*. Genuae. vii. Kal. Oct. ∞ 1607.

² Hunc *Pinellum* ignoro, nisi intelligatur *Joh. Baptista Pianellus*, cujus carmina Italica recenset *Allatius* in *Apibus Urbanis* in additionibus, pag. 261.

EPISTOLA DCCLXXXI.

J. L I P S I U S.

*Dionysio Villerio Canonico & Consiliario.**Tornacum.*

Q Uas in sermone mutuas statim vices redderem, eas ecce in scriptione. Tuas mihi jamnunc redditae, pono & scribo. Quod attollis munuscula ad te missa, quid nisi benignitatis tuae est? ipsa per se munuscula sunt, & quidem chartacea: sed affectus tuus est, qui ea aestimat, & rebus levibus pondus donat. Fac, non corrigo: & iste semper gravis & gran-

¹ Hanc epistolam forte innuit in fine Epistolae lxxxv. Centur. i. ad Belgas. licet nota temporis aliquantum discrepet. plures autem ad hunc *Villerium* scripsit *Lipsius*. erat autem Vir Antiquitatis & rei nummariae studiosissimus, & praecipue patriarum familiarum, teste *Valer. Andrea* in *Bibliotheca Belgica*. & *Lipsii* fuisse olim *Bruxellae*, cum prima rudimenta poneret litterarum, condiscipulum, *Sweertius* in *Ath. Belg.* testatur. vid. i. Cent. ad Belg. 2. Celebrat vero egregie hunc *Villerium* Cancellarium & Canonicum *Tornacensem And. Catullus* in *Tornaco* pag. 112.

grandis talia habeat, quae ab affectu, certe tali, promanant. voves consuetudinem nostram: dii deaque me perdant, nisi ego tecum aut supra te: sed, ut ais, coërcenda haec desideria, & ubi locorum Fatum nos constituit, manendum & parendum. *Quid aeternis minorem consiliis animum fatigas?* illud bene & votive, quod intervallo grandi non dijungimur, & literae nostrae saepe, ipsi nos interdum commeari possumus, te & Fato non vetante. Tu sane vel candore illo, vel lepore (amorem mitto) nos attrahas, *sive est naturae hoc, sive artis, mirus utroque*, sed hîc desino. Ostenda ubi es? omnium scriptionum & sermonum argumentum. Bruxellâ heri ad me, rem pro confecta haberi, & adventu novarum copiarum oppugnandam statim & expugnandam. Modo ne Thraſonia ista spes sit: & gratulari in facto malim, quam jactare faciendum. Tamen, ut mea opinio est, aegre tenebunt hostes, nisi milite in terram exposito pellant, aut caedant, quod abominor, nostros. Angustiae alioqui loci non videntur ad longam defensam. In Pannonia de pace agi nos quoque audivimus. & sunt qui putent peragendam. Ex re Austriacorum id fore ego censeam, quibus civiles turbæ non suadent, imo vix permittunt bella externa. Quod si pax ea non coit, hæc aestas cladem, & ex ea inclinationem rerum in alterutram partem dabit. E Polonia ad me litterae, in quibus *Carolus* Suecum Livoniae maximam partem occupasse: Polonos in eum arma & copias parare. sed de caesis nullus adhuc sermo. ² Quod ais de *Casaubono*, Dii velint ratum certumque esse. Ego ab eo ante biduum literas, in quibus mi- grandi sibi animum fuisse, sed nova liberalitate Clementissimi Principum (ita scribit) retentum. magna res sit, si ille noster. de me valeo ut soleo, id est, incerto & tenuiter, nec gladiator, aut athleta certe unquam ero. Quid tum? si ab animo & pectore isto firmus persevero,

Nec leves somnos timor aut cupido

Sordidus aufert.

In Seneca iterum eram, sed manu lenta, & pene renitenti. quid sit nescio, amo scriptorem, nullum magis nostrum aut meum. Centurias parabam, in quibus *Villerium* legi, ego & Amicitia ipsa volunt. Aliquot tamen ex iis mihi periisse scio: si habes mitte, & me animo clausum gesta. Lovan. ix. Kal. Sext. CIO. IDC. I.

² Intelligere rumorem sparsum de Casauboni transitione ad Pontificios puto. vid. & Epist. cccxv. & dxxix. & alibi memini me quaedam notare.

EPISTOLA DCCLXXXII.

DIONYS. VILLERIUS

J. Lipsio S. D.

Lovanium.

INsculptum in celeberrimi illius templi Delphici vestibulo memini, *Nequid nimis*: Vetans altum de Diis sapere, ne si in abyssum illam impellat mens, obrua-

obruatur. fateor colla submittenda, a Sanctae tamen dignitate alienum, si simplici narrationi credamus, quam Porticenses, etiam si supra caeteros omnes divinitati providentiaeque plurimum tribuant, rejicient, nisi apodeixi fulciatur. Hallensibus debebant esse contenti, Urgent scio, differ, si potes, haec, quippe rerum facies mutationem brevi futuram portendit, longe aliam, nisi animus fallit, a multorum expectatione, perges tamen, si iudicium sequaris cuiusdam Aristarchi nostri temporis, in operoso volumine decernens historias Hispanicas prae caeteris legendas, quod plenae sint miraculis, risi. credo id dicere, ut longinquis suis fidem adstruat, quia nulla prope. Polonum cum commendaveris, de prospero successu nihil dubito. Idem tibi quod mihi iudicium de Polemicis contigisse gaudeo. Crebri hinc Sermones de pace evanescere, opinioque quam de Anglo conceperant refrixit. Dum superioribus diebus tuum de bibliothecis Syntagma evolverem, ubi de Museo Alexandrino agis, mihi venit in mentem alterum, de quo Zonaras libro Annal. III. in Leone Isauro. Utinam & hodie loco tot Burfarum & Seminariorum, Museum aliquod excitaretur; non quod cetera improbem, verum doleo doctis nulla assignari praemia, nec quietem. Levem Musei umbram refert collegium Sorbonae Lutetiae. *Richardotum* nostrum ad te profectum intelligo, nescio an tibi, quod erat pollicitus, profectum in has regiones persuadebit. o Utinam. Vale. doctiss. Lipsi, tuumque Villerium ama. Tornaci IIII. Kal. Decembris.

EPISTOLA DCCLXXXIII.
DIONYS. VILLERIUS

Clarissimo Viro Domino J. Lipsio S. P. D.

Lovanium.

E Pistolae tuae testes mihi videntur atri cuiusdam humoris, quo torqueris, huc evola, excutiemus, nullum quippe praesentius remedium peregrinatiunculis, & fidis liberisque amicorum sermonibus, si publica te non cruciant, ut ne vel cogitationem iis impendas, quod privatis torqueris? Valeant curae, quod superest vitae, genio amicisque indulge. Mihi hinc bellum atrocissimum cum monachis, quos expugnare nequeo. obiit Abbas S. Amandi, ut in defuncti locum D. *Petrum Richardotum* eligant persuadere conor; conjurarunt non alium, quam e suo coetu deligere, etsi ad id oneris impares sint eorum humeri, ineptissimus quisque idoneum se credit, tanta laborant ambitione: conjurationem dissoluturum me spero. Domino Praesidi accurate scripsi, filio in praesenti occasione ne desit, idem ut tu, Dominusque ¹ *Clarius* praestetis rogo: hanc occasionem elabi si Praeses sinat, calviam postea reperiet, urgendus est, filius solus idoneus mihi, qui labantem hanc domum restituere possit, videtur. Vale, mi Lipsi. Tornaci xx. Februarii.

¹ Forte intelligit *Johannem Clarium* Tungrensensem, & Theologiae Doctorem & Professorem in Academia Lovaniensi, de quo vid. *Val. Andr. & Francisc. Sweertium*. & Fastos Academicos pag. 128. ubi ejus Epitaphium. Obiit xxii. Aug. 1611.

EPISTOLA DCCLXXXIV.

THOMAS FIENUS

J. Lipsio.

Lovanium.

Clarissime D. Lipsi. Non prius volui ad T. E. scribere quam status aulae nostrae & conditionis meae aliquali diuturna conversationis & habitationis mora probe mihi esset perspectus, ut ita de eo aliquid ipse certi firmiterque perscribere possem. Haecenus autem qualis ille sit, propter longam ab urbe in itinere Lotharingico absentiam, ipse cognoscere aut animadvertere vix potui. Nunc pro pauco illo tempore, quod hucusque a reditu intercessit, utcumque mores aulicorum, institutum vivendi, normam principum, indolem & conditionis meae qualitatem didici. Quapropter cum post biduum hinc iterum mihi cum Principibus ad venationem sit abeundum, a qua ante sex septimanas non sum reversurus, unde forte mihi ad te scribendi non erit illa commoditas, ne me negligentiae tui suspectum habeas, omittere nolui, quin aliquid de itineris mei successu & statu meo breviter tibi scriberem; eo magis quod Excellentissimus D. *Mermannus* meam ad te scriptionem urgeret, quo ea occasione suam quoque ad te adungere posset. scias itaque, Clarissime Domine, quod iter meum primum faeliciter, laus Deo, successerit. Fui profectus Namurco quatrinduo in comitatu Illustrissimi *Virginii Ursini*, cum eo dies integros in Philosophia naturali jucundissime disputavi: ei gratissimus fui, & nisi ad obsequia Serenissimi Bavariae Ducis ivisset, fui, ut dicebat, Domini observandissimi, ab eo, ut jurabat, numquam fuisset dimittendus. sed vel Serenissimo Duci Magno, apud quem agit, vel Romam suis amicis ad honestissimam conditionem commendandus: summum ejus erga me favorem non possum satis praedicare. Cum ei valedicerem, rogavit, ut si quid esset, in quo ejus possem officium, operam aut favorem desiderare, dum ei praesens adhuc essem, peterem, se quaecunque illud esset, serio praestitutum. De tua Excellentissima crebra inter nos mentio fuit. Certe Princeps est valde humanus, generosus, & in Philosophia naturali tam solide doctus, ut multis doctis ejus professoribus ipsum ausim comparare. Ut Monachium veni, a Serenissimo Duce Domino meo benigne & humaniter sum exceptus, & postridie eum in Lotharingiam ad Thermas Plumbanas, & inde Nanaeum sum comitatus. Thermis illis usus est uterque meus princeps ad foecunditatem spatio 18 dierum. Eo convenerunt quoque Serenissimus Dux Lotharingiae, Dux Barri, Comes Vaudimontanus, Serenissima Principissa Catharina, filia Ducis Lotharingici innupta. Nanaei Princeps meus valde magnifice, & cum magna pompa, donis splendidis, conviviis & tripudiis fuit exceptus. Ut reversi sumus Monachium, venit eo Serenissimus Elector Colonienfis, sed paucis transactis diebus Pragam abiit, & inde rursus in Bavariam reversus.

Fr̃.

Frisingae in sua Episcopali Cathedra pro tempore residet, illinc subinde ad nostros Principes, & ad communem venationem excurrere. Sanitas ejus ambiguo loco est, & non videtur ei longam promittere vitam. Fuit hîc quoque Serenissima Archiducissa Tyrolensis, Mantuani Ducis soror, Archiducis Ferdinandi conjunx, quae pietatis ergo ad Montem Sanctum, qui hîc in Bavaria est, venerat. Dux Mantuanus fuit quoque expectatus, imo nobiles ei obviam missi, sed valetudine adversa impeditus haecenus tantum expectatur. Iturus est in Hungariam ad bellum Turcicum sub auspiciis Imperatoris. Serenissimus Dux noster & conjunx ejus firma valetudine sunt, nihil praeter infecunditatem dolentes. Principes certe sunt piissimi, benignissimi & prudentissimi. Ipse Dux in nullo non scientiae genere versatus. Latine, Italice, Gallice est peritissimus: moribus modestus, sapientia maturus & circumspectus in loquendo, In vultu & moribus gravitatem cum quadam benignitate conjunctam gerens. Aetatem ostendit quadraginta ad minimum annorum, vix tamen viginti novem perfecit, vir est formosus, & statura media, corpore optime formato, Belgica aut Italica facie. Multa me de tua Excellentia rogavit, illamque maximi facit. Summo me favore prosequitur, & familiaritatis ac singularis propensionis signa maxima etiam publice ostendit, quo nomine etiam omnes nobiles me colunt & amicitiam meam expetunt. Dominus *Mermannus* magnae apud eum est auctoritatis, & intimorum ejus consiliariorum forte intimissimus, ut ita barbare loquar. Omnes nobiles aulici modesti, morati, probi, omne vitium ex ista aula exulat, ebriosos, leves, inertes homines princeps odit & contemnit. Omnia ad virtutem, modestiam, pietatem comparata. Senior Dux *Gulielmus*, moderni Ducis pater, in publico nusquam comparet, cum sua sanctissima conjuge *Renata* vitam quasi monasticam degit apud Patres Societatis in Palatio, quod sibi juxta, imo in Collegio eorum, extruxit. Lugubri nigra ex panno veste induuntur. Omnes ministri & pedissequae eodem modo, Dominum a servis vix distinguas, omnes habitu sunt Canonicali. Cum semel Serenissimam Archiducissam Tyrolensem praetactam, una cum principibus Dominis meis, ad convivium invitasset, cibi omnes mensae e patinis argillaceis, seu terreis adhibebantur, argenti aut auri nihil splendebat. Adeo ut mundo & gubernaculis plane valedixerint: Imperium ipse a se simpliciter abdicavit, omnique omnino se jure exuit, subditi in obedientiam filii *Maximiliani* omnes juramentum praestiterunt. Viri singulariter docti hîc pauci sunt, unus inter alios est D. *Fuggerus* Praepositus Frisingensis, curae meae obnoxius, & mihi familiaritate vinctus, qui omni scientiae genere est insigniter eruditus. Is tuam quoque Excellentiam per me jussit salutari. Omnia hîc plena laudibus nominis Lipsiani. Libri apud bibliopolas hîc nulli fere venales, nisi tantum Domini Lipsii, nullus angulus non personat sono gloriae tuae. Breviter, tu es parvulus Deus in hoc mundo, quo non tantum amaris, honoraris; sed quodammodo adoraris. Bene tibi profuerit tua Philosophia, si tantum te istam vanam mundi gloriam interno illo animo spernere docuerit, ut ita postea non minor Deus fias

in

in Coelis. Urbs Monachensis est certe pulchra, populosa, magna & altissimis constructa aedificiis, nitidissimis & mundissimis strata plateis. Homines magis quam in alia Germania morati. Medici Ducis quatuor sunt. Officium eorum est per vices, septimanatim surgenti, prandenti, coenanti assistere, & eum peregre proficiscentem comitari, Etsi autem conditio mea ob dictas causas optima sit & magnifica, quia tamen non est mihi illa libertas animi corporisque tranquillitas, illud otium musarum, illa cum doctis & mei similibus conversatio, quae Lovanii fuit, sed tantum cum nobilibus & aulicis illis, quorum domus longe sunt ab Helicone remotae, ideo haec migratio nonnullam mihi molestiam adtulit, maxime in primo, etsi nunc aliquo modo assuesco. Experiar itaque annum unum, & quomodo se genius meus conformabit videbo. Heri e Belgio intellexi, matrem meam Antverpiae animam agere. Deus faxit, ut bene illi sit ad corporis animaeque salutem. Si de morte intelligo, mox iterum semel ad vos recurram. Hic adhuc est D. *Damantius*, Excellentissimi Cancellarii *Damantii* frater, qui vellus aureum principi esset exhibiturus, si quispiam eodem jam ante insignitus praefens esset. In eam rem fuit multo tempore expectatus Archidux Styriae *Ferdinandus*, sed ob bellum, ad quod personaliter est profectus, huc veniendi otium non habet. Ideo dictus D. *Damantius* redeundi, negotio infecto, mandatum ab Archiduce *Alberto* indies expectat. Vale, Clarissime Domine, & me ama, ac inter tui amantissimos, colentissimos & primos tuarum laudum praecones habe. Haec tibi raptim scribo. Nolo itaque ut in stylum animadvertas, Ego medicus; ego tibi doctae scriptionis curam professionemque relinquo. Vale iterum, Clarissime Domine Lipsi, aliud enim epithetum tibi nunquam do, quod vere tuum, & proprium. Monachio Pridie Calendas Augustas A. 1601.

De *Thoma Fieno*, sive *Fyens* Belgice, vide *Valer. Andr.* & *Franc. Sweertium*. reliquisse iterum aulam Bavaricam, & deinde Belgicam etiam Alberti & Isabellae, ut Lovanii Medicinam profiteretur, narrat *Valer. Andreas*. quem & vide in Fastis Academicis pag. 237. rediisse vero ante annum 1604. patet, quia eo anno Rector fuit Academiae, quo honore ter perfunctus est. obiit vero 15. Martii 1631. *Thomas Mermannus* vero, cujus hic mentio, medicus & consiliarius Ducis Bavariae fuit, ad quem *Lipsius* scribit Centur. ad Germ. Ep. LV. & LXXVII. ubi videmus commendare *Lipsum Mermannum* hunc *Fienum*. vide de eo *Lindenium Renovatum* p. 1021.

EPISTOLA DCCLXXXV.

J. L I P S I U S

Cynthio Aldrobrando S. R. E. Titulo Sancti Georgii Cardinali.

Illustrissime & Reverendissime Domine.

Romam.

A Ditum mihi struere, & pulsare fores tuas petitor debebam, nisi eas benignitas tua sponte aperuisset. Eo audacius ingredior, & preces ecce meas depono. Est in contubernio & ministerio meo *Hubertus Audejantius* Brug-

Tom. II.

L

gen-

genſis, qui a manu & ſtudiis plures annos mihi fuit. Morum honeſtatem, ingenii induſtriam, miniſterii ſedulitatem & fidem ſic mihi probavit, ut prae-
mium aliquod operae debere me cenſeam; & ſolvere adeo velim, ſed a veſtro
aere. Quomodo? ad benigniſſimi Pontificis & parentis ſacram illam aram ve-
nio, & beneficium conferri ſupplex peto, quod in patria ejus nunc vacat. Libel-
lus noſter rem dicet. Ego, Illuſtriſſime & Reverendiſſime Domine, tua au-
ctoritate & gratia nitor, & rogo eam mihi tribui, etiam adoleſcentis cauſſa,
qui ingenii dotibus revera produci meretur, & Eccleſiae bono creſcet: cui te,
Illuſtriſſime & Reverendiſſime Domine, diu ſuperſeſſe interius eſt meum vo-
tum. Lovan. poſtr. Kal. Decemb. cicioci.

Ad hunc *Audejantium* ſcripſit, praeter alias ad contubernales, inter quos erat, doctiſſimam Epi-
ſtolam Centur. III. 38. ubi agit de ratione ſcribendi, & diſtinguendi verba, ut eum imbueret mini-
ſterii ſui rudimentis: erat enim *Lipſii* amanuenſis; ipſe etiam parentavit magiſtri ſui manibus ele-
gia, quae inter Epicedia in Lipſium legitur pag. 31. Obtinuiſſe ſvero hoc beneficium videtur:
nam *Valer. Andreas* in Biblioth. Belgica eum Canonicum ad D. Donatianum Brugis fuiſſe dicit.
Prudentium voluiſſe edere didici ex Epiſtola *Jungermanni* ad Goldaſtum cxviii.

EPISTOLA DCCLXXXVI.

Sire.

Lovanium.

ENcores que deja une aultre fois ai entrepris la hardieſſe de me remonſtrer
rurallement vers la tant digne & fameuſe Perſſone de Voſtre Excellence,
ne m'ai ſceu detenir de cheoir au meſme abisme de ſimplicité: mais non d'a-
rogante temeraire outrecuidance, ce que à Dieu ne veuille: Ains comme a
Dieu eſt notoire, & pluſieurs Grands Perſſonages de Marque de diverſſes Re-
gions, & bien eſtranges contrees; ſi beſoing fuſt, ratifierioint: comme &
de quelle debile action me reclame: Treshumble ſerviteur d'un tant Reveré,
non ſeulement des Princes Catoliques, ains auſſi Proteſtants! En oultre de
toutte la Maiſon Sereniſſime D'auiſtriche, delaquelle ay commiſſion &
promeſſe d'un don de mille Ducats, pour mon vin: Si ſcaurai ſi bien jouer
mon Perſſonage d'eſmouvoir la Perſſone de Voſtre Excellence, de venir en la
ditte Maiſon: en laquelle elle ſera entierement avecque toute ſa famille fort
noblement entretenu & nourri: ſans deſpendre une maille. deffrayé juſques
ici: avant bouger dillec luy ſeront delivres comptant de don deux mille tal-
lers: & les gaiges ordinaires monteront juſques a quinſe cents Reichsdaldres:
ſans dons preſents ordinaires: les quels excederont le tout: tant d'un, que d'aul-
tre coſté: il plaira A V. Excellence ſe daigner de me commander, ce que a icelle
trouvera bon de ſa part reſpondre: ce que ferai avec ce bon zeus deſir, que
ſuis obligé: comme ung ſien domeſtic ſerviteur treshumble: Cependant
plaira A V. Excellence à la fois viſiter ces Princes & Genereus Cavagliers
vertueux avecque ung petit mot: je m'aſſeure ſans aulcune doubte de leurs
Realites: quils ne ſe ſcauront leur detenir, de non ſeulement reſpondre;
ains

ains renvoyer quelque memoire selon leur qualitez: Et en premier lieu plaira A V. Excellence d'envoyer ung petit mot au Illustriſſime Baron *Charles de Liechtenſtain*, & au Sieur *Jan Barvice*, Secretayre privé & Conſeillier de ſa Maieſté Ceſaree: Auſſi a ce Noble Sieur *Forgatſch*, Cavalier Hongrois; & au Illuſtriſſime Sieur *Adam Gal Poppel*. Toutes fois pas oubliant de me recommander de paſſe vollant: encores que ne l'ai merité envers la Perſſone de Voſtre Excellence, laquelle je deſire reverer & ſervir tres promptement ſelon mon debil pover: j'envoye ici quelque peu de ſemence plus freche; que celle, laquelle je la preſentai en Lovain: a ſcavoir *der Lanckeletten Stöckrübell* les quels j'eſpere, que V. Excellence trouvera bon. tant crues, que accouſtres entieres, au mouton. Sil plaist à Voſtre Excellence mander quelque choſe au Duc Electeur de Saxe *Criſtianus*: le quel en bref viendra ici: l'exploiterai tresvolontiers: j'envoye ici quant e quant: Le Tiltre du Sieur *Baron de Liechtenſtain*: le quel Sa Maieſté Ceſaree creera Prince de L'empire en la premiere Diete: laquelle ſe fera environ la Sant Martin A Ratisbone. Ces jours paſſes cependent, qu'on fit bonne chere, Le Turc ſe faiſit de Petite Gomorre: mettant au fil de l'eſpee tout ce quil y trouva. Sa Maieſté envoye en Moſcovie le Sieur *de Ton* en une Ambaſſade, & traite de fort grande importance. Dieu y veuille conceder bone iſſue: Car les Polacs tachent aultant noſtre ruyne, que les Turcs & Tartares. *Charles* Duc de Swede a eſte deſfait, gagnant le hault, mais ung ſien filz Baſtardt demoura engagé, en ſe cuidant faulver en une maiſon forte. Atant le Comte de Solms, s'eſtant encheminé de Hollande, en ca eſt mort au chemin: Non moins regreté que le Duc de Mercure: N'oſant paſſer oultre, Sire, prierai au Createur de preſerver la Tres-noble Perſſone de Voſtre Excellence, à laquelle je baiſe les Mains & entierement me recommande: De Prague ce 20. Mars 1602.

De Voſtre Excellence

Treſhumbl. Serviteur

Philibert Meurier Alias Maulpergher,
Gentilhome dela Maiſon de ſa Maieſté
Ceſaree, & Maiſtre D'hoſtel du Illuſtriſſime
Sieur de Liechtenſtain.

Hanc epistolam, antiquato & fere barbaro sermone conscriptam, edidi, quia nusquam, nisi in illa, vidi Lipsium ab Austriacis vocatum, tam luculenti stipendii spe ostentata. quare dubito, an ex publico decreto talia vere potuerit promittere hic aulicus. nec credam, nisi aliunde constet.

EPISTOLA DCCLXXXVII.

J. L I P S I U S.

*Erycio Puteano suo S. D.**Mediolanum.*

ANtverpiae sum, nec bona valetudine, tenui spe ejus emendandae: nam duos menses jam langui, dicam, an tabui? utrum erit, ego aut fama dicet. Vidi jam nunc scriptum, quod Italia vestra in me dedit, a mero livore & bile. sed & imperitiae omnia plena. ² pudeat respondere, ut omittam perpetuum meum sensum in talibus silendi. Illud video, falsum librum eum Mirandulanum esse; certe non veterem, qui pro tali adfertur. Inquirere te velim, & item de auctore. Quod liber non vetus, multa argumento: sed illud firmiter, quod etiam priores libri sex in eo scripti, quorum unicum tamen exemplar Europa habuit ex interiore Germania petatum, illud Corbejense. Hoc tunc Mirandulanum ubi latuit? sed mihi luce clarius est, falsum codicem esse; aut scriptas saltem ad oram male sagacis & audacis alicujus ingenii notas. Tempus dicet. sed & tu, ut dixi, nava hanc operam, & exquire, & scitorem mercede. Nebuloni homini respondere si libeat, aut me deceat, horarum aliquot spatio calumnias pellam, imperitiam producam. Pro te ad Cardinalem *Borromaeum* scripsi nuper, sed & ad te: arbitror accepisse: Vale, mi Puteane, & tu optime *Septali* salveto. Antv. III. Non. Majas CIOICII.

¹ Respicit haec epistola libellum, qui Bergomi 1602. 8. prodiit, hoc titulo, *Pompeji Lampugnani Collatio notarum Justii Lipsii in Cornelium Tacitum cum MSS. codice Mirandulano*. cujus auctor adhuc latet: varias supiciones vide apud *Fabric.* t. II. *Biblioth. Latin.* p. 754. & supra jam saepius de eo mentio facta fuit. vide ad *Epist.* ccxliii. ccclvi. & alibi.

² Mutavit tamen hoc propositum, & quidem brevi: nam mense Junio jam Antverpiam misisse *Apologeticum* imprimendum scribit *Ep.* ccccxiii. & ad *Puteanum*, mense Augusto jam respondisse, scribit *Cent.* v. *Misc.* 5. in qua epistola omissa quaedam, quae ex MSS. ita supple, & post in numerum venitis, interpone. *Revera non vidistis; an Genium tu gentis nostrae mutas, & illum callidum ac testum assumis? si sapias, Belga esto, & moribus antiquis, id est apertis. quae ne Italos offenderet, omisisse credo. in fine etiam Epistolae addiderat. In Extrema epistola tua aliquid est, quod invitum aut moestus legi. Quis tibi concursus cum illis, quos venerari hic solebas? fac etiam nunc, & pietati fasces submitte.*

EPISTOLA DCCLXXXVIII.

E R Y C I U S P U T E A N U S.

*J. Lipsia.**Lovanium.*

CLarissime Vir. At ego vellem ipsum hunc *Septalium* meum, imo tuum: videres, & audires coram: sic vero noscendum & amandum magis. Utrumque illud mihi contigit, ut videam cottidie, quem in scriptis colo; audiam, quem tu consortem studiorum aut sensuum tuorum optas. Serio dico: post

¹ Respondet ad hanc *Lipsius* IV. *Centur.* *Misc.* 54.

post *Quinctii* mortem hic unus est, qui benigno me oculo respicit, & sine quo abhorream ab hoc munere, ab hac juventute, ab hac urbe. Nam munus, etsi honestum, tardum ac difficile nimis stipendium reddit. Plus profecto negotii mihi cum thesaurariis, quam cum litteris. Sic distrahitur animus, & de praemio, quod meruit, disceptare cogitur; sed apud illos, qui indocti, inhumani, luto suo immergi, perire putant quidquid in litteras infunditur. Jam vero juvenus aliena ab omni animi cultu, sedere, audire, discere in publico erubescit. Urbs denique tota mercium, & turbarum, in qua etsi Aesculapium habeo, bonam valetudinem non reperiō. Velut in via lubrica ex intervallo titubo & cado, etiam cum caveo, & sollicite figo pedem: ac tum manum *Septalius* porrigit, levat; sed ita ut maneam tamen in eadem via, & luto, ut sic dicam, morbi. Ecce cum tuas acciperem decumberebam, & pharmacum sumpseram: nunc valere mihi videor; utinam perrenne sit. voveo, &, quasi voti securus, iter & Romam cogito; sed, ut opinaris, excursus dumtaxat caussa. In biennium etiam obstrictus sive addictus Mediolanensibus sum; solvere aut rumpere hoc vinculum nec fides nec fama finit. Romae quidem, invitantibus non de plebe viris, egregie ac basilice esse possem, apud Comestabilem *Columnam*. quam ego conditionem nec respui omnino, nec admisi; ut coram videam, examinem, ac deinde deliberem, nihil temere aut sine auctoritate *Septalii* nostri acturus. A Rege nostro dependere tutum censeo; si tamen res ejus meliori norma ac ordine irent. nunc mera quaedam confusio haec administratio est, & sub uno capite tot capita publicum privatum habent; ac dum sibi quisque studet & rapit, publicum atterit. Haec ego; ut in pace hac nostra laborare rempublicam videas, & cum ea studia litterarum. Deus fortassis mutabit, & optimus ille Princeps, quem habemus. Quod *Saccus* ad te scribit com meatum me a Senatu obtinuisse, nescio quo stomacho excipiam. Trientem stipendii mei, cujus jam sesquimensis transactus, petii: senatus ad thesaurarios me remisit. Et hoc ille vocat com meatum obtinere. O quam alienus *Septalius* ab his moribus! De Stoïca Philosophia irritasti desiderium nostrum, & semel gustare habemus illa melioris vitae doctrinaeque secreta: quae & hoc & alio quoque aevo profint. Epistolarum Fercula Secunda Francofurtum misi: ac Bellaria mox sequentur, ubi Roma rediero. Cardinalis noster magnum & aeternum negotium molitur, bono litterarum publice hîc² Bibliothecam dedicaturus, in quam viginti millia aureorum infuset. Instituet e prisco more Recitationes, conscriptis pro vectae aetatis & doctrinae viris, qui annum aliquem redditum singuli accipient, ea lege, ut quotannis in publicum quidpiam edant. Res mehercle digna isto viro, & quae fortassis ad bonas artes multorum ingenia excitabit. Sed haec omnia distinctius aliquando scribam; imo brevi, cum consilia Cardinalis magis se aperient. Vale, Clarissime Vir, meque ama, ubiubi semper tuum. Mediolani, .iv. Eid. Mart. ∞. 15 CIII.

L 3

In-

² De illa nuper egimus in Praefatione ad Thesauri Italici Tom. ix. parte 6. ubi egregium *Pauli Boschae* opus de Bibliotheca Ambrosiana recensuimus.

Inscriptiunculam Scholae nostrae praefigendam nescio an miserim: quasi non acceperis, nunc denuo mitto; sic quidem, utinam in melius mutatam. Judicabis.

SCHOLA
PALATINA.

QVISQVIS ES,
OTIOSVS SEV NEGOTIOSVS,
SVSPICE:
HVC AB OTIO AD NEGOTIVM,
A NEGOTIO AD OTIVM
SVADA ET MENS BONA DVCVNT.
EARVM HIC LOCVS,
PVBLICVS ET ANTIQVVS,
REIPVBL. ET ANTIQVAE SACER.
ILLAM AMA, HANC AESTIMA,
VTRAMQVE DISCE
IN OTIO NEGOTIOSVS,
IN NEGOTIO OTIOSVS.
ERYCIVS PVTEANVS ELOQ. PROF.
JVVENTVTI EXCITANDAE
P.

EPISTOLA DCCLXXXIX.

ERYCIUS PUTEANUS

J. Lipsio.

Lovanium.

Clarissime Vir, Languēbam ipse & pallebam metu, quem de morbo literae, & rumor quoque injecerat. nunc erectus & salvus sum, quia saluum te video, & erectum. etsi, quando aliter? priscae constantiae & sapientiae exemplum in te uno admirantur mortales, & magno plausu excipiunt: item magno voto, ut diurnet. Monita & Exempla Politica hīc emi, legi, & exsilui animo cum viderem, De legibus, *cas nec multas, nec item lites probari*. O Monitum aureum, & plane salutare: sed utinam Rex noster audiat, intelligat, admittat! Et quidem destinato ipse libro compellendus esset: aut ii, per quos ille sapit, & regit. Magna auctoritas & vis tuae Suadae: permoveres; & quo fructu totius generis humani! Legum & Litium hoc morbo infecta Respubl. omnem sanioris mentis studiiue colorem amisit. Quot munia, imo quot monstra, legum litiumque causa sunt! titulo publica, fraude privata. Universum regimen administratione controversiarum constat. Non privatus aliquis, sed magni etiam viri stomachantur: & nisi tu falcem
ma-

malo huic injicis, magis etiam in exitium publicum crescet. Epidigma meum placuisse, pleno adfectu gaudeo: nec potui acriori stimulo ad plura hujusmodi, aut majora, excitari. certe animus aut voluntas est, utinam quies & tranquillitas! Nunc miserrime, juro Genium, hîc habeor, & morosa stipendia sunt, quibus non alor, sed exerceor. Nec principem accuso, nec Senatum (nam benignus in me uterque) sed sortem potius litterarum, quae hîc quidem Professoribus infesta. Ticinenses nuper (ride hanc scenam) seditioso consilio huc misere, qui stipendia peterent; ni obtinerent, Scholas publicas clausuri, Juventutem omnem dimissuri. Militaris haec petitio videbatur. itaque dispersitis nummis ad Scholas reducti Professores: sed stipendia dilata magis, quam soluta sunt. Ego in pessimo hoc Litterarum statu, quid sperem, aut praesumam? Exterus sum, & hoc etiam nomine infelicior: amator bonae mentis, & sic verecundior; haec autem stipendia perfrieta fronte, & paene litigio exigenda sunt. Si rem totam scias & infelicitatem, ingemiscas ut frontem ferias. Nunc libere igitur & remoto velo me tibi pando, ut spes & vota mea consilio juves, & auxilio qua potes. Binae conditiones prae manibus sunt, altera Hispaniensis, altera Bononiensis. In Hispaniam vocabar a multis, & cum *Velasquio* agebatur, etiam me incio, ut muneri alicui Regio, sed litterario destinaretur. Haeret igitur hoc negotium, & sic ipse haereo, ut expectem an vocandus sim, & quo proemio aut fine. Ego Bononiam praefero, quo, ut adfectus & inclinatio, ibi atque etiam Romae, magnorum virorum, anhelare coepi: *Titium* & *Persum* nosti: ut his collega sim, cum tertius Professor annis gravis & morbo continuo obsessus, jamque emeritus, vacuum locum fecerit. Judica, Clarissime Vir, & hinc juva. DIVAM SICHEMIENSEM avidissime expectamus: etiam Princeps, quem rumor de morbo tuo graviter adfecerat. Veneratur nomen, imo imaginem tuam, & in ipso cubiculo suspensam habet. Rem dico. Unde acceperit? a *Sacco* nostro, qui eandem a *Micaultio*. Haveo etiam videre, quae in Batavum sunt: ne impunita hominis audacia sit, qui, ut in Indice Francofurtensi vidi, *Dolum Hallensem* nominavit: nisi fortassis hîc Gallus iste, qui ex eodem choro. Ego, ut mones, compescam ingenii aut aetatis fervorem: & in amorem tui omnia laxabo. Vale, & vive, Clarissime Vir, & constanter me ama. Mediolani, VIII. Kal. Jun. ∞. 130. v. Illustrissimus *Laurentius Polus* Praefes Magistratus Extraordinarii, Vir multae lectionis & eruditionis, per me salvere te jussit. Ego *Rubenium* meum, cui proxima septimana respondebo.

Responsio est ad Lipsii v. Centur. Miscel. Epist. LXVI.

EPISTOLA DCCXC.

J. L I P S I U S

Erycio Puteano.

Nimis gavisus sum in animo tuo meliore, id est fortiore. Nisi hunc sumis, quis te transferat per ipsos vitae aestus? Semper fluctus, rara aliqua malicia, & procella ab ea expectanda. Firma in haec animum, & semel serio decerne, Deum sequi. Cardinali *Borromaeo* respondi, trades. Lovanium edidi, puto *Wouerium* misisse. Sed nos cum antiqua, id est vera eruimus, cruces statuimus istis, qui & antiqua oderunt & bona. Vanitatibus hodie pascuntur & turgescunt: tolle, sunt inanes utres. Experior igitur judicia hinc non aequa: & tamen a vestris, atque etiam exteris posterisque meliorem calculum expecto. Videbis. Parens tuus Bruxellae fuit, salutem ad me misit, ipse non venit. Si tu huc ista aestate, libens amplectar: veni ad auditurum multa, ad dicturum. Pontifici Seneca noster oblatus est a *Rubenio*, neque ultra scio. Scilicet hodie sic vivitur, & imputant nobis non tristi vultu accepisse. Salve, salve, & (nisi te verear avertere) omnes Musae. Lovanii, xvi. Kal. Januarii
∞. IDC. VI.

Quid sit quod Cardinalis *Borromaeus* a me expectat, non tu aperis. Sane ego novis scriptiunculis aut floridis non ultra sufficio, tibi aliisque facem trado.

EPISTOLA DCCXCI.

E R Y C I U S P U T E A N U S

*J. Lipsio.**Lovanium.*

Amplissime Vir. Ego vero serio decrevi praeceptis tuis obsequi, & Deum sequi. Animus imbutus bonis artibus, laetus liberque erit, semper & ubique suus. In via eram; nunc ad Sapientiae hoc decretum pervenisse videor, te duce, ferre quaecumque eveniunt. Cardinali litteras tradidi, mire expectatas. Me spectante resignavit, audiente legit; laetus, institutum suum probari a te, atque etiam dirigi. Sane crevit hoc fomento animus ille jam accensus; ut habeat potius viros foveatque, quam faciat; imo habeat & faciat; proemio virtuti posito, quae adulta promovenda est. Serio dicam: serio ille hoc negotium agit Bibliothecae & Musei. & profecto peraget. ego, quantum possum, rogo, insto, urgeo. Sed Lovanium cur non vidi? veniat obsecro, & puriore illa doctrinae aura nos imbuat, qua Musae ipsae vivunt. Infecta & sine mente homines sunt, qui sordes & excrementa quaedam doctrinarum amant: & tamen quam frequentes ubique, imo importuni? ineptiae & vitia infecto astro calent, & vis melioris Musae Mentisque elanguit. a te re-
me-

medium erit, a tua Mente, a tua Musa, quam utramque omnes boni veneramur. Non venit ad te Parens meus? ipse (Deus modo finat) veniam: ita, ita, ad auditurum multa, ad dicturum. o quam anhelō!

Jam mens praetrepidans haret vagari.

habet amplecti suum Thaletem: & amplectar; breve modo iter Princeps aut Senatus noster indulgeat. Pontifici Senecam oblatum esse jam ex ipso *Rubeno* sciebam: qui missum (etiam responsum, addebat. Ego tamen de silentio apud Cardinalem nostrum questus sum. Quo fructu? Romam scripsit, causam Senecae egit. conjecta caeterum. *De Erycio Nomine Syntagmation*, quod ante morbum scripseram, Francofurti editum est: a Marnio habebis. Utinam placeat! Dedi etiam *Laconismi Encomium*: & nunc ejusdem *Patrocinium* scripsi, provocatus ab Amico. Is ¹ *Henricus Farnesius* est, Eburo, Litterarum Ticini Professor: qui amicam hanc litem apud *Saccum* nostrum excitavit. Salse, sed tamen leniter Brevitatem defendo, Amicum non offendo. Hoc uno libello *Sacco* inprimis visus sum dignum quid luce & laude praestitisse. Velim & tibi. *Farnesius* vero vir bonus & senex est: ingenio utitur, sed novitia sectatur. ego vetera, id est vera. Senecam Francofurto expectabam. non venit. contagio in causa est, quae commercia retardat. Crescit igitur hac mora desiderium nostrum; & jam sine tua face Senecam fastidimus. A *Roberto Titio* saepius compellor litteris sane amicis. Desiderium ubique & reverentia tui. Salutem etiam nomine ejus perscribo, & recepisse gratum erit. *Epistolarum Bellaria* dare nunc cupiam: liber paratus est, & e plurimis optimas selegi. Te annuente fiet. Sum nunc in vertendo Apologemate Comitum-Stabuli, cui titulus *Dos Discursos en que se defiende la Venida y Predication del Apostol Santiago en España. Sacados de la libreria de Ivan de Velasco, Condestable de Castilla, Presidente de Italia &c.* Hoc negotii ab ipso *Velasquio* datum est, ac jam quidem satis feliciter translationem aggressus sum. In titulo vertendo haereo; imo vero auxilium tuum, aut potius operam, imploro. Praefatio vero, scripta *Al Reyno de Castilla, en junta de Cortes*. Putabam verti posse, *Conventui publico Regni Castellae*. Quid si, *Regno Castellae, Comitibus Curialis, aut Comitibus Curiarum*? juva obsecro: & me aeterno cultu tuum, aeternum ama. Musas etiam, quae sine suo Phoebo mutae, imo nullae sint. Mediolani, Kalendis Martiis, ∞. 156. VI. *Saccus* & *Septalius* salutem reddunt: atque hic jam etiam Professor in hac urbe, & *Ethica Aristotelis* publice explicat: Sed nova illa aut novata (nostri morem,) & quae in *λογωμαχία* quadam consistunt. Laeta vis? altero filiolo auctus sum, cui *Fausti* nomen dedi. faustum sit. Natus est XI. Kal. Martii, de meridie. *Justus* meus, atque nomine tuus, jam balbutire incipit, humumque premere.

¹ Patria lingua *Furnium* vocatum docet *Valerius Andreas* in Bibl. Belgic. p. 350. latius ejus vitam descripsit *Ghilinus* Theatr. Literat. t. 1. pag. 47. ubi & elogium a *Puteano* ipsi positum refert.

EPISTOLA DCCXCII.

MAXAEMYLIANUS DE VRIENDT

Cl. V. J. Lipsio S. D.

Lovanium.

I Rascerer tibi, mi Lipsi, si irasci possit perpetuus meus in te non amor modo, sed & cultus. Epistolarum tuarum centurias vidi, & in iis honores pluresque Belgas, sed nusquam me ego. Si a neglectu; fero, si a despectu; doleo. Nam ut hunc nostra fortasse meretur tenuitas, alterum certe tua non admittit humanitas, quam ut scriptis privatim ad me tuis, ita etiam & typis testatam optabam pluribus. Ignosce, quaeso, ambitioni, sed quae ab amore & honore est: ab amore, inquam, in te meo, ab honore, quem ab officii reciprocatione, id est, a literis tuis mihi pollicebar cum aliis publicum. Ut enim minores illae faculae ab una & suprema illa coelesti lampade splendorem suum accipiunt, sic ego & similes mei a Lipsiano sole, & Epistolaribus tuis, ut ita dicam, radiis. Sed hoc, ut spero, fiet, quando penitus tuum aliquando noveris Vrientium, qui ut nomine, ita affectu & effectum, qua dabitur, tuus, docto & fido hoc Scipione subnixus ad amicitiae tuae fores verrecunde prorepit, admitti etiam rogat, si non suo, at saltem tam boni sui Mercurii merito, tum etiam *Pantini* nostri suffragio, quibus auctoribus te, mi Lipsi, salvere & quam bellissime valere exopto, cui etiam voto meus & tuus subscribit *Harduynius*, Raptim e maxima Fland. XII. Juni cId Id cII, discedente utroque, quem dixi.

Adjeci epigramma in Symbolum tuum, *Moribus antiquis.*

*Si simplex animi candor, si nescia fuci
 Integritas similes nos facit esse Deis;
 Nemo te propius, Lipsi, se aequabit Olympo,
 Nam te candidior nemo nec integrior.
 Rideat haec patrium¹ fallax Vulpecula ad Arnum,
 Rideat & larvis Aula referta novis.
 Tu modo perge animo contra tua secula prisco,
 Nil prius Antiquis moribus atque fide.*

¹ Respondet Lipsius Centur. iv. 16.

² Credo *Machiavellum* Florentinum indicari.

EPISTOLA DCCXCIII.

PETRUS PECKIUS

J. Lipsio.

Lovanium.

Scripturienti mihi ad Lipsium nescio quid in mora non fuit. Sed illud maxime, quod desueta mihi pridem Musarum sacra; quae quidem praecunte¹ *Lautio*, ducente *Gulielmio* attigisse me aliquando negare non est opus: sed hac fini. Ultra tendentem adolescentem retraxit pater. utique meo bono. Non enim is eram, cui ex eo pulvere laus speranda: aliqua forte ex hoc, in quem me impulit; scilicet ut illi, *qui nescit quantum Cassellius Aulus, Et tamen in pretio est.* Ceterum ex quo tempore ad juris studium serio me contuli, & ad forum, anni sunt circiter xx. quae mihi adversus barbariem salus? Papi-
nianum, Paulum, & totum illum Senatum veterum Jurisconsultorum non dico, in quorum pura & diserta scripta, velut in deliciores hortos plerumque me recipere, & subinde ad *Cujacium*, *Connanum*, *Costalium*, aliosque his similes divertere lubens soleo. Sed fieri non potuit in perpetua causarum actione, quin alii illi inculti scriptores, a quorum lectione abstinere interim non poteram, plurimum in me sibi fumerent; unde, & ex Gallico dicendi & scribendi usu, mea illa a Latino sermone, quam audivisti, peregrinitas. Adolescens Latinius paulo, sed consuetudine magis, quam iudicio sermocinabar, forte & scribebam. Nunc patrociniis causarum relictis, quoniam in liberio-
rem aream eductus mihi quodammodo videor ad reprehendendas litteras, equidem conatum a diuturna ista intermissione longius petendo, spiritus fumo ad cursum. Utinam afflaret me litterationis alicujus amicitiae aura, quae hinc mihi vix ulla: nisi quod Lipsiana lectitans, Lipsium animo meo absens audio, ausculto, & pendeo ab ejus ore. Credas enim hoc mihi, non alius huic menti ad retractanda optima illa studia jam stimulus, quam ex igniculis quibusdam, quos excitat quicquid attingo tui. Itaque temperare mihi diutius non potui, quin litteras ad te darem. sed quas, & quales? scio, & fateor, nullius rei, nec ad cogitationes tuas, nec ad gustum. potius tamen eas, quam nullas. Vidisti patienter epigramma, quod effuderam apud vos commendandis responsis gravissimi viri, tuique & mei olim amantis *Wames I*: & visus est tui probare; non tamen mihi, qui recudendum censui, ita ut nunc mitto. *Gorselius* defugit laudatiunculam hanc, quasi nihil operae ad edendum contu-

M 2

lis-

¹ Respondet Lipsius iv. Cent. 28.

² Hic *Peckius* filius *Petri Peckii* Jcti & Professoris Lovaniensis, ipse Senator Machliniensis, deinde Sanctioris concilii Senator, & Brabantiae Cancellarius &c. vid. de utroque *Valer. Andr. Biblioth. Belgic. & Fastos Academ. Lovan. pag. 193.* notus in annalibus rerum patriarum: nam ad Foederatos ordines, Pacis vel induciarum causa, legatus fuit.

³ An sit *Ludovicus Lautius*, quem memorat *Valerius Andr. Bibl. Belgic. pag. 636* nescio: ut neque an *Joannes Gulielmi* innuatur, quem idem *Valerius pag. 511.* & *Boxhorn Theatr. Holl. in Harlema celebrant.* Nam *Jano Gulielmo* operam dedisse vix puto.

lisset. ⁴ *Weymsius* communem esse vult, & contendit, cui accessi. Quod si eo me honore dignaris, Lipsi, ut admoneas in hoc carmine vitiorum, tunc equidem existimabo aliquam mihi partem fore in amicitia tua. Hoc ergo, quae mea est audacia, sed a candore animi, sperabo. Et ecce me officiosum. Si quid ad amicos Leodicenses, ut *Billehoeum*; & *Oranum* velis, intra paucos dies isthuc mihi iter. Si quid abs te adfero, tanto illis adveniam gratior, quanto apud doctos bonosque omnes optatissima, & gratissima tui memoria est. Vale. Machliniae. prid. Kal. Aug. 1602.

*Non leve Corfelli donum est, & non leve WeymsI,
 Publica WamesI scripta quod orbis habet.
 Scripta boni atque aequi thesauros, lucida, acuta,
 Paene oracula; viro, sive ea nata seni.
 Quis porro, ut praejudiciis, fora nostra, receptis,
 Debebunt quantum nulla aliis alia.
 Multa adeo ad mores hic nostros, sive profanum,
 Sive sacrum, ex umbra non repetenda Scholae.
 Omnia quae recto ille Cato sic exigit aere,
 Librare ut metuat justius ipsa Themis.
 Munificos nimis heredes, privata fovere
 Commoda quos tacito non juvat ista sinu.
 Quin etiam proprii non parvus uterque laboris,
 Quae lustrando operi, quae poliundo adeunt,
 Et tersa expediunt lima: tamque ordine pulchro
 Tot responsa aptant ad Canonum titulos,
 Ut sicut totus Wamesius exstat in illis,
 Sic possint juris totius esse liber.
 Quod dum isti satagunt, & publica sic bona curant,
 Vitae usum aeternae dant, capiuntque simul.
 Dant illi, cui, postquam aevum mortale agitavit,
 Immortale aliud nascitur hoc opere:
 Et capiunt per quos hoc orbi; dum sua quondam
 Emmittenda istis non sequiora parant.*

⁴ *Stephanus Weyms* a *Voerda* Institutionum Professor Regius Lovanii &c. vid. *Valer. Andr. Biblioth.* & *Fast. Acad.* pag. 200. edidit ille *Consilia J. Wamesii*. de *Gerardo Corfelio* videndus *Valerius* in *Fastis* pag. 202. hi vero inter se conjunctissimi. *Gerardi* enim *Corfelli* soror *Machtildis* nupsit *Weymsio*, & *Corfeliarum mater Maria*, erat soror *Joannis Wamesii*. vid. *Valerii Biblioth.*

EPISTOLA DCCXCIV.

HENR. d'OULTREMANUS

Cl. J. Lipsio S. P. D.

Lovanium.

ET judicium nostrum de Arria Paeti, & Martialis versiculo illi plures alios vario sensu a nobis substitutos, una cum Coreti Monumento, tibi, Cl. Lipsi, non displicuisse, ex postremis tuis libens intellexi. Nec alia spes nobis de Carmine, quod Senecae tuo praefigendum, si pateris & meretur, eadem confidentia ad te nuper ire jussimus. Valeant enim, ac plorent asperi illi Morychi: aut certe nobis, amicis dico tuis, quam humanitas tua olim elargiebatur (ac desuisse te propter illos vix est ut probem) laudis & gloriae tuae communionem aliquam, ultra non invideant. Sed quis a vobis ad nos usque veniens Enthusiasmus, rude donatos in poëticam hanc Arenam trudit rursus? puellisque vix jam idoneos, procum agere, Musisque supplicare intempestive compellit? Etsi illae quidem veterem amatorem adhuc agnoscunt, & innocenti non difficulter respondent. An quia tu unus Apollo noster, a quo afflatus hic omnis, Musagetesque dignior, Lipsi? qui & torporem nostrum excitas, Nymphasque illas nobis concilias, & plectra lyramque reddis, quae ad Divi illius tholum miles emeritus jampridem suspenderam? Cui rei testificandae, magis vero assiduo in te amoris nostro & cultui, ecce ad superiora Carmen: quod in Pennam Argenteam illam tuam recens conscriptum, tanquam Herae & Dominae, minor nostra, cum veneratione libens merito submittit. Excitandis etiam ad concelebrandam certatim illam nobiscum, cui tantopere debitor Orbis universus, Athenaei vestri, Heliconisque istius Alumnis. nisi jam fecere, quod fecisse certe omnes oportuit. Atque ô utinam Divae illae, non jam Aonides amplius mihi (ut cum tuo *Douza* loquar) sed Lipsiades, sic aspirassent canenti, uti ad limen primi ex Operibus tuis, cui lucem dabis, post votivum illud tuum, hoc nostrum quantumvis impar, statui mereretur. Ambitionem excusa, Lipsi, quae ab Amore. neque damna, si ille, qui animum hunc tibi, ita nobilioribus scriptis tuis exigua haec sui testimonia, cum res patitur, conjungi & adnecti cupit. Cui quidem de te cogitare, te litteris compellare, ita volupe est, ut nisi vererer, ne Davus audirem interturbans, etiam sine argumento, sine spe responsi, aliis cessator, cottidianas fere ad te conscriberem. Quin tui desiderium ita amplius non fero, ut si ad nos propere non venis, cujus spem injecisti nuper (at hiems ingruit. cum Zephyris-ne ergo & hirundine prima anni novi?) ipse ad vos excurrendi veniam ab Arthritide mea impetraturus sim. Cur enim meam non vocem, cui nuncium remittere, nisi simul & huic vitae, non licet? uti te, Lipsi, oculis totum intueri, corpore amplecti detur, quem animo jampridem! Ac tibi dico nullus istinc ad nos venit, cum nullo congregior, cui tu

notus, quem de te rebusque tuis, de vultu dico tuo, de gestu, habitu, sermone, convictu, similibusque non curiose percuncter. Jamque paro ad *Othonem Venium*, uti effigiei tuae Exemplum ab Archetypo minime degenerans, si habet, ad nos quamprimum mittat, quod in illustriori Atrii nostri parte collocatum, absentis tui loco venerari, imo alloqui, si fas sit, certe acriores ab aspectu illo ad virtutem sapientiamque stimulos, influxusque novos indies haurire possim. Ignosce amanti, Lipsi. ama ab hoc magis. nec dico jam ultra, nisi ut valeas, sed & rescribas, cum vacat. Valentianis. xix. Augusti A. M. DCII.

EPISTOLA DCCXCV.

HENR. d'OULTREMANNUS

Cl. J. Lipsio S. P. D.

Lovanium.

TAm postremis tuis rescripseram, jam nostrae plures jam dies Tabellarium hunc expectabant, cum ecce ab altero tuae cum libellis. Fasciculum itaque nostrum resigno, & ad priores, nihil in illis mutans, haec addo. quibus si tuas dicam gratissimas nobis, libellorumque munus fuisse, annon credes, Lipsi? Nex erat fere cum accepi, ac jam me quieti composueram, cum ad Nomen tuum erectus lumen posco. & in multam usque noctem, a capite ad calcem utrumque revolve, maxima cum voluptate, neque somnus premebat, dicam-ne alterum cum indignatione etiam? Quis enim scarabaeus iste, qui Aquilam nostram Volantem in nubibus? quis Lucius, qui lucem per te, quam lippientes oculi non ferant, ac sibi aliisque ignotus, innotescere suo damno concupiscit? Abi Canicula. latratibus tuis Equus Belga noster non movetur. ac in tam ignobilem absit ut Alexandri ille generosus Canis infurgat. Abi dico. nisi calcem ab illo, ab hoc dentem expectas. Dixeram-ne? Abi mastigia. ac caudam sub alvum reflectens, & ejulans fuge, & in latibulum tuum te abde quantum potes. Quis non rideat, Lipsi, pumiliones istos Herculi nostro insultantes, qui somnum propterea non rumpit? quis non leves istos fumos invidiae, non fumos? *Ἀναπνέου* enim porro Gloria tua. virtusque e supremo Olympi jugo, ventos istos luctantes sub pedibus, nubilaque omnia jampridem contemnit. Vives enim aeternum; ac tecum Tacitus, reliquique qui tibi lucem uni, imo vitam debent. Bene tamen, quod Culicem hunc molestum palma excussisti. ut sit documento caeteris, una cum³ *Diodoro*, & *Domanno* fraterculis, non semper impune Lipsium laceffi, qui saepius silens &

¹ His duabus epistolis respondet Lipsi. rv. Centur. Misc. xxxii. quam vero secunda epistola se a Lipsio cum Fasciculo accepisse scribit, est ejusdem Centuriae xx.

² *Henrici D'Oultremanni*, patria lingua *Woutermans*, elogium & vitam vide apud *Valerium Andr.* Bibl. Belg. pag. 364. praecipuum opus, quo inclaruit, est *Historia urbis & comitatus Valentiarum*. sed cum de metropoli Nerviorum & Cathedra Episcopali Tornacum detrectasse videretur, *And. Catullus* in Tornaco Syntagm. vi. pag. 53. ejus argumentis respondit.

³ *Theodoro Cornhertio*.

& petiens, quandoque recalcitrat undique tutus. Alioqui ludibrium tantum miselli illi debent. indigni, quos Imperator tantus vel audiat provocantes, cum quibus vix velites nos apte committeremur. Rideamus ergo Culices hos, qui se ipsi ad clarissimum lumen tuum comburunt. Tu vero perge. sed tempora-ne Senecae tuo lucem adhuc invidebunt? miserrima illa quidem, sed tu cum Doctore illo tuo, ad externa illa omnia obfirmatus, despiciensque ab alto, in Musarum sapientiaeque gremio tuto conquiescis. Valetudinis causa justior. Vacillat ergo illa adhuc, Lipsi! percussisti enim nos certe, qui *συμπάρομεν* tibi, sed & Orbis debet universus. Cujus cum ingenti damno esset, si tot praeclarorum operum, qui lucem jampridem spectant, extremam manum, ac tot coepta alia, illa abrumperet. In hostes avertat hoc omen Deus. qui te, Lipsi, Amor noster, aeternum conservet, valentemque semper ac firmum reddat, uti te, laborumque tuorum fructu frui Orbis aeternum possit. Haec votorum nostrorum summa. Valentianis. xxv. Augusti M. DCII.

EPISTOLA DCCXCVI.

HENR. D'OUTREMANNUS

J. Lipsio.

Ad Effigiem Cl. Justi Lipsii laureae.

Lipsiadem expressum (mirare) haec arcta tabella
 Quem minor immensus non capit Orbis, habet.
 Haec Lipsi Effigies. Nihil addo. Hoc nomine quidquid
 Olim Orbis stupuit, vel stupet iste voca.
 Lipsius. Astra brevis sic Sphaera, Polosque reponit.
 Sic Orbem in Tabula contrahit Ortelius.
 Invide, quid Suadae, pictor, premis ora? resolve
 Flexanima ora, meum Lipsiadem ut videam.
 Exprimit ora, oculos Lipsi pictura. Sed unus
 Ipse suae Mentis pictor & ingenii est.
 Lipsius. Huic alius nemo certaverit. Aevum
 Vix par docte tuam Varro vel omne feret.
 Hoc Natura Parens longis emortua seclis
 Miraculum his voluit edere temporibus.
 Quae Manus his ausa est Tabulis includere? nullis
 Limitibus spatium est Lipsii & Orbis idem.
 Lipsio Imago sacra est. Assurgite. Sacrat eandem
 Cum Sophia Eunomie Pieridesque sibi.
 Lipsius in Tabulis longum post fata superstes
 Aeternum in scriptis vivet ab ingenio.
 Sic oculos, sic ora, manus fert Lipsius. O si
 E Cathedra dicens posset ab arte dari?

2 Singula disticha Epigramma faciunt separatim.

Quid

*Quid vocem a Tabula, quid labra diserta silenti
 Pŏscitis? in scriptis perpetuo ore loquor?*
*Attrahat huc oculos. trahit aures Belgicus ille
 Lipsius, Alcides. Gallicus ille minus.*
Aspice Lipsiaco quam laeta Modestia vultu!
Hospitis ille notas interioris habet.
*Insidet ora Venus, Sapientia pectus. in ipsis
 Luminibus ducit Gratia nuda choros.*
*Quis vir hic exigua spirans in Imagine? Magnus
 Lipsius. In scriptis spirat at ille magis.*
Quid Senecas, Tacitos, tot docta quid ora requiris?
Tot veterum expressus Lipsius instar adest.
*Aurea debuerat statui Chrysostome Lipsi
 Lingua tibi, atque Amnis aureus ore fluens.*
*Lipsius. Hoc triplex sol nomen adorat & Arctos,
 Roma vetus fasces cedit & imperium.*
*Lipsium in effigie tacitus venerare. Silendo
 Laudari haec nova lux, hic stupor orbis amat.*
*Dum Senecae pictor viva ora oblita reponit,
 Expressam obstupuit Lipsiadae effigiem.*
*O si Animam haec Lipsi, velut ora, referret Imago
 Haud alia in terris pulcrrior ulla foret.*
*Non Ars ista Deos, Lipsi, exprimit. Eclypon in se
 Nobile Divinae Mens tua Mentis habet.*
*Miraclum secli est Moles unius. at uni
 Lipsiadae haud dederunt saecula multa parem.*
*Visibus humanis quo se daret aurea Virtus
 Lipsiadae assumsit corpus & ora sui.*
*Lipsius an Virtus fiet hic, fuge quaerere. utrovis
 Lipsius & Virtus nomine Numen idem est.*
*An Lipsi haec tabula est? O Magni nominis umbra!
 Digna loco Magni Numinis umbra coli.*
*Excubat ut Nudo delubri in robore numen
 Sic Lipsi hic Genius, hic mihi spirat Amor.*
*Lipsiadae, velum est Timantis, Imago. videri
 Non nisi sub picea sol quoque nube potest.*
*Picta foris Veneres, Floresque, reclusa profundit
 Munera, sic & opes Pharmacotheca Deum.*
*Lipsius. Hic libros, hic ponite ferta Camoenae,
 Virgam Hermes, Paphie Ceston, Apollo lyram.*
*Ne quid in hac Momus reprehendat Imagine, Lipsi.
 Corda aperi, haud taeta candidiora nive.*

En Musagetes. Procul hinc Monstra improba. Lipsi
Terret Alexicaci sola vel umbra malos.
Hanc faciem tibi Honos tibi Virtus induit. uno
Ore Deos geminos, Lipsi, animisque refers.
Lipsiadae hocce Caput sacrum est. Pandora Deorum,
Mnemofydom ac Sophiae Bibliotheca loquens.
Ad Senecam reducem praefige haec ora, Morete,
Si Senecae illa aliquis dixerit ora, bene est.
Cur Lipsi, ista suis nudatur Imago Parergis?
Dignum, Inserta polo Roma, Parergon erat.
Pinge Otho perpetuos Lipsi Romaeque triumphos.
Romam & Lipfiaden Arcus & Ara notent.
Per te Roma iterum Roma est, O Romule-Lipsi,
Nomen & Aeternae rursus & omen habet.
Urbs Dea terrarum, magna, admiranda, quid olim
Quid Praecone tuo nunc quoque majus habes?
Romule condideras, auxisti Auguste. ruentem
In folio, Lipsi, sideribusque locas.
Moribus antiquis, Lipsi, stetit illa. resurgit
Moribus antiquis. laus ea tota tua est.
At tu in Barbaricem varie fera bella moventi
Et chartam & calamos, Pi&tor, ut arma dares.
Pinge Tropaeophorum, qualisque Acrone peremta
Rettulit ille Parens Urbis opima Jovi.
Lipsius. Adde obiter Labyrinthum, Pi&tor, & una
Hac una ad Sophiam Fila regenda manu.
Cur sua Lipsiadae desunt Acheloia dextrae
Cornua, ut ipse suas hic quoque fundat opes?
Virga ubi Mercurii est? qua Lipsius evocat Orco
Nomina magnorum tot rediviva virum?
Quin Rhodopem hic renovas mirantem, ubi Lipsius-Orpheus
Et lyra, & attonitas ducat ab ore feras?
Aut Latiam Andromedem, Monstro quae praeda furenti
Libera Lipsiadae-Persei ab Ense sui est.
Quin procul Aonio ducunt in Monte Sorores
Praesule te, Lipsi, major Apollo choros?
Quin solidae impositum Constantia dia Columnae
Evehit, atque Jovis collocat ante pedes?
Lipsiaco Capiti, Pi&tor, superindito Sidus.
Hic Helice in dubiis, hic Cynosura viis.
Cur tua non redimis Joviali tempora Quercu
O Latii, o veterum Luxque Salusque patrum?

Ora Nepos, Taciti, Caesar revocaverat olim.

Is modo Lipsiaca vivit in effigie.

Lipsi. Nestoreos Lachesis tibi perneat annos.

Nestoria at, Pictor, si potes, ora refer.

Lipsius Alcides Musarum. In monstra ruenti

Penna cui clava pro domitrice data est.

O Lipsi-Alcide. tibi longa det oscula Conjux

Juncta tibi Oetaeos ante Juventa rogos.

Hic Lipsi Invidiam, recidivaque sibila, laudum

Ac meriti, exsuperans, non rogi ab Igne domes.

Lipsiadae in Magni vultus descendit Apollo.

Non jam alium agnoscit turba Novena Ducem.

Dic. Miscesne tuis, Otho, mella coloribus? Ecce

Sugit Apis roseo Lipsii ab ore cibum.

Musica, Lipsiadae libans Apis oscula, muto

Ars dare quem nequirit, quem potes adde sonum.

Commodet ora tibi, Pitho, sua Lipsius, ora

Vera minus, rapiant ora aliena magis.

Lipsi ora in tabula Pitho dum conspicit, O sic

Viva forent! maneat tunc mihi nomen, ait.

Dic Otho. Miraculum hoc dum pingis, totus in illo

Qui constare tibi Mensque Manusque potest?

An Lipsi, an Sophiae est quae Mentem accendit Imago?

Quas propior flammis ille vel illa darent?

Sic humiles Terras Paean Hecatebolus urit

Magnetem Chalybi, sic procul unit Amor.

Alloquar. atque tua te sistam in Imagine Lipsi.

Erudit, ecce tui supplet & illa locum!

Desine Lipsiadae miracula stupere loquentis,

En, etiam muta vox sua in Effigie est!

Fascinat, en, Tabula haec. quis crederet? atque videndo

Pectora, nescio qua transitione movet.

Sic nova Pygmalion incendia ab Icone sensit.

Hinc quoque, queis feriat spicula sumit Amor.

Lipsius. O Pictor Mentem simul exprime. Solem

Haud Coelo invideat clarior illa suum.

Sola tuos, Lipsi, vultus effingere Apellis

Dextera digna foret, si tamen ulla foret.

Dic bona verba. Sacri sacra dium hic spirat Imago

Lipsiadae. Euboicae secula Vatis agat.

Lipsiadae Heroi sacrat Oultremannus. & ipsum

Una Animum. O noster iste perennet Amor!

Quid

*Quid mirare tua varios super Icone lusus?
Lipsi. hos dictat Amor. excipio ipse lubens.*

Ad laureas illas nostras, suam addebat nostrum utrique P. Judocus Fortis
Soc. Jesu. ac Rhetorices in collegio nostro professor.

*Vir doctum doctus dum pingit, Amicus Amicum,
Unica utrumque simul reddidit effigies.
Nam se fingit Amans, animo dum fingit amatum.
Quique animo insedit profilit ex animo.
Immortale decus merito debetur utrique:
Unica in Effigie vivat uterque simul.*

Respondet ad haec Epigrammata Lipsius IV. Cent. Misc. LXXXIX.

EPISTOLA DCCXCVII.

HENR. d'OULTREMANNUS

his suis respondebat

Ad Cl. Justi Lipsii Phaleucos.

ITe ad Lipsiadem meum, Phaleuci,
Ite ad Lipsiadem, novum immo Phoebum,
Unus qui Aoniis suum Puellis
Nectar, Ambrosiam suam propinat.
Unus, dum se hilarant, Modiperator,
Praeful ad choreas, Magister oris.
Promus Castalidum potens aquarum
Quarum unus caput, unus ipse Fons est.
Fons, dico, Oceanos scientiarum
Cornu divite perpetim profundens.
Cujus Aura Sophos levans, & ipsam
Fert late Sophiam, sacratque coelo.
Illi haec dicite. Non Amor fefellit,
Falli non potuit tui Oultremanni,
Dum te, dum varie, tuam, mala ausus
Dignis Icona laureis obumbrat.
Falli & fallere Caecus ille nōrit
Mendacis Cypriae dolosus Infans.
Quem pennae abripiunt. leves & aurae
Incertas temere ferunt sagittas.
Caeco quas, malus imbuat veneno.
Aetnaeque rubens camini Alumnus

*Atris Ignibus utra corda adurit,
 Caecos reddere cura prima coeco est.
 Falsa vel dare perspicilla, amantum
 Queis falsas oculis refert figuras
 Ludens praestigiis cupido. flavent
 Sic cuncta Ictericis. putat refractos
 Sic remos tremulis celeusta in undis.
 Fraus nam certa Comes, Dolusque & Error.*

*At noster nitidi propago Olympi
 Caelestis Veneris Jovisque proles
 Sancto corda ligat beatque nodo.
 Is candore nives, is anteit ipsum
 Visu lyncea. nec foveat, probarit
 Nisi quos prius igne, lance. juxta
 Segnis fallere, nesciusque falli
 Illum namque Fides, & ima cordis
 Nudans Integritas, & ima lustrans
 Veri Diva sciens, Charisque nexa,
 Virtus atque Honor, Anterosque frater
 Ducunt, aut comites sequuntur. Ille
 Haud tantus facit ut putere, Lipsi,
 Sed tantum, merito colant ut omnes.
 Hinc noster stupor, Orbis hinc Amores.
 Hinc praeconia tanta, tot Coronae
 Vix jam ipsa Invidia invidente surgunt.*

*Quis Solis jubar aureum, quis ignes
 Late quadrifidum beantis orbem
 Celarit? merito suos honores
 Quis neget? tua, terminatur isdem
 Lipsi, Gloria finibus. nec ipse
 Titan Clarior. obligansve tantis
 Mortales varie bonis Deosque.*

*Unde ergo rubor hic, Amice? si, quas
 Et Fides bona, veritasque distant.
 Laudes concino? si, tuus profundit
 Quas Daphnon mihi, quas Amor revincit,
 Repono capiti tuo Coronas?
 Quin ignosce magis, stupenda tanta
 Artare exiguis modis quod ausim.*

*Nam quis te superis parem, quis, inquam,
 Digne dixerit? aut tuae Columnae
 Tangentis solium Jovis, supremum
 Posse evadere speret in cacumen?*

*Ergo desine d'Oultremann. Quid ultra
Tentare Icarios juvat volatus?
Cui, quod diceris esse Di negarunt!
Sat laudis mihi, tanta libo tantum
Si Miracula. Serta si columnae
Ad pedem statuo. Basique, Lipfi,
Subscribi pateris tuum meumque
(Quod seri invideant decus nepotes).
Nomen cum titulo brevi, Oultremannus
Magno Lipsiadae, cliens dicabat,*

Vid. iv. Cent. Misc. 89.

EPISTOLA DCCXCVIII.

HENR. d'OULTREMANNUS

Cl. J. Lipfio S. P. D.

Lovanium.

I Amdiu nihil respondes, amice Lipfi. nec tamen succenseo. Occupationes enim in caussa, aut infirmior fortasse valetudo. quod postremum abominor. At nos quintam jam hebdomadem lectus tenet; nec tui tamen memoriam depono. Testes hi versus, quos dum defaevit morbus, partim etiam ut solitudinem meam solarer, in centurias Epistolares tuas composui. Quaeres cur hoc argumento? Oratorem apud te ut agam, jampridem instant apud me literati nostri. quos quidem Centuriae illae tuae ita delectant, uti novis abs te beari, dici non potest, quam desiderant. Dixi fecisse me, nec profecisse. urgent magis. Hos ergo mitto. si forte quod pedestres litterae non potuere; sublimius incedentes ac loquentes isti jam impetrabunt. legem tamen dixi. si nihil serium aliud meditaris. ac post Senecam illum tuum, Monitorumque & Exemplorum politicorum libros duos (sed quam lentus in illis Moretus noster?) ferari lubeat jam. ac sic in tot amicorum recordatione Epistolas tuas recensentem, suavissime conquiescere. Crede non Valentianos tuos tantum, sed Orbem cultiorem universum, hoc enixissimis precibus abs te poscere. cujus te ingens gloria maneat, utcunque Zoili & scioli nescio qui obloquantur. si exorant illi, vel hoc nomine non indignos judicabo, qui praefigantur, agmenque ducant. si modo titubantes, uti a podagrico compositos, corrigas ipse ac firmes. At non titubat Amor in te noster. Constet & tuus. valetudo inprimis. quam perpetuam, ac ex voto tuo. ac ut feliciter hic annus decurrat, felicior recurat alter, mihi, tibi, sed & Reip. nostrae, o Lipfi, totis praecordiis Deum imploro. Valentianis. XXI. Decemb. A. M. D. C. III.

In Centurias Epistolares Cl. Justi Lipsii Carmen.

*Vos O Pierias, Sophiaeque exculta per artes
Pectora, quae assiduo, prisca vireta, pede
Hellados & Latii varie peragratis, & una
Lipsiadae haud priscis culta vireta minus,
Carpite secure divinis gramina succis
Sertaque in aeternos texite odora dies.
Nec jam Barbaries, fera non Inscitia, non jam
Incutiat vobis livida Turba metum.
Dux novus, en, Latium doctasque tuetur Athenas.
Moribus antiquis clarus, & arte potens.
Hellada jam & Latium Grudios is transtulit. & jam
Hellas ibi & Latium, Lipsius ipse ubi est.
En, ut Diliacis ambas jam lustrat in undis!
(Dilia! quam uberius fonte Helicon, tuo es?)
Ac mala degeneris tollens contagia saeculi
Reddere sic decori certat utramque suo
Vellere nunc video nocuas radicitus herbas
Damnaque seminiis haec reparare novis
Nunc falce emeritos sterilesque abscindere ramos,
Inferere & docta Lipsica poma manu.
Hic nova post genitis Plantaria pangit. at illic
Viva sacrans riguae flumina ducit aquae.
Omnis &, huc, aevi Miracula (sed extera cedunt
Lipsiacis) pleno fundit, opesque sinu.
Nec satis hoc..valido loca Milite cingit & armis,
Praesidia & passim Centuriasque locat.
Robora Epistolicae Legionis; nomina in illis
Summorum aspicio Marte Togaque Ducum.
Queis studium hinc hostes, vulgusque arcere prophanum,
Bellare, ac placidos aere ciere viros
Atque ad Virtutem Sophiamque accendere cantu
Antipodum extremas hinc vel adusque plagas.
Vieta fugit fera Barbaries. Tuque, improbe livor,
Anguicomum Stygio condis in amne caput.
At Sophia, & Pallas, Dea Suada, Politica, Apollo
Hic sibi Gymnasium Pieridesque dicant.
Maeste animo, O Lipsi! quo jam Duce Cultior Orbis
Cultior it, priscum te referente decus!
Per te aetas alios veterum jam computat annos,
Postque rogam major splendidiorque redit.
Maestae Centuriae! vos Dux legionibus augens
Vobiscum in niveis usque triumphat equis.*

Accipite emeritum, vestrisque reponite Turmis.

Fas Duce sub tanto vel mihi castra sequi.

Ardeo te ut videam. Quid opus? Si corpus Imago

Si mentem atque animum Centuriae exhibeant.

Henr. d'Oultremannus Valentianus.

EPISTOLA DCCXCIX.

J. L I P S I U S

Philippo Rubenio suo nunc & semper S. D.

Romam.

Postremae tuae litterae valde gratae, quia & in iis libere te revelas (quod apud me debes) & viam aperis, qua idem ego possim. Omitto sollemnia & amica, nosti me: de re dicam. Quod deliberas de migratione in illius magnatis domum; ego ex usu censeo, nec probo solum, sed suadeo, ut rem tuam illic, sed & publicam nostram esse video, & fore divino. Nam nobis quid superest, quam

Ἀλγεσι τεύρεσθ' ἔκ ἀπρήκτοισι ὀδύνῃσι;

miseram Belgicam, cui asperum fatum incumbit, & mala malis addit! Audi-
stis de Gravia obsessa (quid si nunc dedita? ita fama mussat) sed exitiale ma-
lum accessit discordia & seditio, & bona pars militum avulsi a nobis, & pu-
blico Edicto hostes judicati. In eos arma vertimus, hostis subsidiis nixos: &
quis exitus, pro bonorum votis, speretur? Ego tibi dicam, mi Rubeni,

Ὅτε π' μάντις ἔων, ἔτ' ἰωνῶν σάφα εἰδώς,

sed dicam, convertimur & ad novam rerum faciem imus. Inter dolores &
lapsus publicos, juvet tamen sapere, & recto mentis oculo arbitrari quae fiunt.
Quid oporteat, videmus, quid possit etiam: sed oculi ac mentes quasi fasci-
no illis praepediuntur, & mali coeptam viam pergunt. Viderint Principes:

— — nos vilis in omnes

Prompta manus casus, domino cuicumque parati.

me tamen excepto, qui Catones, Brutos, Senecas in animo gesto: & morti
potius, quam dedecori occumbam. Sed ad te redeo: quem retinet nonnihil
iste, scio, *μεγάλην δύναμιν ἐν Βελγαῖς κεκτημένῳ*: sed si examinas & te cogi-
tas, quid erit?

Αἰεὶ δὲ μαλακοῖσι καὶ αἰμυλίοισι λόγοις

Θέλξας.

res & effectus erunt tarda. Itaque de illo Ibero ego auctor sim audendi, si ta-
men decora & te digna offert. Si non; me vide, adnitar & manibus pedi-
busque protraham, quo tua virtus & ingenium vocant. Pudor! blennos &
buccones evehi, vos tales jacere, qui variis verisque eminere potestis! Vides
liberam epistolam, ad matrem misi; si quid ultra est, significa, & me ut ami-

co utere, imo (scriptum ante repeto) ut parente. Lovanii, x. Kal. Octobr.
∞. 10CII.

EPISTOLA DCCC.

J. L I P S I U S

*Phil. Rubenio suo.**Romam.*

NUper ego ad te, nec didici accepisse. Binas quidem a te interea habeo, sed nihil de meis, aut ad meas. Parum est, dum constet te non negligi: negligi autem? quem ego in hoc animo circumgesto: & cum deponam, — τότε μοι χάνοι εύρεία χθών. De Schoppio pluscula scribis, grata auditu: & praesertim de intentione illa studii, & ἀπαχέσει a vino, & omni luxu: perseveret, & quo caepit, eat. favemus. Quando autem illa de Institutione? maturuisse debebant, & comparere jam hi fructus. Quae a me quaerit, non proprie ad Stoicos spectant, & nihil ibi, quod sciam, ab aliis diversum. Haec tamen quoque in Ethicis tractabimus, & Physica jam habent finem. Saluta a me virum corde. Tuum illum jam Regem inclinare ad reditum, & ad nos, video: impelle, meis votis nunquam nisi sero venietis. De rebus tuis coram, & sponde tibi consilium auxiliumque omne, quod vel proli, si habeam, donem. Ama me, & veni. Lovanii, III. Nonas. Novembr. ∞. 10CIII.

EPISTOLA DCCCI.

J. L I P S I U S

*Philippo Rubenio semper suo.**Romam.*

INvitus ad te scribo: ne mirare. Vos ego jam exspecto, jam occurro, jam brachia pando ad amplexum. Quid iterum a solida voluptate ad hanc imaginariam vocor? quid a veritate ad umbram? Venite, affamini, & sistite mihi tres vos illos meos: quos non dimisi, sed com meatum in tempus aliquod dedi. At Italia vos tenet, quam hoc nonime minus amo, quia vos sic amatis. Redite, vis dicam? aut ad alios amores ego eo. Senesco, canesco: longum expectare non possum, frui nunc aut nunquam debeo: & fruamur, ita omnia votiva vobis Deus in reliquam vitam donet. Usuram brevem ego posco: sed tam hilaris, quam ii, qui aetate disponunt & promittunt. Audi porro non grata, καὶ ἔ κατὰ θυμόν. Noster ille προσέτης ab Ate Homericæ laesus est, id appello Διὰβολήν: heu, heu ævum! Meministi de quodam praetore Gallo? ille, ille est caput & fons mali: in Hispaniam scripsit falsimonias & delationes, Dii boni! improbas & atroces! res agitur, sed boni plerique

que omnes nostro favent, utinam & Eventus! De re & vero non ambigo: tempora & ingenia novi, & cogito, quae non scribam, sed dicam. Mittamus ista, & uno verbo publica *ἐπείον* minime laeta. In privatis, valemus modice: etsi ab ² equi lapsu laesi ante dies octo. nam equum vel equuleum habemus, ut scias, dono Antistitis Atrebatensis: quem cum inscendi ambulaturus, ut soleo, occursum Thessalae alicujus maleficae, ille subito velut ictu concidit, tibiam mihi laesit. Nisi esset, Antverpiae jam essem, ut porro mea ad Senecam absolverem. Comes-Stabuli venit, ego vidi, conveni: de humanitate dicere possum, de aliis animi dotibus aut ornamentis, nondum possum. Quid opus ista scribere? venite, videte, noscite, tres ad me recta: si quis abnuat, tu nihil excusa, & indulge utriusque (nam & de te arbitror) amor. Sic vale, Lovanii, prid. Kal. Febr. ∞ . 100. IIII.

² Vid. Epist. ccxciii.

EPISTOLA DCCCII.

PHILIPPUS RUBENIUS

J. Lipsio.

Lovanium.

AMplissime Domine, G. Scioppio majori paene, quam ipsi mihi, res meae curae sunt. atque adeo renitentem alia via, quam maxime accommodam rationibus meis existimat, protrudere & promovere me conatur. Et quamquam nuper de hac re copiose scripsit, quasi tamen aliquid in illis litteris desiderasset, alteras hasce, ut ad A. T. curarem, nec opinato misit. Quid quaeris? suppuget magnoque timore sum, ne fines pudoris transilire videar, audiamque triste carmen. *Ἀρκάδιαν μ' αἰτῆς*. Verum ille verecundiam meam objurgat, & *πολλ' ἀεκαζόμενον* urget, cogit. Quod vere a me scribi, neque de compecto rem geri credas velim. Fatendum tamen est, non ingrati viri sollicitudinem & affectum; tum etiam inter fastigia votorum esse, ut negotium hoc effici posset, quo stabilitis praeclare rebus meis, & ad reditum via commoda pateret, & in reliquum vitae Lipsio Musisque fruendi facultas daretur. Quod per sacerdotia vix liceret, quae certis alligant locis, & cum onere sunt conjuncta. Ne vero plane desperem, faciunt illae quidem toties mihi feliciter expertae auctoritas & gratia tua, ut vere dici possit, te impetrabiliorem, qui vivit, hodie nullum esse. Nam de voluntate & affectu res ipsae loquuntur, totque tam eximia beneficia, quae vix animo cogitationeque valeo complecti. De modo tantum hoc dicam, *Velasium* Comestabilem cum nimium quantum A. T. debeat, gavisurum datam hinc occasionem graves aëris alieni sine dispendio suo levandi. Sed de his fatis: imo plura quam cogitaram, abducente nimirum *Φιλαντία* reique desiderio votivae. Quod hinc non mediocre fateor esse, quod ego rem factam hac ratione haberem, & A. Tua coeptorum operum exaedificationem. Et spem praebent, qui in Hispania fa-

Tom. II.

O

ci-

cile id impetratu fore autumant, praesertim tanto oratori audendum tantum esse. Si quid hîc novi, in litteris publicis sive Actis habes, magnum certe nihil expectandum, omniaque pro regentium ingeniis. De *Sangeorgio* sic habe, totum in divinis esse, semperque circa se religiosos viros habere, maximeque severioris disciplinae, quos Capucinos vocant. Sed & sacris exemplo avunculi saepe afflere narrant. nec tamen (vide horum hominum ingenia) fidem facit. Non possum plura, exclusus angustia temporis. Deum precor ut te, Amplissime Domine, reipublicae tuisque omnibus servet. Romae Kal. Aprilis. ∞ 15 CVI.

Salutem adscribi rogat frater meus. Ego *Warnerio* quoque nunciari quaeso.

Hanc nunquam vidit Epistolam Lipsius: mortuus enim 23. Martii jam erat.

EPISTOLA DCCCIII.

J. L I P S I U S

Carolo, Duci Croyo & Arschotano.

Illuſtriffime & Excellentiffime Princeps. Dignatus me iterum es benivolentiae & ingentiae tibi humanitatis pleniffima epiftola, qua ita recreatum me fateor in his malis, ut nautae in tempeſtate ſolent, diei illa luce aſpecta. nam in curſu hoc rerum, quid viro bono & patriae amanti non triſte? & hoc aggravat, quod deteriora praefagit infidens animis noſtris

Pefſimus in dubiis augur timor.

Enimvero Belgica noſtra triginta amplius annos volvitur & jaſtatur civilium bellorum his fluctibus, periculo, & paene dicam merſioni, propiorem fuiſſe numquam opinor. movet me & prudentes ad hoc judicium, Ordo, quem partes noſtrae tenent vel augent, & Diſciplina: quae utraque, fatendum eſt, ad veterem militiam (quatenus aevum fert) & laudatam illam Romanam eſſe. Legi nuper ab amico miſſam accuratam Graviae urbis obſidionem, & opera ac munitiones: Deus bone, varias & magnas! Diceret non paucorum aliquot millium, aut ſeptimanarum eas eſſe; ſed Bataviam conveniſſe ad peragendum. Vulgus miretur, non ego: ſcio a quo fonte hauriant, & imitatione ad ſe derivent. Noſtri autem quid? ſtupent cum vident: ſed hoc tantum, ad emendanda noſtra, aut illa aſſumenda, non conantur. Sicut fonitu & minis aves terrentur; ſic putamus illos ad nomen aut motum noſtrum dilapſuros. Jam in Oeconomia & nervo belli, re pecuniaria, quae adminiſtratio illic, quae confuſio hîc ſit, nec decet me fortasſe dicere, nec apud Te debeo, ſuper alios gnarum. Haec plerique omnes vident, & ſentiunt, & queruntur etiam: ſed, ut poëtae verbis dicam,

Quo

¹ Dubito an non ſibi applaudat *Lipſius*, quaſi ex militia & Poliorceticis ſuis *Mauritius* didicerit illa. vid. Epift. DCXLIX. DCCVII. & DCCVIII.

*Quo tristes querimoniae,
Si non supplicio culpa reciditur?*

Quid Deo decretum in fatali consistorio super rebus nostris, nescio: sed mutatio impendere videtur, ex signis & velut scintillis, quas caeleste illud lumen spargit. Gallia adhuc quieta est; sed ingenium gentis, & regentis si videmus, parare & instruere se arbitrandi sunt, ut collectis viribus invadant. Et causae quaeruntur, & semina sparguntur, quae armatos viros, ut olim illa ab Jasone iacta, producant. Haec universa, ex meo sensu interiore (ignosce libertati) apud Excellentiam Tuam promo: in particularibus, pauca nunc possum. Buda & Pestum in Hungaria a nostris intercepta, sed arce (ut here ad me scriptum) adhuc salva. sic tamen, ut litterae Pragenses spem facerent intra biduum aut triduum dedendam; si id sit, medium illud regnum, aut ultra, est nostrum. In Campinia turmae aliquot equitum nostrorum caesae nunciantur, vexilla tria ab hoste capta: quod timide, nec nisi Excellentiae Tuae scribo, re nondum explorata. Siquid praeterea erit, non deero pro obsequio & cultu, quem aeternum Excellentiae Tuae, & serio animo vovi, id significare: etsi praeveniendum me scio aut suspicor ab iis, qui haec officia ex ipsa Aula praestant. Ergo tantum, ut Excellentia Tua beare me sua ista inclinatione animi pergat, animo certe & fide meriturum, ut alia desint. Concludo in voto Salutis Tuae, Illustrissime & Excellentissime Princeps, quam Deus longam, & si possit, aeternam velit. Lovanii, Kal. ipsis Novembr. 1692. CII.

EPISTOLA DCCCIV.

J. L I P S I U S

Carolo, Duci Croyo & Arschotano.

Illustrissime & Excellentissime Princeps. Binas nuper misi haud magno argumento. Quid enim moestis his temporibus, & frigore etiam hoc rerum, praeter querelas succurrat scribere? Nec eae me deceant fortasse apud talem Principem: & certe in re nihil juvant. Nunc heri litteras accepi, quae in Zelandia scriptae. Nunciant Comitem *Mauricium* illic expectari, qui cum aliis rebus, tum Ostendam praesidio & subsidio prospiciat. Nam certum iis, urbem hanc tenere & tueri; ac confidunt posse. Marchio quidam e Brandenburgensibus illac transierat, cum *Ernesto* Nassoviæ Comite, Ostendam viderat, redieratque. Plures adhuc e Germanica nobilitate ibi haerent, ut loca lustrent: & liberaliter iis stipendia persoluta sunt, etiam cum auctario dimidiati mensis, titulo viatici ad redeundum. Embda urbs legatos suos Hagae habet, & petit auxilia contra Comitem suum: imo sermo iacitur de confoederatione ineunda, & quod contribuent, se jungentque in perpetuum cum Provinciis, ut vocant, Unitis. Algeriana expeditio (ut ad remotiora eam) in fumum abire videtur: & negant classem aut copias satis ju-

itas esse huic expeditioni. An non ante praevisum oportuit? Interea alium aliquem Africae portum invasuri putantur, aut oras maritimas, exscensu in terram facto, vastaturi: ne magno conatu & paratu nihil egisse dicantur. Feliciora ab Pannoniis nunciantur. hostem interclusum ab urbe Buda, & omni subsidio ferendo, ponte in Danubio a nostris rescisso. Transylvaniam etiam, *Bastii* opera, totam jam esse nostram. Deus ea firma esse velit, & propriam hanc Christianis laetitiam. Iterum ad nostra. fumus hic in metu a Batavis, quibus seditiosi junxisse aut juncturi se dicuntur, & loca nostra percursuri, aut & urbes (in occasione) invasuri. moniti publicis litteris fumus cavere, & vigilare. Id quam ignave hic fiat, non opus apud te dicam: vires exiguae sunt, ordo nullus, pauci imperare apti, nemo obedire. Ista nunc scribere potui, Illustrissime & Excellentissime Princeps, quem Deum aeternum rogo perennare nobis, & bono publico diu superesse. Lovanii, Nonis Novembr. ∞. 1611.

EPISTOLA DCCCXV.

J. L I P S I U S.

Carolo, Duci Croyo & Arschotano.

Illustrissime & Excellentissime Princeps. Quoties litteras tuas accipio, beneficium & honorem accipere me, bono jure interpretor; & praesertim sic benigne scriptas. Hodie factum: & prompte respondeo, haud magno, aut certe non laeto argumento. Etsi quid in hoc, non dicam statu, sed motu aut fluxu rerum, laeti prudens aliquis expectet? Causae primae & mediae ad successus aut triumphos non ducunt: utinam saniora, & quod deinde sequatur, feliciora consilia fas nobis videre, & in iis gaudere! Principum & patriae causa, quis illorum reverens, hujus amans, non velit? Sed & privata nostra res incipit agi, & a propinqua flamma comprehendi jure trepidamus. Nosti hanc partem provinciae, amoenam & celebrem magis, quam munitam, aut ad vim excipiendam parem. Adversarii nunc quidem alibi distinentur, & utiliora sibi ac magis opportuna moluntur: sed a seditiosis ecquid satis tuti simus, nescio, & ille mihi nunc est metus. Ajunt occulte agi de placandis, idque per Nuncium Pontificium: sed rebus, id est nummis, non verbis aut blandimentis, est opus. Milites sunt, cupiunt & poscunt, & manu possunt. In Aula res caliginosae. Primos aliquot Hispanorum abire, aut abiturire, imo & abisse quosdam nunciant: an quia offensi, an quia offenderint, sive alia causa & fine, quem dies revelabit. Quid in Hispania, id est majore nave, a qua cymba haec pendere videtur, fiat, nescio, & quae consilia eorum, qui ad clavum illum sedent: nobis usque adhuc haud prospera nimis esse, in silentio nostro res clamat. Heu potentia, quid es sine prudentiae luce? quod sine oculo Cyclops? Sed timide & verenter de Regibus loquendum est: & scio.

scio meum hunc oculum in illa adyta non penetrare. Vota igitur, non verba ultra interpono. E Batavis audimus bonis auctoribus, iterum ad expeditionem succingi in aestatem futuram, & jamnunc parari, quae eo conducunt. In Lucemburgensi ditione quid fiet, & praedandi an insidendi etiam animo inerint, brevi audiemus: & utinam illud tantum! Si pedem figunt; ab Italicis auxiliis, a Germanicis commerciis, magnam partem sumus exclusi. Deus avertat. etiam illud, quod de occulto apparatu in nos Gallico mussant; etsi alii de auxilio vel faventia, & quod Pacem nobis, spe communis alicujus (sed meo animo praematuri) conciliabit. E Burgundia ad me scribunt, certum ibi haberi de translatione Sabaudiae in Regem Hispaniae, alia in Ducatu Mediolanensi (an & ipso Ducatu?) compensatione. Aegre credam, nisi res fidem facit. & vetera manere equidem malim, & inprimis veteres mores, novitiis his spretis.

Hoc fonte derivata clades

In patriam populosque fluxit.

Nimis longum facio. unum illud nunc & semper, uti sim Excellentiae Tuae devotissimus cliens. Lovanii xv. Kal. Decembr. ∞. 1611.

EPISTOLA DCCCVI.

J. L I P S I U S

Carolo, Duci Croyo & Arschotano.

Illustrissime & Excellentissime Princeps. Aliquot dies silentium tenuisse me fateor, vel frigoris hujus ignavia, vel quia res languidae, & ipsae, ut sic dicam, frigidae, stimulos ad scribendum non addebant. nam plane rerum vacuas ad te mittere litteras meus pudor, & magnitudo tua vetant. neque nunc a nobis aliquid nunciare habeo, nisi hostem praedae & famae divitem ad suos rediisse, nobis vastationem & (si ausim dicere) ignominiam reliquisse. Praesidia nunc Germanorum disposita per eam ditionem audio: quid nisi fera auxilia, & post ictum cautionem? Copiae conscribi novae & in Germania & Italia feruntur, & exercitum ad xxx. millium equitis peditisque isto vere futurum. Quid pecunia? ingens exspectatur: & ex Hispania litterae, duos milliones (ut noster hodie sermo & numeratio est) trajici, in usum solum Belgicae, adfirmant. Res addet fidem aut demet. Ante paucos dies supplementum ducentorum militum Buscumducis missum fuit: missum, sed non admissum. Cives excluderunt, caussati nec iis, quos haberent, stipendia persolvere: quid istis, si accederent? nec sese, in hac inopia, alendis iis esse. Vides auctoritatem & imperium sperni: quod incoeptum ne longius serpat, aliquis vereatur. Apud Batavos pecunia extra ordinem concessa & indulta, ad novam novo anno expeditionem. Quid de navigatione etiam nova detecta? res mira, si vera est: tamen litteris e Britannia confirmata. Ecce ipsi Britannii

(Anglos dico) quod Batavi bis terque frustra tentarunt, viam facere conati versus orientem, in divitem illam & celebrem Sinarum oram. Ante quattuor admodum menses, binae naves solverunt, explorandi causa flexerunt cursum magis ad Americam novam laevorsum: & freto reperto, quod paullatim magis magisque se panderet, innavigarunt, enavigarunt, & in plenum iterum Oceanum inveci sunt, flexu in Orientem capto, veneruntque ad quinquagesimum gradum altitudinis: id est, mitiora jam loca, nec procul a Tartariae finibus, & limine ipso Sinarum. non tamen progressi longius aut ingressi: quia exploratum missi tantum erant, neque merces aut alia ad fructum. Redierunt in Britanniam omnes incolumes & salvi, paucis tamen aegris: idque ex potu, ut ajunt, ferventioris vini, quo contra frigus necesse habuerant se munire. Nam ante fretum emensum, versus Septentrionem illum rigidum, ad gradum usque septuagesimum pertigerant. Glaciem in mari, aut ursos in ea albos, & quae alia dura aut tristia Batavi experti erant, negant se repperisse. Haec ita distincte scribuntur: si vera, nonne ab Oriente novae opes, magno navigantium compendio, expectandae? Sed ad nos iterum: qui jam in metu eramus, ob Seditiosos, qui se moverunt, & tredecim turmis equitum petere Namurcum & vicina loca feruntur, quid nisi expilandi causa? Novam hanc miseriam! ab hoste, a milite dubio, aut socio vastari & atteri: & novam etiam Constantiam, non succumbere aut frangi. Vides Belgas nostros (quod prodigium exteris aliquis habeat) vel in illa Campinia, contra omnes clades asfurgere, & ut quercum recisam, succrescere magis & pullulare. An non a Deo hoc robur est? speremus, fortuna aliquando mitior respiciet: & tum certe, cum consilia publica meliora eam advocabunt. Deum rogo faciat: te autem, Illustrissime & Excellentissime Princeps, valentem Patriae, volentem mihi servet. Lovanii, v. Idus Decembr. ∞. 15. cii. Nuncius Apostolicus designatus a Rege Hispaniarum Archiepiscopus Tarentinus.

E P I S T O L A DCCCVII.

J. L I P S I U S

Carolo, Duci Croyo & Arschotano.

Illustrissime & Excellentissime Princeps. Silentium meum unicam causam habet adventum tuum: speratum & promissum nobis, sed, & video, dilatum. Causae sunt, non dubito: alioqui Fleuria tua te trahat, praesertim amoenissimo hoc tempore anni, quo frui amoenitate illa possis & oblectari. Etsi nec nos, qui tam propinqui sumus, nimis oblectamur, discursu & rapinis militum assiduis: quos nulla ultra disciplina aut pudor tenet. Prudentiores viderint: sed ego in exitium publicum tendere hanc lasciviam & licentiam arbitror. Quod utinam ne dies & eventus firmet! Nostri hinc Politici oculos & sermones in Angliam vertunt, & ad novum ibi Regem. Ego spei haud multum video. vel ob religionem, quam interiore animo (ita accipio) di-

diversam profitetur: vel ob foedera occulta cum finitimis pacta, aut paciscenda. Quid, quod nemo Principum magnitudini Hispanae fautor & amicus est? imo pro bono suo habent, distineri eum alibi & illigari. Externa amicitia & commercia esse possunt, foedus & societas haud facile erit. Comes *Arembergius* nondum ad Regem fuerat, proprio tamen suo impedimento, & a podagra tardatus. Legatus Gallicus auditus erat: quem ego bono auctore accepi serio acturum de libertate Religionis admittenda, mandato sui Regis. Inter Gallos & Anglos tumultus aliquid fuit, ad manus ventum, & unus ex his interfectus. In comitiis Ratisbonae de pace nostra agitur: sed Germanos nosti, & quam nec velint serio & concorditer, nec si velint, multum possint. De Ostenda frigida adhuc spes est: & morbus pestilens grassari in castris nostris incipit, cum periculo aperto, praesertim sic mature. Deus auxilietur patriae, & te, Illustrissime & Excellentissime Princeps, illi incolumem diutissime servet. Lovanii, III. Non. Quintil. ∞. 1611.

EPISTOLA DCCCVIII.

J. L I P S I U S

Carolo, Duci Croyo & Arschotano.

Illustrissime & Excellentissime Princeps. Affectum me laetitia e litteris Excellentiae tuae debeo fateri, sed cui tristitiae etiam aliqua pars sit admixta. Laetatum me sane fateor, in hac tanta benivolentia, non verbis solum, sed factis expressa: qui honos mihi magnus est a tali Principe, & aeternum equidem agnoscam. Sed tristitia etiam, ut dixi, juncta laetitiam offuscat: quia neque meruisse me hanc benignitatem animus mihi dicat, & non posse nisi illo ipso animo gratum esse. Illo certe sum, atque ero: & utinam rebus in obsequium Excellentiae tuae aliquid possim! Quidquid certe possum, devotum & mancipatum id esse tuae dignitati jamnunc sincere sub signo & testor. Duplex autem beneficium collatum in me una hac epistola Excellentia tua significat, & Donum a Principe; & annui Honorarii mei promptam solutionem, mandato vestro comprehensam. Equidem grate agnosco & amplector, ut debeo, primum hoc a Serenissimo nostro beneficium sive liberalitatem: & ab illo fonte esse scio, sed intercessionis tuae opera in me derivatum. Itaque etiam Excellentiae tuae initium in parte aliqua debeo, totum debebo in exitum, si efficit (ut benigne & ultro promittit) solutionem mihi nec tardam nec ambiguam esse. Quod autem ad Honorarium attinet, causa mihi major querelae ante duos menses fuit: nunc Quaestor officium fecit, & si porro ita facit, acquiesco. Dabo tamen litteras vestras, velut stimulum in futurum, & ut videat me & mea vobis curae esse: Principes nostros insita pietas & devotio ad Divam Virginem elicit: atque utinam divina illa mater nostram etiam Principem faciat matrem! O felices nunc & postea Belgas!

Nam

Nam etsi amant & curant nos optimi Principes, ut suos; magis tamen tunc faciant, ut etiam suorum. De Comestabilis autem adventu nemo ambigit, etsi de causis etiam curiosi quidam mussant. Excellentia Tua scit suspiciones quorundam, quibus accedere, nisi res me convincat, non possum. Pacem cum Anglo non difficilem fore arbitror: de amicitia dubito, & an toto animo se nobis junget. Si facit; pacem cum Batavis, aut imperium in eos habemus. Nam ipse si bona fide eos deserit, aegre subsistant: etsi a Gallia fortasse occulte foveantur: sed occulte, & pax cum Anglo etiam illum quietiorem & pacatiorem reddat. Aeterna Providentia in nostrum bonum haec dirigat: & eadem Te, Illustrissime & Excellentissime Princeps, eidem bono nostro, diutissime incolumem servet. Lovanii, statim a tuis lectis, XIII. Kal. Decembris ∞.156111.

EPISTOLA DCCCIX.

LUPERTIUS LEONARDUS ARGENSOLA

Doctissimo Viro J. Lipsio, Ex animo S. D.

Lovanium.

NON Madriti, quo mittebantur, sed Caesaraugustae, ubi privatis litibus assidere me oportet, tuas literas, doctissime Lipsi, accepi, eo serius sed jocundius: patria enim concivibusque spectantibus honorari jocundissimum est, maxime cum honores, qui a te proveniunt, Regiis anteponendos putem. Nam illi nunquam sine judicio, ii fortunae beneficia sunt aliquando: attamen non huic laetitiae defuit comes angor, cum invaletudo, bellaque detestanda animum corpusque tuum angant, & ab edacibus curis labores, quos publicae utilitati immortalitatisque dicaveras, intercipientur; Sortem vestram, ut ais, audio, imo video; non tamen cum Epicureo poeta cantare juvat

*Suave mari magno turbantibus aequora ventis
E terra magnum alterius spectare laborem:*

Sed mente, sed voto, vobiscum etiam navim conscendo, jam castra & signa sequor, classicoque excitor, multa mecum causam communicant. Vera religio ante omnia, quam Rom. Pontifice duce profiteor, quae amore flagrat. Princeps deinde, e cujus aulico grege, etsi absens, numerus sum, dum Augustae ejus parenti sanctissimae foeminae inservio. Amici praeterea, quos in discrimine saepe audio, & quid de illis agatur perpetuo timeo, & de te praecipue inter hos, ut Luna inter minora sidera, conspicuo. Tandem sententia illa plausu dignissima, scilicet *homo cum sim, nihil humani a me alienum puto*. Adsit Deus votis, teque longaevis saluti restituat, tibi otia faciat, ut ingenium

¹ Responsio est ad *Lipsii* Centur. iv. Misc. Epist. 26. & ad hanc respondet *Lipsius* Cent. v. Epist. 20. Quis vero & quantus fuerit in Historicis & Poëticis studiis *Argensola*, nos docet *Nicol. Antonius* Biblioth. Scriptor. Hisp. tom. 11. pag. 58.

nium tuum nobis affluat. Gratularis nobis in pace, ut ais, artes & ingenia contentibus. Quæso, mi Lipsi, ignoras nos aut simulas? nos musas colimus? quibus ducibus? quibus præmiis? Virtus maximum præmium: fateor, sed Lethargus nos tenet: Virtuti vale diximus, lûxus & pecuniae vilia mancipia sumus, utinam non cito timenda exempla. Caeterum virtutis rigidos satellites credi cupimus larvæ & præstigiæ tantum, pauci excipiuntur, & inter hos Doctor² *Bartholomæus Laurentius* in Vetustissimo Caesaraugustano templo Deiparae vulgo de Pilari, Canonicus, Theologus latino graecoque sermone peritissimus, Doctor *Bartholomæus Morlanes* Jurisperitus, qui in eodem templo Regio fungitur sacerdotio, florente ætate magnum ingenium virtutibus æquans, *Gabriel Alvarez*, sacerdos e societate Jesu, vestro *Andreae Scoto* notus. O qualis vir? in sacris literis periculum si feceris, magnum theologum invenies, si in hebreo, graeco, latinoque sermone, hebreum, graecum, latinum; sed moribus has superat laudes. Superest mihi Doctor *Dominicus Abengochea*, unus ex regiis iudicibus a litibus judicandis, cujus literas cum his accipies, in eisque ingenium judicabis. Haec lepidissima capita scripta tua admirantur, te ex animo diligunt & consalutant. Ne dedigneris inter tam probos viros novitium amantem recipere, ejusque audaciam audire: Filius est mihi *Gabriel*, qui nondum decimum quintum ætatis annum explevit, latinae, graecæque linguae non ignarus, moribus candidissimis, puer meliori ævo, meliori patre dignus: Is me tuas literas legentem audiens, & patruos in eis a te salutatos, interpellavit aitque, mi Pater, Lipsius de me nec ullum verbum? nullum quidem, ego. at ille, tu de me ad Lipsium? ego? nullum. ergo a te injuria? quid inquam, ego, ad doctissimum Lipsium de puero, quid ain tu? a me amari, coli & suas avidissime lucubrationes amplecti; Sanusne es, puer, qui nunquam eas attigisti? respondi: ille subridens aliquot epistolas tuas recitavit, nulla sua hæsitazione, magnoque meo gaudio, usus comico verbo, patrißare eum exclamavi. Hos igitur ad te duco amicos, dextrasque jungo sancta & non violanda fide. Tu, mi Lipsi, si *Dominico* rescripseris (omnino rescribendum puto homini iudici, probo, docto & amanti) Utere aliena manu, nam imperitiæ nostræ chyrographum tuum non facile negotium exhibuit. ama nos, doctissime Lipsi, & si vacaverit per te, vel per alios fac nos certiores valetudinis tuæ, quam tibi corpori Nestoream, animo, æternam cupio. Vale, literatorum princeps. Caesaraugustæ Kalen. Decemb. ∞ DCII.

² De hoc vide *Nicol. Anton.* part. 1. pag. 154. duos sequentes non reperio, nam *Gabrielem Alvarez Velascum* Jurisconsultum diversum fuisse patet. *Gab. Alvarez* vero meminit, & amicitiae cum Lipsio cultae, *Alegamb.* in Bibliothec. Jesuit. pag. 145. & *Witte* in Diario eum mortuum Ann. 1645. ætat. An. 80. scribit. *Dominici Abengocheae* elogium est tom. 1. pag. 251. Bibl. Hisp. ejus mox epistola sequetur.

BARTH. LEONARDUS ARGENSOLA

V. Cl. J. Lipsio S. M. D.

Lovanium.

GRatias tibi ago, mi Lipsi, immortales acturus, quod tam ex animo & sine parario in tuam nos amicitiam receperis, ut in litteris tuis, quas *Lupercius* frater noster accepit, professus es. Nec minor profecto tantum Virum decuit humanitas, a quo & laudari & amari jucundissimum, & beatum. ² Gerionas nos appellas; nomen & condicionem accipimus lubentes. Tibi enim Herculi cedimus inermes, cedimus hilares Victori, imo incedimus sacra catenati Via. Trahat nos Eloquentiae praestantia Lipsius, Hercules alter Gallus

Quid quod lingua illi levibus trajecta catenis,

Quae fissa facileis allicit aure Viros.

Quem ingenti Clava utraque armavit Philosophia, & leonis exuviis. Haud miror equidem, quod tam praeclare Civem illum constantem agas, quem mire finxisti: & in perturbata Repub. bellorum tempestatibus tu prope solus sis in portu. Fructus enim doctrinae percipis assidue, eos nimirum, qui maximè sunt, Imperatorum actis & Victoriis anteponendos. Nos Hispani, quibus gratularis, quod pace fruamur, quos quaeso alios, nisi luxum, avaritiam, caeteraque pacis mala, quae in ociosam Rempub. immigrare solent? Praeterea bella gerimus foris, ut a moenibus illa propulsemus, damna tamen eorum in nos ipsos grassantur. Incendia, Vastationesque vestrarum Provinciarum nonne Hispano milite; Hispanis opibus peraguntur? legiones alimus, alias sufficimus quotidie. Quare in eo statu sumus, ut nec ingenium, nec militiam colamus. Bella Musas fugant, Ocium vires. Antiqua igitur tuta sapienter aestimas, scilicet ut vel e conspectu malorum tantisper, dum prisca repetimus, animum avertamus. Ergo, sapientissime Lipsi, fax publica cum sis, inerteis explora tenebras, tibi enim uni cessare non licet, nisi in publica commoda pecces. Orbem doce, ut sese agnoscat. At aetas (ais) frigus & ignaviam habet: suavior in occasu, quam in ortu Solis calor. Perge igitur *Musarum* (ut de se ipso cecinit Naso) *purus*, *Phoebique sacerdos*, & hoc age, nosque, qui jam ad tuorum numerum pertinemus, mutuo ama, & vale. Mantua Carpent. Ubi *Mariae* Austriacae Augustarum Maximae Sacra facio. Prid. Kal. Februar. An. cicoicm.

¹ Respondet ad hanc Lipsius iv. Cent. Misc. Epist. 65.

² Cent. iv. Misc. Epist. 26. ratio, quia tres fratres concordissimi, ut Justinus lib. xlv. cap. 4. fabulam Geryonis explicat, vid. *Nic. Anton.* in Biblioth. tom. 11. pag. 59.

EPISTOLA DCCCXI.

DOMINICUS ABENGOCHEA J. C.

V. C. J. Lipsio salutem dico.

Lovanium.

CLarissime Lipsi. Mitto ad te de facie ignotum, sed fama super aethera notum: (cui enim non notus Justus Lipsius?) declamatiunculam nostram, ut de ea libere, amice, & sine fuce quid sentias, pro summa tua humanitate, eximia virtute, & omnigena doctrina; ex animi tui sententia, (qui probe nosti & scripsisti istius loquutionis vim) iudicium tuum proferas. Quod a te postulare, nec vereor, nec erubescō, quinimo jure debeo. Tum quia additissimus tibi & amicissimus V. C. *Lupertius Leonartus*, Augustissimae Imperatricis Mariae a secretis, acutissimi profecto ingenii, & Hispanicae poësis, & amoeniorum litterarum cum primis studiosus & eruditus, tuam mihi egregiam comitatem, humanitatem, & suavissimos mores commendavit; & ut hoc facerem, animum addidit & cohortatus fuit. Tum etiam, quia communis humani generis societas nos, quasi sub eodem solo natos, quodam veluti patrio, & cognationis & sanguinis jure, & propensionis & benevolentiae vinculo, propter similitudinem studiorum, devincit. Quae, non aemulationem (ut *Q. ille Eustagius* dicebat) nec invidiam (quod fabrorum est) sed potius benevolentiam & amorem, inter candidos & vere studiosos, & bonae indolis homines parere & conciliare solet. Etenim sicuti ex admiratione coeperunt homines philosophari, sic erga sapientes viros singularis quaedam & a natura insita (naturaliter siquidem homines scire desiderant) propensio & benevolentia nos rapit, & in sui admirationem trahit, qua nos totos in illorum gratiam & amicitiam dedere & insinuari affectamus. Unde factum est, ut sapientes viri studio & desiderio se sapientiores visendi, & cum eis familiariter conversandi, & ab eis naturae arcana & recondita sapientiae suae ediscendi & perscrutandi, per remotissimas regiones, & per varia rerum discrimina, peragere non dubitaverint. Ut de Pythagora, Platone, Apollonio Thianeo, & plerisque aliis probe nosti. Quod etiam (si fas est nostram indolem & ingenium in suspiciendis & admirandis politioris litteraturae principibus viris, detegere) fuit in causa, ut superioribus annis, cum mihi longum iter peragendum esset, & fere ad alteram Hispaniae oram (quae Oceano vestro terminatur) transmigrandum, via recta excederem, & iter verterem ad Salmanticam, urbem inclytam & feracissimam ingeniorum alumnam, ² ut *Franciscum San-*

P 2

Etium

¹ Respondet Lipsius v. Centur. Misc. 19. *Abengocheam* fuisse Senatorem Regium in Curia Aragonum discimus ex *Eryc. Puteani* Centur. 11. Appar. novi Epist. 58. & *Nicol. Anton.* in Biblioth. Hispan., tom. 1. pag. 251.

² Hic est Celeberrimus ille Grammaticus, cujus pleraque nobis invisitata sunt opera & incognita, licet egregia, praeter *Minervam*, quam prius *Scioppii* & deinde *Cl. Perizonii* industria nobis fecit familiarem. vocatus fuit *Franciscus Sanchez Brocensis*. vide sup. Epist. DCXXIX. & *Nicol. Antonium* Bi-

Etiam Brocensem, Rhetorices & Graecae linguae professorem viscerem, & de facie cognoscerem, & cum eo aliquantisper jucundissime conversarer, & de studiis humanitatis suavissimos sermones conferrem. Virum profecto prodigiosi ingenii in omni doctrinae genere, & in perscrutanda antiquitate, & veteribus poëtis ad vivum interpretandis & enucleandis acerrimi judicii, & mirae dexteritatis. Qui certe cum strenuioribus athletis in palaestra litteraria jure optimo certare potuisset, si non tam Criticus & Φιλεπιδμήτης videri voluisset. Nec mirum, quod cum aetate hoc nostrum studium, propensio, & benevolentia erga illum, te, tuique similes viros adoleverit; cum jam ab ineunte aetate mecum exorta, & aliquantulum provecta, per exteras nationes comes peregrinationis nostrae, & assëcla semper fuerit. Nam cum vix aetatis nostrae vicesimum annum explevissem, exactisque humanitatis & Rhetorices studiis, sub clarissimis viris *Andrëa Semperio*, & *Laurentio Palmireno*: & Mathematicum, sub *Hieronymo Munnoſio*, omnigenae doctrinae & linguarum omnium peritissimo: atque etiam utriusque Philosophiae & Theologiae sub aliis doctissimis & gravissimis viris (quibus Academia Valentina perpetuo floruit & floret) Salmanticam, juris civilis discendi gratia, me contulissem, biennio ibidem commoratus, vix fatis animus & desiderium conquiescere aut saturari posse videbantur. Nam in Italiam quasi fato, & nescio quo impulsu adigi & propelli videbar: ut coepta studia proveherem: & clarissimos viros, qui eo tempore florebant, *Robortellum*, *Sigonium*, *Muretum*, *Manutios*, atque etiam utrumque *Baptistam*, *Giraldum*, & *Rasarium*, *Lucam Contillium*, & plerosque alios cognoscerem & audirem. Sed inter eos praecipui fuere.³ *Joannes Baptista Giralduſ Cinthius* Ferrariensis, & *Joannes Baptista Rasarius* Novariensis, & *Lucas Contilius*, quorum consuetudine & familiaritate, cum singulari benevolentia & mutuo amore conjuncta, fruebar, & toto quinquennio gavissus & usus fui. Quo tempore sub utroque *Baptista*, qui humanioribus litteris & Rhetoricae Ticini, successive unus post alterum, praefecti fuerunt, aliquantulum profeci. Quantus vero uterque fuerit in arte Rhetorica & Poëtica, & Graecarum litterarum peritia, edita illorum opera, & ipsemet integer *Galenus* a *Rasario* in latinum versus, locupletissime testantur. Quorum domus (quid dicam de auditorio?) nunquam vacua reperiebatur doctis & studiosis hominibus de omni doctrinae genere consultantibus, & ab illis quasi ab Ammone, vel Dodona, oracula petentibus. Deus bone? quid si tantumdem

Biblioth. Hispan. Script. tom. I. pag. 361. ubi Catalogum ejus operum Latino & Hispanico sermone editorum habemus. Mortis tempus ejus ignorasse videtur *Nicolaus*, qui anno seculari MDC. eum LXXVII. annum egisse notat. Et tamen *Witte* in Diario suo, eo anno obiisse adfirmat. nescio quo auctore. Meminit ejus cum laude Lipsius Cent. ad Italos Epist. LXXXIX. hoc anno scripta. nec *And. Schott.* in Biblioth. Hisp. pag. 578. de morte commemorat. *Andream Semperium*, vel *Sampere*, memorat idem *Nicolaus* tom. I. pag. 68. *And. Schott.* pag. 614. de *Laurentio Palmireno* vide *Nicol.* tom. II. pag. 5. *Schott.* pag. 590. de *Hieron. Munnoſio*, *Nicolaum* tom. I. pag. 447.

³ De hoc egimus in praefatione ad Thesaur. Ital. tom. VII. pag. 4. & adde *Ghilin.* Theatr. literat. tom. I. pag. 98. qui & tom. II. pag. 142. *Rasarii* vitam exhibet, & *Mercklin.* in Lindenio Renovato pag. 537. qui eum Ticini obiisse An. 1573. ait, cum *Ghilinus* mortem conferat in An. 1578. *Lucæ Contilii*, vel *Contilis*, vita est apud eundem *Ghilin.* tom. I. pag. 154. obiit A. 1574. 28. Octobr.

dem ego eo tempore, vel nunc nancisci potuiffem? & ad te ire, te videre, & jucundiffimo tuo confpectu, & fuaviffimis tuis colloquiis frui & gaudere? Et fapientiae tuae abdita, non inquam penetrare aut exhaurire (hoc enim pauci quos aequus amavit) fed faltem vestibulum ante ipfum confiftere, & primoribus labris delibare licuiffet? Quid gratius? quid optabilius? & ad plenum gaudium & exhauriendam innatam fitim & cupiditatem jucundius, aut gloriofius accidere mihi potuiffet? Sed, proh dolor, officii debitum, & jurisjurandi relligio (quae nos quafi in ergaftulo & cum compedibus detinent) & negotiorum immenfa moles, & in jure dicundo affidua & perennis occupatio, qua diftinemur, & fere obruimur, abeundi & adcundi commeatum ventant. Quod igitur abfenti officium praeflare poffum, te fcilicet per epiftulam affari, & de longinquo falutare, & tibi gratulari pro omni vita in gloriofis laboribus & ftudiis confumpta: & pro admirandis foecundiffimi ingenii tui foetibus, quos de bonis litteris benemerendo, in communem omnium litteratorum utilitatem, quafi oracula fapientiae, quotidie edis: deque re litteraria te confulere, & judicium & cenfuram tuam requirere, hoc praefto, & ad hoc libentiffime & fuma animi propenfione ducor. Et merito hoc mihi, & omnibus fapientiae, & tui nominis ftudiofis tantumdem facere licet. Talem enim te natura creavit (patere laudes, quas ipfe *Benedicto Arie Montano*, gentis noftrae optimo, clariffimo, & fapientiffimo viro, merito detulifti: ad antidora enim tecum ago, tibi que parem gratiam rependo) ut quae fingula in caeteris hominibus mirari folemus, te unum univerfa confequutum fuiffe, imo ipfam *ἐγκυκλοπαιδείαν* perfecte abfolviffe; & verum illud poëtae elogium oftendiffe, *Apparent vari nantes in gurgite vasto*, merito affirmare poffimus & debeamus. Ita namque (liceat etiam per te mihi Salluftianum illud ad Caefarem huc tranfponere. Procul efte livor, & affentatio) aetatis noftrae litteratos viros praetergreffus es, ut prius defeffi fint homines fcripta tua laudando, quam tu laude digna fcribendo. Unde veriffimum puto, quod apud divum Auguftinum, aut quenquam alium aliquando legiffe memini, quodque praeteritorum faeculorum monimentis fatis comprobatur, Naturam humani generis, ut & aliorum omnium, quae fub coelo oriuntur & intereunt, feraciffimam parentem & procreatricem, ut fuae foecunditatis, & inexhaustae virtutis & omnipotentiae fpecimen daret, & quafi digito demonftraret, (quale illud, quod de linea Apellis in officina Prothogenis fubtiliffime ducta, nullum amplius fubtilitati locum relinquendo, ut mirabile artis ingenium oftentaret, memoriae prodidit foletiffimus ille naturae indagator) non folum inter muta animantia, prodigiofa quaedam & portentofa: & inter *μετέωρα* phaenomena quaedam, grandia, inufitata, inaudita, & admiranda quandoque produxiffe: fed etiam inter homines, fucceffivis temporibus, & per varias aetates & apud diverfas nationes, quofdam procreaffe & quafi e foecundiffimo finu in lucem protuliffe, tanto ingenii acumine & foelicitate, & tanta judicii gravitate praeditos, & praefantiffimarum artium & fcientiarum peritia excultos, ut quafi fcientifica quaedam monftra & portenta, nos in fui, & opificis admira-

tionem rapiant, & quasi extra nos ipsos absorbeant, & abalienent. Atque id etiam videri potest (ut paulo majora canamus) quod de illis vere heroibus nostris Mossè, & D. Paulo in divinis literis celebratur, singulari Dei beneficio, inexhaustae & incomprehensibilis divinae gloriae, radium illis in transcursu affulsisse. Sed ad rem nostram, ad id forsitan alluisse videtur Regius Vates, dum nos divini vultus lumine insignitos, praedicat; & quodammodo etiam insinuatum apparet, in verbis divino ore prolatis, in formatione Prothoplasti. Ut tanto magis divinae naturae eos homines assimilari intelligamus, quanto singuli in praeclaris & liberalibus artibus, divino munere, eximia quadam & admiranda ingenii foelicitate prae caeteris hominibus excelluerunt. Unde factum est, ut non solum eadem aetate, sed neque diversis, apud Graecos plures Homeros, plures Platones, Aristoteles, vel Demosthenes; neque apud Latinos plures Cicerones, aut Virgilios; neque aevo nostro, plures Lipsios pari ingenii foelicitate, extitisse comperiamus. Quorum scripta & litterarum monimenta, ad miraculum usque suspicimus, colimus, stupefcimus & admiramur. Quid igitur mirum, si ad te divini fere ingenii virum tanquam ad Delphicum, sive Dodoneum oraculum, & tanquam ad alterum Arcaesilam, sive Carneadem, de qualibet re proposita ex tempore differentem, certatim homines concurrunt? & inter eos ego etiam tui nominis studiosus, limatissimae tuae censurae haec nostra scripta (forsan tanquam abortivum partum tumultuario editum: aut velut ursinum foetum informem, a te expoliendum, & quasi lambendo, effingendum) subicere & proponere satago? tecumque absens, (qui coram nequeo) alloqui studeo, teque quasi e suggestu, audiendi occasiones quaero? Sic tuos etiam te principes, eodem desiderio flagrasse, & ad te audiendum inopinato ad Academiam Lovaniensem aliquando accessisse, a nostro *Lupertio Leonartha* accepi. Te vero gratulationis, & gratiarum actionis ergo, elegantissimam, & ἀκνύθους delinitam, & vario doctrinae genere refertam, atque omnibus numeris absolutam, extemporaneam dissertatiunculam, de tantorum Principum incogitato adventu, maiestate, heroicis virtutibus, laudibus & encomiis, tanta dexteritate & facundia habuisse, ut qui te aspicerent, summo silentio (quale venationi datur, ut dicebat junior Plinius) & alta quiete, qualis conticinio noctis solet (ut tu quandoque dicebas) ex ore tuo immotis oculis pendentes, & intenti ora tenentes καὶ παύσειν δεῖς, lacteum eloquentiae flumen audire viderentur; atque etiam priscum illum *Florem illibatam populi, Suadaeque medullam*. Ut igitur eo unde digressus merito sum, redeam, & desiderio meo fatifaciam, teque consilii nostri & instituti admoneam, causam paucis libenter accipe. Sors mea tulit, ut inter alios Regios consiliarios, qui juri dicundo in supremo istius Regni consilio, & Senatu sedent, ego etiam in syndicatu (quam artis nostrae vocem Νομομαχίας ad instar Μονομαχίας & duelli, quasi legale certamen, appellare libuit; sed an satis apposite, tuum, ut in reliquis omnibus, erit iudicium) villicationis nostrae & anteaetae vitae in magistratu, rationem reddere coactus fuerim, & quodam quaesito colore & nonnullarum querelarum praetextu (quae ex mul-

to-

torum sententia *περὶ ψήματα* & a praetoria censura aliena videbantur: cum non solum labe concussionis & violentiae, (quae solum animadversioe digna) carerent: sed nec leviores culpas officii nostri redolerent: & majori ex parte muneris nostri expertes essent, reus postulari & in iudicium vocari, & honoris & existimationis discrimen subire meruerim. Ego vero, licet singulari Dei beneficio & pietate, neque peccasse in officio, neque quicquam commisisse sat sciebam, meque puriorem clavo putabam: ratus tamen necessario nobis concertandum, & colluctandum fore cum validissimo, strenuo, & veruto Agonotheta, cujusmodi ille, quem junior Plinius *Δυσκαθαίρετον* vocat: & adversus quem Apostolica illa praecautio & clypeo protegi, & muniri nos oportebat. *Εὐδύσασθε τὴν πανοπλίαν τῷ Θεῷ, πρὸς τὸ δυνάσθαι ὑμᾶς εἶναι πρὸς τὰς μεθοδείας τῷ Διαβόλου· ὅτι ὅτε ἔστιν ἡμῖν ἡ πάλη πρὸς αἷμα, καὶ σάρκα, ἀλλὰ πρὸς τὰς ἀρχάς, πρὸς τὰς ἐξουσίας, πρὸς τὰς κοσμοκράτορας τῷ σκότει τῷ αἰῶνι τοῦτου.* Veritus etiam, ne aut propter illius *καταφρόνησιν*, καὶ ὀλιγωρίαν, aut propter nimiam animi nostri *πεπιθίαν*, ne, dum illum profligare confidebam, ejus astu, vel potentia (dolus, an virtus, quis in hoste requirat?) in iudiciaria palaestra, & lite succumberem, & causa caderem. Ideo non contentus propugnaculis, & defensionibus nostris, quibus quod ad rerum gestarum feriem & veritatem attinebat, satis processus erat instructus; quia tamen classicum undique canebat, & personabat, ut ad audiendam sententiam accingeremur; statui, quasi manum conferturus districto gladio, arripere calamum, & quatenus temporis angustiae permittebant, vepres, & dumeta refecare, & tortuosum, & senticosum callem aperire, & viam justitiae nostrae praemunire & patefacere. Et quia cominus, & viva voce causam nostram defendere & propugnare non dabatur, saltim eminus, & scripto liceret. Et quoto gradu querelarum merita penderent, & quanti aestimanda forent: & jure ne, an injuria (quod credibilius erat) imputatae nobis querelae niterentur, atque subsisterent, ostenderem & demonstrarem: & justitiae nostrae imaginem, si non ad vivum, & quadam cum vivae vocis energia expressam, saltim in hoc nostro juris responso adumbratam, & delineatam ante oculos gravissimorum iudicum S. & Supremi consilii Coronae Aragonum (unde sententia indies expectabatur) proponerem, & repraesentarem. Indidi autem opellae nostrae, Declamatiunculae nomen; quod praecipue de rebus domesticis, & quae ad mores nostros pertinent, causa agatur: & in ea quaedam quasi concertatio, & exercitatio nostrarum querelarum, & exonerationum contineatur. Novo etiam, & parum usitato apud nostrates stylo, & scribendi genere, & aliquantulum grandiloquo, & uberiore usus fui, ut quasi in spatioso campo excurrere liceret. Atque etiam praeter juris allegationes (sine quibus loqui erubescimus) & praeter nostratum auctoritatem & fidem (quibus quasi bellicis tormentis & munitissimo quodam praesidio arcem inculpatae vitae nostrae tutati sumus) peregrinorum etiam auctorum testimonia, & sententias ex philosophis, oratoribus, historicis, atque poetis, & interdum ex sacris litteris, petitas, opportunis in locis, meo iudicio, inserui, & collocavi; ut tam inconcussa fide, & tan-

torum virorum auctoritate (qua etiam nostri J. C. utuntur) quasi vallo quodam praemunirem. Et quia res, de qua agebatur, jejuna, sterilis, insulsa, & auribus ingrata forsan erat, aut videri poterat, jucunda quadam & amoenae varietate (quae inter naturae opera nitet) ornata, quasi opus tessellatum, legentium animos alliceret, & oblectaret. Invenies autem inter alios plures temet ipsum plerisque in locis laudatum: & tua auctoritate, & luculentissimis testimoniis scripta haec nostra suffulta & decorata. Sed an concinne, apposite, & cum judicio, uti tam insignem, & praeclaros alios scriptores decebat; an non magis, tanquam in nova aliqua veste, pretiosas margaritas, gemmas, atque uniones perperam, inordinate, & sine ullo delectu assutas, & velut centones quosdam, valde suspicor. Atque fatis vereor

Ne si forte suas repetitum venerit olim

Grex avium plumas, moveat Cornicula risum,

Furtivis nudata coloribus.

Et ideo (ut tuis verbis me protegam) mutire verbum non audeo in tam multos, in tam probos. Sed det imprudentiae veniam temporis brevitās, negotiorum immensa moles, & improbus labor in dirimendis litibus exantlatus. Quae vix respirandi, & auram capiendi, & ad humaniores litteras divertendi (quibus tanquam unico solatio mirifice delector) locum, aut otii & laxamenti pusillum suppeditant. Tu igitur, mi Lipsi, errata, quae multa obrepserunt, libenter condona, corrige, dispunge, elimina. Sic enim fiet, ut opusculo huic nostro, quasi sub incudem revocato, & deterfis maculis renato, & redivivo, ex immenso meritorum & laudum tuarum cumulo, honoris & estimationis accessio aliqua fiat: & sub tuo praesidio & patrocinio, tanquam sub Aiacis clypeo, iterum in lucem, detecta fronte, prodire audeat. Interim ergo foelix vive, diu scribe, & spes Vale, flos aevi nostri καὶ Φιλὴ καὶ Φάλη, meque invicem ama. Caesaraugustae Celtiberiorum K. S. Decembris. A. CPI. ∞. 1511.

EPISTOLA DCCCXII.

J. L I P S I U S

Arnoldo ab Ameyde V. N. Serenissimo Electori Colonienfi a Consiliis.

Coloniam.

Litteras tuas vidi libentibus fane oculis, & in iis veterem erga me affectum recognovi. Gaudeo, & retinere hortor, & me pariter affici testor. Vidi & litteras docti viri, *Lazari Schöneri*, adjunctas, in quibus petit a te porro a me petenda: de quibus sensum meum breviter hîc habe. Ait in vita M. Aurelii a Guevara promulgata citari auctores, quorum libri hodie non essent. Nominat *Cinnam*, *Calvum*, *Sextum Chaeronensem*: de duobus verum est, ex asse perierunt: *Sexti* hujus existare libros *Pyrrhoniorum*, & alia contra

Do-

Dogmaticos scripta, sunt qui volunt. Indigitatur vulgo, *Sextus Empiricus*: sed sunt, ut dixi, qui hunc opinantur, & magni illius Plutarchi nepotem fuisse. Quod autem in praefatione *Guevarae* ait esse, de *Libris Augusti Caesaris decem*, argumento & titulo *Belli Cantabrigiae*, profecto ludibrium est, nec tu, aut vir ille doctus, latere eos in ulla Bibliothecarum putetis. Dii boni, quis thesaurum illum invideret publico, cum aeterna sua fama vulgandum? Lubet hominibus sic ludere, an nobis illudere: nobis dico, si qui creduli sumus, & facile naso ducimur a Sannionibus istis. mihi non evenit, nec eveniet: & videsne tralucere mendacium, cum eos *Colonia ad se venisse* scribit? Scilicet qui misit, non intellexit, quid magnae hoc rei esset: si est, cur misit? Si non est, profecto tenuerit, & rem ac famam fecerit suam. Inquire hoc in Aula nostra ulterius nunc non possum, quia illa abest, & Gandavi firmiter nunc moratur: at tu atque optimus *Schönerus* meae fidei credite, totum hoc fraudem & fucum esse: & res explorata dicet. An non simile jamdiu in Ciceronis *De republica* libris? cujus etiam *Consolatio*, & *Orpheus*, sic Deo visum, nuper prodierunt, tam ab illo patre, quam a me nata. En, quod possum scribere: in eo fortiter affirmare & liquido, te a me amari; fac idem, & vale. Lovanii, postrid. Idus Decembr: ∞. 1561.

EPISTOLA DCCCXIII.

J. LIPSIUS

Everhardo Elmenhorstio S. D.*Lugd. Bat.*

Quod affectum in me, jam olim declaratum, servas & perseveras, mihi gratum, & te dignum est, si Amicitiam non pro vulgo colis. Ego in te idem: & in magnum illum virum, cujus nomine tuis in litteris me recreasti. O adhaere illi, carpe, trahe, tolle, quod in omne aevum juvet. Significas in Senecam cum habere: quis nescit? daturum, si petam: nimis scio, & non peto. Causas habeo: sed tamen petam, & *εὐκαίρως* utar. De *Jano Wouwerio*, juvit audisse ad honorem provectum: eo magis, quia pauci ejus generis, id est modesti (talem novisse videor) & docti. Hoc nunc aevum est: vobis adolescentibus melius curret, neque ira Numinis Europam premet semper. Voveo, & te salvere, cum primario viro, quem dixi. Lovanii xvi. Kal. Febr. ∞. 1561.

EPISTOLA DCCCXIV.

J. LIPSIUS

D. Heremita S. D.*Lutetiam.*

Non pro nomine tuo fuisse te video, mi Heremita, nec solitudinem amasse. Homines & loca plura vidisti, & societatem appetisti eorum, quos
Tom. II. Q du-

duces aut directores censebas ad bona & honesta. Pulchrum tuum amorem! qui jam nunc meum conciliat: & vel absentibus illis parariis, *Scaligero* & *Doussa*, quid abnutem? felicem te talibus consortiis & colloquiis: & judicii bonum, qui insulam illam magnam reliqueris, in qua similes (nam pares ubi sunt?) non erant. Etsi sicubi similes, imo pares, in urbe sunt, quam sedem nunc habes. Duos ibi nominas, sane primores Galliae (de nostris artibus loquor) jamdiu in amore & pretio meo. Nosce & frui, atque etiam utere: & melior doctiorque ad nos redi. Redi, an huc revoco? suave sit videre cives meos talium artium: sed locus iis aut aestimatio apud nos quae nunc est? Heu Belgicam aliam! & heu nullam, paene dicam, si ista sic pergunt. milite adverso, milite nostro premimur, atterimur: nec bella, sed seditiones adfligunt. Tamen vel sic Belga Belgas ames, & miserum fugiendumque hoc solum, nisi quia patria est. Siquid distincte ad me de rebus & destinatis tuis scribis, consilium atque operam offero: illud fidum, & hanc promptam. nam de bonitate aut efficacia non praesto. Praesto hunc animum, nunc & olim in te volentem, volentia hac tua merito inductum. Lovanii, xvi. Kal. Febr. ∞. MCM.

Amplissimo *Thuano*, & doctissimo *Casaubono*, tuo commodo, salutem a me dicito, & amare.

Hic est *Daniel Eremita*, Discipulus Lipsii, ut ipse profitetur in Opusculis pag. 427. cujus opuscula varia, edita sunt a Cl. *Graevio*, & qui de ejus vita praefatus quaedam est Ann. 1701. ubi contra calumnias *Scioppii* defendit *Eremitam*: nobis mirum videtur, cur inter hos nefarios Apostatas (ita *Eremitam* vocat *Rupertus* in observationibus ad Besoldum in Rodolfo II. pag. 636.) tam male convenerit. Epistolam etiam in *Scioppium* edidisse patet ex *Amphot.* pag. 34. *Eremita* vero a *Scaligero* commendatus *Casaubono* Lutetiam cum venisset, ibi puriora sacra ejuravit, quare saepe indignationis iustissimae voces *Casaubono* exciderunt. vide *Casauboni* Epist. cccxxvi. cccxxxii. & cccxxxiii. & licet ipse se excusaret *Casaubono* Epist. cccxxxv. fictam fuisse Palinodiam *Casaubonus* docet Epist. ccclxxxix. *Scaligerum* etiam gravissime hanc labem tulisse, & furto sibi sexcentos aureos ab *Eremita* ablatos questum in Epist. lxxxviii. *Colomesius* in Clavi Epistolarum tradit: plura collegit diligentissimus *Baillius* in Lexico Historico-Critico. Mortuum esse ex lue Venerea traditur in *Patinianis* pag. 66. obiit An. 1613.

· E P I S T O L A DCCCCXV.

² A N D R E A S C H I O C C U S

Medicus Veronensis,

V. Cl. J. Lipsio S. P. D.

Lovanium.

Quod compellare te audeam ignotus, Vir Clarissime, tua imprimis eximia, & celebris eruditio facit cum insigni morum candore conjuncta, quae

¹ Respondet Lipsius Cent. iv. Misc. Epist. 66.

² *Andreas* hic est *Chioccus*, cujus magnificum elogium habet *Ghilinus* Theatr. Literator tom. II. pag. 76. & de cujus libro de Collegii Veronensis Medicis & Philosophis nuper egimus in praefatione Thesaur. Ital. tom. ix. part. viii. pag. 14.

quae occulto veluti oestro ad amandum ingenuos Viros impellunt: Accedit eos amare artifices, qui Artes aliqua ex parte intelligunt: Mihi sane nonnulla notitia, vel potius oblectatio non sine ingenti admiratione ex tuis praestantissimis, & immortalibus monumentis: legi Politica, de Constantia, de Cruce, Saturnalia, Centurias tres tuarum Epistolarum, quarum postremam cum Magnitudine Romana donavit mihi nuper *Christianus de Vuclae* Bruxellensis, meus hîc in Arte cliens, & Amicus, (is Nepos ³ *Petri Vandeville*, qui olim Lovanii Philosophiam in Collegio Falconio est professus, quemque ait, tibi esse benevolentia conjunctissimum.) Umbras alii verborum, & litteraturae fucum in Humanioribus his studiis videntur sectati; Tu res solidas, & expressam Sapientiae, & Prudentiae imaginem ad Senecae, & severioris Sectae normam affabre effictam passim promis, ut vere tu σοφὸς ὁ πολλὰ εἰδὼς Φυᾶ: Quin in ipsa etiam Historia & Antiquitate percensenda, atque illustranda Sapientiae, & Virtutis tuae spiritus & nervi Lipsianarum ἀρετὰ τῶν Φρενῶν se produnt cum eleganti, & vivida rerum, & verborum supellectile, & delectu, ut sine controversia magnus μύθων ῥητὴρ, καὶ πρῆκτῆρ ἔργων attento lectori esse possis: Dicam ex animo quod sentio; Videris Tu mihi, Vir Praestantissime, αἰετὸς ὡκύς ἐν πεπαιγμένοις, major pars eorum, qui haecenus scripserunt, κραγέται κολιοὶ παπεινὰ νεμόμενοι: Postquam enim corrupta docendi ratione exolevit jam usus optimarum Methodorum, Inventionis & Dispositionis, quas Plato, Aristoteles, & boni illi Veteres nobis reliquerant, insurrexerunt Novatores nequam, & impostores garruli, qui Declamationibus, & ineptissimis nugis Dialecticam, Philosophiam, Medicinam nostram, quinimo & priscam Religionem Patrum, & tot Conciliorum auctoritate firmatam, temerario conatu in dubium vocare audent; profecto κραγέται κολιοὶ: At tu divino ingenio, praeter Virtutis lumina, quae ubique in tuis scriptis praefers, a postliminio antiquas etiam methodos revocas, & divisione, & definitione vel minuta quaeque persequens, πᾶντα μὲν, ut Menelaus ille Homericus, ἀλλὰ μάλα λογίως. Sed cur te laudem Virum tota Europa laudatissimum, & celeberrimum? Neque ego forte sum tanti, ut meo praeconio caeteris illustrior, tibi charior esse debeas, aut ut tantum mihi amicum hac sane ratione merear conciliare: Id mehercle fateor, eo potissimum quod Medicus sum; actione Medica satis districtus, & proinde in diversis Doctrinae castris enutritus: Sed excitasti tu, & facies amoris animo adhibuisti mirifica illa, & proluxa benevolentia, qua & Medicos complecteris *Mercurialem*, ⁴ *Costaeum*, *Vizanium*, atque alios eruditos, tum caeteros vel leviter Minervae Sacris initiatos: Si me in horum saltem album rettuleris, qui tibi magnis obsequiis, & amoris vinculis sunt devincti, o me Felicem! Vetus dictum esse non ignoras, αὐτόματι δ' ἀγαθοὶ ἀγαθῶν ἔπι δαΐ-

Q 2

τας

³ Non reperio eum in Fastis Academicis *Valerii Andreae* pag. 265. sed idem pag. 245. monuerat se omnes Paedagogiorum professores non retulisse, nec etiam potuisse: sed *Johannem Vandevillum* Tornacensem Episcopum ex Falconis Collegio prodiisse ait *Vernuleus* in Academ. Lovan. lib. II. cap. 7. & lib. III. cap. II. pag. 294. & *Valer. Andr.* in Fastis pag. 192.

⁴ Ad hunc est Centur. ad Italos Epistola xxix. ad *Vizanium* Epist. xxii. ad *Mercurialem* plures, & a nobis etiam nonnullae editae.

τας ἱασιν. Hoc ergo saltem nomine carus esse debeo, quod virtutis, amoris, amicitiae tuae fores, modeste tamen, pulso. De Morte contemnenda libellum a te olim promissum, & Senecam (qui emendatus quidem a *Mureto* prodiit, sed in quo tamen adhuc multa desiderantur) tua solida, atque acri censura limatum & Commentariis illustratum, quod te facturum recepisse ajunt, imo in tertia hac Centuria saepe palam polliceris, avide expectabam, cum Philarmonicis Academicis nostratibus, & Medicis, etiam nonnullis collegis meis Viris doctissimis, qui te in oculis, & ore assidui ferunt; quanquam existimo Typographos, & Bibliopolas Italos potius nostram expectationem fallere; Sed *Christianus* ille, si *Christianus* vere erit, non me fallat, ut est *Juvenis* probitate, & moribus humanissimis praeditus, qui vel ex Antverpia ipsa, ut complura ex tuis advehantur, se daturum operam est pollicitus. Vide quaeso, Vir magne, quo studio, & veneratione te omnes Itali colimus, & tamquam summum litterarum Dictatorem propemodum adoramus, ut vel ex hoc communis affectus praetextu non me omnino indignum amicitia, & benevolentia tua judicem. Scriptitavi & ego minorum gentium Auctor complura: nonnulla jam vulgata: *Pforica* versu Hexametro, *Quaestionum Physicarum* libri tres, *Apologia* pro *Fracastorii* nostri *Siphilide* contra *J. C. Scaligeri* censuram; De coeli *Veronensis* clementia, & De optimo Medico brevis nuper *Dialogismus*. Superfunt multa excudenda, sed in nonum adhuc annum premenda, μᾶλιν γὰρ χαλεπὸν ὀρύσσειν ἀνδράσι θνητοῖσι (hoc enim libenter refero ad famam ex eruditione & scriptione in quolibet Disciplinae genere comparandam) ἡ δὲ λίψις πάντε δύναται. In praesentia prae manibus habeo opusculum de animi humani immortalitate adversus *Petrum Pomponatium*, & Artem tuendae Sanitatis Methodo analytica per aphorismos dispositam, & explicatam, quae Illustrissimo Cardinali *Valerio* Episcopo nostro, & Patrono meo, qui de tuo ingenio, & Virtute honorifice loquitur, & sentit, nuncupare mihi decretum est, si Deus, & occupationes Artis dabunt: sum enim praeterea in Familia συνδιαστικός, ut mihi ex *Homeri* praecepto saepenumero dispiciendum sit, ὅτι μιν ἐν μεγαροῖσι κακὸν, ἀγαθὸν τὲ πέτυκται; Interim post *Hippocratem*, *Aristotelem* & *Galenum* meum, interdum animi gratia in tua castra divertam; non solum ut explorator, sed etiam ut transfuga, dum solidae virtutis esca & sapientiae illecebris omnes mirum in modum detines. Vale; Vir Clarissime, & me tui studiofissimum, & amantissimum redamare ne graveris; Deum opt. max. obnixe precor, ut morbum illum gravem *Hypochondriacum*, de quo frequenter conquereris, quique ingravescente aetate solet mitior reddi, tibi mitissimum faciat, ac diutissime possis & litteras illustrare, & litteratos omnes, ut facis, juvare. Veronae v. Kalend. Aprilis ciorociii.

§ Hic dialogus nec a *Ghilino*, nec *Mercklino* memoratur.

EPISTOLA DCCCXVI.

ANDREAS CHIOCCUS

Medicus Veronenfis,

J. Lipfio V. Cl. & Magno S. P. D.

Lovanium.

BInas Epistolas ad te praemissi, Vir Clarissime, cur tertia vereatur accedere? cum graeca fide Tabellarii nostras perferant, ut non injuria suspicatur *Christianus* noster, non erit forsitan ab re multitudine eorum fidelitatem aliquando elicere, aut excitare, vel frequentia compensare raritatem. Nactus sum nuper Epistolam *M.² Antonii Bonciarii* Viri docti, & percelebris, qui olim fuit *Mureti* auditor, nunc Perusiae, tametsi aliquot jam annos caecus, publice litteras humaniores summa cum laude profitetur; In ea quid de Virtute, & doctrina tua sentiat, palam & ingenue promit; Eam ex Epistolarum Latinarum volumine recens edito describendam curavi, & tibi transmittendam, ut qua te veneratione, & amore Itali homines, quos aequus amavit Juppiter, prosequantur, ex illa facillime intelligas; nam ingenia illa bruta, & fulgurita, quae ἀμπλακίαισι Φρενῶν in quemvis temere incurrunt, cur Lipsianae sapientiae fastigium vel tantillum permoveant? profecto μεταμῶνια, καὶ ἀισχυρὰ θηρέουσι ἀκράντις ἐλπίσι. Nactus etiam sum Dialogum de recta pronuntiatione linguae Latinae (opus mehercule subtilissimum, & elegantissimum) quem mihi accurate legendum proposui: Quintum te profecto iis litterarum luminibus adjungo, qui in Epistolis tuis sic excellis; verius forte dixerim, te unum instar omnium: nam suavitate & eloquentia Homerum, animi altitudine, gravitate, & pressa docendi ratione (quod a Galeno nostro ipsi tributum est) Hippocratem, rationum robore, & soliditate Aristotelem, Doctrinae varietate magnum *Scaligerum* refert, judicii acumine, mea sententia etiam exuperas; Nec profecto unquam ex tuorum scriptorum lectione surgo, quin doctior, vel melior mihi videar evasisse, quod etiam alii permulti tuae doctrinae, & monumentorum peramantes in se ipsis facile sunt experti; Quare jam expletum vides votum tuum, & te vivo, & apud posteritatem universam, dum utilia sequi, & docere tibi scopum esse profiteris. De magni *Scaligeri* ³ Filio non ita sentiunt Itali nostri, quin ipsum tumore quodam ingenii, dum prae se omnes ridicule contemnit, & Poetas optimos suo more emendat, in putidos errores incidere, ut *Mercurialis* noster in variis lectionibus, & *Clavius* Mathematicus insignis in re magis seria patefaciunt: a vera etiam, & avita religione ajunt descivisse, quo nomine apud Italos, & Hispanos pessime audit. Eum

Q 3

ego

¹ Respondet Lipfius IV. Cent. Misc. Epist. 91.

² Vide ad Epist. LXXIV.

³ Eadem lere effutit contra *Josephum Scaligerum* in libro de Collegi Veronenfis Medicis & Philosophis Sect. I. cap. 14.

ego sane, ut virum eruditissimum, & acerrimi ingenii, addo & Civem nostrum, libenter amplector, quamquam Historicus nostras⁴ *Alexander Cannobius*, longe *Sarayna* praestantior, in stemmate Domus *Scaligeræ* a se accuratissime confecto, hos pro legitimis eorum successoribus, qui Veronae rerum sunt olim potiti, non agnoscit: Mittam stemma jam editum, si tanti erit, & tibi, Vir Clarissime, videre haud fuerit permolestum. Cardinalis noster Illustrissimus, & tui amantissimus mandavit mihi, ut suis verbis maximam tibi salutem dicerem, quod libens facio, & a te mirum in modum peto, ut ad ipsum aliquid litterarum dare ne graveris. Vale, Vir magnæ, & celeberrime. *Valerinus* noster hoc te⁵ Epigrammate salutatur, & omnia sua studia, & obsequia tibi sponte, atque ultro devovet. Veronae Pridie Idus Februarii M. D. C. III.

⁴ Hunc nusquam reperire potui, nec in *Onulphrii Panvinii* antiquitatibus, (sed illo potest esse ferior) nec in *Struvii* Bibliotheca Historica inter Veronenses, nec in *Lippemii* aut *Konigii* Bibliothecis; nec alibi.

⁵ Hoc reperi Epigramma inter alia in laudem Lipsii scripta.

*Haftenus argentes ursae, aestiferique leones,
Serpentes, plura & monstra habuere polum.
Verum ubi te ornantem omnigenis virtutibus orbem
Videre in terris fulgido ab axe Dei.
Mirati decus & praeclaras pectoris artes,
Scriptaque, & ingenii tot monumenta tui:
Monstra ferasque parent properi detrudere coelo,
Et merita illa tibi tradere parte loca.
Teque ibi, cum Vitae cursum compleveris omnem,
Gaudebunt astris, Jusse, micare novis.
Tunc, precor, ipse velis felici lumine terras
Spargere, tunc Athesim visere dexter ades.*

Flaminius Valerinus Veronensis.

EPISTOLA DCCCXVII.

JULIUS SALINERIUS

V. Cl. J. Lipsio S.

Lovanium.

Libellus qui tibi verbis meis reddetur, is erit, de quo diu non est quod ad te literas dedi. eum elaboravi, vulgavi, non quâ nomini tuo detractum vellem, sed quâ meum famae aliquantum infererem. Non deprecor tamen si merui (sed vix est ut non mereatur hujusmodi ingenioli vir) tuam sive tuorum insectationem: nam ductu auspiciisve tuis cadere, non inglorium duco; etenim

— — — tu maximus ille es,
Unus qui nobis scribendo restituis rem,

&

Τὸν ὡς εἰ μὲς' ἐφίλησε.

Pleraque mendarum quae ibi animadvertes, typis, non mihi sunt imputanda, qui

qui valetudine districtus (qua utor non bona) Genuam me conferre non potui. Vale priscae illae eloquentiae splendidissimum jubar, nosque seu victos, five spretos, e cultorum numero ne dispungas. Savonae III. Kal. Mart. 1603.

EPISTOLA DCCCXVIII.

PETRUS SCRIVERIUS

J. Lipsio.

Lovanium.

Salve Musarum Hercules, salve Averrunce monstrorum: Salve Antiquitatis anima, Juste Lipsi. Nuper ad te literas meas frigidas illas & jejunas detuli, nunc iterum tibi molestiam creo, & defero ad te loca quaedam Martialis mei prodigiose (ut mihi quidem videntur) corrupta. Opem tuam imploro. Me vide. (Scorsim hîc in scheda habes.) Ad haec, Vir Clarissime, velim mihi primo otio respondeas. Vix enim credas quantum intersit me citius istarum quaestionum certiores reddi. Profecto jam nugas meas Typographo tradidissem, nisi eas electissimis tuis insertis prius exornari cuperem. Rogo itaque te quaesoque me per Epistolam doce. Dabis hoc amorî in me tuo, dabis publicae utilitati, cui nihil negare potes. Tantum. Vale Musarum Hercules, Vale Averrunce monstrorum, Vale Antiquitatis anima, Juste Lipsi. Iterum te rogo & obtestor V. Cl. literas tuas ad me properes. Nihil moratur finem editionis meae, nisi quod ad haec a te doceri expectem.

Quid sibi velit Martialis in his infra scriptis locis mihi non liquet. lib. I. Epigr. cxiv.

Et Stygias aequum fuerat pater ire sub umbras.

Manifesto βαβελίζει. nam quae haec fodes loquendi ratio? ego sane, qui meus stupor est, non assequor. Si legatur *aequus*, fortasse rem factam habemus. *pater aequus fuerat ire*, Graecismus. πατὴρ δίκαιος καὶ λυγρὸς ἵεναι. δίκαιος εἰμὶ Φράσαι δίκαιος εἰμὶ εἰπὲν quoties apud Platonem & alios legitur? lib. I. I. Epigr. XLVIII.

Haec praesta mihi, Rufe, vel Bituntis.

Item lib. IV. Epigr. LV.

Haec tam rustica malo quam Bituntos.

Quid sit juxta cum ignarissimis scio. lib. eod. Epigr. LXXIX.

Invitas tunc me quum scis, Nasica, vocatum;

Excusatum habeas, me rogo: coeno domi.

Quod Interpretes huc adferunt ἅδεν πρὸς ἑπ. Verte te in omnes formas, nullam bonam sententiam elicies. Si alio vocatus est, atque alibi condixit, quomodo domi coenat? haec profecto pugnantia sunt. Corruptum dico, & fidenter dico, mirorque neminem hactenus advertisse frigus atque adeo ἀναπόλυσθαι epigrammatis. lib. eod. Epigr. LXXXII.

Abscissa servum quid fingis, Pontice, lingua?

An noscis populum, quod tacet ille, loqui?

Ab.

Absurdum & hoc distichon. Nihil possum praeter variantes lectiones ascribere. MSS. quidam *fugis*, alii *figis*. Editiones primae *fugias* & *fugas*. nihil extrico. lib. v. Epigr. xix.

Flammataeve togae scriptula tota decem.

Codex Anglicanus atque alii apud me scripti, *Flammarisve*. lib. xi. Epigr. xxxi r.

Hinc cellarius experitur artes,

Ut condant vario vafer sapore

In ruta folium Cappelliana.

lib. ix. Epigr. lxxxiv.

Me tibi Vindelicis raptum narrabat in oris

Nescia nec nostri nominis Arctos erat.

Quid? Arctos narrabat raptum aut mortuum Martialem? Ecquid hoc ad epigrammata, quae Norbano mittit? Nihil hac lectione absurdius. neque hilum fere juvant membranae, in quibus est *moestus* & *Caesar*. lib. x. Epigr. lxii.

Cirrata loris horridis Scythae pellis.

Sic optimae membranae, & sic Gruterus noster edidit. antea erat. *Scuticaque loris horridis S. p.* Quod spurium esse facile video, non item quomodo emendandum. Subest magnum mendum. Attendamus. Quomodo pellis, si cirrata loris? nam lora ipsa pelles. quippe *μαῖσις*, de qua hîc intelligendum, erat scytale; non pellis cirrata loris. Coreyrea vero mastix lora ossiculis distincta habebat, quae crudelissima verbera infligebant. lib. xi. Epigr. xxix. Exsensum totum & meo iudicio valde distortum.

Invasit medicus sica freneticus Eucli,

Et praecidit Hylan. hic puto sanus erat.

lib. eodem Epigr. xcii.

Aeolidos Canace jacet hoc &c.

Certe si sanum mihi sinciput, non hoc sanum est, neque *Aeolidôn Canace*, quod alii codices ingerunt; nec etiam *Aeolis beu Canace*, quod alias legitur. lib. xi. Epigr. iv.

Scriptus & aeterno jam primum Jupiter auro.

Varias admittit hic versus interpretationes. quae vera sit a te doceri cupio. Doctor eruditissime. Nodos vides. age, age, V. Cl. tu eos ocus Tenedia securi dissecas. Plures alios esse scio vindice etiam dignos, sed hoc tempore hi tantum succurrebant. Lugduni Batavorum. Iphis Kalendis Majis. c1o1ocm.

Notae V. Cl. (sub nomine Tironis & Senecae. eorum tamen esse ne ipsa Suada mihi persuadeat. A Christiano quodam compositas aut saltim auctas pluribus alibi ostendo.) quas edi volebas cum de Notariis ageres, editae sunt a Jano Grutero una cum insigni illo Inscriptionum volumine. Absolutum hoc est; absoluti & Indices. quid multis? totius Antiquitatis Thesaurus prodiit. quem nunc his oculis video, his manibus tango. Deus bone quantum ego lectione istius libri profeci! Tribus annis in Schola non tantum didicissem quantum hîc tribus diebus.

EPI-

Hanc epistolam edidit quidem *Ant. Matthaeus* tom. vi. Analect. pag. 411. sed schedam non adiecerat, quare hîc utramque exhibuimus.

EPISTOLA DCCCXIX.

JIRMEIAS PIERSSSENAEUS

C. V. J. Lipsio S. P. D.

Lovanium.

CRedo te meminisse, V. C., temporis (tres vel circiter anni sunt) quo te, cum *Leone Meyero*, D. Pharahildis apud Gandenses praeposito dignissimo, compellans, me tibi stiti, tuaeque amicitiae insinuavi; saltem id studui. Neque enim quondam discipulus, vel auditor tuus, animum meum potuisssem inducere, te, post peregrinationes meas, non revisere. Quî enim vel tui, vel beneficiorum tuorum obliviscerer? per quae gratus acceptusque vixi apud exteros, atque nunc apud meos. Cumque tunc mentio incidisset Poëmatis mei gratulatorii, in Ingressum Principum nostrorum in urbem Gandam (in quo omne oleum operamque perdidi) nec non Odae ad Senatorem *Affonlevillium*: quam (legeras enim) probabas: neque vidisses illud alterum; illius me tibi copiam facturum pollicebar. Fecisssemque (nisi diligentia *Meyeri* praeventisset meam) comite Elegeia: quam etiam nunc mitto, cum alia; quae postea eidem adgnata est. Misisssem autem citius, nisi negotiosa aliquot mea negotia (quibus ne nunc quidem me explicui) & timidus pudor impedivissent. Utramque divina tua merita exprefferunt, & in me immortalis illorum memoria; miserumque & ingratum hoc aevum. Tam grata quaeso fronte eas suscipe & perlege; quam ego illas mente. sed conniventi oculo. Involutus enim quottidie litium tricis, vulgo consulendo, respondendoque operam meam locans (miserrima pro ingenio meo conditio!) nunquam fere otium suppetit, horulam unam vel alteram dare amoenis illis Musis; quarum consortio nihil animo meo jucundius. Nam, si ignoras, post ductam Gandae uxorem, Curiam illam Provincialem reliqui, ob Advocatorum odiosam, damnosamque multitudinem, atque Ipras migravi, ubi eodem fungor munere. Lucrum fateor istius caussa fuit: sed ut haec tempora sunt, magis rei familiaris sustentandae, quam saturandae cupidinis. Superest ut (post devoti animi mei, operarumque mancipationem) confidenti audaciae meae parcas, adnumeresque inmeritum numero tuorum. Vale. Ipris Flandror. 1603.

ELEGIA I.

Quantum in terra hominum degit, doctissime Lipsi,

Et penitus totis pectoribus sapiens:

Antiquae, Lipsi, mellita medulla Sophiae,

Et Fax Antiquae clarior Historiae;

Ignoscas rudibus, mea quod temeraria, verbis,

Ausa fiet laudeis mens temerare tuas.

Tom. II.

R

Nan

*Nam mihi si linguae centum licet, oraque centum
 Sint, que meis Pythus infideat labiis,
 Nil faciant mundi tantum ad decus extollendum;
 Non te ipse ad citharam cantet Apollo suam.
 Quis diae digne mentis caelestia dona,
 Atque sacra ingenii tot monumenta tui,
 Laudarit satis? Et meritis tua laudibus aequet
 Nomina? non ullo deperitura die.
 Tu veterum inlustras nobis oracula vatum,
 Inscitiae obscuris tecta prius tenebris:
 Per te barbaries totum horrida sparsa per Orbem,
 Diu misere adflicto heu! exulat a Latio:
 Per te iterum imperii pereuntis sceptrum potitus
 Laurea, cum cithara, Phoebus Apollo sui:
 Per te iterum reduces nobis, mea Numina, Musae,
 Per te ad eas nobis commodiorque via est.
 Hinc tibi paciferae, victricia praemia, laurus
 Ornat divinas, innuba ferta, comas.
 Per te habeo, Lipsi, neque nostra haec ultima laus est,
 Est quodcumque mihi mentis Et ingenii.
 Quare hoc quantumcumque mei est, tibi serviat uni.
 Et merito: juris est etenim omne tui.
 Hosce tuo natos igitur de semine fructus
 Conlege. saepe meo at res dolet una animo;
 Quos tibi nunc mitto Ingenii, mea carmina, foetus,
 Hei! nimis indignos esse tuis oculis.
 Sed sint qualescumque, Deis placuisse videbor,
 Haec mea si vestro grata sciam esse animo.
 Nam mihi te primo digito tetigisse satis sit,
 Et Lipsi heic nomen effigiasse mei.*

II.

*Lipsi, cujus ab ore favos atque Attica mella,
 Nectarei inbuto fluminis ambrosia;
 Perpetim inoffenso fundit Dea Suada fluore;
 Seirenum ut dulcem psallere rere chorum,
 Nescio, ut hoc aevum est; an res felicior ulla,
 Et reliquis melior sit, didicisse minus;
 Quam volgo sapere altius, Et sapientiae alumnus
 Dicier, Et totum huic adplicuisse animum:
 Quam mentis deforme chaos, Et inutile molis
 Corporeae, ad numeros erudiisse suos:*

Quam

Quam didicisse avidi desideria improba cordis
 Frenare, & queis sint haec moderanda modis:
 Qua ratione animi deferbeat ardidus ardor,
 Fulmineis irarum indomiti facibus.
 Non ullo inflatae mentis turgescere fastu,
 Nec vanis capier corporis inlecebris:
 Contentus suo at, hoc quodcunque est transigere aevi,
 Integer, & purus omnigeni sceleris.
 Nullius aut odio, inlicito aut tabescere amore,
 Libero ab infelici ambitione animo:
 Neutrum fortunae instabilem exhorrescere voltum,
 Sit licet hic tristis, qui modo laetus erat:
 Verum Socraticis instructus pectora cartis,
 Multifidii armatus ingenique opibus;
 Virtutum aeternis balantis floribus; omnia
 Invidiae & magnae pellere tela Deae.
 Atque ita ad immortale decus sibi, & aurea templa,
 Fortiter inmota mente aperisse viam.
 Quae omnia, Juste, tuo divino e pectore prompta,
 Caelica jam diu Constantia nos docuit;
 Non umquam laudata satis neque lecta; Sophorum ut
 Cunctorum evolvens dia magisteria.
 Nam licet ipsa animum sapientia, suadaque linguam
 Possideant: sociis laeta cupidinibus,
 Te & Venus, & Charites, & Musae, & Phoebus honestent;
 At tibi sola absit Regia Juno comes:
 Non modo non miraclo eo eris, neque gratior ulli;
 Aethereo ut terris numen ab axe datum:
 Verumetiam stolidis deridiculus magis, atque
 Paene omni humano ludibrium generi.
 Talia ego inlacrumans nostra haec mala tempora, Lipsi,
 Dequeror heu! tristi non sine condolio!
 Tempora, ab ortivo quae ubivis male turbida Sole,
 Usque ubi is occiduis mergitur aequoribus;
 Miscent funestis rediviva incendia flammis
 Bellorum, heu! nostri pesque, caputque mali!
 Quod jam continuo, terdenos amplius annos,
 Sanguineo BelgI viscera dente vorans;
 Infera mutavit superis, divina profanis:
 Atque eodem censu fasque nefasque putans;
 Saepe dedit patriae heu! oblito, cum Principum, Amore,
 Hostica fraternis volnera pectoribus.

Hinc ea progenies morum prognata malorum,
 Artium & , infernis edita seminibus;
 Ubertim subcrevit; ut ad vitrei vaga rivi
 Flumina, vel salices vel rigua herba solet:
 Quae has nostras Pacis expulsus abit, atque oppressum,
 Nec superat miseris qui ferat auxilium.
 Nullus Maecenas studiis qui ponat honores,
 Aurea Phoebeae aut praemia militiae.
 Nullus inaccessus bifidi qui vertice montis,
 Ejectasque sacro nunc Helicone Deas,
 Restituat salvas, & regnis reddat avitis
 Otia laurifero Musica sub nemore.
 Et sine te foret, illarum jam temporis aetas
 Delessent nomen, brutaque Barbaries.
 At melius voluere Dei, qui te, cate Lipsi,
 Maestare hoc unum te voluere bono:
 Tecta tua hospitibus ut sint habitacula Musis,
 Aeternumque animus Palladis hospitium.
 Utpote qui cunctas patrio procul orbe vagantes,
 Tantaque non ullis numina tuta locis;
 Sollicite adsiduas vestigatum iveris ultro,
 Servarisque animas omnium ab interitu.
 Jure igitur, Lipsi, tua, Laureaeserta coronant
 Querceaeque, & vitrix tempora docta hedera.
 Vitalesque tuis meritis se ubicumque fatentur,
 Ipso cum Phoebi numine Pierides.
 Quare etiam devota tuae sacra Numina famae;
 (Quae ivit ad Eoos, ivit ad Hesperios)
 Grata; tuum Nomen, Merita; & Studia omnia Divae
 Scalpsere aeternis Mnemosynae in Tabulis.
 Quae tibi, donec erit Phoebi venerabile Numen,
 Fatidicusque fluet Pegaseae humor aquae,
 Omnibus ingratis, apud omnes clara cluebunt;
 Tantillum ad Phoebi qui sapiant Genium.
 Cumque salutârim, licet ipso a limine tantum,
 Te duce, Musaeas, Lipsi, Heliconiadas:
 Ex illoque tuus sim mancupio; hasce querellas,
 Musarum, atque meo nomine ego exsolvo.

Devotus Illustrissimo tuo Nomini &
 Glorïae, Jirmeias Pierffenaeus.

EPISTOLA DCCCXX.

FRANCISCUS TREGIANUS

Cl. J. Lipsio S. P. D.

S Perabam equidem (amate merito & amande Lipsi) citius me reversurum fore, & te Musasque meas revisurum. Sed adhuc in fluctibus Aulæ, cymba fragili, haud secundis ventis navigo; nec quando vela dabitur contrahere, scio. Quippe qui aurea eloquentia (quæ hîc pollet maxime & potest maxima) destituor. Sic cum Aeolide saxum volvo & revolvo: respirandique tantum datur tempus, dum Vatis mei Musa personat. Sed & vix illi hora una aut altera impenditur, coelestiumque dapium delibo dulcedinem; cum ecce tot Harpyarum instar catervatim agmina sodalium involant: trahunt, abstrahunt, distrahunt, & tantum non discerpunt. Sic miser ego renuens renitensque, veluti infans esuriens a lactiflua mamma divellor. Et nunc equos, ludos, jocosque; nunc Aulam, aulaeque Idola puellas invisimus. Ubi nunc caeci pueri (potentis hîc Dei) tela depingimus, bella describimus, triumphos extolimus; nunc aniles naenias & feriantium poëtastrorum figmenta, Arthurum, Amadim, Primaleonta, Bevisum, Bandalum, Dianam, Armidam, Floridam, & hujusmodi pestes & corruptelas juventutis sitientibus, ne dicam prurientibus, ad has ineptias juvenicularum auribus relegimus, infundimus, instillamus. Et his vanitatibus adeo sunt attentae & intentae, ut expuissè scelus sit. Ad singulos quosque conceptus plaudunt, & O divine dictum! & nonnunquam verborum lenocinio non captae, sed raptae, ita stant attonitae, ut Niobes putares. Heu quanti vitrum! & nihili margaritum. Nihil sobrium, nihil doctum, nihil utile, nihil verum. Ita pessimus ille mos invaluit, fabellas potius quam historias amplecti, & falsis magis quam veris delectari;

— — καὶ βροτῶν Φρένας
Ἵπέρ τὸν ἀληθῆ λόγον
Δεδαιδαλμένοι ψευδέσι ποικίλοις
Ἐξαπατῶντι μύθοι.

Et ab his nugis vix ullae induciae. Sic inaeestimabiles (licet vulgo non aestimatae) temporis divitiae abliguriuntur, inutiliter, futiliter, & vix unquam non peccabiliter. Et tamen ad haec ab amicis impellimur: & renitentes non tantum irridemur, contemnimur, explodimur; sed de amicitia actum videtur, nisi cum pueris iterum repuerascimus, & cum insanis insanimus. Heu qualem vitam! Nauseat equidem anima mea super cibo isto levissimo. Sed quoniam (ut cum Apostolo loquar) & sapientibus & insipientibus debitor sum, ne Catonium affectare videar, ut ut fero, aut ferre simulo; & ne amicorum, temporis jacturam patior. Ecce tamen furtivis horis Eclogam hanc funebrem super obitu Illustrissimi & Reverendissimi foelicis memoriae Cardinalis *Alani*, quam olim Romae pio Epicoedio deflevi, jam revisi, relegi,

rescripsi. Quam a te (mi Christiane Varro) si tantum mereor, etsi non tantum mereor, pro otio tuo non amantis, sed iudicis oculo perlegi & cenferi cupio. Unum id scio, juvenile sapit; sicut & illae in fine libri nugae, puerile. Quae si etiam legas, habebis ut rideas, forsan & irrideas. Sed in illo aevō quid non ridiculum gigni potest? & bene, si non monstrum. Itaque etsi non opus, actas saltem veniam merebitur, etiam apud rigidos Censores; magis, te amicum. Indoctis certe olim placuit; cuperem & doctis. Illis siquidem placuisse nulla laus est; his & praemium. Legas igitur & censeas rogo; uti inimicus, scrutanter; ut amicus, libere. Vitam quippe Illustrissimi Domini mei amicorum suasu edere festino. Cui hanc Eclogam una cum planctu (quem nuper legisti) iterum cudendo, inseram. Haec de meis. Quod ad res attinet publicas, gradiuntur lente, non lente festinant. Et vereor ne Epimethei nostri cunctando (ut solent) non rem restituant, sed perdant. Orator hic Iberus semper est ituriens, non adhuc progrediens: & quando, nescitur. Sic (non ut ille Macedo) omnia differunt; & crinita fronte neglecta glabrum calvi senis occiput arripiunt. Nec sui commodi, nec hostilis incommodi tempus norunt.

Νήπιοι, εἰδ' ἴσασιν, ὅσῳ πλεόν ἡμῖν παντὸς,
 Οὐδ' ὅσῳ ἐν μαλαίχῃ τε καὶ ἀσφοδέλῳ μέγ' ὄνειαρ.

Dicam sane quod sentio. In tota hac Boeotica sylva non video lignum, ex quo aut Phoebus fiat, aut Mars. Quis tum Deus? forsan ille hortulanus; aut ille Sandalii Cythereae culpator. At videri tamen volunt ex ipso Jovis cerebro destillatos. Foris Catones, intus Nerones. At me reprimo. Sparguntur hīc rumores varii. Numerosum exercitum, & Hippogryphontaeum equitatum jam Cottia juga superasse. Nec non ingentem (vereor ne illi Dudonicae similem) parari classem; quae Quitoīnis armata glebis, per detriumphata toties coerulea, Neptuno fuscina minitetur eripere. Forsitan, ut terrore belli pax utilior extorqueatur. Si hoc, bene: sed adhuc nec bene gesta sunt bella, nec icta sine damno foedera. Adhuc natatilis illa machina non natat. Deest quidquam, ut moris est. Et novus obex praerupto aquae monti opponendus est. Omnis in illa spes Danaum. Quae si cadat, cadimus; si stet, erigimur. Et jam pro Coronide, seditiosis unico flatu prostratis, Castrum illud, in quo impius olim filius dejectum folio Patrem captivavit, a Solis circulo faede deperditum, verbis non tantum cingitur, sed & capitur. Sed satis notus est fumus virentis eorum ligni, nec nisi tarde, si unquam, accendendi. Qui, (inverso verbi ordine) micant saepe, sed non feriunt. Et parturiunt semper, nunquam pariunt. Sic est quod dubitem, ne tanta haec tonitrua in pluviam resolvenda sint. De Tyro maris domina quae audio, haec sunt. Spes omnis salvi reditus, & securi secessus in ventos abiit. Iterum illi parant verbera, & nos, humeros: tormenta illi, nos, patientiam: illi mortes, & nos constantiam. De me, certe: Stat nec ire, nec redire intuto. Non quod periculum refugiam, sed quia solus cadere nequeo, meoque casu multos obruam. Mihi equidem omne solum Patria est: nec me tanta dulcedine natale solum du-

ducit, ut immemorem non sinat esse fui. Omnes boni, parentes mei sunt: nec fratrem carne, sed virtute aestimo. Ubi illa regnat, domi sum; Ubi illa non regnat, quamvis domi, exul sum. Ubi Deus colitur, & recte colitur, illic sedes, & patria mihi sunt. Domini est terra, & plenitudo ejus. De captis, quae nuper tibi retuli, nimis vera sunt. Etiam ille nostras, symmista tuus captus est; non tamen carceri sed fidejussori traditus; quod nonnihil & matris & conjugis lachrymas soletur. Quid de illis fiet? pessima timentur; & quid ni a pessimis? Sane de dulci ex arbuto fructu spem inanem pascimus, & nisi ille *Zeus ὑψιβρεμέτης*, Qui

ῥῆϊα βεράει, ῥῆϊα ἢ βεράοντα χαλέπτει,

ῥῆϊα δ' αἰετίζηλον μινύθει, καὶ ἀδηλον αἰεζει,

ῥῆϊα ἢ τ' ἰθύνει σκόλιον, καὶ ἀγήνορα κάρφει,

Opituletur; Actum est: & ruimus. Credo tamen & alios cum nostra ruina ruituros; Qui & nostrae & suae causa sunt, si ruant, Quibus timeo, ne idem contingat, quod olim ranis a milvo. Etiam Tullius ille noster, qui Octavium evexit, expectato fraudatus titulo, non ridet. Non opto, illi accidat, ut illi. quamvis utrique merito, & immerito. Sed tanta semper timetur potentia. Et quia timetur, oditur. Potuit evehere? poterit dejicere. Et cui propter magnitudinem beneficii rependendo non simus, ne exproperet, tollendus est. Sic Basilus ille Macedo ingrattissimus mortalium, in vitae servatae praemium, cui vitam debuit, vitam abstulit. Sic cum Juliano illo perduto patriae proditore, egerunt Arabes. Sic & nuper. Sed dictum tibi ut sapienti sat est. In urbe Regia Dea Lua debacchatur. Atque ita ad arcem periscelidis famosam mystis aulica processerunt castra, ubi convivii, ludis, tripudiis, & ferinis bellis dies noctesque teruntur. Interea rumores de unione seu mixtione Arabum & Iberorum, vulgantur; imo & eduntur libri. Violenta haec nimis, idcirco non diuturna. Dantur, venduntur, prostituuntur, officia, praesidia, regimina, vilibus, mendicis, & tamen superbis Arabibus. Hic tamen etiam Divorum Aristarchum agit. Heu quam vereor ne hic illi similis haud futurus sit, qui Celes in Olympiis coronam meruit:

Θεμισέϊον ὃς ἀμφέπει

Σκᾶπλον ἐν πολυμάλῳ

Σικελία, δρέπων μὲν

Κορυφαῖς ἀρετᾶν ἀπὸ πασσῶν.

Det illi Deus hoc ultimum, & illud primum, praestare. Sed epistolae modum excessi. Attamen quia nec laeta nec jucunda retuli, insipidas has dapes admirandi miraculi narratione condiam: Quam hic tibi pro bellario apponam. Res nova est & prodigiosa; atque ab orbe condito nihil simile evenisse, legi. Author mihi est Reverendus in Christo Pater *Franciscus Tellitsonus* Presbyter Anglicus, oculatus testis: Cujus veneranda canicies, & quindecennia vincula pro fide Catholica perpeffa, fidem, si non exigant, saltem merentur. Nuper ipsummet narrantem audiavi: Autographumque Anglice breviter a se descriptum, suoque nomine obsignatum, in rei testimonium penes me reliquit. At

rem

rem aggrediar. Locus est in Northumbriae Comitatu, Glendalia dictus. In eo pagus Doddingtonium. Illic viduata viro paupercula, unica sibi filia *Alisa*, in solitudinis tolamen relicta, degit. Haec plenis nubilis annis, dum hinentium procorum alloquiis, pluries quam virgineo par erat pudori, titillatas aures blande praeberet, a genitrice suae prolis sollicita saepius atque acrius reprehenditur. Illa nihilo correctior (quae ejus est aetatis levitas, & ad Cypriae dapes optandas proclivitas) nec monitis coërcita, nec minis territa, fuerat iterans & reiterans consortia, juventae lasciviis nimis indulgebat. Forte Redemptoris Epiphania celebrabatur; quo tempore pravus ille mos inolevit, singulas familias inter Bacchi cyathos sibi Regem ludorum eligere. Aderat his ludis *Alisa*; & relicta domi matre, usque ad Galli conticinium cum notis amasiis jocatur, convivatur, tripudiat. Supervenit vetula, & natam avocat, avellit, abstrahit: miscensque jurgia, ut lasciviam arguit, utque monitorum matris incuriam objurgat. Illa aegre ab amato sodalizio divulsa, pone sequitur, fremens, indignansque. Utque domus tetigit limen, horrendis vocibus parentem execrata, illi mortem (proh scelus!) a malo Genio imprecat. At audi desuper de coelo vindictam in impiam illam immissam. Vix verba ex ore sacrilego protulerat, cum in extasim raptam in terram corruit, formidando ejulatu vicina circumsonans. Accurrit mater, vix ipsa sui compos, & dolendo conspectu quasi fulminata obstupefescens, super ora jacentis natae se projecit; aratas rugis genas lachrymarum imbre guttatim humectans, & O filia, & me miseram, singultienti prae dolore voce congeminans. Advolant vicinae audito strepitu, matremque natamque gementes erigunt. Illa in se reversa continuis planctibus inauditum natae casum ingemiscens bienni tandem tabe consumpta est. Haec in lecto locata per viginti & unum annos integros, nec cibum sumpsit, nec liquorem hausit, nec membra movit, sensusque & rationis impos, tanto tempore, in eodem lectulo, quasi suo funeri supervivens cadaver, elanguit. Quo toto spacio impensa illi publica custodes dati; bini diu, noctu totidem; qui vigiles eventus aegritudinis singulos testarentur. Accidit hoc sexto Januarii die Angliae sceptris gerente *Elizabetha*, ejus regni anno sexto decimo, aut circiter. Ad tanti famam miraculi tota Anglia obstupuit; atque ex omnibus insulae partibus nobiles, aulici, & plebei convolant. Etiam medici periti quique ad indagandam insoliti morbi causam adveniunt. Inspiciunt, scrutantur, admirantur, & se nescios victosque fatentur; Deique justis peccatorum vindicis laudes consona voce decantant. Illa interim paulatim tabescens, nullo prorsus cibo, nec potu refecta, veluti nix repente Sole liquecebat. In tantamque redacta est maciem, ut per uterum jam haerentem dorso, quasi & iliis etiam inanita foret, singulas spinas juncturas digito numeraverim. Pedibus manibusque instar folium tuberantibus potius quam tumentibus, ut nec unguium, nec digitorum, nec compaginum omnino forma remaneret: Massa tantum carnea exilibus e brachiis, cruribusque, rotunditate propemodum tornatili eminebat; scilicet humores, solitis obferatis meatibus, ad corporis extremitates impulsus, instar bul-

bullae vento inflata, viduatam carne pellem distenderant. Tot per annorum curriculum nullam prorsus passa est evacuitatem; nec puris, nec salivae, nec fluoris, nec sudoris. nec ulla immunditiae mundissima linteamina inquinabat. Nec distabat a conjuge Lot in salis statuatam conversa, nisi quod oculos nonnunquam ad formidinem adstantium rotaret; & quod illi ad immensitatem prodigii muliebria manarent etiam mortuae, huic non, vivae. Et plane sic immota recubuit, ut statua animata putari posset. Cum tandem vigesimo primo Sole jam suos circulos emenso, eodem ipsomet die, eademque circiter hora, qua primum languore correpta est, audita est a custodibus aliquem quasi coram alloqui, rixari, percunctari, & responsa dare. Sed qui ab illa visus, nec visus a turba nec auditus est. Illa haec. *Mentiris nequam.* Et iterum; *Non ita est.* Et paulo post. *Abrenuncio te perditae.* Et. *Faciam, & te nolente.* Et. *Tempus elapsum est.* Et. *Jam hora praeteriit.* Tum quasi ad alium conversa. *Hem, adestum, fer opem, succurre mihi.* Hac effata, cibum poscit & potum; comedit, bibit, & loquelaesensuique reddita est. Paulatimque solidis eduliis refocillata, & membra & membrorum pristina forma rediit; & scelus & sceleris poenam recognovit. Vivit adhuc in Bardovico castro contermino Scotiae, sano satis & vegeto corpore, quamvis nonnihil incurvo. Quem aut quos in illo Dialogismo viderit & allocuta sit, nemo unquam hactenus illi extorquere potuit. Sed pie creditur hostilem alterum, alterum amicum Genium fuisse. Illo poenas & supplicium interminante, ab hoc opem & auxilium flagitasse. En tibi hoc prodigium, quo nullum unquam legi mirabilius. Scio quid foeminae Spirensi, imperante *Ferdinando*, atque alteri jam nuper anno saeculi praeteriti nonagesimo primo ad Sancti Nicolai in Lotharingia acciderit, per biennium jejunis. Sed hinc tot simul & tanta concurrerunt miracula, ut non ille tantum Morycho stultior, & Acarnanio bove stupidior, sed plane aut truncus sit, aut Diabolus, qui non viderit & non crediderit, inflictam illi miserulae hanc poenam in impietatis vindictam; ne videretur aeterna Justitiae scaturigo humanis rebus indormire, aut nostra scelera & suas injurias nescire: Discantque impii, qui nonnunquam impuniti in coeno scelerum volutantes illud stultum effutiunt; Peccavi, quid accidit mihi mali? discant, inquam, esse Deum in coelo qui videt, qui punit, qui judicat populos in aequitate: nec, quod cum illo Numinis negatore, apud poetam, ditentur & prosperentur, idcirco nullum esse Numen erudient: sed sciant paratum esse, & virtuti praemium & impietati supplicium; quamvis non hinc semper aut illud datum aut hoc inflictum; quibus tamen id non contigit, meliora illis, his pejora manent: illis merces in coelis copiosa; hi portant peccatum suum in Infernum, ubi vermis eorum non extinguetur. Corripit tamen benignus Dominus & in hoc saeculo sceleratos, & tempus poenitudini indulget, ut in futurum caveant, ne in aeternum pereant: qui non correpti, non caverent, & perirent. Nec, si non, quoties peccant homines sua fulmina mittat, ideo homines se non peccasse putent; sed si quandoque mittat fulmina, & nobis impunitis alios corripiat, indulgentiam ejus

agnoscamus, qui illos punit, ut nos admoneat, illos conterit, ut nos erudiat; illos caedit, ut nos salvet. Obmutescant hîc igitur Athei, & Protagora suo deserto, providentiam & prudentiam Creatoris fatentes, erumpant mēcum in Regii prophetae vocem exclamantes, Mirabilis in altis Dominus; Cujus judicia vera, & justificata in semetipso. Hanc tibi (columen doctrinae Lipsi) lacinioso quamvis stylo descripsi historiam: Et quam, ne pereat, (siquidem in Chronicis nostris, a Novatoribus nuper editis, ne confunderentur, praetermissam inveni) si qua se tibi offerat de hujuscemodi mirandis scribendi occasio, poteris vulgare; sed tuis verbis, cultius & ornatius. Vivunt enim multa in antiquorum Epistolis, quae alias, ab historicis omissa, interciderent; ut in D. Hieronymi, de septies icta muliere, de multinubo jugali, de Satyro loquente, de decenni patre, atque alia apud alios hujus generis plurima, quae utiliter, insensatis mortalibus providentiam & Justitiam divinam praedicant. Sed sat superque biberunt prata. Et jam tempus est ut vela contraham, nec te melioribus occupatum studiis inculto diutius stilo distraham. Tu itaque (clarissime virorum Lipsi) prolixitati meae indulgeas rogo, medullitus te amantem ames, cultumque tui meum gratanter accipias, nec ense nec arte separandum, nec nisi morte, nec morte delendum. Vale. Datum Bruxellis, in profesto D. Jacobi. 1603.

Respondet Lipsius iv. Centur. Misc. 376. vide supr. ad Epist. cclxxxix.

EPISTOLA DCCCXXI.

CURTIVS PICHENA

Cl. Doctissimoque V. J. Lipsio S. D.

Lovanium.

Vellem, Vir doctissime, ipsarum Gratiarum chorum mihi adesse, ac stilum ducere, quo dignas humanitate tua gratias tibi agere possem. Nam quod ego spe vix praesumere ausus fuissē, ultro mihi pretiosissimum donum obtulisti, aeternam mei memoriam: quandoquidem scriptis tuis in omne aevum victuris, meum nomen, egregia etiam cum laude, inserueris. Sed cum nudae simplicesque gratiae tanto muneri non debeantur, neque ego referre valeam; nihil aliud faciam, nisi ut me tibi arctissimo & indissolubili nexu devinctum fatear. Multa quidem experimenta optimae naturae tuae jam dedisti: sed nullum insignius, quod Notas meas non solum legere, sed etiam laudare dignatus sis. Utinam in ceteris me ipsum noscerem, ut mea ista novi. aegre annui, ut vulgarentur, nullam in iis laudem praecipiens, nisi fortasse puerilem: ac si quid bonae frugis in illis metitur, diligentiae quam ingenii est opus. Quod in nonnullis a te dissensi, nihil excuso. jam, credo, ingenuum candorem meum introspectisti: hodieque recepta haec libertas mihi videtur, dummodo absit laedendi ac mordendi mens; quae, Deum testor, a me semper

per abfuit, abest, aberit, erga quemcunque, tanto magis erga te: cujus excellas virtutes ego adeo admiror venerorque, ut, si quod sentio dicerem, verear ne modestiae tuae pudorem incutiam. & nisi duobus vinculis, aulico, & uxorio, detinerer, certe aliquando istuc excurrere cogitarem, ut aliquid haurirem ex purissimo tuo fonte. Sitibundus fane ego semper fui bonarum litterarum, sed, nescio quo meo fato, sitim hanc sedare nunquam mihi contigit, ut qui a triginta annis, negotiis Principum involutus, mei juris non fuero. hinc facile conjicies, quantulum mihi otii seu commercii cum libris litterisque. Tacito tamen amicus, furtivis horis ea nugatus sum, quae vidisti. ac nuper, testimonio & honore tuo factus impudentior, alia quaedam addidi, & Francofortum ad *Claudium Marnium* misi. Ex iis paucula subicere libet. lib. i. cap. 70. illud, *sapiens a prudenti*, corrigerem, *insciens a prudenti*. nam & litterae non sunt dissimiles, & recte, inscientes seu ignari, opponuntur prudentibus: ut lib. ii. *milesque pavidus*, & *casuum maris ignarus*, dum turbat nautas, vel intempestive juvat, officia prudentium corrumperebat. lib. iii. cap. 67. de Junio Othone: propolluebat. legerem, pr. polluebat. id est, praetor polluebat, ut dedecus, ratione dignitatis, majus appareat. supra dixit: *Junius Otho praetor*. nunc ipsum describens, ait, fuisse prius ludimagistrum, deinde senatorem: recte ergo sequitur, *praetor*. lib. iv. cap. 70. in damnatione Sabini: non imprudentem Tiberium tantam invidiam adiiisse. monui, in Man. legi, non prudentem. quod nunc suspicor, recte se habere. voces enim sunt vulgi, culpam a Principe quodammodo amoventis, & in Sejanum rejicientis. sic mos in Aulis, mihi experimento saepe cognitus. lib. vi. cap. 2. in verbis quae Man. habet, tam referret Scipiones, pulcherrima atque indubia mihi visa est postrema tua emendatio, tanquam referret. eam ego distinctione juvarem: & bona Sejani ablata aerario, ut in fiscum cogerentur: tanquam referret, Scipiones haec, & Silani. &c. nempe senatores illos irridet, talium sententiarum autores. Jam, Vir maxime, finem huic epistolae impono: ac tibi me meaque omnia, sincero animi & cordis affectu, offerens, dedicans, vovensque; Deum precor, ut te felicem, incolumem, diutissimeque superstitem servet. Florentiae. VIII. Kal. Augusti, MDCIII.

Respondet Lipsius Centur. v. Miscel. Epist. 34.

EPISTOLA DCCCXXII.

CURTIUS PICHENA

J. Lipsio S. D.

Lovanium.

Praeter secundas litteras tuas humanissimas ad me datas, vidi etiam quas ad Hieronymum Mercurialem scripsisti, super ¹Pisano fragmento. & quod de L.

S 2

Cae-

¹ Respondet Lipsius Cent. iv. Misc. 87.

² Adjecta erant Cenotaphia Pisana, sed quae hinc describi nolui, tum quia rectius legi possunt cum

Caesare arbitratus es, scopum attigisti. Nam ecce aliud frustum ejusdem lapidis nuper erutum, decreti scilicet initium, praefert ipsius Lucii nomen. Et quoniam ego ipse Pisas nudius tertius veni ad Principis Aulam evocatus, fideliter fragmentum illud transcripsi, atque ad te mitto, *Mercuriale* etiam suadente. Alterum lapidem nunc primum mihi videre contigit, ac nonnulla in eo leviuscula animadverti, quae subijciam. In fine secundae lineae, post verbum *VTIQVE*, nihil deest. nam si recte memini, aliquot puncta in exemplari apposui, defectum arguentia. Inferius, ubi scriptum fuit . . X INDE HABEANT. moneo primum, in marmore non agnosci litteram x. sed cum media tantum extet, videlicet i. potius A, littera videtur, quasi fuerit, EA INDE. Praeterea, ne fortasse putes, post verbum HABEANT. multa desiderari, quia magnum spatium superest, scias nullum ibi esse defectum, sed in eo ipso verbo finem. In sequenti linea, quae incipit, LOCUS, duae litterae deesse videntur. forte, is LOCUS. Prope finem, ubi transcriptum fuit, PHANTQVE. omnino apparet fuisse PETANTQVE, licet litterae sint vetustate semiconsumptae. Haec ad te, Vir maxime, raptim exaravi, plurimis occupationibus obrutus. tibi quoque iterum ac saepius me ipsum totum voveo dedicoque ex intimo pectore. Vale. Pisis xv. Kal. Maji. MDCLIII.

cum doctissimis ad ea *Norisi* Cardinalis commentariis, tum quod ea a *Pichena* in commentariis ad Tacitum publicata haec eadem sint, & tot mendis scateant, ut monstro propius videatur virum eruditum, & Pisis saepe degentem adeo depravate ea exscripsisse, ut testatur *Norisi* Dissert. IV. cap. I. pag. 428.

EPISTOLA DCCCXXIII.

HERIBERTUS ROSWEIDUS

J. Lipsio.

Lovanium.

PAx Christi. Ita est, Clarissime Lipsi: velata erat aeterno Ignorantiae peplo Vesta, nisi styli tui acumine eam revelasses. Gratum fuit legere, imo sublegere scintillantes passim rari judicii tui gemmas. Quia tamen me in partem vocas, nec verae margaritae mihi domi; mangonum imitabor industriam, ut vitro saltem effingam ad speciem. Tuum, id est, probi gemmarii erit videre, si tanti vitrum, quanti margaritum. Dubitas, & merito dubitas, de *Atroce* Apolline apud Tertullianum. Valde aberrat *Junius*, qui *Atracias* substituit. Omnino *Atrox*, probum Apollinis epitheton: 1. quia Homero Iliad. Δ. δεινὸς θεός, Apollo. cui Graeco epitheto par Latinum, *Atrox*. 2. quia apud Statium l. I. Tebaid. vs. 829. de Apolline: *Arcu crudelis iniquo. Pestifera arma jacet*. Et disertè ibi de Apolline Delphico loquitur, de quo & Tertullianus. 3. quia ab hac mente Tertulliano de corona militis c. 12. *Apollo Deus telorum*. Juvenali Sat. XIII. in Diris; *Cyrrhaei spicula vatis*. Apud Gellium l. xv. c. 12. *Simulacrum Vejovis sagittas tenet, quae sunt videlicet paratæ*.

tae ad nocendum. Quapropter cum Deum plerique *Apollinem* esse dixerunt. &c. Ea forma repræsentatur Vejovis in numo argenteo L. Caesii: De Arnobii loco non acque mihi liquet. Manuscripti tamen a vulgatis variant, quos exhibeo. Manuscriptus Limeburgensis noster, *In pene impenetrabilibus & coliginis perpetuos fovetis focos?* MS. Franciscus Regius. *In penetrabilibus & colignis perpetuos fovetis focos?* Unde formabat *Scaliger* cum *Meursio*, & *culinis*. Quid? ut penetralia vestrae *culinae* dictae? non facile persuaserint. Absolute tantum corrigunt, nec explicant. Citat alibi *Scaliger* obiter hunc Arnobii locum, & *colinis* seu *collinis*, si recte memini, repræsentat. nec enim *Scaligeri* locus nunc occurrit. Equidem existimo Arnobium non velle absolute Vestae ignes sublato, sed variatum tantum in modo ignem illum servandi, vel a loco, in quo ante fuit, translatum. Quod tamen difficile ex Arnobii verbis eruere. Tentemus. lego igitur. *In penetralibus & culignis perpetuos fovetis focos.* nulla pene mutatione, *colignis*, in *culignis*. *Culigna* Festo & Glossario vasculi genus. An igitur ignis Vestae ante nuda ara servari solitus, post in vase fictili servatus? facit huc forte *Seria*, de qua Lampridius in Eligabalo: & *petrale sacrum*, tam de igne, quam Palladio capi potest. Altera conjectura erat Arnobium tantum velle ignem hunc non servari amplius in Lavinii penetralibus & Albae, atque ita a priscis ritibus Romanos descivisse. Sed quâ hoc e verbis Arnobii eruas? Lego proxime ad scripturam Manuscripti Limeburgensis: *In Penenii penetralibus & colliginis perpetuos fovetis focos?* *Colligina* forte capienda, de *collibus Albae*. & *Peneni penetralia* de *Lavinio*. Quaerendum quo alio nomine olim Lavinium dictum. Nam ut *Peneni* mutem in *Lavini*, vix ausim. Omnino e re fuerit attentius Manuscriptorum varietatem considerasse. Ego certe nunc aliud exsculpere non possum. Citas hîc alibi carmen ex Propertio de *Tarpeia Vestali*, quod Ovidii est. III. Fast. de Silvia. Vale, clarissime Lipsi, mei apud Deum memor. Raptissime Antverpiae II. Augusti A°. 1603.

Notavi & alia quaedam minuta; quae si tanti, submittam.

Lator harum, nobilis est Polonus, e disciplina nostrorum Moguntinorum. fabula is nuperrime fuit Hagae, dum ut Jesuita & sicarius capitur. Narrabit ipse coram, & bellos illos Milesiarum conditores ridebis. Iterum vale.

EPISTOLA DCCCXXIV.

MONSIEUR.

à Lovain.

ENCORE que vostre vertu soit connue par toute la chretientè, si croyie ny avoir province, ou elle soit en tant d'estime, comme elle est en France: le bruit en est desjà long temps parvenu aux oreilles du Roy mon maistre, lequel maintenant, qu' Il ne travaille qu'à la cultivation de la paix, & à la recolte des fruits qui en viennent, m'a commandè de scavoir de vous, si vous auriez point agreable de changer de seiour, & venir favoriser de vostre presence ce royaume, qui vous honore tant. Il me charge de vous dire, que vous ne

S. 3.

scav-

scauriez jamais estre en lieu, ou vous receviez plus d'accueil & bon traitement, ni pres de Prince, de qui vous soyez plus chieri & aymé, que vous ferez de luy. *Outre que des maintenant il vous donnera Douze cents escus d'entretenement: qui ne seront neantmoins qu'un commencement de gratification.* S'assurant bien, que vostre presence & vos services luy augmenteront à toute heure la volonté de faire davantage. Le principal service, qu'Il desireroit de vous, seroit d'estre garde de la Bibliotheque, que vous jugeriez, je m'assure, des plus belles & des plus rarez, qui soyent au monde, Et où vous trouveries non seulement de quoy contenter la louable curiosité, que vous avez tousiours eue: mais de quoy pouvoir possible d'avantage encore servir & profiter à la Republique chretienne: Car tout ce qui a esté peu ramasser par les Roys ses predecesseurs, & par les predecesseurs de la Royne, depuis tant d'annees, y est ensemble. Et parmy cela infinis livres grecs & latins escrits à la main, lesquels n'ayant point encor esté imprimez, le pourroient estre par vostre moyen, qui ne seroit une des moindres obligations, que vous aura la posterité. Vous y trouveriez dont, de quoy vous satisfaire en toutes sortes, & mettriez vostre vertu sur un theatre vrayement digne de son merite. Je vous serois allé trouver moy mesme, pour faire cet offre de bouche, mais comme la saison est facheuse, & que je n'auroy aussy bien peu colorer ce voyage, de sorte qu'il n'eust suscité des discours en cette court, Sy sachant mesmement que j'ay desia pris congé de vous, j'ay pensé de le commettre à ceste lettre, sur laquelle je vous supplie treshumblement, me faire responce. Et si en effect vous avez tant soit peu d'inclination à ce changement, mais qu'il y eust quelques difficultez domestiques ou autres, qui vous en retiennent, Je vous supplie me faire la faveur de me les dire, & vous assure, quelles seront de tout insuperables, ou que j'y trouveray remede: je suis entre tous les Franchois un de ceux peut estre, qui vous honore & revere autant. Ce qui me faict avec tant plus d'affection prier Dieu, vous vouloir bien inspirer à ceste resolution, vous donnant en toute autre chose le parfait contentement, que vous souhaitez. Monsieur vostre humble & tres affectionné Serviteur. a Bruxelles le 12. Dec. 1603.

LA DODERIE.

Vid. Epist. ccclviii.

E P I S T O L A DCCCXXV.

A U B. M I R A E U S

V. Cl. J. Lipsio S. D.

Lovanium.

SCriptum tuum de *Diva Hallensi*, Vir Clarissime, Machliniae apud *Nic. Oudatum* V. R. esse, inde ad nos, uti jusseras, mittendum, ex tuis ad nos litteris libens intellegimus. Quia tamen haec, quae vides, nuperrime ad nos Hallis transmissa sunt, V. Mag. *Hovius* noster ministrum suum ad te mittit, ut eadem ipsa, si videtur, suo loco interferas. Nam, ut mea quidem fert

fert sententia, haec diplomata, atque in primis illud Nicolai V. Pontificis vere Maximi, vel leviter commemorata, non mediocre praesidium atque ornamentum, adferent. Est his & historia miraculi cujusdam annexa, quam fortasse operae pretium sit legisse. Sed & lampas a Julio 11. magnanimo illo Pontifice *B. Virgini Hallensi* missa, donaria inter merito videtur recensenda. Ceterum de donariis quod scribis, pauca te, (uti & pauca sunt,) ac regia tantum, commemorasse, vehementer probo. Ad Censuram quod attinet, videbatur ea esse sententia Illustrissimorum Antistitum Mechliniensis & Cameraensis: itemque Illustrissimi patrum mei, Antverpiensis Episcopi designati, de Tridentini Concilii decreto. Quamquam si aliter Doctores Theologi Lovanenses sentiunt, libens cedo. Adjungimus Idaeam sacelli Hallensis, ut videas & judices: Delineandum curavimus & opidum ipsum Hallense, aliaque hunc in usum. Vides hinc & insignia opidorum, ac municipiorum Deiparae devotorum; quae, si videtur, una cum ceteris mox in aes incidentur. Tuum super his & aliis (quoniam frustra haecenus, etsi magno desiderio, te expectamus) iudicium, audiemus. Vale. Antverpiae xv. Kal. Martias c10.10. c1111.

EPISTOLA DCCCXXVI.

AUB. MIRAEUS

V. Cl. J. Lipsio S. P. D.

Lovanium.

DE Brabantiae nostrae historia adornanda serio te cogitare gaudeo, & pro virili, ut bonum civem decet, libens juvabo. Mitto nunc diploma unum alterumve, dum cetera describuntur; *Anfridi* nominatim Ultrajectini Antistitis, & Bratustpantium antea Comitum, de quo coram nuper. Ex quo cognosces puto, ipsum in Brabantiae nostrae tractu Rienfi Westerloam & alia praedia possedis. *Dinaei* de Brabantia Commentarii MSS. sunt apud Dominum de *Bassigny*, cum aliis aliquot nostratibus Chronicis. Libens submittet, scio, amico, si petas. *Dinterum* Reverendissimo Patruo Bruxellam miseram, sed eo nunc utitur R. Abbas Parcensis. Habebis autem ut voles. *Uwenus* multa quoque submittet sua manu descripta, itemque amici alii. Non debeo praeterire, quod nuper audiui, Brabantiae Ducem habere perpetuum in Senatu Spirenfi Consiliarium, eumque Brunsvicensi, lata nuper sententia, praelatum. Is nunc est ¹ *Georgius Tegnagelius*, *Reineri* Doctoris Lovaniensis filius. Ad *Hebraeorum Admiranda* quod attinet, de quibus coram inquiebam, quaeque propemodum jam adfecta significabas, fac ut luce donata brevi videamus. Certe, si quae alia, merent illa stilo vestro illustrari. De publicis magni nihil habeo, nisi hoc unum; Anglicis istis rumoribus quosdam hinc & Antverpiae nuper turbatos. O miseros Principes, qui in haec secula crudelia inciderunt! Det Deus meliora, & te Reipub. diutissime servet. Antverpiae postrid. Kal. Decemb. c10.10. cv.

EPI-

¹ Videtur ad hanc respondere Lipsius v. Cent. Misc. 79. certe de eodem argumento in principio agit.
² Vide *Valerii Andr. Biblioth. Belgic. t. 11. pag. 789. & Fastor. Acad. pag. 188.*

EPISTOLA DCCCXXVII.

J. L I P S I U S

*Auberto Miraeo S. D.**Antverpiani.*

Dilemno scribam, ubi munus videro, nunc in via etiam haeret. Quod de Historia scribenda percunctaris, puto nec te ambigere. quid non ambigam post hoc Ordinum decretum, quod videtur (libere apud te dicam) in meam ignominiam conceptum? Non sic meritis de patria usque adhuc fui, nec publicum decus apud exteros ivi imminutum. sed scio iudicia, & eorum causas: sibi habeant, ego magno & forti animo, ut alia, hoc quoque feram. Ante quatuordecim annos in has partes veni, quo animo res & constantia mea docuit: apud Batavos mille florenos annuos acceperam, bis mille potui, si redire voluissem. Quid hîc mihi factum est? sexcentos accepi, & habeo: quod plus est benignitati Principis aut Regis potius, fero acceptum. Nec jactare vocationes libet (non est mei moris) quae triplum quadruplumque omnium obtulerunt. Nihil movi, feci quod Scipio, & consenui & moriar in patria verbum hoc non addo. Atque utinam, ut privata omittam, patria illa in spe meliori sit! De pace tu injicis, & aliunde jam audieram: sed quid inducat aut compellat hostem nondum fateor me videre. Proceres illi Germani? partim non volunt, partem frigide volunt: & quod dicendum, Principes Regesque hodie mutuis dissidiis, in sua quisque intenti, bonum publicum cogitatione, non dicam cura, vix attingunt. Rex iste vicinus metuendus est nobis. sed Spinula sit salvus & redeat, stare non posse confido. Hispaniae vires opesque magnae sunt, utinam consilia? & nemo nescit hac nos parte, & dilectu virorum laborare. sed Deo publico gubernatori haec permittimus: qui te, R. Domine, longum servet. Reverendo Domino Antisti manus per te osculor, ubi occasio erit. Lovanii xi. Kal. Mart. ciorocvi.

EPISTOLA DCCCXXVIII.

ABRAH. DE BIBRAN EQ. SILESIUS

Cl. V. J. Lipsio Historiographo regio S.

ERubui, cum ¹ *Casaubonus* noster mihi nuntiaret gratam Tibi fuisse epistolam illam de Amphitheatro: quod ideo eam accepisset, non ut dignam putarem ad te mitti debere: sed ut meo erga ipsum amoris satisfacerem. In via enim tantum & velut praetereuns id quidquid est vidi, nec potui usque morari: cito velut ex torrente rapido, nec semper casuro hauriendum fuit. Dolere

ta-

¹ Vid. Epist. cccclviii. respondet *Lipsius* iv. Centur. Misc. xciii. sed de Lapide, qui ipsi suspectus videbatur, iudicium differt, quia de plano sententiam ferre non audebat.

tamen non possum, me ejus peregrinatiunculae lucellum cum Clarissimo atque optimo viro communicasse, a quo idem auctior amicitia tua, cum tanto foenore receperim. Nihil mihi optabilius, quam abs te amari, quem, accensus ingenti fama tua, cum admiratione amo: & semper amavi, & amaturus sum, quamdiu literas: atque hoc etiam magis, quod ex omnibus unus sis, quem omnes ament. Quem meum adfectum, tibi, mi Lipsi, ex animo voveo: & nuper coram fecissem, cum ex Anglia reversus Ostendam excurissem, nisi huc me invitum amici retraxissent. Facturum tamen me id adhuc spero, quamprimum ea tempestas, quae nunc in illum tractum incumbit, refederit. Etsi tunc quoque forsan male cavere potero: etiamsi alibi declinem & circum eam: tamen audebo, potuit ille,

— *mediis elapsus Achivis*

Illyricos penetrare sinus —

sequar alios: & ut dicam *κέκρυχα*. Sed ut haec omittam, & interim tibi oneri esse incipiam antequam usui sim: scire velim, quid de hoc marmore censeas, quod non dudum in itinere meo Hispanico Karthagini novae in Constantanis vidi & exscripsi.

Tabula marmorea alibi fracta, muro inserta fani D. D. Fulgentii & Florentinae:

² REGI. JVBAE. REGIS.

JVBAE. FILIO. REGIS

HIEMPSALIS. N. REG. GAV.

PRO NEPOTI. REG. MASI.

NISSAE. ABNEPOTI. N. E. P. D. I.

IIVIR. QVINQ. PATRONO

COLONI.

bona pars est Genealogiae Numidiae Regum, quae a Juba II scilicet sic
Tom. II. T ad

² Hanc a *Bilrano Casaubonum* accepisse testatur & *Sponius*, qui ex scedis *Peireskii* duos addit ver-
sus in fine.

COLONI ET INCOLAE
LIBERTINI.

deinde explicat, & stemma Jubae adjicit. fere, ut antea *Sigonius* ad Livii lib. xxix. 31. & *Reiner. Reinec.* in Historia Julia tom. iiii. qui etiam, ut *Sponius*, Gaudam facit fratrem Jugurthae, & filiam Manastabalis. sed *Sigonius* Jugurtham ex Gauda concubina Manastabale deducit. vide *Miscell. Antiq. Erud. Sect. iv. pag. 145. Reinesius* quoque edidit. *Clas. iiii. Inf. 70.* qui tertio versu pro GAV. leg. GVI. & de *Gulussa* capit, refutatus a *Sponio*. literas N. E. P. D. I. *Reinesius* interpretatur *Nomini ejus ponendum dicandumque jusserunt. Sponius* vero, *numini ejus plurimum devoti jusserunt.* Ego *Reinesium* potius sequor: nam Jubae *numen*, quod Imperatoribus adulatio solis tribuit, assignare ausos colonos non puto. posset etiam reddi: *nomini ejus publice dicari jusserunt.* de hoc Juba vero, rege doctissimo, vide quae collegerunt *Lindenb. & Valesius* ad *Amm. Marcel. xxi. 15. Morellus Specim. rei nummar. pag. 225.* & ab illis laudati alii.

ad Masinissam usque excurrit: & per Gaudam utrosque conjungit. Id vero quam recte fiat, non video, quum, quod sciam, nemo scripserit Gaudam illum Manastabalis F. Masiniss. N., & Hiertham & Hiempsalem F. F. reliquisse. Hunc a Bogude Hiertha caeso aliunde advocant, neque fratris nomine adpellant. Minus apte quod hic Juba Masinissae abnepos nominetur: cum Manastabalis fuisse necesse sit: nisi velis filium a fabro diligenter praeteritum, occurrente patre Magno illo Masinissa, ut nomine ingentis viri eum ornaret. Neque par hic patri fuit: & forsan alterutrum nominare necesse erat, cum ambos nollet exprimere. Literae solutae, N. E. P. D. I. mihi tenebrae sunt: & quae tua face, Lipsi, illustrari volunt, ad meam magis spissant. De Duumviratu, opinor nihil mirum: cum etiam Impp. eum honorem non recusarint. D. *Hadrianus*, ut est apud Capitolin. *in Hispania patria sua Quinquennalis fuit, item Adriae; per latina opida Dictator, & Aedilis, & Ilvir.* Sed quid, inquires, mihi Jubas in Hispania & Karthagini Ilviros creas? peregrinum hoc in historia. Puto lapidem ex vicina Africa advectum: cujus rei conjecturam video in ultimis verbis PATRONO. COLONI. Quod adjuti forsitan patrocinio Jubae ejus, qui Historiam scripsit, in controversia de agris, hunc honorem & titulum ei decreverint. Potuit eadem causa fuisse, quam Juba pater Hiempsalis avi jussu Romae egit: de qua Cicero in agraria. *Audivit, inquit, Hiempsalem possidere agros in ora maritima, quos P. Africanus P. R. adjudicavit: & tamen postea per C. Cottam Cos. cautum esse foedere. Hoc quia vos foedus non jussissetis, veretur Hiempsal, ut satis firmum sit. Quid? cujusmodi est illud? tollitur vestrum judicium, foedus totum excipitur, comprobatur. Quod minuit auctoritatem Xviralem laudo, quod regi amico cavet, non reprehendo. Quod non gratus sit, indico. Volitat enim ante oculos istorum Juba Regis filius adolescens, non minus bene nummatus, quam bene capillatus: Nam idem ager, cujus meminit, iterum manu captus a Caesare post victoriam ad Thapsum. Ac cum ab eodem quaedam receperit, & postea ab Augusto regnum: non dubitem illum de suis bene mereri potuisse. Sed nae ego nimis multa. Tu, vir maxime, videbis si hic lapis lacunam explere possit, in quam vulgus materiem congeffit, qua egesta, forsan suapte sponte coalesceret. Vale, & tui amantiss. redama. Lutetiae Parisiorum. III. Eid. Junii. A. MDXIII.*

Si quid ad haec velis rescribere, quod tamen abs te, mi Lipsi, non exigo, literas tuas ad *Casaubonum* mittito. iterum & longum vale.

EPISTOLA DCCCXXIX.

ABRAHAM. DE BIBRAN

*Viro Doctissimo J. Lipsio Historiographo regio S.**Lovanium.*

Cum libenter de te & saepe cogitem, mi Lipsi: crebrius ad te scribo: & ubi animum habeo, manum mitto. Quid excusum? non ex fluxa verbo-

borum arena, surrexisse nostram amicitiam puto: ideo pergo inaedificare, & tamquam mansuram sedulo excolere. Ex nuperis tuis scriptis hîc Senecam vidi, & Miracula Divæ Aspricollis: quae omnium primus *Andraeas Haniwaldus*, is qui in tanta gratia apud Caesarem, mihi ostendit: non sine laude & admiratione tui. Juvit iterum ex me de te scire, quae coram vidi: & ut rem dicam, ita eum accendi, ut ardere tui amore videretur. Experire, per me, num illum promptum & volentem habeas: si res tibi est: videbis num dicta factis congruant. De Pannonicis rebus audisse te puto: nec repeto: ne dolori meo saepius manus afferam. Nunc illi turbini etiam Septentrio se adjungit: & in mediam Germaniam se infert: proculdubio prospectum allaturus iis, qui adhuc paululum videbant. Equidem timeo Cymmerias tenebras: sed Deus, cui nos & haec talia permittimus, nos etiam in illuni nocte, diriget. Clarissime atque optime Vir, salve & me tui amantem ama. Pridie Nonas Martias Praga. A. Greg. cxcxcvi.

Quae de Amphitheatris oblitus eram nuper mittere, nunc mitto: si quid in iis esset, quod ad cogitationes tuas pertineret. iterum vale, & optimo Rubenio, si est isthic, a me salutem.

Literas Pragam mittito ad Eundem *Haniwaldum* aut ad *Gruterum*: si tamen licet & vacat aliquid rescribere.

Alia quaedam praeter ea, quae notata & nominata Lib. 2. c. 6.
de Amphitheatris.

1. Amphitheatrum, quod in Hispania Hispali esse ajunt, Italicae est: in ipso natali solo D. Trajani, iv. lapid. supra urbem: locum nunc *Sevilla la Viecha* appellant. Ingens moles & comparanda Veronensi: nisi quod illa marmorea, haec ex lapide minutiori secto. Ab Orchestra ad mediam Zonam alibi bene integrum: superiora tantum collapsa, & quasi manu diruta jacent.

2. Augustae Emeritae ad Anam fl. pulchrum quoque vidi: & adjunctum Theatrum: utrumque vetustate adeo desedit, ut aegre priscam faciem sub ruinis agnoscas. Nunc *las sette Sillas* appellant: & mira de iis somniant.

3. Karthagini novae minutulum est: supra portum, in summo vertice montis positum: Oppidum subjectum despicit, ut Capitolium suam Romam.

4. Sagunti, quod hodie *Morvedro* agnominant, opinor, a veteribus muris: sub summa arce in quadam projecta crepidine montis Theatrum sedet pulchrum, bis pulchrum: & integrum totum per Scenam, semi collapsum.

5. Aliud in Narbonensi Gallia vidi *Auriaci*, non minus pulchrum & integrum, hodie *la grande muraille* appellant.

6. Aliud praeterea Veronae fuit, cujus etiamnum vestigia visuntur in descensu montis D. Petri in hortis monachorum D. Hieronymi trans Athesim, vulgo exstat depictum.

7. In Gallia Pictavii Amphitheatrum:

8. Aliud Andegavii in hortis suburbanis cujusdam civis, hujus imum tantum arenae superest, illius exteriores arcus plurimi. Interior area nunc vere in

Sylvam versa, tota confita arboribus; & vere hic Munerarius. non, ut ille per jocos, pro Leone Leporem emittit.

9. Catanae in Sicilia etiam unum esse ajunt: sed non vidi, oppidum praetervectus.

EPISTOLA DCCCXXX.

CLAUDIUS DAUSQUEJUS

V. Cl. J. Lipsio S. P.

Lovanium.

EX quo Academia mihi relicta, V. Cl. perraro meae ad te pervenerunt, nulla tamen sane obliviscentia, quum mihi pene quotidie obversaris: sed quorsum importunior seria praepediam tua, si seria non suppetant? Ac vide, nedum modo seria afferro, si te specto: Basilium tamen Seleucia affero, Chrysostomi Achatem, & si Deo, vobisque placet, Chrysostomum ipsum. ita judicium meum est. Verum ut auratos fraenos admordere regii equi est, & ferreos cujusvis oris: sic interpretatio nostra (sum quippe e multis aliquis) ferrea multis locis est, ex autore aureo, partim infantiae meae vitio, partim Typographi, seu correctoris, cujus erratis nihil est hirsutius, aut senticosius; etiam ut solipungam agere dici queat: miseret mei Basilii, immo mei. Nam si primus hic foetus caecus, mancus, claudus: quid reliquis (nec enim indefes agam) futurum speret, qui certa exactioris judicii acie ventura jaculatur? Quia tamen vulgo Basilus, etsi talis, dispalescit, jussu interpretis, non trepidabit ad te accedere; lucem tu ei aperuisti, inque eam ut me immergerem, scriptorum tuorum stimulis perfecisti, audeo, atque in confugelam tuam me refero. Si carmen interim tuum ὁδὸς ἀπολεστικὸν reliqua sui parte defectum est, si caractere evanido decoloratum, si ejus, qui tibi pridem a manu, carmen non comparet, ignoscite, saltem mihi: nec *Hoji* usquam est, & *Surii* quoque intercidit: non certe voluntate mea, si forte imprudentia. Et certe, iste, quem nosti, irritabilis est, nec facile placibilis. quid agat viderit, mea minus interest. Vale, V. Cl. tu meus esse perge, qui pridem. Insulis Flandrorum Nonis Juliis M. DC. IIII.

Erat & alia Epistola *Dausqueji* ad *Lipsium*, postridie Kal. Jun. 1606. sed quae ad verbum continebat, quae de *Massylis* & *Masaeis* disputat ad Sil. xv. 171. quae feliciter & docte refellit Cl. *Drakenborchius*; ideoque illam hinc edere non est visum operae pretium. sed ζήτηματα illa, quae huic epistolae subjeci, non inter Lipsii scripta, sed in Bibliotheca publica inter alias scedas reperi.

Ζητήματα quaedam & ἀπορήματα super Libris Domini Lipsii de
Mil. Rom.

Pag. 17. Improbatur illud Silii lib. 11. 318.

Pubescit miles castris, galeaeque teruntur

Nondum signatae flava lanugine malae.

Quid si intelligat militem pubescere non eum, qui jam talis, sed qui futurus olim? praesertim cum aeque reiculum, quod adfertur pag. 65. *Flos juvenum pubescentium*, nisi huic quoque loco talem sensum accommodamus. Interfuisse vero castris, imo proeliis adolescentiores probat factum Scipionis, qui non tam patri *Θρεπτήρια* reposuit, quam *σωτήρια* meritis est. Adde quod vox *pubescit*, non signet eum, qui perfecta pube est, sed cui aut primulum oritur, aut orta crescit; quales sunt, qui intra aut supra aetatem istius Scipionis. non tamen stipendiariis eos adscribo.

Pag. 19. Τὰ ὅπλα μετὰ τιμῆς ἀξίαις νεμόντων, vertis. *Cum arma non nisi honestis dignisque darent. Honestis, hoc est, ut opinor, cum honore.* An non possit exponi, *per censum dignis?* Ovid. Am. 3. — *dat census honores. Inde gravis index, inde severus eques.* & miles quivis. colligo ex eo, quod ex Polyb. imprimis pag. 36. *πλετύνδην αὐτῶν γεγεννημένης ὑπὸ τῇ τιμητῷ τῇ ἐκλογῇ.* Contra noster Dionysius aliter loquentem facit l. 3. pag. 110. verum hoc non tam loquitur res, quam persona.

Pag. 19. Δῶλον καταγράφων. reddis, e *servili genere*: requiri possit usus vocis in ea significatione, & si liberos aut libertinos contraxit, nihil in legem aut consuetudinem peccavit Marius eorum commilitio suis adjuncto. at Plut. *παρεὶ τὸ νόμον καὶ τὴν συνήθειαν* cum dicit, *τὸ ἀπὸρον καὶ δῶλον καταγράφειν* (priori generi pauperum obest, quod qui legitime leguntur in milites per censum fortunarum leguntur) porro leges¹ admittunt Civem: liberti & libertini cives censiti, & a nobis censendi. Simile consilium de servis adsciscendis Catilina animo ante praeceperat, sed rejecit id indignum rationibus suis ratus; sed Marius in infimos quosque semper inclinavit animum.

Superiori commate vox *νεμόντων* videtur opposita huic *ὑπὸ νόμον*. ut alteri duces ex lege id soliti sint, Marius vero exlex. aut saltem pro distribuere, aut simile vertenda, ut assumptorum in militiam a rejectaneis secretio significetur.

Pag. 19. Ἐξελύθρον & ἀπελεύθρον pro eodem habes. non Eustathius, qui interlecat Od. ξ. pag. 531. *ἐξελύθρον μὲν εἶπον τὸ διὰ χοῆας ὑπὸ δανειστῇ γεγόμενον δόλος δίκην, εἶτα ἀπολυθέντα. ἀπελεύθρον δὲ τὸ ἐν κοινῇ συνηθείᾳ.*

Pag. 20. Συνοεῖν δὲν τὸ ἀκούοντα vertis, *consentire dicenti discitem.* 1°. non quisquis audit, discit. ergo id laxius. 2°. videtur vox Graeca non aliud offerre, quam una cogitare: ut dum scilicet hic dicit, alter taceat. dubio interim assensu & pendente.

T 3

Pag. 21.

¹ Sed ingenuum. propterea hoc uti caetera omnia tuae eruditioni & examini submitto, Doctissime Lipsi. Dausq.

Pag. 21. Ποῖσι δὲ τὸ κατ' ἐνιαυτὸν. *faciunt hoc fere quotannis.* videtur expungendum τὸ *fere.* τῶν στρατιωτικῶν παρεχνομένων εἰς τὴν Ῥώμην. *vertis, Militaris omnis juvenus in urbe, ὑπὸ κοινῷ, adest.* Ante dixerat Ῥωμαῖς ἅπαντας, ex quo putarem etiam extendi posse ad eos, qui extra urbem, & sic τὸ παρεχνομένων τῷ proficisci aut simili reddendum, alio prorsus sensu. Sic pag. 23. apud Livium, *Romam, cum edictum, sine detrectatione convenerunt.* Imo forte non quidem Romae tunc id factum, sed propter eam, cum infra scribas, eos vocari ad aedem Martis, quae extra Urbem, & post, cogi in Capitolium. Neque hoc aevo binas Martis aedes admitto, nec unquam fuisse. Quam enim apud Suetonium cap. 29. exstruxit Augustus, & sanxit, ut illic de bellis aut triumphis ageretur, claudemus urbe? exclusam malim, nec putem a veteri diversam, sed eandem potius male jam materiata, & vitium facientem renovasse Augustum, non ab imo exstruxisse, sed restruxisse ad eam formam, ut cujus nulla prope esset facies, emereret conspicua.

Pag. 23. Quid si semper duo vexilla? sed in disjunctis arcibus, aut in eadem. Servius loci securus duo ponit in octavum Aenid. nec ejus ratio futilis. Quod scriptores hunc aut hunc usurpent numerum, temere factum, videlicet non certum rei signum.

Aptissime & ex mente Dionysii transponis τὸ ἱερῶν, & apponis τῷ ταγματῶν. id ipse facit lib. undecimo; & l. vi. *πρώτα γὰρ ταῦτα Ῥωμαῖς ἦν στρατίας, καὶ ὥσπερ ἱδρύματα θεῶν ἱερὰ νομίζονται.* haec ego olim dicebam ad aquilam argenteam Catilinae apud Cic. Orat.

Diem prodici placet voce praeconis, cum aliquid subitum. Non negem posse fieri. Sed Livius quasi Graecorum proprium (quo de meus Eustathius II. ψ. pag. 1448. versu 31.) & veluti hac nota Graecorum commentum cernens a Romano l. xxxii. *Postero die advocat concilium. ubi cum per praeconem, sicut Graecis mos est (de quibus & apud quos ibi omnia) suadendi, si quis vellet, potestas a magistratibus facta esset.* moxque haec Livius iterat, *voce praetoris Achaeorum, cum praeco ad suadendum vocet, obmutuistis.* Scriptum certe solenne Romanis vel ex eo liquet, quod res deperditas scripto inquirebant. Propert. l. iii.

I puer, & citus haec aliqua propone columna,

Et dominum Esquiliis scribe habitare tuum.

In hoc negotio militis evocandi cur scriptum tardius? post evocationem nimirum dies aut diei pars melior abibat: & dimidiata hora scriptioni fatis fuit.

Pag. 29. Vertis haec Dionysii τὴν ἐκλιπόντων τὴν στρατίαν, *Qui militiam detrectabant.* flagitium gravius susceptam deseruisse, quod vox Graeca praefert. & fol. 31. adfertur ex lib. iii. Livii, *pro desertore futurum, cujus causam non probasset.*

Pag. 34. Pro, *Albis equis*, substitutum, *Altis equis.* prius tamen facit ad istius transvectionis commendationem, in qua speciem fuisse triumphi vult Dionysius, pene par etiam difficultas in *altis* conquirendis. Quid si omnes *altis equis*, quis inter eos eximius?

Pag. 45. Forte, inquis, *imperatorum nomina in militum manibus.* Potius figno-

gnorum; ita Vegetius l. 1. *Sed non statim punctis signorum scribendus est tiro delectus.* Puncta signorum, puto nomina signorum, Aquila, Draco: aut legionum, *Rapax, adjutrix Martia.* Nisi forte per puncta legionum, hoc est, quae iis inscripta, imperatorum nomina, ut Vespasiani cap. 6. apud Suet. (quandoque imagines imperatorum, ita Vitellii scriptas in signis reperio apud Xiphil.) ipsorum quoque manibus inusta.

De punctis eorum, qui se Diis dabant (non enim lego istos Devotarios fuisse, nec reor) perpulcrum Eustath. in Od. d. pag. 165. De equis punctis probis & improbis idem scribit in Od. pag. 197. v. 43. & Il. β. pag. 259. ubi ait ἐγκεκαῦσθαι αὐταῖς ἀπὸ σιδήρεσ σφραγίδα (hinc Prudentio *Sphragitides*) & Il. κ. pag. 697. v. 33.

Pag. 76. *Non quia revera vela aut panni fuerint.* Contra Plut. in Fabio de Ter. Varrone, ἀμ' ἡμέρᾳ τὸ τ' μαχῆς σημεῖον ἐξέθηκε ἐστὶ τῷ χιτῶν κόκκινῳ ὑπὲρ τ' στρατηγικῆς σκηνῆς διατεινόμενος. Rursus in Pompejo: ὁ μὲν ἐν Καίσαρι εἰπὼν τὴν περὶ δοκωμένην ἡκεῖν ἡμέραν, ἐν ᾗ πρὸς ἀνδρας, ὃ πρὸς λιμὸν, ὃ δὲ πενίαν μαχῆνται, κατὰ τάχος πρὸ τ' σκηνῆς ἐκέλευσε περὶ εἶναι τὸ φοινικῶν χιτῶνα. τὸ γὰρ μάχης ἐστὶ Ῥωμαίοις σύμβολον. Aquilae vero ipsae, non solum quales descripsit Dio l. xl. sed in texto fuisse exprimo ex Flori l. iv. c. 12. quinam aliter potuit eam aquilifer balthei latebris mergere?

Pag. 100. ἵνα τοῖς κατὰ μέρος ἡγεμόσιν περικινδυνεύοντες ἐρρωμένως καὶ μὴ ἀδελοὶ γίνωνται. Haec versio, ut ductoribus ordinum, cum strenue aut aliter pugnaverint, possint innotescere. 1°. τοῖς κατὰ μέρος non satis videtur expressum Latine. Magni tamen referre putant milites, se signari oculis ductorum, praesertim suorum & suarum partium, ita fere sonat τοῖς κατὰ μέρος. 2°. περικινδυνεύοντας non videtur idem esse cum τῷ strenue pugnare, sed animam projicere in aperta pericula, aut prima pericula subire, reliquos praegrediendo. 3°. quid illud aliter? an si instrenui fuerint, id notum volunt, idque suis ducibus? putarem scribendum in Graeco dumtaxat sententia clara μὴ ἀδελοί.

Ibid. Κατὰ τοσῶτον ὀπιλεπτὸν ἐξεληλασμένον. magis arridet, ὀπίλεπτὸν ἐξ.

Pag. 103. Firmitatem quaerere videris in scutis, si pelles non instratae assu-
lis. Conjicio primo a numero pellium. deinde a siccitate. Hom. Il. ρ. βοέας
ἄνας vocat περὶ αἶς, etsi suum aēs, subdit, an addit? Tutius videntur ita po-
tuisse fieri, quod suppositum lignum εὐχριστοπερον & magis forabile, corii lenti-
tudo plus resistat. Unde pro magno Virg. posuit. *Transiit intextum tauris opus.*
Certo tamen allati loci probant subjectionem lignariam: sed nunquam aliter
factum non docent.

Pag. 105. *Craffitie unius digiti.* Unde igitur certum illis libramen? a ferro?
sed altrinsecus adimis. Et ab illis vulnus erit acu punctum, non latae plagae,
quales vult Livius fieri Romanorum telis & armis, non item Graecorum,³ ne-
scio ubi. Alterum istud (quod habetur pag. 120. non videtur de sententia Dio-
nyssii, qui ait, habuisse ὀβελίσκας, non ὀβελίσκον. Cogito quoque ad hanc bre-
vitatem decurtatam non pertingere ad longitudinem mediocris hastae. Deni-
que fulgor iste natus est in summo ferro, lati adjicit, ne quis putet, ortum
etiam ab imo.

3. Est apud Florum libro 11. cap. 7. ut Lipsius infra pag. 120.

Pag.

Pag. 112. *Nec praefecto umbilici vocem &c.* Umbilicus Graecis est ὀμαλός, quem Homerus in scuto pingit Il. Z. 117. expingam & integrabo versus. unice scriptis tuis concinunt.

Ἄμφι δὲ μιν σφύρα τύπτε καὶ αὐχέναι δερμὰ κελαινὸν
Ἄντυξ, ἣ πυμάτη θένει ἀσπίδ' ὀμφαλοέσσης.

⁴Hoc loco scribit Schol. ex elephante plerosque fuisse umbilicos clypeorum, aut librorum. ut autem hîc Eustath. Umbilicos vocavit bullas in librorum tergo, sic in Epodis Horatii & Martialis aliubi. Est & vox haec translatitia ad medium cujusvis rei signandum, ut quum vocant Delphos *Umbilicum mundi*, videor & in Verrinis legere, *Syracusas Umbilicum Siciliae*. Nec in clypeo unus solum Umbilicus, qui ventricosos faciat, multo plures in Agamemnonis scuto. Ilad. A. 34. Ἐν ᾧ οἱ ὀμφαλοὶ ἦσαν ἑξήκοσι κακοήγετοιο Λαοκῷ —

Pag. 113. *Bello non ante tentati.* Habent gentis consuetudine per Tarquinium, Clausum, &c.

Ibid. In Suida reponitur Λιγυσικῶν. etsi res, non tamen haec videtur illi mens; cum pag. 156. dixerit τινοὶ θυρεοὶ τῶν Καρχηδονίοις.

Pag. 114. Quid si pro δεξιὸν μηρὸν, legatur, ἐξιόντι μηρὸν? sic ut gladius brevi loro dependeat infra summum femur, ut sit propius ipsum cingulum, quam genu. aut, ταύτην ᾧ περὶ δέξιον φέρει μηρὸν, distinxit hisce verbis ab Heroico more, qui ad humeros alligabat. Scribit enim φέρει, non φέρεισι. τὸ περὶ δέξιον autem sit, quod mox ἐπεξηγῆται, καὶ καταφορεῖν ἐξ ἀμφοῖν τῶν μερῶν βίαιον.

Pag. 115. *Manlius Hispanico cingitur gladio.* Refert hic mihi locus cum Agellii, ubi substituis vocem *Cantabundus* pro *Cantabundus*. haesi tunc & merito. Tacit. scribit 11. Hist. 22. Germanos cantu truci & more patrio nudis corporibus super humeros scuta quaterere. Caesar Eburones victoriae suo more conclamare. Hi populi ab Historia saepe Galli dicti. Sed extra controversiam Livius vii. cum scripssisset superbe fortissimum quemque Romanorum Gallum proritasse, levitatis & vanae fiduciae notis ita Manlium liberat, non cantus, non exultatio, armorumque agitatio vana, quasi dicat ea in Gallo fuisse; quem & a cantu opinor Stolidè laetum dicere. Ex quibus videri possit Gallus sui incuriosus.

Pag. 119. καὶ τῷδε μαλακῷ. quid si? καὶ ὅδε μαλακῷ. i. forti ferro. tamen χερσὶ καὶ αἰχμῇ, quod facile hebescat.

Pag. 125. Τρυφάλειαν plures exponunt per τελοφίαν, incerta tamen est memoria Eustathii. dictum putarem, quasi τετραφάλειαν aut τετρυφάλειαν. Primo certa est & indubitata scriptio per υ. non per τὸ ι. quod si est τελοφία certo scribendum sit per ῖ. Et suspicor ἀμφίφαλον galeam τετράφαλον, τετραφάλην eadem esse. ut Il. A.

Κρατὶ δ' ἐπ' ἀμφίφαλον κυνέτην θέτο τετραφάλην
Ἰππασιν. δεινὸν λόφ' ἔκατ' ὑπερθεῖν ἔνδον.

Si quatuor φάλοι, cur non totidem caudae, totidem λόφοι? neque hic λόφος plures uno puto. Nam si alios minus aut honore aut virtute spectabiles (quos

⁴ Si tangit malleolos, certe τὸ ποδηνεκές potius est pedumtenus, quam crurumtenus. Dansq.

(quos passim tegit *πετραφάλεια*, quasi communi & vulgari galea) quatuor conis illustrat & insignit, non ducum ductorem & Regem Regum? quem tamen sic honorari non video. Et si *φάλοι* tres, si in singulos singulae plumae, qua positura? si a fronte & a tergo duae, ubi tertia? dextrorsum an sinistrorsum? offert se vertex apicatus. Ibi esto. alia jam mora. ubi jam reliquae duae? an ad dextram, sinistram, frontem, occipitium? ubi? quae causae, cur haecenus, non eatenus?

Quod adfertur a Suida, levius pluma est. Non ab aliis gestata *τελοφία*, si in more fuit? cur non & illi *τεμνέφαλοι* dicti? An quod Geryon primus hoc ornatu conspectus? Sed quî potuit triplicem sui speciem objecisse spectantibus? aderas? distinxisses. aberas? confudisses in unum. Fabula ergo credibilior apud Justinum lib. extremo, arcta trium *Φιλαδελφῶν* fraternitas.

Dixi illa mihi eadem videri: quia Poëtis perquam familiare numeros incertos & multitudinem certis mutare. Horatius

Illi robur & aes triplex

Circa pectus erat.

interpretor multiplex. nec plus videtur dictum, quam a Sallustio *Ferro septos* in fragmentis. Aeneid. 8. de Aeneae clypeo.

Septenosque orbibus orbes

Impediunt

cum alibi:

Clypeum tot ferri terga, tot aeris,

Cum pellis toties obeat circumdata tauri.

de Pallantis. Adeone malignae fuissent operae Vulcani et Vulcaniorum, ut clypeus Aeneae minus firmetur, quam Pallantis? ille prope emeritus, hic *vixdum tiro*. similiter Homerus scutum Ajacis facit *ἐπὶ τὰ βόειον*, hoc est meo iudicio, multiplici pelle; quem similiter vocarit Ovid. 13. Met. & 1. Am. *dominum clypei septemplexis*. Ob haec animi pendeo.

Ibid. Ἡ μέλασιν ὀρθοῖς θριξί. scribis ὀρθαῖς. Hac admessa correctione, ubi *τελοφίας* fundamen? Crines isti quo stant fulcimine? quo furriguntur?

Pag. 105. *Nec ratio est tam caute & custodite armare illos*. Caute restrictum ad velites. Nam II. κ. & λ.

Παρδαλέη μὲν πρῶτα μετὰ φρενον εὐρὺ κάλυψε,

Αὐτὰρ ὅτι στεφάνῳ (sentio deesse vocem, nec liber ad manum) *κεφαλῇ*

λῆφιν αἰέρας θήκατο χαλκείῳ.

Pag. 128. Quae Pausanias de loricis Homericis & γράλλω, vix audio.

Ibid. Cur loricæ proprie dictas non potuit duas gestasse? Dominus de *Bien- te* aevo nostro thoraces de solido ferro indutus ad numerum saltabat, & αὐθι- μέρων tam gravis, cymbam, se, suosque evertit Antverpiae. Id forti, si alii nulli, nemo neget.

Pag. 131. Cur sequendus *Duxa*, ferreus aerato nec cataphraetus equo? Orientalis miles, maxime Parthus, passim auro superbit, & rutilat. Tuus

Cl. Dausqueius.

L. I.

¹ Pag. 17. Vulgarius dicimus *Luy-Dick*. an a populi frequentia, ut Horatio *densum humeris vulgus*?

Pag. 71. *Hos cippos appellabant*] Non ausim a nostrate voce (*Cippen*, vel *Kippen*) deducere, quod est occulte contingere & comprehendere. sic pali hi.

Pag. 41. Vineae nunc barbarico usu *Causiae* dicuntur] vetustissima Vegetii impressio (*Caucias*) habet. Vincent. Belluacensis in speculo doctrinali (*cautibulas* vel *chartos*) an hoc ultimum a (*Garden*) quia vineae ex cratibus? illud a cautione:

Pag. 42. *Lucanus vineam ait adoptam levi terra.*] An hinc Glossarium: *Pluteum*, *πλοπλᾶσια*. & forte etiam plutei scriptorii gypso obliti erant, ut memoriae confirmandae causa quid ibi stylo notarent.

Pag. 51. *Musculus cuniculo similis*] Eodem modo citat Vincentius in speculo. doctr. & forte non ad formam similem respexit, sed ad effectum. ita forte musculus cuniculo similis.

Pag. 77. Plerumque unius aggeris tantum fit mentio, qui *χῶμα* Graecis. An hinc apud D. Hieronymum l. 2. contra Jovinianum. *Si omnes, qui a dextris sunt, ut vulgo dicitur, ἐν χῶμα.* Ita legit Reatinus. sed abeunt ab eo MS., qui omnes haec addunt: *ad militiam probat*: ut sine dubio locus de militia intelligendus sit. Varie tamen vulgatum (*ἐν χῶμα*) exprimunt. & vocabulum (*unum*) praemittunt.

1. noster MS. *si omnes qui a dextris sunt, unum, ut vulgo dicitur, Ensoma ad militiam probat.* hinc credo alios fuisse, sunt corpus unum, & ut vulgo dicitur, ἐν σῶμα.

2. noster MS. eodem modo legit, sed pro (*ensoma*) substituit (*engoma*) hinc forte alii ἐν χῶμα.

Martin. & Francisc. MS. eodem modo legunt: sed loco (*ensoma* vel *engoma*) habent (*encomion*) hinc credo Erasmus fecisse ἐν λόγιον.

En tibi variantes lectiones. adhibe iudicium tuum.

An *enchoma* ab ἐγχῶμα, id est hasta, ut designet unum hastatorum ordinem?

An ad tribunal alludit castrense, quod ad dextrum, legendumque *engyoma* ab ἐγνώμα, id est, in manus trado, mando, fidejubeo. at mandata & fidejussio in foro vel in Praetorio. sic forte Suidas capiendus in *στρατήγων*, ubi γνῶμα. Legendum enim γνώμα vel ἐγγνώμα. Nisi malis γνῶμα pro γρῶμα. Gruma Nonio locus medius, ad quem quatuor tendunt viae, an simile quid in praetorio?

Vel Reatini lectioni addiderim: *ad militiam probat*, & huc traxerim. Nam in aggere nullus ordo dignitatis, sed omnes permixti.

An, *encomion*, quod toti exercitui par laus in victoria tribuatur?

An militarem tesseram mutam & vocalem intelligit, quae omnibus cadem?

cer-

¹ Has quoque observationes ad Lipsii Poliorcetica reperi, sed nescio, an Dausquei manu scriptae. ne tamen perirent, hic edendas existimaui.

certe Martinus Lipsius margini suo affcripserat σύνθημα; id tessera illa Ammiano. *encomon* igitur tesseram circa humerum positam forte signat.

Pag. 157. Varro de R. R. *Palaeſtra aprorum & caprearum*. Martiali *aper palaeſtrita*. vide & ride commentum. An hinc *Valais*; *Vlais*, id est caro: ut *palaeſtra* locus sit, ubi animantes terrestres quadrupedes faginantur, & redduntur carnosae: ut piscina piscium, cui palaeſtram Cicero coniungit, ut sic loca piscium & carnosorum animalium distinguat. hinc *aper palaeſtrita*, id est carnosus, torosus. Sane *p* tam Graecum, quam Latinum in *v* mutari nostro idiomate, mille facile exemplis probavero. sic a πῦρ, *vuer*, a piscis, *visch*.

Pag. 122. *Trifax*. Nobis telum hamatum, quod cum impetu dejicitur, *Dryhaeck*. Quaquam enim Festus dicat, telum trium cubitorum, late forte cubitum accipit pro passu Pliniano, i. e. *vaem*, *vadem* i. e. extensione brachiorum. Caesar certe & Athenaeus decem vel duodecim cubitorum faciunt, qui proprie capiunt cubitum, & in tres passus eorum deductio incidit. An igitur Ennius telum trifax q. *drie-vaem*? certe produxit *trifāci*, ut non videatur a face deduci.

Pag. 148 Viginti Plaustra *coriis* ac minoribus sagittis onusta. an *corytis*.

Pag. 162. *Rotabant circa caput, & vires ita dabant*] L. 1. Reg. c. 25. v. 29. rotatio & impetus conjuncta. Porro anima inimicorum tuorum rotabitur in impetu & circulo fundae. Ita Hieron. Hebraei, in palma fundae, Graeci ὁ μέσω σφενδόνης loculamentum lapidis intelligentes, quod rotundum.

Ibid. *Terra fundae similis*] an quia forma ovali? Anselmus in laude Virginitatis de caelo: *quam* (creaturam rationalem) *teres vertigo caeli ad modum rotantis fundibuli circumgirat*.

Pag. 176. Leo Imp. (*Virutta quae Rhiptaria dicuntur*) an *Rbutaria*, *Rhuyting* Flandris telum simile. sed erro: Excerpta post Constantinum Porphyrogenitum βῆρρύται, ῥιπτάρια. credo intelligi ejectamenta & sordes, quae e castris projiciebantur. Hinc forte porcorum proprium *verrueten*, *vrueten*, sordes scrutari.

Ibid. *Gaesum*. Sibylla γαισός. & Statio *gaessa*, unde fecere *gesta*. Servius virilem hastam exponit; an q. γαί υἱός. ut Gajus Gajam dicunt.

Pag. 179. Herodian. 11. Μαζολία, an non *Javelyn*? Illyricis tribuit. & sane alia multa sunt verba Illyrica, quae nostratia.

Pag. 174. Leo Imp. *Mastriobarbalum*. Excerpta post Constantinum Porphyrog. *Marzomabulon* dicebatur, quod nunc *Saliba*. an pro, σιλιβάσα, id est τῇ θαλάσῃ ἀπελθῶσα, id est, purgamenta quae ad mare deferebantur per fluvium. credo me sic in Favorino olim legisse.

Pag. 180. *Cateia*, Irenicus l. 4. Exegeſeos Germanum scutum facit. addit testimonium ex xx. l. Sid. Apoll.

*Quondam fraete subis Cimber, clypeisque gravatus
Ante manus solitas jussi portare cateias.*

sed quis ille xx. liber Sidonii.

Pag. 197. Ammian. l. xxvii. Sagitta est *cannea* inter spiculum & arundinem

nem multifido ferro coagmentata. an *caucea*? *caucus* Bedae poculum ferreum ventrosum, ut hîc sagitta cannea describitur. non enim capio quo modo dicatur canna inter arundinem & spiculum, nisi cannam majorem arundine intelligat. sed tu ipse censes ferrum excavari, cum (*quod*) loco (*quae*) substituis, & ad spiculum refers. *caucus*, *caucalium*, *baucalium* eadem. Nescio an sic in Apulejo legendum. *Inter orci caucos adhaesisti.* pro (*cancros*) ut ad urnam Aeaci alludat, cui sortes & nomina demortuorum imposita. Et plures videntur urnae fuisse. hinc Aldelmus in Joanne. *Gemina damnatus urna.* hinc & Orcivus thesaurus Naevio.

Pag. 205. *Funibus chalant.*] Vincent. in Speculo Doctrinali, *funibus calant.*

Pag. 149. *Directae trabes*] Recte in longum positae. sic Plautus Curculione.

Glypeatus elephantum ubi machaera dirigit.

Capio enim, in latum vel longum transfodit, id est, *rygen aen 't sweert.* sic forte Plinio recta unguolata tunica, id est, discissa & annulis astricta. sic *Regia.* nisi utrumque malis a Graeco, scribendumque *Rhecta*, *Rhegia.* Scio quid Festus sentiat in Recta, & Regillo. nec forte dissentit. in hoc forte omen novae nuptiae, & liberis in togis virilibus. An simile quid in nuptiis nostris mansit? nam primo a nuptiis die, divisam introrsum tunicam induunt novae nuptiae. Nescio an *Zebillie* pro *Zobiellie* huc alludat.

Pag. 20. *Mangana*] technas impeditas & invias Hispani *magañas* vocant. voce Graeca.

Pag. 21. Deut. xx. Hîc nostri recentiores cum Rabbiniis negarent proprie de machinis Mosem loqui, nam vertunt, *munitionem* aut *propugnaculum*: & videntur favere LXX. qui; *χαράκων ἐπὶ τῷ πύλιν.* Vallum ergo, dicat aliquis, non machinas. Sed evolvi facile. Vallum a LXX. vocari machinas omnes, quibus arctatur & cingitur urbs; quo in numero, vineae, turres &c. Rabbini vero illi falluntur ut solent. iisdem nos consonantibus *Metzer*, galli paulo aliter *Masson*, hinc etiam Latinis *Maceria*. MATZOR מַצּוֹר a TZUR (si non ipsum radix) non obsidionem primario, sed quod angustat & stringit atque coarctat, significat: & inde ad obsidionem traducitur. An non hoc de turribus & similibus machinis intelligitur aptissime. stat etiam pro nostra versione Paraphr. Chaldaeus, cujus verba idem sonant. stat Josephus lib. 4. cap. ult. qui, *ἐν πόλιν μηχανημάτων.* stat Vatablus Hebraicae linguae callentissimus, qui; *machinas obsidionales.* Maneat ergo penes Judaeos origo machinarum: nec pro Graecis quis pertendat. fortassis etiam intelligendi, Periclem inter Athenienses primum ab Artemone usum. Verum enimvero (Lipsi) fortassis hoc loco Moseos, noster machinam latissima sumpsit significatione, pro vallo, aggere, & omni instrumento ac munitione obsidendarum urbium: ut vereor ne malivolis locus iste haut satis firmare videatur sententiam tuam, quam in fine quoque capitis repetis. Posterioribus quidem temporibus, ante tamen opinor Peloponnesiacum bellum, clarum suppetit testimonium, sub Ozia Rege (Amulius tunc apud Latinos Rex) cap. 26. lib. 2. Paralip. vers. 15. ubi recentio-

res.

1 Et haec reperimus, sed manu Delrii scripta, ad Lipsium.

res quoque consentiunt, de machinis bellicis istis agi. In Machabaeorum Historia frequens mentio, sed illa tempora posteriora.

Pag. 67. Quaeso (indicari mihi cupio, nam nondum inveni) ubi D. Hieron. *loriculam* vertit: in nostra quidem Deut. 22. *murum tecti per circuitum exstat?* vertit quidem Vatablus *loricam*, & alii recentiores: & vocabulum Hebraicum *מִגְבָּחֶכֶךְ* *Magbachech* significat aliquid arctans & includens. solebant aedes Palaestinarum esse superius planae ad deambulandum & apricandum (solaria vocabant, Hispanis, *solanas*) strata lateribus, vel caemento indurata & nonnihil in marginibus declivia, ut inde aquae defluerent. securitatis ergo, & praetereuntium & inambulantium causa, cingebantur aliquo vel muro, vel alio sepimento aut munimento; non quattuor digitorum altitudinis, ut somniat *Cammius*; sed quattuor circiter pedum, ut inde liceret deambulantibus despicere in plateas; decidere non metuerent. Ex tali solario vidit David, quam vidisse tota vita poenituit. *Cajetanus* dicit *Pectoratas* vocari. *Gader*, h. e. sepimentum *Jarrhius* Judaeus exponit. Chaldaeus Paraphrastes, *תְּיַאכָּה* *theiacha*, quod idem *Jarrhius* docet munimentum significare. Ex quibus colligo & usum hujus familiaris loricae & altitudinem, & materiam, aliquando ex latere vel lapide, aliquando ex vallis vel lignis aliis.

Pag. 70. Quaeso ullumne exemplar vidisti Tibullianum, in quo; *cervos*, & non *nervos* legeretur. nam ante annos viginti sic & ego; & *Guellius*, tantum ex conjectura correximus.

Pag. 111. Tertulliani verba vellem integra posuisses, & simul lucem aliquam illis, quae omisisti verbis, *trabes machina est*; in quibus mihi tenebrae & suspicio de mendo. num *trabs e mach.* aut quid simile.

Pag. 115. In Ammiani verbis vide num male descripseris, *Poliorcetes est oppugnatus*, pro, *nominatus*, aut quid simile.

Pag. 120. In Athenaei loco, bonum, si quod testimonium adderetur, quo *καταπέλαις* de militibus, & non machinis: maxime cum subdatur, de aliis telis.

Pag. 160. Ego vero vix dubito Phoenices ab Hebraeis hoc ut cetera multa accepisse; nam etiam Jobi tempore, qui vel ante Mosem vel ei coevus, & unus ex posteris Esau, funda nota: c. 41. & vel ante tempus Othonichi (juxta Joseph.) vel ipso Judice Israëlitis (secundum *Seder olam*) cum Benjamitae funditores peritissimi Jud. c. 20. quando vix noti Phoenices.

Pag. 180. Noster MS. *teutonas* vocant, puto germanum, h. *teutonicas*. Noster ille idem, *Cajam*, non, *cavam*: & dixerit ille idem scriptor corrupte *Cajam* pro *Catejam*; vel cum abbreviate scriptum esset, Isidorus legerit; *Cajam* errore, quod *Catejam* legendum.

Pag. 184. Fallere Graecos, & quod solent, veros non esse, nihil ambigo. qui jam inde ab Ismaële Abrahae filio Sagittariam duco. Gen. 21. post & ab Esau Jacobi filio, Gen. 27. Confirmat quod Hebraea d. c. 21. multiplicis sunt significationis; significantia inter cetera, Oleast. *multiplicantem arcus*, vel Vatabl. *peritum*, sive Hamer. *magistrum arcus*: quae ad inventionem non male deflectantur. Ipsum quoque nomen *Schutter*, ab Hebraeo aperte ducitur, quibus arcus *מִגְבָּחֶכֶךְ*

chesbeth, a sono: inde *geschut*. Hoc malo, cum Hebraea sit prima & matrix linguarum ceterarum.

Pag. 198. In emendatione Hesychii: vide ne de asbesto aut simili specie lapidis egerit.

EPISTOLA DCCCXXXI.

SEBASTIANUS MACCIUS DURANTINUS

J. Lipsio.

Lovanium.

ILLustre, & peracre ingenium tuum ego semper sum admiratus, teque ipsum, tuasque animi dotes, egregias profecto, & singulares, omnibus verborum ornamentis pro mea in te, mihi quidem minime notum, sed cognitum, ac perspectum, observantia profectus fui; non enim solum jugem de tuis virtutibus doctissimorum virorum praedicationem ubique gentium audiui, sed etiam multitudo, & copia librorum, qui jam abs te in omnium hominum utilitatem editi sunt, aperte testatur, te verum esse bonarum literarum columnen, & restauratorem. Expectabam profecto annis superioribus, ut Bononiam, quo fueras accersitus, non sine maxima tui ipsius laude, & gloria, te conferres, ut, quam tibi absenti debebam, debeoque in praesentia, observationem, ac reverentiam, praesenti maxima cum animi mei voluptate exhiberem. Sed casu, nescio quo, factum fuit, ut nolueris venire, deterritus, credo, tam longo itineris intervallo; hoc enim uno literarum professoribus nihil est molestius. Quamobrem, quâ possum hoc tempore meum in te animum ostendere? Te diligo equidem. Imo, ut verius dicam amo. Sed quo amore, cum nulla mihi tecum propter interpositos montes possit esse familiaritas? Observo etiam; sic enim est dicendum de eo amoris vinculo, quo peritissimi literarum professores complectuntur. Sed esset hoc etiam parum, nisi quoque te colerem ex animo. Atque, ut hanc meam erga te voluntatem aliquo significationis genere declararem, decreveram ad te mittere *Soteridem* meam, opus versibus confectum, ac typis impressum, de humani generis Redemptione, in quo etiam reliquas omnes Christi actiones, Episodice tamen, recensui, ut res ejus gestae omnes, & vitae totius quasi curriculum tanquam in scena videri, & conspici possent. Sed defuit mihi mittendi facultas; isti enim bibliopolae ex propria consuetudine multa pollicentur, sed nihil unquam faciunt, quod imperantis, & mandantis voluntati satis morem gerat. Si opus ejus-

¹ Respondet Lipsius v. Centur. Misc. Epist. 54.

² *Maccii* hujus laudes post *Nicium Erythraeum* in Pinacoth. pag. 277. ingenti praeconio celebrat *Morhofius* de Patavinitate Livii cap. i. librum scripsisse de bello Asdrubalis didici ex *Naudaei* exercitatione de Sena, quae nunc Thesauri Italiae Tomo vii. est addita, ubi diligentiam singularem in explorandis locis Piceni & describendis commendat pag. 8. & 28. & aliis in locis: prodiit Venetiis 1613. in omni scientiarum genere fuisse eruditum & exercitatum adfirmat *Erythraeus*. Vitam *Maccii* celebrasse *P. Gibelinum* refert *Konigius* in Biblioth. pag. 491.

ejusmodi in manus tuas perveniret, existimarem non esse injucundum cum propter Christianam pietatem, quam profiteris, tum etiam propter ordinem, & methodum, quae a me in eo pangendo servata est; volui enim, quamvis hoc jam ab omnibus orbis terrarum hominibus judicatum esset fieri non posse, Christi redemptoris actiones poëticis numeris describere, nihil tamen discedens ab Aristotelicis de Poëtica facultate praeceptis. Atque id, ut doctissimi homines (absit verbo invidia) mihi persaepe significarunt, ad amissum factum, servatumque a me est. Quin etiam *Soteris* eadem in compluribus locis, & gymnasiis publice ab interpretibus, & magistris sacrae Theologiae, artiumque liberalium professoribus declaratur. Si me docebis, quam debeam inire rationem, ut ad te mittatur, nulla a me interponetur mora, quo minus hoc aere alieno gravissimo me quamprimam eximam. Nonnulla etiam alia historice conscripta paucis ab hinc diebus a me prodentur in vulgus, quae etiam curabo celeriter ad te perferenda; utarque ea mittendi facultate, quam tu ipse mihi offeres in praesentia. De te cum *Felice Paciotto*, Philosopho acutissimo, & cum *Baptista Guarino*, equite, ac Poëta celeberrimo, sermones habeo creberimos; cupimusque omnes, ego vero in primis, ut unam vultus tui effigiem aeneis tabulis impressam, vel peritissimi alicujus viri manu delineatam ad nos mittas, ut eam ipsam, tanquam te praesentem, intueri, & contemplari possimus. Atque, quemadmodum nostrae bibliothecae, unaque in primis bibliotheca Serenissimi *Francisci Mariae Ruverei* Urbinatium Metaurensum Principis, praeter aliam innumeram, ac prope infinitam librorum, eorumque praestantissimorum, supellectilem, exornatae sunt tuis insignibus literarum monumentis, ita etiam hoc uno decorentur tuae imaginis splendore. Erit hoc nobis ingentissimi beneficii loco. *Franciscus* vero *Maria*, *Sancti Angeli Comes*, intimus familiaris ejusdem Principis, quam saepe mecum de te loquatur, testis sum ego ipse, & coeteri, qui nos de te loquentes quotidie audiunt. Te mirum in modum amat, ac nomen tuum veneratur. Novissime ad nos delatus est tuus ille *Seneca*, in vitam prorsus abs te revocatus. Quam vero elegans, quam doctus, quamque eruditus existat, tibi etiam ab aliis significatum existimo; ego enim eum admiror, & ex tuis eruditissimis praeceptis disciplinae Stoicae, ut politioris elegantiae, miro teneor desiderio. Propter hoc cumulus etiam aliquis accessit ad meum in te amorem, si tamen aliqua in parte ille augeri potuit. Perge, vir doctissime, atque alia in dies ede tui ingenii monumenta, ut unus omnibus semper profuisse videare. Tuus ille *Cornelius Tacitus*, nunquam satis commendatus, ab eodem Serenissimo Principe, tam docto, & perito, quam benigno, & perhumano, nunquam de manibus poni consuevit. Tot enim, tantaque abs te uno animadversa sunt, quot nunquam viderunt omnium hominum oculi. Te hominem dicit coelitus missum ad bonarum literarum studia in lucem reducenda. Ejus vero testimonium non floci faciendum est: non solum enim est omni liberali doctrina politissimus, sed etiam miris modis philosophicas, theologicasque rationes profitetur. Habet etiam in sua Aula peritissimorum familiarium catervas. Iis autem ita circumse-

ptus

ptus inambulatur, ut omnes omnium aures ex ejus ore pendere videantur. O utinam illum posses noscere, posses intueri, posses alloqui; semel enim cum tantum conspectum nunquam dimitteres. Sed haec, multaue alia, quae in praesentia consulto omitto, universo terrarum orbi nota sunt. Quapropter tu hanc meam excipe erga te, resque tuas omnes propensissimam voluntatem, atque me ama, ut meum erga te studium in dies expromere cumulatus possim. Vale, Pisauri VI. MDCIV. Idus Quintilis.

EPISTOLA DCCCXXXII.

J. L I P S I U S

*Olivario Manareo, Sacerdoti Societatis Jesu.**Bruxellas.*

ADmodum Reverende in Christo Pater. Si ad quemquam munusculum hoc mittere, certe ad R. tuam debui, vel a tuo, vel a meo affecta, qui sic volebant. Scio enim quam R. tua, & pleraque omnis Societas affecta sit in hanc DIVAM, scio & benevolentiam, qua me dignatur prosequi; itaque & ego vicem reddere provocor, & quod munus includit, cum licet, rebus testari. Facio, mi Pater, si non in magna re, tamen sacra: & rogo uti ab hoc aspectu ames, & me, qui sum censeas, id est, planissime tuum. DEUM & DIVAM oro tueri longum & firmare R. tuam & rempub. erigere lapsantem. Lovanii. postrid. Id. Sextil. ciciociiii.

J. Lipsius.

Unum hoc seorsim R. P. scribo. Intellixisse me a P. Rectore, itemque ex literis R. V. ad P. *Leonardum* meum, agi de titulo *Consilarii status*: quem ve reor invidiosum apud quosdam fore, & ego minore profecto contentus esse possum & debeo, ac sufficiat simplex, *Consilarii S. Celsitudinis*, qui solet etiam Quaestoribus & aliis dari. Nam rogo, R. V. animum interiore meum norit, non ambio titulos: neque vel minimum cupiam, nisi ex dignitate ipsa studiorum & doctrinae videretur, non censeretur in grege, quibus Deus aliquid praeter ceteras in iis dedisset. Ego hinc in publicis confectibus agmen Professorum soleo claudere, quod exteri, si qui veniunt, mirantur, & quidam eorum, qui me solo Doctoris titulo praecedunt, inter auditores meos fuerunt. Quid facio? ambituunculam meam detego: sed merito, apud medicum. velim totum meum pectus videas, & fenestram ei Prometheus (veteri voto) indidisset. Vale R. P.

EPISTOLA DCCCXXXIII.

J. L I P S I U S

*Olivario Manareo.**Bruxellam.*

Reverende in Christo Pater, & semper mihi venerande. Accepi literas, quibus amanter, prudenter, pie me hortaris, ut scriptionem suscipiam & exsequar miraculorum, quae Beatissima Virgo in vicinia vestra, Colle aspero, assidue patrat. Quid ego tibi petenti (meo animo jubenti) aliud abnuam, mi Pater? nedum ut istud, quo religio & ipse affectus meus me vocant. Corde colo, & afficior erga hanc Divam: & utinam possim in honorem ejus, quae velim! potero autem illa adspirante, & te R. P. precibus tuis auxiliante. sed audi, quae me morata sint, aut morentur. Primum Antistes Antverpiensis hoc operis susceperat: & ipse mihi scriptum suum ostendit, & reliquit dispiciendum. Alieno labori haud libens intercedam, neque pudorem meum decet, praesertim talis illius viri. Accessit denique propria mea occupatio, quia nunc *Seneram* totum edo, itemque *Monita & Exempla Politica*: in quibus vel corrigendis vel alibi augendis, ut fit, sic occupor, ut aegre ad aliam curam me donem. Quid? quod valetudo me abjicit? & hanc aestatem sic infestam habui, ut aegre aut vix fuerim corpusculo sustinendo. Tamen sepono omnia, te suadente & animante, nihil obduco: moram tantum brevem postulo; quae & coepta illa profligem, & vires ac spiritus recipiam ab aegrimonia imminutas. Tum vela pandam, & in aequor me dabo. proveho autem, & juvabis, o pater, (supplex peto) sacris precibus tuis, & (si ausim addere) tuorum. DEUS & DIVA R. V. incolumem diu, & pro bonorum votis praestent. Lovan. III. Kal. Octobr. ciciociv.

EPISTOLA DCCCXXXIV.

J. L I P S I U S

*Olivario Manareo.**Bruxellam.*

Admodum Reverende in Christo Pater. Diutius imperare animo & affectui non possum, quin erumpat in gratias, & benivolentiam hanc tam insignem, imo beneficentiam, non illo solum inclusam gestem (quod semper erit) sed verbis etiam & stilo isto prodam. Debeo mi Pater, debeo, & quis parens magis amanter, magis sollicite, de filio cogitet, atque agat? Accipio beneficium, quomodocumque res cadet, & hoc testimonium tuum & de me iudicium, pluris facio, quam quidquid a Principe potest obvenire. Nihil hic blande, sed rem dico. Ceterum de ipsa re, nihil equidem habeo, quod suggerere prudentiae tuae possim: nisi (quod scio illam facere) cogitet de vale-

Tom. II.

X

tm.

tudine mea hac tenui semper & incerta, nec posse eam ad res ullas civiles aut actiones utiliter admoventi. Scit R. V. genus vitae meae a puero, ad has aevi metas, semper quieti & tranquillitati, & uno verbo, Studiis consecratum: rogo ut in eo finire mihi fas, nec senem, sine usu rerum, & levi auditione vel lectione tantum earum gnarum, quocumque colore ad illas mitti. Crede mihi de me, mi Pater: non subsistam, & clitellae bovi impositae rideantur. At eadem illa aetas, & valetudo, post annorum triginta sex continuas scriptiones aut lectiones, quietem aliquam & ferias non injuria sibi poscit, & ab optimi Principis benignitate sperat. Atque id sine publico detrimento, aut Acadēmiaē noxa futurum, audacter spondeo. quia neque totus desinam, & per intervalla etiam legere potero; & idoneum aliquem successorem (qui nunc prae manu est) reperiam, quem ipse paullatim dirigam, instituam, & formabo. Cui rei magno impendio opus non erit: nam quadringenti floreni si a Serenissimo nostro impetrantur, suffecturos in me recipio; & ipse in veteri honorario meo acquiesco. Illud ipsum temporis, aut aevi, quod mihi reliquum erit, lectionibus ereptum, stilo (si Deus volet) impertiar, & plane otiosum otium meum non habebo, nec indoles aut natura mea patiatur. Plura brevi cum R. V. agam, & una cum Monitis & Exemplis Politicis Bruxellam veniam, quae Principi nostro inscripta ipse, de tuo consilio, sum oblaturus. Interea gratias, quas dixi, repeto: nec dies ex animo avellet, vel ille extremus etiam, si boni sensus & virtutes post mortem perseverant. Deum rogo, diuturnum te Ecclesiae, & bonis omnibus, bono omnium effe. Vale, Reverende in Christo Pater. Lovanii, v. Kal. Febr. ∞. 1565.

Divā Sichemienis tua (nam te auctore suscepta est) ad Antistitem Mechliniensem ivit, a nostro censore approbata.

EPISTOLA DCCCXXXV.

D. FRANCISCUS QUEVEDO

J. Lipsio.

Lovanium.

Dii tibi dent annos: a te nam caetera sumes.

Phoenix aetatis famam adhuc velem, & pietatem tuam cognoscere: & ideo has tibi litteras mitto, quibus nil, praeter candidum amorem, niveamque sollicitudinem polliceor. Lipsius es, lynceus: lippus sum. Igni Vestalium lucem attulisti, vidi, vidi, tuum solem agnovi. Fuerunt (ut ais) qui libarunt, & ego Hispanos vespertilioes vidi volantes per umbram, & opus inane foris, plenum typis parabant; castos, non doctos illos appellares. Virgines enim, quas prae manibus habebant, intactas reliquerunt. Quapropter toto corde de Vestalibus scribere decrevi. Virgines tetigi non profanus, sed studiosus. Dicebam cum Eliu, *Junior sum tempore, vos autem antiquiores: idcirco demisso capite veritus sum vobis indicare sententiam meam: Sperabam quod aetas*

pro-

prolixior loqueretur, & annorum multitudo doceret sapientiam. Sed ut video spiritus est in hominibus, & inspiratio Omnipotentis dat intelligentiam. Non sunt longaevi sapientes, nec senes intelligunt iudicium. ideo dicam audite me. Cecidit spiritus ille tuo docto Syntagmate, cecidit, sed adhuc non ut antea de Vesta, de numero Virginum, de poena, vel praemio, de igni, de templo, (tu haec exactissime) de subtili quaestione agere institui. Quidquid scribam, dubia manu, suspensa mente scribam. mittam, corriges amicissime, ac de tua valetudine certiore facies. Vale nostri memor. Pinciae, & Septembris. 4. Anno. 1604. Arnobii nodum (meo videri) sic solvo. 2. advers. Gent. *Idemtidem in alios mores, ac ritus priorum condemnatione transisse* — Addis tu, mi Lipsi, Tum adiungit, & astringit. *Nunquid magistratus per populum creatis? In potestatibus obeundis leges conservatis annarias? In penetralibus Vestae ignis perpetuos servatis focos?* Quas omnes interrogationes negandi mente suscipi palam dicis. Concedo, sed non absolute, sed his exceptionibus. Non negat Arnobius creari magistratus, sed per populum creari. non negat conservari leges annarias, sed conservari in potestatibus obeundis. non negat perpetuos servari focos, sed servari in penetralibus Vestae. Idque roboratur ipsismet Arnobii verbis cum lib. iv. ait; *sedent in spectaculis publicis sacerdotum omnium, magistratuumque collegia; necnon & castae nutrices, & conservatores ignis perpetui Virgines.* Amissam Arnobius flet religionem, omnia enim nimia licentia profanari conqueritur. Quod non repugnat dictis, quia idem est ac si diceret. Jam Virgines non antiqua religione celantur; sedent in spectaculis, non propriis in locis. idem de sacerdotum collegiis. Rescribes pro tua humanitate. & de nodo candidum, vel nigrum calculum amo. Iterum vale: Manu aliena, nam propria lango.

Respondet ad hanc Lipsius v. Centur. Misc. Epist. 55. Francisci vero de Quevedo Villegas (hunc enim nostrum esse puto,) vitam, eruditionem & fata describit Nic. Antonius in Biblioth. scriptor. Hispan. recentiorum tom. 1. pag. 352.

EPISTOLA DCCCXXXVI.

D. FRANCISCUS QUEVEDO

J. Lipsio S. D.

Lovanium.

AD incitas usque (ut ajunt) fui redactus, deficiebam: sed tuae literae mihi pro Esculapio fuere. Vivo, sed valetudinarius, & salute missa a Lipsio, salutem amissam adeptus. *Pallentes* (ut ait ille) *morbos* excutio. Nunc verbis virtutem inesse credo, non a Magia, sed a tua doctrina: & ideo quae olim scripsisti lego. Quae scribis opto pro futuris laboribus tibi a Deo vitam, & ab illis mihi. Vestam tuam denuo illustratam mittas rogo. Nulli fas, nisi Lipsio penetralia illa penetrare. Ignita Dea igneum ingenium expectabat. Scribe

X 2

in-

incessanter: tuis laboribus conficis. tibi *monumentum aere perennius*, & non tantum *magna pars tui vitabit Libitinam*, sed Lipsium totum ignorabit Libitina. Seneca noster te totum habet, & non aliter totum Senecam habere possumus. Felix ille, qui tuo labore ante ultimum solem mundi iterum vivus *volitabit per ora virum*. Bellis ferrea vestra tempora videntur, sed tuis scriptis aurata secula emulantur. Credo & Marti, non Minervae facta, sed tu facis. Quid de mea Hispania non querula voce referam? Vos belli praeda estis. Nos otii, & ignorantiae. Ibi miles noster, opesque consumuntur. Hic nos consumimur: & defunt qui verba faciant, non qui dent. Viduo pede ambulant melioris notae viri: sed solamur. Διὸς μεγαλοῖο ἐκζη. Politicas tuas maternae linguae dedit D.² Bernardinus a Mendoca, caecus ille Tiresias, Argos ille caecus. Feliciter spero, sed magis opto. Concessit naturae vir ille: cujus monitu patrio sermone (id fortasse haut maturo consilio) injurias Homero illatas a Scaligero vindicare fuit animus: occasione sumpta a tuis in Vellejum notis. Fave. Mihi numen est. *Votisque assuesce vocari*. Vale nostri memor. Pintiae. 22. Novem. ann. 1604.

Sed eus amice, quid tibi videtur de his Lucani carminibus in. vi. vs. 712.

Janitor & sedis laxae, qui viscera saevo.

Spargis nostra cani.

Si Cerbero loquitur, ipse *janitor* appellatur. Quis est iste canis, si ipse Cerberus canis est? Janitores enim canes, & canes Janitores vocabantur ab antiquis. Sic Aeschylus in Agamemnone: citatur a Scaligero in suis conjectaneis. Hortensius in suis commentariis sic. De Cerbero loquitur Lucanus, & nihil aliud: si fas corrigere paucis mutatis sic corrigo locum.

Janitor & sedis laxae, qui viscera saevus

Spargis nostra canis.

Et consentaneum videtur dictis: sed non fas, meo videri, & ideo lucem afferro difficultati his verbis Laërtii in vita Pitagorae lib. viii. 31. Porro *Mercurium animarum quaestorem esse, atque ideo deductorem dici janitorem ac terrenum*: & ucuque Laërtius. idem insinuare videtur Lucanus: qua propter meo videri Mercurius Janitor ille est, qui Viscera spargit cani saevo, id est, Cerbero. Suspicio aliquid peculiare includi illis verbis *Viscera nostra*, ad poenam veneficae aniculae. Hanc difficultatem tibi ablegandam censeo, Etruscus mihi Aruspex.³

² Quem describit Nicol. Anton. Biblioth. Hisp. tom. i. pag. 170. ubi & versorum ab illo Politicorum Lipsii meminit.

³ Nescio quid Lipsius responderit. sed posset Lucanus a Cerbero alium canem, ejus comitem, Orthrum distinxisse, quem Silius Italicus, *polluto eviscerare ungue*. dixit lib. xiii. 847. ubi vide quae Heinsius notavit.

EPISTOLA DCCCXXXVII.

J. L I P S I U S

Joanni Viringo Sacerdoti Societatis Jesu.

LEgi, legi libellum, & in eo me, an divam Virginem dicam? stigmatibus compunctam. Nec de me indignatus sum; sed quamquam in morbo (credes hoc mihi) suaviter risi. Quidni ista plebeja, *vernaculorum dicta, sordidum dentem?* Tela levia, quae non me, vix vestem meam tangunt. Et quid repellere ea opus? ego ne possim quidem: neque rei aliquid video, cui insistam. & fac posse: cum scurra aliquo componar? Scribant, scribant: ad gloriam Divae, ad meam etiam facient haec tam vana, tam imbellia. & scommata tolle, quid habes? si audior, nec alteri quidem auctor sum respondendi: neque video fructum. Exspecto e Germania aliquid simile, & litteris monitus sum parari. O securum me reprehensionum, in hoc quidem argumento! & utinam alia scripta mea sic munita! illud stabit, & fida ea tutela defendet. Vale R.P. & solens me ama. Lovanii Postrid. Non. April. ciorciv.

De Joanne Viringo vid. Valer. Andr. Biblioth. Belg. p. 577:

EPISTOLA DCCCXXXVIII.

J. L I P S I U S

Joanni Viringo Societatis Jesu.

SUave de Sannione illo (sic appellavi) Batavo. O homines religiosos, & vere sacros! jam Antverpiae acceperam de transfugio & perjurio. & pudet vel a talibus peti. Nam tangi, absit haec injuria: & tamen ego obiter tetigi, & & reposui aliquid, quod in calce DIVAE ASPRICOLEIS videbis. Forte, et si breve, est & *μεγαληγορία* aliqua nostra apparet: cur non istos? Illum *a lacu* (opinor enim eum esse) vidi, & doctius aliquid affert, & laudes & fraudes in me miscet. Objicit quae in adolescentia dixisse (non enim fecisse aut scripsisse) me dicit: sed dicit. summa est alium tunc me fuisse. Negare fortiter & vere possum: sed itane solis nobis portus poenitentiae non patet, sine crimine levitatis? Illis ad nova ire a veteribus fas est: nobis redire, si leviter defleximus, est inhonestum. Omnia facta aut dicta tueri, non est hominis: sed gaudeo, cum sic abusque unguiculis examinor, non aliam in me calumniam repperiri. Ego & istum, & proles ejus omnes male mulctabo, si Deus aliquis vires mihi donat. adhuc quidem langueo. Tu, vale. V.R. & serio mihi amice. Lovanii VII. Kal. Majas ciorciv.

EPISTOLA DCCCXXXIX.

J. L I P S I U S

Carolo Scribanio.

Ampitheatrum tuum vidi, in quo pro honore veritas depugnat, & illum afferuit, & hac vel factiosorum suffragiis vicit. O raram & doctam manum! o felicem defensum! sit tibi pro meritis Gloria, & non erit, quia e myriade litterionum (ut hodie res sunt) non unus, qui plene pervideat aut aestimet stili tui robora, aut ornamenta. Quam omnia rara, & ex adytis litterarum petita! exhausti oratorum & vatum thesauros, & veteri verbo, flavissas. Quis textus etiam est? non Arachnes omnis soboles tam ingeniosum. Nostra Diva plaudit, sed decore: fortasse & mea scripta, quia valetudo plura inhibet, & manum sistit, ne dedecoret priora. Jure mihi illa cautio est. aliquid tamen Sannioni Batavo reposuimus, uno stili impetu: Fortasse & Gallo (an quem dicam? latet & nondum erui) fortasse inquam, si sanguis & spiritus facient, sine quibus equidem quiesco has partes. At non te amare, mi Pater. Lovanii IIII. Kal. Majas CIOIOCV.

Cur non ita respondit *Scaligero*, & aperte in laudes hujus detestabilis & nugacis Amphitheatri apud eum excurrit? sed alius erat apud *Scaligerum* & *Casaubonum*, alius apud Jesuitas. vid. supr. ad Epist. CCXLVIII. CCCLXV. & IOCLIX.

EPISTOLA DCCCXL.

B A L T H A S A R M O R E T U S

J. Lipsio.

Clarissime ac Doctissime Domine. Folia impressa dumtaxat mitto; nec ulla quae legas aut corrigas. operarius his diebus negligentior fuit, nec potuit aliquid praeparasse in tabellarii hujus discessum. At satis litterarum nunc mitto, ut foliorum vicem legas. quarum unas *Euphrenius* dedit, unas *Buyteweckius* misit; reliquas frater Francfurto cum bono Deo redux attulit. De Auctore Idoli Hallensis, quidquid quaesierit, haud potuit cognovisse. *Gruterus* serio & constanter asseruit se nescire: alium in Germania esse, qui in eadem DIVAM meditaretur; sed nunc omittere. Addebat insuper, etsi Auctorem novisset, malle per alium nobis eum innotescere: *Hyppolitum* enim a *Collibus* inimicum sibi experiri, quod prodiderit ipsum Codicis Mirandulani Auctorem. Interea nos Parisios ad *Sonnium*, in Bataviam ad *Raphelengium*, scripsimus; si forte illic novissent. At parum est de hoc Auctore ignoto. majoris tibi momenti esse opinor, Oratiunculæ Jenensis de duplici Concordia Auctorem a fratre meo in nundinis deprehensum, *Melchiorem Goldastum*, vi-

gin-

ginti septem circiter annorum adolescentem, pauperculum, etsi nobilis haberi velit, ac proinde malis istis fraudibus victum quaeritantem, Jenensium dominorum ac ministrorum assecram, quorum consilio lepidam istam oratiunculam dictarit, ac insuper lucellum ex ejusdem venditione expectarit. nam suis scilicet impensis excudi curarat, & bibliopolae deinde suo nomine vendendam commendarat. Sed operae pretium sit latius explicare, quibus indicis eum frater auctorem cognovit. *Gruterus* ad fratrem primum venit: & quid, inquit, Morete, num Hieroclis Facetias vidisti, Satyricum in eruditos libellum? Nebulo ille *Goldastus* in lucem protulit; & opinamur eundem Auctorem, etsi neget. ille scilicet est, qui Paraenetica vetera nuper edidit cum *Notis Rittershusii*, quas malo furto & abstulerat, atque ipso inscio evulgavit scelesti & hominis impudentissimi fide. imo quod lepidissimum est; sui laudatiunculas admiscuit, *Rittershusio* quasi auctore. Ipso initio Conjecturarum legas: *Palmaria est emendatio Melchioris Goldasti ab Haiminsfeldt, auditoris atque hospitis quondam mei suavissimi*. Ille insuper est, qui Oratiunculam Jenensem falso nomine Lipsii divulgavit. Respondet frater, & simulat se jam ante novisse: Quid? idem ille *Goldastus*, qui de duplici Concordia edidit? Is ipse, inquit. Prima haec actionis scena est. Secedit *Gruterus*, & *Goldastus* cum suo libello prodit. Ecce, inquit, Morete libellum; quem rogo te ad Lipsium curare. Quid? respondet frater, solum libellum? nec ullas Auctor addat litteras? an tanti ei non est Lipsius, ut epistolii laborem impendat? Nomen, inquit, meum infra scribo: *Incomparabili Viro J. Lipsio Goldastus*. idem Paraenetica mea nuper per te ad eundem misi. Itane, subjicit frater. sed dic sodes, an non & tu auctor Orationem de duplici Concordia alias ad Lipsium quasi auctorem misisti? Obstupefcit miser ad haec verba; totus pallet, tremit, & aegra voce vix tandem negat. Tertia jam scena prodit iterum *Gruterus*: *Goldastus* amico cuidam suo questus est, Morete, quod ipsum redarguas & novi libelli & Orationis Jenensis auctorem. at saltem non mei meministi, qui indicassem. Minime, respondet frater. nam de novo libello; nomen suum exemplari ipse subscribit, quod Cl. Lipsio missum desiderat. Miratur *Gruterus*, & per fidem nostram quaeso, exemplar istud servem, quo eum Auctorem convincam, quod haecenus negat; atque aliud Lipsio redde. Permitto, inquit frater, sed ea lege, ne resciscat tibi me ostendisse, tantum te fortuito in taberna deprehendisse. Admitto legem, inquit *Gruterus*. Post haec tandem frater: tanquam indubitato auctorem eum sciret. Sed quae potissimum causa nebulonem impulit, Oratiunculam Jenensem edendi? Nimia improbitas, respondet *Gruterus*, & spes levioris lucelli. Habes Actiunculae hujus finem, Vir Clarissime, atque in eo epistolam hanc finio. Sed & litteras nefarii illius habes. nam quia monuerat eum frater, haud omisit. Vale, Clarissime Domine, invidia omni major. Antverpiae. in Officina Plantiniana x. April. M. DCV.

EPISTOLA DCCCXLI.

JOANNES DECKERIUS

J. Lipsio.

Lovanium.

Amplissime & Clarissime Domine. Extorsit hanc a me epistolam lectio libri vestri Exemplorum; qui diebus proxime praeterlapsis ad manus meas ut pervenit, deponi ante non potuit, quam integre perlegissem. Nulla certe fuit pagina, ex qua non didicerim atque excerperim multa. Ingratus omnino essem, nisi si gratias agerem per epistolam tum meo, tum totius Reipub. literariae nomine; ac singulariter Serenissimi *Caroli* Archiducis: cui quotidie suasu meo (sum enim illi a Confessionibus) ad mensam liber hic vester praelegitur. Legi etiam opusculum illud, quod suppresso Auctoris nomine *Scaliger* non tam contra personam vestram, quam causam totius Ecclesiae & Divae Virginis honorem elucubravit. Et quidem ad ea Personae vestrae quod spectat, neque ego neque quisquam hîc, qui legit, quicquam motus est, vel magnopere digna censet ea, ad quae respondeatur. Illa enim per sese ruunt. Pessimam tamen causam contra honorem Deiparae, non pessime tractavit homo pessimus, quisquis libri Auctor est. Fortasse operae precium esset, & res una a multis hîc desiderata; ut pro appendicula ad divam Hallensem, aliquotusque cultus Dei matris defenderetur. Nam ut hoc factum sit a multis Theologis, qui controversias tractarunt, non tamen stylo illo florido & amaeno, quo amplissima tua Dominatio excellit. Quo fit ut quamplurimis qui nostra legunt, & alia ista nunquam vel minuscule suo attingunt digito, vester hic labor plurimum prodesset. In lectione porro illa exemplorum scrupus unus vel alter mihi adhaesit, quem nunc D. V. A. considerandum vel eximendum proponam. Libro secundo monito 6. pag. 71. miraris ubi mens fuerit Appiano, quando initio operis scripsit, nec Assyriorum, Medorum, Persarum tria regna simul congesta aequare illud spacium aevi potuisse, quod in Romano imperio ad suum illud tempus esset. Falli illud nequicquam dubitas. Eo, quia a Roma condita ad Hadriani, hoc est, Appiani aevum, nongenti circiter anni sunt, quot ipse Appianus numerat. In Assyriis vero mille ducentos, trecentosve annos stetit imperium. Quae omnia rectissime dicuntur, si imperium Assyriorum illud vocemus, quod Ninus in Ninive condidit. Caeterum alia longe videtur mens & probus calculus Appiani. Qui quomodo Strabo libro 1. sic ipse Babylonios & Chaldaeos vocat Assyrios. Herodotus quoque lib. 7. *Assyrii*, inquit, *a Graecis Syri vocabantur, sed a barbaris Assyrii sunt vocati, inter quos Chaldaei sunt*; & libro 1. Babylonem ait esse metropolim Assyriae, & Balthasarem filium Nabuchodonosoris, quem ille vocat Labinitum, quem Cyrus devicit, Regem fuisse ait Assyriae, hoc est, Chaldaee seu Babylonis. Quo etiam modo Xenophon passim, Justinus lib. 1. Clemens Alex. lib. 1. Strom. Euseb.

Euseb. Hieron. Theodoret. Orosius ipsaeque divinae litterae crebro loquuntur. Porro Babylonem expugnavit Cyrus Anno Urbis 224. ducentis Annis praecise antequam Alexander Macedo ad Graecos transtulit Monarchiam. Uti ex Dionysio Halycarnass. & aliis liquet clarissimis historiis. Nullus ergo error in calculo inest Appiani. Siquidem Monarchia Babylonis septuaginta duntaxat annos stetit; attestante id sacra scriptura.

Rursus eodem illo lib. 2. pag. 99. Alexander ille Veles asseritur vilis fuisse quidam e plebe & imaginarius Antiochi filius; qui pacificus Syriae possessor factus in vitia & luxum se effuderit: quemque Demetrius Demetrii inter scorta ac mensas jactatum invaserit, superaverit, trucidaverit; denique qui in imperio annos novem & decem menses exegerit. Auctorem istius historiae & chronologiae lubens noscerem: Pugnat enim cum divinis libris 1. Machabaeorum cap. 10. vs. 1. 20 & 50. ubi diserte asseritur hic Alexander fuisse filius Antiochi Epiphanis, & coepisse regnare anno Graecorum 160. quo & Jonatham constituit summum Pontificem, & cum illo foedus icit. Anno autem Graecorum 165, quinto anno regni sui occisus est in Arabia a Zabdiel Arabe. Ibidem cap. 10. vs. 67. & cap. 11. vs. 16. Scio quid de illo scribant Appianus, Eusebius, Justinus, Orosius, Sulpicius & Marianus Scotus, qui omnes cum scriptura pugnant, ex qua corrigendi sunt; plerique etiam inter se dissident.

Leviculum etiam est illud ex lib. 2. pag. 68. ubi Nimrod pronepos Noë ille esse dicitur, quem profanae litterae ad primorem syllabam allusione Ninum appellant. Scio id ante visum *Gerardo Mercatori* in Chronico, & multo ante Clementi Rom. lib. 4. recognition. Caeterum obstat ratio Temporis & auctoritas historicorum. Nimrod enim conditor fuit Turris Babylonicae anno post diluvium 131. Porro Abraham aliquot saltem centenis annis est natus post diluvium, Anno fere 42 vel 43. Nini: uti ex Josepho, Eusebio, Hieron. Augustino, Orosio & aliis quamplurimis proclive est demonstratu. Sola haec tria mihi occurrerunt: Potest fieri ut mihi aliud videatur quam veritas habet, nec tamen aliud a me fiat, quam caritas habet. Amicissimam proinde reprehensionem gratissimo accipiam animo, simulque & benevolentiam agnoscam tuam & culpam meam si me corrigas: Et quantum dominus dabit in uno gratus, & in alio inveniar emendatus. His finem facio: de rebus, quae hinc geruntur & nuptiis Serenissimae Constantiae, aliquid hinc attexet R. P. noster Rector. Vale in Christo, vir amplissime, Graeci 1. Septemb. 1605.

De *Deckerio* vide supra ad Epist. DXXV. & DCLIX.

EPISTOLA DCCCXLII.

J. L I P S I U S

Francisco Vellerio S. optat.

UBi es, mi Velleri? quid fecisti? a quibus, ad quos ivisti? O meum dolorem! florebas ut laetum germen inter tuos: quis turbo subitus evertit? si error, fraus, impetus est, redi, agnosce, resipisce. Portus ille poenitentiae semper patet, & Pharos divinae bonitatis allucet. Ah redi, sacra majorum cogita, sacramenti tui Religionem. Et noli ad minutas disputatiunculas ire: hinc ecclesia est, hinc successio, hinc consensus, quae frustra alibi quaeras. Quid addam, si etiam virtutem & probitatem alibi requires, illam veram & sine fuko. Repete memoria, quae legisti, quae audivisti: non conquiescet animus, & interior meliorque ratio dicet, quid feci? cur feci? me vide, qui aetatem, & usum habeo, & doctrinam aliquam, ac prudentiam, nec hostes detrectabunt. Me, inquam, vide: Trepidavi & ego aliquid in adolescentia: & mecum magna ingenia, nihilque novum, aut mirandum est in tot procellis: sed grandior firmavi pedem, & in Religione majorum consto, e qua nec mors depellet. Errare liceat, redire libeat, & poenitentiam, quam aeternam poenam malle. Examina illud aeternum, rem factam habes, & iterum es noster. O quam te amplectar? quam etiam tui! nec timenda propone, quae mali, aut malus ille fingunt. Ego spero, & rogo: Et quocunque loco es, erisque, te amo, atque utinam sine exceptione possim! Vale, & hanc epistolam uni tibi scriptam scito, nec malo more divulga. Lovanii v. Idus Septembris ciorocv.

De hoc *Francisco Villerio*, Monacho Franciscano, sed qui relicto Monasterio transiit ad puriora sacra, agit *Casparus Diemenus* in Epist. 852. ad Lipsium.

EPISTOLA DCCCXLIII.

F R A N C I S C U S V I L L E R I U S

*J. Lipsio suo S. D.**Lovanium.*

EGo tui candoris vera jampridem habeo documenta, certam amicitiam in re incerta, & applaudentem Famam inter exsibilantium voces. Candom rem exosculor istiusce modi: & siquid in Religione consulis, plus hinc adferat auctoritatis, quam loquacitas aliorum. Praeterea de judicio tuo non aliter judicem, quam Naturam fuisse tibi parentem, non novercam. Laborem denique tuae lectionis fateor etiam admirari. sed quantum haec differat a scientia, te quoque scire nullus ambigo. Utut est, eum ego te censeo, qui ratiocinari possis, siquis alius. Quod ais igitur Ecclesiam a te stare aut consensum, rem nihil attinere putavero. Rationes quam testes malim. Homo natus est intel-

legere, non credere, nisi mancipium hunc esse voles ignorantiae. Si credant omnes, investigandus est, cui credas. Ad intellectum revolveris, aut opinionem. hoc mehercules est errare: illud non jam credere, sed scire. At longius non evagabor. Quid est Deus? Vis, qua res nascuntur & moventur. Naturam liceat tua pace nominare. Quid homo? Naturae foetus, omnium animantium princeps, qui parentem colat, homines tueatur, aliis imperitet. Habes ecce Religionem, sive nomen hoc aptius, Virtutem. Virtus est immortalitas, Virtus aeternum illud, quod nobis occidit, Virtus bonorum finis, Virtus pietas aut officium, quod ab homine Natura poscit. Haec in animo sedem fixit, non in veste; mentis incolit penetrabile, non ordinum istorum superficiem. Omnia assunt bona, quem penes est Virtus; sed bona, non blandientis lenocinia Fortunae. Quem commendat Virtus, Natura probat, amant homines, verentur omnia. Is generosa Naturae proles, amicus hominum, omnium imperator. Qui contra vitio mancipatur, gerit Nemesein in tergo. Quid mihi *Sedulius* caudas draconum somniat, & Inferorum nescio quae monstra? Mali circumferunt monstrorum Lernam ignorantiam. huic Fortuna comes est. Satis Inferorum, ubi istae dominantur. Nihil praesens stulto placuit; dependet a futuris: numquam imbibet fugientis aquas. Ut quisque malus sive stultus est, ita vel adversis opprimitur, vel secundis illuditur, non est periculum, ne vexari desinat. Scientia virtutem, haec vitam beatam parit. Inscentia vitium, hoc miseram mortem gignit. Quid mirum? Homo differt ab animantibus intellectu, homo destinatur ad scientiam. Officii meminit? Beatus est, & hominis adeptus dignitatem. Neglegit? Miser est, & degeneravit in beluae vilitatem. Quid alia cottidie comminiscimur? Non videmus alborum nivis? Non haec talia sentimus, quidquid reclamet opinio? Spem & Metum damnarunt Sophi. bene. Nihil his enim cum sapiente commercii. Stulti sunt, Lipsi, stulti, qui Religiones ex his conflatas humani potius ingenii, quam impetus esse beluini credunt. Nisi puerilia spectra metuas, nisi pupas blandiores expectes, malus eris? Imo malus es, nisi desinis sic insanire. Bono quidem & sapienti tranquillitatem peperit intellectus: malo autem atque stulto fluctuationem ignorantia. Religionis medulla Probitas. Ut major strepitus offis vacui, quam pleni; sic loquacior ea Religio, quam opinionis ventus inanem fecit. Firmior est Virtutis basis, quam ut argutiis fulciri debeat: altior ejusdem apex, quam ut pertingant logorum fumi. Et simulacrorum vultus, & Divorum pompa, & suppliciorum istorum minae, & funes, & cuculli nihil sunt aliud, quam glaucoma, quod imponat imperitis. Hic superstitionis velut fulgor, qui perstringat aciem intuentium. Omnia Natura docet: apage aniles fabulas. Quid hominem corruptum blatiunt? Naturae lege perfici res omnes volunt. accidit, ut quid impediatur: ea quoque lex Naturae, ut opponat quaeque suas vires, tamque valeat, quam restiterit. Homo suam quaerit temperationem qualitatum. haec modum excessit? Natura clamat, uti morbum Virtute corrigas: nec hoc adscribendum Naturae fuit, sed obstaculo. Pueri monasterio nos addiximus: laudat Superstitio, Natura cul-

pat. Obedientia ligat intellectum, ut nihil intellegat, sed credat. Castitas aliam generationem tollit, qua Natura hominem aeternat ac animantes. Paupertas aut opulentis relinquit opes, aut eripit opem inopibus, desidium quidem ac inertiam pestem animorum adfert. Arbitraris es, Lipsi, Superstitionis & Naturae. Jam uxorem duxi: haec amare, illa jubet execrari. Quid censes? Non me beluam fore, si cervicem indam Superstitionis jugo? Ecce tuum Villerium, mi Lipsi. Nos haec sentimus, alii fabulantur, nec mentem hanc ipsa mors immutabit. Sum veri studiosus, verum amplectar, donec homo. Siquid verius habes, cedo; erit gratia. Mi Lipsi, aeternum mihi salve.

Quam autem nihil aries AETERNI tui laedat, mecum ratione parumper putata. Nego Mortalem Aeternum illud mereri posse. Praeterea caelorum naturam quinctam animus seu ejusdem, seu alterius naturae capit: magis igitur terram. Quae cum sit pervia, regiones Acherunticas nemo vidit. Ad haec nusquam major elementi perfectio, quam in centro: ergo terrae centro nec densius quidquam, nec frigidius esse debet. Haec autem ignis loca credideris, quo nec subtilius aliud, nec calidius? Si nunc ignis agit, aut vincere, aut vinci necesse est: nihil igitur hinc aeternum. Nam nec aeternum alere, nisi infinitum, nec infinitum laedi potest. Omnis passio mortis initium est. Postremum & quae pereunt, & quae permanent, redeunt unde sunt exorta: nec aliter immortalitas aut continuatio fingi potest. Ergo non ante statuamus, animos aeternum apud Inferos puniri, quam sciverimus indidem ortos esse. Expecto, mi Lipsi, quid respondeas. Nam hoc aevum unum te agnoscit, cui pateant haec arcana. Et is mihi semper visus es, qui sapientiam magis probes, quam loquentiam. Quidam Dii haberi volunt, si quod alius scripsit, aut meminert aut imitentur. Hos ego despicio, te suspicio, mi Amice. 1606.

EPISTOLA DCCCXLIV.

J. L I P S I U S

*Florentio vander Hario Canonorum Thesaurario.**Insulas.*

NEque has quidem literas tuas sine responso deponere volo, neque debeo. Et amor tuus, vel meus, ita poscit. Verèris, ut legatus Regius in solutum accipiat excusationem de valetudine: At ego spero, si humanitatem ejus novi. & vera sane excusatio est, neque de colore aut fuco sumit. Si coram me videas, quam sim fili, ut sic dicam, tenuis & fragilis: ipse dissuadeas commoveri, & quietem ac mansionem domi probes. Amò alioqui & veneror illum virum, & paucos tales, an multos dicam? Hispania nobis dedit. De silentio meo ad libellos istos pugnatorios, probari tibi consilium gaudeo: quid probari? ipso praeivisti. Et vere & prudenter scribis, controversiam non de religione, sed de re mea aut persona fere: & nihil hinc fructus praeter lites & reciprocationem expectari. Sane me taedet & piget, cum acria ejusmodi & odio-

odiosa scripta video, aliena non ab eruditis solum, sed ab hominibus, qui vere illud nomen habent. Ubi, non dicam Christiana caritas, sed modestia, sed pudor est? Mea vero manus torpeat, & calamus conteratur potius, quam ut ad hos usus moveatur, aut se impendat. Didici amare omne humanum genus, bona iis exoptare, & si aberrent aut cadant, derigere vel allevare qua possum, & certe non insultare. Errores odi, miseror erroneos. de repub. quod scribam non habeo. nisi valde me illud tuum probare, *vive tibi, moriere tibi*. cui Tertulliani hoc consonat, *nemo alteri vivit, qui moritur sibi*. Et quid in curas istas imus? Reges consilia sua & decreta habent: utinam bona semper & salutaria. sed qualiacumque, per nos haud emendanda. si vis me libere tecum loqui, ego in tota Europa priscos & magnanimos illos Rege desidero. & si unus aliquis esset, jam unus esset. Deo permittamus, nostra curemus: quod mihi opportunum aut necessarium est ad metam eniti. sed ad illam ipsam & amorem tui & memoriam servato. Vale, Reverende & Clarissime Domine. Lovanii xvii. Kal. Septemb. cxcxcv.

Agit de vocatione Parisiensi. ejusdem fere argumenti Epistola Centur. Misc. v. 67. vitam hujus Florentii vander Haer, ex nobilissima apud Ultrajectinos familia, quae nomen ab arce de Haer trahit, oriundo, vide *Val. Andr. Bibl. Belgic.* pag. 217. Maxime memorari meruit libro, quem scripsit de *initiiis tumultuum Belgicorum*, a Caroli V. morte ad Albani Ducis adventum, Duaci 1587. maturi judicii laudes ipsi tribuit *Catullus* in Tornaco pag. 18. ubi librum de *Castellanis & Comitibus antiquis* exquisitum vocat & commendat maxime.

EPISTOLA DCCCXLV.

ROBERTUS SCHEIDLERUS

J. Lipsio.

Lovanium.

Difficulus explicaverim, quam fuerint variae & intricatae meae cogitationes de tuo tam longo silentio: metuebam enim (absit omen) ne apud te gratia excidissim, liberavit me hac molestia epistolium tuum, quod nuper accepi, falsum me fuisse serio laetor! persevera amare nos tuos; coram probasti ingenium & mores meos, absentis cultum & industriam non requires. Scripsit ad nos Canonicus *Vander Haer* Praesidem *Richardotum* nolle te proficisci ad haec loca. acumen boni viri! conatur nos celare negligentiam suam hoc praetextu, scimus eum perfunctorie tecum egisse de hoc negotio, sin secus, Praeses non vult te scire, quot & quantos procos hîc sis inventurus. *Casaubonus* & *Roillardus* commendarunt mihi sarcinulas suas, fac eos certiores ubi acceperis. *Casaubonus* totus est in concinnanda editione *Polibii*, in dedicatoria libelli de *Satirica Poësi* diluit *Naevos Amphitheatrales*, elicuit id, quod *Obscurus*, (*Clarus* inquam) illi propinavit pharmacum. Vale, Lutetiae Parisiorum iii. Id. Septemb. cxcxcv.

Salutant te *Antonius Oiselius*, *P. Fronto Ducaeus* mittit effigiem *Florimundi Raemoni*.

E P I S T O L A DCCCXLVI.

J. L I P S I U S

¹ Jo. Clementi Xandrino S. M. D.

ENimvero silentium tuum egregie compensasti hac scriptiōe, & hac ² scripti ab Illustrissimo *Columna*, missione. O gratum visu lectuque *judicium*! Quod a tali viro & in hac dignitate, tum & in ipsa urbe natum esse, plane gaudeo. Profecto doluit omnibus nobis, qui non dicam Regem, sed verum aequumque amamus, publice sic traduci & aspere proscindi caput & fulcrum (si potentiam spectes) Christiani orbis. Et quem etiam Regem? ipsum & majores semper religiosissimos, semper Ecclesiae & ejus rectori addictissimos, semper inter vindices & tutores. En gratiam, quam refert. Neque de re disputo, aut temere pronunciatum velim: sed modum hunc publice scribendi, imo proscribendi, haud approbem, neque ratio aut mos ita ferunt. Primum, quorsum in Historia hac, velut in judicio accusatio? sane aeterna ea stigmata sunt. Et ut rex aut Regii culpam agnoscant & emendent, manent tamen libri editi, & apud posteros legentur. Deinde cur non privatim admonere potius, & docere? Quod si rationes nullas admitteret, nec ipse idoneas ad refellendum adferret; tum sane ad asperiora haec tempori ventum fuisset, neque sic omni defensione inaudita sententia videtur praecipitanda fuisse. Fiunt haec in privatis hominibus. cur Regi non deferatur. Est & ista consideratio, quod importune hoc tempore dici ista videntur, quo cum maxime haeretici Ecclesiam, & Rex Catholicus haereticos oppugnat. Quid nisi istis animos addere, hujus refrigerare, ipsa accusatione videntur? Scio non hoc agitare piissimum virum, scio, sed crede mihi, haec eveniunt, & constat avidissime ista legi & produci ab adversariis nostris. In odium, inquam, Regis favent & Pontificiae causae. Sane magni illius major ratio haberi debuerat; & si quid etiam peccarat, clementius, parcius, consideratius admoneri. in Tragoediis velo quaedam teguntur, nec foeda omnia oculis exponuntur, decori causa: idem hinc oportebat, & in Aula atque inter aulaea Regem convenire. Nolo plura, neque libenter haec pauca differui. sed excitavit me recens ea scripti lectio, ut inclusos animi sensus apud te promerem. sed apud te, & serio rogo, ne emanent.

¹ Eidem epistola *Lipsii* Cent. II. ad Belg. 95. inscribitur, ubi Jctus & Canonicus vocatur, & Brugae mittitur.

² Intelligit sine dubio scriptum contra *Baronium*, qui Regis Hispaniae jus in Siciliam a Papae jugo liberum, in Annalibus impugnaverat. vid. *J. Nicii Erythraei* Pinacoth. II. cap. 48. ubi non favere videtur *Afcanio* Columnae Cardinali, quem tamen *Munetus* & alii multis laudibus extollunt jam juvenem. vid. & *Miraei* Scriptores Seculi XVII. pag. 270. Edit. Fabric. de *Baronii* libro hinc queritur *Lipsius*, propter hunc vero librum *Baronius* hoc ipso anno, opera maxime hujus *Afcanii* Columnae fuit a Papatu exclusus, teste *Thuano* lib. cxxxiv. in principio, & deinceps controversiam inter *Baronium* & *Columnam* accurate narrat. unde haec *Lipsii* querela lucem habere potest. vide & ad Epist. DCXCIX. & praefationem nostram ad Thesauri Siciliae Tomum III.

nent. Certamini huic misceri, non est consilium, & alii erunt, qui potentissimo Regi advocabunt. Tu me solens ama, V. R. ego non desistam. Lovanii vi. Kal. Nov. ciciocv. statim ut tuas accepi.

EPISTOLA DCCCXLVII.

PAULUS PP. V.

Dilecte fili, salutem & Apostolicam benedictionem. Quod nobis Apostolicæ dignitatis munus, in tua Senecæ ad Nos missi præfatione, gratularis, facis tu quidem peramanter, & quæ tua in Nos fides & observantia est, summopere laetaris; sed longe aliter nobis videtur. Quamvis enim hic Deo proximus Majestatis gradus ad speciem, sicuti re ipsa est, honestissimus sit, est tamen maxime ad laborem proclivis, & anceps. Quis enim esse potest quieti locus in eo, qui ad se recepisse cogitaverit, ut exactam Deo omnium Christi fidelium rationem suo periculo referat? Praeterea cum Pontificis vita altiore loco posita sit, ideoque omnium ad se oculos rapiat, nonne ille perpetua quadam solitudine urgeatur, ne qua in re ab religione officii declinasse argui possit? Quare cum supremo huic muneri tanti labores impendeant, non videmus quid sit cur tantopere laetari debeamus. Neque tamen inficiamur spem aliquam in eo Nos consolari, quod facultas nobis oblata sit, publicæ Christiani Orbis tranquillitati, & eorum præsertim paci, ac saluti, sicuti optas, quantum in nobis erit, consulendi, qui bellorum motibus jamdiu agitantur, errorumque tenebris misere involvuntur, atque etiam piorum hominum religionem, & Litteratorum studia remunerandi, qui in fidei Catholice propugnatione operam, eruditionemque suam effuderunt, ad quorum numerum Nos brevi nomen tuum adscripturos esse confidimus. Etenim, ut in antiquitatis memoria præcipue colligenda, & in omni Regni jure diligenter explicando, ac variis, egregiisque in rebus illustrandis nervos industriæ tuæ hætenus contendisti, ita etiam speramus fore, ut brevi ad Ecclesiæ Catholice amplitudinem, & excellentiam, quæ longe omnium Regnorum præstantiam vincit, pro dignitate tractandam, augendamque ingenii tui vires conferas. Quid enim est dignius, in quo aut maturæ ætatis tuæ labor, & studium expromatur, aut Christianæ pietatis cultus, religioque declaretur? Atque etsi vetus Roma præcis illis temporibus clarorum civium gloria, & summorum hominum, atque omni virtutum laude præstantium copia floruit, ea tamen, cui nunc Christo Domino regnante præsidemus, non est adeo horum ornamentorum expers, quin religiosissimos, eruditissimosque Viros complures habeat, qui proxime ad veterem illam, insignemque doctrinam atque sapientiam accedere, & cum ipsa antiquitate æquari, conferrique posse videantur. Verum, ut his omnibus careat (quod certe non est) clarissimæ Beatorum Apostolorum Petri & Pauli victoriæ, gloriosissimæque pene innumerabilium Sanctorum Martyrum coronæ multo majorem famam, gloriamque conficiunt, quam

quam quantam ceteri omnes alii veteres Romani Imperatores suis triumphis atque victoriis pepererunt. Quae de Cardinalium in Nos miro consensu scribis, ea Spiritus Sancti gratiae, qui nescit tarda molimina, & omnium ejus Ordinis Virorum studio, ac voluntati, qui Nos elegerunt, accepta referimus. Neque ea in re proprias virtutes, ac laudes, quas commemoras, ipsi agnoscimus, fuit illud divinae in Nos Largitatis munus, quae sola dignos eligendo facit; fuit singulare illorum de nobis Judicium, a quo eum honorem, non ut nobis debitum, sed tanquam ab illis ultro delatum, nobisque penitus inopinatum singularem Dei beneficio accepimus. De ipso vero Senecae, Viri hominum judicio Sapientissimi, tuarumque in eo elucubrationum munere, pro comperto habere te volumus, illud nobis fuisse gratissimum, & tanquam tuae optimae erga Nos, & Sedem Apostolicam voluntatis pignus accepisse, & quemadmodum totum hoc opus eruditione refertum esse non dubitamus, ita etiam nihil, quod pietati repugnet, in eo contineri confidimus; Et idcirco illud quantum per occupationes licebit ipsi legemus, ac Viris doctrina, & religione praestantibus, quorum opera ad ejusmodi res utimur, cognoscendum trademus. *Philippum* autem *Rubenium* Latorem ejusdem tui muneris, qui proximas etiam tuas literas nobis reddidit, benevole excepimus, & quibuscunque officiis pro dignitate poterimus, tua libenter causa prosequemur. Interea nostram & Apostolicam benedictionem, quam efflagitasti, toto paternae caritatis affectu tibi deferimus, ac fausta, & felicia omnia a Deo bonorum auctore precamur. Datum Romae apud Sanctum Petrum sub Annulo Piscatoris, die VII. Januarii M.D.C.VI. Pontificatus Nostri Anno Primo.

M. Vestrius Barbianus.

Ad *Paulum* Epistola, qua Senecam suum offert, repetita est a Pontano pag. 18. ad hoc vero Breve, ut vocat, respondet v. Centur. Misc. Epist. 98.

EPISTOLA DCCCXLVIII.

J. L I P S I U S

M. Vestrio Barbiano.

Romam.

Reverendissime Domine. Cum *Breve Apostolicum* legi, quod hesterno die accepi, facile mihi fuit, etiamsi nomen tuum subscriptum non vidissem, agnoscere ex ipso stilo te auctorem alterum, id est scriptorem. Itaque ut Summo ipsi Pontifici statim, ut debui, respondi, volui & pauca haec tibi, renovando veteri amoris nostro, eique magis firmando. Equidem gaudeo munus nostri *Senecae* non displicuisse tanto arbitro: ad quem causa mittendi vel praecipua mihi fuit, ut palam omnibus ostenderem cultum & affectionem animi mei in hanc *Sanctam Sedem*. Quam, quod hortatur me *Sua Sanctitas*, ut etiam stilo adornem; & vere *Admiranda* ejus ostendam: scio & ante monitum me fuisse, & jam tunc respondisse, voluntatem meam inclinatum esse. At nunc certe

certe magis, cum tantus imperator (ita loquendum est) accedit: & si Deus vitam ac valetudinem largietur, incipiam ac patrabo. Alioqui & alio genere studium meum propugnandae veritatis sum professus, editis *Miraculis Divarum* apud nos *Hallensis* & *Sichemiensis*, quarum prior in veteri cultu est, altera nunc incepit, & utraque beneficiis ac miraculis insignis. Scis, Reverendissime Domine, nihil aegrius esse adversariis, quam vel de Diva ista audire, vel de Miraculis: quia & illa est, quae Ecclesiae testimonio haereticos omnes vicit; & haec sunt inter verae & Catholicae, id est Romanae Ecclesiae, certissimas notas. Itaque etsi professione in aliis studiis sumus, tamen & pietas nos interim ad haec sacra vocat: magisque sequar in aetate hac graviore, & quae me ad seria & salutaria jure hortatur. Nam & de postuma vita scio cogitandum. Reverendissime Domine, salvere longum te cupio & amantem me redamare, & affectus ejusdem scintillam in *Phil. Rubenium* spargere, amicum meum & dotibus ingenii merentem. Delectaberis, cum cum bene nosces. Lovanii, III. Kal. Mart. MDCCVI.

EPISTOLA DCCCXLIX.

NUNUS MENDOZIUS

J. Lipsio.

Lovanium.

E Cce jam nos in alio orbis tractu, sed in eodem in Lipsium affectu, aeternumque erimus; quis enim Lipsium (id est delicias & ornamentum nostri saeculi) non diligat & colat, & fama ipsa, communique litteratorum propectu obligari se videat? Ego vero arctius me stringi censeo, qui te conveni; a te saepe, heu quod non saepius! benigne exceptus sum. Quid? qui me tuis humanioribus litteris decoratum amici nomine quondam donatum video. Hoc mihi in Africa, id in antipodis ipsis animo defixum erit. In Africa ergo sumus: bellumque longe Belgico dissimile cum Barbaris nobis tractandum, sed qui non barbare rem tractant. Non tamen ea nunc Maurorum inundatio, quae praeteritis his temporibus crebris incursionibus cum nostris manum inferebant: civilibus vel potius intestinis bellis impliciti, diviso inter fratres Mauritaniae imperio, rarius cum Christianis pugnam ineunt. Sed nos assidue ad praedium accincti, ut qui Christi causam contra infideles defendendam suscepimus; utinam eo animo, qui verum Christianum decet. Atqui remittit arcum aliquando Apollo, & ad amoenos Musarum hortos (ita ad me scripseras) divertere permittitur, ad libros, inquam, Clarissime Lipsi, quos habui viae comites, quos mihi in solatium exuli, in patronos gubernanti designavi; & eo magis, quia illos dono acceptos Lipsi nomine, Lipsi manu insignitos conspiciam. faxit Deus, ut & authorem tandem incolumem revisam, qui totus in Belgium raptor. Quomodo enim vel in altiori honoris gradu tot amicorum obliviscar? (Lipsium venerationis ergo excipio) Quomodo in Principum cultum non fe-

rar desiderio saltem? spero & effectu; ipsis namque post beneficia jure defer-
viam, pro quibus Patriam affectu tantum quondam reliqui. Sed de his latius
aliquando: nunc feliciores Belgii eventus, tibi vero publici boni amatori gra-
tulator, libentius de firmata jam pace congratulaturus. Sed meliora sperare de-
bemus, qui meliora jam videre coepimus. Hoc in votis, & te Clarissimum vi-
rum diu valere: vale ergo, & me inter amantes amantissimum habe, & reda-
ma. Tingi pridie idus Januarii c1616cvi.

EPISTOLA DCCCL.

MICHAEL GROENEWEGHIUS

J. Lipsio.

Lovanium.

Clarissime & Doctissime Domine. Gaudeo vim factam ingenio meo, vere-
cundiori, quam fortunae meae conveniat. Licet enim te potissimum au-
tore didicerim, Clarissime inter optimos, inter clarissimos Optime, Juste
Lipsi (ut verissimum a *Wouwerio* meo elogium mutuer) nusquam meliore da-
mno frontem poni; tamen ingenuus dicam, an subrusticus, pudor haecenus de-
tinuit. Quo magis laetor natam mihi occasionem, imo impositam necessitatem
ad te scribendi, Vir Cl. Nam cum praeter meliorem hunc animi cultum,
quem coelesti ingenio tuo ita refero acceptum, ut propitii Numinis hoc vel
praecipuum munus habeam, ingens tibi beneficium debeam, dissimulare id;
nec sine ingratitudinis nota, nec sine alterius injuria, non possum. Etenim
Illustrissimus Poloniae Regis legatus, in beneficio quodam regio conferendo
inter multos competitores, non alio magis nomine me ceteris praetulit, quam
quod Magni me Lipsii quondam auditorem, divinique ingenii admiratorem
profiterer. Nimirum ea est nominis tui fama, & incomparabilis doctrinae ad-
miratio, ut vidisse Lipsium, & suspensum ab ore illo probo inter auditores
aliquando confedissee (quod mihi Leydae biennio toto contigit) magnum ha-
beatur. Felices nos Belgae hoc tam claro Sydere, cujus se lux adeo longe la-
teque diffundit, ut ubique excitet cultum & admirationem sui. Sane Illustrissi-
mum legatum adeo in te propensum repperi, ut ipse beneficium accipere vi-
deatur, cum quid tibi gratum fecerit. Vir est eximii candoris, & qui Regis
sui dignitatem, & suam, splendore vitae egregie tuetur; Heri amicissime vo-
cavit ad prandium, super mensa non alii, quam de te sermones, aevi nostri de-
cus, cum ubertim suppeditaret, quae libens depromerem apud amantissimum
tui, flagrantissimus meus in te affectus, quem mihi a pueris fuisse vehementem
duos locupletissimos testes habeo, & tibi longe carissimos, *Wouwerium* & *Bu-
terweghium*. Quorum, ille paucis diebus in Hispania cognitus, ob hanc prae-
cipue causam in amicorum album recepit, & ingens reliquit desiderium sui,
Hic ἀπὸ τῶν ἀπαλῶν studiorum sub ¹ *Assendelfio* socius, arctissimo amicitiae
vin-

¹ Vid. ad Epist. XLIII. & hinc apparet discipulos illum habuisse Catholicos.

vinculo conjunctus, & plane germani fratris dilectus loco, hunc in me affectum primo admiratus, deinde imitatus est. Quae spero movebunt benignissimam naturam tuam, ut me in eorum numerum admittas, quos ob amorem cultumque tui, aliqua benivolentiae tuae aura prosequi soleas: dederis hoc *Buterwechio* alteri, ut ex ipsius literis intelliges. Natales nobis honestissimi, vitam moresque & Belgicum quendam candorem haecenus probarunt gravissimi viri; a familiari tuo congressu non me tua humanitas, sed aetas immaturior & meus pudor prohibuit. Summa nunc votorum, ut tribus verbis ad *Groeneweghium*; proximum, ut Illustrissimo me legato porro de meliore nota commendes, quae sane petere non auderem, nisi animos faceret meus in te amor cultusque eximius, qui ita dictitant, singularem tuam & omnibus obviam humanitatem tam amanti homini non defuturam, in quo omine desino, Deum rogo ut te, clarissimum Belgicae lumen, nobis & literis servet incolumem. quod ita ex animo peto, ut ex intimo sensu ferio addam. De nostris annis tibi Jupiter augeat annos. Illustrissimus *Fulvius Constantius*, Patronus meus, *Marchio Corleti*, & supremi Collateralis Consilii assessor primarius, amicissimam tibi salutem adscribi jussit. Vir est & generis nobilitate, & dignitate amplissimi muneris inter procerum primos, adeo studiosus tui, ut quod gravissimis negotiis curisque otii suffurari potest, nusquam libentius, quam divini ingenii tui monumentis lectitandis impendat. Vale Cl. Domine, & me ardentem amantem ama. Neapoli xvii. Kalendas Februarias. anno ab orbe redempto cxcxcvi. Si Cl. D. T. scripserit literas, Barum inscribat, ibi enim Canonicus sum Sancti Nicolai, & Stabilem sedem habeo, nunc Neapoli tantum animi causa dego benigne ab Illustrissimo *Constantio* evocatus.

EPISTOLA DCCCLI.

MICHAEL GROENEWEGHIUS

J. Lipsio.

Lovanium.

VERear ne molestae tibi sint tam crebrae litterae meae, nisi argumento commendentur. Quid enim tibi humanissimo juxta atque doctissimo viro jucundius, quam amor judiciumque amplissimi & prudentissimi viri? Sane in Illustrissimo *Prochnicio* adeo haec eminent, nihil ut candidissimo hoc peccatore fingi possit tui amantius. Quod etsi certioribus tibi argumentis, quam nudis litteris, satis superque constare scio, tamen tam insignem ejus in te voluntatem, tot honorificos de te sermones, plenos sincerissimi cujusdam affectus, silentio obruere ingrato, pene religio est. Seneca tuus a *Wouwerio* transmissus, dici non potest, quam illi gratus fuerit. Tuum jure dicimus, quem non perpetuis tantum Scholiis, sed divinis etiam illis Manuductionibus sic illustrasti, ut & ipse nova vita famaue donatus, & omnes sapientiae candidati insigniter adjuti aeternum tibi debeant. Non exiguam addebat commendationem;

expressa ad vivum tua effigies, quam in argento a *Wouwerio* dono missam oppido quam exosculatus est: unum dolebat, non auro potius, hoc est praestantissimo metallo, praestantissimi viri vultum effictum. Itaque statim id fieri curavit, argenteos autem paravit sibi plusculos, nec id solum, sed vasculis quibusdam mensae usui os illud probum inferi iussit, subinde dictitans, effecturum se, ut etiam post rogum vivat vigeatque in familia sua Cl. Lipsii memoria. Etiam vascula aliquot argentea tibi destinavit, in quibus videre est fidum illud καὶ Φιλάνθρωπον ζῶν. quod & tibi in delitiis, & in ipsius gentilitiis eminet insignibus. non sine occulta quadam συμπαθεία, & ad devinciendos invicem animos argumento. Quid ad hanc humanitatem addi potest? vincit tamen semper se ipse cum a nemine vincatur, excursurus mehercules in amplexus tuos, si per aetatem & impositum ei a Rege suo munus liceret. Sed si quae vis belli (quod Deus omen avertat) tanta ingrueret, ut solum tibi vertere in animo esset, domum suam non benigne magis, quam vere & ex animo offert, honestissima & regia plane conditione. Brevi enim in Poloniam se emigraturum sperat, unde uberius te, commodiusque novis subinde officiis demeretur. Crebri etiam nobis sermones de divinis ingenii tui monumentis. In quibus magnopere suspicit epistolas tuas, quae semper ipsi ad manum: valde tibi autor sit, alteras duas centurias edendi: quamplurimas enim superesse tibi censeat, quibus χιλιάδα absolvas, quem numerum ad hanc aetatem nemo implevit, quibus in fine addi posset Epistolica institutio, nec minus e fama & re tua arbitratur, si omnia quotquot adhuc evulgasti opera, quam fieri potest elegantissime & emendatissime typis excudenda cures. futurum enim ut te superstitite, & accuratius & fidelius operam praestent Typographi. Duos illos de prudentia civili & militari libros, quos in laudatis illis monitis politicis promittis, avidè expectamus. Lovanium a te editum audivimus, nondum vidimus. Nihil autem (mihi saltem) gratius optatusque, quam quod intellexi, te de conscribenda historia Belgica hortantibus Principibus, Ordinibusque cogitare. O dignam Provinciam ingenio tuo stiloque, alterum nobis Tacitum jam animo auguror. Deum precor ex animo, ut confirmet hanc mentem tibi, vitamque diuturnam & valetudinem firmam tantoque muneri parem largiatur. Te oro obtestorque, Vir Cl. des veniam huic affectui, cui dum tam libenter indulgeo quam difficulter impero, video epistolae me modum excessisse. Itaque desino, si pauca de mansione mea Neapoli addidero: diutius hinc opinione mea haesi, benigne sane liberaliterque ab Illustrissimo *Constantio* Patrono meo habitus, qui tui studiosissimus, eo nomine plaris etiam me facit. detinuit autem, quod peregrinationem ad Divam Virginem Lauretanam instituerant, & me sibi volebant comitem, sed dilata est ob invaliditatem filii, itaque perendie Barum redeo, fruiturus & Canonicatu meo & beneficio ab Illustrissimo *Prochnicio* in tuam praecipue gratiam mihi concesso. Deum in sacris pro salute tua toto animo deprecaturus. Vale & Salve, hujus seculi & Patriae decus. Neapoli Nonis Aprilis. anno ab Orbe redempto 1606.

EPISTOLA DCCCLII.

CASPAR DIEMENUS

*J. Lipsio.**Lovanium.*

Ultimis meis litteris 4. Id. Decemb. datis prolixè tibi scripsi. In praesentia brevior ero, utpote qui tuas prius expecto. Has insertas here a *Villero*, nostro accepi, quas quia misit apertas, legi, & iram, fateor, non mediocrem ex iis collegi. Ostendit sane cerebrum suum, si quod modo illi cerebrum erat, medico eguisse, cum illa scriberet. Nam longe aliter scio eum sentire, vel si sentit, nihil terra unquam levius hoc homine produxit. Non semel enim apud me & alios egregie tam de Catholica Religione, quam de vita monastica locutus est, affirmans Regula S. Francisci (haec ipsius verba) nihil esse sanctius, nihil divinius. Tum quoque narrabat se olim scripsisse, & habuisse publice Orationem contra obrectatores Ordinis Monastici. Non obstantibus his cum jam Apostasiam cogitaret, in ipso monasterio composuit Satyram insigniter scurrilem contra eundem Ordinem. Precibus efflagitavi ut ostenderet. Legi quaedam; doctè quidem scripta meo iudicio, sed absurda absurdorum absurdissima, ut ait ille. Tum quaerens num ita sentiret. Nequaquam respondit. Cur igitur haec scribis, dico, *Villero*. Impulsus, inquit, a Concionatoribus, qui haec me inferere volebant. Deinde etiam stili gratia haec scripsi, & odio, invidiaque, ut verum fatear, adductus. Haec ipsa verba cum illo habui. Quid de miraculis Divae Virginis Hallensis dicam? de quibus an tu vel melius scripseris, vel ille sincerius pronuntiaverit, non facile judicavero. Audi amplius. *Dominicum Baudium* se etiam in hanc sententiam attraxisse testari solet, quem aiebat jam optime de praedictis miraculis sentire. Tu, Vir Doctissime, an mereatur responsum, vide. Ego an expediat nescio, tamen ne triumphum canat ante victoriam, si videtur, aliquid contra scribendum erit. Mitto exemplum ipsius ad me epistolae, in qua valde sibi placet, ac responsum urget. Revera, mi *Lipsi*, cum hominem proprius introspicio (citra calumniam dico) neminem unquam vidi confidentius arrogantem, aut impudentius mendacem, talemque eum comperio, ut cum talibus nec amicitiam velim, nec inimicitiam. Quid jam agat, quaeris? Totus est in *Paracelso*, & arti Alchymisticae videtur valde addictus. Sed quaerit miser quod nunquam inveniet. Unde rectè, & vere hos versiculos saepe inculcari audivi.

*At nusquam totos inter qui talia curant**Apparet ullus, qui re miracula tanta.**Comprobat.*

Sed plura de *Villero* quam volebam. Habeo hîc vasculum vini Hispanici exquisiti paratum, una cum canistello uvarum dactylidum, quae prima occasione mittam, ubi per glaciem liceat, quae nobis hanc remoram facit, quo-

minus mittantur. Optarem ut glacies se remitteret, ac illa ante quadragesimam domi tuae habere posses. *Goltzius* (amicus mihi vere Pyladeus) officiose te jubet salutari, voluitque per me tibi significari, se memoriam tui ex animo colere; quod re ipsa, ni fallor, etiam declarabit. Sculpendi artem, si nescis, jamdiu est, quod reliquit, & pictoris officium agit, in quo tam faeliciter versatus est, ut prae illo reliqui pictores velut umbrae habeantur. Haec scripsi *ἀντιπροσέδοξα*, & multis obstrepentibus negotiis. Amsterodami. 9. Cal. Feb. 1606. Vale, & me ama, Vir Clarissime.

EPISTOLA DCCCLIII.

HENRICUS SOMMALIUS

J. Lipsio.

PAx Christi: &c. Quoniam mihi, Doctissime Lipsi, plura de Virgine Maria edendi miracula incessit desiderium, nolui id quidem facere, nisi T. H. ea de re prius certiozem facerem: Hallensia etenim & Sichemia nuper latine evulgasti magno, ut spero, piorum commodo: quae etiam Romam ad R. P. Generalem nostrum misi, quae mihi D. *Moretus* pro sua in me benevolentia donarat. Gratum sibi munus, ut multis profuturum judicavit. Nactus sum vero miracula, quae duobus in locis Germaniae contigerunt, & ea quidem a *Joanne Tritthemio* abbate Benedictino etiam latine scripta. Cum autem illa edere in vulgus meditarer, occurrit mihi non abs re futurum, si adderem & alia plurima, quae pridem, (etiam & nunc) in Belgio nostro contigerunt: veluti in Cambronensi monasterio, in oppido Cervienfi, in pago Tongrensi, tum vero quae ad sacrum Atrebatum cereum, qui incensus non imminuitur, velut alter rubus Moysis, quem is vidit ardere, sed non comburi. Haec equidem Gallico sermone omnia sunt a viris fide dignissimis edita, sed quae nunc Latina fiunt: ut honorificetur Deus in matre sua virgine augustissima, etiam apud alias atque alias nationes: tum vero ut Belgium nostrum, tot annis bello attritum, non carere ejus ope, multiplicique auxilio probetur. Forte T. H. optaret sua nostris addi, quae ad editionem parata habeo, forte id minime quidem: quae in re, vestrae omnino voluntati sum lubens obsequuturus. & quo citius ea mihi perspecta fuerit, eo gratius id mihi futurum. Me sanctis T. H. precibus etiam atque etiam commendo. Gandavi. 1606. 12. Februarii.

Henricus Sommalius Dionantis, Jesuita. vide *Valer. Andr. Bibl. Belg.* p. 369. & *Alegamb. Biblioth.* p. 177.

EPISTOLA DCCCLIV.

MELCHIOR HAIMINSFELDIUS GOLDASTUS

*J. Lipsio S. P. D.**Lovanium.*

Solent, qui Genii alicujus faventiam aucupantur, vel e diffitissimis locis dona mittere, quibus illum placent, ut seseque resque suas intercessis precibus bene vertat. non alio voto meos item libellos ad Deos litterarum amando, quos colo ac veneror, quosve inter Lipsius tamquam Jupiter regnat, pulso Saturno Roterodamio. Si dona mortalia immortalibus illis prodesse nihil possunt, nec illorum indigentes sunt, nec ipsi dona potius quam animum respiciunt donantis: haut magis mei inficeti ac impoliti libelli litterarum juvabunt Deos, quibus affectum studeo declarare inclusumque animo amorem externis his munusculis. quem illi respicientes, non dona compensare, sed ut Divi animae damna restituunt, ita isti mala animi averruncant, vitia evellunt, divinaeque particulam aurae in salebris & luto haerentem retrahunt in planam artamque semitam, denique pedes componunt, ne aut vacillantes cadant aut exorbitantes aberrant. Hoc animo ad te nunc venio, mitissimum & comissimum litterarum numen, pusillum hoc munusculum in donario tuo offerens. non temere nec inconsiderato ad te feror, cujus limina nihil minus horresco, quam qui Divum adyta salutaturi accedunt. Pertraxit me Typographus tuus Antverpianus, qui ut meis me verbis tibi commendarem auctor suusque existit, summo praedicans opere tuam in Paraeneticis accipiendis promptam voluntatem & favorem non vulgarem. Quo nomine tibi, Lipsi optime maxime, gratias ago atque habeo numquam intermoriturus. Meo ipsius judicio non magni momenti sunt, quae misimus. nam praeter quod protrita fere omnia & nota in vulgus, subitata insuper sunt & sub calamo in secessu Alpino nata. majora sunt, quae in scriptores molimur majores. tamen discupio cognoscere, an quid sit, quod calculum tuum dignetur auferre. unius tuum judicium ceteris antistabit omnibus. Vale, & quod abs te voveo, fave. Francofurto a. d. xvi. Kal. Apr. 1606. raptim. *Freberus* litteras ad me recte poterit procurare.

Si auctor fuit *Goldastus* orationis illius Jenensis, de qua vid. Epist. clviii. cccxcviii. & dcccxl. certe candorem & integritatem in eo desidero; qui hac in epistola Lipsio os sublimit, dum ejus famae grande clanculum vulnus imponit: exagitat hujus sceleris, ut vocat, nomine *Goldastum*, *Scioppius* in *Amphot.* pag. 103. & seq.

RODULPHUS BUCLANDUS

J. Lipsio.

Lovanium.

UT amicum in te animum induerim, jam olim eruditio tua fecit (cultissime Lipsi) ad amorem, dum doctissime in Suetonium praelegenti, ac Numo lumen nummis omnibus praetiosius adferenti, Lovanii quondam per itineris occasionem interessẽm, accessio facta est. Conceptam benevolentiam jam tum provexerat ea pietas, qua ad veri Dei vera castra prudentissimo ac saluberimo consilio contuleras. Tot tuos in facultate literaria exantlatos labores gratulor: ultimas in Diva Hallensi, Sichemenſi illustranda collocatas horas, quam maxime. Est autem quod de his referre queam. Atque ob tui communisque Matris Catholicae studium referam. Splendide illae quidem & satis pro dignitate quin alibi terrarum exceptae sint, nihil haereo: quomodo apud Britannos, audi. Quibus veteris avitaeque fidei tenera est offensa, tenax constantia, illibatus amor, obvii assertorem amplectimur. Quibus innovata placet *ἀντινομία* ista καὶ ἀντιμαρία nihil unquam accidit odiosum magis. Antagonistam exprobratorem, veteratorem illum Italum (si rite ferunt) praedicant, evahunt, nihil supra. Defuturum tibi animum respondendi (sed decoctorum fide) spondent; defuturas animo vires: defecisse Lipsio frontem, mentem, ebuccinant, immanem impietatem, apertaeque idolomaniae ad summum ventum clamant: legentes stupent, referentes horrescunt. Vidimus. Nos ridere, bene dicta tueri, objecta strenue diluere, invocationis tuae formulas (nam & sanam servari verborum formam monet Apostolus,) luculenter confirmare, valide evincere. De intemerata virgine semperque praedicanda Dei genetrice nihil magnificentius dici, vel fere fingi potest, quam quod a priscis Patribus in medium adductum est. In cujus dignitatem tuendam (nec tantum Christi Salvatoris) quis mortem dubitet oppetere pius? Neque enim cum eandem Beatus Efrem in orat. de Deipara. *Spem patrum, captivorum redemptricem*; Athanasius Serm. de Deip. *Reginam & Dominam*; Cyrillus Hom. 6. contra Nestor. *Fidei Catholicae sceptrum*; Augustinus Serm. 18. de SS. (nisi velint Fulgentium, Augustini ferme aequalem) *unicam peccatorum spem*; Damascenus Serm. de dormit. Deip. *unicum dolorum levamen* salutaverint; intra Numinis exortes terminos provecti sunt, sed secundum piam fidei analogiam accipiendi. At neque cum per eam gaudio affici *Angelos, hominem ad coelum revocari, gentes ad fidem converti*; per eam *sperari delictorum veniam, in ea expectationem praemiorum nostrorum positam accipiunt*. At neque Victor Uticensis, cujus haec sunt ad Apostolos, l. 3. de Perſce. Vand. in ipso fine. *Prostrati rogamus, ut non spernatis vestros miseros peccatores, per eum, qui vos ad Apostolicum culmen provexit humiles pisces*. vel alii vetustissimorum, qui similia tibi passim exhibent. Ad quorum exemplar semper collimare debebimus, — & veras hinc ducere voces. Est ut caelesti ore neminem bonum de-

denunciemus nisi solum Deum; & ne patrem nisi Deum vocemus super terram: legitime tamen bonosque patresque usurpari quis, nisi qui catharismo ad stuporem infaniunt, inficias iturus? Facebat itaque molestus ille interpellator, cuius cavillatrices nugas tu, vel levissimo pollicis ductu, amolieris totas. Immo ipsum viribus, quibus polles, ac notis artibus, (ipsamet prae omnibus veritatis acie) pessunda, protere, confode. Id ut celeriter naviterque effectum des, ad honorificam Virginis benedictae claritudinem, ad famae tuae integritatem, ad solamen nostri egregie faciet. Ego ut velis obtestor, efflagitamus omnes. Semel aggredere. Quandoquidem pancratiastes Parthenopaeus esse coepisti; maeste animo: atque — *Italo perfusus aceto*, ut extergas incumbit, oleum camino postquam addidisti; ut genus hoc irritabile luculenta defensione vel sopitum vel exarmatum reddas oportet. Excussi suis non argumentis, sed querelis & ineptiis vacillent, taceant. Nihilque a fide alienum, nihil a Patrum traditione devium, nihil viro pio doctoquo indignum, nihil futile sentire Lipsium

— — — *invita fatebitur usque*

Invidia, & fragili quaerens illidere dentem

Offendet solido. — — —

Si scripseris, parum est quod pergratum apud amicum ignotum feceris, praesertim, qui nec talis sit, ut ei referat gratum quid praestitum: id facies quod ex humanitate tua erit; forte & e re tua, nisi non sit in rebus tuis fama tui. Ut optime satisfacias atque ora obstrepentium aeternum obtures,

Quam tua doctiloquo celebravit penna decore,

Diva suum Virgo protegat, author opus.

Vale. Dudum (ut tu) monitus meliora secutus, atque vel hoc nomine tibi certe animo conjunctior Rodolphus Buclandus inter Christi operarios minimus. April 1606.

EPISTOLA DCCCLVI.

CAESAR CARDINALIS BARONIUS

Joanni Moreto.

Antverpiam.

Quod ex meis postremis ad te datis litteris accepisti, idem ex istis intelliges, sed vehementiori energia, nimirum me perstare firmissime in sententia, ut undecimus Annalium tomus abs te cusus non edatur, vel saltem unius versus diminutione. Summa ista audacia, ut S.R.E. Cardinalis cusus Apostolica auctoritate liber, per Bibliopolam decurtetur quovis praetextu regnantium Dominorum. Crede mihi, praestat te jacturam facere cusorum ternionum, quam toto Christiano orbi publicis iisdemque cusis nostris litteris denunciari librorum corruptorem, & alia quae consequeris damna: poenitebit erroris. Vide quid facias. & quorsum ista sint perventura. Cusus est non Romae tantum, sed & Venetiis, itidemque Moguntiae, idem Tomus undecimus absque alicujus elementi diminutione. Si tu cujusvis auctoritate jussus secus fe-

Tom. II.

A a

ceris

ceris, certo scito te daturum, quas non existimas, poenas. Excusationem, quam tuis litteris ingeris, nullius esse momenti, neque apud me, neque apud quemlibet, qui penset quanti sint ponderis Scripta S. R. E. Cardinalium. Vale. Romae XII. Kal. Martii Anno Domini M. DC. VI.

Confer cum hac Epistola aliam supr. DCXIX.

EPISTOLA DCCCLVII.

M. ANTONIUS BONCIARIUS

V. C. Marco Velfero S. D.

Augustam.

ASsem para, & accipe fabulam; imo historiam, sed de fabula. sub initium mensis Septembris, anni proximi superioris, inclytus mercator ex Belgio regressus in Italiam, nunciavit Serenissimo Urbinatum Duci, Justum Lipsium, diutino morbo conflictatum, Calendis demum Sextilibus, cum moerore ac luctu omnium ad plures fuisse translatum. frequens in Curia erat *Sebastianus Maccius*, vir insigniter litteratus, Lipsii cultor, praedicator, admirator (ut ego credebam) inter primos, ut res docuit, supra primos. is cum a Principe accepisset de Lipsiano casu; post lacrymas querelasque non minus tristes, quam quae Parentibus debentur, confestim adit Sacerdotes, quotquot Pisauri notos habebat: ab his flagitat, ut primo quoque die pro Lipsii anima faciant. litteras etiam quoquoersum ad amicos dimittit, rogans, obsecrans, ut parenti omnium litteratorum ab omnibus litteratis parentetur. ille autem in templo maximo Pisauensi, ad aram expiandis Manibus paratam plus centum hostias uno die immolandas curavit, & iustis exequiarum rite celebratis, in magno concursu hominum eruditorum funebrem quoque (ut praesensi) de illo habuit laudationem. Haec nimirum jam erant confecta omnia, me tamen ignorante, cum proximae a Lipsio litterae venerunt: illas dico, quas per te accepimus, Velfere; ad Illustrissimum Cardinalem legatum, & ad me datas. quibus dies adscripta erat, pridie idus Octobris. Hae omnium pectora insperato gaudio cumularunt, & coegerunt amicum meum reponere Caelitibus pro parentatione gratulationem.

Proverbium est nostratum, quod utinam hic valeat, cum mors alicujus falso rumore differtur, propagari eidem vitam ad decennium. quid cum pro certo habetur, & finis ducitur & conclamatur? crediderim duplo amplius. Jube hominem spe optima vivere, Phoenicem apud nos renatum, qui non solum sibi propagat vitam, sed aliis donat aut reddit. Annacum Senecam vide, cui senium & annos adimens, vegetam restituit juventam. & hunc credimus moriturum, per quem alii vivunt vigentque? Habeo illum salutare ab Illustrissimo *Bevilaqua*, cum quo heri Perusiam reverso, duas horas suavissimo sermone consumpsi. harum maximam partem Lipsius occupavit. cujus litterae, fidelius atque celerius ad nos perlatae, quam ad alios solent, etiam Velferi mentionem

tio-

tionem & laudationem induxerunt. promisi, missurum hodie aliquid scriptorum tuorum. De quibus jam scito factum esse a me diligenter, certe loquaciter, quod imperasti. totas decem paginas implevi, generatim de omnibus historiis, & speciatim de tuis, non censendo ego quidem, sed disquirendo. cum Amanuensis copia erit, quae in praesens non erat, curabo describendum, mittamque statim ad *Remboldum*. Aliud quid? lusi aliquid versiculorum ad tuas Martyres. quod cum mittere ad te vellem, non prius dicere; hoc tamen fieri debuit, quia illud non potuit, ne viderer in tam longam diem protrahere mandatum tuum officium meum. Vale IX. Calendas Martii CXCXCVI.

Fuit mihi perquam gratum & amoris non utique vulgaris indicium, quod Lipsii litteras prius legeris, quam ad nos miseris. idem in posterum facias volo, si quid ab illo, si quid ab alio. Cardinalis *Bevilaqua* legit mihi, quas a Lipsio accepit, & quas ad Lipsium remisit. utraque admodum disertae, ac de nobis (quod tu volebas) honorifice loquentes. Et heus tu, mitte amabo, si quam forte habebis ad manum Epistolam Lipsianam, quae in nos aliquid, si-ve de nobis. Aequè honestum censeam mihi futurum ad posteros, vel mulceri ab illa manu, vel distringi ab illo calamo; sed hoc alterum & fructuosius. Vale iterum.

EPISTOLA DCCCLVIII.

'CHRISTIANUS BRUNINGIUS

R. P. *Heriberto Rosweidio S. J. Theologo S.*

Antverpiam.

O rem tristem ac pene Tragicam! immo e tristi & Tragica (Deo & Divae Sichemienfi gratia cito) laetam jam nunc & Comicam! Vix Antverpia solveramus, cum ecce vitae thorique consortem mei repentinus, & atrox lateris sinistri dolor oppressit. Illa βαρυνομένη τὴν γαστέρα queri misera, ingemiscere, quiritari, in magna muliercularum aliquot vectorumque miseratione ac συμπαθείᾳ. Equibus unus & alter pleuritidem dicere esse videri. Dordracum postridie ad horam IV. pomeridianam expositi Medicum arcessimus. Venit homo bellus, videt, negat etiam inter evidentissimas funestae pleuritidis notas (quae nos tamen facile fallebant mali illius & artis medicae ignaros,) negat, inquam, pleuritin esse: negat & venam aegrae incidendam. Quid factum? imperitissimi tenebrionis fiducia imo fraude, cogitationem omnem φληγοτομίας (primum & ultimum in hoc genere mali remedium) seponimus, diem posteram Dordraci spe meliorum consumimus. Interea dolores intendere, augere cruciatus; magis magisque in horas immo momenta angi misera. Die tertia, conducto curru singulari, mollissimis cervicalibus ac pulvinis reclinatam, lente sane atque tractim, inter gemitus & ejulationes assiduas, (quod doloris ea vis ac magnitudo curulem motum aut agitationem adspernaretur,) tandem

A a 2

sub

1 Hic se *Bruningium* vocat, qui supr. Epist. DCCXXVI. *Brunonium* se dixerat, ubi vide.

sub noctem ipsam Ultrajectum deportamus. Tum illa noctem infecutam questibus fletibusque insomnem ducere: nos miserari, erigere, solari, nihil minus quam pleuritin suspicati: & ignari prorsus necessitatis ultimae, in qua verfabatur infelicissima, vix tandem quarto jam die, ex quo languere coeperat, ad Medicum mittimus: invita & renitente etiamtum miserrima feminarum. Quid faceret optima? Etiam in tantis cruciatibus, consultum tamen domesticis rationibus volebat, & cautum a supervacuis (ita fide bona censebat) Medicorum impensis: minime alioquin fordida vel adstricta in languore hominum etiam alienissimorum. Negat igitur, primi illius sed infelicissimi Dordracensis Medici fidem secuta, negat, inquam, extra pleuritin Medicorum opera utendum sibi: dolores sponte sua, cum bono Deo, lenituros. Arcessitur nihilo secius Medicus, venit, videt, pleuritin ipsissimam in ipso primitus aspectu denunciat, depositam clamat, simul imperitissimum tenebrionem Dordracenum inclamat. Inter ultima tamen ad Chirurgum mitti jubet. Venit ille, & miserae jam tum primum sectionem passae, basilicam incidit in brachio laevo: sanguinem copiosissimum educit ad uncias novenas, nigerrimum, putidissimum, virulentissimum, &, ut semel omnia complectar, extrema infausto & funesto colore suo denunciantem. Venit alter cognatus item Medicus, consulitur, eadem omnia censet & in ultima vitae tegula miseram stare. Dies dehinc una & binae noctes interpositae: quum ecce dolorum vis tota e sinistro in dexterum latus conversa, pleuritin novam facit: attonito & stupente medico, & inusitatam rem clamante. Ah misera, quid tibi tunc animi, aut virium fuit, quum somni omnis cibique sextum jam diem expers, fracta doloribus acerbissimis, minuta sanguine, alvo fortiter laxata, ad haec *ἐν γαστρὶ* *ἐξστρα*, ad venae iterum sectionem, id est praesentissimam necem adigeris? Misera facies, Reverende Pater, misera, & quae ferreum etiam pectus fregerit. Sed quid aegerrima inter haec mulier? Illa fortis & intrepida brachium Chirurgo dexterum praebere, sanguinis plus etiam quam antea mittere, ad eandem plane faciem & colorem: illa ad Deum Divamque Virginem mente pariter ac voce intenta vel levamen cruciatus intolerabilis poscere, vel constantiam in ferendo: illa dissimulare, vel potius (quod miretur aliquis) negligere lacrimas & lamenta adstantium, spei & fiduciae in Deum Divamque matrem non plena tantum, sed (ita narrat) secura. Ego interea flere in arcano, Deum Divosque contestari, in auxilium rogare: &, auctore bono Genio meo, votum DIVAE ASPRI-COLLI pro uxore aegerrima maritus tristissimus facere, ego, inquam ille Divae Tutelari meae vetus cliens. Quid fit? Audit Diva supplicem suum, audit: & die altera tertiave, ex qua votum factum, conclamata jam uxorem doloribus levat, viribus auget, sed sacra primum & mystica Unctione delibutam. Itaque a coelesti & Virginico Numine recreata, quae letum spectabat paulo minus, ea lectum deserit, Medicum dimittit. Qui confessionem sacram excepit & injunxit, *Johannes Wachtelarius* ad D. Mariae Canonicus eo die ipso, quo die has exaravi, ad vos ibat. ille dicet. Itaque jam ipse non negotii solum mei causa ad vos iterum specto, sed

votis

voti solvendi, religionisque liberandae. Ades o & fave tu illa inclyta DIVA mea, & spes votaue nostra caetera auxiliari illo Numine tuo imple, sodes: ut, munere ac beneficio unius tuo, e fece ista ac turba Calvinianorum (qui novo rursus genere ὄγκος hinc inquietant & ad Orcum adigunt Cultores tuos) una cum stirpe nostra crepti, in meliore aliquo ac puriore tractu, Jesu filio tuo, tibiue Jesu matri pure pieque, in publica civium tuorum luce, faciamus, placeamus! Caeterum ad te, mi Pater, redeo. Intercessit destinato itineri meo, quod audisti, uxoris meae fatum: & absque hoc fuisset, jam apud vos aut in Grudiis essem. Interea super negotio meo ubertim a me scito ad *Vermidam* scriptum. Scripseram ad *Puteanum*, nosti. sed adhuc sine responso. atqui de professione Graecanica scripseram: & scripseram fero, τὰς μηχανὰς, ὡς ἡ παροιμία, μετὰ τὸν πόλεμον κομισάμεν. Sed, ut est apud Pindarum, πολλὰ δὲ ἀνθρώποις ὅρῳ γινώμην ἐπεσον. Ea re decretissimum habebam scripto hominem repetere. Sed pro meliore visum dum silentii causam e *Vermida* nostro resciscam, sustinere. Fors est, ut aut tempora mutarint illum, aut loca quae insedit peregrina & a Belgica simplicitate nostra longiuscule aliena. Verum tamen quoniam NON LIQUET, diem diffindo. Quod si tu mi pater, *Vermidam* appellari e re nostra esse censebis, fac, quaeso te, litteris quamprimum tuae & mei negotii seria commendatio apud illum appareant: excita hominem non sanguine duntaxat mihi uxoriue innexum, sed alias prona mente & manu faventem ingenio & fortunae nostrae: & adde, quod dicitur, currenti calcar. Me Decimarum hinc frumentariarum auctio vel nundinatio tenebit & sistet in dies pauculos: protinus alioquin excursurum ad vos: Ubi Pelopidum neque dicta neque facta. nosti cetera. Ita profecto est. Quo primum die in Bataviam hanc meam e vestris finibus reversus sum, ἔργονόθεν mihi videor εἰς τὴν ἀδελφὴν venisse. Bene vale, Reverende Pater, & pro me uxoreque suavissima latas laetasque laudes & gratias Jesu Domino, Divaeque Aspricollis age, nostri proprie ac peculiariter inter mystica istaec Sacra tua memor. Ultrajecto. viii. Kal. Jul. ∞. DC. x. *Johannem Woverium* clarissimum Virum, familiarissimum meum officiose a me & uxore salutes velim: & quod nec illum in discessu meo, ita, uti pro necessitudine amicitiae nostrae debui, appellarim, festinationem meam excusa: & purgaturum dic, ubi in rem praesentem rediero. Narra, amabo te, aut, si tanti esse putabis, praelege utriusque nostrum amantissimo homini fortunam uxoris meae, & DIVAE ASPRICOLLIS in hac auxiliarem manum. Cujus ego laudes (ita me servet illa, juvet, amet) a LIPSIANA etiam manu Musave intactas libare percipio, & diffundere grata & gestiente pinna quadam per Christianum hunc orbem. Iterum, mi Pater, narra, sodes, Woverio meo. Hoc ex animo te, quoniam ex animo illum complector, rogo.

Salutem a me, qui mihi istic a Confessionibus fuit, Reverendo P. *Simoni*, homini religiosissimo: R. P. *Joanni a Gauda*, concionatori disertissimo: & jubeto maeste animo & lingua esse. Salveat item a me Jacobus ille Janitor vester, blandissimus omnium homuncio. Ejus in me comitas ita meretur.

AMPHITHEATRUM BURDIGALENSE

Ad magnum

L I P S I U M.

Magne Vir.

Amphitheatrum quod in Aquitania Burdigalae est, pulchri & vetusti operis, ab opido ccc. circiter pass. abest pl. m. cis Garumnā, loco opportuno, & amano, situm. Sub eo propter viam publicā fons nascitur; qui sui copia eluctatus, statim ibi modico flumine effluit. Eum incolae *Odejam*, alii *Divonam* appellant, ut is sit, quem Aufonius celebravit. Hujus ad publicos ludos & communem haustum magnus usus esse potuit: cum populus spectaculis veluti fascinatus diutile se ad solem & pulverem decoxisset. Situs caeae congestitius est: & ut totus ille suburbanus ager, tuberosus: cujus exitus, qui intima aperiebant, Architectus clausit: & terrae aggestu summae arcae aequavit. Per hos dejectus, veluti gradus, ad ipsam molem itur: quae lacera & dirupta mille locis, tamquam evanidum cadaver, vix alibi suis membris haeret. Et ut in eo majora ossa longum tempus non tam facile solvit: ita hujus frontes, illam vere ossēam compagem domesticae injuriae & longa bellorum series destruere non potuit. Jacet tamen: & quae olim forsan laeta tot caedes & in sinum suum congesta funera vidit, nunc quoque semetipsam videt informe cadaver & funus. Conatus tamen sum nunc iterum animare, & ut apud Poëtam

Animas ille evocat orco. Pallentes

ego tuo jussu, tamquam mei Jovis, subito Mercurius factus, id meliuscula facie producere. Atque ut idem vetus hoc redivivum esse agnoscas: totum retexam & signa, quae a matre habuit, ostendam. Structurae genus graecum est, quod illi *Ψευδοδόμον* appellant: & coriorum ordines, qui totum corpus ambiunt, inaequales alternatim habet. Quadrata latiora rubricans linea III. laterum velut interposita vena separat. Id utraque parte est erectis coriis: sed medius murus, & ejus quasi venter, fractis caementis plenus, frontatis non illigatur. Lateres longi pedem unum, lati palmos duos, aut quod excurrit:

toti

1 Nescio cujus manu haec descriptio Amphitheatri Burdigalensis, & Arietis Heilbronensis, ad Lipsium sit missa. cum nulla nota, quae mihi id indicare potuerit, adsit: suspicatus eram ante ab *Abrahamo Bibrano* profectam, qui *Doveonensis* Amphitheatri descriptionem per *Casaubonum* Lipsio miserat. vide Epist. cccLVIII. & DCCXXVIII. & qui sequenti epistola DCCXXIX. aliorum Amphitheatrorum indicem Lipsio mittit. praecipue quia hīc fontem *Divonam* appellari dicit, credebam *Doveonensem*, pro *Divonensi* potuisse scribi: nam video & *Divonam* & *Doveonem* promiscue scribi. utroque enim nomine Cadurcorum caput, hodie *Caors*, a Baudrando in Lexicum Geographicum relatum. & Scaliger ad *Divonam* ab Aufon. in Claris Urbibus, Burdigalae Genium dictum, dicit eo nomine etiam Cadurcorum civitatem fuisse dictam. imo Cadurcorum urbem a fonte hoc nomen habuisse docuit *Had. Valesius* in Notitia Galliae in *Cadurcis* & *Divona*. unum me moratur, quod diversus a *Bibrani* manu character hoc vix suadeat. Lipsius ipse de Amphitheatris, quae extra Urbem Romam, cap. I. meminit hujus Burdigalensis, sed se nondum nactum ejus descriptionem profitetur.

toti nitent: nec quod viderim nullibi, ullas pustulas habent. Quadrata tessellata introrsum multa calce lita cum lateribus tam arctim coeunt: ut concrevisse putet. Nusquam in iis lacuna aut gradus: nisi quod aer aut pluvia exedit. Venusta omnino facies est: & grato adspectu. Eiusdem structurae muros vidi Augustae in Taurinis, Aquaeductus triplices Emeritae in Hispania, alios Lugduni in Gallia. Et ibi Lutetiae lateritium opus ejusdem generis est, quod vulgo aedes Juliani Imp. appellant: nunc pars aedium legati summi Pontificis. Sed ut ad rem. Imum pedem Tuscanus stylobata adtollit, rudis sine taenia, sima, aut scamillis: quoquoersum aequè latus: paululum a Sila, vel ejus Apophyge resilit. Pila basim non habet: supra annulum & astralagon, quo incomptum capitulum suscipit: In eo quoque, si oculis meis credo, Plinthum solum vidi: reliqua membra echinus & regula cum Hypotrachelio pariter exeunt. Epistylum lateritium est. lateresque pulchra ratione contrario situ se sustinent: qua de re tamquam sua & nupero invento Architecti Itali triumphant.

Zophorus ejusdem generis est, sine ornatu, ut fit. Coronix pluribus membris procurrit. Ex hoc Tuscanico opere rudiore Doricum gracilius nascitur. Stylobatae taeniis praevestiuntur: basis Attica sub antis vel pilis, suis omnibus membris constat Plintho, toro, annulo, scotia, vel trochilo, altero item torulo superiore & regula. Silae sine spiris aut striis. Capitulum a Cymatio & Abaco statim ut alterum illud cum Hypotrachelio descendit. Epistylum facias exsertas habet.

Zophorus nudus, sine sigillis, metopis, aut Troglyphis est: uti in militari opere, in quo nihil IMPENSAE CAUSA FIT. Coronix sua sima, Corona, Cymatio aliisque membris longius ante frontem se ejicit: & in utraque corona denticulos habet. Id Vitruvius ferre non potest: qui translatis ex alia ratione proprietatibus in aliud genus operis offendi aspectum scribit: lib. 1. cap. 2. sed tamen hinc, & idem alibi, & idem Romae in Theatro Marcelli videtur. Equidem non laudo: nec confundi haec debent, etsi ab antiquis factum. A fastigii tympano summus vertex corrui: tamen scio ex singulis angulis surrexisse acroteria: quae velut limbus extremum marginem praetexuerunt. Itaque juvat quaedam explere a mente & manu nostra: & inter singula acroteria interjicere extrorsum prominentia saxa, ex quibus antennae cum velis subrigebantur. Quid excusam? fuisse dicam: & cum proposita imagine te quasi in rem venire velim, non haec omittam. Nunc a summo ad imum, unde modo subvolavi, relabor. Ab eo arcuum ordines surgunt: & a porta decumana orti ea paullo minores. pilatim totam caveam circumeunt. Antepagmenta portae interiore latere caesa cava habent, quibus pessulum immissum ad ocludendas fores. In quem finem disputare non libet: sive ad vitandas aut arcendas turbas, sive exigendum pro locis pretium fuit: utrumque aliquam rationem habet. Antepagmenta quantum ipsa pila utrinque lata sunt: sine incumbis (Itali *l'imposta*.) sub conflexu fornicis, cujus frons tota testacea, introrsum aequali arcu descendit. Interiora caveae vacua sunt: neque usque ruina aut exustionis signum apparet. Non vane tamen suspicer exusta vel direpta: & podium


& ab eo surgentes gradus inasseratos fuisse : quod fieri solitum & factum in Placentino & Polano arbitramur, de quo Tac. lib. 2. Hist. Quid enim? primum Romae tota lignea erant : & illud Placentiae conflagravit : forsan etiam quae Lugduni & Viennae in Gallia : quorum nomen ferme cum ipsis periit. Quod Polae est & intus vacuum, id certum est ab igni vel furto esse. Andegavii ex magna mole praeter imam scrobem nihil superest. At quae tota lapidea & intus, extra, supra, infra, ubique bene firma & ferro obfixa contra omnem casum steterunt : atque etiamnum semidiruta nomen suum tuentur. Vide illa Italiae : adhuc suis ruinis fulta perstant : omnia Galliae & Hispaniae adhuc suis balthéis incincta stare velle promittunt. Neque ullum est, in quo non graduum ordines & vomitoria, aut eorum aliquae notae & signa, in arcibus appareant. In hoc nihil istiusmodi aut simile, totum inane est : & totum intus computruisse dicas. Quot vero loca, & in circuitu arcus, tota haec machina ceperit : quam sit longa, lata, & alta, nihil affirmo : amissa in itinere magna ejus dimensionis parte. Quod ideo scribo, ne cum id desideres, me tacite accuses, cui apud talem virum nullum alioquin velum aut fucus. Sed tanti non est illa jactura. *Vinetus*, vel quisquis ille fuit mensus est : & recte scribit VI. arcuum parietes exstare : in longitudinem protendi ped. LXXXVI. Aream interiorē latam ped. CXL. longam CCXXIV. Haec ille supplet. sed pedem non addit, quod potissimum erat. Quantum patuerint carceres & singulae arcuationes quam latae, longae altaeve alius suppleat. Tunc tamen ut subduxi rationem, comparato utroque pede, magnitudine par fuit Nemaufensi, angustius Arelatensi : utroque tamen inferius structura. Hoc enim semilateritium est imbecilli operis : & inornatum : illa tota ex lapide secto omnibus numeris & ornamentis perfecta. Pulchrum tamen & hoc fuit, nec me poenitet A FUNDAMENTIS RESTITVISSE. utinam, nunc, tu me Aedilis, PROBES, & quod magis opto, DEDICES.

A R I E S G E R M A N I C U S.

Heilbrunnae, quae Imperii urbs est in vicina Suevia : unius diei itinere supra Heidelbergam, ad eundem Nicrum sita : inter alia ejus loci pulcra, Trabs est abiegnā quadrilatera longa ped. LXXVIII. & semissem, uno cubito minor illa, qua usus est M. Antonius IIIvir in bello Parthico, quae LXXX. fuit : sed illa structulis fuit : haec ex una eademque arbore. Rostrum palmipedale ex solido ferro, retro sub collo crassum & latum dig. IX. minut. II. ante ubi tenuissimum, & velut in promuscidem definit, dig. IV. & semissem. Ea facile fuit omne prohibendi commentum eludere : ut quae faccis suppositis nec averti nec excipi posset, ipsos cum muro perforans : nec caput facile decuti, trabi quasi innatum. Atque id circum circa laminis ferreis longis pedes X. dig. IV. ex capite dictis illigatur. Insuper illae laminae IV. circulis revinciuntur : qui lati dig. 3. minut. II. crassi min. III. Spatium inter eos subinde augefcit : & a primo ad alterum pedale fit : ab illo ad tertium cubitale vel sesquipedale. Ad eundem modum arbor a capite ad imam calcem regrediens

ARIES Heilbrunensis.

Pedes L X X V I I I *Semis*



diens paulatim crescit: ubi lata in imo palmos 111. dig. 11. crassa ped. 1. & quod excurrit: a capite contracta plus quarta parte minor. Id quod factum existimo, ut ἰσόρροπον Ⓞ esset: vel urgens a tergo pondus ruentem per subjectos toros machinam magis atque magis propelleret. Utroque latere annulos habet ferreos XIIII. crassos min. 3. latos in diametro dig. 111. min. 11. per eosdem trajectos rudentes putem ad retinendum vel incitandum. Annulus, qui extremam oram concludit, latus dig. 11. min. 11. crass. min. 18. Haec totius machinamenti Symmetria est: cujus rationem minute & mensurate in pictura secutus sum. Cujus aetatis sit, nunc non inquirō: ex forma tamen videas, quae rudis & adhuc a prima inventionē, posteriore & deteriore aevo natum. Et Valturius simile aliquid pingit aut fingit: & ferrum illud prominulum, quod suo Arieti aptat, plurium laterum facit. Vidisse potuit tale aliquid tunc paullo ante inventis tormentis, & usu receptis: omni hac arietaria machinatione neglecta.

Arietis hujus figuram, quae in nimium spatium porrigebatur, & chartae fines longe excedebat: ad minorem modum reducere, cum ipsi ostendissem, in meam gratiam non refugit, licet mille laboribus obsessus, Vir Eximius, & Collega conjunctissimus, *H. Boerhavius*, qui cum omnium fere scientiarum spatia peragraverit, praecipuum hodie inter Medicos & Mathematicos nomen habet, & Academiae nostrae singulare ornamentum & decus merito aestimatur. Ex ejus ergo delineatione Arietem illum hīc exhibemus.



CLARISSIMORUM ET DOCTISSIMORUM
VIRORUM
E P I S T O L A E,
P A R T I M E X
B I B L I O T H E C A
L E I D E N S I,
P A R T I M A L I U N D E D E P R O M T A E.

CLARISSIMORUM ET DOCTISSIMORUM
VIRORUM
EPISTOLAE.

EPISTOLA I.

BERNARDUS ORICELLARIUS

Francisco Cataneo Diacetio S. D.



Uaeris, quando nos in urbem Massiliam, tanquam in portum, receperimus, quo pacto vitam, quam veteres dixere vigiliam, traducamus. Ego vero tibi cumulate satis in hoc ocio facturum, urbis situm, adjacentisque regionis oram, incolarumque mores describere institui, quo & tu, quod postulas, facilius percipere, & nos commodius narrare, possimus. Massilia in colle haud satis edito sita, triquetra fere forma, aditum tantum habet a terra, quae Galliam respicit & Septentriones: per caetera mari abluitur, quod partim sua sponte se insinuat circumflexo littore, partim opere atque arte immissum, portum supra caeteros, quos vidimus aut audivimus, tutissimum efficit. quippe manufactus parvo abrupto spatio occidentem versus, quo mare includit, intra se aperit inconspicuae latitudinem tam abdito recessu, ut nullam saevitiam maris pertimescat: rursus ab externa vi maleficioque, ferrea catena obducta faucibus, reddatur incolumis. Adjacet & portus genus alterum, quantavis navium patiens, siquidem mare proximum parvulis crebrisque inter se insulis distinguitur, pumicas incolae appellant, quarum pars in dorsum porrecta speciem portus praebet, profundo interjacente salo, vi nulla ventorum represso, ad fidam simul & commodam navium stationem. nunquam enim ibi factum naufragium, memoriae proditum est. Hic locus a continenti distat circiter millia passuum tria, quo, quidquid mare portumque interest, mons continet magna altitudine; cujus radices ab ea parte, quae ad urbem vergit & Septentrionem, portum cingunt in C litterae similitudinem, ubi navalia salinaeque. Caetero autem sinu, qui urbi adjacet, in cornua curvato, constrictum mare molibus iter praebet ad portum obversantibus: quippe ibi profunditate statio navibus commodior frequentiorque usus est, plurimis officinis tabernisque sinum complectentibus, qui erectus in theatri speciem meridiem versus plurimo solis represso albescente mare lucet,

prospectansque adversum montem mirum spectaculum praebet, cum hemicycli forma conspicua ipsa per se, tum ardui montis prospectu, cujus apici delubrum impositum phari instar specula existit, quae velis interdiu, noctu igne, significet modo adventare naves, modo mare a praedonibus quam maxime tutum. ut ibi naturae munere ad illustrandam Massiliam mons constitutus esse videatur. At caetera regio, quae ab urbe protenditur satis amplo interjecto spatio, continetur praeruptis montibus in circuitum ductis. ab his perennes liquidique fontes manant, fluentes per declivem latitudinem, distinctam collibus frequentemque villarum aedificiis, quorum uberior, veluti princeps, modo subterraneo, interdum arcuato opere influit urbem ad libram summae altitudinis: unde per declivia distinguens corrivatos latices castella lacusque ad xxx. efficit, interim salientibus ipsis ad voluptatem & mundiciem civitatis. res digna memoratu, vel si id nulla Massiliae descriptione recenseas, quippe quae referat pristinam antiquitatem. solidum enim opus est, veterisque structurae genere coagmentatum, & quod supra fidem videri possit, minime ad hanc diem cognitum, a quo capite fonteque tamen libertas aquae derivetur, cum ad eum periscrutandum periti homines, aquarum ductu inmissi, ad quatuor milia passuum processerint. Verum ut ad incolarum mores descendamus, ea gens Massiliensium est, ut Gallorum licentia simul admixta commercio cum vetere frugalitate utrumque redoleat. scimus enim, Cicerone Plautoque authoribus, probatissimos omnium habitos Massilienses mores. quin immo Cicero ipse eorum disciplinam gravitatemque tanta praedicatione prosequitur, ut non solum Graeciae, sed fere cunctis gentibus anteponat, laudarique instituta eorum facilius posse existimet, quam adaequari. sunt enim Massilienses, ut in Narbonensi Gallia, cincti undique barbaris nationibus, frugi admodum homines, humanitate & gratia singulari, & qui nullo officii genere vinci patiantur. procliviores tantum in Venerem epulasque quam sat est. foeminis tamen, quamvis in propatulo usus licentior, domi castitas adest supra caeteras, quae Gallias & Hispanias incolunt. His expositis facile cognoscere poteris, quo pacto vitam, ne dicam vigiliam, ducamus. in promptu enim id est, ac veluti e corporis partibus venustas existit, ita ex membris, ut ita dicam, quae ad corpus Massiliae pertinent, oritur vivendi modus, quem sectamur, natura ipsa loci ac veteri studio adducti. Jam primum omnium nullis obligamur legibus, constantisque esse tantum in sola varietate delectat; modo in hortis sumus, aquis vicissim umbrisque refertis, modo ruri, saepiusque in mari. nam quas diximus, pumicae, commodam affluentemque piscationem habent, tinnorum praesertim; quorum proventus, ut est interdum annona feracior, xl. millium excessisse numerum multi affirmant. quippe non magis navium quam piscium statio est, pro regione loci coelique temperie: nam & hi quoque maris faevitiam sentiunt, recepisseque se ex rapidioribus undis in tranquillo gaudent. hinc saepe videas frequens piscatoribus propinquum mare; quorum labor, propterea quod usu minime ingratus est, obversantes magnopere delectat, ipsique praedae suae adesse advenas mirifice afficiuntur. At ager ferarum aviumque fe-

rax,

max, exposita venatio aucupiumque nos non modo delectat, sed afficit: brevi enim indagine quantamlibet praedam reportare facile est. neque mirum rivis interfluentibus colles vestitos multiplici genere arborum arbustorumque gratissimum receptaculum, aviario vivarioque prope consimile, &, quod maxime voluptatem cumulat, necesse est, ut saepe incidas in villas praediaque inhabitantium, qui nos pro more Gallico summa comitate suscipiant, vimque afferant si detrectaveris. alacres enim per se agrestis locus ac maxime voluptarius licentiores facit. ibi mira festivitas, mira hilaritas, ac ita domestica consuetudo, ut jam antea fuisse una saepius futurosque esse diceres. tanta comitate sese Massilienses agunt. His voluptatis illecebris mirum est, quam venuste intersint studia litterarum, quam facile ingenium diutino usu obtusum acuatur, reddaturque in integrum, ut si quid scribendo exaraveris, brevi veluti alter judex accedas, singula undique circumspectando firmiori quodam judicio constituas. Hinc descriptio, quam te authore suscepimus, etsi pro argumento minus eleganter, tamen flumine aliquo succedit. Poteris id percipere e scriptis, quae nuper Pallanti filio misimus, quibus complectimur praelium ad Tarum amnem, in quo pergratum mihi feceris, si tuum de illo judicium solita sedulitate interposueris. scis enim nullo lenocinio magis nos posse affici, quam illa tua Catanea severitate & gratia: Catoniana volui dicere: syllabae me decepere. Verum ut redeam ad seria, omissis jocis, cumula tantas Massiliae dotes, unde oritur vigilia nostra, jam enim ita vocare liceat, tanto adjuncto comite. *Timo Cosinus Scalia* vir integritate vitae, doctrina ac suavitate ingenii singularis. unde illi Timonis inditum nomen. hic Genuae natus claris parentibus, cum exacto aetatis robore sese recipere e fluctibus humanarum rerum destinasset, urbem Massiliam, ubi reliquum vitae tempus degeret, ex omnibus delegit. quod ipsum maximo argumento est urbis situm caeteris omnibus longe esse praefendum. probari enim re ipsa ab erudito homine, qui cuncta fere maria terrasque adisset, vel in maximis laudibus fuisse non ignoras. Cum Timone igitur copulata, quam primum amicitia est, conjunctum studium. nam & ipse taedio rerum civilium, quibus semper adfuit, se litteris & ocio reddidit, quas a pueritia sectatus est. Hinc videres alterum Cavaccium re ipsa philosophantem nos prosequi, frequenter cum eo esse, voluptates omnes, quas supra memoravimus, una capere, tanti viri interventu gratiores. Haec sunt quae tibi habemus referre de ratione vivendi: in quo paraphrasis tua de coelo forsitan brevior orationem postulat, argumentum vero ipsum, quando Timo interveniat, vigilior ipsa vigilia, multo longiorem. Vale.

De *Oricellariis*, Italis *Rucellai*.

Palatium *Oricellariorum* Florentiae olim magnificentissimum exstructum, idemque vel hodieum praecipuis Nobilium palatiis est. est autem in via Vineae, cum opposita porticu, quod inter argumenta potentissimarum in rep. familiarum habetur. architectura satis pulchra est ex delineatione *Alberti*, hominis eruditione clari.

In fronte Ecclesiae D. Mariae Novellae, quae Dominicanorum est, & praestantioribus Florentiae ecclesiis accensetur, legitur:

JOANNES ORICELLARIUS PAVLI F. AN. SAL. MCCCCLXX.

Porro ipsum templi limen, inserto porphyretico marmore, distinctum est in formam tesserae, ejus anteriora habent:

BIR-

BERNARDVS ORICELLARIVS.

Idem procul dubio, qui descriptarum epistolarum auctor est, forte fundamenta jecit, sive, ut vocant, primum lapidem. Ceterum valvae ejus templi pulcherrimae sunt ac pretiosissimae, quemadmodum & tota frons miro artificio magnisque sumptibus ex vario marmore tessellata est. Paulus Jovius Histor. sui temp. lib. 1. *Quae res, sicuti Bernardus Oricellarius, qui tum Florentiae publicis consiliis interfuit, in historiis asseverat.* Scripsit Bernardus de bello Italico, sive de adventu Caroli VIII. Gallorum Regis in Italiam, quae Historia manu exarata servatur in Laurentiana.

Scripsit praeterea de bello Pisano; de bello Tiphernatico; & de bello Milanensi. atque hi libri reperiuntur in bibliotheca Strozzarum.

Fuit & Hannibal Oricellarius, natus e sorore Joannis Casae, Archiepiscopi Beneventani, ut patet ex epistola ejus scripta ad P. Victorium, ante Johannis Casae Latina monumenta. Haec Cl. Brenemannus, Vir Doctissimus & mihi amicissimus, qui hanc epistolam & sequentem mecum communicavit. ceterum Aloysii Oricellarii praestantissimi adolescentis meminit Gualdus in vita Pinelli pag. 352. Edit. Londin. Joannis Oricellarii meminit Pier. Valerian. de infelicit. literat. lib. 11. pag. 58. Carolum Oricellarium laudat P. Victorius lib. x. Epist. 7. De familia Oricellaria & Viris in illa illustribus late agit Eugenius Gamurrinus in Historia Genealogica familiarum Etruriae & Umbriae Nobilium, Italice scripta & edita Florent. 1668. Tom. 1. pag. 274.

Franc. Cataneus Diacetius ex nobilissima & antiquissima Florentinorum familia, quam Scipio Ammiratus in libro Italice scripto de familiis nobilibus Florentinis parte prima in initio late describit, & pag. 12. hujus Francisci, quem Philosophum vocat, vitam & opera recenset, & Benedictum Varchium Italice, Eufrosium Lupum latine ejus vitam scripsisse docet. vide & Ghilini Theatr. Literator. tom. 11. pag. 88. fuit Platonicus, discipulus Mar. Ficini. Opera ejus edita Basileae 1563. cum praefatione Theodori Zwingeri, inter quae Declaratio istius metri Boethiani, *Tu triplicis mediam naturae cuncta moventem*, inscripta huic Bernardo Rucellaio. filiam ejus Cassandram, viduam Caroli Pandolfini duxit Robertus Acciaiolus. vide etiam de hujus familiae splendore & de nostro Francisco, eundem Gamurrinum tom. 1. pag. 309. & seq.

EPISTOLA II.

BERNARDUS ORICELLARIUS

Roberto Acciaiuolo S. D.

NEapoli cum essem, perlegeremque monumenta ingenii, quae Pontanus templi parieti incisa posteris reliquit (erexit enim ille sibi perspectissimo loco aediculam marmoream) ecce mihi senex supervenit, pedisequis nonnullis priscae disciplinae sectatoribus. Tum super ea re habito ultro citroque sermone, denique in eum devenimus, authore me, quisnam e veteribus praecipue deligendus foret, quem in Historia sequeremur. Infederat jam animo, exardescente armis Italia, gesta Caroli mandare litteris, cupiebamque ex doctissimi hominis judicio facere mihi documentum. Igitur Pontanus ad suos conversus, praeludite, inquit, si placet, certamini, ea disserendo, quae proximis Saturnalibus inter bellaria admisimus. Nam quaestio per se digna est, de qua verba multa faciamus: siquidem pauca pro tanta re praecepta Historiae extant. & Ciceronem ipsum, Eloquentiae lumen, scimus se ab hoc scribendi genere abstinuisse. Tunc e condiscipulis alius alia, ut inter coenam colloqui fuerant, recitavere. Utebatur enim senex, reliquiae priscae temporis, vel symposio, ad fovendas aetate simul ac studio confectas vires, relaxandumque ab intentione animum, quo acrior excitaretur. Puccius igitur, cui primae partes in

in triclinio obvenerant, retulit, videri sibi in Historia, veluti apes in favis ipsis conficiendis solent, undique decerpendum esse quod in opus nostrum conferatur, ita tamen composita oratione, ut suis distincta numeris, nostra, non aliunde accersita sit. At *Marullus* pro ingenio non adeo fecundo tutius fore contendebat, ut e veteribus certum scriptorem ad imitandum proponeremus, eumque tanquam ducem sequeremur. Verum quod *Puccius* omisisset de stilo ac genere scribendi id ipsum maxime probare, quod inter arduum depressumque assurgat: ac, ne recederet a Saturnalium licentia, eam in re Venerea sibi maxime dari virgunculam concupiscere, quae primo renitens obluetur, denique cedat expugnata blanditiis. At *Lascharis*, qui tertius in ordine convivarum fuerat, non multum abesse dixit ab ea imitatione, quae certo duce niteretur, dummodo nova nimisque ardua declinaremus. quod autem ad phrasim attinet, eam censere minime improbandam, quae nec ociosa torpeat, nec luxurians lasciviat: atque ut in machinis tractoriis id maxime genus probatum fuisse ab architectis, in quo nihil libramenti deperiret, cunctaque puncto temporis versarentur, ita laudatum in narratione ipsa, si nihil supersit nihilque desideretur. Haec praeludia cum excepisset *Pontanus*, ordine, inquit, agenda quaestio est, primumque de litteris differendum, quae, ut caetera cuncta ab infimo nata, id incrementi habuere, ut Catonis senioris aetate illustrarentur, rudiores tamen quam pro tanto imperio, sed quae majestatem Quiritem veterum retinerent, quippe cum Sabinis jam primum consociata republ. tetricam illorum disciplinam sapere videbantur. Catonem permulti subsecuti, insignes illi quidem eruditione & copia innovationis, verum prae his, quos tulit aetas C. Caesaris, obscuriores. pubescens enim antea Eloquentia tum primum adulta, qua tempestate, ut ex Ciceronis ad Lentulum & Atticum epistolis perspicere licet, magna scriptorum ingenia provenire, & quae fulgore suae claritatis insequentium aciem perstrinxerint. nam etsi posthac homines Graecis artibus maxime dediti in summos viros evasere, candorem tamen pristinae aetatis minime sunt affecuti. licentiores praeterea innovationibus ac lascivienti quadam luxurie extitere, quam vel a Graecis ipsis, vel suoapte ingenio aucupati sunt. fit enim vitio naturae, ut cuncta a parvis initiis orta, ubi ad fastigium pervenerint, nimia sui inconstantia prolabantur. His ita expositis consequens est, ut descendamus ad eos authores, e quibus elicere possimus optimum scribendi genus. Caesar ac Salustius ambo procul dubio inter insignes excellunt. quorum diversa vis ingenii laudem fere parem consecuta est. ille purus, nitidus, fluens, & qui referat dictatoriam majestatem, ingenuo decori conjunctam. hic prorsus elegans, vehemens ac singulari brevitate distinctus. alter refert eundem animi vigorem, quo bella gessit. alter, quae accipit, ita ponit ob oculos, ut res ipsa agi videatur. verum Caesar tanquam seminarium, Crispus lex & exemplar Historiae est: ita tamen, ut morosis ansam fortasse praebuerit insectandi verba excerpta ab Originibus Catonis, redolentiaque nimiam antiquitatem. At Livius ut magna vis aquarum profluens insignem speciem praefert, modo altissimo alveo, modo tenui, interdum rapi-

do, ac freto magis, quam torrenti similis. nam & copiosus, & acutus, & gravis, par Graecis, quos ille aemulatus est, supraque posteros, quibus ille singulari magnitudine praeripuit imitandi facultatem. quippe cui si datum foret, ut Romae ortus patrium sermonem nactus esset, cunctis proculdubio praeponeremus. Post Livium, longe procul a se relinquentem prosequentium turbam, non habemus, quibus nitamur scriptoribus, usque ad Cornelium Tacitum. hic senescentibus jam litteris pristinum nitorem reducere conatus est. consulari enim viro par dignitas fuit, suis nixa viribus priscisque artibus. Verum dum veteres aemulari contendit, longe abest a pristina dignitate & gratia. vehemens tamen & gravis admodum in concionibus: ut hoc a Livio, illud a Crispo traxisse videatur. Superest Q. Curtius, post quem ulterius in Historia progredi nefas esse arbitror, siquidem Vespasiani temporibus, quibus ille vixit, cunctis pro doctrina dignitas defuit in hac scribendi facultate. Hunc e sectatoribus Graecarum artium Alexandri Macedonis gesta, minime prius Latinis celebrata litteris, illustrare, quae ipse vel e Graeco transtulit, vel ita mutuatus est, ut & figuras & phrasim aucupetur, nativo quodam lepore & gratia, ne dicam Venere, conjuncta, non adscita. Haec cum ita sint, nostra quidem sententia est, ut ex his quos praeposui, modo hunc, modo illum pro re atque genio, cui praecipue indulgendum est, ad imitandum praeferamus: dummodo e diversis concentibus concinnemus modulationem, quae ex organo nostro proficisci videatur. Haec *Pontanus*. Sed quorsum tam multa, inquires, *Roberte*? nempe ut intelligas, quae *Puccius* noster caeterique Pontanae disciplinae sectatores disseruere, in castigandis scriptis nostris de Re militari non procul a *Pontani* sententia censuraque abesse.

EPISTOLA III.

JULIUS PFLUG

Ad Menterum, de Dialecticis Graecis & Ciceroniano Erasmi.

Q UOD tardius aliquanto, quam tu fortasse expectasti, literis tuis respondeo, purgarem me multis sane verbis, si tuo in me amoris diffiderem. Nunc vero quia sentio, quanti me facias, illud mihi persuadeo, ut ego mihi dicam, te ipsum pro me esse locuturum. Quamobrem non tam, quod rem necessariam me facturum arbitror, quam ut consuetudini serviam, causam silentii mei tibi breviter exponam. Cum mihi redditae essent literas tuae, idque Lipsiae statim illo mercatus tempore, rescripsissem subito, nisi meum de Ciceroniano *Erasmi* iudicium requisivisses. Cui voluntati tuae cum deesse nollem, erat antea liber ille legendus mihi, quam responderem. Sic enim staturam, iniqui esse iudicis de scripto alieno, causa non cognita, pronunciare. Itaque cum essem tam valde occupatus, rem in aliud tempus differendam putavi, cum vacuus ipse ad me illum librum accurate cognoscendum, & ea quae vel-

velles explicanda dare possem. Sed postea ita cecidit tamen, ut quem oculi fructum speraveram, ille mihi datus non sit. Nam extiterunt negotia non parum multa, quae me a lectione librorum, & a studiis illis, in quibus conquiescere solitus eram, divellerent, quibus quidem negotiis implicitus fui, donec iis, quae mearum erant partium, confectis, caetera in fratrem transfundere liceret. Quod cum non ita pridem contigerit, ut vere affirmare possum, quia intelligis me citius rescribere non potuisse, accipies, si te bene novi, excusationem meam. Ac nunc quidem, ut singulis epistolae tuae partibus ordine respondeam, perjucunda mihi erit gratulatio tua, in qua quidem se ex omnibus partibus amor in me tuus ostendit, ac quoniam me ad amicitiam colendam provocas, non committam ego, ut meum in eo genere officium desiderare possis. Atque utinam non tam longo locorum intervallo diffiti essemus, ut & saepius inter nos congregi, & coram signa benevolentiae nostrae dare possemus. Quod si rarius fiet, quam ego velim, rationem tamen inibo, ut per literas tecum quam saepissime loquar, & de omnibus rebus communicem. Nam cum e maxima periculi flamma ereptus, domum tandem salvus redierim, hunc quasi portum, in quem post longam jactationem inductus sum, eo libentius tenebo. Atque ut desiderium earum rerum, quas reliqui, tolerabilius feram, certum est, in consuetudine hominum mei amantissimorum, quam suavissime conquiescere, vel si illi absentes sint, ex hoc literarum quasi colloquio delectationem petere. Quod autem mihi de otio meo & studiis Philosophiae gratulare, agnosco illud tuum solemne, ut ex commodis amicorum non minorem capias voluptatem, quam si tua essent. Utinam vero tantos in eo genere doctrinae progressus haberem, ut & tu recte gratulareris, & ego tandem, quam tribuis, agnoscere possem. Sed res ita se habet, ut praeclare mecum agi arbitrer, si Academiam illam, in qua Princeps est *Lazarus Bonamicus*, vir aetatis nostrae omnium (quod pace aliorum dixerim) doctissimus, non dedecorem. Venio nunc ad ea, in quibus tu quidem iudicium meum requirens petis, ut de Dialecticis & Ciceroniano *Erasmi* quid ipse sentiam, explicem. Horum alterum faciam sane libenter. Est enim leve, quod imponis, onus, alterum vero facturus sum, non libenter illud quidem; sed tamen, quia tibi petenti nihil negare possum, facturus. Ac primum quidem de Dialecticis accipe. Cum τὰ λόγικὰ divisa sint in partes duas, in rationem judicandi & inveniendi, in utraque longe omnium, qui sunt aut unquam fuerunt, Principem esse Aristotelem, tu ipse optimus es testis. Sed secundum hunc in ratione judicandi, mea quidem sententia & eruditorum omnium, quos quidem ego audivi, primas tenet Alexander, secundas Boëtius. Has ego Ammonio deferrem, si paulo uberior esset. Simplicius esset quidem in Principibus hujus artis habendus, si non aliud ageret. Nam in eo libro, qui in manus meas venit, totus est ἐν τοῖς μετὰ τὰ Φυσικὰ. In ratione autem inveniendi, Ciceronem antepono omnibus. Qui profecto in eam partem non parum lucis intulisse videtur, cum quae apud Aristotelem fusa essent, & quodammodo dispersa, in genera cogeret, ut locos, qui pene infiniti sunt, facilius memoria tenere possemus.

mus. Huic si quis illam Agricolae partitionem *τοπικὴν* addendam existimet, nihil sane impedit. Haftenus de iis, qui *τὰ λογικὰ* persecuti sunt, vel potius de scriptis eorum, quae extant. Nunc vero de Ciceroniano *Erasmi*, quando ita tibi videtur, cognosce, feram autem iudicium, non hercle magis, quam existimem me afferre posse, quod te fugiat, quam ut tibi amantissimo mei morem geram. Ac ne longum faciam, si tanta esset verborum sylvia apud Ciceronem, ut omnia, quaecunque ad dicendum proponerentur, illis ipsis explicare possemus, fortasse neque *Erasmus*, neque quisque alius, Ciceronem solum in ratione Latine loquendi visitandum esse, negaret: sed cum ille non omnia, de quibus dicendum est, fuerit persecutus, nisi de quacunque re proposita loqui velis, vocabula multa ab aliis authoribus sunt mutuanda, statuit *Erasmus*, etiam alios bonos authores imitandos esse. Nam ita mihi ille sentire aut sentire debere videtur. Ego vero, quanquam concedo, multa propria rerum vocabula in Cicerone desiderari, eaque, si opus sit, ab aliis autoribus sumi oportere: tamen illud affirmare possum; si quis Ciceronem solum recte imitetur, eum Latinius, aptius, atque ornatius de quacunque re proposita dicturum esse, quam quemque alium. Nam illud inter Eruditos satis constat, duo esse vocabulorum genera, alterum quidem publicum, alterum vero privatum, illud convenire in omnia, hoc autem singularum scientiarum esse proprium. Publicis Ciceronem abundare praeclare intelligitur, quicumque scripta ipsius diligenter cognovit. Etenim sive docere velis, sive delectare, sive monere, suppeditabit Cicero verba, quibus ad propositum facere possis. Nulla est enim in ullo genere orationis laus, cuius non perfectio aliqua (ipse dixit *Conatum*, ut par fuit viro parum de facultate sua statuenti) in scriptis ejus eluceat. Quare si quis talem tamque praeclaram facultatem consecutus fuerit, quid erit, de quo ille non perbene Latine loquatur? neque vero me movet illud, quod dici solet, privata quaedam vocabula ab aliis autoribus petenda esse. Quasi vero non possimus aliquem recte imitari, si in ea ipsa imitatione adhibeamus aliqua, quae aliunde sumpta sint. An censeres eum, qui in meditatione armorum, aliquem praeclare imitetur, ejusque similis sit in incessu & toto corporis motu, si forte aliud armorum genus arripiat, ab illius, quem imitatur, similitudine recessurum? Hic ne erres, quanquam tu quidem minime erras, sic habeto. Imitationem eam esse rationem, ut vestigia alicujus eatenus persequamur, quatenus tales, qualis ille est, efficiamur. Quamobrem si quid sumam ab aliquo, quamvis illius similitudinem non continuo arripio, fit, ut aliud sit imitari, aliud vero sumere, seu mutuari. Cum praesertim hoc non tam eo pertineat, ut similes efficiamur alicujus, quam ut ab aliquo, quod habere velimus, auferamus. Atque ut tota haec ratio ad id, quod quaerimus, accommodetur. Si Ciceronem recte imitabere, talis eris, qualis ille. Nam tali locutione tam emendata, tamque eleganti uteris, quali usus est ille, eodem modo verba collocabis, iisdem quasi insignibus orationem distinguens. Simili ratione de tenuibus submisce, de mediocribus temperate, de gravibus denique graviter, dices. Breviter, nihil erit in toto veluti corpore

orationis, quod non erit elegans, nitidum, aptum, pulchrum. Hic si aliquot vocabula a Jureconsultis, aut Medicis, aut Theologis fueris mutuatus, non continuo illos imitabere. Nam cum imitationis proprium sit, talem efficere, qualis sit ille, quem sibi aliquis ad imitandum proponat, illud autem sumere ab aliquo aliquot vocabula non efficiat continuo similem ejus, a quo suminus, licebit certe unum aliquem solum imitari in loquendo, etiamsi privata aliquot vocabula ab aliis fueris mutuatus. De qua re ut paulo enodatius agam: Quis existimabit eum esse Ciceronis similem, qui singula illius vocabula, eaque non juncta more ejus proferat? Nemo profecto, qui modo sapiat. Est igitur imitatio posita in conjunctione verborum, atque structura, tum in toto quasi corpore orationis. Quod ipsum si praeclare imitaberis, etiamsi aliquot vocabula ab aliis fueris mutuatus, eris nihilo fecius Ciceronianus, & laudabilis eloquentissimi viri imitator. Quae cum ita sint, poteris tu quidem Ciceronem solum imitando, tibi egregiam Latine loquendi facultatem parare. Egregiam dico? Imo multo praestantior, quam ille habeat, qui omnes alios auctores vel optimos imitetur. Neque id injuria. Etenim si omnes alii boni Latinitatis auctores in unum conferantur, cum hoc uno comparari non poterunt, ut doctissimus quisque magna auctoritate sentit & loquitur. Quis igitur non malit unum hunc imitari, quam caeteros illos tot ac pene infinitos? Huc accedit, quod si varios imitabimur, naturalis ille nitor & succus orationi inesse non poterit. Ut enim ex varietate cibi malus gignitur sanguis, & ex eo color non bonus: Ita si ex variis stylis unam orationem confundas, eam sanam esse posse & bellam, verisimile non est, perinde ac si illam naturalem quasi sanitatem orationi ademeris. Obsecro te quo reliquum feceris, quod vel splendorem, vel decus habeat? Quamobrem si constitutum est illud, Ciceronem unum imitandum esse, ut ego nihil addam praeterea, per te statuere poteris, quid ego de Ciceroniano *Erasmi* sentiam. Haec fere sunt, quae tibi quaerenti respondeam, respondenda esse putavi. Quae quidem tum mihi verissima esse videbuntur, cum ea a sensu tuo minime abhorrere intellexero. Libros Pandectarum Norinbergae imprimi arbitror te audisse. Adjicientur illis, ut spero libri autenticorum Graeci: opus erit praeclarum & bene emendatum. Vale, ac mihi quam primum rescribe. Cal. Decembr. Anno M. D. XXVIII.

EPISTOLA IV.

NICOLAUS NICOLAI

Hadriano Nicolai Mario, Advocato magni Consilii, Fratri carissimo S. P.

Mechliniam.

FRATER carissime. Scripsimus nuper satis prolixè ad omnes, respondimusque ad singulas literas vestras, quanquam id properanter, quod tunc in eo essent negotia, ut statim mittendus veredarius crederetur: qui quum hætenus retar-

Cc 3

da-

Quaedam Epistolae Joannis Secundi & Nicolai hujus editæ in Appendice Gudianar. n. LII. & seqq.

datus est ob ingruentia negotia, visum est has tibi superadjicere, ut aliae nostrae literae minus vetustae tibi videantur.

² Cursus tuus glacialis quantopere placuerit nobis, ex aliis nostris literis intelligere potes: Vetustatem illam plane refert, & miram majestatem habet. Quaedam tamen (ut cuique sua est sententia, & ut delicatuli sumus) communicato inter nos consilio, mutari non incommode posse censuimus, ut ex exemplari, quod tibi mittimus, apparet. Quorum etiam rationem nonnullam adscribere libet, ut intellectis nostris consilis, ipse judicare possit, an ratum habere debeas, quod nos sine ullo praejudicio fecimus. Versus ille, *Si qua tamen dubio fallit te litera tractu*, ne omnino furtivus esset, pro (*tractu*) mallems *ductu*: scis enim idem apud Propertium legi. Adde quod *ductu* suavius est atque aequabilius, praesertim hîc, ubi nihil durum requiritur. quamquam hoc parvum est. *Dein liquidum immotis prolabitur aëra pennis*: pro *Immotis* maluimus *tacitis*, ut versu magis fluente ac dulciore, melius ille volatus expriniatur: nam & ipsum verbum (*immotis*) gravius quiddam sonat, & collisio illa, non constantem illum & lenem volatum, sed perturbatum & ruptum magis significaret: quod discreparet a tua descriptione, & si verbera alterna alarum describeres, non malus esset is versus, quemadmodum nos in³ Hodoeporico nostro versum fregimus, ubi remorum ictus graves atque aequae distantes, defatigato ac laborioso magnarum avium volatui comparamus, hoc modo

Haud aliter quam si tepidum protensus in Auslrum,

Arctoasque nives horrentiaque arva pruinis

Effugiens, longo distinctis ordine turmis

Grus volucer cava remigibus natet aethera pennis.

Ubi male dicturus fuisse videor, *Grus cava remigibus volucer natat aethera pennis*:

Talos junctos facili arte locamus: Nos mallems, *talos facili simul arte locamus*, aut tale aliquid: nam iis verbis, *facili arte* difficultas magis & labor exprimitur, quam facilitas, ob interruptionem atque hiatum sive absorptionem, ut vocant.

Sicut in immenso pelago &c. Dignius videtur, *Immensa velut in pelago: Vertitur ad clavi motum*: *Motum* humile videtur neque satis expressum, in comparatione tam bona: quare, mallems (*nixum*) aut aliquid simile.

Circulus apparet circum spumantibus undis. Quum haec comparatio egregia sit, & plena rei, mallems *spumantis aquae*, ut videlicet in majestatem quandam versus desinat. Adde quod *undas* saepius in hoc carmine habes. *Immotae stantes triduntur*. Verbum *triduntur*, praeterquam quod rude est parumque decorum, violentiam etiam habet, quae neque ipsi rei convenit, neque cum facilitate ejus, quod sequitur (videlicet *aequora tranant*) satis quadrat: quare (*vertuntur*) maluimus supponere:

Illasque Hollandis primum monstrasse colonis.

Unde olim trepidae nomen duxere tenentque.

Hi-

² Vid. Poëmata Hadr. Marii pag. 72. ubi videbis pleraque ex sententia Nicolai emendata.

³ Nec hoc inveni in editis Nicolai carminibus.

Hi duo versus parum nobis placuerunt: parumque te digni, & cum caeteris non comparabiles visi sunt, sed magis Horatiani, & qui praeter mensuras parum haberent. Qualis & ille nobis est iudicatus, initio carminis. *Et in calamo tibi liquor, haec dum scribo, gelatur*: quamquam hunc tamen reliquimus tuo iudicio: Duos illos frater *Joannes* sustulit, inque eorum locum, octo alios plenos atque amoenos, uti res requirebat, substituit, hos versus

Ac primum Batavis artem monstrasse colonis:

Unde etiam crepidis regionis nomen adhaesit,

Raraque jam Batavos ignorat terra cothurnos,

Quos augusta colit per aquosas Flandria valles,

Et secunda Brabantiacae per flumina gentes,

Cymbrique, Morinique, & gens infrena Sycambri,

Et fumosa cavis algens Germania campis,

Et quoscumque premunt glacialis sydera plaustri:

Sringit Hyems undas.

Quod saepius habeas, *undas*, mallemus *latices*, aut simile quippiam, quod ipsum dulcius esset, magisque responderet amoenitati terrae, de qua loqueris.

Sed haec omnia (ut dixi) sine praeiudicio melioris sententiae fecimus. Neque dubitamus, quin optimam in partem sis accepturus: Certe ego plurimum te oro, ut idem in ⁴ *Narcisso* meo, inque epistola Elegiaca, aliisque omnibus meis facias. Quis enim nescit plura a pluribus animadverti, & aliena iudicia, ut liberiora, ita fere meliora esse: Nam blandiri nobis ipsis solemus atque indulgere.

Scripsi *M. Everardo* fratri de statu magistri *Jasparis* in Hollandia pro te sollicitando: quod si isthic impetrari non possit, me hinc sollicitaturum. Neque est quod desperes te obtinere posse: Itaque tibi suadeam, ut magno animo id sollicitari cures.

Rotulum brevi confice, ibi quoque tuum negotium agam, nam & ego intererem ei rei.

Prothocolla & chartas magistri ⁵ *Francisci*, fratris nostri defuncti, cupio, ut colligas, ac seponas mihi in meum reditum, qui erit cum volam: vellem autem brevi, ob malas has solutiones, si isthic vacaret bonus status, qualis est griffia vestra, quae mihi jam satis promissa est: sed nescio quid facere expediat: Nam si expectativam illius accipiam, & postea non vacet illa, vacent autem alia, ea res mihi damnosa futura esset. mirum autem quam senex ille *Vander E* nondum velit mori: Tu mihi scribe de illius mala valetudine, si gratum facere cupis: Quod si contingat illum mori, pro me statim sollicitetur. Quod si debilius fiat, aut aegrotet, & resignare velit suum statum sub pensione parva, aut saltem tolerabili 200. aut 300. florenorum annuorum, fortasse non incon-

ful-

⁴ Vid. *Nicol. Grudii Eclogam Narcissum*. p. 151.

⁵ Hujus *Francisci* nulla mentio fuit in commentario de Gente *Nicolai* post *Jo. Secundi* Poëmata: ubi pag. 449. *Nicolaus Everardus* dicitur quinque filios *Petrum*, *Everardum*, *Nicolaum*, *Hadrianum* & *Johannem Secundum* reliquisse. memorat *Valer. Andr.* in *Bibl. Belg.* pag. 236. *Franciscum Nicolai* quendam, Ordinis minorum Monachum, sed de ejus gente aut patria nihil addit.

fulite fuerit id aggredi, quanquam magis e re atque honore meo esset, si libere ad eum statum aut titulum pervenire possem: possem autem, si vacaret. Nam (ut libere tibi dicam meam sententiam) ut me invitum revocari non patiar contra honorem meum, ita si mihi hic satis factum, satisque provisum esset, nihil minus facturus sum, quam me rursus fortunae, & istorum finantiariorum fraudibus atque injuriis exponere: sed contra curabo, ut ab illis non dependeam: quod per id officium fieri posset, quum a principe non habeat stipendium, sed a vulgo. Quod si mihi aliquando contingat, & tu Mechliniae resideas, hoc tibi libenter praestare cupiam quod nunc *Joanni*, ut mecum honeste ac citra tuam aliquam impensam agas, unaque vivamus hilariter. nam id omnino statui, & praetera Dominam Matrem nostram apud me sine ullo suo sumptu alerem, quamdiu illa vivet, & mihi unde victitemus Deus concesserit. Scio enim illi parum superesse, & non libenter eam in tanta puerorum turba degere, neque libenter oneri esse fratri: ut ut res habeat, Deus suam voluntatem faciat. Bene vale: meque singulis commenda: E Toletto die 25. Martii 1534. Hodie hinc ad vos redit *Joannes Schamelardus*, *Ludolfi* nostri frater, videtur enim illi displicere Hispania: Ei dedimus Caesarem unum gypseum, unamque effigiem meam: per postas mittemus alias ex metallo: quia metui-
mus ne gypseae rumpantur continuis quassationibus.

Repperi inter scripta manu *Bonaventurae Vulcanii*, commentarii formam de Gente *Nicolaia*, ex qua & *Scrivarium* multa hausisse video; sed ego in tabella brevi hinc eam exhibere utile putavi. Caput, unde reliqui fluxerunt, fuit *Everardus a Gripskerke*, hoc enim nomine quidam ex posteris etiam usi, cujus filius *Nicolaus Everardi* Middelburgensis, J. C. Senator Mechliniensis, mox Praeses Hagani Senatus, inde Senatus Belgici Mechliniensis praeses. obiit v. Idus Aug. 1532. hic habuit filios sex. I. *Petrum Nicolaium*, Theologum ordinis Praemonstratensis, de quo vide *Joh. Secundi* Poëmat. p. 188. II. *Everardum Nicolaium* Praesidem Senatus Frisiaci, mox Mechliniensis, qui Equestri dignitate auctus obiit A. 1561. III. *Nicolaum Nicolaium*, *Grudium* dictum, quia Lovanii natus, Philippo II. Hispaniarum Regi a consiliis, & Ordinis aurei velleris ab actis. qui reipublicae causa in Italiam profectus obiit Venetiis 1571. & a Senatu Veneto honorificis exsequiis elatus. IV. *Hadrianum Marium*, ita dictum, quia *Hadriano* & *Mariae* die sacro natus, Advocatum Mechliniae. qui deinde *Francisco Cranenburgio* successor datus, Gelriae Cancellarius, obiit, Bruxellis 1568. Mechliniae in tumultu patris conditus. duxit *Petri Bloccii* filiam. vid. ejus Poëmat. p. 67. v. *Joannem Secundum*, Poëtam eximium, qui apud Nervios obiit, conditus in aede S. Amandi 1536. natus annos fere xxv. Errat autem vir doctus, H. V. R. qui nuper Belgice edidit Antiquitates Delflandiae & p. 412. Tornaci in aede S. Amandi esse conditum scribit, cum oppidulum, ab aede illa ita dictum diversum sit a Tornaco. VI. *Franciscum*, cujus nulla a *Scrivario* mentio, sed quem *Nicolaus Grudius* memorat hac epistola. praeterea *Isabellam* vel *Elizabetham Nicolaam* Virginem sacram, Latine doctam & pingere peritam. vid. *Jani Secundi* Poëmat. p. 146. ex *Everardo Nicolaio* nati *Carolus Nicolaus* Frisiae Senator, & *Arnoldus Nicolai* Praeses Hagani Senatus, cujus meminit *J. Douza* fil. Poëm. pag. 89. ex *Nicolao Grudio* duae filiae, *Maria*, quae nupsit *Georgio de Lynde*, & *Helenae*, quae ex *Henrico van Ameyde* protulit *Arnoldum van Ameyde*, ad quem, credo, est Epistola Lipsii 1601. *Cornelii Nicolai* Senatoris mentio est apud D. *Heinsium* in Poëmat. p. 15. qui cujus filius fuerit ignoro.

EPISTOLA V.

NICOLAUS NICOLAI

Hadriano Mario S. P.

Cariſſ. frater. Scribis te quaedam adhuc fratris carmina deſiderare, quorum titulos ſive catalogum manu ipſius habeas: De quibus quid ſentiam accipe. Hexaſtichum ad Alciatum, id eſſe puto, cujus initium, *Aureus hic Phoebus* &c. eſtque in libello fratris. Elegias duas ad Neaeram arbitror eas eſſe, quae in Neaeram ſcriptae extant in libro ſecundo elegiarum: Epigramma de Helena & Menelao, nunquam vidi, neque opinor ab illo conſcriptum fuiſſe, ſed conceptum: Id ipſum etiam judico de epithalamio funeſto, quandoquidem ne nomen quidem unquam ab illo audivi, neque tu, opinor: & ſolet ille, quoties aliquid carminis fecerat, id nobis vel per literas communicare. Elegiam ad *Saratum* tibi miſi, & accepisti, ut tuae teſtantur literae. Diſtichon de Nevia illud exiſtimo eſſe, in quo ponit comparationem nobilis canis, qui tamen lingat os canis ignavi. Epitaphium Legati Angliae vidi Montifſoniae: id eſt in manibus Doctoris *Rodolphi* Cantoris Caſarci, quo adhortante ſcripſit, Eſt, ut memini, heroicum, decem fortassis aut duodecim verſuum, Neque eſt, meo judicio, quod illud magnopere moremur, vel ſi quae alia minutiora deſideramus, quum plurima habeamus praeclariffima. In his quaecunque mutafſe te ſcribis, judicio tuo libenter ſubſcribo, Ego quidquid illius habebam nuper per *Cornelium* ad te miſi, qui mihi abs te literas rettulit: rurſum autem excuſſi chartas meas, neque aliud invenio. Epitaphium fratris *Petri*, ſic ut ad me tranſmiſiſti, publicandum cenſeo.

Tetraſtichum tuum non elegantia modo ac facilitate, ſed ipſa etiam brevitate mihi placuit. Vereor tamen ne lectores non ſatis plene mentem fratris intelligant. Itaque fuſius ego idem argumentum ſum proſequutus, relictis tamen omnibus pene Verſibus tuis integris, quantum quidem licuit propoſitum ipſum ac thema nonnihil varianti, nam tu ad libellum, ego ad Grammaticos ſermonem habeo:

Ad Grammaticos, quur ſcribat laſcivius.

Carmina quur ſpargam cunctis laſciva libellis

Quaeritis? inſulſos arceo grammaticos.

Fortia magnanimi canerem ſi Caſaris arma,

Factave divorum relligioſa Virum,

Quot miſer exciperemque notas? patererque lituras?

Quot fierem teneris ſupplicium pueris?

At nunc uda mihi quum dictent baſia carmen,

Pruriat & verſu mentula multa meo,

Tom. II.

Dd

Me

¹ Legitur pag. 104. Edit. Scriver. quaedam vero non repperi inter poëmata Secundi.

² Ad eum eſt Epistoła lib. 1. 13. & Nicolai Grudii lib. 1. Epist. pag. 182.

*Me legat innuptae juvenis placiturus amicae,
 Et placitura novo bella puella Virò,
 Et quemcunque juvat lepidorum de grege Vatum
 Ocia festivis ludere delitiis:
 Lusibus at tetrici procul hinc absistite laetis
 Grammatici, injustas & cohibete manus,
 Ne puer, ob molles caesus lachrymansque lepores,
 Duram forte meis offibus optet humum.*

Habes judicium meum, quod ipsum tamen tuo subjicio. Expecto tempus illud quum omnia nitide conscripta tu ipse huc deferres, unaque relegemus. Hagae 24. Octob. MDCCXXXVI.

EPISTOLA VI.

NICOLAUS NICOLAI

Hadriano Mario S. P.

REmitto poëmata *Secundi* fratris. semel atque iterum relegi, & mutavi quaedam, ut videbis. Atque inter alia folio 187 pro eo quod scripserat, *Aut qui Pegasea labra rigavit aqua*, ego reposui, *sed qui Pegasea* &c. Nam cur neget hoc loco te poëtam esse, quum ubique id jactet, & quidem statim post aliquot versus, ubi dicit, *Annuat intonsa Phoebus & ipse coma*:

Item fol. 209. *Quod Flandria palmas non habeat*, pro eo quod ille scripsit. *Aptat Idumeas olim tibi Flandria palmas Evinctura caput rami victoris honore*, Ego scripsi sic:

*Plectit odoratas tibi Flandria laeta corollas
 Terra parens, cinctura caput redeuntis Alumni.*

Et quum admonueras quibuscunque tuis locis *Titus* primam haberet brevem, mutavi in Elegia ad *H. Montium* sic:

Quales Strozigenae laus, & duo sydera gentis.

Tu poteris reponere sicut erat, aut aliter mutare. Illud libenter admonuerim, mihi non videri expedire, ut edantur ea, quae vel de ¹ Rege Francorum, aut Delphino scripsit. Caeterum quod dubitabamus an Glyconium Carmen primo loco Trochaeum reciperet aut Jambum, id Ninivita mihi dissolvit, dum ait: Utrumque horum recipere, non solum spondaeum. Citat Horatium oda 15. lib. 1. *Ignis Iliacas domos*. Catullum. *Puellae & pueri integri*. Marullum etiam, apud quem nullo discrimine passim invenies. Quanquam de iis, quae ad Odas pertinent, sicuti & de aliis, certius judicabit Goclenius. In Elegia 6. lib. 3. *Et tu sturne loquax cum das imitate volumen*. Videndum an id sit sturnus, quod ipse putat, nempe een spreeuwe. Tum in dialogo Polyph. & Nept. an grammatice positum sit *Neptunie* vocandi casu.

Item

¹ Nescio an Innuat epitaphium *Francisci Valesii*, Delphini; quod in editione *Scrivneriana* est pag. 196. satis acerbum.

Item in epithalamio. *Murmur* pro querimoniis reponens, videndum quanta sit syllaba *mo*:

Ea quae tu mihi misisti abs te emendata remitto: tuae enim limae prorsus accedo. quare judico ponenda suo quaeque loco. Epistolae ad *Ottingerum* duo misisti exemplaria: quorum alterum auctius est, & multis locis emendatum: quare arbitror id esse postremum ac recognitum. Itaque sic edendum censeo inter epistolas idoneo loco. sed duobus adeptis versibus, qui etiam in altero minori exemplari non sunt, nempe. *Hoc canat, ut nemo per te tamen inclyte dignum Servet in extenta posteritate locum.* Aut omnino eos ego non intelligo, aut *Ottingerum* ridet: sed tu mihi scribes tuum iudicium. *Surius* legit prope omnia, & vehementer probat. *Rumoldus* legere non potuit per occupationes & itinera. *Conradus* facile erit unus pro omnibus, si modo volet, (quod confido,) diligenter evolvere. Ipse autem illum per literas id summopere oro. Gaudeo D. Matrem plane convaluisse, atque utinam sanitas illi diuturna sit. Ei me commendabis diligenter. Cupio autem ex te scire (nam facile expiscaberis) an ipsa ad nos ventura sit. Nam conduxì novam domum, quae ei esset commodissima, nempe domum *Treslongue*, quae est proxima Magistro *Arnoldo Gaes*, & non longe a sorore, ut scis. In eam immigrabo mense Majo, aut citius. Et conduxì in multos annos. Bellum Tunetaeum Fratris brevi remittam. *Arnoldus Cobelius* nondum venit, quare neque *Palingenium* adhuc vidi. Scire cupio, *Steelfius* habiturus ne sit characterem illum, de quo tibi dixeram, & cuius praelo commissurus sis Fratris opera. multum enim refert habere diligentem ac doctum typographum. Et nescio quam gratiam conciliat character. mitto tibi literas ad *Conradum*, ubi legeris, obsignabis, item ad *Trifonium* fororium meum. Vale. Hagae 5. Novemb. 1537.

EPISTOLA VII.

NICOLAUS NICOLAI

Hadriano Mario Fratri S. P.

GRatiam tibi maximam habeo, mi frater, quod tam libere atque exacte me admonueris tui de apotheosi mea iudicii, & quae mutata maluisses, nisi jam divulgata essent exemplaria. Id quoniam nunc integrum non est, restat ut tibi scrupulos eximam, qui offenderunt. Primum non satis probas, quod *denam noctem*, pro decima, dixi: quod *denus* non aliud significari videatur, quam decem. Ego, quanquam ad manum non habeo exemplum, tamen ratione ipsa adductus sum, ut sic non vererer loqui. Quum enim *denus* & *dena* nomen sit distributivum numeri pluralitatem significans, non quidem mirum est, si pro decem accipiatur, quoties aliud nomen adjungitur numeri pluralis: sed quum nomen apponitur singularis numeri (ut in meo carmine,) non potest decem significare, sed decimam. neque interea dubito, quin facile exemplum inveniri possit inquirenti: mihi certe nunquam dubium fuit quin

ita dici recte posset: Quod pertinet ad illud. *sollicitumque tenet*, ubi tu maluisses *sollicitumque habuit*: crede mihi, sic me initio scripsisse, sed studio mutasse, maluisseque & hiatum eo loco, ac praesertim in dictione trisyllaba, evitare, qui mihi nunquam placuit, & simul praesentis temporis verbo uti, ut maiorem continuationem doloris mei ac sollicitudinis exprimerem. Nam quod sequentia, ubi *oppressit* praeteriti temporis verbo explicatur, movere non debet, quum quae ibi significantur, longo temporis intervallo post longam & variam sollicitudinem accidisse innuantur, quum addam, *tandem*. neque aliqui novum aut infrequens est poëtis, praesertim Ovidio, subinde eadem etiam in re verborum tempora & modos variare: ut ubique est obvium, neque exemplo eget: Quin & verbum *distendit* praesentis temporis judicari oportet, non praeteriti. Illud miratus sum, te mirari aut dubitare potius, an recte sit quod dixi, *Innitens pectora*, quum fatearis te legisse *Innixus pectora*, imo superstitiosum mihi videtur hoc tuum iudicium. *Mityleneum* pro *Barbarossa* dixi, quia apud *Consentinum* quendam, qui Tunetensem expeditionem scripsit, legi ex Mitylene ortum: In quo si erratum est, (quod facile credo,) non tamen capitalis est error, quum sit error facti: Et meo iudicio nihil admodum vetat, urbem Genuensium, quam vulgo *Metelen* vocant, *Mitylenem* dici a Latinis; quemadmodum in Hispania quoque *Carthaginem* dixerunt, quae *Carthagenia* est. Et scis aliqui, quam licentiose etiam prisci scriptores in propriis urbium, locorum & fluviorum nominibus luserint. Quare non admodum in hoc torqueor: & quanquam clarius fuisset, quod tu censeres, *Barbarossa*, tamen quum secunda omni ratione brevis esse debeat, non ausim eo loco ponere, etiamsi, (quod nunc non est) integra adhuc res esset. sed de ejusmodi videbimus, quum rursus edetur. Venio ad verbum *distenderis*, quod tu longe aliter intellexisti atque ego: tu enim pro torqueris aut cruciaris esse positum credidisti, quum ego *distendi* dicam eum, cujus animus ita distrahitur in diversas undique cogitationes, ut nusquam haerere possit, neque certo constituere quid primum quid postremum aggrediatur: quod potissimum fit, ubi spacium non est ad multa peragenda. Atque ut libere dicam, ipse mihi valde placui eo verbo, tanquam significantissimo atque aptissimo ad id explicandum, quod volebam. Neque sane sine auctore sic usus sum: sed Ovidium secutus, qui in Consolatione ad Liviam de Drusi morte, sic ait. *Nec tua te pietas distendit amore duorum*: quem locum ubi videris, abunde tibi fatis factum dicis, opinor. Illud postremum est inter ea, quae notasti, quod *quamdiu* pro spondaco pede usurparim, quod plane perperam factum pronuncias, neque posse subsistere. addis rationem hanc, *diu* dissyllabam esse dictionem.

Id, mi frater, non ignoro: Itaque antea sic dixeram. *Exspectate diu*. subdis, priorem brevem esse, posteriorem longam. Ego posteriorem ambiguum credo: quum meminerim legisse me tale aliquid in versu pentametro, *morte mea non diuturna mala*: quanquam nunc non succurrit auctor. sed sive longa sit sive indifferens ultima, parum operatur, quum frequentissima apud omnes veteres sint exempla, ubi vel duae breves, vel brevis & longa vocales in unam

contractae, unius longae vicem sortiuntur. sic dixit Catullus. *Et Diis invitis desinis esse miser*, & *O Dii si vestrum est misereri*, Et, *sed de Posthumii & Corneli* narrat amore, Item, *deserto in Mallii nomine opus faciat*. Item, *At Volusii annales Paduam morientur ad ipsam*, & Propertius dixit, *Et qui nunc nulli maxima turba Gabii*. Item, *Tunc animi Volusi Decii Brutique secures*. Sed fortassis haec tibi non satisfaciunt neque similia videntur, quum fiat contractio ex similibus. Ut ex duobus ii. Quare audi Virgilium dicentem in Pharmaceutria: *Uno codemque igni, sic nostro Daphnis amore*. & Propertium dicentem *laeserat abiegni venter apertus equi*. Audi similiter Catullum, & in vocales contrahentem, quod plane meum est exemplum, quum ait. *Caelius Amphilenum*, & *Quintius Amphilenam*, *Flos Veronensium depereunt juvenum*. Sed non necesse est conquirere tam multa exempla, quum res nota sit: quanquam eo plura hîc congeffi, quod tu prorsus negaveras meum *quamdiu* posse consistere. Arbitror, mi frater, his tibi satisfactum esse, id quod ex proximis tuis literis intelligere certe cupio. Vale. Bruxellae postridie Calendas Apriles 1549.

EPISTOLA VIII.

NICOLAUS NICOLAI

Hadriano Mario S. P.

FRater Amicissime. *Theodorum Bezam*, quem ad me misisti, satis diligenter legi: & placet quidem mihi summopere illius vena atque eruditio. Quanquam autem quaedam a te annotata depraeendi, alique non nulla damnare in illo nisi sunt, me certe tamen tam rigidum censo rem non est habiturus. Atque ut ea percurram, hominemque, quantum possim, excussem. folio 8. versu 20. *Occidite, at noscent*. &c. legendum haud dubie est, *'Occide'*. Nam ad *Antonium* solum sermo convertitur: quod ex sequentibus statim versibus apparet. Et alioqui verisimile non est hallucinatum fuisse tantum virum, in ea praesertim quantitate, quam alio in loco, ut in epitaphio *Jo. Dampetri*, egregie observaverit, ubi sic cecinit. ² *Ergo haud occidit ipse, quod putaram: Occidit potius suos amicos*.

Fol. 11. versu penultim. *ebrio*. minime sane est erratum: quum omnis vocalis ante consonantem cum liquida sit indifferens: unde *tenebras* & *tenēbras* dicimus. Virg. *clausae tenebris* & *carcere caeco*. Martial. *Somnus qui faciat breves tenēbras*. & idem Virg. *docuit quae maximus Atlas*. Martial. vero. *Non aliter ridetur, Atlas cum compare gibbo*. Sed sunt ejus rei exempla infinita.

Fol. 14. versu. 19. *Pro patriae afflictæ rebus* ³ *publicaque salute*. Eadem plane ratio est cum superiore.

Dd 3

Fol.

¹ Ita legitur in tertia editione, quam habeo: pag. 73.

² Pag. 96.

³ Correxerit postea Beza, *populique*: pag. 79. nam nullo modo syllaba natura sua longa brevis fieri potest, propter consonantem cum liquida.

Fol. 56. in Xenophontis imagine. *Et literas Pallas &c.* Studio nimirum primam corripuisse videtur, non aliter quam *līturas* dicimus: quia vero utrumque vocabulum a *līno* verbo procedere judicaverit; in qua sententia (Calaepino aliisque grammaticis testibus) multi fuerunt: quae mihi quoque fit verisimilis. Etenim si per se longa fuisset *i* litera in priori syllaba, neque opus fuisset, neque usu receptum, ut *t.* litera geminaretur: sicut in voce *quattuor*, quoniam *a* breve est natura (quod apparet in illo Virgilii. *O terque quaterque beati*) ideo *t.* literam geminatam fuisse constat, sicut *l.* in *religio*. Et memini me apud Joachymum Camerarium invenisse *quatuor* prima brevi.

Fol. 64. de Aldo Manutio. *Didonis cecinit rogum disertus Maro, Pompeji rogum Lucanus.* Pronunciandum est sine controversia *Pompēii*, ut sit quadrisyllabum. Quod vero primam *Lucani* brevem fecerit, error non est: quum in propriis nominibus atque agnominibus primae syllabae variare soleant: quorum sunt plurima apud probatissimos poetas exempla. Sic dixit Virg. *Italiam facto profugus*: & idem, *Italīs longe disjungimur oris*.

Idem dixit. *fluctus nimbosus Orion.* Ovidius autem *strictumque Orionis ensē*. Nam quod *Lucanum* quidam a *luce* dictum putant, non habet idoneam certitudinem. Quid? quod ipse quoque Beza in suo agnomine variavit, quod quum fere prima longa ponat, tamen fol. 87. dixit. *omnes delitiae latent Besaci*, quod certe non nisi studio factum esse credi debet.

Fol. 64. in eodem epigrammate. *Vitam reddere quod queant sublatam.* hic rursus est consonans cum liquida, ut in nomine *Atlas*.

Fol. 65. *Ieiunus sobrium mihi Platonem.* eadem est ratio, quae supra in *ebrio*, & in *publica*, & in *sublatam*.

Fol. 73. *sobrius ad sobrii prandia fertur Amor.* Eodem iterum modo dixit; & quasi ostendere vellet indifferentiam (ut ita loquar) eodem in versu, eandem produxit & corripuit. Quale quiddam etiam respexisse videri potest Lucretius, quum ait. *Crassaque conveniunt liquidis & liquida crassis.*

Fol. 79. *Sic servitur avare, non amatur.* *Avare* nomen est vocandi casu, non adverbium:

Fol. 87. *Mi pes, dic mihi, tenelle mi pes.* Annotari hoc necesse non erat, quando & typographus ultro inter errata indicavit, sic esse legendum. *Mi pes, dic mihi, ô, tenelle mi pes.*

Fol. 88. *Qui te in astra ferant ubi sublimis.* Rursus est consonans cum liquida: & alioqui videtur delectatus fuisse Beza, indicandis ejusmodi, fortassis ut scrupos eximeret nimium superstitiosus.

Fol. 95. *Quum velis Uxorem.* Hoc solo loco dubius sum: neque fatis possum conjicere. Quare non quidem ita ab autore scriptum, sed (ut fit) mutatum temere ab alio fuisse crediderim potius, quam insignem & eruditissimum (quod fatis constat) virum erroris insinulaverim. Tametsi, totum illud de Uxore ducenda & de non ducenda, quod sub nominibus Pontici & Cornelii est, mihi quidem frigidius videtur, quam ut audeam affirmare a Beza conscriptum: quod ipsum etiam judicavit noster *Betsius*, praesertim de ea parte, qua con-

conjugium dissuadet: fortassis, quod pueret tam cito poenitentiam profiteri sui instituti. Ut ut est: mihi certe valde placet *Beza*, & eo nomine multum ei debemus, quod de fratre nostro ⁴ *Secundo* tam scripsit inigne testimonium. Audio hominem ex Galliis profugisse ad Helvetios, neque tamen causam fugae intellexi: suspicor autem Invidiam sibi conflasse, eo epigrammate, quo *Dolletum* celebrat, hominem atheum, Parisiis iudicio publico concrematum. Quod epigramma utinam non edidisset.

Opera *Joannis Secundi* relego, ut rursus edi possint. Inveni autem duos insignes errores, quos emendavi: primum in Elegia tertia primi libri. *Nec mihi deficiat calor hic hyemantibus annis.* neque enim *deficio* dativo jungitur, sed accusativo. quare scripsi *me deficiat*. Secundus error est in epigrammate ad *Petrum* quendam. *Quum tu sis levior.* &c. ubi *atomos* masculino genere protulit, quum sit foemini generis nomen. Itaque pro *quique* scripsi *quaeque*. *quaeque sole puro Per leves atomi feruntur auras.*

Revidi & mea nugamenta: quae, si tua poemata statuisti edere, possemus omnia simul excudenda & coniungenda curare. Quare velim, ut quid cogites, mihi scribas, ut & ipse constituam. Bene vale, Bruxellae die XVIII. Decembris 1549. Cuperem nos iterum revidere nostra poemata, & propterea communicare tibi translationem prioris libri *Cortesani*, quae statui edere, sine nomine, ut iudicium hominum intelligam tacitus atque in tuto.

⁴ Pag. 149.

EPISTOLA IX.

NICOLAUS NICOLAI

Hadriano Mario S. P.

FRater optime. Perlata ad me sunt tua poemata cum literis iis, quas Ruremunda dederas: quibus deinde successerunt alterae Venloae datae. Praefagium ejus nuncii de morbo tuo, non est cur tibi suspectum sit, aut mali ominis loco habeas, quando comperi a Vate non nimium veridico profectum esse, nempe ab Actuario rerum isthic feodaliū. Poemata illa tua legam summa cura, & si quid minus arridebit liberrime admonebo: Idem a te in meis fieri postulans. Sed mea nondum mittere possum, quod unicum adhuc exemplum habeo. Expecto autem in horas singulas adolescentem eruditum & scribendi elegantia praestantem, qui describat. Interea *Georgii Rotalleri* Sophoclem accipe. *Vida* meus ad manum non est. Nam etiamdum vagatur Andoverpac: ubi redierit, ad te ablegabo. Mitto interea exemplum epistolae, qua ille ad *Honoratum* scribens, epigramma sibi de ipso meum placuisse testatur. Id erat ejusmodi

¹ *Eridane, aequareas longe qui ducis ad undas
Centum amnes, merito & nomina regis habes,*

Moe-

¹ Legitur lib. I. Epigram. pag. 44. sed versu 2. *merito nomina regis habens.* alios vero versus non repperi.

*Moenia quando tibi fas est spectare Cremonae,
 Aeternum sacris qua fluis udus aquis,
 Pro me magna mei venerans cunabula Vidae,
 Ipse, licet properes, haec mea vota refer;
 State precor, stabunt vestri dum vatis honores;
 Vicinusque aevum Mincius invideat.*

Mitto etiam exemplum eorum versuum, in quos, calore nescio quo insolito correptus, erumpere coactus sum, quum Hymnos illos sacratissimos ejus de Trinitate legerem. quos versus nondum ad illum misi: missurus ubi tuum judicium audivero. Vale. Bruxellae. xxviii. Septembris. 1551.

EPISTOLA X.

HIERONYMUS MONTIUS

Hadriano Mario.

SI rationem aliquam invenirem, qua tibi stomachum & bilem (quod ajunt) in nasum concirem, libentissime id quidem jam fecissem, ut te ad scribendum excitarem, quando, ut ille inquit, facit indignatio versum: ita enim quod sponte recusas ac differs, invitus ageres, sed nisi fallor viam repperi, & tibi nugas meas obtrudere flatui, hoc enim non dubito te commovebit, cum videris me, qui tantum ab illa tua suaviloquentia absim, tam impudenter tamen mea isthaec circumferre, intelligasque quanta fama prives scripta tua: excitavi enim nuper apud eos, qui Elegos tuos superiore anno ad me transmissos legerant, expectationem quandam incredibilem tuorum carminum, idque feci lectis tuis ad *Remicum* litteris, quibus facile ostendebas scire te, quam gravi cum Danista res tibi foret, & qui optime Calendas supputaret, cui quantumvis magnas usuras persolveris, nunquam illius desiderium satis expleveris. Sed ut tibi fabulae nostrae argumentum explicem, scito solere Romae doctorum hominum celebres quottidie conventus agi, ubi siquid quis legerit, quod aut animum illius praeter modum delectarit, aut aliquid minus intellectum torserit, in medium proponat, & vel amicorum adstantium unumquemque sententiam roget, vel jucunda rei perlectae narratione moveat: horum exemplo quindecim fortasse numero Scholastici apud matronam quandam quottidie conveniunt, nobilem, & dum juvenis esset supra modum forma & morum elegantia excellentem, nunc vero senio plane confectam, sed fortasse prurientem, ubi forte ducti a principio fuere, qui duo primi coeteris praelegerent, Alter Virgilii Bucolica, Alter amatorias latina vulgari *Francisci Petrarcae* cantiones explicaret, ac mox posito legendi munere carmen proprio Marte compositum proferret, coeterisque clara voce recitaret. Horum ego insaniam ridere volui, qui sciam illorum plerosque vix bonas literas attigisse, sed quam bene tu videris, omnia tamen Ironice scripta existimabis: nam & persona, ad quam scribo, ficta est; expecto tamen in dies ridiculum magis aliquid, quod ab hisce prodeat, quo

quo acrius possim maledicendi aculeos intendere, quod si fit, habebis tu quoque quamvis longe remotus, quod multum rideas, qui non solum illorum ineptias intelliges, sed & meam hac in re scribendi inanem operam ridebis. vale, & a me, postquam focum in cornu gerere coepi, caveas, hoc est saepius scribas, alioquin habebis me immodicum cessationis tuae in scribendo ultorem: vertam enim stilum, ut te velut ab amicitiae officio deficientem arguam, postquam te scio commodè per *Siprandi* nostri patrem posse literas Antverpiam usque mittere, unde ad nos facillime perferuntur. Ticini pridie Calen. Junii 1535. *Vicecomes* ac *Benedictus* se tibi plurimum commendant.

De hoc *Montio* nihil mihi constat, praeterquam ex *Hadriani Marii* Epistola, carmine ad eum & *M. Ant. Caimum* pag. 72. Poëmat. scripta, ubi studiorum comitem suum vocat. *Joannis* etiam *Secundi* lib. III. Eleg. 3. ad eum scripta est: *Montii* duo ad *Secundum* carmina pag. 65. & 67. exstant.

Hieronymi Montii ad Hadrianum Marium Mechliniensem eidyllion.

Tene ego cara meae liqui oblectamina mentis?
Te potui infelix deserere, Anna, abiens?
Quae poteras tervis miserum me reddere ocellis,
Atque eadem placidis sola beare jocis:
Ut patriam peterem dilectaeque otia terrae,
Hic ubi nulla mihi culta puella placet,
Cerufata cui facies, miniove rubescit;
Aut uncta externo membra colore nitent;
Cultior ut fucata suo videatur amanti,
Quem trahit artificis sub sua jura dolo.
Quis furor est ipsas naturae invertere leges?
Non placet haec superis sedula cura deis.
Alma Venus formae nuda in discrimina venit,
Nudus amor tales non amat illecebras.
Lascivi procul o mores, procul ite; puellas
Haec picta Ausonias non bene forma decet.
Illa sinu placeat niveo formosa videri
Quae cupit, & nivea conspicienda manu est.
Inducat dum nulla suo tectoria vultu,
Nec tingat variis se medicaminibus.
Quae rugas tremulae faciunt properare senectae,
Longa premat canum quam caput ante dies.
Ista juvent fortes pigmenta ad bella Britannos,
Extremi Seres corpus & ora linant.
Sint potius nobis exempla domestica curae,
Quaeque decet Latiam forma pudicitiam.
Aspice nativo qualis suffusa colore,
Quam contenta suis posse nitere bonis,

Principis advenit nostri gratissima conjunx,
 Quae genus a magnis regibus orta trahit.
 Sive patrem spectes, seu matris stemma coruscum,
 Undique praeclara nobilitate nitet:
 Cui non sat dederat laudum fortuna benigna,
 Ni quoque in hac faceret parte, beata foret.
 Tali ut conjugio, tam clavis nupta hymenaeis
 Solvat legitimo debita jura thoro,
 Ah felix, omnes ab fortunata puellas,
 Una alias inter, quas vagus orbis habet,
 Quae tali conjuncta viro, quo justior alter
 Consiliis non est, nec pietate prior;
 Gratatur plausu tibi plebs fremituque secundo,
 Omnia perque urbis compita perque vias.
 Namque illa quis luce hilarem compescere vultum?
 Quis potuit tacito gaudia ferre sinu?
 Laurigero ducta est similis cum pompa triumpho,
 Qualem securae commoda pacis habent.
 Spectavit populus, procures, sanctique senatus
 Conspicuos magna cum gravitate patres,
 Et juvenum niveis in vestibus ire phalanges
 Vidit, & innocua pila tenere manu.
 Qualis caede madens nulla, sed laetus in armis;
 Effuso miles cum redit hoste domum.
 Totque triumphales statuit per compita portas,
 Cum titulis posuit nomina scripta suis.
 Hic variae species spectatum, culta puella
 Cuncta notat celsa pendula de specula.
 Ex aequo ast alius venientes ordine longo,
 Lustratosque ostro sepe recenset equos,
 Miratur magnos procures comitesque puellae,
 Quos secum e patria duxerit illa sua.
 Atque novo ornatas cultu videt ire puellas,
 Insolita & comptas spectat ab arte comas.
 Qua tractum turba Marium si cernere in illa
 E tam longinquo mi foret orbe datum.
 Qualia fortunae supplex ego dona tulissem,
 Carmine laetitiam testificante meam?
 Quod videt optatum longo post tempore amicum,
 Montius haec sanctae munera magna deae.

And. Alciatius Hieronymo Moresino Mediolan. studiorum causa
huc profecto.

*Quod Pallas, quod sancta Themis tibi plura dedissent
Dona, quod ingenii dote superbus eras,
Naiades invidere, equitem & mersere sub undis,
Heu spes momento quanta perempta brevi est!*

A. M. DXXXII.

Alciatus D. Melchiori Volmario Grammatico cum placentia, quam
nos Martium panem vocamus.

*Hanc e melle Arabo, Graeca & juglande, Placentam,
Volmario Alicatus dulcia dona suo.*

Montius Uxori Volmarii, ad quam mittebatur Martius panis.

*Ambrosiae similem, sed adhuc sine nomine, Mazam
Accipe, felici juncta puella toro.
Ingratos si quando cibos tibi fecerit aestas,
Languida quae nimio membra calore facit.
Hoc libo melle ex Arabo & juglande Pelasga
Amisam valeas ut revocare famem.
Verum Hominum genus ingratum; sua nomina Tigris,
Et lupus, & serpens & crocodilus habet.
Et tamen hoc tantumque bonum sine nomine passi;
(Heu facinus) Latii posse carere suo.*

Haec ego, quoniam vere proprium nondum scio nomen.

Inscriptio in marmore Fenestrae

ANNA MEUM COR. MEVM DECVS.

*Negligit aversa tristes quas aure querelas
Pulchra, ast Ionio surdior Anna freto,
Excipiunt duris miserata haec marmora venis,
Anna meum, ut retinent, corque decusque meum.*

M. Renfio, ad carmina cujusdam, qui objurgaverat scribentem in Scholis
obscena membra, & carmina.

*Lingua nequit quoniam male sanae dissona menti
Esse, meum quod cor expetit haec loquitur.
Hinc linguae bene fida comes nil dextera novit
Scribere, quam nostri delicias animi.
Aut pulchre arrecto pendentia vasa Priapo,
Aut cummum, & quae adeo mens juvenilis amat.*

Ee 2

Hier.

Hier. Montius Aurelio Suevo, discedenti in patriam post accepta doctoris insignia.

*Quod tandem gratis cogor sermonibus, atque
Congressu, Aureli docte, carere tuo,
Discrucior: neque enim invenio solatia tristis,
Quin nostra insano corda dolore premar.
Ast alia de parte alacris sim omnino necesse est,
Cum subit insignes esse datum titulos
Ferre tibi; & patriae victricem reddere laurum,
Sueverat Elaeo victor ut in stadio
Optato caris genitoribus, inter amicos
Conspicuo, & Themidis nobili honore sacrae.
Consule tu quid agam, nodos cui solvere legum
Concessum, & medio dicere jura foro.
Num durum absente est laetum me vivere amico,
Durum, crede, tuis non hilarem esse bonis.
Sed video: Austeram mavis me ponere frontem,
Et faustum in patriam vis precer ut reditum.
I felix, Grajis decus Ausoniisque Camoenis,
Et gemino ornatus juris honore caput.*

Montius Joanni Secundo Hagienfi Amico optimo.

*Quod desiderium patriae tam dulce teneret
Moerebam, hinc quum tu nuper iturus eras.
At nunc terrarum postrema Hispania quando
Advocat, & magni Principis aula tui,
Num doleam, quod longo aberis magis intervallo?
Anne erit illa animi magna medela mei?
Quod brevis haec variis sit circumfusa Elementis,
Ut punctum medio est terra reposta loco,
Nec distet multum Eois Hispanus ab Indis,
Aut Libs a Scythica jam regione Niger.
Dum mens propositi constans, & fida, Secundi
Persitet in absentis semper amore mea.
At discedenti proponat Julia dira
Omina, quam primis pes tuus in foribus
Haeferit, & numeret patriis quae tum hospes ab oris
Functa peregrina membra reliquit humo:
Quae proficiscenti suevit narrare Tibullo
Impatiens tantum Delia ferre morae.
Mi gratum magno crescat quod honore Secundus,
Utilis externis, utilis ipse suis.*

*Dummodo amicorum me oblivio nulla tuorum
Infonem e numero non queat eximere.*

AD AMICUM.

*Et faciem & mores referam tibi quaeris, ut hujus
Urbis, post rigidi tot dura incommoda Martis,
Atque inflauratum, Sancto sub principe, tandem
Gymnasium, coeli mira hic clementia, quam nec
Insani potuit boreae convellere fluctus,
Externo aut veniens miles recutitus ab orbe,
Ille licet miseris vacuarit civibus urbem
Atque opibus, licet ille domos, licet hospita tecta
Diruerit, magno & foedaverit omnia luctu,
Hic Themidis qui sancta colunt sacraria, Ripa.
Qui matutinus subsellia detinet, hora
Vespertina habet Alciatum, nam caetera turba
Haud referam quid agat: quis enim te sanus inepte
Dicere Alexandrine queat? quis te Leonarde
Incomptum multis accentibus: O male cura
Commissa his Juvenum, cur tandem, sancte senatus
Barbariem non hanc sentis? quam vitat & odit,
Matrona, insignes procures quae torserat olim
Atque duces, mediae dum flos stetit ille juventae:
Nam postquam teneraeque genae, nigrique capilli
Defluxere, olim & tumidae periere papillae,
Composuit studiis animum mentemque severis,
Atque Academiâm erexit, quo lecta juvenus
Confluit, irati postquam jejunia ventris
Solvit, & est multo mens exhilarata Lyaeo.
Hic aliquis, cui ducta cava sors obtigit urna,
Enarrat flentis Melibœi aut tristia fata,
Spernentem aut miseri Coridonis munera Alexim:
Mox alius numeros, vulgaria scripta, Petrachae
Explicat, utque illo defunctus munere primum est,
Ethruscis carmen numeris Latiae Camoena
Compositum profert, proprios quo cantet amores.
Quo multa in rigidam faciat convicia amicam,
Quo se deceptum nimia levitate queratur,
Hunc audit veneranda cohors, hunc suspicit unum,
Quod bene deducto sint verba sonantia filo,
Adnotat, aut seriem rerum vel voce sonora,
Cumque suis prolata accentibus omnia laudat,
Aut probat ingenium, nec docta inventa silentur.*

*O Fortunati coetus, quos ille probavit,
 Quos tam concordi mirabitur ore caterva:
 Non secus Elaeo quam cum sua praemia victor
 In stadio, fortisque manu pugil abstulit, illum
 Circumstat plebs laeta, audit, comitatur euntem,
 Virtutem extollit, nec ab uno lumina flectit.
 Nam modo qui docti furatus scripta Secundi est,
 Et velut e propria fluxissent carmina vena,
 Integram multum tumidus recitaverat oden,
 Quam magno plausu exceptus, quantoque frementis
 Confessus studio est? madidis dum basia labris
 Poscit, suavicepo centum sibi murmure jungi,
 Qualia multivolo concessit Lesbica vati!
 His coepta auspiciis Academia crevit, ad hoc tu
 Gymnasium ut properes, multum rogo & hortor, Amice.
 Ne dum tam longo absentes simus intervallo,
 Fructus amicitiae sic nostrae intercitat omnis.
 Pertaesus limam haec scripsi, nimiumque laborem,
 Vix flueret longa cum desuetudine versus.*

EPISTOLA XI.

SPLINTERUS AB HARGE

Hadriano Mario S. P.

GRatissima mihi fuit, Humaniss. D. Hadriane, & memoria tua nostrae
 conjunctionis, quam non obscuram ex literis tuis perspexi, & amicitiae
 etiam augendae voluntas, quae jam pridem non mediocri me voluptate
 ex consuetudine nostra, utilitate ex consilio atque opera tua affecit.
 Diploma ex animi sententia impetratum & legitime confectum, ut in posterum
 citra amicorum injuriam possim mori, gaudeo, gratias immortales acturus,
 ni tanta necessitudo quam mihi tecum esse voluisti, omnem gratiarum
 actionem recusare videretur, & ego malim praesenti officiorum meorum pietate
 & assiduitate, memorem me tibi probare. Moriendi securitatem, quam
 mihi diplomate praestitisti, ad liberius vivendi rationem, tuum consilium secutus,
 traduxi, satius ratus, vita, quam morte amicis gratificari; animo interim
 vivam tranquilliori, quo de humanis necessitatibus, mihi amicisque omnibus rectius
 prospectum esse sciam. Ex quo a vobis discessi, fortunam pro temporis
 difficultate expertus commodissimam, bonis auspiciis coeptum iter, melioribus
 confeci, ac tandem salvus & incolumis Patavium veni. venienti D. *Damianus*
A Goes Lusitanus, cum D. *Joanne Jacobo Fuggero* & Germanis aliquot com-
 militonibus nostris, diei unius itinere occurrit. post mutuos complexus & gra-
 tula-

tulationes, summa alacritate & quasi publica laetitia, tot amicis comitatus in urbem deductus sum, ut non jam peregrinum & hospitem in Italiam me redire, sed patriae post varios casus & mille pericula rerum restitui crederem: hujus gaudii mei, quod ex amicorum erga me studio ac benevolentia concepi, expertem te nolui, quem mei studiosissimum & amantissimum cognorim. De rebus bellicis rumores hîc feruntur varii. Veneti causa & tempore arrepto, infensissimis animis & summis viribus, adversus Turcam bellum moliantur, Imperatoris & P. M. auxiliis freti: Execrantur omnes, qui de Pace ad Senatum referent, consilio iis interdixerunt, quorum interest pacem componi, aut qui in Asia merces exercent. ut sperandum sit, daturum aliquando perfidiae suae poenas Tyrannum unum omnium, qui sunt, qui fuerunt, qui futuri sunt, crudelissimum. Rex Galliae magno conatu in Regionem Pedemontanam intrumpere conatur, ut Taurinensibus suppetias ferat, & commeatus subvehat. *Marchio del Guasto* non minori contentione exercitum xxv. m. militum his objicere, & Alpium saltibus & arctis occupatis viam praecludere statuit. Legatos Veneti destinarunt ad Imp. M. & Regem Galliae, ut dissensiones componantur, & Rex societati contra Turcam initae se adjungat. Praeter has bellicarum rerum mutationes, & Pasquillus insignem Metamorphosim passus est, constans alioqui & intrepide convitia excipere solitus, invidiam tamen & male feriatorum hominum dicteria non ferens, nominis versuram facere est coactus. Haec de eo carmina accipe.

Pasquillus.

*Vera mea haec est effigies, quam conspicis: hospes
Accipe Pasquilli signa paterna dei.
Non ego magnificis templis delector & aris,
Romanos satis est carpere Pontifices.
Nunc istam formam, nunc illam sumo quotannis,
Vertumnus verso dicor ab ore deus*

De Variis Pasquilli formis.

*Ipse fui coeli qui mittit fulmina ab arce,
Et sacra quem Pelago fuscina sola juvat.
Quique etiam clavae oblectatur robore, & ille,
Qui deus exultat sanguine & ense nimis.
Auratas pariter qui fert post terga sagittas,
Et dea, cui bellis hasta tremenda placet.
Insuper & pharetra quae in sylvis utitur, & quod
In manibus Thyrsus numen habere solet.
Divaque & excoluit prisco quae tempore fruges,
Pene fui veterum non nisi quisque deum.
Sum modo Vertumnus, magis ut sim denique gratus,
Stopinus quando frater ineptus ero?*

Ad

Ad Pasquillum.

*Sumpſiſti pulchri juvenis Paſquille figuram.**Inde places populo, gratia tanta tibi eſt.**Gratior eſſe poteſ, viſ dicam quomodo? verte,**Verte humeros, verus efficiere deus.*

De Paſquilli pudore.

*Incluſit ſeptis ſeſe Paſquillus, & ora**Hoc anno cerni non tulit ille ſua.**Quinetiam ora miſer foedus nigredine tetra**Perſonam voluit diſſimulare ſuam.**Ridiculum puduit tot ineptis verſibus eſſe;**Conſuetum a doctis vatibus ante coli.*

Jam finem ſcribendi facturum accepi a D. Grantuellio, oratoris C. M. apud Venetos literas, ex quibus haec iſdem verbis uſus tranſcripſi.

Ex litteris ad me Rom. Regis XIX. Octobris datis, intellexi exercitum omnem ipſius adverſus Turcas, incolumem & ſalvum erectiſque vexillis abſque ullo impedimento perveniſſe ad caſtrum Walpo, ibique ſatis commeatum habere, & in conflictibus hinc inde factis pro certo occubiſſe Mechmet Wegk Baſſa in Belgrado, & ſuum Vice Baſſa; cum aliis quibuſdam magni nominis Turcis. ex noſtris autem duos Nobiles viros deſideratos, Paulum Bakyſch. & Petrum Roſchyn, maſchalcum Boemiae: Literae ex Mantua allatae habent Gallos difficultate itineris preterritos, de referendo gradu cogitare, deſtitutos ab Helvetiis, qui contra Imperatorem venire nolunt, quamdiu cum Turca Galli ſint confoederati. Prolixiorem me non loquacitas, ſed meus erga te amor facit, quem mutuum eſſe percupio. Patavii. ipſis Kal. Novembris A^o. M. D. XXXVII.

EPISTOLA XII.

'PHILIPPUS COBELIUS

N. N. S. P.

CUM rogaffes ante meſes aliquot & exegiffes, integerrime vir, ut aliquoties te carminibus noſtris ceu ſtrenulis ſalutarem, ab hoc officio adeo non

I Eſt haec epiſtola Philippi Cobelii, ſed ad quem neſcio. An hic Cobelius fuerit Nicolao Nicolai, Joannis Secundi fratri, adſinitate junctus, etiam ignoro. Nicolaus certe habuit uxorem primam Annam Cobellam, cujus mortem deſlet Eleg. I. libri Funerum. & in Epigrammatibus Hadriani Marii pag. 55. memoratur Arnoldus Cobelius, qui quo gradu ſanguinis juncti fuerint, aut an frater Philippi ille fuerit, non patet mihi: Belgice dicti Cobel fuere, unde Cobellus, & Cobelius deduxerunt. Quae in margine carminis notantur ejus ſunt, ad quem Epiſtola, manu ſcripta: forte Nicolai Nicolai, cujus character non multum diſſimilis videtur. Cobeli cujuſdam meminit Viglius Zwich. in Epiſt. ad Hopperum IIII. & XXXIV. & alibi. Ex Ecloga apparet non perfunctorie Muſis liſaſſe virum inſignem, qua ſola dote meritus eſt, ut memoria ejus Belgis renovetur.

non deterrebar, ut perquam lubens etiam (promerentibus hoc praeclaris tuis virtutibus ea tua humanitate, benevolentia) morem gererem, sed quo minus optatis tuis pro animi mei sententia satisfacere potuerim, praeter alia fuit & illud impedimento, quod ubi terrarum fueris jam menses plus minus quatuor certo non sciverim, diversis videlicet diversa afferentibus: omnis igitur occasio est adempta mecum exoptulandi, quod serius tuis jussis obsecundem. Ab hoc dubio proxime frater noster *Arnoldus* tui observantissimus, & utriusque nostri amantissimus, literis suis id petentem me vindicavit; faciundum itaque putavi, ut praevis his ac jam diu absolutis promissum calamum tuum provocarem, quae nequaquam in hoc dari existimes, quo fidem nostram liberemus, sed ut liberandi studium testemur, id si parum feliciter a me tentatum est, erit humanitatis tuae, incredibilem hanc animi propensionem aequi boni consulere, dum ex lautiore penu alias plura, fortasse & meliora, tibi nos optima spes est deprompturos, atque animo majora (si musae canenti non deerunt, precibusque vocatus Apollo) paraturos. Interim illud unum majorem in modum te rogo: ut exquisitius omnia limes, caelumque superfluis adhibeas, aut saltem quae commutanda, quae eximenda putaveris annotes, quo a viro undecunque doctissimo & disertissimo laudanda reprehendenda discam. Bene vale, humanissime vir omniumque virtutum dotibus cumulatissime, cum tibi charissimis, cum Gratiis ac Musis tuis, quarum particeps fieri ex aliqua parte impense peto. Lovanii anno 1540. idibus Octobris.

E C L O G A D A P H N I S.

THELGON, FAUSTULUS.

F Thelgon.
*Austule, quandoquidem rediit nova temporis aetas,
 Lenibus & Zephyris vario patefacta colore
 Terra nitet, teneris quaeque & nunc frondibus arbor
 Exultat, surgensque gravi de palmitis gemma
 Parturit, exhilarant volucres & vocibus auras,
 Intermissa, precor, repetamus carmina tandem,
 Lanigeri foecunda greges dum gramina carpent.*

*Faust. Huc ades, o Thelgon, hic lenis spiritus aerae,
 Hic virides lauri, hic Veneri gratissima myrtus,
 Hic tiliae molles, & opertae vitibus ulmi,
 Aspice ut obscuris fundunt umbracula ramis;
 Fons sonat in medio nitidis uberrimus undis,
 Mollibus hic strati cantu certemus in herbis.*

*Thelg. Daphnidis hic strati reditus celebremus in herbis,
 Cujus ob aspectum jam stagna loquacia gaudent
 Circum, & laetitia montes Sylvaeque resultant;
 Arridetque novo jam lumine clarus Olympus,*

*Et te Pierides leve carmen arundine Musae
Ludere Trinacria docuere Heliconis in antro.*

*Faust. Te quoque Pegaseis gustasse e fontibus undam,
Phocidos ac saltus ajunt, Pindumque subisse,
Parnassique jugis sacras vidisse puellas,
Ipse ubi frondenti cinxit tua tempora lauro,
Atque dedit calamos dono tibi Phoebus agrestes.*

*Thelg. Eia age, si quid habes, dicendi nostra vicissim
Munera suscipimus, majora negocia quando
Non revocant, facilesque vacat dare cantibus aures.*

*Fault. Processit tandem roseo gratissima ab ortu
Illa dies, magno affectu, votisque petita,
Qua patriam gentem longo post tempore Daphnis,
Et patriae fines repetit, notosque penates.
Ergo mirifice assensu laetantur amico
Omnia, festivo & monstrant nova gaudia cultu,
Diffusum resonat felici murmure coelum,
Blandius aequoreis sol aureus exit ab undis,
Sydera clara micant, cunctae cessere tenebrae,
Laetitia ingentem cuncta illustrata nitenti
Luce probant, plausuque fremunt gavisæ secundo.
Jam nunc vernat humus, ridetque virentibus herbis
Almus ager late, generoso & flore revidet,
Bacchica paulatim frondoso vitis amictu
Pubescit, redeunt cessatis pabula campis,
Nunc & amoena comis plaudit frondentibus arbor.
Surgit ab oceano¹ liquidis aurora volucrum
Cantibus, invisum linquens formosa cubile,
Hinc patula fagi residens Philomela sub umbra,
Populeisq; comis, modulatur gutture mille
Dissimili voces, hominum jucundius arte.
Daphnide laeta modos meditantur cuncta recepto,
Ipsi etiam montes, ipsa haec arbusta videntur
Motari in numeros, & carmina saxa sonare.
Daphni, tuos reditus pecudes pictaeque volucres
Applausu claro per gaudia magna salutant,
Ter felixque tuum jaectant ad sydera nomen.
Nunc praedulce canunt per mollia prata puellae,
Certatimque legunt flores, gremiumque sinusque
Aut calathos onerant, haec candida lilia carpit,
Illa metit calthas, nec jam moerentem hyacinthum,
Has rosa blanda tenet, sunt his vaccinia curae,*

Pars

¹ Ego sic malle liquidis comitata volucrum &c. & pro formosa, Aurora.

*Pars florem, Narcisse, tuum, pars subsecat ungue
 Pallenteis violas, tum quidquid rura ministrant
 Aequales populant coetus, plenisque canistris
 Ecce tibi innumeros spargunt, pulcherrime Daphni,
 Per sola perque vias flores, nectuntque corollas.
 Pastor oves nunc atque armenta & pascua laeta
 Ire jubet surgente die, recubansque sub umbra,
 Propter aquam, levibus meditatur carmina cannis.
 Auditos sylvae referunt & flumina cantus,
 O nos felices, nimium felicia prata,
 Felices hortos, tandem quibus illa tueri
 Ora datur, placidosque illos agnoscere vultus.
 Salve iterum atque iterum salve, optatissime Daphni,
 Pastorum decus & nova gloria Daphni tuorum,
 A quantum expectatus ades, tua gaudia nobis
 Qui revehis tecum, Saturni plurima tecum
 Jam redeunt, redit & ruris jucunda voluptas,
 Nataque falciferi libertas aurea regis,
 Mellibus Hybleis fontes & flumina passim
 Tota fluent, tibi jam rorabunt nectare sylvae,*

*Thelg. Faustule dulce sonant auri tua carmina nostrae,
 Nec motus nemorum (zephyrus dum recreat arva)
 Sic me delectant, curvi nec littoris ictus,
 Nec per saxa vago lapsu quae murmurat unda,*

*Faust. Pastorem Thelgon capras armentaue oportet
 Pascere, & hinc tenui rude fundere carmen avena.*

*At tu promissos cantus gratissima nobis
 Munera persolvas, Daphnim reditumque cupitum
 Carmine concelebres, namque ipse est carmine dignus,
 Thelg. A quam lugubri squallebant omnia vultu?
 Dum procul hinc aberat, dum ignotos advena saltus,
 Ignotas rupes Daphnis, camposque peragrat,
 Quem sine fine omnis grex, quem pecus omne vocabat,
 Pro cuius reditu votis ardentibus omnes
 Solliciti, superis libamina sacra ferebant.*

*Non ita lenta salix petitur cythysusque capellis,
 Frigida non rapido cervis optantur in aestu
 Flumina lassatis, teneris non frugibus imbres,
 Ut tuus aspectus nobis, praesentiaque ora
 Luce serena magis, fortunatissime Daphni,
 Ruris amor summus, rerum spes unica Daphni.
 Te sine nullus ager nobis, loca nulla placebant,
 Rustica jam late non ulla sonabat avenis*

*Fistula disparibus, sed moesta silentia circum,
 Absentem flebant solum te Najades udae,
 1 Luxerunt Driades, & 2 Oreades 2 ulularunt,
 Tecum rapta sibi solatia suspirabant
 Capripedes satyri, simul & pastoria Panes
 Numina, & errantes sylvae per devia Fauni.
 Regnaque pastorum tardos deserta recursus
 Visa queri, placidaeque boves, caper, atque capellae.
 Quinetiam positis stabat tunc frondibus arbor
 Omnis nuda comas, tunc florum protinus omnis
 Consumptus vigor est, pecori nec pabula campis
 Ulla apparebant, segetes nec pinguibus agris,
 At cultore carens informis terra jacebat,
 Hortorumque furens decusserat auster honorem.
 Arebant salices ripis, ac robora passim
 Montibus in nostris, dulces & collibus umbrae:
 Sed nunc venit Iö, venit post tempora sospes
 Longa insperato Daphnis, patria arva solumque
 Natale invisit, nunc o gaudete coloni,
 In patriam tandem atque in limina nota recepto
 Daphnide, sacratis fument altaria flammis,
 Debitaque agricolae laeti persolvite vota.
 Ecce diem spargit veniens super aequora Titan
 Fulgidior coma, pexis & crinibus aurae
 Mollius aspirant, venti cecidere protervi.
 Daphnidis adventu nostri nunc omnia cultu
 Exultant faecunda novo, nunc terra virenti
 Gramine se vestit, 3 suavesque nemoribus umbras
 Condensant coryli fragiles, & Chaonis arbor.
 Nec liquidi fontes, non carmina laeta volucrum,
 Non molles absint somni, non florida prata,
 Non Bacchi vites, divinaque munera mellis.
 Omnia nunc gaudent, pecudes mutaeque natantes,
 Nunc alacres riguis ludunt in vallibus agni,
 Dulce boves; vitulique sonant in pinguibus agris,
 Ipsae etiam ad mulctram veniunt 4 bis, & omnia vaccae
 Lacte redundanti nunc ubera plena ferentes,
 Scilicet aspectu 5 (nec habet sententia falsum)
 Effecisse suo, cuncta ille serena videtur,*

1 Lugebant.

2 Exululabant.

3 Suaves in collibus.

4 At istic ter mulgentur: ter poteras dixisse.

5 Nec me sententia fallit.

*Et circum laetis foecundasse imbribus arva.
 At tu vive diu, tantum, patiare nec unquam
 Divelli a nobis o te, celeberrime Daphni:
 Nam sine te laetum quid sit vel amabile cuiquam,
 Dexter ades nobis, longum salveque valeque.*

*Fauſt. Oſtibi blandiloquum, & Muſae ſua carmina donant,
 Nec tantum vitulus ſemper bove vincitur omni,
 Nec tantum molles concedunt matribus agni,
 Quantum tu reliquis praeſtantiore arte canendi.*

*Thelg. Eia age ſurgamus, pronus ſol aequora ſpectat,
 Veſper & extremis veniens effulſit ab oris,
 Nunc pecus omne domum ſuadet deducere tempus.*

1 Cenſeo hunc verſum immutandum.

EPISTOLA XIII.

JOHANNES CALVINUS

Philippo Melancthon.

VIdē quam pigro ventri literas tuas dederis. Eas enim vix quarto demum menſe mihi reddidit, & quidem multo attritu jam diſruptas ac laceras. Hoc tamen ipſum, quod vel ſero ad me pervenerint, magno in lucro poſui. Nam dum eas huc atque illuc circumfert; mirum, quod non alicubi reliquerit. Ergo, utcunque ejus negligentia ſingularis gaudii fruſtu privatus ad tempus fuerim: facile tamen veniam a me impetravit, ubi eas recepi. Utinam vero, ſicut dicis, ſaepe nobis, ſaltem per literas colloqui liceret. Tibi quidem nihil inde accederet: mihi autem nihil foret in hoc mundo optabilius, quam in literarum tuarum ſuavitate acquieſcere. Vix credas quanta hīc negociorum mole premar atque urgear. Sed inter has anguſtias duae res ſunt, quae me plurimum excruciant: quod mihi legitimus operae meae fruſtus non conſtat: deinde quod abs te pauciſque aliis tantopere diſſitus, illo, quod me in primis juvare poſſet, conſolationis genere deſtituor. Verum quando ne hoc quidem optionis noſtrae eſſe cōvenit, ut locum ſibi quiſque arbitrio ſuo deligat, ubi ſerviat Chriſto: in ea nobis ſtatione manendum eſt, quam cuique noſtrum deſtinavit. Hoc ſaltem nobis nulla regionum longinquitas eripiet, quin hac conjunctione, quam Chriſtus, ſanguine ſuo conſecratam, Spiritu quoque ſuo in cordibus noſtris ſanxit, contenti, dum vivimus in terra, ſuſtineamur beata illa ſpe, ad quam nos literae tuae revocant: in coelis nos ſimul perpetuo victuros: ubi amore amicitiaeque noſtra fruemur. Caeterum, quod in lucubratione, quam nuper edidi, abuſus ſum tuo nomine, hoc vel amori erga te meo ignoſcas, vel tuae humanitati concedas, peto. Inter multas rationes, quibus eo adductus fui, haec non poſtrema fuit, quod

Sadoletum Pigbius delegerat, cujus nomine suas nugas venditaret. Verum ideo subticui, ne mihi ad comparisonem descendere necesse foret. Neque tamen hîc longa excusatione utar: cum testatus fuerim, ideo me fecisse, quae mihi per tuam humanitatem benevolentiamque, quam mihi defers, licere certo considerem. De rebus nostris multa sunt quae scribam, sed hoc ipsum est, quod me tacere cogit, quia nullum finem invenirem. Laboro hîc & fatigor mirum in modum; proficio mediocriter. Et tamen mirantur omnes, me tantum proficere inter tot impedimenta, quorum magna pars est ab ipsis ministris. Haec tamen mihi magna est laborum levatio, quod non tantum haec Ecclesia, sed tota quoque vicinitas fructum aliquem sentit meae praesentiae. Adde quod nonnihil in Galliam usque & in Italiam redundat. Statum vestrae Germaniae non sine acerbissimo dolore audio. Nec leviora sunt mala, quae timeo, quam quae lugeo. Nam si verum est, quod narratur, Turcam majoribus rursus copiis bellum instaurare: quis obstabit, quo minus longe lateque pro libidine grassetur. Et quasi parum esset, turpiter dilapso exercitu, tot impensas frustra profudisse, tantum accepisse dedecoris: praeterea praecipuum roboris florem primum continua peste triennii, deinde hac postrema lue perdidisse: nunc multo gravius ab intestinis diffidiis laboratur. Necdum tamen tam acriter perculsi nostri principes expergescunt, ut dare discant Christo gloriam. Hoc tamen me nonnihil recreat, quod ajunt, Coloniensem & alios quosdam ad repurgandas Ecclesias animum serio adjecisse. Neque enim parvam accessionem esse duco, quod Episcopi, ex quorum ordine nullus adhuc nomen Christo dederit, nunc sublata manu, profiteri ab Idolo Romano defectionem incipiant. Tantum nunc advigilandum & enitendum est nobis, ut eorum cursum promoveamus, ne ex dimidio Christo pejus monstrum renascatur. Interea Ro: Pontifex jam concilii simulachrum Tridenti ostentat, ut orbem expectatione suspensum aliquantulum adhuc retineat ac moretur. Sed Deus non patietur diutius sibi illudi. Fallor, nisi hic annus maximam rerum conversionem parturiat, quae brevi emergat: Sed jam nimis multa. Vale igitur, Vir modis omnibus ornatiss. mihiq; semper in Domino colende. Dominus te diu servet incolumem in gloriam nominis sui, & Ecclesiae suae aedificationem. Miror, quid sit causae, cur tamdiu Danielem tuum domi suppressum teneas. Neque enim me lectionis ejus fructu privari aequo animo patior. Do: *Martinum* reverenter meo nomine salutes, quaeso. Habemus hîc *Bernardinum* Senensem, magnum & praeclarum Virum, qui suo discessu non parum Italiam commovit. Is ut vobis suo nomine salutem adscriberem, petiit. Vale iterum cum tua familia, quam Deus semper custodiat. Genevae. 14. Calendas Martias. 1543.

EPISTOLA XIV.

JULIANUS AURELIUS

*Hadriano Nicolai Consiliario S. Majestatis.**Arnhemium.*

Q Uod serius literis tuis respondeam, Hadriane doctiss. simul ac humaniss., quam vel officii mei ratio postulat, vel fortassis ipse expectas: ideo certe factum est, quod neminem in hodiernum usque diem reperire potuerim, qui isthuc proficisceretur. Siquidem mira est apud nos nuntiorum ad vos commeantium penuria. Imo ne nunc quidem habeo, cui has committam. Sed cum mihi diutius temperare non possem, quin tui memoriam scribendo mihi refricarem: libuit interim per ocium parare domi, quod ad primam nuntii occasionem ad te transmitterem. Ut autem ad literas tuas deveniam, quibus puerum, quem coram multis verbis mihi commendaras, rursus accuratius scripto commendas: hoc tibi, mi Hadriane, pro responso sit, eum tam curae mihi futurum, quam si ex me natus esset, talemque me diligentiam adhibiturum, ut Gallicam linguam addiscat, ut ne praemonstratoris quidem officium refugiturus sim. quod quidem facturum sum perlibenter, tum in tui gratiam, cui modis omnibus placere studeo, nempe summo amico, ac etiam patrono fortassis aliquando futuro: tum vero, ut amplissimo Viro D. Cancellario vestro, cujus summas virtutes ac incredibilem eruditionem ubique praedicari audio, hac me ratione insinuem, aliquaque apud eum amicitiae parte haercam. Nam eum mihi amicum esse supramodum cupio, quod ejus amicitia multorum aliorum amicitias mihi paritura sit. Itaque, mi Hadriane, etiam atque etiam te oro obsecro ac obtestor, primum quidem, ut antiquum tuum erga me non solum obtineas, sed etiam augeas: deinde ut D. Cancellarium, cujus noticia te autore mihi parata est, ita confirmes, ut me perpetuo in amicorum albo retineat. Scripsissem ad eum, nisi pudor, ac propria tenuitatis meae conscientia a proposito me deterruisset. Accedebat quod in publica commoda mihi peccaturus viderer, si eum tot sanctis negotiis occupatum vix tantillum legendis nugis meis remoratus fuisset. Itaque tibi relinquens totam mei commendandi provinciam, satius esse putavi homini occupatissimo non obstrepere, quam inopportuno fortassis tempore occurrens, odiosus esse. Bene Vale cum conjuge suavissima, cumque² *Stratio* collega tuo, quibus, nisi molestum est, meo nomine, salutem plurimam precaberis. Mechliniae. 17. Junii. 1544.

¹ Est hic *Julianus Aurelius Haubrechtus* Lessigniensis, cujus habemus libellum satis eruditum de deorum cognominibus; & commentarium in duas priores Horatii satyras. vide *Valer. Andr. Bibl. Belg.* pag. 597. praeter vero laudata *Valerio* habeo ejusdem *Aurelii* declarationem ad l. *jurisgentium* §. *Quinimmo* ff. de pactis, editam Pictavii 1538. in 12^o.

² Ad hunc *Joannem Stratium* est *Hadriani* Elegia quinta lib. II. p. 34. & *Joannes Secundus* lib. III. Eleg. 14. p. 57.

EPISTOLA XV.

P E T R I G I L L I I

Ad Amicum Epistola.

Postquam Franciscus Rex me primo reliquit, quam ad ullos ejus nummos pervenissem, quorum spe veneram in Graeciam, ad Codices antiquos investigandos, ac etiam obiter ad cognitionem Historiae naturalis; binas literas ad te, alteram ad Cardinalem nostrum scripsi, quibus conabar tibi renovare memoriam Gillii veteris tui, dicerem, congerronis, nisi summus ille tuus gradus verbum hoc jam non agnosceret, timens ne longa & longinqua peregre profectio ex mente tua omnino exciderim. Jam vero longissime gentium abductus, ea aetate tyro, in Bellum Persicum, qua veterani emereri solent, necesse habeo, iterum tibi nonnullam recordationem mei suggerere, qua incolumi, nondum despero nidum aliquem senectutis meae assequi me posse. Jam annus est, cum in Galliam maxime redire conabar, si nummi ex Sacerdotio meo mihi hoc tempore affulsissent, priusquam eorum desperatione adductus, profectus essem in Soltani *Solymani Pachi* expeditionem, ne Byzantii in languore desiderem, nummulos meos exspectans diu. De qua quidem expeditione, & de toto itinere nostro informarem te magno volumine, nisi prius visere cuperem Aegyptum; sed usque ad sinus Arabici proximum portum, quem jam appellant Sues, olim Arfinoen: qua peragrata & te & Cardinalem Armagniacum informabo, mediocri quidem ingenio, sed magno volumine, de toto itinere nostro, ubi rediero Byzantium. Et ne charta haec vacua sit, addam itineris summum. A Chalcedone, posita in faucibus Bospori Byzantini, ad Tauricum urbem, quatuor decies millia centena passuum fecimus, non modo dimensorum Ptolemaei longitudinibus & latitudinibus, sed etiam passibus nostris: primum per Bithyniam, in qua vidimus Diacibicen, quae olim Libyssa appellabatur, Hannibalis sepulchrum; postea Panthicum, cujus meminit Antoninus Pius, & Helenopolim, cujus Procopius, Caracen, cujus Stephanus. Deinde Nicomediam, & lacum supra Nicomediam, de quo Plinius, quem falso quidam putant Ascanium, cum hîc sit juxta Niceam, distans ab illo amplius centum mille passibus, cujus fluvius influit in Propontidem, illius vero in Zagarim, & deinde in Pontum Euxinum. Juxta hunc locum Justiniani Pontem vidimus, celebratum Procopio, & Agathii epigrammatibus, adhuc excisis in ponte exstantibus, & etiam in florilegio Epigrammatum edito in vulgus. Postquam ingressi sumus in Phrygiam, seu Gallo-Graeciam, in qua cum aliarum urbium multarum ruinas vidimus, tum Boli, quam olim vocabant Aboni, moenia celebria, nobili emporio, & balneis & infinitis Graecorum & Romanorum monumentis. Ex Gallograecia venimus in Paphlagoniam, in qua vidimus Theodosiam Grangrorum. Ex Paphlagonia pervenimus in Capadociam, transito amne, quem Turci Casilimar, id est, amnem rubrum. Pro-

Procopius a colore vocat Tyberim, quod aquas habeat rubras. Ego vero alio tempore monstrabo esse Halyn, Lydici & Persici Imperii limitem, cum imperaret Croesus Isthmo Asiae, id est minori Asiae: cujus juxta pontem statim in Cappadocia est collis Saye, undique praecifus, & magna planitie circumdatus: in cujus jugo est arx, quam primam obtinuit Ottomanus, fundator Imperii Ottomanici; eamque arcem alii appellant Ottomagith, alii Ottomagich. Inde aliquot castris factis, vidimus Hierapolim, in supercilio excelsi montis, relinquentes prius ad dextram Amasiam, & Jobatam, & Angeram, ad sinistram vero Synopem: posteaquam trajecto amne Iri vidimus Neocaesaream, prope quam fluit amnis Lycus. Quo trajecto, attigimus Armeniam minorem, in qua spectavimus Azam Urbem, & fossas, unde Bolus Armenius effoditur: & oppidum Dascusum, quod hodie vocant Aesnigam. Et si Eufrates fere fluit, tamen amplius binis castris non cum transivimus, sed ternis eo trajecto non longe ab ejus fonte propeque ostium Arseni fluminis, tribus castris per Armeniam majorem factis, venimus Esdron, quam Procopius vocat Theodosiopolin, limitem Romani & Parthici imperii, tempore Justiniani. Inde binis castris transivimus Araxen, tendentem ad Orientem, & dividentem Armeniam majorem a minori Media. Ex Araxe quartis castris vado trajecimus Tigrin, non longe ab ejus fonte, a quo non procul eminet mons Nimbarus, in cujus jugo dicunt Arcam Noë resedissee. A Tigri sex Castris tentoria fiximus juxta lacum Mantianum, falsum, in ambitu complectentem iter octo dierum, in quem octo magna flumina ingrediuntur, & nullum exit. Ex eo lacu septem castris venimus in Cohinam planiciem, sed magna difficultate vallium angustarum montis Tauri, in quibus totus exercitus constans amplius septingentis millibus equorum aut camelorum, a paucis opprimi potuisset. Ex Cohina planicie ad vesperam solventes iter, totam noctem & medium diem insequentem continuavimus, ob inopiam pabuli, & copiam aquarum falsarum. Haec nox tyrocinium militiae meae valde exercuit. nam cum Regis copiae se in fugam conjecissent metu Persarum, ego equo & reliquis ornamentis spoliatus, a media nocte ad diem usque inter tot millia equitum fugientium fugi pedes, ut mei socii mirati sint, me incolumem evasisse. sed Deus ludere voluit tyronem senem, & servare ad nescio quos alios fortunae ludos, utinam jucundiores. Inde quartis Castris pervenimus Tauricam, quam quidam falso putant Ecbatana, sed falsius *Paulus Jovius*, qui eam putat in Armenia, cum sit in Media; & quidem bene penitus, neque amplius ducentis mille passibus. Ubi quinque diebus consumptis, cum Rex *Sophianus* aufugisset in montes asperos, & ad eum insequendum commeatu deficeremur, urbem reliquimus incolumem, duntaxat Palatio vastato, ac redire coepimus, quinquagintaque millibus confectis, lacum Spontani invenimus, adeo falsum, ut ejus totum littus per quatuor stadia extra aquam tectum sit perpetua glacie salis. Ego ut experirer, quod Strabo falso tradit, pruritum doloremque facere, per ipsum nudus ambulavi ducentos passus, tendens in ejus altum: neque tum aqua attingebat umbilicum: vidique totum vadum ubique tectum crusta salis,

ut nusquam solum appareret. Hic lacus sex dierum iter in ambitu habet. Juxta hunc lacum aliquot millia Turcorum caesa sunt. inde quartis castris transivimus fauces angustarum vallium, ubi circiter quinque millia Camelorum, equorum & mulorum perierunt. Inde profecti sumus ad obsidendum Mantianum castrum, in colle situm, undique praeciso, undique circumdato magna planitie. quo deditioe facta intra octo dies capto, transivimus montem Niphatem, juxta quem ruit Tigris, & subit latum Arethusam, & Betelmos, quos Zagris montis ramos arbitror: in quorum vallibus angustis multa animalia perierunt, praesertim cum tanto exercitui necesse fuit transire foramen rupis, non majus porta, excavatum in saxo. Ac tandem trajecto Tigri, venimus in urbem Caramiti, quam Procopius vocat Armidam: unde Rex Turcorum institutum iter coactus est relinquere, & se convertere contra Regem Persarum, qui totam Armeniam majorem jam excurrerat, & Eufrate trajecto penetraverat in minorem. sed prius Rex Solymanus misit Eliam fratrem Regis Persarum in Babyloniam, & Susianam, quam nuper cepit: ex praedaeque Regia triginta Camelos onustos misit Imperatori Solymano. quod munus heri in hac urbe Alepa vidi offerri Regi, & deportari a sexcentis Genniferis, ordine pompatico, ut mos est, cum Regi Turcorum quippiam datur. Nimirum in orbem magnae areae ambulantes, & singuli aliquam muneris partem manibus gestantes, Regi repraesentabant, spectanti ex cancellata fenestra: Alii ferebant stiores, gracilibus arundinibus auro argentoque textilibus inductis elaboratas. Alii ephippia gemmis distincta, alii arcus Persicos, plerique stragulas vestes, & Babylonicas: alii peripetasmata belluata ex auro argentoque textilibus: alii tentoria summa arte laborata, alii libros Persicos auro & gemmis ornatos. Nonnulli sacculos gemmarum plenos multi ferebant imagines hominum reliquorumque animalium ex serico auroque & argento elaboratas. alii alia, quae longum esset recensere. Exin Alepia castra relinquimus, & profecti sumus Melitonem Urbem Armeniae minoris septem diebus. Inde rursus trajecto Eufrate redivimus Amidam, ex qua quinque castris venimus in urbem Edeffam, quam hodie vocant Offam, in qua Turci dicunt natum Abraham. Ideoque ex fonte, ex quo fluvius manat discurrens per urbem, pisces sacros habent, & non attingunt. At Judaei dicunt Abraham natum in Carram, distantem ab Edeffa iter unius diei, quam Carras esse arbitror nobiles clade Crassii. Ex Edeffa tribus castris Eufratem trajecimus inter Hierapolin & Zeugma Comagenae, ubi adhuc visuntur reliquiae antiqui pontis, ubi cathena in hanc aetatem servatur, cujus meminit Plinius. Ab Eufrate tribus castris venimus in Urbem, quam hodie Syri vocant Alep. sed olim vero ea erat Beroea, non, ut quidam tradunt, Hierapolis. Hic hiberna quatuor mensium exegimus. Plura non addam, reservans longum volumen itineris mei in reditum meum Byzantium. Tu vero interea, dum Aegyptum viso & Byzantium redeo ad mensem Julium, ne obliviscaris tui Gillii: ac si forte ullum locum vides, ubi aedificare possim nidum senectutis meae, ne praetereas. Ita enim canus ad vos rediero, ut humi cubare perpetuo malim, quam semel erigere in nidum suspensum ex longa spe.

Ad-

Adderem, nisi Regem audirem remotum a litteris, efficeret cum Domino *Castellano*, Episcopo Matifconensi, ut Rex peregrinationi meae faveret. Sed ne sim importunus, totam hanc provisionem relinquo iudicio tuo, qui sensus regis, ejusque intimorum nosti, non minus quam fortunam meam destitutam omni auxilio, & solo meo tenui vectigali aegre sustentatam tot annos peregrinationem. Verum ut sit a litteris Rex remotus, non tamen a justitia; quod ex eo colligo, quem quotidie chariorem Regi fieri audio, non ob aliud, quam ob singularem justitiam tuam. Quid justius, quam Heroicum Regem tam divitem, debitum praestare paternum? Ego per hosce viginti annos non destiti bene mereri de Rege *Francisco*, ac potius de tota *Valesia* gente, cum aliis orationibus, tum tribus ad Regem Angliae scriptis, suadentibus Franciae regium nomen ne amplius usurpet, aut ejus partes repetat, quas priusquam scriberem testis est Cardinalis *Armagniacus*, me hyemem consumfisse in Bibliotheca legendis codicibus Pontificum, apud quos haec causa tum disceptabatur: quos si *Seisselius* legisset, longe aliter hanc causam tractasset. quid aequius, quam Regem mihi dare aliquod perfugium senectutis meae, qui Regis praescripto tantam peregrinationem suscepi, & tamdiu sustinui, nullo regio auxilio adjutus? omnibus me voluptatibus privavi, senex tot aerumnas subivi, ut jucundum quiddam Regi gratificari possem. Bene vale. Ex Urbe Alep, Emporio celeberrimo totius Orientis. IV. Non. April MDXLIX.

Tuus antiquus Clienſ

Petrus Gillius.

De *Petro Gillio* videndus *Teisserius* in Elogiis ex *Thuano* excerptis tom. 1. pag. 247. & *Scaev. Sammarth.* Elog. lib. 1. pag. 23. hanc epistolam vidisse se testatur *J. Tollius* de infelicitate literatorum pag. 455. nos eam editam esse nescimus, nec credimus, ideoque insigne magni viri hoc monumentum prodere volumus. Obiit Anno 1555. Romae. *Mirae.* Chron. Belg. pag. 413. De *Gillio* etiam vide inter Epistolas *Lipsianas*, *Metelli* LVIII.

EPISTOLA XVI.

J O H. P I P I N U S

Ant. Mizaldo suo S. P. D.

GAudeo mihi oblatam esse occasionem, charissime Antoni, qua rem novam ac plane admirabilem tibi nuntiare sit datum. Nuper ex India Orientali Regi nostro allatum hîc vidimus lapidem, lumine & fulgore mirabiliter coruscantibus, quique totus veluti ardens & incensus incredibili lucis splendore praefulget micatque. Is jactis quoque versus radiis ambientem circumquaque aërem luce nullis fere oculis tolerabili latissime complet. Est etiam terrae impatientissimus: si cooperire coneris, sua sponte & vi facto impetu confestim evolat in sublime, contineri vero includive loco ullo angusto nulla potest hominum arte: sed ampla liberave loca duntaxat amare videtur.

G g 2

sum-

summa in eo puritas, summus nitor; nulla forde aut labe coinquinatur. figurae species nulla ei certa, sed inconstans & momento commutabilis. cumque sit aspectu longe pulcherrimus, contrectari tamen sese non finit; & si diutius adnitaris, vel obstinatius agas, incommodum affert: sicuti multi suo non levi malo, me praesente, sunt experti. quod si quid ex eo fortassis enixius conando adimitur, aut detrahitur, (nam durus admodum non est) fit (dictu mirum) nihilo minor. addit insuper is hospes, qui illum attulit, homo, uti apparet, barbarus, hujus virtutem ac vim esse ad quamplurima cum utilem, tum praecipue, regibus inprimis, noxiam: sed quam revelaturus non fit, nisi pretio ingenti prius accepto. reliqua ex me praesenti audies, cum primum Rex ad vos redierit. superest, ut te, & si quos habes istic viros eruditos, diligentissime orem, ex Plinio, Alberto, Marbodeo aliisque, qui de lapidibus aliquid scriptum reliquerunt, sollicitè disquiratis, quisnam sit hujusmodi lapillus, aut quod illi nomen (si modo antiquis fuerit cognitus) praescribi verum possit. nam in eo per anxie, nec minus infeliciter ab aulicis nostris eruditis haecenus laboratur. quibus si palmam ea in cognitione praeripere possem, mecum felicissime actum iri existimarem. Incredibilis enim & Regi inprimis, & toti denique procerum aulicorum turbae, ea de re commota est expectatio. Vale: Bononiae. pridie Ascensionis Christi M. D. L.

Hic *Pipinus* mihi prorsus ignotus. sed adscriptum huic epistolae erat, manu mihi ignota, fuisse medicum Conestabilis.

E P I S T O L A XVII.

'N. N.

Cornelio Walthero & Georgio Cassandro S. P.

Miror quod a vobis nullas accipiam, amici in Christo Charissimi. Ego aliis profectionibus impeditus nihil potui scribere. Ritus Ruthenorum &c. nondum potui habere, quia Vienna inter libros meos remanserunt. Mitto hinc quaedam forte a vestro instituto non abhorrentia, addam plura, sed successive posteaquam recepero, per Venetorum nuncium. Curo ritus in Corsica & aliis provinciis mihi describi. Forte non inconsulto feceritis, si in lambendo partu aliquot menses insumeretis, certe cupio vos candori studere, ne hoc seculo corruptelis undequaque obnoxio, alienae quoque impietatis vos faciatis ministros. Non placet, quod censurae vestrorum theologorum vultis ea committere, quia ansam dabit de vobis, studiis ac scriptis vestris, eo magis in posterum judicandi: taceo quam omnia ad limam ipsorum quadrabunt, si praefari velitis, ut omnino necessarium judico, nempe ut recensetis quid quoquo tempore institutum, quando creverit &c. Nam is fructus vestri hujus laboris erit precipuus, & quem *Cassander* vel maxime nobis poterit exhibere.

Agam

¶ Auctoris nomen deerat: videtur viri cujusdam Primarii, qui ad comitia Augustana erat profectus, esse epistola.

Agam cum *Oporino* aut alio bono viro, qui bona fide imprimet, & si mea res ageretur, mallet potius nomen suppressi, quam cedere veritati, ne latum quidem unguem; Accipietis hic *Missam Chrysothomi Pragae impressam*; *Legem Salicam* & reliqua possietis, ut opinor, facile ex Galliis habere per bibliopolas, modo scriberetis. Rogo ad me exemplar unum atque alterum transmittatis; recte si adderitis *Frisionum* & *Angliorum* leges. Scribit ad me Vir quidam bonus & summopere urget, ut vos hortet, quo alteruter ad *Tilium* proficiscatur, & omnibus modis cum eo agat, ne suppressat, sed edi curet quae habet: veretur enim ille, ne quod saepe solet evenire, insula literis multum obstet, quod si animadverteretur, vel describi quaedam possent vel accipi ab ipso accomodato: ego illud iter pro viribus meis sumptibus etiam juvarem, sed nescio vestram commoditatem, praesertim hoc tempore belli, & quos sejungi nec posse nec debere ipse existimo. Praeterea hortor Vos, ut, hisce nundinis pascalibus *Francofortium* proficiscamini, ut cum *Τῷ Ἰλλυρίῳ*, quem eo venturum audio, conferre de variis possitis, ipse vos ibi expectabit. Est vobis quoque non parva commoditas navigio ascendendi *Rhenum* ac descendendi, frequenti civium vestratum consortio, & sumptibus non magnis, quos feram lubens ex parte. Nunc nihil mitto, quia nec certi sunt homines, nec intelligo, quo loco sint res, quid pro me descriptum sit, vel quid effeceritis. Miseram corbem plenam libris ad vos ex *Liser* supra *Mosellam* cum epistolio, scribite num acceperitis. In *Betburch* rogo Pastorem sollicitetis de illo libro, in quo agitur de originibus monachorum &c. quicquid constiterit. Apud praedicatores *Coloniae* ad dextram in introitum est liber, in quo sunt *Epistolae Cassiodori*. In fine sunt libri duo, *Urbanæ praefecturae*, hos duos libros cupio prae aliis omnibus mihi describi, habetis praeterea indicem eorum, quae desydero. Rogo strenue pro me, vel ut verius dicam, pro publico literarum bono, invigiletis, & scribite saepe quid coeptum, quid absolutum, sumptus liberaliter per doctorem *Gerhardum Aquensem* ad vos curabo adferri. *Epistolas Synodales* ex libro pergameni descriptas una cum originali, si jam *Birckmanno* traderetis, pergratum esset: indico ipsi, cui *Francofordiae* talia committat ad me perferenda. *Lovanii* est impressus liber anno. 51. in 8°. per *Petrum Phalesium* De veritate corporis & sanguinis domini &c. In eo quaedam sunt, quae vobis erunt forte non ingrata, congeffit enim plurimos tractatulos. ad me nihil descriptum mittite, nisi certi sint tabellarii, & quia non dubito Reip: *Coloniensis* deputatos hic esse, facile ad me certo poteritis. hospes mihi est *Daniel Ulstatt*. fui apud *Canonicum*, qui & *legem Salicam* habet. In fine ipse has interpretationes antiquorum vocabulorum annotaverat, ut inclusa est scedula. Principi *Ottboni Henrico Palatino* vestra misi, nihil adhuc respondit, urgebo denuo, & summa diligentia vestrum negotium agam, ac significabo, qualem invenero. Dominum D. V. *Velfum* salutate & rescribite, quis fuerit *Tragoediae* exitus. Apologiam si quam edidit, ad me mittite, literas vestras si vel *Spiram* miseritis ad Dom. *Furflenbergium* recte curabuntur. Mansurus sum hic per Comitias, *Birckmannus* quoque recte

curabit perferri. Si certior fuerit tabellarius, poteritis literis vestris subinde aliquid conjungere. Calendarium Ruthenicum ad vos mittam, postquam descriptum fuerit. Initium anni facit a Septembri & multorum sanctorum Graecorum nobis incognitorum notam continet. Hisce valete in Domino & rescribite saepe. Datae Augustae. 18. Marcii Anno. 55.

EPISTOLA XVIII.

JOACHIMUS HOPPERUS

Cornelio Gualtero & Georgio Cassandro S. P.

Mechliniam.

Volenti mihi heri D. Viglio valedicere, Clarissimi amicissimique viri, ille respondit, se habere, quod adhuc hodie in prandio mecum ageret. Quominus ergo in prandio vobiscum esse possim, quemadmodum condixeram, veniam dabit, ad coenam autem omnino approbante Deo adero. Ut igitur & vos isthic maneatis, & quod me visendo beneficium mihi praestitistis, id nunc ultra constitutum nonnihil commorando, cumuletis, vos etiam atque etiam rogo. Quod quidem vel eo minus vos mihi puto denegaturos, quod spem habeo adferendae novae historiae *Sleidani*, quodque schedia vestra variarum antiquitatum nondum vobis restitui. Sic igitur facietis, & cum uxorcula mea, quam meo nomine salutabitis, interea temporis gaudebitis. Bene valete, Clarissimi amicissimique viri. Antverpiae 14. Maji 1555.

EPISTOLA XIX.

JOACHIMUS HOPPERUS

Cornelio Gualtero & Georgio Cassandro S. P.

Brugas.

Mitto vobis, Clarissimi Domini & Amici, ea quae ex Franciscanorum Bibliotheca vobis mandaveratis exscribenda. Si rudior & minus emendata fortassis est scriptura, jubebitis iterari, curabo, ut non solum bene, verum etiam eleganter omnia vobis exscribantur. Remitto etiam leges Fresiorum, quas mihi jam descripsi. Si qua ratione fieri possit, velim vos hac redire Coloniam, habeo enim quod vobiscum convenirem, meo ac vestro iudicio valde ferium, de eo videlicet, de quo sub abitum vestrum pluscula colloquebamur, quae non tam commode literis mandari, quam coram tractari possunt, videor enim mihi repperisse aliquid, quo reapse operam aliquam reipublicae ea in re navare possim, maxime si habeam adjutores aliquot, qui nihil pedetentim sunt comparandi. Dominum *Scoonhovium* velim meo nomine plurimum salutatum, & si intelligam non ingratum illi fore, si de antiquitatibus nostrae gentis, hoc est Fresiorum, per literas subinde ad illum scribam, & interio-

riorem paulatim cum eo familiaritatem contraham: ita faciam, nam quemadmodum libenter ab amicis disco, ita nihil quoque est in mea tenuitate, quod non iis vicissim omnibus modis sit expositum. Bene valete, Clarissimi & charissimi viri, & nos, ut facitis, amate. Mechliniae 3. Id. Junii 1555.

EPISTOLA XX.

JOACHIMUS HOPPERUS

Cornelio Walthero & Georgio Cassandro S. P.

Qui hasce vobis reddidit, *Cornelius Rhetius* est Jurisconsultus, meus amicus & familiaris. Is Coloniam commigraturus habitatum, vobis per me commendari voluit, ratus meam commendationem pro nostra veteri necessitudine aliquid apud vos posse. Quo minus autem ea spes illum fallat, vos diligenter curaturos etiam atque etiam confido. Nam praeter hoc, quod & virtus vestra tanta est, & nostra amicitia, ut nihil diffidere debeam: tum etiam ipse *Rhetius* ejusmodi est, ut doctorum ac proborum hominum favorem sua sponte mereatur. Quare si ita casus ferat, ut vel ad professionem Juris commendare illum possitis, vel ad forum, liquide utrumvis licebit: nam & juris cognitionem habet valde eximiam, & forum multis annis diligenter tractavit. De *Sleidano* ad me misso magnas habeo gratias, pretium dabit *Rhetius*. Bene valete, ac me vestrum esse vobis persuadete. Mechliniae Calendis Aprilis. 1556.

EPISTOLA XXI.

JOACHIMUS HOPPERUS

Antonio Schoonhovio S. D.

Qui hasce tibi reddidit, Clarissime Domine Schoonhovi, patronus causarum apud nos est, nomine *Stenemolen*, homo probus ac diligens. Is quoniam procurator negotiorum Capituli vestri, quem hic perpetuum habere soletis, vita functus est, in locum ejus suffici optaret, utque super ea re dominationem tuam, in cujus autoritate summum praesidium ponit, interpellarem, vehementer me rogavit. Quare ut commendatum eum habeas, & quod cum Capituli vestri commodo fiat suffragio tuo juves, etiam atque etiam oro, teque ita facturum valde confido. Quod res Capituli mihi commendas, hoc tibi persuade, me quatenus aequi ac boni ratio permittit, semper commendatas habiturum. De tuis annotationibus magnas habeo atque ago gratias. Quantum iis sim adiutus, malim te aliunde suo tempore, quam ex istis literis cognoscere. Essent quidem mihi ad aliquot adhuc dies usui (tam enim varie occupamur, ut perparum supersit temporis, quod studiis liceat impartiri) sed

sed pudet jam secundo admonitum non remittere. Quare si quid est in nostra bibliotheca, quo vicissim utendum censeas, tantum opus est uno verbulo, sum enim totus tuus. Vale, clarissime ac eruditissime Schoonhovi. Mechliniae xix. Septembr. 1556.

Hic *Schoonhovi* fuit Canonicus Brugenſis, cui debemus Eutropium, primum ejectis aliorum interpolationibus ſibi reſtitutum, quam laudem perperam *Eliae Vineto* tribuit *Naudaeus* de Sena pag. 24. vide *Glareani* Praefat. in Eutropium. *Valer. Andr.* Bibl. Belg. p. 75. & *Ant. Sander.* de eruditis Brugenſibus pag. 19. *Rumoldus* vero *Stenemola*, ſi hic ille innuatur, ut puto, fuit praeceptor *Jani Secundi*, quem celebrat pag. 109 & 113. Poematum. & cui epitaphium poluit *Hadrianus Marius* pag. 63. unde apparet ab actis Batavi Senatus fuiſſe. vid. *Andr. Valer.* p. 804.

EPISTOLA XXII.

JOACHIMUS HOPPERUS

Joanni Birckmanno Librario S. P.

Binas tuas literas, eruditissime atque amicissime Birckmanne accepi, quibus quod non confestim respondi, per negotia factum est, quibus propter Praefidis absentiam, vel hanc tantillam epistolam vix tandem potui eripere. Quam mihi ab *Cassandro* nuncias salutem, gratissima fuit, quemadmodum & libelli, quos una miſiſti, quorum alter a *Cassandri* instituto non videtur alienus. Quod de meis nugis me tam serio interpellatis tu & *Cassander*: nae pro vestro quidem amore facitis, sed ipse scio quam mihi sit curta suppellex, ut omittam in tanta multitudine negotiorum, quam parum sit otii ad commentandum, & quanto minus, ad bene commentandum: nam ut de manu quidquam dimittam, quod non ad plenum perfectumque sit elaboratum, neque haec aetas fert neque ordo, neque sane ea est instituti mei ratio. plane tametsi pollicitis meis nondum hoc tempore possum respondere, & quod vobis debetur aes alienum persolvere, quod etiam Cardinalis aliqua ex parte sibi vendicat: nisi tamen satisfecero, non conquiescam, speroque brevi effecturum me, ut vos placatos reddam, prius quidem *Cassandrum*, cui minus opusculum debetur, deinde vero te, ad quem majorum vigiliarum opus excudendum mittetur. De *Lindani* scripto adversus *Cassandrum*, nihil equidem audiſi, nec vero puto ullum extare, sed significavit aliquando coram nonnulla esse, quae non satis probet. Ut Anabaptistas fortiter oppugnet *Cassander*, etiam atque etiam hortor. De *Pfluggi* judicio de scriptis *Cassandri*, quod ad me miſit, est quod illi plurimum gratuler, nec dubito, quin apud multos multum sit ponderis habiturum. Institueram ad *Cassandrum* aliquid scribere, sed intervenerunt hoc ipso momento quaedam negotia, quae, quod illum capere oporteret, intercipiunt. Itaque mittes ad illum exemplum harum literarum si videtur, ut vel aliquo modo quadamtenus ei satisfiat. De libris, quos abs te habeo, & mihi non sunt futuri usui, ita faciam, ut scribis. Cura, optime *Birckmanne*, ut valeas, & si qua fieri potest, antequam Coloniam redeas, ad nos excurre. Raptim Bruxellae, pridie Calendas Februar. M. D. LXIII.

EPI-

EPISTOLA XXIII.

JOACHIMUS HOPPERUS

N. N. Cognato suo S. P.

TE saluum ac sanum, cognate Clarissime, Spiram venisse gaudeo, oro-
 que Deum, ut reliqua fortunare & ad animi tui sententiam concedere velit.
 Librum, quem *Cassandri* iudicabas, paulo ante e Gallia acceperam, quam tuæ
 literae ad nos perferrentur. Placet sane, sed, quemadmodum etiam tum dice-
 bam, nequaquam puto esse *Cassandri*, idque multis argumentis, quae hîc ni-
 hil attinet referre, quando *Cassandrum* jam ipse convenisti. ¹ *Franc. Balduinum*
 in Gallia esse in familia Cardinalis *Lotharingi* jam, credo, audivisti: fertur etiam
 author Orationis, quam contra *Bezam* Cardinalis habuit, satis meo iudicio
 luculentam, ita ut spes sit fore, ut in viam *Balduinus* redeat, quod vehemen-
 ter etiam atque etiam spero: nam quanto quis fit doctior, & in antiquitatis
 studiis diutius versatur, tanto magis ac magis a novis istis inventis recedit, &
 ad interpretationes patrum veteremque usum Ecclesiae se applicat, cui (si
 quando paululum corrupta est) restituendae, non autem evertendae operam
 dare oportet. Novarum rerum, quod te putem ignorare, hîc nihil est, nisi
 quod Episcopatus nostri novi aliquot jam sunt constituti, ut Iprensis, Harle-
 mensis, & Middelburgensis. D. Cardinalis Archiepiscopus Mechlinensis au-
 tem heri cepit, aut hodie capturus est possessionem, per procuratorem suum
² *Couthautium* nostrum, quem nosti. Gallia tota turbulenta est, & quantum con-
 jicere licet, meditantur magnum malum. Nobis cum haereticis Tornacensi-
 bus & Flandrensibus Galliae finitimis multum est negotii, speramus tamen
 meliora, ac potissimum quidem ex novis istis remediis, quae meditamur, aut
 vera, aut certe ad vera proxime accedentia. Cura, optime Cognate, ut va-
 leas. Uxor se plurimum tibi commendat. D. *Andreae Gail* multam a me di-
 ces salutem. Raptim Bruxellae. xxix. Novembr. M. D. LXI.

¹ Hic *Balduinus* vario ingenio & subdolo, primum addictus Papisticae Sectae, deinde Gene-
 vam abiit, & *Calvini* & *Bezae* familiaritate usus, iterum se contulit ad pontificios. Principi etiam
 Arausiconensi se insinuavit. vide ejus vitam apud *Valer. Andr.* Bibl. Belg. p. 221. *Sammarth* Elog.
 I, II. pag. 106. *Melchior Adam* Jct: p. 200. & praecipue *Bayl:* diction. Critic. t. I. p. 474. multa de
 eo in *Cassandri* quoque Epistolis mentio, sed praecipue Ep. XL. XLII. LXVIII. & LXIX. ubi de li-
 bellis ejus contra *Bezam* & *Calvinum*. adde & Epist: a D. *Heinsio* Editar. Centur. I. 53.

² Metuo ut hoc nomen bene sit expressum; nec aliud tamen ex scriptura elicere potui.

EPISTOLA XXIV.

JOANNES SAXO

*Cornelio Gualtero S. D.**Coloniæ.*

MEminiſti ſine dubio ſæpius in literis noſtris ultro citroque miſſis mentionem vitæ divi Willibrordi factam eſſe. Velim itaque, ſi potes, mihi eam ſoluta oratione alicunde conficias. Hoc feceris mihi longe gratiſſimum. Poſtremis tuis literis, ſi recte memini, videbaris mihi ſignificare te audiviſſe eam alicubi extare proſa oratione ſcriptam. Cuperem etiam ſcire, ſi commodum eſt, quo tempore Coloniae ſis futurus, ſi forte quid incideret, de quo tecum per literas commentari vellem. In his regionibus nihil novi accidit, niſi quod duodecim cohortes militum aut circiter, duce *Weisbergo* Wueſtfrifiam hujus ditionis partem, inter oſtia Albis & Viſurgis fluminum, ad mare ſitam, proximo vere diripuerunt, atque omnibus rebus mobilibus ſpoliaverunt exinaniveruntque, contra omnium hujus dioceſis ordinum voluntatem. Illi Cares, cum audiviſſent duces Brunſvicanos cum exercitu adventare, varias in regiones diffugerunt, vexillis diſcerptis. Hic deus juſtum judicium exercuit. Nam in illa fuga non gregarii milites, ſed dux ipſe, tribuni centurionesque iſtius latrocinii autores, poenas dederunt. *Weisbergus* ipſe in manus præfecti arcis Pinnenbergenſis in Holfatia venit. Illic adhuc eſt in cuſtodia. Tribunorum centurionumque alii Hamburgi, alii in oppido Itzeho Holfatiæ (Nam illic decreverant militum manu iterum coacta etiam tumultum facere) partim in vinculis ſunt, partim in hoſpitiis adſervantur cuſtodianturque. Landvogtius hujus dioceſis, qui illis hujus facinoris autor adjutorque fuerat, in fuga Lunaeburgi compræhenſus, in turri illa nobili, quæ Springintguet vocatur, hoſpitium habet. Concionatores hujus capituli & civitatis acriter inter ſe diſceptant pro concione de corpore & ſanguine Chriſti, ſine tamen omni motu aut perturbatione populi. Maxima pars concionatorum totius Saxoniae & ſeptentrionis ſentit cum illa parte, quæ aſſerit in coena dominica verum, naturale, eſſentiale corpus & ſanguinem Chriſti ſumi, ſolumque corpus & ſanguinem non eſſe ubique, ſed Chriſtum (qui verus deus & verus homo eſt, & quatenus homo eſt, ex anima rationali & corpore humano gloriſicato conſtat) ubique eſſe. Eſt enim novum vocabulum *Ubiquitatis* jam inventum, & proditum in vulgus, quod ſoli corpori & ſanguini tribui non poſſe, inter factiones convenit. Ego metuo ne & de iſtis & aliis religionis noſtræ capitibus nimium altercando veritatem amittamus.

De vita Willibrordi memineris, & valebis una cum *Caffandro* noſtro, in Chriſto feliciter. Brema natali divæ Magdalenæ, Anno LVII.

Hic eſt *Joannes Saxonius* J. U. D. dictus a *Valerio Andr.* Bibl. Belg. 559. qui fuit Hatſtedius Friſius & Hamburgienſis Eccleſiæ decanus, & Bremeniſis Canonicus: ut ipſe ſe mox vocat. ejus vitam deſcripſit ejus æqualis & amicus *Suffrid. Petr.* de ſcriptor. Friſiæ decad. XII. 2.

EPI-

EPISTOLA XXV.

JOANNES SAXO

*Cornelio Walthero S. D.**Coloniæ.*

DE libello legum Friscarum ad me misso magnam tibi merito gratiam habeo. Quod mihi etiam Bonifacii Archiepiscopi Moguntini, Liudtgeri Monasteriensis & Gregorii Ultrajectensis Episcoporum vitas describendas curasti, quam mihi gratum sit, verbis assequi nequeo. Ubi descriptae & cum exemplaribus suis collatae fuerint, velim eas *Henrico Magen* Coloniensi, qui mihi tuas literas reddidit, hujus epistolae latori, qui hîc mercaturam panni exercet, ad me perferendas committas. Earundem vitarum scribae grato animo mercedem suam persolvam, cum quantum postulet scivero, quod ut mihi indices rogo. Quod ipse vitas exscriptas cum suis archetypis conferendi & emendandi laborem mea causa sumpturus es, admodum libenter audiui. Ad vitam Willibrordi Ultrajectensis Episcopi exscribendam, cuperem aliquem juvenem literatum, in monasterium Epternacense Colonia Agrippina meis sumptibus per te mitti, qui tam eruditus sit, ut eam & recte describere, & descriptam ad exemplar rite conferre, & siquid scribendo erraverit, ipse inter relegendum corrigere atque emendare norit. Scis enim ipse, quam nulli usui sint exempla cum suis exemplaribus non sedulo comparata. Si talem hominem nactus fueris, velim mihi significes. Confestim enim & viaticum & praemium laboris, quantum indicaveris, illi mittam.

De Colonia & Ambronibus, quod ex me scire cupis, breviter sic habeto. Coloniæ oppidum aut locum ad septentrionalem Oceanum Germanicum five Balticum unquam fuisse, nunquam vel legi vel audiui. Sunt autem mihi plerarumque nobilium urbium antiquarum nomina, ad mare Balticum & in ejus vicinia sitarum nota: quae cum olim, maxime ethnicis temporibus, admodum floruerint, ante aliquot secula aut ad nihilum venerunt, aut in vicorum formam degeneraverunt. In Suedia clara Gotorum urbs Birca interiit, sed finitimae Upsalae incrementa suo interitu dedit. Idem accidit Lethrae in Selandia Danica. Nam inde aucta est Roskildia, sepulchris Danicorum regum & ecclesia cathedrali nobilis. In Gutia meridionali Slesvicum ad quinquaginta millia civium armare poterat: nunc aegre ducentos armat. Oldenburgum in ejusdem Baltici maris littore, in Vagria quondam Venedorum five Sclavorum provinciola, nunc Holsatiae parte situm, episcopatu, Barbarossa imperatore, Lubecum inde translato, omni pristino decore amisso, a mari etiam ad duo passuum millia deserta, paucis tuguriis vix vetus nomen conservat. Ea urbs olim tribus nominibus insignis fuit. Saxonice enim Oldenburgum, Venedice Starigart, idem significante vocabulo, Danice alia ratione Brandenesia appellabatur. Nam erat in harum trium nationum confinio posita. In Gotlandia insula emporium opulentum & populosum fuit Wisboia. Inde

mercatus superioribus seculis, fatis omnia mutantibus, Wisbariam primo, & cum illa etiam quasi defloruisset, ex ea urbe multo post Lubecum traductus est. Wisboia nunc vicus est maritimus non magni precii, arce tantum conspiciendus, veterem celebritatem cellis cameratis earumque ferreis valvis utcunque etiamnum ostendens, & quod lex nautica, ut antiquitus in mari mediterraneo a Rhodo, sic toto Baltico sinu adhuc a Wisboia nomen habet, atque ejus nomine a nautis colitur & observatur. In Pomerania magnifica urbs Wineta sic intercidit, ut etiam locus ejus ignoretur. Creditur tamen propinqua Stetino fuisse. Julini in eadem provincia maximas quondam opes maximamque civium convenarumque frequentiam fuisse scriptores nostrates confirmant. Est autem in ripa Suevi fluminis, non procul ab eodem mari positum, nunc pauperculi oppiduli speciem habens, & nonnihil contorto vocabulo vulgo Wollin dicitur. Bardevici nomen tibi notum esse puto, in terra Lunaeburgensi ad fluvium Elmenoviam, ad secundum a Lunaeburgo, sed ad sextum ab Albi lapidem, in quem Elmenovia influit, collocati: quae urbs cum prius, quam ab Henrico Leone Saxonum duce everteretur, potentissima fuerit, nunc sub vici figura vetus tantum collegium canonicorum & octo templa, quae vulgus parochialia nominat, admodum deformia, & aggeres veteres ex parte dirutos adhuc ostentat. Hujus everfio Lunaeburgo multum profuit. In occidentali ripa Albis, in Cauchis, qui nunc Kedingi appellari putantur, e regione Sturiae fluminis, qui ab oriente ex Holsatia in hunc profluit, & ante & post Christi redemptoris exortum, Dorstadium oppidum & mercimoniis & hominum multitudine & divitiis excelluisse, memoriae proditum est: quo inundationibus deleta, ex illius ruderibus hoc Stadium ad Quingam fluvium, duo passuum millia longe ab Albi exaedificatum existimatur. Sed ne instituti obliviscar, inter tam multarum veterum urbium vel nomina, vel cadavera, vel reliquias, nullus annalium, harum praesertim regionum, scriptor, quod ego sciam, Coloniae, quae his in locis fuerit, meminit aut mentionem facit. Urbs tamen illa, in qua princeps elector Brandenburgensis habitat, cum Sprea flumine (quod Christianus Pirkheimerus Nurembergensis in Germania sua Suevum olim vocatum fuisse, perperam scribit.) in duas partes dividatur, quae pars urbis orientalem ripam attingit, Berlinum dicitur, quae vero occidentalem tenet, in qua ejus Electoris arx ac sedes est, Colonia nominatur, omnibusque principis Electoris nomine illinc dandis literis locus sic adscribitur, Datum *Zu Collen ann der Spre.* Sed hoc oppidum ad Lxxx. millia passuum & eo amplius a mari Baltico distat, propterea fortasse minus ad historiam sive fabulam Ursulanarum virginum pertinet. Novi etiam vicum in Turingia, cui nomen est Cucolonia, id est vaccarum Colonia. Is multo minus nostro proposito servire videtur.

Ambrones, ut scis, Gallica gens, Cimbrorum & Teutonorum socia, ad Aquas Sextias una cum Teutonis a C. Mario ad internecionem caesi fuerunt. Ejus gentis si ullae reliquiae fuerunt, illas in Gallia haesisse crediderim. Hic in vicinia pars Frisiae Amberlandia, ejusque populus Ambri vocantur, quorum

caput est Oldenburgum ad Huntam flumen, ubi nobilis ille & potens Oldenburgensis & Delmenhorstenſis Comes domicilium habet. Utrum hi Ambriprileis Ambronibus cognati ſint nec ne, nihil pro certo alterutram in partem affirmare auſim: neque quidquam de Ambronibus mihi praeterca conſtat.

Fui verbosior quam putaveram, tecum per literas philoſophandi garriendique quadam voluptate ductus. Ignosce igitur, aut ſi libet & vacat, prolixiore epiſtola quibulvis de rebus ſcripta, par pari referto. Sincſala Flandriae maritimus locus, qui olim Friſiae terminus meridiem occidentemque verſus fuit, quo etiam naves e Norvegia & Gutia appellere quondam conſueverunt, a noſtratibus chronographis interdum nominatur. Siquid de ejus ſitu & forma compertum habes, id mecum ut communices peto. Habeo vetus chronicon Hamburgenſe, in quo haec ſequentia ad verbum habentur. *De Ripa in Flandriam ad Cincſal velificari poteſt duobus diebus & totidem noctibus. De Cincſal ad Prol in Angliam duobus diebus & una nocte. Illud eſt ultimum caput Angliae verſus austrum, & eſt proceſſus illuc de Ripa anguloſus inter austrum & occidentem. De Prol in Britanniam ad S. Mathiam uno die.* Haec ille. Caeterum Ripa urbs eſt Gutiae ſive Gutlandiae, id eſt Cimbricae Cherſoneſi in littore occidentali ſatis lauta, epiſcopatu Ripenſi celebris. Terra, in qua Ripa ſita eſt, Nortgutlandia appellatur. De Sincſala ergo, rogo ut mihi indices ſiquid reſci- viſti.

Vehementer mihi gaudeo, quod tecum & cum eximia doctrina viro, Domino *Caffandro* noſtro, ſuperiore anno noticiam amiciciamque contrahere contigerit. Neque mihi in illa peregrinatione Friſica quidquam laetius accidit, quam quod in vos viros eruditos, honeſtos & comes bona quadam fortuna incidi. Eam amiciciam cupio inter nos eſſe perpetuam, ſumque & tibi & illi ad gratificandum paratiſſimus. Vale, & ſaluta eundem meis verbis diligenter. Datum Brema ix. Calend. Febr. anno LVI.

Joannes Saxo. Hatſtedius Eccleſiae Hamburgeniſis decanus, Eccleſiae metropolitanae Brementiſis Canonicus, I. V. doctor.

EPISTOLA XXVI.

JOHANNES MOLINAEUS

Georgio Caffandro S. P.

Duisburgum.

PErpetuo mihi viſum eſt, Caffander Doctiſſime, meae decretorum profeſſioni, nihil aeque neceſſarium eſſe, ac eccleſiaſticae cognitionem anti- quitatis; qua quidem in re cum compertiſſimum habeam omnia tibi perveſti- gata eſſe & cognita, dici non poteſt, ex quo Regia Majeſtas nos hanc Spar- tam Lovanii excolere voluit, quantopere conſuetudinis tuae fructum deſidera- verim, quam utinam ſtipendii mei ſemiſſe liceat redimere. Caeterum quando longioribus dividimur ſpatiis, quod proximum eſt, precor ne grave ſit, epi- ſtola

Hh 3

stola te vel authorum nomina, quibus quicquid huc pertinet pertractatum est, percernere. Liturgicis tuis ingenue profiteor nonnihil me adiutum. Tamen id velim persuadeas tibi, a studiosis nullam te initae sponfionis acceptilationem consecuturum, ni fontes ipsos, unde omnia deprompta sunt, detexeris. Liturgias ipsas, te sic jubente, jamdudum expectamus. Quo quidem in opere ut auctius prodeat, Jacobi apostoli, fratris dicti domini, Missam Graecam lubens suppeditabimus. Reor equidem haec tibi eam minime visam esse, quamvis sit omnium reliquarum vetustissima, & prope parens: cujusque testimonio usi conspiciuntur patres Canon. 32. Synodi Constantinopolitanac in Trullo, quae oecumenicarum ordine sexta existit. Quod si quis te Genius huc aliquando (quod imprimis opto) pertraxerit, exhibebo tibi Isodorum, Burchardum, & Ivonem Carnotensem vetustos canonum concinnatores, quorum nullus adhuc typos sensit. Nam quae Burchardi Ivonisque nomine circumferuntur passim decreta, nihil sunt, quam horum compendia, ab ignotis ut plurimum authoribus digesta. Habemus & Graecorum canones plures omnino, quam sint Lutetiae impressi: quamvis multos etiamnum desideremus. Confidimus tamen propediem nos habituros omnes: & una cum iis etiam epistolas canonicas patrum Graecorum, quod est volumen alterum. Multa sunt praeterea, quae instaurandae praelectionis nostrae ergo undique conquisivimus. Ordinem Romanum interim, cujus penes te esse arbitror tria exemplaria, nusquam potui reperire. Si liber est molis non omnino magnae, velim meo aere hunc codicem descriptum habere. Si quid erit praeterea, quod ad institutum nostrum judicabis pertinere, quaeso, ne graveris indicare. Vale. Lovanio Calendis Julii 1559.

Salutabis meo nomine D. *Cornelium*, *Othonem* etiam cum conjuge, & si qui erunt alii amici nominatim.

Joannis Molinaei, sive vander Meulene, Gandensis vita est apud Valer. Andr. Bibl. Belgic. pag. 541. & Sweert. Athen. Belg. Decretorum Regius Professor factus A. 1557. ordinarie & continue legens. Valer. Andr. Fast. Academ. pag. 156. & 195. de eo scribit Viglius Zwich. Epist. xxv. pristino destitutum favore rediisse Lovanium, sed persuaderi ipsi non posse, ut Gratiani decreta praelegat, sed sua dictamina loco eorum surrogare. Respondet ad hanc epistolam Cassander Epist. xiv.

EPISTOLA XXVII.

JOHANNES MOLINAEUS

Georgio Cassandro S. P.

Coloniam.

LIterae tuae, Cassander eruditissime, quibus nihil omnium mihi potuit aut jucundius aut suavius accidere, redditae sunt mihi ad iter, quod Gandavum suscipiendum versus erat, accincto. Itaque diffidebam posse me meas eidem tabellario tradere. Caeterum quum is commodum heri sub multam reverso noctem hodie sese offerat, nolui prorsus vacuum remittere. De censura operae tuae in hymnorum libello nihil nunc attingam, quod otium non fuerit
cri-

criticorum sententiam, quidve eos moverit ad damnationem, exquirere, quamvis id me facturum per oportunitatem lubens recipiam. Plane ut retractetur iudicium, quod magnopere a me contendis, ne spes quidem est ulla. Illud interim dolorem lenire poterit, quod in catalogum librorum lectionis improbatæ nedum ea referuntur, quæ hæresim quampiam aut statuunt, aut redolent, sed quæcunque ætati nostræ parum videntur congruere. Velim profecto te hymnos ipsos edidisse suppressis scholiis, quæ labore nos tuo frui haudquam finunt. Est Gandavi ¹ *Franciscus Goetbals*, *Othoni* fortasse quam tibi notior, nobis certe notissimus, qui editionem secundam meditatur. Ac ut est in iis carminum generibus, quibus conscripti sunt hymni, versatissimus, multa castigavit, versusque, ubi minime constaret numerorum ratio & quantitas, quorum ingens est, ut ait, multitudo, conatus est restituere, semper retento sensu pristino, quinetiam ipsis verbis: nam transpositione vocum frequenter vitium sustulit. Missam Beati Jacobi dedi studioso cuidam describendam propediem ad te missurus. Nunc in Ivonis Carnotensis decreto castigando laboramus. Sed parum foelici successu, quod unicum exemplar dumtaxat ad manum sit, idque non admodum correctum. Quod si ejus plura nosti exemplaria, velim id te perscribere. Tuo nomine Salutem dixi ² *Tiletano*, *Augustino Hunnaeo* eam debeo, quod interea non sit visus. Ille videtur, quantum prima fronte conjeci, non omnino integram de te opinionem habere. fortè quod patriam nunquam repetas, quodque eas præferas ditiones, in quibus quidvis sentiendi opinandique libertas est major. Satiùs est tamen multo Coloniae te morari, quam Duysburgi, qui locus pessime istic audit, propediemque futurum est, ut inde omnes revocentur, in renitentes gravibus constitutis poenis. Itaque gaudeo nullam nomini tuo ea occasione notam inurendam. Ad fontes Leodieneses vivere te constitueram, sed honor doctoratus propediem suscipiendus in causa erit, quæ minus adesse dabitur. Vale, Cassander eruditissime, Lovanii: Raptissime undecimo die Augusti. Memineris Coriolani Plutarchi.

Rex noster classe in Hispaniam contendens Flandriæ nostræ & Artesiæ Egmundanum Comitem, Hollandiæ & Zelandiæ Principem Aurisiacum, mari Comitem de Hornes præfecit.

¹ Vide infr. Ep. xxx.

² Vide de his mox ad Epist. xxix.

EPISTOLA XXVIII.

JOHANNES MOLINÆUS

¹ *Georgio Cassandro* S. P.*Coloniam.*

EN tibi Beati Jacobi Missam, Doctissime Cassander, quæ a studioso quodam transcripta est interea, quod Gandavi apud Regem Philippum comoramus. De missali Hispano memini me tum audisse, tum legisse etiam ante,

¹ Responsio ad Cassandri xiv. qui respondet Ep. xv.

te,

te, quamvis haec mihi minime viso. Quidam Hispanus Dominicanus fidem nobis fecit sese curaturum, ut ejus exemplum brevi habeamus, qui si fefellerit, constitui Regium Confessarium ea de re literis interpellare, quicum mihi necessitudo est haud vulgaris. Caeteroqui si quid erit, quod ad institutum tuum promovendum pertinebit, tuus labor fuerit mandare, jubere, imperare, noster ilico curare jussaque capescere. Audio te valetudinis ergo ad fontes Leodinos commorari, quo eram omnino tui videndi cupidissimus accessurus, ni occupationum immensa moles, quam impendens² Doctoratus honor nobis peperit, necessario vel invitum ac renitentem retineret. Neque tamen ob id omni excidi spe, posse me te coram frui, cui haud erit molestum oportunitate oblata Coloniae te invenire. Porro de libello tuo hymnorum, quem doles in catalogum improbatæ librorum lectionis insertum, etsi quidnam mihi videretur, scripserim alias; tamen ut intelligas, quantopere existimationi studeamus tuæ; recipio me propediem missurum ea, quibus adducti sunt Critici nostri, ut ita decernerent. Quæ si aut mutare voles aut confutare poteris, dabimus operam, ut studiosorum manibus teri possit. D. *Cornelio* ex me salutem dicito. Is ante triennium, ni fallor, abstulit commodato aliquot libros e bibliotheca Martinensium, & in his Eusebii chronicon manu scriptum. hos cupiunt, quorum ea res est, sibi restitui. Vale Lovanii 5. Septembris 1559.

² Antea enim Licentiatus tantum fuerat: Doctor creatus v. Non. Octob. 1559. v. *Valer. Andr. Fast.* p. 195.

EPISTOLA XXIX.

JOHANNES MOLINAEUS

¹ *Georgio Cassandro S. P.*

Coloniæ.

Missam Beati Jacobi græcæ, quamvis non omnino emendatam, uti scribis, perlatam esse gaudeo. Tres sunt anni, cum Reverendissimus Atrebatensis codicis sui nobis potestatem faceret: tum dedi eam describendam adolescenti satis quidem erudito: sed in impressis quam manu scriptis libris versatiori. Atque hinc factum forte, ut meum exemplum, quod secutus est notarius tuus, sit minus castigatum. Is valde cupiebat nos conferre utramque scripturam, priusquam transmitteretur; quam ego operam non sponte mea, sed variis negotiis id temporis fatigatus recusavi. Crediderim tamen errores esse ejusmodi, ut facile etiam citra alterius exempli præsidium ex ipsa sententia possint restitui. Ut vero Missale Hispanicum, quod *Mosarabes* vocant, aliquando nanciscamur nihil habeo spei firmioris. quod edicto Regio omnes ejus gentis, quotquot hîc erant studiosi, vix uno alterove retento in Hispaniam sint revocati. Unus certe decedens promisit se curaturum, ut aliquando videamus: sed vereor ut fidem servet, quem sponsionis suæ itidem submonere

va-

¹ Responsio ad Cassandri Ep. xv. qui respondet Ep. xvi.

vastissima terrarum mariumque intervalla non finunt. Dabo tamen operam diligentem, ut ne hac quidem in re voto tuo frauderis perpetuo. Exspecto jam abs te vicissim libellum ordinis Romani, quem velim te mandare alicui transcribendum, & quidem meo aere ac sumptu. Ivonis Carnotensis decretum in partes septem ac decem digestum habemus quidem, sed ita mutilum & mendosum, ut de editione in publicum ne cogitare quidem possimus, ni accesserit aliorum codicum copia. Proinde feceris nobis rem longe gratissimam, si eum codicem, quem ais esse quam castigatissimum, utendum ad nos miseris, quem paulo post optima sumus fide restituturi. Quem nos nacti sumus, is re-
gius est, a *Maria* Angliae regina olim non sine multis impetratus precibus; qui primum datus est cuidam monacho inspiciendus. Is nescio quo consilio quem oportuit Gratiani decretum ex Ivone emendare, maluit ex Gratiano Ivonem pervertere. ² *Tiletano* placuit, quod ea, quae offenderunt in scholiolis ad hymnos tuis, mutare non recuses. itaque dedi operam, ut censuram videas. sed quia ea impetrari debet a pluribus, haud scio an hoc tabellario expedita parataque futura sit. Jussit te praeterea suo nomine salvere. unde conjicere lubet acquiorem tibi esse, quam haecenus. Praeses *Viglius* Aquisgrano reversus in mensa vestrum officium commemorabat. Adjeci quantopere nostram professionem tu una cum M. *Cornelio* juvares. quod sciebam suae Celsitudini comprimis fore gratum. Aderant tum, qui non omnino optime volunt tibi, conticuerunt tamen omnes intentique ora tenebant. ut scias non tam infensos ac iratos esse, quam vulgus putat. Vale, Doctissime *Cassander*, & nostram spartam exornare perge. Sed heus, quod prope exciderat mihi, M. ³ *Augustinus Hunnaeus* Theologus nedum te resalutat, verumetiam obnixe rogat, ut quinque illa capita, quibus revinci posse & ad religionem sanio-rem pertrahi existimas, in epistola nuncupatoria ad Vigilium martyrem, nedum haereticos omnes, verumetiam infideles & paganos, non graveris communicare. Iterum Vale. Lovanio 27. Octobris. 1559. Censuram curabo ut habeas primo tabellario.

² Credo esse *Jodocum Ravestonium Tiletanum*, hoc tempore Professore Lovanii, & acerrimum haereticorum vexatorem. vid. *Valer. Andr. Bibl.* pag. 594. & *Fast.* p. 110. & *Marchant.* descript. Flandr. lib. 1. pag. 82.

³ *Auz. Hunnaei*, vulgo *Huens*, vita est apud *Valer. Andr. Bib. Belg.* pag. 95. & in *Fastis* pag. 116. in *Joannis Hesselii* locum successit commendatione nostri *Molinaei*, cum Lovanienses Theologi alium surrogari petiissent: ut scribit *Hoppero Viglius* Epist. xxxiv. in Epistola *Cassandri* xxix. vitio librariorum credo legi, *Augustinum Harpaeum*, pro *Hunnaeo*.

EPISTOLA XXX.

JOHANNES MOLINAEUS

¹ Georgio Cassandro S. P.

Coloniam.

Petrus Colonienfis tabellarius, cui Ivonem ad me perferendum credideras, Doctissime *Cassander*; fideliter eum tradidit, paucis post diebus quam
Tom. II. Ii pro-

¹ Respondet ad hanc *Cassander* Ep. xix.

provinciam suscepisset. Quod autem id serius tibi significem, est quod ipsum culpes, non me, quod interea ad me nunquam reverterit. Contuli itaque tuum cum codice regio, dedique amanuensibus transcribendum. Qua in collatione ut deprehendi exemplum tuum nostro esse cum vetustius, tum emendatius; ita non omnino mendis esse vacuum, codicum comparatio commonstravit. potuissimque universum ad amussim meam castigare, ni id in alieno & praecario accepto libro audere visum fuisset hominis esse nimium familiaris, vel potius temerarii & improbioris. Perlatus est nuper & ordo Romanus, cujus uti haecenus videndi, inspiciendique desiderio langui; sic nunc in intelligendo laboro, tuamque potissimum operam postulo, cujus fruendi non minimam sane spem audita nuper morte Cl. V. ² *Joannis Walteri* conceperam, sed qua nunc prorsus excidi, quod intelligam sine te D. *Cornelium* advenisse. Ego, vero etsi nihil habeo, quod pro tuis tot tantisque in me beneficiis rependam, tamen iis non expleor, quin plura semper aveo abs te accipere. Censuram certe mihi nuper non sine fatigatione ostensam, tibi que valde desideratam paucis accipe, sed sententiam, non verba, quae prolixiora erant, quam ut luberet describere.

Principio offendit in epistola nuncupatoria seu praeliminari (ni fallor) quod ³ *insignes* a te libri appellantur. qui quatuor adversus Synodum ordine septimam, quae fuit Nicæna secunda, olim conscripti sunt. Profecto id encomii genus parum videtur abesse ab haeresi, si modo non media est dictio, quaeque natura sui tam bonis, quam malis, tam vitiis, quam virtutibus jungitur. Nam ex aequo dicitur *insignis latro*, *insignis nebulo*. ut doctor ut martyr & similia. Neque sum nescius hoc verbo eruditionem notari posse: non etiam pietatem. Verum enimvero ut ut sit, consultius est, praesertim nostra tempestate, ut omnis calumniandi criminandive anfa praeripiatur, ab ejusmodi ambiguis loquendi formulis temperare.

Proximum est quod ⁴ asseris in solenni & publica eucharistiae administratione confirmationem sanguinis statim & semper communicationem corporis sequi consuevisse. Ubi si pro *confirmatione*, *consecratio* legi debet, adstipulor tibi, si *confirmationem* vocas complementum communionis, tum idem iudicium esto, quod de sequentibus. Ais enim plenam communionem habitam non fuisse sine communicatione sanguinis. Expressior est, fateor, & ἐμφοτικωτέρη representatio passionis Christi sub utraque specie, quam sub altera; tamen nihil amplius, aut majus, sub utraque sumitur specie panis & vini, quam sub altera aut panis aut vini; quin in quavis eucharistiae particula totus est Christus, *cujus gratia*, ut ait pulchre Augustinus, *non consumitur morsibus*. Id quod in manna, hujus mysterii figura, manifestissimum fuit, de quo neque qui plus collegerat habuit amplius, neque qui minus paraverat invenit minus. Sic acque sanabat contactus fimbriae Christi servatoris ac admotio manus: & aequae manus, ac totius admotio corporis. Proinde haec digladiatio de specie altera vel utraque

² *Cornelii Gualteri* vel *Walteri* fratris.

³ Pag. 155. ubi libros illos, Caroli Magni titulo, de imaginibus, hoc elogio ornat.

⁴ Pag. 218. in Scholiis ad Hymnos.

mihi prope de lana caprina esse subinde visa est. Neque tamen ob id cenſeo laicis iterum calicis uſum eſſe concedendum, uti olim ſcimus liberum fuiſſe. quin juſtius adverſarios culpo; qui ob rem tantillam, nescio quas non turbas concitant, & ad defectionem provocant. Quippe perpetuo aliquis fuit uſus euchariftiae ſub altera ſpecie, licet rarior: id quod ex eo ſolo conſuevi adſtruire, quod olim Chriſtianis, longum iter per paganos aut haereticos forte ingreſſuris, mos fuit ſecum conferre hoſtiam conſecratam, quam ingruente mortis discrimine, ne ſine ſacro viatico decederent, perciperent. in quibus Cypriani martyris aetate commemoratur aliquis, qui proficiſcens orario ſuo eam incluſerat. Hoc utique non eſt verofiſmile, ne credibile quidem, ſub vini ſimilitudine ſanguinem dominicum aſportaſſe. Minus etiam antiqui iudicarunt, quod itidem affirmas, communicationem corporis & ſanguinis neceſſario eſſe conjungenda. Quamvis non eam inficias, creberrimam fuiſſe ejusmodi communionem, & aliquo fortasſe tempore extra caſum praediſtum, profectionem ſcilicet, vel ſimilem, (valetudinem, inquam, aetatem, ſexum, aut naturae ſingularem qualitatem, hoc eſt corporis *ιδιότητα*.) perpetuam, & ita longa conſuetudine confirmatam, ut prope pro lege haberetur, absolute tamen neceſſariam fuiſſe nunquam admiferim, quamvis Gelafius, canon concilii Turo- nenſis, Julius primus, Paſcaſius, Algerus, Micrologus (ut nihil diſſimulem) urgeant. Verum quod Chriſtus mandaverit, ut omnes ſumant ſub binis ſpeciebus, id nullo pacto mihi probaveris. Sic tradidit, fateor. Sic & poſt coenam dedit, non etiam tum porrigi praecepit. alioquin abſit, ut Eccleſia id fuerit unquam adverſus Chriſti praeceptum mutatura, ſanciendo *ut jejuni & impranſi myſteria accipiant*, ut eleganter ad Januarium docet Auguſtinus. Caeterum ex Micrologo, quod citas de intingenda euchariftia cap. 19. uti fidem agnoſco bonam, ita reprehenſio authoris in promptu eſt, qui eo loco eſt *Berno* Abbas Augienſis, uti a doctioribus accepi: impingit enim manifeſtum mendacium ordini Romano, uti nobis apparet. Die paraſceues ſervatur mos inter Latinos offerendi *τὰ ἀρχηγιασμένα*: pridie videlicet vel die dominica, uti apud Graecos, conſecrata. Neque vinum tum fit immiſſione corporis ſanguis Chriſti. Sed vinum manet: ut toto coelo aberret *Berno*, vel quiſquis illius capitis ſub principium eſt author. Jam vero mos communicandi ſub altera ſpecie non temere increbuit. id quod varii canones de ſanguine effuſo neglectiusque habito coarguunt. Quibus acceſſit & hoc, quod pleraeque mundi plagae & praefertim ſeptentrio prope totus, vini neutiquam ob nimiam frigidityatem feraces ſunt. Adeoque verofiſmile mihi fit, tunc hunc morem invaluiſſe primum, cum innumerae gentes in hoc terrarum ſpacio Chriſtianam religionem receperunt. Tunc certe crediderim reliquos occidentis populos, partim ut pericula vitarent, partim & maxime ut ſeſe in ſacramento pacis reliquis, quibus vini uſus erat incognitus & vix parabilis, pretio conformarent. ne quid neophyti quererentur ſibi minus eſſe, quam aliis. neve ejusmodi diſparitas unius duarumve ſpecierum alicui tumultuandi in republica Chriſtiana anſam praeberet. Quapropter qui conſuetudinem tot jam ſeculis intermiſſam

& obliteratedam revocare nituntur, non tam student paci Ecclesiae, quam motibus & seditionibus in ea excitandis. Adeo consultissimum est ab iis autoritatibus citandis abstinere: sin minus; ut saltem non sine praesenti nota producantur. Duo sunt, quae supersunt. ⁵ Illud *omnes sancti orate pro me*, sic explicas, quasi nudum desiderium significetur, non autem oratio, sive intimatio desiderii ad aliquam personam secundam, quam alloquaris. Non sic Latini, non Graeci patres. Non Ecclesia Romana, non denique hymni illi tui, tuos jam dico, quos concinnasti. Extremum est quod tradis bona opera non esse causam vitae aeternae sed signum, occasionem & viam, & quod haec locutio, ⁶ *propter merita datur vita aeterna*, significet consecutionem, & non causam. si ita est, si verum dicis, quorsum igitur Paulus, *bonum certamen certavi, cursum consummavi, de caetero reposita est mihi corona justitiae?* vel quid, *fide credimus Deum unicuique redditurum secundum opera sua?* Haec si dignaberis mutare, omittere vel mitigare, & moderari, quod ut facias obsecro, tum demum licebit tuis frui lucubrationibus, & nobis tui studiosissimis te acrius ab aemulorum sycophantarumque morsibus tueri. Illud sane nolui omittere, quin tibi significarem, quendam familiarem meum Gandavi ⁷ *Franciscum Goethalsium*, virum doctum, emendasse in hymnis rationem metri. quoties peccatum animadvertit, cujus laborem cum scirem tibi non ingratum fore, non me piguit hac de re ad eum literas dare. Illud quoque intelligo Luteciae sub praelo esse thesaurum missarum. Vale, Cassander doctissime, & me tuis officiis ornare perge. Resalutant te M. N. *Tiletanus* & *Augustinus Hunnaeus*. Lovanio 18. Martii 1561.

⁵ Pag. 242.

⁶ Pag. 262.

⁷ Hujus vita est apud *Valer. Andr. Bibl. Belg. pag. 230.* & *Sander. de claris Brugenfib. p. 28.* Jctus fuit & Poëta: in hunc puto esse festevissimum & aculeatum illum jambum *Jani Douzae* lib. 111. Epigr. pag. 65. unde apparet illum criminatum esse *Douzam* & rosisse ejus scripta. Uxorem ipsius Monachis & sacerdotibus usurariam lepide ibi exagitat.

EPISTOLA XXXI.

JOHANNES MOLINAEUS

¹ *Georgio Cassandro S. P.*

Antverpiam.

Puribus ad me tuis epistolis, Doctissime Cassander, quod haecenus nihil responderim, neque per occupationes, neque per aliquam culpam meam accidit. Prolixiorem illam, qua rationem adferebas, ad omnia illa, quae in scholiis ad hymnos tuis theologorum censura notarat, principio M. *Augustino Hunnaeo* tradideram. deinde M. N. ² *Lovanio.* & tandem etiam *Tiletano* nostro. cae-

¹ Responsio ad Cassandri Epist. XIX. XXIII. XXV. & XXIX.

² Intelligit *Joannem Hesselium* Lovaniensem, de quo vid. *Valer. Andr. Biblioth. Belgic. p. 515.* & cujus mentio apud *Viglium Zwich. Epist. xxv. ad Hopperum* & XXIV. ubi male *Hassellius* dicitur, qui diversus fuit. vid. *Simon: Bibl. Critiq. t. I. cap. 7.* Epistola Cassandri ad *Hesselium* est inter selectas edita a D. *Heinsio* Cent. I. 50.

caeteroqui illius ordinis eam vidit nemo. Equidem iis, quos duriores paulo intellexi esse tibi, nihil unquam communicavi. Aequioribus porro, aut, ut verbo utar tuo, minus morosis ne tu quidem invidebas, quin legerent. Vifusque mihi sum omnino quam diligentissime observasse quicquid super hac re praefcripferas. Plane ab *Hunnaco* & *Lovanio* nullam censuram elicui. Sed ne a *Tiletano* quidem quicquam adnotatum est, nisi quod ad Synodum Francofordianam adscripsit haec verba. *haec meræ calumnia est: nam definitio Synodi Niceanae longe alia est, ut facile patet eam perlegenti.* & paulo post ad Gregorii Romani Pontificis sententiam haec subjicit, *manifestum est Gregorium loqui de adoratione, quae propria est deo, non autem de veneratione:* caeteroqui nulla est nota. Et sane, ut ingenue eloquar quod sentio, universa epistola mihi videbatur tantopere & autoritate & ratione munita, ut mordendi nullus relictus foret locus. quae etiam consideratio me impulit, ut etiam antesignano omnium Lovaniensi exhibere non formidaverim. Verum admodum diu apud *Tiletanum* delituit. neque licuit recuperare, quam demum his quindecim diebus proximis: quae causa fuit cur minus potuerim ad ea, quae petebas, respondere. Illud compertissimum esse velim tibi, quanquam fortasse nunquam deerunt, qui calumniabuntur & suggillabunt; tamen omnibus prope studiosis gratissimum esse laborem tuum, quem in divulgandis corrigendisve libris ecclesiasticis impendis, ut nullo te pacto debeat ab instituto tam sancto tamque utili paucorum praedudicium revocare. Mihi sane proposito ordine Romano magis acuisi famem harum rerum, quam expleveris. Neque sariabor, nisi etiam reliqua opuscula, quorum meministi, edideris. quod ut quam ocyssime facias te etiam atque etiam quanto possum opere rogo ac obtestor. Quod ad Ivonem pertinet, scito pene ad finem esse perductum. ubi fuerit absolutus quamprimum istuc remittetur una cum binis exemplis impressis, quorum unum tibi servabis, alterum ad monasterium, unde nactus eras, transmittere curabis. Prior Martensenium ante pentecosten Coloniae fuit, cui de te percunctanti, dictum est in Flandriam profectum esse. Inde spes nobis accessit videndi tui, & coram de communibus studiis tractandi, qua re nihil mihi accidere potuit gratius, nihil antiquius. Quod si etiamnum integrum est huc excurrere, nolo te alio uti hospitio, quam nostro. Aedes habitamus exiguas quidem, at a tumultu populari semotas & supra modum, praesertim hac anni tempestate, amoenas atque jucundas. itaque hortor ac moneo, ut, si sine incommodo magno poteris, te aliquantulum una cum amicis aliquot familiarioribus istic reficias. Adest nunc & *Ximenius*, qui te Duysburgi commorari apud parentem tuum nunciat. Hujus negocia jam omnia cum Theologorum collegio expedita confectaque sunt. quod cum scirem voluptatem tibi allaturum, nolui silentio praeterire. D. *Hopperum* si constituiisti visere, Bruxellam petas oportet, ubi in Senatum privatum, ut vocant, nuper lectus agit. Cujus collega *Zeubelius* de te semper interrogat diligentissime, vir cum primis candidus tuique, quod certo scio, amantissimus. Si quid impedimento erit ut non venias, obsecro me certiore fieri, quo nunc te recipias. an Coloniae an Duysburgum. Ut si qua me occa-

sio in has regiones rapiat, te saltem ex itinere & obiter salutem. Vale, praeceptor eruditissime, Lovanio Vigilia Joannis 1561. Quaeso meo ut nomine quam officiosissime salutem nunties Clarissimo Viro D. *Cornelio & Birckmanno* typographo, & si qui praeterea sunt alii noti.

EPISTOLA XXXII.

JOHANNES MOLINAEUS

*Georgio Cassandro S. P.**Gandavum.*

EN tandem exemplum Decreti Ivonis Carnotensis, quod munusculum etsi me minime fugit levidense esse, ac vulgare: cupio tamen ut sit, quale quale testimonium, & veluti pignus observantiae veteris erga te meae. Porro quod ad membranaceum codicem (quo in castigando plurimum usi sumus) pertinet, *Gravius* typographus in se recepit una cum exemplo impresso, Coloniam ad *Birckmannum* mittere. quod volui indicatum tibi, ne hanc in causam fortasse quid te sollicitet. Illud sane mihi significes velim, an & quando, nos visere constitueris. jamdudum enim exspectaris a multis, quibus gratissima est omnis ea opera, quam in eruenda Ecclesiae antiquitate impendis. hortanturque te quod possunt, ut in hoc tuo instituto perpetuo pergas uti coepisti. Vale, raptim Lovanio 7. Augusti anno. 1561.

EPISTOLA XXXIII.

VIGLIUS ZUICHEMUS

Joachimo Hoppero S. P.

Mitto per D. *Franciscum*, mi Hoppere, *Elberti* responsum super controversia Baroniana; quod mihi certe bene doctum & exactum videtur: expectabam autem ut duntaxat tuo adjiceret, quae ad plenioris juris adstructionem facerent, verum quod amplius opinione nostra praestitit, id non nisi grato hilarique animo recipiendum est: velim autem ut D. V. secum dispiciat; satiusne videatur in unum utrumque contrahere, an unumquodque per se relinquere: plus autem forte auctoritatis singulis erit, si separata relinquantur, nec offendi pluralitate iudices poterunt, postquam utrumque satis breve ac succinctum est. Opus porro erit ut D. V. dispiciat de aliquo, qui in eis describendis operam nobis navet, & postquam *Vulcanius*, uti mihi nuper coram retulit, factus est Reverendi Domini Baronis pensionarius, atque filium habet, qui hanc operam praestare queat, haud abs re mihi videtur, ut antequam D. V. huc commigret, hac de re coram ibi provideat. Non improbo ut D. V. Reverendissimo ac Illustrissimo Domino Cardinali epistolio aliquo de nova dignitate congratuletur; seque mox subsecuturum significet, quo illum responden-

di labore hoc tempore sublevet, quo undique ad eum ejus generis literae adferuntur. Ego autem ad diem Sabbati aut Dominicam proximam D. V. expecto. Omnino vero convenit ut D. V. aliquot diebus hîc adsit, antequam uxorem ac familiam huc traducat. Erunt enim in novis aedibus multa reparanda, & illa cum tempore commodius sequetur. Interea vero ego vestra consuetudine suaviter perfruar, & erit quoque D. V. ab curis familiaribus spinisque domesticis soluta, ad novam functionem aggrédiundam alacrior. Bene Vale. Bruxellae 7. Apr. 1561.

Haec epistola inter Viglii editas quia non exstat edenda fuit, ex qua constat *Bon. Vulcanium* jam in primis annis maximis his viris fuisse notum, & amatum.

EPISTOLA XXXIV.

CORNELIUS VALERIUS

Joachimo Hoppero S. P.

CUM nudius tertius in templum cum nostro *Cauchio* venissem, forte incidi in *Simonem* tuum cognatum, ex quo cognovi te jam in Collegium Consiliariorum arcani regii senatus esse cooptatum, & a principibus viris inauguratum, quam ego dignitatem & tibi, quem summis honoribus omnes, qui te modo vel nomine tantum norunt, decoratum cupiunt, & Reip., cujus est in hominum prudentium atque doctorum industria, posita salus. Oro Deum Opt. Max. ut ea res tibi fauste atque feliciter eveniat, & idem perpetuo te prosequatur favor, quem omnibus in locis ubicunque versatus es, hucusque reliquisti, idemque bonorum erga te studium atque benevolentia nunquam decreseat. Videre mihi videor id, quod jam nunc multorum votis expetitur futurum, ut, si quid humanitus optimo ac doctissimo prudentissimoque viro D. Praefidi *Viglio* acciderit (cui nescio quo pacto non male etiam valenti interdum metuo) tu conterraneo succedas, iis exornatus virtutibus, quibus ille ad summum dignitatis gradum pervenit; interea vero sis illius vicarius, ut ego quondam, (si parva magnis conferre licet) amici nostri *Nannii*: sis, inquam, illius Atlantis duri coelum qui vertice fulcit, & jam diu magno pondere pressus opem videtur aliquam poscere, successor Hercules. Salutem plurimam uxori tuae liberisque doctissimis. Nostram brevitatem *Cauchius* hic noster compensabit: bene vale, & me tui studiosissimum amore mutuo, ut facis, complere. Raptim Lovanii die 21. Aprilis anno *MDLXI*.

CONRADUS GESNERUS

Georgio Cassandro S.

Vivere te & valere & in reip. Christianae bonum semper aliquid elucubra-
ri his diebus ab amico, Clarissime & doctissime D. Cassander, summa
laetitia mea intellexi. Deus Opt. Max. quam diutissime te nobis & Eccle-
siae suae incolumem conservet. De scriptis tuis quaecunque edidisti, aut ad
editionem parasti, per occasionem certior fieri cupio. Nam pro Bibliothe-
cae nostrae nova editione paulatim aliqua colligo. Mitto Catalogum lucubra-
tionum nostrarum, etsi in eo nihil gravissimis & sanctissimis studiis tuis forte
dignum sit. Communicabis cum amicis, quibus haec & ejusmodi cognosce-
re vacat & libet: imprimis Excellentissimo medico D. *Echtio*, cui me ve-
hementer commendari ab te vellem. Dioscoridis *ἐν ποσειδων* libros, nunquam an-
tea visos, Graece & Latine editioni nunc adorno, intra hos proximos dies,
spero, absoluturus, inde ad historiam stirpium, jam olim a me inchoatam,
totum me conferam, ad quam Cl. D. *Echti*us, quicquid & quantulumcunque
habet, quod conducatur, circa nomina, icones, aut facultates quorundam, si
communicarit, ut alacrius absolvam tantum opus, & mentionem ipsius quo-
que honorificam faciam, author mihi erit. Urge, quaeso, & instiga hominem
occupatissimum. Mithridatem meum de differentiis linguarum forte vidisti,
ante annos aliquot excusum, a quo tempore multa multis e regionibus acce-
pi, quae ad eum augendum & Illustrandum faciunt, Nuper autem ex Do-
ctissimi viri D. Ge. *Aemylii* ad me literis intellexi, habere te quaedam rara de
vetere Gothica aut Germanica lingua, nempe alphabetum, suis characteribus,
orationem dominicam, & alia quaedam: quorum ut me participem facias,
etiam atque etiam enixe te rogo: & si quid aliud hujus argumenti, ut meo
in Mithridate tua quoque liberalitas locum habeat. Ego vicissim, si qua in re
optimo & Doctissimo Cassandro meo gratificavi, faciam nae ex animo ut me sui
amantissimum observantissimumque esse non obscure intelligat. Vale & igno-
sce festinationi ac lituris. Scripsi Tiguri Octobris die 9. A°. 1562. multa jam
nocte: non relegi.

1 *Joannes Echti*us Medicinam fecit Coloniae, natus in Belgio. vid. *Mercklin*. in *Lindenio* reno-
vato pag. 574. multa ejus & honorifica mentio in *Epistolis Cassandri*. vid. Ep. LXVI. & mox in
Epistola Ximenii XL. duxisse ancillam suam idem *Cassander* scribit Epist. CXIII.

EPISTOLA XXXVI.

P E T R U S X I M E N I U S

Georgio Cassandro S. P.

Coloniæ.

O Rnatissime Domine Cassander: Magnam tibi habeo gratiam ob laborem susceptum in tradendis nuncio Coloniensi sarcinis, quas ab eo integras accepi; paulo tamen meliore conditione accepturus, si cum eo de precio prius convenissem. Adfunt quidem arma nostrae militiae, quorum adjumento & nos quoque meditando, scribendo, docendo Deo gratum obsequium praestare possemus. Sed utinam tuam diligentiam imitarer, quam frustra impedire conatur valetudinis tuae imbecillitas. Quod tamen ad professionem meam attinet, ea differetur ad aliquot hebdomades, dum nimirum Reverendissimus Dominus Hochstrato redeat. Profectus eo fuerat ad suscipiendam e sacro fonte filiam Domini Hochstratani, & quo die eo pervenerat, incidit in gravem fatis morbum, qui quamvis affirmantibus medicis periculo Dei benignitate vacuus sit, redditum tamen ejus, ut nobis scribunt, qui eum comitati sunt, non paucis diebus morabitur. Interim cum D. Archidiacono, qui hîc quoque relictus est, in alio genere studiorum versabimur. Magno me affecisti beneficio, quod Galliae in negotio religionis statum tam luculenter mihi descripseris. Faxit deus, ut & ipsis, & iis, qui Tridenti nunc convenire dicuntur, & omnibus Christianis nationibus cum concordia spiritum largiatur, qui eam in posterum quoque tam validam fanciat, ut hisce malis, quibus nunc labefactatur, non sit tam facile obnoxia. Rependerem, mi Cassander, beneficium, si memoria retineret longam quoque de actis conventus illius Gallicani historiam, quam epistola quaedam Bruxellae scripta, ac me praesente recitata, narrabat. Summam tamen, si potero, complectar, & addam decretum de Eucharistia, quod postulavi mihi permetteretur exscribi. Actum a principio fuerat de liberando rege aere alieno, quo sicuti ajunt gravissime premitur, deque reformando statu Ecclesiastico, & de tollendis novis his opinionibus quotidie magis invalescentibus. Supervenere postea ministri Protestantium, seu Calvinianorum satis magno numero, fide publica illis data eo evocati. Horum princeps *Theodorus Beza* nomine omnium copiosam & eloquentem in concilio, rege, regina matre, totaque nobilitate praesente, habuit orationem, in qua primo artificiosa quadam insinuatione sibi conciliavit benevolentiam. Purgavit dein id, quod suis sciebat objici, quod essent seditiosi, turbulenti, abhorrentes ab omni concordia, conditiones proponentes iniquas ac plane intolerabiles. Secuta dein est fidei explicatio per omnes articulos, in quibus a nobis dissident, cujus

Tom. II.

K k

fco-

1 De hoc *Ximeno* egimus ad Epistolam *Lipsi* cxxv. & multa ejus mentio in *Cassandri* Epistolis, ex quibus in primis videnda lxxxiii. pleraeque ejus Epistolae Anni certi notam non habent, nec ex *Cassandri* Epistolis semper licuit certum tempus assignare, quare, si in conjectura aberraverim aliquando, veniam, spero, dabit lector.

scopus, propter narrandi artificium & adhibitas interdum probationes, etiam ad persuadenda illa dogmata auditoribus spectavit. Postremo falso de illis vulgatum crimen deluit, quod docerent non esse parendum magistratibus, cum contraria sententia ubique in concionibus ac scriptis coram traderetur. Auditus est magno silentio, adeo ut cum ipse initio orationis ad dicendam orationem Dominicam procidisset in genua, idem facientibus principibus, etiam episcopi id imitati sint. Semel tantum strepitus excitatus est, cum agens de Eucharistia, tantum diceret distare ab ea Domini corpus, quantum caelum distat a nobis. Post habitam orationem scriptum exhibuit, ejusdem fere argumenti, & modestiorem sententiam in illo de Eucharistia articulo. Intelligi satis non potest, quid in hoc conventu statuatur. Suspiciabatur auctor hujus epistolae Regem relaturum in patrimonium suum omnes regias fundationes, alias autem relinquendas, partim pauperibus scholasticis, partim ministris ecclesiarum: probabile etiam esse disputatum iri de singulis seorsum confessionis eorum articulis. Judicat etiam idem, omnia paulatim tendere in favorem adversariorum. Vulgatum esse hoc Septembri edictum, quo absolvebantur omnes, qui in armis fuerant hac aestate ob causam religionis, restituuntur exules, liberantur e vinculis capti: missis etiam ad concilium ministris quibusdam sparsarum etiam per Gallias eorum Ecclesiarum, sibi quoque Ecclesias per singulas civitates concedi postulant, quas forte, si publice id non permittatur, per vim occupabunt. Qui sedent ad regni gubernacula, magna pars nobilium ac doctorum, creduntur illorum esse sententiae. Accedunt Germanorum artes & machinae, qui ad recipiendam Augustanam confessionem principe Palatino eos sollicitant; magnas itaque portendi mutationes in eo regno, nisi alias rationes incant Catholicici. Ipsos principes Catholicos spem abjicientes saniorum consiliorum ad sua reditum parare, inter quos Lotharingius Cardinalis, magnis conatibus frustra quaedam voluisse impedire, Cardinalem Ferrariensem, qui nihil cum suis effecerit, quamvis strenuam operam Praepositus Jesuitarum navarit, Romam rediisse: sparguntur & belli suspiciones, quia Navarra repetatur, comitatus invehantur Caletum, a nobis dimissa munitio Gravelingae iterum suscipiatur. Ne sim prolixior, confugiendum nobis ad remedium Regis Josaphat, hoc est, ad orationem, quae sola potest impetrare ea, quae humanis consiliis regi nequeunt, & quia statim aderit nuncius petiturus a me epistolam, ne sim illi in mora, non possum haec transcribere, quae tamen aegre leges. Decretum de venerabili Eucharistia hoc modo habet, quod ex Italico ad verbum verti in linguam Latinam, sicuti illius author Epistolae ex Gallica verterat in Italicam. *Cum fides promissas nobis res praesentes exhibeat, cumque haec ipsa fides verissime suscipiat corpus & sanguinem Jesu Christi virtute Spiritus Sancti, secundum hanc considerationem, fatemur corporis illius praesentiam in Sancta coena, in qua nobis praesentatur, donatur & exhibetur substantia corporis & sanguinis ejus per operationem Spiritus Sancti, recipientibus & manducantibus nobis spiritualiter & per fidem idem corpus, quod pro nobis mortuum est, eo quod sumus os ex ossibus ejus, & caro ex carne ejus, in eum finem, ut simus vivificati, & percipiamus, quicquid requiritur ad*

nostram salutem. In hoc decretum conceptum ab iis, quibus negocium hoc demandatum fuerat, tam a nostris quam a protestantibus, reliqui Catholici nullo modo consentiunt, & quia nondum publicatum est, omni ratione dant operam, ne id fiat, & potissimum Cardinalis *Lotharingius*. Authores decreti ex parte nostra fuere Episcopus Valentiae in Delphinatu, Episcopus Sagiensis in Normandia, doctores Sorbonici tres, *Despenfa*, *Salignaco*, *Botiglieri*. Ex adversariis *Beza*, *Petrus Martyr*, *Saules*, *Marloratus* & *Della-Spina*. Interim, mi *Cassander*, in Domino valebis, ac perge tuum Ximenium solito tuo amore semper complecti. Humanissimus Dominus *Cornelius* hanc epistolam tecum communem habeat. Ego vos semper, ut debeo, de meis rebus certiores faciam. Iterum valete, ac officiosissime meo nomine salutate virum a me humanissimum Dominum *Arnoldum Hufmannum*, & alios amicos. Leodii postridie Simonis & Judae. Dominus Archidaconus, Dominus *Visbrouh* cum socio vos plurimum salutat.

2 Respondet ad hanc *Cassander* Epist. xxxviii. scripta est A. 1561. quo hoc colloquium Poissiacum habitum fuit. vid. *Mezeray*. Abreg. Chronol. in Carolo ix. Tom. v. pag. 45. & *Baylii* Lexicon Hist. Crit. in *Beza*.

EPISTOLA XXXVII.

PETRUS XIMENIUS

Georgio Cassandro S. P.

Coloniam.

Cum paucis ab hinc diebus nuncius, per quem literis meis responderas, humanissime D. *Cassander*, *Coloniam* rediret, impeditus eo tempore certis de causis fui, ne tibi quoque vicissim per eundem rescriberem. Id ergo per hunc, qui tibi has reddidit, faciam, qui mihi se hodie *Coloniam* profecturum dixit. Ac primum quod ad literas tuas attinet, nihil attinet dicere quam mihi gratae fuerint, quam gratae perpetuo futurae sint. Merentur humanitas & benevolentia, quibus me non merentem profecutus es, meretur incredibile ingenii candor, meretur eruditio, & singularem mihi literae tuae non solum voluptatem, sed consolationem perpetuo afferunt. Atque ideo quod te certo sciam in hoc humanitatis officio perseveraturum, tuumque Ximenium de tua, ac D. *Cornelii* valetudine deque statu rerum vestrarum certioresemper factum iri, hac ipsa cogitatione solidam animo percipiam voluptatem. Sed his omissis, quid hisce diebus de rebus tuis acceperim, breviter indicabo, deinde de valetudine, sicuti tibi scripsi, affecta Reverendissimi Domini, deque meis rebus, quae scribenda sunt, addam. Scies igitur, mi *Cassander*, me ante triduum a Doctore *Vendovillio* accepisse epistolam, in fine cujus haec de D. *Balduino* deque te erant verba. Audio F. *Balduinum* fuisse nuper *Coloniae*, & deinceps fore in familia D. Cardinalis *Lotharingii*. Audiavi etiam D. *Cassandrum* esse in *Galliam* vocatum, idque a rege *Navarrae* ad componenda ista dissidia, vel ad ju-

vandum ad ea componenda, sed tamen non habeo certum authorem, si quid ea de re habes, velim facias nos certiores. Haec, mi Cassander, ad me scribit D. *Vendovillius*: quae unde acceperit, divinare non possum, & tamen si vera sunt, non potuer mihi non afferre ecclesiae nomine atque etiam tuo singularem voluptatem. Certo enim scio, modo vocationem hanc a Deo esse iis, quibus debet, conjecturis constiterit, te tam illustrem & pium laborem non recusaturum, etiam si propter imbecillitatem valetudinis lectica esses in Galliam, sicuti ille Dux Samnitium in castra, deportandus. Te vero operam tuam huic negotio praebente, debet profecto nos excellens ista eruditio, tantam accipiens auctoritatem, in optimam spem erigere faelicissimi successus. Faelicissimum vero successum concordiam voco Christianam; in qua vetus & perpetua religio conservatur, & restituitur, & ab omnibus approbatur, iis alteri parti concessis, quae concedenda prorsus esse moderatiores omnes sanioresque Catholici confitebuntur: in iis vero, quae salva pietate admitti nequeunt, adductis contra sentientibus, ut sibi vere persuadeant ea, quae ab ipsis defenduntur, carere illis tribus tuis ex tuo Lirinensi verissimis orthodoxae doctrinae notis, antiquitate, universitate ac consensu, nullamque doctrinam recipiendam in huiusmodi controversiis, quae illis carere demonstratur. Ut ad tantam rem conficiendam tua opera hoc tempore haberi debeat inter potissima Spiritus sancti, quibus usus est, instrumenta, facit ea, quam dixi, eruditio, in qua ad hunc finem paranda totam aetatem usque ad corpusculi tantummodo non interitum consumpsisti: facit ardentissimum ecclesiasticae concordiae desiderium, ac postremo incorruptissimum, ac nullo partis alicujus iniquo contra veritatem studio infectum iudicium. Quod si ergo haec vera sint, &, quod deus avertat, suscipiendum tibi iter non censeas, nihil addubito, quin id ideo sis facturum, quod pro deploratis habeas res Galliae, quodque locum illic nullum fore sanioribus consiliis apud obstinatos animos, & nunc factionibus etiam exasperatos arbitraris. Deum opt. max. oro, ut Spiritus ejus, quo in tanta potissimum re regi debent filii Dei, primum tibi in hac ipsa consultatione adsit, deinde, quod votis omnibus nobis optandum est, eo proficiscaris, ea tibi ac gloriosi laboris fociis suggerat, quae ad liberandum amplissimum regnum tantis malis sint utilissima, atque ut spes nostras ulterius promoveamus, quae ducto ab amplissimo regno initio, ad sanandos reliqui corporis & mores & errores manare felicissime queant. Haec ita tibi scripsi, quasi vera sint, quae fortasse non de nihilo orta a *Vendovillio* mihi scripta sunt. si falsa esse ex tuis literis intellexero, ea & apud *Vendovillum* & apud alios suscipiam refellenda, interim dicam hinc nihil ejusmodi dici. Sin vera sint, non dubito, quin pro tuo ergo me amore, me sis aliquousque tantae rei facturum participem. Humanissime Domine Cassander, quo minus tibi possim aliis de rebus scribere, nuncii interventus accincti ad iter in causa est. Priora ergo cum per ocium scripserim, de meis rebus haec brevissime addam. Professio mea morbo Domini Reverendissimi impedita est. Ipse Reverendissimus melius quidem, laus deo, se habet, sed nondum convaleuit, & morbus ejusmodi est, sicuti me tibi scripsisse ar-

bitror, ut quamvis convalescat omnino, nisi tamen utatur victus ratione exquisitissima, in perpetuo versetur vitae periculo. Deus illum ecclesiae suae nobisque servet incolumem. Interim cum D. Archidiacono ac *Lampsonio* versamur in Aristotele. D. *Tiletanus* mihi significari curavit, & se & Magistrum a *Lovanio* apud Hispanos male audire, quod me absolverint, & proin mone-re, si quid Reverendissimo Domino humanitus accideret, ne cogitarem de Hi-spania. Si Lovanium redeam, se suscepturum mei defensionem, proin me ta-cite monere videtur, ne vel Lovanium redeam. Sed tabellarius me non finit plura scribere. Tu mihi quaeso per hunc late respondeas. Vale, mi Cassander cum D. *Cornelio* in Domino: salveant & quos epistola tua nominasti. Leodii 8. Decemb.

Respondet Cassander Ep. XLII.

EPISTOLA XXXVIII.

PETRUS XIMENIUS

Georgio Cassandro.

Coloniam.

SAlve plurimum Clarissime Domine Cassander. Dici profecto non potest, quanto tenear desiderio cognoscendi, tum de valetudine tua, tum de stu-diis ac rerum tuarum statu. Itaque majorem in modum te oro, nuncium hunc sine tuis ad me literis non patiaris discedere, quamvis cum ipse postremo hinc discederet, propter ipsius festinationem, meas ad te non attulerit. Spero autem te jamdudum ex isto morbo, qui tibi nimis efficitur familiaris, Dei be-neficio recreatum ad priora studia rediisse. Esset quidem nobis omnibus do-lendum praeclarissima ista studia toties corporis istis incommodis impediri, ac fructum eorum nobis minui, atque adeo tenerum ipsum optimi Cassandri cor-pus tam gravibus morbis ac tam saevis doloribus affligi, nisi danda Christianis omnibus esset opera, ut & sensus omnis illorum & ratio ad ea probanda fle-cterentur, quae summae rationi, hoc est divinae, probari intelligunt. Ne-que dubito, quin apud te quoque, mi Cassander, in hac, quantumvis ardua, expugnandae carnis imbecillitatis materia, consilium divinum, sicuti Prophe-ta inquit, prosperum habuerit successum. De reliquo quantum suspicari pos-sum, credo tibi indies minui desiderium proficiscendi in Galliam, si forte pu-blicae utilitatis causa laborem hunc suscipiendum, atque eo te vocantibus pa-rendum esse decreveras. Huc certe omnia tristiora quotidie afferuntur. Ni-hil videtur esse medium, nihil moderatum in sententiis, atque utinam intra sententiarum extremarum pugnam confisterent. Prorupit, jam sicuti ex cer-tis literis, in Gallia scriptis, cognovi, pugna illa ad arma, ad caedes, ad ex-pugnationes aedium ac templorum, ac ad omnia illa mala, quae inter ejusdem regni cives Christiani nominis committi vix oculis nostris credere possumus. Neque audiavi hic saltem de aliquo, cujus consilia ad concordiam atque ad ali-

quam conciliationem spectent. Quo pacto autem dici possit principes in Gallia mediam aliquam rationem probare, cum *Beza* potius princeps in ipsa aula religionis, ut dicitur, arbiter sit & moderator. Itaque nisi Deus manum suam admoveat, videntur omnia cessura Calvinistis, qui jam non viribus tantum, sed numero, quod mihi tamen incredibile videtur, dicuntur esse superiores. Hac de causa in ea sententia te esse puto, ut neque tuam illic, neque D. *Balduini* operam putes profuturam, ac proin cogitationem ad furentes, ut videtur, proficiscendi abjecisse. Opto tamen, an haec falsa sint, vel in majus saltem aucta ex te, mi *Cassander*; deque consilio tuo, de spe alicujus in hisce malis auxilii, certior epistola tua fieri. Interim ad ultimam anchoram, vel potius ad solam, hoc est ad deum ipsum, ut ipse tandem nos respiciat eo, quo singuli possumus, affectu confugiamus.

De morbo Reverendissimi Domini tibi his jam scripsi. Vires quidem ejus naturales per Dei gratiam vel aetatis beneficio, vel ope medicorum plane restitutae sunt. In cerebro vero vel ea adhuc est intemperies, vel humoris noxii reliquiae etiamnum resident, ut ad priorem mentem redire nondum potuerit: itaque (quod nobis gravissimum dolorem affert) in minori quotidie sumus spe fore, ut plane ad se redeat, atque ad priorem administrationem sit idoneus. Non delirat ille quidem, sed constante judicio etiam de multis rebus eloqui potest, sed prolixam orationem continuare per vitium memoriae, ac potissimum seria negotia tractare nequit. Nondum adhibita sunt acriora remedia, adhibebuntur autem, si ea, quibus nunc utitur, non proderunt; partim autem in illis, partim in veris proximi clementia post Deum nobis spes est. Is Deus Opt. Max. si & ipsi & Ecclesiae ipsius salutare erit, nobis optimum principem tandem sanum atque incolumem misericordia sua praestet.

Morbus hic Reverendissimi Domini, non quod mihi cura aliqua incumbat, sed nescio quo modo ob perturbatam familiam lectionem publicam impedivit. Privatam tantum operam dedi Archidiacono & *Lampsonio*, ac horis aliis interdum cogito, de quodam opusculo ad religionem pertinente, ad quod me *Vendovillius*, tibi & *Balduino* amicissimus, & addictissimus, quamvis plane imparem, perpetuis epistolis impellere non cessat. Scripsit etiam ipse *Vendovillius* se feriis paschalibus proximis Coloniam visere statuisse, cui, Deo volente, si aliqua ratione mihi fuerit integrum, ut chariss. Dominum *Cassandrum* amplectar, me adjungam comitem. Omnino cum tam sumus propinqui, quas nobis aestates Deus Opt. Max. vivere concefferit, in illis aliquot dies vel mihi, vel tibi eripiendi sunt, ad hunc, ut certo scio, utrique nostrum optatissimum amplexum, & colloquia. Amore saltem erga te ac benevolentia, quando alia re non possum, vix *Ximenius* tuus D. *Cornelio* cesserit. Tu mihi, quaeso, rescribes, ubi locorum sis eo tempore futurus. Nam *Duisburgum* quoque, si opus erit, petiturus sum. Collatum est mihi hinc sacerdotium quoddam. Sed quia onera habet, quae a me suscipi non expedit, vel resignaturus sum, vel pensuunculam 12. librarum reservaturus ad alendum hunc inexplabilem ventrem. Ita suadent amici, & negant se turpe aliquod videre,

cujus tamen aliqua species ob oculos meos versatur. Finem faciam, ne vertam folium. Valebis. Clariss. D. Cassandro cum D. *Cornelio*, cui simul & D. meo *Bircmanno* cum D. *Rocasingero*, salutem multam dices. Leodii ipso die Purific. Facies me quaeso certiore de *Juliano* nostro, ac si illi scribis, etiam meo nomine salutabis.

Ad hanc respondere etiam videtur Cassander. Ep. XLII. certe non remota ab ejus scriptae tempore est.

EPISTOLA XXXIX.

P E T R U S X I M E N I U S

Georgio Cassandro S. P.

Coloniam.

ERuditissime Domine Cassander. Summam mihi, sicuti consuevere, literae tuae attulere voluptatem, quamvis ex alia parte dolore quodam manentis adhuc ex morbo debilitatis temperatam. Placet forte Deo Opt. Max. hac veluti cruce temperare felicitatem tuam, quae fortasse propter beatum illud ocium, quo tot per annos frueris, & ob perpetuas de rebus divinis cogitationes, nimia foret, ne stimulus sic magnitudine contemplationum te plus aequo extolli prohiberet. Precor autem eundem Deum ut, sicuti ejus beneficio studia tua tempore prosperae valetudinis serviunt ejus gloriae, idem in alio quoque obedientiae genere impedimentum istud studiorum ac corporis cruciatus, ac stomachi illa tui perpetua nausea praestare valeant. De cetero, mi Cassander, magnas tibi gratias habeo, quod semper eorum, de quibus in hac nostra per epistolas consuetudine agi potest, me facis certiore. Mirandum porro meo judicio non est, ¹ ducem factionis illius in *Balduinum*, quem authorem illius libelli credebat, acriter esse invecum. Nam & natura ingenii vehementioris, & humanus affectus est, ubi eam sis auctoritatem consecutus, si quid adversus tuam sententiam statuatur, id gloriae tuae detractum putare; & si persuasi ab eo adeo sint ab omni moderatione alieni, credibile est ducem ipsum hoc affectu gravius laborare. Quod autem ad libellum illum attinet, quem parari scribis ad prioris illius scripti defensionem, opto magis, si divinum auxilium secludamus, quam spero magnum illius fore fructum, etsi in authore nihil omnino desit, quod ad tractandam hanc causam aliquis merito desideret. Novimus quanta sit paucitas eorum, qui ab hujusmodi concordia non sint alienissimi. Alii ad auditum nomen conciliationis nuptias parari Christi & Belial cavillantur. Alii nisi, sicuti *Wicelius* ait, omnia defenderis, eodem te loco, quo ipsos adversarios habebunt. Fieri praeterea non facile poterit, ut in aperta dimicatione generalis tantum disputatio suscipiatur; in particulari vero vix vide-

¹ Videtur & haec scripta esse circa idem tempus, quo Epist. XLII. scripta, &, ut credo Ann. 1562.

² *Theod. Beza*. vid. ad Epist. XXIII.

videtur vitari posse utriusque partis offensio, adeo ut quidam noster amicus ipsius quoque *Wicelii* suspectam habuerit generalem abusuum reprehensionem, quod eo ipso, quod nullum abusum nominaret, aliquid eum contra catholicam religionem tacite sentire merito judicari posse crederet. Ut neque sic & pia & necessaria videtur defensio, Deus ipse successum largietur, quem ipsius sapientia nobis expedite definiet. Mihi multum in eo positum videtur, si non autoritate tantum veteris ecclesiae sententia nostra confirmetur; sed solidis quoque rationibus ostendatur, vel magnas esse causas, cur revocari aliquid debeat, quod desiit esse usu, vel cur omnino retinendum, quod adversarii tanquam pugnans cum euangelio sustulerunt, utque huiusmodi rationes quaerantur, quas apud animos hoc modo affectos, atque huiusmodi persuasione imbutos, plurimum momenti habituros maxime judicabitur verisimile. Haec ad te magis confabulandi causa scripsi, quam quod opus fuerit his de rebus a me agi. Addam tamen & ipse, quae ex Galliis, quae nunc expectatione futuri earum status suspensos tenent omnium animos, quamvis primo authore incerto, accepi. Principes & praesides regni, nescio quo loco, convenerant ad constituendam in his tumultibus rempublicam. Actum est in eo conventu, quid tandem statuendum esset de Hugenis, nam sic vocant Calvinianos. Ex 48. qui convenerant, 29. censuerunt permittendum illis esse, ut sua templa extruerent, ac ut Lutetiae extra muros quatuor loca futuris templis designarentur: in hac sententia dicitur fuisse Cardinalis *Chastillon*, & Galliae Cancellarius. Fuisse sex, qui non templa quidem illis permittenda, sed publica tantum loca ad ceremonias eorum celebrandas judicarunt: unus, ut in privatis tantum aedibus id illis facere liceret, censuit. Reliquis 12, inter quos nominatur ipse Rex Navarrae, non templa, non privata, non publica loca illis concedi placuit. Cum tamen plurimorum sententia valere debuerit, nec decretum huiusmodi promulgari potuerit sine consensu regii Senatus Parisiensis, ajunt hunc Senatū vehementer illud improbasse; atque ea de causa ad impediendum edictum legatos ad regem ac praesides misisse, ac proin spem esse plane abolendam hanc templorum mentionem. Haec non plane certa, digna tamen credidi, quae tibi scriberem. Neque quicquam habeo, quod preterea scribam, nisi quod Reverendissimi valetudo eodem, quo prius, loco est, & proin nos semper inter spem & metum versamur. Spes tamen, ut verum fateamur, recuperandae integerrimae valetudinis in Deo potius est, quam in medicis: illi ergo omnia haec, & alia ea, qua decet fiducia, committamus. Interim si *Vendovillius* huc venerit, iterum polliceor, si aliquo modo mihi integrum erit, me & hinc Colonia & Colonia Duisburgum profecturum, cum praesertim ex tuis literis intelligam, id tibi, quae tua est humanitas, non minus futurum gratum, quam mihi, qui summo desiderio teneor in tuum complexum veniendi. Salutant te plurimum D. Archidiaconus & *Lampsonius*, & ego vicissim D. *Cornelium* ac *Bircmannum* ac *Rocasingerum*. Vale. Leodii 16. Februar.

EPISTOLA XL.

PETRUS XIMENIUS

Georgio Cassandro S. P.

Coloniā.

ORnatissime Domine Cassander. Ante tres fere menses profecturus cum Domino Reverendissimo Stokhemium (oppidulum est ditionis Leodien-
sis ad Mosam paulo ultra Trajectum) postremam a te accepi epistolam: Illinc ob negocia quaedam Lovanium atque Antverpiam profectus. hisce diebus re-
versus sum Leodium, atque ad intermissam hanc inter nos consuetudinem, si-
mul etiam cupidissime redii, quando illa potissima, quae inter praesentes est,
quaeque sola consuetudo appellari potest, frui non licet. Hoc itaque pri-
mum, mi Cassander, intelliges, me Dei Opt. beneficio recte valuisse, atque
a te vehementer petere de tua quoque valetudine ac studiis, deque D. *Cornelio* me
digneris facere certiore. Emi Antverpia discedens libellum tuum, atque
ejusdem falso accusati defensionem, & quia neque tunc ob discessum legere
potui, nunc vero amicis quibusdam legendum eum dederim, haecenus eum
non recepi, proxima epistola latius iis de rebus, Deo volente, agam, praefer-
tim cum nunc prohibear ipsius tabellarii festinatione, cui hanc horam, qua
scribo, constitui postulandae a me hujus epistolae. Gaudeo plurimum iis,
quibus ostendi, & causam & doctrinam & modestiam tuam placuisse, quamvis
mihi dubium esse vix poterat id ita futurum. Causam & modestiam etiam il-
li ipsi, qui maxime favent adversario, vel inviti cogentur probare. Doctri-
nam tuam mirabuntur. Sed sententiae tuae accedere non poterunt, nisi eos
eadem opera ad partes pacimontanorum pertraxisses. Quod ut fiat necesse
est omnibus tuis copiis, quas longe quam quisquam hac in parte majores ha-
bes, in praelium eductis oppugnes & expugnes. In praesentia nihil aliud di-
cam, nisi quod Deum Opt. Max. oramus omnes, ut sint illae copiae, sicuti certo
speramus, laboranti Ecclesiae profuturae, & addat corpori vires & animo alacri-
tatem, ut quam primum in lucem prodeant. Interim, mi Cassander, quando
finem imponere cogor, ingrediente Domino Reverendissimo cubiculum Do-
mini Archidiaconi, apud quem scribo, quaeso, ut tuum Ximenium, quo non
puto habes tui amantiorē, sicut coepisti fratris loco habere pergas. D. *Lam-
psonius* quoque & propter iniquitatem adversarii tui, & ob amorem, quo
te prosequitur, vellet offerri sibi eum, quo animi sui indignationem erga
eum propter te possit ostendere. D. *Cornelium* plurimum salutabis. Leodii 22.
Octobr. 1562.

Ad hanc respondet Cassander Ep. LIII.

EPISTOLA XLI.

P E T R U S X I M E N I U S

Georgio Cassandro S. P.

Coloniam.

Charissime Domine Cassander. Cum has tibi literas redditurus sit doctiss. atque humaniss. Vir D. *Echtius*, non videor mihi habere quod scribam. Ab eo quippe omnia accipies, quae de nostris hîc rebus a me tibi scribi potuissent. Summa eorum, quae ad me pertinent, est, me omnino statuiss., nisi necessarium aliquod a Domino impedimentum mihi objiciatur, hac aestate ad vos proficisci. Nihil mihi jucundius esse poterit tua consuetudine, praesertim cum parem erga me benevolentiam in te ac D. *Cornelio* experiar. Communicabo tibi Deo volente meas nescio quas de Pacimontanismo cogitationes, aliquo jam usque progressas, non ob id solum, ut consilio tuo prosequendae ne sint an abjiciendae, verum etiam, ut, si prosequendas esse judicabis, opera ope atque opibus tuis homo, cui tam curta supellex est, utar. Fieri potest, ut Reverendissimus Dominus dimissurus hoc vere sit Episcopatum, & ea in parte tum reip. tum conscientiae suae, tum etiam dignitati ac tranquillitati consulturus, quando ita domino visum est tenuem nobis spem relinquere, quod sit animi cum vigorem recuperaturus, qui ad tantae provinciae administrationem requiritur. Oramus autem Dominum, ut quod consilium D. *Echtius* attulit, successum habeat majorem iis, quibus hactenus usus est. Quod si Episcopatum Reverendissimus dimiserit, necessitas me forte urgebit ad conditionem aliquam quaerendam, quam ad rem omnem mihi suam operam, sicuti ex eo intelliges, humanissime D. *Echtius* obtulit. De obitu *Juliani* nostri nihil intellexeram: cepi ex eo dolorem, quem par fuit, ac Deum oro ut illi voluerit esse propitius. Eadem semper metuenda sunt nobis de omnibus amicis, vel illis de nobis. Nam & heri de alterius cujusdam non levis amici in Dania obitu intellexi. Mi Cassander, dici non potest, quanto dolore afficiar, quod toties recurat iste tuus morbus, oro nunc te per Deum, non minus pulchrum pietatis certamen tibi propositum putes in superanda omni impatientia, atque in agendis Domino perpetuis gratiis, quam in isto, quod geris, bello contra eos, qui oderunt pacem. Nihil mihi gratius esse potuit testimonio illo D. *Julii Pflugii*, itaque misi ad *Vendovillium* tibi amantissimum ac communicavi cum *Molinaeo*, quo praesente Epistolam tuam accepi. De victoria illa tua Clivenfi, in qua victus non perditus, sed servatus est, tibi gratulor, vel potius Deo per te gratias ago, atque opto simul & spero parem in lectoribus illi dogmati affinibus successum libelli tui, qui nunc sub praelo est, cujus priores paginas hîc legimus: si omnes ad quaerendam veritatem eas dotes ingenii, modestiae ac discretionis afferrent, quas in illo ad sanitatem revocato fuisset scribis, sine dubio potior ubique sententia vinceret. D. Archidiaconus te plurimum salutat. Is proximis diebus Romam misit exemplar unum, quod
ego

ego Antverpiae emeram, libelli tui de officio pii viri, simul cum ejus defensione. Gratissimum utrique nostrum feceris, si dignaberis unum atque alterum exemplar ad nos istinc transmittere. D. *Cornelium* D. *Metellum* D. *Tienum*, officiosissime ex me salutabis. Vale in Domino, mi Cassander. Leodii ipso die purificationis. si usus es libris S. *Laurentii* ac vallis Divi Lamberti, eos remittes, nam saepius a me expensi sunt.

Videtur esse responsio ad Epist. Cassandri LV.

EPISTOLA XLII.

PETRUS XIMENIUS

Georgio Cassandro S. P.

Duisburgum.

Charissime Domine Cassander. Seculum mihi videtur elapsum, ex quo nihil a te literarum vel ad me, vel ad alium quempiam est allatum. Id eo mihi molestius, quia postremis tuis ad *Bircmannum* literis intelleximus, te iterum morbo tuo correptum. Quamobrem quo pacto hac te vice tractarit, & qua nunc sis valetudine majore, quam explicare possumus, desiderio omnes cognoscere optamus. Quin ego quoque post illas meas priores ad te literas longiori silentio non sine gravi culpa usus, culpam eam conduplicassem, si sine literis meis D. Doctissimus *Furstenbergius* ad vos venisset. Ac de publicis quidem rebus si quid alicunde novarum rerum allatum est, ob eam ipsam causam, quod haec ex Doctore cognosci possunt, nihil est quod ad te scribam, nisi quod plusquam unis e Germaniâ literis cognitum est, Imperatorem in morbo suo sacrosanctum corpus & sanguinem Christi magna religione sumpsisse, sub utraque specie. Ex eodem etiam intelliges, pestem hîc quotidie invalescere, Faxit Deus Opt. Max. ut his clementibus flagellis admoniti, & culpas nostras serio agnoscamus, & in vocatione nostra diligentes simul paratique simus ad emigrandum, cum Dominus vocabit, atque ipsam emigrationem veluti laboriosae peregrinationis finem ac faelicissimi status initium, cum spe potius, quam timore operiamur. Quod ad me attinet, ego, Deo mihi vitam largiente, statui post duas aut tres ad summum hebdomadas Leodium, atque inde post aliquot dies Antverpiam ob sororis negocia proficisci. Neque mihi plane etiam nunc constitutum est manere Leodii, quamvis grave mihi futurum sit D. Archidiacono hac in parte non satisfacere. Est mihi habenda ratio tum vocationis meae, tum etiam libertatis in hac praesertim aetate. Non cogor autem me ulli astringere, cum mihi soror mea scripserit hisce diebus sibi tanti non esse 50. aut 60. daleros, quibus mihi singulis annis futurum sit opus, ut ob ejusmodi lucrum aequo animo patiatur vel tantillum adimi libertati meae. Quicquid statuero faciam te confestim, Deo volente, certiore. Est autem in hac mea deliberatione insigne momentum allatura Christianissima, suavissima atque utilissima consuetudo D. *Cassandri*, ad quam me tam ex animo ad-

mitti usque adeo mihi exploratum est. Dignaberis, quaeso, hisce literis ante discessum meum respondere, quod tibi deinceps facile est futurum, cum verisimile sit D. Doctorem *Furstenbergium* frequentes literas Coloniam istinc perpetuo missurum: Non solum summo desiderio teneor de valetudine tua, hoc praesertim tempore, aliquid cognoscendi, verum etiam fieri cuperem certior de secundis ad te Imperatoris literis, simul cum sarcicula quadam missis. Suspiciamur omnes esse scriptum quoddam ad religionem pertinens Viennae conceptum, de quo iudicium tuum requiratur, quodque etiam a te expoliendum ac locupletandum mittatur. D. *Metellum* ac D. *Bircmannos*, qui te plurimum salutant, sicuti facile suspicari potes, incredibile desiderium tenet haec cognoscendi. ac *Bircmanni* quidem vehementer, mirantur te tot jam hebdomadis nihil illis respondisse, praesertim cum de tuis libellis sit sibi respondendum, & doctor successum intelligere cupiat positionis illius, & aliarum rerum, quas tibi misit. Faxit Dominus, ut gravior aliqua valetudo non sit hujus silentii causa. Si pestis adhuc magis saeviet, *Metellum* etiam ipsum Leodium brevi migraturum arbitror. vix itaque sic dici potest, quantopere cupiam aliquid a te videre literarum, & quidem prolixarum, si fieri posset, de rebus omnibus. si aliqua ex causa tibi non erit integrum scribere, ne dictando quidem te fatigari oportebit. *Everardus* noster, quem amantissime saluto, facile fungetur officio secretarii, quoties ad *Ximenium* tuum erit scribendum. Audio D. *Horsium* hinc profectum Lovanium, ut suscipiat titulum Magistri nostri, simul cum aliis, inter quos erit nepos praesidis *Viglii*, cujus, ut puto, auctoritate & ipse, ut hoc faciat perductus est, is certiora nobis referet de *Lindano*. Saluta quaeso amantissime patrem ac D. *Othonem* cum conjugē: vicissim te hinc omnes salutant. Interim te, mi charissime *Cassander*, communi Domino toto pectore commendo, ut incolumi hoc tempore valetudine eum vigorem & alacritatem addat, quae speratam jam ubique ex studiis tuis utilitatem ecclesiae aliquando afferat. Crede mihi, quando casu scribere coepi, aegre dimitto calamus, sed quando sterile ingenium nihil mihi suggerit, vel quando etiam nolim tibi meo studio esse molestus, iterum tibi vale dicam. De D. *Cornelio* si quid habes mihi scribere non gravaberis. Oblitus eram tibi scribere de eo, quod ad *Sambucum* non tu solum, sed etiam *Metellus* ac *Bircmanus*, ut arbitror, de me scripsistis. Usque adeone me honorare cupitis, ut ea mihi tribuatis, quae tanto intervallo superant & ingenii mei & eruditionis tenuitatem. Sed quia nolo tibi diutius esse molestus, pro vestro erga me summo amore, immortales habeas gratias; finem faciam. Coloniae ipso die divi Laurentii 1564.

Respondet *Cassander* Epist. LXXIX.

EPISTOLÆ XLIII.

PETRUS XIMENIUS

Georgio Cassandro S. P.

Duisburgum.

Charissime Domine Cassander. Etsi mihi jucundissimum fuit de tua ac D. *Cornelii* valetudine, vel ex brevi tuo epistolio intelligere, alia tamen ex parte molestum fuit responsum a me sine ulla mentione reditus tui postulari. Atqui tres tantum ad summum hebdomadas vos istic futuros dixeras. Spero tamen constitutum ad terminum vos adfore, praesertim, si jucundam hanc coeli faciem imbres mutare coeperint. Novi hîc plane nihil habemus, quia neque D. *Metellus*, neque ego post discessum vestrum aliquid literarum vel Leodio, vel ex Brabantia accepimus. *Bircmannus* tamen Francfordiam discedens, narrabat nobis obiisse Londini laudatorem illum operis tui, legatum apud Anglos regis nostri: dicitur extinctus peste, quae tanta dicitur esse Londini, ut una hebdomada numerata funera sint paulo minus 1500. Haec nos, senes praesertim, cogunt de illis regionibus cogitare, a quibus & pestis, & omne genus malorum exulat, quas qui hîc etiam in terris positi animo peragrarè possunt, praesertim si credant illam esse patriam suam, ibi beatissimum esse coelum, cui se quoque brevi aggregandos confidunt, cujus principem ac simul universorum dominum se patrem suum verissime, ac sine ulla tamen arrogantia, appellare posse intelligunt; non admodum moleste ferent, se per corporis imbecillitatem non posse frui, non decora unius loci amoenitate, sed totius etiam aspectabilis naturae varietate. Sed de his rebus hac hyeme, si me non expulerit conditionis suscipiendae necessitas, Deo volente latius agemus coram: tu quidem ut hac consolatione lenias perpetuos animi corporisque tui labores, ad gloriam Dei susceptos, ac filere jubeas humiliores interdum occurrentes phantasias, ego vero ut opponam peccatis meis infinitam Dei misericordiam ac contra spem, in spem de salute mea credam, & simul illa ipsa excitatus misericordia, torporem hunc corporis & animi, ac summum charitatis frigus ipsius beneficio excutiam. Expecto ergo vos summo desiderio, ac simul D. *Metellus* quam plurimum vos salutat. Vale. 9. Sep.

Duacenus, de quo scribis, nobis omnibus insalutatis discessit. Ad *Vendovillium* post discessum ejus scripsi, non sum tamen ausus illi indicare, quod nobis non sit visus tam civilis & sincerus, ut oportuit, ne si forte falleremur, non suo merito *Vendovillio* esset suspectus.

EPISTOLA XLIV.

P E T R U S X I M E N I U S

*Georgio Cassandro S. P.**Coloniam.*

CLarissime Domine Cassander. Has tibi literas redditurus est D. *Johannes Metellus*, vir omnibus doctrinae, prudentiae atque humanitatis dotibus ornatissimus. Annus fere est, ex quo negotiorum quorundam gratia habitare coepit Leodii, quo quidem toto tempore ob singularem ejus humanitatem summa mihi cum illo intercessit familiaritas. Cum vero frequenter ex me intellexerit tua quoque humanitate non minorem mihi tecum intercedere, Coloniam hinc ob alia quaedam negotia profecturus, sine literis ad te meis discedere noluit, occasionem itaque te salutandi hac scripta epistola ei praeberere volui; cum alioqui nullis literis fuerit opus, ut ejusmodi virum ac tui cupidissimum solita illa tua in omnes humanitate exciperes. Nomen tuum, mi Cassander, & antea quoque audierat, nunc autem lectis tuis posterioribus libellis, summam pietatem & eruditionem magis coepit admirari. Addiderunt aliquid & nostri de te sermones. Cum autem & ipse D. *Metellus* in eorum sit numero, qui moderatas in religione sententias, ex quibus fere solis spes aliqua pacis ac concordiae nobis ostenditur, deposito studio partium vehementer amet & amplectatur, vel hanc solam ob causam, quae hoc potissimum tempore homines inter se conciliat, & ipse summo teneretur tui cognoscendi desiderio, & tibi hoc nomine multo futurus esset gratior. Quoties ergo illi per negotia liberum erit, & tibi opportunum esse intelliget, tua consuetudine cupidissime fruetur, atque ea de causa multum se negotiis illis Colonienfibus, quae illum ad vos proficisci cogunt, aliquid etiam huic meae Epistolae debere confitebitur. Scripsi ad te, mi Cassander, ante aliquot dies prolixam de rebus omnibus Epistolam; si quid erit praeterea quod cognoscere voles, D. *Metellus* tum de Reverendissimi valetudine, tum de nostra etiam ac studiis etiam nostris certiorrem faciet. Poteris autem quamdiu D. *Metellus* istic erit, me paulo frequentius literis tuis invisere, quarum ut summo semper desiderio tenear, & alia omittam, haec tua tam frequenter afflicta morbis valetudo in causa est. Deum precor eam tibi ac D. *Cornelio*, quem officiosissime salutabis, longo tempore servet incolumem, in ipsius gloriam. Leodii postridie natalem Domini.

EPISTOLA XLV.

P E T R U S X I M E N I U S

*Georgio Cassandro S. P.**Duisburgum.*

ORnatissime Domine Cassander. Mitto ad te aliquas Epistolas Domini *Metelli*, cum literis *Bircmanni*. Cur tam sero mittantur causa haec est.

Prior

Prior Epistola commendata fuerat *Bircmanno*, apud quem, quia non habebant, per quem eam mitterent Duisburgum, relicta fuit multis diebus. Cum autem ante aliquot dies a me postulatum esset, ut ego eam mitterem, eadem inopia tabellarii factum est, ut nunc primum accipias. Ac fieri quidem potest ut hoc ipso die venturus sit Dominus *Metellus*, qui turpe iudicavit, si ipse suas tibi literas traderet. Nec tamen certum habeo eum hodie profecturum, quod cum D. Doctor *Echtius* & ipse quoque hodie Dusseldorpium atque inde Meursiam cogitaret, neque ante diem Lunae nunc discedere queat, incertum mihi est quid sit factururus Dominus *Metellus*. Itaque haec ad te scripsi in omnem eventum, ac inscribam literas D. Doctori. Secuturus eram ipse D. Doctorem, si Duisburgi fuisses: nunc in isto tam celebri conventu te, sicuti par est, occupatione, distuli amplexum nostrum in tempus aliud commodius. Nihil est quod aliis de rebus ad te scribam, cum sitim tuam rerum novarum, quantumvis magnam, & hae literae & postea ipse author sint impleturi. Hoc tantum dicam, missam ab *Wicelio* quartam partem typi Ecclesiastici Latine scriptam, a *Bircmanno* post reditum Antverpia edendam, quem librum si legerint iniqui illi censores tuorum scriptorum, verendum est, ne tu pro illo apud eos habearis plane catholicus, ille in Lutheranismum relapsus. Tam aperte, tam acriter abusus & vitia nostra reprehendit toto libello, & quidem plura inter vitia numerat, quam quisquam fuisset arbitratus. Lutheranos insectatur quidem more suo, sed minus acerbè, quam ante hac fecerat. Quod ad te, mi Cassander, attinet, imo quod etiam ad illum, quotidie magis ac magis bene mihi sperandum videtur de fructu ac successu scriptorum Palaeoleucorum ac Pacimontanorum. Itaque si, sicuti dixi, vel integrum opus a vobis ederetur doctrinae catholicae, vel per partes singula argumenta perfecte tractarentur, primum omnibus Pacimontanis essent gratissima, & multo pluris fierent, & principes fortasse cupide eadem amplecterentur, & solida totius vetustatis, & ea numerosa testimonia minus pertinaces convincerent, prae fractionibus silentium imperarent. Apud Lutheranos forte plus profutura, quam apud nostros: Lutheranos enim, sicuti mihi dixisti, pudet discedere a consensu veteris Ecclesiae; quem tamen vos illis quasi in tabula ante oculos poneretis. Nostri, quominus ad huiusmodi typum recipiendum adducerentur, unum meo iudicio habent validissimum argumentum, quod juxta hanc sententiam non videtur ecclesia omnibus aetatibus par esse auctoritatis, si quidem communis sententia totius ecclesiae, quae fuit hisce 400. annis, repudiari potest, quae ante illa tempora fuerit, non potest. Ergo auctoritas non est penes Ecclesiam, quae ecclesia est. ut hoc argumento a nullo possit impediri pulcherrimus ille typus ecclesiae tempore Augustini & aliorum, ac salva maneat ea, quae debet, ecclesiae Christi auctoritas, meo iudicio vobis diligentissime elaborandum est. Eo sublato, meo iudicio, scrupulo, vel inviti omnes cogi possunt ad evidentissimas vestras probationes suscipiendas. Sed haec a me dicta sunt, cum nihil minus cogitarem, imo cum fere tantum mea charta tegere literas D. *Metelli* statuissem. Futurum puto, mi Cassander, ut sub initium Septembris sim rediturus

Leo.

Leodium, quo (quando fortuna postulat uti conditionem aliquam suscipiam) & vetus amicitia D. Archidiaconi, & spes injecta alicujus, causa publicae utilitatis, per novum Electum, me vocant. Si tamen a summa mea ignavia & tarditate in hac aetate aliquid praestabitur, quod florente aetate praestitum non est. Itaque mihi eripietur doctissima, suavissima utilissima consuetudo D. Cassandri. Dici sane non potest quantopere doleam, & D. quoque Doctorem esse deferendum, cujus erga me in ipsius aedibus humanitatem nullis verbis explicare possum. Sed hujusmodi sunt mortalia. Et nos & amici omnes *θυητοὶ ἀποδημητικοὶ*. Illud tantum commode est, quod non solum in hac propinquitate Leodii & Coloniae frequentior esse poterit, si vitam nobis Deus largietur, haec per literas consuetudo; verum etiam vos invisere frequenter potero. Non dubito, quin ante discessum meum futurus sis Coloniae, aut ego te, Deo volente, visam. De omnibus quaeso ad me scribere digneris. & nunc praesertim de eo, quid istic actum est. Amici te etiam, ut dixi, coram brevi salutabunt. Tu quaeso, humanissimum virum D. *Lithodium* meo nomine officiosissime salutabis. Itaque Vale, in Christo Charissime D. Cassander. Coloniae. 10. Junii.

EPISTOLA XLVI.

PETRUS XIMENIUS

Georgio Cassandro S. P.

Duisburgum.

QUa celeritate oppressus ad te scribam, Ornatissime Domine Cassander, indicabit Dominus *Levinus*, si forte ante reditum tuum non poterit has literas ad te transmittere. Rescripsit facultas Domino Reverendissimo. Summa haec est. Notata sunt non pauca, in quibus sententiam meam non probant. omnia tamen fatentur esse hujusmodi, ut propter ea ne suspectus quidem aliquis haberi debeat. Dicunt se temperasse potius rigorem legum adversus simpliciores haereticos, tantum abesse, ut illi sint authores. Haec tibi soli scripta sint. Miror tamen cum eo loco scriptum meum habeant, & cum Reverendissimo agant, ut omnino me restituat priori existimationi, cur praeterea collationem de illis ipsis controversiis judicent necessariam. Forte putant veriore sententiam, mihi ab illis coram demonstratam, majorem in animo meo vim habituram. Cum ipsi humanissime scripserint, & Reverendissimus ipse properis literis me Leodium vocarit, & magno se gaudio affectum indicarit, non possum non obtemperare imperio ejus, cui tantum debeo. Itaque accinctus ad iter haec scribo, atque ex ipsius Reverendissimi consilio ac sententia Deo volente de collatione cum doctoribus, deque reliqua mea vita constituturus; sed quando jam beneficiis effecit, ut cogar me totum ejus arbitrio committere. Ad libertatem ac tranquillitatem studiorum ac fructuosissimam, qualis mihi tecum fuit, consuetudinem votis tamen recurrere licebit, si re ipsa impetrare non potero. Interim, mi Cassander,

ami-

amicitiam nostram eo usque progressam arbitror, ut etiam si maxime liceret, verbis nullis opus esset ad demonstrandum vel meum erga te affectum, vel quem induisse te puto ergo tuum Ximenium, qui semper tuus erit & per occasionem perpetuo scribet, & nunc hac epistola te in Domino salutatur, & complectitur toto animo, & salutem ac valetudinem tuam Domino commendat. Coloniae ipso die S. Crucis.

Libros tuos reliqui Domino *Levino*. *Julianus* discessit. si istic cum D. *Cornelio*, cum salutabis.

EPISTOLA XLVII.

PETRUS XIMENIUS

Georgio Cassandro S. P.

Duisburgum.

Charissime Domine Cassander. Ingressus hoc ipso momento officinam *Bircmanni*, vidi paratas esse literas cum libris quibusdam, qui mittebantur Duisburgum. Itaque hora mihi ad scribendum concessa, vereor ne fatis mihi spacii sit ad ea, quae sese offerunt, perscribenda. Dabis ergo veniam & celeritati & cacographiae. Valetudinem tuam speramus hîc omnes eam esse, qualem optamus post leve illud incommodum ex itinere acceptum; Deumque oramus, eam etiam supra vires affecti atque imbecillis corpusculi longo tempore nobis servet incolumem. Hac ipsa hora, qua veni ad *Bircmannum*, redibam a *Licentio Horstio*, qui proximis diebus per famulum a me postulaverat, ubinam ageres, & quando rediturus. Itaque ea de causa visi illum, ut mihi indicaret, si quid haberet, quod te cognoscere vellet. Summa haec est. Accepit literas a D. *Lindano*, in quibus arbitrari videtur, libellum hunc de communione eundem esse cum illo, de quo inter vos superioribus mensibus ultro citroque missis epistolis actum est. Itaque vehementer miratur hujusmodi libellum esse editum, cujus tu possis author convinci, qui tamen easdem sententias habeat, quas ipse in literis ad eum tuis jam tibi ab aliquot annis improbatas confitereris. Ego ostendi D. *Horstio* errorem. & quia hoc de hoc postremo libello adjiciebatur, quod esset valde seditiosus & perniciosus, neque addebatur contineri in eo aliquod falsum vel improbatum dogma, suspicor libellum nondum esse *Lindano* lectum; sed ex similitudine tituli, atque aliorum, qui legerint, qui sine dubio Lovanii graviter videntur offensi, sermonibus deceptum, pro illo altero accepisse. Postulat, ad illum ut scribas, & an sis hujus libelli author, & ante conscio, permittente vel volente sit editus, & rationem hac in parte tui consilii explices, cur post illam tuam ad se epistolam hujusmodi foctum exire in lucem sis passus. Refert praeterea in eo libello Concilium Constantiense, & Basiliense sacrilegii damnari, quod ego plane falsum esse me omnino credere dixi. Postulat item sibi quam primum responderi. Ipse D. *Horstius* se transcripturum totum hoc caput ad te pertinens pollicitus est, ut

ad te transmittere queam. Nolui tamen hanc occasionem praetermittere, praeterea quia nihil fere plus in eo contineri puto, quam quod hîc a me scriptum est, ubi ipsa verba audieris, paratior eris, & magis meditatus ad respondendum, si tamen responsionibus agendum putabis cum tam iniquis omnium eorum, qui paulisper ab illis dissentiant, accusatoribus. Ego certe dixi me ferre non posse tantam acerbitem, non dicam adversus talem virum, sed omnino adversus aliquem, qui non plane ab Ecclesia nostra discessisset. Multa alia inter nos acta sunt, quibus cum memorandis vacare non possum, summa est, cuperent te stare iudicio hujus vel Lovaniensis Academiae, & non provocare ad eos, qui ipsis graviter suspecti sunt. Dominus munia sua nobis omnibus largiatur, & modestiam, & constantiam & prudentiam, & charitatem, quae Christianos decent, ut in hujusmodi quoque casibus ea, quae ipsi accepta sunt, praestare possimus, & Christianam animi magnitudinem ad ferenda, quae nostra culpa nobis non accidunt. Fieri posset ut *D. Echterius* & ego te simus visuri brevi, velim summopere eum in illa sententia manere, ut te ante hyemem videre & complecti queam. Nam absente *D. Cornelio* & paulo magis invalescente peste, quae forte etiam incrudescet, non arbitror te huc ante hyemem rediturum. Propter hunc ipsum metum pestis *D. Echterius* coëgit nos ad se, hoc est in vineam suam migrare. *D. Vendovillius* a me per literas quaesivit, an sim Duaci suscepturus conditionem docendi literas Hebraeas, simul & moralem philosophiam. Sese apud Senatum daturum operam, ut mihi hujusmodi provincia demandetur. Respondi placere professionem, si ad illam essem idoneus, & si ceteris amicis videar, omnino delatam suscepturum, sunt tamen aliquae causae, quae deliberationem requirunt, atque ideo tu quoque dignaberis ad me tuam sententiam perscribere, nisi prius, quod Deus faxit, te istuc videro, & coram inquiramus, an expediat me Coloniam ac charissimum *D. Cassandrum* relinquere. Sunt qui ferant, Pontificem fecisse, quod Caesar postulabat. Eode te ac de libris si forte aliquid allatum erit, proxima epistola Deo volente, uberius. Nunc non licet ulterius pergere. Ad *D. Metellum* etiam scribes, ut ea ratione impellatur, ut copiose de rebus omnibus te certiore faciat. Is te salutat officiosissime, ac aderat simul in aedibus *Horstii*, quamvis colloquio non interfuit. *Tusano* dedi genesim tuam. Occupatus aliis rebus, praesertim brevi promovendus in jure civili, nondum potuit de ea astra consulere. *D. Johannem Othonem* dignaberis officiosissime meis verbis & amantissime salutare. Coloniae Sexto Maji. Vale in Christo.

EPISTOLA XLVIII.

PETRUS XIMENIUS

Georgio Cassandro S. P.

Coloniam.

ORnatissime Domine Cassander. Cum prope non dubitem Duisburgum te ante aliquot dies esse profectum, dixi huic tabellario ut, si Coloniae

te

te non reperiret, hanc epistolam relinqueret domus vestrae inquilino, quem certo scirem tua causa eam primo quoque tempore missurum Duisburgum. Nolui porro committere, ut sine literis meis nuncius discederet, quo ex illis, vel hoc solum intelligeres, meam ac *Vendovillii* ad vos profectionem dilatam esse in festa Pentecostes, ob negocia quaedam, quae illum cogant proximis hisce hebdomadis partim Mechliniae esse, partim Bruxellae. Ac gaudeo sane vehementer haec ita accidisse, quia eo tempore mihi multo futurum est magis integrum me illi comitem adjungere, & ut nunc quoque fuisset, si *Vendovillius* ipse non potuisset Duisburgum accedere, suscepto hoc itinere, non vidissem Cassandrum meum, cujus potissimum gratia iter ipsum suscepissem. Meum voco Cassandrum, ea ratione, qua nostra merito possumus appellare, quaecunque a nobis diliguntur, quia possident animum diligentis, quod si illi mutuo nos quoque amore prosequuntur, jam duplici ratione nostros vocare possumus. Id nobis evenire non dubito, quia cum tu propter istas animi tui dotes sis amari dignissimus, tu me vicissim ob humanitatem redamas. Hoc certo scio singularem istam tuam eruditionem, pietatem ac sinceritatem tantum apud animum meum valere, ut vehementissime dolerem carendum mihi esse tua consuetudine, nisi haec & similia nos docerent in solo Deo nobis esse acquiescendum, cui si in hac vita fide ac dilectione uniri coeperimus, in perpetuum fruemur illo omnium bonorum inexhausto fonte, & per ipsum omnibus illi sanctitate ac sapientia proximis, imo omnibus rebus ab illo conditis. Sed ut eo redeam, unde me vocabulum hoc meum diverterat, quamvis sciam te feriis Pentecostalibus Deo volente futurum Coloniae, velim tamen literis tuis de ea re fieri certior, itaque dedi negocium huic tabellario, ut proxima profectione hospitium tuum accedat, ac si quas apud hospitem domus reperiat ad me literas, eas sibi reddi postulat, neque dubito quin hospes ipse hanc epistolam quam primum ad te sit missurus, & responsum tuum redeunte Coloniam tabellario apud se habiturus. E Gallia laetiora paulo afferuntur, Rege Navarrae conatibus Calvinianorum sese apertius opponente. Et quia credibile est, neque ipsum, neque Reginam hac in parte simulare, occasio forte rei haec fuerit desideratae in eo saltem regno per moderatas aliquas sententias religionis concordiae, praesertim cum etiam cogitare dicantur de redeundo in gratiam cum Guisianis, qui prope regno pulsi bellum etiam occulte moliri credebantur. Sed haec incerta sunt: Interim Deum oremus universae tandem Ecclesiae misereatur. Valetudo Reverendissimi eodem est loco, vel paulo tantum meliore, accedente tamen aestate medici pro certo sperant eum multo melius habiturum, praesertim cum victus ratione, qua nunc utitur, & sumptis per intervalla medicamentis profici putent, ne in morbum recidat, quod ille faxit Deus, cujus solius est dare atque adimere salutem. Cives Leodieneses hinc aliquantulum tumultuati sunt, ac coactis per vim Consulibus, revocarunt edictum a Consilio Principis paulo ante in religione propositum. Sentiant omnes non debuisse hoc tempore aegrotante Principe nova edicta proponi, nam quamvis in revocatione professi sint, se velle plane manere in veteri religione & in

obedientia Principis, & quamvis revera pauci sint, qui in religione aliter sentiant, non ferunt tamen se novis edictis premi, & putant imminui libertatem suam, neque defunt, qui populo natura sua parum tranquillo faces admoveant. Speramus tamen omnes, eos voti sui factos compotes nihil ulterius ausuros: Hujusmodi animantes, quales homines fuerunt, sunt, erunt, non Deus, non Prometheus finxit, sed unum peccatum efficere potuit. De valetudine tua, mi Cassander, quae me non desinit habere sollicitum, quamvis plane restitutam confidam, quaeso, diligenter scribe, ac de illo libello, quem a te parari scribis adversus Lemannica illa maledicta; si quid habes, etiam facias quaeso certiozem. Interim vero dum tempus advenit, quo te complectar Coloniae, tu simul cum D. *Cornelio* ac patre tuo in Domino valebitis, ac simul salutabis, D. *Jacobum*, qui apud Reverendissimum nostrum habitavit, ac D. *Rhetium*, ac si quis istic erit, quem me nosse existimes. Iterum Vale. Leodii 17. Martii. Salutant te Archidiaconus & *Lampsonius*.

EPISTOLA XLIX.

PETRUS XIMENIUS

Georgio Cassandro S. P.

Duisburgum.

OPtarem, mi Cassander, plurimum hanc te epistolam plane valentem ac sanum deprehendere, ut illa quasi initia morbi adventantis nihil nobis, praeter inanem metum, attulerint. Quod si per corporis constitutionem id non sinunt, secunda jam vota sint, ut quantum quotidie decedit corporis viribus, tantum spiritualis ac Christiani roboris in invicto pectore accedat, utque tantum saltem temporis illa ipsa imbecillitas tibi relinquat, quantum satis erit ad scriptis mandandas cogitationes, quas Ecclesiae hoc tempore salutare fore, jam olim plurimis piis ac eruditis viris, nunc etiam summis Monarchis persuasum est. Dignaberis ergo nos quam primum facere certiores tuae valetudinis. Cum nos dico, omnes intelligo, quos hinc saluari cupiebas, quos par mecum hujus rei sollicitudo tenet. De reliquo accipies simul cum his literis epistolam Reverendissimi Treverensis, & deinde fortassis enim Moguntini, quibus, ut videtur, idem quod Colonienfi de te Viennam mittendo pari studio ac diligentia a Caesaribus mandatum est. Tanta illis Principibus, quod nobis ex animo laetandum est, hujus tam utilis ac jam omnino necessariae rei cura est, tantum ad eam rem in tua praestanti eruditione momenti positum esse merito arbitrantur. Fuit ille ipse consiliarius Reverendissimi Treverensis, quem nosti, qui has literas Coloniam tulit, quique te hinc Coloniae Principis sui nomine convenire cupiebat; ubi vero ex me heri audisset, te valetudinem hac in parte tuam apud Imperatorem excusasse, causam non esse putavit, ut ipse te accederet, aliis praesertim causis abutum ejus confestim postulantibus; itaque a me petiit, ut tibi scriberem quam primum Principi ipsius responderes, ut ipse quoque diligentiam suam in literis mittendis Principi probaret. Simul etiam
me

me ascribere iussit eundem Principem tibi ex animo bene velle, ac voluntatem erga te suam in eo, quod ab ipso postulabis, libentissime declaraturum. Utinam, mi *Cassander*, dotes tuae ita innotuissent tempore colloquii *Wormatiensis*, quum viribus integris sponte eo profectus, ne praesentia quidem tua, ut opera tua sequeremur, effecisti. Sed haec ab ea sapientia administrantur, ad quam cogitationes nostrae pervenire nequeunt. Cum in obvium mihi heri *D. Helmannum* incidissem, is tuis a me verbis salutatus a me diligentur contendit, ut cum tibi primum scriberem, ipsius nomine te rogarem, inquireret, an apud *D. Othonem* locus esset ipsius filio, quem etiam ipsi *Othoni*, sicuti puerum ejus aetatis atque amicissimi viri filium decet, commendares. Addidit praeterea se quoque ipsum ad aliquot menses migraturum *Duisburgum*, si commodae istic aedes illi reperiantur. Feci mentionem aedium *D. Cornelii*. Itaque vehementer optat vel eas, si vacarent (nam *D. Rochafageran* non puto de migrando valde sollicitum) vel alias, quas illi commodas fore judicabis, ipsi quaeri ac conducere. Facies autem illum quam primum certiore, & quales sint aedes, & quo precio locentur. Arbitror totius hujus consilii pestem esse causam, quae tamen non admodum graviter hîc grassatur. Sed tamen quia sollicitus videtur, dignaberis ejus hac in parte desiderio quam primum satisfacere. Ego, Deo gratia, sanus & incolumis pedes perveni non *Dusseldorpium* modo, sed *Coloniam* etiam, tantum mei pedes tuis praestant: Salutavi omnes amicos, solus *D. Metellus* cupivisset te quacunque ratione iter hoc suscepisse. Itaque prae nimio desiderio, tum alicujus felicioris status Ecclesiae, tum tuae quoque gloriae, nullam credebat satis justam excusationem. Literae tuae ad *Lindannum* hodie, ut puto, mittentur in *Brabantiam* per *Horstium*. cui tuam apologiam quoque dedi, ac simul monui eos, qui in tuis scriptis non possint errorem aliquem, saltem graviorem, perspicue demonstrare, ab eorum simul & authoris insectatione debere abstinere, *D. Bircmannus*, ut puto, Latine & Germanice excudet tuam apologiam, cujus causa literas accipies. Omnes te officiose salutant. Ego vicissim patrem *D. Othonem* & *Everardum* ac te simul atque illos Deo commendo. Polonica tua nova tibi remittentur per primum. Vale in Domino, Coloniae. 4. Julii. 1564.

Indicavi *D. Bircmanno*, quae jusseras de potione illa gemmea. Respondit securaturum, sed rem egere spacio plusquam trium mensium.

EPISTOLA L.

PETRUS XIMENIUS

Georgio Cassandro S. P.

Duisburgum.

Charissime Domine *Cassander*. Rursus me cogit tarditas mea, a te merito accusata, literas scribere prioribus similes. Est nunc prope hora noctis undecima, & crastino die summo mane, Deo volente, proficiscar *Aquisgranum*,

literis & proprio nuncio Domini Archidiaconi nomine Reverendissimi Domini mei accersitus, ut eum illic iterum agentem ac in patriam forte rediturum salutem. Quo itinere nihil mihi est gratius, visuro Principem de me optime meritum, & cujus morbus ac fortuna moerorem nobis incussere & benevolentiam augment, si tamen non rectius cum eo agatur, qui tantum onus deposuerit, quod etiam sanum gravare poterat, utcunque sic & ipsi & nobis omnibus ea ferenda sunt, quorum Dominus nos *κατέστηκεν κυρίου*. & tibi quoque, mi Cassander, in hac tam bona gratia, quam utrinque eruditio tua, labor ac christianae concordiae studium reportat. Pulcherrimam & hinc & in corporis morbis tum patientiae, tum aliarum, ut nosti, virtutum exercendarum nactus es materiam. Deumque precor, quando materiam hanc impedire non statuit, Spiritum quoque largiatur, per quem nihil est impossibile (si quidem hisce diebus per unum atque alterum piscatorem universum orbem sibi subjecit) cujus beneficio ea tibi cedat in ipsius gloriam. Eundem etiam majori affectu oro, vires quoque largiri dignetur, quo minus corporis imbecillitas te impediat, integrum aliquod Catholicae doctrinae corpus, ex orthodoxis scriptoribus tanto studio per tot annos a te collectum, in lucem brevi mittere. Quanto diligentius apud me rem eam perpendo, tanto magis confirmor in ea sententia, ut credam & eos, qui ex nostris tibi nunc sunt iniquiores, longe magis tuam sententiam probaturos. Et adversarios, qui nunc has futes & obscuras disputationes, vel ad unam controversiam pertinentes, tot conviciis excipiunt, multis in rebus invictis principiis & probationibus, quibus ille Anabaptista resistere non potuit, cessuros. Sed de his iterum Deo volente latius, nunc neque tempus, neque calamus, neque atramentum, neque ingenium plane torpens patitur me his rebus immorari. Ostendi epistolam tuam, ut volebas, *Horstio*, neque tamen flectitur, ut libellum, quem tot Catholici probant, cui tam iniqui sunt adversarii, ipse probet. Mitto tibi ejus epistolam, quam scripsit postridie, quam ego priores illas ad te litteras miseram, tum ob inopiam tabellarii, tibi haecenus non misi, neque ipse posterioribus tuis literis respondi, quia cum eas accepi apud *Bircmannos* eo ipso momento expectabatur ad te rediturus tabellarius: nec mihi satis fuit spacii ad sanctum *Scuerinum* ut redirem, ac meas simul cum *D. Horstii* literas mitterem. Fortasse non fuerit inconsultum, si responderes *Lindano*, sed uteris tuo judicio, satiusne sit vel contemnere, vel expectare, dum & ipsi aliquid edant. Non dubito idem fore editis utrinque scriptis bonorum omnium judicium, quod de tuis ac *Calvini* scriptis adversariis. Mi Cassander, non somnus me opprimit tecum differentem, sed intempesta nox, talis praesertim, quae nimis urget Thesalicas sagittas, me jubet finem imponere. Regina Galliae dicitur esse infestior Condejanis, quam antehac fuerit, & aperte dicere regem illo foedere non obstringi. Egerrime tulisse id *Andelotium*, ac libere profiteri, non violatum iri id faedus, nisi prius moriantur decies mille nobiles, & centum millia aliorum civium: atque in quodam oppidulo ipsius praefecturae, quia incolae Catholici unum atque alterum per tumultum ex ipsius comitatu interfecerunt, duodecim cives egit in crucem. Si haec vera sunt

sunt, propemodum dubitari nequit de novo bello, quo, quod Deus avertat, plane videtur peritura misera Gallia. Angli fuere etiam adversus nostros ferociore, quamobrem non levis apud nos dicitur esse belli metus. Sed jam tempus est eundi cubitum, ac proinde te, charissime Domine Cassander, Deo commendo. D. *Arnoldus* mittet tibi libellos, quos petis, ego raro in urbem venio: nam judico me habitare ruri: post reditum meum deo volente inquiram, utrum eos miserit, & scribam latius, & D. *Metellum*, cujus etiam consuetudine raro fruor in hac solitudine, objurgabo, si ad te non scripserit. Tu tamen ad nos scribere dignaberis, quando te poterimus expectare: nisi totam aetatem nos deferere statuisti. Pestis non augetur, Deo gratia Dominus *Echtius* minimo digitulo trahere me poterit, ut longe ultra Duisburgum Dominum meum Cassandrum invisam, si tu ad nos brevi non es rediturus. De valetudine tua quoque scribes, quam tibi precor ex animo incolumem, ut saltem tanto jam tempore maturos animi foetus, atque ecclesiae hoc tempore tam necessarios, edere non prohibeat. Iterum vale. Coloniae 19. Maji.

EPISTOLA LI.

PETRUS XIMENIUS

Georgio Cassandro S. P.

Duisburgum.

DOCTissime ac Charissime Domine Cassander. Puto tibi a Domino *Metello* scriptum esse, me favente domino post Episcopi nostri Leodiensis inaugurationem Coloniam ad vos profecturum. Ego vero ne tamdiu quidem expectandum mihi ducerem, nisi D. *Marcus Peres* is, cui ego sicuti, ut opinor, nosti, plurimis & maximis beneficiis sum obstrictus, se eodem tempore tum spectandae hujus pompae gratia, tum etiam ob alia negocia Antverpia Leodium venturum scripsisset. Cum is a me obnixè postularit, ne ante adventum ipsius quoquam discederem, profectio quoque mea ad vos necessario differetur, ad summum, ut arbitror, usque ad festum Pentecostes. Non dubito, quin tu quoque, mi Cassander, eo quoque tempore Coloniae sis futurus. Sed, & si aliqua te causa Clivis detineret, parum mihi esset, & eos & quosvis etiam montes superare tui visendi gratia. Sed aequum plane est ut Colonia quoque tua, praesertim communes nostri amici, post quindecim jam mensium absentiam, *Cassandro* suo rursus fruantur, quamobrem, sicut dixi, te quoque tunc Coloniae futurum dubitare nolo. Interim nullis fane verbis desiderii mei magnitudinem exprimere possum, quo teneor, te, D. *Echtiū* ac D. *Metellum* visendi & complectendi, te quidem ex tot morbis recreatum, tot laboribus interim fatigatum, D. *Metellum* ex tam longo ac periculoso incendio salvum & incolumem; D. *Echtiū* tam tenere eos, quas amisit, amantem, & quidem etiam maximo eorum merito, amicorum adhuc praesentia egentem, utinam autem vel hîc vel alibi quippiam in me esset, quod meo ergo illum amori & illius

illius in me meritis responderet. Spero tamen me eum Leodii visurum ante meum hinc discessum. Spem mihi fecit adventus sui ad inaugurationis diem, partim minuendi maeroris causa, partim ut agrum sum Leodiensem commodissimo anni tempore perlustret. Cohortaturus sum illum, ut in proposito maneat, si venerit, credo nos simul Deo permittente redituros. Vidi interim, mi Cassander, Imperatoris ad te epistolam, hoc est ejusmodi industriae testimonium, quale tibi omnes semper vere concordiae cupidi, & vere Catholicarum sententiarum amantes, perhibitura sunt. Eas a te Catholicae Ecclesiae testimoniis ac rationibus ita confirmatas non dubito, ut aequitas saltem contra sentientium nihil sit habitura, quod opponat. Invidia & iniquitas semper habebit. Vehementer vellem librum ipsum videre, & simul aequorum & iniquorum judicia de eo cognoscere, & quem effectum studio Imperatoris, & tua industria dignum pariat. De omnibus, favente Deo, latissime agam, & simul si quid in his ingenii mei ac doctrinae angustiis, ignavia mea studiis tuis inservire poterit, de eo, quod expedire videbitur, statuere poteris. Judicabis etiam utrum pergendum mihi sit in meis meditationibus, de quibus aliqua munde scripta videbis, & simul intelliges, me plurimis destitui ad tantum argumentum, sicut oporteret tractandum, praesidiis. Ut interim omittam incredibilem meam ignaviam, quam tua industria in tam infirmo corpore in die judicii esset accusatura; si prius Clementissimum Dominum non exoraverim, ne in judicium cum servo nequam venire velit. Vides, mi Cassander, quam sim cupidus veteris nostrae, cujus memoria recreor, consuetudinis, qui te tam diu teneam. Itaque Deo volente, cum primum licuerit, ad vos advolabo. De rebus meis nihil habeo, quod scribam. Post discessum Colonia meum fui Antverpia tribus prope mensibus, ubi sororis meae & liberorum negocia Dei benignitate, ac studio & cura illius honestissimi viri, quem hinc operior, ex animi sententia confecta sunt. Interim quinque fere sunt menses, ex quo hinc sum apud Dominum Archidiaconum, cujus nimia erga me indulgentia corrumpor. Deberem potius in hac aetate, in qua jam de migrationem ibi cogitandum est, exteriorem hominem corrumpere, ut interior vegetus nihil aliud cupiat, nihil expectat, nihil expectet, quam beatam illam hereditatem, in qua jus nobis est merito passionis ejus, qui altero jure filii contentus alterum nobis dedit. Interim in Christo bene valebis, charissime Domine Cassander. ac simul *Everardum* tuum amanter meo nomine salutabis. Nam D. *Cornelium* nondum ad vos rediisse credo. Salutat te D. *Archidiaconus* cum *Lampsonio*, tui studiosissimi. Iterum vale. Leodii ipso die inventionis crucis. 1565.

EPISTOLA LII.

PETRUS XIMENIUS

*Cornelio Walthero S. P.**Gandavum.*

CUM nihil minus fore cogitarem, Clarissime Domine Waltere, quam me hac saltem hyeme Colonia discessurum, vocatus sum subito Antverpiam, negotiorum quorundam gratia ad filios & uxorem fratris pertinentium. Etsi autem nova hac molestia interrupta studia mea & turbatum placidum illud, quo fruebar, ocium non mediocriter dolebam, gravissima tamen dolendi causa merito fuit, quod D. *Cassandri* tot mihi nominibus expetita & quaesita consuetudine frui prohiberer, ipsumque vicissim hoc tempore te absente deferere cogerer. Fuit illi autem inter caetera molestus discessus meus, quod, cum post tam longas a proximo paroxysmo inducias in quotidiano fere metu futuri morbi versetur, si eo, quod absit, ante reditum tuum corriperetur, me prae caeteris, quamvis aliis rebus imparem, ob majus otium paulo magis apud illum fore assiduum sibi persuadebat. Fecissem sane per Dei gratiam, quod in me fuisset, & id ipsum ob ejus erga me benevolentiam fuisset illi gratissimum. Utcunque sit, hic ipse meus discessus summum illud reditus tui desiderium in eo nonnihil auxit, quam ob rem etiam ut eum paulo magis accelerandum ducas, charitatem tuam hortatur. Ego vero, ut ingenue fatear, rationem etiam aliquam inveniri posse optarem, ut, fieri si posset, in posterum perpetuo una esse possetis, utque vel ipse Gandavum se perducere pateretur, si negocia tua te istuc diutius necessario retinerent. Nam, sicuti nosti, cum propter corporis ejus imbecillitatem, vix unquam metu carere nobis liceat, ne quid illi humanitus accidat, incredibili sane dolore conficeretur, si vel in periculosum aliquem morbum te absente incideret. His tamen de rebus me tecum agere supervacuum est, cujus omnes curae a 25 annis in uno *Cassandro* fovendo, per aeterna memoria dignissimam benevolentiam ac beneficentiam consumptae sunt. Itaque vestrum erit, ubi Deo permittente Coloniae fueris, quid negocia tua, quid valetudo ipsius postulet, quid communi utriusque desiderio, quid rursus importunae interdum necessitati tribuendum sit, accuratius examinare. Meae tantum sunt partes & brevem aliquem finem molestis istis litibus, & prosperam utrique vestrum valetudinem, & celerem mihi etiam reditum ad gratissimam & utilissimam *Cassandri* tui, (nam ad te scribens non audeo meum vocare, vel nostrum) consuetudinem a Domino postulare. Non arbitror tamen ante festa natalitia mihi fore integrum hinc discedere. Quantum autem ex postremis tuis literis colligere potui, ne te quidem iisdem festis cum illo futurum suspicor. Quod si molestum non est, facies me de tempore reditus tui certiores, ut si & ipse tunc expeditus fuero, possim tibi esse comes. De reliquo de iis, quae ad D. *Cassandrum* attinent, nihil est, quod in praesentia scribam. Ex literis ipsius, quibus meas adjunxi, ea facile cognos-

sces. Id tantum a me accipe, D. *Echtium* nostrum, cujus erga me singularem humanitatem fatis praedicare non possum, brevi alteram uxorem demum ducturum, ac D. *Metellum* te plurimum salutare. His ergo in Domino valebis, clarissime vir. Antverpiae. 27. Novemb:

EPISTOLA LIII.

P E T R U S X I M E N I U S

Cornelio Walthero S. P.

Gandavum.

Clarissime Domine Waltere. Accepi hisce diebus binas a D. *Metello* literas, quae proculdubio summam nobis consolationem afferre potuissent, si tale corpusculum, quale est D. *Cassandri*, mediocrem aliquam spem nobis praebere posset victoriae contra tot simul morbos. Quicquid id tamen est laetioris nuncii, quicquid ex eo consolationis, quod nobis hae posteriores literae attulerunt, hisce tibi, sicut aequum est, breviter impertiam. Paulo meliore valetudine per Dei gratiam est *Cassander* noster. *Bircmannus* optimam spem de ejus restitutione conceperat. Ceteri medici paulo quidem minorem quam *Bircmannus*, sed tamen longiorem illi vitam pollicentur, quam paucis ante diebus erant polliciti. Supervenit postea familiaris illi articulorum dolor, & quidem non sine nova febre, quamobrem auctus iterum omnibus metus est, ne agmen tandem malorum infirmissimum adversarium obruat. Quamvis autem ipsi medici in nonnulla adhuc versentur spe; nos tamen potissimam spem in Domino collocemus, qui nobis eum, sicut scribis, ad suam gloriam conservare dignetur. Vehementer doleo non te solum, sed neque me etiam hoc tam necessario tempore illi potuisse adesse. Mea Coloniam profectio dilata fuit ob adventum D. Marchionis Bergensis, quem hodie hîc expectamus, cum ante quatrimum fuisset alioquin venturus. Coactus sum illum expectare, tum ob alias causas, tum quia soror mea nupsit hisce diebus cuidam ex familia ipsius, ipso Marchione eum nobis per literas commendante, & nuptias liberalitate in maritum promovente. Itaque necesse erit primum currum expectare, qui nullus paratus erit ante hujus hebdomadae finem. Si ullo modo, mi Corneli, negotia tua patientur, ut una discedamus, facile intelliges te praesentia tua propemodum posse salutem afferre animae dimidio tuae. Opto itaque, certior me facias tui consilii. Si ego solus discessero, tuorum mandatorum ero memor. Haec ad te rursus breviter ex aedibus D. *Bircmanni*, qui te plurimum salutatur. Ego interim precibus meis, quantum in me est, charissimi viri salutem Domino commendabo, cui te quoque commendo. Antverpiae 2. Januar.

EPISTOLA LIV.

PETRUS XIMENIUS

*Cornelio Waltero S. P.**Gandavum.*

CLarissime Domine Waltere. Quo loco sit *Cassander* noster, ex hisce *Metelli* literis facile intelliges. Optimo est ille quidem, vel per Dei misericordiam brevi futurus est; sed nobis, qui illum amabamus, ob imbecillitatem nostram ac communem studiorum ac piorum jacturam, non optimo. Ego sane erepto mihi tali viro, talique amico, cum quo aliquot adhuc annos cum summa voluptate ac summa studiorum meorum utilitate me exacturum sperabam, cum accepi nuncium, quo forte nullum in vita accepi acerbiorum, quique, te uno excepto, alium neminem tam gravi dolore afficere queat. Unum meo judicio est, quod in hoc tam gravi casu nos prae caeteris consolari potest, quod non modo ob afflictissimam ejus valetudinem, verum etiam ob nostram omnium jam ingravescentem aetatem promittere nobis non licebat, hanc nostram tantae voluptatis conjunctionem fore diuturnam. Sed de his & de aliis, divina providentia nobis contra has acrumnas datis, remediis coram fortassis paulo post agemus. Nunc neque per occupationes quasdam in sororis nuptiis de his agere vacat, neque per recentem adhuc maerorem facile possum. De reliquo vides etiam, quid D. *Metellus* scribat. Si supra vires meas non erit, quod a me *Cassander* videtur postulare, & tibi ita videbitur, neque pium, neque honestum fuerit deesse tanti amici supremae voluntati, ac communi quoque studiorum utilitati. De eo igitur simul deliberabimus. Caeterum ego profecturus etiam Coloniam fueram post triduum aut quatrimum. Quamobrem opperiar harum responsum, ita tamen, ut si tibi integrum non erit quam primum iter arripere; ego cum mandatis tuis de eo, quod fieri Coloniae velis, praecedam; quod si in crastinum nullus occurret, cui has tradere queam, proprium ad te nuncium, sicuti jubet *Metellus*, dirigam. Tu, quaeso, non committes, quin visis hisce literis extemplo respondeas, cum mihi vix liceat hinc diutius haerere, sorore simul cum marito Bruxellam discedente. Epistola D. *Echti*, cujus hinc mentio fit, ad manus meas non pervenit. Itaque morbi genus, & quae in eo accidunt, ab illo nobis descripta ignorare cogimur. Tenuissima adhuc, ut apparet, spes de vita ipsius relinquitur, quandoquidem multi a medicis deplorati aliquando supersunt, quod in *Cassandro* nostro ille faxit Deus Opt. Max. ut vota nostra hac in parte exaudire dignetur. Ad fratrem quoque tuum, quando ita *Metellus* jubet, scribam, & exemplum mittam literarum ejus, ut hac quoque ratione ad manus tuas perveniat, si forte fueris Bruxellae. Interim in Domino vale, Charissime Domine Waltere. Antverpiae. 14. Januarii 1566.

Obiit ex hoc morbo *Cassander* III. Nonas Februarias A. MDLXVI. ut ex Epitaphio, ipsi a *Cornelio Waltero* posito, quod legitur ante ejus opera, constat. vid. *Valer. Andr. Bibl. Belgicam*.

EPISTOLA LV.

PETRUS XIMENIUS

*Cornelio Waltero S. P.**Gandarum.*

ORnatissime Domine Corneli. Scripsi abhinc dies tertius de tristissimo nuncio extremae valetudinis D. *Cassandri*, & simul mihi epistolam ea de re D. *Metelli*. Omnino arbitror meam epistolam tibi redditam, sed nihil nocuerit, has etiam literas per ipsum Gandavensem nuncium ad te misisse. Res, ut vides, desiderat praesentiam tuam, vel saltem mandatum aliquod, quid fieri velis, dum tu revertaris. Ego ipse, quem nihil aliud praeterquam tuum responsum hîc detinet, vel comes tibi futurus sum, vel perlaturus epistolam & mandata. Itaque non committes, quin mihi per hunc ipsum nuncium rescribas. Interim ut tristissimum nuncium levi aliqua consolatione mitigem, scito me postea ex literis D. *Echti* intellexisse, ipsum non plane desperare, quamvis deteriora metuat. Nos tamen magno, vel saltem aequo animo ferre oportet, quod illi videbitur, cui nihil placere potest nisi optimum. Ille nobis, quaeso, tantum amicum ac tantum Ecclesiae membrum servet misericordia sua incolumem, cui tuam quoque salutem commendo. Haec raptim scripsi in aedibus D. *Bircmanni*, qui te plurimum salutat. Vale 16. Januarii 1566.

EPISTOLA LVI.

ANDREAS MASLIUS

*Georgio Cassandro S. P.**Xantos.*

Valde me oblectavit epistola tua, mi Cassander, quam Cancellarius noster cum chorographia Sanctae terrae, a nostro *Gerardo Mercatore* elaborata, ad me mittebat die xviii. hujus mensis, cum multis aliis de causis, tum in primis, quod te non pessime in tam noxia caeli intemperie, ut tunc mihi videbatur, valere significaret, & quod opus illud de dogmatis Ecclesiae controversis, ut ipso argumento difficillimum, ita ob tantorum principum expectationem tuae famae & nomini longè periculosissimum, & simul propter temporis brevitatem, imbecillemque tuam valetudinem tibi multo molestissimum, ad finem esse perductum nunciaret. Ego, mi Cassander, plane mihi persuadeo, si deo propitio illud sacrosanctae religioni nostrae congruenter elaborasti, ut eorum, qui hoc seculo rempublicam moderantur, titubans atque vacillans ad omnia & singula paene dogmata ritusque Ecclesiae animus, & novitate pruriens, firmetur, & a sui iudicii fiducia aut confidentia potius, ad veterum conciliorum, patrumque auctoritatem reducatur, futurum, ut posthac multo
quam

quam adhuc, suavius vivas, quando tam utilis tamque praeclari, immo divini operis te conscientia miris modis semper oblectabit, & omnium hominum vota optima, quos certe novarum rerum libido non prorsus perdidit, te perpetuo prosequuntur, ut jam nihil te poenitere debeat infumpti laboris, etiamsi tuae valetudini aliquid detrimenti attulisse videatur: non credas enim, quam facile omne, tranquillata semel mente, refarcietur. Illud porro faciendum tibi erit, ut bonorum approbatione contentus esse, eorum vero, qui novitatis, ut dixi, studio prorsus insaniunt, judicia, obrectationesque fortiter contemnere possis. Sed quid ego te hujus moneo, qui jamdudum hanc aleam probe es expertus, & prudentissime moderatus. Ego vero jam mirifice flagro desiderio videndi operis illius tui, nec scio, an tantisper, dum in publicum illud prodeat, ferre potero hoc meum desiderium, certe nisi alia me studia retinerent, jam nunc ad te adcurrerem, ex animo loquor, mi Cassander; non quod ego in iis non acquiescam, quae a veteribus tradita, & in Catholica ecclesia adhuc observata didici: mihi enim semper sacrosancta erit majorum meorum religio, ad quam a puero assuevi, & qua veriore simplicioremque, & verae pietati convenientiorem comperio nullam; sed quod vehementer desiderem illud videre scriptum, quo male curiosorum hominum πολυπραγμοσύνη, in iis praesertim fidei nostrae mysteriis, quae sub Ecclesiae auctoritate a profanis saltem hominum disputationibus tuta, καὶ ἀνεξέλεγκτα, ἀνεξέταστοιτε manere debebant, reprimatur aliquatinus: extingui enim posse, nisi per maximam rerum publicarum vicissitudinem, & prope novam orbis faciem, jamdudum despero. Sed de his haecenus. Facile enim, ut video, in publicam nostri temporis inciderem querimoniam, ad quam nulla unquam verba sufficient. Missum est ad me a *Plantino*, novo typographo Andoverpiensi, responsum quorundam Sacerdotum Anglicorum adversus nescio quem *Hopperum*, ei adjuncta est replicatio, ut vocant, *Stephani Gardineri*, in qua visus sum animadvertere plurimas hujus seculi controversias docte, solide, acute, copiose tractatas, quare velim hanc replicationem a te lectam fuisse, prius quam illud e manibus amandasses opus. Sed quae tua fuit multorum annorum diligentia & sedulitas, nihil spero praetermiseris, quod ad solidae veritatis agnitionem faciat, ad quam amplectendam, utinam non plurimis suae obstat gloriae ambitio, & vanissimum novitatis studium, cum implacabili vetustatis odio, & nullo iudicio conjunctum. Plane in tempore venit *Mercatoris* nostri χωρογραφία; jam tum enim ad fortitionem tractandam, qua tributim terra sancta dividitur, me comparabam. Sed quando ille ex animo, ut allegatum scriptum de situ montium Hebal & Garizim testatur, mihi gratificari voluit; ego mutuis ad ipsum literis meam quoque gratitudinem, ut potero, declarabo, tibi vero interim maximas ago gratias, mi Cassander, qui talem virum mihi amicum & benevolum feceris. Fuit praeterea gratissimum mihi abs te munus libellus ille tuus de infantum baptismo, ex quo historiam adhuc mihi prorsus ignotam, veluti ob oculos depictam, videre visus sum, & simul fanaticae gentis subversa praesidia omnia. Satis intelligo, mi Cassander, te ad hujusmodi argumenta tractanda natum eruditumque esse; per-

ge ergo, aut potius sequere maeste virtute, quo divinus te afflatus ducit, & cave, ne, dum pudentiussculus de te ipse minus bene sentis ac debes, ingenii tui alacritatem impendas, mentisque vigori nebulas quasdam offundas. Non tu, mi Cassander, jejunus es in tuis argumentis, nisi me amor in te meus judicantem impedit, sed occurrunt tibi dicenda, quae opus est, omnia, & suavi *καὶ αὐτοχθονί* oratione omnia fluunt, qui stilus in rebus sacris tractandis mihi probatur maxime: quorsum enim illa Calviniana *σέματα*, & inutilis orationis luxuries, nisi ad faciendum auditori vel lectori fucum. Ego veram ingenii sterilitatem, ariditatemque in me experior, cui vel prolixissima cogitatione vix quidquam occurrit. Ex memoria labilissima nihil suggeritur, adeo ut quoties serio me ad commentandum comparo, tametsi multa legerim, multa didicerim (absit arrogantia) mens mea videatur, veluti nube quadam ignorantiae imbuta, se frustra intendere, quam alioqui ex Dei benignitate satis habeo perspicacem: sed ita sunt Dei dona, alius ad alia natus est, ut diversis operis omnia hominum inter se societatis officia praestentur. Quare simus, mi Cassander, Dei in nos liberalitate contenti, eamque, illo vires subministrante, ita exerceamus, ut olim sortem cum foenore possimus rependere minime duro domino. Quod superest Deum opto: Max: precor, ut hunc tibi annum & plurimos alios det quam felicissimos. *Wezius* te amantissime resalutat, *Reccus* apud principem per hosce duos menses hinc abest, mea etiam uxorcula multam tibi salutem nunciat, teque aliquando coram videre exoptat, conscia mei in te amoris. Non vacat, mi Cassander, ut ipse describam hanc epistolam, neque habeo amanuensem, quare est, quod lituris ignoscas, impediior enim jam multis literis scribendis, & mens, ut vides, saepe articulos praevertit. Dominum *Petrum* Canonicum Xantensem & Doct: *Risvicum* obsecro ex me amanter salutes, quando ad te visent. Et tuam valetudinem, mi Cassander, quantum potes, curato. Pridie Calendas Januarias MDLXIV. Ex Zevenera. Si quid de *Ximenio* audisti, ubi nunc agat, velim significes, quando vacabit.

Vid. *Cassandri* Epist. LXXXV. pag. 1186. operum *Cassandri*. Fuit autem hic *Massius* Vir egregius, cujus vita est apud *Valer. Andr.* Bibl. Belg. & cui testimonium praeclarum eruditionis & moderationis dedit *Dallaeus* de usu Patrum lib. I. cap. 4. pag. 67. Multa ipsi familiaritas cum *Latino Latinio*, ex cujus epistolis multa de eo disci possunt. vide t. I. pag. 84. & de ejus matrimonio t. II. Epist. 64. vide etiam *Teisser.* Elog. Thuan. tom. II. pag. 461. Quam non placuerit inquisitionis antistibus ejus doctrina & libertas, ostendit Index, ut vocant, expurgatorius Quirogae Cardinalis, qui in initio quaedam expungi jubet in ejus commentariis ad Josuam, quibus Latinum interpretem mendo-
se, & non satis considerate vertisse, & Divorum monumenta ad solam vitae bene actae imitationem, non etiam ad religiosum cultum, quem adorationem vocant Theologi, conservare jus esse dixerat. Perperam etiam Inquisitores eum *Massium* vocant in altero indice *Antonii a Soioma* Major Madriti, ut titulus prae se fert, edito 1682. ubi pag. 46. & 47. plura adhuc deleri jubentur.

EPISTOLA LVII.

ANDREAS MASIVS

Georgio Cassandro.

S Alve mi suavissime Cassander. Iter isthac facturo *Wezio* meo; aut nostro verius, non potui non aliquid ad te literarum dare, pro magno meo adversus te amore, atque hoc officio, simul illi tui alioqui amplectendi avidissimo occasionem objicere majorem tui videndi, simul mei apud te memoriam instaurare. Nam alioqui nullum mihi jam praecipuum argumentum scribendi erat, nisi quod velim *Mercatorem* per te rogari, quando utrique ocium erit, ecquid certi habeat de montibus illis Samaritanis Garizim, & Hebal, quanto intervallo alter ab altero absit, & uter altero magis, ut sic dicam, meridionalis: vehementer enim me torquet celeberrimus ille actus faustae & dirae imprecationis a Mose praescriptus, & a Josua ad rem ipsam collatus. Neque enim quâ potuerit illa caeremonia peragi intelligere possum, nisi mons unus fuerit, qui ab radice molli acclivitate assurgens, mox ex plano loco duobus veluti cornibus dissectus, prope *ἡμθεάτης* speciem praebuerit, atque in verticum altero Garizim, altero Hebal fuerit dictus. Si apud meos libellos essem, ubi haec altius sum meditatus, scriberem fortasse complures causas, quae, ut ambigam, faciunt, sed nihil opus est causis, quando ego non tam mea cogitatione *Gerardum* informare, quam quid ille, ut est talium rerum peritissimus, comperti habeat, audire desidero. Quod si me hîc expediverit, putabo me maximo beneficio adfectum esse, & avide alia quoque deinde ab ipso percontabor, qualia sunt de ascensu & descensu Bethoron, & quae sunt ejus generis. Memini me videre *χωρογραφίαν* terrae sanctae, quam ille aliquando evulgavit, obsecro te, mi Cassander, si isthic venalem habet, alligatam epistolae tuae, qua per ocium mihi ad haec dignaberis respondere, ad me curato. Ego tibi precium, quantum significaveris, lubentissime persolvendum curabo. Nam vehementer illius generis mappis oblector, quare velim simul significes, ecquas alias praeterea habet aliarum regionum, quas redimere possim. Nihil enim facilius, quam ejusmodi chartas ad Cancellarium, ut vocant, Clivensem mittere, unde ad me cotidie perferri possunt. Hoc quoque te oro, mi Cassander, ut libellum tuum de Baptismate, sive *κατὰ τὴν ἀναβαπτιστῶν*, quando tibi commodum erit, mittas, ut es pollicitus. Vale, mi Cassander. Nam conveniunt frequentes Consiliarii, ut cogar a scribendo supersedere. Cancellarius creberrimam atque amicissimam tui mentionem facit, ut plane tenerrime ab eo amari videare. Iterum vale, & *Henricum* meum *Wezium*, virum ex meris virtutibus conflatum, suaviter amplectere. Ex Clivis Nonis Septembribus M F LXIV.

Ad hanc respondet *Cassander* Epist. LXXXV. vide etiam Epist. XCII.

EPI-

EPISTOLA LVIII.

ANDREAS MASIVS

Georgio Cassandro.

Xantos.

SAlve mi Cassander, tametsi minus nihilo sit, quod scribam, non possum tamen te tribus verbis non salutare, prius quam hinc domum recurram. Postquam chartaceam supellectilem omnem movissem, repperi tandem de Patriarcha illo Nestoriano quaedam a me, causa memoriae, annotata, verum quae vix quidquam, immo prorsus nihil faciant ad ea studia, in quibus tu potissimum versaris, sed describam per ocium, neque enim amanuensem habeo, & mit-tam tibi: velim tu vicissim, quod tibi tamen commodum sit, promissum tuum libellum adversus Anabaptistas ad me cures. Vehementer, ut me Deus amet, gavisus sum, quod *Furstenbergius* te mediocriter valere nunciaret, immo prorep-tasse ad *Clossii* aedes: nam *Wezius*, tui certe amantissimus, ea retulerat, quae me valde sollicitum haberent de gravissimo aliquo paroxysmo, sed jam expe-cto Cancellarii oraculum, quo domum redeundi mihi fiat potestas. Tu igitur, mi Cassander, vale, & me, quod facis, pergito amare. Ex Clivis XXI. No-vemb. 1564. Ego creberrimo capitis dolore infestor, & certe usque eo, ut verear, ne tandem (avertat Christus) in ἀποπληξίαν definat, adeo molestus, & insuetus dolor ferit cor. Sed hoc Deo curae erit, egoque, quod potero, illius benignitate nixus, mihi ipse non deero. Certe si in literis operam ponere mihi non liceat, neque vivere libet.

EPISTOLA LIX.

JOHANNES METELLVS

Georgio Cassandro S.

Duisburgum.

SCripfi satis longas, & molestas rerum novarum litteras, ad te. Sed *Bir-comannus* non repperit, per quem mitteret. Postea accepi exemplum unius aerearum Tabularum, quae in senatu Eugubino Umbriae diligenter adservantur. Numero sunt quinque, ac scriptae litteris antiquis Romanis, quales sunt primi versus in eo exemplo, quod mitto. Molestum enim fuisset, integram majusculis describere. Eas tabulas vidi, atque curavi totas iisdem formis describi. Sed Romae sunt, ubi *Pygbius* duarum a me exemplum ha-buit, & *Morillonius*. Hoc autem exemplum *Pygbius* ad me misit, ut id de-scribi curares, ac remitteres, atque statim efficeres; *Campanus* ille, aliquo enthu-

Cum his *Metelli* Epistolis conferendae sunt aliae, circa haec tempora scriptae & editae, a *Dan. Heinsio* in prima Centuria virorum illustrium, quas in Indice reperire poterit lector, & respon-siones in *Cassandri* operibus, inter epistolas.

enthusiasmi sui genio percitus, eas nobis interpretaretur. Itaque; repertae sunt in agro Eugubino. Quarum fortassis *Steuchus* mentionem fecit; vel alii ejus provinciae historici. Nemo vero umquam repertus est, qui eas intelligeret. Etrusca lingua scriptas non adparet; quarum characteres sint Latini, non Etrusci. nisi tamen, Etrusca lingua, Latinis litteris scriptas, putaremus. Sic autem; & Punica, vel Gotthica, Geticave lingua scriptas, liceret adferre. In ea re *Campanus* se excerceat, ac, siquid profecerit; alteram tabulam a *Pyghio* petam. Ut igitur cumprimum hujus interpretationem faciat, diligenter curabis. Quod si profecerit; certe laudem merebitur. immo praemium ab eo Eugubino senatu; qui eas habeat pro thesauro. Cum Eugubio Perusiam venissem, mihi ostensi sunt aliquot libelli parvi, in papyro scripti, characteribus Geticis; qui in altaris cujusdam armario, tamquam Ethrusci servabantur. Quidam nobilis vir *Gottus*, eo a me ductus, agnovit, esse suae gentis Geticos characteres; & fragmenta quarundam municipalium legum Gotiae continere. Quod cum audiret *Jacobus Taurellus* Fanensis, Graecae linguae in ea urbe professor; mirum, quam ipse obstupuerit. Sed de his fatis. *Sambucus*, ad me Vienna scripsit; pridie Nonas Maji; de tuis rebus; in hunc modum. *Saluta diligentissime, Dominos meos & eruditos viros² D. Cassandrum & Gualterum. Libellosque Imperatorem, & Regem, suis Consiliariis legendos dedisse. & valde studium, & varietatem laudasse doctrinae, καὶ τὸ φιλαλήθειαν.* Ego, nondum cum Imp. loqui potui: tum quia decumbit; tum quia tres septimanas abfui. *Saluta D. Gifanum: & me, intra x. dies, Theophylactum missurum significato; quemadmodum, ad Bircomannos quoque scripsi.* Haec ille. Coram te visissem. sed me morbus, vel potius ejus suspicio, retinet. Vale. VIII. Eidus Junias. M D LXIV. Colonia.

² Vid. *Cassandri Epist.* LXXIII. pag. 1173.

EPISTOLA LX.

JOHANNES METELLUS

Georgio Cassandro S.

Duisburgum.

F*Ranciscus Richardotus* Sequanus Atrebatensium Episcopus, cum certior a me factus esset, tibi placere constitutiones ejus ecclesiasticas de sacramentis administrandis; in quibus eorum usus ostendatur: te tamen eas, qua lingua primum scriptae sunt, hoc est Gallica; cupere: ad me misit, hoc earum exemplum; ut id ego tibi traderem, teque suo nomine diligenter salutarem. Quare, accipe hunc libellum, ac lege. sique tibi probabitur, effice, alii legant. Is tibi optime cupit; propter notam ubique probitatem, virtutem, scientiamque tuam. neque non scit, ab aliis; te, in reformationis negotio, Caesarum jussu, versari. quod feliciter evenire, eque re Reipublicae, a Deo Opt. summis precibus, pro ea, qua praeditus est pietate, petit. egoque, ceterique

Tom. II.

O o

omnes,

omnes, optamus. Haec de tuis rebus. De civitatis statu lugubria scripsi. neque jam laetiora de communibus amicis indicabo. *Echtius* enim, jam quintum diem, peste gravissime decumbit. Eum invisi, sub initium morbi, ac sum coram lectulo fixum decumbentem allocutus. Hodie, qui meus est natalis dies, adhuc in lecto jacens, accepi felicius nuntium. nempe, meliuscule eum habere. neque spem, uti prius, de recuperanda valetudine, quod Deus faxit, projectam. Qui fugerunt, & huc redeunt; fere ea lue corripiuntur. quod aliquot exemplis testari possumus. Jam primum tamen, paulo saevitia remittitur; multique evadunt; cum antea vix e mille decem vitam conservarent. Credimus; divino beneficio freti; tandem, clarius sidus appariturum huic miserae civitati. Sat. enim malorum exhaustimus. Philippica classis, oppidum Velezum Hispanis propinquum, in Africa, cepit, eique contiguam arcem, indomitam bello, & cetera, quae tu nosti. proximo veredario, expectatur nuntium, quod omnium invidorum Hispanicae gentis luminibus obstruat, de victoriae progressu. ac fortassis, jam tertio Algerium tentabitur. De Gallicis rebus plura ad me perscribuntur; quam aut vacet scribere, aut haec exigua, & ad imam ceram perducta charta, capiat. Tu igitur vale, ac salve. XVIII. Octobris M. D. LXIV. Colonia.

Respondet *Cassander* Epist. 83.

EPISTOLA LXI.

JOHANNES METELLUS

Georgio Cassandro S.

Xantos.

ACcepi litteras Amplissimi viri Cancellarii Clivenfis; quas ejus adfini tradidi. suavit, expectarem Reverendum praepositum, cui supplicem libellum ad Illustrissimum Ducem dederam. quo litteras ab ejus celsitudine, obtinerem. Nam ita quidam, immo prope omnes, consulunt. Quare hoc unum urgeo. In quam rem, & *Furstenbergius*, per hunc nuntium, epistolam quoque, ad Amplissimum illum virum Dominum Cancellarium, scripsit. Ego sane, ei magna de causa sum obligatissimus. nempe; quod de me, tam humaniter adfini suo scripserit. eumque etiam rogat; ne mihi desit in re, quam peto. Id quod, me tibi debere, non ignoro. Tu igitur, postquam coepisti, per occasionem, obtestaberis hominem aequitatis amantissimum; ne & hoc summum ejus erga te benevolentiae signum tibi deneget: ut ejus videlicet Illustrissimi Ducis litteras, ejus auctoritate, nanciscar. Ero non ingratus, quoad potero. tibi vero in primis; siquid sit, quod ipse, tua causa, valeam. atque pateris, me uti hac meae in te observantiae testificatione. *Echtius*, etiam dudum, negotium promovit apud *Mejerum*. Quod autem ad *Wesembecium* attinet; habes, in quo possis, in eo juvando, pietatis munus exercere. ac sane in negotio, quantum ipse judico, longe justissimo. Sed,
cur-

currentem non incitabo. Postremis meis litteris, tum his, si vacat, per hunc tabellarium respondebis. Cumprimum enim revertitur. Incidi in carmen, quod ad te mitto. Cujus auctor fertur *Joannes* quidam *Computus* Bredanus, adhuc, ut audio, adolescens. & qui, *Duisburgi*, apud *Gerardum Mercatorem* habitat. nec se diffitetur auctorem, seque tibi id renuntiasse. Haec cum accepissem; ac tamen dubitarem, num vera sint; resque ad te pertineat; caelare te nolui. ea quidem lege, ut sopiantur, taliaque scripta, quemadmodum soles, egregie contemnas. *Franciscus* ille *Jesuita*, postremo ordinis sui sacramento, Pater evasit. jamque Patris insignibus, & titulo decoratus, Colonia nescio quo, Paternas opes egenis expositurus, proficiscitur. Frendent equidem, ac fremant licet ejus symmistae; calix edicto *Clivensis* permittitur, ut scis. In Rep. de reb. Gallicis, nihil praeterea accepi. Quidam, *Antverpia* monet; turbas componi. Sed *Reginam* matrem, cum *Elizabetha Philippi* Regis, in finibus *Hispaniae* conventuram. *Philippum*, quod tales principum congressus suspiciones moveant; se Proceribus Germanis excusasse. saepius rogatum, recusasse. victum tamen precibus, cessisse. siquid inde sinistri nascetur, ad se minime pertinere. scorpium sub lapide latere, sagaces suspicantur. Proxima aestate in *Belgium* properat. *Egmondanus* ad eum adpulit. *Renardus* Proreginae *Belgii* scripsit; se a *Philippo* comiter fuisse exceptum: Italicosque proceres, cum *Turca*, Galloque clam consultasse, contra *Philippi* potentiam. *Granvellanum* crebras ad *Philippum* litteras dare; velit ejus meminisse. Ordinis *Livonici* Magister, a *Moscovita* captus, fuit liberatus. ac toti provinciae, uti antea, restitutus. quibus condicionibus, nondum audivi. *Polonus*, qui defensionem ejus susceperat, *Rigam* provinciae metropolim tuetur. & *Suecus*, alteram eo loci urbem. Itaque adhuc bellum geritur. Sed; ne longior sim, valebis. xv. Cal. April. M D LXV. Colonia. *Echti*, salutem.

Respondet *Cassander* Epist. xciii. & cxiv.

EPISTOLA LXII.

JOHANNES METELLUS

Cornelio Valtero S.

Gandavum.

Q UOD tamdiu ad te scribere distuli; non id accidit, ulla mei in te amoris cessatione: sed primum, quia ubi litteras tuas accepi, uti calamo non licuit; propter humeri luxationem. postquam vero ab ea convalui; ea vobis imminere fata coeperunt; ut vix tuto, cui litteras darem; fuerit. & nihil erat tamen, quod scriberem; praeterquam necessitudinis nostrae recordatione te commonefieri, me recte valere; idemque me tibi optare. Postea accepi; te octo *Hispanos* hospites habere domi, quorum summa humanitate. plane nobis fuisses immutatus. & jam te coepisse eorum moribus totum dare. qui,

cum quales sint, sciam, & semper abhorruerim, naturae quadam meae libertate, a superbia; contempserim magnificos titulos honorum: nolui te, praeceptis philosophiae inceslere; per quae, ob oculos tibi ponerem, vanas esse eas similibus hominum cogitationes. uti a te ego, dum te Christianae doctrinae totum tradebas, didiceram. malui enim tibi amicus esse, quam importunitate mea tibi, ulla in parte, etsi honeste, molestus videri. Sed quia, & deinde mutatum video; & neglectis illis subtilibus honorum, sermonisque etiam ambitionibus, tete totum Jurisconsultis nostris dedere: equidem, alacrior ad tibi scribendum fui redditus, nisi quod mihi plane displicuit; te, adfidos dies, & conjuges noctes, fori contentiosis maeandris, & involutis rabularum technis, irretire; quo minus ad liberos huc tuos redeas. & Casfandrinus partus; quos tu injuria nimia jacere finis; & nescio quomodo, contra testatoris voluntatem, prope exponis, pietate foveas, alas, emittas. Nam obsecro; cur totam aetatem tuam in optimis studiis trivisti; praecclaros totius orbis Christiani doctos viros amicitiae vinculis tibi devinxisti; eorum scripta, libros, hausisti; omnia denique omnium omnia collegisti; quae negabantur, aliter si tu minime potueris quaerere, rapuisti: cur igitur ea tu detines captiva; cum tu captus ab Iberis, eos tu tantopere detesteris? Nimirum; ut tu, homo liber, servias, uni latrunculo vestrorum judiciorum? Et quorsum? ut tu, rabulam infamem aliquem, vicisse per simili arte, tute vir eruditus, vir Christiana pietate praeditus, glorieris? At tu famam non venaris. Atque si tibi venari cupias; melioribus retibus, & venabulis magis acutis, paranda est. Neque tu meminisse non potes igitur; quae tibi talenta Deus concredidit; loquar enim tuae disciplinae more; ea tibi non data, ut in terram illa defodias; sed ut illis sis utilis; & ei qui tibi ea concredidit, hoc est Deo Optimo Maximo, reddas. neque solum reddas; sed etiam, multo cum fenore. Quam ob rem omnes, quibus es notus, per me hoc a te poscunt; ut desinas, ipsorum de te insignem hactenus expectationem fallere. relinque aliis, tantos ad perniciem excogitados labores judiciorum; iis inquam, qui nondum eo pervenire, pietatis profectu; ut putent, alia non esse potiora, quibus vitam transigant; & se non inglorie vixisse testentur. Tu itaque, si Dei donis abuti nolis; credo; explicabis te illinc. non quidem explicabis; sed alii deferes. Nam; nec tu tibi, aut liberis; sed sponte aerumnas illas (cur enim licita negotia vocem, quae nec tu, qui illa suscepisti, loqui si libere velis, probes) subisti. tibi que, vel eo quo voles momento, inde te extricare licet. Utinam ergo; qui unam litem verso, tu centenas; mihi tu exemplo tuo auctor esses; ut, vel patrimonium potius, qualecunque est, perderem; quam bonas horas male collocarem. Cogor ego; tu sponte. Ego uni haereo; tu centenis. Tibi licet cedere; mihi non licet. Equidem; cum calamum in manus sumpsi, ut haec ad te scriberem; sensi, me spiritu quodam divinitus compelli; ut haec ego tibi. ne tu etiam excusare tute te possis. & cogita; te divinitus admoneri. quoniam Deus, per homines moneat, hortetur, excitet; quae fieri iuste & velit, & mandet. Vale. prid. Non. Februarias. M D LXVIII. Colonia Agrippina. Gra-

Gratum feceris; quod alias tibi scripsi; si cumprimum indicabis; quot singillatim, & quae, cujusque valoris annui, beneficia, ab hinc annis decem, haecenus contulerit Praepositus ille, de quo monueram. & an indultorum vi, an vero tamquam praepositus. quia plurimum mea interest. Habes postremis litteris meis indiculum. quem relege, amabo te, ac rescribe. meque, qui te hortor, etiam extrica ab hac hydra. Vale, mei memor.

EPISTOLA LXIII.

CORNELIUS WALTERUS

*Reverendissimo Illustrissimo Domino Friderico Archiepiscopo Colonienfi,
Primate Electori, Domino suo Clementissimo.*

Cum Caesar Maximilianus per literas *Georgio Cassandro* piæ memoriae mandasset, ut quaedam conscriberet, quae facerent ad conciliationem controversiarum hujus temporis in religione, eaque per Reverendissimam & Illustrissimam Celsitudinem Tuam essent Caesareae Majestati transmissa, rescripsit praedictus Caesar *Cassandro* literas propria manu subscriptas, quarum exemplum ad authenticum collatum his adjunximus, ex quibus constat Caesaream Majestatem *Cassandro* donasse Ducentos aureos, numerandos per ejus commissarium *Spirae* agentem, quibus acceptis *Cassander* post aliquot tempus nactus occasionem misit chyrographum suum *Georgio Langg* commissario. Idque per *D. Bartholomaeum Heimback* Consulem Urbis Colonienfis tunc *Spiram* proficiscentem, quo certius praedictos Ducentos aureos recipere posset. Verum *Georgius Langg* respondit sibi de hoc mandatum a Caesare non fuisse transmissum, quare nihil numerare posse. Itaque dum sic solutio differtur, interea *Georgius Cassander* Coloniae ex hac vita migrat, cum is prius mihi *Cornelio Waltero*, vitae ac studiorum ipsius Socio, jam per viginti & amplius annos testamento commendasset, aliaque fidei meae exequenda commisisset. In primis vero ut *Joannem Cassandrum* patrem suum, senem ac tenuis fortunae, quamdiu viveret, alerem, ac de omnibus necessariis providerem, & simul mihi omnia bona reliquit, quae moriens habuit. Quamobrem post ejus mortem ego *Cornelius*, haeres fideicommissarius, cupiens satisfacere piæ voluntati charissimi amici, diligenter per annum & amplius egi, ut praedictos Ducentos aureos a Caesareâ Majestate *Cassandro* donatos in usum parentis ipsius *Cassandri*, aliorumque Legatorum recuperare possem, sperans fore, ut interea temporis aliquod certum mandatum a Caesareâ Majestate *Langg* acciperet, verum is adhuc constanter affirmat; ad se nullum de hoc mandatum a Caesarea Majestate venisse, sine quo nil numeraturus videtur. Quare jam necessarium esseprehendimus, ut Caesarea Majestas iterum admoneatur, praedictae donationis *Cassandro* factae, misso exemplo authentico suarum literarum, si forte hujus memoria per graviora negotia excidisset, quibus & alias supplices literas addidimus, una mittendas ad Caesaream Ma-

jestatem: siquidem ita Reverendissimae ac Illustrissimae Celsitudini tuae videatur, quo tandem liceat impetrare a Caesarea Majestate chyrographum sufficiens ad pecuniam petendam, aut saltem Mandatum ad predictum ejus commissarium, cujus Mandati nos a Caesareâ Majestate certiores facti, ipsum *Langium* de solutione efficaciter compellare valeamus. Sed hujus rei conficiendae nullam commodiorem neque certiore rationem invenire possumus, quam si prius a Tua Reverendissima & Illustrissima Celsitudine obnixe petamus, ut non gravetur literas quoque suas de his omnibus ad Caesaream Majestatem aliosque in ea aula viros dare, quibus imprimis futurum confidimus, ut promissa pecunia nobis *Spirae* a *Langio* representetur. Ut autem Tuae Reverendissimae & Illustrissimae Celsitudini super hoc negotio supplices esse audeamus, facit imprimis, quod te horum omnium conscium esse scimus, quippe qui frequentius Caesareae Majestatis literas de toto negotio acceperis, cum te Interlocutore, ut ipsius literae testantur, sua Majestas libenter ad haec usa sit. Praeterea quod adhuc recordamur, qua benevolentia ac pietate vivum ac etiamnum defunctum *Cassandrum* prosecutus sis, denique speremus fore, uti te moveat senectus parentis ipsius *Cassandri* ac calamitas, si is jam unico filio vitae suae solatio & praesidio orbatus, hoc insuper necessario subsidio frustrandus sit; Cum tamen eo beneficio Caesarea Majestas remunerari voluerit immensos labores, quos *Cassander* dies ac noctes exhausit, dum urgenti mandato Caesareae Majestatis absolutionem operis certum tempus praecipientis satisfacere cupit, valetudini quantumvis afflictæ non parcens, neque vitae suae jam fatiscentis rationem habens. Sed cum haec omnia, & Caesarae Majestati & Reverendissimae ac Illustrissimae Celsitudini Tuae satis nota sint, nolo illis commemorandis esse prolixior. certo confidens fore, ut T. Reverendissima & Illustrissima Celsitudo huic pio officio non sit defutura. Oro autem Deum Opt: Max: ut T. Reverendissimam & Illustrissimam Celsitudinem ecclesiae ac Reipub: diu servet incolumem. Datum Coloniae.

EPISTOLA LXIV.

ANTONIUS DE TASSIS,

Magister Veredariorum,

*Joanni Metello.**Coloniam.*

CAlix, a Pontifice non fuit concessus, praecipue respectu Archiepiscopi, sed Imperatoris in Germania. idque sub certis condicionibus. Postea audivimus, ab aliquibus receptum fuisse. Scribitque Imperator, eam concessionem, fructum adtulisse; quia condicionibus illis, eae nationes, ad obedientiam sanctae sedis prolicerentur, traherenturque. Quam & ob causam Caesar a Pontifice petit; ut ordinatis presbyteris uxores ducere liceat: ut laici matrimonio copulati, bonae tamen famae, doctrinaque praediti; presbyteratus

tus ordinibus possint initiari: ut presbyteri, qui duxerunt uxores, sint absoluti; cumque iis, quas duxerunt, uxoribus, manere iis permissum sit. Itaque Pontifex eruditus hoc negotium discuti mandavit. Non reperitur; hoc saeculo, Apostolicae sedi convenire; ut haec indulgeantur. Maxime; nulli bi invenitur; ut qui presbyteratus ordinem susceperunt, ipsi uxores, ex Pontificis licentia, ducant, propter, uti fertur, vota. Pontifex cum Helvetiis foedus inire tentat. sed, cum solis Catholicis pagis. quod; pactum iri, Pontifex ipse, in Consistorio, dixit. verumtamen; tuendae solum Apostolicae sedi; & contra eos, qui eam niterentur offendere. non autem, aliis offendendis. Romae III. Mart. MDLXV.

EPISTOLA LXV.

PEREGRINUS WILACH,

Pastor Duisseldorffiensis,

Georgio Cassandro.

DOctissime amicissimeque mi D. Cassander. Cum ante paucos dies ad tuam dignitatem venerim, miraberis fortasse, quid causae sit, quod ex Blannckenbergh (sicut T. D. promiseram.) ad te non redierim. sed ubi causam audieris, defines haud dubie mirari. Verum primum dicam, quando venerim in Blannckenbergh. Deinde quid ibi actum sit. Tertio itineris mei rationem reddam. Veni 12. die Augusti in Blannckenbergh hora quarta ante meridiem, & ingressus publicum hospitium, nempe Domum praetoris. (tuus interim adventus expectabatur avidissime, cujus absentia mihi quoque non parum molesta fuit.) sed vocavit me in Arcem praefectus Arcis, vir valde humanus, qui & me humanissime excepit & tractavit. Hic multis verbis sursum deorsumque habitis de variis rebus, coepimus tandem colloqui de Anabaptitis, quae meae profectionis causa (ut nosti) fuit, quorum agebat, nonnullos esse minus pertinaces suae mentis, & de quibusdam se nonnihil spei resipiscentiae concepisse, & Dominum *Petrum Loo*, multum boni assiduo labore, per continuas tres Septimanas apud illos prestitisse. Me vero hic percunctante, quidnam de illo viro sentiret, subrisit, ac tacuit. Nam ipse Amptmannus vir pius & bonus Catholicus. Deinde quaesivi ex ipso (est enim non indoctus) qua ratione & quo ordine Dominus *Petrus de Loo* in institutendis & ab errore liberandis miseris illis hominibus usus fuisset, Respondebat se non semper actionibus illis adfuisse, & tunc temporis Principis negociis vel occupatissimum fuisse, propter presentiam Principis & Consiliariorum: Proinde se non posse rationis illius & ordinis, ullam mihi dare informationem. sed

in-

1 An ille *Peregrinus* Epist. II. *Cassandri* memoratus? Crederem, quia & ibi de Anabaptistis agitur. hoc etiam anno *Cassander* edidit acta Colloquii in aedibus Vicecomitis Coloniae cum *Matthia* Anabaptista. vid. Epist. CI. & CIV. & Anno 1557. cum *Joanne Kremer* aliud habuerat, quae edita post Epistolas. Eodem tempore de parvulorum Baptismo opusculum *Cassander* elaboravit. vid. Epist. XCVIII. & seqq. quod etiam inter opera legitur pag. 701.

interim tamen omnia diligenter ab ipso publico scriba esse excepta, qui quoque, quum ego eo venirem, aberat. Hujusmodi colloquiis consumptus est primus dies. Sequenti vero die, qui erat 13. Augusti, interrogavit me Satrapas, num etiam mihi esset animus agendi cum Anabaptistis ante adventum D. Petri. Respondebam: Id commode fieri non posse, ut aliquid nimis urgeatur a me, quod ab illo fuerit concessum, & ex contrario, ut ego aliquid concedam, quod ab illo non fuerit admissum. & me certo scire, non per omnia inter nos convenire, & ejusmodi dissentione, miseros illos homines misere & dolose deceptos, magis in errore suo confirmari, quam ab eo liberari & emendari. Ilico manibus pedibus in meam sententiam itum est. Interea dum haec inter nos aguntur, & D. Petri Adventus expectatur, redduntur Praefecto Arcis literae a Domino Petro missae, quibus significabat se non posse adeste ante VI. diem ejusdem mensis. Quid multis? hic consilium, quod paulo ante ratum erat, irritum fieri necesse fuit, & aliud capeffendum. Putat Satrapa non inutile fore, si cum eorum aliquo verbis fraterne & amice communicarem, experirerque, si aliquid boni efficere possem; praebebam me sane difficilem, ob causam superius dictam, victus tandem rationibus Satrapae consensi. Educitur itaque unus ex illis e carcere, quem Praefectus Arcis in hanc formam alloquitur. *Martine* (id enim Nomen erat Anabaptistae) non parum miratur Princeps Illustrissimus pertinaciam tuam, qui post unam atque alteram admonitionem non destiteris a tuo proposito, cum a piis & doctis viris erroris tui prorsus convictus fuisses. Deinde, dum carcere fuisti inclusus, data fuit tibi non semel cum viris, Divinae Scripturae non ignaris, colloquendi facultas, unde colligere potuisses, si voluisses, quantam ipsius Celsitudo tuae salutis gerat curam. Tertio petiisti, ut adhuc semel tibi concederetur doctorum virorum colloquiis uti, te velle operam dare, ut melioribus rationibus auditis & saniori Doctrina, non pertinaciter in proposito tuo permanere velles. Ecce adest igitur hic *Peregrinus*, Illustrissimi Principis Concionator apud Dusseldorpenfes, cui ut dubia tua, si quae tuae adhuc inhaereant menti, exponas, & te illi vicissim docilem praebeas. ex animo tibi consulo. Respondebat. Quod Principis mandato non parui, illius facti vehementer me jam paenitet, & non parum doleo hoc factum esse a me. Verum non puto me in hoc admodum graviter peccasse: cum fidei negotium non pertineat ad prophanum Principem: Sed non possum tibi & aliis viris satis dignas agere gratias, qui hoc apud Illustrissimam Principis Celsitudinem effecerunt, ut ad petitionem meam, ante aliquot dies alios, nunc hunc ad me miserit unum, & quantum ad me attinet, ut jussisti, strenue faciam: precaborque Deum, ut si sim in aliquo errore, liberer per hunc virum ab hujusmodi errore. Ad haec ego paucis in hanc formam praefatus. Frater, hanc de me velim concipias opinionem, quod te in eo, in quo recte sentis, confirmare, in iis vero, in quibus male a tuis institutus es, rectius, quantum in me fuerit, instituere cupiam, idque prorsus sincero & fraterno animo. Respondebat, se nihil aliud petere, quam ut absque dolo hinc inde agamus, & ne quid sibi inde periculi immineat; quod

Quod nullo modo futurum affirmavi. Quaesivi itaque ex illo, qua de causa ab Ecclesia defecisset. Aiebat se copiose respondisse Domino *Petro de Loo* ad illam quaestionem: nec se putare denuo opus esse illa huc repetere, cum illa sint literis comprehensa, & Illustrissimi Principis Consiliariis tradita. Coepit interim graviter taxare turpissimos hominum mores, pessimos in Ecclesia abusus, spurcissima Sacerdotum crimina, & ita nostram Ecclesiam turpissimis vitiis turpificatam esse, ut non esset dicenda Christianorum, sed Ethnicorum Ecclesia. Respondebam id verius & manifestius esse, quam ut negari possit, & pios viros idipsum male habere, non interim illos Ecclesiam deserere: abusus fuisse in Ecclesia semper tempore Moisis, Davidis & Prophetarum &c. tempore Christi, Pauli, Augustini, &c. non propterea illos Ecclesiam deseruisse. Sed pro viribus illam ab hujusmodi vitiis purgasse, & huc semper omnes pios viros direxisse omnes suos conatus, &c. Nil aliud illo die tractavimus. Sed omnia perscribere non arbitror necessarium esse. pergam igitur ad diem, qui decimum tertium sequitur. In hoc die haec paucis acta sunt. Interrogavi illum, quidnam ex Domino *Petro* didicisset de Paedobaptismo, cujus ipse jam existeret contemptor? Respondebat admodum modeste, se haec didicisse ab illo. Fidelium infantes, absque omni macula, & salvari posse absque Baptismo, nam illos esse Sanctos, & Sanctificatos propter parentum fidem. Quaecebam ex illo, an Dominus *Petrus* aliquas adjecisset illius dogmatis conditiones, vel interpretationes? Respondebat mihi categorice Non. Locutus cum Satrapa Latine, num haec ita se haberent, annuebat & ille simpliciter. Ita surrexi ac Satrapae dixi, in ipso fundamento non convenimus, ergo suspendendum reliquum colloquium in adventum Domini *Petri*, quod & illi consultum videbatur. Quid illo praesente sit actum, de hoc vel tibi scribam, vel coram tecum agam. Haec potius effudi, quam scripsi, propter quotidianas occupationes & molestias, imo nuncii insperati, festinationem. Vale in Christo.

EPISTOLA LXVI.

PEREGRINUS WILACH

Georgio Cassandro.

DUbito hae literae priores subsecutae fuissent, Vir ornatissime, ut id quod in exordio promiseram, ordine executus fuisset: nisi intellexissem te tanta infirmitate oppressum, ut neque te legere, neque alios legentes audire liberet. Metuebam itaque tam afflictæ valetudinis virum incomptis literis obruere. Sed spero te jam nonnihil ob aëris mutationem, a tam gravi difficultate morbo respirasse; Quare paucis quae adhuc restant perstringam, & tantum summa rerum fastigia tangam, ne mea loquacitas tibi nauscam moveat. Venit D. *Petrus de Loo* in Blanckenbergum 18. die Augusti (ut tibi prioribus meis literis significavi,) circa horam octavam ante meridiem. Protinus quaesivi ex illo, an concessisset Anabaptistis, infantes nullam ex parentum propagatione nativitatis suae attrahere labem, neque indigere ablutione sacri

fontis. Nihil mihi certi ab illo responsum est. Interim unus e carceribus ex Anabaptistis educitur, quicum ego ante egeram, atque in medio statuimus illum, quem interrogavi. An ne falsus fuisset D. *Petrus* dixisse, infantes non opus habere sacro Baptismate, eo quod ex fidelibus Parentibus essent prognati? Affirmabat, hoc ita se habere adiecta hac ratiocinatione. Ex sancta radice ascendunt rami, sancti fideles Parentes sunt sancti, & sanctificati, ergo ex illis nascuntur sancti & sanctificati. Ajebat D. *Petrus* se haec ad Paganorum & Christianorum parvulorum distinctionem dixisse: sed de hac re ita obscure, nunc in hanc, nunc in illam partem sese dimittens cum illis agebat, ut mihi ab Anabaptistis non multum dissentire videretur. Manet itaque verum, quod ego apud te dixi, convertendi debent alios convertere. Sed haec sint lapidi dicta. secundo conabatur persuadere illis, infantes habere propriam fidem, idque his modis. Infantes placent Deo ex, *Vae illi, qui unum ex pusillis, qui in me credunt, offenderit* &c. per pusillos, non tantum simplices adultos, sed etiam infantes intelligi probavit, ex 18. cap. Lucae: ubi habetur *Βεβήκη*, sed num hoc cum proposito consentiat tibi dijudicandum relinquo. Ex his tandem & similibus concludebat, infantes esse baptizandos. Ad locum Actor. 19. nullo modo volebat illos fuisse retinctos ab apostolis, qui a Joanne fuerant baptizati. sed locum illum interpretabatur, de pleniore instructione Christianae Doctrinae: quum quaererem ego, quo auctore id faceret, respondebat mihi, Doctorem *Mommerium* quoque in ea sententia esse. Verum cum ego illi indicarem mentem tuam, statim arrepto calamo in suum librum assignavit, atque illam approbavit, & de illa interpretatione se quoque non semel cum Doctore *Aegidio* egisse ajebat. Hic oportet me multa transire silentio, ne tibi sim molestus. Quae de humana in Christo Natura cum illis disputabat, valde mihi placebant, conveniebantque multum cum proposito, sicut multa ex prioribus a proposito vehementer erant aliena. De coena vero Domini nihil hic scribam, cum ipse ea de re justae magnitudinis ediderit librum, quem tu quoque legisti. Non tamen interim negabo, quaedam dubia ex illo colloquio menti meae inhaesisse, de quo coram (Deo favente) tecum agam. Me abeunte 20. die ejusdem mensis mansit D. *Petrus*, dicturus a meridie de coena ad seditiosas & scabiosas quasdam oves: ibi, ex aliis didici, multa suo more in Papam & Papistas effudit, imitatus suum patrem *Lutherum* (hoc enim nomine apud illos honoratur) qui hoc unum sibi semper unice propositum habuit, ut Clerum plebi quam maxime exosum redderet, & hoc illius conamen fatis felicem exitum habuit: sed cum maximo Christianae religionis detrimento: factum est autem inde, ut vulgus libentius audiat fieri mentionem Diaboli, quam sacerdotis, unde & sibi novarum dignitatum finxerunt nomenclaturas. Ad hanc rem exaggerandam D. *Petrus*, coram miseris illis hominibus misere in errorem missis, utebatur subinde hac phrasi. *Tu bist ja nicht getauft auff des Gottlosen Papst Namen, oder einigen Paffens Namen*, & hoc admodum amarulenter faciebat, quo res tandem sit evasura, piis & doctis viris considerandum relinquo. Nunc ad ultimam propositi mei partem

tem venio. Mansi ego illa nocte apud Siburgenſes, qui religioſi Domicelli me perquam benigne tractaverunt, & ut te ipſorum nomine quam honorificentiffime ſalutare juſſerunt, & hoc a me haſtenus neglectum, quaefo ignoſcas. Sequenti vero die veni Coloniam, atque ibi inveni navem expans velis ad Duiffeldorpium properantem, quam ingreſſus domum feſtinavi, te & omnibus bonis amicis inſalutatis: Deus Opt. Max: te nobis diu incolumen conſervet. fac ut ſemel videam tua ſcripta. Si contingat te deſcendere, quaefo ne humiles meas lares contempnas. A°. 10. Novemb. CIO IO LXV.

EPISTOLA LXVII.

PEREGRINUS WILACH

Georgio Caſſandro.

DEcima tertia hujus menſis die mihi traditae ſunt literae tuae, vir mihi jugi obſervatione colende, quibus ſignificas, Tuam Dominationem mihi miſiſſe per *Ludovicum Rockelfingeri* filium literas una cum libello adverſus Anabaptiſtas emiſſo, quae quidem ad me nondum pervenerunt, ſed brevi pervenient. Deinde D. *Caſſander* me fraterna quadam objurgatiuncula perſtringit, quod tardior ſim ad ſcribendum, quam ipſe unquam exiſtimaveſſet, & hinc ego colligo meas literas non ſemper T. D. fuiſſe redditas. Quod ſcribis, ut, ſi quid habeam adverſus Anabaptiſtas tibi mittam; certe ego nonnulla ab ipſo M. *Petro* excepiſſem calamo, niſi ipſe dixiſſet, ſe ſua quae collegerat adverſus Anabaptiſticos furores, in lucem editurum, ſic factum eſt, ut ea de re tibi non multum ſcripſerim. Verum hîc praeterire non poſſum, quin paucis indicem, quae ipſe in ſuis collectaneis, contra Anabaptiſtas parvulorum Baptiſmum eſſe neceſſarium negantes, obſervaverit. Primo ipſorum omnia argumenta, quibus parvulorum Baptiſmum infirmare, vel potius tollere conantur, ordine ponit, deinde eorundem confutationem. Hîc ex illis quaerebat, ſi quid haberent in contrariam partem, in medium adferrent, ſe velle id quod dixiſſet adhuc multis aliis rationibus confirmare, quod & fecit, de quibus pauca in poſtremis meis literis ad T. D. miſſis. Interim illud inficiari non poſſum, multa in medio ab illo abducta, continuo quodam orationis contextu, quibus parvulorum Baptiſmum commendabat. Et e contrario contemptores hujus Sacramenti aeternae condemnationis reos agebat, qui Deum facerent mendacem, Chriſtum pedibus conculcarent, teſſeram novi foederis deſtruerent. Hanc formam obſervabat in reliquis articulis hîc ſubjectis, nempe de humanitate in Chriſto, de coena Domini, de reſurrectione, de Magiſtratu, quem dicebant Diabolicum: hic erit ordo & totius libelli ſcopus, cujus vidi bene magnum ſententiarum ex neotericis acervum. faxit, ut omnia in Chriſti gloriam, & multorum ſalutem cedant. Libellum Germanicum T. D. nondum eſſe reſtitutum, ſatis equidem mirari non poſſum, cum cujus ille, ſancte admodum promitteret, ſe ſtatim T. D. traditurum, ſi nondum tradidit, quaefo mittas puerum tuum ad illum, habitat ille juxta templum D. Martini minoris. Vale feliciter, in Chriſto Jeſu Salvatore noſtro. 27. Nov.

CIO IO LXV.

P p 2

EPI-

EPISTOLA LXVIII.

EUSTATHIUS A KNOBELSTORF

Georgio Cassandro suo S. D.

EXcipe Francigena missam regione salutem,
 O decus, ô Clarii gloria summa chori.
 Ut Lachesis fausto tibi stamina candida fuso
 Protrahat, est voti portio prima mei.
 Altera Cassandrum rapiant ne obliviam nostri,
 Flandriacas Paphio dum foveat igne nurus.
 Me licet immensis occludat Gallia septis,
 Inque peregrina commorer exul humo:
 Immemorem nunquam cernit me Sequana vestri,
 Sequana Castalia vix superandus aqua.
 Eustathium simili quo completaris amore,
 Hac te, si merear, conditione rogo.
 In Christi quantum pietas tua sudet ovili,
 Ad nos verorum nuntia fama tulit:
 Perge bonis avibus comitantibus, auspice Christo,
 Perge nigrum sacro sternere fuste gregem.
 Arripe scripturae fundas, tormenta, sagittas,
 In Goliathaeum projice saxa caput.
 Regia jam veteris trepidat ruitura Babelis,
 Extremumque sibi sentit adesse diem.
 Alter ut Atrides victricibus utere telis
 Parvo, ne dubita, tempore victor eris.
 Audiat hanc celebris saltem Germania laudem;
 Te patriae Brutum dixerit esse tuae,
 Ipse ego cum repetam clarum pietate Philippum,
 Cassandri feriet sydera pura fides.
 Qui patrio profugas demulcet in orbe Camoenas,
 Barbaricamque suo depulit imperio.
 Interea Musis dulcissima cura, Georgi
 Vive memor nostri, perpetuumque vale.

Cum haec ad te missurus eram, plane nihil habebam tua praestantia dignum, quod vel tu audire posses, vel ego affirmare auderem: Ecce novus, at plane mirus inter Gallos oritur rumor de rustici cujusdam visione; quae etiam si mihi a veritate alienissima videatur, tamen quoniam hîc a purpuratis regiis, & principibus aulae miro supercilio firmaretur, ejus te participem fieri volui, tum ut rumores, qui hîc sparguntur, scias, tum ut vanitatem hominum mire-
 ris.

ris. Fidem ejus rei nequaquam apud me esse velim, quoniam animadverto Gallorum ingenia foecundissima talium figmentorum esse, nec unquam nugandi finem facere. Sed ad somnium venio. Rustico cuidam ajunt, cum intentus suo operi esset, sese obtulisse adolescentem felicissima specie, ac ultra humanam quicquam prae se ferentem! niveis amictum, fulgorem formae repraesentantibus vestibus: quae cum rusticus admirabundus intueretur, ipse missum se, ut certa quaedam regi Gallorum nuntiaret, opus esse eo internuntio, ut statim relicto, quem colebat, agello in regiam (quae vicina erat) se reciperet, & commissam subiret legationem: additis verbis, quae regem scire voluit. Rusticus perculsus metu, se gnaviter effecturum respondit, iterumque videt evanescere puerum. Concussus igitur miraculo rei agricola de petenda aula cogitavit, quas tamen cogitationes facile illi extorsit conditionis suae reputatio, cum suam tenuitatem in consilium adhiberet, se & juvenem & rusticum, quibus sane in regiis aulis vix ulla habeatur fides; commissam igitur legationem omisit. Post aliquot dies, certo in loco versanti occurrit juvenis ille, graviter de neglecta provincia expostulans, interminatusque est illi dira, nisi quod se facturum recepisset efficeret. Hic rusticus videns cum periculo conjunctam esse dilationem, aulam petit, apparitores convenit, ad regem aditum poscit, habere se aliquid quod regem scire plurimum intersit. Exceptus est legatus ille plane aulico apparatu & more, primum ab omnibus risu, mox etiam a satellitibus regiis famulisque purpuratorum instar morionis foras protrusus, in terram prostratus, ac concussus, iterum colaphis bene mulctatus ex castro ejectus est. Interim Grammatophylaceo praefectum obambulantem conspicit, ad quem ilico volat, ac regem necessario sibi conveniendum constanti vultu testatur; qui cum hominis rustici pertinaciam in asseverando satis mirari non posset, secum in conclave hominem ductum percontatur, quidnam novarum rerum ferat. Rusticus apparitionem narrat. Verba, quae a Juvene accepit, obtinet, eo quod solum ea Regem scire oportere dixerit adolescens, jam bis sibi visus: quae cum praefectus grammatophylaceo audisset, credens hominem delirum, monitum non tam facile quibusvis accessum ad regem patere, dimisit. Paucis interjectis diebus redit Mercurius ille, vehementius etiam increpans negligentiam coloni, quod tam facile cesserit aulicorum injuriis, poenam illi denuntiat, nisi breviter legatione sua defungatur, proinde, clementiam suam quam severitatem experiri malit, hortatur. Colonus jam nullum locum neque socordiae neque ignaviae relictum videns, aulam repetit, mortem etiam se non recusare vociferans, modo regem conveniat: cinctus jam erat corona satellitum, qui forsan etiam inclementius excepturi erant hominem: cum commodum intervenit purpuratus ille, quem antea convenerat; cui provolutus ad pedes testabatur, se eadem & vidisse de-
nuo & audivisse; etiam cum mortis denuntiatione. Accessit quamprimum aulicus ille Regem, legatum, quem nuper adfuisse dixerat, rediisse, eademque constanter proclamare. Rex asservato diligenter homine, percontari in pago diligenter, unde oriundus erat, jussit conditionem hominis, quam cum satis

honestam audivisset, intromissus est ad Regem rusticus, ibique accepta in aurem profundit. Rex percussus tantarum rerum nuntio, rusticum custodiri iussit, ac interminatus graviter ne cuiquam communicaret ea, quae ad se adtulisset, ob quod nullum conscium allatorum ajunt esse, resque imprimis arduas. Habes, optime Cassander, fabulam totam, ex qua ne tragoedia aliqua oriatur plane vereor. Scis enim ipse quae interdum ex talibus apparitionibus orta sint, cum ad ea divinitus agi videantur. Tu de ea vero sentias, quod velis, me narrare authorem somnii istius esse noli. Vale, & haec, quaeso, boni consule: relegere non potui propter festinationem. Ex Lutetia, 15. Aprilis.

EPISTOLA LXIX.

JOANNES MURELLIUS

Georgio Cassandro.

Duisburgum.

I Amdiu teneor magno desiderio communicandi tecum consilia mea (pie & erudite vir) quemadmodum rerum mearum status & nostrae amicitiae ratio postulat; communicavi ante annos quinque rudimenta meae religionis: dixi institutum meum esse facere primum, quod videbatur esse primum officium meum, nimirum exuere opinionem illam apostoli papistici, quae de me habebatur, qua sciebam multos perire me authore, & contrariam sententiam persuadere. Hoc Dei beneficio absolutum est forte non ea, quam optabam, foelicitate, uberiori tamen, quam speraveram, certe laboribus longe majoribus, quam fuisset ferendo mea infirmitas; nisi manus Domini potens adfuisset in bello, quod adversum me tribus annis crudelissime gesserunt meus olim *Picardus*, *Lifetus*, *Mallardus* & omnes Sorbonicae bestiae, atque ipsa mors: donec armato in me rege, & apparatu longe majori, quam adversus homuncionem oportebat, precibus & fletibus piorum potius, quam mea sententia coactus sum in Angliam excedere octavo abhinc mense; ubi cum de te quid haberetur quaererem (quoniam in Gallia jamdiu ante nihil acceperam; nisi te Coloniae esse atque bene habere) intellexi, quanto studio religionem & gloriam Dei promoveres: quo nuncio (quanquam facile fuit persuaderi) a multis confirmato nihil potuit gratius mihi significari. turbata religione in Anglia cum cogitarem Genevam, statuebam Colonia iter facere, atque ibi te convenire: interim rogatus sum a fratribus, qui sunt Londini, ut Vesaliam venirem, & Ecclesiae exterorum praeessem minimum, donec alium commode possent substituere: obtemperavi & secutus sum eum, qui hinc ad hoc missus fuerat. Hic primum conveni concionatores, & exposui me eum esse, quem ut praeesset Ecclesiae exterorum Senatus jusserrat accersiri: nemo magnificentius laudavit nostrum institutum: Doctores & Ecclesias, quas nos imitamur, nemo plura nec majori significatione promisit in gratiam nostri atque tui (cujus se dicit studiosissimum, & ad hoc literas abs te habere, si quidam, quem *Flamminius* insti-

tue-

tuerat, huc veniret, quas jactabat se ostensurum Magistratui,) quam quidam *Hermannus* Hollandus, idque nudius tertius, cum apud nos caenaret: tamen heri pro concione dixisses furore correptum, tam seditiosa oratione usus est in nos. Senatum nondum sumus allocuti propter comitia, quae hodie cepta sunt haberi ad deligendum Magistratum: cum primum hîc aliquid erit in nostro negotio constitutum, vel contra statutum, ad te convolabo, ut diu desiderato tuo colloquio tandem potiar, interim cura ut valeas, precor Deum, ut te Ecclesiae suae diu servet incolumem. Vefaliae die 19. Februarii. *D. Cornelium* fratrem meum, charissimum laborum tuorum socium & adiutorem pii operis, opto meo nomine impense salutari.

EPISTOLA LXX.

PAULUS MANUTIUS ALDI, F.

*Joanni Cratoni S. D.**Viennam.*

Nihil minus placet quam ut, nulla proposita re, nulla certa sententia, ad te scribam. Occurrit enim mihi tua dignitas, occurrit autoritas. cogito, quam tibi personam tua virtus imponat, quae te premant onera, quae negotia distrahant. nimirum cum tuae scientiae, tuoque consilio salus & incolumitas commissa sit ejus Imperatoris, qui multa regna, multas provincias imperio, omnes virtutes animo complectitur, gravissimam Christianae Reipubl: partem sustines. Cur igitur ita sim ineptus, atque adeo tam adversus communibus commodis, ut inani te litterarum genere interpellem; & quem salutes illae curae detinent fixae, & locatae pro publica Majestate tuenda, ad privatae rei cogitationem ac studium vocem? Verum tamen quia nec res ipsa, ut ego interpretor, privatim ad me unum pertinet; sed aliqua ex parte cum publica utilitate conjungitur, & ex tuis litteris velle te mea causa multum, ex omnium sermone posse plurimum intelligo, male prorsus mereri videar de studiis meis, ac de me ipso, nisi opportunitatem istam nactus amoris, officiique tui, agam tecum de statu meo, quantum res ipsa postulat, & quantum mihi per humanitatem tuam licet, per quam licere video plurimum. Etsi enim jaceo, nec recenti, nec levi, sed inveterato jam, difficilique morbo: tamen si tu tantus vir ad me erigendum, ac recreandum accingeris; si istam scientiam, istam artem adhibes, quae saepe bonis viris in calamitate opem ac salutem attulit: cur dubitem, quin voluntatem atque industriam meam felicitas illa, utrique nostrum pariter exoptata, consequatur? quod si secus acciderit; suum tamen humanitas tua fructum non amittet. Ego enim quod volueris, conatusque sis, in tua laude ponam: quod non perfeceris, ad meam fortasse culpam, vel, ut aequius de me ipso sentiam, ad meam certe fortunam transferam. nam & praeclarus artifex perfectam animo speciem intruens, cum ipse nihil in arte possit, opus tamen imperfectum subjectae materiae-

riac vitio relinquit. Nec tamen is ego sum, cujus animum immoderata quaedam opum honorumve cupiditas angat. Habeo magnam gratiam naturae meae, quae me ad hanc insaniam nunquam impulit; majorem etiam iis viris, quorum praeceptis eruditus, ad hanc diem ita vixi, itaque posthac, ut spero vivam, ut neque summa cupiam, nec summa adeptis invideam. Sed quia virtus licet a se ipsa pendeat, externa tamen quaedam non recusat: propterea mediocritatem earum rerum, quae fortunae bona quidam vocant, nunquam contempsi, elaboravi etiam, ut consequerer: & plane me consecutum credidi, cum decem ab hinc annis Romam veni. Quis enim aliter crederet, cum a Pontifice maximo vocarer; cum hic vigere dicerentur, ac semper antea vigerent artes illae, quibus ab ineunte aetate meum studium dederam: cum ipsum denique nomen urbis Romae nihil tenue, nihil angustum; sed ampla, & magna polliceri omnia videretur? Hoc loco non faciam, ut aut de meis ipse meritis detrahā, quod certe non debeo: non enim commisi, ut meam in re mandata diligentiam, operam, fidem requirere quisquam jure possit; aut alios carpam, quod ab institutis meis longissime distat. tantum dicam, & id ipsum invitus: nescio quo fato mihi fontes aruisse, qui profluere solebant: benignitatem, quae antea patebat, ita clausam in me esse, non modo ut nihil ejusmodi, in quo vel copia, vel splendor inesset, sed ne mediocritas quidem illa, quae repellit incommoda, quae honestatem ex parte saltem aliqua tuetur, mihi adhuc obtigerit. Ac vide tamen aequitatem animi mei. Rei domesticae jacturam, quaecunque enim facile fero libenter dissimulo; do operam, ut obliviscar, quod antiquam colere frugalitatem, quod illam parvo contentam, omnium laudandarum artium parentem altricemque disciplinam retinere cogar, non irascor. & hanc ipsam fere crederem liberis meis non contemnendam haereditatem. At multa desunt. Ego deesse mihi quidquam nego, abesse multa confiteor. Quae tamen ipsa, ni fallor, ejusmodi sunt, ut si large suppetant, nihilo fiam melior; si absint penitus, aut si minima sint, sicuti sunt, nihilo deterior. Ergo, quod ad hanc jacturam attinet, tranquillo satis animo sum, illa me dies noctesque vexat, illa mihi penitus insidet, haeretque cura, quod si quem studia mea fructum ferre, siquid posteris industria mea prodesse poterit, id periisse totum, ac perire quotidie magis intelligo. Haec sunt mea detrimenta, optime Crato, atque utinam mea tantum essent: ferrem facilius, & quoquomodo quasi foverem, ac mollirem dolores meos: Nunc quum publico tamdiu commodo defuerim; quum jacere studia mea per annos decem, quum ingenium languere sim passus, quum denique fundamentis adolescentiae praeclare jactis, aetas gravior expectationi non responderit; id cum recordor, paene totus ipse mihi displiceo; & quanquam culpa vacem, me tamen culpa non libero; sed quasi communis causae desertorem accuso. Una relinquitur in amore tuo consolatio: & si nihil praestares aliud, hoc ipso tamen consolaris, quod aegritudini meae sociam se adjungat aegritudo tua, & dum tu aequae doles, atque ego, id efficis, ut ego non aequae doleam, atque soleo. Sed illa pars litterarum tuarum, in qua de *Maximiliani* Imperatoris admodum pro-

propensa ad liberales disciplinas voluntate significas; & addis, opem ab eo si petam, fore ne frustra petam, ea vero pars animo meo tanquam labanti, quidam quo confisteret, instillavit. Aliis alia rara sunt. Non eodem sensu; non eodem omnes ingenio natura finxit. ego quarum rerum illecebris capiuntur multi, ita pleraque non amo, ut averfer penitus ac fugiam; litteris pascor: his voluptatem nullam praefero, ac ne confero quidem: harum consuetudine nihil suavius experior, nihil dulcius. & quemadmodum si solem ex mundo Deus auferat, statim in hoc orbis terrae communi domicilio summus horror, summa sequatur incommoditas, sic adempto mihi litterarum usu, plena tenebris omnia, plena molestiis. Otium injucundum, negotium perdifficile videtur. O mi Crato, o mi, inquam, suavissime Crato; (jam enim audeo tua fretus facilitate, familiariter, ac plane blande tecum agere) Tunc is es, qui mihi me ipsum longo intervallo restituas? qui has aliquando tenebras tuo lumine expellas? cujus munere excolantur, & rursus florere incipiant studia mea? Confer huc, obsecro, opes tuas, quas intelligo esse maximas, ingenii, prudentiae, auctoritatis. Digna prorsus tuis officiis, digna tuo patrocinio causa est: nam si pro litteris agitur, cur humilis & obscura videatur? Si apud Imperatorem sapientissimum verae solidaeque gloriae cupidum, cur difficilis aut dubia? Merces autem recte factorum nulla praestantior, aut uberior, quam ut usuram vitae quam brevissimam aeterna nominis memoria compenset, posterisque tradita litterarum beneficio pulcherrimae virtutis effigies, amorem conciliet, laudandi voluntatem commoveat, imitandi studium excitet: praeclarum ducitur quam plurimis imperare mortalibus, gentes, nationesque subigere, dare leges, jura praescribere: haec magna videntur, & expetenda in primis. sed haec ipsa saepe motus temporum labefactat, saepe vis hominum convellit, saepe ad alienam fortuna potestatem transfert. urbes & oppida intereunt: vestigia vix apparent. nomina simul interire, & cum aspectu memoriam quoque tolli scriptorum virtus & industria non est passa: decet igitur, cum tu *Maximilianum* vehementer ames, cum illius gloriae maxime servias, id curare te in primis, quod maximum est amoris argumentum, & ad ejus gloriam maxime pertinet: bonis enim viris, quorum excludi numero me non arbitror, & ita doctrinarum in studio versantibus, non ut sibi tantum vivant, privata delectatione contenti, sed ut ingenii monumenta relinquere, & posteritati patere suam industriam velint, quae mihi semper studiorum ratio probata vehementer est; his tu si otium das, & qua vales apud Imperatorem gratia, conficis: vide quot bona consequantur: ipsum Imperatorem ornabis immortalis gloria: probitati & virtuti amissam prope dignitatem restitues: frueris tu quoque magna laude, quanquam te quidem hoc spectare non oportet; ad eam enim laudem, quam adeptus jam es, propemodum accedere nihil potest: sed tamen frueris eorum amore & observantia, quos tibi tua merita, tua benignitas adjunxerit. Equidem si hoc per te assequar, ut ex turbulento negotii genere emersus ad tranquillitatem perveniam; & quod reliquum vitae contigerit, in optato litterarum portu, interpellatore nullo, vacuus omni cu-

ra degam; nulla res erit tanta, quam non & me tibi debere confitear, & libenter tua causa suscipiam. Istam quidem virtutem, quae me a molestissimis occupationibus ad suavissimam quietem, & aptissima naturae meae studia traxerit, feram in oculis assidue, colam animo semper; fortasse etiam futuris gentibus ignotam esse non finam, vale. Romae idibus Juniis CIO IO LXX.

EPISTOLA LXXI.

O B E R T U S G I P H A N I U S

Josepbo Scaligero Philosophiae Professeri publico S. P.

Genevam.

ET si litteris illis ad me tuis (nam has ultimas a te accepi quatuor fere ab hinc mensibus) quibus cum de casu illo & invaletudine tua ad me scribebas, tum de Gellio an Agellio candide & prolixè respondebas, & plane satis faciebas: etsi igitur ex iis constantem tuam & perpetuam in me voluntatem & studium perspicue cognovi: cogor tamen jam denuo nonnihil de te conqueri, qui tanto intervallo nihil rescripseris, maxime ad illas ad te litteras meas, quibus hoc, ut ita dicam, litterarium officium deberi videretur: nam memini iis me ad te scribere de novo vitae meae genere, & de nuptiis, ad quas cum te occurrere non posse viderem, Musas certe tuas expectabam. Sed tu interea cur nihil plane rescripseris, qui ne Musas quidem tuas miseris, mirari desinam; postquam tuas litteras accepero, quas equidem ac illas simul expectabo. Superioribus diebus, quibus ad socerum migravi, dum libros & chartas scrutor, incido in litteras *Caroli Langii*, illius, qui olim officia Ciceronis emendavit: iis litteris; (quas abhinc sesquianno ad me dedit) scribit *Jacobum Susium* (est hic vir nobilis, & manuscriptorum librorum valde studiosus est, & mihi quoque notus) habere antiquissimum exemplar *Manilii Astrologi*, idque cum edito formis comparare. Sed se ita nosse *Susium*, ut vix putet nisi longo fortasse post intervallo eam rem perfectum iri. In eo autem Poëta, quia te illis litteris scripseras versari, & operam dare, ut emendatior brevi edatur: rem gratam me tibi facturum putavi, si illud ad te perscriberem: nam si ita voles, opera *Langii*, de quo tamen jam ex eo tempore nihil accepi, curare fortasse tibi potero, ut si non ipsum exemplar, saltem varietates scripturae habere possis. Qua de re quid me facere velis, facies me certiore. Non in hac re tantum, sed in omnibus aliis rebus, me tui cupidissimum, & qui tibi operam dare velit, paratissimum reperiens. Gratiam tibi habeo de Varrone, in quo eximiam operam praestitisse te existimo. Utinam nostra suppellex esset paullo plenior, unde & tibi & reliquis amicis accommodare liceat. Dabimus fortasse brevi in Institutiones juris quaedam, & Gellium nostrum, in quo cum alia quaedam me exercent, tum illud lib. III. cap. II. *Capella Homeri*, & maxime hoc *Quod ariete*. Scio *Hieronymum Magium* hîc voluisse quiddam mutare, sed aqua adhuc haeret, quod dici solet. praeterea miror quod est lib.

lib. 11. cap. 22. Etiam cum de *Hispanis Alpinis* scriberet, nam Hispani non sunt Alpini seu inalpini, sed Galli potius, & Strabo lib. iv. de hoc vento agens ad Gallos refert, prope a Massilia incolentes. De his si quid habes, rogo te ut communicates, & si qua fortasse alia in eo scriptore habebis a te observata. Vale, mi Scaliger, vir doctissime. Argentorati 7. Id. Febr. D. Bonifidio V. D. & humanissimo salutem a me dices quam officiosissime.

Scripta haec epistola videri potest circa annum 1578. nam & sub idem tempus scripta est epistola ad *Adrianum Mylium*, edita a D. Heinsio Centur. 1. Select. Ep. LVIII. ubi rumores de amoribus suis sparsos Argentorato scribit *Gifanius*, & de nuptiis *Alenconii* & *Elizabethae*, de quibus hoc tempore rumor erat, agit. In literarum fronte *Scaliger* Philosophiae Professor publicus vocatur, quem titulum gessisse, nondum reperi.

EPISTOLA LXXII.

O B E R T U S G I F A N I U S

Josepho Scaligero S.

Genevam.

MUltum tibi debeo, mi Scaliger, qui cum de me meaque valetudine tam fueris sollicitus, tum ea fere omnia, quae satis libere te rogaram, liberalissime promittas. De quo tuo in me studio & voluntate praeclara etsi nunquam dubitavi, per mihi tamen gratum & jucundum fuit hoc amplius, ut dici solet, ex tuis id litteris cognoscere, & his, velut tabulis obsignatis, aliis quoque probare: sed de valetudine; ea jam satis commoda utor. Tibi vero & reip. vestrae ipotius gratulor, quae te Philosophiae doctorem delegerit. in quo munere quam praeclare aliis satisfacias, scio: quicquid tu in litteris ad me tuis excuses. quare jam plene illa tantum, quae petii, reliqua de lege Dei a te expecto: Gelliana, postquam suppellectilem eris nactus. nam Catalecta simul erunt formis descripta, avidissime expectata mittes. De *Lambino* tibi assentior omnia eadem. Ollus jam leto datus est, in quem tamen quae paravi, propter monstrosam plane Monstroliensis hujus in me maledicentiam, proferre aliquando volo, & brevi fortasse. Audio te versari in explicandis Finibus bonorum Ciceronis, de quo ipso loco theses aliquot hîc confeci, de quibus in schola differatur. nam tametsi juris docendi munus mihi jam est mandatum, & in jure docendo jam satis sumus occupati: tamen politicis horam unam aut alteram etiam nunc tribuimus. mittam ad te exemplum thesium, si fortasse utiles tibi esse possint. In ipso Cicerone quae observavi, haec fere sunt: lib. 1. de finibus fere in fine. *Sed ad rem redeamus, de omnibus dici necesse est.* in vet. cod. quodam est *de hominibus*. quare fortasse ita rectius, *de hominibus dici necesse non est.* lib. 11. initio. *Ut quibusdam in formulis ea res agatur.* Turnebus & Lambinus, *qua de re agatur.* ego ne nimium mutem, ita: *Ea res agitur.* nam & haec formula veteribus erat usitata his notis *E. R. A.* teste Diacono de notis. *Quibus vinum diffusum, e pleno sit hirsiphon, ut ait Lucilius, cui nibildum sit jus & sarculos abstulerit.* in v. cod. *hirsifon.* Tu conjicies fortasse de-

fusum e pleno sit oenophoro, ut ait Lucilius, cui nîbîldum nîx & sacculus abstulerit. meministi de nivis & sacci usu in vino. Nam cum Academicis incerta luctatio est. in V. C. ut Pitheus mihi indicavit, est, uncta luctatio, satis conveniente metaphora: post, ubi de Pompejo: Esse enim quamvis vellet justus, iniquus poterat impune. vetus ille codex ita: esse enim quam vellet iniquus poterat impune. sic Plato χαλεπὸν γὰρ καὶ πολλὰ ἐπαίνεσθαι ἄξιον ἐν μεγάλῃ ἐξουσίᾳ & ἀδικεῖν γεόμενον διακρίως διαβιῶναι. & pulcherrime lib. vi. de legib. ubi de servis. Nonne melius est de his aliquid, quam tantis voluminibus de Themistocle loqui? idem ille codex, de Themista loqui? optime nam Themistam mulierem, Epicuream philosopham, valde celebrabant Epicurei. de hac Themista, Laertius, Clemens Alexand. Lactantius alii. de eadem & hîc Cicero, & ille in Pisonem ut Epicureum, accipiendus mihi videtur, etsi alii mutant, licet sis Themista sapientior. In quibus inest memoria rerum innumerabilium quaedam infinita. inest & hic videtur legendum. lib. iv. Jam ille sorites, quo nîbîl putatis esse vitiosius, haec verba, quo nîbîl p. e. v. videntur, ut spuria, inducenda. lib. v. Quae acerrime corripuisset. forte legendum concupivisset; & mox quem Tiberina dissensio, forte, descensio, & mox, quae ipsi egerint principia, puto legendum jecerint. Quae cum Zeno didicisset a nostris, ut in actionibus praescribi solet, de eadem re dixit alio modo. De hoc instituto Jurisconsultorum veterum Cicero lib. xi. i. epist. 27. Servio Sulpicio J. C. Et ut vos (inquit) in vestris formulis, sic ego in epistolis; de eadem re alio modo.

Vale. salutem D. Henrico Stephano, ad quem proxime scribam. Argentorato, postridie id. Decemb.

EPISTOLA LXXIII.

SIMEO BOSIUS

Josepho Scaligero Jul. Caesaris F. S.

Vellem propius a te abessem. frequens extaret testimonium amoris erga te mei: si quidem coalescit, ut censeres, amicitia crebra litterarum missione. Nunc quoniam longiore itineris intervallo diffiti fumus, rariusque ad vos nostrates commeant, quam ut, quoties volo, litteras dare possim; idcirco tamen nolim existimes, quicquam de pristino meo in te amore decessisse: Qui a pueris ortus, ita cum aetate maximo merito tuo crevit, ut ad ejus cumulum sperandum non sit amplius quicquam addi posse. Manilium tuum ne diutius nobis invideto. efficies hac opera diligentiaque tua, ut Astrologi Latine loqui tuo beneficio nunc primum discant. *Lipsii*, viri diligentis & eruditi Plautinam editionem tam cupide expecto, quam tu: poene dixi, *quam te*. Audivi enim ex rumore quodam, an ex aliorum litteris, te ad Marcham usque nostram, hoc est Lemonicum propediem excursurum. unde spem conce-

^{pe-}
I Fuisse videtur *Bosius* ejus sententiae, ut vitiosam hanc constructionem crederet. atqui vindicavimus eam ad *Quintil*: Declamat: cclxiii. & cccxxi. Cicer. ix. ad Art. 2. *me plus vidisse, quam se.*

peram fore, ut eadem ad nos inviseres. Quo ut venias, si commodo tuo fieri potest, te etiam atque etiam rogo. Me & benignum, & minime odiosum hospitem habebis. Notae meae in epistolas ad Atticum deficiunt jam sunt. tantum librarii, qui eas descripsit, menda tolluntur. Itaque brevi Lutetiam, ut edantur, eas mittere constitui. Nequicquam tamen, quod scribis, speras te re tam tenui beatum fore. Sat ipse hujus generis divitiis affluens, nisi forte *ἄψωσι κερύων*. Vale. Ratiasti Lemovicum viii. Kal. Decemb.

EPISTOLA LXXIV.

SIMEO BOSIUS

Josepho Scaligero Jul. Caesaris F. S.

Vix haec mea manu ad te; ita digitos *ἀρθεῖς* contraxerat. *Castaneo* oratori regio quam oportuit operam narraui. Amico mandaram, ut mihi Manilium tuum curaret, quem excusum putabam. Sed *Patissō* suam rem, non tuam gerit. expectandum igitur. De proceribus scholae Parisiensis quid anxium animum habes? nosti illud, *homine imperito nihil est injustius*. Perge ergo. Nam probis & eruditis viris *εἰς Σκαλανὸς μυρίοι*. Ego editioni epistolarum ad Atticum hinc incumbo. diligentem habeo typographum, ipseque *διωρ-θωπῆς* sum operarum. Sed juva Ciceronem, obsecro, quibusdam in locis, quibus mederi non potui. Facile vero poteris. *εἰς γὰρ οὐ τῶν πάλαι Ἀσκληπιαδῶν*. Epistola prima libri decimi, ubi vulgo legitur, *M. Antonii istud, quod scribis, non mihi videtur tam re esse triste, quam verbo*: pro *M. Antonii* veteres libri habent partim *Macum*, partim *Macom*. Latet, ni fallor, sub harum litterarum cortice vox quaedam Graeca, quae alteri illi, quam Cicero subjicit, *τῇ ἄλῃ* respondet. Ego *μοῖον* olim putabam, nunc *ἐπέχω*. Libro ultimo Epist. 15. pro *σεατήλαξ* *Lambinus* repugnantibus libris antiquis reposuit, aut potius supposuit *σεατηλάτης*. *Stratilax* vocatur servus quidam apud Plautum Truculento. Sed quae sit ejus nominis ratio mihi satis compertum non est: *Camerarius* ait, esse *ὑποκόρυμνα τῆ σεαπῶτα*. non probo: quid si *σεατήλαξ*? *ἀπὸ τῆ ἀλλάσσειν τὴ σεαπὸν*. Nam hoc nomine Cicero indicat Antonium. Is vero tunc omnes sui exercitus duces mutarat, ut refert Appianus. Haec, quaeso, mihi explica. magna profecto me cura liberabis. Tuto litteras dabis, si eas *Pictavium* mittes, ad *Albonetum* tabellarium, qui creberrime ad nos com meat. ad eam rem commode uteris opera *Bosselli*. saepius a me accepisses, ni valetudo obstitisset. Bene vale, & nos, ut soles, ama. Ratiasti Lemovicum v. Kal. Novemb.

EPISTOLA LXXV.

SIMEO BOSIUS

Josepbo Scaligero S.

DEcreveram ad te proficisci; jamque mihi equos inferni jufferam, ut te inviserem, cum subito mihi undique allati sunt nuntii, ita obsideri vias a grassatoribus, ut sine periculo vix quisquam, nisi magno stipatus latronum comitatu, ita milites ἀρχαϊκῶς vocare soleo, itineri se committeret. Itaque cum partim incredibili tui videndi desiderio raperer, partim itinerum periculo revocarer, tandem sic de tua erga me & alios familiares tuos, jam satis ab ineunte usque aetate perspecta, voluntate judicavi, malle te amicorum consuetudine perpetuo carere, quam si tua causa adversi quicquam eis accideret. Quocirca institutam illam profectionem meam in aliud tempus commodius forsitan, certe tutius distuli. Interim has ad te litteras exaravi, quibus coeptam quidem a teneris annis, sed longo tempore desitam, amicitiam renovarem, tibi ob praeclara ingenii tui, quae quotidie in lucem edis, monumenta tanquam litteratorum hujus aetatis principi gratularer, abs teque non veluti a λοξία, sed ut ab Aperta peterem variorum locorum ex epistolis ad Atticum, quae diu me torserunt, explicationem, Inprimisque horum verborum, quae extant lib. xiiii. epist. 39. *Libros mihi, de quibus antea scripsi, velim mittas* ἔσ' maxime Φαίδρου περὶ θεῶν ἔσ' παλιδος. Sic est in editione Victoriana: Antiquissimus vero meus codex ita edit postrema verba. ἔσ' maxime Φαίδρου περίων & ἐλλαδου. recte meo quidem judicio. Videtur enim significare Cicero librum Dicaearchi, quo genus illud scribendi, quo usus erat in Phaedro Plato, ut redundans & odiosum reprehendebatur. Quod indicat Laërtius, quum scribit Dicaearchum dialogum illum, ut Φορπικόν notasse. Itaque apud Ciceronem πὲ πέρωνα idem erunt atque τὰ Φορπικὰ, nisi tu aliter sentis. Nam quamvis eo significatu; ni fallor, alicubi scriptum legerim τὸ πέρωνον, nunc tamen locus non occurrit. Itaque aliquo exemplo, ex veteri quodam auctore deprompto, velim meam hanc opinionem juves. gratissimum certe mihi feceris, totamque illam emendationem meritissimo tibi acceptam feram. De postrema voce ἐλλάδος, nihil est quod dubitemus. Scripserat enim Dicaearchus librum περὶ ἐλλάδος, ut refert Suidas. Hunc nodum, mi Scaliger, Tuo Bosio solve. plura scribam, cum plus erit otii. Bene vale Pictavii iiii. Kal. Sext.

Tuas litteras *Bossellus* mihi reddendas curabit.

EPISTOLA LXXVI.

SIMEO BOSIUS

Josepho Scaligero Jul. Caesaris F. S.

Nihil mihi gratius, & acceptius tuis litteris, quibus legendis, fatigatus antea negotiorum molestiis, animus mihi visus est quodammodo con-
 quiescere: De loco Ciceroniano, lib. XIII. ad Att. 39. ut tecum non sentiam
 in causa est, quod eodem illo libro Cicero ab Attico alios libros petierat Di-
 caearchi, supressio, ut hîc, auctoris nomine, ut *τριπλίηνδον*, & *ἀναβάσεως*. In-
 stituerat enim illius exemplo scribere, aut ut ipse Cicero garrit, *ὑλλῆν πολι-
 πκὸν σύλλογον* Olympiae, aut ubi visum esset ipsi & Attico, ad eamque rem
 ei opus erat libris Dicaearchi, quibus valde delectabatur. Itaque *ἐλλάδῳ*
περίηγησιν five *περίπλουω* illius indicat; quem praeterea adversus dialo-
 gum Platonis *Φαῖδρον*, cum genus id scripti ut *Φορπικὸν* vituperaret, aliquid
 edidisse refert Laërtius. ut vox quoque *ᾤων* eo necessario referenda videat-
 ur; Sed quia id tibi minus probatur, amplius deliberabimus. Tanti enim
 iudicium tuum facio, quanti alius neminis. Illum autem Dicaearchi *ἐλλάδῳ*
περίπλουω, quem te habere scribis, ne litterarum studiosis invideto, a quibus
 magnam sane gratiam inibis, si eum quam primum in lucem emiseris. Notas
 tuas in Catullum, Tibullum, Propertium legi, quae minime meam de iis ex-
 pectationem fefellerunt. acute, docte, accurate omnia. Quamquam passerem
 aliter ac tu legebam, quam meam lectionem video veteri tuo exemplari valde
 confirmari. Sic enim ibi exaratum esse tradis,

*Et solatiolum sui doloris,**Credo ut, cum gravis acquiescet ardor,**Tecum ludere, sicut ipsa, possem.*

scribendum putabam

*Ei solatiolum sui doloris**Cedo, ut, cum gravis acquiescet ardor,**Tecum ludere, sicut ipsa, possim.*

Hanc tu lectionem si probas, utere tanquam tua: sin minus, Bosio redde,
 hoc est ei, qui, ut nec ingenio, ita neque conjectura multum valet. quo ma-
 gis ferenda tibi est ejus in hoc scriptorum genere audacia. Sed *ἄλλῃσιν* *προνδῆς*.
 Ad postremam epistolae tuae partem venio. Itane *Φιλέρημῳ* es, ut regiam
 fugias? Atqui doctis & probis viris, hoc est, tui similibus stipatos potius re-
 ges oportuit, quam *μυζοβαρβάρων* aut *θηλυδριῶν* satellitio. Sed tamen, ut ju-
 bes, de te apud Regem, quamquam inviti, silebunt amici; *ἑθυμίας*que
 istius tuae potius hoc tempore rationem habebunt, quam publicae utilitatis.
 Ego vero quae te velle, quaeque ad te pertinere arbitrabor, omni studio, dili-

gen-

1 In Ciceronis Epist. ad Attic. XIII. Ep. 31. & 32. est *καταβάσεως*. & ita legi debere, ex Ar-
 heneo constabit, notas doctorum virorum legentibus.

gentiaque curabo. agnoscis ἐπερογενῇ κατεκλεῖδα. Re tamen ipsa praestabo, ut me γνήσιον & αὐτοφύη amicum agnoscas. Bene Vale. Pictavii v. Id. Aug. resignarant tuas litteras πολοφύλακες. Itaque vide quid scribas.

EPISTOLA LXXVII.

SIMON FALCONIUS AURATUS

Medicus,

Josepho Scaligero S.

ITa me Deus amet (vir clarissime) si unquam in hoc regno litterario (cujus tu summus Imperator) tantam gloriam mihi arrogare speravi, ut non modo nomen meum sese auribus tuis inculcaret, aut ea scriberem, quae tu & legeres & probares: Sed & aureas illas litteras a te extorquerem, quibus me reique medicae studiosos omnes tibi devinctissimos habes. Ita magnam ignotis vocibus, multisque Joannis hujus Galeni locis lucem attulisti. Quorum omnium luculentam in litteris tuis explicationem dum saepius lego, atque oculis commedo, mihi nescio quo fato subblandiuntur ac delitias faciunt ea verba, quibus tu hunc laborem nostrum ut laudatissimum commendas, & meas esse aliquid censēs nugas, ut mihi ipse jam nunc serio atque ex fide tua eruditus videar. Atque eo tandem progressa est mea juvenilis Φιλαυτία, ut tibi ἀνταγορεύειν non dubitem, nempe ὁ πάραλλ' τῷ ἄρχοντι, ut Aristophanem emolliam. Quod enim tu de eo animali, quod τοιχοδεμόνα vocat, nempe ὑποκαάμπην esse Dioscoridis, id sane dum attentius lego, libri nostri scripturae videtur repugnare. Verum eo me rapit nominis tui autoritas, tantique apud me sunt momenti rationes illae, quibus innixus, ea scripsisti, ut in sententiam tuam pedibus descendere paratus forem, nisi subinde cogitassem te ex conjectura tantum egisse. Itaque mihi ipse succensebam, qui integrum authoris locum tibi non bona fide descripseram. Nam praeterquam quod περὶ ὑποκαάμπης inter calculosorum renum auxilia apud veteres medicinos authores ne gry quidem reperias, Galeni hujusce verba id liquido tibi persuadere possint. Cum ergo Nicolaus Alexandrinus τοιχοδαίμονα καὶ καρκίνους ποταμίους in illa re praecepisset, & ex eisdem medicamentum pararet author noster, etsi alia forma, quid esset τοιχοδεμόνον illustrare voluit. Hujus haec sunt. Ἐπαρον τὸ λεγόμενον τοιχοδεμόνα. παλίστειν γὰρ ἐνι μικρότερον, ἀκρόξανθον: καὶ περὶ πατεῖ εἰς τὰ κλαδία, καὶ

εἰς τὰς Φρακτας, καὶ εἰς τρύπας ἐνι γὰρ ἴσον καὶ μικρόν. βάλε δὲ αὐτὸ εἰς τρεῖς κάλιν μαδάριζέτο πρῶτον καὶ ἐξεντερίζετο, καὶ βάλε καὶ καβούρους ἀπὸ τῶ ποτάμῃ, καὶ κρασὶν, καὶ ἀσβερίσον. Quae animalculi descriptio & quam longe absit ab ὑποκαάμπης natura perspicuum est, & non multum ab ea, quam passeris trogloditis adferunt Paulus Aegineta & Aetius, recedere fortassis ipse concedas. Quorum ille, ἐστὶ δὲ σκουθίον ἀπάντων τῶν ὀρνέων τὸ σμικρότατον, πλὴν τῶ λεγομένου βασιλίσκου: μικρόν γὰρ ἐκείνου μόνου μᾶζον ἔστιν, καὶ περὶ σκουθίον αὐτῷ. χρεῖαν μεταξὺ

πεφροῦ καὶ χλωροῦ, λεωφόρον, ἐν πίοις μάλιστα καὶ φεγγμοῖς Δαιτόμενον. Addit Actius permulta alia, quae illis tuis de tyranno avicula maxime consonant. Cujus verba proferrem, si exemplar graecum ad manum esset. Quantum tamen ex latino Jani Cornarii intelligere licuit, a regulo differt troglodytes, quod & paulo major, nec in fronte habeat pennas auricolores, & garrulus magis exauditur. Quin & caudam subrectam habere punctis albis interstinctam, & plurimum hyeme apparere scribit: ut eam esse, quam tu asperis frigoribus venari solitus eras, non dubitem. Hanc saepissime per hyemem in parietibus hortorum & sepibus degentem, huc illuc sese brevi ac frequenti volatu inferentem conspeximus. Colore est admodum rufo obscuro: Quod ait Paulus, μεταξὺ πεφροῦ καὶ χλωροῦ, ut Aristoteles alicubi πεφροῦ καὶ πυρροῦ μέσιν. Quem colorem per τὸ ἀκρόξανθον vereor ne intelligat author noster. Hic nostri eam a garrulitate, quam in ipsa annotarunt Actius & Arabes, ex lusciniarum genere esse dictitant, parvamque lusciniam, seu agrestem vocant. Neque vero abs re ista minutius prosequi me putes velim, cum de hac avicula maximus vulgarium medicorum animis obversetur error, qui ex Arabum fontibus omnem suam doctrinam haurire soliti, cum apud Razem & Avicennam legissent aviculam hanc assidue caudam movere, eam esse existimarunt, quae *Motacilla* nonnullis dicitur, in quibusdam Galliae locis *Crolequeue*, unde caudam tremulam barbari, Graeci σεισπυγίδα καὶ κίγκλον vocant, a qua posteriore voce κίγκλιζον deducit Galenus comment. 1. In lib. de articulis. Quidam cum Jynge eandem faciunt: haec aquas confectatur cinerei quidem coloris, sed non varii: Atque hinc erroris causa: in parietibus enim & piscinis reperiri dixit Avicenna, fortasse & ipse deceptus. Nam cum ex Aetio ejus aviculae descriptionem suis infereret, pro eo, quod caudam subrectam habere dixit Aetius, caudam movere scripsit Avicenna. Quorum illud ut verissimum, ita hoc falsissimum est: Troglodytes enim & rufus est, & caudam subrectam tenet: σεισπυγίς vero caudam movet, & tota cinerea est, etsi ἵνυσα πικίλην τῇ τριχάσει esse dicant Pindari interpretes. Quod fortasse de troglodite intelligendum. Neque vero is sum, qui Graeculorum neotericorum more Arabas medicinae doctores nigro dente velim impetere, a quibus artem nostram plurimum illustratam esse scio, sed potius barbaros ipsorum interpretes, qui ea, quae non intellexerunt, depravarunt. Utinam autem tu Avicennam labore tuo & vigiliis dignum judicares, ac nobis latine loquentem exhiberes, cui familiaris est Arabicus sermo, ut & alii permulti. Hunc sane authorem neque Galeno minus elegantem, & optimis rationibus instructum visuros nos maximo viro, tibi quoque soli comparabili parenti tuo, lubens assentior. Sed ad rem. Non est ergo avicula illa, quae juxta aquas degens caudam assidue motat, eadem cum troglodite, quem in omnibus refert τριχόδεμον nostri authoris. Nam quod non sit ἰπποκράμπης praeter illa μαδάριζέτο, satis indicat, quod scribit περιπατεῖ εἰς τὰ κλαδία, καὶ εἰς τὰς φεγγαῖς, καὶ εἰς τρύπας. Quae quidem id denotant, quod ajunt Paulus & Actius, ἐν πίοις μάλιστα καὶ φεγγμοῖς Δαιτόμενον. τρύπαι enim sunt ἐν πίοις. Quin eadem esse videtur avis cum trochilo Aristote-

telis. Cujus haec sunt ex lib. 9. hist. anim. ὁ δὲ τροχίλος καὶ λόχμας καὶ τρώγλας οἰκεῖ. Atque ἀπὸ τῶν τρώγλων dicitur τρογλοδίτης. Hesichius autem τρώγλας exponit τρύπας. sane trogloditem apposite nostri (*roffignol creuset*) vocant, quod murorum foramina subeat. Ita fortasse *πιχόδεμον* ἀπὸ τῶν τοίχων. Alio hanc etiam nomine *σιλιπιπίδα* vocasse videtur Nicolaus Alexandrinus, unde & *pipisdam* Razi dictam comperio, fortassis a passerum voce, quos *πιπίζειν* Graeci dicunt. Neque mireris, quod hanc avem uri non jubeat Galenus hic, ut Nicolaus, cum apud Paulum, Aetium, & Arabas eam uftam, elixam, asfam, salitam exhiberi videre possis. Illud restat, quod tibi negotium facebat, ἐνὶ γὰρ ἴσων καρδὶ μικρόν. Sive enim καρδὶ sit καεῖδι, sive καεῖδιον; qua voce aut aviculae parvitas designetur, aut crabro, sive etiam regulus intelligatur, sive sit *καεῖδεον*, quae lutea est, omnino trogloditen esse mihi persuadeo. Haec sane prolixiori stylo tibi scribere libuit, (Vir undecumque lectissime) quod & in medicina faciunda non adeo exigui sint momenti, & si calculum addas tuum, non levis error vulgarium medicorum ostendatur, qui cinerem caudae tremulae (sic enim vocant) calculosis exhibent. Sin tu aliter sentias; non dubito quin verum sit. Te vero pro ea, qua polles, comitate a melioribus studiis paululum revocantem ne moleste feras, immo semper diligas, qui te admiror, suspicio, colo. Vale Aurati 15. Cal. Junias.

EPISTOLA LXXVIII.
ROBERTUS TITIUS

¹N.

Video me nunc tibi parum prodesse posse ad explendum desiderium Clarissimorum virorum *Occonis* & *Velferi*. nam & ego hujuscemodi antiquitatis monumenta nunquam admodum diligenter conquisivi, & video ab aliis exquisitissima diligentia in unum corpus fuisse collecta; ut nihil propemodum superesse credam, quod viros illos fefellerit. De pauculis illis inscriptionibus, quarum copiam tibi feci, haec breviter dicere habeo: Ea cujus initium *SP. MELIUS COPRIANUS*, dicitur extare Auximi. Vetus epigramma, cujus initium *Q. MURCIO SALAPIENI*, & spectabatur olim in agro Tiphernati, in loco, in quo villa Plinii nepotis fuisse creditur, haud ita longe a mea patria, erat in angulo domunculae rusticae, quae deinde vetustate corruit, & a domino in fornacem calcariam marmor conjectum fuit. inscriptionis copiam mihi fecit *Christophorus Rufus*, civis meus, vir apprimè eruditus; cujus libri excusi circumferuntur, ut te nosse censeo. Epigramma, cujus initium *PORCILLAE VESTINAE*, spectabatur in agro Aretino, via, quae Clusium ducit, procul ab urbe ad vi. lapidem. id ad patrem meum, harum literarum probe gnarum, misit olim *Hieronymus Magius*, vir insigniter eruditus, cujus plurimi libri formis aeneis impressi extant:

Epi-

¹ Haec epistola non ad *Gruterum* videtur scripta, (vide *Gruteri* Inscript. pag. MIXI.) sed cum *Grutero* communicata.

Epigramma, cujus initium D. M. A. *RUSTICUS*, & adhuc spectari dicitur in delubro, quod est ad ripam Metauri, non longe ab oppido, cui nomen Sant Angelo in vado; in ditione Urbinatium ducis. id a me olim descriptum misit *Accursius Columbinus* civis ejus oppidi, meus affinis. Alia Epigrammata descripta habeo in codice Epigrammatum antiquae Urbis, qui fuit ² *Benedicti Varchensis*, hominis pereruditi; cujus libri plures extant Etrusco idiomate scripti, diversis in locis impressi. Ad ea Epigrammata non erant adscripta locorum: in quibus reperirentur, nomina, nec de eis certius quicquam habeo. Haec praestantissimis viris *Occoni* & *Velfero* significare poteris, atque utrique meo nomine salutem dicere; id ut facias te etiam atque etiam rogo obtestorque. mittam ad te pulcherrimam inscriptionem, quae in Camertibus eruta fuit anno CIO IO XLIV. eam descriptam habeo in quodam codice, qui nunc mihi non succurrit, incidam in eum, cum minus speravero.

² An hic *Benedictus Varchi*, cujus Historia Florentina exstat? de quo egimus in praefat. ad Thesaur. Italic. tom. VIII. pag. 8.

EPISTOLA LXXIX.

FREDERICUS MORELLUS, FREDERICI F.

Josepho Scaligero.

INCIDIT in manus nostras, Josephe eruditissimorum humanissime, sphaera illa graeca vetus, quam in Manilianis tuis citas libenter, & emendas obiter. eam typis nostris regiis majoribus describere fert animus: quod eodem tempore *Buchanani* Scoti sphaeram Latinam, alio tamen ornatu poëtico expressam, excudere cogitem. Itaque oro te atque obsecro, pro perveteri illa magni *Julii Caesaris* patris tui *πλεῶν ἀνταξίς ἄλλων*, & singulari in Vascosanum avum meum maternum benevolentia, qua eadem te etiam nunc in me tui cupidissimum, non mei, sed *Cujacii*, *Puteani*, *Pithoei*, *Pincei*, *Petitii* causa, esse confido; ut tuas in Empedocleam illam sphaeram, (si Empedocli Agrigentino cum Demetrio Triclinio censes tribuendam) emendationes, vel ejus exemplar a te castigatum, & si quam ludens ejus versionem parasti, mittas ad me quamprimum. Itemque notas & animadversiones tuas in Lycophronis Cassandram Graecam & Latinam, quam veluti coactus a professoribus nostris regiis festinanter & indiligenter edidi. Illam, cuicunque est, ad te mitto. *Pisidæ κοσμοουργίαν* temere etiam & inepte a me conversam, & nonnulla alia, quae tibi non injucunda fore sperabam. Gregentianam quandam disputationem *περὶ τῆς πίστεως*, a Palladio Graece scriptam utraque lingua cudo. *Christiani Florentis* scriptis propediem incumbam. Tuus, vel noster potius, *Pincaeus* Senator, *Astreae* & *Philologiae* cultor assiduus, te salvere jubet, coram ex tua sponsonne salutare mallet. *Jonathae* nostri fidei fasciculum hunc commendavi, quo citius optatis fruerer. *Auratus ὑπάρ νεόταμ*, & *Ronsardus ὄναρ νεοθανῆς* hîc vivunt & valent: Vale, & feliciter vive *μυροπόλων ὅχ' ἄρειτε*. datum Lutetiae, Nonis Februarii. M. LXXXV.

Rr 2

EPI-

EPISTOLA LXXX.

FRED. SYLBURGIUS

Josepho Scaligero S. P. D.

Plures anni sunt, ex quo ut patrem tuum, ita te quoque, Clarissime Scaliger, ob praeclara in remp. merita, amo & veneror. Cujus meae erga te observantiae etsi aliqua privatim ac publice indicia exhibui, fuerunt tamen illa fortasse obscuriora, quam ut tibi innotuerint. Itaque missis ambagibus, recta via mihi aditum ad te patefaciendum existimavi, cujus cum se commodior non offerret ratio, eam arripui, quam res ipsa monstrare videbatur. Secutus ergo doctorum virorum exemplum, eum Aristotelis tomum, quem te maxime dignum putabam, tibi dedicavi. idque eo libentius feci, quia confido te, quae a me festinante animadversa non sunt, pro singulari eruditione ac judicio tuo correcturum esse, ac per nos cum universo literatorum coetu communicurum. Sed & haec spes accessit, fore ut perspecto instituto & studio nostro, nos in ceteris etiam tomis absolvendis pro virili adjuves, nec tua tantum nobis impertias, sed aliena etiam ab iis, qui tibi favent, impetres. Cum ergo tres nobis adhuc tomi supersint, Politica cum Oeconomicis, Historia animalium, & ultimus tomus, quo diversi argumenti opuscula continentur, rogo ad eorum expolitionem conferas quidquid vel ipse habes, vel ab aliis nancisci potes. quod beneficium si a te tuique amantibus obtinere potuerimus, efficiemus, ne vos contulisse poeniteat. Problematis Aristotelis addidimus etiam Alexandri & Cassii problemata. Hac aestate, si Deus conatus nostros fortunarit, Dionysium Halicarnasense expediemus: deinde vel Polybium, vel Biblia Graeca. Ad quorum editionem si quid contribuere volueris, magnam a nobis pariter & literatis omnibus gratiam inibis. Sed modum petitionis me excedere sentio, quare finem ei faciam, audaciaeque ac impudentiae culpam deprecabor, ad quam quia me ardens juvendae reip. studium impellit, spero te mihi facilius daturum veniam: praesertim cum tu in eodem exercitationis genere, sed feliciore cum successu & laude majore, verferis. Deus Opt. Max. in tam laudabili curriculo te magis ac magis incitet & prosperet. Vale, & si quid vicissim tibi gratificari possumus, mone ac jube. Salutant te *Wecheli* heredes, *Claudius Marnius*, & *Joannes Aubrius*.

Francofurdi in *Wecheli* aedibus 12. Apr. 1585.

EPISTOLA LXXXI.

FRED. SYLBURGIUS

Josepho Scaligero S.

Saepius ad te scripsissem, Scaliger praestantissime, nisi ex *Opusopoeo* nostro intellexissem, te in remotioribus secessibus nunc degere, ad quos amico-

rum

rum litteris vix tutus sit aditus. Nunc postquam e juvene quodam tui observantissimo cognovi, aliquam esse litterarum mittendarum occasionem, utendum ea putavi, atque in his negotiorum turbis qualemcumque exarandam epistolam. Ut ergo de studiis nostris pauca tecum colloquar, post Dionysium & Aristotelem aggressus sum Romanae historiae syntagma. Ejus primo tomo dedi scriptores Latinos minores, qui altius exorsi, Augustae historiae aut viam straverunt, aut partem ejus aliquam ad sua usque tempora brevi compendio deduxerunt: videlicet Fastos Capitolinos a Sigonio suppletos & commentario explanatos; cum ejusdem Sigonii libro De nominibus Romanorum; tum Messallam Corvinum, L. Florum, Vellejum Paterculum; Sextum Aurelium Victoris De Romanae gentis origine; De viris illustribus; De Imperatoribus; cum ejusdem Victoris Epitome: Sextum Rufum, seu Festum Rufum; Eutropium, Cassiodori & Jornandis ea, quae ad Rom. historiam pertinent. Altero tomo dedimus Caesaris historiae scriptores Latinos minores, Suetonium Tranquillum, Aelium Spartianum, Julium Capitolinum, Vulcatium Gallicanum, Aelium Lampridium, Trebellium Pollionem, Flavium Vopiscum, Ammianum Marcellinum; & ex recentioribus Pomponium Lactum ac Baptistam Egnatium. Ad horum expolitionem ut amici egregias contribuerunt symbolas, ita non dubito, quin tu quoque sis collaturus aliquid. quod ut facias rogo, & quodammodo reip. nomine postulo. Maxime autem ad tertii tomi perfectionem tua ope nobis opus est. is Graecis scriptoribus cum Latina versione dicatus est; nempe Fastis Graecis, Eutropii Graeco interpreti Hieronymo, Xiphilino, Herodiano, Zosimo. Quibus Olympiodori *ἐκλογαὶ* e Photio visum est subjungere. sed mallems tamen Olympiodorum integrum, si abs te illum aut ab amicis possemus impetrare. Rogo igitur ne nobis hac in parte desis, sed de tuis amicorumque scriniis communices quidquid huc pertinere videbitur. Quartus tomus Procopio & Agathiae fortassis assignabitur: quorum nobis ab amicis facta est expectatio. Sequetur hos *ἀπ' ἄλλης ἀρχῆς* Dio, & Polybius: ad quorum editionem ut ante aliquot annos quaedam nobis obtulisti, ita te nunc ejus promissi velim esse memorem; & quidem serio. Versionem Polybii a *Pompilio Amasaeo* interpolatam accipiemus ex Italia, cum aliis quibusdam ejus lucubrationibus: promiseruntque suppetias alias alii amici. Non diffido igitur, quin tu quoque tuas notationes nobis sis communicaturus, & ab amicis impetraturus, quae hanc ad rem conferre videbuntur. Id certe ut facias enixe contendo; ac plane mihi persuadeo, precibus meis apud te amicosque tuos aliquem futurum locum. Cujus voti si me compotem feceris, adnitar, ut te atque amicos collati in me beneficii non poeniteat. Porro quod attinet ad operis progressus, si Olympiodorus citius ad nos pervenire non possit, saltem primo vere ad nos mittendus fuerit. Dio & Polybius moram paulo longiorem ferre poterunt: quanquam sunt, qui Polybium valde urgeant. Haec tibi, Scaliger Clarissime, putavi significanda. tu pro indefesso erga remp. studio conatus nostros, quantum potes, & tua & amicorum ope adjuva. Vale quam felicissime. Francof. in Wecheliorem aedibus 23. Sept. 1588.

JACOBUS CHRISTMANNUS JOANNIS-BERGENSIS

Josepho Scaligero S. P.

Bituriges, in edibus Cujacii.

ANte annum, Vir Nobilissime, omnisque generis eruditione Clarissime, Studiosus Pomeranus, amicus noster, *Adrianus Borckius*, in Gallias abiit, excolendi ingenii causâ: cui rudimenta mea Arabica dederam, ut tibi ostenderet, & quid de illis sentiret, ad me rescriberet. Sed cum nullas ab eo hæcenus literas acceperim: malui in præsentia te ipsum compellare, & de Arabicis nonnulla proponere: quæ te in bonam partem accepturum, & sententiam tuam liberè mihi declaraturum, haud diffido. S. Lucæ Evangelistæ historiam Actorum Apostolicorum Arabicè conscriptam, conformavi in characteres Hebraeorum: iisdemque addidi puncta, prout Arabum & Hebraeorum fert analogia. Verbum de verbo Latinè expressi, Arabismos diligenter annotavi: ἀνάλυσιν inculcavi: omnes propemodum radices Arabicas, quæ in Actis Apostolicis inveniuntur, ad Hebraeas & Chaldaeas reduxi: quò videre liceat, quæ Linguae Arabicae sit proprietas, ejusque cum Hebraea & Chaldaea affinitas. Spero autem has meas lucubrationes brevi in lucem edendas. Codex Arabicus, ex quo ista primum descripsi, exstat in Bibliotheca Illustriss. Princ. Palatini Electoris, ad Rhenum, in urbe Heidelbergensium, (ubi etiam Professore linguae Hebraeae ago:) estque exaratus, ut ad calcem ejus habetur, anno Martyrum Sanctorum 990. his verbis Arabicis: وكان الفراغ من

هذا الكتاب في الثاني والعشرين من بابه سنة تسعين وتسع مائة
 للشهدا الايمرار *
 وكان اَلْفَرَاغُ مِنْ هَذَا الْكِتَابِ فِي الْاِثْنَيْنِ وَالْعِشْرِينَ مِنْ بَابِهِ سَنَةِ تِسْعِينَ وَتِسْعَ مِائَةٍ لِلْشَّهْدَا اَلْاَيْمَرَارِ /

Hoc est.

Et fuit finis de hoc scripto in secundo ٢٢٠٠ vicefimo ex Baba, anno nonagesimo ٩٩٠ novies centesimo Martyrum sanctorum. Hanc aeram quò intellexerim, tuis eruditissimis commentariis de emendatione temporum debeo: & integrum locum pag. 245. operis tui, ex relatione Reverendissimi Patriarchae Antiocheni, lucubrationibus meis pro commendanda antiquitate Codicis Arabici inserui: tui etiam faciens honorificam mentionem. Cùm verò constantes habeam rationes, quibus Characteres Arabum in Hebraeos sunt transfundendi: in nonnullis ego à te dissentio: ita autem D. Ignatium respondisse Arabicè colligo, وايضا انكم قد سالتهم عن تاريخ الشهدا المستعمل من القبط- ما هو وما هو سببه- تسميتهم فاعلم اننا مبدئي من السنة التاسعة عشر ملك ديوقايطيانوس القافر التي فيها زاد الاصطهاد عالي النصاري وامر بهدم كنائسهم وبقتل كل

כל מן מא ידכ לאסמא פאסדשד בחדא האר מאי ידכ מן
מומנין ואלה القبط. מאי וארבע ואربعין الق وسبعماية نفر من هذا اليوم
ידי تاريخ القبط. ويسمونه تاريخ الشهدا اي هولاي الدين اسفك
دمهم ديوقليطيانوس

Quae in literas & puncta Hebraeorum ita commutavi.

ואיצא אנכם קר שאלתם ען תאריח אלשהדא אלמשתעמל מן אלקבט כא הו וקא הו שגב תשמיתה בהדא
אלאשם ואעלם אנה מבדי מן אלשנה אלת אשעה עשר לכלך דיוקליטאנוש אלכאמר אלתי פיהא ואר אל
אצטקאר על אלנצארי ואמר בהדא כנאשקם ובקתל כל מן מא ידכ לאסמא ואשתשהד בהדא אלמאר
על ידה מן מומנין ואלה אלקבט כאי וארבעה וארבעין אלף ושבע מאה נפר ומן הדא אליום יבדי תאריח
אלקבט וישמונה תאריח אלשהדא אי הולא אלדן אשפך דמהם דיוקליטאנוש /

Latine hoc modo ad verbum transtuli.

*Etiam vos pridem quaesivistis de aera Martyrum usitata apud Kobtitas, quid
esset aut quae causa appellationis ipsius in hoc nomine: sed scito quod ipsa (sit) in-
coata ab anno nonodecimo regis Diocletiani impii, in quo auxit persecutionem ad-
versus Christianos edixitque destruere ecclesias ipsorum & interficere omnem, qui non
sacrificaret idolis ejus. Sic martyres facti sunt hoc edicto per manum ejus ex fide-
libus dioecesis Kobtitarum centum quatuorque & quadraginta millia, & septingenta
disperfa sunt. Quare ab hoc die incipit aera Kobtitarum, quam vocant aeram Mar-
tyrum, id est, eorum quorum sanguinem effudit Diocletianus. Ex quibus omni-*

bus perspicis me literas Arabum ش & س vel سي non aliter distinguere,

quàm Hebraei faciunt in discernenda ש à ש. Primò enim ex ductibus litera-
rum ש & س constat, eas ab Hebraeo Sin & Schin dimanasse: & per haec
eadem Hebraeorum elementa reddendas. Sed utrum sit S lene, & utrum S
durum video ambigi: *Guilielmus* enim *Postellus*, & qui eum sunt secuti, non
sine errore scripserunt, Characterem Arabem ش denotare S durum, hoc est,
respondere Schin Hebraeo: & س repraesentare S lene, hoc est Sin Hebraeo-

rum. Verùm hoc frivolum esse, ostendit collatio utriusque linguae: nam
quamplurima, quae Schin Hebraeum habent, Arabes per س scribunt, ut in
aera Actorum meorum سنة تسعين وتسع: Et in explicatione Ignatiana

والمستعمل سالعم &c. Annon absurdum fuerit, si illa per Samec o vertamus, hoc
modo סנה חסין ומס? Deinde multa sunt, quae apud Hebraeos Sin obtinent, &
apud Arabes ش, ut in superioribus allegatis locis عشر, شهدا, عشرين

quae si refundas ad Characteres Hebraeorum hoc modo עשר / שדא / עשרין prorsus
quadrata rotundis mutabis. Et si non diffitear, haec in omnibus non observa-
ri, sed in aliquibus confundi: ut Hebraicè scribitur שמש apud Arabes vero
شمس, hoc est שמש &c. At objicias forsitan, apud Arabes literam ش du-
riter legi, & س leniter: equidem probè id scio: fit autem hoc eo modo,

quo

quo apud Judaeos plerisque Character Hebraeorum ψ legitur *S*, & non *Sch*: neque tamen propterea sequitur, quòd ψ debeat mutari in *Samec* inter describendum. Exempli gratia, שלמה legunt plerique *Selomo* vel *Salomo*: cum tamen non sit scribendum שלמה vel סלמה. Ad lectionem autem Characteris Arabici ش quod

attinet respondeo, illam propriè Arabibus non duram esse, sed sibilantem: sicut ث *S* sibilans (cujus punctum supernum, transsumtum est, propter pronunciationis affinitatem, ad *Sin* Arabicum hoc modo ش) vel *Tau* Raphatum

Hebraeorum, Graecorum θ, designat. Si istes, quòd triangulare punctum $\ddot{\text{z}}$ vel $\ddot{\text{z}}$ infra vel supra literam positum, videatur habere vim durioris pronunciationis: ut si mensem باب (quem Graeci dixerunt παωφι) scribas

vel *Papa* legens pro *Baba*. Respondeo, supernum punctum triangulare, semper ejusdem esse naturae, hoc est, sibilum denotare, respondentem proximè ث seu *Tau* raphato: infra autem literam positum, & inverso modo $\ddot{\text{z}}$

designare privationem sibili, & fortiolem requirere literae prolationem. Inveni autem tale infernum punctum in litera *Beth*, ut *Baulus*, & in litera *Schin* ut שמע &c. Utut ergo *Beth* fortiter efferatur, tamen manet *Beth*, ut

figura ejus ostendit: sic licet Arabicum س nonnunquam leniter & per sibilum, nonnunquam fortiter enuncietur: tamen figura ejus ostendit, sumtum illud esse ex Hebraeo ψ , & in illud refundendum: nequaquam verò commutandum in *Samec* כ: Arabes enim vulgares non habent figuram literae *Samec* Hebraei: pro *Samec* tamen in numerorum notatione (quae prorsus Hebraicis literis secundum ordinem respondet) productius *Tsade* adhibent: sicut in quodam Astrolabio Arabico apud me videre licet. Itaque ei, qui volet characteres Arabum, in originales Hebraeorum refundere, spectandum est, quid figurae inter se utrinque communes fiant, quaeque utriusque linguae sit proprietas & cognatio. Si enim ex vernacula Arabum pronunciatione pendendum esset, utique ض per *Daleth* raphatum, غ per *Gimel*, &c. etiam esset reddendum, quo nihil foret absurdus, & à fontibus Hebraeis alienius. Sententia mea est, ut دس vel دس, vel دس

Arabum per ψ reddatur: vel saltem si typi Hebraei non habeant punctum dextrum vel sinistrum, ut exemplo Chaldaeorum ش Arabum vertatur loco *Sin* in *Samec*: hoc modo عشر, in עשר &c. Ubi enim apud Arabes viginti sunt dictiones, quae per ش scribuntur, fere sedecim earum respondent *Sin* vel *Samec* Hebraeo: & ubi apud Arabes sexcentae voces sunt, quae per دس, دس, دس scribuntur, ferè quingentae ex iis respondent Hebraico *Schin*. Haec me movent,

vent, cur in versione praedictarum literarum a te dissentiam: tu, Optime & Nobilissime vir, ignosces Academicæ *παιδεία*, & porro ut iudicium tuum ad me perscribas vehementer oro. Quod si feceris maximis me beneficiis obstrictum habebis, & me amicum certum experieris. Plautum tuum eruditi juvenes, & viri Clarissimi sollicitè expectant, & ut tandem promissa persolvas maxime rogant. D. *Franciscum Junium* Biturigem, hoc tempore collegam meum reverenter colendum, monui, ut occasione data de Arabicis quoque tecum conferret. Nobilissimum studiosum, D. *Adrianum Borckium*, quem supra nominavi: si tibi innotuit, meo nomine officiosissime saluta: eique, ubicunque degat, hasce adjunctas redde. Ad eum enim scripsi (modo Biturigibus adhuc haereat) ut me tibi commendaret, & responsum ad meas abs te peteret. Deus Opt. Max. te diu Reipub. literariae salvum & incolumem servet. Datæ Dominica Judica, ipsa nimirum die 28. Martii Anno 1585. stilo vet. Heidelbergae.

De hoc *Christmanno* vide quae diximus ad *Lipsii* Epist. CLVII. CCCXXVIII. CCCCLXXXI. Quia vero ignorabam, quid de argumento hujus epistolae judicandum esset, eam cum viro optimo, & doctissimo collega, *Johanne Heymanno*, Linguarum Orient. Professore, communicavi, qui ad eam haec, quae sequuntur, adnotavit.

Arabicum textum in literas Hebraeas transfundere, de quo agitur in hac Epistola, vanus est labor, & solis Judaeis inter Muslimos commorantes, ne scripta sua legant, utilis. Nam Hebraei habent 22. Arabes vero 28, vel juxta ipsorummet calculum, 29 literas, & si peculiares, quas praeterea habent Turcae ac Persae, jungant in vocibus exoticis literas, quod tamen rarissime fit, quatuor vel quinque amplius. Praeterea Hebraei habent 10. vocales, & si jungas vata cum *schevaim*, 15; Arabes vero tantum tres & nunnationem; transeo differentiam non exiguam in aliis punctis diacriticis; sic ut non tantum turbanda sit lectio & pronuntiatio, sed etiam multo difficilior evasura, praesertim etiam quia Arabes regulariter quaedam literas elegantissime connectunt, alias non, unde saepissime limites vocum in Arabica scriptura melius dignoscuntur, quam in Hebraea, ubi singulae literae separatim pinguntur, & quae terminant vocem cum voce sequente initialibus saepe per errorem jungi possunt.

Si tamen aliquis ita instituere vellet, is leges illius transfusionis non ex suo cerebro condere, sed ex Judaeorum inter Muhammedanos habitantium usu, (v. g. ex quodam pentateucho, vel ex Maim. Moreh Nevochim &c. quorum textus Arabice, scriptura Hebr. exstat in hac Bibliotheca) accipere deberet.

Author epistolae etiam multos errores admisit. 1. in transcriptione textus Arabici ex *J. Scaligero*, apud quem fere omnia sana sunt: tres voces omisit; duas cum omissione aut transpositione literarum foedavit, aliquot puncta diacritica, quae adesse debebant, neglexit, unicam vocem correctius scripsit, sed alias incorrectas reliquit &c. 2. In versione ejusdem textus voluit versionem *Scaligeri* emendare, sed infeliciter, praesertim ubi vocem *نفر* quam non intellexit, vertit per *dispersa sunt*, ac si fieret distinctio inter occisos & dispersos per persecutionem Diocletiani, cum tantum in t. Arabico interfectorum fiat mentio, & vox *نفر* non significet dispergere, sed tot homines vel personas, idque praesertim ex usu linguae Turcae, quam etiam videtur intellexisse *Scaliger*, sed non author Epistolae. 3. praeterea multa animadverti possent in seq. disputatione ejus de quibusdam vocibus & literis, quae aliter se habent in Hebraea, aliter in Arabica lingua; & de orthographia; in quibus se prodit inscitia authoris & animus admodum pronus ad subjugandam nobilissimam linguam Arabicam legibus linguae Hebraeae; sed ea haec pagella non fert.

EPISTOLA LXXXIII.

Q. SEPT. FLORENS CHRISTIANUS

J. Douzae a Noortwico S. D.

Leidam.

Heri tantum (hoc est sex integros menses, postquam scriptae sunt) tuas accepi literas, mi Douza, mittente Jo. Jossentio qui nunc Caesaroduni Turonum *Scaligerum* nostrum opperritur, ad vos merito iturientem, & quum has accipies, portum, ut spero, vestrum applicantem. Gratulor viro istam e Gallia nostra abitionem, & voveo felix iter, vobis vero planissime invideo bona tanta, quanta in hac copia eorum fruituri estis, quae propria nobis essent, si sciremus. sed bene, quod sub libera conditione Principem virum, & vere ἐλευθερον conduxistis. Nam & ex animi sententia istic morabitur, & regressum habebit liberum. Quanquam, si me audit, amabit vestros focos, quando in hac terra Gallia nullum operae suae dignum nactus est pretium. Vestrum erit causas morandi innectere, ut qui nunc vocatus, taedio ruentis patriae, & multa prece motus, Bataviam petit, vestra demum comitate & toleranti prudentia delinitus & victus, videatur ultro ambiturus. Neque vero miror fuisse apud vos genus hominum, qui *Scaligeri* erga vos propensum animum & simplicem voluntatem imminutum irent: etiam in his regionibus ii percrebuerant sermones, qui totum istud negotium pessum dare poterant. Nam de vobis Batavis ea circumferebant, quae certe scio ficta fuisse commenta invidiae & malignantis ἐχθρῶ. Quasi vero, ut *Lipsum* ureretis, *Scaligerum* tantum accersendum putaveritis. Imo neque hunc unquam in mente vestra sensum fuisse arbitror, & certum habeo neminem esse ex ista gente litterata, quem libentius videat, & de facie norit quam *Scaligerum Lipsius*, aut *Lipsum Scaliger*. Quicquid aggrediemur aut quoquo grassabimur, illiberale est & impium, gradum sibi facere ex aliena ruina, aut laetitiam ex dolore; neque cadit in humanitatis professores tam fera cogitatio. Vellem equidem aut *Lipsum* non praebitam, aut ab ipso non arreptam, discedendi a vobis occasionem, & haberetis δύο κοσμήτορες Μουσῶν. Non me latet posse non leves causas adferri, propter quas istud discidium factum sit, sed sic censeo, talium virorum amicitias non dirumpendas, sed (si necesse sit) diffuendas. Vidi his diebus ¹ Epistolam ipsius ad *Monavium*. Hui tantas turbas propterea? cui bono? quid vel le istos dicam, nisi in lente unguentum? Non dissimulabo tibi, quaedam in illo esse, quae multis etiam bonis viris suspicionem urgeant non constanter servatae, sed laesae Religionis Christianae, vel cum ait, *Deum sibi posthac colendum per vestigia majorum*. Id quamvis per se rectum est & laudandum (agnoscimus enim majores Apostolos) tamen non perinde ab omnibus aut intelligitur, aut accipietur. Neque ego probaverim scribentis animum, si hac cautione quaesivit famam deferendae Ecclesiae, ut nec legentis, si id immerito fu-

¹ Cent. II. Miscell. 98. & vide in hac Sylloge ad Epist. *Monavii* ad *Lipsum* cccxcv.

suspiceretur. Multi quidem in Gallia multum hac in parte peccavimus, sed metu mortis instantis, quam vis & Tyrannis praeferebant, neque sponte, sed, ut semel dicam, vitio humanitatis. Haec ego, mi Doufa, libere ad te & apud te scribo, non qui sim πολυπράγμων, sed ut omnes Batavi intelligatis mihi, laudis vestrae amantissimo, dolere hoc vobis deesse ornamentum, ac vere moneam (si quid monitoris eges tu) saepe bona a Deo data nobis excidere culpa nostra, praesertim si tale ingenium nobis sit, quod in juventae calore praecipiti vocat Horatius, *Amata relinquere pernix*. Caeterum magnam inivisti a me gratiam in literis tuis, quibus tam elegantes & amoris plenos ² elegos at-
texuisti, omnia dicta sive soluta sive vincta, recta semper sunt: omnino respondere elegantiae tuae non possum: erit tamen cum aliquando carmine te alloquar. Quam jacturam filiulae tuae fecisti aegre, ut debui, tuli. Quamquam mei mihi sufficiant dolores, ὥστε ἢ μὴ τὰ τῶν πέλας εἶναι, ut ait Sophocleus Neoptolemus. Tamen, ne tu hoc nescias, superat Dei gratia Claudius filius, qui cum defuncto fratre, velut equo funali, gratissima mihi erat συνωρίς. Hunc ego Neoptoleum & militiae nimium amantem, vix ac ne vix quidem persuasi, ut arma deponeret & Andegavum proficisceretur, ubi nunc meret sub Juris doctoribus otia scholastica, non sane quod armorum expertem ipsum velim, aut totum deponere Martis amorem (nam ea incidimus tempora, quibus vi geritur res) sed ut discat, reliquas omnes artes, vel belli vel pacis, ancillas esse sapientiae. Itaque eum opto esse ῥητῆρα λόγων πρακτικῶτατε ἔργων. utinam Deus mihi sospitet superstitem & spiritu suo dirigat, si tamen ille ipsum cum timore diligit. Qui ut domum tuam, uxorem & liberos tecum prosperassit eodem animo precor. ἔλεπε καὶ μέγα χαῖρε, θεὸς νυ τοὶ ὅλβια δοίη. Vale, Vindocini, Proprid. Kal. Majas ciccioxciii. Ego semper te ut Olorum Herodotus, μακαρίζω Ἵ Ὀπεκνίας propter filium Doufam, cui faveo ex animo.

² Credo intelligi Epistolam xv. inter Carmina Douzae pag. 437. editam.

EPISTOLA LXXXIV.

Q. SEPTI FLORENS CHRISTIANUS

Jano Doufae Nordowico.

Leidam.

SI sperassem eam fore Scaligeri nostri procrastinationem, ut hoc tantum Quintili se in procinctum daret, inhibuissem, mi Doufa, festinationem earum literarum, quas ad hunc Jossentium ante tres menses Caesarodunum missas, redditurus est tibi Tuningius. Praeterea alia dedissem in clientelam tuam literaria munera (quae in Musaeo nostro latent satis multa, utinam bona) typis a Raphelengio Plantinianis, si ita tibi visum esset, eliminanda. Nunc quum post diuturnam moram hac iter fecit Scaliger cum comitatu suo ita properanter, vix ut excusandae illi scriptioni, aut hanc exarandae tempus supersit a suavi colloquio, quo frui mihi datur cum veteri & magno amico; peto a te ut tu-

Sf 2

mul-

multuariam illam operam boni consulas, & augere me finas numerum eorum, qui te merito & amant & observant. Interim *Doufam* filium ex animo salvere jubeo. Perlegi attentius & cum cura, quae ad tres Poëtas erudita, & in illa aetate admiranda scripsit. Ea mihi saepius legenti magis ac magis adlubescunt, ut jure nexi obstrictum me jam teneat pro inscriptis meo nomini notis ad Propertium. Ita ille te patrem ingenio suo, & tu tali prole nos amicos beasti, imo omnes, quorum interest vacare Mulis. Vale, Vir Generose & inclyte, columnen ruentium litterarum, & ruina barbariae imminenti. Vindocini, Prid. Idus Quintiles 1593.

EPISTOLA LXXXV.

Q. SEPT. FLORENS CHRISTIANUS

Jano Donfae Filio.

Leidam.

ALiqua te existimo, Praestantissime Juvenum, intuentem in scriptis meis laudabilia, non solum ad amicitiae foedus mecum feriendum venire nunc, sed & quasi ad id cogendus sim, litterario munere verberatum me provocasse. Atqui, quamvis longe inferior opinione & praedicatione tua sit laus nostra, satisque nimis exigui, quod in me est, ingenii conscius, tamen currenti, quod ajunt, calcar addidisti. Qui jampridem parentem tuum nobilem, eruditum & optimum virum, quum in isto fere aetatis, qua tu nunc es, uterque essemus, coluerim & amaverim, huc me impellente proba, & Christiana virtute, atque adeo studiorum similitudine, nullum alium mihi proxenetam adhibendum censui ad istam paternae amicitiae ἐμφύτῳσιν: tantum Graeco versiculo admonitus πολλάκι καὶ Φιλίῳ λῦσ' ἀπροσηγορίῃ, nolui committere ut, hac iter faciente *Tuningio*, officium meum desideraret pater *Douza*, ad quem festino impetu ante annum scribens, recolendum putavi pristinum amorem. Tu vero dignus isto patre filius, & olim Dei virtute in majus nomen iturus, meminentis animi lenem illam significationem cumulasti ingenti, & vel omnem principalem sortem superante accessione, dum novellum, sed mirificum ingenii tui foetum, quem Propertii hortis adsevist, mihi consecrasti. De quo judicium meum vix feram ad aures tuas: apud alios id liberius fiet, & extra invidiam quaesitae gratiae. Hoc unum dicam, non solum admirari me, sed amare etiam quam nonnulli oderunt, *Teneris in annis praecocem sapientiam*. Interim cogitationi incumbam, qua te in simili munere redhostiam, & ex scriptis meis ornatum te velim. Habeo in schedis meis satis multa (bona sint tantum) quibus doctos amicos licet περισφονῆσαι. Quorum bonam partem per hos civicos motus muginatus sum, postquam aulicae & vanissimae nostris moribus vitae pertaesus ad me redii. Ea si elegantibus suis typis diligens & eruditus *Raphelengius* edere volet, non admodum pertendam, quandoquidem his temporibus bonis artibus Pacis (inter quas Typographia non postrema) frui non possum, & vetus Proverbium tollimus, *Ipsi sitiunt Fontes*. Vale, mi Doufa, & quod videor semper repositurus, me ama. Vindocini proprid. Kal. Majas 1593.

EPI-

EPISTOLA LXXXVI.

CUNRADUS RITTERSHUSIUS

*Josepho Scaligero S. D.**Leidam.*

SI vel exemplo careret hoc factum meum, quo nunc ad te, Vir Clarissime, tibi ignotus atque invisus scribo, vel si mihi dubia esset humanitas & facilitas illa tua, qua uti soles erga omnes, qui adamarunt ea studia vel universa, vel eorum aliqua, in quibus tu ita excellis, ut familiam ducere hac tempestate ab omnibus eruditis tuo jure existimeris: facerem pluribus, ut tibi me excusarem. Nunc cum & bonorum exemplum habeam, quo exemplo licere mihi puto idem facere, quod illi factitarunt, & tuae humanitatis, cum summa eruditione & virtute conjunctae, fama ubique decantatissima jam olim me quoque bona spe implevit, fore, ut si vel coram vel per literas tecum de rebus ad studia literarum pertinentibus aliquando forte agerem, libenter me ad colloquium admissurus patienterque auditurus esses: non utar jam prolixiore oratione, qua me tibi insinuem, teque mihi conciliem. Tantum peto abs te, ut quid velim, paucis, nisi quid te detinet, audias. Jam diu fit, cum de Oppiani Cynegeticis & Halieuticis (Ixeutica enim nullo sumptu, nullo labore, ne quidem ex ipsa studiorum parente Italia, eruere potui, ac frustra id semel iterumque tentavi) denuo edendis, & ad publicam studiosorum utilitatem illustrandis cogitavi. Cum enim in hunc poëtam (nosti quantum & qualem) primo inter Saxones meos admodum etiam adolescens incidissem; ita illum ardentem amare coepi, ut quicquid mihi a studiis Juris civilis, quibus me patris voluntas & imperium destinarat, otii concedebatur, id post Homerum & Virgilium in nullo Poëta alio, quam Oppiano conterere mallet. Accesserunt postea tot tantaque judicia, quae de eo fecit pater tuus, ὁ μακαρίτης καὶ δαμόνιος ἐκείνῳ. Ea me in sententia confirmarunt plurimum, & hunc auctorem etiam carissimo cariorum mihi fecerunt: Videbam enim, nullum ex Graecis poëtis majoribus ac pluribus laudibus cumulari, quam hunc nostrum: quem passim in suis scriptis nunc Musarum alumnum prudentissimum vocat, ejusque versus tum pios, tum pulcerrimos, tum divinos, tum luculentissimos, tum aureos, tum Maronianos, si cujusquam Graecorum: nunc candidissimum atque magniloquentissimum, nec vulgari eruditione: nunc adeo sublimem inter Graecos, adeo numerosum, ut eorum unus ad Virgilianam diligentiam aspirasse videatur: quicum Graecorum neminem ausis comparare: cujus unius spiritu Virgilianam divinitatem repraesentatam semper judicavit: nunc magnum poëtam, (quod saepe a se dictum sit) nunc maximum atque elegantissimum appellat: nunc absolutissimum Graecorum, qui nitidissimo carmine rem oculis subjiciat sine strepitu: quo nemo omnium frequentius usus sit comparationibus, in quibus & venustas, & robur & candor & efficacia sit: nunc denique ipsum poëtis annumerat Ethicis, Naturalibus, Theologis. Ἀλλὰ

τί πὲρ τὰδε πάντα λέγω Φρονέοντι καὶ αὐτῷ; Tentavi itaque, num possem huic tanto poëtae meis quibusdam Scholiis aliquid lucis afferre, unde simul honestam adolescentiae meae commendationem ducerem. Successit belle sub manus negotium, ut ait Plautus. Confeci enim mediocre corpus Commentariorum, tam in Cynegetica, quam in Halieutica: necdum audiveram aut videram quidquam eorum, quae in Cynegeticῶν libros scripta sunt a *Joanne Brodae* & *Bodino*, duobus literarum in Gallia vestra luminibus. Sed me meorum ne tum quidem poenituit, cum ea contulissem cum illorum Cl. Virorum lucubrationibus, quas tandem meis confectis nactus sum. Halieutica autem nemo, quod sciam, attigit, praeter *Laurentium Lippium*, qui ἐμμέτρως Latina ea fecit, commentariis autem illustravit nullis. Nostra igitur saepe approbantibus, & me excitantibus σπύδοντα καὶ αὐτὸν, doctissimis quibusdam Germaniae nostrae viris, praelo tandem adornavi Anno 1587. ac sequente ad *Henricum Stephanum* misi, petentem & editionem ultro pollicentem. Verum quia ille ratione usque ad nundinas superioris auctumni (hoc est sex annos ipsos) me distulerit, meaque omnia suppresserit, & quomodo ego ea tandem singulari ope ac beneficio immortalis *Isaaci Casauboni* recuperarim tanquam ex orci faucibus, hîc tibi non commemorabo, sed scire cupientem remittam ad ea, quae super his *Francisco Raphelengio* vestro scripsi: cui & epistolam *Casauboni* ad me & Epigrammata duo amicorum meorum misi, *D. Posthii* inquam & *Bersmani*. Is tecum haec communicabit. Cum autem nondum abjecerim hujus editionis voluntatem, de alio Typographo, μάλλον ἀξίόχρεω τε καὶ ἀξιόπιστῳ, cogitanti venit mihi in mentem cum *D. Raphelengio* agere. Itaque ad eum scripsi voluntatem hominis explorabundus: de qua quam primum me certior fecerit, mea ipsi mittam. Quod si, uti spero, conditionem acceperit: peto a te, ut huic instituto nostro faveas, non solum ἔνθημα φωνῶν, sed etiam adjuvans aliquando *Raphelengium*, virum quamvis per se diligentissimum & doctissimum, quo ornatior atque accuratior tandem Oppianus noster exeat. Sed & illud te rogo, ac, si necesse est, etiam oro, ut Epigrammate aliquo hanc editionem nostram exornatum eas: quod ego summi beneficii loco habebō. Idem per te a *Bonaventura Vulcanio* quoque peto & contendo: cui, si pateris, hanc epistolam tecum cupio esse communem. Non enim succurrebat mihi in praesentia peculiaris ad ipsum scriptionis argumentum, neque otium satis erat: cum quidem in notitiam viri, quem de quibusdam optimae notae scriptis aestimo & colo animo meo, jamdiu gestiam pervenire. Valete, & si vobis facinus nimis audax fecisse videbar ad vos scribens ignotus, quae-so date mihi veniam, & a fiducia vestrae humanitatis hanc audaciam profectam existimate. Iterum valete,

Ἐξοχα δὴ κεφαλῇ, πεφιλημένα ἐννέα Μούσαις.

Altorpîi in Academia Norimbergensium, a. d. 28. Martii A. 1595.

Placuit tibi mittere Clariss. Collegae & amici mei conjunctissimi *D. Scipionis Gentilis* Epigramma in Jesuitas, a Christianissimo Rege e Gallia proscriptos, quod

is

is nuper faciebat, cum Arrestum Parlamenti Parisiensis & Philippica ¹ *Ant. Arnaldi* J. C. ad nos allata essent.

¹ Intelligit libellum, cui titulus, *Plaidoie d'Antoine Arnauld, Avocat en Parlement, pour l' Université de Paris contre les Jesuites*. 1594. de quo vide *Le Long* Biblioth. Histor. num. 16858. Pater fuit celeberrimi *Ant. Arnaldi*, doctoris Sorbonii & Jansenistarum Coryphaei. vide de eo *Baylii* Lexic. T. I. p. 334.

EPISTOLA LXXXVII.

CUNRADUS RITTERSHUSIUS

Josepho Scaligero S. D.

Leidam.

Vide vero hujus hominis audaciam, Illustris Scaliger, qui tibi suis literis iterum obstrepere non veretur. An non semel verecundiae fines transgredi satis fuerat, dum ad tantum virum ultro ignotus, invisus, scripsi? Ac sane ipsum me silentium tuum detertere poterat ab omni ulteriore scriptione, nisi ex *Fr. Raphelengii* optimi & doctissimi viri literis unis & alteris intellexissem, meas te & comiter accepisse, & favere cum ceteris studiis meis, tum instituto de renovanda Oppiani editione. Pro hac igitur erga me benevolentia, proque consilio & ope, quibus Typographo illi meo adfuiisti, gratias tibi nullas agere, mihi religio fuit. Hinc igitur istae nascuntur literae: quibus simul etiam amico meo, atque ut ipse modestè & benigne profiteri amat, discipulo opera a me datur. *Caspar Schoppius* est, adolescens ingeniosus & acutus: qui hac aestate novum opusculum Criticum edidit titulo *Verisimilium*. Eum librum tibi, Illustris Scaliger, ipsius nomine mitto, quod quidem ipse facturus fuerat, ni peregre abesset. Rogo autem tuam praestantiam, ut efflorescenti hominis indoli tu quoque favere velis, quem ego cognovi admiratorem virtutis & eruditionis tuae incomparabilis multo maximum, quique jam nunc in hoc aetatis lubrico ad omnem virtutis laudem, decusque literarium ex summis opibus connititur. Cujus rei argumenta minime obscura in hoc ipso libello, ni fallor, animadvertere licebit. Quod si hîc mei quoque nominis laudes aequo majores videris, illud velim cogites:

Πολλάκις ἐὰν ὅτ' ἔρωτι τὰ μικρὰ μέγιστα πέφανται,

ut liceat mihi Throcritum παραδῆσαι. Ipse autem me vehementer amat. Meae erga te observantiae summae pignus capias licet a *Fr. Raphelengio* nostro, cum erit absolutus Oppianus noster. Cujus editio ut sit ipsi quam lucrosissima & fructuosissima, opto. Erit autem, si liber sit vendibilis. Et erit vendibilis, si a te tuique similibus doctis ac bonis viris juventuti studiosae commendetur. Quod ut facias saepe, idque non solum, ut dixi, utilitati typographi, cui ex animo factum volo, verum etiam honori meo tribuas, etiam atque etiam a te peto. Erit enim mihi tanto majori laudi ista editio, quanto in plurium manus liber pervenerit. Meae quidem Commentariunculae (quibus multa μετὰχειώδη inesse ipse agnosco, ut quae ante complures annos a me scriptae sint) quamvis tan-

tanti non sint, ut vestram, majorum gentium Criticorum (dico *Scaligeros*, *Douſas*, *Lipſios*, *Giphanios*, *Cafaubonos*, *Vulcanios*, *Merulas*, alios de genere isto) approbationem promereri, aut acerrimi iudicii limam sustinere possint: tamen conatus iste adjuvandi studia adolescentiae, cui a me potissimum haec opera dabatur, aliqua in laude ponendus videtur. Quod ut facias, meisque studiis favere pergas, iterum te majorem in modum rogo. Vale, vir Illustris, & Salve. Altorphii in Acad. Norimbergens. Prid. Kal. Septemb. An. MDXCVI.

EPISTOLA LXXXVIII.

CUNRADUS RITTERSHUSIUS

Josepbo Scaligero S. D.

Leidam.

QUaerebas ex me postremis litteris tuis, *Josephe Scaliger*, vir Illustrissime, quid in studiis optimarum artium novi parem. Scire enim te ajebas, me semper novi aliquid parturire; nunquam feriari solere. O humanitatem benignitatemque incredibilem! Tene in tanta excelsitate tua etiam ad meam humilitatem respicere? neque id obiter aut perfunctorie, sed ita ut de studiis quoque meis tam & quaeras benevole, & iudices benigne. Ergo cum tantae benevolentiae non respondere nimis agreste & barbarum foret, sic de me velim habeas. Ea quidem ingenii felicitas, quam tu, alios ex te aestimans, mihi tribuere videris, a natura mihi non contigit, novi quippiam ut parere possem, in tanto praesertim eruditae doctrinae proventu, tantaque ingeniorum copia, quae pene omnia jam occuparunt: *νῦν δ' ὅτε πάντα δέδασαι*, ut conqueritur Chaerilus. Mihi itaque semper in mentem est Pindaricum illud: *πολλὰ γὰρ πολλὰ λέλεκται: νεαροὶ δ' ἐξευρόντι δόμεναι βασάνω ἐς ἔλεγχον, ἅπας κίνδυνον*. Tua tuique similitum, quibus mens altior & diviniore a propitio numine concessa est, haec est provincia, novi aliquid & antea ignorabile in lucem proferre, quo nomine omnes vobis debere fateamur, vestro magisterio facti doctiores. Quid autem nobis relictum est, qui non quidem averſa a Musis pectora gestamus, sed non ex supremis tamen illarum mystis sumus? Nimirum hoc, primum ut velut humi reptantes vos tanquam aquilas in nubibus suspiciamus, & quantum nobis conceditur, acie oculorum vos sequamur: Deinde, ut quae vel ab antiquis sapientibus ad nos transmissa, vel a vobis adinventae, aut ex parietinis oblivionis & ignorantiae tenebris eruta sunt, atque in posterum adinvenientur aut eruentur, diligentia nostra custodiamus & conservemus. Nam & in re familiari scimus esse non tantum, qui quaerat & compararet foris; quae ad familiam sustentandam pertinent, patrem familias, verum etiam, quae parta foris ab illo accipiat & domi servet tueaturque, matrem familias. Atque ut illi laus praestantiae merito conceditur, ita huic diligentiae relinquatur, qua multas contineri virtutes testis est Tullius. Hoc ego animo & consilio jam ab aliquot annis studiosae juventuti, quae se in meam familia-

ritatem contulit, auctor esse consuevi, ut optimorum auctorum lectionem ament, eorumque eruditione animos implere studeant: neque in Latinis solum sese deditos esse velint, quod plerique vulgo satis habent, (si tamen & hos cognoscant) verum etiam Graecos fontes adeant, a quibus ne ipsi quidem Latini dissimulant sua se pleraque hausisse, & si inficias ire vellent, facile convinci possent: planeque studiosis meis conor persuadere, frustra esse, qui sibi se doctrinam solidam sperent comparare posse absque Graecitate, neque Latinae linguae absque Graeca perfectam esse cognitionem. Non solum enim res & sententias plerasque omnes Latini a Graecis sunt mutuati; sed etiam bona pars verborum Latinorum inde ex Graecia promanavit in Latium: Quod tibi quidem minime est obscurum, qui quidquid uspiam est linguarum & traducem earum cognationemque nosti, tanquam unguis digitosque tuos, aliosque ad Varronem & Festum plurima id genus docuisti: sed propter eos, quibus id fortasse per suam imperitiam aut contradicendi libidinem incredibile dictu videri solet, cogito aliquanto proprio atque ad id destinato tractatu planum facere. Ita alias quidem in Euripide, philosopho illo scenico, alias in Aristophane, Comicorum festivissimo, diligentia nostra fuit versata. Superiore vero autumno & hieme amicis quibusdam, eruditae doctrinae sitientissimis, rogantibus accommodavi operam meam in omnis eruditionis parente Homero, familiari expositione post sumptum cibum interpretando, quantum quidem per alias occupationes, quae me subinde distrahebant, mihi concedebatur. Ea res occasionem mihi praebuit colligendi quaedam, quibus omnes libri pleni sunt, de hoc summo vate encomia, elogia & testimonia variorum: unde nimirum & studiosi illi mei, & alii fortassis, si qui praeterea haec legerent, tanto plenius cognoscerent, quid sibi de Homerica lectione sentiendum expectandumque foret. Adjunxi autem & Periochas Aufonianas in Iliadem & Odyssaeam, ex quibus nonnulla errata, qua lectionum, qua distinctionum sustuli, quae in tua illa omnium alioquin optima editione, aliisque quotquot vidi, resederant hactenus: non quod illa tu aliive viri doctissimi animadvertere non potueritis, (hanc enim ego laudem acuminis mihi non arrogo, ut aliquid videre potuerim, quod vestram animadversionem, ubi eam adhibere voluissetis, subterfugerit) sed quod vobis ad alia difficiliora properantibus forte relicta sint. Ita factum quod est in proverbio, ut claudus viator certiora omnia retulerit. Quod si qui putabunt, rem me fecisse alienam professionis meae, quae me in jure civili versari jubet: ii sciant, habere me veterum Jurisconsultorum exempla: ut Sabini, Cassii, Proculi, Julii Pauli, Aelii Marciani, Ulpiani, Papiniani, Sexti Caecilii, Gaji, Claudii Saturnini, Herennii Modestini, & aliorum (at quantum virorum!) quos cum in illa luce reipublicae, quam consiliis suis ut veri politici gubernabant, non puduerit, lectitandis hujus summi & praecipui poetarum scriptis assiduam operam impendere, adeoque testimoniis ejus uti, vel ad exornandos libros suos, vel ad juris controversias nonnunquam decidendas: quid nos facere aequum est homines Scholasticos? qui licet nobis sat occupati videmur, tamen otio abundare diceimur, ad prisca illa lumina compara-

ti, quibus tota vita in gravissimis negotiis consumpta fuit, & tamen Homeri lectioni vacare potuerunt. Sutelarios autem nunnullos (quos illud nunquam fatis tibi, Scaliger, laudatum Glossarium διερρηάφης vocat) quid moremur? quorum sententia, existimantium, perfecti & absoluti Jurisconsulti nomen tueri non posse, qui non omnem elegantiolem doctrinam & cultum humanitatis a se procul spreverit segregaveritque, & de industria quasi inquinata & sentiat & loquatur, jam pridem ab aliis, quibus sanum est sinciput, explosa est. Mihi quidem saepe mirari subit illos, qui cum alias semper crepent Justinianum, tamen non meminerint pulcerrimi illius Elogii, quo ab eo Imperatore Homerus afficitur, dum patrem omnis virtutis appellat. Et si autem apud multos etiam eorum, qui se volunt esse ex melioribus, haec talia fere contemni & indies minoris minorisque fieri videmus: mihi tamen stat sententia, stabitque quoad vixero, ab hoc studiorum genere non plane discedere, sed levamentum ac solatium petere aliarum curarum, & grata hac varietate distinguere severiora studia, eorumque velut senium depellere. Valde enim mihi semper fuit probatum illud Εὐριπίδειν: ἔπαισμαι πὰς χάριτας Μῆσις συγκαταμιγνὺς ἡδίσταν συζῆαν: nec minus illud Theocriticum:

— — — — — τὶ γὰρ χαρίτων ἀπένευθεν

Ἀνθρώποις ἀγαπατὸν. αἰεὶ χαρίτεσσιν ἀμὲν εἶναι.

ὅσα ἢ μὴ πεφίληκε Ζεὺς, ἀτύζονται βράν Πιερίδων βόαν ἀΐοντα, ut ait Pindarus. Collectanea ista mea, qualia qualia sunt, non quidem acerrimo illi iudicio tuo subicere, (quod vereor ut sustinere possint, cum mihi non licuerit ea, ut volueram, perpolire, festinanti ad alia) sed benevolentiae & favori commendare visum est, qua susciperes eorum, sicubi opus esset, patrocinium. Quis enim erit ille tam arrogans aut fastidiosus, qui spernere ausit, quod tibi inscriptum, & a te non illibenter susceptum cognorit? & cui non sese approbet

Quae sibi Scaligeri praefixit pagina nomen? Vale.

EPISTOLA LXXXIX.

CUNRADUS RITTERSHUSIUS

Josepho Scaligero S. P. D.

Leidam.

TOssephe Scaliger, Vir Illustris. Rittershusius tuus cum vellet ad te accuratius scribere instantibus nundinis Francofurtensibus, tempore & aliis negotiis exclusus non potuit cogitata exequi. Quare iustis litteris in aliud tempus rejectis hoc tantum *πλητάκιον* ad te nunc dirigere voluit, insertum libello Arabico, & (ut suspicatur) Mahumetano: quem tibi dono mittit, rogans ut boni consulas, & animum in eo recognoscas tui observantissimum, tui cupidissimum, tibi devotum. Homerica Collectanea, quae tibi inscribere parat, nondum perpolivit omnia. Culpam conjicit in morbum, qui ipsi prope letalis fuerat anno, & pigriorem effecit. Partem quoque culpae sustinerit (si haec

haec culpa tamen dicenda est) alia ordinaria & graviora *Πατηδύματα* Juris interpretandi, & consultoribus respondendi, cavendique. Resumet tamen per hanc aestatem, utque ad autumnales nundinas parata sint, operam dabit. Haec nunc volebat nescius ne esses, Tibique se commendat. V. Altorphii 3. Martii 1600. Mira sunt & inaudita quae in me patrat *Schoppius*, ille meus quondam consalaneus, ex quo Romam migravit, & Cardinalibus & Inquisitoribus supparasitatur. Sed de his ejus facinoribus & venenatis moribus alias: longa enim est fabula. Nec clementius tractat *Giphanium* nostrum, veterem hospitem suum: a quo Symmachum habuit, sicut a me Plautum, quorum beneficio primum inclaruit. Ei extrema machinatur in aula Caesaris (ubi nunc vivit *Giphanus*) criminando virum magnum apud Legatum Pontificium aliosque. Heu qualem anguem fovimus! Quam turpiter ab homine ambitiosissimo delusi sumus?

EPISTOLA XC.

CUNRADUS RITTERSHUSIUS

*Josepho Scaligero, Franc. Junio, Paulo Merulae, Bonav. Vulcanio,
Jano Douzae S. D.*

Leidam.

NE dirimant chartae, quos sociavit amor. Libet enim (& fas sit) compendii causa jam conjunctim ad vos scribenti, versiculo uti, nato sub manum de sententia B. Hieronymi. Id factum vos, si bene novi vestrum candorem & amorem cum inter vos mutuum, tum erga me quoque, licet longe non solum loco remotum sed & imparem ut qui maxime, si bene ergo vos novi, benigne factum interpretabimini. Non licuit mihi vel antehac, quoties gestiit animus, toties ad singulos aliquid dare, vel etiam nunc affari singulis epistolis unumquemque vestrum. Alias alia, nunc occupationes obstiterunt, quae me in diversa distraxere. Cur ergo non abstineo calamum a scriptione? Quia cupio vestrum mihi favorem proprium conservare. Etsi enim vos, quae estis constantia, non mutatis forte quicquam de eo, quem semel in me sumpsistis, animo, mihi tamen metuendum, ne vestra excidam benevolentia, quae fit a me plurimi, si nimis longum colam silentium. Quo metu ut me ipsum liberem, loco litterarum singulis inscriptarum hoc tempore vobis boni ominis causa mitto ecce

Δελφίνας Φιλανθρωπίας:

qui quoties ad parietes museorum vestrorum vobis alludent, sistere vobis ob oculos poterunt hominem vestri cupidissimum & observantissimum nominis vestri. Quod utinam fiat! atque ad conspectum istius munusculi nostri usurpetis illud, de re alia a poeta in Dipnosophistis pronuntiatum:

Ἀνάμνησις ὃ πέλει χαλεπότης αὐτῇ.

Te, Illustris Scaliger, & te Nobiliss. Douza, hic diribitorem esse velim,
T t 2 cum

cum conveneritis. Puto enim vobis quoque probari ea, quae ibidem praecedunt:

Οὐ γὰρ συμποσίαισι Φίλων ἀπέχεσθαι ἐταίρων Δηρὸν.

Sint igitur tum vobis haec quoque quasi bellaria quaedam, si non ipso sui pretio aut sapore sat commendabilia gratave, saltem longinquitate itinerum, per quae ad vos deferentur. Sic & pulegium apud Indos pipere pretiosius habetur, quod in nostris hortis saepe calcamus pedibus. Desinam in eodem, a cuius sententia ordiebar, Hieronymo. nam & illud de pulegio ejus esse nostis. Vale & salve, tu Scaliger, tu Juni, tu Merula, tu Vulcani, tu Douza, πῦμας illustris, mihi plurimum veneranda,

Tuumque amare perge Rittershusium,

Tibi qui in suo aram collocavit pectore:

Tuo & favere perge Ritterhusio,

Cui plurimorum tute millium instar es.

Altorfii xx. Martii MDCI.

EPISTOLA XCI.

CUNRADUS RITTERSHUSIUS

Josepho Scaligero.

Leidam.

Collegam meum, & compatrem conjunctissimum carissimum desideratissimumque, jucunde tecum, nec sine mei amica mentione fuisse, ex ipsius literis, quas Haga-Comitis ad me dedit, libenter magnaue cum voluptate cognovi. Illud autem non sine magno dolore, quod in iisdem adscripserat de sui parentis obitu, cuius salutandi tam longinquum & periculosum iter susceperat. Utinam aliis in rebus tam essemus similes *Scipio Gentilis* & ego, quam hac sumus miseria sociati! Nam & ipse, dum amici & collegae vicem doleo, nuntium consimilem ex patria accipio nudius tertius, Patrem meum optimum & carissimum nono Augusti in complexibus filiarum & generorum expirasse, vitamque hanc mortalem, (quam Dei beneficio ad quinque & sexaginta annos produxerat inter varias alternantis fortis vices, & reciprocantia nunc gaudia, nunc taedia) cum altera illa vere vitali commutasse. Quid dicam de maerore & squalore, in quem datus sum? qui oculos pene peridi lacrumando. Experior in me quoque quam vere dictum sit olim: ῥᾶον παραινέιν, ἢ παθόντα καρτερεῖν. Obfirmabo tamen animum quantum potero (potero autem quantum dederit qui tantum bonum mihi abstulit) & resistam dolori, certe ingentis. Cum primis id me consolatur, quod intelligo ex literis eorum, qui morienti adstiteri, pie placideque in Christi fiducia obdormiisse. Testamento suo, quod sanus valensque fecit xvi. Julii, subjecit ab semet compositum epitaphion, quod nihil nisi pietatem spirat. Initium sic habet:

Militiam in terris egi dum fata senebant:

Militiae laetus munia linquo meae.

Laetitiae sed, Christe, meae fons unicus es tu.

Par-

Parco adscribere cetera. Sunt enim plures versus, quos praestat separatim abs te legi. Et si igitur ipsi sic mortuo nihil mali, imo nihil non boni contigisse potest, ac gratulari potius debeamus ei, qui posteaquam nepotes neptesque complures numerasset, vitae istius miseriis (quid enim est quo magis affluat?) ereptus, venturisque malis praereptus est: tamen nostra causa non possumus non dolere & angere. *Sunt lacrymae rerum, & mentem mortalia tangunt.*

Verum ego jam longus sum, tibi que molestus, quod nolim. Dabis veniam querulo dolori, qui sic paulatim egeri videtur, dum communicatur cum aliis, quos affici συμπαθεία quaedam erga nos credimus: ut ego Te in me esse non credo, sed certo scio. Talem enim tuae olim-literae mihi repraesentant. Quare istas querelas pluribus apud te non excusabo, fretus incredibili tua humanitate, qua etiam amiculorum res abs te non alienas putare soles. Meus consilaneus & amicus Mich. Virdungus Francus, opt. & eruditiss. juvenis, recens Tragoediam scripsit, *THRASEAM*, quam Tibi cogitat inscribere: ut nuper consilium hoc suum mihi aperuit. commendarem ipsum tibi more Romano, nisi probum & doctum os & pectus hominis, quod ex ipso dramate aestimabis, satis se ipsum commendaturum esset. Itaque μήνυτρον saltem abs te promereri volui, si forte has literas prius accipias, quam ipsius Virdungi, qui in patriam Kittingam hinc abiit, inde ad te scripturus. Vale, Illustrissime Domine, & me in tuis cultoribus & amiculis numerare perge. Altorfii xxvii. Augusti cix. ix. cii. Mortis paternae, vel potius meae de ipsa scientiae praesagium, quaeso, vide & perpende. Nocte illa, quae praecessit diem, quo Norimbergam allatae sunt funestae literae affinium meorum, continentes infauftum illum, quem dixi, nuntium, θεός μοι ἐνύπνιον ἦλθεν ἔνεργος, quo videbar mihi vehementem plagam a patre accipere, pugno ejus in ipsum occiput meum percussus. Itaque statim in ipsa illa quiete inquieta prorupi in haec verba: Quid hoc novi est, mi Pater? Cur ita me caedis? Talia certe ραπίσματα a te pati non asluevi. Equidem hoc factum tuum tam insolens in Calendario meo ad perpetuam memoriam annotabo. κατὰ ἐγὼ ἐξεγρόμην (κατὰ τὴν παροιμίαν) ἐπὶ ἀλεγομένη τῷ πατρὶ, καὶ δὴ πάλομένης τῆς καρδίας ὡς εἰκὸς ἀπατραχθείσης. Vix interposito uno die accipio ex re ipsa ἐξήγησιν ἤρουν ἐρμηνείαν ὀνειροκρητικὴν, qualem minime sperabam. Quis neget, in his θεῖόν τι inesse τὰ πράγματα ἡμῶν ἐλαῦνον ἢ πρὸς ἀνεῦρον; Haec etiam cum Clariss. viris D. Francisco Junio, B. Vulcanio, Merula, & P. Bertio, familiari hinc olim meo, μετ' ἀπασμῶν velim abs te communicari. Vale iterum atque iterum.

EPISTOLA XCII.

CUNRADUS RITTERSHUSIUS

Josepho Scaligero S. P. D.

Leidam.

Narro tibi, Illustrissime Scaliger, Thesaurum hac hieme reperi χρυσὸν περὶ ἀρχαῖς καὶ λίθων πρῶτων ἀντάξιον. Is qui sit, paucis accipe. Isidori Pe-

lufiotae epistolas nosti, ad 1213. Parisiis tribus libris editas Anno 1585. cum lat. Interpret. *Jac Billii*. Eas ego his proximis tribus mensibus ope MSC. cod. quem Bibliotheca Principis Bavariae suppeditavit, parario *M. Velfero*, non solum plurimis locis qua correxi, qua supplevi, verum etiam ipsis ccxxx. epistolis insignibus auxi, ex quibus facile quartus liber confici & recusis prioribus adjungi possit. Nunc in versione totus sum, quatenus aliae occupationes permittunt. Postea, vel etiam interea, de idoneo Typographo inquiram, ne diutius Ecclesia & respublica literaria careat iis fructibus, qui ex ejus operis lectione percipi poterunt uberrimi. Inscribitur id in dicto libro *χειρογέγραφο*, *Ἑρμηνεία εἰς τὴν θείαν γραφὴν*. quam alibi harum *ἀνεκδότων* epistolarum *κανόνα τῆς ἀληθείας* appellat. Ejus *ἑρμηνείας* tum regulas (parfim tradit: tum exempla adfert illustria. Potest ne vero argumentum ullum esse nobilius aut utilius, in tot sectas praesertim scissa Ecclesia Christi, quae unitatis & concordiae vinculo adstringi debebat? Plurima quoque ad bonos & Christiana professione dignos mores facientia habet: nec pauca *Φιλόλογα*: quae suo tempore in lucem proferam. Interea te rogatum volo, ut huic labori meo faveas aliquo Epigrammate, quo mirifice exornabitur opus. Velim etiam me facias certiore, an uspiam alibi, praeterquam Parisiis, editas cognoveris Isidori Epistolas: & an alibi etiam manu exarati codicis copia esse possit. Non parcerem equidem vel sumptui vel labori, si plures alicubi indagare possim. Confeci quoque hac hieme paraphrasim hexametron Danielis historici & Prophetae eximii: quam alias videbis. A te expectamus Chronicon Eusebianum, aliaque majorum vigiliarum opera. *Heinsii* vestri virtuti & eruditioni majori, quam pro aetate & seculo, impense faveo. Deus illum superstitem & *μακροχρόνιον* esse velit, omnique felicitate accumulet. Ego mense Decembri natu maximum ex quatuor filium Deo reddidi, qui patrem, cui *ἐμᾶνυμ* erat, non multo post annum sequutus, me in his miseriis vitae reliquit. Ut igitur hujus mei maeroris gravissimi paulisper obliviscerer, tanto liberius in Isidoro & Daniele me occupavi his proximis mensibus. Bene vale. Noribergae in diverforio, cum huc excurrissem comite Collega Clariss. *Scip. Gentili*, ad cohonestandum funus amplissimi & meritissimi Senatoris & Scholarchae Norici Dn. *Antonii Genderi*. XXI. Martii, MDCIV.

Respondet *Scaliger* Epist. ccxxi.

EPISTOLA XCIII.

CUNRADUS RITTERSHUSIUS

Josepho Scaligero S. D.

Leidam.

QUicquam ne vero sit, quod non tua causa libenter faciam, Vir Illustrissime, si vel minimo indicio intelligam, quid tibi a me gratum possit eveni-

nire? Itaque quam primum accepi tuas, quibus¹ Albategnium abs te requiri significas, ad fontes adii, & in urbem, ubi impressum esse dicis, me contuli, inquisitum de aliquo exemplari. Impressum quidem ibi nullum inveni; sed in bibliotheca Reipub. Latinum MSC. ostendit mihi Ornatissimus vir, praefectus ejus, & simul Syndicus Senatus, *Bernhardus Praetorius*, amicus meus integerrimus. Ex eo quaedam exscripsi, & his literis inclusi, ut inde videas, sit ne idem opus cum illo, quod tu expetis. Domum reversus apud alterum *Joan. Praetorium*, mathematicum apud nos Professore, optimum senem, vidi tandem impressum: cujus qualitatem & quantitatem (ut sic loquar) cognoscas ex mea designatione inclusa. Nunc a te expecto, quid me hinc praeterea facere velis: an ut petam a *Praetorio* nostro, ut tibi suum codicem impressum concedat (quod equidem cum haud gravate facturum crediderim, praesertim si intelligat, editionem Albategnii a te forte renovandam, & alterius exemplaris copiam se habere, vel etiam suum recuperare post impressionem posse) an MSC. ex bibliotheca Norimbergensis R. P. expectes. Ego certe quicquid te cupere intellexero, & quicquid potero, faxo lubens. De *Schoppio*, qui jam se *Scioppium* vocat, quod scribis, non miror: nam ut meretrix semel quaestuariam illam artem professâ non amplius turpiter, sed instituto suo convenienter facit, ita & hoc genus hominum, quod semel instituit maledicere bonis, atque etiam benefactoribus, hunc quaestum sibi putat uberimum. Itaque nihil aliud a talibus expectemus. In amphitheatrum illud sceleris & infamiae hinc etiam nonnulla facta sunt Epigrammata, quae alias ad *D. Heynsum* mittam. Meas antehac non omnes tibi redditas esse, inde colligo, quod ad *ζητησίδια* mea de quibusdam *Isidori Pelusiotae* locis nihildum respondisti. neque enim tacuisses, opinor, si accepisses. Quare alias repetam, si id tibi non molestum fore cognovero. Editionem illam spero totam hoc instante demum mercatu nos viuros. Indidem & ego tuas expectabo, quibus de Albategnio rescribas. Vale, Illustrissime Scaliger, & meis studiis favere perge. Altorfii xxvii. Februarii mdcvi.

P. S. Quaeso, quid tibi de rebus Brunswicensibus videtur, & de illa disputatione civili controversiae ex judicio in campum & castra translata? O nos Christianos *λόγω μὲν*, *ἔργῳ δ' ἑδαιμῶς*. Siccine nos servare ipsa salus poterit?

Jam haec scripseram, cum ad me pittacium mittit Dominus *Praetorius*, quod ut accepi, ita his includere volui.

In bibliotheca R. P. Norimbergensis extat Albategni Arabis liber MSC. Latin. in 4. forma oblonga, num: 53. Habet praefixam praefationem *Platonis Tiburtini*, quae sic incipit: (ab eadem etiam incipit impressum exemplar

¹ Videtur *Scaliger* accepisse impressum exemplar *Praetorii*, nam auctoritate hujus scriptoris, quem vocat *Muhammeden Albateni Arabensem*, saepe in libris de emendatione temporum utitur; ut index docere potest. Vocabatur vero *Mohammet Ben Giaber*, *Ben Senan* oriundus ex urbe *Batan*, unde *Albategnius* a Latinis vocatus fuit. cognomine etiam dictus *Harrani*, ab urbe *Harran* Sabienfium, quorum etiam sacra, non Mahomethica professus est. Scripsit circa annum Christi 912. vid. *Herbelot* Biblioth. Orient. p. 293. & 616. Alter Arabs *Muhamedes Alfraganus* hunc *Muhamedem* saepe ad verbum descripsit, etsi cum non nominat, ut notavit *Jacob. Christmannus* ad *Alfraganum* pag. 5. & passim.

plar Domini Joann. Praetorii, de quo infra) *Inter universa liberalium artium studia, quae Graecos, quaeque etiam prius invenisse constat Aegyptios, quae stellarum scientiam profitetur disciplina, & est, & habetur jure princeps. Quod inconcussis demonstrationum rationibus asserere non gravaremur, nisi & a proposito longe recederet, & apud Philosophiae perfectiores indubitata fide constaret. &c.* Et mox pag. seq. *Hunc, inquam Albategni meo labore Deo propitiante transferendum, & Latinis auribus offerendum censui. In quo opere si qua forte difficultas lectorem offenderit, ne hanc extimet interpretis vitio accidisse, sed materiae gravitate. Est enim liber etiam in Arabico gravissimus, tum quia scientia subtilissima est, & rationes perplexae: tum quia in plerisque locis Geometricae demonstrationes ex industria subtrahuntur, tanquam negotio non rudibus, sed peritis instituto. Deum ergo scientiae auctorem adiutorem invoco.*

Praefationi haec subjiciuntur:

In nomine Domini incipit liber Machometi, filii Iebir, filii Crueni, qui vocatur Albategni in mūs (forte, motibus) stellarum & in locis motuum earum, experimenti ratione conceptorum, in quo libri capitula continuantur.

Primum est in libri prooemio &c. Et sic ordine cetera &c.

Capituli primi hoc est initium: *Machomenus Tinen filius Acharzavi, qui & Albategni dicitur, inquit: In cunctorum operum initiis omniumque rerum exordiis principatus & excellentia Dei laudi nomine, cujus exaltetur ac ipsius gloriae deputetur, & ex suis sibi grates dignae beneficiis exhibeantur: ejus etiam cum prophetis nuntii, ut in ipso & cum ipso quieti sedem habeant, benedicantur. Rerum ergo creator omnium potens Deus velle proprio singula sapienter & benigne disponens, cujus scientia nunc (forte, munerum) Universitatis complectitur, quod nec eam caelestia seu terrestria latent occulta, laudibus honoretur.*

Cap. penult. ita incipit: *Quoddam ergo aeneum, vel lapideum, aut ligneum quadratum &c. Definit ita: De compositione Altitude, per quam fiunt observationes.* Cap. ult. ita incipit: *Tres quidem planas regulas. &c.* Finitur ad hunc modum: *Simili quoque modo, si necesse fuerit, ut per eas altitudo lunae vel aliarum stellarum accipiat, cum longitudinis arcus a cenit capitis de 40 minutis, reliquum erit altitudinis arcus.* Videntur autem hoc ipso exemplari usus aliquando fuisse Typothetae in typis describendo hoc opere. Id colligo ex numeris paginarum, quos in marginibus chartae stylo *κεχαγραμένους* deprehendi. Erat autem ultimus 89. Sed impressum exemplar nullum adhuc videre licuit mihi. Superiora Norimbergae in publ. Bibliotheca descripsi. Domum reversus petii a nostro Mathematico Joanne Praetorio, ut si quod Albategnii exemplar haberet impressum, communicaret mecum. ostendit suum codicem, qui in 4. forma ab *a.* incipiens, definit in *y.* & 90. paginis constat: Quia vero initio deest una charta, in qua fuisse impressam dedicationem suspicor, non possum inde certo cognoscere locum, ubi sit editum illud exemplar: nisi quod typi videntur fuisse ² Joannis Petrei, quondam typographi Norici. Accedit, quod etiam

² Ita in Epitome Gesneriana docemur, & produsse A. 1537. nomen vero auctoris *Mahometis Aracensis.*

etiam in impresso numeri paginarum respondent illis, quos ad oram MSC. adnotatos supra dixi. Titulus in summo chartarum est.

Albategnius de Scientia Stellarum. Initio MSC. haec annotata reperi, quae & in Praetoriano exemplari totidem verbis adscripta vidi postea: *Albategnius observationes suas consideravit in civitate Araçta: cujus latitudo est 36. graduum & orientior, quam Alexandria in 10. gradibus, quae sunt $\frac{2}{3}$. unius horae: anno quidem Christi 883. currente.* Seqq. ad suum cod. annotarat *Joan. Praetorius: Longitudo Araçtae 75 $\frac{1}{4}$. graduum. Albategnius Ptolemaeo posterior annis 743. ut ipse testatur fol. 80. 6. Copernicus vocat Albategnium Mahometum Araçtensem.*

EPISTOLA XCIV.

CUNRADUS RITTERSHUSIUS

Josepho Scaligero S. P. D.

Leidam.

SUMMO honore & beneficio me affecisti, Illustrissime D. Scaliger, cum tuis Jambis Isidorum nostrum ornatorem in manus hominum prodire voluisti. Ingratus autem & vivam & moriar, si non de referenda quodammodo gratia sedulo cogitem. Quî vero possim aliter te renumerari, quam hujus ipsius auctoris volumine novae editionis *εις ἀντίδορον* ad te misso? Accipies igitur hoc a me, & boni consules, non quidem quod idoneum sit persolvendae gratiae, aut me ab illa obligatione, qua tibi obstrictus teneor, liberandi, sed tanquam pignus & monumentum grati ac memoris animi, qui sic erga te affectus est, ut quo plus jam debet, eo plura debere cupiat. Debeamus autem plus plusque vel hoc nomine, si Isidoro nostro aliquem in tua bibliotheca locum dederis, & aliquando eum inspexeris, meque de illis vel monueris vel etiam reprehenderis, quae in hac editione desiderabis. Hinc enim colligam, & gratum te habuisse hoc nostrum officium, nec omnia, quae ad Isidorum contulimus, improbasse, verum ea duntaxat, quae notaveris, quaeque ego ad nutum tuum corrigere paratus ero. De Albategnio, quae inquirere potui, jam pridem ad te perscripsi, & literas per *Gruterum*, sicut jussieras, curavi. Quid porro me facere in hac re velis, expecto. Scribo jam & D. Heynsio, cui mitto item unum exemplar Isidori, quod meo rogatu reponat in Academiae vestrae bibliothecam publicam. Si ipse forte absit, per *Bon. Vulcanium* V. Cl. id fieri velim. Cupio enim ibi quoque exstare publicum aliquod monumentum meae erga florentissimam Academiam observantiae.

Salvete Illustres animae, nobisque favere

Pergite. Sic vobis prospera quaeque precor.

Vale. Altorfii prid. Kal. Aprilis. MDCVI.

EPISTOLA XCV.

CUNRADUS RITTERSHUSIUS

*Josepho Scaligero S. D.**Leidam.*

Quidquamne vero sit, quod cum tibi, Illustrissime V. gratum fore intelligam, tua causa non velim? Libens igitur meritoque feci, quod tuis simul & *D. Heynsii* & *P. Scriverii* literis a me petitum est pridem, ut quae de catharmate illo, sive scelere, sive sterquilinio hominis, (a quo tam foede sumus delusi,) comperta habere potuimus, consignata complecterer Commentariolo quodam. Eum per Clarissimum *Gruterum* uti spero, recte accipies, cum epistola Collegae nostri *D. Gentilis*: Sero quidem, sed tempori tamen. Quae causa tantae morae, significavi *D. Heynsio*, purgandi nostri ergo. Nec repetam hîc, ne actum agam, cum ex relatu ipsius te putem cognoscere posse impedimenta legitima. Vestrum nunc erit, haec, quae ex fide dignis habemus, & partim ipsi observavimus, ita ad vestros usus, atque ad detegendum hominis, qua vilitatem, qua improbitatem, ut & ipse pudefiat publice, nec nobis ullum inde periculum creetur. Cogitandum enim, quorum confedemus arvis. Neque nobis in Germania media conceditur ea in scriptorum editione libertas, in ditione praesertim Norica, qua vos in Belgio fruimini. Cavebitis ergo modis omnibus, ne nobis fraudi sit officium nostrum, & ut non tantum non profiteamini unde haec, quae perscribimus ad vos, nacti fueritis, verum etiam strenue dissimuletis: quod fiet, si & styli nostri simplicitatem, quam dissimulare non facile possum, immutetis, auctoresve nos nullibi laudetis. Sed quid ego haec tam multis tamque sollicitè? cum meminerim promissorum vestrorum de indemnitate illis praestanda, quibus merito fidem habemus. Utinam illum videamus diem, cum prodibunt illa scripta, quibus hominem tractabitis ex merito. quamquam quî hoc potest? Si enim ex merito suo tractaretur, jam corvos pasceret, qui nunc est iin vicinia nostra in Comitibus. Ibi enim esse heri ad me Ratisbonâ perscripsit vetus amicus. τῶϊα νῦν τὰ ἐπίχειρα καὶ αἰθλα τ' ἐπιρρείας καὶ φιλολαϊδορείας ἐσχάτης τε καὶ ἀναισχυντοτάτης. Φεῦ τ' βίσηπνηρίας; καὶ Φεῦ πάλιν! Vale, Vir Illustrissime, & nos favore tuo dignare perge, vel tuae constantiae, si non nostri meriti causa. Altorfii die xi. Januarii. Anno MDCVIII.

EPISTOLA XCVI.

FRID. TAUBMANUS

*Josepho Scaligero S. D.**Leidam.*

Constitueram, Illustrissime Scaliger, per hanc viam, quam in litteris eo perferendis unicam scribis, mercatum Francofurtensem, copiosissimas, quae

quales vix alias unquam, ad Te mittere: & una specimen Commentarii Plautini, Truculentum tuam; quidni enim tuam appellem, quam majore ex parte a mendis vindicasti? sed cum jam calamus in manu esset, & mens tota in Scaligero; negotium ab Academia subitum, grave, & cui expediendo juratus absentiam meam Rectori nullo poteram excusare modo, sed nec protollere. Quid facerem? occasionem tam praesentem amittere poene religio fuit. arripio itaque chartam, & haec vides, Illustrissime Scaliger, in ipso aestu negotii (quod quidem e Belgio nonnulli tumultuantes, alioqui mihi valde amici, & quibuscum crebros de te sermones habere soleo, concitasse arguuntur) in ipsis subselliis judicii tibi, imo mihi & Plauto suffuror. Scito, Illustrissime Scaliger, me tuas recte accepisse, luculentum studiorum meorum praemium. & quae in istis, ita a me haberi, ut solent & debent omnia, quae a *Scaligeris*. Etiam de Fragmentis Plauti recte mones, sed quis ea mihi suppeditabit, omnique ex parte perpurgata? nam ut ista retineam, quae doctissimus *Camerarius* & post hunc *Lambinus* ad calcem sui Commentarii adjecerunt, nescio sane an *Scaligeris*, *Douzis*que & *Lipsiis* operam meam tali farragine probare possim. quando & ipse deprehendi, non pauca sparsim latitare in auctoribus, quae ad illam congeriem & lucem nondum sunt protracta. Per decimam Musam Plautum te obtestor, mi Scaliger, ea vel abs te, vel a *Douzis* vel a *Lipso* mihi impetres. nam praeter eos nemo est, opinor, qui illa cum judicio selegerit; sed & notis illustraverit. Jam quid faciendum isto procemio? Non credo in Europa esse, qui me id doceat, extra te unum. idque mihi persuadeo non tam ex ingenii tui divinitate, quam ex libro illo de Emendatione temporum tuo, quem hisce diebus ab amicissimo, & poene mihi domestico, *Tychone Brake* utendum habui: in quo te specimen edidisse vidimus. Obiter de *Tychone*: is menses jam quasi quinque nobiscum Wirtebergae cum tota familia degit, expectans sententiam Caesaris. sed quid eum expectare dico, qui nudius tertius litteris Imperatoris Pragae evocatus est: & haec causa, cur hac vice litteris te (quem maximi semper in sermonibus nostris facere solet) non compellet, quod alioquin facere mecum per hanc viam plane fuit animatus. est enim in rebus suis ordinandis & compilandis occupatissimus. Jam quis est ille *Ivo Villiomarus*? multa sunt ab eo (si quid ego judico) divina, & vel Scaligero digna. quaeso te, si quid praeter illa in *Titium* vulgavit, rationem me doce, qui ejus fiam particeps. Et quis ille praeclarae expectationis adolescens *Meursius*, quem primum nosse coepi ab Arnobio; eundemque tibi, o hominem felicibus familiarem? Etiam ad nobilissimos *Douzas* illos cogitabam litteras, quos mitterem ad *Lipsum*: verum hae turbae nimium intempestive intervenientes turbant mihi omne consilium. Valeas Illustrissime Scaliger, & *Douzas*, *Lipsum*, *Meursium* meis verbis (si vobis ego tanti) salvere jubeas. si Melodaesia mea, quae anno Lipsiae publicata est, coelum in Belgio aciemque oculorum vestrorum ferre posset, optare ausim, eam haberetis. sed nec Bibliopolae vestrates hoc plumbo naves suas onerant. Valet iterum, divine Scaliger, &

responsurae plectra movete Lyrae. Wittebergae in loco consistorii. Tuae Illustrissimae dignitatis Devotissimus.

Responsio videtur ad Scaligeri Epistolam cccxxxvi. quae x. Kal. Sept. c1515xcv. scripta.

EPISTOLA XCVII.

FRID. TAUBMANUS

Josepho Scaligero S. D.

Leidam.

Quod si altera illa mercatorum Francofurtensium via non successit, divine Scaliger, Orbis terrarum doctor, fortasse hac succedet, ad Te ut literae meae perferantur, quas ex his oris emitto jam tertias. Earum nullas tibi redditas vel hinc conjecturam capio, quod nihil haecenus responderis. Nec est, quod quis dicat, qui ambos novit; Scaliger tibi? Mihi, inquam: aut summi Viri summa humanitas, quae mihi privatim toties praedicatur, quamque publice ad alios depraedico, nulla ea de re praesertim ad litteras pertinente, in quibus ille nobis Oraculum. Atque ut multa verba compendifaciam, divine Scaliger; summa deperditarum (in talium censu eos habeo) fuit; Me Plautum vestrum juventuti nostrae explicare, idque Wittebergae, ubi meri (ut Philosophilli isti loquuntur) *Reales*. quod ante me nemo fecit, (causam, tu divine, divinato) ne magnus quidem ille decimae hujus Musae fospitabor *Camerarius*, civis meus. Me item *Herculem*, hoc est, Scaligerum aliquem invocare. Me pro his litteris, quique eisdem docti, valde ad frigidum hunc Septemtrionem laborare; saepe ingemiscere; saepe illud mecum tacite ruminari; *Nimis vellem habere perticam*: Me denique, ex quo coepi omnium Commentarios Plautinos cogitare: atque ex omnibus, qui aliquid in Plautum contulerunt, colligere (quod Nobilissimus omnium ille *Douza*, quem etiam saepe compello, ante annos x. promisit, quodque haecenus frustra, magno rei literariae malo, hinc exspectamus) retentis, quam fieri potest, cujusque autoris verbis: atque ad hoc opus Tuam & *Douzae* operam & consilium implorare, quae utraque etiamnum ab utroque flagito; & quae *J. Gruterus* noster ultro mihi obtulit. Vale & Salve, divine Scaliger, cum tuo *Douza*, atque utinam *Douzis*! Wittebergae Sax. Id. Majis a. d. 1598. Mi divine Scaliger, mi *Douza*, quos toties e cathedra publice compello, me quaeso vos, vel privatim tribus verbis dignamini. Quod ubi apud vos obtinuero, fructum omnium studiorum me consecutum putabo uberrimum. Versor jam in Trinummo.

EPISTOLA XCVIII.

FRID. TAUBMANUS

*Josepho Scaligero S. D.**Leidam.*

EXhaustus sum, magne Scaliger, literas scribendo, atque intra breve tempus. Tamen cum dator harum, *Casp. Bartholinus* Danus, Academiae nostrae alumnus, adolescens pro aetatis modo, & ut nostratium sunt ingenia, apprime versatus in Philosophia, iter ad vos meditaretur, meque rogaret, vel tribus verbis aditum sibi ad te pararem; ut Scaligerum semel oculis posset intueri, quem me interprete toties animo vidisset: qui, quaeso, affectum tam honestum adolescentiae non amarem? non juvarem? Facio certe, magne Scaliger. Nec tibi molestum erit venerabile illud os tuum nostris ostendere, *dum superes & vescaris aura*. O me infelicem, cui idem non licet, quod me indice discipulis nostris! Abcant tamen (non invideo) salveant, & fruantur Scaligero praesente praesentes. ego absentes venerabor; Te inquam, & Patrem tuum, qui quidem mihi die abhinc octavo publice in Academia dicenti aliquot pagellas unus favebat cum faventia & applausu meliorum ex omni auditorio. Vale, divine Scaliger, cujus litteras quotidie exspecto a Bibliopolis Francofurto. Wirtebergae xv. Aprilis, anno Christiano c1515cvi.

Respondet Scaliger Ep. ccccxv. ubi male *Partholinus* pro *Bartholino* legitur.

EPISTOLA XCIX.

FRID. TAUBMANUS

*Josepho Scaligero S. D.**Leidam.*

ET si haec via Francofurtensis expeditissima est litteris committendis, merito tamen dubitavi, utrum tibi, Illustrissime Scaliger, molestus etiam esse debeam, quem scio ex omni Orbe litterato certatim adiri, & in feriis istis, quae posteritati laboras, saepius turbari. Ausus sum tamen denuo ad Te scribere: cum, quod nudius tertius demum tuas a Dano illo accepi; (tamdiu in patria substitit. Illas enim ad *Calvisium* comiti, recta huc proficiscenti, commisit: quas & recte *Lipsiam* curavi.) quod significare debui, & gratias simul agere pro honore mihi habito, (nam qui aliter interpretor?) tum, quia ita jussit fortissimus Vir & Urbi Elect. Dresdae Praefectus, *Barthol. Brand* Hannoveran. Saxo: Cum quo multa de Te, Illustrissime Scaliger, locuti: optima omnia (ut tua sunt) & auditu mihi jucundissima. Tuo etiam numini inter mensas libavimus vitro illo, quo se abs te donatum aiebat, contra aurum sibi caro, atque insignibus etiam tuis, insignito, Jussit is te, ut & uxorcula, plenissimo affe-

et salutare, ut primum se daret occasio: quae quidem nunc dari videbatur. Sed cum, ut fieri solet, aliud ex alio nasceretur, quaesitum etiam inter nos fuit, unde Insignia gentis Scaligerae, domui Sax. inserta. Nam ubicunque (ut & Wittebergae in templo Arcis Academico) basilica aliqua Insignium Saxoniorum pictura cum caelatura visitur, inibi & Scaligerorum, ordine xivtum apparet. Ubi scilicet duo canes per scalas adscensum moluntur. Moliti sumus aliquid, sed emoliri non valuimus. quaeso nos juva. Et vel ob hanc unam causam responderi abs te velim primâ occasione. Nam & alumni nostri, nominis tui amantes sapiculae idem quaerere mihi visi: atque in vicino Marchionatu Berolini Scaligerorum Insignia ante ccc. annos sculpta exstant in basilica. Doce docendum: ut ipse porro meos possim. Plautina editio, quam denuo ad ver proximum, Deo volente, suscipiemus, doce quaeso quomodo fieri a me aut typographo possit melior: ut & nostris ingeniis probari & nostrae juventuti (scis quali) utile esse possit. Atque ad hujus quidem caput ego potissimum mea illa accommodare debui; non ad vestratium, quibus mea nihil opus opera. Wittebergae doceo, non Lugduni: quod vos etiam atque etiam attendetis. Sed Fragmenta, quaeso Te, Incomparabilis Heros, tandem fac sint meliora & claria; vel tua causa, cui Plautus a me inscriptus. immo indiculum hoc da. res est tridui aut quadridui: Vel certe optionem tibi sume alium, qui tuo arbitratu rem istam curet. Habes ibi *Heynsios*, habes *Meursios*, habes *Grotios*, Quis horum omnium tam duram frontem habeat, qui jubenti Scaligero non libenter pareat? Dissertatiunculam novam mitto, in qua ex professio id agere videri poteram, qui amorem Scaligeri nominis juventuti imprimerem. Quo facto faciliores in omnibus bonis artibus nostros habebimus. Vale, magne Scaliger, & mihi fave, qui te veneror. Wittebergae xxix. Aug. anni cixcxcvi.

EPISTOLA C.


JOANNIS PISTORII

Memoriale pro negotio apud D. Franciscum Raphalengium Typographum expediendo.

Nuper in excussione Bibliothecae antiquissimae inter libros semicorruptos inveni membranaceum librum chartarum nonaginta octo, in forma quarta vel minoris folii, in quo erant perpetuae notae, ascriptis verbis, quae per notas significantur. Miratus libri antiquitatem & notarum imagines, cum titulum quaererem, inveni a fronte majusculis literis ascriptum. *Auxiliante Domino incipiunt Notae Senecae feliciter Amen.* Et paulo inferius: *liber Notarum Senecae Magistri.* Veniebat statim in mentem, esse nonnullos authores, qui ejus-

¹ Hoc codice Pistorii usum se scribit Gruterus in initio notarum ad notas Tyronis & Senecae. de Joanne Pistorio Nidano, antea medico & Luterano, postea Papista, & ut hîc se vocat, SS. Theologiae doctore protonotario Apostolico & praeposito Sarburgensi; vide Verton. de satyris, quae titulum Anti-gerunt. T. I. p. 22. 26.

ejusmodi librum attribuerent Senecae. Itaque mecum beneficio Domini Bibliothecae sumptum & domum perlatum coepi cum illis notis, quas in libro² *D. Vulcanii* de notis Lombardicis paulo ante me legisse recordabar, diligenter conferre: statimque deprehendi esse illum eundem integrum librum, cujus fragmentum ex codice Argenteo desumptum ad *D. Vulcanium* pervenit: Sed initium libri non a verbis, *super insuper*, inchoatum erat, sed praecesserunt triginta octo notae aliae. Nec erant isti barbarissimi (*capitulas* vel *capitula*) interscripti, ut recitat *D. Vulcanius* ex Anonymo: tamen nec capita ordine erant posita, nec proba erat semper latinitas, sic ut folio sexto legerentur Verba sequentia, *Explic. Cap. Primus Incip. cap. 11.* & similia.

Quod *D. Vulcanii* liber sub finem reperiri ascripserat (*Puteoli Puteolanus, Neapolis Neapolitanus*) id in meo libro ante finem quidem erat: sic tamen, ut triginta duae chartae adhuc insequerentur aliarum notarum plenae. In calce voluminis erat. *In Christi nomine, auxiliante Domino, explicitae notae Senecae feliciter Amen:* Et paulo post *Explicit Commentaria vi. feliciter, Deo gratias, Amen.* Verum sequebantur adhuc duae paginae, in quibus similes notae erant nominum priorum, veteris & novi Testamenti: & similiter dierum per septimanam intercurrentium: ut ultima nota esset  dies Sabbathi.

Talem igitur librum nactus, Existimavi nihil me ab officio alienum facere: si *D. Raphelengio*, qui librum *D. Vulcanii* superioribus nundinis publicaverat, significarem, ascripta simul salute & oblatis officiis: quo is ad *D. Vulcanium* cum eadem salute mea & officiorum oblatione referret, qui librum, cujus ille Tyronem Ciceronis libertum authorem facit, magno desiderio in praefatione expetere videtur.

Sive vero ille, sive *D. Raphelengius* excudendum putat, intercedam libenter ad Dominum libri, qui mihi ad paucos dies utendum eum dedit: nec spero futurum difficilem: Id igitur celerrime in charta publica notari & per *D. Quentelium* tradi *D. Raphelengio* volui. Actum Friburgi Brisgiae Idibus Septembris A^o. 98.

² Inscríbítur *commentariolus viri cujusdam docti Anonymi in literas Gothicas*, & solet adjungi scriptoribus Gothicarum & Langobardicarum rerum A. 1618. licet quaedam exemplaria viderim, quae hoc commentariolo carent: p. 16. alter *commentariolus in Alphabetum Gothicum & notas Lombardicas* legitur, de quo hîc agitur.

EPISTOLA CI.

P. MOLINEUS

*Josepho Scaligero J. F. S.**Leidam.*

SI me amas, vir amplissime, etiam accusas: & offenderis nostro silentio. Sed offensio illa, ut est argumentum amoris, ita facile admittit excusationem. Non habui, nec unde, nec quid, nec per quem scriberem: nam ex quo de-

serui functionem illam, in qua otiosus agebam & liber, haud scio equidem ubi fuerim, aut potius ubi non fuerim, tot me distraxerunt negotia, tot discursationes exercuerunt. denique idem mihi videor pati, quod is, qui dormiens in navi multa coeli & maris tranquillitate subito oborta tempestate excitatur: Nec hoc quidem mihi accidit praeter expectationem, immo nec prater votum, nunquam enim defugiam ullum laborem, qui ullatenus ad Dei gloriam redundabit. Hoc unum doleo difficile mihi esse in vitae actu dissipato & vago tenere cursum studiorum, quae ego vel abundans otio aegre promovebam. Spero tamen vitam tranquilliorē, atque id nunc operam do, ut rebus meis constabilitis, & ducta uxore sedem figam Lutetiae, & liberem animum bona parte curarum, quae me hactenus circumsteterant: Vix pedem posueram Lutetiae, cum me reluctanter, & conscium imbecillitatis, & fessum discursationum, omnium sollicitationes, & preces eo perpulerunt, ut Regis sororem prosequer in Lotharingiam: feci, atque ibi Sophisticis Jesuitarum quaestionibus tentatus sic discessi; ut illis nihil inde accederet honoris incrementum, Dominae vero animus jam labascens in religione plurimum obfirmaretur: Sed de eo (spero,) ut primum otium dabitur, scriptum extabit: Revertens inde, in via inveni uxorem, moribus ingenuis, stirpe honesta & nobili, forma etiam superest, nec desunt fortunae: Haec tibi pro more nostro, hoc est libere & familiariter: Mihi enim videor etiam nunc te coram affari, & frui dulci tua consuetudine: quae mihi debuerat tantum afferre utilitatis. quantum peperit honoris, sed obfuit partim innatus stupor, partim interpellendi metus: Ut ut sit, plurimum me tibi debere semper profitebor, immo & gloria-bor: Jactare se eo nomine, quod fueris Scaligeri discipulus & contubernalis, honesta est superbia. Nam quae tibi imprudenti excidunt, plura sunt & meliora, quam nos ex aliorum scriptis extundimus, multa cura & commentatione. Caeterum si me presenti usus es nec satis commodo, nec satis grato, fac experimentum an habiturus sis absentem promptiorem ad exequenda imperata, & utere tuo jure: *Tompsonum* heri vidi ex Italia reversum novissime. Et is quidem sub Italo habitu, Anglum crepat, & cervisiam bibit, & Criticus est: & circumfert aqualiculum solito amplius: amo hominem, & rideo. Nihil hinc propemodum rerum novarum: Locus cogendae Ecclesiae nobis assignatus est ad quintum ab urbe Lapidem, Corbeliam versus, interea dum nobis de commodiore prospicitur: hospes Ecclesiae est *Josias Mercerus* affinis meus, tibi probe notus: qui fundum ibi possidet: In eo dudum sumus, ut locum propiorem & commodiorem consequamur; sed parvo successu: Quid acciderit *D. Servino* Regio advocato, proculdubio inaudiveris, sed plenius explicabo, & planius: Agebat causidicus, cui nomen *Roberto*, causam Ducis Mercurii, atque inter sermonem, ut sit, nominaturus Ducem, eum Principem appellavit: Ibi tum *Servinus* incitatus subito animi impetu, increpuit acriter causidicum, dicens neminem in Parlamento appellari Principem, nisi qui sit Regii sanguinis: Aderat *ἀντιάνερα* illa Ducis uxor, quae ad ista, ut par est, vehementer commota, dixit, Indignum esse, marito suo ab isto homine eum honorem

rem negari, quem rex ipse ei saepe detulisset: Nihil commotior ad haec *Servinus* confedit: Mulier impotens, domum reversa maritum probris & convitiis sic excitavit, ut de *Servino* occidendo cogitaret: Venit igitur stipatus multo satellitio ad *Servini* aedes: & pulsatis foribus dixit sibi esse quod *Servinum* vellet; nec cunctatus, ingressus est domum, & invenit *Servinum* ultro occurrentem; ac post foeda convitia, ensen, sed non totum, distrinxit: haesit enim aliquantulum, manum habens ad capulum, pendulus inter iram & metum. *Servinus* quidem libere, ut est ingenium hominis, respondit, non suum caput peti, sed Regis & Parlamenti dignitatem, quam non esset Dux impune violaturus: convitia vero refellere insuper habuit, & raptim recessit. Mercurius revertens, rumpebatur dolore & poenitentia, quod a caede hominis abstinuisset. Res ut innotuit Parlamento, jussus est Dux domo non excedere, donec ad praestitutam diem causam dixisset: Intercessit Rex, & indignationem quidem prae se tulit & promisit se ultorem, sed Parlamentum vetuit de causa cognoscere: rem esse cognitionis regiae, quandoquidem Dux Mercurius esset inter Pares Franciae: Existimo ego Ducem laturum id impune. *Servini* quidem nullo probro, in quo ελευθεροσύνη ab omnibus laudatur, sed summo Parlamenti, cujus dignitas agitur: Salve, vir amplissime; & me ama: Lutetiae Nonis Quintilibus 1599. *Casabonus* expectatur; sed non ante autumnū.

EPISTOLA CII.

LEONARDUS GUTENSTEIN

Josepbo Scaligero.

Leidam.

Valde ego, si quisquam alius, viros eruditione nobiles, & fama sublimes amare & colere soleo; inter quos, Vir nobilitate illustris, Josephe Scaliger, primus es merito, quem tacito quodam animi sensu, diu est, quod admirer, & observem. Quoties ego ad vos aspiravi? sed, ut video; speravi tantum haecenus. Et forsā spe & opinione mea id serius fiet, ut ocellum illum Germaniae perlustrare queam; Votum meum respiciens aliquando Deus adjuvet. Morae vero impatiens ardentissimus adfectus, velut ignis longo tempore inclusus, vi magna & pectore erupit, qui liber cum hac tabella, sine verborum ambitu, dicam & cultu, ad te, Vir Illustris, jam abire festinat; Cui si bene cesserit haec audacia, multis me nominibus obstrictum profiteor nobili Viro *Joanni a Wouveren*, qui mirum quantum *Scaligeri* divinam eruditionem cum humanitate conjunctam hīc praedicet, ut multos in tui admirationem & amorem rapiat. Multum tibi deberi omnes Viri eruditi fatentur: sed plurimum, crede mihi, *Scaligero* debebit posteritas, si opus illud Inscriptio- num tot novis antiquis auctum tandem in publicum prodire coeperit. Nimium lente procedere ex *Welfero* nuper intellexi. Urge, potis enim es, Vir Illustris, apud *Commelinos*, ne labor & diligentia quorundam in conferendis cum

MSS. Smetiano, & Metelliano, ac exscribendis tot Inscriptionibus pe-
reat. Plura hac de re *Wouveren*. Interim opto obvenire occasiunculam
saltem, quae scintillas aliquot cultus mei apud te testari queat. Hoc eris, qua
es humanitate, scio jam contentus. Salutem & obsequia mea, si placet, No-
bilissimo Viro *Jano Doufae* meo nomine deferre ne graveris rogo. Vale, Vir
Illustris. Properanter Romae a. d. 7. Februarii Anno sal. rep. 1601.

Romae anno elapso in vinea quadam ad portam Septimiam Cippi, aerulae ta-
bulae marmoreae, integrae turmae militum repertae, sed maximam partem
comminutae, inter quas haec tres Inscriptiones Germanae, multae vero Romanae
elegantiae. Plures apud me, sed Romanae his elegantiores, quas ubi praelum
fervere intellexero, ad *Gruterum* mittam. Adscripsi has ideo, ut genti bel-
licosae honorem & virtutem instando apud *Commelinos* adserere, & conser-
vare libro illo Inscriptionum edito alacrius pergās.

Adscriptae erant tres inscriptiones, quas a *Wouwerio* accepisse se *Gruterus* testatur DXXVIII. 5.
DXXXII. 9. & DCCCLXXV. 2. ad ultimum vero lapidem ex *Gutensteinio* notatur, Annos XLV. vi-
xisse Felicem legi.

EPISTOLA CIII.

STEPH. CLAVIGER

Josepho Scaligero S. D.

Leidam.

LUstrum jam tertium agitur, domine Illustris, cum notitia tui paullo plus
quam extima nobis, haudquaquam ob meritum, illuxit; ut te alloqui &
coram intueri fas esset. facerent superi, ut per aetatis lubricum inscitamque
adhuc caliginem, tam eximium decus clare perspicere non minus, quam ad-
mirari, potuissem. sed enim tua singularis eruditio divinitati propior, neque
ab aevo constanti, neque a senili experientia, nisi oblique cerni valeat. Ne
vero diutius te perplexum teneam; ego ille sum, quem olim tibi nobile ad-
movit hospitium Cujacianae domus. ubi tu, Sol orbis litterati, fere annis re-
deuntibus quasi festa luce cum appareres, radii alicujus indulgentia me non de-
fraudasti. si quam enim tunc a Doctore principe inii gratiam, ei lingua & ani-
mis favere dignatus es. Ita ut modo *Janum Clavigerum*, post modo musaeo-
lum ambulans, Attico idiomate vocitares. at praeclara illa, opinor, ex parte
ceciderunt, non etiam tui memoria. Imo neque viri illius magni, quem tu
parentis loco suspiciebas, quae tua est moderatio. utque sit meis dictis aliqua
fides: ecce tibi *Cujacii* vitam libello mediocri, parique stilo delineatam tan-
tum non emisimus; eamque inclytae genti utriusque Germaniae certa ratione
debitam: modo prius tua censura invaluerit. addituri Panegyricos & elegias
cum aliquot Epigrammatis libello, si ita res ferat, singulari: quae sane tuis
folius auspiciis prodire gestiunt. nam quidam e nostris proceribus ea quantivis
esse precii, si fas, non abnuunt, mihi que dicunt eo nomine blanditias. sed non
ego

ego illis temere credulus; quamvis agnoscam istius phalerati generis non adeo multa hodie publicari. Quid plura, ne simplici vice insaniret tuus paupertinus *Claviger*, ei cupido nata est editionis Claudiani, poëtae, vel teste tuo incomparabili patre, maximi. quem nos olim cum Manuscr. *J. Cujacii* V. C. contulimus, denuoque cum aliis probae notae codicibus iteravimus; cum annotationibus, tum explicatione recensita. De iis omnibus tuum, vir maxime, consilium expectabo, si prius significare non graveris, an ea non illibenter visurus sis. Nobilis ac eruditus juvenis *Adrianus Manmakerus*, hospes meus, tuo Illustri nomine aedes meas personat, ego illi accinere, ille recinere non desistit: deque hac ad te scribendi occasione monuit; ut tamen subita, nec meditata, licuerit contexere. Dabis vero vel temeritati vel infantiae loquaci veniam; nosque in tuam clientelam suscipies. Biturigis prid. Kal. Martias Anno 1601.

Stephanus Claverius vocatur in editione Claudiani, quam emisit Parisiis A. 1515. 1517. Illum; editorem Cujacianarum annotationum, ingenio & diligentia ipsius auctarum, & tanto patrono non indignum, vocat *Barthius* ad Stat. vi. Theb. 404. sed diversum de ejus in Persium notis iudicium profert ad eundem Stat. v. Silv. 1. 96. Ejus commentarium in Persium se ignorare dicit *Crenius* de Furibus librariis pag. 61. sed prodiit Parisiis 1515. 1517. cum *Bernardi Autumnii* simul notis; vitam vero *Cujacii*, cujus hîc meminit, nondum ab eo editam fuisse reperire potui, cum illa a *Papirio Massenio* sit conscripta, quae & ante ejus opera legitur, & deinde a *Frid. Jac. Leickhe-ro* cum aliis Jctorum vitis edita *Lipsiae* MDCLXXXVI. mortuum hunc *Claverium* esse A. 1622. dici ex *Longi* Bibl. Hist. Franciae p. 6462. ubi ejus librum *Floridorum* recenset.

EPISTOLA CIV.

FRID. LINDENBRUCH

¹ *Josepho Scaligero* S.*Leidam.*

Persuadere mihi non possum, Vir Nobilissime, culpam tuam esse litterarum tuarum desiderium tam diu quod feram. saltem enim vel ad id respondisses, Glossarium te ² *Joan. Monachi* accepisse, quod expetebas. Quidquid sit, tamen sinistri nil suspicabor. ceterum quo amore litteras prosequar, jam plusculis indiciis, doctis me probasse reor: quocirca cum te Eusebii chronicon edere amicorum relatu intellexerim, insuper habere non potui, quin tibi significarem, esse penes me Idacii chronicon MS. nec unquam haëtenus editum, similis fere farinae cum Prospero, quamvis diversas res narret. tum quoque Idacius Prospero antiquior; quippe quem Sigebertus A°. Christi 490. vixisse refert. Istum si Eusebio adjicere velis, lubenter transmittam. uti & Marcell. Comitem, quem collatum cum MS. in quibusdam locis auctiorem habeo. a te enim multo maxime cupio ut edantur, quam ab ullo alio, ne vel a me ipso quidem. nam & Georgium quendam Episcopum habeo, qui chronologiam ab

X x 2

Jul.

¹ Respondet ad hanc *Scaliger* Epist. cxxiii.² *Maximum* vocat *Scaliger*, quod MSS. in Bibliotheca Medicaea exstare ait *Cl. Fabricius* Bibl. Graec. lib. v. cap. 40. pag. 52.

Jul. Caesare ad Anastasium usque conscripsit, & curate satis Coss. nomina cum suis titulis notavit. cum prioribus conjungere decreveram ac in publicum dare, sed mutavi consilium, tibi haec omnia, uti dixi, missurus si velis, qui unus atque unicus omnium est, quotquot sunt mortalium, a quo ea recte edi possint. Leges Germaniae paratas habeo, & jam illas vidisses, si per typographum licuisset, qui nescio quid causatur ac moram trahit, at si nimis tricarum inceperit, Francofurtum eas mittere decrevi. Jupiter! ὡς ἀρχαίεον πρᾶγμα ἐστὶν τὸ ἀφρονεῖν ἀνθρώπων! adeo verum verbum est, pro captu librariorum habent sua fata libelli. Interim ut intercapedinis damnum resarciam, Terentii fabulas forsan exhibiturus sum cum Donati commentario (antiquissima mihi obtulit exemplaria *Fr. Pitheous*, & item alterum ex bibliotheca Regia habeo bonae notae) & Eugraphio multo ampliore, quam olim *Faërnus* quaedam illius ediderat. Quod te caelare nolui. si quid amplius in tuam gratiam possim, hominis plane tibi addicti, quaeso ne parcas. Vale, Lutetiae vii. Kal. Septemb. A^o. Christi cix. dcci.

EPISTOLA CV.

FRID. LINDENBRUCH

¹ *Josepho Scaligero S.**Leidam.*

NE verbis me munificentior, quam factis reabsque experiare, en tibi chronologos, quos promisi. aude credere, vir amicissime, non tu illos avidius desideras, quam a me libenter mittuntur: nec enim commodum ullum commodis antepono publicis: imo isthoc fidere natum me arbitror, vel damno meo Musis ut inserviam. Quod si seculum hoc benefactis gratiam referre vellet, abunde famae meae consultum esset. nunc cum multum laboris atque impensae infumserim his studiis, quid aliud, quam caballus in clivo operam me luisse dicar? hoc scilicet praemii auferens, calumniantis linguae flagello ut verberer. *Wouwerium* istum ἀλαζονοχαυνοφλύαρον, ut credo, frustra expectas. nam a Papa captus tenetur, puta catenis aureis. Plane quippe in ² Romanum nomen sacramentum juravit uri, vinciri, verberari, atque inde stipendium habet. Vides quorsum hominem adegerit supercilium altius & *ποφομαρία* Ego hanc hyemem in Gallia commorabor, & partem aestatis quoque, deinde in Hispaniam cogito, ut & illius gentis mores & linguam addiscam. De Donato Terentii quod miraris, noli quaeso, sic capiendi erant hi librarii. alioquin annus fuisset, antequam manum operi adhibuisset. nunc secunda fabula pene peracta. Leges Germaniae, si desiderarem, jam equidem hinc ederentur, sed non multum urgeo. & reservabuntur fortassis an donec Augustam Vin-

¹ Responsio est ad *Scaligeri* cccxiii.² De hoc nihil repertum in ejus vitae scriptoribus, *Witte* Memior. Philos. dec. i. 9. & *Claramont.* part. xi. 17. sed tamen *Vulcanius* idem scribit *Cantero* in *Sylloge Matthaei* Ep. xi. ipse vero Epistola ad *Basilium* scripta negavit, se ejurasse sacra Lutherana, vide *Baylii* Lex. T. iv. pag. 288o.

Vindelicorum veniam, quâ sic commodius Imp. Caesari exhiberi possint. Interim vero, quod tu de Eusebio scribis, ex mora meliores evadent. Nam a *Daniele* Marculfi formulas integras habeo, & alibi alias nactus, quas omnes (adhibito tamen iudicio) in calce exhibebo. quae cura non exigui laboris & fastidii. sed quid? ita ita me *ὡμίς ἐν νόμοις δὲ περιλαύμνειν*. A te vero peto ad excerpta Donati mature ut respondeas. Dn. *Buzenvallium* exlegatum Regium jam salutaveram, cui has tradidi, ut voluisti. nec ego quenquam invenire potui, qui rectius curaret. Descripsi Idacium ex vetusto MS. *Fr. Pitthoei*, ut & Victorem. Georgius vero ineptire mihi saepiuscule visus est, ideoque hic bonas horas male collocare nolui. ecce tamen & illius quaedam. Marcellinum non mitto, sed variantes tantum lectiones, & si quid amplius erat. verbar enim ne latorem nimis onerarem. tamen & istum si desideras, habebis. Secutus sum editionem Parisin. Wecheli. Inaudivi *Onuphrii Panvinii* meliorem esse. Ea ante quinquennium Heidelbergae prodiit, cum illius fastis. tu videbis. Prosperi Chronicon quod *Pitthoeus* edidit, collatum tibi olim dedi. sed si recte memini, *Pontani* incuria periit. refarciri ergo hoc damnum potest, si a *Raphelengio* inquiras, cuinam libri isti MSS. inaurati divenditi sint, quos tum temporis habebat. nam inter illos erat & Eusebius & Prosper, uno volumine. Ego si quid amplius possum, me vide, sedulo & curate agetur. nec quidquam est, quod tua causa non velim, qui te sincere atque animitus ubivis locorum colui & colo. hoc solum redhostimentum petens, me semper, quod facis, unice ames. Vale. Lutetiae Parisior. Nonis Januarii A^o. Christi c10 10 c11.

Fr. Pitthoeus Palladii libr. de architectura editurus est; & *Bulengerius* ex illius bibliotheca Panegyricos veteres. Nil opus Idacium & reliquos transcribas. nam exemplar mihi servavi. Significes rogo Eusebius tuus quando prodibit. Et me doceas quid sit in Diodor. Eclog. 22. p. 323. ubi de Prusia agitur. *πίλεον ἔχων λευκόν, ἐπὶ φορῶν τηθέντων καὶ ἰκάντιλον*.

3 Adscripserat margini *Scaliger*, *Μάντιλον*.

EPISTOLA CVI.

FRID. LINDENBRUCH

Josepho Scaligero S.

Leidam.

RUpi tandem silentium, quod continuare decreveram aliquamdiu, qui labore te levarem ad meas respondendi; sed rupi, inquam, causa amicorum, qui id a me postularunt. Clarissimi illi sunt; & in regis aula fide ac meritis honorati. Scilicet Epistola huc perlata fuit; an hic potius edita, ad te anno missa: ejus autor cum multis in Papam ac Romanam curiam debacchetur, scire expetunt boni illi viri, & veritatis avidi, *γνήσιον* ne hoc scriptum sit, an *ὑποβολομαῖον* non certe a te, sed tui nominis praetextu, ut major illi autoritas fidesque concilietur. Rem igitur mihi illisque gratissimam feceris,

si scrupulum hunc nobis exemeris, ad quem multi nunc subsistunt. Atque ut melius intelligere possis quid sit, ecce tibi exemplar. Hoc primum: dein, Statius meus denuo edetur, sed sine commento: ideoque si me amas, juva me tuo judicio, & quid de nomine illo *Surculo* sentias edoce. Ego sane in quibusdam MSS. libb. Hieronymi, non *Surculum* scriptum repperi, sed *Ursulum*, quod tamen ut ad nostrum hunc Papinium referatur nunc vix, imo nullus credo. Et verius puto, ut *Stattus Papinius* solummodo dicatur: praesertim cum a nemine antiquorum illo altero nuncupetur, hoc vero non semel. Hieronymum tuum avide expectamus; at quando tandem, in tua manu situm est. Vale Lutetiae Parisiorum. vi. Eid. Octobris A°. Christi M. D. CIII.

Litterae tuae ad me *Casaubono* nostro tradantur velim, is recte curabit.

Respondet ad hanc *Scal.* ccxix.

EPISTOLA CVII.

FRID. LINDENBROGIUS

Josepho Scaligero S.

Leidam.

Occupatiorem solito fuisse te, cum ad postremas meas responderes, ex ipso charactere litterarum tuarum animadverti: nam & festinanti manu erat exaratus, nec quidquam ad ea, quae petebam. Itaque denuo tibi aurem vello, ut quod commodo tuo fiet, curate de singulis moneas: praesertim vero de *Curiaribus*. Panegyricum illius nostri cum latrante nomine jam legi; ideoque nil opus est, ut tuum exemplar mittas. Statius meus adhuc stat. Ego sane apud multos verum reperio, quod antiqui de tua hac natione dixerunt, ridendo eam fidem frangere. Hinc factum, nondum poetae illius secundam editionem prodiisse. Leges Germaniae Populorum paratas habeo, testisque mihi ejus rei esse poterit, qui tibi has tradit, Vir Nobilissimus *A. de Bibran*, quem quaeso eo favore, quo me omnesque bene natos soles, excipias. Meretur hoc virtus illius & eruditio non vulgaris: Quem ipsa sese melius conferendo exeret; nec me curione indigebit. Vale. Lutetiae Parisiorum xi. Kal. Septemb. A°. MDCCIV. Novel. 146. c. 1. ἀρχιφερειῶ. Edict. 4. Τερποδέλματων. Edict. 13. καλανδικῶν. *Curiales*.

EPISTOLA CVIII.

P. LABBAEUS

Josepho Scaligero Jul. Caesaris F. S. P. D.

Cum priore littera, Vir Illustrissime, ad Cantabrigiam & Oxonium nos profectos intellexeris, quid in utraque viderimus, hac tibi significandum

Respondet *Scaliger* Epist. cccxviii.

sa-

fatis mihi officii mei ratio persuasit, quod etsi tua lectione revera indignum, ab officio tamen meo non alienum sciens, calamum cohibere nec potui, nec debui. Cantabrigiam igitur appuli, dominum *Thomsonem*, virum tui amantissimum, convenimus, quem nobiscum deambulanti febris ex improvviso invasit, eaque per quindecim dies, non absque damno nostro, detentus fuit, paulo siquidem tardius bibliothecas illorum inspeximus, quas certe, praeter opinionem non ita instructas vidimus, plerosque siquidem libros manuscriptos falso inscripsit author Catalogi. exempli causa licebit hunc adducere, Viaticum Constantini, quem (magno labore repertum) sic inscribi vidimus, *Breviarium Constantini aliter dictus viaticus, quia secum semper hunc librum ferret.* in quo plane omnia monachalia erant. In collegio Trinitatis, Philonem Judaeum Graece manuscriptum vidimus, cujus collationem suscepit *Richardus Montacutius* studiosus in collegio regali, a quo, secundum promissa ipsius, spero nos accepturos: Praeterea Domini *Thomsonis* caeteris instructiorem per otium videre nobis licuit, qui praeterquam quod ad plurimos libros, varias lectiones ex MSS. Italiae habeat, Procli praeterea justum volumen adhuc ineditum aservat, cum pluribus aliis MSS. sed non tanti momenti. Visis ita Cantabrigiensium collegiis atque comitiis, ad Oxonienses absque mora properamus, quorum ut ingenue dicam, magnificentiora collegia nec non instructiores vidimus bibliothecas, quippe tam Latinorum quam Graecorum Manuscriptorum copia, eaque permagna refertas: quos ita stricte, imo turpiter, pulvere undequaque obsitos, aservant, & occultant, ut perire, quam in usum publicum redigi satius habeant: quod enim Cantabrigienses plane ac plene nobis concesserant, manuscriptorum videlicet exportationem, illi plane negaverunt; quod cum rude atque aliquo modo inhumanum nobis videretur, a collatione Julii Pollucis MSS. chartacei destitimus, quem per diem unum in bibliotheca² collegii Sancti Joannis contuleramus: *Doxapatris* libros duos ineditos in Hermogenem de inventione, in collegio Magdalenensi vidimus, quos quidam ipsius collegii socius describi se curaturum, posteaque ad nos, ut typis mandari curremus, missurum, affirmavit, quod an facturum sit, intra paucos menses, uti spero, videbimus. Post haec Londinum reversi, ubi per septimanam, videntae Reginae aliarumque rerum gratia, haesimus, salutato prius Clarissimo legato, Domino *Boissizio*, optime de nobis merito, in Galliam reditum meditati sumus, deoque favente Lutetiam superiori mense appulimus; ubi dominum *Thuanum*, *Casaubonum*, *Rigaltium*, caeterosque tui amantissimos convenimus, illisque litteras tuas tradidimus, praeterquam Domino *Gillotio*, qui jam per aliquot menses abfuit: Catonem tuum, quem omnes, qui viderunt, admirati sunt, *Ambrosio Drovard* his diebus dedimus, qui ut excudatur per *Fridericum Morellum*, in quarto, brevi curaturus est. Libros Hebraicos, quos adhuc reperire potuimus, duos ad te mittimus, nobis, ut verum fateor, non ita

no-

² In Catalogo MSS. collegii S. Joannis Baptistae non invenio Pollucem MS. sed in corporis Christi pag. 50. n. 1542.

³ Vid. Catalog. MSS. Britanniae Tom. I. part. II. pag. 71.

notos, tamen in pergameno excusum, partem esse Talmud existimamus, alterum, quem ex *Genebrardi* bibliotheca fuisse intelleximus, plane non novimus, tu ipse videbis, atque si in eis quidpiam boni, eodem animo quo ad te mittuntur excipies. Ad linguas quod attineat, praeterea nihil vidimus, nisi tractatum Malaicae linguae a Generoso Anglo in India confectum, quam linguam Indicis populis tanto in praetio esse affirmat, quanto Gallica sit Teutonibus, quo in tractatu, primum litteras Malaicas ad vivum depinxit, postea nomen Regis, & officiariorum eorumque numerum, cum dictionariolo, ad mercaturam spectante, eaque Anglico sermone e regione apposuit: quem cum a quodam Consiliario reginae Angliae, viro omnium curiosissimo, describendum mutuo acceperimus, nos tibi transcribemus ac prima occasione transmittemus. Interim Deum Opt. Max. a quo, & in quo omnino nostra salus: ut te salvum diu ac incolumem conservet, ac foveat, orabo. Vale, ac nos tibi devinctissimos, in numerum tuorum habe: Lutetiae Parisiorum, die mensis Septembris 12. Anno 1601.

EPISTOLA CIX.

P. LABBAEUS

*JC. F. Josepho Scaligero S. D.**Leidam.*

UTinam ingenii tui merita nota mihi minus essent (Vir Illustrissime) aut facultas quidpiam ipsis dignum offerendi suppeteret, tunc ex lactitia animi tui exultaret noster, nec ingratitude labi veluti perpetua notatus ipse sibi videretur. In urbe praestantissima totius Europae degentibus, mundi totius veluti epitome, quis crederet nihil singulare occurrere, quod viri perquam singularis doctrinae mentem, laboribus nec non vigiliis fessam, recreare, ac quodammodo reficere possit? Quin singularia multa scriniis semidoctorum quorundam inclusa jaceant, nemo sanae mentis negabit unquam, officinis vero Bibliopolarum contineri negare possumus, qui multoties ipsarum volumina pervolverimus. Dominus *de Laet*, qui ante mensem huc pervenit, multos libros comparavit, quos intra paucos menses, uti spero, videre poteris, eos siquidem recta in Angliam misit, quibuscum accipies, quos a Dom. *Puteanis* te optare didicimus. Nuperrime colloquendo cum Domino *Marescaldo* nostrate, hac in curia consiliario regio, certi facti sumus Dom. *Petavium* misisse antiquum suum exemplar manuscriptum chronici Eusebii ad Episcopum *de Basas*, Burdigali, Quam rem scire, interesse tua visum mihi est, ut inde levitatem hujus, illius vero ineptam pertinaciam intelligeres. Vestram editionem quanto cum desiderio expectent omnes vix credi potest. Quod ad me, agrestis ac insolita mihi barbaries illa forensis caninaeque facundiae, summa ac vehementiori cum aviditate ut eam efflagitem, facit. Neque revera tamdiu animus chronologiae cognitionis rudis existeret, si aliquis ordo legendi authores

ad

ad intelligentiam magnificae istius scientiae conducentes notus mihi fuisset, quem ut a notis tuis ad Eusebium exspecto, sic tandiu a proposito studio quiescere, atque desiderium istud lenire in animum meum induxi. Memini enim, & recte ni fallit animus, multoties mentionem a te nobis factam Introductionis cujusdam ad chronologiae cognitionem, quam ad initium notarum tuarum esses collocaturus. Non injucundum forte erit, Vir humanissime, si desiderium Domini *Bes*, mercatoris papiropolae tibi aperuero, cujus parentes, ni fallor, notissimi tibi fuere: is etenim non nisi 35. annum attigisse videtur, qui Arabicae linguae amantissimus, ante aliquot annos characteres Arabicos perlepidos fabricari curavit, quorum specimen ad te mitto; ac inter loquendum cum intelligeret a nobis te grammaticam Arabicam habere paratam, cum insigni illo dictionario, coepit expostulare, ut suo nomine rogaremus te, grammaticam prima occasione ad nos mittere, seque adeo eleganter excusurum eam, ut cogaris, velis nolis, illius laudare acuratissimam operam ac diligentiam, Quod studium decori maximo tibi, publico utilissimum futurum, pro aequanimitate tua, spero non recusabis. vale.

Lutetiae Parisiorum 3. Kal. Majas, anno domini 1604.

In Epistola Scaligeri ad Carolum Labbaeum cccxxx. quaedam sunt, quae ad hanc referri possunt.

EPISTOLA CX.

DAVID HOESCHELIUS

— Josepho Scaligero S.

Leidam.

L iteras & tuas, heros illustris, & *Casauboni* eodem accepi tempore: quibus utriusque vestrum de Notis in Phrynichum meis iudicium cognovi: sed laudem accipio καὶ ὑπερβολῶν, qua me ad majora invitetis. Idem *Casaubonus* observationes ad Procopium promittit: hunc enim, proximo vere, praelo (σὺν Θεῷ δ' ἐπιεῖν) subjicere cogitamus. Cum igitur tibi etiam sit Codex MS. & varietas librorum calamo exaratorum haud parum ad cujuscunque Scriptoris editionem conferat; cum etiam *Vulcanius* vester interpretationem differat: ne interim Graecae linguae periti thesauro illo careant, perquam gratum accideret, si tui etiam codicis copiam nobis faceres, & mercatu proximo huc per certos Francofurdum istinc profecturos mitteres. Chronici illius *G. Monachi* usum tibi quoque, nullo negotio, impetravimus. Sed absque tuis notis non expectabo. Quod si clarissimus *Vulcanius* quantum Graece imprimeretur, Latine, ad se missum, per negocia statim posset vertere (facto statim jam antea initio) ejus interpretationem subjiceremus, ea forma, qua Pausanias editus est. Eidem doctissimo viro pro Thesauro utriusque linguae, Philoxeni &c. gratias & ago & habeo: ἀντίδωρον mittam proxime, Phrynichum & homilias Chrysostomi κατ' ἰσθαίων. Idem a me sibi Cl. *Meursius* promitt-

Tom. II.

Y y

mit-

1 Videtur esse responsio ad Scaligeri Epist. cccxc.

mittat. In illo thesauro, p. 34. *Canalis* Graece redditur $\rho\acute{o}\upsilon\varsigma\epsilon\upsilon\epsilon\zeta$: legit *Vulcanius* $\rho\acute{o}\upsilon\varsigma$, $\acute{o}\epsilon\upsilon\zeta$: mihi (quod ad Horapollinem annotavi) propius a vero videbatur, $\rho\acute{o}\upsilon\varsigma$, $\rho\acute{o}\upsilon\alpha\zeta$. utrum magis placeat, ni molestum, fac sciam. *Casau-bonus* auctores, qui post Suetonium scripserunt, brevi nos habituros scribit. *A. Schottus* Senecam Rhetorem cum notis praelo commisit. ² Amicus quidam meus describit Indicem Graecum veteris Testamenti, a se magno labore constructum. Ei vere biblico Thesauro typographum quaero, atque id negotii *Bongarsio* dedi. Bene vale vir eximie.

Idib. Christi A. S. N. 1601. Augustae Vind.

² Credo esse *Conradum Kircherum* Augustanum, cujus concordantiae prodierunt Francofurti 1607. nam in praefatione inter amicos, qui institerunt, ut opus perficeret, principe loco memorat *Hoeschelium*, qui & diligentissimus fuit $\epsilon\varsigma\gamma\omicron\delta\iota\omega\kappa\tau\eta\varsigma$; nuper vero opera *Trommii* A. 1718. alia forma refecta.

EPISTOLA CXI.

D. HOESCHELIUS

Josepho Scaligero S. D.

Leidam.

Mitto specimen Procopii, heros Illustris, quanquam ea non est prima pagina futura, ut neque hac forma imprimetur, sed quartâ, ea propemodum, quam vulgo Medianam vocant. Primum Perficis, alterum Vandalicis, tertium atque ultimum Gothicis assignabimus. His feliciter $\zeta\upsilon\kappa\ \theta\epsilon\omega$ finitis, edere cogitamus e legationum codice quem habemus, Prisci $\tau\acute{\epsilon}\ \rho\acute{\eta}\tau\omicron\rho\omicron\varsigma$, Malchi Philadelphi, Dexippi Atheniensis, Menandri (haud scio an ejus, cui tam iniquus est Phrynichus) & Petri Patritii ac magistri. Nam ad horum editiones valde noster *Velferus* propendet, modo ad manus essent codices meliores. Nam quos habemus *A. Schotti* & e Bibliotheca Bavara, eodem tempore, manu eadem, ex eodem codice $\chi\theta\epsilon\varsigma\ \kappa\epsilon\ \pi\rho\acute{\omega}\lambda\omega$ a recenti Graeculo transcripti sunt satis mendose, neque integre, ut ex jam editis ab *Ursino* constat qui cum his nostris alicubi collati sunt. His appendicum vice adjungerem excerpta e Chronicis Diodori ($\epsilon\kappa\ \tau\acute{\epsilon}\ \chi\rho\omicron\nu\iota\kappa\acute{\omega}\nu\ \Delta\iota\omicron\delta\omicron\rho\epsilon\varsigma$) Eclogas e libro 21. 22. 23. 24. 25. 26. Horum principium est $\pi\acute{\alpha}\sigma\alpha\kappa\ \mu\acute{\epsilon}\nu\ \kappa\alpha\kappa\acute{\iota}\alpha\kappa\ \Phi\theta\upsilon\lambda\acute{\iota}\omicron\epsilon\omicron\nu\ \epsilon\sigma\tau\iota\ \tau\omicron\iota\varsigma\ \nu\acute{\epsilon}\nu\ \epsilon\chi\chi\sigma\iota$, $\mu\acute{\alpha}\lambda\iota\sigma\tau\iota\ \eta\ \tau\iota\omega\ \pi\lambda\epsilon\omicron\nu\epsilon\zeta\acute{\iota}\alpha\kappa$. $\alpha\upsilon\tau\eta\ \gamma\acute{\alpha}\rho\ \Delta\iota\acute{\alpha}\ \tau\eta\kappa\ \epsilon\kappa\ \tau\acute{\epsilon}\ \sigma\upsilon\mu\Phi\acute{\epsilon}\rho\omicron\nu\ \epsilon\lambda\pi\acute{\iota}\delta\alpha\ \pi\epsilon\theta\kappa\alpha\lambda\epsilon\mu\acute{\epsilon}\nu\eta$, $\pi\omicron\lambda\lambda\eta\kappa\ \pi\epsilon\theta\epsilon\varsigma\ \alpha\delta\iota\kappa\acute{\iota}\alpha\kappa\ \mu\epsilon\gamma\acute{\iota}\sigma\omega\kappa\ \kappa\alpha\kappa\acute{\omega}\kappa\ \alpha\iota\tau\acute{\iota}\alpha\ \gamma\acute{\iota}\nu\epsilon\tau\alpha\iota\ \tau\omicron\iota\varsigma\ \alpha\upsilon\tau\omicron\iota\varsigma$, $\Delta\iota\acute{\alpha}\ \kappa\epsilon\ \mu\epsilon\theta\acute{\rho}\omicron\pi\omicron\lambda\iota\varsigma\ \epsilon\sigma\tau\iota\ \tau\acute{\omega}\kappa\ \alpha\delta\iota\kappa\eta\mu\acute{\alpha}\tau\omega\kappa\ \pi\omicron\lambda\lambda\acute{\alpha}\varsigma\ \kappa\epsilon\ \mu\epsilon\gamma\acute{\alpha}\lambda\alpha\varsigma\ \alpha\pi\epsilon\rho\gamma\acute{\alpha}\zeta\epsilon\lambda\alpha\ \sigma\upsilon\mu\Phi\omicron\rho\acute{\alpha}\varsigma$, $\epsilon\ \mu\omicron\kappa\omicron\nu\ \tau\omicron\iota\varsigma\ \iota\delta\iota\omega\tau\alpha\iota\varsigma$, $\alpha\lambda\lambda\acute{\alpha}\ \kappa\epsilon\ \tau\omicron\iota\varsigma\ \mu\epsilon\gamma\acute{\iota}\sigma\tau\iota\varsigma\ \tau\acute{\epsilon}\ \beta\alpha\sigma\iota\lambda\acute{\epsilon}\omega\kappa$.

Nundinis proximis Homiliam in Judaeos misi, plura Chrysostomi vix misurus, cum Nobilem Anglum *Henricum Savilium* omnia $\tau\acute{\epsilon}\ \text{Joannis}\ \chi\rho\upsilon\sigma\omicron\theta\omicron\rho\eta\mu\omicron\nu$ opera in certos tomos digesta prelo adornet, e Variis Europae Bibliothecis suppetias magno aere quaesiturus. Bene vale, Vir Amplissime. Non. Junii Anno Christi 1602. Aug. Vind.

EPI-

EPISTOLA CXII.

D. HOESCHELIUS

*Josepho Scaligero.**Leidam.*

Mitto, heros Illustris, Procopii chartas, quotquot jam sunt editae, & secundae quidem Tetrados geminas, quum primae Tetradis chartas *Vulcanius* abs te jam accepit. Huic non unas misi litteras, quibus certior fieri volui, quid sperandum sit de ipsius interpretatione, cum jam pridem illam suscepit, neque vero prius poterit, quam integrius exemplar obtingeret, beneficio nostrae editionis, id cum munus praestitutum confidam, tua praesertim autoritate inductum, quae ut plurimum apud illum valet, ita ἐργασάμενος velim agere pergas, fructu cum Reip. literariae maximo. Eusebium tuum nondum vidimus, sed jam in portu esse intelleximus. ut primum reddetur, faciam ut scias; pro quo munere gratias ago & habeo quam maximas. Cratronum examina merito spernes, nec *Velfero* nostro probantur id genus scripta, quibus praeclare de literis meritorum famam laedi posse existimat quidem, sed apud cordatos frustra. Et omnino id genus hominum ἐκθεατερίζει εαυτὸν καὶ ἀδελφύματις. Interea nostro nos officio fungimur. Bene vale, Vir Magne. salutem plurimam adscribo Cl. V. B. *Vulcanio*. Aug. Vin. vi. Idus Septembris 1606.

Procopii finita essent jam historica, nisi Photio prior locus datus fuisset. Dabimus ergo operam, ut accessione libri περὶ κτισμάτων redintegrati a *Casaubono* (sic enim literis ad nostrum Polytarchum promittit) & notis tam tuis, quam ejusdem *Casauboni* edatur splendidior. Ego nihil unquam scripsi in illum librum. Mi *Vulcani*, uno verbo monere nos potes, an Procopium vertere constitueris. Sin autem, nos curabimus vertendum, aut vertemus ipsi. Nolo enim homines falli secutos fidem nostram, quibus spem feci te hoc facturum.

Responso est ad Epistol. Scaligeri cccxcvi.

EPISTOLA CXIII.

GEVERHARDUS ELMENHORST

*Josepho Scaligero Jul. Caes. Fil. S. D.**Leidam.*

AD 3. Non. Nov. multo imbre Hamburgum veni. In Westphalia quae passus sum, haud facile effabor. Pestis ita in omnibus pagis & hospitibus grassabatur, ut sub nudo coelo pernoctandum esset. diverterunt semel (me quidem reclamante) ad quendam rusticum, ubi nihil propius fuit, quam ut perirem. Inhorruui enim tam periculoso frigore, ut jam pestem timerem. Ve-

rum Deus adfuit, qui me servavit; cui nunc gratiam habeo & aeternam. haec de itinere. Clarissimo *Wowerio* adfui, & ea, quae mandasti, curavi diligenter, qui omnia quoque quam citissime transmissurum, nobis pollicitus est. Deus bone. quam magnifice se gerit? holoserico indutus est pallio, & quando in publicum prodit, undique a fervulis stipatur. omnia tam splendida & magnifica, ut fatigeris admirando. Censorinum & Minutium nunquam edidit. Ex libro cognitionis veterum novi orbis, pagellas aliquot vidi, (proprium & unicum exemplar reliquerat apud nobilem *Welferum*) ex quibus caetera quoque doctissima esse, conjecturam facio. Totum jam illum habet Tertullianus, quem ex cod. MS. Bibl. Vaticanae multis in locis facilliter emendavit; omnia facturum publici juris, cum plus otii nactus erit. Haec apud te, Illustrissime Scaliger, liberius sum elocutus, quod ne fraudi mihi sit te etiam atque etiam oro. Vale, magne Scaliger, & Elmenhorstium tuum amare perge. Hamb. prid. Id. Nov. An. cix. ix. cix. Biblia Islandica hîc non reperiuntur, mei jam ante scribserunt Kopenhagam, ut primum acceperimus faxo habebis.

Respondet ad haec *Scaliger*. Ep. cclv.

EPISTOLA CXIV.

GEVERHARDUS ELMENHORST

Josepho Scaligero S. D.

Leidam.

VIr illustrissime. Jam duos annos est, quod nullas abs te accepi, cum ego interea non intermiserim ex omnibus locis litteras ad te scribere. Nescio quo scelere me adversum te impiavi, quem ita aperte is contemptum. Praesentem te veneratus sum, ut omnium hominum eruditissimum: absentem tacitus colui, tanquam Jovem suum olim cultores coluere antiqui: facio idem adhuc, faciamque aetatem, licet tu parvi facis cultum meum & amorem. Quid enim ex alto isto silentio aliud possum augurari, quam mei oblivionem & contemptum. Nam si amares, non taceres. amor est importunus, non finit tacere. Etsi tu quidem tot negotiis implicitus, ut omnibus rescribendi vicem reddere non possis: Elmenhorstio tamen redderes; qui te ita observat, & colit: & quem tu olim (ut vidi non obscure ex sermone & litteris ad me datis,) amasti & habuisti inter tuos, incertum an nunc habes: ut meus ergo te animus est certe debes. Eheu cum hoc recogito, ut cor dolet mihi. Nonnullos (qui mihi male volebant) subdole frigidam mihi apud te suffudisse scio: an tu faciles aureis ipsis praeberis; nescio: ut homo es, non credo. Pluris certe te feci, & adhuc facio quam isti omnes. Verum haec haecenus. Ante annum ex Marburgo ad te scripsi de Scholastico quodam *Daniele Angelocratore*, qui edidit *demonstralem temporum descriptionem* (ut vocat suum librum quem *Mauritio Landgravio* inscripsit.) Ille nebulo aperte in te bacchatur. an
cum

eum librum videris adhuc nescio; si ejus copiam tibi fieri velis, mihi scribito. Legi nupere notas *Desiderii Heraldii* ad Arnobium: & miratus sum talem virum non doctiora protulisse. Eusebium tuum nondum vidimus. cur invides diutius tale bonum mortalibus? Multi sunt, qui suspirant eum & expectant. Have, vir Illustrissime, & si rescribere tanti putas, quibus tuas committas, serio jube ut recte curentur. Hamburgi. 111. Id. Aug. cio. 10. cv.

Respondet Scal. Epist. cclxv.

EPISTOLA CXV.

THEOBALDUS MEUSCHIUS

Ecclesiae minister, quae est in Zultzbach.

Josepho Scaligero.

Leidam.

S Alus sit tibi per Dominum nostrum Iesum Christum, *μεσίτην & ἱκήτην*, Magnificentissime Domine Schaliger. Ante biennium fere dedi ad Magnificentiam tuam literas de divino tuo *χρονολογίας* opere, & misi brevem quandam summam harmoniae Evangelicae. Eae literae num Magnificentiae tuae a bibliopola vestro redditae sint, equidem ignoro. Famulus sane aiebat esse traditas, sed nihil responsi acceptum. Cum igitur hinc bonarum literarum studiosus terras istas invisere cogitaret, volui tibi iterum pro divino tuo opere gratias agere, & simul gratitudinis ergo offerre hunc peregrinae linguae sane quam vetustum codicem, cui fortasse soli potest esse usui. Non tamen dubito T. M. ejus argumenti, si quod forte dignum scitu habeat, me quoque facturum esse participem. De harmonia mea judicium tuum summo desiderio expecto, praesertim de Sabbatho *δευτεροπέριτω*. Si non placet secundum a primo, intelligam a secunda paschatis primum, sc: festum solemne magnum. Nam & festa Sabbathā magna vocabantur, ut sensus sit: in pentecoste. Omnino enim puto ibi pentecosten notari, non pascha. Nam sane paschatis tempore non licuit aristas manibus terere, quod fecerunt hinc discipuli, sed pentecostes. Cuperem etiam scire rationes. M. T. quibus capita Matthaei a 4. usque ad 14. non ad secundum, sed ad alium annum ministerii Christi referat. Certe ut scribit, M. T. in opere suo fol. 520. ea quae ante 14. Matthaei, 6. Marci, & 9. Lucae narrantur, eorum, inquam, melior pars inter 5. & 6. Johannis interjicienda sunt: sed Johannis 6. notari tertium, non quartum pascha: Tertium autem notari Joh. 4. vs. 45. & ibidem tertiae, non secundae illius praecedentis *ἀποδημίας εἰς Γαλιλαίαν* fieri mentionem existimo. si. M. T. me in his erudire dignabitur, gratias agam immortales: si quoque hunc studiosum juvabit, mercedem a Deo accipiet. Quin & mihi filius est a Deo datus, qui ad studia natus videtur: si famulatio vel alio tuo auxilio dignus haberetur, paratus essem vobis illum mittere. Sed interim expecto vestras literas, Va-

le, Magnificentissime Domine Scaliger, & me admiratorem tui complectere, quem ego contra *Bruchtonium* quendam Anglum, & *Christmannum* Heidelbergensem pro viribus defendam. Iterum valeat Magnificentia tua, & garulitati meae ignoscat. postridie Calend. Ap. feria. 6. ad Vulgari 1602.

EPISTOLA CXVI.

THEOBALDUS MEUSCHIUS

Josepho Scaligero.

Leidam.

Salus & pax sit vobis a Deo unico fonte pacis & Salutis per D. nostrum Jesum Christum, Magnificentissime Domine Scaliger. Qui semel verecundiae fines transierit, cum oportet gnaviter esse impudentem. Id in me ipso verum esse experior. Cur enim ego miser homuncio, qui bonas literas vix primis labiis attigi ausus sum Josephum Scaligerum, C. Julii Caesaris filium meis interpellare ineptiis? Sed admirabile ingenium, quod in scriptis vestris elucet, me quasi stupidum reddidit & insensatum, ut instar infrenis equi ad Magnificentiam Vestram accurram. Tum & incredibilis humanitas, quae me in literis suis sanctissimi amici nomine dignata est, facit me audentio-rem. Mitto igitur non solum literas, sed filium quoque unice dilectum, *Ulricum Meuschium*, quem Deo vovi & sacro ministerio: qui est ingenio satis felici, sed timidiore. Si igitur M. V. ipsum in studiis suis juverit, non solum illum ac me patrem sibi penitus obstrinxerit, sed Deo etiam rem non ingrati fecerit. Sumus autem tenui fortuna, ita ut necesse habeat famulitium aliquod obire; vel mensae inservire, vel liberos informare, vel denique amanuensem praestare. Sin minus, non abhorreo eum ordinum Hollandiae stipendiarium fieri. Cur apud nos nolim, ex ipso intelligetur, quod pennae tradere non est tutum. Confido igitur ipsi a Deo & Magnificentia Vestra alicubi prospectum iri apud vos, si forte infimum gradum doctrinae Scaligerianae attingere possit. Porro, Magnifice Domine Scaliger, quae περὶ τῶν οὐρανῶν δόξα, non solum in Emendatione temporum pulcherrime ostenduntur, verum etiam ad me perscripta sunt, ea sunt talia, ut a me refutari non possint: Attamen liceat mihi oro, conjecturam de his aliam (si conjectura, & non potius demonstratio appellanda est) ex vestro penu promere. libro 2. cap. de Periodo Judaeorum Alexandria ex Iad Moisis Maimonis allegatur: Morem fuisse arboribus in Palaestina tempore Paschali florere. Hinc colligo tum fruges usquequaque maturas non fuisse, quoniam videmus arbores ante frugum maturitatem florere. Quod igitur de oblatione manipuli in 16. Nisan praecipitur, intelligi potest de ea maturitate, qua culmus ad justam magnitudinem excrevit; non tamen ita maturuit, ut dentii possit aut debeat. Unde tostii offerebantur manipuli ἐν τῇ δόξῃ τῶν πύσχα, ad spem frugum maturefcentium alendam & fovendam. Discipuli autem ἐν οὐρανῶν δόξῃ vellicant spicas, ac manibus tri-

tritas comedunt: quod sane 16. Nisan fieri haud potuit. Praeterea eodem lib. de periodo Judaeorum Alexandria magnificentia vestra ingeniosissime differens, post allegatum Josephum scribit: Duo igitur festivi dies, Sabbathum & Pascha &c. Quid si igitur festum pentecostes anno in feriam primam incidens, & Sabbathum immediate sequens, appelletur a Luca Sabbathum *δευτερόπρωτον*? Ac sane illo anno, qui fuit aetatis Christi 32. incidit pentecoste in feriam primam. Nam & Pascha praecedens inciderat in Sabbathum. Accedit quod messis triticea adscribitur pentecoste a Mose Exodi cap. 34. Sed satis mearum ineptiarum, Domine Magnificentissime. Deus Opt. Max. Magnificentiam vestram, mihi meoque filio atque toti rei literariae diu, servet incolumem. Amen. Zultzbach prope Francofurtum 23. April. 1603.

EPISTOLA CXVII.

GEORGIUS MICHAEL LINGELSHEMIUS

¹ *Josepho Scaligero.**Leidam.*

Illustrissime Domine. Jacebam in morbo, cum litteras tuas reddidit mihi *Gruterus* noster, quae me ita repleverunt gaudio, ut malum abiret. Quid dicam, ad tantam tuam in me benevolentiam, quam me indignum, quem sol adspiciat, nisi te supra mortales omnes colam ac venerer? Ac quamvis laudes abs te mihi tributas, minime agnoscam, ac sciam quam longe adhuc absum, tamen gratum & optabile, quod tam praeclaram de me opinionem concepisti, quam tantum abest, ut eximere coner, ut potius tibi persuasum esse cupiam, serio me jam dudum eo tendere, quo tua benignitas me pervenisse tam amice innuit. Sed de libello illo Anthallenfi, me beas judicio illo tuo tam praeclaro; certe auctor, quod probe scio, hunc unicum sibi scopum propositum habuit, ostendere, in religionis re, summi illius viri auctoritatem valere non debere, quod quia tuo judicio adsecutus, merito ille triumphat. Idem tecum judicant lumina illa Galliae *Thuanus*, *Plessacus*, *Casaubonus*, quorum elogia itidem habeo. Verum non satis notus tibi ego, si me talem foetum edere posse putasti, ac quamvis auctoris maxime intersit, nomen suum caelari, cum vivendum ipsi sit inter Jesuitas, & homines a vera fide alienissimos, tamen apud te dissimulandum non putavi, auctorem scripti esse *Petrum Denaisium*, Argentorati, quae & mihi patria, honestis parentibus & ampla in re natum. Is ab ineunte aetate mecum in bonarum artium disciplina conjunctissime vixit, nosque ambo, uno fere tempore, ab Illustrissimo Duce *Joanne Casimiro*, laudatissimae memoriae, in Consiliarios Electorios adsciti, sed ipsi deinde quie-

tior

¹ Responsio ad *Scaligeri* Epist. cccxv. in qua *Scaliger* suspicatus erat, *Lingelshemium* fuisse auctorem dissertationis contra *Lipsum* de Idolo Hallensi: sed *Lingelshemius* hic aperte auctorem indicat, vide & ejus epistolas ad *Bongarsium* LV. LVI. & seqq. nam & *Bongarsius* credebatur auctor. vide Epistolas Gallicas ad *Scalig.* II. 14. & *Placci* Theatr. Anonym. n. 760. *Deckerium* Jesuitam, qui & *Scaligero* adscribebat, laudantem hanc dissertationem videre licet in Epistola ad *Lipsum* DCCCXL. *Goldastum* vero editionem curasse ejus libelli ex iisdem epistolis *Lingelshemii* apparet pag. 196.

tior vita obtigit, factus enim assessor in supremo Imperii Tribunali, quod Cameram Spirensem vocant, & litteris & sibi vivere jam per XIV. annos potuit, ego fluctibus aulicis immersus perpetuo curis publicis agitor. Habes virum, qui pietatem, virtutem & litteras unice colit, atque is jam dudum in tui admiratoribus, ut qui ex aeternis ingenii tui monumentis uberes fructus se percepisse fatetur, quique modestissimus cum sit, tamen erigitur, & operae pretium se fecisse existimat, cum tibi probari tam exilem libellum videt. *Lipsii* Sichemensem nondum vidimus, sed negotium datum huc adferendi. Mirum fane tantum virum existimationi suae tam parum consulere. Legi cum maxima voluptate Elenchum tuum in *Serarium*, impudentissimum monachum; bono reip. Christianae factum, quod veteratores illos dignis modis accipis, ac pestes illas generis humani detegis. Posteritas in tuis summis laudibus etiam hunc animum tuum vere magnum admirabitur & probabit, quod sceleratae factioni, quae exitium pietati & bonis artibus molitur, tam cordate bellum quodammodo indixeris. Audio impudentes monachos istos, magnum librum, id est, magnum malum effudisse ² *Amphitheatrum honoris*, in quo boni omnes pro Calvinistis traducuntur, & impudentia etiam tuum nomen allatrare ausa. sed quid mirum, si improbissimi mortaliū, bonis infesti? accipientur dignis modis, ac sentient summae ipsorum impudentiae & improbitati opponi exactam doctrinam & pietatem. Grave mihi remoras injici utilissimo operi tuo Eusebiano, & confido te expugnaturum moratores istos, ac gloria merita etiam superstitem fruiturum. Sed nimis patientia tua abutor, ignosce quaeso loquacitati, & me inter clientes nominis tui studiosissimos habere, ac vale, Illustrissime Domine. Heidelbergae. IV. Kal. Jul. MDCV.

² De eo saepe occasio fuit agendi in Epistolis *Lipsianis* vid. ad CCXLVIII. CCCLXV. MDCCCXXXIX. & alibi.

EPISTOLA CXVIII.

GEORGIUS MICHAEL LINGELSHEMIUS

‘ *Josepho Scaligero.* ’*Leidam.*

Illustrissime Domine. Ablegatur ad Ordines generales ab Illustrissimo Principe Electore Palatino, *Hippolytus a Colibus*, Praeses Curiae, ut adsit consultationi de Pace. Is eo libentius munus hoc sibi delatum suscepit, quod tui compellendi, ipsi futura est occasio. Quum enim te ob immortalitate digna scripta tua coluerit & suspexerit semper: tum etiam de incredibili tua humanitate & comitate praedicantem saepenumero me audivit, ideoque litteras etiam a me flagitavit, quibus accessio ad te fieret. De eo aliud non dicam, quam quod sit mecum alter idem. Reperies autem ipsum dignum favore tuo, & gratias forte habebis quoque, quod conciliatorem hinc egerim. Summa cum
ani-

† Respondet Scalig. Epist. 316.

animi voluptate vidimus magni illius ² *Casauboni* ad te epistolam Florilegio tuo praefixam. Abunde satisfactum dignitati tuae adversus Sycophantam illum, a Romanis purpuratis ad maledicendum conductum, judicamus. Tu vero precibus illius tanti viri locum da, & qui amicis nihil negare didiceris, persuadere tibi patere, & nos tui nominis cultores bea scriptionibus illis, quas publicari abs te bono publico tam vehementer expetit. Nobis bona spes est, quod tibi dictum sit, obtinendi viri illius, & huc pertrahendi, quo integra libertate frui possit, & ea in re laboro ego pro virili. Vidimus & ³ Carmelitanum pecus in auctorem Idoli Hallensis incurrens, suspicatur monstrum illud, *Bongarsium*, nostrum summum, auctorem ejus scripti, in quo ille se magno honore maectatum judicat. Sed risi ego, quum *Lipsum*, politissimum scriptorem, nactum vidi vindicem, omnis mundiciae expertem, & nil nisi stabulum monachale olentem. Sed longior sum. tu *Hippolyto* nostro frui, ex quo de omnibus rebus nostris quae voles cognosces. Vale, columen litterarum. Heidelberg. Kal. Nov. MDCVII.

² Legitur illa etiam inter Epistolas *Casauboni* DLX.

³ Intelligit *Anastasi Cochelet* Carmelitae Palaestritam Honoris D. Hallensis pro *Iusto Lipsio* Anno 1707. editum, de quo & vide *Lingelsheimii* Epistolam ad Bongars. LXXVI. pag. 227. Scriptum vero ineptissimum esse cuiusvis insipienti statim patebit.

EPISTOLA CXIX.

GEORGIUS MICHAEL LINGELSHEMIUS

¹ *Josepho Scaligero.*

Leidam.

Illuſtriffime Domine. Longe gratiffimae mihi fuerunt litterae tuae, quod non tantum molestas tibi meas minime fuiſſe intelliſſerem, ſed & Praefidem noſtrum *Hippolytum*, quo mihi conjunctior non eſt alter, tibi probari. Votis certe ſaepe vobiſcum ſum, & tam diuturnam cariffimi capitis abſentiam aeſſuo non amplius fero animo; praefertim quum & tuum accedat prudentiffimum judicium, vel inanem fore hanc omnem actionem; vel damno reip. ceſſuram. nam nemo noſtrum judicare poteſt, Hiſpanum eo anguſtiae reſactum, ut tam infames condiciones pacis inire cogatur, ſed potius perſuaſum habemus, conſtituiſſe ipſum ſemel fallere hac ſpecie, itaque nihil non tandem permittere, dum ſcopum ipſe ſuum adſequi poſſit: ſed futura *Θεῶν ἐν γούνασι*. Tot hoſtes ingruere in literas & literatos tecum indigniſſime fero; tantoque magis afficior, quod etiam nos monſtra fovemus, & toleramus eos, qui gloriam ex inſectatione bonorum affectant apud imperitos, ſed illos, quia accepti pro meritis, plorare ſinamus, & ſuum ſibi cor edere. Satiram ² *Menippeam* beneficio *Hippolyti* noſtri nactus ſum, & maxima cum voluptate legi; periit ſcelus iſtud hominum, & exitio litterarum natum, ſed nimis a bona

Tom. II.

ZZ

ma-

¹ Reſponſio ad *Scal.* 316.

² *Danielis Heinfii* contra Scioppium.

manu. Magni feci semper auctorem festivissimi, & multo sale conspersi scripti, & coram cum ipso arctissimam inii familiaritatem, quum ornamentis faeculi in vestra Batavia frui datum. Nebulo ille ad extremam lineam impudentiae pervenisse videtur, adeo ut ex ipsa infamiae magnitudine gaudium capiat, nam in ista luce comitiorum Imperii Ratisbonae, publicavit praeconium indulgentiarum ab Antichristo sibi pro meritis eximiis concessarum, & typis adeo vulgavit, cujus specimen Praefidi nostro antea misi, apud quem videre licebit, sycophantam istum Deo & hominibus illudere, & pudorem omnem exuisse. verum detestabilem illum in maximam malam crucem mittamus. Publica laborant, & jam dissoluta Comitia Imperii, nulla re gesta, tantum publice innotuit, quanta in Imperio distractio sit animorum; gratia tamen Deo, quod major quam umquam consensus fuerit eorum, qui Babylone excefferunt. Constanter nunciatur, *Matthias* Archidux exercitum xx. millium in fratrem Caesarem ducere, & Moraviam petere. Mihi merae hinc tenebrae: sit Caesar ineptus ad gubernationem, sicut Archiduces inter se ante annos paucos statuerunt; & Aulici consiliarii digni sint castigatione: num propterea fratrem decet, qui & subditus & administer, ut is hero & fratri suo vim faciat? non adsequor, quidquid id est, & scio Archiduces omnes Romanae Bestiae addictissimos, & Hispanorum consiliis, addo & Loiolitarum duci: & constat nobis, quum *Matthias* Hungaris libertatem religionis concessit, simul Ecclesiasticis pollicitum scripto, se in omnes occasiones intentum futurum, ut una Catholica religio stabiliatur. Dies docebit, & imminere videtur, ut tu sapienter prospicis, insignis in Europa mutatio. *Jungermanni*, domestici olim mei, mihi que carissimi, literas mitto, & nihil tam in votis habeo, quam insigni aliquo officio, quanti benevolentiam tuam aestimem, demonstrare. Servet te Dominus incolumem bono reip. & literarum. Vale, Illustrissime Domine. Salutem audebone adscribere *Heinsio* Vindici? o virum! Heidelbergae 22. April. 1608.

EPISTOLA CXX.

JOHANNES BUXTORFIUS

Josepho Scaligero S. P. D.*Leidam.*

R Edditum est mihi mense Martio D. *Jacobi ad Portum* Bernatis, amici mei Epistolum, מעט חכמות ורב האיות. Inter alia scribit, T. M. perhonorifice de me in privato colloquio locutum esse, ac laudabiles in lingua Hebraea profectus mihi ascripsisse. Quid? an etiam cum acutissimo *Drusio*, aliisque incomparabilibus in lingua Hebraea artificibus ego comparandus? tacitus subrisi, cogitans mecum מר איכא שמיא כלפי חבורתא. Anser inter olores obstrepens, ac omnino נהרי בוכמן ego apud tales. Novi quam mihi curta sit domi suppellex. Ingenita mihi a natura verecundia non concedit mihi in magnis ambulare, לעולם

dictum est R. Eliesaris in Sanhedrin cap. 11. pag. 92. Inter Judaeos Cracoviae, Pragae & per Germaniam passim aliqua mei notitia ex literis Hebraeis, quas saepiuscule ad illos transmitto. Studio semper habui viros doctos in lingua Hebraea amice venerari, ut per quaestiones aliquid ab eis discerem. Nunquam enim tales mihi praeceptores praesentes unquam contigerunt, sed quantuloscunque profectus habeo, privato labore & Dei benedictione acquisivi. Inde *Drusium* amare & admirari coepi, ac praeter ipsum unum & alterum in Germania, cum quibus frequenter per literas colloqui soleo. Plerique, ut notum, sunt superficialii, qui fundum plumae instar non petunt. Maximopere optandum, ut studium Hebraeum ardentius in scholis Theologicis Germaniae excoleretur. Cum frigent docentes, quomodo inflammabunt discētes? Introductionem in versionem Rabbīnorum egone daturus essem? ut amicus scribit. Fecit id jam ante *Genebrardus* Parisiensis professor, qui tamen observationibus & notis opus haberet. Magnum id prae meis viribus opus esset, nisi forte aperire velim, qua ratione ego ingressum in illorum scripta invenerim, qui nullum ad hoc iter vivum ducem unquam habui. Mihi certe non admodum infeliciter ea via successit, quam etiam postea privatis quibusdam discipulis monstrare conatus sum. Scribit praeterea amicus *Ad Portum* M. Tuam petere a me Itinerarium R. Benjamin, & Lexicon Rabbīnicum *Davidis de Pomis*, Judaei Itali. Itinerarium dono mitto, quod a Judaeo quodam satis aēgre impetravi. Lexicon non nisi summa incommoditate missurus essem, cum tantum unicum exemplar habeam, cujus marginem novis vocabulis quotidie compleo, quae aliquando in ordinem redigam, & in justum Lexicon, mole contractius, sed numero vocum auctius quam vulgo sunt, congeram, si Deus vitam & vires ingenii concefferit. Sed & hīc mihi in mentem venit, quod legitur in Sanhedrin cap. 11. pag. 103. באחר דמר ביתא. תלא זיניה קולבאי רעיא קולתיה תלא. Magnorum hoc artificum est, non misellorum professorculorum. Interea etiam in mentem venit illud Eliphasi Themanitis ad Jobum אדם לעמל יולד, ubi pulchre Kabalici explicant על מנת ללמד. Labore Deus mortalibus omnia vendidit, absque labore nemo quid consequitur, juxta illud אי לאו דלינא חספא לא משכחת מרגניתא תוחיה. Misit ad me D. *Drusus* praeteritis nundinis, an ante annum? responsum M. T. ad Jesuitam *Serarium*, quod magna cum oblectatione legi. Promisit & *Drusus* suum responsum, sed id nondum vidi. Digne *Serario* isti larva detracta est. Incidi his diebus in librum *Eliae Levitae*, cui nomen Masoreth Hammasoreth, (quem ante annos decem privati exercitii causa Latinum feci) ac disceptationem de origine & autoribus punctorum & accentuum Hebraicorum perlegi. *Elias* per מתקני התקור primos autores, ut puto, intelligit, ac si in monte Sinai data essent, scribit, futurum fuisse, ut id in priscorum scriptis alicubi reperiretur annotatum. At in priscorum libris nullam punctorum mentionem reperiri ait. Huic Sententiae adversantur, qui ex libro *Zohar*, (quo vix alius antiquior) haec citant, לית לכל אהון רשו לגמלא להאי ספרא ולהאי כפרא: כר

בר בנקרי אתון כלח כגופא בלא נפשא כר אתן נקרי הא גופא אתקיים בקיומיה דמין נקורתא דמשח
 כגופא דאניש. Et in libro הבהיר, qui itidem satis antiquus: כגופא דאניש. Sed de
 hac materia alias amplius mihi cogitandum. Monuit me *Drusus* de integro
 libello Epistolarum Hebraicarum familiarium edendo. Forte in Belgio essent,
 quibus hic liber placeret aut usui esset. In nostris Academiis paucissimi sunt,
 qui consue in studio Hebraeo progrediuntur, ut vel scriptitare vel balbutire
 aliquid Hebraeum audeant, unde non magnopere mihi iste labor cordi fuit. Si
 tamen hoc qualicunque labore industria Studiosorum incitari & promoveri pos-
 set, libenter hoc praestarem. Possem adjicere alium libellum, in quo totus
 stylus fere biblicus est: possem etiam adjicere varias formulas exordiendi, con-
 cludendi, gratias agendi, salutandi, inscriptionum & similium rerum, quas ex
 manuscriptis Judaeorum Epistolis mihi aliquando collegi ad meos privatos usus.
 Sed Deus consilium & vires dabit. Temerarius non immerito M. T. videor,
 qui imperito & prolixo sermone eam delineam. Hoc quidquid peccati est,
 amico ascribendum, qui ad scribendas hasce acriter me instigavit, ועתה אתה אדוני
 תמסוך עלי חוט של חסד ותכמה עלכל פשעי אהבה. Vale, Vir illustris & magnifice, ac
 has meas literas aequi boni consule. Scripsi Basileae 3. Aprilis Anno 1606.

Respondet Scal. Epist. ccxlii.

EPISTOLA CXXI.

JOHANNES BUXTORFIUS

Josepho Scaligero S. P.

Leidam.

UT homines tempore multiplicati frumenti ac abundantis musti, aut cum
 partiuntur spolia, exsultant; ita ego, Vir Illustrissime, acceptis tuis li-
 teris laetitia affectus sum. כי מי אנכי אדוני המרומם והנעלה ומי ביתי כי הביאותני עד הלום
 ותפקדני בבקרים / הלוא אתה אדוני אביר הרועים מובץ ההשגות מעמר התבונות פשיש החכמים עמוד
 הבנה ואנוכי תולעת ולא איש / בער ולא אדע / נלעג לשון ולא בית אדם לי. ותקטן עוד זאת בעיני
 דוממותך והנאת גם את עבדך עבך בבדית האהבה. אשריני וטוב לי כי בהמה שמן חלקי וכסי ריזה.
 Satis magnum gaudii argumentum mihi fuisset, vel verbulo favorem aut ani-
 mum benevolum indicasse: at non tantum hoc Epistola humanitate plenissima
 testatum reddere, sed & in amicitiae foedus cooptare, beneficium est, quo
 nullum majus mihi accidere potuit. Est itaque quod de summo hoc bono mi-
 hi gratuler, imo in Deo gaudeam, qui me plane inscio, contra omnem spem,
 tuum animum mihi conciliavit. Pium gaudium est, laudatis placere viris. Pii
 vero etiam animi est, non in hoc tantum acquiescere, sed ulterius vehi, ac
 dispicere, quorsum Deus ignotos animos inter se conciliet ac devinciatur.
 Quod dum cogito, fateor me accendi ad ea, ad quae antea frigebam. Com-
 moverat jam antea nonnihil animum meum *Drusus*, ad pertexendas Epistolas
 Hebraicas, sed nondum plane permoverat. Nunc cum tuum, Vir illustrissi-
 me, judicium accedat, nihil est quod negotium hoc amplius subterfugiam aut dif-

differendum censeam, nisi in Deum ipsum aut vocationem meam peccare velim. Si vos, viri vere magni, studia haecce mea approbaveritis, non est quod innata verecundia me absterreat. Annitar itaque, ne mea opera amplius desideretur. Ante aliquot jam annos converteram in linguam latinam librum *Eliae Levitae* de Accentibus Hebraicis, cui אֵלִיָּהוּ לֵוִי nomen, & librum Masoreth Hammasureth, in quo multa praeclara ad rem Grammaticam pertinentia, tum etiam Masorethicarum notarum ratio traditur: hos cum quibusdam explicationum notis edere an consultum, aut etiam e re Scholae Hebraicae? Multo tutius aguntur, quae virorum prudentium applausu fiunt: ideoque & de hisce libris iudicium tuum audire desidero. Sed jam de quaestione quadam agam, quam mihi proposuit vir in Hebraicis & Mathesi bene eruditus, nunc in Academia Marpurgensi Professor: Nempe constat primum anni mensem lunarem esse Nisan, in quo Deus voluit Pascha Judaeos ordinarie celebrare. Jam quaeritur, quisnam inter 12. vel 13. menses anni lunaris sit pro Nisan habendus? Judaei uno ore respondent, eum esse primum anni mensem, quem cyclus eorum parvus חֹדֶשׁ קָטָן demonstrat. Christiani doctores veteres & recentiores aliter respondent, nimirum eum esse primum mensem anni lunaris videlicet ניסן, cujus plenilunium quam proxime subsequitur aequinoctium vernum, quod omnes in primo arietis gradu constituunt. Hanc esse causam & sententiam Doctorum Christianorum, puto manifestum esse: de ea multi dubitant, cum nullo e sacris scripturis testimonio probari possit. Neque etiam ex Talmud patet, quod Tekuphae olim, ad indagandum primum mensem anni Ecclesiastici Nisan, adhibitae fuerint. In hujus quaestionis explicatione vir ille sic statuit: Quemadmodum (scribit) Ecclesia a Judaeis accepit ordinem dierum hebdomadae, sic ab iisdem quoque ordinem mensium anni accipiendum fuisse: Et sicuti Ecclesia habuit eundem cum Judaeis cyclum lunarem, sic quoque eandem cum Judaeis illius cycli applicationem sequi haecenus debuisse, atque in posterum etiam debere. Hoc enim si fieret, nunquam Christiani suum Pascha aliter quam juxta decretum Nicaenum celebrarent. Tu, vir Illustr. liberrimo tuo iudicio de hac causa controversa facile judicabis. Praeteritis nundinis alius Hebraeae linguae Professor petiit a me, per quae media ac subsidia, linguae Arabica, Aethiopica, Americana addisci possint. Respondi me ad linguas orientales discendas nulla alia vidisse praecepta, quam *Postelli* librum de 12. linguis. Scribit etiam in libris *Scaligeri* fieri mentionem Glossarum Latino Arabicarum, sed ubi ista reperiantur aut extent, se nescire. De his etiam mihi nihil constat. Tu si hinc aliquid in medium consulueris, facies viro eruditissimo, & variis linguis addiscendis addicto, rem summe gratam. Sed Epistolae modum jam excessi: ideoque telam praecidam. הַחֲבִירָה מְכַרְעַת הַכֶּף, ideoque longior, quam fas erat, fui. Vale itaque, Vir Illustrissime, & quem semel amare coepisti, amoris tui aura fovere pergito. Scripsi Basilcae 4. Septemb. An. 1606.

Responsio ad *Scaligeri* 243. & *Scaliger* respondet sequenti.

JOHANNES BUXTOREIUS

¹ *Josepho Scaligero.**Leidam.*

SUMMA tua, vir Illustrissime, est humanitas, qua me secundo compellare dignatus es. Singularem Dei gratiam fieri iudico, quod Tua maxime & aliorum clarissimorum virorum benevolentia mihi conciliatur. Ea sentio me ex verecundiae somno excitari, & haud parum confirmari. De Lexico *Davidis de Pomis* tuum cognovi iudicium. Certe neque meum aliud est. In Rabbinicis & Chaldaicis ordinem habet, qualis est inter crispas pilas. Multa, plurima, infinita desiderantur; probe novi. Testatur id meum exemplar, in quo omnes margines aliis vocibus complevi. Commendaveram autem illud studiosis, eo nomine maxime, quod putarem extare & haberi posse. Ecquae enim hinc subsidia? *Munsteri* Lexicon venale esse desiit. *Aruch R. Nathan*, quis studiosorum intelligit? Id quod operi Hispanico adiectum, quotusquisque habet aut habere potest? Et quid praeterea hinc subsidii? Quis hanc penuriam supplebit, defectum refarciet? Rogandus Deus, ut aliquem excitet, qui hinc studiosis subsidium ferat, laborem suscipiat ac superet. Si mihi ut animus, ita otium esset, cogitarem de hoc opere. Temporis multum, dicam plus, in aliena quam propria professionis meae studia impendere cogor. Hac hyeme *Sebastiani Serlii* Libros v. de Architectura ex Belgico idiomate in linguam Germanicam converti. Quorsum id? scilicet ut pascuum habeant irriguum שחלי זירת כנב לשלחי. Hae plantulae, quae Dei benedictione quinque sunt, ac sexta cum bono Deo hoc vere orietur, ex mea professione nullum succum habere possunt. Nosti, און קמח און תורה. At בחר יהוה יראה. Et אחרו כנב, כנב ב עתא מנולגתא משהת קייסי כולתא. Et עשר השמח בחלקו. Et פני הנהר de Punctis vocalibus. Autor istius libri vixit Jonathanis filii Uzielis tempore, & Hillelis ac Schammai, vel saltem in illorum vestigiis. Author Chronici Hebraei, cui Tzemach David nomen, ponit eum circa annos triginta ante Christum. Hoc Chronicon prodiit Pragae Anno 92. id est 92. superioris seculi, ac ab initio mundi ad istum usque annum historiam Judaicam complectitur, continua annorum distinctione. In libro Jochasim de autore libri Bahir est

¹ Responsio ad *Scaligeri* 244.² Hoc in Epistola *Scaligeri* non legitur.

est pag. 20. sub titulo נחמיה. Videtur ergo inde probari, non adeo recens punctorum esse inventum. Librum Zohar scribis esse recentiore, quam Thalmud. Ejus author statuitur R. Schimeon Ben Tochai. Hic vixit paulo ante R. Jehudam Hannafi, vulgo Rabbenu Hakkadesch dictum, circa annum Christi 120 aut 130. Sed R. Schimeon numeratur ברוך שלישי מהתנאים, R. Jehuda ברוך, circa annum Christi 150. De hoc Schimeone & ejus filio refertur historia fabulosa in Schabbath pag. 33. b. In Jochasin pag. 42. notatur ab hoc Schimeone Zohar non esse absolutum, sed a discipulis ejus, neque evulgatum nisi post tempora רבנן, imo ipsum ה"ראש ne vidisse quidem. An tam longo tempore liber iste delituerit, nescio. Ut ut a discipulis R. Schimeonis fuerit absolutus, fuit tamen ante Thalmud scriptus. Nam ducentis & 20. aut circiter annis post Christum fuerunt Mischnajos absolutae; Anno 230. aut circiter R. Jochanan composuit Thalmud Hierosel. Circa annum millenarii quinti ר"ס, nempe 500. post Christum obsignatum Thalmud Babylonicum, Non dubito itaque, quin ante haec tempora liber iste conscriptus sit, etsi diu delituerit. Sed dum haec in Cronico Tzemach. David disquiro, incido in Hillel Hannafi, nepotem ex filio R. Jehuda Hakkadosch dictum, qui notatur ad annum Christi 340. ibi notatur istum Hillel Hannafi composuisse סדר העיבור על דרך תקופת רב ארא כפי הזמן והצורך sicut scribit Rambani cap. 5. in Hilehors ק"ה id est, קירוש החורש. nempe in Tractatu זמנים. Vidi illic omnia tractari, quae ad lunae cognitionem necessaria sunt. Sed quâ causa Judaei numerant a condito mundo 5367, nos quos & quot? Ego, ut numeri minores sibi respondeant, & cum annis Christi conferre possim, soleo addere annos 40, ut ש"ק ut nunc numerant, additis 40, venit ultimus unus 70. Sed quo labor? cognovi te delectari Itinerario R. Benjamin: nunc tibi dono mitto aliud a R. Petachja notatum. Id si placet, gaudeo: fin minus, oblecta te in Medrasch in Jonam. Hilarabunt te fabulae. Praeter has nolo te a rebus feriis avocare. Vale itaque, & optime vale per Servatorem Christum; scripsi Bas. 17. Martii. 1607.

EPISTOLA CXXIII.

PAULUS DUMAY.

D. Josepho Scaligero.

Leidam.

Nescio, Clarissime Vir, & adhuc dubius sum, an dextro alite epistolium nostrum ad te pervenerit; licet enim praeposteri pudoris & ignaviae a te jure optimo argui possim; discendi tamen desiderium judicii cujuslibet asperitatem nimiam emolliet, tuique nominis ubique terrarum diffusa nobilitas, aviti privatique honoris laudabili ambitu juvenis audacia licet conamina suscipere non dedignabitur. Emendabam nuperrime Ulpiani J. C. verba ad l. 49. item legato de leg. 3. *Item mancipia alia, puellae, forte acus queis comatas mulie-*

res exornant : evulgati Codices suggerunt, *puellae fortassis, quas sibi comatas mulieres exornant*, quae verba hoc modo restituit *Jacobus Gijacius*, x. Obs. c. 16. *queis sibi comas mulieres exornant* : Castigatio nostra, ut vides, verba legis veterii antiqua serie contexta non immutat; ornatricibusque (quae ibidem *puellae* vocantur) acus subnectit; quemadmodum superiori parte dictae legis, *lecticariis fellam & burdones* J. C. addidit: nec mirum quod acus, sive ut est in V. Gl. *Isidori*, calamistratorium inter mancipia connumerentur, prius enim *lecticariis lectica & sella* conjungitur; Easdem rationes tibi deducebamus 9. Kal. Septemb. ad pleniorē fidem lectionis novae: sed ad veteris securius firmamentum *Petronii* testimonio utebamur, apud quem legimus *Trimalcionem* capillatos pueros privatim domi nutritivisse; sic etiam *Ulpianus* recte puellas sive ornatrices legato muliebri contineri respondit, quas sibi comatas ad procacioris licentiae lusum mulieres exornant. Superest, ut data venia, quandoquidem *Arbitrum* testem locupletissimum lectionis antiquae probationi adhibuimus, ejusdem *Satyricon* accuratius perscrutemur, cujus grata varietas saepius animum lepore interdum illepido titillat, eademque dispari ratione ordine verborum interrupto nauseam parit, ita ut ad majora mentis levamina pertinaces orationis incultae hiatus (utpote *Archiatri filius*) sanare coner. Occurrit etiam, (disciplina civili quam insequimur temporibus otio praestitutis,) remedium ad illa verba; *Itaque in arcula herbarum omnium succos Democritus expressit*; vulgo legimus *hercula* cum asterisco, sed nos protractiorem lineam *h. litterae i.* subnexione contrahimus, deletō asterisco, ita ut recte dicamus *in arcula*. Hujus lucubrationis cunabula tibi arridere confido, apte enim ad id, quod *J. Lipsius* Lect. Antiq. lib. i. c. 8. ex *Luciano* in *philopseud.* annotat, quem in hac emendatione [*e pergula*] non omnes sequuntur, nec mirum, difficile enim ut unicuique verborum correctio pro voto contingat. *Arculam* autem pyxidem interpretor: qua utuntur pharmacopaei, quorum industria herbarum varii succi intus continentur, expressi quadratis litteris in fronte ipsius pyxidos. His quaestionibus epistolicis ignosces, Illustrissime *Scaliger*, mihi que pariter, quod harum nodum tibi solvendum proposuerim. Vale, Vivis-
corum lumen. Lutetiae Parisiorum 4. Id. Novemb. MDCVI.

Scaliger Epist. cccxxix. excusat negligentiam, quod ad binas Epistolas non responderit statim: ceterum locus ille *Petronii* cap. lxxxviii. varie vexatus, & de eo etiam vide *Heinsii* & *Graevii* Epistolas clxxii. & seqq.

EPISTOLA CXXIV.

JACOBUS BORAETIUS CHANLIEU

*Josepho Scaligero.**Leidam.*

C Itius omnino, quam voluissē, ad te scribo: quaerī' cur ita? ratio eccilla, est ad manum. Nolui priusquam certiorē eadē facere te possem
de

de Seneca illo olim tuo, quem bibliothecam *Dalecampii* capere arbitraberis. sed qui tamen non inventus est, quod liquido asseverare audeo, quoniam volumina nulla, neque membranae, nulli codices, libri, siue cubant, siue adstant in forulis, vel etiam in pulpitis conspiciuntur, aut in situ & pulvere ibi delitescunt, quos omnes non excussimus, non manibus sumpsimus, ut inde cognoscerem ecquid compareret. sed frustra. quocirca non est, quod unquam sperare possimus vel debeamus, illud exemplar recuperare posse his tractibus. subdubitat tutor a plagiariis quibusdam Lugdunensibus statim post mortem defuncti illud subreptum fuisse, & antequam ad minorum patrem Bibliotheca illa pervenisset. An factum hoc sit, opera amicorum, quos plurimos Lugduni habere potes, curabis expiscari. Intereadum male me habet, quod expectationi tuae respondere non potuerimus. si effectum defuit, ut certe est, saltem ingenium & voluntas & conatus nunquam, quod eodem animo testatum tibi relinquo, quo me semper tui studiosissimum fore glorior. Vale, eximium orbis decus, meque amantem redama. Rotomagi ix. Kal. Mart. 1607. Audio Eusebium tuum, magnum, credo, opus in lucem nunc missum, quem librum mihi videre non contigit, quod huc ad nos nondum pervenerit.

Vide Epistolam *Schotti* ad *Lipsium* xcii.

EPISTOLA CXXV.

MONSIEUR.

TAy honte de vous escrire sans vous envoyer nostre recueil concernant le Concile. Il ne tient pas a moy : mais a un mauvais garçon d'Imprimeur, qui s'amuse a faire des fadaïzes de livrets pour des colleporteurs, au lieu de travailler a un petit ouvrage sérieux, & duquel, s'il avoit jugement, il peut faire grand profit, s'il ne me trompe, comm' il a fait il y a deus moys, j'espere que nous l'aurons dans huit ou dis jours. je ne tien pas un homme, non pas François seulement, mais pour homme, qui apres avoir leu les pieces, qui sont veritables, & dont nous avons les originaux, puisse appeler Concile l'assemblée de Trente, duquel on recommence de vouloir parler. l'accord des Venetiens est fait par la seule entremise & negociation du Roy, le quel l'a escript a Monsieur le P. Pres, pour le faire savoir a tout ses bons serviteurs. Je nay peu recouvrer la lettre, dont je desire vous en envoyer copie : parce que j'ay esté pressé d'escrire. Monsieur Dupuy, qui est a Rome, m'a envoyé une Inscription Grecque fort grande & belle, trouvée in via Appia & me charge de vous en faire part. Ceque j'eusse fait a present, mais Monsieur Casaubon, qui l'a vëue & restituée & interpretée, la fait imprimer pour la vous envoyer. Il m'avoit prié de ne vous en escrire point; jusques a ce que vous l'eussies receu, & par la mesme voye Vous avec sceu la grande resjouissance de la naisance d'un second fils de France, qui n'a point encores de nom asseuré : Lon en a fait icy de grandes joyes. je nay sceu descouvrir l'occasion de la hayne des Jesuites contre Bodin, mesmes en particulier de ce P. Gontier, lequel en son sermon a fait sa genealogie, praefatus, qu'il alloit faire le fol, & a dict que sa Mere estoit descendue des Paleologues, comme Scaliger l'a

Tom. II. Aaa escript.

escript: le tout pour monstrer, qu'il estoit grand & François. Il ny a icy rien de nouveau, qui se puisse escrire. Monsieur le president Janyn s'en va traicter en Holande de la part du Roy: vous en saures plus de nouvelles que nous. Je vous baise tres humblement les mains & prie Dieu, Monsieur, quil vous donne en sante tres longue & tres bonne vie. de Paris ce v. May 1607.

Vostre bien humble & tres obligé serviteur.

J. GILLOT.

Jacobi Gillotii senatoris Parisiensis multae epistolae sunt inter Gallicas ad Scaligerum scriptas, & editas A. 1624. per Jacob. Revium, quae hodie raro reperiuntur. Inter illas una est lib. III. 49. quae ostendit hanc circa Februarium 1607. esse scriptam: nam ibi etiam de Jesuitis in Bodinum declamantibus scribit. Inscriptio vero illa in via Appia reperta, & notis a Casaubono & deinde a salmasio illustrata fuit. Utriusque commentarios Musaeo suo inseruit Cl. Crenius A. 1699.

EPISTOLA CXXVI.

MONSIEUR.

JE ne puis a mon grand regret rien trouver, qui merite que vous y employes vostre temps a le lire: mesme du subject, que je veoy, qui vous plaist maintenant. J'espere, que nous ramasserons de bons & rares traictez, concernant la liberte & les droict de la France, pour monstrer, qu'elle s'est tousjours garentie de cette puissance Transalpine, qui n'a aucun fondement, qu'en la teste des fous, n'y eü progres, que par la lascheté, ne quid pejus dicam, des ministres des monarques. Je vous envoie un traicté, qu'en avoit faiët defunët Hotman, qui pendant la Ligue fut advocat du Roy, frere du Docteur Jurisconsulte. Il avoit estude & sçavoit de bonnes choses: & peut estre trouverez vous en ce petit livret quelques passages non communs. Depuis qu'il se fut degorgé de la Ligue, il le refit & corrigea en mieus. J'espere le recouvrer. Et si je l'ay il fera compagnie a trois, que j'ay de ce mesme subject: dont l'un est fort ancien de feu Monsieur Capel advocat du Roy. Je me delibere d'en amasser trois ou quatre, pour leur faire veoir le public, & d'autres petits traictéz, qui feront un autre volume. Je ne travailleray en ma vie, qu'a ce la, afin que nous laissions quelques monuments, & reliques veritables de nostre pauvre nation, la plus gourmandée & asservie aus Jesuites, Feuillants & Cappuzzins, que jamais fut nation. Jam libera nulli lingua manusque sua est, voces & scripta notantur. j'escris a Monsieur Bodius pour le prier de me donner quelques vers en la memoire de defunët Monsieur Rapin, qui a grandement meritè des lèttres. Il m'a laissé la disposition de ses oeuvres par son testament avec Monsieur de Saintemarthé. J'espere vous faire veoir des pieces, qui vous plairont. Je n'ay pas meritè de Monsieur Bodius cette faveur, je vous supplie m'y ayder. Je dresse un petit tombeau en son honneur, & si je ne craignoy estre trop arrogant ou presumptueux, je desireroy qu'il fust honorè de vostre nom seulement, qui par tout, ou'il est mis, faiët estimer & la chose, & la personne. je vous baise tres humblement les mains.

Nous

Nous n'avons rien de nouveau. Le Roy est icy pour 2. ou 3. jours, l'on ne parle qu'i du mariage de Madamoiselle de Merceur avec Monsieur de Vendosme: La fille ny a aucune volonte, la mere & la grande mere ne la veulent forcer, Le Roy est fondè en contract, id est, articles accordez lors de la reduction de la Bretagne: il veut que la fille soit sequestrée entres les mains de la Royne. Res est ardua & se traite au Parlement.

Monsieur.

Du XIV. Juin.

Vostre treshumble & tres obligè serviteur.

J. GILLOT.

Haec epistola scripta est anno 1608. nam eo, circa idus Februarias, obiit Nicolaus Rapinus, ut scribit Scaev. Summarth. Elog. lib. v. p. 272. ubi & Rapinum sibi & Jacobo Gillotio Poëmata edenda testamento mandasse prodit. Quis vero Bodius ille sit vix scio. reperio Robertum Bodium Scotum, fuisse in Salmuriensi Academia, deinde in Patria Theologiae doctorem. Antonii vero Hotmanni tractatus Gallicus de libertatibus Ecclesiae Gallicanae editus inter alia opuscula A. 1616. vid. Le Long. Biblioth. Histor. de la France. p. 2327.

EPISTOLA CXXVII.

IGNATIUS HANNIEL J. C.

Josepho Scaligero S.

Leidam.

J Amdudum te amo, Vir Nobilissime, & cum ex Gallia in Angliam trajicerem, animus erat, inde ad te provifere, ut meum adfectum tibi coram exponerem, si fortean ea ratione tuam quoque mihi benevolentiam lucrari possem. Sed Hispanorum, mare tunc infestantium, metu ab hoc consilio depulsus, omnem tui adeundi spem abjeci, & satis habui, te intra arcanum pectoris penetrare tantum religiose colere, & virtutes tuas tacite venerari. Tango hos oculos, mi Scaliger, quando tuos libros lego; lego autem fere quotidie: ut ego tibi ob praeclaros illos labores, aeternaque in rempub. nostram merita τῇ σιγῇ ἐπ' ἐμῇ omnia fausta optare, & detractoribus tuis exitium precari non desino. Nam meliorem illis mentem vovere, nugas agere est. Sed nec hîc cultus noster constat: etiam in elogia tui erumpit, idque unum agit, ut quod sibi jamdudum persuasum habet, aliis quoque persuadeat. Etsi enim solidae virtutis & scientiae adminiculis eo magnitudinis pervenisti, ut invidiam eorum, qui in hominibus censerî merentur, jamdudum superaveris; multos tamen in terris oberrare nosti, qui specie quidem homines, nomine etiam augustiores, pura puta tamen Diaboli progenies sunt, in quibus quia natura usque recurrit, non mirum, si omnibus bonis infesta te praecipue petat, quem in alto fastigio collocatum suis luminibus unice obstruere videt. Notae tibi nationis istius viperinae artes: non te recta invadit, aut rationes tuas impugnat; sed calumnias meras struens, famam oblique carpit, ut magnitudine sensim deminuta tandem in contemptum praecipitet: quo pacto se suasque res

bene stabiliisse, & in tuto collocasse putat. Hoc itaque non tantum verbis apud suos, scriptis apud alios satagit: verum etiam emissarios alit, qui juventuti sese in nostris Academiis insinuantes, id unum summis opibus moliuntur, ut eorum, quos incrementis suis obistere vident, contemptum adolescentibus ingenerent; qualem hinc ante paucos dies novimus nescio quem *Terrentium*, qui memoriae aliasque secretiores artes, nec non linguas exoticas magno cum juventutis concursu professus, tandem pontificiam religionem clam sparsisse, & tui praesertim odium imperitorum animis aperte instillasse deprehensus fuit, quem ego postea plurimis, etiam e nobilitate, presentibus ita depexum dedi, ut paulo post se ex hac universitate subduxerit. Scilicet haec illa natio est, quae in sua manu rem jactat, famam alicui dare vel auferre; cui dum bonus *Lipsius*, amicus quondam noster, nimium fidit, eam, quam habuit, fere totam amisit. Ejus autem clamores quod tu, Vir Magne, magno contemnis animo, recte facis. perennabit enim tua fama anguibus istis invitis, quorum minutis sibilis nihil est, quod magnopere commovere. Relinque illos discipulis tuis compescendos. Tu saltem magna aggredere, & ardua semper debellanda suscipe: quanquam ut ingenue quod sentio dicam, fere non videam, quid in hoc mundo tibi amplius magnum videri possit: ut istas *Baronii* & aliorum nonnullorum in tuis scriptis laudes, saepe non sine indignatione legam. Qua de re, contra hoc genus non hominum, sed daemonum, aliquot jam annos, quatenus mihi per fori occupationes licuit, e pulpito pugno, a sapientissimo piaememoriae principe *Ulrico* Megapolitano ad Chronologica & Historias interpretandas in *Chytraci* locum accitus: ubi occasio se perpetuo offert, malevolorum de te calumnias refellendi, & labores tuos studiosis commendandi, quibus me commentarios meos ornare tantum abest ut dissimulem, ut etiam mihi laudi ducam. cujus rei testem tibi do decadis nostrae *II.* controversiam *VI.* quam contra *Beroaldum* aliosque de *LXX.* captivitatis annis auditoribus nuper explicavi. Ceterum ut hoc obiter adjiciam, longe mihi alia, ut vides, docendi methodus, eaque non tam a voluntate, quam necessitate. Nam eos tantum in temporum ratione nodos, de quibus pugna est, a senatu Academico explicare, & adolescentum captui accommodare jussus. Totum principio opus in duas partes tribui; quarum priorem Chronologiae Sacrae: posteriorem prophanae dicavi. nisi quod in ea, qua de captivitate Babylonica quaestio est, caput de aera Nabonassar, ejusque cum Olympiadibus, annis Urbis, Templi, mundi conditi connexionem inferere necessario coactus fui. Cumque animadverterem, adolescentes, adeoque etiam provectiores Theologos, Jurisconsultos, Medicos & Philosophos solo numerorum taedio ab isto studio abhorere: disparavi argumenta, ut quae vulgaria, ex sacris literis aut bonis auctoribus petita, in primis istis duobus libris tractarem; quae vero abstractiora, ex Mathematicis deprompta, in peculiarem librum tertium rejicerem. Quod meum consilium successu non caruit, rei jucunditate non tantum adolescentibus, verum etiam senioribus, auditoria frequentantibus. Onus vero immensum, quod humeri mei vix ferrent, nisi tu novus Atlas succurrisses. Ipse

cogita, quanti laboris sit, in omnium rationes inquirere, quae saepe nullae; saepe, quia ridiculae aut parvi momenti, dissimulantur, ita ut eas divinare necesse sit. In controversiis autem istis dirimendis tuum semper calculum sequor, nisi quod in ea, quae de Abrahami nativitate, ejusque vocatione quaestio est, a te dissentiam, idque veritate victus, quam ab altera parte stare video; cui ego pertinaciter oblucri noli, ne reliquis etiam fidem hoc pacto derogarem. Quod tu, Vir magne, quae insignis tua est humanitas, aegre non feres; sed potius libertatem in amico laudabis, cum, Symmacho teste, *quassa fide sint, qui jugiter blandiuntur*. Neque ego tamen tam pertinax, ut sententiam praefractae tuear. Una veritas est, quam utrinque spectamus, a qua si vel tantillum aberrasse deprehensus fuero, ecce me primum, qui errores meos castigaturus sum. Sed haec parergos, non tamen omnino. Nunc ut ad id, quod institui redeam; puto te ex ante dictis cognoscere, quam constans hactenus tui culter fuerim. Et licet studii in te mei ardor quotidie incanduerit, me tamen tibi in notitiam tuam insinuare per verecundiam nunquam fui ausus, semper veritus, ne tu illam ignoti hominis compellationem aliovorsum verteres, & ego te in tam illustri loco positum cupidius ambiisse viderer. Tandem vero, cum tuam eruditionem cogitarem, & quae ejus anima est, humanitatem, quibus te hodie supra omnes mortales extulisti: hisque accederet C. Rittershusii nostri hortatus, qui fere unus jam nutantem impulit, & ut omnem frontem abjicerem fecit; calamum in manus ineunctanter arripui, ut eum, quo te hactenus, licet ignotus colui, amorem tibi plenius testatum facerem, & auctum tui desiderium hoc velut litterarum solatio alienarem: In certam spem & fiduciam ingressus, te, si quid hac in parte peccavi, prolixo adfectui nostro, quo te prosequor, ascripturum; interea vero amicitiae tuae sacraria referaturum, mihiq; locum inter cultores tuos concessurum esse. Vale, Vir Nobilissime. Rostochio v. Id. April. Anno Christi. MDCVII.

P. S. Quia Vir Nobilissime, controversia illa, cujus in literis mentionem feci, tam cito describi non potuit, ne primo statim adpulsu ad amicitiae tuae aram vacuus venirem, placuit locum quendam ex ea enotare, & te nuperae nostrae in Cenforinum conjecturae judicem ferre. In eo mihi videtur haerere lacuna, ab exscriptoribus plane neglecta, loco scilicet c. 21. famosissimo, ubi de tempore inter cataclismum priorem & initium olympiadis Iphiteae disputat; Quod ipse in universum statuit esse MDC. circiter annorum. Recte. Nam a diluvio ad primam olympiadem totidem fere effluxerunt, uti tam ex nostris, quam aliorum chronicis satis ostendi potest. Hunc autem numerum Cenforinus demonstraturus, particulares deinceps adfert numeros, & primo annos circiter cccc. a cataclismo usque ad Inachi regnum, in quo item paucis aberrat: Nam Eusebius LII. duntaxat hunc numerum excedit. Sed quod porro Cenforinus ab Inachi regno ad primam olympiadem cccc. tantum numerat, uti nunc quidem in editis legitur, in eo non tantum historia, verum etiam sibi ipsi contrarius est, quippe qui totum intervallum MDC. annis paulo ante definierit. Nunc autem in particulari istius intervalli demonstratione

10000. duntaxat, id est, summae ejus dimidium profert. Non igitur sine causa medium intervallum ab Inacho ad captum Ilium hinc effugisse suspicamur, praesertim cum ipse Censorinus dicat; postremum tempus Mythicon ab Eratosthene definiri annis ccccvii. At totidem planissime Eratosthenes apud Clement. 1. Stromat. non ab Inachi regno, ut hîc legitur; sed a capta Troia ad primam Olymp. numerat: ut ita mythici istius temporis medium, (nam initia & postrema apud Censorinum sic satis constant) ab Inacho scilicet usque ad Ilii Excidium, quod ipse Censorino teste 10000. circiter annorum est, librarium culpa omissum certo certius sit. Miraris tu, Vir magne, in libro de Emendatione, ubi de Ilii Excidio agis, Cur Censorinus postremum tempus ab Inacho, non autem a capto Ilio, ut reliqui ordiatur. Non dubium, si Censorini locum obiter saltem inspexeris, te eam, quam dixi, exscriptorum oscitantiam facile deprehensurum. Atque haec de illo Censorini loco, super quibus tuam sententiam audire pervelim, mihi instar oraculi futuram. Eusebium tuum nondum nobis videre contigit. Ea hîc bibliopolarum socordia, dicam, an avarities, qui de selectis auctoribus parum solliciti, quaestui duntaxat intenti sunt. Proxima occasione eam, quam dixi, controversiam tibi censendam mittam, una cum ea, quae de Abrahami nativitate & vocatione est, ut videas, quibus rationibus motus pro altera parte pronunciaverim, neque enim eae unius generis. Si per veritatem fieri posset, quam unam me hîc spectare Deum & conscientiam meam testor, libenter me scriptis tuis hac quoque in parte conformarem. Plurimum salvebis a *Joh. Kirchmanno*, meo hîc adfine, nominis tui, si quisquam in Germania, studiosissimo, qui suam erga te observantiam per literas libenter exponeret, nisi eadem, quae me, verecundia haecenus abstineret. Quod si tamen id tibi non ingratum fore intellexerit, proximo meo responso suas adjunget. III. Id. April Anno MDCCVII.

EPISTOLA CXXVIII.

IGNATIUS HANNIEL

Josepho Scaligero.

Leidam.

ET si, Vir Illustris, non satis commode habeo, lecto totum fere triduum adfixus, tamen egregiam hanc ad te scribendi occasionem negligere nolui. Redit enim ad vos *P. Merulae* quondam uxor, Viro Opt. & doctissimo ineluctabilis fati necessitate orbata, quem ego eo pluris feci, quod & te, cujus effigiem mihi non sine multo verborum honore communicabat, magni facere, tuamque juxta mecum famam contra Jesuastorum quorundam immanitatem egregie defendere videretur. III. Eid. Jul. cum quaestionem de LXX. Danielis hebdomadibus ordire, ipse quoque, licet valetudine jam esset afflictiore, lectioni tamen interesse voluit, meque inscio supervenit. Dissertatione, quam institueram, finita, domum me comitatus est, ubi ad tempus caenae usque hi-

hilariter una fuimus. Nocte secuta in morbum incidit lethalem, sanguine copioso ex liene in ventriculum effuso, quem cum quarto post die magno cum labore & non sine vitae periculo majore copia & quantitate rejecisset, etsi tum meliuscule habere visus est, XIII. tamen Kal. Aug. viribus plane collabentibus, intra septimum a morbo diem decessit, integris usque ad mortem sensibus, ita ut me aliisque praesentibus, tribus plus minus ante obitum horis, sua manu aliquot ad *Barnfeldium* versus vel lineas, literis sic satis eleganter pictis, exararit. Aperto postea corpore, epar pallidiusculum repertum, sanguinis officina ad lienem fere translata, qui propter factas jam evacuationes, valde erat deminutus, vena bifida, quae ad fundum usque ventriculi pertinebat, existente amplissima. Magnifico funere post triduum elato, parentavit J. Kirchmannus, oratione extemporaria, sed in qua eorum, quae ad defuncti laudes pertinebant, nihil omisit. Atque haec ad te, Vir Nobilissime, aliquanto fufius, cum quod tibi carum fuisse existimem, tum ut meo quoque in eum amori satisfaciam. Sacrum illum & horribilem in te ¹ librum cum stupore per-volutavi. Nihil me memini vidisse dirius aut immanius. Nec quenquam sanae mentis, etiam inter pontificios, futurum puto, qui istam calami virulentiam probet. Qua de re, doleo sane, eo jam res olim amici redactas, ut optimorum osor, pessumorum defensor, furiis quam homini similior esse, & cum Diabolo plane paria facere cogatur. Sed quid? hoccine & maledictis obtinere posse sperat, quod *Cardanus*, Deus bone quantus vir! re adhuc recenti & in propinquo Veronae constitutus nunquam tentare, vel etiam somniare ausus? qui licet acerrimus patris tui hostis, illustri tamen vestrae origini egregium semper in scriptis suis perhibuit testimonium. Neque id valde mirum, cum ipsius veritatis, oculos omnium tum perstringentis, vis hoc etiam ab invito & inimico pectore expresse-rit. De *Terrentio* tanti non est ut repetam. Natione Germanus erat, *Schreck* dictus, inter Jesuitas eductus, fortasse & ipse Jesuita. pro exploratore habui, quales in Germanorum Academiis, proximis his annis, observavi plurimos. Italiam, Galliam, aliasque provincias viderat. *Minervae Serarii* edidicerat, ex quo ea, quae privatim apud discipulos in te jaciebat, tela depromebat. De tuis in *Paraeum* lucubrationibus multum te amo. Sane nunc demum absurditatem rei intelligo, taedetque pigetque & olei & operae in eam olim quaestionem collatae, quam utinam plane abolere possem. Neque enim dubito, si tu, non praemonitus, in eam forte fortuna incidisses, quin de Hanniele tuo illud Hannibalis pronunciaturus fuisses: Multos te quidem ejus quaestionis tractatores vidisse deliros; sed qui magis deliraret, vidisse neminem. Debent certe ea, quae dixisti, satisfacere modestis ingeniis. Sed tamen Augustini, Lutheri, & aliorum, veritatem perverse & minus mas-cule defendentium, disputationibus seducto, tum etiam difficultatibus propter Semi-exemplum, quod nemo te melius expedit; nec non locum protomartyris implicito, venia juste datur. Licet ne sic quidem omnis mihi scrupulus exemptus. Nam quomodo vs. 12. c. xx. tum etiam vs. 13. c. xv. Genes. explican-
dus

¹ Credo intelligi *Scioppii* Scaligerum *Hypobolimaicum*, qui hoc anno prodit.

us sit, valde haereo. Tu quaeso juva; Neque enim dubito quin possis. *L. Suslygae* de morte Herodis considerationes, quas vocat, a *Keplero* nuper repetitas, & tractationi de nova stella in pede serpentarii adjunctas, an legisti? vel tanti, ut legas, facis? Equidem prae valetudine, nimisque occupationibus, hactenus examinare nondum potui. Sed & te unum, quotquot sumus Chronomaphi verius quam Chronologi, (Latine loquor,) hinc respicimus, tua dicta, quasi ex Apollinis Tripode profecta, suscipimus, admiramur; idque eo lubentius, quod humanissimarum tuarum literarum indicio, nunc certo cognovi, candori & libertati suam quoque apud te gratiam, nec te ingenuas modestorum hominum voces aspernari. Age igitur, Vir Nobilissime, & ubi a molestis illis culicum stridoribus paulisper conquieveris, quid tibi super omnibus videatur, breviter rescribe. Literas *P. Merulae* viduae, ubi voles, & quando otium suppetet, tradere poteris, quae eas ad fratrem *D. Johannem Gryphium*, V. Cl. urbis hujus senatorem, recta curabit. Plura valetudo, eaque pessuma, scribere prohibet. Et tamen sic etiam fatis nugarum est. Vale. ix. Kal. Septemb. cio. io. cvii.

Malvasii Jcti mentionem inter alia in facerrimo illo libro fieri vidi, quem autorem fortasse habes. Sane si desideras, exemplum tibi apud me in mundo est.

EPISTOLA CXXIX.

JOHANNES LYDIUS

*Paullo Merulae S. D.**Leidam.*

Vir Amplissime. Mitto ad te juvenilia Erasmi, sicut promiseram: mitto etiam Apologiam Patris p. m. sed tanto cum metu, ut mirum sit. Hoc enim certo certius scio, fratrem meum expostulaturum, quod eo inscio hoc agam, & ego non possum illi semper scribere. Et si forte scriberem Aethiopem lavarem. Miraberis fortasse me dedicasse patris opus Magistratui Rotodamensi, & dices hoc tuae dedicationi posse obesse. Minime: fratris causa hoc ago, ut ne quid habeat quod objiciat: tu Vir Amplissime, primo tuam praefationem praemittes, & totum offeres, haec dedicatio nulli rei servit, nisi ut frater habeat id, quod olim mihi mandavit. Si tamen hoc minus tibi placuerit, aut hoc modo edere nolis, gratum erit, si statim Apologiam remittas, nam video Epistolas Erasmi Palaeonaeas tales esse, quas pauci forte umquam viderunt, & quas curabo recudi, quia video ibi esse multa memorabilia. Ego in illis non solum hanc Epistolam regis Angliae, sed Pauli 3. Pontificis, Regis Poloniae, plurimorumque Cardinalium memorabilia multa invenio, quae omnia possent afficere etiam morosissimos. Editae sunt istae Epistolae Friburgi Brisgojae, apud Joannem Emmeum Anno 1532. Invenio in titulo manu patris scriptum. *Quicumque filiorum meorum, hunc librum abalienaverit, aut perdiderit, hanc ego ut infidelem paternorum bonorum custodem exhaeredari volo.* Hoc man-

mandatum patris cogit me. Vitam Erasmi abs te vir Amplissime editam cum patris exemplari contuli, & collatam remitto, ut videas patris exemplar longe melius fuisse: utinam illa de nomine Erasmi adhuc possent inferi. Epistola illa scripta ad *Servatium* patrem, ejusdem est argumenti cum illa *Lutheri*, quam scripsit ad *Johannem Lutherum* patrem suum, cur ex monasterio fugerit, quam ego non puto esse in operibus. Ea excusa est Anno 1521. Habeo similis argumenti Epistolam *Zuinglii* & aliorum, si scirem posse publico prodesse, simul conjungerem, & inscriberem: *Epistolae renascentis Evangelii*: Tuo confilio stabo, mi Merula; & Deum rogo ut te bono publico conservet. Veteraquae 3. Augusti 1606.

EPISTOLA CXXX.

CUNRADUS RITTERSHUSIUS

Caspari Barthio, Amico in primis honorando S. P. D.

Superioribus diebus, Barthi doctissime, optime, amicissime, Typographus *Joannes Schoenfeldius*, amicus meus, vir probus & industrius, unum atque alterum ad me misit exemplar Commentarii tui eruditissimi in *Cirin Virgilianam*, quem aperiens vidi meum nomen in *περοφώνησιν* conjunctum cum Clarissimo *Grutero* nostro; Quid quaeris, mi anime? Miratus fui, ut paucis absolvam, hanc combinationem tam imparium. Quod enim ad *Gruterum* adtinet, ille sane & hoc & id genus aliis honoribus dignissimus est. Ego vero quid tandem, vel de te privatim, vel de litteris unquam publice meritis fui, ut de hoc tanto honore, qui non nisi principibus Litterarum debetur, habendo mihi cogitares? Sed agnosco hîc quoque abundantiam Amoris erga me tui potius, quam ullum meritum meum: Addes autem hoc etiam ceterae tuae in me benevolentiae, ut patiaris tibi honore verborum gratam vicem rependi ac satisfieri, quando nunc aliud quam gratias agere nequeo, & hoc ipsum non luculenter ita facio, ut tua dignum erat eximia doctrina. sed simplici oratione, ut mea mediocritas, & varia *ἀσχολία* permittit. Aurea vel argentea, vel gemmea *ἀντίδωρα* sat scio, a me, non expectas, quem conditio nascendi, & majorum virtus atque opulentia talibus non egere passa est. Sed profecto grati animi memoria, quam tibi spondeo perpetuam nemini concedam. Ea me exstimulabit, ut tibi parem aliquid litterarium munusculum, quamprimum scilicet dabitur occasio &c. Tuus omni studio: Altorph. 7. Sept. 1608.

EPISTOLA CXXXI.

JANUS GRUTERUS

Caspari Barthio, & Friderico Taubmano & Adamo Sibero S. P.

MI Taubmane. Vix veni Francofurtum, & ecce abitum parant vestri Bibliopolae. Unde fit ut nec tuis privatim, neque Domini *Barthii* publi-

blice scriptis respondere queam, ut volebam, ut debebam. Et in tuo quidem aere, mi Taubmane, jam diu sum quod haereo, neque me expedio. Itaque tu, mi Barthi, quid tibi vis? an ut tibi addicar mancipio? ita sane arbitror. Taliter enim me devinxisti luculenta illa dedicatione, ut conturbare habeam. necesse. Imo profiteri praeterea, ne inveniri quidem verba, quibus meritis tuis satisfaciam, ne dum ullam rem. Quare si jure tuo agere voles, video eo me redactum, ut in nervo apud te militem necesse est. Verum quandoquidem ultro iisti ad obaeratum, spero te, omisso summo jure, aequitati accessurum, quod fiet si me patiaris istis locis vivere, sed tuum tamen totum, totum, quique etiam, ubi jusseris, me tibi sistam cum intestinis omnibus, ac cum voce:

O referant divi, quoniam nos possumus ipsi.

Interim, quod nunc possum, & adfectum meum, & officia omnia tuae incomparabili voluntati denuo hisce literis, largiter, ut decet, defero, interpreti nostro Taubmanno, cujus litteras ad D. *Casaubonum* cras recte curabo. Tu quoque quidvis in me potes, impetra quaeso quodvis imperando, ne videaris diffidere voluntati meae in te prolixissimae. Vale, mi Barthi, mi Taubmane, ut & tu quoque, mi *Sibere*, Triga illis locis ex tot olim amicis, nunc iis locis unica magis unica. Scribebam nec stans, nec sedens, nec jacens, sed omnia. xxiv. Sept. cico cviii. Sic tamen vester.

EPISTOLA CXXXII.

ANDREAS SCOTTUS

Petro Scriverio S. D.

Leidam.

QUOD honoris mei gratia, eruditissime Scriveri, inopinato miseris dono Bilbitanum poëtam, a te aliisque, Vir Doctissime, egregie illustratum, facis benigne, meque obstrictum, dum voles, tenebis. Ego vero nescio quod *ἀντίδωρον* reponam, nisi forte, quia & in poëtica excellis, & Simonidae Lyrica eidem poëtae comitem muneri misisti, ad Te allegem Pindarico stylo *Joan. Aurati* poëtae Regii quaedam, quae a *Canteris* fratribus, dum viverent, suntque *Gulielmi* manu pleraque descripta, accepi, & quaedam typis nondum esse evulgata observavi. Habes itaque poëta poëticum munusculum, exiguum, at magni pignus amoris habe; quando nihil nunc quidem suppetit quod rependam. In Belgica Historia, quam & ipse Latine patriae gratia coepisti recte illustrare, scito me misisse *ἀντίδοτα* non pauca *Joh. Grutero*, sed aegre posse ab Aubrianis editionem extorqueri. Habeo & alia selecta e bibliothecis, sed sustinebo, dum typographus reperiatur idoneus, ne frustra sumptus toleraverim. Hoc enim ago optoque ut posterius habeant, tametsi rustice, ut illa erant tempora, conscripta, quae elegantiore alii stylo velut calami stris inurent, ornentque pro virili. Hoc meum consilium facile vobis iisdem vestigiis haerentibus,

ut

ut spero, probabo. Vale in D^o. Salvebis a *Schotto & Heriberto*. Antverpiæ 27.
Maji. c10. 10c. XIX.

EPISTOLA CXXXIII.

JANUS GRUTERUS

Joanni Meursio S. D.

Leidam.

AMice singularis, atque optime. Et si affectus ille, qui Jambum tuum elicit ad Plautum nostrum, plura quidem nobis tribuit quam meremur; tamen paulo post apparebit, me auctori illi plus praestitisse, quam postremos Afellos, quorum flagitia & scelera tot & tanta miraberis detestaberisque: plurimum quoque tibi debeo, quod Dominum *Vossium* incitaveris ad parem liberalitatem. Animis vestris quid rependam? imo quid non rependam? Facitis me de regulo Aquilam. Ergo quod talis habebor debebo vestrae prothymiae. Non puto esse *Jacobum Corputium*, cui aegrotanti adcurrerit. Si quid ei humanitus acciderit, indica id, obsecro, per affinem tuum Dominum *Billerbekium*: nam habet sub se res rationesque aliquas haeredum Smetianorum, quarum cura jam soli mihi incumbit, fato functo *Winando Zonsio*. Quaeso uti & virorum illi optimo eruditissimoque multas a me dicas habeasque gratias. Utinam vicissim de eo studiisque ejus, ut etiam tuis possem bene mereri! in Bohemia omnia succedunt ex voto nostro, si ante ver inde perduelles ejecerimus, magna me tenet spes, vix reliquias aliquas nos veri proximo habituros belli tam formidolosi. Videtur fatum deferere, quos hactenus elevarat super omnia. Distento Hispano, ceteri nihil agent nisi minis. Qui ad vos venit est Amplissimus *Carolus Paul*, amicus meus non e multis, homo non modo nostrarum literarum, sed & absque fuce. Is de me, de rebus nostris omnia tibi dicet, si interrogaveris. Itaque finio; precatus tibi & tuis, ut & familiae *Vossianae*, fausta omnia ac felicia, non in hunc modo annum seqq. sed multos multosque sequentes. Velim per occasionem indices, num quid *Stephanus Doussa* vivat Hagae in dignitate. Miror hominem ita intermittere foedus amicitiae, qua cohaerebam parentibus ejus, imo & fratribus, imo & ipsi, ante annos xxiv. Si is adhuc vivit, salutes quaeso a me quam officiosissime, ut & caeteros amicos, Dominum *Bertium*, Dn. *Erpenium*, Dn. *Scriverium*, dulcissima capita. Iterum vale ac salve ab omnibus modis tuo *J. Grutero. XII.* Decemb. c10 10c XIX. Aveam mecum communicari natales *Triumvirorum*, quos modo salutavi, unaque affinis *Vossii*.

EPISTOLA CXXXIV.

HUGO GROTIUS

Jano Rutgerſio.

Leidam.

LEgi quanquam occupatiſſimus, Observationes tuas, Doctiſſime Rutgerſi, & rerum ἀξιωματικῶν varietate, & ut haec abeſſet, tamen admirabili lepore ac feſtivitate dictionis ita conditas, ut vel ob hoc unum legi debeant, quod Latinas Veneres oſtendunt ſaeculo alioqui inficeto. Inter caeteras emendationes illa in Lucanum longe certiſſima eſt. & mihi nuper in lectione ejus Poëtae idem in mentem venerat. Sed poſtquam egi cum memoria mea, invenio jam ante me tuam ſuper eo loco ſententiam intellexiſſe. Ita quod mihi primo tanquam meum impoſuit, nunc hoc ipſo magis placet, quod tuum eſt. In Hylam conjecturae cum erudiſſimis certant. itaque ardeo videre & caetera. nulla lis tam gravis, nulli libelli tam ſerii; quos non excuſſura ſit mihi de manibus Rutgerſii pagina. *Baudius* ſcazontes ſuos, quibus δουλοπρεπείαν ſuam ulciſcitur, editurus eſt: ſed tentabit praefatione perſuadere hominibus, experiri ſe voluiſſe, numquid ſatis commode poſſet tutari partes amantis; ne quis ibi ſerium quicquam ſuſpicietur. *Mylius* ſatis mihi placet, & eſt minime ἐπεικὴς. ſi ita nunc ſint homines, vilis futura ſit advocatorum annona. ſed queritur duris ſe imperiis premi. 1v. Auguſti.

EPISTOLA CXXXV.

HUGO GROTIUS

Johanni Rutgerſio.

Leidam.

MAgnas tibi gratias debeo, mi Rutgerſi, quod virum optimum D. *Gommarum* non paſſus es neſcire nimiam editoris licentiam in meo carmine. ſimul quod de nova editione me admones. quare transmitto exemplar emendatum manu mea, quod ſequi Typographus poterit. rogo commodas mihi oculos tuos, ne quid denuo peccetur. Viſum mihi eſt etiam ad *Gommarum* ſcribere, ne putet me, quod *Arminii* memoriam benigne colui, ipſius honori detractum, aut controverſiis praejudicatum velle: quarum magnam partem me non intelligere ingenue profiteor. neque enim faciunt ad edictum Praetoris. nobis modica Theologia ſufficit. Librum tuum, quem amicorum tuorum indicem deſtinavi, retinui apud me haecenus, ſpe videndi tui, aut alicujus a te. nunc ne te diutius morarer, viſum transmittere, cum epigrammate. Vale & nos ama. xxiv. Dec. 1609.

Carmen in mortem *Arminii* legitur lib. 111. Farraginis pag. 210. & Epigramma in Album *Rutgerſii* lib. 1. Epigr. pag. 253.

EPI.

EPISTOLA CXXXVI.

HUGO GROTIUS

*Jano Rutgersio.**Leidam.*

LEgi, imo perlegi (nam olim legeram) *Baudii* nostri orationem ad componendas Academiae turbas. Judicium meum exigis. Habeo justissimam excusationem. est enim tam eximium illud ingenium, ut sub nullius censuram, aut certe non nisi doctissimorum cadat. Urges adhuc & vis dicam quod sentiam? Et orationem totam & partes singulas admiror. Relucet ubique singularis viri memoria, quae omnia veterum dicta factaque non retinet modo fideliter, sed in tempore repraesentat. Implevit locos duos aut tres plane accommodatos negotio. attexuit alios minus necessarios, illectus, ut puto, priorum dulcedine. In ipsa dictione agnosco egregium vehementiae & tranquillitatis temperamentum, plane rei conveniens. Duo, quae propria sunt *Baudii*, rariora hîc, quam in aliis ejus operibus, invenias. Prius est locutionum licentia, cum scilicet verba phrasisque poëticas, Comicas, Satyricas, Milesias, Ciceronianae majestati interferit. alterum, quod in re maxime seria jocos non abstinet. Ego neutrum in alio ferrem. sed ut in omni legum genere, ita in isto personae quaedam singulare privilegium merentur. & quosdam ita decent vitia, ut virtutis locum occupent. Quo magis monenda est juvenus, ne ea imitetur, quae viris doctis suo quodam ac singulari jure permixta sunt. Novi patronum in foro nostro nobilem, qui ne in capitalibus quidem causis & summo clientium periculo a jocos abstinet. quod contra rhetorum omnium praecepta esse quis neget? At illi hoc ita succedit, ut laudent multi, omnes ferant. Alteri idem tentanti, nemo ignoscat. Ita *Baudius* quaedam cum laude peccat, quae in exemplum trahi non debent. Habet & peculiarem quandam excusationem haec oratio; quia ad studiosos dirigitur, qui ferre non possunt perpetuae censoriae gravitatis tenorem, quo justius licuit evagari interdum a tristî argumento, & ad laetum divertere, & dulcia quaedam aspergere, & auditorum minus faventem demulcere vario eruditionis apparatu. Habes, mi Rutgersi, quod voluisti: in quo obsecutus magis fortasse sum desiderio tuo, quam officio meo. tu tibi imputa, quod me extra territorium jus dicere compuleris.

xxix. Dec. ciciocix.

EPISTOLA CXXXVII.

HUGO GROTIUS

*Jano Rutgersio.**Leidam.*

POtueras quidem abstinere; Doctissime Rutgersi, a nobis consulendis in rebus antiquitatis, qui ejus parum etiam olim attigimus, & hoc etiam

quantulumcunque fuit, eorum studiorum non tam voluntario quam necessario neglectu amissimus. Sed quia tibi visum est eum nobis exhibere honorem, qui non debebatur, officii est nostri id pro beneficio agnoscere, atque etiam conari amplius posse quam possumus. De Cossio igitur, quod quaerebas, sentio, ut dixi, majores omnes magistratus populi Romani, hoc est Dictatores, Consules, Tribunos militum consulari potestate, & Praetores, habuisse belli auspicia. Caeterum legatos & alios militum tribunos praefectosque, qui magistratus populi Romani non erant, cum ipsi creati essent sine auspiciis, non habuisse jus auspicandi. Quare quicumque imperium habebat jure magistratus, idem suis auspiciis gerebat bellum, quanquam fieri poterat, ut is ipse non summum haberet imperium: neque enim ad habenda auspicia, ut ego arbitror, summum imperium desiderabatur, sed imperium a populo datum jure majoris magistratus. Et qui auspicia habebant *duces* proprie vocabantur. Caeteri autem, qui mandatum a duce & quodammodo fiduciarium habebant imperium, non item. Fuit igitur dux Cossus, & auspicia habuit, quia Consul cum esset, ut vult Livius, aut ut alii, Tribunus militum, modo Consulari potestate, imperium habuit non ab ipso Dictatore, sed a Populo Romano, & quidem auspicato datum. Hanc autem sententiam non ita tibi scribo, quasi qui prae fracte eam tueri velim, sed ut ipse, qui quotidie in Romana antiquitate versaris, tecum expendas, an cum veritate consentiat. III. Cal. Apr. CIO IO CX.

EPISTOLA CXXXVIII.

HUGO GROTIUS

Jano Rurgerio.

Leidam.

NON deposui ex manibus tuas in Senecam notas, ex quo eas recepi, nec legere tantum, sed relegere dulce fuit. Solum id, quod petis, esset forte arduum, judicare: sed hoc quoque facile ut esset effecit rei evidentia, quae neminem dubitare patitur, quin sint ea, quae scribis, vera pleraque, verisimilia multa, ingeniosa omnia. Etiam mihi gratulor, cui memini in mentem venire multa eadem cum tibi observatis: nonnulla etiam, quae a te inducta video, quia ante & te & me alius ista occupaverat. Gaudeo me istorum studiorum transfugam cum bonis ingeniis interdum *συμπλήν*. Caeterum quominus singulatim ad tuas Animadversiones perscribam, causa est, quod Seneca mihi non ad manus: amicus enim exemplar meum secum abstulit, quod repossidere & expectare poteram, nisi veritus essem, ne mea mora festinantibus Typographis tibi debitam laudis occasionem praeiperet. Haec interim in mentem veniebant. Phoenis 126. *sacra quo Dirce latet*, esse *ἐκ ἀνεκτίων*. nam latere amnes videntur in silvis, qui in planis camporum apparent. *Turpe servitio* casu dativo non puto convenire Senecae seculo: & quod adfers *Mucrone* &c. nihil vetat sexto casu intelligi. Itaque aut vulgatum *turpi servitio* retineam, aut

si tuum illud verum est, sumam turpe *περὶ ἡρωιδελεγεῖται*, ut saepe. Hippol. 558. *Mitius nihil est feris.* vera est tua interpretatio, nec dubita esse imitationem Ovidianam Epist. x. vs. 1. *Mitius inveni quam te genus omne ferarum.* Est schema a contrario. In Juvenali Sat. xiii. 81. etsi pater Aegaei potest esse Αἰγῆος, ut Idomenea ducem; tamen non dubito esse pater Aegaei, ut arbiter Adriae. Emen- datio tua secunda in Octaviam vs. 516. est *ἐνδοχῶτα*, ut multae aliae. sed non video quomodo ducum aciem recte ibi intelligamus Senatum Pompe- janarum partium, cum Pompejus illa acie superatus dici non possit. ¹ *superatus ducum acie*, pro cum acie ducum, sed durum est & potius contrarium si- gnificat. Nam ducum aciem vocat Caesarianam, in qua nullus qui non di- gnus, qui imperaret? An verum est quod tu judicas, Magnus ducum conjun- ctim pro Pompejo? Herc. Octae. 172. *Templa suis collapsa Deis* Hellenismum non putem. aliud enim est αὐτοῖς, aliud suis; sed collapsa Deis est lapsa cum Deis. Haec eo liberius, quia certius indicium afferre non potui, quo ostenderem placere mihi caetera, nisi pauca excerpando, de quibus dubitare posse vide- bar. Tu, qui morosum hominem lacestisti, tibi imputa. v. Jan. cio io cxi.

¹ Hic in autographo quaedam ita maculata erant, ut vix legi possent, ita ut forte uno vel al- tero verbo defecta hic sit Grotii sententia: egit vero de hoc loco Rutgers. lib. 1. Var. cap. 15.

EPISTOLA CXXXIX.

HUGO GROTIIUS

Danieli Heinio S. P.

Leidam.

Cum Lugdunum proficisceretur frater meus, quem clientelae tuae addixi, nolui illum sine litteris dimittere, quanquam omnino tibi loqui malebam, quam scribere. Sunt enim quaedam, quae litteris committere non audeo. Et tamen ad te pertinent, *περὶ τῶν ἡρωιδελεγεῖται γράμματα βογέφω*. Ita ta- men addam: urget quotidie ut scribam Encomium: scis autem quam sit mihi infocunda vena. Itaque dum nihil potuit elicere, nisi unum Epigramma, quod non intelliges forte, nisi sciveris poëtam nostrum equitare non minore cum fastu, quam ambulare solitum. Erat autem id tale.

Ingenti solitus silvam calcare Caballo;

Nunc pedibus noster quam bene currit eques!

Carminis ecce pedes gressus imitantur heriles,

Et sua libratus pondera versus habet.

Reliqua ubi confecero, te dabo judicem, an digna sint, quae Euphrenii versi- bus jungantur: Nam & hic sine dubio inter encomiastas erit. Leges ita- que πάντα γελοῖα, καὶ ὥς ἐπὶ εἰπῶν, digna patella opercula, nec quales tu ver- sus facis, sed quales ego vel Cluvienus. Nunc ad seria. Velim te Hesiodi edi- tionem, nisi jam alteri destinata est, Ordinibus faederatarum regionum dicare. Nam Dominis Scaligero, & Douzae ἐκ τῶν ἐπιφωκίδων, aut ex poëmatibus tuis sa- tis

tisferi poterit, si ita videbitur. Haec amicitiae jure scripta boni consules, & me videbis, si potes, cum tuo illo, odissè profanum vulgus, & istam enceniorum frequentiam, hoc est stultorum ferias. xv. Cal. Quintiles Anno MDCII.

EPISTOLA CXL.

HUGO GROTIUS

*Danieli Heinsio.**Leidam.*

IRascor, si aut irasci me posse putes, aut omnino aegre ferre, quod ad constitutum non adfueris. Quid enim mirum, si totus orbis suum te sibi vindicavit? & quia mecum, ut cum Jurisconsulto, agere voluisti, cave putes tam incivilem & adversum te *μονομερῶς* calculum feram. Quod autem versus promittis, bene est; nec possum desperare, cum etiam in litteris tibi Pentameter exciderit. At Jambos etiam meos laudas, *ἐγὼ δὲ πῶς ἔπαυμαι*. Ali-ter nobis, quam Apelli & Protogeni accidit. Lineam enim, quam conspi-ciendam reliqui, tu, ubi libitum fuerit, tanta subtilitate vinctes, ut necesse mihi videam & penicillum & tabulas abjicere. Rectissime fecisti, quod istum hominem, *τὸν ἑδὲν εἰ μὴ τύφον*, pacasti quatenus licuit. Quid enim necesse est inimicitias gravari eorum etiam, qui amici prodesse non possunt. Idyllium tuum, & Elegiam toties hodie legi, ut, si quid unquam, haec certe in suc-cum jam abierint, & sanguinem. Nihil est edisci dignius, non modo a no-bis, qui quovis Magistro libenter utimur, sed illis quoque ardelionibus no-stris, qui adeo sciunt omnia, ut nihil relinquant caeteris: De Poëmatum meorum editione mecum delibero. Si quid erit feligam meliora, & finiam lus, quos haëtenus excusat aetas. Certe nihil est, quod aut *Scaligero*, aut Legato, aut tibi negare possim, qui urgent, & instant, reliquos parum mo-ror. Hoc certum non aliter me vulgaturum mea, nisi tu & tua promiseris. Nolo enim credant peregrini ulla ex parte me ad fastigium illud Poësius ac-cessisse, quo aditus datur Belgicis etiam ingeniis; id tu proba, si me amas. Vale, juvenum quotquot sunt, eruditissime, *ἔδύναμαι γλυκερώπερον ἑδὲν ἰδέσθαι*.
11. Aug. Hagae Comitatenſi. c1010c11.

EPISTOLA CXLI.

HUGO GROTIUS

*V. C. Danieli Heinsio S.**Leidam.*

CLariſſime juvenum. Martialem totum perlegere nondum licuit: Notas tantum *Gruteri* noſtri percurri, & nonnulla paſſim Epigrammata; Tuo ju-

judicio permittere placuit, quicquid inter legendum venit in mentem, quale est illud, quod dixeram unum esse Libro quinto Epigramma, quod in duo dividitur, inscriptum numeris XIX & XX. Nec minus LX & LXI. libri duodecimi, cui simile est, quod in Priapeis dixeram de LXVIII & LXIX. Libro I. Epigr. LIII. versu, qui ante penultimum est, *offendit*, quod in manuscripto reperitur, verum puto, quamquam *Gruterus* mavult *offundit*: *offendit* ita dictum, ut supra *violat*. Liceat mihi facere quod *Gruterus* saepe, nec satis commode meo judicio, ut interrogationis notam inseram Epigrammati XIX. Libri III. cujus versus secundus ita legetur melius.

Felicem caena Zoïle? deinde tua?

In Epigrammate ejusdem libri XLIV manuscriptus habet versu secundo

Seu tres, vel puta quattuorve libras.

Conjecerant unius litterae mutatione *selibras*. Sed dubito. Epigr. LVII versum penultimum restituere ex lege *Pedia* facile sit vel puero

Oppigneravit Claudii modo ad mensam.

Nec minus in proclivi emendare versum quintum Ep. quinti Lib. III. *quacres*: nec monerem, nisi scirem haec tam levia praeteriri solere. Nam quis non miretur omnes haecenus editiones, & hanc nuperam omnium emendatissimam Libro III. Epigr. LVIII. praeferre corrupte, *Furemque Priapo*. cum illud *que πλεονάσμος* tam certum sit, quam *Anapaestum* illum locum non admittere. Non negabis eodem libro Epigr. LXXVI. in fine *κοπεροφαγίς* verum esse potius, quam *σαπροφαγίς*. in Epigr. LXXXII. *pro Massilianis* finis *Scazon*is *Massilitanis* postulat. Epigrammate XCI. in fine vide an non pro *cervo*, *servo* scripserit *Martialis*, quia supra *fugitivum* dixerat, ut sit *παρανομασία*, non *ἀναφορά*. Epigr. XCI. scribendum esse

Et anatis habeas erropygium macrae.

Sciunt qui Graece non nesciunt. eodem Epigrammate lego.

Quid surire si velit saxum?

Surire est *καπεῖν*. Emendavimus elegantem locum in *Arnobio* circa principium libri primi, *non esuriunt, nec concipiunt?* legendum est *non suriunt?* Quod vero dixit *saxum surire*, simile est ei, quod alibi dixit de *Niobe*. Epigrammate LXI. Lib. IV. in fine versus luxatus est, nec aliter sanari posse video, quam si legas,

Aliquando narra quod velimus audire.

Epigrammate LXXIII. miror cur *stamina pulla*, in textum non receperit *Gruterus*. Epigramma LXXVIII. vix puto *γνήσιον*, praesertim cum absit a manuscripto, nec sapiat *Martialem*. Tu *aristarchus* judica, an sit *παρεμβεβλημένον*. Certe ne illud quidem, quod penultimum est eodem Libro, *Martialem* redolet. Vide an Libri VI. Epigramma XII. ita possit expleri.

Numquid, Paule, numquid pejerat?

in Epigrammate LXXXVI. *Epotet*, pro *Et potet*. verum est: an pro *calidam* legendum sit *gelidam* ex sententia primi versus addubito. Epigr. XLIV. libri IX. Disticho quarto *Numen* pro *Nomen* restituendum esse arbitror. Libro X. Epigr. XXXVII. *capta marte* non improbarem, nisi in MS. esset *male*: legendum itaque

maele, cujus fere Plinius meminit, & Gratius. Vulgo *taxus* dicitur. Epigr. i. Libri xi. vide an probes ex vestigiis MS.

Nunquid Parthenium videre certas?

Miror, quid in mentem *Grutero* venerit, qui Epigr. viii. *Penelope* dativum Graecum sua auctoritate eiecit, ut Latinum substitueret. Epigr. ix. pro *curvo quae cadit aura croco*, *Cilico* in mentem venerit, nec sine exemplo. Sed nondum mihi persuasi. Epigramma LI. mutilum est, idque patet ex sententia & iudicio manuscripti. In Epigrammate LIX. in *Telesphorum* haeret *Gruterus*: ego non procul recedens a vestigiis manuscriptorum bonam effecerim sententiam, hoc modo

Cum me velle vides. tecumque Telesphore sentis,

Magna rogas. puta me velle negare. licet?

At nisi &c.

in libri xii. Epigr. LV. versum quintum expungo auctoritate Manuscriptorum, sextum transfero, ut praecedat illum, *Ne sint basia*. Lib. xii. Epigr. xcix. in *comatis* duas esse voces, contra quam omnes editiones habent, certissimum est, Postrema illius libri Epigrammata non puto esse τῶ μύρου. In Xenii Lemmate LXIX. *dominae* probabis prae *domino*. neque enim Imperatorem intelligit. Lemmate xcv. lege

Constat quot mihi morte canum.

In Apophoreton LII. *Gestarit modo*, probum & acutum est. in cv. cur *Gruterus deerit* ex Palatino non praetulerit vulgato *desit*, haud video. idem iudicium de cxliii. ubi *consumunt* certissimum est. In clxxxii. ex Manuscripto, qui habet *forris* lego.

Ebrius haec fecit formis puto monstra Prometheus.

In Epigrammate cxcvi. vera est *Gruteri* lectio, quam confirmo simili sententia Epigr. LIX. Lib. ix, v. Lib. i. LV. lib. v. De hisce omnibus sententiam tuam poscam, ubi ad lectionem Horatianam venero. Indicabis mihi diem, si placet, & mittes Elegiam. Tu Epigrammata accipe, quae promiseram, & vale quam optime, ne quid de fatiis queramur. iv. Kal. Sept. Anno ciciocxii.

In autographo adiectum erat epigramma, quo *Heinsio* gratias agebat pro misso Auriaco & Jambis, quod legitur in Poematibus *Grotii* pag. 223. sed adiectum etiam Graecum epigramma, quod legitur in libro adoptivo *Heinsii* pag. 641.

EPISTOLA CXLII.

HUGO GROTIUS

Danieli Heinsio.

Leidam.

EQuidem absentiam tuam, Clarissime *Heinsi*, diutius non fero, tu tamen & *Neostadium*, & me frustratus es. Ego *Myrtillum*, quem per *Gisbicium* po-

poposceras, nunc demum mitto, occupatus haecenus nuptiis ¹ *Barneveldianis*. quibus factum est, ut nec dies nec noctes habuerim utiles. Mitto tibi Epithalamion, & de eo expecto iudicium tuum praesentis potius, si ita videbitur, quam per litteras. Utinam extorquere tibi amicitiae jure possim libertatem illam, fidemque iudicii, quam certe mihi debes; sed ut auribus meis nihil volo, ita nolo plane improbes carmen, quia fustum est fere, ut nos dicimus, ex tempore. Ridebis me scilicet, qui censori leges feram. Tu tamen hoc patere, & vale. vii. Febr. An. cicoiciii.

¹ *Mariae filiae magni Oldenbarneveldii, quae nupta Cornelio vander Mylen, & quas nuptias celebrat Grotius lib. iiii. silvar. p. 86. & lib. i. Epigram. p. 226.*

EPISTOLA CXLIII.

HUGO GROTIUS

*Danieli Heinsio S. D.**Leidam.*

FAcis pro humanitate tua, quam nemo me saepius experitur, quod occasionem mittendi ad me Appiani tam diligenter occupas, atque adeo amicissimo juveni mavis imperiosus esse, quam mihi inobsequens. Vides, mi Heinsi, quam familiariter tecum agam, qui & hoc officii genus nuper a te poscere ausus fui, & nunc ita accipio, quasi aut hoc mihi, aut omnino aliquid debeas: Quod tantum abest tamen, ut agnoscam bona fide nulli me tam beneficiis obaeratum esse, quam tibi. Utar itaque eo libro non mihi Hercule, ut tu recte ais, sed pluribus; non tamen tibi, quem tam eruditum lectorem jam dudum deprecor. Et tu tamen quas non laudes, quae non praeconia mihi, & quasi obiter ingeris? In quibus equidem si quid agnoscam, praeter amicitiam, & liberalitatem tuam, ne inter mediocriter insipientes quidem ponendus sim. Sed quemadmodum magnus ille mundi oculus, cum in caetera astra per se lucis egentia, tum in ipsam quoque siderum plebem jubar atque aureum illud lumen transfundit coelesti largitione, quod tamen solius suum est, ita tu, cui injuriam fecerit, qui juventutis tantum litterariae principem dixerit, gloriam splendidissimam ingenii, atque eruditionis tuae nobiscum communicas, qui in eodem quidem spatio tecum currimus, sed ignobili studio atque aeterna nocte damnamur, nisi quantum prohibent radii sideris tui. Sed ut ad mea redeam, (nam huic quidem sententiae, quam haecenus mediator, paria non invenio verba, & me spiritus, ut vides, deficit) gratissimum feceris, si Librum ejusdem Appiani, quem Libyca ipse inscripsit, aliquando ad me ablegaveris. De ¹ Pandora, quo diutius cogito, quo verius video, quod tu dicebas τὸ πῶλον significari, non qua τῇ φύσει, aut qua τῇ τῷ θεῷ δωρεῇ ἀντιτίθεται, sed qua objicitur τῇ πεποιηθείᾳ, quae sunt quodammodo ἐναντίαςμένα, ita ut Aristoteles recte dixerit τὸ πῶλον καὶ τὸ πῆλον περὶ τὰ

Ccc 2

αὐτῶν

¹ Vide ad Epist. Gronovii & N. Heinsii LXXVII.

αὐτὰ εἶναι, quae est definitio aduerforum. Quemadmodum & in Menone Plato opponit τὴν τέχνην τῇ ἀνθρώπινῃ ἡγεμονίᾳ. & Libro iv. de Legibus τῇ τέχνῃ. Aristoteles saepe τῇ Πιπτήσῃ καὶ τῇ ἀνθρώπινῃ Διανοίᾳ. Haec sane vulgaria. nescio quid majus haerebat memoria cum nec authorem, nec ipsam omnino sententiam reperire potui, ἐμὶ γὰρ Πιπλήσμων: sed vocor a D. Legato: ad quem eo hanc festinationem boni consules. Cal. Mart.

EPISTOLA CXLIV.

HUGO GROTIUS

Danieli Heinsio.

Leidam.

SI litteris tuis parum ordinate respondeam, veniam dabis: nam profecto ex quo eas legi vix apud me sum: adeo iis turbatus sum, adeo indolui, ut nunc demum ipse sentiam, quam te amem & colam. Tune, ut serio vasa colligas, & desiderium relinquas tui, cui medius fidius non ego par sim? Tune, ut ejus bibliothecae, quam tu in spem publicae utilitatis comparasti, quae te possessore facta est pretiosior, vel minimum divendas, ἐμὸν ζῶντι, καὶ Πιπτήσωνι δευχομένῳ. Nunc ego demum fortunarum mearum tenuitatem deploro, quas haecenus aequo animo tuli, quod non justissimis tuis querelis aliqua ex parte possum succurrere. Serio, serio loquor, mi Heinsi, & ita me magnus ille Deus amet, quidvis potius sum factururus, quam ut patiar mihi melius esse, quam tibi, siquid possum. Quod tamen potui, id feci: & quidem ne litteris opus fuisse credas, quibus socordiam meam excitares, jam locutus eram *Neostadio* vehementer, & ut vere dicam, accusatorie; Liberalissime promiserat operam suam, ita tamen, ut commune secum *Douzae* vitium τῆς ἀπεργασίας fateretur. Pressi hominem, dum polliceretur non parsurum se auctoritati suae, ac negotium tuum quavis ratione perpelleret. Dixit scire velle, quantum desideres. Dixi id verecundiam tuam, & genus, & fortunae pristinae reputationem non pati: ipsorum esse ut ultro occurrant necessitatibus tuis. Peregeram hanc causam, quum illud mihi tuum fulmen affertur, quo ita ictus sum, ut continuo inflammato animo ego me ad eundem proriperem: nam *Douzam* quidem convenire id minus nihilo est. Ego confestim, nihil mirum esse, si Academiam fungis quibusdam, & umbraticis doctoribus plenam haberemus, cum viderem palam, & quidem ex professo in te eruditioni omnem contumeliam infligi: Nec minus acriter egi, quam tu scripseras, non quod ita expedire arbitrarer, quamquam hoc quoque, sed quod aliter non possem. Ille errorem accusare D. *Seystii*: contra mandatum eam honorarii tui percriptionem factam. Dixi me scripturum tibi, quod nunc facio, ut *Seystium* ea de re moneas, qui si errorem corrigere supersederit, instrumentum ad me mitas, effecturum ut hîc ab ipsis Curatoribus emendetur. Id nunc si tuto fieri potest, experiamur illorum fidem: sin minus audes cuiquam chartam credere, mi-

mihi scribe, ad te veniam, & mecum feram: nihil mihi molestum erit, quod tui retinendi causa fiet. Addidi *Baudio* destinatam horam docendi, eandem quam tibi, ut vos homines ineruditi inter vos committerent, simulque curarent, ne cuiquam frequentius esset auditorium, quam sibi. At Hercule melius studiosos de magistris suis, quam Curatores judicare, cum isti quem sequerentur scirent, hi quem honorarent, nescirent. *Neostadius* respondit, non placere sibi Professores eam auctoritatem, quam hactenus, usurpare in lectionum tempora: Sibi ea curae fore. Atqui, inquam, maturato opus est: Itaque vult transmitti sibi descriptum indicem omnium lectionum, quod velim cures, si fieri potest: nam qui publicati sunt, non puto eos ita habere, ut nunc usus est. Consilium dedi, ut dum aestas est, *Baudius* hora septima matutina doceret. Id illi placuit. Semper ad id recidebam, non satis tibi prospectum: ad haec modo aerarii inopiam, modo Consulium incitiam excusare: ad extremum polliceri, ut ante quoque fecerat, ejus se rationem habituros plane, ne finerent jactare alias gentes esse quemquam apud se magnum, quem Batavi expulissent. Sed, inquam, tricones estis: properandum est. Cum iterum Comitia procul, & alia nescio quae afferret, meam illi sententiam dixi, quam continuo probavit, ad praefationem *Baudii* eos recte facturos, si convenirent; tunc hoc quoque negotium peragi debere. Recepit facturum. Sed iterum voluit edere te, quanto remedio opus esset, ut malis tuis medicina fieret. Dixi, ne quaereres quid tu, sed quid dignitas tua flagitaret: dandam illis operam, ne soli litteratorum *Heinsium* ignorarent: me nunquam desitutum ipsis molestum esse, dum id impetrassem. Probavit hanc vehementiam meam in causa amici, & voluit haec ad te perscriberem. Habes historiam brevem horarum aliquot, jam te monebo. de instrumento dixi, & indice lectionum, ea ut mittas, si commode fieri poterit: sin minus, me adfuturum. Nolo quicquam cogites de discessu, antequam tibi loquar, & tu mihi. De *Douza* ex industria differam: neque enim is est, quicum consilia communicari oporteat. Postea viderimus, ubi inter nos convenerit, quid ultra agere oporteat. Nisi mihi pernecessaria quaedam incumberent, & quae moram non patiuntur, jam apud te essem: & simulatque licuerit ero: nisi tu quippiam mandabis. Interea, si fieri potest, irascor tibi, quod etiam adeo iniquus mei aestimator sis, ut nummos nescio quos, pro tabellarii mercede miseris: quasi aut hoc aliquid sit omnino, aut si aliquid esset, amicitiae nostrae ratio calculis debeat subduci, Non faciam idem, ne me videar vindicare. Vale. *Φίλον κἀρα, ἡ δὲ πρὶ τῇ παύσει τύχη μακροθύμησον.* Rescripsi eodem die, cujus meridiem tuas acceperam. xxv. Maji. Hagae. cio iō ciii. Ad *Hogerbetium* eadem hora curavi, qua acceperam.

EPISTOLA CXLV.

HUGO GROTIUS

*Danieli Heinsio S. P.**Leidam.*

Quantam me censes injuriam aestimare, quod petitioni meae non satisfaceris in indicando tempore praefationis tuae. An tu nullos nisi Lugduni amicos habes, quos dignos putes, qui te audiant? Sunt certe & Hagae, qui gaudeant a te discere. Nam de Legatis quidem Palatinis, quibus idem significare omisisti, video fere quae tibi detur excusatio: verecundiam scilicet tuam, & alia ejusmodi praetexes, & jam fecit tuo nomine *Baudius*. Ista mihi dici non possunt, siquidem sum, quod unice ambio, amicus tuus. At ego Hercule melius tui memini, & jam emendatum instrumentum ad te misissem, nisi distulissem in eum diem, quo te praefantem auditurus eram, quem tu mihi eripuisti, nescio quo meo merito. Scribo itaque nunc paratum esse. Cur igitur, inquires, non mittis? quia non ausim homini ex vulgo committere & certum amicum, per quem curem, non invenio. Ipse potius ad te veniam hebdomade proxima. Nam nunc quidem admodum impediior. Legati nostri propediem discedunt. Vale, amicorum maxime, & posthac noli oblivisci mei, ne cogar tibi irasci. pridie Cal. Jun. ciciociii.

P. S. Accipio jam litteras tuas, quibus ecce respondeo: Nomen alteri legatorum est *Georgius Michael Lingelsbemi*: alteri ¹ *Joannes Gernandus* Consiliarius uterque Principis Serenissimi Palatini Electoris: sed ille sanctioris consilii. Magnificentias, Amplitudines, Claritates, & si quae ejusmodi sunt hujus saeculi monstra, tu supplebis ex more. Miserunt mihi sculptores residua exemplarium ² currus velivoli: poscunt cautionem: sed non meminerunt etiamnum debere se mihi duo colorata, quae ubi praestiterunt, dabis illis instrumentum. Vale, maxime amicorum.

¹ Illi carmina scripsit *Grotius* lib. 1. Farrag. pag. 174. & lib. 11. pag. 186.

² In quo exercuit Poëticam venam *Grotius*. vide poemat. pag. 157. 264. & seq.

EPISTOLA CXLVI.

HUGO GROTIUS

*Danieli Heinsio.**Leidam.*

Adeone tu me, quem certe eruditione immensum anteis, etiam officiorum benignitate praecurris? nam hodie quoque occupasti me jam jamque scripturum; nec ego invitatus tibi aut culpam hanc, fateor, aut gratiam debeo, quod prior interpellasti inofficiosum illud silentium. Didici, didici jam dum cedere, non quidem omnibus (nam non ita natus sum) sed *Heinsio* meo, quem

quem nunquam ita amo, ut non simul admirer. Idque mihi in literis tuis modo accidisse sentio, quae me non minus suo lumine perculerunt, quam permulserunt amoris lenissimo vapore. Unum me in dolorem dedit; quod de convalescentia etiamnum cogitas. At certe dixeram ne quid molireris, ante conventum Curatorum, hoc est praesentiam *Neostadii*, quem unum hactenus excuso. Quaeso, largire mihi hanc patientiam: tum si non tui habebitur ratio, potius tecum in exilium eo, quam ut te prodam. Poëmata mea revifere mihi hactenus non vacavit: nescio, mi Heinfi, quam totos mihi dies furetur ingratum illud forum. Crede mihi, & gratulare fortunae tuae. Longe aliud hoc est, quam Academia. Nam lites nostrae, praeterquam quod homini etiam diligentissimo molestiam exhibent, & minime conveniunt ingenio tam pacato, qualia sunt haec nostra, tum offensarum apud adversarios plurimum habent, gratiae apud clientes parum, gloriae apud caeteros, paene dixeram, nihil. Vix ego emersi, ut paulo plus esse viderer, quam caeterum vulgus togatulorum nostrae aetatis: idque actionibus aliquot, quae satis feliciter successerunt. Tamen neutiquam labori par fructus est, & nisi per has salebras eo esset enitendum, ut nos quoque essemus aliquando in Republica non aliena, plane sudores isti & vigiliae amico tuo perirent. Hoc enim tempore, quod scribendo cavendoque impenditur, quantum rerum bonarum disci potuit, quas tu doces! Essem certe paulo magis philosophus, in Graecis paulo minus peregrinus, in antiquis vero moribus, & in Poëtis &, quicquid est, Philologis, aliquanto versatior. Haec cum cogito, quo me maerore affici putas, qui scis quam liberali sim ingenio, quam mihi displiceant artes, quae, ut maxime non sunt, tamen videntur sordidae: solare me, si potes: tibi hunc maerorem meum commendo, quo certe in dies magis magisque conficior. Ipse non credas, quam haec mihi sint seria. sed ad Poëmata redeo: vix puto e re mea fore, ut te absente, aut tuis ante vulgatis, experiantur lucem: poteram latere sub tuo fulgore. quid nunc commendabit illos, ut levissime dicam, abortus meos? Haec tamen ita dico, ut de habitu tuo nihil adhuc velim credere: tua prius vulgatum iri etiam sperem. Ita arbitror, multo mihi plus famae accessurum ex editione carminum tuorum, si mea Lectores tui tantum quaesiverint. Magnus ille Poëta diadematus egregie fefellit ¹ hiantem, scis quem velim. nihilo plus habet, quam meritus est. Nugas attulit: inanis redit. Pandora tuae gratulor, quae sola tanto viro potuit imponere. Itaque nunc illa vere mihi, quod dicitur. Sed te, mea lux, quando videbimus, Vale 21. Julii c1010c111. Hagae nostrae:

¹ De *Baudio* agi constat; qui spe pecuniae in Angliam abiit, sed inanis rediit, unde saepe in Epistolis se reges sibi debendi reos habere jactat. quis vero ille sit, qui eum pellexit in Britanniam & fefellit hiantem, doceri vellem. vid. & Epist. mox. cxliii.

HUGO GROTIUS

*Danieli Heinſio.**Leidam.*

VENIAM dabis ſilentio haſtenus, & nunc incurioſae ſcriptioni. utrique in cauſſa febris, quae me corripuit vehemens admodum, & primo paroxyſmo totum perdomuit: ex quo malo hunc fructum cepi, ut cum gravioribus ſtudiis vacare prae nimio capitis dolore non poſſim, interim mea Poëmata tuo juffu concinnarem. Silvarum libros quinque jam collegi. Nunc ſum in Epigrammatis. Ubi primum per morbum licuit, haec non ſine moleſtia exaravi, ad caetera tua tum respondebo, cum paullo ero validior animo & corpore. Aut potius ipſe veniam: niſi tibi melius vacaverit ad nos tranſcurrere: quod pervelim: Locutus ſum heri de te D. *Neofradio*, & quamquam ſerio ſemper, nunc tamen ſolito vehementius, quod lenta remedia improbarem in ejusmodi malo. Teſtatus ſum Deum, & conſcientiam animi mei, quicquid haſtenus de te monui, id me Academiae & Curatorum cauſſa feciſſe, cum ſine horum ignominia, illius jaſtura, nulla ratione dimitti poſſes. Tribuiſſe deinde aliquid amicitiae noſtrae, ſed haſtenus, ut ſi cum commodo tuo fieri poſſet, mallem te minus procul a me abeſſe. Scire me nunquam tibi minus eſſe poſſe, quam nunc eſt: nuſquam te indignius haberi poſſe, quam ubi praeclariffimam operam navavi. Eſſe Lugduni, qui iſta contumelia, an rerum omnium bonarum inſcitia, reſpicere te ſuperfederent. Adverſus eos, ſi in ipſo & *Douza* nihil eſſet remedii, ſi quod autem eſſe poſſet, in ipſo eſſe debere, me non eo uſque perſecuturum amicitiae meae compendia, ut deditum te velim publicae ingratitude. Cum deinde exempla attuliſſem eorum, qui in Galliis uberri- mos quaefus ex litteris fecerunt, Academias quoque, quae Profeſſores tuarum litterarum ſummopere requirerent, multumque verba commutaſſemus, atque ego, uti eſt, dixiſſem omnino non minari te abitum, quod ſcio plerumque aegre ferri, ſed in hoc eſſe, ut ſerio diſceſſum moliaris, & praelum te, non Academiam morari, ſancte mihi affirmavit, invitiffimis omnibus (ſcis quos, dicam) perfecturum ſe, *Douza* tantum aſtipulante, ut hîc pro dignitate tua habearis, ne quid ultra ſit, quod tibi fugae conſilia impellat, nec paſſurum, ut ulla juſta ratio ſit, cur nos deſeras. Dixi, ſi id ita fiat, ut jure te retineri homines aequi judicent, interceſſurum me pro amicitia noſtra, ne magis noſtri taedio, quam injuria affectus profectionis cogitationes iniſſe videaris. Haec ſignificata tibi volui, Clariffime Heinſi, & quo ea de re acturi ſint, praefitutum diem diſputationis Arminianae; tunc enim neceſſario illis coëundum erit. Veniſſem ego ad Baudianam praefationem: ſed forenſia negotia me Brilam tra- duxerant. Veniam ad te prius forte, aut ſi id fieri non poteſt, cum Curato- ribus. Quaefo ne moleſtum tibi ſit adire mea cauſſa Illuſtriſſimum *Scaligerum*: &

gra-

gratias ei ingentes agere pro transmissio Procopii fragmento. Deinde dabis ei haec currus mei exemplaria, quae, si incommodum non est, amicis suis in Galliam mittere poterit. Vide etiam, si placet, an *Scriverio* nullum exemplar sit. Accepi modo litteras ab isto nostro, quem ille Magnus τῆς εἰς Βρετανίαν πλοῦτος ἐφολκίδα dicebat, amiciores sane quam oportuit. Nec dubium est, quin ingentis beneficii loco sit mihi imputaturus, quod prior mihi, & ut non plane indigno amicitia sua scripserit. Tu vale, Juvenum maxime, & eo me honore affice, cujus sum ambitiosissimus, ut sciant omnes, me tibi placuisse. Hagae Comitatus. xxviii. Julii cico idciii.

EPISTOLA CXLVIII.

HUGO GROTIUS

*Danieli Heinsio.**Leidam.*

Vide quam me velis erubescere, qui impudentiam & importunitatem vocas, quod me *Murdisonii* causa iussisti *Mylium* accedere, quod certe vel ipsi, sine tua commendatione postulanti, scis me non negaturum fuisse. Ego vero quod nomen meae culpae inveniam, qui te non ad *Mylium* aliquem, sed ad homines spurcissimos ablegavi? Tamen sine ulla excusatione id ausus fui, cum tu tamen te reprehendas, quod meis officiis utaris. Itaque aut mihi abstinendum erit posthac ab ejusmodi familiaritate; aut tibi tacendum. Facies autem melius, si quo simplicius meam operam posces (est autem exigua, & certe ad res paucas optabilis) eo me tibi amiciores fore confides. Nunc quoque sentio me non satis reverenter tecum agere, sed dabis veniam amori. Haec tantum scribere placuit, ne me segnitiae accusares, plura adderem, sed nescias quam occupatus sim, in eo, quod brevi videbis. Vale interea, fidus nostrum.

EPISTOLA CXLIX.

HUGO GROTIUS

*Danieli Heinsio S.**Leidam.*

Merito tibi irascor, quod tam pertinaciter nuper me fugeris: nec ignosco, nisi culpa emendetur. Ut scias igitur & poenitentiae & veniae locum esse, cito te, ut coram causam dicas, cui uterque vacare jam possumus, dum auditoria quiescunt, & friget forum. Sin veniendi copiam ejuras, adeo ipse injuriae meae exsecutor. Vide tibi caveas ab illis hominibus. qui bilem habent, etiam quam venditent. En tibi *Junghermanni*, ut arbitror, litteras, quas accepi cum ejusdem ad me, & *Lingelsheimianis*. Salutem tibi ab illis ascriptam nuntiare paene supervacuum est, cum mea possis contentus esse: nisi

Tom. II.

Ddd

me-

melius fidis illorum voluntati, quos nunquam offenderis. Longi Poemenica nescio an audeam a te poscere, ne forte putes eo beneficio redemturum me offensiones meas. sed heus tu *Jungbermannum* illum suaviter decepisti: Soles nonnunquam mihi, homini misero, sine metu talionis, in libris tuis magnitudine praeconiorum illudere. Ille quod arbitratur, credo, te familiaritatis consortio non minus mihi eruditionis, quam laudis affricasse, titulum unum ex illis, quem mihi cum nugari libet, perquam odiosus laudator imponis, ita adscripsit, quasi perpetuum epitheton esset, aut gentilitium aliquod cognomen. Denique tu me facis omnia, cui multum debebo, si posthac sodalis & congerronis tui *Ὀτέλειαν* non contempseris. VI. Jan. Anni c1515civ. Hagae Comitatenfi.

EPISTOLA CL.

HUGO GROTIUS

*Danieli Heinsio.**Leidam.*

Scribo ad te, sed *Meursii* rogatu, quod tamen ita te scire oportet, ut ille nesciat. Apparat igitur Lexicon Barbaro Graecum, quale *Rigaltius* vulgavit. nosti laborem, in quo ingenii nihil, industriae non multum requiritur. Legit auctores plerosque & exicripit. hoc illi placuit Lexicon vocare. Restant legendi Zonaras & Cedrenus: quos a te petere non cupit. Me submisit, qui illius gratia mentirer, & dicerem opus mihi illis auctoribus, ad quos videndos otium non est. Nescio an habeas. vix puto, quia raro inveniuntur; neque magnus usus est. Si ita est, scribes te non habere, sed ita quasi mihi petiverim, ut possim illi tuas litteras ostendere. Sin quid adjicere libebit, quod inter nos maneat, fac a litteris separes. Ego hoc magis illi negare nihil debui, quia videor offēdisse hominem, quod rogatus Encomium scribere Meditationibus, Epigramma scripsi, nec tamen, ut ille, de sole, aut saeculo, sed liberale praeconium, & quo putabam ipsius quoque arrogantiae satisfieri posse. Nunc video inexplabilem, ex quo me coram meos versus legit fronte corrugata, tristis, an indignabundus, & ad singula prope verba subsistens, quasi cum dignitate sua expenderet. Est id Epigramma hujusmodi ¹.

Si bene te novi, tu, ut ego, dices, ² *nescio quid faciet*. Sed vale & ride, meum & litterarum decus v. Febr. c1515civ.

¹ Quia lib. 1. Epigram. p. 231. legitur, hīc omittere visum.

² Haec verba erant ultimi versus in epigrammate, quod vide.

EPISTOLA CLI.

HUGO GROTIUS

*Danieli Heinsio.**Leidam.*

Quod mihi discedens mandaveras promptissime exsecutus sum, ut sane debui tantis jamdudum beneficiis, & recens tam illustri munere obligatus. Affirmat *Hogerbetius* locutum se de tua re *Seyssio*, eumque id in se recepisse, quasi haud dubie confecturum. Caeterum metuo, ne ille domestica calamitate impeditus comitiis Curatoriis non intersit. Ita in solo *Duyckio* spes esset: nisi quod & *Neostadius*, tum ab *Hogerbetio*, tum a me (si quid hoc tamen est) serio admonitus videtur, in re tua inchoaturus eam auctoritatem, quae ejus collegii principem docet. Aequae tecum eventum desidero. Valere te opto, precor vobis omnibus fausta omnia, & Academiae egregium rectorem. τὰ ὅδ' ἄλλα ἄδην καχεκτέ. 4. Febr. CIΩICCI.

EPISTOLA CLII.

HUGO GROTIUS

*Danieli Heinsio.**Leidam.*

Ussit me D. *Neostadius* ad te scribere, de re, quae ad te non minus, quam ad illum pertinet. Est enim communis Academiae vestrae, cujus honorem scis dictatoris sui flagitio profanatum. Cupit igitur D. *Tuningium*, & D. *Baudium* a te conveniri, ut tres, qui simul isti convivio interfuistis, quod literarum nomini probrosissimum fuit, summa capita earum rerum annotetis, quae maxime scire D. *Neostadium* publici interest. Nam etsi ad ultima remedia veniendum non erit, moneri tamen debet vir ille, non alio magis nomine celebrior, si suam famam vilem habet, attamen parcendum fuisse honori Academiae, & muneris: deinde ne quid tale iterum posthac committat, fiducia sacrosanctae potestatis. Annotabitis autem ea maxime, quae in ancillam D. *Scaligeri* protervius dixit; nam quae illi cum D. *Vulcanio* intercesserunt, quamquam minime decent utriusque dignitatem, tamen inconsultum ira, & altercandi calor excusat. Ista autem in feminam dixit haud dubie non provocatus. Si quid tamen & de jurgiis istis memorabile succurrat, vestrum erit monere, si quidem D. *Neostadio* gratificari vultis. Nec est quod vos remoretur: neque enim testes in judicium vocamini, sed suggeri tantum sibi Curator cupit ea, quae conscientiae illius in publico conventu objicere possit. Etiam alii interrogabuntur. Vos quicquid scribendum videbitur (& Hercule licebit minus dissimulare) mittetis ad me aut si mavultis, paratum habebitis in adventum D. *Neostadii* (futurum dixit Jovis die) cui occulte tradatur. Vale, lite-

rarum columen: & Clarissimos, quos dixi, collegas a me saluta. III. Maji. CIO IO CIV.

EPISTOLA CLIII.

HUGO GROTIUS

*Danieli Heinsio.**Leidam.*

Pessimum commisi facinus, quod tanto tempore (& sane ut esset breve, non potuit te absente mihi non esse longissimum) literis amicum non compellavi. Idque maxime vereor, ne forenses tricas mihi putes tanti esse: Fuit autem vel nunc certe mihi festinandum, cum te video isto cum homine magno, ut sese aestimat, literas commutare. An tu reris hunc sacrum, atque caelestem amorem minus habere aemulationis, & invidentiae, quam illi vulgivagi solent? An me vereri non putas, ne illum, Regio spiritu sceptrum sibi votis admetientem, praeferas homini misero, & cui satis sit in toga senescere? Sed tamen serio, mi Heinsi, nescis quantum illi ad arrogantiam, quod minime crederes (pervenerat enim ad summam) accreverit ex nescio qua domini pollicitatiuncula, qua nunc ita elatus est, ut nec se, nec quenquam noverit. Ex eo me non salutat. nam ego privatus scilicet parebo isti a ferula sua venienti. Habet hercule mirificam virtutem, quam *ἀναιδείαν* vocant: & ei nunc prostant omnia: nec dubium est, quin *περιπλεμένῃς ἐν αὐτῷ* facturum sit aliquid magni. Tu ergo recte, qui talem tibi fautorem in tempore concilias: Nam nisi ita consulimus rationibus nostris, timendum est ne & ego vulturiolus togatulus escam non inveniam, & teipsum ne tua quidem Pandora prohibeat a fame. Haec libuit jocari, ne tam vastum posthac silentium esset. Vale, lux, & spes mea. CIO IO CIV.

EPISTOLA CLIV.

HUGO GROTIUS

*Danieli Heinsio.**Leidam.*

Irascentem me negotiis meis (quae exigua quidem, sed tamen multa sunt) quod tanto tempore ne litteris quidem tecum conjungerer, deprehendit bellissima occasio, quae debetur *Garnandisto* nostro. Is cum & literis & inscriptione problematum suorum me tibi sociaffet (quod fere solent, qui mihi optime volunt) quae utrique nostrum erant communia forte prius ad me pervenire: Uterque rei gratiae sumus, uterque in solidum tenemur. creditum hoc dividi non potest. sed tibi constat ratio: habes quod imputare possis: ego nihil unquam aliud, quam debui. ita sine fine obligor. excusarem me, quod prior

• Vid. Epist. cxlv.

prior haec resignaverim, prior legerim. sed ita arbitror, ne illam quidem partem a me alienam esse, quae tua propria est. Non possum tibi non conqueri miseriam meam. Germanus quidam (nostis hominum genus) edidit figuras asterismorum caelestium cum explicatione. Eo in libro nihil paene est, nisi ex Manilianis maximi Herois, aut meis ad Aratea commentariis depromptum: nec tamen usquam proficitur illorum nomen, quorum fere paginas exscribit. Etiam praefationem suam expressit ex mea. & *Scaligeri* quidem, cujus opera vel propter ipsum perpetuo omnia legentur, id non interest. Mea aut peribunt, aut, si benignius mecum aget fortuna, faciet posteritas utrum volet, furti reum. Ita etiam tenuis fama insidiatores habet. Vale, mea gloria. xv. Dec. c1010civ. Thesium exemplaria tibi mitto duo, manent apud me altera totidem. Saluta suavissimum *Baudium*.

EPISTOLA CLV.

HUGO GROTIUS

Danieli Heinsio.

Leidam.

JAm dudum ad te scripturus fueram, si quid certius de rebus materterae tuae potuissim cognoscere. Nunc quoque non ideo scribo, quod cognoverim ejus quippiam, sed ne frustra expectetis. Nam ad litem illam quod attinet, nullum hinc ab ullo Magistratu praesidium peti potest, antequam iudices loci nos laeserint, de quo nobis queri nondum licet. De re altera plane ita est, ut dixeram, nisi magnis faventium studiis spem lesse nullam conficiendi negotii. Interim *Hussenius* hinc prensat, & valde vult in summum senatum allegi, quod si impetrabit, credo nobis aliquanto plus in jure fiducia fore, nisi omne illud tribunal ejuramus. Heroi me & *Borelium* commendabis. Vale, princeps eruditae juventutis. xx. Oct. c1010cv.

Litteras has multo serius curavi quam scripsi: quia is, quem allaturum credideram, me frustratus est. Interim tuas recepi. Quibus nunc quidem nihil aliud respondendum habeo, quam fore ut ὁ θεσμόςτης praesideat septimana, non ea, quae nunc incipitur, sed sequente, quae in annum alterum incidet. Addebam xxv. Dec. c1010cv. Velim te meminisse *Douzae* Poëmatum. sed & Apotheosin nobis transmittere, ut videamus. Litteras inclusas, quandocunque commodum erit, velim *Tuningio* tradendas cures.

EPISTOLA CLVI.

HUGO GROTIUS

Danieli Heinsio.

Leidam.

QUod nuper in fratrem hujus adolescentis studium ostendisti, idem in hunc ostendas tres simul oramus. Est enim eo iudicio, ut facile intelligat ma-
Ddd 3 gnum.

gnum diligentiae suae subsidium in amicitia tua fore. Ego cum talem cognovi, qui tibi dehonestamento futurus non sit. Reliquisti apud me, si forte memineras, Saxoniam historiam, Suevicam inquam. Eam & si quid aliud apud me tuum est transmisissim nunc, sed nolui ipsi praeter literas quicquam oneris esse. De ¹ *Bezae* carmine sollicitus sum: quia nec genus carminis, nec tempus invenio: Tantum argumentum abunde sufficit, idque ipsum saepe cogitanti impedimento est. si aliter non potero, ubi prima me Musica aura inflaverit, Epigrammate transigam. De Apotheosi, quaeso, memineras *Mylii* causa. Quoties ad nos veneris, & molestum non erit, juvenis hic non invitatus te comitabitur. Interim materteram tuam a me salutatam velim. Et cum, quem nunc incepturi sumus annum, felicem tibi, hoc est literis, precor. III. ejus Cal. scribebam CIO IO CV.

¹ In ejus mortem quae incidit in XIII. Octob. hujus anni, Anapaestos fecit, qui leguntur lib. III. Farrag. p. 204.

EPISTOLA CLVII.

HUGO GROTIUS

*Danieli Heinsio.**Leidam.*

HUnc, qui ad te venit, duplici tibi nomine commendatum volo: & quod apud suos in aliqua dignitate est, & quod mihi olim Lugduni studiorum commilitio junctus, nunquam exinde desuit amicitiae foedus fovere. Nomen est *Eitizoni Tiardae*, tibi, ut puto, non inauditum. Ipse omnium elegantiarum studiosus, & quod reipsa magis experieris & τῶν τυχόντων. Fac, quaeso, ut videat meam gratiam apud te aliquid valere: quae mea maxima jactatio est. De caeteris, quae pro nimia tua humanitate curanda susceperas, proxime, ut puto, aut per literas, aut, quod multo mavelim, adventu tuo intelligam. Et utinam illum una adducas, qui nunc, ut tu scribebas, in diem gaudet. Ostendam tibi, si velis, quanto ego rectius legem Ascracae frugalitatis observem. Vale postrid. Kal. Sextil: CIO IO CVI.

EPISTOLA CLVIII.

HUGO GROTIUS

*Danieli Heinsio.**Leidam.*

MAle sit illi convivatori, qui me heri sobrium abire passus non est: ac praeterea maximo me bono fraudavit, conspectu tui. Idque eo magis dolet, quia quaerendi me laborem toties a te sumtum intelligo. Sed fatum hoc meum est, saepe tibi molestum esse. Nam & pro ¹ versibus meis scio non

¹ Puto hac & seq. Epistolis agi de Epithalamio *Philippi Guilielmi Arayssonensis*, & *Heleonorae Barbovicas*, quod legitur lib. XII. Silvar. pag. 107.

me magis ipsum, quam te esse sollicitum. Nihil forte opus erit aut emblemate aliquo (ut fieri solet) aut loci Typographiae expressione, ut frons sit quam simplicissima: & apud Gallos (nostri gentem) aliqua novitate commendabilis; quos facile patiar & auctoris nomen conjecturis destinare, nisi ad quos ipse scripturus sum. Sed de his omnibus tuum esto arbitrium: & re peracta monebis me, ut transcurram. Comprimenda erunt exempla, donec nuptiarum dies advenerit: de quo needum rescivi. Materterae tuae ita me commendari velim, ut simul excuses meam nuper festinationem. *Baudium* quoque gaudere jubeo, dum licet: & in isto voluptatis interusurio nostrae vitae commoda delibare. Sed vereor, ne brevi recidat, in suum αἰθ' ἰφελον, nostri sequentia. Tu autem quam jucundissime vale. XII. Sept. CIÖIOCVI. Hagae.

EPISTOLA CLIX.

HUGO GROTIUS

*Danieli Heinio.**Leidam.*

EUndem te semper agnosco. Tam tibi ἀδωάνη est non bene facere, quam mihi gratiam referre. Amicos meos ita amplecteris, ut non minus tibi, quam mihi debeant: nisi quod hoc ipsum mihi deberi vis, quod tu praestas. In carminibus nostris, quae mihi ob hoc unum placent, quod tibi non improbantur, horas ultro perdis; & quidem tam pretiosas. Interpellatus nocte, literas ne in diem quidem differs: At eas quam lepidas, quam elegantes, ut sane appareat, te ne tum quidem, cum dormiendum est, dormire. Sed quid amplius dicam. *Baudione* memoriam suam imposuisse, quod ego inter prodigia habeo, an, quod solet fieri, me non satis explicasse animi sententiam? Non enim paucis exemplaribus, sed aut omnibus, aut sane magna parte operat, quae in Galliam mitterem. Itaque hoc volueram, quod de inauratione dictum erat, si sine temporis jactura confici non posset, omittendum potius, ut quae parata essent exemplaria, sine ulla mora curarentur, quod etiamnum ut fiat te oro. nam imminet nuptiae, & satius est quemvis potius cultum amittere, quam ejus temporis occasionem, qua elapsa Epithalamium res sit frigidissima. Transmittam igitur ea, quamprimum a te accepero, quod confido jamjam futurum. Si quae inaurari caepta sunt, ea ubi perfecta erunt, facile hîc dominum invenient. Sed, ut dixi, non tanti hoc est, ut vel diem unum interponam. Rogo te, ut aliqua Carmina his, quibus videbitur, distribuas. Nam apud nos pauci sunt, a quibus eo nomine gratiam expectem. Fraudem hanc mihi gratificare: Putent homines aliquid, esse quod per te donabitur. Pecuniam, quae Bibliopolae restat, ubi quanta sit indicaveris, transmittam: nisi ipse huc venturus es, quod ut ante monui, flagrantissime exopto: xv. Sept. CIÖIOCVI.

EPI-

*Danieli Heinsio.**Leidam.*

Tibi gratias ago, Typographo ignosco, *Baudium* absolvo. Quid enim erravit, qui credidit non esse numerosis exemplaribus vulganda carmina, quae sive bona sunt, quod nunquam mihi persuadebitis, paucorum laude contenta esse debent, seu mala, ea ratione multorum notas lucrabuntur. Sed ita nobiscum agitur, ut quibus labores nostros donamus, iisdem famam nostram gratificemur. Mecum autem ita agitur, ut cum lusore paupere, qui perdere ne tum quidem potest, cum vincitur: ejus autem generis hominibus crebro arbitror tentandam aleam. Satis enim tuto periclitatur, qui quod speret habet, pro quo timeat non habet. Gaudeo sane, quod τὸ τῆ σοφοῦ experimento comprobasti, αὐτὸ τῶν Φίλων κοινὰ, μάλιττα οἱ τῶν Φίλων Φίλοι κοινοί. praecipue quod caeptum faedus hospitali uterque tessera obsignastis. Atque utinam fuisssem & ego τῶν δαίτυμόνων. dixisssem aliquid tam stultum, quam ea erant, quae te nuper laudare coëgi, ne me impune convivio excepisssem. Ego, severus ille censor, ultro poposcisssem majoribus, cum superindictō, bene te, bene me, bene nostram. Nec enim aliter decuissset apud ducturientem. Bene cessit *Tiar-dae* nostro, quod *Baudium* non vidit, ex quo contractior dormit. Non placuissset illi, vereor, vultus maritalis. quid enim illo tristius, cui ex animo tristi esse non licet? Fingo mihi non jurgia tantum molesta, sed & delitias molestiores: cum miser conjunx infaulto noctis tributo mala quae pertulit deprecatur. Sed heus tu, versus meos cur ita contemissisti, ut nulla paene apud te exemplaria retineres? An te puduit malorum carminum esse divisorem? Nunquam effugies. reddam tibi si huc veneris. si non veneris, ipse referam. Vale, dulcissime Heinsi, & in Maximo diligenter perge. Postrid. Cal. Oct. cıııııııı.

*Danieli Heinsio.**Leidam.*

Plurimum tibi debeo, per quem mihi adducto, & tristi esse non licet. Nam absque te foret vitam agerem plane ἄμυστον ἢ ἀβροδείαιον, nunc & fori tedium, & ingenii mei frigus festivissimae tuae litterae detergunt. Nam quis non rideat, cum tam lepide depingis illum, qui sane intelligere debuerat, in Batavis neminem parem sibi fuisse, peregre se non habere idem gratiae? Quod si magistrum se neget, & ego eum non mentiri liquido jurabo, nam discipulos non habet. Quod autem ita agit, ut herifugae famuli solent, seque pro
li-

libero gerit, &, ut ita dicam, fui plagium facit, id hercule sciri dominorum interest. Carmina, ut voluisti, tibi mitto. Cupio enim, ut alias scripsi, ita te implicare, ne tibi integrum sit non laudare ista, quibus & oculos & manus commodaveris. Melius autem me scis, quibus ista debeantur. hoc est nec ita ineruditis, ut intelligere non possint, nec ita severis, ut nequeant ignoscere. De paraphrasæ Aristotelis jam mandatum a Curatoribus *Merulae* datum est: quem quidem librum ego, simulatque emtus fuerit, inspicere gestio. Delectant me enim mirifice *πὶ τῇ ἱστορίᾳ*. Nec minus tamen ardeo & Maximum tuum & Alcinoum legere: quibus dum tu obstetricaris, interim desiderium Epigrammate Graeco, eruditissimæ (ita me Musæ juvent) simplicitatis solabor. *Τὰ ἡγῶν* commendatum me velim & illi, quem proprio rabies armavit iāmbo. Vale, meum dulce decus. IV. OCT. CIOIOCVI.

I *Dominico Baudio*, ut puto.

EPISTOLA CLXII.

HUGO GROTIUS

Danieli Heinsio.

Leidam.

SOla nocte interposita postquam a te abscesseram adii *Mylium*, qui mihi literas tuas demonstravit, sane candidas & elegantes, & dignas quas tu scriberes, ille legeret. Probabat non tantum verba, sed, quod puto tibi non minus curae esse, rem ipsam: nisi quod arbitrabatur parum dignitati tuae consultum iri, si ante peractum interpretandæ Paraphraseos laborem de præmio, velut stipulato, agatur. putat & ipsis Curatoribus, & tibi decentius fore, si nec tu liberalitati illorum diffidere videaris; & illi non ex pacti conventi formula, sed ex gratiarum lege teneantur, cujus nomine actionem ideo Praetor nullam prodidit, ne virtus esse desineret, quod jus esse coepisset. Scio multas esse causas, cur, non quantum tibi debetur, tantum sperare audeas, ab illis hominibus, quibus hætenus partim ad judicandum prudentia, partim ad efficiendum vis defuit. sed fas est attollere animos, ex quo illius numeri esse coepit vir cordatissimus, cui difficile sit literas amanti deferere literatos. præcipue autem dignitatis ejus fructum vindicare vobis debetis tuque & *Baudius* privato amicitiae jure: ut nunc nihil dicam de singularibus tuis in publicum meritis, in quorum partem nemo venit. Neque decipiet vos spes vestra, si hoc modo cogitetis temporis illi spatio opus esse, tum ut suam auctoritatem confirmet, tum ut vestris occasionibus invigilet. Curatores non coibunt antequam dissolutus sit aut diffusus Ordinum Hollandiæ conventus, qui in aliquot dies adhuc, sed incertum quousque durat. Legatus noster sarcinas incipit colligere, & quidem optimas primo loco: jam enim libros convasat. Hodie illi Senatus Federatorum Ordinum datur, in quo nunc supremum, ut puto, oraturus est. Vides & tibi super itinere ineundum consilium: ac forte non impruden-

Tom. II.

Ecc

ter

ter feceris, si Illustrissimi *Scaligeri* rationes, quibus istam peregrinationem dissuadet, cum animo tuo consideraveris. Ego & hoc vereor, ne cum ille subito abiturus est, ut ferme solet, tibi tempus non sit cum Curatoribus agendi, ut illorum pace ab Academia tibi abesse liceat. Loquar hac de re cum patre tuo: & tecum si huc veneris: quod satis consultum videri potest. Mihi hesterni temporis angustiae abstulerunt bonam partem eorum negotiorum, quorum causa Lugdunum veneram. Nam *Patium* eram conventurus, ut scirem quid illi a me restet. si velit transcribere, mittam continuo. Promiseram Nobilissimo *Doussae* me ipsius nomine tecum acturum de editione Poëmatum fratris. potes negligentiae meae succurrere, si quid fieri ejus possit, & quid tibi optimum videatur, coram, sin minus, per literas mihi, aut ipsi significaveris. Idem voluerat dici *Bertio*, quem audit editionem superantium *Lipsii* epistolarum adornare, esse aliquot apud se nec editas, nolim tibi eam ob rem molestus esse, nisi forte in illum incideris. Vale, & de Maximo, Alcino, Paraphraсте fac ne nimium diu nos torqueas. XI. Nov. CIOIOCVI.

EPISTOLA CLXIII.

HUGO GROTIUS

*Danieli Heinsio.**Leidam.*

TE an Tyrium tuum magis expectem, ita te semper amicum habeam, ut nescio. nam & librum videre vehementer exopto, a se bonum, at te meliorem, & quem ipsa mora desiderio meo commendavit: & tu quoque abfuisse jam pene saeculum videris. sunt praeterea, quae tibi referam jussu D. *Busanvalii*. Fac itaque ad nos venias. Nam *Mylio* ipse te Maximus optime excusabit: cui tamen ego interim impatientiam expectationis spe propinqua mitigabo. Et eadem opera poterit res materterae tuae apud Hugensem Secretarium tua gratia adjuvari. quod & *Venio* videtur, qui protracti negotii hanc reddit causam, quod *Bevernius* nondum praefederit. Addam & hoc, si quid forte ad rem pertineat, optare me judicium tuum in paucis ¹ Erotopaegniis meis, quae puto iratus otio meo effudi. Cura ut valeas. XIX. Dec. CIOIOCVI.

¹ Leguntur illa lib. II. Epigr. p. 282.

EPISTOLA CLXIV.

HUGO GROTIUS

*Danieli Heinsio.**Leidam.*

Litteras tuas, Clarissime Heinsi, non cum voluptate modo, sed & cum fructu perlegi, dignissimas illas, quae ab optimo Platonis interprete scribe-

berentur. Veniam autem dabis, si fatebor de Alcinoi loco nondum omnes mihi scrupulos evelli. eoque mitius, si quid fallor, interpretari debes, quia nec otium mihi suppetit ista pro voluntate & studio meo examinandi, neque ad manum sunt Academicorum scripta, quae consulam. Tantum quod mihi memoria Platonicae lectionis, & Alcinoi tui diligens inspectio subjecit, ejus te participem, atque adeo judicem fieri volo. Primum autem hoc velim diligenter consideres, illud ἐξ ὑποθέσεως apud Alcinoium dici non tantum, *ᾧ τῆς ἐν νόμοις πολιτείας*, verum etiam *ᾧ τῆς ἐκ διορθώσεως ἐν Ἰπσιολαῖς*. Quomodo hoc τῇ ἐν νόμοις conveniat, aliquo modo in litteris explicas, ita tamen ut negare non possis, eam loquendi rationem a Graeco sermone, & usu Philosophorum abhorrere. sed Epistolicis *πολιτείαις*, quae sine dubio sunt verae Respublicae, & in se subsistentes, quomodo eadem illa interpretatio aptari possit, non satis video. Deinde in libris de Republica describi Rempublicam *ἀπόλεμον* ita verum est, ut iisdem etiam *ᾧ τῆς πολεμικῆς* agatur. quid enim aliud faciunt *Ἰπικουροι*, & mulierum armata agmina? Et hoc ipsum diserte Alcinoius testatur cum dicit, ἐν τῇ *πολιτείᾳ*, hoc est in libris, quos dicebam, *ὑπογράφεω καὶ τὴν ἀπόλεμον καὶ τὴν πολεμικὴν*, utramque scilicet pari loco ponens: ut & debuit, quia tractatio bellica in illis libris neutiquam minorem partem obtinet. Idem ex Apulejano Philosophiae Platonicae compendio clarum est. Nunc ad rem venio. Convenit inter nos Alcinoium earum, quae apud Platonem sunt, *πολιτειῶν* duo summa genera ponere. ut patet cum dicit *πᾶς μὲν*, & infra *ὑπογράφει τὴν καὶ ἄλλαν*. Illa autem summa genera duo ex lege *διχοτομίας* Platonicae oportet *ἀντιδιαρῆσθαι* quare si unum intelligamus, facile est alterum reperire. De genere posteriori non dubitamus vocari *πᾶς ἐξ ὑποθέσεως πολιτείας*. Sequi ergo videtur genus illud prius, quod contrarium huic esse oportet, non posse *ἐνυπόθετον* dici, quod idem plane est cum illo ἐξ ὑποθέσεως, (si tamen vox illa apud Philosophos usitata est, quod equidem nescio) sed *ἀνυπόθετον*. Expendere ergo debes, an non ullo recto sensu (quando istarum vocum non ubique eadem est significatio) Respublica ἢ ἐν τῇ *Πλάτωνος* *πολιτεία* possit *ἀνυπόθετος* dici, ita ut ei directe opponatur, ea quae est tum ἐν νόμοις, tum ἐν *Ἰπσιολαϊκῇς διορθώσεσιν*, ἐξ ὑποθέσεως scilicet. Voces ἐξ ὑποθέσεως & ἀνυπόθετον non memini me in ipso Platone alibi tam clare alteram alteri oppositam legere, quam in sexto & septimo *τῆς πολιτείας*: ad quos locos respexisse Alcinoium, cum de eo argumento ageret, plane mihi persuadeo. Videtur autem mihi Plato illis locis hoc ferme dicere. Esse in rebus aliud *ὄρατόν*, aliud *νοητόν*. *Νοητόν* esse duplex: aliud enim uti *ὄρατοῖς εἰκόσι*, aliud non uti, aut certe non uti necessario, illud quod *ὄρατοῖς εἰκόσι* noscitur pendere omnino ἐξ ὑποθέσεως, qua sublata corruiere omnem ejus certitudinem. Alterum autem non uti *τῷ αἰσθητῷ*, sed *εἰδῶσιν αὐτοῖς δι' αὐτῶν*. esse tamen ei posse *πᾶς ὑποθέσεως Ἰπιδείξεων* loco: sed easdem *ὑποθέσεις ἀναρῶσθαι* venirique ad *ἀρχὴν ἀνυπόθετον*, quae scilicet vi nulla ὑποθέσεως nitatur. Mox eam doctrinam aptans ad institutam de republica tractationem, fatetur, qualem ipse instituit rempublicam, difficulter quidem inveniri posse inter res visui ac sensui

obnoxias, sed tamen veram se formam atque ideam reipublicae perscripſiſſe, quae non contineat *δοξασόν τι*, & ἐξ ὑποθέσεως, ut aliorum νομοθεσίας, sed ut ipse loquitur τὸ ἀρχαῖον αὐτὸ, quod sit ὅν magis quam γιγνόμενον, & καθ' ὕπαρ, non καθ' ὄναρ. Illud vero τὸ αὐτὸ ὅν vult esse ἀρχὴν ἀνυπόδεικτον: Itaque in Republica communi nomine δικαιοσύνης videtur exprimere. Ergo ut ipsi videtur πίνεται, non ὑποπίνεται: quod Rhetores dicunt, agit ἐν θέσει, non ἐν ὑποθέσει. In legibus autem agere videtur ἐξ ὑποθέσεως. nam ὑποπίνεται in agro Cretenſi civitatis exſtructionem. Et haec quidem ficta est, ut arbitror, ὑποθεσις: At in Epistolis vera. Tam vero in Epistolis, quam in legibus, non id explicat quod absolute & in se optimum est, quod non nisi ex ipsis principiis demonstratur, sed quod optimum est quibusdam positis, quae videas tolli non posse. Apulejus de Republica in legibus ita loquitur. In hac non suo nomine & de statu & de commodo civitatis requirens originis ejus principia, & fundamenta disponit: sed eo tendit, quemadmodum civilis gubernator, ejusmodi locum conventumque multitudinis nactus, juxta naturam praesentium rerum & convenarum debeat facere civitatem plenam bonarum legum & morum bonorum. Comparat item, ut Alcinous, rempublicam τὴν ἐν πολιτείᾳ & τὴν ἐν νόμοις. In illa dicit ipsa principia disponi; quae est ἀρχὴ ἀνυπόθετος Platonis. in hac consuli ex rerum praesentium statu, quod est ἐξ ὑποθέσεως. Haec autem, Doctissime Heinſi, non ita scribo, quasi qui pertinaciter velim defendere haec ita se habere, sed ut qui cupiam a te doceri, cui & librorum & scientiae major est copia. Praesertim de voce ἐνυπόθετον velim me moneas, nunc ubi & quo sensu reperiatur, & si quid differat ἀπὸ τοῦ ἐξ ὑποθέσεως. Ego si possem, Alcinoium tuum libenter ab oblivionis & incuriae nota liberarem. Borelius noster te resalutat, & quis fuit alter, ὁ τ' ἔρωται ὀνειροπολῶν. De Visscherō autem quid? jamne e voto suo miser est, an servabitur invitus? Vale, amicissimum mihi & Musis caput. Jan. cio io cvii.

EPISTOLA CLXV.

HUGO GROTIUS

Danieli Heinſio.

Leidam.

Literas tuas, eruditissime Heinſi, legi non ut literas solemus, sed ut libros: hoc est attente, & ut in quibus unus finis est discere. Quare gratias tibi habeo maximas, quod in me instruendo tantum laboris tibi perire volueris: aut non tibi, qui, ut scio, nihil mavis, quam amicos bene institutos, sed publico, cui perit etiam, cujus privatim tibi constat ratio. De argumento isto nihil nunc scribam. Multa enim subjecisti, quae longiorem cogitationem desiderant: & interim nolui nescire te, venisse Mylium, qui te & Maximum tuum sedulo exspectat. Erit aliqua gratia in ipso tempore. Haec igitur in praesens satis, nisi illud me vis iis addere, non hoc me quaesivisse an ἐνυπόθε-

πς possit ἀναλογικῶς dici, quod aliquis leviter, & ut ego, Graece peritus nescire non potest, sed an usitatum sit, & quidem ita, ut sit ἀντιδιηρημένον τῷ ἐξ ὑποθέσεως. Ne illud quidem ignorabam, in sexto de republica a Platone Philosophum describi, quem perfici statuit divinitatis contemplatione. Sed arbitrabar demonstrari posse, quod, ni fallor & alii voluerunt, haec ita aptari institutae de republica tractationi, ut dicat, quemadmodum summam sapientiam in Deo, ita singulas partes ἐν πάσι ιδέαις quiescere: ibi autem τῆς πολιτείας ιδέαν describi: quam qui norit secundum Platonem, certi aliquid, & non aliunde pendens, norit. Ideo enim per se sunt & semper: ideoque per eas vere sapimus. In tuis definitionibus, quae Alcinoi subjunctae Speusippum anstitem praeferunt, recte ex Platonis sententia σοφία definitur, ὁπισήμη non tantum τῶ ὄντι, id est, Dei, sed τῶ αἰεὶ ὄντων, quod sunt ιδέαι: eodemque sensu dicitur σοφία esse ἐπισήμη ἀνυπόθετος; quia qui res, ut semper sunt, intelligit, is scit eas simpliciter, & non ἐξ ὑποθέσεως. Sed tu quam primum ad nos veni, ut & amplius, si necesse est, de hac re colloquamur, & versus legas, quos pro te interpellatus Milandro rescripsi. miserum me, cujus hodie feriae exierunt: vestrae an vivaciores fuerint equidem nescio. Salutant te duo, quorum alter diligentissime vigilat, alter felicissime somniat: & velit ex te audire quid faciat ὁ ληψὶς ὁ τελεπῆς. VIII. Jan. CIOIOCVII.

EPISTOLA CLXVI.

HUGO GROTIUS

Danieli Heinsio.

Leidam.

TAm anxie sollicitus fui, ut mea Epigrammata de *Lipfio* inter vestra carmina non comparerent, ut cum moneret *Nicolaus* noster editionem a te parari, ne scribendi quidem ad te moram mihi indulserim, quum continuo quicquid erat id ad te mitterem, quare quod tunc festinatione peccavi, nunc refarcio. Facis rem te dignam, quod hoc tam diligenter agis: videant homines illi, qui humanitatem omnem eousque exuerunt, ut extra suam cohortem nullius virtutes velint agnoscere, in nos neque religionis neque reipublicae partes tantum juris habere, ut alieni boni ingratos nos faciant aestimatores. placuerunt mihi semper illi e Tragoedia versus:

Ἀλλ' αὐτὸν ἔμπας ὄντ' ἐγὼ τοιόνδ' ἐμοὶ
Οὐκ ἄνγ' ἀπμάσάμ' ἄν, ὥς τε μὴ λέγειν
Ἐν' ἀνδρ' ιδεῖν ἄριστον Ἀργείων, ὅσοι
Τρεῖς αἰφικόμεθα, πλὴν Ἀχιλλέως.

Et hujus quidem laudis ego quoque in partem veniam. illud autem proprie vestrum erit decus, *Lipfii* famam hostium carminibus auctam, quam fui male

E e e 3

lau-

I Leguntur lib. II. Farraginis pag. 201. & lib. I. Epigram. pag. 239. *Heinsii* vero in *Lipfii* mortem carmina inter ejus Poëmata lib. III. Silv. pag. 62. & seqq.

laudando corruperint. Ex literis postea tuis etiam illud libenter didici, nulum esse tam magnum malum, unde non bonum alicui obtingat: quippe cum illi, quos studiosos nos dicimus, sibi arcessito negotio, vobis otium paraverint. Egregrie fane se ulciscuntur, quod volunt quicquam discere. ἢ κεν γηθήσαι Περίαιμος. ² illum dico, qui perpetuum cum ordinariis bellum gerit: qui vereor ne se cupiat per istos tumultus reipublicae partem facere, & jactare se tribunitiis concionibus, nisi forte domesticum illi bellum civili prius est. Miratus sum nuper vim hominis. serio cuidam irascebatur, quod alapis suis caput non praebuisset. Sed tu, arbitror, recte feceris, si ad nos transcurras? ubi nullae sunt, nisi horariae, partes. Salve, Heinfi clarissime & nos ama. Mart. CXCVCVII.

² *Baudius*, cujus epistolae, praesertim ad *Mylium*, plenae querelarum, quod tam diu inter extraordinarios Professores sedere juberetur. quod concoquere non potuit magnus ejus animus.

EPISTOLA CLXVII.

HUGO GROTIUS

Daneli Heinſio ſuo S.

Leidam.

UTinam tu quidem meam causſam, quam juſte ſuſceperas, tam feliciter egiſſes. nam proſecto pudet me, cum iſta video publici juris facta, quae ne privatim quidem, niſi inter paucos, legi debuerant. ¹ Verſus enim illos *προς τὸ τότε μελλοδόχῳ* in ea primum charta concepi, quae ad ipſum miſſa eſt, idque praesentibus amicis aliquot & mecum nugantibus; neque aliud ſperaveram, quam quod tu veriffime conjicis, fore ut noſter *ὁ ἀλξερτιάδης*, ea quae ita ſcripſeram, pro ſoluta oratione acciperet, quum non videretur mihi ipſe unquam ſolutius ſcribere. Itaque in mandatis dederam Heroi *ἡρωοποιῶ*, ne litteras illi exhiberet, niſi in ipſo prandio, aut paulo ante, ut cum deinde vobis eaſdem literas oſtendiſſet, haberetis riſus argumentum. Nunc ita res accidit, ut quae potuiſſent non indigna videri *Grotii*, ut ille inquit, lepore, facta ſunt iſta editione paullo minus, quam fatua atque infulſa. Locutus ſum hac de re cum ² *Archilochō*. is primum videbatur operam ſuam mihi velle imputare, quod ut magis perſuaderet, ajebat quaedam ſe illic ſui genii agnoſcere, puto quia *natio mortalium* mihi excidiſſet. Poſtea, ut vidit me ita judicare, non debuiſſe tale quid fieri, me non modo inſcio, ſed etiam invito, ut qui contraria mandata dediſſem, quod negare non poterat, culpam omnem rejecit in amicum noſtrum, quem mihi in mentem venit vocare ³ *ἐκδῶσόντα*, qui ſane

hac

¹ Credo intelligi Epistolam jocosam ad *Henr. Delmanhorſium*, cum Medicinae doctor crearetur lib. 11. Farrag. pag. 189. videtur ille *Delmanhorſii* pater vitriariam feciſſe. vid. infr. Epist. ccx.

² *Baudio* Jambico Poëta: quem mox *Biprofeſſorem* vocat, quia & Juris profeſſionem ambiit, & titulum obtinuit, ſed honore contentus, diſciplina abſtinere debuit.

³ *Scriverium*, qui diu Martialem promiſit, antequam tandem ederet. nam in epistoſa illa vocat eum *Grotius Martialis editorem Lentulum*: & *Roffae Poëtam* eſſe ipſum *Heinſium* patet ex Epist. clxxxix. quae ſequitur.

hac in re contra istud nomen suum fecit, neque Lentulum se, sed Celerem aut Cursorem praestitit. Ipsi parentis tanti alumno non miror persuaderi potuisse istam editionem; credidit enim quae ibi dicantur, ad artis suae commendationem mirifice pertinere: cui ego cur parcerem, cum etiam meos offenderim? Posthac ergo & litigatores & medicos iratos habere mereor. ac proinde nec honestum mihi forte erit causas agere, nec tutum aegrotare. Poterant omnia ista tolerari, si nomen non accessisset, quod sane pluribus quam duobus exemplaribus proflare oportet, cum ego jam duo ita edita acceperim, alterum per *Reigersbergium*, alterum per nostrum novum Biprofessorem, qui spero uxori eas poenas pendet, quas mihi debet. Aesculapii autem nomen, quod in aliis pro meo suffectum est, nonne insigniter ineptum est? saltem Aulum Gellium dixisset, nam Aesculapii personae alia conveniebant. Vide quam saepe falsa sint nostra consilia. Ego qui ⁴ *Heemskerkianum* Epicedium, quod tu quoque, ut inter mea, non pessimum judicabas, nescio quas ob ratiunculas, suppressere volui, nunc per istud egregium poema fabula fio. Adversus hoc fastidium refeci me hodie lectione eloquentissimae tuae praefationis *εις Διοσκόριον*, quae visa est mihi mirabili temperamento, & amici affectum, & iudicis religionem servare. Rogo te, saepe aliquid edas, ut saepe praefari tibi necesse sit. Huc autem si redire tibi vacaverit, qua me domi reperias certiore tibi horam, quam prandii condicere non possum. xxiii. Julii ciorocvii.

4 Legitur lib. 11. Silvar. pag. 72.

EPISTOLA CLXVIII. HUGO GROTIUS

Danieli Heinsio.

Leidam.

Mitto tibi literas ejus hominis, qui vix unquam solitus est gratis scribere, nosti, ut video, artem homines inescandi. tam belle illi Theognidem suum proponis. invenies & in his Theognidea, sed ea quorum optime meminisse videtur, *περὶ τῶν χρημάτων, καὶ τῆς πενίας*, quae puto facilius in Academiis, quam in aulis invenitur. Potest ille sibi occinere, *omne tulit punctum*. & tamen ita scribit, si animadvertas, quasi puncta nesciat. Sed satis jocosum. Nam ille profecto nos potest armis non Alexandri, sed Eumenis *ἀντιμνησθῆναι*. xxvii. Julii ciorocvii. Hagae.

Hanc epistolam agere de *Joanne Milandro*, Domino de Poederoye, ideo suspicor, quia *Danielis Heinsii* manu in margine notatum erat, *Milander*, ad quem sunt multae *Baudii* Epistolae, qui quovis modo ex arido illo pumice nummos elicere tentabat, unde saepe joci in ejus epistolis ad *Mylium* & alios de ejus tenacitate occurrunt. vide lib. 11. Epist. *Baudii* 101. & 111. 3. & ex aliis ad ipsum *Milandrum* & *Mylium* epistolis saepe illum mendicasse, sed non potuisse emungere constabit. erat vero *Milander* Principi Mauritio scriba, sive secretarius, quo respicere hic puto *Grotium*, cum Eumenes scriba Alexandri fuerit: & ideo nihil gratis scribere ait, quia scribae ex omnibus, quae scribunt, quae-stum faciunt. *Grotius* epigrammata duo ejus honori dedit pag. 209. & 222. *Heinsius* nuptias ejus cum *Maria Hohenloia* celebrat lib. 1. Silvar. pag. 7.

EPI-

EPISTOLA CLXIX.

HUGO GROTIUS

*Danieli Heinsio.**Leidam.*

JUssit D. Legatus Francicus impelli illud negotium, quod ejus nomine tibi commendaveram de libello, quem nosti. Quantum igitur poteris hoc cures velim, ut describatur. Locutus sum *Mylio* de controversiâ, quae Urbi cum senatu inciderat; non potes habere animosiores tui defensores, ex quo rem illi omnem, & nescio quorum inscitiam aperui. Ille continuo ad vos perget: quid actum sit, postea sciam, & significabo. Interim de scribendis literis quod dixeram, tecum vide. Ego sicut ex usu tuo esse credidi, ita suasi. Tibi si aliter videtur, nihil repugno. Tua enim dignitas mihi commendatissima est. Sed de *Rhedonio*, mi *ἐυεργέτη*, utinam! beabis me. Salve igitur, & aut scribe, aut potius veni, utriusque excusationem non accipiam. Hagae c1515 cvii.

EPISTOLA CLXX.

HUGO GROTIUS

*Danieli Heinsio.**Leidam.*

GRatularis vero mihi, Heinsi Clarissime, & cur quaeso gratularis? quia ne ereptam mihi vides eam, quam semper habui maximam, literariam voluptatem? an quia in lites, apud quas diverti haecenus, nunc totus relegor? an vero quia totos dies cum eo hominum genere vivendum mihi erit, quos vos non possitis sine stomacho aspicere. Vera sunt quae dico, atque utinam minus vera essent. At tu etiam sic loqui audes, quasi in ista, quam tibi dignitatem appellare visum est, aliquid amicis esse posset praesidii, in quo sane nescis quantum fallaris. Nam mihi in hoc munere *ἔπερον μὲν ἔδωκε πατήρ*, ut malis nocere possim, *ἔπερον δ' ἀνένδρουν*, ut bonis possim prodesse. Putasne tu ei homini magnopere gratulandum, qui officii bene gesti non aliam potest sperare mercedem, quam graves & magnas offensas? Hoc ei non accidit, qui Theocritum, Hesiodum, Maximum Tyrium & similia edendo quicquid ubique doctorum est obligat, aut ut ad minora exempla veniam, qui de curru aliquid, aut de area ludit. Quare, etiam vetante te, non mentiar, si me invidere vobis dicam, istam vitae tranquillitatem, securitatem animi, libertatem otii: An tu hoc esse putas, Hagae litigare, quod Lugduni inter *Scaligeros* & *Baudios* vivere? Vestras virtutes magna excipiet gratia posteritatis: quanquam ne posteritas quidem expectanda est illis, quibus vivis licet fama & consentientis orbis iudicio frui: nobis parum est inter ingratos senescere: inter iratos & in-

fenfos transigendum est aevum, in praesens sollicitum, in posterum ignobile. Lucani ipsius, cujus tu in mei gratiam meministi, vereor ne mihi nunc obli-
viscendum sit, nisi quod illi versus nimium adhuc haerent animo

— — — O vitae tuta facultas
Pauperis, angustique Lares, o munera, nondum
Intellecta Deum!

Pleni sunt omnes chori Tragoediarum id genus sententiis, quae nobis privata studia commendant, sed nos istorum quasi memores loquimur, quasi obliti vivimus. Ipse ego, cui nunc ista dicere non difficile est, tamen hoc volui, quod nunc incuso. At tu, cui liberius & constantius est iudicium, loco gratulationis consolationem meditare, neque enim minus verum est de eo, qui ad talia munera, quam qui ad aulas accedit, δὲ λὺν πέφυκε καὶ ἐλπίδες μὲν μοι. Morbum tuum jam desisse spero, aut minuisse saltem: at meus nunc incipit primum, & crescit, donec ego decrescam. XIX. Nov. CIO IO CVII.

EPISTOLA CLXXI.

HUGO GROTIUS

*Danieli Heinsio.**Leidam.*

ROgo te per quicquid amas & taces, ac per istos Belgicos versus, quos nuper crudelissime cremasti, ut Tragoediam nostram, quam *Christum patientem* inscribere *Scaligero*, Heroum maximo, visum est, perlegas quam diligentissime, emendes quam liberrime, deinde quamprimum transmittas, ut ea quoque corrigam, quae idem Heros admovit. Vellem sane, si fieri posset, non tam meum nomen, quam *Jannini*, cui debeo plurimum, in Nundinis comparere. sed oportet serius Typographos decipi, qui alioqui scientes tam malae merci se non immiscebunt. Fac mentiaris aliquid mea causa. Sed nescire non debes esse tibi iratum amici nostri genium, quia ipsum ab uxore, quam ille insanire tandem fatetur, contusum esse *Scaligero* nuntiasti: qua de causa a *Scaligero* se Laconem plagipatidam vocatum graviter conqueritur. Vide ipsi satisfacias, ne vestri Jambis inter se committantur. Post abitum tuum dixit mihi *Mylius*, curaturum se, ut res tua jamjam transigatur, dum Lugdunenses hîc sunt. Doleo sane recruduisse apud vos mala Academica, dum hîc remedia quaeruntur. Ego febricula laborare incipio, adversus quam refice me, quaeso, si vacat, literis tuis. XXVI. Febr. CIO IO CVIII.

EPISTOLA CLXXII.

HUGO GROTIUS

*Danieli Heinsio.**Leidam.*

Vix ad te dederam, quas postremas scripseram, literas, cum mihi tragoedia a patre tuo redditur, quam leniter perlectam neque multo emenda-
Tom. II. Fff tio

tiorē remitto. Persevero enim in ea opinione, si edenda est, id sine mora faciendum: nescio autem an typographum jam inveneris, an praelum vacet. si utrumque ex voto est, nihil obstat quo minus continuo tradas. Praefationes ad *Janninum* & lectorem jam scriptae sunt. Sed retineo eas, dum caetera excusa sint, si quid forte ex mediis temporis occasionibus mutandum obveniat. Multum sine dubio tibi creatura est correctio. Sed rogo ne grave sit hoc quoque beneficium multis prioribus adjungere. Lectiones vobis recte procedere gaudeo. Et velim scire, an *Baudius* a declamando se abstinere potuerit, & quousque vapulet tibi *Scoppius*. A°. CIOIOCVIII.

EPISTOLA CLXXIII.

HUGO GROTIUS

*Danieli Heinsio.**Leidam.*

ET si nundinarum occasionem praeterfluxisse ex te intelligo, tamen aliis de causis omnino constitui tragoediae editionem festinare, & *Janninum* Praefidem, hoc potissimum rerum statu, publico scripto affari. quam ad rem te mihi adiutorem fere confido. Idque scripsissem statim post receptas tuas literas, nisi dictus esses mihi hinc expectari, quod & literae tuae innuere videbantur. quae spes cum jam forte evanuerit, & ob lectiones, neque dum scimus quo successu, repetitas, iterum te rogare volui, ut de Typographo si quid actum est, sciam, simulque exemplar accipiam, ut emendatius remittam. Gaudeo tibi meos lusus mediocriter placere. nam caetera, quae addis, persuasurum te non sperasti ei maxime, qui non modo priorem tuam Tragoediam, sed & recentioris partem viderit: si quid apud vos novi agitur, fac nos, quaeso, participes: praesertim *Scoppiana* quo processerint. Et quomodo tibi cum viro-
rum optimo, mulierem habente pessimam, conveniat. Vale, Clarissime Heinsii. 3. Martii 1608.

EPISTOLA CLXXIV.

HUGO GROTIUS

*Danieli Heinsio.**Leidam.*

ANxia res est poësis. praesertim in ingeniis crudioribus, nec satis in ea arte recoctis. Venit mihi in mentem hodie, me in choro secundo semel posuisse, *Nova creverunt moenia templi*. quod non muto, semel; sub finem ejusdem chori per te *sancti moenia templi*, pro quo melius erit *Limina templi*; ne vocum duarum repetitio offendant. Similiter in actu quarto scripsi, *Templi il-*
lae

la veteris decora, quae fuerant prius, quod retineo; sed in ultima scena Tragodiae est aliud, quod nimium prope accedit, nempe Saecli illa veteris decora quam longe tibi &c. Mallem igitur, Senioris aevi decora quam longe. Ignosce ineptiis, & vale, mi Heinfi. Mart. c10 10 CVIII.

EPISTOLA CXXLV.

HUGO GROTIUS

*Danieli Heinfi.**Leidam.*

Quod Tragoediam nostram tam cito prodituram scribis, e voto est, eo-
que magis, quia in amicorum manibus esse poterit sub id tempus, quod
ejusdem argumenti memoriae ab Ecclesia consecratum est. Et quod addis exi-
guum fore libellum, neque hoc displicet. Erit enim hoc magis *ωεφενης*:
Siquis tamen haec quoque, siquis. Etli parum id refert: Eritis enim pro omni-
bus tu mihi & *Scaliger*, a quibus absolutus non est quod aliorum judicia anxie
metuam. Ceterum quod tu in re nihili tam diligentem operam navas, excu-
sandam tibi habeo meam libertatem, quae te non uti modo, sed & abuti au-
deat. Quanquam vero in rebus majoribus expertus saepe sum benevolentiam
tuam, tanto plus tamen nunc tibi debeo, quanto minus est, quod exsequeris.
Utinam vero sciret orbis, qui te novit, te mihi tam amicum fuisse, ut ista ti-
bi patereris injungi, esset mihi hoc fane non paullo gloriosius, quam id, quod
tu magnifice depraedicas, inter forum & carcerem regnare: ubi fane nullus
est locus meis Tragoediis. Misi tibi nuper emendationem duorum versuum
novi opusculi. Nunc de tertio monebo. in scena Petri est Josephi Patriarchae
quaedam *περίφρασις*. Ibi dixi, *undecim fratrum manus*, & tamen cum recte
cogito, undecimus, qui erat Benjamin, consilio fratris interficiendi aut ve-
numdandi non interfuit. Dolet mihi quod istam numeri elegantiam amittere
debeo, & rescribere, *impias fratrum manus*, nisi tu mavis *invidas*. XI. Martii
c10 10 CVIII.

EPISTOLA CLXXVI.

HUGO GROTIUS

*Danieli Heinfi.**Leidam.*

V Ideo me in Tragoedia mea, id quod ferme potissimum erat, perdere tem-
pestivam editionem. Itaque quod vulgo dici solet, post diem festum ve-
niemus. Scio te quoque irasci. Sed quid faciamus? ita sunt homines. Impelle
tamen quantum potes. Versus hos ad *Vrientium* scriptos cum leges, ridebis, sat
scio, captatam nominum allusionem. & tu scis quam hoc a me alienum sit.

sed volui ipsum, cui ista, ut video, placent, suo exemplo ulcisci. Transmittes cum litteris tuis, si tanti videbitur. Ego vero non Herculis, sed tuam fidem imploro, quod expectatissimo scripto tam diu caremus. Accepi a *Baudio* novas litteras plenas tristibus facetiis, in quibus vim sibi fieri queritur, quod οἱ *μεγίστης* orationis editioni intercedunt. Vale, & fac aut te aut tua quamprimum videamus. 11. April. *ciōiōcviii.*

EPISTOLA CLXXVII.
HUGO GROTIUS

Danieli Heinsio.

Leidam.

TRagoediae meae exemplaria, quod rerum omnium si non primum, certe nec postremum est, in tempore recepi: eoque nomine ac plurimis aliis diligentiae tuae summas habeo gratias. Mitto nunc ministrum, ut exemplaria alia usque ad quinquaginta a bibliopola auferat eo pretio, quod tu, si vacabit, cum Typographo statues. D. *Scaligero*, tibi ac *Baudio* ipse hinc transmittam: interim volo quaedam nunc apud te relinqui, quibus pro arbitrato utaris. In relegendo inveni errata quaedam Typographica in posterioribus paginis, & quaedam talia, ut sensum alium facerent, quam quem ego voluisse me sentio. Ea omnino judico calamo, quando aliter fieri non potest, corrigenda: quod si Typographo nimis molestum est, tradat huic homini exemplaria omnia: remittam intra biduum emendata. De versiculis, sane tecum judico esse non satis *πρὸς ἐπὶ* aut, ut proprie loquar, *πρὸς τὴν τετραγώνιον*. Sed tamen istius commendationis lenocinio aliquot lectores alliciemus. Te & Herculem tuum *ἀποτρόπαιον* avide expectamus, imprimis legati Germanici, qui me velut expromissorem interpellant. Legatus Marchionis Ansbachii eo magis, quia 'hominem illum, si tamen homo dicendus est, tam familiariter in Italia novit, ut ab ipso Cardinalibus Lutheranismi nomine commendatus sit, quod illi magnam fugiendi diligentiam iniecit. Vale, & veni. *ciōiōcviii.*

I Scioppium.

EPISTOLA CLXXVIII.
HUGO GROTIUS

Danieli Heinsio.

Leidam.

LEgi Menippeam tuam, quae fane meretur, ut inter magnos titulos, quos tibi summo jure eruditorum omnium judicia conferunt, *Lepidi* quoque nomen non respuas. Neque enim arbitror post *ἀποκολοκύντωσην* quicquam exiisse tam docte festivum. Unum dolet, quod plerique lectores magnam jo-

corum partem non intelligent, eam vero imprimis, quae ad *Zenonis* decreta alludit. Versus autem, quos intexuisti, sunt vere Petroniani, hoc est elegantissimi: tum vero *παρωδιαί*, & versuum Graecorum & Latinorum detorsiones felicissimae. Utinam adfuissem heri, ut demonstrare praesenti tibi potuissem, esse me inter eos, quibus istam scriptionem potes imputare. Dedissem simul tibi exemplaria aliquot Tragoediae, non quidem quot volo, magna enim pars a salutantibus abrepta est, sed quot nunc potui. Ubi Lugdunum venero, efficiam ut habeas, quot voles. Rogo D. *Scaligero* meo nomine unum exhibeas, aut plura etiam, si uti voluerit: cui quidem Heroi sedulo gratulor, quod ita uti debebat, ac pro dignitate vindicatus est. Vidi hinc *Baudium* cum uxore, quae litigando ita mihi profecisse videtur, ut tunc etiam cum loqui vult, non loquatur, sed latret. Cerita mihi videtur, ita loquitur *ἀνὰρθεως*. Ipse autem, cum praeter istud, quod maximum est malum, eo miseriarum redigatur, quotidie ut *πρωχέειν* turpe non iudicet, tamen & versus facere potuit, & bibere non desinit. Nescio cum risu haec an indignatione dicere debeam, nuper in mensa *Fannini* praesidis, cum mero incaluisset, sponsione obligare se voluit, se vel ipsis, qui aderant, iudicibus, (erant autem Pontificii omnes) luce meridiana clarius demonstraturum, Pontificem esse Antichristum. Nunc Haesdam nescio qua specula abivit, & illam circumducit foedum spectantibus omen. Nobis erit procul dubio *ἡ ζυγία* placatior. de qua si lubet cogitemus. Nihil absurdi feceris si de illa, *ἡ μελίαν καλέεσσι*, & quae in *Silvis* dicitur *pulcherrima*, aliquid moliaris: *καμάζεται* quidem jam, quantum conjicio, non a nostro *Othonis* adversario, sed ab altero, contra quem tibi non difficilem puto fore victoriam, si committi volueris. Hoc affirmare tibi possum, si formae magnam habes rationem, nihil tibi posse melius contingere. Sed forte eorum ex numero es, qui aequo animo ferunt aliquid formae decedere, dum doti tantundem accedat, a quibus ego quoque non pertinaciter dissentio. Tamen aliquid agamus, ne nos putent homines *Baudii* exemplo ita affici, ut de iudicio nostro desperemus, aut id verum credam, quod mihi exprobavit *ὁ μείζων Reigersbergius*, te ac me nostrique similes tantum citra versus amare; quam ego vocem illi non excidisse magno velim: adeo me moleste habet. Tu autem Vale XII. Apr. CIOIOCVIII.

¹ Vernaculo nomine, credo, *van Esch* vocatam puellam innui: respicit enim ad illa Virgilii. Ecl. VII. *Fraxinus in Silvis pulcherrima*. vid. & Ep. CLXXX.

EPISTOLA CLXXIX.

HUGO GROTIUS

*Danieli Heinsio.**Leidam.*

Rogo te fasciculum hunc tradas ei viro, quem nos, invito *Scioppio*, *Scaligerum* nominamus. Puto inesse litteras ad te. Alterum quod te precor

Fff 3

hoc

hoc est, ut si quae habes penes te exemplaria Tragoediae nostrae, tradas unum *Scrivario*, quem sane multis nominibus amo. Si non habes, jube peti a Typographo. Audio te & *Baudium* nuper coenatos apud *Venium*, elegantissimum hominem. Sane, nisi se invitare turpe esset, adesse debueram, nisi posthac ob austeriora quaedam studia, exulare me e vestro choro jubetis, quam unam poenam deprecor. April. ciciocviii.

EPISTOLA CLXXX.

HUGO GROTIUS

*Danieli Heinsio.**Leidam.*

Polybium Megalopolitanum, auctorem, ut Cicero sentit, neque vero ego dissentio, inprimis bonum, ut dicere tibioccoeperam, videre gestit ¹ privigni Phaedrae cognominis; qui ut eum sibi transmittas e bibliotheca aut tua aut publica, meretur sane, Herculis tui lector non indiligens. Huic libro si alterum adjunxeris, *Philippum de Leydis* Jurisconsultum, rem munificentia tua non indignam feceris. Ne autem moram ullam facias his te versibus obtestor,

Sic properet se inferre tuis amplexibus ultro

Digna viro conjux; Dryadum seu sanguinis una

² *Fraxinei laetas nemoris te invitat ad umbras;*

Seu quicumque furor tecto quem carmine Rossae

Dissimulat, quas non perlatum nomen ad aures!

Sic tibi: ³ Munsteri generis furtiva propago

Sub flagris gemat, atque inscriptus verberare terga

Vibices toti cupiat monstrare Suburrae. ⁴

IV. Maji ciciocviii.

¹ *Hippolytus a Colibus* Palatini legatus ad Ordines foederatos, cujus & infra mentio saepe fit.

² Vide sup. Epist. CLXXVII.

³ Scioppius.

EPISTOLA CLXXXI.

HUGO GROTIUS

*Danieli Heinsio.**Leidam.*

Mitto tibi, Heinsi Clairissime, libros elegantes duos ab *Ottone Venio*, quem ego non illepide, ut mihi videbatur, verum infeliciter *Octavium* nominaveram. Habes hîc ¹ Emblemata Erotica, quia meruisti: Horatiana, ut merearis: pauca enim nunc exemplaria excudit, brevi plura editurus: ad quam commendationem a nostrum utroque Epigramma expectat. tertius erit *Vrientius*:

¹ Vide D. Heinsi Poëmata pag. 376. & 377. & Grotii pag. 245. & 246.

tias: hic laudator illi fatis est. Credo facturum te, etsi materia per se favet, & ipsius & fratris gratia. Hoc igitur ipsius nomine. Alterum alterius, vel potius meo petam. Monui nuper obiter, nunc serio urgebo versus a te aliquos, quibus ² *Joh. Borelii* ditissimae nuptiae celebrentur. Erit illi non ingratum poematum Belgicum, quod & sponsae legi possit, si tibi ita videbitur. *Baudius* quoque non absurde fecerit, si Gallicam venam experiatur. Nos etsi eo scribendi genere apprimis lassati, Latine aliquod moliemur. Ab *Herro* epigramma aliquod polcere forte importunum foret. tamen fieri posse arbitror, ut leviter admonitus aliquid meditetur, si hora sit commoda, & ad libros orientales respexerit. Haec ego amicissimi hominis nomine rogo confidentius, quam pro me fuisset rogaturus, cui tamen aliquid reservavi, si quid nobis forte tale contingat, trepide precor. Vale, decus aetatis, & me perpetuo tuum crede. xiiii. Maji ciciocviii.

² Celebrarunt ejus nuptias cum *Agnete Haymanna*, *Grotius* pag. 104. *Heinsius* 191.

EPISTOLA CLXXXII.

HUGO GROTIUS

Danieli Heinsio.

Leidam.

Puto te, Clarissime *Heinsi*, & tibi & *Borelio* non defuturum: *Borelio* quidem, quo minus ipsius locupletissimum conjugium praesentia tua honestes; tibi vero, quominus optima occasione & in hominum amicissimorum comitatu (quos inter & me velim numeres) remissionem aliquam studiis indulgeas, & videas *Zelandiam*, illam divitum puellarum nutricem. quis scit an & nos vocet aliqua boni fati aura? vulgatum enim est, nuptias ex nuptiis fieri. Epigramma tuum puto jam esse paratum. magno velim te videre hac septimana, ut & de versibus nostris, & de itineris ratione aliquid statuamus. Ego nisi quibusdam molestiis detinerer, jam ad te advolassem, vocatoris diligentis officio functurus. Ita enim mihi jucundum est, ut te adducam, ut nisi te comite proficisci omnino non audeam. Quare cum eo ire mea interest (est enim ibi quaedam nobis non invisita) poteris paucos absentiae tuae dies non minus mihi, quam *Borelio* imputare. Scis nos ita solere rationem ponere, ut nunquam ducamus perire id tempus, quo una sumus. Responsum tuum, aut te potius, jamjam expectabo. 27. Maji ciciocviii.

EPISTOLA CLXXXIII.

HUGO GROTIUS

Danieli Heinsio.

Leidam.

T*uningius* noster, & quidem serio, spem mihi fecerat adventus tui in hunc diem; ego multum crucior, quod eventus non responderit. Ecce enim

litteras, quas ea de causa penes me servavi. Audio te deliberare, num honestissimi viri postulato obsecuturus sis. da mihi veniam: si ea de re dubitas, parum amice facis. potes enim duobus summopere gratificari, & *Borelio*, qui hoc mihi diligentissime injunxit, & mihi, qui alioqui habiturus sum iter fastidiosissimum. Et si libere loquamur, quid utrisque nobis commodius accidere potest, quam tanto tempore, eoque continuo, simul vivere, & studiorum intermissionem familiaribus colloquiis solari. proculdubio jam aliquid scripseris. Ego scripsi, quod vides, carmen minime optimum, & in quo facile animadvertes nihil me sponte dixisse, sed quod Philosophi quidam in omni rerum natura putant accidere, tractum materiae necessitate. quo factum est, ut sumpserim decursorium scribendi genus, & quale, ut puto, neque tu antehac a me legisti, neque ego posthac scripturus sum. Vides quanta sit miseria non ex suo, sed alterius tempore poetam agere. *Baudius* quoque spem mihi injecit *Πηγεαυμανίς* aut *Ἰαμβίς*. velim illi aurem velli. Si *Basson* vacat, aut si non ille, alius quivis, velim mea cum vestris imprimat; ita ut sub vesperam diei Mercurii, aut, si fieri potest, aliquanto ante parata sint, ut ea nobiscum feramus *σὺν τε δὲ ἐρχομένῳ*. Melius nobis conveniet, quam heri atque hodie *Gomaro* & *Arminio*. Utinam tantum apud te possim, ut craste videam. Nisi admodum necessariis detinerer, jam ad te transvolassem. fac aliquid, quaeso, mei causa. 31. Maji. CIOICVIII.

EPISTOLA CLXXXIV.

HUGO GROTIUS

Danieli Heinsio.

Leidam.

Velim ex te scire, Vir Clarissime, quae schola earum, quae sunt in oppidis nostris, maxime apud vos commendetur, optimamque juventutem in Academiam mittat: idque amicorum causa, qui de liberis aliquo litterarum causa ablegandis consultant. Nonne tibi mirum videtur vacare homini sponso istis de rebus esse sollicitum? Atque die martis proximo isthuc cogito, unde abesse aequo animo diutius non possum. quo si, ut & tu venias in septimanam inde alteram circa xvii. Julii cum parentibus cognatisque meis rogem atque obsecrem, putem me rem indignam facere nostra amicitia, quasi tu, qui me soles, quoties benefaciendi occasio est, ultro praevenire, nunc magno ambitu exorandus sis, ne id mihi neges, quod nemo hominum venustiorum negare tibi putabit jus aut fas esse. Nam ne nescias, quanta res agatur, discent nunc homines, quid Poëtae Poëtis debeant. Ego in eo etiam persto, ut *Baudium* serio vocem, sed, quasi caelibem, id est, sine uxore, cujus adventus non posset esse nisi male ominatus. Epithalamii necessitatem non ipsi modo, sed & summo Heroi facile remitto: praesertim si & ipse heros sponte malit facere. Ti-

¹ Legitur *Heinsii* Epithalamium lib. I. Silv: in ipso initio.

Tibi quoque remittam hoc potius, quam operam paranympthicam, ad quam & noster *Tuningius* ὁ ὑδρεπότης sodalis futurus atque sociennus unus tuus, serio se apparat. Vale. v. Julii c1515viii.

EPISTOLA CLXXXV.

HUGO GROTIUS

Danieli Heinsio.

Leidam.

CLarissime Domine. Ita te illa amet, quam tu satis belle *Luciam* nominas, caeterum nescire non debes, haud indecoro vocabulo *Margaritam* eandem appellari, ita enim illam καλέσαι θεοὶ nimirum *Vettius* & *Blonquius*, μεροπὲς τ' ἄνθρωποι, hoc est *Tuningius* & sui similes. Miraberis quo eam tam longo hyperbato: sed hoc volebam, ita te illa amet, ut ego litteras tuas, in quibus legens σημεῖα καὶ εἰκότα morbi sane mihi non incogniti, recolui mecum *veteris vestigia flammae*. Votum meum simplicius efferre non possum, quam, optare me, ut idem Heroinae isti a te fiat, quod tu meae factum putas, cum primum in amorem incidisti. Interim nescire non debes, *Tuningium* ad illam scripitare, animi, ut puto, caussa: tibi tamen opera danda est, ne plus ille joco facere videatur, quam tu serio. Si quid vis facere, quod ille assimulare non possit, scribe versus, *sed quos legat ipsa Lyncoris*. materiam fumendam non arbitror, neque ab illo misero Vale, cum ipsam apud hortum relinqueres, neque vero a rheda, & arboribus illis, apud *Westhovium* tuorum suspiriorum conficiis, sed quomodo mansionem hinc tuam, cum id maxime vellet, impetrare non potuerit. Aliquid illi praestare debes, cui tantum negasti. Ego, qui jam aliquid juris in novam nuptam meam usurpare incipio, diligenter eam admonui, quam sit me atque ipsa indignum, tibi ullas ab ipsa aut conquerendi aut suspicandi causas dari, cui plus obligata sit, quam aut ego possim dicere, aut ipsa intelligere. Putabat se nihil aliud, nisi incendiisse te, ego dixi, si aliae nescirent, at ipsam non posse ignorare, quam sint proni ad aegritudinem & desperationem amorum id genus hominum, qui, sanctissimo olim nomine, nunc prope ad convitium delapso, Poetae vocantur. Orpheus quoque & Stellam nunquam sine tristitia & suspicionibus amasse. Illa, tacta tam magnis nominibus, serio dolere, quod ullum suum factum tibi displicuisset. quid plura? promisit se in *Manmakeri* & *Comaniae* subselliis futuram. atque adeo hodie Middelburgum transit, *Luciam* allocutura ἀκαδημικῶς: id enim paullo est melius, quam σκεπτικῶς. Coepit jam & καταλαμβάνειν, & tuae sententiae συγκαταπέθεσθαι. Heroum principi lusus nostros non displicuisse est quod gaudeam: atque eo praesertim nomine, quod eadem Epigrammata vobis duobus probantur, quae ego quoque damnare vix sustineo. Male sit isti decoctori, qui me solutione pecuniae sibi debitae fraudavit. neque enim hominem vidi, visurum tamen spero, ne ille sic impune cum aere alieno meo se in fugam dederit.

Tom. II.

G g g

Plu-

Plura non addo, visurus enim te sum, ut spero, ante abitum hinc meum, hoc est ante proximos octo dies. Veriae. c10 10 cviii. xviii. Aug.

EPISTOLA CLXXXVI.

HUGO GROTIUS

*Danieli Heinſio.**Leidam.*

Triumvirali nostro conventui nihil his diebus ad summam laetitiam, ut arbitror, deerat, nisi quod amici nostri uxor viveret, & *Scaliger* periclitaretur: hoc est, hic nimis, illa minus, quam vellemus, aegrotaret. Ego sane & boni hinc omnes solliciti sumus pro valetudine viri incomparabilis, & ejus damnum vere aestimare non nisi serae posteritati dabitur. Nam nostrum quidem saeculum, si quod ominari nolim evenerit, non tam perdidisse illum dici potest, quam expulisse: quippe tam ingratum ac prope dixerim impium, ut & beneficia *Scaligeri* sine praemio tulerit, & scelera *Scoppii* sine poena, absque vobis paucis esset, qui & ipsi alieno saeculo nati estis, digni tamen a fatiſ habitis, qui cum *Scaligero* viveretis. Utinam immortalis Deo hanc poenam placeret imponere facinorosis hominibus, ut diu jubar istud luceat, quo fulgente inscitia latere non potest. Quod si aliter, hoc est, ita ut aetas meretur, acciderit, quae licentia ignorantiae dabitur, quanta nox literarum imminet? mors ista non mors dici debet, sed occasus. Qua nota terrarum eluvies & morbi populorum strage grassantes, & anni alimentorum frangentes fidem memoriae & honori commendantur, hac transibit ad posteros istius non jacturae, sed calamitatis detestatio. Moram tamen, si fas est, tanti mali precibus efflagitemus: non erunt inverecundae, etsi pro sene. Demantur anni, quos non sibi, sed mundo vixit; juvenis est: imo puer. Interim has ab *Hippolyto*, ut puto, literas ei trade, si quid forte sit quod dolentem juvet, languentem excitet; & ea mihi de ipsius valetudine renuntia, quae bene sperare me non prohibeant. Tu quoque, ut ipsi melius sit, recte vale. ix. Octo. c10 10 cviii.

EPISTOLA CLXXXVII.

HUGO GROTIUS

*Danieli Heinſio.**Leidam.*

REduci mihi jammodo ab aliquot dierum itinere, inter alia laeta obvenit epistola tua, in qua quod de *Lucia* scribis tam gaudeo falsum reperiri, (ita enim mihi affirmant, quibus ea res curae cordique est) quam verum esse doleo, fraudem esse factam naso Baudiano: de quo quid aliud dicam, nisi nec recte nec ordine factum videri? Heroína illa, quae vellet se sine matre natam, nu-

nuptura est ' seni nostro die, ut arbitror, solis, non jam imminente, sed eo, qui istum sequitur. certe non prius. ego hactenus ita destringor, ut scribendo epithalamio non vacaverim, nedum super poematum editione cogitarem. de quibus tu vere & amice mones, nunquam tempestivius posse vulgari, quam hac aetate, quae & iudicio non caret, & extra veniam non est. Spero te brevi ad nos transcursum, ut & de hac & aliis de rebus loquamur liberalius, quam aut epistolae mos est, aut mihi nunc facere temporis angustia permittit: cui donabis huius tam festinatae scriptionis culpam. 14. Novembris 1615.

P. S. Deceperunt te heri scriptae literae meae, quibus nuptialem *Titboni* tui diem significavi. hodie enim certo, hoc est ab ipsa, cujus de virginitate agitur Comitia, mihi nuntiatur, solemnia peractum iri die Martis proximo: quod te latere nolui: quem & arbitrum facio, num hoc carmen otii penuria & aliud agentis animi festinatione protrusum, novi conjugis honori, edi an meo supprimi debeat.

1 *Joh. Milandro. vide Grot. lib. 111. Farraginis pag. 209. Heinsf. lib. 1. Silvar. pag. 7.*

EPISTOLA CLXXXVIII.

HUGO GROTIUS

Danieli Heinsio.

Leidam.

Vereor ut satis vendibilis sit inventa opera nostra Indicana, eoque magis, quia nihil a te accepi tam relligioso rerum alienarum curatore. Mea quidem interest, ut editio mea me indemnem praestet, neque emam ipse opera mea meo pretio, quae rursus aliis donem. Tamen si non potest lucripetis vestris persuaderi, ut desiderio meo satisfaciant, malo librorum aliquot, quam temporis facere jacturam: Itaque celeritatem editionis inprimis tibi commendo, sine qua & usus & gratia operis peribit. Hodie admonet me quidam, ut circumspiciam, num quem possem reperire, qui Gallice hoc scriptum interpretetur. erunt forte studiosi apud vos Galli literati, quorum si quis aliquot horas in translationem velit impendere, poterit & typographum demereri, & me, qui libenter relegam & considerabo, num sensus meus, qui mihi optime debet esse cognitus, satis expressus sit. Rogo te patiaris hanc tibi a me molestiam imponi, ut partui nostro obstetriceris. Sed & alieno nomine te sollicitabo. *Janninus* induciarum arbiter magni facit commentarios istos in sacras litteras Rabani Mauri, quos puto esse in bibliotheca publica sub tua fide. ingenti desiderio tangitur ejus libri inspiciendi. si habes, velim (nam puto tomos esse plures) Tomum primum experimenti causa ad nos transmittas. Ego me tibi publico nomine debitorem *Philippi Leidenfis* profiteor, quem transmittam per nautam. 21. Nov. 1615. Fac aliquid sciam, quousque aegrotet *Scaliger*, & quid meditetur *Baudius*.

EPISTOLA CLXXXIX.

HUGO GROTIUS

*Danieli Heinsio.**Leidam.*

Scripsi ad te nuper de Indicanis nostris, nondum puto te Typographum invenisse, nam alioqui scripsisses, tamen id quaecunque est, fac sciam, quaeso, ne diu pendeam. Multas habeo rationes editionem festinandi in quibus, satis scio, adjuvabis me, si potes. Scripseram autem de Rabano Mauro, quem praeses *Janinus* utendum ex bibliotheca publica receperat. Si forte literas non receperis, potes ex his intelligere, quod prioribus significaveram. Vereor, ne te *Scaligeri* sequior valetudo detineat: tamen aliquid tibi temporis tui salvum esse debet, & amicis minoribus. Utinam iter Zelandium tibi arideat: neque enim debes, si eo iturus, ire eo tempore, quo *Scottus* & *Vosbergius*, tui amantissimi inde abfuturi sunt. Vale, & nos, quamvis saepe molestos, ama. xxvii. Nov. cico cviii.

EPISTOLA CXC.

HUGO GROTIUS

*Danieli Heinsio.**Leidam.*

Nimia mea expectatio & impatientia molestum me tibi saepius cogit esse, satis intelligere videor ex eo, quod non scribis, nihil te conficere potuisse de Indicanis meis. tamen velim scire, qua pecunia putes posse imprimi, simul quid de Gallica translatione sperare debeam. Rescribe, quaeso, imo potius, si potes, transcurrere ad me in aedes jam viduas. Uxor enim a me profugit, & minatur mihi gelu longum divortium; solare saltem in unum diem solitudinem meam. Facies rem pergratam *Jannino*, si ipsum videris. Legati Germani & princeps chori *Hippolytus* excusant se, quod celeritate abitus sui impediti sint *Scaligerum*, ut putant, nunquam rursus videndum teque & *Baudium* salutare. *Ansbachiensis* quoque abiit, qui sane felix mihi videtur, quod *Scaligero* placeat: sibi autem quod diviti dominae: quae multum praedicat eum, sibi & bellum & non invenustum videri. Hoc eo, ut scias, illum, ubi redierit, indicturum tibi epithalamium: quod si ei ego excusare non potero, praevideo futurum, ut in eundem locum incidamus, de gentium jure violato in vulnere legati. Rogo te ut has literas, quas inclusas vides (sunt a patre meo) per ministrum tuum mittas ad hominem, si non fallor, in tractandis pecuniis non paulo te eruditorem, quam sapientiam mirum ni *Baudius* ipsi invidet v. Dec. cico cviii.

EPI-

EPISTOLA CXCI.

HUGO GROTIUS

*Danieli Heinſio.**Leidam.*

IN Zelandiam trahor, tristi cauſſa, ob morbum conjugis: quod ne tibi contingat certiffimo uteris remedio, vita caelibe. Ego malo ibi totus eſſe, quam hîc dimidius. Caeterum τῶν Ἰνδικῶν deproperationem tibi, ut me ipſum, commendo. intereſt enim & publice & mea privatim, ut editio feſtinetur: alioqui χάρις ὄλετο. ſcio per te non ſtaturum. ſed negligentiae & deſidiaſ Typographorum oppono diligentiam tuam, quam ſemper in rebus meis etiam infra dignitatem tuam exhibuiſti. Cogita me, quamdiu abſum, quotidie id rogare, quod nunc ſemel per litteras rogo. In correptione neſcio an aliquis uſus eſſe poſſit herois *Tuningii*. ſi ita eſt, non gravabitur. Dabo operam ut redeam quamprimum, etſi hoc θεὸς ἐν γυναικί. Inter proprios metus etiam *Scaligeri* me valetudo cruciat, cui me commendo, forte haud ultra viſurus iſtud ſaeculi lumen. Vale, Doctiſſime Virorum. xviii. Dec. ciciocviii.

EPISTOLA CXCII.

HUGO GROTIUS

*Danieli Heinſio.**Leidam.*

EPithalamiorum tuorum partem a me interceptam humane laturum te confido. Interim de amoribus, ſi modo ea tibi manet cura, ignarum te eſſe nolui, heroinam noſtram Middelburgi eſſe, eo a matre, ad quam *Blonquius* miſerat, vocatam. cauſa ejus conſilii erat, ut ſi quis eam vere amaret, quaereret ipſam potius, quam inveniret. quippe oblata occasione colloquendi fortuita facile diſcerni poſſe ſimulatos & temporis cauſa confictos amores a veris amoribus. Dixit mihi *Blonquius* ſe, ſi ante adventum tuum conſilii tui particeps fuiſſet, potuiſſe rem multum apud ipſam praeparare & matrem. Socrus mea a te ſtat. ſi non plane deſperaviſti, neque quicquam vidisti cur te conſilii prioris poeniteat, forte aliquid apud ipſam praefidii tibi futurum eſt in ea arte, quae mihi ſaepe feliciter ceſſit: de verſibus loquor ea lingua ſcribendis, quam mollior ſexus intelligat. Fac quaefo, aliquas a te litteras accipiam, & memineris me unum eſſe ex eo hominum genere, qui ſummam felicitatis ſuae partem in eo ponunt, quod virtutes tuas & aeſtimare & praedicare poſſunt, quod ego & nunc facio, & facere nunquam deſinam. Decemb. ciciocviii.

EPISTOLA CXCI.

HUGO GROTIUS

*Danieli Heinsio.**Leidam.*

Hic in Zelandia multos tui amantes pluresque accusantes video eam, quam tu quoque in versibus socordiam appellas. Imprimis *Blonquius* verba mihi retulit *Vettii*, qui cum matre dominae hac de re serio egeras. Uterque tuus est, quantum vis, sed prodesse tibi non possunt, dum tibi obstat. Ita feriae causam tuam gravant, & meum huc iter. putant enim minus esse patrocinii in occupationibus contra amicam, quam contra uxorem. Mea gravi morbo liberata est. Tua adhuc vacat. Neque est quod aut *Papirios* aut *Martios*, aut id genus hominum metuas. Liber meus interim, ut puto, procedit. te quidem *ἐργασίῳ*, quod si *Luciae* aliqua tibi cura est, & febrem Zelandicam non nimium metuis, poterit correctio mandari *Tuningio*, aut si ille minus vacat, *Baudio*, qui se oblectabit hac opera interim, dum uxor mori cunctatur. Pro *Scaligero* sane sollicitus sum, nisi tu fortiter desperandum putes. Vale, decus nostrum. 26. Decemb. ciciocviii.

EPISTOLA CXCI.

HUGO GROTIUS

*Danieli Heinsio.**Leidam.*

Domum reversus, sine uxore, quam tamen reliqui probe valentem, nihil prius habui, quam ad te scribere, primum ut hoc tu scires: deinde ut ego ex te, ecquid Indica mea profecerint, quae nisi maturantur, & oleum & opera perierunt. De *Lucia* nimium tu securus es. Et vera sunt, quae ex Zelandia scripsi. Nescio quis illi nunc miles alludit, quem tu facile excuties. Etsi hercule etiam dubito, an suadere cuiquam ausim matrimonium, cum video me, cui id optime cessit, tanto in cruciatu fuisse, pendente conjugis valetudine. Adeo nihil in rebus humanis sincerum est: nam ubi id quod amas nactus sis, succedit amittendi metus, molestia, cui vix ulla voluptas contra comparanda sit. ut bene succedat tamen, ut dico, me exemplum habes: si male¹ amicum nostrum vides, quem non dubito graviter angere ob immortalitatem uxoris. Saluta quaeso materteram tuam, cui gratias ago, quod se pro uxore mea sollicitam ostenderit. 5. Jan. ciciocix.

¹ *Baudium.*

EPISTOLA CXCV.

HUGO GROTIUS

*Danieli Heinſio.**Leidam.*

EGo vero, mi Heinſi, hominum ſum omnium ingratiſſimus, ſi aut ea, quae tu mihi praeſtas, quotidie non agnoſcam, aut ea tibi imputem, quorum in aliis culpa ineſt: quis enim non in ſuis hoc rebus experitur, diligentiam noſtram vinci ſaepe atque impediri aliorum deſidia, etſi iſtorum lucripetarum mora non eſt mera deſidia, ſed avaritia. ſi putarem eos non poſſe indemnes eſſe, niſi mihi injuriam facerent, ferrem aequo animo. nam de quaestu tuo certant diſpendio meo, hoc eſt gratiae detrimento: tamen quantum adhuc in poſterum feſtinabunt, tantum peccato ſuo demſerint. Tibi vero tanto plus debebo, quanto cum moleſtiore hominum genere rem tibi eſſe ſatis intelligo. Characteres ſane placent & libelli forma. utinam chartam non peſſimam adhibeant! De publicis addamus aliquid? Induciae periclitantur, quantum unquam antehac. Videtur Hiſpanus non tanti facturum nos decipere, ut eo nomine veterem ſuperbiam omittat. quod ſi facit, verendum eſt ne poſteritas illum a nobis corruptum judicet, adeo hoc rebus noſtris expedit. Caeterum de Eccleſia quoque, ut debeo, ſollicitus ſum. Et ut poſſim cum viris ſapientibus loqui cum ratione, legi diligenter dialogos *Caſtellionis*. invenio miſerum interpretem ſacrarum literarum, & ut objectiones moventem in argumento foecundo multiplices, ita ad contrarias auctoritates respondentem perfrigide. Si eſſem apud vos, darem operam, ut ſcripta aliqua *Arminii* nanciſcerer. De *Scaligero* nihil ſcribis, puto eum adhuc mori. *Baudium* noſtrum an vidisti? inauratus eſt a *Jannino* non poenitenda liberalitate: puto eam eſſe hominis ingenuitatem, ut hoc omnibus praedicet: nam ad me quidem eo is duntaxat nomine venit, ne hoc neſcirem. Rogo te, ut has literas ad *Gomari* aedes cures deferri. XII. Januar. CIOIOCIIX.

¹ Nec tacuit *Baudius*, ſed magnifice jaſtat *Brasſero* lib. III. Epiſt. 70. munus centum Piſtoletorum, quos de manu in manum *Janninus* ipſi dedit, minatus ante diſceſſum in Galliam adhuc tantundem additurum: nec minora exſpectabat ab Angliae legato, qui non inferiorem ſe in *Baudio* inaurando fore promiſerat.

EPISTOLA CXCVI.

HUGO GROTIUS

*Danieli Heinſio.**Leidam.*

INter negotia non minus multiplicia, quam injucunda, ſolatium majus mihi obtingere nullum potuit eo, quod ex orationum tuarum lectione percepi.

pi. Nefas sit te alii quam tibi et ipsi comparari. Itaque cum priores tuas orationes cum his postremis consero, ita iudico, eloquentiam tuam a subtilitate Senecae ad Plinii elegantiam venisse, nunc in perfectissima Ciceronis facundia consummatam. Discent posthac Tullium admirari, qui videbunt te, cui caetera dicendi genera felicissime contigerunt, hunc delegisse postremo loco, quem imitareris, aut quicum contenderes. Quis nunc contemnet eam facilitatem, quam tu sequendam duxisti, cui nihil difficile est? Eant nunc illa verbosae brevitatis praeaeipitia, eant acumina anxie quaesita, eat putida fordidis vetustatis affectatio: illi quoque eant, qui per omnes aetates, per omnia dicendi genera instabili dictione decurrunt. Habent forte aliquid eruditionis eorum labores: oratio sanitatem & robur non habet. Fuit olim laus saeculi incorrupte atque castigate loqui, quo nimirum tempore Hortensius, gravis aemulus, palmam tamen Ciceroni reliquit, quo Brutus, Asinius, Calvus, certatim ad vim dicendi masculam aspirabant, quo immensus ille Caesaris animus digna Romana maiestate sine furo & calamistris loquebatur. Nunc ista laus, quae publica esse aetatis iam dudum desit, privata tua facta est: Versus ipsi tui, quorum gloria hac nova laude obscuratur, indicium huic rei dederant atque praesagium. Quid enim aliud exspectare debebamus ab Ovidiano poeta quam Ciceronianum oratorem? Illa vero imprimis quae de bibliotheca est oratio, multis mihi bibliothecis praestare videtur, quippe cum praeter eximiam in dicendo felicitatem de Clarissimis ingeniis exactissima iudicia complectatur. Neque minus admiror, quomodo in argumento parum amoeni de ratione interpretandi Poetas non disertus tantum, sed & festivus esse potueris. In librum de Mundo quae dicis, talia sunt, quae nisi ab exercitissimo Philosopho, & Critico diligentissimo, dici non potuerint. Argumenta autem de auctore ejus libri certissima; stylus & placita Aristotelis, a quibus iste liber plurimum diffidet. Nunc ad mea venio, hoc primum testatus, non sine rubore mittere me ad te Praefationem, quam Indicis meis praefigas. nunc enim demum, postquam tua legi, incipio intelligere, quam non Latine alii scribamus. Sed profecto totus liber, ut ferme omnium, qui in studio hoc inficeto versantur, laboris multum continet, eruditionis nihil. Mitto & binas regis Hispaniae literas, quas in fine operis locandas iudico. Inscriptio libri erit, quae in prima pagina scripta est. Sed non debet publicari liber antequam monstratus sit Ordinibus, a quibus accedet permissio, cujus exemplum in tergo ipsius frontispicii excudetur. Itaque ubi impressa erunt omnia, exemplar unum ad me mittetur, quod cum Ordinibus communicem. Vale, Clarissime Domine, & aequi interpretare libertatem meam, qua toties tibi molestus sum. 18. Febr. 1609.

EPISTOLA CXCVII.

HUGO GROTIUS

Danieli Heinſio.

Leidam.

LEgi heri literas tuas, Clariffime Heinſi, quarum leporem ſi noſter *Blonquius* tam bene intelligeret, quam ego mihi intelligere videor, non putaret ſe difficile adeo patrocinium ſuſcepiffe, cum tibi contra *Decios* & *Curſores* & *Martios* favet. Ac de illo quidem noviffimo rivali tuo ulciſcendo nunc diligenter Antverpiae agitur: ac duo viri principes, ¹ *Janninus* & *Mylii* ſocer nihil omittunt moliri, quo illi male ſit, quod hercle fortiter concoquendum ipſi puto, quando affinis ipſius, vir & tibi & *Monacho Neyen* non ignotus, jamdudum annititur ut artificium iſtud, quo illi ſe jaſtant, funditus pereat. *Ferrum eſt quod amant*, inquit ille de ſui ſaeculi feminis. ſed proſecto huic ferro poſthac non tam cum hoſte, quam cum rubedine certandum erit. Interim ad tui fautoris nuptias quod attinet, ſcis quam raro mihi vacet poëtari, qui hoc munere diſtringor & uxorem habeo. praeterea eſt adhuc, quod ipſi de *Jona* excuſem. tamen cum heri tuam epiſtolam accepiſſem, meditatus ſum aliquid hodie, quod eſt ſane non magni pretii.

Ad V. Clariff. ² Adr. Manmakerum.

*Te quoque, per vanas jaſtatum ſaepe puellas,
Detinuit loro jam Cytherea ſuo.
Nec tua jam multas mirantur lumina formas,
Multarum victrix poſſidet una locum,
Teutonides ſordent, & gens male caſta Latinae,
Et Tameſis quicquid, Sequana quicquid habet.
Hic quoque ſunt aliquae: ſed & has Berchemia vincit,
Et tantum eſt animo pulchrior illa tuo;
Quantum nobilitas ſeſtivaque gratia morum,
Et tuus in laudes addere quirit amor.
O bene dilatae felicia gaudia taedae!
Omnibus ô votis concelebranda dies!
Sed quid opus votis? trepident quod vota precari
Jam tibi, praeveniens contulit ante Deus.
Jam nihil optandum dominam tu praeter habebas.
Optaſti dominam: contigit ecce tibi.
Haeredes (id reſtat enim) jam cernere velles,
Hos quoque ludenti leſtulus ille dabit:*

Tom. II.

Hhh

Vi-

¹ Innuit inducias, de quibus agebatur hoc tempore, quae ſi convenirent, rivali *Heinſii* militi male eſſet. Vide Ep. ſeq.

² Ejus nuptias celebrat *Heinſius* lib. 1. *Silvar.* p. 12. ſed haec epigrammata inter *Grotii* Poëmata non inveni, ideoque perire nolui.

Vides nihil esse non vulgaris argumenti: & quandoquidem semel depuduit, quin te, aut potius sponsum, onero & hoc epigrammate inficeto: sed tamen aperto & familiari, in quo miraberis Baudianum *pernegat* tantopere mihi placuisse.

Ad eundem Manmakerum.

*Accipe, felici juvenis dignissime fato,
Carmina pro meritis inferiora tuis:
Non ea larga quidem, nec certe qualia vellem,
Ut pereat Fisci triste patrocinium.
Quod tibi nunc justas prohibet me solvere grates,
Tam procul abstentum fontibus Aoniis:
Cujus tu implacidos quondam miseratus amores,
Tentasti Dominae frangere duritiem.
Praeterea vates quantum tutaris amantes,
Heinsius ignotum pernegat. esse sibi:
Heinsius ille meus, cui qui bene fecerit unquam,
Hic Venerem & Musas scribat in aere suo.
Ille tuo dignos deducit foedere versus,
Quos procul extremo quisquis in orbe leget.
Felicem nimium dicet Berchemida nympham,
Felices thalamos, Mannemaquere, tuos.
At tu, cum Maria nisi vis resipiscere nostra,
Invisum populis, Lucia, nomen eris.*

Cave nimium anxie inquiras, cujus characteris sit hoc postremum epigramma, est enim nullius, & quidni nobis uti liceat Baudiana libertate. Implevi epistolam nugis, implebo & hoc negotiolo. Uxoris meae (quae se dixerat nunquam aliarum fuisse partium, quam quae optimates decent, neque se cuiquam contra te favisse, sed tamen dedisse operam, ut suscitato rivalitatis certamine sui generis mercem incenderet) ejus inquam frater minimus, *Davidem* quem vocant, sub Majum mensem Lugdunum migraturus est, velim nos consilio instruas, quo in hospitio eum honestissime acturum putes. Vale, flos aevi: neque succense, si frigidius interdum jocamur, neque divinas virgulae tuae virtutis exprimimus. Quo ego scripto nihil vidi eo in genere felicius, nisi in saeculum insipiens incidisset: & tamen diligenter legetur iste liber, & a multis, non dubito, ob hoc tantum, ut intelligere credantur. x. Apr. cix.

EPISTOLA CXCVIII.

HUGO GROTIUS

Danieli Heinsio.

Leidam.

FAcis rem te dignissimam, quod ei, qui te unus tanti facit, ut pluris neminem, mortuo gratias persolvis: tuus enim vere grati animi affectus appa-

paret, cum amplius foenerari beneficia non licet, & ei datur, qui reddere jam non potest. Neque te decet quemquam magis ornare, quam *Scaligerum*, neque *Scaliger* ab alio ornari, quam ab *Heinsio* potest. Ego autem patrocinii mei tristitiam nunc demum intelligo: duo jam itinera confeci, alterum Noorthollandicum: alterum Amstelodamense: nunc ad tertium Dordracense accingor. mediis diebus ita premor negotiis, ut vix respirare mihi detur, multo minus versus scribere, minusque etiam tales, qui *Scaligerum* deceant, aut dignos, qui cum tuis appareant. Videbo tamen quid mihi permissum sit, quod nunc instituo, iter. Habere interim te puto Epigramma meum de chartis *Scaligeri*, quod puto posse ob argumenti similitudinem epithaphiis versibus adjungere. Sapienter autem facis, quod praeclarissimo munere eum vis donare, cui ob inducias factas non uno nomine obligaris, ut quibus & Rivalis tuus damno auctus est, & tu recuperatis rebus, quas hostilis injuria abstulerat, minus habes quod Rivali inideas. *Tuningius* aliud solatium sibi invenit: dicit *Luciam* rubicundiores fieri indies, & si ita pergit, non parum in deformitate profecturam. Nobis aliter videtur, neque enim potest sine scelere non formosa credi, quae tam bonos a te versus meruit. Sed tu etiam vide, ne te Flandricae deliciae ita capiant, ut hujus nostrae, quae & altera tua est, patriae obliviscaris. Sed quid tantum mali feci, ut mihi tam acerbe de dilata exemplaris libelli mei missione insultares? An nescis, mare illud ita liberum esse, ut me Domino incio atque invito in libertatem proruperit, *Elzevirii* hercule manumittentibus, qui mihi jus patronatus intervertere, dum ego in ultima Noorthollandia Fiscii utilitatibus pervicaciter indulgeo: quam ob rem aequissimum esse, ut in integrum restituar, multi mihi Jurisconsulti respondent. Tu igitur ita habe, quasi nunc primum is liber prodeat, teque ante omnes alios, ita uti par est, salutet, quippe qui tot cruciatus & fastidia ipsius causa fortiter exhausseris, ut ipsos illos, qui in liberrimo Mari, quod Oceanum dicimus, vehuntur, magis nauseare non putem. Vale, eruditissime Domine.

CICICIX.

EPISTOLA CXCIX.

HUGO GROTIUS

*Danieli Heinsio.**Leidam.*

Puto occurrere tibi interdum juvenes, quorum ingenium cum fortuna laetatur. eorum si quem repereris non alienum a paedagogica sorte, velim mihi commonstres. Affinis enim meus *de Bye*, ordinum Foed. aerario praefectus, filios habet duos (minor est jam, ut puto, annorum quindecim, satis tenui tamen profectu) quos domi in conspectu suo institui ad maturandas, quas de liberis suis concepit, spes utilissimum putat. Foret autem hoc non incommodum alicui, qui Juris disciplinam coepisset attingere, & sine suo

H h h 2

sum.

fumtu usum fori hîc vellet addiscere. Et pater ipse talem quaerit, qui post tradita linguae rudimenta, & quantum Philosophiae properantibus fatis est, legum quoque primordia adolescentibus aperire posset. Adjicerem, posse & ad meliorem fortunam perveniri per gratiam viri, in nostra Republica multum valentis. Sed quominus id asseverem facit exemplum 'cujusdam, quem nosti, qui nondum taediorum suorum dignam accepit mercedem ab eo, qui omnia posse creditur, Batavo Pericle. *Bontio* vestro video vitam Academicam magis placere, quam spes forenses. De illius itaque & *Meirosi* negotio *Campius* viderit. Tu si quem talem nosti, qualem tibi descripsi, eum ad me rogo alleges. Juveris & affinem meum, & ipsum, ut puto, juvenem: Me quoque, qui libentissime amicis inservio. 27. Junii cıııııııııı.

1 *Meursii* credo, qui *Oldenbarneveldii* filiorum rector fuit.

EPISTOLA CC.

HUGO GROTIUS

Danieli Heinſio.

Leidam.

A*Rminium* vita excessisse intelligo, virum ut omnes judicant, eruditum, probum & veri amantem. Scio tibi non placuisse ipsius in quibusdam capitibus aut ἐπεροδοξίαν, aut, ut dicere tu solebas, ἀκαταληψίαν. Interim puto illi constituisse apud conscientiam factorum suorum rationem, tam in iis, in quibus ἐπείχε, quam in quibus ἐξω τῆς λεωφόρου ἐβάδισε. Nostrum certe est, praesertim ex quo ille vitae huic ereptus est, quam optime de illo arbitrari ex charitatis regula, quae docet duarum ansarum semper commodiorem καὶ τῷ εὐτλητότερον apprehendere. Ego, etsi quartana ita premor, ut necessariis rebus meis superesse vix possim, constitui tamen ex animi sententia viro eximio & mihi, dum vixit, amico, carmine aliquo, puto ' epigrammate, ut meus est mos, id praebere testimonium, in quo spero me ψευδομαρτυρίας ἐκ ἐμπειρῆς δίκην. Tu quid factururus sis apud te constitues. puto, poteris sine ulla nota inconstantiae, aut invidia, etiam dissentientium, mortuum laudare, quem vivum nunquam odisti: praesertim cum multae illi laudes tribui possint extra τὰ ἀμφοισβητέμενα. A ² *Baudio* quin id impetrare possim non dubito. est enim δεινὸς ἀνὴρ. Et cum arbitrum se totius controversiae constitui saepe postulaverit, praestabit sine dubio, quod arbitrorum est, animum medium & offensis non obnoxium: etsi in *Scaligeri* ³ naenia perstrinxit τὸν μακαρίτην satis frigido schemate. quia tu scilicet ea omnia praeripueras, quae istius erant temporis, ad aliena confugit & locum implevit. Sed haec illi non minus jam exciderint, quam quae de *Scribanio* & Duce *Alberto* olim scripsit, ea nimirum tempestate, qua & fas & jus erat, πολεμιζέμεν ἢ δὲ μάχεσθαι. Sed nescio quomo-

1 Scazonte parentavit lib. III. Farrag. pag. 210.

2 Vide *Baudii* Poëmata pag. 232.

3 Nescio quaenam ea sit, nam in *Scaligeri* mortem nihil carminis edidit, & silentii causam reddit *Jacobo Gilloto* Epist. III. 17.

modo orsus a tristibus ad jocos delabor, nisi quod est & hoc hominis febriculosi nulla in re sibi constare, sed per omnia affectuum genera jactari: Rogo, respondeas mihi, quid tu circa memoriam *Arminii* facere constitueris. 21. Octob. c1515 cix.

EPISTOLA CCI.

HUGO GROTIUS

*Danieli Heinsio.**Leidam.*

Mitto tibi¹ carmen, Clarissime Heinsi, non quale tua eruditio meretur, nec sane quale debeo tibi meritissimo, qui me immeritum saepe laudibus tuis obruisti, sed quod tu tamen, qui & occupationes nostras nosti, & ista scis non suo pretio, sed animi affectu aestimanda, aequi consules. Dixi in eo quod verissimum est, mirari me quomodo tot linguarum, tot generum carmina tam feliciter omnia tractes, quam veterum pauci singula. Et hîc de carminibus tantum mihi sermo. quid si illud de scriptis antiquorum acre judicium, quid si philosophiam sectarum omnium, quid si denique per omne id, quod sciri potest, diffusa studia tua velim proficere? Quae cum considero, amicitia tua nihil mihi puto contingere posse gloriosius. teque oro & precor, ut eam mihi perpetuo tam integram serves, quam ego in admirationem tui defixus sum. 111. Cal. April. c1515 cx.

¹ Vid. *D. Heinsii* Adoptiva p. 642.

EPISTOLA CCII.

HUGO GROTIUS

*Danieli Heinsio.**Leidam.*

Mitto tibi litteras, Clarissime Heinsi, ex quibus intelliges, non tantum ea, quae tibi virorum maximus *Casaubonus* significat, sed etiam venisse *Milium*, qui has tibi attulit. Is me ut curarem rogavit. Ego *Casaubonum* sollicitari a Rege Angliae intelligo, non sine optimis praemiis. Puto illi non ita placitum Galliam, quin praelaturus sit securiorem sedem, sine rei suae detrimento. *Hippolytum* nostrum si aliquanto invisas saepius, facias rem & te dignam & illo, quo nemo est tui amantior, & nunc in relegendis poematis tuis totus est. ¹ Amicus noster hîc fuit, & me vitare videtur, quod nolim. neque enim tam inepti sumus, ut nihil vino velimus ignoscere. Spero te vel *Milii* causa huc venturum, quod si erit, fac, ut soles, ut me quoque facias participem tui. Salve, doctissime amicorum. Prid. Cal. Julias. c1515 cx.

¹ *Baudius.*

EPISTOLA CCIII.

HUGO GROTIUS

*Danieli Heinſio.**Leidam.*

Cum ad me venit epistola tua, Heinſi Clarissime, nullum apud me exemplum Senecae fuit. habui duo, sed alterum *Reigersbergius*, alterum *Blonquius* abstulit, nec memoria mihi tam fidelis est, ut absente libro locum repraesentem. Tamen quae nuper notaveram cursim admodum, transmittere tibi volui. Tu ex his eligas, si quid dignum posteritate & aliis indictum. Postquam illa scripsi; vidi *Scaligeri* posthuma, & in illis notas ad Senecam, in quibus ut multa praeclara, ita non dubie pleraque ingeniosa magis, quam vera. Multas emendationes phrasas & stylium Senecae respiciunt, de quo puto te non dubitaturum. Voces etiam quasdam, ut *praecommovebunt*, *procacitates* & similes a Seneca usurpatas vix credam. Jam vero illud Theb. 65. *Duc e duobus*, id est elige, quam durum nec illius saeculi? cum vera sit lectio, *quovis vertere duce me: duobus omnis eligitur via*. Antigone enim duce Oedipo quovis ire cupit, nec posse patrem ait iter aliquod invenire, quo non sequatur & filia. Et in Medea quid est apertius illo versu 514. *Quid facere possim, eloquere. MED. pro me vel scelus*. Hoc enim vult Medea, nihil esse, quod non ipsius causa facere Jason deberet, quamvis id cum scelere conjunctum foret, quae videlicet multa scelera ipsa illi imputabat: Rursus Jason ait duos reges gemino a latere ipsi instituros, respondet illa, Medeam magis esse metuendam regibus. negari non potest quin apertum sensum vir magnus mirum in modum distorserit. Illud quoque non dubito, versui 500. *Regina natis*, in eadem Tragoedia, recte Jasonis personam praeponi. Cum enim Medea aegre ferret suis liberis fratres ex Creusa futuros, Jason contra nihil in hac quidem re dolendum esse ostendit, cum potius id & honori & praesidio ipsius liberis esset futurum, quod miseri ipsi potentes haberent fratres e stirpe regnante. In Phaedra versus 556. hanc ego putarim esse sententiam. Nihil est humani inter homines. Ipsae matres saepe suis liberis sunt infensissimae, ut jam de novercis nihil dicam. Omnia si circumspicias, invenies, inquit Hippolytus, feras, inter quas vitam agunt venatores, minus esse feras, quam ipsi sint homines. Est enim *ἄγδοζον*, ferae a feritate dicuntur, atqui ego contendo feras non esse feras, prae quam sunt homines, imo si comparisonem instituas, nihil esse feris mansuetius: ita ut merito solitaria ista inter feras vita consortio hominum sit praeferenda; nam huc spectat oratio. plura nunc non addam. nam & negotia me divellunt ab hac suavissima confabulatione, nec quicquam ultra praestare possum sine libro meo. Vale, flos eruditorum. VIII. Decemb. CIOIOCX.

EPISTOLA CCIV.

HUGO GROTIUS

*Danieli Heinsio.**Leidam.*

Dicam quod res est, Heinsi, ut te eo compellent vocabulo, quod aliis quidem datur, caeterum uni tibi debetur, Vir undequaque eruditissime, cum omnibus scriptis tuis id reverentiae debeatur, ne ea aliter legere audeam, nisi quum totum id unum ago, tum vero imprimis addixisse me diligentiam expendendis virtutibus ejus ¹ libelli, quem mihi postremo misisti proprium munus, utpote meo inscriptum nomini. Neque enim ita legendum existimavi, quasi esset pulcherrimorum duntaxat epigrammatum dilectus quidam, sed tanquam totius veteris philosophiae breviarium. Quominus ante id fecerim obstitit infelix hominum genus, quibus quotidie libet peccare magno meo incommodo. Implacabilius autem illis posthac irascor, ex quo comperio me per illos impediri, quo minus mature fruar, re mihi dulcissima, commentationibus tuis. Sed bene evenit, quod me tristibus illis negotiis per dies aliquot exercitum solatus est liber tuus sapientior, an doctior dicam incertum. Adeo tu & pro philosophia es sollicitus, quam Musarum amoenitate exhilaras, & pro ipsa Poësi non minus, quam rerum sterilem non esse finis. Paucissimis datum est unam aut alteram sectam diligenter ediscere; tu nobis omnes paucissimis paginis exhibes; & quidem suis quamque sententiis, sua phrasi, suo etiam idiomate. Itaque ego, qui istis in rebus non quantum vellem intelligo, mirifice tamen moveor & Epicuri delitiis, & Platonis suavitate, & majestate Aristotelis, & Stoico robore, & dubitatione Arcesilai. Plane ut per se, quod eximium erat, ignotam per tot secula Graecam Poësin ad vetus instar reparasse, id inter alia laboris tui merita vix compareat. Et pro his quidem gratias habeo tibi publico nomine, & tanquam eorum unus, quorum studia tuus labor adjuvit. Caeterum quod cum libello aeternitate dignissimo meum simul nomen posteris commendare voluisti, id vero ego tantum existimo beneficium, ut libenter & ingenue fatear, nec ad habendas gratias copiam mihi, nec ad agendas verba sufficere. Quod reddam profecto nihil habeo praeter vota, inter quae praecipuum est, ut saeculum te contingat te dignius. Magnum tibi luculentissimi operis fructum abstulit mors *Scaligeri*, quo prope uno Judice haec stabant litterae. Nunc *Casaubonum*, *Thuanum* & paucos aliquot mihi tolle; perierit ille ipsi etiam vetustati admirabilis labor. Sed ne tantum imperitiae regnum Deus concefferit, ut aestimantium penuria te a recto deterreat. Audeo de posteris melius sperare. Veniet aetas doctior & sanctior, quae nostrae hoc quoque exprobrabit, quod virtutes tuas non intellexerit. Vale, amicorum princeps. XI I. Cal. Decembr. MDCXII.

1. Intelligit peplum epigrammatum Graecorum. vid. *Heinsf. Poëmat.* pag. 508.

EPISTOLA CCV.

HUGO GROTIUS

*Danieli Heinsio.**Leidam.*

Cum in manus meas venissent literae, quas ad te scripsit vir tui simillimus *Casaubonus*, in culpa esse nolui, quo minus quam maturrime ad te curarentur. Noveram enim illud nostri juris, minus solvere qui tempore minus solvat. Maluissẽm tamen, si spes fuisset tui hĩc videndi, coram tibi tradere, si quid forte inde discerem, quo in statu res ipsius nunc essent, ecquid placeret Britannia, an Gallia adhuc potior, & quo labore rem sibi invisissimam otium pelleret. Nam meae quidem litterae horum nihil habent, tantum quaedam, quae ad me pertinent, quanquam ut verum dicam, ne haec ipsa quidem ad me pertinent. Nosti vitium hominis, etiam minime magnos magni facientis. Nimirum ita est saeculum, ut videri possint sapere, qui non extrema desipiunt. At tu vale, Heinsi doctissime, & hoc tum natura, tum diligentia consecute, ut laudatoribus tuis nihil debeas. VIII. Jan. cııııcxıı.

EPISTOLA CCVI.

HUGO GROTIUS

*Danieli Heinsio.**Leidam.*

Litteras, quas ad affinem miseras meum, Heinsi Clarissime, referare ausus sum, cupiditate nimia videndi Socratis tui, tum ne Senatorum desideria morarer, quibus exemplaria te mittere non dubitabam: erat enim *Nicolaus* noster in Zelandia, estque etiamnum, reditu, ut videtur, hoc frigore intercepto. Omnes, qui legerant orationem tuam, gratias tibi agunt, ipsam orationem laudant, non modo ut tua omnia, verum etiam inter tua. Post tantorum virorum judicia, frigida sit mea commendatio. Et soleo de te ubique potius, quam apud te loqui. Uno verbo dicam, mel Hymettium. Nunc litteras ad te mitto, quas ad me *Casaubonus*: alteras quidem inscriptas tibi, quae simplices sunt, ut aspicienti patet: Caeterum ad *Bertium* alteras, in quibus nescio quid latet, uterum enim gestant. Dabis operam, ut curentur: simul rogo molestum ne sit, si forte illac transis, aut per famulum, monere *Raphelengium*, exemplaria mihi tria aut quatuor Antiquitatis Reip. Batavicae mittat. Petiit enim a me Galliae legatus, vir, ut tui amantissimus, ita tuo vicissim amore dignissimus, quod ubi voles experieris. 23. Febr. cııııcxıı.

EPISTOLA CCVII.

HUGO GROTIUS

*Danieli Heinsio.**Leidam.*

U Sus sum paullo inverecundius, Heinſi Clariffime, beneficio tuo, dum libros, quos utendos dederas, longa poſſeſſione detineo. Pro uſura præter gratias quod ſolvam nihil habeo: niſi in ſolutum accipere tibi placet has *Cafauboni* literas, quas mihi ad te curandas mandavit. Scripſit ad me nuper *Gruterus* verſari te in Cicerone Gulielmiano, & rogat ut, ſi quid haberem, adferrem ſymbolam. Velim ſcire cujus ſit anni editio Gulielmiana. nam, qua ego utor, Wecheliana eſt anni *CIOIOCXI*. An poſterior aliqua & emendatior ſit, nescio: ſed ex te id potero diſcere. *Cafaubonum* jam ſæpe, ut ad nos tranſcurrat, invito, & facturum puto: Eo magis, quia Spadanas aquas adire jubetur a nedicis. Id ſi evenerit, nos felices. Vale, mi cariffime, & nos ama. *CIOIOCXII*.

EPISTOLA CCVIII.

HUGO GROTIUS

*Danieli Heinsio.**Leidam.*

L Ibenter admodum ex tuis intellexi paratas eſſe ad me viri maximi *Cafauboni* literas, quas avide exſpecto, bonasque & auſpicatas reipublicae & Eccleſiae fore confido. Miror illorum *ωερεγίαν*, qui tantum laboris inſumere volunt in effingendo vultu, quem ſine operis detrimento prætermittere poterant. Vobis illud jus debetur imaginum, nobis latere liceat, ne pictum mirerentur poſteri, quem vixiſſe ignorabant. De *Eraſmo* agere coepi & peracturum me ſpero. interim velim tuo beneficio ad paucos dies uti tomis Conciliorum Graecorum. quo minus dubites, auctor tibi erit ipſe *Mylius*. ſi recta Rotterodamum mittere non poteris, mittes ad hofpitem meum, is ut ad me recte perferantur curabit. *CIOIOCXII*.

EPISTOLA CCIX.

HUGO GROTIUS

*Danieli Heinsio.**Leidam.*

E X quo me tetrica haec & Muſis hoſtiliter inimica fori rabies ludo triſtiſſimo incluſit, haud facile memini felicius mihi proceſſiſſe Epigrammatis ſcriptionem (hoc enim ſolum mihi regnum relictum eſt) atque hodie, cum

Tom. II.

Iii

pau-

paucos, sed affectus veri plenissimos, versus, in laudem sacratissimorum tuorum poematum fudi: quae quidem tanti ego facio, ut in eorum venerationem interdicendum mihi carminibus putem. Sed exstare volui apud posteritatem quantumvis breve monumentum, quo constaret, vixisse in Batavis amicos duos, quorum alter optima scriberet, alter optime scripta, qua debebat, fide miraretur. Vale, vir summorum summe, & quantum te colimus tantum nos ama. A. CIO IO CXIII.

Carmen additum erat, quod legitur in *Grotii Poëmatibus*, p. 642.

EPISTOLA CCX.

HUGO GROTIUS

Danieli Heinsio.

Leidam.

ACcepi heri specimen primarum paginarum libri ejus, quem pro tuenda Ordinum existimatione conscripsi. Non opus est, ut curam editionis tibi commendem, qui soleas rebus amicorum non minorem, quam tuis diligentiam impendere. Sed nisi serum est, oratum te volui, ut pagina tertia ad oram adjiciatur vocis Graecae interpretatio *cordium cognitoris*. Pagina etiam quarta magis masculinum mihi videtur *invieta patientia civitas*, quam *invietae*, etsi est hoc satis *ἀδράφρογ*. Et pagina septima versu tertio ego *debere* scripseram, ubi nunc est *deberet*. malueram enim a prioribus pendere sensum. Cogita etiam, an nitidius sit futurum, si voces, quae in margine scribuntur, characterem habeant, ut nunc, rotundum, an potius acutum, ut in *Casauboni* Epistola ad Frontonem. Caetera, quae ad ornandam editionem pertinent, tu melius excogitabis, quotidianus editor. Ignosces mihi, quod liberius te utor. Utinam tamen respondere possem tot tuis officiis. xvii. Sept. cio io cxiii.

EPISTOLA CCXI.

HUGO GROTIUS

Danieli Heinsio.

Leidam.

QUod de libello meo tam benigne sentis, est quod gaudeam, Heinsi clarissime: multorum enim inclementia judicia exspecto, adversus quae solabitur me recti instituti conscientia. Multum errant, qui meo me consilio, aut privata temeritate suscepisse putant tam molestum negotium. Viri magni, necessitas muneris, periculum reipublicae hoc mihi onus imposuerunt. Itaque & post confectum opus publico nomine actae mihi sunt gratiae verbis honorificentissimis. Et certe examinemus ipsas libri partes: quid est, cujus poenitere me debeat? Socini errores nonne aperte damnavi, damnaturus & alios,

EPISTOLA CCXII.

HUGO GROTIUS

Danieli Heinsio.

Leidam.

Nihil insolitum facio, cum tibi molestus sum. Libros, quos a te utendos accepi, etiamnum retineo. donec cum aliis, quos nunc peto, remittam. Laboramus omnes boni, ut semel & Reipublicae & Ecclesiae liceat ab istis ministrorum turbellis quiescere. Et in conventu novissimo ita placide acta sunt

Iii 2 omnia,

omnia, ut a spe nostra non longe simus. opus autem habeo Theophylacto in Epistolam ad Romanos, Fausti & Lucidi scriptis, quae puto existare in tomo quarto Bibliothecae Patrum. Puto esse in eodem Tomo Epistolam Hormisdæ & Maxentii agentis de his ipsis controversiis. Velim adjici Cassiani scripta, & imprimis libellum Fulgentii ad Monimum. Mihi enim mirum in modum placet antiquitatis vestigiis insilire, quae & sanctius vixit, quam nunc vivitur, & judicio usa est minus perturbato. Haec si per te nanciscor, adjunges plurimis tuis in me beneficiis hoc quoque gratissimum. Scripsi & D. Bertio, ut si qua ipse istorum habet, te molestia levet. Vale, Vir doctissime, & diu de litteris bene merere. v. Febr. CIOIOCXIV.

EPISTOLA CCXIII.

HUGO GROTIUS

*Danieli Heinsio.**Leidam.*

PAUCOS ante dies, Virorum Clarissime, convenerunt me litterae tuae, sed paullo serius, quam oportuit; vix enim eas acceperam, cum mihi ereptus est *Seistius*, ita ut ejus compellendi potestas non esset. Sed postquam is Lugduno ad conventum rediit, coepi ipsi exponere acquitatem postulationis tuae. Ille statim occurrere, transactum se arbitro negotium, & *Cunaeum* omisso Tacito ad Suetonium rediisse. Mihi ne hoc quidem satis placebat, cum neque sic solida historiarum professio tibi relinqueretur. Sed tamen gaudebam quocunque modo tibi satisfactum. Multi minus amant *Ἡσιόδειον* illud: ἀγαθὴ δ' ἐστίν. At mihi inhumanum videtur, oblectare se eorum simultatibus atque contentionibus, qui magistri esse debent humanitatis. Recte faceret *Cunaeus*, si parceret uti in te tuis beneficiis, hoc est & fama sua & dignitate, quarum utrumque, post Deum immortalem, tibi maxime debet. Sed si ille officium non facit, tu tamen oblivisci non debes eorum, quae de ferendis fortiter injuriis tuus Plato, & alii Sapientiae doctores praecipunt. Minime enim te dignum esset, ignorare in vita, quod in schola & libris doces. De componendis belli nostri Annalibus egi cum Pericle. sed video decretum ipsi nihil agere antequam venerit ὁ Ὀπίσθεος, quem plane tuum esse confido. Vereor ne *Byzantinus* molitiones nostras perturbet. Ego non hîc modo, sed in quacunque re alia, si quid facere possum, quod aut dignitatem aut commoda tua promoveat, id omne tibi deberi, ac longe inferius esse tuis in me officiis semper existimabo. Vale, nostri saeculi decus, & magno fer animo, si qui te qui sis ignorant. XII. Martii CIOIOCXIV.

¹ *Corn. Mylius*, gener *Oldenbarneveldii*, quem *Periclis* nomine videtur indicare. Quis *Byzantinus* ille sit vix exputo, nisi ad nomen *Constantini* respiciens, intelligat *Hugenium*, vel forte an vero *Grotius* de suis Annalibus, an vero de hac Provincia *Heinsio* mandanda agat dubium videri posset, *Aarssenium* sed ego *Heinsium* commendasse puto, quia *Mylius* curator de eo consuli debebat.

EPI-

EPISTOLA CCXIV.

HUGO GROTIUS

*Danieli Heinſio.**Leidam.*

Liber, qui te Rotterodami exspectaverat, Lugdunum ad te venit: 'Poëta Φιλελόγητος, ἀεισθητικός, μισοτύραννος, in summa dignus, quem mei Batavi legant, ut quo magis amant vatem Hispanum, eo Hispanum Regem implacabilius oderint. Multum hæc editio *Raphelengii* diligentiae, mihi aut nihil, aut minimum debet, itaque & nomen me inscio adscriptum est. Videtur enim mihi plane μικροφιλόπμον labore tam exiguo, tam obvio, gloriolam quaerere. Textus puto tibi non displicebit, concinnatus, nisi fallor, ex lectissimis lectionibus. Notas, non ut ita ederentur, scripseram, sed ut emendarem aberrantes quasdam *Bersmanni* interpretationes, alioqui aut plura annotanda fuerant, aut nec ista. Sint hæc sane, ut sunt, haud magni pretii. tamen nemo ante me Syndicus Rotterodamensis hæc præstitit: Vides me ridere, hominem tanto Theologorum odio laborantem: quod non vulgaris est fortitudinis: Nam & apud Lucanum Caesar² Achoreum satis placide alloquitur: ut videas, ne tum quidem tutum fuisse in Isiacos incurrere. Miror quod nullum adhuc ex Frisia fulmen. magnum oportet malum sit, quod tamdiu cuditur. Vale, mi Heinſi, & me vel illis invitis ama. xx. Apr. c1515cxiv.

1 Lucanus.

2 Lib. x. 175.

EPISTOLA CCXV.

HUGO GROTIUS

*Danieli Heinſio.**Leidam.*

Henicum Delmanhorstium familiariter olim novi, juvenem puer, cum ambo mirifice eo studio delectaremur, quod nos superbo nimis vocabulo Criticum appellabamus, cum id omne in vocum quarundam abstrusiorum notitia, & rituum quorundam indagatione consisteret: ac memini jam tum tantos fuisse illius progressus, ut si cum Carmenta, matrona nobilissima, loquendum hodie esset, aptior vix quisquam posset inveniri, cui id negotium mandaretur. In Scholiis Græcis nullus illum locus fugiebat, ubi scriptum esset εἶδος λόγος. Ex eo tempore quantum profecerit, anni enim jam multi sunt, equidem nescio: præsertim vero illud ignoro, quam prope absit a magistro Hippocrate. Ego quidem aegrotavi jam sæpius, sed opem ipsius experiri mihi nondum contigit. Ambit nunc, & quidem calide, Medicam in Academia

Iii 3

Pro-

1 Medicinæ honores Academicos ei gratulatus erat lib. II. Farrag. pag. 189. vid. supr. Epist. c1xvii.

Professionem. Hic ego quid facerem, homo tenerrimae frontis, diu dubitavi. Videbantur mihi multa esse, quae spem illi facerent. Primum videntur mihi, qui Academiam curant, numero docentium mirum in modum delectari: neque ineptum est, ut qui sex aliquando Jurisconsultos habuerunt, quatuor habeant Medicos: praesertim cum sint, qui ex ingeniorum conflictu voluptatem nescio quam capiant. Deinde quod minime est contemnendum, non Gallus est, non Germanus, non Flander, ut tuos quoque attingam, sed purus putus Hollandus, & quidem Lugdunensis, *Baudii* voce, *eques verna*. Tandem haec menti sedit sententia, ad te scribere, qui ipsum tanto melius nosti, quanto posterius cum illo vixisti. *Toiôs ὃς vóος ἐστὶ*, meministi caetera. Quare rogo te, ut si videtur tibi *Delmanhorstius* herbarum ingenia ac vires, humani corporis membra ac recessus intimos, morborum causas ac remedia, ita ut oportet, didicisse, patiaris eum de suo lumine aliis facem accendere: imo tuae commendationi meam quoque adjungas, quod & Virum Clarissimum *Petrum Scriverium*, amicum utriusque nostrum veterem, libenter facturum confido. Sin (nolo autem male ominari) tum ut blanda oratione, qua vales plurimum, a proposito infelicis spei eum deterreas, medicusque sis medico. Non leviter enim aegrotare mihi videtur, qui insana ambitione se macerat. Vale Vir Clarissime xiii. Maji c1610cxiv.

EPISTOLA CCXVI.

HUGO GROTIUS

*Danieli Heinsio.**Leidam.*

Mitto tibi summe virorum, historiam ornate admodum & subtiliter scriptam a doctissimo ¹ *Raphaele Thorio*, quae causam mortis viri incomparabilis, & tibi simillimi, *Isaaci Casauboni* complectitur. Rogo legas, deinde ostendas *Pavio*, qui miram constitutionem corporis, in quo habitavit admirandus ille animus, observationibus suis Anatomicis adjungat. est enim res digna medicorum exacta consideratione. postea vero obsecro cures ad me redeant literae. De *Cassandri* epistola interpellor a Christianissimi Regis Legato, jussu ejus, cui omnes operam nostram debemus, *Augusti Thuani*. quare advigila quaeso. Velim etiam mitti mihi *Goldastina*: & primum quidem totum quamprimum poterit: eum ubi remiserim, alterum, deinde tertium. Vale, decus literarum, quarum spes nunc ferme in te solo sita est. xiv. Aug. c1610cxiv.

¹ Vide Vitam *Casauboni* ante Epistolas novissimae editionis pag. 64.

EPISTOLA CCXVII.

CORNELIUS VANDER MYLE ET HUGO GROTIUS

*Danieli Heinsio.**Leidam.*

Virum nobilem & utraque fortuna insignem *Poppium ab Aysma* tibi commendamus, non sane perfunctorie, neque dicis causa, sed ut amantem eruditos, & dignum vicissim qui ab eruditis ametur. Ordines foederati, cum multa habent agenda apud Balthicas civitates, neminem reperire potuerunt, cui potius legationem, & quidem permanentem crederent. Quare recte & pro tua humanitate feceris, si hunc virum suis virtutibus praeclarum, deinde publica quoque dignitate ornatum, ostendas tibi esse quam gratissimum. Hagae Comitatenſi x. Auguſti c1610cxvii.

EPISTOLA CCXVIII.

HUGO GROTIUS

*Danieli Heinsio.**Leidam.*

Pro diligentia, quam praestitisti non operi (neque enim merebatur) sed amico gratias ago maximas. Errata annotavi, & gaudeo me tam paucis defunctum, ut nunc est Typographorum genus. Sed alia difficultas hinc suborta est, quod cum illorum hominum desidia opusculum meum sua tempora perdidit, cum id ipsum argumentum isto modo disceptari decebat, nunc in ea inciderit, quae plane videntur incommoda omnia editioni, quippe in ultimo colloquiorum articulo, quibus ea omnia vitanda sunt, quae possunt ingenia partium offendere. Utique vir sapiens, *Mylii* tui focer (quem cum dico nihil me aliud, quam ordines Hollandiae dicere intelligo) in ea persistat sententia, quae & mihi, non hercule mea, sed reipublicae causa probatur, posse quidem, ne Typographus de damno conqueratur, mitti libellum ad nundinas: Caeterum distributionum in vulgus in septimanas aliquot, mensem ad summum, his in partibus diligenter comprimendam, extra ea exemplaria, quae mea cura & fide hominibus iudicio praeditis & bene in patriam affectis donabuntur. Huius rei causa, & ut impressio finem quam primum accipiat, ne nova suboriantur incommoda, eram venturus Lugdunum, sed prohibeor arcta occupatissimi muneris necessitudine, quo tamen non ita distringor, ut non vetera studia interdum fugitivum suum retrahant. Testabitur hic, quem tibi mitto, *Jonas*, de quo iudicium tuum simplex & sincerum exspecto, hoc primum stipulatus, ut bene cogites, quam sit difficilis omnis poetica paraphrasis argumenti religiosi, & quantum intersit inter sermonem Hebraeum & versus La-

z Legitur in ipso limine Poëmatum *Grotii*.

tinus. De libello meo explora, quaeso, an Typographus ultro pariturus sit legi, quam scripsi; alioqui utendum erit publica auctoritate: nolo enim eum meo periculo peccare. Et non sumus *Baudii*. Jonam aut remittes, aut, si placeret, referes. VII. Martii.

EPISTOLA CCXIX.

HUGO GROTIUS

*Geverhardo Elmenhorstio.**Hamburgum.*

Libellum *Wouwerii*, quem mittis, Vir Clarissime, de interpretatione τῶν ὀ jam ante scriptum manu videram beneficio *Johannis Wittii*, qui a consiliis est Megalopolitano Duci: miratusque fueram & observationes raras & sermonis castitatem, cum summa elegantiâ conjunctam. quare me quidem libentissimo fecisti, ut publici usus foret tam praestans, deque argumento tam nobili dissertatio. Et hoc quidem nomine debitorem me tibi fateor, sed inter multos illud me propius tangit, quod animi tui affectum benignissimum mihi promissis atque promittis: de quo dubitare minime possum, cum video quam praeclare & supra meritum de studiis nostris sentias. Id enim tanti judicii viro accidere non potuit, nisi amor judicium antevenisset. quare & gratias tibi habeo, & tibi persuadeas velim, me & ob summas tuas virtutes, & ob hunc in me affectum, addictissimum semper tibi fore. Meorum nihil erat, quod mitterem novum, praeter id, quod contra *Socinum* commentati sumus: in quo si quid est boni, id argumento debetur: si quid minus recte se habet, excusabunt me negotia publica, quae vix exiguum temporis partem excolendis studiis mihi relinquunt. Tibi felicius otium precor, simulque fausta omnia. Gratum erit, si indicem Photinianorum & Antiphotinianorum ad me miseris. Si qua in re vicissim commodare tibi potero, experieris paratissimum. Cal. Dec. Anni MDCCXVII.

EPISTOLA CCXX.

HUGO GROTIUS

*Geverhardo Elmenhorstio.**Hamburgum.*

NOli succensere mihi, Vir Amplissime, quod & literis & beneficiis tuis provocatus silentium tamdiu reponam. Non ausus sum vacuis ad te manibus venire: qua me molestia liberavit *Ravenspergerus*, qui aut contradicendi studio, aut prava inclarescendi libidine nostrum librum & aliorum, & quod plurimi facio, tuo judicio approbatum hostiliter est infectatus. Ei libro doctissime respondit vir tui nostrique amantissimus *Gerardus Vossius*: cujus laborem a me, quam ab ipso, ut acciperes malui, ne deesset testimonium grati in te ani-

animi. Nam cum a me propter molestissimas occupationes nihil dignum tuis oculis possit proficisci, quid facerem potius, quam ut ab alio fumerem, quo te possem demereri? Attamen si quod respirandi mihi tempus dabitur, resumam in manus Apuleji Milesias & alia ejusdem scriptoris: non quod praeferre me quicquam posse confido in artibus, quas, si didicissem unquam, jam dedidicisse poteram. Sed ne ulla in parte tibi sim inobsequens. Vale, vir Amplissime, & nos in tuorum censu habe. Prid. Cal. Sextil: c10 10 CXVIII.

EPISTOLA CCXXI.

HUGO GROTIUS

Andreae Schotto S.

Antverpiam.

JAm pridem, vir optime ac doctissime, tui visendi cupidine flagraveram, cujus non eruditio mihi tantum ex editis libris, sed & suavitas morum ex Scaligeri atque aliorum testimonio innotuerat. Atque adeo id ipsum inter causas vel praecipuas erat, cur vestram Belgicae partem adire cuperem: sed obstitit bellum diu, mox factis induciis metus ne, quia privatus jam esse deficeram, sequius id interpretaretur hominum malignitas. sed vere, quod dici solet, fumum dum metuo in flammam incidi. Nam qui tam temere metuebam, ne levi suspitione aspergerer, totis calumniarum fluctibusmersus sum. sicut autem in carcere cum essem, me isto Josephi dicto solatus sum: *nihil feci cur in hanc foveam conjiciendus essem*: ita nunc liberatus Dei beneficio (ingratus sim aliter si dicam aut sentiam) merito mihi videor cum eodem Josepho dicere posse, *τῷς ἐνὲ δωρεὰν ποιήσασι*: Vos quidem in malum hoc cogitaveratis, Deus autem hoc cogitaverat in bonum. Nam exemptus & negotiis publicis, quae vix ullam animo pacem indulgent, & turbæ hominum plerumque per contagium noxiae, vitam egi quasi ἀσκητικῶς, maximamque partem temporis tum precibus, tum sacrae scripturae & veterum ejus interpretum lectioni impendi, eo sane animo ut, quemadmodum in controversiis de Gratia & libero arbitrio id, quod verum esse firme persuasus sum, magno potentium odio meoque periculo & professus eram libere, & pro eo, quo tumungebar, munere tutatus; ita in caeteris partibus, seposito rerum temporalium respectu, veritatem aut jam cognitam, aut amplius (neque enim de profectu desperandum est) cognoscendam animose sequerer. in quo proposito Deum & precatus sum haec tenus, & nunc etiam precor, ut me conservet ac roboret. cum autem iis, quae praecipua sunt, praecipuam quoque curam deberi arbitrarer, primitias otii mei consecravi illis rebus, quae Christianorum universitatem a reliquo humano genere segregant. Itaque eo animo lectis aliquoties sacris oraculis, atque iis, quae tum adversus Gentes, tum adversus Judaeos a priscis ac recentioribus erant disputata, operam dedi, ut horum summam populari ac patrio sermone expressam, quo magis lectio allubesceret, quadam versuum dulcedine

condirem, aliis quoque, sed meis praesertim Hollandis, hanc operam navans, ut qui domi cum Judaeis, peregre cum Mahumetanis & paganis, saepe etiam cum impiis Dei aut divinae providentiae negatoribus versantur, haberent praesens adversus tot venena remedium. Is labor in libros sex fluxit, quorum primus Deum esse probat, ac scitu maxime necessarias proprietates ei assignat, providentiam, & aliud post hoc, quod hîc agitur, aevum: atque inde Religionem generaliter adstruit. Secundus docet eam esse veram religionem, quam Christus Dominus noster in terras attulit. Tertius auctoritatem defendit eorum librorum, quos veteris & Novi instrumenti codices continent: Quartus speciatim Paganismo, quintus Judaismo, sextus Mahumatismo opponitur. In eodem opere Christianos omnes hortor, ut omissis ad pietatem minus facientibus controversiis, praecipue vero animos asperantibus rixis, ad pacem se concordiamque componant. Confido Deum Optimum Maximum, qui in delineandis istis Christianismi rudimentis mihi benignus adiutor fuit, hoc etiam mihi concessurum, ne in erroribus ullis haeream, qui animae meae saluti possint adversari, neve charitatem abjiciam in eos, qui eidem Domino nomen dederunt, praecipue qui vitae innocentia tanto nomini respondent: quam in rem omnium bonorum precibus adjuvari cupio, paratus & ipse pro aliis easdem preces ad Deum sine intermissione fundere. Haec igitur, ut dixi, quamquam meditari coeperam pridem, tamen ut amplius intentiusque meditarer divina directione carcer mihi profuit. proderit, spero, & exilium, cui hoc etiam debeo, quod te aliosque viros eximios, tum istuc, tum hîc in Gallia vidi: quibus omnibus gratias ago, nominatim tibi, vir reverende, qui praeter illos sane amicissimos sermones has etiam literas, tui in me affectus indices, esse voluisti. Bene mones & carcerem esse hanc vitam & exilium. Carcerem: nam quota pars universi est, quae nos inclusos tenet, adstrictos etiam vinculis divinae gubernationis? exilium, a patria quippe absumus: municipatus enim noster in coelo est. Exempla Themistoclis, Coriolani, atque aliorum interdum cogito: saepius autem illorum, qui leniter tulere illatas a civibus injurias, qualis Aristides, Phocion, Rutilius, &, quem dicis, Scipio: sed quid opus aliunde exempla petere, cum praestantissimum nobis in Mose exhibeant sacrae literae? qui populi liberator incertum ingratusne acceptus sit a suis, an ipse patientius pravae populi mores pertulerit. Virtus hîc in alieno habitat. inde plerumque adeo sine praemio est, ut & poenas incurrat, aut ubi unus principatum in dominationem vertit, aut ubi inter plures orta factio, rem, quae publica fuerat, privatam facit, aut ubi populus, (qui mos est furentium) in membra sua, & quidem potissima, saevit. Merito divini libri civilis imperii statum mari comparant: nam ut maris aestus eadem loca nunc tegit, nunc destituit, ita potestas illa ambulatoria est, neque vestigium servat: tum vero non desunt venti & fluctus, qui, non dicam, incautos, sed vel maxime sibi caventes, alios penitus demergant, alios diu vexatos tandem naufragos in littus ejiciant. Ad haec exempla nos quoque accessimus, quibus propositum semper fuit in eo, quem acceperamus, statu patriam conservare: quod nobis

qua

qua mercede steterit vides, quanto tutior tranquilliorque vita in piis meditationibus & literato otio senescentium

Ζηλῶ σε γέρον, ζῆλῶ δ' ἄνδρων

Ὅς ἀκύνδυνον βίον ἐξεπέρασ'

Ἀγνῶς, ἀκλεής.

Hoc vitae genus si mihi in posterum clemens Deus indulserit, operam dabo, ne eo segniter abutar. Versus, quos ex Graecis apud Stobaeum Latinos feceram, jam recepi, eisque relegendis quod primum dabitur tempus impendam. Conferam & *Rattalleri* libellum, pro cuius usu gratias habeo, remissurus propediem. Quos nominas viros eruditionis fama pridem notas, videre nondum contigit. si qua dabitur eos videndi occasio, utar, neque enim nescio quam multa sint quae ab eis doceri possem. Vale, vir optime. viii. Julii. ciorccxxi. Lutetiae.

EPISTOLA CCXXII.

HUGO GROTIUS

Casparo Gevartio.

Antverpiam.

Sillvam nostram, Clarissime Gevarti, jam puto noster *Puteanus*, penes quem exemplorum dispensatio est, ad Te miserit: in qua si quid est, quod tibi amicisque aliis non displicet, id omne vestrae in me benevolentiae atque amoris acceptum fero. Neque enim nescis haecenus ea nostra tempora fuisse, quae litterarum usum vix quinquam mihi, nisi ad solatium, permetterent. Pro Carmine, quo Libertatem meam prosequeris, summas ago gratias: agit & uxor, quae non sine magnis incommodis tandem ad me pervenit, exsilium ejus toleratura, cujus carcerem tulit. Poësin apud vos vigere ex sapiente Satyra optimi senis, & ex *Burgundi* mellitis supra saeculum versibus laetus intelligo. si quid recte judico, non est quod Belgica in hoc studiorum genere cuiquam terrae concedat, te praesertim superstiti, Doctissime Gevarti, cui felicem litterarum successum ex animo precor. Patere quaeso ut *Schottus*, *Miraeus*, *Woucrius*, *Rubenius* per te salutem a me accipiant. Nam *Hemelario* jam alterum rescripsi: tamen per te quoque velim intelligat amorem ipsius in me a me maximi, ut debet, aestimari. Vale, Vir eruditissime. xxv. Septembr. ciorccxxi. Lutetiae.

EPISTOLA CCXXIII.

HUGO GROTIUS

Joh. Hemelario.

Antverpiam.

Spero jam pervenisse ad te, Hemelari doctissime, literas, quibus & Scriptori pro conscripto, & tibi, pro transmissio ad me Belgico libro gratias ago.

K k k 2

Alio-

i Vide de hoc *Hemelario*, & his epistolis, quae notavimus ad *Lipsianas* Epist. dXLII. Tom. I. pag. 563.

Alioqui merito mihi doleat tamdiu me apud te mei amantissimum haesisse in crimine maximo ingrati animi, cujus culpa ut me exsortem scias, mitto exemplum earum, quas dixi, literarum, ut si eas non accepisti, hoc earum vicem praestet. Librum ipsum & legere incepti, & qua oportet diligentia atque animi attentione perlegam. Accessit interim alterum beneficium, Jambli ad me Latini: in quibus libertatem loquendi frustra excusas. Neque enim nescio id veri affectus certissimum esse testimonium, quae sentias promere: praefertim si ea persuasus sis, ad summam salutem ejus, cui loqueris, pertinere, quod te quidem plane credere neutiquam dubito: & vel hoc uno, etiam si deessent alia, facile agnosco quantopere tibi sim obligatus. Nam si omnium munerum census ex animo maxime venit, sequitur ut hoc mihi gratissimum esse debeat, quod non ambigua praefert summae benevolentiae signa. Accedit ad hoc Carminum dulcis politura, de Angelis vitae nostrae custodibus, de vitae a turba secretae felicitate, pia sententiae, & singularis in me divinae bonitatis numquam ex animo meo delendae pulcherrima delineatio. quod vero antehac & dixi & scripsi, idem nunc quoque tibi persuadeas velim, daturum me operam ut, quae inter Christianos disputantur, ad dictata Prophetarum atque Apostolorum, & secundum eos ad sanctae Vetustatis consensum exigam, exutis praepjudiciis & rerum caducarum respectu, quas si contemnere nondum didici, summus mihi adversorum meorum fructus periit. Cum vero non nesciam, quot sint humanae ignorantiae sinus, Deum supplex veneror, ut tibi mihiq; animum superna luce collustret, & ad verum, in rebus praecipue salutaribus, constanter arripiendum tenendumque corroboret: Te vero, Reverende Hemelari, etiam atque etiam precor, ne minus me tui amantem credas, quam tu te mei ostendis, quamquam ostendendi mihi haud par est copia. Vale, vir eruditissime. xxiv. Septemb. ciciocxxi. Lutetiae.

Exemplum epistolae primae, cujus fit in hisce mentio.

Librum olim mihi consolando, nunc instruendo destinatum, Hemelari doctissime, jam nunc accipio: ita ut totum perlegendi nondum tempus invenierim, facturum id ipsum sine mora, ut meretur affectus pro meliore mei parte sollicitus. Interim tibi magnas ago gratias, maximas Auctori ejus libri, cujus ego eruditionem per omne litterarum genus latissime dispersam, quod vel inspicienti patet, valde imperitus sim, ni admirer, ingratus ni exosculer. In illis versibus, quos liberis meis instituendis conscriptos, alii me ignaro ediderunt, video esse quaedam, in quibus aut ingenii mei caligo, forte id temporis per calamitates meas nonnihil obruti, cum ab omni amicorum alloquio abstractus nihil nisi hostile aspicerem, aut ipsa versuum brevitates & numerorum vincula me impedierunt, quo minus satis perspicue animi mei sensa exprimerem. Quod ni esset, certe nulli data esset occasio adversum me disputandi de illis culpis, quae hominem de Gratiae divinae possessione non depellunt. Omnino enim cum libri, quem mittis, scriptore sensi, ejus generis esse quosdam quotidianae incursationis lapsus, quos *αποδείξεις* ibidem appello: minime vero trahenda eodem capitalia facinora, quae aut dolum malum aut latam culpam

involvunt, & proinde cum statu τῆς παλιγγενεσίας nequeunt consistere. Sic & alia quaedam esse arbitror, in quibus cum idem sentiamus, hoc tantum interest, quod ille, qua pollet facundia, sententiam communem verbis lucidioribus expressit. Erunt & alia, credo, in quibus aliud illi, aliud mihi animus dicat; quod ipsum tamen ne amicitiae nostrae obstet, impense oro: atque eo, ni fallor, iustius, quia non tantum absum longissime ab odio a me dissidentium, sed quod in summis malis, Deo juvante, praestiti, ne quid in re Fidei profiterer contra quam animus sentiret, idem nunc eadem opitulante gratia praestitutum me confido, & quidem eo facilius, quo longius nunc absum ab omnibus in eo negotio simulandi dissimulandique causis. Interim Deum oro, ut si quid me fugit ad salutem utilis Veri, ejus me luce perfundat; meaque ex parte polliceor animum doceri cupidum, & rectis paratum cedere. Ejusdem paternae bonitati te quoque & libri scriptorem quam possum maxime commendo. Carmen tuum avide exspectabo. Vale, eruditissime Hemelari. XXI. Julii CIOIOCXI.

EPISTOLA CCXXIV.

DANIEL HEINSIUS

*Geverardio Elmenborstio.**Hamburgum.*

VIr Clarissime. Mitto tibi ex pacto Methonensem, exemplar elegans: quod ut descriptum qua potes fide ad nos remittas, vehementer oro. Scripsi nuper ad te, & quidem satis prolixè, ad quas literas responsum nunc expecto. Accepi Libanii Rhetoris λόγον ἀνέκδοτον: verum ante nundinas negat quicquam se in eo posse typographus: qui eodem tempore alia nonnulla excudit. Verum de his alias. nunc vix haec licuit. Impense enim properat Regis serenissimi legatus, cui Methonensem tradidi. Meus amor vale, & responde. Lugd. Bat. CIOIOCVIII. VII. Feb.

EPISTOLA CCXXV.

DANIEL HEINSIUS

*Geverhardio Elmenborstio.**Hamburgum.*

VIr Clarissime. Reverfus e Flandria eximium munus tuum accepi. Arnobium inquam, & in eum commentarium doctissimum. Utinam quicumque has literas tractant, ad autores tales emendandos & illustrandos operam omnem & industriam conferant. Expectamus & Minucium; scriptorem, quem sine singulari admiratione nunquam lego. Si quantum ego istis laboribus tribuere me fateor, omnes eruditi debere tibi se sentiunt, non est quod oleum & operam perdidisse te existimes. De literis, quas ad me creberrimas

dedisse scribis, equidem nescio. Scio unas & alteras me accepisse a mercatore nostrate: Sed quibus respondisse continuo me arbitror. Si quo minus semel atque iterum hoc ut oportebat a me factum fuerit, per absentiam meam stetit, quaeso ignosce. Aliquamdiu enim meus non fui. *Wouwerii* nostri obitum maximo cum animi dolore intellexi. Ego eruditionem ejus viri ac praecipue acerrimum ingenium vehementer semper fui admiratus. Sed quid agas! Naturae concedamus ut in singulis hoc agat, quando ei visum fuerit, quod vitare nemo potest. De Plauto diu est cum cogitare desii. Sed fortasse si occasio se offerat denuo in manus sumam. Jam enim editionem adornaveram. Theophrasti opera, quae ex emendatione nostra annos aliquot sub praelo fuerant, adhuc lente procedunt. Excuduntur & Orationes nostrae, quarum brevi exemplum videbis. Nescio quae de Satira disputavimus nuper an videris. libenter enim quicquid ejus est transmittam. Liber *Vorstii* de Deo, quem sollicitè quaesivi ante tempus aliquod, extare hîc negabatur. Scio tamen me immensum aliquando exemplarium vidisse numerum. Res aliquantulum jam languet. Ipse jussu Ordinum Lugduno Goudam discessit, ubi nunc vivit. Faxit Deus, ut cum quibus aliquamdiu Academia nostra conflictata est molestiis, eas componat ὁ Θεὸς πάντων. De amore meo & benevolentia si dubitas, non nosti hominem ἀπὸ χνῶς χηρείαι καὶ κτήσεαι tuum. Talem enim me profiteor. Vale, vir Clarissime, & me literis tuis beare perge. Lugd. Bat. CIOIOCXII. XII. Junii.

EPISTOLA CCXXVI.

N. N.

*Isaaco Casaubono.**Londinum.*

Soleo ego saepe mecum, Iface Casaubone, vir Clarissime, in haec tempora intueri, quibus duae res gravissimae, religio ac pietas, aliis quaestui ac lucro, aliis exercitio sunt aut ludibrio. Quibus eodem modo disputatur, quo in bello configi solet, non ut utraque pars in fide & charitate placide sub capite suo conveniat, & divulsa Ecclesiae membra colligantur, sed ut quocumque modo victoriam obtineat, qui opiniones suas acrius tuetur. Quare quemadmodum milites, stipendia qui faciunt, fortes esse negat maximus philosophorum, ac ne quidem civibus hoc nomen relinquit, quibus vel honor, vel aliud quid praeter honestatem est propositum: ita mihi hodie paucissimi videntur esse, qui inveniendae veritatis spe eam quaerant. Alii quippe, dum immane quantum corruptam esse Ecclesiam, ipsi non nesciunt, eam, a qua
semel

¹ Dubitavi diu cui hanc Epistolam adscriberem. An *Dan. Heinsio*, a quo *Casaubonus* iudicium de Epistola sua ad Cardinalem *Perronium*, de qua hîc agitur, petierat, & etiam acceperat: vid. *Casaub.* Epist. DCCCVII. & DCCCXV. An vero, *Petro Bertio*, qui de hac epistola iudicium suum transmisit *Casaubono*, qui sub *diatribes* nomine ejus mentionem facit Ep. DCCCXXXV. videat Lector, & dijudicet. in sequentibus etiam epistolis, quas non autographas repperi, nomina eorum, ad quos scriptae sunt, deerant.

femel recesserunt antiquitatem, semper & loquuntur & fugiunt. Quare inventa est patrona causae pessimae, Sophistica: quae dum partim verbum Dei vel superba praeterit, vel negligit secura, partim saecula aut diversa confundit, aut corrupta tantum adducit, facile obtinere hoc potuit, ut non tantum fidem inveniret apud suos, sed quae vellet suis sibi munita principiis, adversariis pro veris venderet. quibus hoc ipsum saepe nocuit, quod pastoris sui vocem non solam audirent: aut quod potius antiquitati crederent, quam ex solo Dei verbo tempora distinguerent. Omitto plurimorum interesse ex iis, qui Catholicos dici se volunt, ne admittant veritatem, aut efficacissimae ejus potentiae dent manus. Non enim aras tantum sed & focos tuentur, quos perpetuo lucere sibi volunt. Omitto auctoritatem illius, sub quo militant: qui divisum cum Christo imperium jam habet. Ex quo illa caelum reliquit, sibi in inferiora ista potestatem usurpare coepit. Itaque eo est deventum, ut & unus supremum caput sit Ecclesiae totius, & sub isto capite Ecclesiam errare non posse, pars sit fidei aut fulcrum. Cui si quis Dei verbum opponat: rursus ab eadem interpretationem ejus accipere cogatur, quam oppugnat. Hanc enim eadem sibi servat quae errat. Et ne quid desit, quia principem habet in terris, quae credenda sunt ex verbo vitae non probat, sed ex potestate sua injungit. Itaque Catholica, non quod universalis sit, vocatur, sed quod universae imperet, merite sic dici potest. Alii dum in ea omnia corrupta esse sibi persuadent, & hoc a parentibus liberi hauserunt, tantum studiose dant operam, ut in diversum cant, quare nihil praeter odium ad eam causam adferunt, quam oppressam esse cupiunt. Verbo Dei gloriantur potius, quam ut ex antiquitate interpretationem illius admittant. Ritus, qui ad formam Ecclesiae internam quidem non faciunt, externam vero absolvunt, tollere non dubitant: Partim quia superstitionem metuunt, quam ibi viderunt, hinc autem non distinguunt, partim quia veteres non legunt, sed calide condemnant. Denique dant operam, non tam, ut Catholicae sint membra, quam ne sint in Romana. Nec intelligunt se ea ratione, non ab ea tantum abire, quam oderant. Sed cum reliquis, quae si non sunt puriores, sane quod ad formam internam nihil mutant, ad externam autem quod attinet, forte prudentius sunt constitutae, coalescere non posse. Ut de iis ne dicam, qui divortium faciunt. Nam quam multos novimus, qui opiniones sequi suas in exilio malunt, quam sub optimo principe pietatem in patria profiteri? Tantum quia maximus Regum, solis quidem literis sacris omnem in omnibus auctoritatem defert: si quae ad salutem aut parum conferunt aut nihil, ad aedificationem autem plurimum, ea ex antiquitate, non corrupta quidem illa, sed quae proxime ad Apostolicam accedit, esse judicat petenda: Ideo quisque in religionis negotio, quia suae plurimum opinioni tribuit, alienam facile sententiam contemnit. Dum haec & id genus alia mecum ipse cogito, gratissimum munus tuum, amicissime virorum accepi. Si vulgares illas a me laudes expectas, quibus homo literarum studiosus, virorum quantum hodie est literatissimum, commendare soleo, fallit te tua expectatio. Longe enim majus & illustrius est munus, quam

quam pro illis laudibus, quod suscepisti. Neque tu ignoras, quaedam esse quae laudari non possunt. Quae suprema nempe sunt in bonis, & virtutem ipsam excedunt: ut philosophorum maximus nos docet. Quid est autem melius, quam Christi causam agere: cujus ἄρραφον καὶ ὑφαντὸν χιτῶνα non jam milites, ut olim, dividunt, sed qui negotium pietatis maxime curare videntur? Quid praeclarius, quam cum summa eruditione nihil praeter veritatis studium ad hoc conferre, ad quod alii scientiam, alii fiduciam illius attulerunt: neutri sine perturbatione mentis integri & suae spontis accesserunt? Perturbatio quid est; nisi mentis tempestas? aut quis recte de duobus judicat, quam qui aliquid utrique concedit? vel quod aequitas hoc postulet, vel ut ea ratione animos utrinque mitiget? Jam κελύερα quae ponis, ut ad veritatem inquirendam sunt certa, ita neutra pars ea non admittit. Sacras enim literas neque illi nesciunt, sed subinde aliter interpretantur: & praesertim de Ecclesiae auctoritate cum agatur. Nam hinc tota res haeret. Patres vero & antiquitatem hi quoque agnoscunt, nisi quatenus ab illa veritatis norma recedunt. Id autem quando factum sit, & quomodo docet historia. Non Ecclesiastica tantum, & quae de industria hoc agit: sed quaecunque e continuatione aut mutatione petitur doctrinae: quae in patrum scriptis plana est ac manifesta. Quare qui pro saeculis diversam distinguit doctrinam, & ex una hac amissi judicat de tota, facile videbit quae sit pura. Et, quod utinam utrinque fieret, multas cavillationes, recitationes, rixas, conclusiunculas ineptas quas invexit ἡ δογματικὴ, vitabit. Quam nisi accurata illa ab antiquitate lux illustret, novam semper aut aliquid statuet aut refutabit. Hujus ancilla philosophia, ne non disputet, quas non ineptias invexit, ne non, quod Platoni tribuit antiquitas, erudite dubitet, quid non excogitavit? Hinc etiam opiniones in sacris peculiares, & nonnunquam nulli rei. Quae cum agitantur inter doctos, nihil aliud dicuntur, & facillime componi solent. Si in vulgus emanent, haeresin libenter vocant, qui non capiunt; alii libentius sequuntur. Unde primum Schismata in Ecclesia, & non raro factiones in Republica. Quod ex illa de Ubiquitate controversia apparuit. Vel una Metaphysica scientia, quae si intra limites consistat suos & principia, ita convenit cum mente nostra, ut occurrere ei ultro videatur cum discitur, ut quae prima sit ac nobilissima sapientia, in quam omnes inclinamus, quas non nugas in Theologiam induxit, & spinosas primum, mox perniciosas quaestiones? Scholastici enim, qui & illam veritatis normam, de qua supra agebamus, mirifice involverunt, & antiquitatem insuper habuerunt, principia ipsa diversissimarum disciplinarum confundere non dubitarunt. Quarum altera ex mera revelatione & effabili aeternae bonitatis sapientiae, sua habet firma & immota: altera autem suo naturali circumscribit lumine. Velle in iis ergo lascivire, aut commiscere illa, quae mox aegre separari possunt, & nihil aliud quam controversiarum augment numerum, quae dementia est? Ubi pax praesertim & concordia quaeritur. Et hoc sancti illi patres viderunt, quibus loco Metaphysicae sua Huperphysica, erat, cujus principia; sola ea norma, de qua agimus, nituntur. Quid Augu-

gustino ad faelicitatem in disputando defuit? Nec Logicam quidem Aristotelis integram viderat. quae ut nobis divinitus est data, ita infinita addidimus, quae nec Aristoteles agnosceret. Quanto autem plura ad Theologiam ex philosophia nostra accesserunt: quae ne Apostoli quidem (humano more loquor: omnia enim illis Dei spiritus communicare potuit) intelligerent? Quae res sicut puritatem doctrinae, ita pacem Ecclesiae non parum turbavit. Ad utramque autem, nisi fallor, aspirare viri vere Christiani est. Et hoc serio agere Majestas illius videtur; quae internam Ecclesiae formam quaerit in divino verbo: externam partim ibi, partim ex antiquitate, sed quam maxime integra, quaerendam arbitratur. Cui laudabili ac praeclaro illius instituto, procul dubio is benedicet, cujus negotium potissimum agitur. Horum autem posterius ut fiat, diligenter τὰ ἰσχυρόμενα tractanda sunt. Nam ἐν ταῖς δογματικαῖς, satis ad salutem ac super: nimium ad contentionem profecimus. Gaudeo vero totum te in eo esse, & mecum plurimi praeclari ac eruditi viri. Qui quantum olim literarum humaniorum nomine obstricti tibi erant, tantum nunc Ecclesiae causa, debere se libenter profitentur. Nam ut omnibus placere ista posse credas, ne autor quidem fuerim tibi. Debes enim melius quorundam ingenia nosse, quorum saepe judicia expertus es. Hoc enim est prudentiae; sicut generositatis est, ea fortiter contemnere. Sunt qui novum esse putant, quicquid nunquam audierunt. Et haec imperitia est mera. Igitur commiseratione digni sunt. Sunt non pauci, neque indocti, qui antiquitatis loco habent quicquid obtinere coepit, licet nuper sit exortum. A quo latum unguem si recedas, pessimae opinionis damnatus fias. Non de necessariis jam loquor, sed externis quoque ac ritibus. Multi sunt, qui superstitionem vocant, quicquid paulo minus est quam necessarium ad cultum. Qualia non pauca prima illa saecula habuerunt, & Anglia nunc habet. Sunt qui Idololatriam vocant quicquid aut Pontificii admittunt, aut non damnant. Neque tantum homines hoc nomine, sed integras Ecclesias condemnant. Et hanc dari auctoritatem sibi concedi volunt. Sacras enim literas sequi se ajunt. Quasi eas melius, quam Patres intelligant. Aut Apostolis sint propriiores, quam eorum proximi. Ego vero sponsam Christi, puram debere esse semper judicavi, non nudam. Ordinem in domo Dei, non confusionem, laudari. In qua si omnes sunt pares, imperitissimi sunt superiores. Necessaria enim in regimine tollitur proportio. Tum si non sunt, fiant. Major enim est eorum ambitio, quae paulatim se exerit, & si nimium possit, tyrannidem inducit. Hoc non credidi olim, nunc experientia me docuit. Confessionem damnant: qui vel ejus usum non vident: vel abusum modo in papatu cogitant. Admittere autem nec *Melanthon* olim dubitavit. Τῆς μοναχισίας πέρι meministi alias quid ad te scripserim. Quae ad τὰς ἐκτάσεις reponuntur, facilius nostris quam adversariis probabis. Tamen quae ad primum de reali praesentia, nec ex his quibusdam, scis quam multa plurimi quam operose de hoc argumento scripserint; quomodo τὸ εἶναι vere, & τὸ εἶναι realiter, distinxerint. Quam multas ea disputatio chartas impleverit. Cum facillime, in hoc utrinque convenire pos-

fit. Est enim mere inanis disputatio. Qui realiter praesentem esse Dominum fatetur, pie loquitur. Nihil enim ibi est imaginarium. Atqui *esse realiter & esse ratione* a philosophis opponuntur. Nam quae ratione sunt, in sola mente nostra & imaginatione versantur. Ut Respublica Platonis, quae τῷ λόγῳ γενέσθαι semper dicitur: Tale aliquid statuere in sanctissimo hoc mysterio magna sit impietas. Nam τῷ λόγῳ ὄν, non imaginarium modo, sed & fictum saepe dicitur. Et haec idem valent. Convenit ergo de reali praesentia: convenit de eo, panem realiter esse corpus. Quomodo autem sit, ut recte praestantissimus antistes notat, si intelligeremus, jam mysterium non esset. Qui ergo pie credit quod sit, pie fatetur se nescire quomodo sit, ad sobrietatem sapit, ut Apostolus loquitur. Tum *transubstantiones, concomitancias, & alia*, quae primum barbaries induxit, superstitione excepit, utilitas confirmavit, excludit. Quae tuentur pauci, quod sic sentiant: plerique vero, aut quod expedire id sibi sciunt, aut, quo semper confugiunt, quia Ecclesia id credit. Quam non amplius sacrarum literarum autoritas, sed pontificis defendit potestas. Et huc omnis res redit. Eo enim jam deventum est, ut nec calamo eruditi, neque armis eam debellare possint principes. Facile autem possit tueri quae credit. Qualia sunt plurima quae nec verbo Dei, neque incorrupta antiquitate nituntur: neque immerito a te ad reliquas ἐνστάσεις adferuntur. In quibus omnibus, aliquando ut utrisque inter se conveniat, a miraculosa Dei bonitate, & moderatione hominum est expectandum. Hoc autem magno Regi hic cura videtur esse, non modo ut Catholicum se esse probet. Quod qui Anglis demit, quomodo Romanis tribuat, non video. Hujus autem principis tam magni instituto, tam praeclaro, pii omnes favent: & cum eo pariter desperant. Nimis enim notum est propugnare quae semel placuerunt, non esse fidei fiduciam, sed ingenii exercitium. Cujus praemia in hac vita hodie a plerisque, non ut olim in futura, expectantur. Te autem strenue ut pergas, moneo. Verum magno animo. Debes enim cogitare, homo tam profundae eruditionis, nunquam cuiquam, nisi magno admodum stetit, concordiae inter dissentientes studiosum fuisse. quod tam bonum est opus, quam periculose suscipitur. Scis *Erasmo* quid evenerit: quem mordicibus asini, cornibus petebant boves. Neque scio tamen an consiliis illius quicquam extet moderatius. Nisi si qui damnent, quod prudenter iis displicere noluit, apud quos veritati solus prodesse tum poterat. Idem in scriptis aliquid nonnunquam ex iis, quae ἀδιάφορα sunt, prudenter concedit. non quod ita sentit, sed quod tempori serviat, causae succurrat, veritatem promoveat, quae tum nondum cognita, damnata tamen erat. Quod ipsum in paraphrasi cum nollet, maximis patronis eos libros inscribit. Quos profecto sine admiratione nunquam lego. Chrysostomi ac aliorum medullam esse dicas, qui sine allegoriis & ineptiis τὴν ἀνορθίαν sacri contextus optime excusserant. Jam de *Melanchtone* quid dicas? quem ut animum ab omni perturbatione alienum, ita pectus omni eruditione instructum ad hoc negotium contulisse certum est, quo hoc unum est consequutus, ut cui parti optime consulisset, prope ab ea tantum vapularet.

Ut

Ut *Cassandrum* hominem nostratem omittam, cujus summam modestiam, cum utrinque plurimi mirentur: sunt tamen nonnulli qui frigidiuscule de eo, ne dicam maligne, judicent. Credo, quia antiquitati nimium deferre eum credunt: quod ab ea, quam antiquam esse judicabat Ecclesiam, nondum divortium fecisset. Ne tum quidem cum utrique parti operam daret. Vides quam prolixè, ut mei prope fuerim oblitus. Huc res redit. Summam eruditionem tuam me mirari, institutum vehementer probare, curam antiquitatis, ac Christianae moderationis tibi commendare, successum a Deo immortali petere. A quo solo hoc expectandum est. Lugd. Bat. c1510cx11. 18. May.

EPISTOLA CCXXVII.

DANIEL HEINSIUS

N. N.

Leidam.

CLarissime juvenum. Vidi lepidas festivitates, quas hoc die ad me misisti. Non est nostrae opis efficere, ut nemo insaniat: sane non magis, quam ne quisquam sit aeger: Quanquam iste morbus est profecto: & ut recte judicavit medicus, qui homini respondet, jugere ellebori curandus. Carmen illud ab autore paulo ante accepi. *Eglisheimii παιδαγωγικὰν μανίαν* non videram. Est in paedagogicis ingeniis quotquot vidi, nota quaedam, quam vix toto mari eluas. saepe mecum cogitavi, an ab educatione sit hoc vitium. Verum usu didici, plerumque tales nasci. Ajunt *Buchananum*, virum suo saeculo majorem, cum vix unquam Academiam vidisset, sed in Gallicis collegiis conseruisset, ad Reginam suam, monstrum illud faeminae, attulisse, quod mirari satis ipsa non posset. Nam cum affectaret libertatem quamdam in censura morum, diluebat specie simplicitatis omnem protinus offensam. Ut non tantum aulae natus videretur; sed & huic emendandae. Quominus est ferendum, esse hominem tam confidentem, qui leoni mortuo insultet. Sed & pulices & pedes idem faciunt: animalia quae e putridine nascuntur. Equidem cum isto praeceptore usi estis, plus pro oblectatione, quam pro institutione debuistis homini. Versus enim sunt inepti: *φρενοβλαβεις*: numeri, quos reprehendit, exquisiti & cum cura adhibiti. Homerus, ait ille, alibi dormitat. Psalmus iste rex est caeterorum. Quod si versus leonini sunt, quos iste notat, dabo integras elegias Ovidii, quae talibus pentametris contextae sunt. Non potest *Buchanani* manibus de illo satisfieri, nisi constet saeculo, larvarum plenum esse. Cave tamen credas solum hunc esse, qui sic desipit. Narro tibi, nausea tenet ad plurimorum pensa, quae chartis hoc tempore illinuntur. & praecipue eorum, qui se literas tractare existimant. Inprimis ubi fastus paedagogicus & ignorantia conspirant. Ibi epim filia quae nascitur phrenesis est. Cujus in hoc Scoto specimen habemus. Verum desino nugarum, & ut amare nos pergas vehementer a te peto. Vale, praestantissime juvenis, ac paren-

ti, viro singularis exempli, fratrique tuo, me commenda. Lugd. Bat. Octob. Anno 1619. Addidi munusculum: quod ut aequi ac boni facias, te rogo. Pauca in usum amicorum exemplaria excusa sunt.

E P I S T O L A CCXXVIII.

N. N.

*Danieli Heinsio.**Leidam.*

Reverendissime & Praestantissime Vir Domino. Fuit proculdubio Apostolorum Joannis & Pauli sententia, quam in tua homilia enarraſti, eamque orthodoxam esse soli non credunt, qui caecitate mentis damnati sunt; nam ut divinae gratiae & adoptionis soli electi participes sunt, ita quae sit ejus vis & efficacitas soli cognoscere possunt. Non enim mundus, aut caro, vel nycticorax lucem ferre valent, quibus denegata est ea oculorum acies, qua lux perspicui potest. Meo judicio nedum fides divinum beneficium est, verum & recta de ea ac de illius causis & effectibus existimatio mundanis sapientibus est denegata. Vos faelices, quibus caelitus divina mysteria detecta sunt. Christiana ista Synodus Apostolicam sententiam a carnali discrevit, & hac damnata illam pie amplexa est, & prudenter Amplissimi Ordines adversarios vestros linguam coercere jusserunt, defuncti munere, quod principis proprium est in Ecclesia. Quod vero illi hostibus se adjunxerint, nihil mirum, errores invicem maxime pugnantes, & extremum dissidentes, facilius inter se conveniunt, quam cum media veritate. Ego summa alacritate literas tuas Kal. Jan. his de rebus recepi, & legi, quem divinarum rerum scientem ex homiliae lectione cognovi, & intelligentem humanarum ex aliis, quae circumferuntur, scriptis publicis adverti. Te diu incolumem servari maxime exopto, idque a Deo & Patre precibus exorare nunquam cessabo. Venetiis 4. Kal. Junii. 1620.

Credo esse *Pauli Servitae* epistolam, quae an alibi edita sit nescio; agit vero de Homilia in locum Johannis cap. xvii. 9. quae legitur post *Heinsii* Orationes pag. 431.

E P I S T O L A CCXXIX.

D. A. N. I. E. L. H. E. I. N. S. I. U. S.

N. N.

Leidam.

Vir Clarissime. Quod serius respondeo, pro humanitate tua ut excuses enixorogo. Ex quo enim mortalium carissimam, uxorem meam, cum dolore ineffabili amisi, vitam egi vagam, & in diem quasi, saepe & absens, vixi. Quod de styli puritate & auctoribus, qui eo ducunt, paucis ex me quaeris, paucis respondebo. Duo hinc spectanda. Primo ut Latinus sit, quam nos *puri-*
ta-

tatem dicimus. Secundo ut absolutus, in quo *brevitas* potissimum, & quae cujusque ingenio convenient, spectatur. Quod ad *puritatem*, Ciceronem cum Terentio ac Caesare, omnibus praeferrere non ignoras, nec Romanos ipsos alios his praetulisse. Qua de re praecclare alibi *Muretum* disputasse memini, cujus scripta, hac aetate, sola fere puritatem istam prae se ferunt, Adde nihil obstitisse, quo minus Menandrum caeteris praeferebam Graecis, qui postea essent, qui in hac parte, hoc est in formando sermone, comicis cujusque gentis scriptoribus non sine causa praetulerunt. E Cicerone quidquid est simplicissimum, legendum primo. Ubi jam ulterius deventum, Epistolas ad Atticum, quas *brevitas* commendat, caeteris praeferrere velim, ac cum iis Curtium, Vellejum similesque, qui purissime scripserunt, ex historicis conjungi. Confirmata jam aetate Tacitum, qui omnibus prudentia antistat, cum Sallustio. Aliquamdiu autem iis abstinendum, quos declamatoriae argutiae commendant, & qui quam longissime a puritate ea absunt. Inter quos Valerium, scriptorem alias eximium, fuisse & ego judicavi semper, nec tu, puto, negas. quaeque alia in eo culpent, recte annotasti. Vale.

EPISTOLA CCXXX.

DANIEL HEINSIUS

N. N.

Leidam.

Amicorum intime. Quod ad tuas nihil responderim, causa una est. speravi enim haecenus; Slusam me venturum. Interim cognatus meus, adolescens summae indolis, & eruditionis in aetate ista rarae, ad vos venit, a quo unum alterumve *Scrivarii* munusculum accipies. Ita enim malo vocare, quae nobis excidunt, ille autem studiosior lectoris quam nostri, sed tamen amore nostri, cum omnibus communicat. Quanquam sane Hymni sacri non me poenitet. Epistolas quas promissisti, frustra haecenus expecto. De edendis loquor. Poëmata, cum sensim, sicut solet fieri cum multa simul excuduntur exemplaria, vendantur, bonum factum erit, nisi fallor, si inscriptio mutetur, & mutata illa reliqua addantur. Sed fortasse de his coram. jam enim tempore excludor. quod si non eveniat, multa brevi scribam & multis. In privatis enim meis fide tua & integritate nobis opus est. Valde Itali nos amant: & jam clanculum eis τὴν ἐπτάλοφον ingenti praemio, videndae urbis causa invitamur. Sed ut dixi, de his brevi. Vale, noster amor, & de Belgicis his judica. Lugd. Bat. A°. CIΩCXXVI. XX. Māji.

Ad quem haec epistola scripta sit ignoro; certe Flandro cuidam, vel in iis partibus agenti. ex fine hujus epistolae posset quis suspicionem, in quam multi Heinsium vocabant, confirmare, quasi non modo in Italiam, sed in ipsa sacra Romana inclinasset. vide *Cunaei* Epistolam ad *Apol. Scotum* xxviii. pag. 48. certe tentarunt eum post hanc scriptam epistolam etiam *Barbarini*, vid. *Eryc. Ruteani* Nov. Appar. Epist. Cent. III. 82. quam cum *Naudaei* epistola protulit hanc in rem Cl. *Grenius* Animad. Hist. tom. III. pag. 98. Cardinalis etiam *Balnea* eum labefactare conatus est.

sed gravius visum Heinſio Religionem, quam ſedem aut fortunam mutare, fatetur *Eryc. Puteanus* Centur. 1. Poſth. Epist. 8. *Voffius* quoque Epist. dxv. ita eum ſcripſiſſe ait, ut & Romae placeret. Et ex *Balsaco* nobis narravit *Auſtor Novor. reipub. Literariae* Anno 1686. tom. v. pag. 650. *Heinſium* in libro quodam ſuo ſcripſiſſe Papam, *Eccleſiae caput*; ſed in erratis juſſiſſe emendari, *Eccleſiae Romanae caput*; illud ut Romae placeret; hoc ne Theologis noſtris cauſam aliquam criminationis praeberet: tot ſuſpicionibus preſſum fuit caput illud, cujus manu vindices *ὀρθοδοξίας* in Synodo Dordracena uſi fuerant, & quae tam fervide ibi victtricem cauſam egerat, ut grande inde odium ſibi apud alios contraxerit. ſed hoc etiam *Cafauboni* & aliorum magnorum virorum fatum fuit.

EPISTOLA CCXXXI.

DANIEL HEINSIUS

*Scoto cuidam.**Leidam.*

Nobiliffime Vir. Bene fit optimo huic viro, qui effecit, ut, quod diu optavi, aliqua in Scotiam ſcribendi daretur occaſio. Quomodo enim non optare eam poſſim, qui ex quo hîc una fuimus venuſtos mores tuos, ſummam comitatem, exquisitam eruditionem, excitatum ac vegetum ingenium, non tam inſcriptum, quam inſculptum huic pectori aſſidue circumfero. Quod ut credas, ecce meos de contemptu mortis libros, ecce & aliud, quod nuper aliud agenti excidit. Noſtra in Politica philoſophorum maximi paraphraſis, propemodum ad finem a typographis perducta, ad te itidem abire geſtit. neque voluntati ejus deero, niſi deſit nobis, cui eam, & quaecunque noſtra poſthac proditura ſunt in publicum, committere auſim. Mea enim magis intereſſe arbitror quam tua, ut qui incredibili humanitate tua me obſtrictum ſentio, ſi deſint caetera, ad tanta beneficia, ſi nihil aliud animum erectum ſaltem non ingratum adferam. Quem ſpondere tibi, Nobiliſſime vir, audeo. Vale, Generoſe Domine, & nos ama. Lugd. Bat. A°. 1621. Jan. 29.

EPISTOLA CCXXXII.

DANIEL HEINSIUS

*Joanni Polyandro Academiae Rectori.**Leidam.*

Magnifice & Ampliſſime Domine. Cum primo Hagam ex itinere me contuli, eo veni animo, ut Lugdunum me conferrem. Nam & ſatis adverſus omnes caſus, qui humano generi, ex ſupremi numinis juſtiſſimo judicio ac voluntate, evenire poſſunt, inſtructus ſum, & de contemnenda morte libros, qui in omnium verſantur manibus, conſcripſi. Ita tamen, ut nec amicorum judicia, nec eorum, quibus reverentiam debemus, conſilia, quod praeſactorum eſt, inſuper habenda exiſtimem. Evenit autem, ut cum aliquot proceribus, quorum prudentia res noſtra ſtat ac nititur, occurrerem, uno omnes ore peterent, ne, qui puriſſimum hauſiſſem in itinere aerem, infecto
me

me committerem, sed ad tempus aliquod, secessum urbi nostrae proximum eligerem. Certo scire se, non tam esse mentem iis, quibus curae esset Academia, viris humanissimis praesertim, ut ad ultimum discrimen eruditos cogerent. qui quo pauciores misera hac tempestate superessent, qua ad internecionem prope eruditionis ventum esset, eo magis dandam operam, ne in flammam manifestam ac incendium se darent, si qui superessent. Haec illi, qui & in loco commodo idoneoque offerendo, inter se certarunt. Quorum humanitatem cum vix expugnarem, ac ut meo succo viverem, nec cuiquam gravis essem, Wassenariam concessi. In primis autem curae nobis fuit, ut cum iis agerem, quibus cura Academiae commissa est. Qui amorem, aut ut propria hinc voce utar, pietatem verius, quodque illorum est, humanitatem singularem, prolixissime testati sunt. Consulendo ac monendo, ut me sibi atque Academiae servarem, nec in casum tenere aut periculum tam praesens me darem; ne cum invidia cujusquam id conjunctum esset. Sperare enim, brevi adfuturum urbi laboranti Deum immortalem, nec diuturnum fore, quod tam vehemens atque atrox esset. Me vero quanquam haec movere aut debebant certe, aut poterant, & exemplum viri conjunctissimi suavissimique, ne de eruditione dicam, *Golii*, terreret, qui vix ex itinere ingressus urbem, lue eadem, aut malignitate simili afflatus est, ante omnia, in statum Academiae, ac caeteros, qui nondum malo illi ac calamitati sese subduxissent, inquirendum duxi: ne quod viri boni munus ac officium in me desiderari posset. Intellexi autem, plerosque, cum ad obeundam stationem magno animo se comparassent, destitutos omni auditorum populo, sine comitatu ac choragio, cum ornamentis, domum rediisse. Quae res animum nutantem confirmavit. Non ignarus autem, annos esse plurimos, ex quo, amicorum monitu, in primis autem ejus ordinis, in quo illustrem locum obtines, laborem, ut molestum, ita, si quid judicare possum, plane necessarium, suscepi, in quo eos jam progressus feci, ut post pene exhausta veterum praecipue Theologorum scripta, nihil praeter describendi taedium jam restat, huc me protinus converti. Non ignoras autem, quod non semel ex me audivisse potes, primo omnium, Amplissimum doctissimumque *Catzium*, nunc Curatorem nostrum, nomine Illustrissimorum Bataviae Ordinum, per literas aut internuncios egisse mecum, ut me interpretibus recentioris Foederis adjungerem. Secutum mox & *Pauwium*, qui ex eorundem partim, partim & eorum, quos Foederatos dicimus, mandato, quod in scriptis haberet, idem persuadere nobis conaretur. Quod ut honestissime ac modeste tum declinavi, ita nihil mihi prius est, quam ut brevi labore proprio defungar, ac nonnihil temporis ac ocii curae gravissimae impendam. Quod cum caeteris negatum non sit, mihi, qui Latinam non interpretationem modo recensui, ut nosti, sed & locos difficillimos, pro virium tenuitate ac ingenii, extricavi aut excussi, tristissimo hoc tempore, quo alii, non sponte, sed inviti vacant, non negatum iri arbitror. Quanquam enim destitutus libris, quibus infinitis opus est, non possim quae velim, nullum tamen tempus, cujus ratio non constet nobis, hinc elabi patimur. De quo tibi, qui ego

Deo

δωκτῆν hujus operis te profiteri soles, ut constaret, mea interesse existimavi. Inprimis vero, ut & per te iis, quos religiose, ut debemus, haecenus coluimus, Amplissimis, videlicet, Consulibus, aut si qui ibi, praeter eos, alii, quos cura Academiae aut salus tangit. Ubi caeteros redire ad munus intellexero, dabo operam, ut & ipse ad reditum paulatim me componam: qui jam annos amplius triginta, tum scribendo, tum docendo, nisi fallor, nihil de industria remisi. Magnifice & Amplissime vir, vale, & ut soles, nos ama. Wassenariae, anno c1c1cxxxv. Octob. 25.

Amplissimi viri D. Syndici negotium nostri quam serio a me commendatum sit. cum quo has, si videbitur, communicare poteris, ne non curae fuisse nobis existimet.

E P I S T O L A CCXXXIII.

J O H A N N E S B U X T O R F I U S

*Danieli Heinsio S. P.**Leidam.*

LIterae tuae, mense Augusto anni superioris, datae, ex nundinis vernalibus hujus anni demum mihi sunt redditae. liber autem Tuus Exercitationum in N. T. ante paucos dies, quem proinde nondum mihi licuit perlustrare. Interim gratias tibi ingentes ago pro munere praestantissimo, quo non aliud pretiosius accipere potuissem. Utinam & gratitudinem & observantiam, quam Tibi debeo & habeo, luculente aliquando re ipsa testari possim. Petis a me, ut, quo jam in loco res meae sint, ad te scribam, quo item hîc fruor stipendio. Citius utique respondissem, sed morbus febrilis, quo per totam fere aestatem, a principio mensis Maji, laboravi, & a studiis & a literis scribendis me aversum reddidit. Nunc meliuscule iterum habeo; necdum tamen plane confirmatus. Res meas igitur quod attinet, stipendio fruor quidem extraordinario, sed tamen modico, hac praesertim omnium rerum caritate, quo victualia omnia in triplo sunt, respectu aliorum temporum, pretio. In pecunia parata quotannis 150 Thaleros Imperiales circiter habeo in universum: frumenti aliquanto amplius, quam pro praesentis rei familiaris necessitate nunc requiritur, vini aliquanto minus: haec pecunia aestimata, centum plus minus, his temporibus, Imperialibus aestimari possunt, decrecente autem illorum pretio, tantundem etiam huic summae decedet. Hoc totum est stipendium, quod tamen alendae exiguae meae familiae, cum duobus liberis, & totidem famulis, nequaquam sufficit. Itaque quod ulterius requiritur, de peculjo meo addendum, vel aliunde acquirendum. Per caetera triennium nunc est, ex quo in statu viduo dego, neque adhucdum de mutatione suscipienda cogito, varias ob causas, inter quas tamen non postremae sunt hae; ut tempestate vel turbidiore & adversa (quam nobis haud pauca minitari videntur) hîc ingruente, tanto expeditius evadere & enatare possim; vel sereniore & favorabiliore, seu publica seu privata, affulgente, tanto liberius, quod mihi videbitur, facere liceat.

liceat. Omnia autem mea in Dei providentia & benedictione sola pono, ejusque voluntati totum me submitto. Dabit idem aliquando meliora etiam tempora. Tu interim, Vir & Amice summe, mihi meisque studiis semper faveto. Praeteritis nundinis Abbreviaturae Parentis cum Bibliotheca Rabbinica, trecentis circiter novis libris aucta, sunt recusa: eidem nunc accedit Appendix satis copiosa: unde non dubito, majorem imo maximam librorum Judaicorum partem nobis jam notam esse, quae res non exiguam habet quoque utilitatem. Si Deus mihi vires adaugeat, prodibit forte hac hyeme nova editio Latina Synagogae Judaicae. Utriusque enim, & Latinae & Germanicae editio, a Typographis & aliis apud me urgetur. Quid D. *L'Empereur* agat & edat, his nundinis expecto: intra annum nullas ab eo literas accepi; cum tamen ego semel atque iterum ad eum scripserim. Plura alias, si Deus volet: scriptiorem negligentiorum ut benigne interpreteris, & valetudini, quae me nec intantum, nec assiduum adhuc in studiis esse finit, ut adscribas, observanter rogo. Deus Opt. Max. Te saeculi praecipuum decus & ornamentum quamdiutissime salvum & incolumem conservet, suisque benedictionibus cumulet. Dab. Bas. prid. Kal. Sept. An. 1640.

EPISTOLA CCXXXIV.

JOHANNES BUXTORFIUS

*Danieli Heinsio S. P.**Leidam.*

Non soleo libenter occupationes Tuas, Vir honorande, frequentius interpellare: sed nequeo etiam mihi temperare, quin aliquando, occasione in primis aliqua se offerente, ad conservandam eam, quam tua singularis humanitas & benevolentia mihi indulsit, amicitiam & familiaritatem, verecundiae limites transiliam, meaeque in Te observantiae debitae testimonium apud Te deponam. Saepius jam sum expertus, quantopere Tibi & rerum, & studiorum meorum statum curae Tibi esse patiaris ac digneris. Unde non ingratum futurum Tibi duxi, si ex meipso quoque intelligas, quod forte ex aliis jam audivisti & intellexisti. Viri Clarissimi D. *Spanhemii* ad nos adventus & Promotio occasionem dedit, ut & ego, magnis sic suadentibus Viris, me ipsi adjunxerim, & supremum in Theologia gradum una cum ipso assumpserim. Causas habuerunt amici, qui id suaserunt: causas habui & ego privatas, ob quas huic consilio mihi obtemperandum esse duxi. Tu spero cum caeteris amicis favebitis, nec improbabitis. Mitto Tibi, Vir eximie, Disputationis inauguralis exemplar, quamvis probe sciam, nihil quicquam in ea esse Tua lectione dignum, sed duntaxat veluti *μνημόσυρον*, & meae observantiae testimonium. Ob instantissimam enim D. *Spanhemii* festinationem non licuit mihi aliquid accurate conscribere & meditari: imo vix haec licuit tumultuarie in chartam conjicere. Faxit Deus ut ista quoque res cedat ad Nominis ipsius Di-

Tom. II.

M m m

vini

vini gloriam, Ecclesiae & Scholarum aedificationem, Orthodoxae nostrae Religionis propagationem, meamque propriam salutem. Addo Exercitationem quoque in Historiam Institutionis S. Caenae Dominicae, in qua praecipue ritus primae Caenae enucleare mihi fuit propositum, & tentare, num ex Hebraeorum historia ad hujus quoque rei ulteriorem illustrationem, in rem Christianam, aliquid elici possit. Quid praestitum, Tuum, & Tui similibus erit judicare. Utinam vero non Camarinam moverim in meum malum! *Scaligeri* sententiam examino, sed modeste & candide. Si bene id a me factum, vel haec unica susceptae hujus scriptiunculae causa sufficiet, quod maculas istas ex illustrissimo illo tanti Herois opere eluere conatus sim: si & ego erravi, docilem me & facilem meliora ostendenti praebebo. Occasionem mihi eam scribendi dedit, quod hoc ipso tempore in nostris quoque Ecclesiis, ad caeterarum Ecclesiarum reformatarum exemplum, Caenae celebratio sit confirmata, azymo pane sublato, & communi ac nutritico pane, una cum illius fractione, introducta. Hanc ergo actionem hac Exercitatione Academica prosequi volui, existimans id & rei de qua agebatur, & professioni meae consonum & conforme, nec absque utilitate publica, futurum. Exemplaria autem ejus publice apud Bibliopolam nostrum sufficientia prostant, si qui forte studiosorum sibi comparare desiderent. Tuum, si tantum abs tuis rebus tibi sit otii, ut ad me de ista Exercitatione judicium perscribas, officiose rogo. Simul & illud scire vehementer desidero, quibus in studiis tua nunc sint tempora occupata, quidque nobis a te expectandum. Vale, Vir Magne, & solito tuo amore & favore prosequi me perge, Dabam Bas. 5. Sept. An. 1642.

EPISTOLA CCXXXV.

THOMAS BANGIUS

Danieli Heinsio.

Leidam.

Nobilissime & Excellentissime vir. Ecce tibi denuo amoris dextram, tesceramque debiti tuis virtutibus honoris. Imo ecce tibi nobile ingeniorum par, *Joh. Mulerium* & *Michaelem Johannaeum*, quibus si me interprete, favere digneris, magni beneficii loco ponam, ipsosque tuarum virtutum admiratores fore spondeo. Causam vero spontaneae sponfionis tanto lubentius in me suscipio, quanto rectius heic apud nos uterque se virtuti & labori suapte devovit sponte. Alter *Mulerius* nobili genere, alter Episcopali loco oriundus, non minus loci quam generis decus esse coepit. Quare si has commendatitias aliquid apud te ponderis habuisse cognovero, conabor efficere, ut non modo hujus favorabilis beneficii memoriam conservasse judicer, sed etiam singularem tuum erga nostrates virtutis & eruditionis alumnos affectum & agnovisse & digne aestimasse. Annus jam est, cum cum erga memetipsum a te declaratum gratus intellexi e literis tuis humanissime & eruditissime ad me scriptis.

Deus

Deus tibi ac tuis praeclaris ausis benedicat, quibus, quae omnia vincit, mortem dudum vicisti. Porro iudicio tuo submitto chartas quasdam meas, majorem in modum rogans, velis istas anguli nostri obscuras umbras benignis oculis tueri, mihi quae ut indigno Jesu Christi servo bene velle & precari. Deo ter Opt. ter Max. te ex animo commendo. Hauniae 6. Jun. 1641.

P. S. Lustraturus pronuper thecam librariam, forte incidi in Dialogos duos elegantissimos *Venetis* 1534. a *Melch. Seff.* excusos, quorum hic titulus: *Cicero relegatus & Cicero revocatus*. Ille Ciceronis dictionem & res gestas obelo confudit: hic vero liberat & laudat. Opus praeter propter 24. fol. 8^o. min. dictatum *Pomponio Trivultio* a H. A. Tuae humanitatis erit me heic ἐν τῇ τῆς Βολῆς περίοδῳ haerentem juvare, & siquid certi de illo (H. A.) autore tibi constiterit, paucis id per amanuensem velis significare. nolo enim viro occupatissimo & publice & privatim me molestum esse, nisi hac lege. In primis vero eo nomine hoc Te rogo, ut scribas mihi tuum iudicium, ubi de autore constiterit aliquid exploratius, dignumne novis typis censeas? &c. Vale, seculi decus, & importunitati amici audentioris facti tua humanitate ignosce!

EPISTOLA CCXXXVI.

HENRICUS ADIEST

*Danieli Heinio.**Leidam.*

Nobilissime & Clarissime vir. Visis tuis literis, laetatus sum, quemadmodum solent homines, ἡλπὴ ἀληθῆ. Eas vero, ut exosculatus sum, ita reverenter habeo, donec fructum aliquando benevolentiae, quem promittunt, carpam. Coepi his feriis evolvere exercitationes tuas sacras, Deus bone, quantos labores! & non potui, quin de duobus, hac occasione, te consulere. Primo, quum distinctionem N. T. in versus, non semel perstringas, tanquam novam, & alicubi vim ipsi contextui facientem; quo consilio ejus authorem dissimules, quem *Henricus Stephanus*, praefatione in Concordantias graecas N. T. scribit esse patrem, *Robertum Stephanum*? Deinde, an 1. *Tim.* 3. 15. 16. articulus, de quo scribis, impediatur talem constructionem, τὸ τῆς εὐσεβείας μυσῆρον, ἐστὶ σῦλος καὶ ἐδραῖωμα τῆς ἀληθείας, καὶ ὁμολογεμένως μέγα? Habeo enim auctoritatem Irenaei, qui videtur verba illa, σῦλος καὶ ἐδραῖωμα τῆς ἀληθείας, non ad praecedentia, sed ad sequentia referre: ut & doctissimo viro D. *De Dieu* nuper exposui. Ille enim lib. 3. cap. 1. Evangelium, ab Apostolis praeconiatum, postea in literas relatum, scribit esse Columnam & Fundamentum fidei nostrae. Interim admiror ea, quae a T. C. in explicationem hujus loci adducuntur, sicut & pleraque alia; quibus Ecclesiam tibi aeternum obligasti. Deus T. C. bono publico, meoque privato, diu servet incolumem. Dabam Daventriae, Anno 1641. 19. Septembris.

LUDOVICUS CAMERARIUS

*Danieli Heinsio.**Leidam.*

POSTquam Leida disceffi, & cum meis Groningam feliciter appuli, saepius mihi animus fuit, ut hoc tibi viro mihi amicissimo, & cujus virtutes & eruditionem veneror, significarem litterarum mearum indicio. Non enim dubitavi, gratam tibi fore cognitionem rerum nostrarum. Verum distuli illud officium, donec oportuna se offerret occasio, quae cum nunc mihi contigerit, negligere illam nolui. Vivimus hîc & habitamus satis commode, & quod primum est, grati sumus Magistratui, Ecclesiae & Academiae. Otio fruimur honesto, & in valetudine mediocri ea tranquillitate vitae, ut in hac migratione temporaria de coelesti illa ad aeternam beatitudinem ductura rectius cogitare possimus. Interea nunquam amicorum, quos habemus complures in Hollandia, obliviscar. Sed ubi ubi & quodcumque erit occasio, reipsa ostendam, & virtutes ipsorum me aestimare, ut par est, & grati animi memoriam pro acceptis beneficiis nunquam depositurum esse. Disposui nunc in ordinem Bibliothecam meam, & omnes chartas avi mei τῆ μακαρίτης, ut & meas tot annis collectas, evolvi. Ex iis brevi ad x. volumina Epistolarum a magnis doctisque viris ἐν ἀντιγράφοις scriptarum me congesturum puto. Ad incrementum vero totius operis adhuc a tua benignitate expecto, quas a me in scheda annotatas, ut etiam plures alias, mihi es pollicitus. Spero etiam filium tuum, lectissimum mihi que carissimum juvenem, recuperata integra valetudine ex tuo jussu eam curam operamque in se lubenter suscepturum esse, quantum sine vestro damno fieri poterit. Ex *Rutgersii* Epistolis plures sane desidero. Quodcumque autem hac in re officium mihi praestabitis, grati animi memoria & aliis hostimentis compensare studebo, arrepta omni occasione se forte offerente. Multum jam vobis debeo pro iis, quas ex magni *Jos. Scaligeri* chartis mihi nuper communicastis, Sed ad eas adjecturos adhuc vos esse aliquas etiam ex illis, quae a doctis clarisque viris ad doctissimum clarissimumque Dn. *Heinsium*, praesertim ex Italia, missae fuerunt, certo mihi polliceor. Iubete autem vicissim, quae vobis a me fieri velitis, securi, voluntati & desideriis vestris cunctis viribus me obtemperaturum esse. Deus Te, Nobilissime vir, cum tota tua domo servet & tueatur, in bonum Reipub. & amicorum. Inter quos persuadeas tibi velim, quod sum dignitatis tuae studiosissimus. Groningae. 26. Julii. Anni 1642.

EPISTOLA CCXXXVIII.

ANDREAS COLVIUS

*Danieli Heinsio.**Leidam.*

Nobilissime ac Praestantissime Vir. Summas tibi debeo gratias pro libello nuper ad me misso. quem heroibus nostris Consuli *Beverio*, & D. *Beverovicio*, cultoribus tuis, communicavi. qui elogia quae tibi merito tribuuntur gratissimis auribus oculisque exceperere. quemadmodum & ego, qui ab ineunte aetate magnus fui virtutum tuarum aestimator. Auctor, cujus nomen necdum apparet, videtur vir doctissimus. Ego summopere optarem magna illa ingenia nunquam conflictari. ita enim fit, quod omnis eruditio apud vulgus male audiat. Qui de contemnenda gloria scripsere, etiam nomina sua addidere. Et qui de concordia Christiana scribunt, & ad eam viam sternunt, quantas rixas dant, & ni fallor dabunt. Et qui omnium affectus componere student, proprios sedare nequeunt. Quis unquam credidisset talia de maximo *Hugone*, quem ὁ μακαρίτης *Frisius* noster, cui olim palmam solebatis dare, Deum in terris vocabat paulo adhuc ante obitum. In senibus maxime prudentia & iudicium vigeant oportet. In multis ipsi inimici ejus defectum harum rerum puto agnoscent. D. *Maresius*, quem semper per contemptum Borboritam vocat, satis acerbe, ut puto, more Gallico, respondebit. Ejus scripta necdum vidi, etiamsi ultima nostra Synodus lectionem illorum mihi injunxerit. D. *Spanhemii* adventum una tecum vehementer desidero. quemadmodum & tuum in hac nostra urbe, qui etiam communi nostro amico D. *Beverovicio* erit longe gratissimus. Vale, vir summe: & me amare perge. Dordrecht 16. Julii 1642.

EPISTOLA CCXXXIX.

JOACHIMUS MATT. F. GERDES

*Danieli Heinsio S. P. D.**Leidam.*

Vir Nobilissime. Iterum ad Te exiguo aliquo literario comitatus munere venio, sed minime ad palatum tanti viri. Quam vellem, crepundiis ejusmodi meis vel unum Distichon hostimenti loco elicere possem, quale illud in *Grotium*, quod nunquam sine admiratione tui recolo:

*Deposita coeli, quod jure Batavia mater**Horret, & haud credit, se peperisse sibi:**Talem oculis, talem ore tulit se maximus Hugo,**Instar, crede, hominis, cetera crede Dei.*

Equidem perlibenter, sic beatus effectus, illud, χεῦσα χαλκείων, usurparem.

Mmm 3

Vi-

Videor facilius mihi impofterum talia promiffurus, quum Lugduni in praefentia *Henricus* Jacobi Archiatri Reg. Dan. fil. *Fabricius*, amicus meus praefantiffimus, qui has Tibi tradet, degat, quoque curatore (nam ita cum illo egi) commodum utar. Nunc, virorum Excellentiffime, paucis caufam percipe, quamobrem ad Te fcribere, neceffarium duxerim. Annus eft, ex quo cum Doctiffimo, & elegantiore tam Graeca quam Latina Eruditione ornatiffimo quodam viro Nobili, cui nomen *Joachimi Gerstorphii*, in Scania vivebam. Apud quem cum Philofophia Stoica magno in pretio effet, ego jamdudum eam periens, acrius amore illius accenfus fui. Quare, cum mihi apud eum copia Veneti Codicis Simplicianorum in Epictetum effet; quibus infignis ille Philologus *Hieronymus Wolfius* ufus eft, eum cum Editione Batava, quae tuam in fronte praefationem exhibet, ac biennium in Academia veftra abhinc excufa eft, quam potui diligentiffime conferre, quodque Oppio de B. H. dictu frequens eft de militibus, pedem pedi componere coepi. Quo labore longe moleftiffimo exantlato, equidem me temporis difpendium feciffe, non queftus fui, cum, ut opinor, exacte fatis ea ratione utriufque codicis indolem perdidicerim, nec fruftra nunquam fatis laudatum *Hieronymum* perhibuiffe viderim, quod perquam depravatum codicem in verfione fua fequi coactus fuerit. Hinc mirari defii, quare eruditiffimus ille vir non eadem opera, qua Epicteti Encheiridion, ac Arriani in illud exegefin Graece divulgaverit, lectorem *Φιλέλληνα* exhilaraverit; fed Latinae interpretationi Simplicii, optimi explicatoris Epictetici, acquiefcere voluerit. Vidit enim acutiffimus, linguaeque Graecae peritiffimus Germanus, fi ea ratione literariae rei prodeffe vellet, integrum illum codicem, quantum quantus eft, describendum, ac eam ei medicinam adhibendam effe. Quod fortaffe per alia eo tempore ipfi praeflare non licuit. Pauci tamen loci in iftis Veneti Cod. tenebris lucem praeferunt, quam veftra editio, clariorem. Id quod miranti oftendere, non effet difficillimum. Quod autem ad illam attinet, equidem fi Graecum textum excutimus, cumque Veneto illo desperato volumine componimus, merito gratias vobis, quotquot aliquid ftudii in ea pofuiftis (quos inter Tibi, *Heinfii*, princeps debetur locus) habemus, agimusque; majores acturi, fi per Typographum aliquantisper adhuc tam aurei operis editionem differre vobis licuiffet diutius. Idem enim etiam vobis illic loci accidere autumo, quod aliis alibi quandoque ufaveniffe audivi, quibus Typographorum instantium importunitas, fcripta faepe numero quafi extorfit, nec potftremam manum iis imponere conceffit. Ego autem non parum tam illuftria duo nomina praefcripta libro indignatus fum, in quo tantum quid adhuc deberetur. Nam hoc parum veftrae opitulabitur exiftimationi, quod Typographus interpretationem illius, de qua loquor, editionis, nonnullis a Wolfiana interpretatione abire dictitat; cum illud tale fit, quod integrum fcriptum accuratori Lectori fufpectum magis faciat. Omnino enim, Latinam interpretationem cum textu Graeco comparanti, mula equo juncta vifa fuit. Quomodo enim (ut de multis duo faltem Tibi, tua, Excellentiffime vir, pace, propinam) pagina 89. τῇ ἀρχῇ fignificet *per ignaviam*? pag. 91. ἀγνοίας, *horrorem*?

rem? Recte, pro ἀρχῇ Wolfius ἀργία, pro, ἀγρία, ἀγανία legendum cen-
 sebat. Atque illi emendationi Latina ista quadrabant. Licet illi, qua τῇ ἀργίᾳ
 legitur, rectius, quam huic, qua ἀγανία. Mihi, cui continua illa bellica
 flamma ad excelsa in editis illis Sapientum Templis adspirare minime alias con-
 cedit, eam mihi obtingere de cetero tranquillitatem tantum expeto, ut no-
 bilissimos hosce divinae Philosophiae Doctores Epictetum, Simplicium, Ar-
 rianum, pro captu meo, munde mihi descriptos, ac *Wolfi*, tuo V. C. *Rut-*
gersii, atque, si ut modice saltem caepit, opem ferre uberiores iis perrexerit,
Salmasii, tum meo iudicio castigatos, effingere, ac eo modo effectis commo-
 dam aptamque interpretationem apponere possim. Is talis, erit meus codex:
 meum delictum: meum ἰατρῆον. Inde, si dextre spero, quae Belgicam nup-
 ram Editionem, citra tuam, vir Doctissime, culpam, lectionum monstra con-
 taminant; qualia pag. 144. m. διαβὰς: pag. 157. Πηχέτην: pag. 214. αἰτία
 τὰ: pag. 247. m. ὡς φέρονται: 280. pag. φέρονται, ibid. εἰρημένων, & quae, nisi
 opera tua in legenda hac epistola abuti mihi esset religio, multo plura annu-
 merare possem (nam operarum errata, quae etiam assatim observavi, quale
 Pag. 83. f. διασκαίματα, hunc in censum nullus traho) ea, inquam, omnia,
 iisque similia, e codice mea manu utilitati meae exarato, exulabunt. Quae
 illic animi recreatio; quae seria voluptas erit? Praesertim si industriae meae
 aliquis prosperior respondeat eventus. Ignosce mihi, *Arriane*, Philosophe ma-
 xime sobrie, quod voluptatem cum utilitate junctam in aureae hujus doctrinae
 lectione, cum meo mihi *Heinsio* pollicear. Videris enim eam his in seriis
 nullus tolerare. At seria mihi illa, quam dixi, erit voluptas: sicca erit: quae-
 que se alte tollat super omnem faecem. Nec *Lipsius* enim (at quis viro illo
 magis vestrae addictus Stoa?) ullo modo illud delectationis nectar removet ab
 hac palaestra. Vale, vir summe *Heinsi*, ac ea quae tecum communicavi, can-
 dide interpretare, etiam, cum per varia officii tui negotia licet, ad ista re-
 spondere haut aspernare. Filio tuo politissimo meis, quaeso, verbis salutem di-
 cito. Scrib. Hafn. xvi. Kal. Jan. anno Salutis per D. N. partae ciciocxliiii.

EPISTOLA CCXL.

MARTINUS SCHOOCKIUS

Danieli Heinsio S. D.

Leidam.

Amplector consilium de chartis nostris *Janssonio* committendis, cum quo
 ubi huc venerit (expectatur autem intra tres hebdomadas) coram agam.
 Diutius si emanerit, fratrem meum Amstelodamum ablegabo. Intererca alte-
 rum hominis nostri Commentarium percurri, & praeter alia multa prolixius
 expendi opinionum portenta de dono linguarum Apostolis ad horas tantum
 paucas concessio (cujus commenti architectus videtur esse *Erasmus* in Apologia
 ad Monachos Hispanos p. 148.) de Epistola ad Hebraeos & Evangelio Johan-
 nis

nis Ebraice scripto, de Petro Graecae linguae ignaro, ejusque interprete Marco, & LXX. senum versione deperdita, de versione eadem nunquam ab Apostolis (sic contendit noster) ad partes vocata, de Judaeorum dispersionibus, quas reclamante variis in locis ipsi Sp. Sancto, contra *Grotium* unam tantum fuisse vult, oblitus eorum, quae in Praef. ex Epiphanio citaverat, aliisque ejusdem per omnia farinae. Prolixiorem Praef. ad ipsum virum Nobilem (sic enim haberi vult) Dissertationibus, quae jam in molem aliquam excreverunt, praemissi, qua perquam modeste summam non tantum controversiae propono, sed ipsum quoque procedendi Methodum, provocando ad eum ipsum & scripta, quibus olim visus est probare ea, quae cum psalteriis & canticis praeter rationem hodie traducit. Omnium, qui linguae nostrae favent, indiculum, prolegomenis subjiciendum, contexui, in quo praeter ipsum *Salmasium*, *Hugo* quoque *Grotius* ex nuperis Annotationibus in N. T. laudatur. Triplex N. T. ἐκδῶς nescio an tibi annotata sit ex Eulogio Alexandrino apud Photium. Multa concessi, quae si uni tibi probata fuerint, regem me putabo. Turbae & eruditorum vulgi securus sum. Quod reliquum, supplex Deum veneror, ut misereatur reip. literariae, te illustrissimum ejus principem non ante ad se vocando, quam succreverit alter Atlas, qui nisi ex aedibus vestris prodeat, ipsis Musarum manibus formari non poterit. Vale & salve, seculi miraculum, ac si mereatur amare perge eum, qui semper devotus nominis cultor. Raptim Groningae XI I. Kal. Jan. CIOIO CXLIII.

EPISTOLA CCXLI.

MARTINUS SCHOOCKIUS

Danieli Heinsio.

Leidam.

Maximum Musarum decus, virorum doctissime & celeberrime. Pono tandem frontem, schediumque hoc, cui qualemcumque de Anima Mundi Commentariolum jungere meditabar, coram literati senatus principe comparere jubeo. Loqui compellit impudens quis vespillo, qui nisi odio excaecatus esset, cognoscere potuisset imperatorium spiritum in gregario milite non elidi. Minus polita & tumultuaria exercitatio, visa a viris admodum Reverendis Dn. *Revio* & Dn. *Cloppenburgio*, cum tandem venisset in manus D. *Voeatii* (qui nugas meas aliquid esse putare solet) me inscio typis exscripta est: adeo vere ejus evulgatio displicuit, ut nulli mortalium, praeterquam amicissimo *Vedelio*, jam ἐν τοῖς μακαρίτοις exemplar miserim. Et tamen homo noster in abortivum hunc partum, quem ipse author ad torrentem delatum mallet, haut secus ac Ajax in verveces ac hircos suos, debacchatur. Si pateris, mi domine, viri furibundam imprudentiam orbem docebo. Non semel pronunciat linguam Hellenisticam, quia nusquam est, mori non posse, & tamen funus ei ducere audet. Me certe haec κωφὰ βέλη mirum quam confirmant,

&

& pene cogunt ea, quae amplius de nobilissimae linguae natalibus, incunabulis ac excessu commentatus sum, iis legenda offerre, qui rationes magis pensitare, quam loquentis auctoritatem respicere solent. Nomen an praescribere debeam, tute arbitraberis. Enimvero latere malo, & Deo meo (quem toties innocentiae vindicem expertus sum) notus esse, quam pilas & librarias nominis celebritate replere. Quidam ex iis quoque, quos professio & aetas aliud docere deberent, existimant abunde conatus nostros contundi, si iis opponantur rancidae calumniae, quibus veritatis divinae hostes religionisque mango- nes ante annos aliquot me onerare laborarunt. Deus talibus ignoscat, pergatque sermo suo, frementibus omnibus maledicentibus, benedicere: si ille, qui omnes eruditos submovere laborat, quo solus in vacua arena dominetur, secundum easdem furoris lineas me adoriatur, methodum in scribendo ipsi peculiarem orbi literato ostendam, ut exemplo *Renati des Cartes* (quem audio convitiis plaustra in me ac Doctorem *Voetium* exonerasse) ingenio suo tantum servire ac gnaviter furere possit. Si ita videatur, Nobilissime Domine, causam linguae Hellenisticae communem faciam, laudando authores, maxime Theologos, qui nobis sunt ὁμόφρονες. Quod ad ἑλληνιστὴς, favent per omnia sententiae nostrae Reverendi authores annotationum ad novam versionem N. T. item *Piscator*, & tot alii ex Pontificiis, inter quos *Salianus* sic pro nobis sunt, ut amplius quid ab eo flagitari non possit. Contra coaxantem *Gretzerum* pro Illustrissimo *Scaligero*, confutante vulgatam ex Aristaea de LXXII. senibus fabulam, diu apologiam paratam habui; si pateris, eam reliquis quisquiliis adjungam, ut & octo exercitationes circa varia Scripturae loca, ab homine nostro minus faeliciter examinata, quo videat, cur ea, quae prodiit, prima inscripta fuerit. Rogo vero doceas me, qua fide libitinarius pag. 59. referat conciones Gallicas desuisse Illustri vestra praesentia condecorari, ex quo ipse in Hollandiam venit: Ad hoc, an ullibi, ex tripode profatus sis Apellam, in vulgato illo Horatii versu, *Credat Judaeus apella*, notare λιπόδεσμον. Flaccus Vester ad manum non est. Homo noster existimat se novi quid docere, ostendendo Apellam proprium nomen esse, cum hoc notatum sit a *Torrentio*. Si non abnuas, hac occasione prolixum catalogum conjecturarum, & audacium bustirapi dictatorum concinnare potero, ex quo quisque videre poterit, saepe cum Talariae legis securum esse. Amplius si quid usui esse putes, rogo communices. Si deo visum fuerit, propediem inter infinitas & plus quam paedagogicas occupationes, telam hanc pertexam: nisi forte magister arrogantiae *Renatus* virtutes suas, clarius adhuc propositas, intueri debeat. Vale σεβασμιώτατον ἐμοὶ κἀγα, diuque orbem exorna. Conscientia tenuitatis nisi vetaret, rogarem ut me amares, & esse patereris in ultimo amicorum agmine: quam stationem quanquam non mereor, ero tamen semper Illustri vestro nomini devotissimus. Groningae IX. Kal. Jun. CIOIOCXLI II.

EPISTOLA CCXLII.

MARTINUS SCHÖCKIUS

*Danieli Heinsio.**Leidam.*

UT quod res est fatear, gratiores literae vestrae fuerunt, quam apud multos caeci illius Dei cum multis talentis adventus. quemadmodum enim Amplitudinem Vestram semper suspexi, tacitaque veneratione colui, ex animo vovendo, ut potius annis meis quid decederet, quam Musis; (quas nisi solus recreares, curriculo ad tibicines properandum esset) ita hominum sortem me excessisse credo, quod nullo meo merito cohorti eorum ascribere digneris, qui ut virtutes tuas magis aestimare sciunt, merentur quoque primae apud vos admissionis amici esse. utinam vero, provincia, quam a me susceptam esse probas, sic defungi queam, ut saltem qualiscunque conatus tibi non displiceat! quam curta mihi supellex sit, per Dei gratiam, non ignoro, & prae omnibus aliis serio deploro: cum multis haecenus difficultatibus luctatus fui, nec per ea adminicula, quae abunde aliis in mundo sunt, proficere potui: non defuit tamen qualiscunque coelo successus, Deo, cui ex assensu me consecravi, homini juveni & imperito favorem & non contemnendam conditionem ibi procurante, ubi neque cum candida toga unquam conspectus fuit, neque notos habuit eos, quos alii prensare, & superfluis officiis onerare solent. Funeris, quod homo ad miraculum arrogans ducere meditatus fuit, apparatus ac ornamenta diligentius lustrare institui, quoque rogo (ad quem subsecundariis horis aliquando multos jam fascis contuli) nihil desit, de cupressis (immo sex exercitationes circa Theologica dogmata adversaria plane communi omnium Orthodoxorum opinioni) ordine convenienti disponendis cogitavi. Omnia Archilochi nostri scripta legi, ex quibus omnes, quotquot extra partes sunt, docebo, nullum unquam in literatorum Orchestra sedisse, quem non furibundi instar cum veru suo aggressus fuerit. Suspexi haecenus hominem, ut doctum, credidique Gratiis etiam litasse, at me deceptum video. Recolui obiter ea, quae ante in variis ejus scriptis & elephantinis libris notaram: quò diligentius vere ea expendo, video propositum ei fuisse, ex quo primum animum ad scribendum appulit, nulli parcere, ac per omnium (qui eruditi haberi solent) aut contemptum, aut latrocinium ad dictaturam quam grassari. modestissime agam fideque optima; & quo more suo dein convitia pro rationibus adferre non possit, breviter per indicem ea omnia exhibebo, quibus non tantum te, omnibus invidiae conatibus superiorem, sed multos etiam alios, quorum nomina aequa posteritas peplo consecrabit, petere solet. ad me quod attinet, ignorari mallet, quam in libri fronte legi. sed cum necessitas flagitare videatur, lubens offeram me dentibus, quibus Theones ab annis aliquot lacerare laborant, quod stylum in virum quem celebrem pro re nata strinxi. si supremo conatuum nostrorum arbitro visum fuerit, cuicuiusmodi opusculum propediem af-

affectum erit, & si ita Amplitudini Vestrae videatur, typographi alicujus operam efflagitare audebit. Quas vero, mi domine, tibi gratias debeo, quod sollicitus sis de me promovendo, & ex carcere hoc educendo. mihi hîc non male esset, si liceret per eos, qui, ut olim σεβασμιάων senem, nunc ἐν τοῖς ἀγίοις D. Gomarum quiete beare non potuerunt, ita circumscribere artibusque homine Christiano non dignis circumvenire eos laborant, quibus servile non est ingenium. In Franekerana Academia quos fautores me habere scio. in partes si amicos plures sollicitare voluisssem, forte Curatorum puncta tulisssem. sed haut soleo in subsidium advocare seculi hujus delitias. eventum ei commisi, qui (quicquid malevoli qui crepent) novit servi sui innocentiam & candorem; quem ex animo rogo ut Academiam vestram clementer respiciat, teque ejus Palladium cura singulari conservet, & nepotibus quoque nostris, tanquam rarum suae omnipotentiae depositum, ostendat. Vale, vir saeculo hoc major, & si merear, me qui animum hunc tibi mancipo, ama favoreque prosequere. Si non grave, disertissimo Domino *Boxhornio* ac Reverendissimo Domino *Revio* salutem. Iterum Vale & salve. Raptim Groningae pro pridie Kal. Quintil. CIOIOCXLIH.

E P I S T O L A CCXLIII.

M A R T I N U S S C H O O C K I U S

Danieli Heinsio S.

Leidam.

ERuditorum princeps, fautorum maxime. Fidem Hagae nuper datam, magno meo emolumento servasssem, nisi eadem vespera declamata (sic opinabatur avia) filioli valetudo me Ultrajectum revocasset, invidissetque voluptatem, qua, praeter melleum tuum os, dives opum bibliotheca me perfudisset. Incommodum hoc aliud secum traxit, sinistrum scilicet de me rumorem, per nescio quem flagrionem per hanc urbem divulgatum. qui male conatibus meis volunt, indigenasque in his oris suppressere student, per *Cartesium*, graviter quasi a me laesum, custodiae in vestra urbe mandatum ominabantur, audebantque absentem, ut publicae quietis perturbatorem, traducere apud eos, per quos Acedemiae sceptrum hoc anno mihi mandatum esse ringebantur. Quid non facturi sunt hi maleferiati, ubi viderint me audere Deo literatorum (sic de *Salmasio* existimant) personam detrahere, libereque pro veritate ac innocentia verba facere. Ego contemnere hos didici, eorumque ronchis & calumniis bonae conscientiae Palladium opponere. Scriptum meum jam misisssem, nisi hîc significatum esset hominem nostrum alterum quem tractatum de Hellenistica lingua, inscriptum τῷ πάλῳ de *Laet*, apud vos evulgasse, rogo quam ocissime ejus mihi copiam facias, quo cum chartis illis conferre queam, quae, quoniam animum addidisti, censurae tuae subjici gestiunt, ut orbis universi, si a te probatae fuerint, applausum mereantur. Vale, seculi Phoenix, bonoque

publico perenna. Si non molestum D. *Revio* Viro Clarissimo salutem. Iterum vale ac salve. Raptim Groningae postr. Eid. Octob. CIOIOCXLIH.

EPISTOLA CCXLIV.

MARTINUS SCHOOCKIUS

*Danieli Heinsio S. D.**Leidam.*

Literarii Senatus princeps, virorum observandissime. Hominis nostri Commentarium accepi, in quo multa *πάρεργα*, quaedam *ἐπερόδοξα*, pleraque ejus commatis notavi, ut cum funere propediem ad rogam jam structum efferri queant: cujus apparatus hac occasione vidisses, nisi nova quaedam errata, proscripta jam olim ab iis, qui inter antiquos Patres prae aliis judicio valuerunt, varent. Toto tractatu hoc ago, ut doceam aequum Lectorem, infestissimum Hellenisticae linguae adversarium improvido contradicendi studio abripi ad errores, nequaquam ferendos in eo, qui Orthodoxus Christianus haberi cupit. Rogo indicium typographi, fidique editionis curatoris facias. Nosti quid solitarii inter Professores hujus Academiae Belga ferre ab alienigenis debeam, qui tum sibi magni videntur, quando innocentes calumniis ac convitiis circumvenerunt. Nuper cum in Hollandia opinione diutius per morbum & alia negotia detinerer, sine fronte homines ipsis Curatoribus persuadere voluerunt, per *Cartesium* Amstelodami me incarcerationem esse, ad cujus nomen trepidare debeam, quia decem aureorum millia quotannis ex redditibus colligit: nunc quia reversum me vident, quos ex primoribus blandiloquentia ductare solent, vinculis in tempore meam in scribendo pruriginem coërceant, monent; grande enim periculum Academiae imminere, si in eam *Salmasius* concitetur, qui ut habeatur quis ex Indigetum choro, literas Vossianas, nescio ad quem datas, publice ostentant. Sed haut terrent me tales Lamiae turres: Proceres nostri tam exploratum habent meam candidam innocentiam, quam eorum maledicam invidiam. Postquam liber sub praelo fuerit, modo Consuli, qui unus hîc omnia est, scripseris, securus ero. Ut vero propediem eum habeas, sedulo inter curarum agmina enitor. Quod superest Deum rogo Excellentiam Vestram fospitet, bonasque literas sero Hercule suo spoliet. Vale, seculi ornamentum & salve. Si non grave salutem plurimam Reverendissimo *Revio* amicorum candidissimo, & disertissimo *Boxhornio*. Raptim Groningae XII. d. Novemb. 1643.

EPISTOLA CCXLV.

GYSBERTUS VOETIUS

*Danieli Heinsio.**Leidam.*

Nobilissime & celeberrime vir. Voluisssem sane occasionem mihi oblatam summum meum erga te studium & observantiam declarandi. Sed quia
gym-

gymnafii nostri Conrektor D. *Bockstadius* ex hemiplegia sua convalescit, & spes sit eum pristinae sanitati restituendum; factum est, ut Senatus noster non cogitet de successore. Alioquin juveni illi libens pro modulo gratificari voluifsem; cujus pater & avus mihi non ignoti fuere. Non parum mirantur nostrates, quod in Academia vestra ante menses aliquot corollariis & thesibus fanatica & fantastica illa philosophia defensa sit: metuunt, ne praeludia sint majorum turbarum. Senatus noster de consilio Academiae hîc in herba eam oppressit. Non dubito quin & vos invigilaturi sitis, ne quid Respublica literaria detrimenti capiat. Quod nisi fiat, non video quomodo tempestas aliqua Reipublicae & Ecclesiae non immincat. Deum precor nostri misereatur, & furores fanaticorum compescat, teque & animo & corpore sospitet. Ultrajecti VII. Kal. Junii CIOIOCXIV.

EPISTOLA CCXLVI.

REINHOLDIUS FRANKENBERG

Danieli Heinsio S.

Leidam.

Domine Patrone & Fautor aeternum honorande. Gratum mihi est & fuit, quod literas meas ut & ipsum, uti spero, Tractatulum meum Chronologicum acceperis, & insuper Dn. *Meisnerum* commendatissimum habueris, gratius autem & gratissimum, quod affectum, quem erga *μακαρίτην* Magnum *Scaligerum* ab ineunte aetate gessisti, prolixè declaraveris, eoque ipso tenue meum *Scaligerum* contra *Petavium*, *Calvisium*, *Samuelem Petitem* &c. defendendi studium non parum laudaveris. Nulla opus fuisset excusatione, quod literae tuae responsoriae serius sint subsecutae. Sat cito, si sat bene. Facit autem tuus immensus *Scaligeri* amor, ut non dubitem in his, quae ad causam Scaligerianam pertinent, majus negotium facessere. Scripsit & edidit nuper Clarissimus Dn. *Cloppenburgius* in causa Scaligeriana & Casauboniana, ad Pascha potissimum *συγγραμμεν* Alexandraeum spectante, contra Dn. *Capellum* libellum quidem exiguum, & tamen multiplici eruditione plenum, ut vocant, in 16°. Ingenue fateor me hunc libellum elegantissimum, cum fundamenta conscriberem & ederem, neque vidisse neque legisse. Unde magno meo infortunio factum est, ut neque Maximi hujus Viri Dn. *Cloppenburgii*, neque Dn. M. *Petri Crugeri* Mathematici quondam Dantiscani, ipsius *Cloppenburgii*, in Paschatis Alexandraei *συγγραμμεν* Scaligeriani causa *ὁμοψήφως*, in Scholio meo 16. & praecipue in Paschate quinto ullam mentionem fecerim. Idem mihi accidit cum Paulo *Guldino* Jesuita doctissimo & iniquiore, quam *Petavius* existit, *Scaligeri* Adversario. Libenter ergo scirem & resciscerem, num Dn. *Cloppenburgius* fundamenta mea jam legisset, in quibus nimirum Calendarii Calippici & Alexandraei artificium in *Scaligeri* operibus aliquo modo obscurum, a *Calvisio* autem debita fide minime propositum, & planissime proposui, & rationibus Astrono-

micis munivi. Si scirem Dn. *Cloppenburgium* suam in libello isto propositam adhuc retinere sententiam, facere non possem, quin in Chronologia suo tempore edenda ejusdem Dn. *Cloppenburgii* argumenta, contra *Scaligerum* & *Casaubonum* prolata, & a Dn. *Capello* meo judicio non omnino sufficienter refutata, de novo & examinarem & refutarem. Ita etiam tu, Vir Illustrissime & Maxime, haud gravatim me erudies, namque potes, cur Illustrissimus *Scaliger* Cantorem Lipsiensem, prout ipsum *Paulus Guldinus*, per contemtum & injuriam vocat, *Sethum Calvisium*, qui in tam multis & magnis rebus *Scaligero* obloquitur, contradicit & adversatur, tantis in variis locis non tam ornaverit, quam oneraverit, quae encomia non tantum in *Guldino* de *Calvisio* & *Origano*, hac occasione Sceptice & ironice loquuta, mala audiunt: verum etiam *Scaligerianorum* & *Calvisianorum* Scriptorum Chronologicorum lectorem, *Scaligerone* magis an *Calvisio* credere debebat, dubium reddunt, imo confundunt. Ego divinissimum *Scaligerum* mallet & optarem in *Calvisio* laudando fuisse cautiorem & circumspectiorem; sed homines sumus, errare possumus. Ego Illustrissimae Tuae Excellentiae sancte promitto, me τῆ μακαρίτης *Scaligeri* vestri & tui, hoc est ipsius veritatis Chronologicae causam, cujus patrocinii suscipiendi in Tractatulo illo tum primo & ut tyro initium feci, toto vitae meae tempore & praesertim in ipsius Chronologiae meae, quam etiam primo quoque tempore publicarem, modo Bibliopolam sumtus facturum haberem, exiguo opere ita, Deo dante, esse acturum, ut neque veritati vis injusta, neque *Scaligero*, *Petavio*, *Calvisio*, *Petito*, D. *Behmio*, Dn. *Cloppenburgio*, Dn. *Petro Crugero*, *Paulo Guldino*, ipsique adeo Calendario Gregoriano injuria facta videatur. Tu interea, Virorum Illustrissime, & defensorum *Scaligerianorum* Maxime, longissime vive, bene vale, meis conatibus favere, omniaque officia & servitia a me expectare perge. Dabam Witebergae. 28. Maji Anno 1645.

Hujus *Franckenbergeri* vita est apud H. Witte in memoriis Philosophorum Decad. VIII. 5. p. 439.

EPISTOLA CCXLVII.

JOANNES BAPTISTA DONIUS

Danieli Heinsio S. D.*Leidam.*

Clarissime vir. Quanto sim gaudio affectus ex adventu in Italiam atque in hanc urbem eruditissimi juvenis *Nicolai* filii tui, vix equidem dicere possum. Nam praeter proprias insitasque dotes probitatis atque excellentis doctrinae, quae cordatis omnibus ac virtutis amantibus mirifice eum conciliant, vivum in eo simulacrum Clarissimi genitoris apparet: ut qui te vel e scriptis elegantissimis noverunt; ideoque & plurimi faciunt, & non vulgariter amant (quorum numero me licet adscribas) non possint ex ejus notitia atque amicitia non summam percipere voluptatem. Et quamdiu quidem Florentiae is man-

sit,

fit, non destiti quacumque in re potui, studiose eum colere atque afflētari. Nec tamen quidquam praeſtiti, quod aut propenſiſſimae in eum voluntati meae ſatis reſponderet; aut merita illius ullo modo aequaret. Nunc illum Urbs gentium victrix complexu ſuo fovet ac detinet; ſingula quaeque monumenta & bibliothecas in primis curioſe luſtrantem, quibus ſic afficitur, tantoque ardore ac perfeverantia dies totos & magnam noctium partem in volutandis libris impendit; ut niſi eum, Vir Clariffime, autoritate tua, quae ſumma eſt, patris videlicet, talisque patris, a tam pertinaci labore deterreas, vehementer metuam, ut eſt corpore infirmo & gracili, ne citius, quam Reipublicae litterariae expedit, deficiat atque ſuccumbat. De hoc ut te admonerem (quamquam id prius a me factum oportuit) & officii mei ratio, & commune humanitatis juſ ſuaſerunt; ſive impulerunt potius. Tu quidquid hoc eſt, in bonam partem accipies: & me inter nominis tui, veſtraeque familiae ſtudioſiſſimos connumerabis. Interea Deum Opt. Max. precor, ut & ineuntem annum, ac deinceps alios plures tibi quam lactiſſimos ac feliciſſimos fluere velit. Florentiae 3. Nonas Januarias CIOCCXLVII.

EPISTOLA CCXLVIII.

DANIEL HEINSIUS

N. N.

Leidam.

Nobiliffime & Ampliffime Vir. Anni ſunt jam plurimi, cum de vocando in hanc Academiam *Claudio Salmaſio* agi coeptum eſt. Inter eos autem, quibus praecipue tum commendatus erat, Nobiliſſimus Ampliſſimusque vir *Franciſcus Arſenius* Someldyckii Dominus, Academiae hujus Curator, fuit. Cujus comitati ſummae ac benignitati tota Academia debere ſe fatetur, inter primos autem ego. Qui cum prolixe hac de re tum ad me ſcriberet, ac judicium, quo tamen opus hīc non erat, ex me ſcire meum vellet, non hominem modo, ſed & institutum de vocatione approbavi, meque eo eſſe animo ſignificavi, ut quo plures eruditi hanc Bataviam ornarent, eo melius & illi & eruditis caeteris proſpectum judicarem; niſi eſſent, quorum animos invidia, familiare quorundam, qui in literis verſantur, malum jam afflaſſet. A quo, ſi quem alium, inprimis alienum ſemper me fuiſſe. Optare interim, ut quantum poſſet fieri, peregrinus hic cum eſſet, humanitate ac civili converſatione quam plurimos conciliaret ſibi. Ubique enim & aetate omni quosdam reperiri, qui nec advenis nec eruditis nimium faverent. Meminiſſe me quid maximo *Scaligero* jam olim eveniſſet. qui vir tantus, ſumptu licet maximo in Academiam vocatus, & aegerrime ab Hōſpite Illuſtriſſimo, cum quo tot annos vixerat, ac Rege impetratus, quanquam gravis ac moleſtus eſſet nemini, haud pauca tamen, etiam in Academia, ingenti concoxiffē animo, quae vix ferenda videbantur. Quas litteras judiciumque meum gratiſſimum fuiſſe ſibi, ſaepius vir idem Nobiliſſimus cum voluptate & gaudio teſtatus eſt: neque quic-

quicquam magis placuisse sibi, quam quod a livore ac aemulatione omni alienum me videret. Odium enim aliorum non raro comitari eruditionis amorem: cum nihil tamen minus animo honesto dignum sit, quam in alio non ferre, cuius ipse studiosus sis. Post haec omnia diu expectatus ipse in urbem hanc advenit; quem & protinus accessi, & officia quaecunque excogitari a me poterant, sincero animo ac candido, qualis Belgarum esse solet aut debet, qui sine fuco aut ostentatione ulla non aliud, quam sentiunt, atque ab amico simili expectant, vultu prae se ferunt, libentissime obtuli. Ludere enim in re seria ac tali mimicum ac scenicum, viroque bono, si quid aliud, indignum arbitrantur. Paullo post quam huc advenit, & in Academiam admissus est, de loco, quem in ea obtineret, actum est; cum eundem, quem obtinisset *Scaliger*, deberi sibi, atque hac lege vocatum se affirmaret, caeteri plerique se opposerent. Atque eo jam devenum est, ut ad Illustrissimos Hollandiae Ordines nonnulli provocandum judicarent. Ego autem quantum potui id dissuasi. cum ab iis, qui pars essent Ordinum, imo ipsos, & ab ipsis constituti, hinc repraesentarent, abeundum non existimarem, neque id gratum iis fore crederem. Modeste potius ac placide cum his agendum, quod aegerri-me tulisse quosdam, tum expertus sum. quod ut ipsi judicabant, animo non satis pro praesentibus erecto, mihi pariter & Academiae deessem. Aliquanto post evenit, ut typographus tum quidam, quis & qualis hinc non dicam, cum res ipsa satis id evincat, Epicteti Enchiridion hinc ederet, cui & Simplicii ad-jungebat commentarium, quem cum manuscriptis collatum codicibus domi meae cum haberem, copiam ut ejus sibi facerem, enixe petiit. Curaturum enim, ut qui operis praeesset typographicis, atque eas emendaret, Graecae linguae cum peritus esset, meliorem ex collatione ejus publico contextum daret. Quem codicem, qui nihil publico negare aut amicis soleo, praesente quodam e collegis ei tradidi. Et, ut amplius de eo mererer, praefatiuncu-lam editioni ad amicum praefixi, in qua ne tantillum quidem mihi vindicavi. Ille gratum se pro beneficio, tam candide collato, ut profiteretur, codicem hunc meum, (quem ne nunc quidem ab eo impetrare possum) hosti meo tradi-dit. qui me indignissimis asperrimisque dictis tanquam plagiarium traduxit. Me inquam, qui jam publice testatus fueram, interpretem me cum editione Vene-ta collatum, locisque haud paucis auctiorem, cum Typographo communicasse. quemadmodum & Nansianum nomen meo jussu a Typographo expressum est. qui *Nasti ergo, inquit, codicem cum Nansiano MS. collatum, &c. Viro erudito, qui emendationi praest operarum, percurrendum dedimus*, quo nihil dici potest planius. Ille interim, haud recte quaedam, quae in Nansiano codice extabant, manu mea emendata ait. Ac ne veritati locus detur, aut ad ea respondere nobis in hac ipsa libertatis sede liceat, noster nobis denegatur codex. quibus singulis nihil posse atrocius excogitari omnes boni mecum judicant. Nisi sit atrocius, quod sequitur. Cum asperrime in viros eruditos plurimos is ipse, de quo agi-mus, invecus esset, quidam, cuius nomen quoque mihi hactenus ignotum est, excerpta quaedam ex ejusdem scriptis edidit: in quibus & opiniones ali-

quot,

quot, in quibus ab Ecclesiis, quas reformatas dicunt, recessisse videbatur, refutavit auctor & rejecit. Qui libellus ne distraheretur publice effecit. me quoque, ut autorem ejus, cum ne jurato quidem mihi, aut amicis meis fidem hinc haberet, aliquoties traduxit. Quidam hinc consultus juris, inter urbis hujus Senatores, cum de Mutuo ac Alieno, applaudentibus quotquot Hagae saperent, ac tales haberentur, Jurisconsultis, imo admirantibus (judicia quippe nec unius ipse audiui) tractatum conscripisset, opinionem autem ejus ac sententiam damnarent, ipsum quidem Senatorem verum dixit Asinum; Jurisconsultos vero Hagienſes, ut & Advocatos publice cum ratione insanire scripsit, quae nunc publice leguntur: cum nihil iis interim respondeat, qui principia eum Juris, cujus scientiam venditare coeperat, ignorare, & argumentum, quo ad hoc quod vult probandum utitur, virgis dignum ferulisque in aliis jam Academiis scripserunt, imo Thesibus, quae publice ibi disputatae sunt, haec addiderunt. Omnes, quotquot haecenus fuerunt, eruditi, cum non parum interesse inter eam linguam, qua Novi Foederis conscriptus codex legitur, eamque, qua scriptores Gracchi veteres jam olim usi sunt, recte judicarent (ut pote, in quo non minus ubique exprimitur Hebraismus, ac familiaris Orienti ratio loquendi, quam a septuaginta, ut vulgo eos vocant, interpretibus, qui Hebraeorum atque Chaldaeorum nobis librorum versionem dederunt) peculiari eam distinxerunt nomine, cum de re si constet, parum referat, quo nomine dicatur. Hellenisticam igitur etiam Rabbiniſ praecuntibus dixerunt. Neque aliter aut *Scaliger*, aut *Casaubonus*, aut *Seldenus*, aut alii innumeri: neque aliter *Salmaſius*, qui nomine hoc eodem passim, in Exercitationibus praefertim Plinianis; usus est. Quos cum & ego non immerito secutus essem, non secus ac si crimen majestatis commissum a me esset, id objecit mihi. Quod ita mirum eruditis visum est, ut nuperrime ex iis quidam, cum quo nihil commercii intercessisse unquam mihi norunt omnes, qui me norunt, scriptum opposuerit publicum: quod ipsum non expresso cum prodiret nomine, ne quid suspicari ullo modo de me posset, aut indignum quicquam se committeret, cum cura ac sollicitate, & in tempore de hoc amici eum monuerunt: Quos acerbe, ut intellexi, atque asperrime excepit. Libro interim famoso non in scripti auctorem licet jam monitus, sed in me, etiam amicos meos, ac propinquos, qui, quo loco hinc & alibi fuerint, multi meminerunt, asperrime invecſtus est. Ita ut quaecumque in auctore reprehendit, non auctori, sed, quod fidem omnem superat eorum, qui nunc vivunt, neque minus & posteritatis superabit, rei hujus plane ignaro, hoc est mihi pro libidine ascribat. Adeo, ut cum auctor nos commendat aut honoris, ut fit, titulos attribuit; id ut a me, non ab eo, factum acerbissime traducat. Quod si is, qui privatim aliquem, a quo privatim laesus est, acerbius traducit, reprehensione ac censura etiam, privatim, inquam, hoc si fiat, dignus judicatur, quid qui publice ac coram orbe universo illi parcit, a quo laesus est, immerentem autem atque innoxium, & quem talem novit ac novisse debet, publice traducit? Quod longissime omnem, quam privatim haecenus in Bel-

gio exercuit Hispanus, vim, crudelitatem, ac injuriam excedit: neque aliud jam Academiae nonnullae, atque in iis eximii loquuntur Viri. Cum nihil sit crudelius, quam innocenti & de cujus innocentia ex amicorum monitu jam constat tibi, publice injuriam inferre, ac carnificinam in bonorum famam atque existimationem exercere, & cum alii in te scripserint, ac qui sint scire possis, aut jam scias, non his ipsis, sed qui eos ne noverunt quidem, insultare ac vi publica grassari: imo ea non in illis, sed in his traducere, quae alium autorem habent; ut omittam D. D. Curatorum rem hîc agi; qui cum liberaliter imprimis ac benigne Professores habeant, tantum Academiae ac sumptibus eorum, quantum famae Professorum atque existimationi publice detrahitur. Ne de D. D. Ordinum autoritate ac majestate agam, qui cum publicis decretis hanc licentiam, ut diram atque detestabilem proscripserint, adversus instituta sua toties peccari, ac praeciri aliis intelligunt. Id autem quid & quantum possit, quotidie hîc jam videmus, cum vix quisquam hîc nuper ad gradum facultatis, ut loquuntur, aliquem promotus sit, quin versiculi famosi, etiam adversus facultates ipsas, & earum Professores, publice prodierint. Quia id, quod uni licuit, ac quotidie licet, licere omnes sibi arbitrantur: imo volunt: quia sine legibus superiores sunt, in primis autem, & ante alios, juventus. Fuerunt interim non pauci, qui initio ut responderem serio hortati sunt. Cum alii & quidem e proceribus nonnulli serio id dissuaderent. Futurum enim, nemini ut parceret, qui quam plurimos impune ac optimos laesisset. Ita & futurum, ut id nemo excusaret, quod jam detestantur plurimi, tum autem omnium ut puniretur interesset, quanquam & nunc omnium interfit. Sed & fieri vix posse, quin qui petulanter laesus esset, irritatus simile aliquid reponeret, cui neque ingenium praesertim, nec vigor animi deesset. Ita similem futurum ei, quem jam accusaret. Dissentire autem eruditis usitatum: certare maledictis neque generosi animi, nec viri boni esse. Maledicere autem ultro vix hominis esse, ideoque ad spiritus ab homine diversos nomen id aut simile, a Christianis jam translatum esse. sed & ipse haesisse in bivio me fateor, donec aliorum scripta non autoribus suis, sed nobis, nescio quo animo ac fide ascripsit, ac pro iis me traduxit. Qui ne responderem, mea simul & illorum interesse existimavi. Mea, quod ad me non spectent: illorum autem, quod ut illis hoc debetur, ita relinquendum est, neque vindicandis suis impares futuros aut existimem, aut aliis, qui hoc ignorant, persuadere debeam. Quis enim esse auctorem illorum me ignorat? Ut dissimulatio hîc nullum aut contemptus habeat jam locum. Adde quod famosis libellis nemo pro merito respondet praeter magistratum, qui autores punit. Memini autem mihi aliquando quid evenisset. Dum initio quid faciendum esset adhuc dubitarem, cum amicus quidam me Theologus, officii atque amoris offerendi causa accessisset, ac de eo agerem cum ipso, praeter expectationem meam, cur *Scaligeri* jam mei amplius non meminisset, & an penitus extincta ejus apud me jam esset recordatio, quaesivit. Cum attonitus haererem, nec quid vellet intelligerem, ibi iterum ille, Cum quidam maximorum, inquit, hominum, *Xylandri* pariter

ter ac *Casauboni* cum ab iis dissentiret, nomen traduxisset (erat autem is de quo nunc agimus, cui Theologorum ordo alibi homines inepti, eorum aetate sua princeps *Franciscus Junius* bestia terrena alibi dicitur) verbis totidem ad eum scribit *Scaliger*: *Tuum est indicare, inquit, illa (errores scilicet) nerudiores in illos scopulos offendant: & excusare, ne animadversio illa propior sit obtrectationi, quam castigationi. Doctis & probis semper honos suus & reverentia debetur. Contra, maledicos inultos pati non debemus, nisi forte contemnere malimus: Nam superbi magis offenduntur silentio, quod se contemni putent, quam responso, ex quo triumphum captant, quasi digni, qui meliorum odium aut iram meruerint.* Sed nec ignorare me aut ignorasse unquam, melius contemptu quaedam quam responso vindicari, & quam magno illi viro ea semper displicuerint. Loco autem alio rem esse hîc nunc judico. Cum omnino aliud sit maledicere, aut intemperanter aliquem ab aliquo dissentientem respondere: aliud non respondere iis, qui dissentiunt, aut aliquid scripserunt, sed in famam innocentis, ac majorum ejus nomine dissimulato truculenter ac congestis maledictis & calumniis, quas falsas esse, bonus nemo est qui nesciat, incurrere ac grassari; quod si hîc impune licet, de quo omnes docti ac indocti pariter nunc agunt, quis antiquis legibus, quae inter pauca alia nec male, Augustino si credimus, capite id puniendum judicarunt, tantum olim tribuisse quosdam non mirabitur, aut quis, ut de iis agam, nostris locus erit? Quid Reipublicae denique aut Academiae jam fiet? Quas interiisse, nec jam viris bonis esse in iis locum, si hoc liceat, ac tandem omnibus sit metuendum, quod in quibusdam non punitur, caeterae fere omnes judicant, ac libere de eo inter se consentiunt, pronuntiant ac censent. Quid ipsis Curatoribus, in quos nonnulla circumferri sunt qui dicant. Hoc affirmare possum, vidisse me nonnullos inter primores patriae, quibus moestissimae querelae exciderent, cum haec & similia audirent. Nos aequissimam rem petimus ac postulamus; cum praesertim plures sint, quos publice exagitavit aut exagitat. Ne iis, qui tot annos absunt hinc, & alibi jam vivunt aut morantur, hactenus in eos, qui praesentes sunt, nec pessime de Academia omnium judicio merentur, tyrannide immodesta saevire ac publica liceat. Quorum nomen atque existimatio dum laeditur, nomen atque existimationem Academiae prostiui, eosque, qui de ea frequentanda cogitant, in alias, vel propter hanc licentiam, ac simultatis causas, vel inusitata maledicta, quibus fidem quidam habent, ablegari, ne amici quidem ejus negant, aut negare possunt.

EPISTOLA CCXLIX.

DANIEL HEINSIUS

N. N.

Reverende Domine. Aliquamdiu postquam eruditum munus tuum hîc accepi, quod, ut omnia tua, cum admiratione percurri, quemadmodum,

Ooo 2.

ut

ut spero, sigillatim aliquando testabor, venit ad nos tanto patre dignus filius: cui & me, & quicquid exspectari a me potest, libentissime obtuli. Si quis enim vivit hodie, qui te tuaque, adde & tuos vere aestimat, ut debet, is ego sum. Utinam occasio se offerat, ut vere hunc animum testari possim, qui nihil magis opto: etiam cacteri, quos commendasti, semel nobis ut se sisterent, sed frustra domi nostrae fuere. jam enim in publicum prodieram. Post natos homines nemo minus hominem, quam *Salmasius*, se aut esse meminit aut praestat. Nullus in Belgio Hispanus sic grassatus est. Qui in omnem etiam Theologorum, etiam Jurisconsultorum ordinem, mucronem strinxit publice. In me praesertim, a quo nunquam laesus est. Et, quod fidem omnem superat, cum bis adversus cum alii jam scripserint, quos (de quo amici cum monuerunt) ne novi quidem haecenus, quicquid deliquisse eos arbitratur, nobis id ascribit. Atque haec causa est, cur amicorum suasu haecenus contemptu ista vindicem. Alii enim hoc jam agunt. De lingua Hellenistica, stolidam, ut scribit, *λογμαχία* est, quid enim cum de re constet, hoc est quae qualisque sit haec lingua, refert, quomodo dicatur? Linguam, de qua agitur, eruditi, nisi fallor, hujus seculi prope omnes Rabbiorum imitatione Hellenisticam dixerunt, *Salmasius* imprimis, quod negare nemo potest; passim id Exercitationes ejus clamant, etiam posteriora scripta, ut amici nos monent. Nunc majestatis crimen qui hac voce utitur committit. historiam eorum, quae hic evenere. & quomodo adversus me imprimis hic se gesserit, transmittam aliquando. Vix fidem adhibebis credo. Fidem enim omnem haec excedunt. Haec scribebam obiter. breve pluribus ut spero. Festinationi & mendis ut ignoscas rogo petoque.

EPISTOLA CCL.

DANIEL HEINSIUS

N. N.

Nobilissime & Reverende Domine: Quantum tibi pro erudito atque elegantissimo scripto, quo adversus hominis malevoli calumnias, & me & Infanticidam meum tutatus es, debeam, e *Gronovio* nostro pridem intellexi: qui cum in terras alias jam pridem se contulerit, neque de eo, in quo versaris, loco certus essem, nihil haecenus scripsi. igitur quas debeo ac possum pro immortalis beneficio gratias privatim ago, quas occasione prima publice acturus sum. In quo dum totus sum ex amicis intelligo, fuisse quendam (cui ut Deus immortalis ignoscat peto, cumque veneror) qui persuadere conatus fuit tibi, me typographis fuisse auctorem, ne tuas in Novum Testamentum observationes hic in lucem darent, quas ego me vidisse nunquam satis scio: qui nec tale quicquam a te praestitum aut te praestiturum scivi unquam. Cui rei confirmandae typographi ipsius, quem in partes audio vocari, testimonium hic mitto, qui ut tua haec excudat operam libenter atque ex animo daturus sum.

In.

In meis nihil magis bonis omnibus, imprimis τῷ μακαρίτῃ, D. Gomaro, cuius opera Amstelredami nunc eduntur, placuit, quam quod nusquam acerbe de viro maximo, cui & inter primos honorifice hîc olim parentavi, *Theodoro Beza* iudicaverim. qui *Gomarus* paullo ante obitum, post amicum nimis de conatibus nostris elogium verba haec apponit. *Nomini D. Bezae quantum ob-
servare potui, parcis: cum vir ille Clarissimus Erasmo non parcendum iudicavit, si
quando usus postulabat: nec sibi ipsi, cum quaedam revocanda ac recensenda censeret.
Nec in Piscatorem est invehctus, sed gratam testatus publice memoriam ob merita. Adeo
ut non dubitem, quin si superesset ob multa egregie a te correctâ, gratias similiter age-
ret ac haberet.* Aliter mecum te acturum quod nonnulli arbitrantur, absit ut credam: qui existimationem tuam veneror ac colo. Salutat te amicus meus ac deliciae, vir summus, *Fredericus Spanhemius*.

• Videtur ad *Crojum* scripta.

EPISTOLA CCLI.

DANIEL HEINSIUS

N. N.

Reverende Domine. Cum Saturni die proximo, Ultrajecto, & quidem hac de causa, indignantibus amicis, quotquot ibi studiosos mei repperi, reversus essem, ut sacro caenae Dominicae hîc interesset epulo, praeter expectationem amicus me accessit, qui & monuit asperrimum D. *Salmasii* adversus me parari scriptum, quod ante tempus aliquod gener meus, scripto post pactum inter nos initum ab illo hîc edito, acerbe exceptus, acerbe, ut ait, ei respondisset. Se, cum tanti illum non faciat (qui amplissimis tamen summaque dignitate functis prognatus est parentibus, ac magistratum in hac urbe gerit) mecum esse acturum, ac jam acerbissimum ad manum habere scriptum. Amicum utriusque nostrum, cui id aut partem ejus tum exhibuit, attonitum haesisse: quod non ignorarent nunquam eum a me laesum esse: neque hoc decere eos, inter quos dematur concordia, cum mandato publicae auctoritatis convenisset: Sed & qui sanctissimae conjunctionis ac fraternitatis epulo se conjunxissent. Ille non id sibi curae esse nunc respondit, cum non me, sed mea vitia odisset. Qui, licet hominem me esse memini, quae aut cuius tandem sint generis ignoro. Ex quo tempore inter nos convenit, nullo, ut nec ante, eum scripto laesi. Genero autem meo, ut aut non, aut modeste responderet, non auctor modo fui, sed & ut persuaderem, dedi operam, & quidem omnem. Ut autem genero, & quidem qui in publico versatur munere, absolute focer imperet, ac legem ponat, quis consultum aut hoc admittiturum eum credat. Nescio quis illi amplius persuasit, Curatori me nostro hunc libellum ei dedicatum cum insigni commendatione obtulisse. Hoc enim a quibusdam agitur, ut committamur. Cum omnino fieri non possit, ut vel cautius vel circumspectius, vel Christiane magis quisquam agat, quam a me, praesertim postquam inter nos convenit, actum est. Per amicum quemdam nu-

per mihi *Schoockius* significavit, alterum de lingua Hellenistica paratum se habere libellum: qui & libelli ejus auctor, cujus causa acerrime in me inventus est: cum ne nomen quidem tum auctoris nossem, me tamen ille, (quo quid acerbius dici potest?) non hunc refutavit. Respondi, inter nos jam convenisse, si quid scriberet atque ante editionem, quod facturus videbatur, ad me mitteret, D. *Salmasio* me id missurum esse. Moriturum enim prius, quam ut pacto non starem. Litterae, in quibus cum primum huc venisset, acerbissime in proceres nonnullos inventus dicebatur, ne in lucem ab hostibus illius ederentur suasi atque obtinui, ne de aliis quibusdam agam, quae oberrant. Quod si nihilominus, ut in me innocentem invehatur, sua interesse existimat, quae hîc denuo inusitatae atque omnino inauditae (hactenus turbae immineant ac simultates, verbis exprimi non potest. Et in primis si ad procerum quorundam me consilium componam, qui, ut hactenus ne responderem, serio suaserunt, ita laesam patientiam furorem fieri non negant. A quibusdam jam dimisso Ordinum Hollandiae conventu, in locum ei rei destinatum vocatus, scio quid intellexerim, & de famosis ejus libellis quid judicent. Ipsum ergo D. *Salmasium* cum ministro uno Gallicae Ecclesiae atque altero, vir Reverende, ut convenias te rogo. Verbis enim exprimi non potest, quid utrinque hîc sit expectandum, & quid de inusitata hac scribendi licentia primates judicent. Ego, ut saltem hospitem me esse & convivam Domini mei patiatur, rogo; a cujus sacrosancto epulo jam annos aliquot cum cruciatu animi ac conscientiae non levi abstinere sum coactus. Vale, Reverende Domine, & si me ames, hoc age.

Videtur fuisse codicillus, quem ad aliquem Ecclesiae Wallonicae Pastorem, quae Leidae erat, misit *Heinsius*.

EPISTOLA CCLII.

DANIEL HEINSIUS

N. N.

in Britanniam.

Nobilissime Virorum. Litterae tuae, quibus nonnulla proponebas nobis, ad quae responderi velles, in eo morbo a Clarissimo *Latio* nobis traditae sunt, quem fatalem nobis aliquamdiu judicarant medici. Ita factum, ut seponerentur litterae, ad quas respondere tum non potui, & cum ad me rediissem, eas non repererim. Ignoscas igitur, si non mihi, meae calamitati certe, quae ab omni seria cogitatione me tum abduxit. Quare ad posteriores nunc respondeo. Veterem Aegyptiorum linguam non fuisse Graecam, recte summi illi Viri, quorum meministi, judicarunt. Quid enim hîc commune esse potuit? Extant etiam hoc tempore Aegyptiorum linguae quaedam in libris Foederis antiqui voces, ut exempli causa illud *Zaphnath Paaneach*, quas quum ad Hebraeam nonnulli ex magistris Hebraeorum reducere linguam con-

nentur, alii, voces esse Aegyptias candide fatentur. quod Graeci interpretes aut Hellenistae potius *Ψοντομφανήχ* salvatorem, ut volunt, mundi dixerunt. Quod an origine sit Graecum, aut quicquam cum Graecorum lingua commune habeat, ejus linguae periti satis vident. Ptolemaeos Graecos fuisse origine, in primis Lagi, summum Alexandri magni amicum, patrem Philadelphi, cui Graeca interpretatio debetur, nemo nescit: cui & Stratonem praecceptorem tribuunt. Et quis dubitat, quin Philadelphus, Soter, Evergetes, caeteraque quibus usi sunt Ptolemaei, ut & ipsum Ptolemaei, Graeca sint nomina? quid igitur mirum, si Rex talis tantusque Graecae & Hebraicae peritos linguae convocarit viros, ut tam illustrium interpretatione librorum (ne de majori & publica utilitate nunc dicam) nobilissimam suam exornaret bibliothecam, quamquam cur, qui eam legerent, Aegyptiace legere dicerentur, causam notat magnus *Scaliger*. Neque mirum utriusque linguae peritos fuisse Hellenistas Judaeos, cum plurimi sint hodie, qui plures conjungant. Oracula olim Sibyllina fuisse & quidem nota paganis ac lecta, qui negat, simul duumviros S. F. atque iis quoque inspicendis, ac deinde decemviros, tandem quindecimviros, creatos neget. Qua dignitate functus inter caeteros, si ipsi credimus, etiam Tacitus. Et quomodo, si nulla apud eos Sibyllina fuerunt oracula, idem libro VI. Annalium, *relatum ad patres a Quintiliano tribuno plebis, de libro Sibyllae, quem Caninius Gallus quindecimvir recipi inter caeteros ejusdem vatis, & ea de re Senatusconsultum postulaverat*, notavit? Ut omittam Platonem in Phaedro, in Theage Aristotelem, Strabonem, Plutarchum, Aelianum, Pausaniam, Graecorum alios, Latinos autem prope omnes eorum non semel meminisse, quod jam ostenderunt eruditi. Ut omittam caeteros, quis Polionem Eclogam Virgilii ex Oraculis Sibyllinis, aut plurima certe in ea excerpta, non videt? Nota quae de Virgine ibi ac felicitate saeculi ad verbum prope ex Esaia & prophetis conversa. Cum de Pseudo Sibyllinis autem oraculis, *e Christianorum haec officina prodisse, in Gentium autem Bibliothecis non reperta*, idem dixit *Scaliger*, quis de Pseudo Sibyllinis, quod profitetur, non de Sibyllinis egisse eum non videt? Pseudo Sibyllina autem ea esse, quae hodie habemus, ita planum est, ut vel quivis obesae quamquam naris protinus id deprehendat. Sibyllarum veterum oracula aenigmatibus, pluribus in locis, ex obscuritate proxima fuisse, antiqui docent. Cum haec, ad fastidium prope, plana sint, & omnibus exposita. Ita autem putide inepta nonnunquam, ut nec Graecismus, nec quantitatis ratio in syllabis plerisque in locis sibi conflret. Ut omit- tam, ex Homero, ex Hesiodo caeterisque paganorum poëtis, ridicule ac trivialiter non pauca desumpta esse. Qua aetate autem vixit Sibylla, quae futurum aliquando Mosen praedicat, *Τῶτων δ' ἡγήσεται κατὰ σῆσαι μέγαν ἄνδρα Μωσὴν*? Cui si credimus, ante Mosem vixit. Aliae quae de Domino, ut vere ita ex oeconomiae ratione obscurius, quemadmodum ut caeteros omittam, ab Esaia dicuntur, ita plane exprimunt, ut Mariam quoque matrem Domini futuram dicant: quod ipsum eruditis jam, ut alia non pauca, observatum video. Singula autem si percurram, infinitae, & quidem non inusitatae Criticis,

censurae, de dicendi in primis genere, quod nec vetustum esse, nec constare
 sibi certum est, sub manu nascentur. De oraculis res alia est. Neque enim mi-
 rum, non nunquam vera, oraculorum, ut caeterorum ita inprimis Delphicorum
 autorem, praedixisse Diabolum. qui ne falsa responderet, ut plurimum ambigue
 respondit. Quemadmodum, nec mirum, nato Domino defecisse oracula, nec
 amplius locutum falsi autorem. Quis esset Dominus, novisse Diabolum pro-
 bat hoc oraculum (ita enim confessionem illam dico) quod Marci 1. 24. legitur.
Novi te quis sis. Sanctus ille Dei: quid respondet Dominus? *Obmutesce* quod &
 eo tempore evenit, quo magnus ille Pan (nostri historiam) advenit. In ora-
 culo Clarii Apollinis, Germanico de morte ejus reddito, ita Tacitus, *Et fe-*
rebatur (quod non tam ejus est, qui affirmat, quam qui rumorem memorat
 aut famam) *Germanico per ambages* (hoc est, dubie & ambigue) *ut mos oraculis,*
maturum exitium cecinisse, quod nemo qui ingenium Tiberii ac Pisonis perspe-
 ctum haberet, quem non alia de causa, nisi ut Germanicum everteret, missum
 in Syriam satis constat, ignorare poterat, neque quisquam vere prudens aliud
 Germanico tum praedixisset, nisi in omnibus nos fallit Tacitus. Sequitur de
 Historia adulterae, quam a Phariseis accusatam ac Scribis absolvit Dominus.
 & quam non Syriacus modo codex, ut scribis, & Nonnus, sed & maximus
 interpretum ac vere cordatus, adde & qui optimis usus est codicibus, praeter-
 misit Chrysostomus, & qui eum sequitur Theophylactus. ne de Eusebii judi-
 cio aut aliis nunc dicam. Mihi quoque interdum mirari subiit ipsam Dei sa-
 pientiam, non quidem hypocriseos Scribas damnasse ac Phariseos, sed depre-
 hensam in ipso facto absolvisse adulteram. Ipsum dico verbum Dei & sapien-
 tiam, quae simpliciter pronunciarat, *quicumque mulierem aspicit, ut eam concupi-*
scat, jam cum ea adulterium in corde suo commisit. quomodo igitur factum absol-
 vit, qui cogitationem damnat? Quod & in mentem venisse S. S. Patribus exi-
 stimo, qui ex optimis codicibus suppositum id esse ac paulatim, ut non pauca,
 in Graecum antiqui Foederis contextum, quae Hebraea norma non agnoscit,
 irrepsisse judicarunt. De praeclaris numismatis tuis, & vero antiquitatis the-
 sauro maxima cum voluptate legi, quae scribis, qui & memini quanta cum
 voluptate nummorum *Gorlaei* nostri indicem confecerim. Cujus imprimis
 Graecos maxima cum admiratione magnus *Scaliger* lustraverat. Magnus, in-
 quam *Scaliger*, cujus autographa quaedam ad te misisse nostrum *Latium* ex eo
 intellexi. Annotationes autem nullas ad Novum Testamentum habeo, aut
 ullis unquam, quae non extant, usus sum. In augendis nostris exercitationi-
 bus jam sum totus. Atque utinam tam sim felix, ut, procurante aliquo, in
 nostram gratiam Manuscripti, quos antiquissimos esse in Britannia vestra no-
 vi, conferantur codices. Quod sperare quam consequi facilius: ego sane publi-
 ce me gratum probarem. De excerptis tuis ex Homiliis MS. Anglo Saxonice;
 gratias, quas possum, ago maximas, qui sum ac futurus semper sum tuus.

EPISTOLA CCLIII.

JANUS VLITIUS

*Danieli Heinsio S. P. D.**Leidam.*

ITa est, ut praedixi, Vir Illustris: Stipites Romanos in elegantissimis literis suis multum mihi praedicat Filius tuus; (quem nisi redamem, ἀναξιο-Φιλητότατος; nisi aestimem ut tuum, indignissimus illo, quo me haecenus inter cultores familiae vestrae admisisti, ac habes, favore tuo sim.) Saxa tamen ac lapides, &, quam in iis constituit, Urbis magnificentiam mire laudat, & super incolas atque indigenas suos extollit. Vereor ne, ut digniorem se iis inquilinum adscribat, ideo etiam atque etiam morandum Romae censeat; nimisque antiquis inhaerens, praesentium immemor vivat. Multis conatus sum desiderium Tui (cujus subita desolatio pro maximo argumento militabit) patriaeque ac nostri in memoriam illi redigere. Ne saltem ulterius tendat, causasque innectat emanendi, dehortatus sum hisce¹ literis meis; quas vel ideo, Virorum summe, commendari & committi tibi patiari, rogo. Tu quoque affectui meo ignosce; ac porro, si faves, luculenta illa favoris tui testimonia, literas tuas, quarum compellatione jam gloriari incipio, aliquando repete. Ita te Reipublicae tuisque incolumem diu, tibiue reducem sistat Filium tuum Deus Opt. Max. Vale, Vir illustris. Dabam Hagae Com. pridie Idus Januar. cxcxcxlvii. quem annum & Tibi felicissimum opto.

¹ Quae leguntur tom. III. pag. 117.

EPISTOLA CCLIV.

VIRO AMPLISSIMO

.

Amico Veteri.

PAulo ante Calendas Maji Sedano discessimus. Ubi Ducem Comitemque, quem nosti, iisdem operari sacris vidimus. D. *Molineum* & *Ramboursium* sed ignotus, salutavi. Lutetiae nonnullos, imprimis Cardinalem, veram nunc Europae totius, rerumque quae pro Gallis adversus Hispanum geruntur, Cynosuram, cum Patre Josepho, etiam amoenum *Balsaci* ingenium vidi. Ante omnia mira de apparatu belli in sequentem annum, ex aulicis nonnullis intellexi. Non ita multo post Leodium venimus, ubi diem unum alterumque egimus. In qua urbe exacerbatos plurimorum animos adversus Hispanorum factionem invenimus; ob prodicionem imprimis, quae Trajecti ad Mosam nuper tentata, pessime autoribus cessit. Eodem nobiscum hospitio nostras quidam utebatur. Cujus eruditionem admiratus sum. Ex eo cum de statu Academiae Lugduno-Batavae, cujus olim alumnus fuisset, & in qua moratus ali-

Tom. II.

P p p

quam

quamdiu ipse esset, diligenter quaesivissem, omnia optimo loco esse respondit. Etiam amicos veteresque Professores salvos ibi atque incolumes. Cum ex eodem, ecquid novi sub praelo esset, aut in lucem nuper prodiiisset, quaererem, inter alia libellum quendam De usura nuper editum, respondit; cuius autorem ante annos aliquot, relicta matre Gallia, eo se contulisse, veterem amicum suum. De quo varia in Batavia (ubi & ipse ignotus aliquamdiu vixisset) judicia, & quae nollet, audivisse. E quibus alienos multorum animos ab eo esse, satis perspexisse. etiam Theologorum quorundam, etiam amicorum: qui non parum mirarentur, cuius consilio hoc argumentum delegisset, ut tot annorum ocium sic excusaret & usuram sic solveret. Sed & concionibus interfuisse, in quibus non obscure tangeretur. Judicare quosdam, potuisse eum genti nihil minus quam insipidae, a qua benigne inprimis esset habitus, ratione alia nomen atque existimationem suam commendare. qui ejus praesertim Ecclesiae pars esset, in qua verbis solennibus excommunicari foeneratores ac usurarii solent. qui inter Belgas viveret, quorum pueri in templis ad octavum praeceptum verba illa, *furti nomine, iniquum pondus, injustam ulnam, inaequalem mensuram, fucosam mercem, fallacem monetam, ac usuram, aut aliam quamvis rationem aut modum rem faciendi a Deo interdictum*, contineri recitant, aut morali lege prohiberi, discunt. Illud quoque mirum non paucis videri, quod de Jurisconsultis cum loquitur, quorum mentem non satis plerumque assecutum praedicant, qui haec intelligunt, non morari se eos publice pronunciet. neque saltem quod de eo profani scriptores veteres Romani statuerint, permovere eum potuerit. In omnium enim manibus, ut caeteros omitteret, Catonis de re Rustica libros versari, quorum initio nobile illud dictum legeretur: *Majores nostri sic habuerunt & ita in legibus posuerunt, furem dupli condemnari, foeneratorem quadrupli. Quanto pejorem civem existimarent foeneratorem quam furem, hinc licet existimari. Ad quem locum cavillari. Sed & Aristotelem arroganter ab eo traduci. Neque quis, si connivendo alibi toleratur, ideo laudari aut permittendam dicat. Quod tale est, ac si quis furtum commendet, aut permittendum dicat, quia in severa alias Lacedaemoniorum Republica id permixtum, aut paederaftiam, quia alibi non toleratur tantum ac dissimulatur, sed & laudem ejus quidam, patrum aetate, in iis locis scripsit. Nam quid Synodi de ea statuerint, mirum, ubi tot eruditi vivunt, neminem suppeditaſſe ei. Sed & hoc mirari, quod eos, a quibus nunquam publice aut privatim laesus esset, praeter rem & institutum scribendi, laceſſeret. De quo mirum esse, nunquam a D. Riveto monitum fuisse: inprimis, ne inprovidè nonnunquam apud eos, quorum animos non satis perspectos habet, de ea gente judicaret, cui tantum debet. cum ille aliter se gesserit, ac amice cum collegis vixerit. Ibi ego, Me eruditis omnibus, illi quoque viro, de quo nonnulli ita judicarent, quamvis necessitate nulla junctus nobis esset, semper favisse, dotesque ejus aliis commendasse, id autem serio displicuisse, quod in aliis quoque scriptis, quoties a Magno Scaligero, Casaubono aliisque dissentit, ineptire eos dicat. Quae non nisi ab aegro animo aut bilioso, proficisci posse.*

Sed

Sed & *Franciscum Junium*, de Theologia optime, nec de aliis studiis pessime meritum, tum Gallum, vehementer alibi perstringat; quasi ea quae in Tertullianum scripsit, nihil aliud quam cacata charta essent. quem & parum honesto, aut infami potius, notavit nomine. Quemadmodum & summo cum periculo quosdam, qui adhuc supersunt, tangi: cum praesertim nec illorum satis refutet sententiam, nec suam probet: taleque sint, ut impune eos nemo irriter; qui fortasse solo contemptu melius haec vindicabunt. Illud inprimis parum consulte ab eo factum videri, quod in eo libro hos reprehendat, in quo ab ipsa, cui nomen dedit, Ecclesia, a Patribus, a Synodis, quin a plerisque Christianis, dissentit. Ne jam dicam, quod inciviliter ac putide Aristotelem exceperit. Ibi contubernalis ille meus, quaesivisse se sollicitate aiebat, quisnam esset ille, quem de mutuo cum agitur, acerbè punit. Intellexisse autem e quodam, urbis primariae Medicum ac Senatorem esse, cujus nomini nunc parceret: qui & ipse scriptis jam illustris, neque quicquam minus quam mulus esset. Etiam illud mirari quosdam, quicquid autor alibi legisset, in hoc scripto legi: neque quicquam, praeter ea quae ad rem spectarent, ibi praetermitti. Hoc fateri omnes, qui iudicio exacto essent, etiam plerosque amicos ita sentire. Nihil enim aequè ac genium & brevitatem cum iudicio, scripta, quae unius sunt argumenti, commendare. Sed & sine etymologiis, emendationibusque locorum, qui locum ibi non habent, transigi negotium hoc potuisse. Etiam mirari quosdam, quod Theologo, & quidem erudito, opusculum hoc inscripsisset; quem & ab ea sententia alienum esse nemo dubitaret (adeo ut respondendi imposuisse illi necessitatem videatur) & ne scribendi quidem rationem probare existimarent. E locis enim communibus congerere omnia, etiam quae praeter rem sunt, non tam eruditionem, quam molestam ostentationem, nonnullis videri. De lectoribus autem eorumque iudicio semper sollicitum prudentem scriptorem esse oportere. Haec tum ille. Nos post dies aliquot, tuti commeatu publico, Antverpiam pervenimus.

EPISTOLA CCLV.

GOTHOFREDUS JUNGERMANNUS

Claudio Salmasio amiciss. meo S. P. D.

Heidelbergam.

Binas abs te accepi probe, utraque gratissimas, mi amiciss. Dn. vin' tamen scire quae gratiores? verbo dicam; longiores. Prioribus ex parte quid reposuisse me jam nosti, antequam has acciperem. In illis quam ornate excusas eruditam aberratiunculam tuam? tanti paene fuit errare, uti tam elegans orator accederet. O de meis quid dicam, si sic tu agis, qui subinde labor, haereo, nescio. id tu omne in me amice toleras, & connives non raro; te vero tam acriter castigas, nae tibi es ipse injurius. Ego hos eruditos lapsus culpis annumerare non possum: & si mihi contingerent, laudi ducerem. de plaustris quoque cavillari (ignosce verbo) tibi ut in tuis licet, mi Dn. Mihi tamen,

Ppp 2

ut

ut aliter sentiam, quam scripsi, ne persuaseris unquam, ne si Suadam adducas ipsam, & quae in labris tuis fessitat, Attica Pitho: versum, quo carebat inscriptio Herodiana, eodem tempore quoque cum literis nostri *Bongarsii* accepi. E quibus nil novi alias, quam editorem nuperum Boëthiani libelli de consolatione philosophica facile potuisse impetrare a *Petavio* vestro graecam versionem illius libelli Planudicam. De *Morello* nondum certe e paucis, quae vidi, potui mihi ita persuadere prorsus, uti eum inter semperfidios interpretes adnumerarem. Ingenio mihi indulgere nimium videtur suo, & delectari flosculis inferendis, hinc inde decerptis. Sed penes vos sit potius iudicium de ejusmodi. Platonis comici carmen de *σβώτεια* ut interpretaris, intelligo. Nondum tamen, amicissime, possum conquiescere, vereor uti aliquid adhuc lateat. Jam accipiebam editoris *Seberi*, auctoris inquam Pollucaeae editionis, qui multis MSS. usus fuit, notas. avide accurrebam ad hunc locum, ubi ne gry quidem. Puto de loco isto sane inquirendum magis: quod ego tamen prae inscitia non audeo. Infra quidem l. vii. c. 33. *σβώτρειαι* quoque nominantur: sed nihil praeterea additur. video quidem forte Pollucem hoc dicere, Epicharmum *ποιητικόν* (de qua vocula quis etiam ambigeret) *π μέλ* *αὐλῆ* dicere: Platonem vero comicum etiam *σβώπικόν αὐλῆ* & nescio an dicat *σβώτρειαν* habere saltem digitos *αὐλητικῆς*, non & os aptum ad canendum tibia. Sed aegri somnia vidisti & ante, nec opus ea me referre. Alias noster *αὐλῆς δακτυλικῆς* vocat infra etiam *τῆς ὀπί ὑπορχήμασιν*. Sed quando taceo delirare? Sed lubet repetere de *σφοδρμαχία*, quod vocabulum l. iiii. c. ult. in mendo cubare admonebas, non *περδοσίαν*. Audi quid mihi in mentem fuit jam, legendum *σφαιρομαχία*. considera infra sis, sique vacat, quae l. ix. cap. 7. de lusu pilae *τῆς ὀπισκίης*, an me quid juvent. Ad Indicas facile jam acquiesco, & cur te caelem, haec ipsa a duobus feriri quae ab Isidoro videbam addi, & in Suida *ὄργανα τείγωνα*. me statim dubitare fecerunt. Pro insigni loco de tubicinibus maximas tibi gratias, quae per omnes lineas essent repetendae, quia semper mereris. Quid enim dicam de *ποῖ*, in quibus eruditissimi viri fassi sunt se nil scire, & *ἀναδήγμασι*, quae jam omnia primum intelligo? O quem te dicam! nolo in os te laudare, quod modestissimum ipse incoram cognoscere potui. Quod ad *γυλῆς*, prorsus scopum attigisti: omnibus enim suis litteris id ita in MS. Palatino: & uti porro nos doceas, eodem in loco lib. x. c. 31. noster ita auctior: *πελαμῶνα δ' ἂν καὶ ζωστῆρα εἴποις, καὶ ὄχανα, καὶ κιλλιβάντες, Ἀριστοφάνης εἰπὼν*, *τῆς κιλλιβάντας οἷσε παῖ τῆς ἀσπίδος*. Et eodem capite post *οἰκοδόμος σκεύη*, statim ante *νεωλκῆ*, *ζωγράφος σκεύη* &c. *καλλιβάντες*, quae infra in vulgato c. 37. leguntur. Sed l. vii. c. 28. ubi vulgo *καὶ καλύβας*, MS. *κίλλιβας*. Aristophanea in Acharnensibus indicarunt jam alii, ubi legitur, *οἷσε παῖ τῆς ἀσπ.* Sed jam iterum mirum locum propono lib. vi. c. 12. *ἐμοὶ ᾧ καὶ τὴν καλῶμένην αἶγλαν μυσιλὴν ἴδιον καλεῖν, ἢ αἶγλαν*. MS. habet *καλ. νέγλαν ἡδεῖον καλεῖν, ἢ νέγλαν*. ego nec de *αἶγλα*, nec de *νέγλα* alibi quid invenio. ἡδεῖον emendare facile est. Etiam audi mea facinora lib. vi. c. 11. fine, ubi MS. *λείπῃ*. Et quidem de *βαγινδαρίοις*, & *πλασίοις* tacui, uti ignarus. Mox *ἰσχα-*
δόπη.

δόπην suspectum mendii habeo. Sed & quod conjiciebam, ἰσχάδα ὀπὴν. Sequitur paullo post ἐλαιοσάμμαζις. quod monstrum ni fallor pellebam feliciter, restituendo, ἐλαέθ, ἀμαζις, (sive ἄμαζις, vel ἄμμαζις,) ἐλαέθ sane, ut ἀμπελθ εἶδες: & ἀμαζις, uti γένθ ἐπιφυλῆς apud Hesych. legi: apud quem & caeterorum quoque nomina fere variant. Sequitur in Polluce χαιρένεως. apud Hesych. est χαρόνη, χαρὶνθ ἄμπελθ. dein quae malum Φθισία. patet mihi scribendum ψιθία. Dein λυθυσθ ἄπράμνειθ. an? λίθυσθ, πράμνειθ. de πρέμνειθ non dubito. Deinde χαρόπη. forte id apud Hesych. quoque reponendum pro χαρόνη. De ea quae πελμηρίς & τερνία mihi non liquet. Cap. sequenti τὰς λαβικλάς ὀνομαζομένας. An λαβιδας? Hesychius tamen de χρυσοχοικῶς σκῶει. Eodem capite 14. ista ταῦτε δὲ ὅσα κατὰ Φιάλας ἀνεπέπιατο (quae pars capitis in MS. deest) nescio an non aliquid quoque vitii alant. l. vi. c. 28. περὶ κόλακθ. in fine. defunt in MS. πρῶταιρῶν, ὀπίσιθ. Et quid hīc est quaeσὼ πρῶταιρῶν, vel quo modo corrigendum? Ibidem ultima, πᾶνα εἰπὼν, πᾶνα παθὼν. ridicule vester *Bulengerus* in theatro interpretatur, qui panem patitur, risum vocans panem, omnia sic restituenda ajo: παρεχόμενθ συμβολὰς τὸ γέλωτε, πᾶν ἂν εἰπὼν, πᾶν ἂν παθὼν. MS. habet saltem, πᾶν ἂν εἰπὼν. Sic. c. 32. loquitur noster, πᾶν ἂν πρέξας, πᾶν ἂν εἰπὼν. Agatharchidis Eclogas Ctesianis adjiciemus, quod me aliquando scripsisse puto. Edemus illa ex Photii Bibliotheca. Quaeσὼ te, adi ejus Bibl. graecae p. 722. 723. Si tibi vacat & illa, Ἀΰσηρὸς ὁ λόγθ, ἀλλὰ σωτήριθ δηλοῦται &c. usque ad p. 724. quae *H. Stephani* vetus editio non adgnoscat, considera an Agatharchidis putes. Mihi id persuadere non possum, sed ex alio auctore assuta credo, nisi tu dissentis. Et plura jam non addo, nisi haec non nimia fuere ad te obtundendum. Prolixè est ad *Gruterum* nostrum scribendum, qui tecum credo quaedam, si tanti, communicabit. Vale & salve, amicissime *Salmasi*, diu diuque mihi & reipublicae litterariae, & tibi quoque annes & perannes. raptim e typographio Wecheliano: a. d. xvi. Kal. Jan. ciorxcvii.

Hae epistolae, quae ad *Salmasium* scriptae sunt, cum annorum modo xiv. vix esset, stupendam eruditionem in tam praecoci ingenio magis ostenderent, si ad eas responsiones nobis ad manus essent. Tot enim egregias in Polluce & aliis Graecis scriptoribus emendationes cum *Jungermanno* communicavit, ut patet ex hujus notis in Pollucem, quibus *Salmasii* sui verba fere semper inseruit, ut incredibile videatur jam tum potuisse evolvere tot Scriptores. Hac vero occasione de ejus natalibus aliquid adjiciendum videtur, quia *Ant. Clementius*, qui *Salmasii* vitam prodidit, & Epistolis praeposuit, sibi contraria tradidisse, nec recte calculos posuisse mihi videtur. Scribit ille *Salmasium* natum esse A. ciorxcvi. & deinde A. ciorcvi. abiisse Heidelbergam, annos jam xiv. natum. quare ex ejus opinione debuerat nasci A. ciorxcii. Sed postea ipse ex epistola ad *Gronovium* docet Anno xv. aetatis edidisse *Florum*, qui cum prodierit A. ciorcix. sine dubio natus fuit A. ciorxciv. De anno, quo obiit, etiam in diversa abeunt Scriptores. *Clementius*, *Witten* in Diario Biogr. referunt ad 111. Sept. ciorccli. sed ex Epist. *Heinsii* ad *Gronov.* cclxv. qui mihi videtur falli vix potuisse, constat; A. ciorccliii. mortuum esse; & *Adolf. Vorstius* parentans ipsi A. ciorccliv. (dies non additur) praeteriti anni 111. Septembris animam exhalasse ait, Anno aetatis lxxv. quod iterum mirum videri debet. sed ille natales in Annum ciorclxxxviii. conjecerat. quis non miretur tot viros, qui vixerunt cum *Salmasio*, & eum habuerunt familiarem, tam discrepare in annis natalium, aetatis & mortis. Ego puto recte calculum constare iis, qui statuunt natum A. ciorxciv. obiisse ciorccliii. aetatis lxx. Qui vitam nuper *Salmasii* edidit *Clarmondus* personatus, incredibilis stuporis & inscientiae compilator, sequitur fere, et si omnem temporum rationem confundit, *Clemen-*

tium, quem ignorasse tamen videtur: nam & *Clementem* illum vocat, & *Famulum Salmasii*, & ipsi in primis charum, ideoque scripta ipsi, quae vivente *Salmasio* jam tractabat, ait fuisse post fata commissa; quae omnia falsissima, cum *Clementius* sibi non eam familiaritatem intercessisse, quanta aliis, nec necessaria sibi suppetiisse subsidia scribat, neque umquam in familia *Salmasii* vixerit, sed post ejus mortem omnia, quae edidit, undique collegerit: in ipsa vita tot peccata admittit, ut ne puer quidem, qui Latine sciret, ex aliorum monumentis omnia corradens, foedius posset errare. Patrem destinasse filium sibi successorem senatoriae dignitatis in *Lugdunensi* Parlamento scribit: legerat certe in Gallico quodam scriptore *Dijon*, inde ille *Lyon* fecit. nec errorem operarum esse patet, quod bis Parlamento de *Lyon* meminerit, ubi nullum esse constat. Florum edidisse A. xv. aetatis recte quidem narrat, sed eum *Hugoni Grotio* dedicasse falsum est: nec enim ejus viri notitiam adhuc habuisse credo. dedicavit vero *Jano Grutero*. Unicum reliquisse filium, quo quid factum sit omnibus ignorari ait: atqui *Clementius* ex filiis (habuit ergo plures) duos memorat *Claudium* & *Josiam*, ex quorum primo adhuc posteritas, ejectis ex Gallia *Hugenottis* in Bataviam transfudit aedes, & nos ejus nepotes nuper disciplinae nostrae alumnos habuimus. Interdici publice deberet tam fatuis & indoctis nugatoribus, ne vitas summorum virorum tot mendaciis contaminarent. Ego certe nullam hujus compilatoris vitam inspexi, quin singulis fere paginis pueriles errores deprehenderim: potuisset certe *Hankium* consulere, cujus operâ vita *Salmasii* conscripta legitur apud Wittenum Decur. v. Philof. p. 111. in qua etiam quaedam castigari possent, sed notarum harum ratio, jam nimium me fuisse, clamat.

EPISTOLA CCLVI.

GOTHOFREDUS JUNGERMANNUS

Claudio Salmasio summae eruditionis juveni, S. P. D.

Heidelbergam.

Non ut tuas elegantissimas, & quae divinae in te particulam aerae, ut ea pollens & melior tibi data prae caeteris, ita spirabant, redhostirem, haec exaravi; quî enim id fieri posset? sed ut ex iis tamen magis tibi, mirum, quem veneror & admiror, familiarem me factum adgnosceres. Placet enim tuum judicium exquirere super quibusdam Πολυδευκείαις. in quem auctorem jam conscribere incipiebam, quae ex MS. observaveram. Unum tamen, ut statim id quod dolet indicem, in tuis literis me haecenus male habuit, quod *Stephanum* rursus inter ἀποκειμένους relictum iri dicere videris: quod ut ne facias, reip. litterariae nomine te volo etiam atque etiam obsecratum. De caeteris geographis & *Hoeschelii* levi in illos opera juxta tecum sentio. Sed Pollucea illa libet adferre, in quibus me a te adjutum velim. l. i. c. i. τμήματι περὶ τῶν προσιώντων θεοῖς, vulgati: τὰ δὲ αἰρώματα ἢ θυμιάματα καλεῖται. Θυκυδίδης δ' αὐτὰ εἰρηκεν ἀγνὰ θύματα πρὸς τὰ αἰμαῖσενται ἢ σφαττόμενα ἀναθηαῖς σμύρναι, λιβανωτόν. MS. Θυκυδίδης εἰρηκεν αὐτὰ, θύματα ἀγνὰ, ἀντιπιδασέλλων πρὸς τὰ ἐν αἵματι. & in margine alia manu additum, ἀντιπιδασέλλων, λιβανωτόν. Quaeso te, quis iste locus Thucydidis. nam qui mihi l. i. ξυνγραφής occurrit de Diasiis: ἐν ᾗ πανδημεὶ θύσαι πολλοὶ, ἔχ' ἱερεῖα, ἀλλὰ θύματα ἐπιχώρια, vel non est, vel Pollux mendosus est. Mox τμ. Περὶ ἀναθημάτων. πόπανα; ὀμικὴν, σφάνης. Illud ὀμικὴν lexicographi certe plane omittendum sunt rati, ignorantes credo juxta mecum, cujusnam esset generis. MS. quidem eo caret. tu me doce; & ego potero tum alios. Non ita longe post τμήματι sequente

sequitur fabula de Hercule pomario. Ibi ista, Μήλων ὁ Ἡρακλῆς, Erasmus interpretatur, *Hercules malorum*, quod mihi videtur non rectum: qui ex Helychio videor posse colligere, Μήλων fuisse nomen Herculis, non casum illum patrium. Helychii verba sunt: Μήλων Ἡρακλῆς. ὀνομαθῆναι φασὶ τὸ θεὸν ἕως ἄρτι τὸ μὴ ἱερεῖα θύειν αὐτῷ τὰς μελιτῆς, ἀλλὰ τὸ καρπὸν τὰ μῆλα. & quinam fuerunt illi μελιτῆς, fuerunt enim Melitae illae plures. Sectione Περὶ τῶν κατὰ τὰς θυσίας ὀργάνων. λίκνα, κανᾶ MS. auctius longe: λίκνα παριφέρῃ κανᾶ, ὁ βαρβάρως πύργος καλεῖται κανᾶ &c. Ubi illud πύργος usitatum fuerit, ignoro juxta cum ignarissimis. Sectione antep. ubi de hymnis Deorum, *Bulengerus* vester de theatro sic ait: Polluci l. 1. dicitur *Demetrulus aut Demetriulus*; qui nescio quid codicis ob oculos habere debuit, cum in Polluce nostro clare legatur, tantum: δῆμητρε, ἰσλ. apud Eustath. in ιλ. Σ. est quidem δῆμητρεῖσλ. συνθέτως. Et haec saltem e primo cap. Plura adtexere nolim: si non haec forte satis sunt. Eustathii fabellam amaenam tandem ad te mitto, quod bene Eroticis vertat. MS. 2. sunt Augustani; unus Lutetianus cum Tatio. Addidi, ut & ego descripsi, si otium ullum nactus fuissē ad illum recensendum, vel interpretandum serio. Is si tibi usui esse potuerit, ut ad prelum serviat, gratum mihi est. Ego tamen nondum contuli, an fideliter usquequaque descripserim, quod non semper credo factum. Sequutus sum vero codicem Augustanum majorem illum, integumento ornatum. Quae alia habeo a *Casaubono* & *Scaligero* πῶς πάνυ, ut & a *Rigaltio* super isto auctore, ἐν καιρῷ, si tibi placuerit, submittam. Tatum aliquando studiose perlegi, & minutias multas in eo observare visus sum, quibus ingenium exercere conabar. Heliodorum eodem modo: quem audiui ab *Helia Putschio* τῷ νυν ἐν ὁσίοις auctiorem existare Commeliniano apud *Raphelengium*. Cyri illa Prodroimi, quae te feliciter audio descripsisse, & Venetiis in Martiana se vidisse quoque narravit mihi *Segbertus* meus, δυσαναγνώσω pariter scriptura exarata. Debes, credo, & illa impetrare ab *Hoeschelio*, quae bibliotheca Augustana habet a *Simone Sethi* e Saracenico versa κατὰ σφραγίδην ἢ ἰχνηλάτην. Sed doctum moneo. tu ignosce meae audaciae, qui ita meae conditionis & ingenii immemor adversus te, eximie Salmasi, tam prolixè garrio. Vale atque salve, & impolitissimis litteris ignosce, quas raptim dabam Hanoviae. A. D. ix. Kal. Jul. MDCVII.

EPISTOLA CCLVII.

GOTHOFREDUS JUNGERMANNUS

Claudio Salmasio suo S. P. D.

Heidelbergam.

ITa scribas semper, amicorum doctissime atque rescribas, ubi id cum tuo commodo fiat, & absque publico reip. litterariae incommodo. Quod profecto illa sentiet, si tua praeclare meditata interrumpas ob ullius amici privatam causam. Novi tuam istam insignem modestiam, quod te gravent illae, quae

quae dixi: sed non potui tamen non vel leviter affari, quod veritas exprimit. Et quam gaudeo de Floro tuo, amicissime & floridiss. Juvenis: o fac certo efflorescat cum futuro vere, nec nos amore *μεράσκειν* finas diu. Et quoniam ita stat Latium prius demereri, post istum Romanum sine, quaeso, quamprimum sequi tuam Atticam corollam, *Stephanum* tuum, five quocumque alio nomine tibi adpelletur ille *ὁ τὰ ἔθνη καὶ μεράσκειν*. Jam, uti scripsi, nolim te morari pluribus, quum impedimento esse ullo tuis Musis abominer. Mererer alias certo furcillis ejici praeceps, uti illa mala apud Catullum res. Quum tamen ad *Gruterum* nostrum alias cum ipsius adfine scriberem, libuit quid adjicere ad te. Ctesiae fragmenta edimus quaecunque *Schottus* collegit, egoque pauca insuper inveni. Novi autem apud *Stephanum* tuum in *Dyrbaeis*, & *Chorammaeis* extare ejusdem quid: sed libro isto careo. Si vacat & non molestum est, quaeso sis ista paucula descripta habeam. Valde caveo, ne te ulla ratione avocem a tuis: sed hîc tamen male cavi. Tu hoc ignoscas, rogo. De *σφαιρομαχία* legi quae adfers. Non libenter contendo tecum, uti qui nimium quantum prae me vales. Nescio tamen, an praecise negandum illud de lusu pilae. Certe enim infra l. ix. c. 7. *περὶ παιδιῶν, ἡ δὲ Πίσκυρος σφαίρας παιδίαν* ita describitur, uti cursui in eo varius locus esse videatur: & in segmento illo capitis ult. lib. iii. ubi de mendo nobis sermo, agitur de variis cursus exercitiis. Ait autem Pollux diserte in capite *περὶ παιδιῶν* l. ix. *ἔστι δὲ καὶ σφαιρομαχίαν εἰπεῖν, τὴν δὲ Πίσκυρον τὴν σφαίρας παιδίαν*. Sed non traho hanc ferram ulterius. De *τυμωπώλαις* eximia tua conjectura. Et praecedunt certe ibi *νεκροφόροι καὶ ταφῆς*. MS. noster ibi nos destituit, ita saltem habens: *τὰ δὲ δὲ Πίσκυρος δὲ πομπήσκειν. ἔστι δὲ εἰπεῖν ἐπὶ αὐτῶν τυμωπῶλαι. καὶ ἡ παμπρ.* Ita saltem noster MS. Nec placet jam *Casauboni* expositio illius vulgati. De Agatarchide facile jam tecum sentio. Aberraveram tamen in interrogando. Non enim de illa oratione tam dubitabam, ubi Aethiopum mentio: quam de caeteris, quae sequuntur excerpta ex orationibus Hegesiae, Hermesianactis, Demosthenis, & quae mihi plus ad rhetoris alicujus institutum pertinere videbantur, quales Senecae fuit, quam historici. Sed non te diutius moror, mi amicissime Salmasi. Quaeso insubidas litteras, quales omnes meae, boni consule: non possum aliter per meas operas, & tam distractum animum. Vale, & hoc novo anno feliciter age & ex animi tui sententia, feratque ille, quem jam numeramus cum vulgo a Christo nato ciciōeviii. ingenii tui partus optatissimos in dias luminis oras. Scripsi τῇ ἀγία τῇ Φώτων ἑορτῇ, uti a Nazianzeno diem appellatum ferunt.

EPISTOLA CCLVIII.

GOTHOFREDUS JUNGERMANNUS

Claudio Salmasio S. P. D.

Heidelbergam.

Non patiar tamen, Salmasi eximie, te errare de me diutius. Amor quidem erga te meus & tui veneratio apud me tanta sunt, ut nolim tibi in ipso initio firmatae per tuas elegantissimas literas amicitiae quasi contradicere. Affectus quoque proprii, immo communes omnibus, ad laudes tam egregias, quas in me congeris, facere queant, ut ad illas conniveam. Est enim, ut Xenophon ait, & repetit Plinius noster, ἡδίστον ἄκρομα ἔπαινον. Verum addit alter, utique si te mereri putes. Id quoque meditor ego, & quum me ne quidem mereri unquam posse tam egregia dicta abs te non putem, sed certo sciam, nolim tibi etiam quid esse fraudi. Si enim verum est suo modulo atque pede se quemque metiri, nolim sane mihi aptari alienum, & qui majori conveniat. Meri nos, mi eximie *Salmasi*, pumiliones sumus, si in litteris vobiscum πῶς πειδεζῶντες Asteropaeis comparemur. Quid enim putas nos hîc posse, ubi ἀπὸ δέλης ἐώας μεθ' ἐπύρεαν βαθεῖαν εἰς ἀρχομένην νύκτα, male conciliati typographorum pueri detinent, errata erratis accumulando, ut nunquam queas satis esse securus, vel, quasi hoc mendorum stabulum satis hac die expurgasses, in utramque aurem ob eam rem dormire? Jovem lapidem tibi juro, dum hîc fui, operae meae hautquaquam passae sunt me ullum boni coloris auctorem mihi perlegere: quod tamen ipsorum ingratis fecissem, si illis potuissem tantillum surripere operae. Et tu itaque, juvenum elegantissime, quid verecundaris scribere ad me, vulgarem scilicet correctorem librorum, & qui prae tenuitate ingenii & eruditionis vix audeat prodire tenus, ultra certe desperat? Quid enim non tibi me aperiā, quem certe sua opinione falli minime velim? Nec vero leviter saltem cogitare debes, ut regeram in te laudes, quas tibi convenire scio. τῷ αὐτῷ sane μέτρῳ facerem, ἢ λατῶν, αἵ κε διωαίμην. Sed id virium nostrarum non est; & laudes eximias ingenii culpa detinere & θέρμιον. mittamus itaque hoc omne, & ad alia, quae litterarum nostrarum argumentum sint potius, properemus. Eustathii de Ismenia fabulam amoenissimam ad te mittam lubens, primum ac mihi certa occasio mittendi offeratur. Sunt MSS. duo Augustani: & tertius a *Grutero* τῷ πάντῳ nostro mihi donatus: Accedit quartus raro varians, eleganti manu, sed mendose perquam exaratus e *Thuani* vestri bibliotheca, cum Achille Tatîo pleniore longe, quam est editus & correctiore. Ipse Eustathium mea manu descripsi, vacuis pagellis interjectis, quibus inscriberetur versio Latina. Mittam illum quoque, qui prelis inservire potest. Conquiram & alia, quae super auctore ipsiusque nomine eruditi viri exquirenti responsa dedere varia. *Rigaltii* nomine promisit *Casaubonus* vester plura e MSS. regiis: sed ultra annum est, quod nihil viderim. Valde vero gaudeo de Prodrômi Rodanthe, gaudebit & heros noster *Scaliger*, qui

Tom. II.

Qq q

hoc

hoc urfit jam ante biennium. Vidi enim ipse MS. illum Palatinum, & contortiplicatis vocabulis, Graeculique manu difficili & δυσαναγνώσω deterritus resiliit: quamvis Illustrissimus *Scaliger* animum adderet, scribens diligentiae & assiduitati omne tandem id fore facile. Incipiebam sane Heidelbergae transferre Eustatium: sed omne id in spongiam incumbere jussi. Hic certe ne asperi quidem amplius: adeo se omnes amaenitates a me in hoc statu spernunt. De Anthologia diu est, quod ex litteris mei patroni amplissimi *Lingelsheimii* cognovi illa εὐαγγέλια: juxtaque tecum sensi & sentio de Planude, cui non omnia fuere plana. Credo tamen deterritum & lascivia carminum. Sed quid? Faciamus vel invitis illis inficetissimis castratoribus bonorum auctorum, ut rumpantur ilia patrum impudentiae. Si enim illi inciderint in haec carmina, antequam publicentur, actum erit, ilicet. Sed Stephano tuo quid tandem fiet? Quaeso fac ad hiemem habeamus; quum prius nobis non vacet. Da hoc reip. litterariae, quam ἔρωπι μετέσκειν video illius auctoris, & vel paciscere cum typographo non ex animi tui sententia prorsus. Diligentia sane mea in corrigendo πύτη κέν τοῦ μάλ᾽ ἀπὸ πρῶτων ἀρεσάμεν, & in quacunque sane re eam tibi usui esse posse putaveris. Dabo certe operam, ne te operae meae poeniteat, huicque negotio praevortam ante omnia, ut mendarum, quae typographorum sollemnis incuria hodie fundere solet, expers tuum opus prodeat. Cui enim bono noctu diuque invigilamus, ut σφάλματα e bonis auctoribus exturbemus, si alius turbo mendorum a typographo ingruat deinde? Nec immemor eris, quae per Cl. *Gruterum* olim monui, Scylacis Caryandeni, Martiani Heracl. &c. si versione tua illustriores queant Stephano addi. Bonum factum id putant *Welferus* & *Scaliger* & *Hoeschelius*: accedit & auctor optimus *Bongarsius*, qui id novissime ad me perscripsit. Sed charta me jam deficit, & tenui te diutius meis impolitiis, quas ignoscas, & me ideo amore tuo, quem erga me cepisti, non ducas indignum: quod me sperare jubet tua humanitas. Vale atque salve, eximie Salmasii. raptim e typographio Wecheliano, Hano-vae ipsis Kal. Maji 1607.

EPISTOLA CCLIX.

GOTHOFREDUS JUNGERMANNUS

Claudio Salmasio S. P. D.

Heidelbergam.

ITane, mi amicissime Salmasi, tuam operam semper mihi promptam ac paratam sentio, nec unquam quid posco frustra? Ah pudet me impudentiarum, pigetque nugarum, quibus te onero tam saepe, tua humanitate adeo frequenter abutens. Quid faciam tamen, si tu tam facilis, qui ne differs quidem operam rogatus, nedum negares quidquam? certe me facis iterum iterumque audere, licet non ita prorsus perierit apud me pudor tamen, ut non ideo tacitus mecum erubescam. Gratias vero habeo, quod jam tantum possum men-

te

te & animo, hisque literarum tabellis, tibi maximas pro lepidissime conver-
tendis in Latium nostrum istis carminibus graecis. Valde nossem libens
& quis illius auctor, quod sine auctore citant, non illepidum certe: ex
veteribus membr. in numero pag. 382. Ἡρόδοτος Μῆσας ξενίασάτο· τῷ δ' ἄρ'
ἐκάστη Ἀντὶ Φιλεξενίης βίβλεν ἔδωκε μίαν. Broughtonus noster in novantiquam e-
ditionem Herodoti promisit sponte carmen, & vidi jam initium, plusculos ali-
quot versus graves & elegantes: pertexeret modo quam primum. Herodoto
nescio quid adpendiculae adjecimus, quoniam nil alias in tam brevis temporis
angustiis adgredi ausi sumus, immo quaedam adgressi frustra abjecimus: sed ad-
jecimus tamen e priscis aliquot locos de dissensione veterum super auctu Nili.
In iis una cujusdam incerti expositiunculam, quam varie senserint, vel dissense-
rint potius illi, editam anno 1553. inter alia fragmenta Theophrasti & Aristo-
telis, graece ab H. Stephano. Isti unico ἀποσπασματίῳ non inveni interpre-
tem, quem itaque ipse praestare coactus sum, ne hic libellus saltem versione
destitueretur. quod quum raptim & operis urgentibus praestiterim, non est ut
me valde venditem; malim omnibus excusatus esse potius. In illo sunt versus
Aeschylei, quae an in hodiernis, quae supersunt, ejus viri tragoediis temere
reperiantur, nescio. Sunt autem isti:

Γένθ' μὲν αἰνεῖν καὶ μαθὼν ἴπισταμαι
Αἰθιοπίδ' ὅτ' ἦν, ἔνθα Νεῖλ' ἑπάρρ' ἔσ,
Γαῖαν κυλίνδων πνευμάτων ἐπιμβρίας.
Ἐν ἣ πυρωτὸν² μηνὸς ἐκλάμψαν φλόγα,
Αἴγυπτ' ἀγνὸν νάματ' πληρομένη,
Τήκει πετραίην χιόνα, πᾶσαι δ' ἐνθαλῆς
Φέρεσθιον δήμετρ' ἀγγέλλει σέχων.

Vincte ego ista extorfi.

*Aethiopiae haud incognitum terrae genus
Laudare novi, Nilus unde defluit
Humum volutans quum flabra imbres concitant;
Ubi ignea diei micans vis splendida
Flamma resolvit ningidas rupes. viget
Aegyptus omnis tum beata, flumine
Sacro tumens, segetemque laetam nunciat.*

Legisti & antea imperitorum versiones, mi amicissime, legeris itaque & istam
meam, cui si quis stipulam me adhibuisse arbitrabitur, quum hoc carmen di-
sperderem, opinione sua non falletur, quisquis est. Sed quid tibi videtur,
mi amice observande, de Graecis, usquequaquene sana? ego in quibusdam
haesi, ut satis ostendit mea ἀτάφρασις. immo ausus fui etiam duos versus mo-
vere loco, non in graeco contextu, sed in meis, nempe penultimum in locum
antepenultimi reponens, & contra. Si super quibusdam me, in quibus for-
te hic hallucinor turpiter, monueris, candidissime meorum judex, id quo-

Qqq 2

que

¹ Legendum est ἐπάρρ' ἔσ, hoc est septisfluus. Salmas.

² Legendum σμῆν' ὅτ' πυρωτὸν. Salmas.

que monebo alias. ista enim jam data sunt prelo. Caeterum inter istas *οὐκ ἀναβάσεως τῆς Νεῖλης* adnotaveram mihi & peculiare in eam rem caput Theophylacti Simocatae in illius historia, qui de hac re opinionum variarum examen se instituere suo sibi jure ait, quoniam sit Aegyptius. Quid alibi sane fecit nescio, haec, quae vulgata sunt nuper, ad verbum transcripsit e Diodoro Siculo, ne quidem nominato suo auctore, mutasset saltem ordinem, & saepius Diodorea verba, quae quidem aliquando aliter *ὡς ἀφ' ἑξέταις*, ubi tamen, ni fallor, *ψυχρολογία* non omnem effugisse videri queat, de qua re & Photius innuit. Nec putavi hoc isti debere abire adeo impune, optarique ne lucrificeret censoriam notam ab iis, quibus hoc jus datum est hodie, in quibus & te agnosco. Libetne oculos advertere ad aliquod iterum *ζητημάτιον* in Polluce nostro? Suidas ait, *πινὲς ἢ Ἀρδχέννας σοφιστὴν γράφουσι παίζοντες. πόλις ἢ Φοινίκης ἢ Ἀρδχέννα*. Et haec sollemniter Polluci praefiguntur. An vero tu legisti unquam de hac Syriaca Arduenna? & quid tibi videtur de viri docti sententia, quam ultro ad me perscripsit, nimirum de Cardyto Syriae potius quid hîc comminiscendum? Sed cur te moror diutius; quem cum Floro suo florentem & valentem hisce nundinis visurum spero, quod laete fiat, faxit summus Deus, cui te commendo, amice honorandè. Vale atque salve. raptim Hanoviae e typographio Wecheliano. a. d. xi. Kal. Mart. ciciocviii.

E P I S T O L A CCLX.

GOTHOFREDUS JUNGERMANNUS

Claudio Salmasio suo S. P. D.

Heidelbergam.

NOn tamen adeo abutar, mi amicissime, tua humanitate & benignitate, ut singulis septimanis illas *τὰς ἀφθόνας ὡς ἀσὶ τῶν Μουσῶν θύρας* pullem: quamvis ad tuas jucundissimas & doctissimas, in qua re quidem antiquum obtinent, quin continuo responderem, vix me continerem. Tamen calamum nimis prurientem repressi, & amico aliquot diecularum quietem permittendam merito cogitavi. Laudari vero abs te ni gauderem, vererer certe ne mihi soli cornea fibra esset, a tam laudato juvene, & cui placere in hoc studio plus duco, quam multis senibus. Nec tamen huic gaudio non conjunctus est & pudor multus, quum tantum abs te non mereatur scilicet nostrum ingenium, curtam sane eruditionis suppellectilem & tenuem quamvis possidens. Nam quod MS. Palatini optimi ope tot insignes locos restituerim: id fortunae potius tribuendum, qua tam bona in tam bono codice nanciscendo uti me contigit. Et res clamavit ipsa, si modo Notae nostrae unquam in lucem emerferint, quod quidem non tam mei causa, quam Pollucis exopto, *τὸ αὐτὸ βεβαῖον* tum patebit, quidquid in iis boni & reconditi, id maximam partem & fere omnem tum laudato MS. codici, tum tuo erga nos amoris & benevolentiae acceptum ferendum esse. Sed ad tua accedo propius. Quod itaque ad lib. vii. 31. attinet,

net, κρωπεῖς, & ego ad eum locum, ob praecedens πρόκω, conjeci πορκῆς, adduxique locum Pancratis apud Athen. lib. vii. πορκῆες ἀλίζωι, ut ibi Casaubonus pro ἀλίζωι legit. paulo post ναυφύλαξ habet clare & MS. Lib. x. 8. quoque non fallus fuisti. Sic enim MS. ibi: ἔρηται γὰρ παρὰ Φιλίστῃ ἐν τῇ 5, καὶ ἐν τῇ Σιμύλῃ Μεγαρικῇ. illius Simyli mentionem alibi quoque videor legisse, nec ubi possum recordari: nisi tamen memoriam meam ludit Simulus ex Moreto Virgiliano. de eo itaque amplius quaerendum quis fuerit: fane recipiendam interim MS. lectionem nullus dubito. Pro εὐήτειχον voce nihili, quod δῆτειχον reponis, & in eo MS. nostrum habes consentientem, felicissime ingenii amice, sicque ille auctior: καὶ ἐπαινῶν δ' ἂν εἴποις, σρωμνὴ λεπτή, δύφης, δῆτριχον, ὕψα, &c. qui bene jungit δύφης, & δῆτειχον. nam & lib. vii. 10. habebamus, ὕψασμα δὲ ἐστὶ, λεπτόν, δύφης, ἰσχνόν, δῆτειχον. Versus istos, quos dein uno impetu feliciter concinnas, & a me tentati sunt, adsumpto Clementis codice ad lib. vii. 22. Sed quod ego ambitiose egi, & per multas ambages, id tu simpliciter & facili conjectura agis, mi amicissime. Indicabo itaque, ubi ego diversus abii, Primum ex MS. nostro ita scribebam. ξυρόν, κάρποπρον, ψαλίδια, κηρωτήν, νίτρον, secundum juxta tecum restitueram. In tertio ego pessime, ἄγχασ' ὀλεθρον &c. quum accusativus ἄγχασαν necessario requiratur. In 4 & 5, quoque pari modo laboravimus. 6 & 7. ita ego: τρυφοκαλάσειν, ζῶσμι', ἐλέβορον, κεκρύφαλον, ἀμπεχόνιον, τρύφημα, παρυφές, ξυσίδα. In MS. enim nostro, ἀμπέχονον, τρύφημα, inveni. Ista τρυφώμα, λάσειν in MS. non erant, & pravissimam repetitionem alicujus negligentis scribae quoque putavi. 8. ita ego: χιτῶνα, βάθρον, ἔγκυκλον, κομματορίον. nam βάθρον in MS. Sed alterum magis placet. 10. ita ut tu, nisi quod μαλάκιον, quod & Hesychio nititur, cum MS. retinebam. 11. 12. 13. quoque ut tu, nam & MS. ὀλίσβεος habebat. Lib. v. 16. MS. noster ὄχθαι, βῆς, ὀλεθρον. egoque omnia ista tria adstruere conabar: sed tecum potius legendum judico ὄχθοίβεος, ὀλεθρον. paulo ante ξάνιον MS. noster, ut coniecisti: ut & ἰπποκάμπα, quae utraque restituere jussi. Quod ad πανθενεῖστοι ὄρμοι, tibi facile assentior πανθαῖστοι legenti, quum alterum non capiam. Considera tamen sis nostri MS. Scripturam, an tanti. Is enim habet, κανθεῖρυστοι ὄρμοι. ego non intelligo: & quis omnes has nugas? Pro τελωπῖς, si τελωπῖς mavis, nescio an adsentiri debeam, quum Hesychium in τελόπι lego. Cap. 14. MS. etiam diserte ὀισπώτλω. λέγνα (ea periodus in MS. deerat) ex Hesychio quoque jam reposueram. Quod ad Φιλίνλω lib. vii. 17. attinet, merito id mendosum tibi videtur. legendum enim certo Φλοῖνλω ut MS. noster habet. Locus historici nostri est, Thalia de Indis: ἔποι μὲν δὴ τῇ Ἰνδῶν Φορέσι ἐσθῆτά τε Φλοῖνλω, ἣν ἐπεὰν ἐκ τῆ ποταμῆς Φλῶν ἀμῆσσαι &c. Et quod mireris, ea lectio remansit Polluci lib. x. incorrupta, ubi ita orditur caput XLVI. Φλοῖνλω ἣ ἐσθῆται Ἡρόδοτος εἰπόντῃ. Sed eodem lib. x. ut jam quaedam abs te quaeram cap. 36. extremo, ubi Ἡρόδοτος ἣ καὶ κίταριν. in toto Herodoto non adverti hanc voculam: sed in excerptis Ctesiae Persicis apud Photium eam quidem legi. Si tu in Herodoto nosti, indica. Sed juva me in ipso fine libri quaeso,

ubi MS. noster deficit. Illa, quibus clauditur *ὀνομαστικὸς* decimus, ex Eupolidis πόλεσιν enim adnissus sum in versiculos, ut certe esse credo, reponere, sed haereo in quibusdam, nec ea constituere possum. Quodque eodem ultimo capite est, πᾶς ὃ πόδομπα, παραπίμπτει καλεῖται, non credo mendorum exsors. MS. ut dixi, noster isto capite fere caret toto. A calce ad caput regredior. lib. 1. cap. 5. καὶ τὸ χειρῶνακτες Ἡρόδοτος εἰς τὸ μέλλοντα καιρὸν. Quaeso quid hīc salis? curque hanc voculam improbens ait eam concedendam Herodoto in futurum tempus? MS. noster aliter longe, Ἐκαταῖος λεγέτω, καὶ Ἡρόδοτος τὸ χειρῶνακτες. Tum novum caput, titulo περὶ καιρῶν, incipit ita: εἰς τὸ μέλλοντα καιρὸν, Ὀφεία &c. ubi ista verba facilius tolero: nec adquiesco. Cur enim ista Ὀφεία &c. quae sequuntur, saltem ad futurum tempus spectent, causam non video. Plura jam non addo: quam de *Broughtono* nil tibi mirum accidisse putes, cum homine tam miro. Is profecto potius videtur quaerere, qui opinioni ejus adsentiantur, quam quos prius doceat. Multum hīc fatigavit Mercatores ob eam rem, & inter eos consulem *P. Schambartum*: ad quem inter alias litteras etiam scripsit, quibus me, ut audio, immiscuit. Scilicet me ipsi etiam demonstrasse locum ex Aemil. Porti Lexico Pindarico, qui egregie suam sententiam περὶ ἁδς firmet: & Heidelbergenses tamen sapere nolle. Ego de loco quaesitus mirari valde coepi, quum nullum unquam talem ipsi ostendissem, quantum memini: qui ne quidem ejus mentem percipere adhuc potui: nec valde urfi hominem quoque, sed sivi semper suo sibi modo funditare verba. Veritus ne mihi accideret quod aliis infinitis, si ad ejus ingeminatum crebro, intelligis? non fateris, ut asinus audias, & atheos, & nescio quid illi amplius solet dictare assidua bilis. Vale & Salve, mi amicissime Salmasi. Idem facere jubeo *Gruterum* nostrum, a quo responsionem ad meas expecto adhuc avide: Scripsi raptim proprid. Kal. Aug. 1608. Hanoviae.

EPISTOLA CCLXI.

GOTHFREDUS JUNGERMANNUS

Claudio Salmasio suo S. P. D.

Heidelbergam.

JAm nunciatur mihi tabellionem vestrum, qui hodie cum prima luce petafatus prae foribus adstabat, in civitate adhuc morari: rebus itaque relictis caeteris, propter opuscula tua ad te scribendum putavi illico: quamvis fortasse res non ita celeriter suscipietur ipsa. Immo si non impressorem adhuc unum nanciscamur, de quo nobis spes injecta, nulla ratione fieri posse video, qua ad nundinas vestro desiderio satisfiat. Volo autem certus esse de tuo consilio super quibusdam ad editionem spectantibus: ut omnia καδδύναμιν ex animi tui sententia prodeant: tu liquido tui animi mentem nobis explicabis.

1. Titulus saltem continet Nili libellum contra primatum Papae, & Barlaami alterum, nec additum est, Latinam versionem adjectam, quod vel propter

pter typographum tamen addendum est. Praeterea inter ipsa opusculi adjicitur libellus de igne purgatorio, Niline an alterius? Tum *Μαλίζης* quaedam Graeci & Caldenarii, sive is Cardinalis est. Haec Latine & Graece. In fine excerpta ex actis Synodi *VI I I.* & Quaestio de purgatorio, quae Graece non invenio in transmissis. Haec ista si titulo propter concinnitatem non addenda, tamen in alteram faciem primae paginae vel post praefationem tuam possent addi.

2. Velim, si non vidisses, polceres a Dn. *Lingelsheimio* vel *Grutero*, Nyseni epistolam vel illam, quam *Molineus* edidit, vel illam, quam *Casaubonus*: quamque nos ante annum recudimus. Eo modo alternatim Graecis & Latinis paginis positis & haec edere volumus: & omnia pulcre quadrabunt.

3. De lectionibus aliis, quas *Servinus* adjecit ad oram, cognosco jam e notis tuis, eas nos non debere recipere in textum: qui alias ita emendatus fuit, ut operae potuerint aberrare. Videntur tamen & aliae quaedam adhuc ad oram occurrere, a te in notis praeteritae, (non dico errata manifesta typographica) quas plane itaque abjiciamus: Idem cognovi de duobus illis locis prolixis, quos suppleant *Servinianus* & *Palatinus*: qui si in contextu recepti fuissent, debuissent tum & Latinae interpretationi addi, ut pagellae sibi responderent. Quod jam non opus: quoniam in notis tuis eos recitas.

4. Indiculum, quod tamen non promitto, adderem in fine, si forte inter corrigendum aliquid occurrat, qua in rebus, qua in verbis: si tibi non displiceat.

Barlaami Libellum propter novitatem statim arripui, & quoniam aliter non licebat, priora duo capita in prandio perlegi. Non contra te mutire audio, mi amicissime: tamen veniam mihi da, si in duabus emendatiunculis a te dissentiam. Initio-capitis: ἐγὼ δὲ ὅτι μὲν ὁ μακάριος Πέτρος καθολικὸς ποιμὴν τε καὶ διδάσκαλος ἀπάσης τῆς θεῆς ἐκκλησίας κατέστη, πάντῃ ἀληθὲς φησὶ. καὶ μὴν αὐτόσγε μόνος. ἀλλ' ἰσότημῳ αὐτῷ καὶ τῷ δώδεκα ἑκάστῳ. Tu, amicissime mi, ais legendum ἰσότημῳ. Ego prius putabam verius & capiebam, ἰσότημῳ αὐτῷ καὶ τῷ δώδεκα ἑκάστῳ, scilicet, κατέστη ποιμὴν καθολικὸς καὶ διδάσκαλος ἀπάσης τῆς θεῆς ἐκκλησίας, καὶ μόνος Petrus. Alterum erat. διὸ καὶ αὐτῶν τῆς δι' ἢ τῆς δι' τῆς πόλεως ἢ χώρας ἐπίσκοπος κατωνόμασαι, ἀλλὰ πανταχῶς αὐτὴν ἐξουσίαν ἐτύγχανεν ἔχων. Tu ais mi Dn. legendum, τῆς δαίνας ἢ τῆς δαΐνας. Mihi saltem videbatur mutato accentu certo scribendum τῆς δὲ ἢ τῆς δὲ, *hujus vel alius* certae civitatis aut provinciae, idque videbatur mihi sic eleganter & Attice dici. sed tu ignosce quod ego, qui vix ἀκρεθιγῶς attigi Hellenismos, haec ad te audeo: & metuo ne imperitam αὐθάδειαν non boni consulas. Nolim tamen de humanitate tam perspecta dubitare. Vale, mi amicissime & salve quoque, quod & *Gruterum* nostrum facere jubeo. raptim a D. xvii. Kal. Sept. *CICIDCVIII.*

GOTHOFREDUS JUNGERMANNUS

Claudio Salmasio suo S. P. D.

Heidelbergam.

EN tibi, amicissime Salmasi, de vestris opusculis primitias tuarum praefationum, quas hospes meus praeterita dominica elaboravit. Speramus autem tibi placituras. Valde vero voluisssem additam fuisse *Vulcanii* praefationem vel titulum: potuisssem inde quid sequi certius, quod ad caeteros libellos Nilo adjectos attinet, de quibus nil tibi monitum video. Praeponemus autem Nilo & adjectis istis peculiari pagella post praefationes tuas titulum, qui indicet Nili duos libellos, & e *Vulcanii* interpretatione eos esse: tum adjectam *Δι' Ἀλέξιν* vel *Δι' Ἀλέξεως ἀρχὴν* Graeci cujusdam & Latini: tu excerpta loca similia e Nilo: tum libellum de igne purgatorio: omnia (ni fallor) ex ejusdem *Vulcanii* interpretatione: sic enim adponam, modo ne falso. nam editionem eam in primis pagellis non vidi. Exinde sequitur Barlaam quoque novo titulo, qui indicabit *Luydum* interpretem esse. Tum notae tuae in utrumque: amplissimi vero Domini *Lingelsheimius* & *Bongarsius* volunt, ut inferamus contextui, quae a *Servino*: & monuit me Dn. *Lingelsheimius*, in notis tuis interpretationem eorum fragmentorum inventurum. Sed nihil tale ibi: nec inferam itaque: sed qui velit cognoscere, is sane tuas notas non gravate adire poterit. In praefatione tua ad lectorem ibi: *Et cum nos quoque in codice Palatinae bibliothecae, ejusdem Nicolai Methonensis disputationes aliquot adversus Latinos, item dissertationem Basilii Thessalonicensis Metropolitani, hoc eodem usi argumento* &c. mihi omnino verbum deesse visum fuit; & ausus sum addere; *Metropolitani invenerimus*, &c. Et in prima praef. *Nam ut caeteras tuas virtutes nonnunquam, quae maximae sunt. jussi opas edere non tantum, quae.* Sed o me miserum criticum: fere tua certa corruptela affecissem. In ultimo enim specimine, quod jam exhibetur, cogito legendum *tangam*: & tu jam editum habes. Si non recte, condonabis tamen nostrae sollicitudini, & indicabis, quid tu volueris, id referam inter Errata ad calcem libelli. Ut & hoc quod ibi *Stilus hujus, quem edimus plenus, aequabilis, illius alteri, multiplex* &c. fecerim *alterius*, quum te mihi non persuadebam voluisse *ἀρχαίον*. Sed currente calamo emanasse *συνάβιον*. Ut & in notis tuis: *Haec quidem haftenus. Quae data fuisse omissa, vel caeco appareat* - non dubito addere: *Quae data opera fuisse* &c. Haec tamen omnia tibi indicanda duxi, ut si quid temere, in Erratis adhuc sit corrigendi locus. Nam in tuis ne apicis mutandi libertatem mihi fumo absque metu. De Barlaamo sperabam quid a *Gernando* vos impetraturos: sed spem abjeci post Domini *Lingelsheimii* literas. Alias is, qui apud *Gernandum* degit, mihi certo affirmavit, *Luydum* quaedam *Sylburgio* misisse ad Barlaami vitam pertinentia, quae praefigerentur, si quando hic libellus ederetur. Si salvi & incolumes fuerimus, in ipsis nundinis adhuc istos libellos extrudemus. Spec-

cimen si cum amplissimo *Lingelsbennio* communicaveris, quem officiose saluto; ut & *Gruterum* nostrum, scio te rem gratam facturum. Meas notas in Pollucem, bonam partem tuas, hac hieme se editurum Marnius promisit: nisi mole audita deterritum iri sperare debeam. Et quando tuus *Stephanus* emittetur? O te durum! vel sola ejus mentione in notis tuis torquere nos iterum voluisti. Sed ne haec epistola sine *ζητημάτων* finiat, quaeso doce me emendare, vel intelligere ista in scholiaste Aristoph. ad *Ἀχαρνῆς*, paullo a fine longius: *ἀγορεύειν, ἐν ἀγορᾷ διατρίβειν, Ἀττικῶς, ὅθεν καὶ Κορινθία ἐστὶ τὸ Πινδαρεὺς Ἀττικισί. ἐπεὶ καὶ ἐν τῷ πρώτῳ τῶ παρεθνίων ἐχρησάτο τῇ λέξει.* Pindarum *παρεθνία* scripsisse e Suida mihi notum. Sed Corinna quid hîc agat, id non novi. Et quid τὸ *Λύδιον πάθῃμα* apud Pollucem lib. 1. cap. 10. mea memoria mihi non indicare vult, quum tamen tale quid videor certe olim in historia legisse. Vale, mi amicissime, & impudentis amici mores noris, nec oderis, & salve quoque. raptim e typographio Wecheliano. a. d. 10. Kal Sept. c10 10 CVIII.

EPISTOLA CCLXIII.

GOTHFREDUS JUNGERMANNUS

Claudio Salmasio suo S. P. D.

Heidelbergam.

Languidum te fuisse, quum proximas scriberes, illae quidem mihi indices: quamvis ex illarum filo eleganti, & sibi simili, ut alias, id nunquam coniecissem. Sed respicies tamen te, immo nos, & cui te debes, publicum inquam bonum, & vel ejus causa ita studia tractes; ut diu tractare queas. Scimus enim quam in illa re sis tibi inclemens, & quam valetudinem contemnas, ô ferree. Quaeso vero in ea re resipisce, nec te prode nobis. Mihi sane *ἐδέρως*, quamvis id Stagiritēs neget recte dictum, *ἐχοντι* tuae redditae sunt, immo per totam Hebdomadam hanc porro non tam valui, quam male habui. Credo aëris τὸ *παραχῶδες* in causa esse, & quum eo sereniore me rursus firmiorem fore. Libellos vestros tandem in ipsis nundinis extrudemus: ubi valde conflictor cum operis imperitissimis, quod ad Graecas literas componendas attinet: adeo ut non raro & inter nos sit *ἀγέτης*, ubi ego tamen, non secus ac papa, primatum obtineo. Sed τὸ *πάπαν* ἔκ *αἰεὶ ὀρθοπαθήσαι* ostendit Nilus, & nos quaedam vitia proculdubio oculis male lippis pervidebimus. Cumulant enim plane *σφαλμάτων σωρακόν*. Raptim videbo ad relegendum ut temporis aliquid suffurari queam, & si quid adhuc erratorum videro, nec aberunt credo, sub exordio libelli ponam, cum tribus vel quatuor meis conjecturis leviculis, quae interim dum corrogo in mentem venire, *πάντα ὑπὸ μίαν μύκωνον*. Tua quod adeo extenuas, apud me opus non erat, minime nempe credulo, & qui se ipsum non nihil plane judicare posse putat, nec in tuis nisi eximia multa advertit. De Floro oppido quoque gaudeo. Sed cum vere & aestate debebas: tu mirus in ipsa hieme *θανυμασίως* nobis profers flores. Alias in tuis me ita gessisse videbis, ut

Tom. II.

R r r

nul-

nullam causam expostulandi habeas. Sex vel septem variantes lectiones a *Servino* additas, quae non fuisse videbantur, tuis inferui, sed verbis spero tuis. illius loci corruptelam utinam in tempore advertissemus, quo ei mederi licuisset. Ecce enim in libello *πεὶ τῆ καθαρτηρίας πρὸς* ab operis Lugdunensibus in Graeco male tota linea omissa est: nempe ubi narrat quomodo J. Chrysostomo adparuerit B. Paulus: *τὸ ἐν τέλει πινὰ δυσυχία χρησιμειον, καὶ ὀργῆς παρὰ βασιλικῆς, τὸ δὲ Πρόκλον ὑπαινίσσαντα τὴν ἑδωματοῖς θύραν τῆ διδασκαλίας* &c. Ecce hic omissus integer versus, ad sensum necessarius, sine dubio ab operis, quae fat negligentes alias fuere. nec *ἔλλαμμα* notatum est. Interpres sane integre vertit: *Quidam e primoribus urbis rebus suis male affectis, quique regiam indignationem incurrerat, noctu ad magnum hunc Johannem venit, precaturus ut sibi regem placaret. Proclus autem, quum recluso domunculae ostio.* &c. Francofurtum mihi vix ire licebit: mallet enim *Marnius* operas pergere per totas nundinas. Erit tamen eo excurrendum vel per dieculam negotiorum privatorum causa. Clarissimum *Gruterum* officiose saluto, qui sine dubio aderit & forte aliquando ad nos huc exurret. Vale atque salve, mi *Salmasi*, & tuum *Jungermannum*, ut facis, ama. Deum omnipotentem oro, ut te diu nobis servet. raptim a. d. 6. Id. Sept. MDCVIII. Hanoviae.

E P I S T O L A CCLXIV.

GOTHOFREDUS JUNGERMANNUS

Claudio Salmasio S.

Heidelbergam.

QUO longius in Polluce progredior, eo me certius puto deprehendere causam, quod haecenus nemo exortus fuerit, qui serio illi operam navare ausus sit, eque sua recensione in publicum emittere voluerit, operis nimirum varietatem, quam multis modis difficilem reddit vocabulorum multorum varietas & ignorantia, plurimorum vero corruptio & depravatio. Quae omnia experior desiderare ingenium *Salmasianum*, id est felix, & expromptae memoriae: idque quum meo, in quo nihil praeter vulgare, tam prompte, tua comitate adminiculetur, non possum non gaudere satis: qui tantum amicum inveni, cujus opera mihi benigna ubique licet in obscurissimis locis, & ubi antea alta & mera nox. Utar porro, mi amicissime Dn. ita enim te velle, quod tuum *τὸ ὑπεράγαλιν Φιλάνθρωπον*, incoram mihi adfirmabas. Et quid quaeso vocabuli est illud *πεισφίς* in fine lib. 2. ubi *περὶ τῶ δερματι* recensentur: *ὑποδερὶς, πειδερὶς, πεισφίς, πειδέραιον*, &c. reliqua sane in MS. Pal. habentur ibi; sed illud, de quo quaero, non adparet. Quid quaeso vocabuli lib. 3. cap. 20. *περὶ ποταμῶν* statim initio, *γαμαπία*, quod etiam in MS. deest? ineptiebam forte, *γομαπία*, a *γάμα*, *γέρομα*, quasi tumentes: sed te audiam. Et libet paullo altius repetere librum III. Pollucis: Ibi c. 2. *τμ. περὶ τένων* fine, locus videtur tua consideratione dignus: ἢ (*μηκέπ τίπτεσαν*)

ἢ ἀνελήθειαν φίλον τοῖς ποιηταῖς καλεῖν. MS. η. κ. ἀνελείθειαν οἱ ποιηταὶ καλεῖσι. *H. Stephano* videtur verisimilius ἀν' εἰλείθειαν, ut apud *Hesychium*: alias enim fore σωθέειον, ἀνελείθει. An itaque *Pollucem* errasse dicamus? non puto. Sic enim & *Suidas* una voce, & *Etymologus* in εἰλείθειαι. Turbat me insuper & *Hesych.* apud quem ita: Ἀν' εἰλείθειαν, ἀνὰ τόκον. Εὐερίπιδης Ἰώνι. Ego nil tale in hodierna *Jone* invenio. Nam illi versiculi in media fere, ubi chorus, σὲ τὰν ὠδίνων λοχίαν Εἰλείθειάν περ ἐμὰν Ἀθάναν ἱκετεύω &c. nihil ad rem credo. lib. III. tm. 2. initio: ἢ περιμήσειαι (MS. περιμήσειαι) μὲν &c. Σικελιώται δ' αὐτὰς καλεῖσι περιμηθυρίας. MS. Pal. περιμυθικρίας. *H. Stephanus* mavult περιμηθηρίας. Quid tibi videtur? lib. IV. plusculum a fine: ἢ ξενίζεν, ὃ οἱ μὲν παλαιοὶ τὸ ἐστὶν λέγουσι. MS. longe aliter. πολλοὶ enim pro παλαιοὶ habet. lib. VIII. tm. I. ἀλλὰ ἡ δαλεία, κατὰ Θεκυδίδην. τὸ ἔργον αὐτῶν, δαλεία, δῆλον, &c. Suspicor de mendo. quorsum enim repetitur δαλεία, an tum pro opere & actu fervorum, ἔργω ut *Pollux* ait, capiendum? prius sane περὶ πλήθους δέλων dici, locus *Thucydidis* satis ostendit, qui est l. γ. ξυγγε. in ξυμμαχία Athen. & Laced. ἦν δὲ ἡ δαλεία ἐπανίστηται, ὅπως εἶναι Ἀθηναίους Λακεδ. ubi & ejus Schol. Cap. XIII. ubi τὸ γὰρ σκελύθειον, ὑπομόχθηρον. MS. σελύθειον τὸ γὰρ σκελυθεῖ. ὑπὸ. quibus quid faciam, nescio. Cap. XIV. ὦρξαι δὲ κρατίνω, βάδισμα MS. nova voce κρατίνω δὲ βαδισματίας, quod an de equo gradiente, vel gradario accipiendum? qui solutim badiffat, ut *Plautus* jocatur. Eodem cap. XIV. ubi: ἢ οἱ τοῖς ἀναβαίνουσι βοηθῶντες, ἀναφέρουσιν αὐτὰς ὀρθαῖν ταῖν χεροῖν. MS. longe aliter: ἀναβαίνουσιν αὐτὰς ὀρθαῖν ταῖν χεροῖν, ἢ σημαῖν ταῖν χεροῖν. Illud ἀναβαίνουσιν videtur mihi errore librarii oculos in praecedentem voculam intendentis contigisse, ut & τὸ repetitum ταῖν χεροῖν. Ex σημαῖν ni fallor facile fiat σημαῖν. Et *Stratores* puto exprimi. Audiam tamen tuam sententiam: in quam quaeſo & hoc conjice, cui vocabulo ἀναβολέων *Pollux* abſtineat? an nullum apud Graecos vocabulum, sicut *Molineus* vester nuper adfirmavit, quod exprimeret eum, qui herum equo deponat. Addam unam vel alteram corruptelam insigniorem, tuo feliciss. ingenio profligandam:

Lib. X. c. penult. ἢ πολλὰ ἐκείνῳ τρυπήματα εἰσπέληπται, μίλιγδ' καλεῖται. ὅθεν ἢ Σοφοκλῆς ἐν αἰχμαλώποισιν, Ἀπὸ μίλιγδ', ὡς πύκνωμα πὶ ὀπιπόρπωμα δὲ, καθαρωδὲ σκευῶς, ὡς Πλάτων, Δότω τις ἐνδοθεν ἢ ὀπιπόρπωμα. Sic vulgo. jam notabo MS. lectionem. ἐναπολείπεται, μήλιγδ'. αἰχμαλώποισι, Ἀσπίς μὲν ἡμίλιγδ', ὡς πυκνὸν πατεῖ. σκευή, ὡς Πλάτων ἐν ταῖς ἀφ' Ἰερῶν, Δότω τὴν καθάραν τις ἐνδοθεν ἢ τοῦπιπόρματα. Sed emendatum videtur, τὰπιπόρματα. Ejusdem capitis finem tibi totum ex MS. praesento, ipse, si vacat conferre cum vulgato potes: θεωμάζω τὸν τὴν δαπιθάκην (sic sunt priora deleta alterius manu in MS.) πότερ' ὅσρακίην ἢ βίβλον ἔχων τὴν δήποτε Ἡρόδοτ' δ. κ. κ. ε. ἢ ὁ Ἀναξίλας Βότερος (in margine βοτρυδίῳ) sic est resutum, διωνίου κᾶν γε μήπῃς πὶ γένηται κεράμινον. En monstra, quae te *Herculem* laceſſunt. Mihi nihil hic virium. Quam praeclara vero nos docuisti de ternis remigum βόλοις, & δὲ ἐταιριδίῳ Corinthiacis deque loco *Callimachi*: pro quibus gratias tibi meo loco aget aliquando posteritas. In tantum, si vacat, & caetera ad nos

mittere ne dedigneris, quae Pollucem percurrens, adnotasti. Non sic laetetur pertrepidum cor, si quis vel τὴ γυράδα χρυσὴν καὶ ἀργυρεὴν nobis dona ferat. Alias mihi in recenti memoria, quae dum Francofurti tam charo & amico ore incoram frui dabatur (ὦ Φίλε, σε ἀπ' Αἰγίλῳ ἰαχάδα τραγῆν Ἀδείαν ὁμοσαίμην) auribus his hausi, de ἡμιάμβοις, pro μηνιάμβοις l. 4. reponendis (quo pacto credo & Casaubonus suspicatur) & de παραιοῖς ξύλοις, quae prorsus ita scribenda erant praecedit enim statim eodem loci de παραιοῖς δεξιῶ καὶ ἀριστερῶ. οἷς τοιαῦτα ξύλα ὑποπεπηγμένα ait. *Marnius* noster ad me misit *Herodotum* ex ultima (anni 1592) editione *H. Stephani*: vultque illum hac hieme excudi. Ego ut aliquid adferrem; tempus Polluci adhuctribuendum si fineret, prorsus tamen nec pransus nec paratus ad hanc rem essem. Bonum factum erit, si ad exemplar illius καλλίστη τῶ τοπογράφων Στεφάνου fideliter auctor ille edatur & correcte. Si tu tamen quid nosti, quo dare aliquid solemni typographorum desiderio possemus auctius, vel additamenti vice, consilio & ope nos juvabis: idque ut facias rogo. Non dubito hinc inde ejus auctoris locos a Scholiastis laudari: sed cui ea collecta, non scio. Vale atque salve, mi amicissime Domine, & longas ac infubidas litteras boni consule. Scripsi Hanoviae A. D. vi. Kal. Octobr. CIO IO CVIII.

EPISTOLA CCLXV.

GOTHFREDUS JUNGERMANNUS

Claudio Salmasio suo S. P. D.

Heidelbergam.

I Gnosce, mi amicissime Salmasi. muto institutum tuis forte ingratiis. heri scribebam ad *Gruterum* nostrum, & inter alia in sequentem hebdomadam me tibi iterum molestum fore minabar. Jam περήμερθ· venio audaciter nimis, qui si sustinerem meas diutius, scilicet ὑπερμερείας fortasse γράφεσθαι ἔμελλον. Sed ea libido peccandi fuit, quam si non intendere velis, noli ipse tam promptus esse in respondendo. quid dico? ah sis potius porro mihi tale unicum μαντεῖον. & amiculi mores noveris, non oderis: quamvis nimis tamen impariter inter nos comparatum est. mihi in quaerendo labor parvus, tibi vero in respondendo nonnullus, quem tamen praeclarum ingenium, quod summus ille εἰδὼν δωτὴρ tibi largitus est, facile profligat. Sed ad tuas aliquid prius, χωματίας, ut verum fatear, mihi etiam in mentem fuit, sed vix tam fuit atque excidit: quod ejus vocolae considerationem non persequerer, vel quid conjecissem intelligerem. nunc ex tuis scio sensum nominis, quod me scire ipse prius nesciebam. Locum illum, ibi δαλεία inculcatur, bene expedis. Sed sequitur tamen eodem temmate statim. καὶ ἔργον δαλικὸν καὶ δαλοπρέπεια. &c. hac ratione vero erit repetitum illud δαλικόν. sicut antea δαλεία. sane perturbatus est locus. audi tamen, mi amicissime, quid mihi denuo jam incidit, quod non probo, nisi tu adprobas. locus sic legendus: ἀλλὰ ἡ δαλεία κατὰ Θεκυδίδην. τὸ ἔργον αὐ-

αὐτῶν, δῆλεον, δῆλον, δελικώτερον. &c. de δῆλειον vix dubito. δῆλον non invenio sic: nisi δῆλα σώματα, quod bis statim ponit Pollux tm. 2. hoc cap. viii. quamvis in extremo l. 2. sit δῆλοσώματα, forte mendose, quum statim sequatur, σώματα οἰκῆα. Platonis locum. vero a te explicatum adgnosco, uti tam eleganti ingenio dignum. de ἀναβολαῖς video verum esse & inquirendum etiam hic in huiusmodi Φιλολογήμασιν illud Cassianum, cui bono. Aristophanem vero diligenter lectum oportere ei, qui Pollucem feliciter aliquammultis locis restituere velit, ex tuis, uti περὶ κολλύβας, facile video. En ut & ego interdum, tamquam ut patriae meae idiotissimo utar, & gallina caecutiens quamvis interdum etiam reperiat granulum, non plane sum infelix. Libro enim iv. Cap. 2. ubi Ἀριστοφάνης ἢ παίζει ἐν Θεοδοσιαζέσσαις, λέγων ἢ γραμματέας, voculam ultimam plane corruptam advertens, in manus statim illam fabulam fumo, & prius quam dimidiam parvo intellectu & raptim percurrissem, perveni ad cubile illius dictionis, & menda remota, legendum adfirmavi, ἢ γραμματῶς. hoc est quod joco foeminae hoc vocabuli tribuere ait comicum. Verfus est ille, si recte odoratus fui: τὰ δ' ἄλλα μετὰ τῷ γραμματέως συγγραψομαι. Sed ad te, mi Salmasi eximie, revertor, qui si me ex uno expediam, infinita contra sunt, in quibus haeream: e quorum numero sunt & ista, quae tuam curam deposcunt a me relicta. L. i. i. Cap. 15. fere extremo: Πλάτων ἢ τῷ ἀγορεύσεως εἰρηκεν, ὡς τῷ ἀγορεύσεως Τηλεκλείδης. repetitio huius vocis prodit mendum. an ἀγορευσίας altero utro loco legendum? vel si aliud mendum suboles, doce me. In eodem cap. pro ῥῶπος legendum ῥῶποι, unde ῥωπικόν. Dabo tibi alios ejusmodi errorum modos: nec enim credo in junctis lineis Pollucem tam negligenter voces repetiisse. Eodem libr. cap. 28. ὅππῃ ἢ ἐπαίνος, ἴαροςος, ἀψυχία, ἀπολμία, ἀδεία. τὸ γὰρ ἀτολμία, πάννυ ἀπελές. atque antea ἀτολμος, & postea ἀτόλμως, non sunt nostri ἀπελῆ. an itaque primum τολμία delendum? Aliud dico. eodem cap. Φιλοσώματῳ, ἀψυχῳ, καπε-ἀπλήξ. ὁ γὰρ ἀψυχῳ, σφοδρεα καμικόν. non me expedio, ni prius tollam. incidit tamen pro priori reponi posse forte ἀθυμῳ haec in MS. defunt singula, quum tantum MS. habeat ibi parvam epitomen. Ejusdem l. c. ult. tm. 3. fine: τὸ μέντοι προδραμεῖν εἰσάσαντα ὀπιλιώκειν, ὅπερ ἐν τῷ σφοδρμαχίαις γίνεται, προδοσία ἐλέγετο. sic & MS. Legistine aliquid in Tacticis de hac προδοσία; ego nil invenio. Eodem cap. ult. tom. ult. σετωμασκηκῶς, ἀδικομαχεῖν, ἀσκητής &c. illud ἀδικομαχεῖν MS. etiam habet, ego non capio. Lib. iv. cap. 1. extremis verbis: καὶ γέναι, καὶ ἰάναι, καὶ ἰᾶσθαι. agit de verbis ἀστυπικῇ & ἰατρικῇ, prius emendo ἰσάναι, ut infra c. 24. alterum ἰάναι, ab ἰαίνω est, nec huc pertinet, nisi ejiciam. Sequitur enim ἰᾶσθαι, infra quidem & penult. est, ἰᾶσθαι, ἰάσσοσθαι. Eodem l. c. 3. καὶ τὰ περάγματα, δεινότης &c. ἀφθονία, ἐπιμέλεια, &c. ἀφωνία, ἀφθονία, βραχυλογία &c. hīc iterum talis error? quales ante adnotavi. Eodem cap. δι' ὧν ἐστὶ πορὺς ἐξέρειν. &c. si antecedentia & sequentia considero, videtur mihi illud δι' ὧν mendosum. ita sane vox etiam praecedens in mendo cubat. quae omnino delenda sunt & leg. περάγματα δι' ὧν ἐστὶ &c. Ibidem paullo post, ἀπατάσθαι, δεδιξασθαι, διδάσασθαι. Est phraseologia.

bi non legi: adnotavi tantum MS. varietatem modo *σάμαξ*, modo *σάναξ*. *σάμαξ* mihi alias placet magis. Hefychius me valde firmat, cujus verba tibi nota non adscribo. Ait etiam quosdam a *σάτιεσθ* deducere: in qua certe sententia & ego fui, antequam legerem. Ab eo verbo certe & *κάλαμ* ὁ *σάκτης* vel *σάκτας*, cujus *ρίψ* nominatur a polluce *σάμαξ*. ἐν *σάμακ* itaque dormiebant milites, in expeditione credo, quasi ἐν *καλάμῳ* *σεζαμένῳ* ὡς ἐν *σιεαδίοις*, uti & Hefychius innuit, qui & aliam *ἄλλῃ* quoque narrat. Sic mihi videtur; quod rectum putabo, si tu accesseris. De *Chalcedonia Demoneso* lib. v. cap. 5. tibi facile assentior: sed *καρχηδονίων* expresse habet Aristoteles, uti ipse vidi, *περὶ θαυμαζ*, *ἀκκς*. De *Teumestria* vulpe ibidem locum quoque inveni in nuper recepto libello *Metamorph. Ant. Liberalis*. Et patet mihi ista omnia Pollucem deprompsisse ex Nicandri *ἐτεροισμένοις*. De *Psyllicis* & *Menelaidibus*, intricata res. Versus vero illos quod emendasti, gratiam habeo, Jam enim ideo ad te issem. Non intelligebam sane *λῶκοςεάτον* *τύμβειν*. H. Stephanus nihil ausus erat, nisi prima ita emendare, ἢ *σεῦ* *ἢ* &c: In *ἀνισας* magis haesi, ubi H. Stephanus *πολυρρίζον* emendabat, praeterea nihil. Illud *ὠκύταλον* quidem & mihi incidit. Sed liceat jam quaedam majoris pretii addere, & ubi aetatem haeceam, nisi tu juves. lib. iv. cap. 7. tm. 2. *Πλάτων* ὃ ὁ *κωμικός*, *ἢ* *συβωλικόν*. ὅτι δ' ἂν ἡ *συβώτεια* μ. η. δ' ἀγαθὴ γῆραίτο μοι. ἔχῃ ὃ μόνον *δακτύλας* *αὐλητικὰς*. MS. hīc *λείπῃ*. Tu redigas & illustrabis mihi, mihi mera caligo in talibus. Noſti de *ιαμβύκη* initio cap. 9. Est locus Isidori 3. Etymolog. 1. *Psalteria*, *lyrae*, *barbita*, *Phaenices*, *ἔ* *peſtides*, *ἔ* *quae dicuntur indicae*, *ἔ* *feriuntur a duobus simul*, putabam forte & hic legendum: *ἔ* *quae dicuntur jambycae* &c. Delrio enim nimis abire puto, qui *ſcindapſi* emendat. Eodem lib. c. 10. tm. 1. quaero qui ſint *σύεινες* *ὑπότεροι*, uti & MS. habet. tom. 2. vulgo *Θερεσκίων* ὃ, τὸ *ἀργολικόν*, ὃ ταῖς ἀνθεσφόροις ἐν ἡρῳ, ἐπὶ ἦλθεν. MS. *ιερεσκίων* ὃ τ. α. ο. τ. ἀνθεσφόροις ἐν ἡρῳ ἐπ. Bene *ιερεσκίων*. De Hierace enim paullo post noſter. Et ἀνθεσφόροις etiam puto rectius. Αἱ ἀνθεσφόροι credo ὑπὸ τῷ ἀνθεσφορέων, quae Proſerpinae feſta novi e noſtro. ſupra l. i. c. i. de ἡρῳ nescio quid dicam. vulgatum ἡρῳ capio. ſcilicet ὡρῳ ἡρῳ. De Serrite Pollucem adiri jubent hic *Catubonus* & *Bulengerus* ego ne gry invenio, ſed apud *Athenaeum*. Ibidem ſtatim poſtquam de *Antheſphoriis*: οἱ ὃ *Εὐίς*, *κύκλιοι*. MS. monſtroſe: οἱ ὃ *σύις* *κύκνοι*. Eodem l. c. 11. *ἢ* *Μένανδρῳ* δέ τινας *καλεῖ ἀριſτοſαλπικτῆρας*, *ληſαῖς* *ſαλπικτῆρας*, quinam illi *ληſαῖς* *ſαλπικτῆραι*. Mihi erat in mente ineptum quid, *λῶſας*, ſed me hercule adſcripſiſſe paenitet pudetque. Sed proſecto jam tibi locum proponam, quam ſi reſtitueris, eris mihi magnus *Apollo*: *ἢ* τὸ μὲν ἐπιſτάδιῳ τῷ *ſαλπικτῆρι* *ᾧ* *ᾧ* *φέρειν*, εἰς *πεντήκοντα* *ſάδια* τῇ *ſαλπικτῆρι* *διῖκνέμενον*, ὡς περ ἡμόλοκρον ἐπὶ τῷ *Φιλοπάτορῳ* *αὐλήσαντα* *δύο* *ſαλπικτῆρας* *ἰſαῖ* *ἔωλον*. Quid enim ἐπιſτάδιῳ. An forte aliquis *Epistades* tubicen dictus? quis dein ille *Hemolocrus*? & quid illa ſine ſenſu *ἰſαῖ* *ἔωλον*. MS. hīc deficit. C. 12. εἰς ὃ *Φιλομήλειαν* τῷ ἐπ' αὐτῷ *παραλθόντων*, οἵτε *καλέμενοι* *πόδες* *ἐνεθέτηθησαν*, *ἐλεγχον* *ἔχοντες* εἰς *μῆκα* *πνύματῳ*, *ἢ* *πολλῶν* τῷ *ᾧ* *τὰς* *νεῶς* *ᾧ* *κοδομημένων* *ἔκδοσιν*, *ſαφωείας* *τινός* *δεομένῳ*. Locus hic vel non ſanus, vel non clarus, mihi quidem: nil poteram praeter *ἐνομοθέ-*

τηθησαν faciens ex ἐνθέτηθησαν. Mendosum esse pronuntiavit & *H. Mercurialis*, emendare tamen non ausus est. De versiculis mox, quae Archiam Hyblaeum spectant, nolo tibi narrare mea commenta. Emendabam tamen quos mendosos putabam. ὅς τις ἐκάρυξε τὸν Ὀλυμπίαν· αὐτὸς ἀγῶνα ἔθ' ὑπὸ σαλπ. quatenam illa ἀναδείματα mihi obscurum: nisi quod in Hesychio legam exponi, ἡνίας πρὸς τετραγύλοις. Unde putabam innui eum non in curuli certamine victorem, qui lora non tenuerit. Sed nae tacuisse satius erat, quam de quibus mihi non liquet, narrare tamen tibi mea somnia. Plura jam non addo, quam ut valeas, atque salveas ex animi tui sententia, id tuum Jungermanum ex animo precari, qui scribebat haec A. D. iv. Kal. Dec. e Wecheliano typographio. ciciocviii.

EPISTOLA CCLXVII.

CLAUDIUS SALMASIUS

Gothofredo Jungermanno S.

Hannoviam.

LEgi nuper tuas, mi Jungermanne, quas mihi communicavit Gruterus noster. Illae mentionem mei ferebant, ex quibus me nondum tua memoria excidisse cognovi. Sed pene memoria viventum excidi, ita me morborum pessimus per has quatuor septimanas pessime habuit. Quam pene furvae regna Proserpinae &c. Nunc neque melius habeo, neque melius spero. Deus tamen aderit, & salvum me praestabit. Hodie venae sectionem, nunquam antea expertus, omnibus rebus quasi desperatis, passus sum. Tuum casum non diu sanus cognovi, & dolui: ut scias quantum de viribus cum animi tum corporis diminutum sit, has inspicere: multa quidem mira & magna minatus in hanc hyemem eram; sed Deus ille me plane μετὰ Φρονέοντα ἐταπείνωσεν. Nunc itaque agnosco quam multa homines sibi fingant, quae numquam futura sint. Vale, mi Jungermanni, tuumque Salmasium, ut antea solebas, nunc etiam ama. Kal. Decembr. ciciocviii.

EPISTOLA CCLXVIII.

GOTHOFREDUS JUNGERMANNUS

Claudio Salmasio suo, utinam jam sano & salvo, S. P. D.

Heidelbergam.

AMice care atque honorande. Doleo ob morbum tuum, qui profecto me non mediocri tristitia affecit, quum primum de eo cognoscerem e tuis, & mei *Lingelsheimii* literis. Deus te quamprimum pristinae sanitati restituat, & bonis literis atque amicis caris diu diuque conservet. Eam ob rem vota facio, quorum ut fiam quamprimum damnas, avide ex tuis literis cognoscere cupio. Insomnia vero pari usi sumus, mi amicissime, uterque. Mirabilis
Deus

Deus in operibus suis, cujus nomen sit benedictum in saeculum saeculi. Ego te tamen vici isto pervigilio injucundo. Ultra quatuordecim dies somnum oculis non vidi in mea febris, dumque supinus (quasi trabali enim clavo lecto dorsum meum ob pedis cruciatum immobile figebatur) ita eodem loco jacerem, nec in alteram saltem, nedum utramque aurem possem quiescere. Si oculos clauderem paullisper insolens terror, unde statim pedem meum *σπᾶσαι* contingebat, quod & tussis vigilanti quoque malum oggerebat assidue. Vel legi itaque vel legentem audire fui solitus. Et misericors Deus ita affecto ne ullum tamen delirium vel capitis dolorem sivit accidere. Sed ego tibi sum inolestus, amice doctissime, dum ita de me longum sermonem infero: pes tamen meus ad officium suum non redit, & desperant medici nostri, ut video, nisi in tempore me conferam ad thermas. Neglectim nimis chirurgus in ea re fuit. Deus clementia sua me respiciat. Animus alias erat, dum ita *ἐδεῖν καὶ θῆμαι* per totum diem, suscipere tandem in manus interpretationem Harpocratonis lexicī, & ejus editionem adornare: in eamque rem confeci indicem omnium auctorum & scriptorum veterum, qui ab eo laudantur, ubi multa vidi corrupta, quae restitui non sit difficile: multa vero quoque de quibus prorsus despero, nisi a te tuique similibus (quos ubi quaeram?) auxilium feratur. Nolim tamen intempestive tibi movere jam taedia: quod tamen jam imprudens fecissem, nisi meus morbus & diuturnus ab eo languor haecenus vastasset. Alias ambae officinae *Marnii* nostri occupantur & occupatae erunt hac hieme in Medicis potissimum, & Theologicis. Pudet me vero tam leviter tecum fuisse nundinis proximis: sed certe subrepens jam tum febris, & tussis *Φθισικόν* π subsonans, me ad omnia reddebant tardum & defessum. Tu operam dato, mi amice, ut quamprimum te audiam convaluisse. Musis nostris haec evangelia erunt, & mihi laetior nuncius veniet nemo. Faxit id Deus, cui te & tuam valetudinem commendo ex animo. raptim e typographio Wecheliano. Hannoviae a. d. v. Id. Dec. 1608.

EPISTOLA CCLXIX.

GOTHOFREDUS JUNGERMANNUS

Claudio Salmasio suo S. P. D.

Heidelbergam.

GAudeo magnopere, amicorum eruditissime, te a morbo tuo tandem liberatum esse atque convaluisse: & summum illum *ζῶων καὶ ψυχῶν παύσας* precor, ut optimam tibi porro largiatur valetudinem, teque diu salvum & incolumem bonis literis nobisque conservet. Et hoc meum votum anno illo novo, in quo jam agimus, & ut feliciter tecum peragamus. Certe sollicitum me valde habuit tua invaletudo. idque omnibus meis literis tam ad Cl. *Gruterum* nostrum, quam ad *Lingelsheimium* meum sum testatus. Intelligo enim quantum in te praesidium resp. literaria & totus Musarum chorus amitteret: prae-

Tom. II.

Sff

fer-

fertim jam ubi Musageta ille unicus, pro dolor, *Scaliger* noster δ πένυ diem obierit. Vixit quidem ille sibi satis, immo & gloriam eam sensit vivus, quae paucos sectatur mortuos: at nos isto ingrato & insolenti saeculo nunquam non possumus tales viros ex animo desiderare, si vel ad Pylios annos pervenirent. Quod quum longe supra vota nostra sit, neque fieri queat, quid aliud solatii nobis repositum putas, quam si tales bonae & optimae frugis flosculos efflorescere videamus alios, a quibus similem fructum nobis possumus promittere. Et id in te profecto ignorare non possumus, quandocunque ingenium tuum consideramus, & quae adfecta vel parata habere nobis ipse indicasti, horum inquam quandocunque in mentem venit, venit autem saepius, nunquam non tacitum nostrum pertentant gaudia pectus, & adprecamur tibi *σηθιδόν* optimam & diuturnam *ὕλην*. Nec enim spero, quamvis ad majora te tui vocent, tuque altiora studia aggredi cupias, te non respecturum saepius ad Musas nostras, praesertim illas Atticas. Sines inquam illas in partem curarum venire: nec enim tam leviter illas nosse coepisti, ut unquam earum oblivisci queas. Quid vero jam agis, o dulcissime rerum & quid paras? Audivi enim laetus, te illo molesto morbo tandem profligato, ad studia rediisse. Ego quantum per meas operas licet, (quantulum vero istud?) Harpocrati ad ornando sum intentus: cui rei forte cum aestate, si noster tum ab imprimendo cessabit, ut conjicere est, otium nactus fuero largius. At multa sunt ibi, quae me ad te auxilii implorandi causa recurrere cogent. Utinam saltem uno scripto codice juvarer: vel illum, quem ille δς νῦν μακάριον ἀριθμεῖται *Scaliger* noster possedit, vulgatis & auctiorem & locupletiolem, possem nancisci. Eo lexico absoluto, si Deus porro vitam & otium concesserit, ad Stobaeum rectam manum admove animus est. Nolim te jam quaestiunculis solitis exercere: hoc saltem addo, miram oppido mihi videri explicationem illam Chrysostomi ad Hebr. 11, 35. ἄλλοι ᾗ ἐτυμπανίσθησαν, hoc verbi de capitis praecisione interpretantis, & ἀποτυμπανισμὸν idem esse quod ἀποκεφαλισμόν. In eaque sententia σύμψηφον habere audio Oecumenium. Mihi, ni tu rectius docebis, longe aliter videtur, accipioque cum aliis vel de distensione tortoria, vel fustium ictibus, quo pacto apud Demosthenem, ni fallor, adverti, semper. Sed ne diutius te teneam, quod ad meum statum alias, is ad pedem ἐξαρθρωθέντι quod attinet, nondum is est, quem optavi: & incedere, ne titubanti quidem gradu, ἀνευ σπρίγματος ἢ γυν βακτηρίας, nondum possim ne gradum. Cogito, medicorum nostrorum suasu, in ipsis nundinis ad thermas Wisbadianas, si annuente Deo medelam aliquam inde sentire possem. Vale, mi amicissime Salmasi, & salve etiam. Scripsi raptim a. d. xii. Kal. Mart. anno mdcix. Hanoviae e typographio Wecheliano.

EPISTOLA CCLXX.

GOTHOFREDUS JUNGERMANNUS

Claudio Salmasio suo S. P. D.

Heidelbergam.

Sperabamus vero certe amicissime Salmasi, Florum tuum cum isto florenti vere proditurum. Fefellit nos spes illa, & desiderium nostrum frustratus es, nisi te tamen typographus, quod potius credam. Sed tamen, quid ita te juvat, amicissime mi, caussando nostros in longum ducere amores: De Stephano, inquam, Callimachaeis curio, Anthologia nova, Erotico Syntagmate. Utinam tu desideria nostra *σημηδὸν* posses contemplari, non mei solius, de quo leve est, licet illud me hercle non leve, sed & aliorum, quo quiquam Graecas Musas ambit studiosius. sine tibi tandem cum Stephano persuadere, & noli typographis hinc adversari, ne diutius differas publica commoda; sine illos, inquam, addere vel *Wolfii* vel alius cujuscunque versionem etiam ineptam suo cum periculo; tuum certe nullum est, a quo saltem hoc impetrare cupimus, Graecum textum emendatum & Notas in eum tuas: orator accessi, sine exorator sim. Et hinc quid vetat iterum ad Pollucem nostrum redire, in quo non audeo dicere, te mihi adhuc debere, ita tibi immane quantum ego debeo, qui tam multis obscuris locis mihi lucere fecisti, tam multis intricatis extricasti: Interim mi D. a Clarissimo *Casaubono* nostro accepi litteras amicissimas, ubi etiam ad quaedam loca respondet, de quibus olim & ex te quaesiveram. Et nolim te laudare in os, auxilium a te mihi efflagitatum magis praesens. Labet tamen tibi & quae ipse scripsit *ὁ πάνυ Casaubonus* indicare (lib. iv. cap. 11. pro *ῥησιδὴν*, malim *ῥησιδὴν*, *ὡς δὲ τὸ ῥησιτείνειν τὴν φωνήν*. Corrupta vox est *ἡμολοκρὸν*. apparet insignis tubicinis nomen desiderari: nescio an ita scripserit *ὡς περ εἰς Μολοκρὸν*. Sed putem verius *τὸ Λοκρὸς* a praecedentibus separandum esse, ita ut proprium tubicinis nomen cubet in menda) Haec ille: tu *ῥησιδὴν* & *Μολοκρὸν* volebas. & in illis *ἰσαίῳ ἔωλον*, pro iis quid restituat ait sibi non occurrere. ibi tu felicissime *ἴσως ἔωλον*. Capite seq. versus duos ita se ait legere, *ἔς τρεῖς ἐκάρυξεν τὸ Ὀλυμπία αὐτὸς ἀγῶνα, οὗθ' ὑποσαλπίζων, ἔτ' ἀναδέγματ' ἔχων*. Tu vulgatum *ἀναδέγματα* nobis clare jam in litteris tuis exposuisti: Quaeso te, nunc porro operam dato, si vacat, sique commodum est: alias si poscam. Musas mihi merito habeam iratas. lib. vii. cap. 2. *Ἰσαῖος δὲ καὶ Ὑπερίδης τὴν πρῶτην εἰπον ἐν τῇ κωμῳδίᾳ. ὁ πωλῶν, πρῶτης εἰρη-
ται*. MS. noster insigniter: *πλὴν Ἰσαῖος καὶ Ὑπερίδης, ὁ πρῶτης εἰπον. καὶ ἡ κω-
μῳδία ὁ πώλης. ὡς περ καὶ ὁ πρῶτίας*. egregie *πώλης*, quod ex Aristophanis *Ἰππεῦσι* optime novi. Illud *πρῶτίας* vero ubi exstet, minime, non tamen minus probum id, quam *βαδισματίας* quod Cratino supra lib. i. i. onomast. quoque MS. conservavit, Eod. cap. inferius *προπώλην δὲ Αἰσχροφάνης αὐτὸν εἶπε*. MS. pro *Αἰσχροφάνης*, *Αἰσχροτέλης* habet. Illius tamen potius arbitror, licet locus

non mihi in promptu. Sub finem capitis: ἐν δὲ τοῖς Ἀττικοῖς ψηφίσμασιν, ἀ τοῖς ἑτέροις ὅτι π μέρει ἐγράφετο, ἔστιν ὡρεῖν εἶναι αὐτῷ καὶ οἰκίαν ὠνησιν. an ista verba, εἶναι αὐτῷ καὶ οἰκ.: ὦν. sunt ex Atticis ψηφίσμασι MS. hīc nos destituit, qui & sequenti carmine Pherecratis caret. το παιδίον τὸ πλλαγόμενον, καὶ πὸ πωλ- λῶν θήλιων, ubi extrema πολλῶν θήλιων non sat capio. cap. 4. Alexidis verba ἐν ἀμφοτίδι quoque in MS. desunt, ἐνεκόπη τὴς ἀλεκτρυόνας, τ̃ δὲ κοπτόν- των ὄντας. ea mihi non corrupta esse nemo persuaserit, nisi tu mihi explicaveris. Nostrae opis sane non est talibus medelam conari, nec absque MS. quid ten- tem. Tentare non solemus facile, ne cum imperitia nostra audaciam conjun- gamus, & rideamur merito: si excidit tamen unquam quid calidi, quod vi- ros doctos & humanos nobis ignoturos sperare lubet. cap. 5. καὶ ἀρτοτροφεῖν δὲ Ἀριστοφάνης λέγει. Δαπλάσαι &c. egregie MS. καὶ ἀρτοτροφεῖν δὲ Δαπλάσαι δὲ ὡς Ἀριστοφάνης. egregie inquam τὸ ἀρτοτροφεῖν, in quo aliqua significatio tosti in veru & agitati panis, quales ὀβελίαι illi erant, ὀβελίσκοις ἐμπεπαρμένοι, un- de ipsis etymon etiam dant, ἀρτοτροφεῖν sane hīc ad ἀρτοποιίαν nihil pertinet. Paullo inferius difficilis locus nec ab *H. Stephano* potuit restitui, nec MS. hīc quidquam juvat, illa omittens. Sophoclea verba inquam ἕως ὅτε κερθώσης εἶ- νη. Putabam sane κερθιώσης ὄντα. Tu vero, qui rectiora habes, candidus im- perti, nos cum gratia publice reddemus. Statim in verbis Aristophanis πτῖω (ita est nimirum MS.) βράτῳ &c. non tamen possum exputare, quid pice usi fuerint in panificina. Haec jam sufficiant, Amicissime Salmasi, & per ami- citiam in bonam partem interpretare hanc audaciam. Accepi alias quaedam *A Schotti* excerpta ex MS. ad eundem Pollucem & *Labbaei* vestri codicem, mittente nostro *Bongarsio*, in quo tamen nihil, nisi vix septem primae pagel- lae (est autem editio Basiliensis) cum MS. collatae, & rarae aliquae adnota- tiunculae, nescio an a *Labbaeo* vel alio adjectae interdum. Misit idem *Bongar- sius* & editionem Aldinam Harpocratonis e bibliotheca *Vulcobaei*. Vale, mi amicissime Salmasi, & salve, quod tibi me dicturum sperabam interea his nundinis, quum gratissimum tuum adventum frustra exspectarem. Utinam tu & *Gruterus* noster (quem plurimum saluto) aliquando ad nos excurreretur, dum ita adhuc feriamur. Vale iterum. a. d. xiv. Kal. Maj. c i o i o c i x.

E P I S T O L A CCLXXI.

GOTHOFREDUS JUNGERMANNUS

Claudio Salmasio S. P. D.

Heidelbergam.

MI amicissime Salmasi, quibus verbis tibi sat magnas agam gratias, quod iterum tam multa & erudita me docere volueris, missis litteris jucundis- simis, quae quo insperatiores, eo gratiores. Nam, ita me Deus amet, pror- sus male verebar, ne nimis te satietas mearum quaestiuncularum, quibus te num- quam non tam impudenter adgredior, quasi apud te certum διδασκαλεῖν con- sti-

stitutum haberem, ad quod ἀδελῶς Φοιτᾶν mihi quodocunque luberet, liceat, cepisset. Et mehercle si indignareris, & prorsus diuturno silentio, quae tua esset benignitas, saltem hanc impudentiam nostram multares, non ideo mihi injuriam fieri, vel incomiter mecum agi, dicere possem, vel me dicturum quisquam credat. sed tu ultra insignem eruditionem, quam in te unice admiror, tali praesertim aetate, insigniter quoque humanus atque comis es. Quid enim agis? Auctarium addis insuper: quasi non satis sit ad ea quae proposueram respondisse. Iterum tibi gratias ago, mi amicissime, & rogo ut me porro juvare velis: quod tamen cum commodo tuo fiat, quod sine omni tua molestia. Aliis conditionibus abs te litteras non exspecto: Nec addas in posterum ullam excusationem, si quando rescribas tardius. Sed statim hoc agere volo. utut Pollucem emendare difficile, tamen sponse velim contendere cuivis, si non post eruditum & amicum editorem adhuc gravidis mendis & praegnantibus, qui profecto alia paritura videbantur innumera, sexcentis (parce enim dico) Pollucem liberavero, MS. Palatini opera, & Claudii mei Salmasii opera, & ingenii mei interdum subclaudicantis opera. primus locus lib. vii. 6. tuum κρεά-κεντρον valde ingeniosum est. ego male haerebam ibi, MS. nihil juvabat, nisi quod καὶ ῥάκετρον haberet: ego me varie vertens, comminiscabar ῥάχετρον, quod cum κοπίδι idem putabam: quum Pollux ita vocet medium dorsi: & ῥα-ρίζαν pro κόππιν. ῥαχετερίσαι pro Διακόψαι exponit. Sed jam meum mihi evilescit, & putem in illa corrupta voce omnino initium a κρέα vel κρέω concipiendum. Quod ad ἰσχαδόπτην attinet sane & ego suspicabar ἰσχάδ' ὀπτῶ. quamvis leviter, & ἀνδ' βεβαιωτῶ. sed mihi in mentem revocans quod l. i. c. 12. idem noster scripsisset εἰ ἡ καμωδοὶ καὶ ἰσχάδα κοπτῶ λέγουσιν. omnino & l. vi. putem legendum: καὶ πλάσια αὐτῆς καὶ Κρατῆν ὁ ἰσχάδα κοπτῶ. Sane ibi & MS. agnoscit illud: hoc vero lib. vi. cum aliis multis tota pagella exsecta deest in eo. l. ult. c. 34. tuam emendationem exosculor in Callimacheis. Totus locus in nostro MS. ita habet, quamvis monstrose: εἰπὼν τε ἀναικτῆτε μᾶλλον εἰδότα μακρὸν ἀλέοθαι unde tamen ἀλέοθαι, propter versum quoque, pro vulgato ἀλλεοθαι secure reponamus. sed & quae vulgo sequuntur αἷς τ' ἀνδικοτήνοντα, εἶδος μυάγρας, MS. noster egregie emendare monstrat, qui habet, αἷς καὶ τ' ἀνδικοτήνοντα. Ut tua enim legi statim, vidi scribendum, αἷς καὶ τ' ἀνδικοτῶ ὄντα εἶδος μυάγρας. En quo monstra nostrum Pollucem invaserunt, & hîc muscipulas suas corruperunt opici mures. quod tamen non credunt hodie illi critices ofores, & Graecarum litterarum contemptores. Quae addis prorsus ita leguntur in nostro MS. καὶ μετὰ τῶν κεράμῃ ἐν τοῖς δημοπράτοις καλυπ-τῆρες κορινθιαγῆς. Et talia quaedam ex MS. etiam aliquot locis apud Pollucem memini emendare, quae se jam memoriae non sistunt. Tale tamen l. vii. c. 22. de Sandaliis: ἐχάλεον δ' αὐτὰ τυρρῆνικαγῆ. sic enim ibi MS. ubi vulgo τυρρῆνικαγῆ. sic & parilia Aeliani illis, quae noster l. i. c. 10. Segm. 13. Θώραξ αἰτῆνικαγῆς (ita enim MS. non 16.) κράνος βαιωπιαγῆς. ubi bonus interpres, vulgato deceptus quoque; *Thorax Attica*. sequens Aristophaneum verissime correxisti: MS. nostro consentiente, quamvis sine accentu μη in fine unius

versus habet, altero incipiente δίκων. Sed idem MS. noster ψηφισμάτων π
θαμός, habet. & in praecedentibus etiam, γέγρατον καὶ θαμόν. quod mihi vi-
detur verius quoque, πραιτίας mihi adhuc valde arridet, quamvis in forma &κ
ἀναλόγως illud conceperam. Nec non reliqua bene docuisti. De ἀρτοπροφείν
tamen ad ὀβελίας potissimum id apud Aristophanem, cujus locus in amissis
comoediis forte erat, referebam: quod plerumque alias sub testa panes suos
πέψαι legeram, quo pacto & in Moreto placenta fit, *testisque tegens superagge-
rat ignes*, idque ἀρτοπροφείν ad circumactionem in veru transferebam. sed jam
tu docuisti rectiora: & puto te respexisse ad ista Moreti: *Contrahit admistos
tum forteis atque farinas. Transversa durata manu etiamque subactum Format opus
palmisque suum dilatat in orbem.* Quod ad versus Poëtarum attinet, praesertim
Comicorum, quorum maxima in Polluce seges, mihi quoque plerumque aqua
haeret: nam MS. fere in illis nos prodere solet. Tu nihil gratius facies, quam
si ejus notae nobiscum communicare volueris. Jam profligavi caput de Talen-
to & re nummaria lib. ix. in quo insignes locos plurimos restitui, etiam mu-
tilos ex MS. supplevi, non paucos eximie, ut & reliquos, qui restant, tu ju-
vato sis: egregie enim in illo capite operam locatam ducere debemus, licet
forte, hoc ingrato aevo, ne ramento quidem ditiores efficiamur ideo. Sed ad-
do quaedam loca: ne te tamen diu nimis morer. Primo loco statim egregie a
me ni fallor, sed ex MS. restitutum locum adfero. Illo lib. ix. cap. 6. vulgo
τοῖς κραπτοσύλαις &c. ita MS. noster: τὸ ἥ ἐν ταῖς Κράτητ^Θ τόλμαις, πρῶτα
μὲν ταλανπαῖ^Θ ὅσις ἐστὶν αὐτῶν λέγει ἀδελον, εἴτε τιμὴν, εἴτε ῥοπήν, λέγει nil ve-
rius. itaque concipio verba comici: — πρῶτα μὲν Ταλανπαῖ^Θ ὅσις ἐστὶν αὐτῶν
λέγει, quibus Pollux subjicit ἀδελον &c. esse, pretium an pondus dicat: Et
quid si eadem Τόλμαι Cratetis apud Suidam non recte omissae sint? ait enim,
Κράτης &c. δράματα αὐτῷ εἰσιν ζ'. & tantum sex enumerat. sed leguntur apud
Pollucem etiam alia adhuc dramata. Ibidem: ὡς ἐν τῇ Ἰπποκράτους Ὠδρακα-
θήκη, ὅταν γὰρ οἶμαι λευκὸς ἄνθρωπος, παχύς, ἀργός, λάβη δίκελλαν εἰδὼς τρυφᾶν
πενταστάτην, γίνεται τὸ πινόμενον ἄνω. Versus sine dubio comicos tu nobis con-
cinnabis. In MS. nostro tota haec particula deest. Ego tamen nomen comoe-
diographi emendandum credo, Ζωσικράτης. Si nostro MS. fidem non abroga-
mus. supra enim lib. iv. c. 24. ubi eadem ita vulgo: δίκελλαν ἥ πέντε στατήρων
Κράτης ἐν Ὠδρακαθήκη τὸ πεντάλιτρον. ibi MS. noster clare: πενταστάτηρον Ζω-
σικράτης. Ibidem porro. ἐν καλλιαισχρῶ οὐφῆσιν εἶναι τὸ ἐτέρων τὰς μέσας Στατη-
εἰδίας; mihi tamen non placet ista concipere: MS. totum hoc commation o-
mittit. ego ita legerim: ἐν Καλλιαισχρῶ εὐφῆσιν, εἶναι τὸ ἐταῖρων τὰς μέσας στατη-
εἰδίας. Mox in Eupolidis χρήσει, quae pariter deest in MS. non video quid
alterum Κολάζιν ante οἶνον hic agat. Deinde Theopompi verba in MS. quoque
non adparent: nec ego temere ea concinnare adgredior. postea ἀνημιωβολαία,
& sic legitur etiam in editis Aristophanis, & apud Suidam credo, & non ta-
men potest MS. nostri scriptura clara mihi displicere, ἀν ἡμιωβολαία praeser-
tim quum & ἡμιωβολαία χρήσιν noster adferre se indicet. paulo post Philemo-
nis χρήσιν, quae quoque in MS. non est, ni fallor, ita recte concipio: χαλ-
κός

καὶ ὁφέλλεις πέντε μοι. μέμνησ', ἐγὼ σοὶ πέντε χαλκὰς, σὺ δ' ἡ μοὶ τριτήμορον τὰς ἐξ
 δαπιδῶ, τὰς &c. nescio tamen an δαπιδῶς mutandum. Philemonis altera χοῆ-
 σι; desperatior: nec tantillum ibi MS. Ego quidem sensum puto me adsequi,
 & per partes tento, ut v. 1. legamus τριτήμορον, & v. 2. forte ἑκάστος ἡμῶν ἤλ-
 θεν. εἴκοσι πένταρας. Sed nondum mihi plana omnia, certe mox ἐξ ἑκάστω legen-
 dum. & pro ὀβολῶν ὄντων, forte χαλκῶν, ut & avum meum puto legisse.
 Sensus certe hic esse videtur: fuisse quatuor, inter quos triobolum ex aequo
 dividendum. id vero si obolus 8. chalcos valet, ut noster docuit, continebit
 24. chalcos. Jam ex illis quatuor hominibus si quisque acceperit sex chalcos,
 illud aequaliter distributum erit, & habebit quisque suum, quod Philemo vo-
 cavit τριτήμορον. Eadem pag. Aristophanis verba ex γεωργίᾳ & emendandi &
 in numeros suos reponendi a te possunt: ego ubi MS. defuit, Davus soleo ef-
 fe. pag. 434. v. 3, 4, 5. ex MS. ita reposui. ἐν ταῖς Αριστοφάντε διδύμαις ἢ πυ-
 ραύλῳ:

— ἐπειθ' ἡπάτια, καὶ νῆσιν πινα,
 προσέθηκεν ὄμμα, πέντε χαλκὸν περσλαβών.

Callimachea in eodem cap. ut & Euripidea, in quibus noster Casaubonus de
 Satyra, inopia melioris codicis, non se extricabat, mihi olim jam dilucide ex-
 planasti, & restituiti. Nec addo jam alia: quum & haec nimis multa sint,
 & charta tenuior non admittat τὸ μέλαν. egoque alteram paginam deberem in-
 vadere. Quod ad Theocritum attinet, ita se res habet. Misit quidam poli-
 tiorum litterarum studiosissimus Jo. Weitzius, Scholae Gothanae in Thuringia
 prorektor, cujus carmen in novam editionem Pollucis praefixum est, suas No-
 tas in Theocritum. Eae nihil critici continent omnino. Sed saltem ἀνθ' ἡ γνο-
 μῶν καὶ νεφετήματα ἡθικά. Ne itaque Marnius noster spernat, quia eas solas
 vendi posse metuit, commentus fui aliud, nempe ut accederet Index in Theo-
 critum a Sebero confectus, quem ad huc exspectamus. His tua eximia, talia
 enim novi, an addenda censes? mirum id editioni conduceret. Sed nescio an
 suadeam. Nisi tamen ita rem adgrederemur, ut tua ita accederent, ut non ac-
 cessisse, sed separatim, edita viderentur. Scilicet cum novo frontispicio atque
 pagina ab aliorum fere dixissem quisquiliis separanda. Vale atque salve, mi a-
 micissime Salmasi, & Jungermano tuo favere & adesse porro perge. scripsi
 raptim Hanoviae a. d. 111. Id. Jun. e typographio Wecheliano 1609.

EPISTOLA CCLXXII.

GOTHOFREDUS JUNGERMANNUS

Claudio Salmasio suo S. P. D.

Heidelbergam.

EN incipio scribere in adversa chartae pagina, quod ista tenuior nimis trans-
 mittat alias litteras. Et id tu quidem facile ignosces: modo & alterum,
 quod prolixas iterum a me accipias litteras. Quamvis enim de humanitate &
 fa-

facilitate tua mihi satis jam constet: tamen nunquam non me pudet postquam litteras misi, quod adeo iis, quas in te virtutes cum aliis esse dixi, abutar. Dum scribo tamen, manum de tabula numquam tollere possum. Et quas tibi sat magnas gratias agam, qui me tot tantaque docuisti? adeo in tuis litteris

Ἀγαθῶν τέχτων ξυνελέγη μοι σωρακός.

Et una vocula saltem immutem istud comici (ita enim in MS. κακῶν τῶν ξυνελέγη μοι σωρακός) ubi tu me quid *Soracum* & Plautus dixerit vere docuisti, grates persolvere dignas non opis est nostrae. Sed si quid leviter conari contra possim, non mihi deero. Jam quaedam egregia, ad quae me ducunt tuae conjecturae, ex optimo codice Palatino tecum communicabo. Tu vero memineris, pro commodo & quando optime vacabit, rescribere Jungermanno tuo: nec ejus causā ullis tuis, quae publico paras, accedat ἐμπειρία. Quod itaque jam ad locum Aristophanis attinet, in tuam sententiam pedibus jam eo facile: praesertim postquam illius Scholiastae verba legi. Antea eo libro carebam, quem nuper jam accepi, quum prius comico ἀνευ σχολίων uterer. Sed si vidisti novam editionem Genevensis, quam mihi in nundinis σὺν θεῷ parare volo precio, quaeso quid illi praestiterunt boni? ego enim nondum in-
spexi. Quod ad ἰσχυρά κοπτήν ego nil scio. nam τὴν κοπτὴν credo joco tuus est: quod de altero, bis a Polluce reposito dici nequit. Et Callimachi tui ὀπτήν non possum improbare, quī enim? nondum tamen & in Polluce audeo mutare istud ego quidem. Quae de Alexidis, Sophoclis, & Hipponactis locis talia sunt, a quibus nemo dissentiat credo, nisi qui cor non habeat: licet in illis MS. nos vel destituerit, vel non juvaverit tamen. qua re ea gratiora: quum ad ea ego nil adnotassem, nisi quod quivis possit, me haerere scilicet. lib. x. cap. 31. τοῖχοι & in MS. nostro, quod miror. Nec tamen dubito de tua conjectura. Notum mihi quam saepe in nostro MS. οἱ & υἱ errore mutant & κ in x facile lapsu pervertatur. Firmat eam ipse Pollux ἐν τεκτόνων ἐργαλείοις supr. vii. 26. ἡ δὲ σφύρα τῶν λατόμων, καλεῖται τύκος. Immo quod propius, in eo sequenti capite continente οἰκοδόμων ἐργα & ἐργαλεῖα clare iidem τύκοι. In sequente Aristophanis loco MS. noster adhuc mendosius: πῖχον μοχλίσκον καλάνειν. Tuae emendationi facile accedo. pro σπειρία in medico instrumento MS. noster σπυγρία habet, quod mihi placet valde, ut cujus usus sit clarus. in margine tamen recentiore manu σπειρία additum cum notula, ut & hoc infereretur. eodem libro c. 26. Axionici e χαλκιδικῶν jam ita restitueram, & tentaram reponere in versiculos, & gaudeo nos eodem forte tempore pari modo emendasse. Tuum facinustamen tibi soli vindicare potes & ingenio tuo, mi humanissime & doctissime Salmasi: ego MS. nostro meum: e quo videbar & hoc melius fecisse, quod κάνθαρος reponebam ex MS. quod vas κεραμεῖν fuisse e multis comicorum locis apud Athenaeum constat: alterum κανθαρίς mihi ignotum. Et ultimum versiculi ita ex MS. scribebam; ὡς ἡρεσία σοι παντελής γεαῦ, κεραμίων. Sed quod antecedit tu ingeniose ἐξαπτρίας. nam vulgatum nemo intellegebat. Ego tamen me vere restituisse ajo lectionem MS. εἰρηκεν ἐν ξαντρίαις αἰσχύλῳ. ξάντελαι Aeschyli in catalogo ejus dramatum hodieque visuntur. ibidem

dem ἢ λύχνῳ mutilus erat MS. & defectus. Et cap. 24. σκαμέλλαν, non videram rationem emendandi, quam tu me clare docuisti. Miror & fugisse Scaligerum, qui in Varronem scribit Pollucem *cameillam* σκαμιλλαν adpellasse. Et me hercule σ adponere hujus voculae initio nimis eam barbarè pervertere sit. Sed ibidem in χρήσει ex Alexidis σπονδεφορικῶ ego reponebam — λαγκον ἡμφοισμένον τῷ ἀνδρακῶν — ut magis adhuc haererem vulgatae lectioni. Et eleganter putabam dictum, sicut alia talia: & hoc quod ibidem ex MS. restituebam: ὥσπερ καὶ ἐν τῷ γήρα ὁ αὐτὸς ποιητὴς εἴρηκεν, κοπίδι τῷ μαγειρικῶν λάγκας enim & alios adnotabam in Hesychio ἐν ᾧ ἰσχυράδας ἐφόρεον. Sic & illud cap. 23. ἐν δὲ σκίρωνι, καὶ πηλίνων λεκίς putabam defendi posse? ita enim MS. ibi, nisi quod habebat πηλίνων λ. Nescio tamen, an quum particula τῷ non sit addita, satius tecum legere sit, πηλίνη λ. Sed elegantissima ibi χρῆσις ex Hipponacte mutila est, quam adscribo: ita enim MS. ὑπὸ πάναντι εἰπντῷ καλεῖται φαρδινόν. ἡδὺ καὶ λεκὸς πυρῆ. Quis non videt legendum? καλεῖται φαρδινόν ἡδὺ καὶ λεκῷ πυρῆ: πίνακες μαζῆς & in nostro MS. Pal: egoque initio, quod meum ingenium hebes, inops quomodo explicarem, & quos nescio absurde populos cogitabam. Jam tuis lectis, ut ἰχθυοῖς vidi statim mihi incidebat, illas δὲ τῷ μαζῆς dictas. Vides, mi amicissime cum quali homine tibi res, cui ingenium mehercule nec exprompta memoria est: adeo ut si te ejus imperitiae & inscitiae tacuisset dudum, ego ipse minime mirarer. p. 475. 6. noster MS. ita habet Hipponactea: σῆλξιν ὥσπερ ἐστροφήιον σάκῳ. Ego nihil tentabam. Jam tua conjectura factum, ut elegans versiculus reddatur auctori:

Στάλξιν ὥσπερ ἐς τρυγίπιον σάκῳ.

In Eupolideo cap. 17. ubi καπαχύτλξ reponis, MS. vulgatum καπαχύτλιν retinet. Tuum magis placet. Sed in sequentibus falsus es mi amicissime, Locum tibi totum ex MS. adscribo, longe auctiorem, ut inde de integrioribus ex integro sententiam feras: ὅστις πύελον ἢ κίς ἔχων, καὶ χαλκῶν, ὥσπερ λέχω-
 στραπώτης ἐξ ἰωνίας καὶ γὰρ τὸ χαλκίον ἐν π τῷ λστρῶν, ὥσπερ καὶ λεβῆς καὶ τείπας ρ
 ubi καὶ χαλκίον, legendum esse, vel quae sequuntur, καὶ γὰρ τὸ χαλκίον satis fir-
 mant ρ. Et de eo χαλκίῳ in capite de talento lib. 1x. cap. 6. quaedam: ubi
 v. 43. Aristophanis verba e γεωργοῖς in MS. ommissa, a te constitui desiderant.
 In altero Eupolidis versiculo quidem λεχὼ στραπῶτης facile video legendum:
 tu & alia, quae χρῆσιν elegantem illustrent. De ὠμολίνῳ certum est. Sed lib.
 x. 14. MS. noster ni fallor veram lectionem conservavit: ὡς ἔχοιμέν πνα τῷ ὀνό-
 ματῳ τῷδε δόπσροφῶ, capiebam autem hīc simpliciter δόπσροφῶ, pro κρησ-
 φυμέτω, de perfugio, ad quod quis se convertere queat, & auctorem quasi
 exhibere ejus nominis. Sic enim video nostrum loqui & cap. 23. v. 9. καὶ γὰρ
 ἄχθομαι τὰ συνήθη τῷ ὀνομάτων, καὶ ἂν ᾤξαι τῷ ἡτῶν κεκερμένων ἐντα, ᾤξαι γὰρ
 εἰς χρῆσιν, ἐπειδὴ ἂν ἔχω τὴν πρὸς τῷ εἰπόντι δόπσροφῆν. Philippidae χρῆσιν male
 torquebam, vix τόνῳ ille καινός magis fuerit, nec extorquebam quid sani.
 Tuis quid aliud adclamem, nisi vere. Sed Pherecratea cap. 23. ni fallor feli-
 citer restitui & vere, si modo tu non negasses. MS. ita habebat: ἀλλ' ὅτι ἂν
 Φερεκράτης ἐν Κρεπατῶν Φῆ, μάχαιραν ἀρενέθη κάσσι τι μ' ἐργασαι ἀμάχαιρῳ

Ἰπποβοεία νοσήσω κρέα. ἀνὴρ γέρων ἀνόδοντ'Ⓢ. Crapatalli hi a nostro facpe citantur. Versiculos ita constituēbam

Μάχαιραν ἄρ' ἐνέθηκα σ8; τί μ' εἰργασαι;

Ἀμάχαιρ'Ⓢ Ἰπποβοεία νοσήσω κρέα,

Ἀνὴρ γέρων ἀνόδοντ'Ⓢ —

Sed tecum jam in primo scribo: μὰρ' ἐνέθηκα; ἔπι μ' εἰργασαι. Illam eandem χρῆσιν in mente habuit noster, lib. 11. 4. ἀνόδοντ'Ⓢ, ὡς Φερεκράτης, ut quidem MS. illic habet. cap. 23. Versus Nicocharis (ita enim cum MS. scribo, qui Νικοχάρης. & Suidas id in Νικοχάρης firmat, pariter Galateam inter ejus dramata recensens) ipsi in MS. decrant: in iis concipiendis quoque ἐμογνώμονες fuimus, nisi quod κυμινόδοκον malebam, ut in MS. praecedebat, pro κυμινόθηκη; quae nimis repetitur vulgo saepius. nam primum noster Pollux κυμινόδοκον sive κυμινόδοχον ex Nicochare firmat. tum κυμινόθηκῶν ex Demiopratis, tandem κυμινόδοκῶν ex Apollodoro. ita enim paullo post κυμινόδοκῆ μετὰ τὸν λόγων δὲ τῶν μοι δοκεῖ κυμινόδοκῆν ἔγραμματα τῶν περὶ Φερεῖ, quae vulgo vix dimidiata legas, videtur autem altero versiculo legendum κυμινόδοκῆν, ἔγ' ὡς Φερεῖν. Tu tamen rectius statues. Jam adderem libere quaedam, ubi plane non mihi liquet, sed chartae spatium restat exiguum. Potius de ipso Auctore hīc injiciam quaestionem mehercule difficilem. Scribit Suidas Πολοδόκης Ναυκρατίνης, πινὲς δὲ Ἀρδύεννας σοφιστῶν γράφουσι παίζοντες. πόλις δὲ . . . ἡ Ἀρδύεννα. Viri docti valde se fatigant, nec explicant tamen, ubi ullibi de Arduenna quid legatur. fatentur fere sibi N. L. quidam malunt Carditin ex Herodoto reponere; quid tibi videtur? In inscriptione veteri, quam Casaubonus noster non ita diu edidit, nuper de binis locis suam sententiam ad me perscripsit, eruditissimus Hoeschelius, quam ego porro ad te, si quid forte elicuero vicissim. Novi enim te praeclara ibi quaedam post Casaubonum notasse. versu sexto nihil mutandum censet Hoeschelius, sed a extremae dictioni adjiciendum, ἐν ἀθανάτοις ἀλέγησθον, inter, ait, immortales recenseamini, velut eodem utatur verbo Pindarus 11. Ad. Olymp. πύλασε καὶ κάδμ'Ⓢ ἐν τοῖσιν ἀλέγονται quod verbi hujus significatu, in Lexicis fuerit annotandum. versu 23. itidem scripti lectionem existimat servandam χλωρὰ θεῶσαν, ut in scuto Herculis v. 146. λευκὰ θεῶσαν legamus. Sed de Stephano iterum quaero quid sit? A te certe driter & immisericorditer, ignosce, nec tu es mitio huic factui. Nuper Francofurti fui, quum Marnius inter alia, ubi Stephanus tandem maneret, rogabat. quaeso te emitte tandem nec invidie utilissimo scriptori lucem, & utere mea opera ad praelum: omnes nervos intendam, ut me diligentem & religiosissimum in tuis fuisse dicas. Vale, & salve, mi amicissime Salmasi. Scripsi raptim a. d. 7. Id. Jul. Hannoviae ex urbe nova. Brouchtonus jam Amsterodami est. is te ob literas, quibus illi respondisti, apud omnes mirum in modum praedicavit, quasi suae opinioni ὁμοψήφοιται, si ita loqui liceat. Adeo ut e primoribus hīc quidam me rogitarint aliquoties, & in iis Lavaterus noster, quid tu sentire de ipsius sententia ἐν τῷ περὶ τῆς καταβαίνειν εἰς ἄδ'Ⓢ. Tuas literas apud Praetorem nostrum legi, sed in iis nil nisi summam modestiam

stiam video, & quod potius aliis disputare de ista re permittas, quam praescribas quid ipse. Is alias Anglus iracundior est; & quamvis saepe ab ipso ejus mentem percipere cupierim, tamen ipse semper irascitur, & adhuc magis, si quaeras, vel contradicas, adeo ut frustra semper fuerim. Et hoc te admonere volebam, ea quae occurrunt in notis *Seberi* nostri ad Pollucem sub nomine Sylburgii, ea omnia esse *H. Stephani*: ejus codicem habeo, ibique ejus manu ad oram suis quaeque locis notata. Inde *Sylburgius* ὁ μακαρίτης, dum apud *Stephanum* vivebat, credo, transcripsit, ut solet, ad sui codicis oras, quem quoque modo sum nactus. Hinc error nostri *Seberi*.

EPISTOLA CCLXXIII.

GOTHOFREDUS JUNGERMANNUS

Claudio Salmasio τῷ πρίνυ S. P. D.

Heidelbergam.

MI eximie Salmasi. Vix credas, quam exosculer tuam humanitatem, atque benignitatem. Nam hoc in quibusdam doctissimus viris desidero, qui nolint sibi tantum a re sua otii, ut amicum doceant. Sic nuper Doctissimum quendam medicum, litteris Graecis haud leviter imbutum, rogabam ut opellam fumeret in Pollucis capite, quod de morbis tractat: quum mihi videretur id corruptum valde. Sed frustra fui, & ille me ad *Goraei* definitiones remittit. Verum facile id condono optimo amico *πρὸς ἄλλα ἀρχαῖα, ἃ ἴσως μᾶλλον ἐπείγουν*. Tibi vero, mi eximie Salmasi, qui tam promptus es in conatibus nostris juvandis, ago immortales gratias, & nunquam non σὺν εὐφροσύναις praedicabo ingenue, per quem profeci. Illud lib. 1. cap. 1. tm. 25. ὁμπρὸν vero quam prope ad litterarum ductum emendatum: quod ipsum ὁξυτόνως sic in Etymologo inveni. Caeterum in hoc nimis suavis es, mi Domine, quod nos contra de tuis elegantissimis conjecturis super obscurissimo illo poematio judicare velis. Quid dicam? ludis? Ego non ludam, sed vere dicam, & valeat a candore nostro fucatus sermo. Admiramur tua, inquam, quaecunque super isto poematio adfers, & gratias agimus, quod nobiscum communicare volueris. Optamus vero, ut quamprimum publici juris fiant, bono nimirum reipublicae litterariae. Quam vero optima illi interpretes paene omnes ad illud ovum Rhodium, & caetera illa poematia substituerunt, nec sunt progressi ultra. Nec enim, credo, quid ibi *Casaubonus* vel *Heynsius* ausi. Unum & alterum a *Scaligero* adferunt, qui illud Ovum profecto mire versavit, & forte, ut ex te cognosco, tenellum illud laesit gravius. doctissimus *Brodacus* vester caetera poematia illustrare conatus, Ovum & Fistulam non attigit, si recte novi. De Pitii, cujus ἐρωμένης & Longus meus meminit, argutissima tua expositio, mirum quam placuit, quum praesertim nil verius ea mihi videatur. Lectionis illius ἀντίπρετρος etiam Graeculus ἐξηγητής meminit. Illud ὅλον in Panis nomine etiam sagaciter invenisti. De Planude tecum facile sentio, licet

in rem praesentem non venerim, illum praesertim impotenti libidine quaecunque libidinosa putaret amovisse. Sed nuperorum Graecorum *πολυμήματα* ejusmodi arbitror plura. Stephanum quod attinet, fatum scriptoris doleo, si iterum nostra spes fallatur. Nonne satis fuit *Casaubonum* per tot annos nostra vota frustratum. Quid enim? vix audeo tamen contra tam magnos viros hiscere. Sed profecto hoc aevo insaniendum est cum vulgo, & libidini typographorum obsequendum. Illud emere non curat, si Latina non addantur: hi vendere tamen omnia volunt, quaecunque cudunt, immo nisi sat lucri illis obtingat, queruntur statim de damno. Putabam etiam multa historica in Stephano, quamquam auctoris copiam habere numquam potui, quae interpretem merentur. Sed, ut dixi, nil audeo contra tantos viros. De Eroticorum missione ita nos delusos, male me habet. Tali tamen qui non diligentius, quam si sua res ageretur, haec curet, tradere sane nolim. Et ipse nostri raritatem horum codicum, & periculum, si pervenirent in alienas manus. alias jam compacti & in sarcinam conjecti sunt, mittenturque primum ac a vobis occasio indicetur mittendi, vel per me inveniatur, de qua securus ἐπ' αὐφ' ἡμεῶν πρὸς ὅτι καθεύδειν possim. Nunc quum chartae aliquid restet, placet tuam sententiam super Pollucis locis iterum rogare, nec dubito quidquid tu censueris, idem fore ac si a senatu critico responsum tulissem. Nec aliter fiet posthac a me: sed Aetolus hic tam diu sibi superveniet, donec te negaveris esse velle amplius Doricem: quod, si quam nullum meum meritum contra in te exsilet vel extare forte possit consideraveris, facile potes facere. Ego tamen cum bona fortuna iterum tentabo. Bis in MS. Poll. haec nota 5. occurrit, quam alias semper *ως* significare adverti ex paucis, quos Heidelbergae evolverim. In hoc MS. tamen ita ponitur lib. 1. cap. 2. *ὡς τῶ μὴ βραδύνοντι εἰς, ἔργα, ἢ τῶ ταχέως*. putavi ἡγαν significari; nec incidit aliud. est etiam ab alia manu, quam quae contextu exaravit. Sed hoc nihili sane. Et forte illa non pensiora, quae jam indicabo. l. 1. c. 4. Pollucis venatione punica purpurarum in MS. *λείπει*. bina tamen ibi loca ab ingenio conabar emendare in vulgatis. 1. ubi de *κυψέλαις* structis a piscatoribus. *πρὸ γὰρ τῶ σπάρτων ἢ τῶ χοίνων τέλη, ὡς εἰς τοῖς σώμασι τῶ κυψέλων ἐξεπίτηδες ἀνέχειν ἔωσιν, ὡς τῶ μὲν purpurae περιόντι ῥαδίως ἦκειν καὶ δίσταται. ἀναχώρησιν δὲ εἰς τὸ ἔμπαινον, μηδὲ ἀναστροφῇ τῶ παρελθόντι ἐκδιδόναι*, Pro ἦκειν reponcbam *εἶκειν*. Mox de coctura purpurae. *τὸ δὲ αἷμα, ἐπειδὴν πρὸς ὁμιλήσῃ, χεῖται τε, καὶ ἐξανθεῖ* pro *χεῖται* emendabam *ζεῖται*. cap. 5. *ἀποχειροβίωτοι, ἀπειρόβιοι δημικροί*. Quaeso te quinam illi medii? corrigebam itaque *ἀποχειρίβιοι* ex Hesychio & Suida. c. 7. *ἀπειναυτίσαι δὲ, τὸ φυγεῖν ἐτῶ, ἢ πένυσαι πινῶ ἐπ' ἐνιαυτὸν*. MS. noster clare *ἀπειναυτῆσαι* ut & Suida, apud quem tamen *Meursius* emendare nos jubet *ἀπειναυτίσαι*. Sed & alia talia sub duplici forma, ni fallor, dives illa lingua profert. unde etiam alias esset *ἀπειναυτίσις*; MS. forte & haec rectius habet. *φυγεῖν εἰς ἐτῶ* nimirum, c. 8. *εἰς δ' ἂν τῶ περιέσυχον τόπον &c: κατὰ τὰς ἀττικὰς περιέσυχον. εἰ δ' ἂν καλεῖ* (H: Steph: *καλεῖ* emendat) *τὸ μέρῳ αὐτῶ: εἰ δ' ἂν τὸ πλευρὸν καλεῖται. ἢ μέντοι χρῆσις καὶ ἐπὶ τὰ ἐναντία τέτραπται*. Haec ultima non capio. & primum forte *τέτραπται* su-

susplicabar legendum. MS. ἡὶ λείπα. Caeterum illa ὅτι τὰ ἐναντία non capio tamen incidebat ὅτι ταμεία. Legeram enim & ταμεία σημαίνει apud Hesych. Tu rectius me docebis, mi eximie Salmasi. Ibid. non longe post: εἴτε ὀπτανείον, το μαγειρεῖον, ἐρεῖσος, ἀποθήκη, ταμεία, ἡσσανεῖοι, Φυλακτῆρια. ἐρεῖσος quid est quaeso? Lexicographi tacent prorsus: in MS. deficit hoc totum c. 8. In eo ilatim sine dubio & haec medicinam expetunt. Ζενοφῶν δὲ καὶ στεφανῶ, καὶ σέγγην ὠνόμασεν, ὅπως εἰπὼν. ὅσοι δ' ἔδ' ἐν δεκακλίῳ μεγαλοσέγγει. καὶ παλιν. σέγγαια, ψυγεῖνα, καὶ ἀλεῖνά. Nec enim σέγγην nominare hic Xenophontem videas. An itaque Pollux scripsit καὶ σέγγη (& mox utitur etiam genitivo τῆ σέγγης) & in Xenophonteis legendum μεγαλῶ σέγγει. δεκάκλινον σέγγη ut δεκάκλινον οἶκον. Verum exspecto a te aliquid rectius. Talia enim plerumque mea, quae ipse non satis probem mihi, nedum aliis. c. 9. de re nautica initio fere, ἐπακτρίδεις ἐπακτροκελητες βαρεῖς, περθεῖον. Quid si? ἐπακτροκέλητες βάρεῖς. Mox στεφανηγὰ puto omnino emendandum στεφανηγῆς, uti & infra nominat. Sed libet saltu facto pausam facere. C. 12. inter legumina enumerantur ἐρέβινθος, ῥέσραχοι, ἀράκη. ῥέσραχοι quid fuerint nullus invenio. Quid tibi videtur, eximie juvenum, nonne χάλκεια, ni vix sint ὑποχαλκά πνα, remisisti tibi, χρύστα qui dederas. Non aliter fit amice, pro opibus quisque struit moenia. Vale atque salve, mi eximie Domine, & tuo Jungermano, quum loci non magna intercapedo id nobis commodi faciat, nec tar litterarum tuarum, nil magis sitienti, crebro propina. Ita diu felix sis, & ex animi tui sententia vivas. Cl. Gruterum nostrum saluto officiose, & rescribam proxime: jam hercle non vacabat. Vale iterum atque iterum, raptim e typographio Wecheliano A. D. xv. Kal. Aug. cicoicix.

EPISTOLA CCLXXIV.

GOTHO FREDUS JUNGERMANNUS

Claudio Salmasio τῷ πάνυ S. P. D.

Heidelbergam.

S Agax ingenium nobis non est, mi eximie amice, πὶ γὰρ ἀν' ἄλλως κἀθόμι Θεῶν ἐρικυδέα δῶρα. Nec, ingenuè fatear, me si rupissem, expediissem ex illis tricis, quas tu profligasti facile, & fecisti, ut Pollux tibi aeternum debeat, & per eum bonae litterae. Evilescunt mihi jam aliorum oracula, in quibus adeundis frustratus fui saepius. Tuum μαρτεῖον me non fallit. Caeterum quod ad illud ἀράκη attinet, putabam tantum esse qui apud Hesychium ἀρακοί. ἀράκη enim mox tm. sequenti sequitur, ubi MS. ἀθάρη. ἐκ καχυδίας. περιάτη. Alia tua valde placent, praesertim tam recondita de illo composito non composito μεγαλοσέγγη. Jubes insuper & alia non minus grata exspectare. Pro quibus omnibus gratias satis dignas tibi agere infacundia mea me prohibet. Spero sane, si ego non mereor tantam benignitatem, tamen in litterarum gratiam porro nostros conatus juvare perges. Pergo itaque adnotare & alia tuae

opis indiga. c. 9. tm. 2. de re navali *περὶ ναυπηγῶν*. quae defunt in MS. vulgo ita: *Φιλοπρότερον ἢ καὶ νεωγχοὶ, νεώτεροι, νεωπιοὶ* &c. sub illo *νεώτεροι* aliquid latere puto, quod paria cum caeteris significet. nec placet cum viris doctis accipere pro recentioribus scriptoribus, quasi illi usurpassent *νεωπιοὶ*. quid tibi videtur? Eodem tm. *τὰ ἢ εἰς τὴν κατασκευὴν χρήσιμα, σανίδες, σίδηρος, ἥλοι, πεττανία, πῖσσα* &c. & haec in MS. defunt. Caeterum an scribendum *πέττανια*; & an eadem cum *πεταύροις* vel *σανίσι*. Tm. 3. MS. ita: *ἐπὶ τῇ (vulgo ἔπειτα) ἐνίοις ἀνίσταται ἡ τελευτή* (vulgo tantum *ἀνίστανται*) *ὧν ἕκαστος κατὰ τὰς καλῆται πρώτος βόλος, καὶ δεύτερος, καὶ ἐφεξῆς*. Illud *βόλος* mihi rectius vulgato *βώλος* videtur. Verum & aliud quid latet sine dubio hīc, quod tu, sagacissime juvenum, facile eruas, & ni fallor delitescit menda in cubili *ἐνίοις*. Facit, hoc ut suspicer, Hesychius, qui: *ἐννίον, κόπης μέρος τὸ ὅππῃ τῷ σκάλμῳ ἔνδον ἐν τῇ νηὶ* — C. 10. tm. 18. fine *ιερεῖα ἐθύσαντο, ἐσφραγίσαντο, ἐσφαγιάσαντο*. MS. illud medium *ἐσφραγίσαντο* non habet: & nescio quid significet in hac quidem re sacrificiorum. Tm. 19. *ἐμετάλλωσαν, ἐπατάλλωσαν*. alterum illud MS. non habet, & quaeso quid est verbi? an forte legendum *ἐπατάλλωσαν*? *πατάλλωσαι* lego in Suida, *πρὸς πῆξαι*, quod de machinis forte non inepte dicatur. an tanquam ex priorē male repetitum, delendum? emendare tamen placet. Sed ut quidque sub manu ita quaedam addam, quum occasio de subito ad vos litteras mittendi offeratur. cap. 14. *περὶ ἀμάξης*. locus ibi ita in MS. *ὑποπέπηγε ἢ αὐτοῖς ζύλα, ἀ θάραια* (sine accentu) *ὀνομάζεται*. Certe vulgatum *καὶ καθαραῖαι* nescio quid corruptionis innuat. l. 11. sub finem, ubi vocabula, quae a *δέρις* deducuntur; recenset, ea habet omnia MS. praeter unicum *περισφές*. quod profecto nescio quid sit rei. L. 111. c. 2. *περὶ θείων* &c. & hunc locum corruptum puto, qui sic in vulgatis. *καλλίας ἢ, δυαδελφίδω πευτῶ μυχῶ*: in MS. ea defunt, & itaque inde nihil opis. c. 3. tm. 2. *περὶ περμνηστρίας*. initio statim MS. ita: *Σικελιώται ἢ αὐτὰς (περμνηστρίας) καλῶσι περμνηστρίας*. an forte id rectius, quam quod *H. Stephano* placet, *περμνηστρίας*. Sed addo quaedam desperatiora, ubi divinum ingenium tuum exerceas potius, L. 19. c. 6. (Basil. edit. p. 483. v. 20.) ita MS. auctius: *Αεριοφάνης ἢ ἐν ἀναγύρω λέγων, τῶν αὐτῶν πρᾶξι δυνάμει, καὶ σύμβολον ὑποτυπικλιντράμων τὸ αὐτὸ ἀνείλετο*. an? *ὑπὸ τ' ἐπικλιντρώ ὦν*: Sed haec tu rectius. Statim Callimachi versus ita in MS. *ἐκ τ' ὀκοβρνοκολλύβη πιπρήσκουσιν*. Quae vero paullo post sequuntur Euripidis, ea corrupta esse patet, non ut restituenda. narrabo ut in MS. habentur: caetera tuae erunt *διηγήσεως*. *Τάχα δ' ἂν εἴη κόρη, ὡς εὐρυπίδης ὠνόμασε παρθένον ἐν Σκίρωνι, λέγων περὶ τῶν ἐταίρων ἐν Κορίνθῳ. Καὶ τὰς μὲν ἄλλων πῶλον ἂν δίδως ἐναπας ἢ ζυνωρίδα. αἰδὲ καὶ ἐπὶ τετάρων Φοιτῶσιν ἵππων ἀργυρῶν. Φιλῶσι ἢ τὰς ἐξ Ἀθηνῶν παρθένους, ὅτ' ἂν Φέρη πολλὰς* &c. vulgata sunt in edit. Basil. p. 454. v. 18. &c. Mi eximie Dn. Salmasi, amice suavissime ignosce impudentiae: & perscribe ad ista tantum quae *θαυμάσιον* ingenium tuum ex tempore jubet. nolim enim mea causā ullo pacto te fatigari, vel tempus insumere, quod praeripias aliis tuis meditationibus. Vale, atque salve, mi domine. Scripsi raptim e typographio Wecheliano a. d. vi. Id. Aug. CIOICIX.

EPISTOLA CCLXXV.

GOTHOFREDUS JUNGERMANNUS

*Claudio Salmasio S. P. D.**Heidelbergam.*

M Axima laetitia me affecisti, amicissime Salmasi, quod litterarium nostrum colloquium renovaveris. Ego enim amplius scribere vix audebam, quum nescirem silentii tui causas. De amore quidem dubitare ne leviter quidem volui, nec ulla tua vel diuturniora silentia, (quae tamen deprecor) id ut faciam, efficient, quam diu certe in mente vel manibus tuas amicissimas & eruditissimas litteras verso (verso autem saepius) in quibus certe non amoris ῥαδίως λυθῆναι δυναμένοις signa, sed constantis & minime interituri. Facile autem tibi credo, quaeque de tuo taedio perhibes, & ego novi meo malo, καὶ γὰρ πῶς ἀνόμοιον ἔπαχον. Senex quidam Metensis, famosus, medicafter tamen, tumens τυμπάνῃ δικίῳ genu in pristinam εὐμέλειαν restituere aggressus fuit. Et admisi hominem virorum gravissimorum hîc consilio inductus, qui & adduxerant. At ille medicatis suis potionibus, (praeter quas admittebat nullam) ita ventriculum meum afflixit (inepte curam internarum, quae non egebant, partium instituens) ut prae taedio & nausea quoque nemini amicorum responderem quidquam, ἀρσιπυῶς μάλ' ἔχων, si typographicas occupationes, quibus perpetuo distineor, possem quotidie profligare. Sane ille medicafter tantum non me enecavit, abiitque re desperata cum mala gratia. Jam paulatim benignissimus Deus Jungermannum tuum erigit, ita ut speret se resumere serio tandem posse Harprocratationem hac aestate. Paullulum modo summus ille Deus valetudinem confirmet, videbo ut tandem molesto me illo negotio liberem. Si non possum multa millia mendarum a me ejecta gloriari, certe tamen bona fide dixero, quot voculae explicentur, tot quoque σφάλμασι, in quibus multa insignia, me liberasse istud Lexicon. Deus modo largiatur valetudinem aliquanto minus incommodam. Dulce vero fuit de tua recuperata valetudine cognoscere: Deoque ideo ago maximas gratias, & porro cum precor, vota quoque ipsi facio, diu nobis salvus vivas & superstes sis. Quam gratum vero fuisse mihi putas, quod iterum ipse tuum mihi μαντεύειν tam humaniter aperiās. ὦ ἄφθονοι Μυστῶν θύραι. Nosti quid aliquando querebar. viros doctos plerumque ad talia ζητημάτια tacere: idque ipsum te ajebas expertum fuisse. Certe ad Harpocratationis Lexicon illud, quod tamen innumerae mendae possident, ubique loci aliquot mutili & desperate corrupti, symbolam haecenus contulit nemo mihi. Tu facies, mi amicissime Salmasi, vel in mei gratiam, immo boni publici causa, cui nostra studia inserviunt. Sed ad rem ipsam, ubi statim initio rogo, si plura proposuero, ubi me expedio minus, ne id gravatim feras, quum enim tuis litteris eruditissimus tamdiu caruerim, vellem mihi has dapes repetere (cum tua tamen venia) largius: & ipse ita jubes, ad
tuas-

tuasque litteras audacter provoco. Age sis igitur ὦ φίλῳτε. In Ἀ' mirus locus: ἀντί ῥ', ἕως exponit, itaque inveniri in Antiphontis Samothracica. quibus addit: πολλή ῥ' χρεῖσις αὐτῷ. καὶ Θουκυδίδης ἐν τῷ προοιμίῳ ἕτως ἤρξατο. Οὕτως μὲν ἔνιοι δεῦρ' αὖτε τείνει λόγους. prorsum versum istud prooemium perlegi, nil inveni tale. Locus sine dubio insigni vitio inquinatus, ubi ego nil nisi me haerere fatear. In Ἀξιοῖ, ita laudatur Antipho: Ἀντιφῶν ὑπὲρ τ' εἰς τ' ἐλευθερον παῖδα. titulus orationis sine dubio corruptus. Versus Eupolidis in Ἀπόκλεισις. ὡς ὅμιν ἐγὼ πάντως ἀποκρινέμαι πρὸς τὰ κατηγορούμενα. & statim in Ἀ' παραχρῆν Aristophanis: οὐ μὴν ὄγε σὺς ἀδελφὸς ῥ' ἀπελάγχανε. tuo quoque iudicio subijcio, cujus in ejusmodi restituendis felicitatem ex Pollucæis locis abunde didici. Quæ in Ἀ' πομάττων mythologumena refert, videndum Etymologicum magnum in voce δελφοὶ καὶ δελφὸς ἀνὴρ. ὡς ἄρα οἱ τιζάνες τ' Διόνυσον ἐλυμνήναντο, γύψῳ καὶ πλασάμενοι, ὅππῃ τῷ μὴ γνώριμος γενέσθῃ. quaeso si ea alibi legeris indica. ita enim illustriora mihi & aliis reddam. In Ἀπρότων. Dinarchi haec: ἐμπεπηδηκότων τ' ῥητορῶν, ὥσπερ Ἀπρότων εἰς τὸ ἐμπόριον: addit, nisi sit γεφυρικὸν ἀμάρτημα, καὶ δὲ γεγράφειν, ὥσπερ Ἀλησίπων. Vaticanus cod. habet ἀληπίσων. Utrum rectius judicare non possum: neutrum enim intelligo. In Ἀρχαίως iterum locus Thucydidis memoratur: Θουκυδίδης, αἶτ, ἐν τῇ πρώτῃ ἱστορίῳν τρόπον τινὰ ἐξηγήσατο. φησὶ περὶ τ' ἀρχαίων πραγμάτων τὰς νεωτέρας &c. Nec enim ista in Thucycide quaerens invenio. In Ἀ' ττα, ἐνιαχῶς ῥ' παρέληψεν τὸ ἄττα. χιωνίπε, πύσθι χειδῶν πῆνικ' ἄττα φαίνεται. Putavi rescribendum: χιωνίδης πσ. Πύσθι χελ. π. α. φ. Chionides in Heroibus & apud Pollucem laudatur. In Ἀττικοῖς γεγραμμάσι. Θεόπομπῳ δ' ἐν τῇ κ. ε. τ' φιλιππικῶν ἐσκευασθῆναι λέγει τὰς πρὸς τ' βαρβαρον συνθήκας, ὅς τοις Ἀττικοῖς γεγραμμάσιν ἄλλα τοῖς τ' Ἰώνων. Vatic. habet ἐκ Ἀττικῶν γε ἐπτηλίτευται, ἀλλ' Ἰώνων. Sic & Pithæi variae lect. nisi quod οἷς ἐκ Ἀττ. An forte illud ἐσκευασθῆναι delendum & scribendum ἐσηλιτεύσθαι, ut illud fuerit hujus glossæ. Statim locus qui me magis torquet in Αὐθέντης ὁ αὐτοχειρ, ἢ ὁ αὐτ' ἀναιρῶν. διὸ παρ' Ἰσοκράτῃ, αὐθέντες. Torfit & H. Stephanum, qui certe exemplum ex Isocrate afferre non potuit, ubi αὐτοχειρ ita usurpetur: nec ego in iis, quæ existant, reperio. Et quis ubique immorari velit? In Ἀ' υτολήκυθοι locus dignior, cui medicina & lux fiat: ὅτι ῥ' εἶχον ἐν ταῖς ληκύθοις ἀργύριον. ἐνίοτε ῥ' φίλον ἀποβάτην. Vatic. & Pith. habent ἀργύρεα, ἐνίοτε δίφρον ὅπ. Tu medere mi Salmasi. In Ἀ' φ' ἐσίας ὥπότης οἰκίας. καὶ ἀφ' ἐσίας μυῖσθ. Ἰσακῶν ἐν τῷ πρὸς καλυδῶνα. Οἱ ἀφ' ἐσίας μυῖσθ Ἀθηναῖοι ἦν πάντως. καὶ ὁρῶ ῥ' λάκων ἐμυῖτο. Locus defectus: qui a me quidem frustra exspectat opem. Nolim ad Βῆζα progredi: nam haec satis multa: quibus si nil responderis pro imprudentia dignam sane fero mercedem. Sed tuæ litteræ me fidentiozem reddidere. Quid vero, mi amicissime Salmasi, de tuis ita taces, Stephano, inquam, Callimacho, aliis praeclari illius ingenii tui (ἀνευ κολακείας dico. τὰ ῥ' θεῶν, ἐρικυδέα δῶρα namque laudanda sunt) monumentis, quid illis sit inquam? Θεράποντας certe μισῶν φθονεῖς esse minime decet. cur itaque premis tamdiu, & caussando nostros in longum ducis amores, qui πόθῳ ἰσθ' tantum non γηγράττομεν. Et Eroticorum syntagma ego quoque nonnullo jure urgeo, certe

ita olim promittebas, quum hanc lampada tibi cederem lubens. Catalogum nuper vidi: sperabam in iis & ad te quid. Sed frustra. praeterea, si tituli me non fallunt, nil fere τὸ παλαιὸν κόμματ. Sacculum hoc scilicet ita novitatis avidum. Jussi mihi tamen adferri *Meursii* Glossarium, & *Heinsii* Horatium. Vestri libri nimis caro Francofurti, ut nosti, venduntur. Suetonium alias *Casauboni* vestri desiderabam. Sed vix obtinetur, ut audio, septem florenis. Et nondum mihi constat, an illius magni viri Animadversiones exauctae accesserint. Nec enim in rem praesentem ire possum: quum hic lectulo meo affixus tenear, Deo meo ita volente, cui ὅτι φίλον, καὶ ἐμοὶ κεχαρισμένον εἶναι χρεῖ. *Casauboni* vestri amorem erga me insignem, & qualem minime mereor, ex multis litteris jam cognovi, ut ex proximis etiam, quae mihi his nundinis redditae. Cujus commentarium in Polybium an mox habituri simus, aveo scire. Sed in primis de te & tuis, mi Salmasi: vellemque adhuc ante mortem meam hoc frui gaudio, ut tua in publico viderem. Jam nuncius advocat, *Claudium Marnium* esse mortuum. ipsius haeredes & Aubriani ante nundinas paullo rem librariam diviserunt: & utriusque jam officinae catalogum ad amplissimum *Bongarsium* misi: alias novi nihil apud nos quidem prodiit: quo te impertire potuisssem. Vale, mi amicissime Salmasi, & longas has litteras in bonam partem interpretare, impolitiemque meo languori diuturno condona. raptim e lectulo meo, Hanoviae in typographio Thomae Willier hospitis mei in urbe nova. 1610. ipsis Non. April.

EPISTOLA CCLXXVI.

GOTHOFREDUS JUNGERMANNUS

Gaudio Salmasio suo amicissimo S. P. D.

Heidelbergam.

Quid agis, mi suavissime Salmasi? Perpetuone ita Sigalioni sacra vovisti? Nec tamen credo te oblitum esse Jungermani tui, quamvis id nulla re se mereri novit, quapropter ita volueris antea esse tuum: quod solum potest, te & eruditionem tuam veneratur, & venerabitur, quamdiu vitam habebit. Spero vero te ex diuturnis morbi tui reliquiis tandem evasisse, certe ita velim, utque ita sit, Deum summopere precor, & diu servet sanum & incolumem. Desiderat hoc bonarum litterarum, quod videtur instare, senium, quae immane quantum detrimentum fecerunt in obitu *Scaligeri* nostri. Ne porro faciant, tibi profecto, tuisque similibus (quorum tamen quotus quisque est?) providendum est, nobis inferioris subfellii precandum, ut Deus ideo vos servet. Quid multi hodie agant, vides: nil praeter calumniarum & quidem αἰμάζας plenas evomunt in optimos quosque, quasi in nulla re alia stylum vertere possint vel debeant. Vidistin' quam aniliter convitiatus nuper fuerit *Greſſerus Molino* vestro & τῷ πάντῃ *Casaubono*, ob editas ab utroque Nysseni epistolas & Notas. Sane si tu in Nilum & Barlaamum paullo liberius commen-

tatus fuisses, statim idem fatum te mansisset. Sed quo prolabor? Hoc potius, quod tamen timide facio, te consulere super aliquot corruptis Harpocratonis locis, in quo auctore adornando adhuc serio pergo, quantum per valetudinem licet infirmissimam, quantumque dolores pedis & μάλ' εὖ ὀπικατασθέντες subinde recurrentes, & me quotidie lecto affligentes sinunt. Hac conditione, si convalueris, si tibi vacat, si obiter incidet, quod ideo ad me perscribas: alias nolim, potiusque illas non scriptas velim. Ex festinata quamvis collatione Demosthenis, Isocratis, aliorum, qui exstant, rhetorum lacunas quasdam desperatas sanavi, & alia loca innumera, certe putavi me non potuisse incidere in corruptiorem auctorem. Sed restant adhuc, unde me nemo extricabit, nisi vel tu, vel liber MS. plenior. In ἄττα: ἐνιαχθ' ἢ παρέλκει τὸ ἄττα. χιονίπυς πύθυς χελιδὼν πήνικ' ἄττα φαίνεται. Chionidem quidem comicum novi, ejus etiam heroas Suidas laudat: at loco huic nescio, inde quid medelae: χιονίδης πύθ. . . . πύθυς χελιδὼν πήνικ' ἄττα φαίνεται. Sic tentabam. In Δρασησαὶ ἀντὶ τῆς Δρατρεάζου, καὶ οἷον ἀδύνατον ποιῆσαι. Μένανδρος: χρηαῖβοῶν πικρίτω τὴν πόλιν Δρασιτῶν. Putabam. Μενανδρος: χήρα βοῶν, & videbatur mihi in eo dramate citari apud Suidam in ἀνάδοχον. Sed non tamen constituo versiculum. Nec plura: vereor enim, ne hisce peccarim. Quod si a me factum, amicus amico amice condona, & vale atque salve, mi amicissime Salmasi. raptim a. d. 16. Kal. Hanoviae in urbe nova ex aedibus hospitis mei Thomae Williari. 1609.

EPISTOLA CCLXXVII.

J. O. H. F. R. I. D. G. R. O. N. O. V. I. U. S

Nobilissimo & Clarissimo Viro

C. L. A. U. D. I. O. S. A. L. M. A. S. I. O

in Academia Lugduno-Batava Professori Honorario, de omni
Antiquitate optime merito, Domino meo.

Leidam.

SI quis est in natione nostra, qui, ubi illam famam rumores distulerunt, ex animo favit seu Academiae Lugduno-Batavae felicitati, cui tua praesentia illustrari concessum, seu tuo honori, qui soli virtuti tuae imputari se patitur, seu denique ipsi Germaniae, quae viciniore fruitur Litterario sole, eum me esse ajo, atque tibi ut persuadeas, oro, Nobilissime & Clarissime *Salmasi*. In religiosum enim nominis tui cultum rapuerunt me veluti limphatum tua in eruditionem omnem merita, omnem aestimationis gloriam, & judicii aleam supergressa: quibus tanta sum doctus, indoctus alias & rudis, quanta per vitam doceri posse vix speraveram. Itaque non potui, istius admirationis molem mente non capiente, moderari amplius libidini meae, aut verecundiae fi-

nes

nes non migrare, ut non fronte commasculata devotionis meae apud te indicium profiterer, & referri in numeros cuperem eorum, quos cultores tuos notti, & aliqua benevolentiae strictura remuneras. Plures enim quam scire potes, ubique a sole exoriente utque ad Maeotis paludes admiratores peperit tibi incomparabilis illa quamlibet doctos erudiendi felicitas: nec singulorum mentes hanc audaciam praelumunt, suae humilitati fastidium veriti, ut innotescere cupiant iis, quos in tantam sublimitatem fama evexit. A quo metu immunem non facit me ulla meae dignitatis, sed tuae humanitatis opinio, quam praecipue ex familiari colloquio magni amici tui *Hug. Grotii* nuper *Hamburgi* didici, & tum quoque timidi voti murmure, operam daturum, ut experirer ipse, me obligavi. Eaque religione nunc me solvo, per communia musarum sacra, in quibus te summum antistitem veneramur, nobis placentes, si mystis esse liceat, orans; ut gratam tibi esse hanc scriptionem hominemque velis, temeritatemque, si quae est mea, studio rem litterariam promovendi, & te submisso colendi, condonare. utque hanc spem res aliqua mihi affirmet, patere, quaeso, me nec frustra expectare edecumatam censionem tuam super his paucis in *Martialis* quaedam loca, quem docto seculo in augustis tuis ad hist. Augustam notis promissum a tua lima avide desideramus. Lib. xi. Epigram. 9.

Lassa quod besterni spirant opobalsama drauci;

Ultima quod curvo quae cadit aura croco;

Valde dubito de hac lectione, obscaeni enim hominis unguenta quis non abhorreat? tum *lassa opobalsama*? Itaque suspicor rectius legi in MSC. *Norico*, quique jactat *T. Gennadium* recensitorem, ac *Palatinis*:

Lapsa quod externis spirant opobalsama truncis

Sic *Tragicus Herc. Oct. 792. quod Phoebum colens Dives Sabaeis colligit truncis Arabs.* eodem xi. Lib. Epigram. 44. turpi quidem verbis, sed quod mores probos non inquinat:

Parce tuis igitur dare mascula nomina rebus:

Teque puta cunnos, uxor, habere duos.

MSC. *Uxor biare duos.* *Horatius: Ep. viii. hietque turpis inter avidas nates podes.* Lib. xi. Epigr. 22.

Portabat uxor rufa crinibus septem.

MSC. *Uxor capta* quod non intelligo, nisi emendandum *capra*, quod in convitiis obvium: fane Lib. vi. Epigram. 86. pro *Catellae*, *Capellae* invenio. Errat *Jos. Scaliger*, qui percrines septem intelligit septem fertas, vittae & crinibus ipsis implexas, ad Festum. Innuit *Martialis* foeminam fuisse calvam, ut summum formae dedecus indicaret. ut hoc Libro Epig. 7. *Toto vertice quot gerit capillos; Annos si tot habet; Ligia, trima est.* Et vi. 74. *calvam; trifidem.* Et Lib. iii. Epigr. 93. *Et tres Capilli, quatuorque sint dentes.* Lib. xii. Epigr. 57.

Dicet, quot aera verberent manus urbis

Cum secta Colcho Luna vapulat rhombo.

Ambigo, an sit *septa* scribendum. Ovid. 1. Amor. Eleg. 8.

Quid torto concita rhombo Licia.

Et familiaris confusio harum litterarum. Invenio, *Salipto*, *Copta*. Et Lib. x. Epigr. 48. *septa*, pro *saluto*, *cocta* & *secta*: Ibidem:

Nos transeuntis visus excitat turbae.

Forte, *nifus*, scribendum. ut innuat motum agitantis & densentis se turbae. In Xeniorum Libro. post Ep. LXVII. inveni in MSC. distichon quod abest a vulgatis quos vidi: inscriptio: Phasiani duo:

*Quas Argoa prius transvexit Phase carina,
Oris avis sapidi foemina virque sumus.*

De quo uti & de caeteris omnibus tu quid sentias, vir maxime, magnopere scire & ingenii mei plausum cognoscere haveo. Salve, & vale publico bono, meque amare incipe qui devotissimus Excellentiae tuae cultor. scripsi Bremae IV. Kal. Decemb. Julian. Christi MDCCCXIII.

Has summi viri Gronovii ad *Salmasium* epistolas debemus viris egregiis & humanissimis *Francisco Sevino* & *Claudio Sallierio*, qui ex Bibliotheca Regia Lutetiae descriptas ad me transmiserunt, hinc & illic vero voces quaedam, quas ille, cui describendi partes mandaverant, non bene affectus erat, excidisse, vel perperam expressas esse animadverti, quare aliquando conjectura fuit utendum, in qua si aberravero, divinanti ignoscet lector, denique unam aut alteram etiam deesse Epistolam ex argumentis reliquarum deprehendet lector. Respondit ad hanc *Salmasius* Epist. XLIV.

EPISTOLA CCLXXVIII.

JOH. FRID. GRONOVIIUS

Claudio Salmasio.

Leidam.

Nobilissime Domine, Admirationem tui auxit maxime mihi illa felicitas, quae semel iterumque, cum Lugdunum vestrum praeterirem potius, quam intrarem, colloquium tuum participare permisit. Etsi enim praeclara illa ac diu reperta, quibus litteras sine pari demeruisti, quemvis facile inducant, ut nihil nisi maximum de te concipiatur, tamen omnia fidelius committuntur oculis, & praesens intuitus diutius haesuras imagines animo commendat. Ne dicam, quod recedere non licet ab aedibus tuis, nisi ingenti litterarum flumine inundatum, humanitatis tuae prothymia plane obrutum. Unde mihi amabili isthac, sive opinione, sive errore blandior, non vulgarem esse affectum, quo religionem mei erga te cultus remuneravis; nec ingratum fore auribus tuis, si de vitae genere, cui libertatem meam transcripsi, aliquid familiariter narrem atque in sinum tanti fautoris fortunae meae aectus expectorem. Fuerant amici, qui comitis Nassovii *Guilelmi*, Administratoris Zelandiae, filio *Mauricio* adungere me volebant. Sed iidem cum de toto negotio ad D. *Altingii* consilium me remitterent, dissuadenti huic, ne hanc provinciam susciperem, quod non paulo feliciori sorti reservarer, manus dedi. Ita-

que

Respondet *Salmasius* Ep. XLVII.

que post aliquot septimanarum decursum parui jubenti me citato Novioma-
gum ire, quasi rem factam habiturus, & in vacuam possessionem invasurus
apud Lansbergensem Principem, fretus ipsius promissione, fore ut statim post
abutum per litteras illustrissimae matri commendarer. Devoro incommoda iti-
neris, & sumptus illos animose profundo: sed cum eo venissem, alia inve-
ni omnia, & ultra tres, ut minimum, menses expectationes meas differendas
audivi. Porro quasi non sit satis in ista itineris, sumptuum, temporis impro-
be deperditi damna, velut in lagenam me esse conjectum, ubi redeo Amstelo-
damum, affertur mihi nuncius horribilis, κήρυξ ἀχέων, alii cuidam, serius
hanc spartam ambienti, auctorem fuisse D. *Altingium*, ut se suaque quacun-
que ratione commendaret, esse enim rem integram: sic ferre cogimur mortales
judiciorum ludibria, & ab iis ad nitendum petere alas, quibus magis in de-
liciis est, pinnas, si quas habemus incidere, quam quas non habemus, addere.
Itaque cum viderem simplicitatem meam malis artibus deludi, mihi cum istoc
altero, cui *Altingius* magis factum vellet, in ambiguam litem descendendum,
favore, non virtute ambiendum, non sustinui diutius videre tam inique paria
componi, & ludus esse jocantibus damno nostro, a quibus nihil tale merue-
ramus. Jamque abjecta omni spe in eo eram, ut aptis sarcinulis & expeditis
Groningam reverterer, meoque modulo me includerem, cum vir in hac Re-
publica amplissimus *Michael Pavius* me vocavit, & sermonibus ultro citroque
habitis, si sui fratrisque filii studia ordinare vellem, praeter convictum, habi-
tationem, aliaque, quae ad horum commoditatem necessaria, stipendium C.
Imperialium humanissime promisit. Ego, qui cogitabam rem certam incertae
quamvis amplae spei praeferendam, hinc plus dapis & minus rixae atque invi-
diae me habiturum, tum studiis quietem aptiorem in privato, quam aulicas
inter turbas fore, conditionem accepi, ac ventos & inania captare desii. Hoc
meum infidorum amicorum experimentum cum catastrophe, quae scilicet tan-
ti erat otiose hinc narrare, ut tibi, Vir maxime, odium essem, & graviores
occupationes nugarum longis ambagibus morarer. Ignosce nimiae fiduciae,
quae talis est, ut vel sic habere me, quod caelo imputem, credam, cum etsi
quotidie adesse negatum, tamen propius abesse licet, & quod non ab nectareo
tuo ore pendenti per litteras citius subinde doceri. Quam in rem ecce tibi
vitrea fracta, id est emendationum Lucretii, ad quas Domini *Vossii* liber MSC.
me manu duxit, gustum: quae valde vereor ne plurimum traxerint ab lan-
guenti animo & ad meditandum plus quam inepto. Patere, quaeso, me hunc
fructum ferre sincerissimae meae erga immortale nomen tuum observantiae, ut
censionem tuam accommodes & diviniore meditationes tuas super iisdem lo-
cis mecum communices. Secus, damnabo studium meum, & ipse operae pre-
tium me fecisse non putabo. Dominus *Sixtinus*, qui te utique pro meritis
tuis aestimat, attinetur nescio quibus negociis, ut interea non nisi semel mihi
cum ipso colloquium fuerit. Etsi verbis satis magnifice promittit, & salivam
thesaurorum suorum audientibus movet, tamen videtur eorum esse plus nimio
retinentior, & cum haereditate librorum *Gruteri*, simul ejusdem optimi viri

certe hac in parte invidentiam crevisse. Inclusam Schedam ni grave est, cum tuis remitte quas destinabis Amstelodamum rectaque mittes ad eum, qui navi-
culariam exercet, ne iterum morae nobis sit, ut antea oscitantis Bibliopolae,
apud quem per tot menses tuæ delituerant. Vale, vir & Fautor incompara-
bilis cum omni familia. Scripsi Amstelredami Prid. Eid. Aug. Juliani Anno
Christi cıııccxxxiv.

2 Deest schedula, quae emendationes Lucretianas continebat sed ex *Salmasii* responso patet de quibus egerit.

EPISTOLA CCLXXIX.

JOH. FRED. GRONOVIIUS

Claudio Salmasio Salutem & observantiam.

Leidam.

Libero fidem meam, vir maxime, quam appellas, & Catalogum fibularum thesauri, ut eum a ² Pastore Noviomagensi accepi, transmittito. Qui si alicui tibi futurus est usui, habeo quod gaudeam: sin, constabit tamen me morem me promissi paruisse jussis tuis. Vir bonus, & supra captum maximae partis sui generis hominum eruditus, captavit occasionis articulum in alloquio tui, cui siquid respondebis, ad me delatum tuto curabitur. Nos autem cum desiderio expectamus *θεῶν ἐγκυδία δώεα*, tuum, inquam de re vestiaria libellum, tum Arnobianas notas. Hic enim tam variae doctrinae scriptor, tantus Varronianorum scriniorum compiler, tot cruces, quoties legimus, nobis destituit, quot eximere interpretum antehac connisus fatis est nemo, te ab stirpe excidisse spes est, aut omnes aut plurimas. Suspicio judicium magni *Grotii* nostri, quem recorder, quum de loco difficili consuluissem, etsi alias promptissimus in respondendo est, ad te digitum intendisse, tuaque ut expectarem, jussisse hoc Catone contentus. Quid autem dicam de illis in *Lucretium*, quibus me nuper beasti?

Nectar & Ambrosiani latices epulasque Deorum

gustasse sum visus. Atque hae quo plus sunt potae, plus sitiuntur, ut non ignoras. Itaque plura nunc quoque misissem quibus eandem vicem referri peterem, nisi vererer transgredi verecundiae fines, & nimium mihi rapere oculi tui, cum & de inclusa dissertatiuncula quid sentias, scire haveam. Paucula tamen, quae in MSC. reperi, & dubito num carbonem pro thesauro hîc ponam, uti discam, possitne inde aliquid ad lineam extricari an rejicula sint & purgamentis librariorum deputanda. Lib. i. in princip. de Memmiada: *omnibus ornatum voluisti excellere rebus*, MSC. *ora latum*. Lib. iiii. in querulis quasi praeficarum vocibus: vs. 907. *At non jam domus accipiet te Laeta*. MSC. *Vim non jam*. vs. 934 *aeternum per nos sic esse soporem*. Monstrum Lectionis in MSC. *per nos sic esse praemo*. vide, magne Pontifex noster, quomodo expiari possit. Lib. iv. vs.

I Respondet *Salmasius* Epist. l. & li.

2 Johanne Smithio.

vf. 1202. cum semen forte virile, *Faemina* immulsi. MSC. cum semine forte virili *Faemina* vi mulcit. Lib. v. vf. 678. *Consequa natura est jam verum ex ordine certo.* MSC. *Consequiae quoque rerum ex ordine certo.* Damno versus. Editio Florentina, cui variantes ascripserat quidam *Carolus Strotius*, olim *Josephi Scaligeri*, e manu istius in margine exhibebat: *Consequitur naturae est jam series.* videtur aliquid latere. Lib. vi. vf. 641. *neque enim media de clade coorta.* MSC. *neque enim media greciade coorta.* Edit. florentina: *media de glande.* Illud volventes frigora fontes. quod eleganter explicas, confirmatur quoque alio loco lib. iv. vf. 260. *Ventus enim quoque paulatim cum verberat, & cum Aere ferit frigus.* MSC. *Aere fluit frigus.* sic Lib. vi. vf. 925. *Perpetuo certis fluant ab rebus odores, Frigus ut a fluviiis, calor a sole, aestus ab undis Aequoris.* Idemque ingerunt quae habentur Lib. iv. vf. 225. De his omnibus quid sentias si contingat mihi ex tuis cognoscere, summo me beneficio affectum putabo. Et si enim plura debeam, quam quae tam arcto & grato nexui unquam me exsolvi patieris; at nihil gravius accidere mihi possit, quam si ex eo aere me dimissum velis, & cum eo rem tibi esse putabis, qui quamdiu vivet, & quicquid posteris relinquet, magnam ponat in ea confessione gloriam, quo doctore profecerit. Tu vale, & me fovere perge. Amstelredami vii. Kal. Septemb. Juliani ciciocxxxiv. qui quod te cognovisse, vidisse, tam prothymo usum esse concessit, aeterna mihi in memoria.

EPISTOLA CCLXXX.

JOH. FRID. GRONOVIIUS

*Claudio Salmasio Salutem & cultum.**Leidam.*

ET si serio exoptarim, non hac staturam salutationem tui praesentis, cum in aedibus *Vossii* a me convenirere, tamen reputans a pluribus te adiri, quam vel ipse velles, & hanc litterarum viam mihi servans, indecorum putavi undam salutatorum augere, & partem recreationis, quam huc excurrendo quaesiveras, perdere. Nihil in aetate gratius contingere mihi potuisset, nihil quo ante obitum beatus fuisse videar, certius quam perpetuo gustare vel audire Nectareos sermones tuos, qui nec brevissimi me dimiserunt, ni aliqua eruditorem. Sed sic semper fui *Φιλομαθής*, ut potiozem modestiae rationem duxerim, caverimque omni modo, ne in eorum censum referri mererer, quos modestos dixere veteres, quibus debetur illud, *Nimum tinnis*. Ideo, Vir maxime, ne, infrequens si in officio fuisse existimer, minimam culpam imputes aut negligentiae aut morositati, sed si ulla est, studio potius meo, ne nimis familiariter odio tibi essem, alias ille, quo nemo mortalium virtutum tuarum agit reverentior, quoque vel vicem mediastini (tantam obligationem ultro profiteor) uti potes. Schedas meas a *Scrivario* tandem recepi, ut eas paululum interpolatas typographo, si cujusquam notitia mihi esset, darem. Spero

ro *Boxhornium* amici officio hîc functurum, Inclusas misit ad me ante paucos dies *Smithus* noster, ut videbis, priores meas redeuntem invenisse puto, flagitoque amice responsum. Aveo quoque audire iudicium tuum de difficillimo, ut vides loco Lib. VI. Lucretii vs. 954. *Undique qua circum caeli lorica coercet*, Ubi neque MSC. qui *denique qua circum caeli*, neque interpretes mihi fatisciant. A te expectamus ea quae alias docere nos queat nemo. Salve, heros incomparabilis, & vale cum omni familia. Scripsi Amstelredami Prid. Non. Octob. Ad CIO ICXXXIV.

Respondet *Salmasius* Epist. LI. & LII.

EPISTOLA CCLXXXI.

JOH. FRID. GRONOVIIUS

Claudio Salmasio S.

Leidam.

UT scias nondum desultoriae isti vitae me ἐπ'ωον dixisse, transtuli Hagam Comitum frivola mea in aedes *Regnerii Pavii* Senatoris. Ita placuit nostris, qui pecori imperitant. Fateor prope fore, ut si me ἀμαξόβιον quis vocet, agnoscere cogar convitium, & advocacionem non mediter. In musarum tamen viretis nunquam erimus peregrini. Itaque incredibile gaudium meum, quod concivit felicissima enodatio tuae fortis verae Delphicae, apud Lucret. VI. 747. *apud, acri sulphore montes*. Neque caetera aliter me afficiunt. Calpurnii, tamen Declam. II. *naturaliter fuscus artus umbra cogit albescere*, nondum satis capio, *Fusci*, credo, erunt, qui ut *Persius* loquitur, *fixerunt in cute solem*, & postea ab illo insolationis exercitio abhorrentes domi se continere, ut in umbra pallescere caeperunt. Sed videtur ἐμφανῶς prolatum, *naturaliter fuscus*. Et videtur in hoc vis argumenti declamatoris esse, si tempori tantum licet in naturam, quid naturae in seipsam & sui munera. In *Arnobio* *carnem* fateor a sono vulgatae distare, at non a litterarum apicibus; fuerit vetus scriptura, *carem* quam facile *v* pro *a*, *a* pro *e* supponitur. Nempe in *Lucretio* quoque *ecris* pro *acris*. In *valetudinem* *vertere* explicatur sequentibus. *prandia inde & caenas conficere*. Neque aliud intelligit *Lucretius*, cum ait *pecudes verti in nostra corpora*. Alimentum puta in id, quod alitur. Sic apud *Tragicum*, *Herc. Furente . . . igniferas trabes hinc inde traxit, nimia quas flamma occupat, totasque in ignem vertit*. Scilicet materia est alimentum ignis, & generatio unius corruptio alterius; sed nugae hae sunt. A tua *Cortina Arnobiana* veritatem expectabimus. Laetatus sum, cum cognovi ex *Vossio* ipsum illum scriptum codicem inspectione tua te dignatum esse. Nec dubito desperatissima quaeque, ubi adhuc viri docti in tenebris micarunt, tibi se debitura. Illud per Genium tuum te rogo, ut pergas me adhibere mensis istis. In Lib. III. vs. 966.

At

*At qui obitum lamentetur miser amplius aequo
Non merito inclamet magis, & voce increpet acri:
Aufer abhinc lacrymas, barathre, & compesce querelas
Grandior hic vero si jam seniorque queratur
Omnia per fructus vitae praemia marces;*

Non videntur haec cohaerere & versus quartus ponendus in locum secundi. Sed quid illud *Barathre*? quod servant MSC. an *Balathro* qua voce uteretur ex lege allegoriae. ut vs. 951. *plenus vitae conviva*, & vs. 973. *Satur ac plenus rerum*. Certe talis figura impedit Librarios, ut corrumpere locum in Lib. 1. Augustini de Civitate Dei. c. 30. *Eaque ipsa Libido Dominandi, quae inter alia vitia generis humani immoderatio inerat universo populo Romano*. Ita vulgo: At membranae Noricae, quas inspexi, exhibent, *meracior*, pro *immoderatio*, quod servat in margine optima omnium Editio Parisina. Plane apparet vulgatum esse alterius interpretamentum. Livius Lib. xxxix. *nimis avide meram haurientes libertatem*. Arnobius: *o meraco sapientiae tincti & saturi potu*. Ipseque Augustinus hoc lib. c. 32. *mens tam diu potatis erroribus ebria*. Et utitur simili allegoria Plato Lib. viii. de Rep. ubi de *ἐχλογεαρία* agit, sed liber non est ad manum. haec eo lubentius, quia MSC. Scriverianum etiam penes te esse puto. Lib. iv. vs. 166.

*Quandoquidem speculum, quodcunque obvertimus oris,
Res tibi respondent simili forma atque colore.*

Mire hinc se torquet Gifanius, Turnebus quoque & alii. At legam ex MSC. *quocunque oris*, ab *ora* quae notat extremitatem rei, circumtexturam, vel circumcaesuram ut Lucretius appellat. *Quocunque ergo obvertimus oris*, seu extremitati rerum *speculum*, simili colore res eae respondent in speculo, ut est in extremitatibus. Patet hoc ex vs. 156.

*Et quamvis subito, quovis in tempore, quamque
Rem contra speculum ponas, apparet imago,
Perpetuo fluere ut noscas e corpore summo
Texturas rerum tenues, tenuesque figuras.*

Lib. v. vs. 583. *Ut est oris extremis cunque locata*. Orae sunt corpora summa, cum quo quia immediate cohaerent tenues texturae, quas vocat Lucretius, pro his illae sumuntur nonnunquam: ut Lib. iv. vs. 179.

*Nunc age quam celeri motu simulacra ferantur,
Et quae mobilitas ollis tranantibus auras
Reddita sit, longo ut spatium brevis hora feratur.*

Legendum est: *brevis ora feratur*. Quod postremum verbum est in o. MSS. *Brevis ora* est textura tenuis. difficillimum sensum mira hypallage fingeat Gifanius, sed haec omnia aut tibi placeant, aut dicta nolo. Vale, prima gloria litterarum, & me ama. ad Smithum quum scripseris, litteras ad me mitte; diligentissime curabuntur. Hagae Comitum xi. Kal. Novemb. Juliani Ad CIO IO CXXXIV.

EPISTOLA CCLXXXII.

JOH. FRID. GRONOVIIUS

¹ Claudio Salmasio Salutem & observantiam.

Leidam.

Silentium tuum, Nobilissime Domine, dubitare me facit an ultimae meae, quas per ordinarios aurigas misi tibi redditae sint. Quod tamen magno velim ego, qui in istis omnem a me suspicionem Lucretii causa candide tue-ram amolitus. Repeto eam mihi mentem esse, ut quicquid aggrederer, si viderem strenuiorem athletam Isthmia deluctari velle, lubentissime manum sub- togam retraherem: Nedum, te, o temporum nostrorum gloria, cui uni ne- minem inter eruditos comparo. Repeto etiam nihil a te posse fieri, quod me offendat, nisi si amare desinas. Quod ut extremi supplicii mihi instar esset, ita nunquam tam malis moribus ero, ut merear. Certe si quid in eum scri- ptorem cogitarem, non praecipitarem & male cocta promerem, ritu illorum, qui proponunt famam, antequam nascatur. Premerem profecto in annum, nec te unquam dimitterem aut copias tuas. ² Qui ultimus Lucretium editum cum magnifico praeconio optimo *Vossio* nostro dedicavit, si vidisti, quid prae- stitit, quaeso, nisi quod librariorum scrinia Volusianis chartis exuberantiora fecerit? Mallem alterutrum ex doctis commentatoribus sive *Lambinum*, sive *Gifanium*, curasset excudi. Stulti indices, qui typographorum etiam errata fideliter exhibent, plerumque a paedagogianis pueris collecti, quid habent si- mile ad *Gifanianum* istum? Quae nos faciunt non omnino viribus nostris in- dubitare, etsi alias semper esse malim, ut ille ait, obtrektor mei. Sed ut dixi, inter *ὁμωθέεις* esse volo prae quam cito ineptus videri ostentator. Tuas ad *Smithum* diligenter curavi. Adjeceram prioribus meis rejiculam quamdam in Tertulliani de Pallio locum conjecturam, cujus jacturam, si illae periire, levissime fero: sin, etiam nigrum theta tuum lubens praefigi patiar. Quaesi- veram etiam quid in Festo & Macrobio intelligeres per *mundum patere*. Doce- me, quaeso sis, si lubet. Illustrissimae principi Landsbergenfi inscius & prae- ter spem commendatus placui: sed obstat communibus votis Dominorum meo- rum morositas, qui obligatum ad certum tempus dimittere nolunt. Ac etsi autoramentum nullum acceperim, nescio tamen qua verecundia vi nexum rum- pere non sustineo. Laboratur tamen etiamnum in ea re a nonnullis, quamvis ambiguo eventu. Post octiduum revertendum mihi est Amsterodamum in ae- des *Michaëlis Pavii*. Itaque si ante rescribendi ocium non fuerit, tuae me se- quentur. *Isacius Pontanus* misit ad me MSC. codicem Cypriani, bonae, ut spondet, notae. Facturus ne operae praetium sum, si excussero? Germania nostra extrema patitur. Hodie litterae Noriberga nunciant mihi a Kalend. Augusti usque ad Cal. Novemb. unum & viginti millia hominum peste in ea urbe

¹ Respondet *Salmasius* Epist. LVIII.² *Danielem Pareum* intelligit, qui Francof. 1631. edidit, & *Vossio* inscripsit Lucretium.

urbe periisse. Vale, primum aevi decus. Hagae Kal. Decemb. Juliani
Ad CIOIO CXXXIV.

EPISTOLA CCLXXXIII.

JOH. FRID. GRONOVIVS

Claudio Salmasio S.

Leidam.

Maxime Virorum. Non sine admiratione, *Smithum* nondum respondisse, accepi. Cum enim comitatem ipsius & promptitudinem nossem, putaram alia via eum in suis curandis usum, & recta Lugdunum eas destinasse. Itaque subirascebar illud officium mihi eripi. Recipio autem tibi, nobilissime Domine, fideliter tuas ordinariis tabellionibus commendatas. Statimque, ut postremas legi, scripsi *Smitho*, & lentitudinem ipsius admonui. Sed ne nunc quidem ullus mihi apex inde: ut verear, ne optimus vir causa fontica & nostris & suis desideriis excludatur. Sed avertat Deus omen. In me, si quid accepero, nihil erit morae. Merito ridiculum ἀναχρόνισμα quorundam nimio affectu Pontificiorum, sed dolerem ex MSC. Codicibus nihil opis a me adferri, nisi ipsa se veritas facile probaret. Ne nihil agam, mitto indiculum opusculorum quae in illo leguntur, ne similiter in posterum frustrer.

i. Epist. ad Donatum: *Bene admones*. ii. de habitu virginum. *Disciplina custos*. iii. de Lapsis: *Pax ecce*. iv. de Ecclesiae Catholicae unitate. *Commoneat Dominus*. v. de orat. Dominica. *Euangelica praecepta*. vi. de opere & Eleemosinis. *multa & magna*. vii. de Mortalitate. *Et si apud plurimos*. viii. ad Demetrianum. *oblatrantem te*. ix. de bono Patientiae. x. de Zelo & Livore. xi. Epist. ad martyres & confessores. *Exsulto Laetus*. xii. Epist. ad Mosen & Maximum Presb. *Gloriam fidei*. xiii. Eisdem. *Et cunctos nos par*. xiv. Presbit. & Dd. Frr. *Quaquam sciam, fratres carissimi*. xv. Presbiteris & Diaconis, item plebi. xvi. Eisdem. *agnoscenda & amplectenda*. xvii. Cornelio fratri. *Cognovimus*. xviii. Epist. Multorum ad Corn. Fr. *Statueramus quidem*. xix. Cornelio. *Legi Litteras tuas*. xx. Eidem. *Et cum diligentia & d.* xxi. *Et religiosum & necessarium*. xxii. Eidem. *Quod Dei servis & maxime*. xxiii. Eidem. *Venerunt ad nos*. xxiv. *Et egisse nos & agere*. Eidem. xxv. Cyprianus cum Colleg. Lucio F. *Nuper quidem tibi*. xxvi. Maximo & Nicostrato. *Cum frequenter Carissimi*. xxvii. Pr. & Collega Lucio. *Exsultantibus nobis*. xxviii. Rogatiano presbitero & confessori. *Et jam pridem*. xxix. Plebi universae. *Quaquam fratres Carissimi, Virtus*. xxx. Nemefiano, Lucio &c. *Gloria quidem vestra*. xxxi. Cypriano fr. Nemefianus. *Cum semper magnis*. xxxii. Quod Idoli Dii non sint. Haec sunt, quae in codice illo continentur; unde si quid scrutari me tibi velis . . . & hoc & omne militabitur Bellum in tuae spei gratiae. memini cum primum litteris Brema datis, favorem tuum sollicitassem adscripsisse me epigrammation Martialis Phasiani duo: quod inveneram in

MSC. Cod. *Pirckheimeri*, proximo bonitate post *Palatinum Gruteri*. Idque tibi vehementer probatum. Post id tempus nefaria manus spoliavit me omnibus chartis, tam quae excerpta ex MSC. quam quae conjectanea servabant. Concluseram in vidulo, & ad iter subitaneum eram compositus, ea scilicet causa, ut hujusmodi luctus mihi indiceretur. itaque miscellanea, quae vidisti, nihil aliud erant, quam observata, ex fuga retracta paucarum horarum spatio, ut vos salutaturus non omnem spem vestram minuerem, nec plane a Musis incomitatus essem. Et forte absque hac honesta ambitione fuisset, ejurassem omnem bonam copiam, & nuncium remissem tam infelicitate tentatis Litteris. Nunc etiam gratias incentivo isti ago, & quotidie memoria, quae amiseram, recolligit. Sed haec ideo ne mireris, quod peto illud distichon mihi descriptum mitti de *Phasianis* duobus. tale erat:

*Quas Argoa transvexit Phaeae carina
Oris avis sapidi faemina virque sumus.*

Sed quocunque me vertam, tertiam vocem recipere nequeo. Vale Nobilissime Domine, & Libertati meae ignosce. *H. Grotium* cum Legatione *Lu-*
tetiam missum, & una cum uxore pervenisse indicavit mihi nuper *Vossius*. Iterum Vale. *Amstelodami* vi. Eid. Febr. Anno Christi c1515 cxxxv.

Respondet *Salmasius* Epist. lxi. sed ex Epist. lxxv. unam *Gronovii* intercidisse, suspicari licet.

EPISTOLA CCLXXXIV.

JOH. FRID. GRONOVII

Claudio Salmasio.

Leidam.

Maxime Virorum. &c. Jamdudum manifesto rubore suffundor, quod toties insuavi alloquio gravissimas occupationes tuas moror. Est is honor homini pudico meminisse officium suum; molestiam autem exhibere iis, quorum incommoda publicum bonum participat, mos est impudenter ociosorum. In quem censum ut referar grande quidem periculum est: fas tamen, me in priori quasi innocentiae patrocinium quaerere. Unus es, Nobilissime Domine, cui ego parem faciam neminem: unus, cui me meaque probare, timidissimo voto exoptem. Itaque cum saepius Religionem meam testari desiderem, fieri non potest, ut non aliquam culpam officiosae injuriae in me admittam. Beatus ego si, uti adhuc factum, tuo affectui hanc condones. Illam (quamvis & absque hoc foret, aeternum meritis tuis debeatur) amoebaeis velut facula animare pergās. Mihi quidem nihil antiquius, quam operam sumere, ne te unquam tui de hoc homine judicii paeniteat. A *Smitbo* tandem aliquid Litterarum, omnia salva nunciantium, accepi. Culpam dilati responsi confert in pictores, quibus fibulas nonnullas rariores delineandas dedit. Eclypa ad te destinata, & cum litteris, ubi illa fuerint parata, propediem mihi submissurum se spopondit. Cum *Lucretium* nuper *Gifanii* volverem, subiit conjectu-

ra ad Ovidii Locum, de qua iudicium tuum audire haveo. Notat ille *contin- gere* antiquis dictum pro inducere, illinere, a *tango*, non *tingo*. Inter alia exempla recenset verba Nasonis Lib. xiv. Metamorph. vs. 345. de Pico:

Phaeniceam fulvo chlamydem contactus ab auro.

Sic enim emendare se ait, ex MSC. cum vulgo legatur *comprehensus*. Et secutus ipsius iudicium *Hercules Ciofanus*: Sed veriore puto scriptionem, quam & ipse in MSC. qui penes me est, & illi in aliis invenisse testantur: *contractus*, ut intelligatur fibula, qua chlamys connectebatur circa collum sic enim Naso infra:

*Purpureum chlamydis pennae traxere colorem,
Fibula quod fuerat, vestemque momorderat aurum,
Pluma fit, & fulvo cervix praecingitur auro.*

Nempe illud aurum, quod momorderat chlamydem, eandem contraxerat. Vale, Vir maxime, & me ama observantissimum tui. Amstelodami vi. Kal. Mart. Anno Christi cico cxxxv.

Respondet *Salmasius* Epist. lxi.

EPISTOLA CCLXXXV.

JOH. FRID. GRONOVIIUS

Claudio Salmasio S.

Leidam.

Maxime Virorum &c. *Smithi* nostri litterae tandem vadimonio se stiterunt, ac nunc politissimis manibus tuis gaudent contrectari. Si exhibent sitim tuam, partem absens laetitiae capiam. Denuo saliva mota est mihi tui illius de re vestiaria Commentarii. Vix fero desiderium, & si licet tamen, audeo familiaris poscere, ut properes insigni hac occasione tua in publicum merita augere. Quae cum summa sint, a te solo summa esse negantur, cum maioribus in dies revincuntur. Miscellanea mea, multimodis & in aliam plane formam, quibusdam defectis, plurimis additis recocta edendi fervor jam intepuit. Senium merum fuere & fecere mihi typographi, qui, quotquot allocutus sum, quasi de compacto rem agere, captare lucrum: ita dum illi sperant, a me illis manus adita est. Triumphum impudentiae abstulit, cujus humanitatem ad invidiam mihi, & mea, ut aiebat, ipsi commendaverat *Boxhornius*, ausus stipulari, ut centum florenorum praetio exemplaria ipse praestinare, quantum ipsi in integrum opus vix sumendum esset. Equidem nulla ambitio, ut ejusmodi vota mihi proponerem, mentem dedit: sed affectus in bonas litteras, & quia ostendenda erat aliqua diligentia iis, quibus innotuisse rebus Germaniae nostrae affectissimis, forte e re nostra erat. Quod tamen si hac via prohibebitur, aliam munient tempora mea, quae opperiar, hoc Catone contentus. Interim non adeo ista amo, ut nolim in decimum annum premere, ut omnibus juvenilis fervoris notis ipsa mora obsolefactis puriora ali-

quando benigniores homines nactus, si numen volet, prodam, aut omnia junctim cum porcis cum fiscina, ut ille jocatur, consumi sinam. In Cypriani libro de habitu Virginum. c. viii. *Patrimonium tuum Deo faenera, Christum ciba* &c. MSC. *Patrimonio tuo Deum faenera.* Quod & alicubi Pamelius invenit, sed improbat. Et quam ille vulgatum citet, *Patrimonia tua*, eo aurigatur. mihi perelegans videtur Lectio MSC. Et sic Martialis: lib. i. Epig. 77. *haec omnes faenerat una Deos.* Sed & idem Pamelius Epist. ad Donatum: *impletur in succum cibis fortioribus corpus, & arvinæ toris membrorum moles robuste pinguescit* &c. toros pro cibis gladiatorum accipit. Quo mihi nihil videtur ineptius, aut valde fallor. Tori enim gladiatorum sunt, non cibi. Seneca epist. xv. *Cum tibi feliciter sagina cesserit, & tori creverint* &c. Toties apud poëtas, *Herculei tori.* Sed de habitu Virginum, cap. 12. *Impugnatio est ista divini operis.* MSC. *Indignatio.* Quasi dehonestationem ea vox notet. non succurrit tamen exemplum ejus significationis. Tu videbis, Vir maxime, & me tui. observantissimum amore solito prosequeris. Vale & bene age. Amstelodami prid. Eid. Mart. Anno c1515 cxxxv.

Respondet *Salmasius* Epist. lxxi.

EPISTOLA CCLXXXVI.

JOH. FRID. GRONOVIVS

Claudio Salmasio S.

Leidam.

Maxime Virorum. Qui has ad te defert, Domine, *Theodorus Graswinckelius* Jctus, Vir eruditissimus est, quod plerique Gentis vestrae peculiare habent, felicissimo cinno amoenitates Musarum cum Jurisprudencia conjunxit. Adderem cultorem juxta ac mecum, id est si quisquam mortalium vivit summorum tuorum meritorum devotissimus, si dubitarem, quemquam cui vera Eruditio & non mentita humanitas cordi est, talem esse velle: ostende ei, quod me docere non dedignatus es, posse te verae observantiae amorem infucatum refundere. Quod cum ipsius virtutibus dabis, tum meae quoque submissae petitioni, qui de affectu istius viri non sine causa maxima mihi spondeo. Postremae tuae multum nubis mihi deterferunt. Heros maxime, aut si quod nomen est omni veneratione majus, crede mihi, (sine dolo dico) me unum tuum judicium opponere omnibus hujus seculi affaniis, quod non capit nisi specie inanum validos. Nunquam ita frontem perfricuissem ut tantum exemplum Comitatus tuae peterem, quantum ultro me, si res ferret, experiiri voluisti. Et nunc quoque ut timeo a te poscere, ut ita leves nugas typographo commendes: ita contra tamen nemini lubentius famae primordia, quam tibi debere velim. Itaque nisi jam cum hominibus majoris fidei rem omnem transigesti, cum bona pace tua, sufflamen injicio voluntati tuae, postquam me inscio, qui curam mei egerunt, ante paucos dies suspensum & bo-

næ

nae spei plenum me fecerunt. De quibus proximis clarius, & continuatam diligentiam meam probabo in Cypriano. Interim Vale, prima seculi gloria, & bene age. Vovet, qui reverentissimus tui, Amstelodami xviii. Kal. Majas c1010cxxxv.

Respondet *Salmasius* Epist. LXXIII.

EPISTOLA CCLXXXVII.

JOH. FRID. GRONOVIIUS

Claudio Salmasio.

Leidam.

IS, qui nuper veneres suas probare potuit tibi, *Graswinckelius* noster, cum heri negotii causa huc advenisset, indicium fecit eorum, quae se inter & typographum transacta essent. Distulisse ajebat omnem rem ad censuram tuam, atque ita abstulisse chartas meas, ut non improbatas tibi sine mora evulgandas promiserit. A te, Nobilissime Domine, quid earum vilitas mereatur, quid rursum tuus erga hunc hominem affectus promittat, utrumque scio, & sic lancem deliberationis hujus libro, ut huc fere propendeat. Interim egerit ne ille, quod prae se tulit, & quibus studiis cognoscere haveam. Una hac vice multa opus mihi placabilitate tua, ne aegre ferat ob nugales ineptias toties interpellari. Nosti utendum esse istorum hominum calore, & dum ferrum in igne est urgendum opus. Porro in illis meis, si quid ob oculos venerit quod meae tenuitatis & inscitiae meae prodigum sit, ut plurima fugere te non potuisse ne addubito quidem, serio rogo, ut severe moneas, dum res integra est. Pleraque omnia vulgaria sunt, & conatus potius, quam res seriae, sed beatus sum, si vel isto titulo censeantur. de caetero quae nonnunquam in viris magnis minuta deprehendo errata, in iis libertatem & modestiam me miscere operam dedi. *Vincentius Fabricius* Nuperis suis jussit salutationem & officia sua religiose tibi deferre, & quaerere, an quae ante dies aliquot ad te destinavisset essent perlata. Duobus verbis docere me ne graveris, aut si quid Literarum ad eum cogitas, quandocunque commodum fuerit, mihi credere tuto potes, qui hanc operam amico debeo. Tuae ad *Smithum* bene sunt curatae. Vale, Vir summe, & me observantissimum tui solito amore dignare. Amstelodami raptim. Nonis Jun. Anno c1010cxxxv.

Respondet *Salmasius* Ep. LXXIX.

JOH. FRID. GRONOVIIUS

Claudio Salmasio.

Leidam.

LUcretium recte accepi, & magnas ago gratias. Quam primum pinguius paullo otium nactus fuero, majori cura eum aggrediar. De nova Editione Apologiae Apulejanae bonum factum, quod me mones, & ut verum fatear nimium quantum videre haveo. Illud praecipue quaererem, quid de aliquot palmariis tuis emendationibus censuerit autor, quales: hic labratae, &, ut partim Ocenium dicunt: quae quidem meo judicio adeo divinae sunt, ut continuo in textum migrare illis liceat. Et sunt isti loci adeo insigniti, ut nemo fere praetergressus sit, qui non alia forma stigma inusserit. In eadem levissima mutatione unum locum emendare visus sum pag. 281. Edit. Elmenhorstiana: (*Quippe ejus (caelitis Veneris) amorem non amaenum & lascivum, sed contra incompertum & serium pulchritudine honestatis virtutis amatoribus suis conciliare: & si quando decora corpora commendet, a contumelia eorum procul absterre. Causa bonus voluit, incorruptum.* item: *virtutis amorem amatoribusque suis con.* Flor. *virtutes* & sic editum ibi. Non recte ut puto, aut saltem nimis obscure, cum de amore puerorum (*ἀππεν & μόνον*) (Caelestem Venerem esse ait Plato) agatur. Velim unica littera mutata: *pulchritudine honestatos virtutis amatoribus suis conciliare.* *Incompertum* autem utique retineri debet. Est enim comere generale verbum omnem corporis ornatum indicans, itaque amaeno opponitur, ut serio lascivum. Sed hoc non est tanti. Lib. iv. Metamorph. locus est valde suspectus mihi. p. 152. *Ego vero quanquam alias ordeum tunsu minutatim & diutina refectio virulentum semper eserim* &c. Ubi quidam codices pro *refectio cogitatione virulentum*. Et certo scio latere aliquid, quod exputare non possum. Te nobilissime Domine, libens cum hoc monstro commiseri, & petam ut me doceas quomodo ista concinnanda sint. Litterae ad *Fabricium* curatae sunt. Bene vale, vir incomparabilis, & me ama. Hagae. v. Kal. Jul.

EPISTOLA CCLXXXIX.

JOH. FRID. GRONOVIIUS

Claudio Salmasio.

Leidam.

Immensum quantum exhilararunt me cordatissimae litterae tuae, quae tam rara tam certa tam elegantia me docuerunt. Nihil ibi est, quod non, quo magis lego, hoc magis placeat. Atque vel citius hoc scire volueram, ne qua vel minimo momento sub eorum censu me esse suspicari, qui cum ipsi odoriferae naris ad vestigandam occultam veritatem non sint, adeo imbecilles sunt

sunt iudicio, ut nec ab aliis productam agnoscere valeant. Quae in plerisque magna profecto infelicitas, in plurimis etiam invidia est. Miseri! qui nesciunt hac βαλανφάρια post fruges repertas sibi maxime se molestos esse. Cupio tamen videre librum illum saltem quia novus est, & cum bene commodum fuerit mitti peto. *Illud Tragoedi Syrmate, histrionis crocota, mimicentunculo* memini jam olim te proposuisse ad Pallium Tertulliani, memini etiam statim me margini Apuleji mei appinxisse & probasse. Et sunt sane reliqua asscirtia ex glossa magistelli alicujus, nil nisi cupressum pingere & appingere docti. De illa emendatione in Lib. iv. *Ego vero nunquam alias hordeo cibus cum minutatum & diutina coquitatione jurulentum semper eserim*: Non possum tam magnifice dicere quam sentio. Plane ita Lucium scripsisse quovis pignore contendere paratus sum. Velim scire an publicaveris alicubi. Est Locus in miscellis meis, ubi illa verba alleganda sunt, eaque de causa praecipue, ut ea considerares, petieram. Si edita est, remittam Lectorem: sin, ego quod primus produxerim, seculo Litterato eam imputabo additis ab uberiore Lucem, quaecunque ex te hausi cum honorifica (ut saepissime ad partes vocandus es) mentione auctoris mei. *Salie sic γνήσιον* Apuleji est, etsi viveret, ut excidisse sibi gemmulam istam doleret, ita repertam denuo gratularetur. In Septimio *in exitum ptisanæ* magis laudarem, nisi dicendum esset, & credenti forte, idem mihi quoque ante in mentem venisse. Notaveram signatum hoc & exquaesitum verbum esse. Apud Martialem: Lib. xi. Ep. 32. *hinc exit varium coco minutal*. Sed & idem verbum de exactis operibus mechanicis frequenter dici animadverteram. Cicero in paradoxis: *ut ex eadem officina exiisse appareat*. Horat: *cur urceus exit*. Tali sensu apud Augustinum de Civitate divina. Lib. vii. c. 4. *Ridemus quidem, cum eos videmus figmentis humanarum opinionum partitis inter se operibus distributos, tanquam minuscularios vestigialium conductores, vel tanquam opifices in vico argentario, ubi unum vasculum ut perfectum exeat, per multos opifices transit &c.* Quo in loco de minusculariis vestigialium conductoribus mira fecerunt Lud. Vives & Gruterus Lib. ii. Susp. c. vii: Sed omnium facetissimus Euf. Swartius, qui ex Servii loco, ubi de minuscularis Quinquatribus, lucem an novas tenebras Augustino faeneratur? Poterant autem hoc aestu supersedere, si meminissent quae scribuntur Lib. 3. Cod. Theodosiani de indulgentiis debitorum, quae quasi data opera Augustinum interpretantur; certe satis indicat per illud, quod Augustinus alludit. Sed haec extra oleas. Vide autem quo processerit forte non felix temeritas mea. *Exeundi* verbum hoc sensu restitui volebam Arnobio tuo Lib. ii. *Vidit enim Heraclitus res ignium conversionibus fieri? Concretionem aquarum Thales? Pythagoras numero exire?* scil. res. Ubi vulgo: *numero scire*. Legitur. De vicibus autem istarum Litterarum S. & X. nihil attinet dicere: adeo celebres sunt; haec duo *spectare* & *expectare* id testantur, quae ubique fere in Libb. antiquis confusa. Nec persuadent mihi, qui saepe annotarunt mutuas easdemque verborum horum significationes: Ut enim credam, *spectare* non nunquam ea notione accipi, qua *expectare*, ita contra *expectare* idem quandoque esse, quod *spectare*, vi-

dere, aspicere nondum credo. Sic *exire* in *scire* corruptum. *Heraldus* & *Fulvius* *numeros coire* voluerunt. Rides, Nobilissime Domine, an doles scruta haec & pannuceas thesauris tuis rependi? Sed nulli tam nota domus sua, quam mihi tua aequitas, qui haec talia etiam in acceptum referre soles. Ego autem ideo propono, ut de omnibus me certius quid doceas. Quod scio a nemine eruditorum saeculi nostri, sive habeant illi famam tantum, sive etiam mereantur, quam a te (sine adulatione & coelo teste dicam) certius me expectare posse. Nescio quomodo abreptus paene praeterieram ultimum tuum, *frena rodebam*. De quo Pyrrhon nec ipse dubitabit, & quantula quaeso mutatio est *faena frena*? Ipsos faenum esse jubeo, qui lautissimum Lucium in asinina facie commorantem faenum commesse volent in posterum. De Apulejanis tuis rogo ne intermittas, quoties ocium est, etiam non rogante me aliquid litteris tuis adjicere. Non invenies appetentiorum stomachum ad has delicias. Nec deero mihi frequenter sciscitando, qui & diligenter illum scriptorem evolvi, & in plurimis haereo. Nec nunc quidem abstinuissem, nisi excrevisset loquax haec epistola, adeoque etiam nigellae hae Cadmi filiae rubore suffundi viderentur, & quod tam familiariter paene odio futurae sint, metuerent. Bene vale, o primarium decus aevi & noster esto. Hagae VII. Eid. Julias Anno CIO ICXXXV.

Responsio ad *Salmasii* Epist. LXXX.

EPISTOLA CCXC.

JOH. FRID. GRONOVIVS

Claudio Salmasio.

Leidam.

Nobilissime Domine. Novos honores, quibus Patria nuper tantum civem ornavit, meditata oratione gratularer tibi, nisi acceptum haberem, nullos honores conferri in te posse tantos, quos non virtus tua & merita infinitis parasangis excedant. Nunc haecenus, ut & feliciter evenisse tibi eos ex animo precer, & gaudeam, nactum te esse, quod, illis, qui adventitio illo splendore magis quam solidis propriisque bonis glorianatur, opponas. Jamdudum hinc te expectavi, ut amplecterer aut adorarem potius: tum ut diatriben meam, quatenus nondum ab operis tenetur, emendari peterem. Sed usque adhuc spes meas frustratam esse valetudinem tuam maestissimus intellexi. Precor Deum immortalem supplicibus votis, ut illam quamprimum commodissimam reciperes, atque in Nestoreos annos haud dubiam teneas. Utinam piaculari pro te dare hoc possem caput, aut annos meos, qui mihi inglorii otiosique peribunt, tibi transcribere. Sed adeo res rediit, ut non tantum non nisi precibus tibi prodesse queam, sed ultro etiam augere imperitis quaestiunculis molestias tuas cogar. Quas adhuc tamen ita circumcidi, ut ubicunque mihi aliqua spes, quae pusilla sane nimis, ingenioli superesset, ibi te fatigare pu-

pudori haberem. Quare, noli, quaeso, irasci, quod de locis tantummodo deploratis consultum ad te venio, utpote quibus te unum suppetias venire posse certum habeam. Ubi minus equidem fero quod modestiam tuam mihi allegas, cum inexhaustam doctrinam possis; aut illudis mihi, quod ea placere mihi tester, quibus tu ipse nihil precii tribuis. Ego vero ita a natura comparatus sum, ut tecum errare malim, quam mihi ipsi in veris, quibus tamen indubito, credere. Nec exigit a nobis aliud fortuna nostra, qui in ea statione locati sumus, ut abunde spartam ornaverimus nostram, si per captum sensus hebetis sane & frigidi discere tantum atque intelligere possumus divina illa, quae a te paucissimis tui similibus proferuntur. MSC. Cyprianum & poemation *Fabricii*, quae praesenti in manus tradere speraveram posse, mitto. Advolasssem jam pridem Leidam, si hinc abesse me pateretur editio libelli mei, cujus correctura ipse fungor. Praeterita hebdomade fontica quaedam negotia Amsterodamum me evocant. Interea cum amico meas vices commendasssem, duo folia, quae excusa sunt, tot sunt conspurcata mendis, ut totius negotii suscepti me paeniteat. Locum Apuleji in floridis: *Religiosis viantium moris est, cum aliquis locus sanctus, aut lucus in via oblatus est, votum postulare, portum apponere* quomodo concilies, scire velim, obiter eum allegare necesse habeo, sed nec ipse quomodo sanem, invenio, nec cuiquam interpretum qui tentarunt, assentiri possum. Hoc si res tuae patientur, quamprimum discere haveo. Hac enim hebdomade pagina illa typis dabitur. Nec minus exercent nos illa in Epicedio in patrem Statii: *Et quibus Arcadia carmen testudine mensis Cyda labor nomenque fuit.* Nam τὸ Cida purum putum figmentum Domitii est. MS. Flor. *Cicla liben.* Et Domitius: *Libem* reperiisse se fatetur, unde fecerit labor. hoc ex *lyrae* depravatum videtur. Pro *Cida* quid olim fuerit nescio, nisi forte *Cura*, Ut scripserit Papius. *Et quibus Arcadia carmen testudine mensis Cura Lyrae nomenque fuit.* Testudo pars Lyrae, non pro integra ipsa accipienda esset. *Quibus cura & nomen Lyrae fuit*, esset, quibus amor lyrae fuit, & qui inde nomen apti sunt, ut Lyrici dicerentur. hoc somnium nostrum. habeo aliorum conjecturas mecum primum communicatas, quae cum ipsis placeant, mihi nec coelum, nec terram tangere videntur. Sed a te, vir maxime, certius aliquid expecto, quo magis quam istis nostraque lector satietur. Quod ne graveris me docere, etiam atque etiam rogo. Vale, primum decus nostrum & hujus saeculi. Hagae VII. Kal. Mart. Anno MDCCXXXVI.

Respondet *Salmasius* Ep. LXXXVII. sed sequentis anni gerit notam, aut hîc aut ibi scribae peccarunt. Certe in *Salmasianis* ordo turbatus est, nam Epist. LXXXVIII. praeponi debet priori: praeterea deesse puto *Gronovii* Epistolam, quae in *Silio* emendationes continebat, cui respondit *Salmasius* Ep. LXXXV.

EPISTOLA CCXCI.

JOH. FRID. GRONOVIVS

*Claudio Salmasio.**Leidam.*

ET si semper, Nobilissime Domine, antehac ad te magis fiducia tuae committatis, quam mearum virium litteras dederim, tamen nunc maxime vereor, ne nimis prodam infantiam meam. Praeterquam enim quod solemnis illa mihi, contagionis aliquid adhaesisse mihi sentio a rure, in quod per hebdomadas tres quatuorve secedere me ratio haec vitae meae coegit. Neque tamen morari debui aut expectationem tuam, aut officio optimi nostri *Smithi* deesse: neque etiam amicum, quem latorem offerebat occasio, & ipsius studium, abstinere nolui, quominus hac contestatione sui cultus penes te defungeretur. Ultimas meas, puto, obtulit tibi *Graswinckelius* noster, quae aequae importune, atque hae mihi exciderunt. Tibi tamen, uti constat de sincerissima observantia mea, ita unius scriptionis infelicitas, atque impolitia, quae subinde properantes deprehendit, non excusserit amorem mei. Vir ille eximius suscepit adeo fidelem nugarum mearum curam, ut nunc demum sperem, nihil citius fore quam ut publicum tentare incipiant. Quod nunc eo acrius desidero, quo certius scio te quoque spei nostrae favere. Cum iterum ad *Smithum* scribes, habes me, qui tuis me servitiis devovi. Perendie Amsterodamum ad consuetas sedes revertemur. Bene vale & bene age, Vir summe, meque ama, qui tui observantissimus. v. Eid. Maji. Anno. cio 16 cxxxvi.

Et hanc Epistolam loco motam puto. hoc enim tempore in Gallia erat *Salmasius*, nec *Graswinckelius* ei tradere epistolam potuit. credo Ann. 1635. scriptas & collocari debere post; sed nolui Ordinem mutare.

EPISTOLA CCXCII.

JOH. FRID. GRONOVIVS

*Claudio Salmasio.**Leidam.*

Nobilissime Domine. Incredibili laetitia affectus sum ut ad Penates tuos, salvum te sospitemque, salvis claritatibus tuis, salva etiam re, reversum audivi. Cognoveram ex parte quibuscum excetris conflictatus esses, antequam Gallia decedere tibi liceret. Sciebam, quanta incommoda & pericula a difficultate itineris & tempestate dubia tibi instarent. Cruciabar tam diu a Bibliotheca tua & studiorum ocio te separari, cum certum habeam, quicquid temporis extra tui studiorumque tuorum curam tibi perit, id ex visceribus (ut ita dicam) literarum & sanctissimo eruditionis censu expendi & derui. Denique Academiae vestrae bene volebam, cui ex ferali squalore caput erigenti,

fo-

solum decus tuum ad perfectissimam lucem (quam vel solus dare posses) deerat. Ex quibus omnibus unum nascebatur votum: quod cum Deus Opt. Max. nunc tandem secundaverit, ipsi quidem laudes gratesque ago, tibi vero ex animo gratulor voveoque, ut posthac Nestoreos annos in optata sacrae & divinae tuae mentis tranquillitate exigas, omnemque laborem, qui sive a fortuna, sive ab improbis hominibus impendere queat, durissimis itineris malis expiaveris. Ego, si nondum excidimus tibi, & pateris nostrae fortunae audire vices, ad hoc usque bene me habeo, sit gratia Numini: ex aedibus nobilium istorum hominum, ubi me agere sciebas, cum bona eorum gratia discessi, ut totus meus essem. Itaque nunc quidem virtute mea involutus pro opibus maenia munio. Sed praeventendum eo est, quod cum tot communes mihi cum optimo quoque causae essent, quare praesentem te aut saltem propinquum vellem, intestinum propriumque quiddam jam pridem habuerim, quod desiderium tui acerrime stimulare. Narro tibi, nacti sumus tandem, qui nugarum nostrarum miseretur, & permoveri potuit, ut aliquid earum edere non recusaret. Itaque Diatribe in Statii Silvas foras jam spectat, quam sine censione tua, sine symbolis publicare extremae mihi infelicitatis videbatur. Plurima enim loca misere nos excuerunt, in quibus exploratum mihi est, neminem nisi te & nos & antiquitatem juvare posse: plurima haud dubie nos Homericis oculis transmisiimus, quae sagacitatem tuam fugere non potuerunt. Quare venio ad te, Vir incomparabilis, & per inaestimabilia merita tua, per denique affectum, quem observantia non quidem meritis subii, sed ab humanitate tua abstuli, te oro atque obtestor, ut ne fastidire ruditatem nostram, sed *Ζητιδία* nostra comiter excipere velis, deinde ultro, quae olim ad illos libros notasti, benigne nobiscum communicare. Integrum libellum misissem tibi, ut lituras & obelos & miniatulas tuas pateretur, ut omne in eum jus haberes, nisi vererem me occupato in domo ordinanda & refocillandis viribus, curandoque corpore, si tetricis istis nugis negotium facerem, gravissimam noxam meriturum. Et spero propediem tibi me adfore, cum de manu in manum tradere licebit. Interim ne nullum meae adversum te audentiae nunc exemplum edam, de duobus tantum locis te rogabo. Lib. 11. Silv. in epicedio Pileti: *vitae modo carmen adultae, Neetere tentabat juvenum pulcherrimus ille, Cum tribus Eleis unam trieterida lustris*. Quid *vitae modo carmen adultae*? Lib. 111. in lacrimis Hetrusci: *hibernos citius numeraveris imbres, Silvarumque comas vigilis te animique sagacis Exitus evoluit*. Quid, *exitus animi sagacis*? & quomodo cum sequentibus haec cohaerent? Interpretes ad unum omnes, stupori legentium confisi, ceu clara haec & facilia transeunt, cum nihil in toto Poeta difficilius mihi visum, nihil, in quo minus mihi ex mea arte spei sit. habeo quidem in promptu conjecturas, sed quas apud te promere non sustineo: cui, quae mihi ipsi non satisfaciunt, minus multo probaturum me opinor. Quare malo ignorantiam meam fateri, & tuum auxilium implorare. Illud nunc iterum te rogo, ut simul primum res tuae patientur, petitioni meae facilis, quemadmodum soles, respondeas. Hac hebdomade incipient nobis laborare opera, & magna res est, cur ego quoque

festinem, quod praesenti, si Deus volet, exponam. Ego, σεβασμιώτατε Salmasi, cum ea ex te Scriptisque tuis didicerim, quorum odorem extremum ad me perventurum nunquam speraram, ita statuo, quae a nemine mortalium, ab te uno expectari debere, & si regnum in Eruditione instituendum esset, in tua uniusque verba jurarem. Haec non adulatio, quae longe a moribus nostris abest, sed verus amor simpliciter, & sic ut credi velim, ita dignus sim qui literas tractem, post longissimam taediosissimamque, sive litterarii commercii, sive colloquii intercapedinem, mihi exprimit. Vale & salve cum tuis, prima seculi gloria. Hagae. a. d. iv. Non. Februar. A^o. ciciocxxxvii.

Scis puto *Casauboni* Epistolas virum & amicum tuum summum *A. Rivetum* mihi edendas commendasse, & jam nunc eduntur. Ni fallor audiavi ex ipso te aliquot, quarum apographa nondum haberemus, in Gallia nactum esse. Ejusce quid sit, indica, quaeso. Si vacabit rescribere, uti cupio & rogo, destinabis tuas, in de Wagestraete allernaest de drie goude merfen. Ibi enim habitationem conduxim.

Respondet *Salmasius* Epist. LXXXVI.

EPISTOLA CCXCIII.

JOH. FRID. GRONOVII

¹ *Claudio Salmasio.*

Leidam.

Nobilissime Domine; Quemadmodum reditus ad nos tuus immensa me laetitia affecit, ita primus quoque fructus ejus longe mihi gratissimus fuit: literas tuas dico. quas nudius tertius accepi. Eaece multa egregia me docuerunt, magnis testimoniis affectus tui, quem nullo auro, nullis gemmis contra carum aestimo, pectus mihi pertentarunt. Pro utrisque immensas ago gratias, & hoc quidem in sinu gaudebo, tantoque stimulo ad excitanda studia nostra prudenter utar, illis vero, ceu purpureo limbo, centonem meum & vere pannuceas commendabiles faciam. De Siliano loco prorsus tibi assentior, & tum eruditionem, tum sagacitatem divinae conjecturae tuae prorsus stupeo. Statianus uterque ut depravatissimus antea erat, ita nihil antehac reperi, in quo facilius acquiescere possem. Interpunctionem in priore mutandam, quod verissime mones, ipse quoque notaveram. Sed & istud: *gnara malorum infelix invidia*, quamquam vero *infelix* eleganti Graecismo pro scelestâ positum esse videri posset, vehementer displicebat. Itaque τὸ *infelix* accipiebam ut appellationem Viri, quem alloquitur poëta in vocandi casu scribebam denique: *Sed gnara dolorum invidia, infelix animi vitalia vidit, laedendisque vias in te (modo carmen) adulte.* Ut apostrophe ad Pileum esset. *Modo carmen*, ut apud Silium: *nunc Ardea nomen.* & Horatium: *fabulaeque manesque: Adultus* pro adulescente. quomodo Ammianus & ejus generis scriptores saepe loquuntur. Quare

¹ Responsio ad *Salmasii* Epist. LXXXVIII.

re hîc maxime dubitabam an Papinius ita scribere ausus esset. Libentissime igitur tuo illo hoc expungam. Nunc rogandum habeo quomodo conciliandum putes vexatissimum locum in Propemptico Metii Celeris. *Sint quibus exploret rupes gravis arte molorchus*. Nam ultimum illud de molorcho urinato- re quidem, stipula levius. Vellem tam facile mihi esset aliquid aliud reperire, quam hoc arguere, utcunque docti viri in eo sibi placeant. Excerpta MS. Cod. Florentini, (quae tranmisit Hamburgo mihi *Fr. Lindenbrogius*) habent: *primo gravis arte molorchos*. Ego nisi tu quid movebis, ab hac scabie abstinebo unguis. Kal. Decembribus: *Jam bellaria adorta pluebant*; Non haesitarem hîc, si ullibi alias hac licentia producendi brevem syllabam usus esset, & non du- bitare juberent MSC. Cod. Quorum Senensis, quem excerpfit *Scaliger. velaria linea*. Florentinus: *velaria Borea*. Protreptico Crispini in Lib. v. *Sic Phry- ges attoniti quamquam Nemaea viderent arma* &c. hoc a *Domitio* est, cum in MSC. invenisset, ut ipse testatur; *quamquam vectita*. Et ita prorsus Flor. Etiam Politianus illud *Nemaea* se non probare ait in Epistola illa, quae *Do- mitii* Commentarium sub censuram revocat: sed quid verius sibi videretur, non apponit. Scire etiam velim, quo tempore vixisse putes Meleagrum istum, cujus epigrammata aliquot in Anthologia extant. Ego nihil haecenus inveni, unde de aetate ejus argumentari possim. Et est hujus mihi rei usus, ne simi- li imperitia me prodam, qua ille ² Q. R. conditor, qui ausus est scribere Ca- tullum dixisse hoc modo, ut imitaretur Martialem, & hic nobis sacra & pro- fana eruit. Sed valeat Carcinoma seculi nostri, quandoquidem stupore vulgi nobilis factus est. Tu de istis, Vir maxime, haud gravatim erudire nos di- gnabere. Epistolam *Casauboni* suo loco inseri lubens curabo. Meministi me aliquando ad Cyprianum observata non nulla ex MSC. membranis ad te mit- tere. Eum codicem adhuc penes me habeo, sed reposcitur nunc a Do- mino *Isaco Pontano*. Quod si inspiciendi cum lubido tibi & ocium est, trans- mittam, & dum ad satietatem usus fueris, penes me magna causa adhuc de- tineri rescribam; Neque enim totum conferre potui, quod aliis avocarer & ille, cujus edito Cypriani exemplari utebar, librum suum utique sibi volebat reddi. haec incommoda sunt desultoriae vitae & studiorum, quae ab aliena bibliotheca pendent. Sed ego satis magnum pretium habuero, si mea opera tibi iste liber sit profuturus. heri primum folium Diatribae nostrae excusum est. Et minantur operae intra sex hebdomadas hoc munere defungi. Quare
etsi

² Manifestum est intelligi *Boxhornium*, qui Quaestiones Romanas edidit, simul cum Plutarchi. Problematibus: Vix credibile tamen videri posset, virum non ineruditum & qui publice literas hu- maniores profitebatur, tam crassum potuisse errorem committere, nisi publice in Cap. 35. Quaest. Roman. exstaret. Ubi tamen *Boxhornius* agens de loco vexatissimo Catulli, in quo Minerva *patro- na virgo* dicitur ait *Joh. Pontanum* in literis ad se, correxisse *paterna virgo* & expressisse haec Ca- tullum ex Martialis viii. Ep. 72. ubi *narbo paterna* dicitur. Sed si jam *Pontani*, epistolam festi- nantis, ea fuisset hallucinatio, certe *Boxhornii*, librum publice edendum meditantis, partes erant, eam emendare aut arguere: sed stupor hic fuit *Boxhornii*: nam *Pontanus* scripserat *deinde, quia imi- tatus hic Catullum Martialis illo, quod legitur lib. viii. &c.* & cum legisset illa in *Boxhornii* edito li- bro, eum graviter objurgavit alia epistola, quae nunc legitur in *Analect. A. Matthasi* Tom. x. p. 517. ubi cum haec scriberet *madida Boxhornium memoria* fuisse dicit.

etsi nunc minus sum ociosus (nam & Epistolae *Casauboni* procedunt) tamen videre velim Anglum illum, quem narrabas aliquando in Apuleji apologiam scripsisse, sed hoc si tibi commodum fuerit. Vale, Vir incomparabilis, & ruditem nostram ita patere, ut doctrina tua expellas. Hagae postrid. Non. Febr. A°. c1010 cxxxvii. raptim. *Vincentius Fabricius* poemation quoddam Hamburgi excusum tibi dedicavit. Misit ad me exemplaria aliquot, sed ignarus te ad nos rediisse, non iussit ut tibi sive unum sive plura redderem. Puto jam in Galliis id visum tibi, sin, exemplar faxo habeas.

EPISTOLA CCXCIV.

JOH. FRID. GRONOVIIUS

¹ Claudio Salmasio.

Leidam.

CUM praestantissimus *Colvius* diceret se ad vos ire, ut te saluaret, Nobilissime Domine, non potui quin raptim hoc quicquid est exararem: praesertim quia necdum sperato abitu tuo ultimum colloquium mihi miscendi tecum destinatio intercepta est. In excerptis Livianis nihil inveni, quod juvare te posset. Locus puto ille est Lib. viii. c. 7. & 8. ex editione *Gruteri*. Non variant MSC. nisi in his levibus: *a prima acie ad triarios sensim referebantur*. Duo MSC. *ad triarios retro se referebant*. *Extemplo compressis ordinibus velut claudebant vias*. iidem: *complexis ordinibus in hostem incedebant*. Unus *concidebant*. Supra scripto in sec. *incidibant*. Nihil praeterea notatu dignum. *Lipsii* conjecturas immiscuerat modo suis excerptis collector. Sed ipsum librum si jubes, mittam: Rôgo quod tamen commodo tuo fiat, memor sis promissi de excerptis & tuis notis Ovidianis. A *Scrivario* nuper iterum accepi libellum (non enim epistolam) emendationum ad *Silvas*. Quid quaeris? *ὕμης εἰδέν*, nostri caetera. Aut ille prorsus de ingenio meo desperat, & similem me putat, patrio subsidere *Belgae*, qui famam primaevo flore juventae *Solis ab occasu solis metitur ad ortum*. Aut ille quotidiano ejus convictu scabiem contraxit, ipsique similis factus est. A filio quoque ² *Heinsii* unas habui post discessum tuum, in quibus haec leguntur: *Vide quam impudens sim, qui petere ausus a te, ut me magno illi Salmasio commendares hominem nibili*. Sed hoc amor erga literas meo imputabis. Ipse enim licet nihil ad hanc rem aut eruditione aut ingenio conferre possim, affectu tamen, quod licet, prosequor eos, qui principatum in his sacris tenent. Inter quos qui *Claudium Salmasium* vel *primarium* esse negant, ne illi plane *asini & stipites* sunt. Et majorem propositionem assume & vera sit conclusio. De *Pervigilio Veneris* quid sit? fac sciam quaeso. *Casauboni* ad te epistolae jam descriptae sunt typis. Itaque si vis, autographa restituere tibi possum. Non expectas ut iterum offeram tibi operam meam in tuis ad *Lindenbrogium* curandis & *Fabricium*, qui scis beneficium me grande habiturum, si quid, quod facere

¹ Respondet *Salmasius* Epist. lxxxix. ad hanc & sequentem.² Vid. Epist. Gronovii ad *Heinsium* xii.

cere me velis, mihi jure tuo imperaris. Oblitus pene fueram quaerere de loco Statii in Lib. ix. Theb. 696. de Parthenopaeo.

— — — *tereti juvat aurea morsu*
Fibula pendentes circum latera aspera cinctus
Vaginaeque sonum, tremulaeque audire pharetrae
Murmur & a cono missas in terga catenas.

Schottus in Observ. Human. lib. 11. 29. ex MS. emendat *ligat* pro *juvat*. Et ita in membranaceo cod. reperi. Sed parum videtur interesse, cum *juvat* sit sustinet. Verum ille versus: *Vaginaeque sonum*: & qui sequitur prorsus non video quomodo priori connectatur, aut a quo verbo regatur illud *audire*. An deest versus? an *juvat* bis construendum diversis significationibus: *juvat fibula cinctus* & *juvat audire sonum vaginae* &c. hoc profecto durissimum & indignum Statio. Quid denique *missae in terga catenae*? Vidi quid notet Lactantius, sed de eo nihil memini legere. An *κατήχησις* est, & *catenam* dicit flexum illum cristae quem alibi sic describit. *Capiti tremit aerea cassis Ter nivea scandente juba?* Haereo & a te cupio doceri. Vale. Vir maxime, & me ama. Hagae raptim. ad ix. Kal. Apriles A°. c1515cxxxvii.

EPISTOLA CCXCV.

JOH. FRID. GRONOVIIUS

Claudio Salmasio.

Leidam.

Nobilissime Domine. Etsi pudori habeam tot molestis meis salutationibus fastidio tibi esse, tamen ut nunc quoque verecundiam istam insuper haberem, officii ratio a me exegit. Vides epistolam *Fabricii*, quam ut nunc ipsum Hamburgo accepi. mitto, ut videas quam egregia aperiatur occasio, si quid petes, ex istis oris accipiendi. Unas meas expectare se posse dicit, antequam itineri, quod per Belgium instituet, se committat. Non fideliozem latorem optare poteris, aut cui securius committat *Lindenbrogius*, quae huc velit destinare. Quare si vacat nunc tibi ad utrumque scribere, recte facies, si ad me ante diem martis instantis hebdomadis, qui erit pridie Kal. April. tuas mittes. De loco Statii quam nuper designavi, doceri abs te opto. In Abascantii Poëmate vide an legi possit: *quis centum valeat frenare maniplos Intermisus eques*. *Eques frenans centum*, hypallage frequentissima est, pro frenans centum equites, quod antea tibi quoque videbatur. *Missus* autem idem est quod mandatus. Ut *mandata signa*, *mandata castra* alibi dixit. Pro *ius* consistere inter maniplos, & centum equites ducere. Graeci quoque *ἐλάειν* usurpant pro jubere, quod tibi notissimum. Plura nunc nolo, & vel sic deprecor importunitatem meam. Vale, vir incomparabilis & me ama. Hagae a. d. vi. Kal. April. Anno c1515cxxxvii.

EPISTOLA CCXCVI.

JOH. FRID. GRONOVIVS

Claudio Salmasio.

Leidam.

Nobilissime Domine, Fateor peccasse me largiter quod non citius gratissimis tuis litteris respondi, & pro excerptis Ovidianis, quae mittebas, gratias egi. Sed illas differo, dum usus pro libidine schedis fuero tuis & remiserero eas: istud quominus facerem inhibuit me negociorum turba, quae velut ruina quaedam subito incidentia mihi, licet parva dictu, multitudine tamen magna necdum satis me juris mei esse sinunt. Epistolas statim curavi, & si omnia recte se habent, jam redditae sunt iis, ad quos destinabantur. Excerptis quantum properata perlustratione fieri potuit, mirifice delectatus sum. Inveni statim non pauca, quae lectiones MS. Codicis, quo in Noricis usus sum, confirmarunt. Ut illud Lib. I. Amor. Eleg. VI. *Aspice, & ut videas, immitia claustra relaxa.* Et Lib. I. de Arte: *jacturas poma myricas.* Ubi vulgo, *laturas.* Quod muniveram Prudentii loco hymno III. Cathemer. *Arbor onus tremefacta suum deciduo gravis imbre pluit. Purpureosque jacet cumulos.* Item illa: *Palliolum nitidis: & Venerem Cois posuisset Apelles.* quae jam olim in scriptis tuis monuisti. quae & plura talia ego, si mei arbitrii res esset, statim quidem in textum admitterem. Ignosce autem stultitiae meae, quod verissimae conjecturae tuae in Pietate Abalcantii indubitavi. Scilicet deerat hoc unum mihi, ut elegantissima Epistola tua omnia illa in memoriam mihi revocaret quae dixeras, & clara luce oculos ipsos feriret. Nec *equos* muto amplius. Nam & Ovidius *regere centum* dixit Centurionem in Lib. I. de arte, ut Statius *frenare centum* praefectum equitum. Hodie excusa est pagina illa, ubi istam purpuram tuam centonibus nostris attexuimus. Videbis quam ingenue fessum, cujus doctrinae & humanitati & ista & plurima alia debeam. Quamquam hoc mihi non est fateri. Sed profecto, si verum licet dicere, gloriari. Hic multa animus dictat mihi, a quibus vix abstineret calamus, nisi castigationem vererer, & scirem etiam quae serio & sincere dicuntur, si propius blanditias sint, tibi odiosa esse. Fabii locus est Lib. XII. Instit. Or. c. VIII. *Denique linum ruptum, aut turbata cera, aut sine agnitione signa frequenter invenies.* Eum locum qui emendasse visus sum, inserueram postremis schedis meis. Corrigebam autem, *aut turbata cera, aut ima* (sc. cera) *agniti erroris signa.* ut diceretur nihil quidem in textu correctum, sed in ima cera aliquid additum, unde appareret agnitum esse errorem quemdam in scriptis commissum. Probasne? aut juvat MS. Codex quem contulisse te narrabas? Fac sciam, amabo; & expecto, ut a tuo judicio aut stet aut cadat hoc conjectaneum. Laetatus sum cum legi quae addidisti de probitate & vero animo *Scrivarii.* Ergo omnia illa quae ad te delata sunt, & quae ipse his auribus hausi, fuerunt pessimorum hominum vota & Sabinorum somnia. Equidem non dubitavi, quin hoc velut

signo.

signo dato arriperent illi occasionem, & qua possent oleum affundere camino: sed verebar ne & ipse fuetus semper audire eos, qui verba tollunt cadentia, veritatis esset impatiens. Nunc de constantia ejus prudentiaque tibi mihi gratulor. De excerptis Statianis dicis, ut res est: idemque monuerat me, antequam mitteret *Lindenbrogius*. sed cum instarem & qualiacunque videre cuperem, transmisit ut erant. Quia alia non habuimus, necessarium fuit, ut isto Catone essemus contenti. Et tamen paucula inde hausi, quae utinam tibi probare possem? Sed confido, neque enim amare me potes, nisi ut multa ignoscas. Atque illud facis spero: atque aeternum facias, obsecro te & obtestor, siquidem id bonae mentis studio, tuique observantia merebor. Ita vale & salve cum omnibus tuis, Princeps eruditorum. Hagae. III. Eid. Apr. Anno. CIO IO CXXXVII.

Responsio est ad *Salmasii* Epist. xc. & respondet ille Epist. xci. & xcii.

EPISTOLA CCXCVII.

JOH. FRID. GRONOVIIUS

Claudio Salmasio salutem & observantiam.

Leidam.

Fuisse ad gustum tuum excerpta Urbiciana non tu magis, nobilissime domine, quam ego laetor: optoque ut fideles invenias manus, quae integrum illum tibi persistant. Video enim quantum in eo momenti ponas ad consummandum illustre illud opus, quod tibi in manibus. Si tamen per Phaenicem nostrum te dignum est veteres libros MSS. inspicere. nam hoc ille nuper cum apud magnatem quendam, potentem virum & fama doctum, una pranderemus, aperte dicebat Actum Mechanicum esse, seque nunquam eo pervenisse stultitiae gloriabatur. De Patricio, erravi, non erat ille amicus hic, sed Amsterodami, homo nempe iste morosissimus, quem non semel tibi deformavi, interim curabo ut eum quoque *Lindenbrogius* mittat. Quam difficultatem aliis crearet imperfecta linguae Italicae cognitio, eam procul dubio omnem peritia materiae facile tibi explicabit. Intra mensem hoc quoque effectum dari poterit, ut librum istum Hamburgo habeamus. Tu modo quas ad ipsum scripturus, fac primo quoque die habeam. Quae ad locum Fabianum illustrandum de ratione obsignandi tabulas aut literas addidisti, tam grata mihi fuerunt, ut cum plura suppeditarent, quae me doceri erat aequum, te abruptisse doleam. Sane cum multa de cera & lino legerim, notaverim, fateor tamen me nunquam ritum illum satis intellexisse. Tibi vero hoc διδασκαλον in solidum debeo. Locus posterior Julii Pauli egregius est ad emendationem tuam cuius paulum modo attendenti probandam. Martialis versus de Livio didiceram explicare ex notis ad H. A. tuis. *Gervartius* lib. iv. Pap. Lektion. cap. III. insultat interpretibus Martialis, cujus acumen nescio an magis pastoritia fistu-

la dignus sit, quam omnia, quae caeteri attulerunt. Et scio tamen fuisse, aut esse potius, cui nunc quoque commentum placet. De Metio verissime correctum vel invitis MSS. Nullis fidiculis inde extorqueatur sensus, qui ad aliam historiam alludat. Subtilitas illa distinguentis inter *in contraria versi*, & *in diversa acti*, eum decet, qui quid *agere*, quid *vertere*, quid *diversum* sit ignorat. *Paucaque fortunae* plane insulsum & fatuum mihi videtur. *Parca* ut vere explicas, ita profecto summa cum gratia & notabili proprietate accipitur. Sed illud scito sic tenere patrem, sic filium ab eo didicisse, ut quo quid sit simplicius & apertius, eo magis ducant esse Ovidianum. Quomodo bene eos dicere puta, sed quod bene dicunt male intelligere. Neque enim simplicitatem istam ex genio Nasonis, sed ex sui opinione, dimetiuntur. Vidisti opinor, optimi Gruteri ad Sallustium notas. In eis eandem rationem sistit. Cum enim brevitās Sallustiana omnibus in ore sit, vix vero centesimus quisque eam meo iudicio capiat, quodcunque vocabulum salvo sensu abesse posse credebat, censet superfluum, aut certe sententiam veterum de Sallustiana brevitate tacite oppugnat. Eodem videbis modo hos quicquid exquisitum, nec obvium impolitīs auribus, si otium hoc sumere velint, ut iterum notas scribant, una litura extirpare, & quae monachi deliraverunt, aut ipsis male feriatis venerunt in solum, Nasoni impingere. In Epist. Hypermnestae: *Et queritur, factum sanguinis esse parum*. negabant latine dici aliquando. Subserviebant qui aderant, alter pervigilii, alter Plutarchi editor & corripiebant *tractum* vel *jactum* vel *tactum*. Nec potuissē ulterius contra niti, quicquid dicerem, nisi objecissem eis Livii locum ex lib. 11. 30. *plusque ibi sanguinis promiscua omnium generum caede, quam in ipsa dimicatione factum*. Alibi: *Perfide quo pretio, qua nece dignus eras*. Emendat Scaliger: *Perfidiae pretio qua nece*, sine dubio ex libro MS. Et tua excerpta ita habent, sed non vacat nunc requirere, certus autem sum me legisse. Quid verius, quid elegantius? ille noster hoc insuper habito nuper scribendum me monuit, nescio ex quo libro *Perfide qua paena qua nece*. Nesciebat *precium* & *mercedem* in malam quoque partem accipi, sed hoc aiebat esse simplicissimum. Omitto alia, ne senio sim tibi. Hoc ergo magis miror, quomodo *tutet* ausus fuerit reponere: quod cum ineptissimum revera sit, speciem tamen habet rarioris verbi. Suavissima vero & frequens Poetae ista repetitio est. Verissimum τὸ ἐν τῷ debere mutari. *Ingenuae vires*, si placebit, retineam. Ut enim liberi homines animum a sapientia, ita servi corpus a robore & injuriarum patientia habent aut habere credebantur instructius. Cujus rei rationem meministi dare Aristotelem lib. 1. Pol. Et habent illud Bersmanni, Pal. & Pirchaimeri codex. Et similiter Martialis: *Vires ingenuae, salubre corpus*. Item: *Invalidum est nobis ingenuumque latus*. Ovidius alibi indignum censet: *Ingenuum dura ponere corpus humo*. Valeat tamen hoc, si tu probabis. Caetera omnia vehementer mihi placuerunt. Illud imprimis elegans: *Quae mimis prodest, scena*: Illud eruditum de authore, *qui mollem Achillem fecit*: ubi confossiorem foricina naenia istius notam fecisti. Et haec tamen, ceu nescio unde ex abdito petita, cum similibus quam maxime vulgus admiratur. Vellem, vir maxime,
hoc

hoc impetrare a te possem, ut quoties a gravioribus studiis quiescere & velut interjungere velis, digrediaris in notas illas, & ut cepisti excutias infelix lolum, cujus plena messis est, non quidem ut singula denotes, & minuta quaevis, quaeque etiam nobis patere posse putes. Non adeo abuti otio tuo volo, aut operam a majoribus detractam in hunc ludum damnare. Sed illa minus apparentia & speciem atque personam quandam abstrusae doctrinae praetendunt. Nescio enim quomodo hoc ille peculiare habet, ut cum maxime nugatur, maxime exsultet, & hac gloriatione incauto lectori assensum extorqueat, quod plurimis in locis observavi & quosdam hinc ascriberem, nisi omnia illa jam obelis tuis designata certum haberem. Sed simulatque Statium deposuero, haec cura erit mea, ne, si illi denuo Nasonem conspurcaverint, vindex ei desit. Epistola, quam plus millies ad me scripturum promisit pater de Statii aliquot locis controversis, in spongiam credo incubuit, aut certe, si nondum caepta est, non scribetur. Nec ego valde sollicitus ea de re sum. immo sapere eum puto prae duobus sodalibus, qui tot vulnera a se bono poetae meo inflicta per me publicari sperant. Sed nae illi vehementer se falsos deprehendent, post tres, ut multum, Hebdomadas. Quae de prima Syllaba vocis *athletes*, notasti, adjeci in Chartula, quae jam in manibus est operarum. Fuerat autem disputatio illius, quem significabam, honesti & non ineruditi, viri mecum non proprie de positione Syllabam eam producente: non dubitabamus ambiguas illas esse, quae ante liquidam consonantem haberent. Sed cum ἀθλῆν ab ἀθλῶ descendat, ἀθλος vero contractione ex ἀεθλῶ factum esset, possetne syllaba, quam contractio longam fecisset, & in dissyllabis posteriore correpta circumflexo notasset, corripitur. Nam in ἀτλητον, ἀκλυτος ἀχρης, a privativum est, non possunt ergo haec, nisi quoad positionem, cum τῷ ἀθλητῆς comparari. Ad hoc ego respondebam, quod in prioribus scripsi, nempe Latinos in Graecis vocabulis interdum suo jure uti. Quod non sic intelligebam, quasi Graecas syllabas pro lubitu suo producerent corriperentque, quod omnino falsissimum: sed quod in Graecis vocabulis suas regulas, ceu Latinae eae essent, adhiberent. Ut in *Coo*, *pliada*, *romphia* factum: quippe vocalis ante vocalem corripitur. Ut in *Hector ubi est?* quia in R desinentia brevia sunt communiter. sic in *Athletes*, quia α Graecis esset ex communibus, positio autem illa etiam ambiguam syllabam faceret, nullo respectu contractionis habito, primam a Statio correptam dicebam. Ut ut sit, verissime a te emendatum est, & stupidum esse oportet, qui de eo dubitare velit. Tuas ad Reverendum & Cl. Dn. *Rivetum* statim detuli. Vale, maxime virorum, & de studiis meis, quod facis, optime mereri perge a. d. iv. Kal. Majas Anno. cxcxcxxvii.

Excerpta tua Ovidiana penes me esse sciant illi, & legant; ut oculi illis doleant, ego nunquam thesaurum illum communem faciam in talibus, qui nihil se aliud invenisse putarent, aut videri vellent, quam calvus si pectinem, quam Gallus Gallinaccus, si pretiosum lapidem.

Responsio est ad *Salmasii* Ep. xciii.

¹ Claudio Salmasio.

Leidam.

Nobilissime Domine, Jamdudum ex scriptis tuis cognoveram, quanto intervallo in originibus Graecae & Latinae linguae eruendis omnes veteres recentioresque superasses, quam latum dedisses limitem aliis, si quis secretiori aliqua eruditione imbutus vestigia tua perlegat. Ejus rei certissimam quamvis, etiam absque his foret, fidem postremae duae, quas a te accepi, mihi confirmarunt. Unde ut multos graveisque Grammaticorum errores condemnavi, ita sic in omnibus satisfactum mihi esse fateor, ut nihil sit, quod aut non cum rationibus tuis conveniat, aut si disconvenire videatur, non ipse facile solvere possim. De ipsa quidem emendatione Statiani loci nunquam dubitavi: Et pridem quae ibi in diatribe notavimus, edita sunt. Spectat enim ad finem libellus meus, & praeter indices & Praefationem omnia sunt perfecta. Non poteram autem satis remove, quod unum de quantitate mihi obiciebatur dubium. Itaque quod ad haec laevia te submisisti, & de omnibus accurate me docuisti, immensas tibi gratias ago. *Internas aras* in Ovidio Epist. vii. 113. nunc ferre possum. Illud *Herceas*, quod hariolationem vocas, si incidisset illis hominibus, qui se amant sine rivali, non jactarent, se non albis quadrigis invehiri meritos arbitrarentur? Hujus ergo ut ingenium laudari mereatur; ita alteram conjecturam in Epist. xiii. 113. *quibus arsa relucet, ut solet a fuso*, non possunt improbare nisi illi, qui omne eruditum, vocesque a plebe summotas ex Nasone exterminant. Si quid video, haec ipsa veritas est, & multum tibi debeo, quod mecum eam communicaveris, Quod in prioribus de illa subindicaveras, non intellexeram, & erat animus cum scriptiorem ordiebar, rogare, ut loquereris apertius. Sed nescio quomodo id oblitum sensi non priusquam meas manu emissem. Nunc etiam vere puto reprehendi a te audaciam transpositionis in Epist. Penelopes: & ad servandum ordinem qui vulgo est, recte explicari *in hoc faciunt*: Nec displicet, *tu solum imitaris*. Incidi his diebus in locum Lib. xiv. Metam. vf. 656. de Vertumno; *custosque intravit in hortos Pomaque mirata est: tantoque potentior, inquit*; Inferunt olim vulgatae post ultima verba duos versus, quos citat homo noster. ubi cum multa esset nugatus, concludit tandem non dubitare se, quin aliquid defuit. Ego sic accipio haec verba, formulam illam loquendi, *tanto potentior*, non ceperunt & ipse & alii, qui locum illum vitiarunt: quae mihi eodem modo dicta videtur, ut apud Comicos, Senecam, Phaedrum: *tanto melior; tanto felicior*. Quo quis valet, eo *potens* est & dicitur saepe Ovidio. Sic *nobilitate potens*, sic *generis natisque potens*. Opes autem Pomonae erant poma: Censurus profecto nobilis heroico aevo: Unde Polyphemus Galatheam dicit, *nobi-*

¹ Responsio videtur ad Salmasii Epist. xciv. qui respondet Epist. xcvi.

billicrem pomis. Viso ergo Pomonae hoc censu, *tanto potentior* inquit Vertumnus. De hoc scribe mihi quid sentias. Pertinacem inscitiam novantiquorum poëmatum² constipatoris, hercle, miror. Nam illa quidem quae ponis *in armis*, item, *vere natus* (hoc prius scisse vellem sic a te defendi) tam aperta sunt, ut stuporis meri sit non assentiri; supponere autem *armatus*, & *ver renatus annus* confidentissimae & incivilis audaciae. Nimirum hoc habet, qui cogitur admirari tua scripta, cum alia legit, ubi te secum comparat, hoc est in locum incidit, quem uterque tentastis, ita se amat, ut non possit non te post habere, & usque suam palpare scabiem. Equidem Gentis vitium est, omnes alios prae se fastidire & contemnere, in qua scias quanti se facere oporteat eum, qui *ἐνδομυχον* suae sapientiae ante caeteros opinionem gestat tot adulantium ac symbolorum larga humanitate auctam in majus. haec sano efficiunt satis iudicio: quid si accedat invidia, & quos aperte appetere non audeat, ignavo ac imbelli dente sic admordeat clanculum, atque libidini suae obsequatur. Disputationem aliquando cum eo habui super Juvenalis loco: *Qui Lacedaemonium pitysmate lubricat orbem*: dicebam te nihil ibi dubii reliquisse: meque ipsum, qui *Scaligeri* sententiam antea prae caeterorum commentis probarem, simul legissem tua, nihil fecisse citius, quam ut assensum darem. Et crum forte recens tum ab iterata lectione, rationesque tuas omnes clare exponebam.. Ille tamen pertendebat scribendum: *Qui Lacedaemonium per crusmata lubricat orbem*, quia *Baetica crusmata* in Martiale suo legerat. Et videbis cum prodierit, qui nunc commentator esse Juvenalis minatur, radiare hanc ibi conjecturam. Nam hic verus utrique Subballio est: Ille vero etiam ineptissimorum somniorum adeo tenax, ut si vera si falsa esse putet, fusque deque habeat, dum nomen suum in scripta aliorum infulciet. Hinc illa Ilias vanissimorum commentorum, quibus speravit se omnes paginas in mea Diatribe posse facere. Sed mirum quantum se opinionis falsum videbit: quamvis & pudeat me, servandi moris & fucatae amicitiae causa, laudari toties illa nomina ibi, quoties facere id coactus sum, & tibi quoque non dubitem improbatum iri. Sed vides quae fortuna sit mea, ut levissimae etiam invidiae ferendae impar: Quam tamen haecenus cedendo omnibus, praefereundoque omnes mihi vix vitare potui. quid me fieret, si inspexisse illos propius & propemodum intelligere me faterer? Quare non commovebunt te ista, vir maxime, quae vereor ne manifestae vanitatis reum faciant factum illum: & de animo meo judicabis ex hac litterarum simplicitate, cum qua ut fidem serves, facile suspicaris, quanti mea interfit. Equidem verum & ingenuum erga me amorem ut apud illos excitem, pridem desperavi, ex quo nosse illos, immo nationem caepi: sufficit, si non inimici sint professi, & quia suorum miratorem me putant, non male velint mihi, aut noceant: Ea enim nostrarum rerum nunc incertitudo est, ut abs quovis metuere & neminem offendere nobis curae sit. Interim non dissimulo, me aliqua apud te, si tamen; gratia polere, & crebras tecum alternare litteras: sed ubi de ambitione sua quid inji-

ciunt,

ciunt, dico me ista nec scire nec curare; id agere, ut aliquid dicam, hîc subinde me in loco lubrico servat Apollo. N filius Dordrechtò redux nudius tertius cum transiret, horam fere unam apud me garricbat. Strenue in Ovidio ajebat pergere: excerptorum mentio nulla: unde conjicio, postquam audivit ex te *Scrivenerius*, illa penes me esse, nondum cum eo esse locutum. Sed forte non petet, quia non magis aliquid volet tibi debere, quam nos ad indignas manus thesaurum istum pervenire. In loco Livii lib. vii. c. 15. nihil variant excerpta. Nos foenus tuum anxie expectamus: aliud quod epistolari dic (liceat sic loqui) pensum, ut mihi scribis, laetissimus semper accipiam. *Fabricium* Leidae audio fuisse, & vide quam parum ipsi simus curae, qui tot epistolis spem fecerat mihi videndi sui, & sibi fuerat eo nomine gratulatus: cum Amstelodami tot dies exegerit, tot Leidae, me insalutato transiit. Quid dixit, quaeso, quid praese tulit? nisi illis mortalibus, qui pessimo rumore hîc famam ejus laeserant, cum quibus bacchari assueverat, similior, quam verorum amicorum amantior est. Vale, Nobilissime Domine; Hagae. v. Eid. Maji Anno. c1515cxxxvii.

Quid sentis de loco illo in Soteriis Rutilii. vs. 13. *Nosterque ex ordine collis confremat.* Ita enim se restituisse ait Domitius, cum MSC. haberent. an latet aliquod nomen regionis, urbis? cogita quaeso.

EPISTOLA CCXCIX.

JOH. FRID. GRONOVIVS

*Claudio Salmasio.**Leidam.*

Nobilissime Domine, quas ultimas a te accepi, non fefellerunt expectationem, quam semper de tuis habere soleo. Ita doctrinae & humanitatis tuae nectare non dico irrigarunt me, sed inebriarunt. Quid vero est quod liberam mihi potestatem facis tua reprehendendi? *ποῦν σε ἐπ' αὐτῷ*; Non ego adeo sum fatuus, ut cum illis, qui soli sapere sibi videntur, certem; ut hoc mihi attribuam aut petam. Ego vero tum aliquid profecisse mihi videor, cum tuis assentiri possum, facilioribus quidem sine mora, secretioribus vero illis post quandam ingenii contentionem. Si dubito, non argumenta quaero, quibus meae opinioni adsum, sed in agnitionem imbecillitatis meae reducor & laboro in hebetudine sensus mei corrigenda. Quod etsi subinde molestum est, non aegre fero tamen: quia haec velut modestiae retinendae admonitio est. Illud vero quo contingit saepius, eo impensius laetor, & vel pro pusillo hoc quod accepi, quodque affecutus sum Deo doctorique meo gratissimas gratias ago. Si vero cum millia multa me docueris, semel forte, dum inter gravissimas occupationes mihi tamen vacare non desinis, aliud agentis calamus praeceperit mentem, & in minutiis non alta cura dignis, vacillaverit; utar ea libertate, cujus copiam fecisti; non ut erroris alicubi te convincam, (crede mihi ex animo

mo loquenti, vanam ambitionem & typhum, quo nescio quomodo litterae nostrae jejunos quosdam & mei similes inflant, pessime odi) sed ut accuratius mihi cupiam monstrari, & clarius explicari, in quibus haesito. Quae de epenthesi Jonica notasti, verissima sunt, & magnam erroris nubem oculis meis exterferunt. Nec de antiquitate & praerogativa temporis in Attico Alphabeto dubitare possunt, qui non Graecae historiae prorsus ignari sunt. Sed quid dicis de voce ἀργός, quae omni Grammaticorum vulgo pro ἀεργός facta putatur. Nec epenthesi hinc locum videtur posse habere, cum origo, ut illi volunt, sit τὸ ἔργον. sed ἄδω, si non ex αἰδω factum, cur alpha habet jota subscriptum: aut quae differentia inter ἄδω satio, & ἄδω cano? Hoc ergo explica mihi. In Ovidii loco Epist. xi. 46. *Denaque Luciferos Luna premebat equos.* omnino ferri illud *dena* non potest, ob rationem quam addis: quicquid ille philosophetur. Hoc verum est librum posse conscribi locis illis, ubi tam decimi quam noni mensis mentionem faciunt in hac re veteres. Sed hoc non dicit *dena*. Vide autem an scribendum sit, *Plenaque*? Et videtur hoc probari per τὸ *premebat*. Quod etsi in genere de aurigis dicitur, tamen proprie competit prope- rantibus ad finem & metam sui cursus. Nec *Luciferi equi* aliter excusari videntur posse, quam per Hypallagen, ut equis datum sit Epitheton, quod ipsi Lunae debebat addi: Il Art. Amat. 660. *Male viva*, certissimum, elegantissimum, & proprium, & signatum est: nec aliter legendum esse credidi, ex quo Pallium tuum Tertulliani legi, & ita quoque Palatinus, & ille, quem ego in Germania contuli. Habui super hoc ipso loco acerrimam contentionem adversus N. quid quaeris? persuadere non potui, si omnino βαλανηφαγεῖν necesse esset inventa fruge, malim equidem quod *Gervartius male visa* probat alio loco, ubi *male conspectus*: quam illud ridiculum & exhibilandum est, *mala visa*? sed aliud fane est *conspectus* hoc usu, aliud *visus*. Epist. xiii. 137. *Heroisin & Troasin* non dubito quin vera sint, & ipsius Nasonis. *Infernae arae*, ut placere fane non possunt, ita nescio quomodo nec *internae* illae satis sunt ad gustum. Si *infectas* aut tale quid posset supponi, amarem magis. Itaque te oro, ut per ocium aliquando de isto loco cogites. Si tamen in MSC. *Herculeas* legitur, quid opus cunctari? Unde autem tanta mutatio? Lib. vi. Livii c. 36. ita invenio in duobus MSC. legi: *ni potius quam sorte creditum solvat.* in tertio: *an placeret faenore circumventam plebem potius quam sortem creditam solvat, corpus in nervum ac supplicia dare?* Ad Lib. xxxv. nihil habeo. non enim ultra xxx. excerpta nostra porriguntur. Ultimam illam partem nullis blanditiis ab Dracone illo hesperio extorquere potui. Sed quando thesauro isto nos beabis? salve & vale cum tuis, unicum decus meum. Hagae a. d. iv. Eid. Majas A^o. CIOICXXXVII.

Lib. v. Silv. piet. Abas: Laudavi palmariam tuam emendationem: *nullaque famosa signatur lancea pinna*, Itaque locum ex scholiaste Juvenalis: *Antea si quid consules.* Nescio quid sibi velit τὸ *Antea*, an scribendum *anxia*. Ut sit prima vox versus quam explicat. Inspice, quaeso, Scholiasten. Nam mihi ille ad manus non est.

Responsio ad *Salmasii* Epist. xcvi. ipse respondet Epist. xcvi r.

Tom. II.

A a a a

EPI-

JOH. FRID. GRONOVIIUS

¹ Claudio Salmasio.

Leidam.

Nobilissime Domine. Lapsam hebdomadem miris modis eripuerunt mihi certi homines maleferiati : etiam unum diem urbe abesse coactus sum. Ea causa est, quod gratissimis litteris respondere statim non potui. Illud, *Foenoris accedat merces* omnino alicubi me legisse puto : sed ad ipsum repraesentandum aequae me deseruit memoria. Manilii esse initio suspicabar, sed cum integrum percurrissem, non inveni. Ipsa observatio tua adeo mihi placuit, ut continuo non paucos locos ad eam exegerim, & deprehenderim verissimam. Itaque quod hoc quoque nos docuisti, immensas tibi gratias, ingentem sitim istius operis mihi excitasti. Quod quia admonuit, scribam nunc rem invitissimus, quam tu cum risu leges. Eruditus quidam juvenis Belga, quia ex me audiverat propediem id typis datum iri, dicebat nuper habere se librum MSC. JCTi cujusdam Hispani, maritimum spoliū, de Usuris. Eum jussit offerrem tibi, si uti velles. Respondi ejusmodi adjutoribus te non egere : deinde procul dubio tractari ibi forenses quaestiones & naenias ex recentibus JC. millies repetitas : quod genus toto coelo a tuo scribendi more differre. Nosti *Φιλαντίας* gentis. non persuasi ut urgere desisteret. Itaque liber penes me est, & expectat quid jussurus sis. Est autem talis qualem fueram suspicatus. Prima quaestio est : *Usurane sit mutuum dare cum pacto, ut mutuarius teneatur partem mutui in mercibus accipere aut solvere in alio loco?* secunda : *Utrum usura sit mutuari aliquid, ut tantundem reddatur, quando plus valebit?* &c. Ego mandatum persecutus sum : tibi ridere, vel ad haec non respondere licet. In Statio : *Septenusque ordine collis*, utinam non tam longe a vet. Lectione abiret. Vix me contineo, quin euge acclamem. adeo nihil convenientius sensui fingi posset. *Senusque ex ordine collis* nimis videtur eruditum. Malo tamen quam interpretum *Φλυαείας*. Locum Scholiastae Hephaestionis valde velim habere descriptum, nec enim is scriptor in mea librariola est. Verissime reprehendis imperitiam corrigentis in Ovidio : *Quo mihi sit genitor*. In lib. vi. Fast. vs. 435. *autor in incerto est, res est Romana. tuetur Vesta, quod assiduo lumine cuncta videt*. Mira hîc affertur Scaligeri emendatio, sed an non scribendum, *juncta*. Quod pronomen est, non conjunctio. Erant autem iisdem in penetralibus Vestalis ignis & τὸ διωπετὲς Palladium. Citavi hunc locum in Diatribe : sed corrigere oblitus sum. Ea perfecta fuisset, nisi deficerent litterae, ut loquuntur, Capitales ad indices adornandos. illae dum funduntur, opusculum non exit. *Bodecherus* cum ² lituo hujus expeditionis, nuper hîc quatuor integros subsedit dies, ut haberet occasionem caedendi *Fr. Vossii* : & fecit in via celeberrima media luce.

¹ Responsio ad *Salmasii* Epist. xcix & ci. Respondet vero *Salmasius* Epist. cxi.² Vid. Gronov. Epist. ad Heins. xx.

luce. vide otium & dignitatem Professoriam: Rumusculos quod non nisi contemptu dignos aestimas vehementer laetor. Et profecto jam dudum eo profecit tua virtus, ut possis *ὑπὸ τῆς γῆς πυκνᾶς ἀνῆσθαι ψεκᾶδ' ἐνδύσῃ φρενὶ* Litteras ad *Lindenbrogium* curavi. Epithalamion illud, in quo sic *ἑσπνοφαντῆθης* ob certas causas habere me vellem: & si fieri posset, editum cum lituris tuis. Vale, maxime vir, & me solito favore complectere. Hagae 111. Kal. Jan. A°. CIOIOCCXXXVII.

Hanc epistolam nudius tertius sera nocte scripseram, ut altero die summo mane deferrem ad aurigas. Ecce adsunt *Vossii*, & totum istum diem Genialem cum ipsis in suavissimis sermonibus habui, quorum praecipuum argumentum tu fuisti. Nunc etiam nunciatur te auctum esse liberis. quod ex animo gaudeo, eamque rem tibi, puerperae atque ei quod natum est, bene evenire Deum precor.

EPISTOLA CCCI.

JOH. FRID. GRONOVIVS

*Claudio Salmasio.**Leidam.*

Maxime Virorum. Quid promerueram de te, Nobilissime Domine, ut me fraudares palmaria illa Ovidiani loci correctione, nisi Deus quispian bene advocatus me suspicari de ea coegisset? Certe enim talis primo intuitu mihi visa est: nec dubitare possunt nisi Acrisii & Acrisiorum filii. Vere dicis multa esse, quibus probare eam possis. Puto & Prudentii loco, qui mihi incidebat Lib. 11. in Hymn. *Ut Tragicus Cantor ligno tegit ora cavato Grande aliquod cujus per biatum crimen anhelet.* Verissimum etiam *τὸ praetexit.* Ille N. quaesierat hinc nuper per epistolam ex JC. quid esset lib. 14. de Ponto. el. xv. *Teque meae causam servatoremque salutis, Meque tuum libra novit & aere magis.* Ita enim habet ista Editio. Veniebat ille ad me & petebat Ulpianum & Theophilum, ut describeret loca illa, ubi mentio facta testamenti per aes & libram. Dicebam de ritu illo satis multos notasse: Inter caeteros *Brissonium*: sed hunc quoque errare, quod *magis*, non *minus* legeret, cum illud a faevis correctoribus esset. Insanire videbar homini, quod tam sanam lectionem loco movere vellem. Silui ergo & mihi sapui, si tamen sapui, quod tu judicabis. Habent enim optimi quique MSC. *minus*, non *magis*. Et errori illos implicuit quod dicendi illud genus non intellexerant: *tuum libra & aere minus*, quod elegantissimum est. Et simili fere sensu Galba apud Ciceronem filios suos parvos tutelae Populi Romani commendat, ac se ait *tanquam in procinctu testamentum faceret, sine libra atque tabulis populum Romanum tutorem instituere illorum orbitati.* Nisi quod Ovidius non ad testamenta, sed mancipationem in genere alludit. Sic Manilius: *Tarquinioque minus Reges.* id est, praeter Tarquinium. Statius: *Pallados armifonae, pharetrataeque ora Dianae Aequa ferunt, terrore mi-*

nus. Aufonius in periochis: *amissis una minus caeteris navibus.* Tuum ergo inquit, mancipium sum, sola libra & aere minus? sola haec mancipationi meae defuere. Per aes enim & libram Dominum mutabant mancipatione, quae res mancipi erant, & nexu abalienabantur, ut est apud Boëtium. sic hunc locum tractaveram dudum in miscellaneis meis. Tui de foenore in dies mihi fitis crescit: etiam *Lindenbrogio* nostro, qui me statim, ut editum fuerit, sibi comparare iussit. Is salutat te plurimum. Acronem & Porphyrium non habeo, nec nancisci possum. Cruquianus commentator ita: *hic Fufidius capiti a summa capitali quinas enim exsecat. id est quinas centesimas de sorte deducit in singulos menses, quas aut accipit aut tabulis notat.* Cruquius ipse: *exsecat scriptum est in o. c. quinas autem centesimas exsecare, est, de sorte seu capitali summa (ut fertur) foenus exigere, est quod Flandricè dicitur. vyve ten hondert.* Quod quidem exiguum est in annos at in menses singulos intolerabile. Quod ne fieret apud Romanos Censoribus negotium datum erat. Laev. Torrentius: *caput vocat sortem ipsam; mercedem vero sortis fructum, quod proprie vel foenus vel usuram dicimus. foenus tanquam fetum quendam sortis, usuram quod usu detur. Merces vero proprie in locatio- ne appellatur, ut in emptione praetium: Horatius igitur καταχρηστῶς, ut paulo ante conductos nummos vocat foenori acceptos, sic nunc mercedem quae pro eis penditur.* &c. *Fufidius iste quinas in singulos menses capiti mercedes exsecabat, hoc est quinos quot mensibus aureos pro centum numero datis tanquam vi quadam in summa indigentium necessitate auferebat, non toto biennio sortem aequans.* Sic illi. De loco Martialis & Epithalamio sis memor, quod commodo tuo fiat. Epistolae Casauboni sunt sub praelo: sed tardius procedebant operae, dum iidem inter meam Diatribam & illas laborem partirentur. Quod nunc desierunt facere: & proximis diebus mei libri exemplum habebis. quem utinam oculis tuis subducere honette possem! Sed tanti est errasse, tanti plurima jejune & inepte dixisse, ut veriora & certiora a te docear. Salve & vale, primum literarum ac meum decus. Raptim. Hagae a. d. xiii. Kal. Jul. Anno cico cxxxvii.

EPISTOLA CCCII.

JOH. FRID. GRONOVIIUS

¹ Claudio Salmasio.

Leidam.

Mitto ad te tandem, Nobilissime Domine, infelicem foetum nostrum seu abortum verius Diatribes in Silva Papinii, pro quo etsi semper metui, tamen cum maxime discrucior animi cogitando, quis sensus futurus sit tuus, quae de nobis existimatio, cum tantum cumulum inscitae λογδιαρροίας & inanilogae inscitiae sub conspectu & uno quasi oculi ictu es habiturus. Utinam paucae modo paginae, immo lineae probarentur tibi! Utinam invenires aliquid, propter quod caeteris ignosceres! Quicquid sit, hoc etiam te oro, ut per-

¹ Respondet Salmasius Epist. cvii.

perdere digneris horas nonnullas vacuas, & idem sumere in illa jus, quod in Nafonimastiges, caprimulgos ² P. V. & Q. R. editores, & per Epistolam quamvis longam apud ipsum me plectere abnormem illam Minervam. Non dabis beneficium invito, & hoc certe intererit, ut & castigationem utcunque acerbam aequissimo animo feret, etsi vel totus liber una deleatur litura, spem tamen habet autor se imprudentia sua atque ἀμαθεία, non perditurum affectum tuum, quem ut nulla doctrinae opinione, solo cultu erga nomen tuum, acquisivit, ita eadem arte ut desint caetera omnia, se servaturum, si quid in rebus humanis certi est, certum exploratumque habet. Misi ad te ipsum exemplar, quo, dum sub operarum manu liber est, ipse usus sum: cum nondum haberem paratum, quod tibi proprium destinavi, & perire mallet non diutius tortus. Eum ipsum licet tibi obelis tuis distinguere aut configere: sed ut remittas postea, cum exemplum purum, quod retineas, ad te curavero. Nondum enim dedi cui inscripsi, nec aliis, quorum quidam ea ambitione sunt, ut finistre interpretarentur, si ultimi tam Levidense donum acciperent. De loco Varronis quando sic illudere mihi voluisti, ut sententiam meam quaereres, ludibrium debere tibi pergam. Puto ergo falli Varronem, non tantum in ridicula illa origine τῆς nexi, sed & quod ceu diversas ponit sententias Manilii & Scaevolae, quarum utraque vera est, nec inter se pugnant. sane & Cicero distinguit ea, quae tenentur *jure nexi*, & *jure Mancipii*. Nempe quae habeo *jure Mancipii*, eorum sum Dominus: quae *jure nexi*, in ea habeo obligationem. Ita non contradicunt sibi Manilius & Scaevola. Nam Manilius requirit, ut quae nexa sint, eadem quoque sint Mancipi, hoc est talia, quorum commercium sit, & quae Mancipari possint: Scaevola dicit nexum esse, quod per aes & libram geritur, praeterquam quae dantur Mancipio. Et haec enim per aes & libram geruntur, sed plus dant juris, quam nexa. Non negat igitur Scaevola necesse esse, ut aliquid, quod per aes & libram geritur, sit nexum, id esse rem Mancipi: sed dicit aliud esse tenere aliquid *jure nexi*, aliud *jure Mancipii*, quamvis utrumque per aes & libram geratur. seu omne id nexum esse, quod per aes & libram geritur, si non Mancipio detur. ita negatione unius speciei, definit alteram, quod non negat Manilius. Quod Mancipio datur, ejus fio dominus: quod nexum est, ejus proprie non sum dominus, sed habeo tantum in id obligationem. Et ita *nexus* quoque differt a *servo*, etsi obligatus est, ad serviles operas praestandas. Nexum habeo *jure nexi*, non *jure Mancipii*; at servos habeo *jure Mancipii*. Sic quod mihi pignoris loco datum est habeo *jure nexi*: illud etiam etsi penes me sit, non tamen est meum. Logica haec Etymologia est, non Grammatica, videntur omnia quidem Mancipia etiam esse generali vocis notione nexa, aut quae habeo *jure Mancipii*, eadem me habere *jure nexi*: sed non contra aut reciproce. Ita Cicero cum dicit *abalienationem esse traditionem alteri nexu*, sine dubio generaliter vocem accipit, ut etiam quae Mancipio dantur, comprehendat. Sed ad utrumque requiritur, ut sint res illae, quae sive *jure nexi*, sive *jure Mancipii* tenentur, res Mancipi. Quod

Aaaa 3

vo-

² Pervigilii Veneris *Scrivarium* scilicet, & Quaestionum Romanarum *Boxhornium*.

volebat Manilius. Nec adversatur quod liber homo, qui non est Mancipi, obaeratus potest nexus fieri. Revera enim liberi hominis commercium non est, ideoque non potest esse Mancipi: sed ut fiat nexus, fit ex dispositione legis, quae obaeratos necti iussit, & ad refrenandam indigentiam quorundam patrumfamilias, hoc introduxit. Ita etiam si liberi hominis commercium non sit, idque leges sciverint, homo tamen major viginti annis, cum ad pretium participandum venundari se patitur, fit Mancipi & servus, etiam dispositione legis, quae unicuique favori pro se introducto renunciari licere, & hoc modo lasciviam fraudatorum coercere voluit. Fateor tamen omnia ista non tralaticia obscuritate involuta mihi videri, & nescio an recte singula intellexerim. Tu judicabis, & si erravi, me in viam reduces. Habebam in Miscellaneis meis duo capita de nexis debitoribus, ubi Livii, Senecaeque loca non nulla explicantur. sed postquam intellexi te de fœnore scripturum cancellare ea constitui. Non enim tam ineptus sum, ut non te de his omnibus veriora firmioraque prolaturum crederem. Vale, vir maxime, nec in mentem veniat tibi, ut ob tenuem immo nullam cognitionem meam sive doctrinam mores meos & animum odisse velis. Hagae. a. d. viii. Kal. Jul. A. ciciocxxxvii.

Illud etiam rogare te volui, & paene fueram oblitus, si in aliqua libelli mei incides, quae videntur ambitum sapere & laudationes praeferent hominum, de quibus quid secreto sentiam, nosti, ne irascere. Crede mihi, non tam te, quam me ipsum talium pudet pigetque, & tamen moderata haec erunt, praeut alii grassantur. Aliqua etiam mutis insaniendum fuit. Iterum vale.

EPISTOLA CCCIII.

JOH. FRID. GRONOVIIUS

*Claudio Salmasio.**Leidam.*

Quibus incessem laetitiis lecta epistola tua, Nobilissime Domine, describere tibi non possum, sic ut credas, quia non vidisti. Unus es, quem revercor, quem timeo, quoties calamum manui applico, cujus ὀφθαλμοειδής oculos nihil fugere puto, quod Homericis scriptum est. Qualia multa cum haud dubie in libello sint nostro, tamen meliora penes te valuisse tantum, ut his illa condonares, & totum opusculum laudares, hoc vero mihi omnia ambitioforum hominum vota transcendere videtur. Tibi enim probari existimo idem, quod omnibus doctis & bonis probari. Atque etsi illud magis ex affectu profectum arbitrer, quam severo strictoque judicio, tamen ipse affectus mihi iudicium est, quod neminem eo usque adames, quem non elegeris. Plausu igitur illo tuo sic erectus sum, ut de studiis meis animum nequaquam despondeam, & hoc amabili mihi somnio mihi blandiar, non omnino perditum esse oleum, quod lucubrationibus nostris impensum est. Interim refrigerata congratulatione illa recenti, non abstinco petere, uti quae condonasti etiam notes, & emen-

emendare me finas naevos, qui specie rectiorum absconduntur. Sunt enim non pauca, quibus ipse diffidam, & ideo proposui, ut certiora discam. Sunt quaedam jejune dicta, ut exactius ab aliis tradantur. In quibus est locus ille, ubi defendi in Tiburt. Manlii contra Gevartium, *Satiram turbare*. Si hîc fuisses cum illa notarem, aut faciliior copia mihi foret per literas te consulendi, petiissem, ut quod de Satira tractavit Danaes pater examinare me doceres. Bella namque occasio erat materiam illam sub incudem revocandi. Licet enim scirem te & alios doctissimos viros sententiam *Casauboni* magis probare: tamen inveniebam ibi quaedam, quae quomodo seponenda essent, satis decernere non poteram. Itaque nec illi assentiri volui propter vestram dubitationem: nec sententiam ejus tangere, quod rationes, quibus confutarem, satis explicatas non haberem. Inprimis speciosus est ille Hesychii locus: σατύραι σκαφαὶ βοτρυῶν ὡς δὲ Λάκωσιν, eum enim pro se adducit ut *satiram* Graecum esse verbum, & *satiras* Graecae inventionis esses probet. De hoc & aliis, quae eodem ducunt, quid sentias perscribere te nimio velim, & sic repetes solemne scribendi genus, quo adversum me pridem usus es, & usurum te spondidisti. Quod obelum obelo transfigis, non aliter expectaveram, & omnino recte factum judico. Homo quidam tibi non ignotus, ut primum id legerat, monebat ὀβελον. ὀβελισκον Graecos dicere consuevisse. Ei objiciebatur autoritas Phaen. qui semper media longa eam vocem pronunciaret. Ille cum videret gratius fore, si defenderetur aut excusaretur quod semel placuerat, tantoque Catone niti diceretur aut fingeretur, capiebat vorforiam, & Graecos ajebat interdum brevem vocalem ante liquidam producere. quomodo, ni fallor, apud Homerum: θεὸς δ' ἰπὸ μέλῳ &c hoc ingenti plausu exceptum, & *obelus* ille infelix subito felix judicatur, in qua possessione sua manere jussus est. Quanti vero hoc argumentum sit, vides, nec ille ignorabat. sed de pluribus verum est, quod de Domitio Afro dicebat Tiberius: eos nempe suo jure disertos & Poëtas esse. De cursoria pellectione libri non tam mole, quam solida & omnigena doctrina ingentis, verum de uno est, puero nempe. Ille enim egregium hoc facinus molestissimum tum mihi praestitit. Ego vero magno me hoc spectaculum, etsi tum aegerrime tolerarem, non vidisse nollem. Inde didici quae istorum hominum perpetua ratio studendi sit. Certus sum nihil cum aliqua saltem ingenii contentione tractare, nisi forte magnas nugas; Ita ignavia, & quia omnia facilia sibi credunt, omnia difficilia Subterfugientes, aut contemnentes torpent, satis arbitrati, si stupore vulgi famam nacti sint, & verba saeculo dederint: adeo rursus securi, immo stupidi, ut famam apud imperitos nacti opinionis fastum propriam conscientiam circumveniant. Tales ut te intelligant unquam aut anteponant frustra speramus. Ut vero propter eos rationem scribendi tuam improbes, indignissime fiat. Quam ipsis majorem optabis paenam, quam ut sibi sint similes, id est, neque ex tuis neque ex cuiusquam scriptis aliquid discant. Vale, Vir maxime, cum tuis. Hagae. Non. Jul. Anno Christi 1610 cxxxvii.

Responsio ad *Salmasii* Epist. cvii.

EPI-

Claudio Salmasio.

Leidam.

Nobilissime Domine. multis modis animum meum delectarunt postremae tuae, quibus quaedam mea reprehendis, & quae petieram accurate me doces. Nunquam venit mihi in mentem adeo esse fatuum, ut saepe lapsus me esse & dormitasse non opinarer, aut *δοκησιον*, ut veritatem discere nollem. Quare ad omnia illa ne hiscere quidem audeo. De *ripa stagnata* memini te, cum hîc esses, paucis me monuisse. Ne vero putes me pertinacem fuisse in tenenda sententia, mea non dico (jam enim id folium excusum erat) sed cum monitus essem non corrigenda, quod inter omissa commodè fieri potuisset, rationes meas allegabo, cur non plene tum tibi assenserim. Inveniebam tot locis, quorum partem citavi, verbum *stagnare*, ut Statium id aliter usurpassè non putarem nisi quod suo more usus *stagnare ripam* dixisset, pro stagnando facere ripam: ut alibi *turbare satiram* & quae similia istiusmodi sunt. Nec vocem *ripae* accipiebam in individuo, ut loquuntur, pro ista vel hac ripa, quae facta est, sed in specie, quae subinde aggeritur. Nec enim omne illud, quod advexit, tollit Nilus. Cur enim *donata rura* dicerentur? cur *fossae oblimatae*. Deinde cum *stagnare* in hoc usu apud nullum scriptorem antiquiorem Justino reperiēbam: cui inter caetera istius aevi hoc condonandum esset. Nec sane tam *stagnare* quam *stannare* scripsisse illi videntur: ut *ἀπὸ τῆς σεννοῦ* aut *σεννώσαι* *stannum*, a *stanno stannare* dicatur; Illud vero G. quod insertum est, illis rescribatur mortalibus, qui *columpna*, *dampnum* & similia in veteres libros monstra invexerunt. Sic igitur *stagnata* non componebam cum *Cecropio luto*, sed *stagnatam ripam*, id est a Nilo ipso factam, coërcere undas Cecropio luto, seu hîrundineo opere, sed haec non repeto, quasi nunc quoque explicatio tua displiceat (placet vero, & meam ea redemptam vellem) sed ut scias me non pertinacia, verum ratione, quamvis perversa, meum illud reliquisse: vellem enim ut plura talia, pro affectu docendi me, notares. Nunquam enim fiet, si vel totum librum una litura deleas, ut ego plus stolidae charitati erga infelicem factum, quam rectissimo iudicio tuo tribuam. De *Satira* omnia nunc mihi expedita, & miror ipse, quomodo nomen aut existimatio hominis oculos mihi praestrinxerit, ut hoc praeiudicio veluti glaucomate mihi objecto deceptus verum pervidere non potuerim. Quamquam & ipse non pauca in istis libellis notaveram, quae solitam ipsius festinationem redolerent. Quale est quod reprehendit in Juvenale: *Dominae femur exclamare coegit*. Quasi non Statius *portae mugitum exclamare* dixerit? Quasi non alii *rumorem* pro murmure, immo *vocem* pro sonitu. Item *figi in cute solem* in Persio. Quod mihi si tamen veram rationem video, eleganter dictum videtur: De solis enim lumine, ut liquido plerumque loquuntur veteres, & *nubem sole colorari* dixit Seneca, & alii innumerabiles aliter.

Jam

Jam insolatione non ad valetudinem tantum aut depilationem, sed & ad fuscum & virilem colorem cuti inducendum utebantur. A quo praecipue sine *figi in cute solem* dixit Persius, cum reliquam forte mollitiem etiam reprehenderet. *Figendi* verbum in colorum applicatione usurpat Petronius: *nec vestem atramento adhaesuram, quod frequenter etiam non accersito ferrumine infigitur*. Nec diverse Juvenalis: *nitidis rebus maculam figere. figere ergo in cute solem* dicetur, cujus cutis vernum solem bibit, Juvenalis Phrasi, & verno sole coloratur. Plinio *alligari* dicitur color, qui constanter haeret, nec eluitur facile aut evanescit, ut Graecis *κατάχεσθαι*, quod tu nos docuisti in Plinianis exercitationibus. Qui *colorem alligari, infigi*, qui rursus *cutem sole tingi, colorari* dicit, quare non *solem in cute figere* diceret. Haec ante octo fere dies scripseram, cum interpellatus seposui chartam, & continenter postea tot negociolis distractus fui, ut vix cogitatio ejus mentem subierit. Quare oro atque obsecro, ne sinistre accipias silentium meum aut ignaviam moramve imitere. Posthac diligentior ero. Notum est post divisionem Augusti, qui in provincias publicas cum imperio mitterentur, sive Consulares sive Praetorios, *Proconsules* dictos. Cur ergo Strabo. Lib. III. p. 166. Ed. Casaub. *ἡ μὲν Βαιτική πρὸςκειται τῷ δήμῳ καὶ πέμπεται ἐπ' αὐτὴν στρατηγὸς ἔχων ταμίαν τε καὶ πρεσβευτὴν*. Etsi hoc in Strabone ferendum, cur dubitant in I Annalium Taciti docti viri, an non vitiosa scriptura sit, ubi *Praetorem* Bithyniae Granium appellat? Pudet omissam esse in libello meo egregiam emendationem tuam in Saturnalitiis ad Plotium: *Alvorum, calicum, atque caccaborum*. Nuper adeo id recordatus sum. Nam semper, ex quo primum cognovi, pro verissima haberi, cum Varro & Columella perpetuo *alvos* dicant. Et destinaveram ei locum ab Lib. III. Sil. L. ubi obiter de corruptione *τῆ B. in V, & V. in B.* monui. Nescio quae menti caligo objecta fuerit, aut quomodo sic pocula lethes traxerim, ut obliviscerer. Si quando textum edemus, videbis sine ullo metu hanc lectionem Statio assignaturos: Nec dubitare possunt, nisi putidi & inepti. Vale, Vir maxime, & me ama. a. d. VIII. Kal. Sextil. Anno CIO IC XXXVII. Hagac.

Foenori tuo quid sit? Nisi forte idem quod Epistolis *Casauboni*. Nam dum avaritia & lucri odor hominem meum impellit, quaevis opera, ex quibus sperat aliquid proventurum suscipere, suscepta inceptaque necessario cogitur, dum absolvat unum aut duo, caetera differre. Iterum vale, & bene rem gere.

Responsio ad *Salmasii* Epist. CVIII.

EPISTOLA CCCV.

JOH. FRID. GRONOVIIUS

Claudio Salmasio.

Leidam.

ERgone irascerer, quod errores aliquot meos benevole correxisti? nunquam faciam cuiquam, qui modo aliqua specie judicii mecum agat; nedum ti-

Tom. II.

Bbbb

bi,

bi, quem unum omnibus oculatiorem aestimo, cui uni studia mea approbare cupio, apud quem unum aperta fronte dicere licet mihi quid sentiam, & quid sentiendum sit audire. Nam caeteri maxima pars, ut ipsi sunt, vana respiciunt, atque inutili ambitu plerumque iudicia corrumpunt, sic ut etiam cum exuerunt simulationem, fidem non invenient. Serio immo irascor occupationibus meis, vel mihi potius ipsi, qui non omnia posthabui, ut aut suspicionem tuam officio anteverterem aut caverem saltem, ne tot dies mihi sustinere eam necessum esset. In quo video & cognosco negligentiam inaeestimabili me fructu privasse tuarum epistolarum, ex quibus plura addidici, quam ex aliorum gloriosorum hominum vastis commentariis. Igitur posthac cavebo, ne similis noxa committatur. Ita tamen ut tuarum quoque occupationum rationem eliciam. Exilui prae gaudio, ubi legi certissimam conjecturam tuam de Hesichii loco. Quam ego felix essem, si hac purpura centones meos adornare potuissem! sed veniet, spero, dies, cum emendare illud opusculum poterō, & omnia ista, quae ambitionem & juventutem sapiunt, (quorum quidem me paenitet & paenitebit quādiu non correxero) spongiis effingere, substitutis aliis, quae & verum animum meum, & quae ex te didicerim, praeferant. Sed ad conjecturam tuam, quae, credo, ipsum Suffenum nostrum eo adigeret, ut fateretur se autorem illum suum incomparabilem negligenter & imperite, hoc est suis oculis inspexisse. Neque enim vocum praecedentium subsequen-
tiumque series aliam scrip-
tionem admittit: & eruditissime sagacissimeque Laconica illa vox a te eruta est. Σατῳραῖ vel Σατῳραῖ pro Σατῳραῖ, statim subibant illa Σιαρ pro Σιαρ; πισορ pro πισορ; σῆν pro σῆν; μαχαῳραῖ pro μαχαῳραῖ; & ejusmodi innumerae. Nec geminatio illa litterarum ignorari potest, quae omnibus vocibus communis. De Epigrammate valde amo te, quo quidem purius, elegantius, ingeniosius, quod in rotundius Κέντερον, quae peculiaris illi generi laus est, desinat, diu nihil legi. Neque aliter judicare possunt nisi homines ἐμὲρόνητοι, αὐτῳδεῖς, ὑπερήφανοι, verbo mali, quibus nihil placet, praeter quod ipsis satis interdum infelicitate excidit. Humane vero facis, cum ad excutiendas Horatianas paleas ultro offers operam, quam ego etiam libens precibus ambire vellem. Nec dedignor partes a te mihi impositas: hac tamen conditione ut cum in arctum contrusus fuero, nec effugium habeam, non accersendus sit mihi θεὸς ἀπὸ μηχανῆς, nec susceptum meum deferendo praevaricer, sed aperte rejecta parmula malam causam omittere possim. sane in ipso limine mallem *tetram nivem* Riphaeis montibus reliquisset. *Jove non probante*, placet fere prae commentis interpretum, nisi tu quid novi habes. sed de *imminente Luna*, & *undique decerpta fronde*, ubi se tantopere jactat, quid judicas? nam posteriore quidem loco veram lectionem asseruisse paene persuasus sum. Expectabo tamen sententiam tuam. Vidistine librum *Galilaei* de *Systemate mundi* quem *Berneggerius* noster vertit? Et legisti sine stomacho encomium illud nugacissimi hominis, certe hujus studii ignarissimi: *Florentissimus in Batavorum Academia doctor*, quem *Heinsius*, quem *Salmasius* gloriae suae succrescentem sibi gratulantur? Equidem non patiar virum optimum diutius in tanto iudicii errore

re versari: sed simul primum ad eum scripsero, hoc glaucoma oculis ejus detergebo, & monebo ne in posterum, si quid turbida A. illa eleuet, statim accedat. me quidem vehementer haec res commovit, doleoque librum alias, ut periti judicant, multae bonae frugis faedissimo hoc stigmate ipsa in fronte inustum esse. Ad posteriorem partem meae prioris responsionem tuam expecto. Epigrammatio etiam illo, quod misisti, non nisi cum summo honore tuo utar. Vale, Vir maxime, & me fingere perge facilem obsequentemque materiam. Hagae VI. Id. Sextiles Anno c1515cxxxvii.

EPISTOLA CCCVI.

JOH. FRID. GRONOVIIUS

¹ Claudio Salmasio.

Leidam.

CUM heri Leida discederem, abstuli mecum commodatum a filio hospitis mei Dionysium *ᾠὴ ὕψος λόγος* Oxonii editum cum notis cujusdam Angli, nec visi antehac mihi, nec nomine cogniti. Perlegi aliquot pagellas in via, quantum quidem succussio rhedae pateretur, vidique tandem recte eum vidisse quod magnos quosdam viros fugeret, cur ² *Salamis vera* diceretur. Ita enim notat: *Salamis Insula ad quam navali pugna Athenienses Themistocle duce Xerxis copias fuderunt. Salaminii Atticae aliam in Cypro cognominem extruxit Teucer, cum a Telamone patre non reciperetur, ut qui Ajacem fratrem ἀντιχαιεξ non impedisset. Atque hinc Salaminem Atticam veram appellant scriptores. Senecae: Nunquid Ajacis Salamina veram? Lucanus: Tresque petunt veram credi Salamina carinae. Manilius: Vera Syracusis Salamis non merget Athenas. ubi aqua haeret magno Scaligero. De eadem re ego latius in miscellis meis jamdudum notaram, ut testis esse mihi potest Isaacus Vossius, apud quem jam ante biennium Amsterodami (cum *Sam. Petiti* miscellanea nobis in manu essent) & postea hinc non semel super ea sermones habueram. Itaque partem illorum statim domum reversus ad te, Nobilissime Domine, misi, tum ut olim, si forte arguerer, te testem citare possem, me nihil alieni involasse, tum ut haec ipsa, & quae propterea adjecta sunt perlegeres, & sicubi sum lapsus corrigeres. Constitui enim per otium hoc modo ex schedis meis selectum librum adornare & velut nova incude distinguere: cujus ut aliquid perfectum fuerit, statim tuis oculis censendum subjiciam, nec ullum ibi apicem tolerabo, quem tum improbaveris. Cupioque ut unicus *Κανὼν* sis posthac scriptorum meorum, nisi grave hoc tibi est. Nunc accipe hunc gustum, & quando tentaveris, cum censura tua remitte. Proxime de eo, de quo inter nos convenit. Vale, Princeps Eruitorum, & me ama. Hagae. raptim ad D. xv. Kal. Septemb. A°. c1515cxxxvii.*

¹ Respondet *Salmasius* Epist. cx. ex Epistolis *Salmasii* apparet deesse quasdam *Gronovii*.² Vide *Gronovii* 1. Obs. 3.

JOH. FRID. GRONOVIVS

*Claudio Salmasio.**Leidam.*

Jamdudum siti tuarum me conficis, Nobilissime Domine, Ambiguum etiam acceperis nec ne postremas meas, quibus epistolam praestantissimi e Germania Viri incluseram. Eam tamen periisse nollem, nec respondere potui, antequam tuas reciperem. Equidem nunquam ita fui insulsus, ut meis quibuscunque desideriis gravissimas occupationes tuas non praeverterem. Quare nec nunc moleste rogo, ut quamprimum tuis me digneris, sed commodorum tuorum primam rationem putare te cupio; sic tamen, ut paulo otiosior nostri recorderis. Mitto hîc pagellas quasdam miscellanorum, non ea mente ut onerem curas tuas. Itaque potes eas cum lubitum fuerit perlegere, atque exigere ad obrusam, quaeque displiceant, libere notare. Parata mihi sponsa est, inquam omnia, quibus iuste notam appinxeris, ultro incumbant. Duas paginas libelli mei non ita pridem cum in Galliam destinanda exemplaria essent, mutavi. Eas hîc quoque mitto ut tuo inferas. Scito me priora illa scripsisse procinctum ad iter Amsterodamense, stantem pede in uno, quae etiam causa est, ut totum illud folium turpissimis mendis depravaretur. Eram tum recens a lectione scripti magni viri quem aestimo caetera, sed imprudenter interdum amo meos, & indigne ferebam dentem ubique repetitum in vulnus popularis mei, qui aliquibus certe meritis redemit meliorem famam. Nunc iste fervor refrixit, & me serio paenitet. Quare pudori non duxi apud amicos fateri ἀνόμιαν meam, praesertim cum me quoque non in re quidem, quod sciam, sed circa rem errasse agnoscerem. Tu igitur ignosce confitenti & se deferenti reo, & sit haec inter caetera quae aetati, & improvido conatui condonas. Vale, Vir maxime, & me ama. Hagae. a. d. v. Non. Octob. Anno CIOICXXXVII.

¹ Joannis Wouwerii. vide Gronovii Epist. ad Heinsium Ep. xxx. alterum, qui Wouwerio obtestabatur, fuisse Elmenhorstium colligi potest ex Epistola Gronovii & altera ad Heinsium LXII.

EPISTOLA CCCVIII.

JOH. FRID. GRONOVIVS

*Claudio Salmasio.**Leidam.*

Nobilissime Domine. Quod excusas tarditatem tuarum, exosculor comitatem tuam, id vero mei potius quam tui reor esse officii. Nam ego quidem facile gravissimas curas tuas metior, atque illis ignosco, si quid praeter

ter cupiditatem meam evenit: Tu vero meum negotiosum ocium nescis. atque ideo semper vereor, ne quod negligentior sum interdum, secius interpretare, ac putes me *χρηστότητα* ac facilitatem tuam, cujus ad participandos immensae tuae doctrinae fructus tam grande saepe pretium tuli, non satis agnoscere & venerari, in petendo identidem quam tu in dando tardior; sed si rationem vitae meae cognitam haberes (& plane cognitam facere non possum) essem semper tibi purgatissimus: & testor Deum immortalem, non id fieri unquam minore cura aut tui aut dulcissimarum literarum, sed occupationum mole, quas non ipse onero, sed fiducia mihi imponit illorum, qui aliquod jus in me habere se putant, & me ut mulo Mariano utuntur. Cum te postremum viderem, Leidam excurreram vocatu avunculi mei, Consilarii Ducis Brunswicensis & Luneburgensis, qui ad Comites Oldenburgicum & Frisium legatus hucusque perrexerat ad visendam famosissimam obsidionem urbis Bredae. Reversus ille ex castris significaverat mihi vix fore, ut Hagam adiret denuo: si quae haberem domum mandata, aut per litteras explicarem aut venirem Leydam. Postero die cum omnino scribere ad te constituiissem, ecce totam urbem pervagatur nuntius, obsessos pactos esse deditiois leges, & raptus sum a familiaribus quibusdam, quibus hoc promiseram, impransus impratus in castra comes. Ex quo vero relatus sum in nidulum meum, ita fui distractus totos dies, saepe etiam medias noctes, ut de studiis meis vix cogitare possem. Ita compensanda mihi paucorum dierum voluptas, si voluptas fuit totos dies currere per castra, mille homines alloqui, fame & siti oculorum redimere pastum, noctes semisomnes in scamno aut terra nuda cubare. Nunc ubi paullulum respiravi, & me ex istis evolvi tricis, nihil habui antiquius, quam ad solitum reverti scribendi munus. Igitur in prioribus quidem tuis, quae disputas de *inbibendo κρείεσθ* & *ἀνακρείεσθ* *πρύμνην* vehementer mihi placent: nec dubito aut ineptire Scholiasten Aristophanis, aut ibi esse mutilum. Unum tamen atque alterum est, in quo nondum satisfacio mihi: sed cum illud, quod opponam tibi, nondum concoxerim satis, proximis aut certe post proximas videbis. Interea ad cogitandum spatium mihi dabis. Quod vero pagellas, quas miseram, perlustrare atque perpendere dignatus es, ob id maximas tibi gratias ago. Utinam quod spero telam hanc te arbitro vel exactore detexere mihi liceat. Ita demum studiosis profuturum aliqua laborem nostrum non desperarem. Nam tuum, Vir maxime, unius iudicium mihi famae instar est. Nec pugnabo tecum in Senecae loco. Arguit enim Antithesis in illo: *Salebrosa exiliensque oratio: pedem servare* esse nihil aliud, quam eodem tenore delabi & quasi defluere. quod convenit orationi velut in plano incedenti: hoc igitur mutabo. Horatianum vero interpretem nequaquam deponere suadeo, antequam promissum tuum totum mihi representaveris. Verissima sunt omnia quae notasti: in primis moverunt salivam duo illa loca, quibus demonstras quid sit *πνεῦμα ἔχειν ἄνω*. Itaque non expecto, sed *δυσω* caetera. In lib. iv. Od. ii. potuimus observare (& puerile est non observari) nihil minus eum, quam sensum esse affecutum in illis: *Tuque dum procedis, Io triumphe,*

non semel dicemus, *Io triumphe*. Ubi cum de *Lipſio* triumphasset, certissimum ait esse scriptum fuisse olim: *Duque*. quod sit *Duxque*. si certissimum est, cur non pugnaturum se dicit ei, qui vulgatum ad solem referat? Et id tamen falsissimum est. Nunquam vel puer intellexi haec aliter quam ut apostrophe sit ad ipsum triumphum. Et dum tu, *triumphe*, procedis non semel dicemus, *Io Io triumphe*; Ut in *Epo.* ix. *Io triumphe, tu moraris aureos &c.* & *Ovidius*:

Tempora Phoebaea laurum cingentur, Ioque

Miles, Io, magna vocc, triumphe canet.

Extra ordinem unum rogabo, quid intelligas, per *Vestigales*, apud *Sallustium Jugurtha* cap. xcix. ex distinctione *Gruteri*, ubi describit pugnam post captum oppidum *Capſam* inter *Jugurthinos* & *Marianos*: *defessis jam hostibus ac somno captis de improvſo vestigales item cohortium, turmarum, legionum tubicines, simul omnes signa canere*. Et dignum hoc in militia tua doceri. Vale, Vir maxime, & me ama *Hagae a. d. iv. Kal. Novemb. A°.* ciciocxxxvii.

Cum claudere has vellem, commodum intervenit, qui has tradet tibi, juvenis modestus *ὁ γὰρ ἐν ἀμφοτέρω* *Berneggeri* quondam amanuensis. Is una opera humanitatem alloqui honoremque desiderat, quem haud gravatim impartieris.

Responsio ad *Salmasii* Ep. cxiv. & cxvi. qui respondet Ep. cxviii.

EPISTOLA CCCIX.

JOH. FRID. GRONOVII

¹ *Claudio Salmasio.*

Leidam.

Nobilissime Domine. Nisi affectum tuum ex meo animo metirer, & occupationes tuas nossem, non aegre modo ferrem silentium tuum, sed & male de eo suspicarer. Sed quia narravit elegantissimus *Vossius* mihi Foenus tuum ad diem & colophonem spectare, & rerum tuarum aliarum haud dubie satagis, publicis tuisque commodis privatum meum libenter damnum compenso. Interim cum totum tribueris potioribus, id etiam atque etiam oro te & obtestor, ut exiguum dare non desinas memoriae amiculi tui, vel potius *μαθητῆς*, qui nunquam sperat emensurum crassissimam ignorantiae noctem, nisi tuac identidem litterae facem ei extollant. Si nihil aliud, saltem rationem te habere velim promissi tui & detexere telam ad *Horatianum* interpretem institutam. Nunquam puto deprehendisse in me fastidium aliquod hujus gratiae tuae, quin semper immanem sitim & gustum quoque pulcherrimarum tuarum observatum. Quas *Berneggeri* amanuensi dederam, ultimas meas, non dubito redditas esse tibi. Quaesiveram ibi de loco *Sallustii*, & id nunc repeto. Habeo alia, in quibus simile officium desidero: sed nunc onerare te nolo, dum pergamus in *Horatianis*. Mitto autem idoneum fidumque hunc *lytorem* nactus librum *Epistolarum Casauboni*, ut in *Arabicis* per *Hebraicas* litteras exprimendis, quem-

¹ Respondet *Salmasius* Epist. cxviii.

quemadmodum recepisti, nos juves. Tres ex acerrimis obtreſſatoribus tuis
² V. C. H. hîc. exeunte priore hebdomade fuerunt. Multa cum primatibus
 colloquia, & haud dubie aliquid sunt moliti, quod opto in ipſorum recidat
 caput. Nos perſonam noſtram ludere pergitur. Illi quidem *μυνηſκονται ἀ-*
πιſτῆν, ſed unus homo eſt, qui cum ſemper magni me facere penes eos teſte-
 tur, huic vero blandiantur illi, & carere eo nolint, nec niſi amorem noſtri
 ſimulare audent. Itaque mihi ineptas in Statium conjecturas eorum refutare
 licuit; nec de hac libertate verbum: a te vero (credo fortioribus plagis) in
 de uſuris ſaepe vapulare N. narrabat aut querebatur mihi N. Vale, Vir maxi-
 me, & vince malevolorum conatus. Hagae a. d. xvi. Kal. Decembris Anno
 CIOIOCCXXXVII.

Quid ſibi vult quod in nonnullis litteris *Cafauboni* ad *Thuanum* additum eſt
 nomen *Emerii*? quibuſdam etiam in apographis adſcriptum eſſet manu ſe-
 cunda cancellatum? an nomen igitur illuſtriſſimi ejus viri fuit: *Jacobo Auguſto*
Emerio Thvano? Rogo ut ipſum quomodo praefcribi Epistolae primae ad illum
 optime cenſeas (idem enim eidem praeponitur caeteris) mihi ſignifices.

² *Vorſtius Cunaeus & Heinfius.*

EPISTOLA CCCX.

JOH. FRID. GRONOVIVS

¹ *Claudio Salmaſio.*

Leidam.

Nobiliffime Domine. Quod reſponſum eo uſque traxi, donec te monitore
 opus haberem, fecit exemplum humanae fragilitatis, quod his diebus
 communis naturae me admonuit in juvene magnas ſpes promittente, majores-
 que fovenſe, *Franciſco Levio*, cujus erat liber ille MS. de Uſuris, quem ali-
 quando ad te miſi. Is ante octo dies cum menſem tabe correptus jacuiſſet,
 ante oculos miſerae matris turbato mortalitatis ordine extractus eſt. Ego qui
 ſummam cum eo neceſſitudinem coluiſſem, & multa humanitatis officia ab ea
 domo accepiſſem, non potui non & adſidere identidem morituro, & poſtea
 orbatae matri adeſſe frequens, ut aliquot fere integros dies Delphis, ubi habi-
 tabant, agerem. Quod Arabica illa Characteribus expreſſiſti Hebraicis, &
 hanc amicam nobis operam commodavi, magnas ago gratias. Eſſi enim utri-
 uſque linguae juxta cum ignariſſimis ſim peritus, tamen litteras Hebraicas no-
 vi & pingere poſſum, quodque caput eſt, Arabicis typis deſtitutus eſt typogra-
 phus noſter. In iſta quidem olim, quae ad Grammaticam pertinent, mediocri-
 ter addidiceram: ſed cum pene puer ad Cauſſidicinam vocarer, hominum bar-
 barorum impuſus conſiliis id ſtudii, quod nunc paenitet, & ſerum eſt, inſu-
 per habui. Poſtea mei arbitrii factus magno animo ad Graecas tamen Latinas-
 que

¹ Reſponſio ad *Salmaſii* Epist. cxix.

² Vid. Gronovium ad Heinf. Epist. xxxix.

que Litteras relatus sum: in quibus etsi nihil labore meo dignum assequi potuerim, nunquam tamen desperavi, aut abjeci discendi cupidinem. Quam magis magisque tu stimulas doctissimis epistolis tuis. Vel in hac proxima dubium mirerne magis eruditionem an *τῆς ἀριστείας* singularem in illis excutiendis, quae millesimus quisque transit. Itaque noli quaerere, nihil scripsisti, quod non statim mihi totum placeret, quod minimam dubitandi ansam relinqueret. Mirifice vero movit salivam illud *Vep̄ris inborruit*: Certe oportet omni sensu carere Germanae Critices, qui in hac emendatione haesitaret. In Virgilii loco saepe haesi in illo Hemistichio: *Celsis caput urbibus exit*. Quid hīc *caput*, a quo *domus* distinguitur? Sed & in Hesychio probasne illud *παῖδων ἄλεις*. nam de eo non monuisti. Vere etiam in posteriore duobus notas verbis de Praesente divo. Vide autem (fateor enim *ἐκὼν ἀένοντι θυμῷ*) negligentiam meam, qui futilem illam observatiunculam nunquam attente legeram. Credo quia *Φαίνο* apparere est, voluit docere nos pro imperio suo *Φαναί*, esse apparens & sic praesens. De legibus Atticis, verum est in bibliotheca eas asservari, & ipse habui in manibus. Quod vero meo vis officio uti, gaudeo, & libens illud repraesentabo tibi, si paucorum dierum ferre moram potes. Expectant me quothoris Leidae, ubi post plurimas invitationes hodie me adfore promisi. sed intervenerunt negotia, ut ante ineuntem sequentem hebdomadem venire nequeam. Quod si hunc librum illum peterem, aut putarent me promissum fallere & spem adventus mei perdere, aut me juberent adesse & auferre quo opus haberem librum. Vides justissimam causam hujus dilationis. Ubi autem Leidae cum bono Deo ero, nihil obstabit quo minus statim poscam, & etiam cum tibi in manus tradam, idque insciis ipsis. Vale, Vir maxime, & me ama, etiam si fieri potest, paulisper sustine. Hagae a. d. xvi i i. Kal. Januar. Anno c i c i o c x x x v i i i. Cujus felicissimum exordium, felicissimum decursus cum omni domo tua tibi ex intimo affectu precor.

E P I S T O L A CCCXI.

J O H. F R I D. G R O N O V I U S

*Claudio Salmasio.**Leidam.*

HEri tandem absolverunt me molesti illi tricones, qui codicillum quem dixeram, expedire debuerant. Sero itaque in conductum reversus uno die coactus sum expectationem tuam frustrari. Ut potui nihil fuit mihi antiquius quam promissum luere, hoc est, si nescis, mittere ad te legum Atticarum collectanea. quae, tibi curae erit, ne oculos mordeant illorum, qui prodere nos possent. De loco Flori gestio cognoscere judicium tuum, quo conjectura mea stabit cadetve. Illud *sicut erat ad nuncium* indicat festinationem Caesaris intenti, si quisquam olim ducum, ad occasiones & articulum temporum. Ob quod, ni fallor, a Cicerone ad Atticum alicubi *τέρας* nuncupatur.

tur. Ad *nuncium*, ut alibi *ad famam*. pro simulatque nuntius allatus est. Sed haec facile despicias; addidi tamen, ut ego quomodo intelligerem, scires. Proxime pluribus, nunc morari te nolo. Vale, Nobilissime Domine, & me ama. Hagae a. d. Non. Januar. A. c1515cxxxviii.

Velim ut quam primum commodum fuerit tibi, commentario hoc utare, & mihi, antequam restituatur, pervolutandi copia sit.

Responsio ad *Salmasii* cxx. qui respondet Ep. cxxii.

EPISTOLA CCCXII.

JOH. FRID. GRONOVIIUS

¹ Claudio *Salmasio*.

Leidam.

Nobilissime Domine. reversum me excepit, ut solet, maxima negotiorum moles, quae inhibuit ne citius responderem ad tuam *ῥευστὴ ἀντιζήτω* Epistolam. Nec enim respondere volebam, quin una mitterem hanc putidam fortassis Diatribam de ² A. D. in qua describenda decies sum interpellatus. ut vides ex inaequali scriptura. Ocium autem ea res requirebat, ut singula componerem ex Schedis, in quas prout nata erant: facile enim apparet non una die neque tenore uno haec nobis expedita. Expecto igitur ut ad Lydium lapidem & examines, & ubi visum fuerit reprehendas. Neque enim reprehendere potes quemquam, quin doceas, & limpidissima elegantissimarum tuarum observationum *ῥεύματα* effundas. Mihi non taedio erit aliquot impendisse horas etiam ubi falsus fui, si erroribus meis veritatem ex te elicui. De MS. Glossa *cupa* indubitata conjectura tua est. Vere lutulentus fuit noster ille, dum in lutulento Lucilii apud Horatium fluxu Graecitatem suam ostentat. Et correctiuncula tua & explicatio loci Aristophanis mihi plane perplacuit, nec dubitare de iis potest, nisi omnium imperitissimus. *Cupa potare magistra*, omnino probo, & reminiscor dicti quod referunt de juvene, qui cum Dionisium inter vinum maledictis proscidisset, interrogatus a tyranno, respondit: imo nisi lagena defecisset, occidissemus te. Vereor ne inscitum aut adulatorium videatur tibi toties me tantum assentiri. Sed testor fidem meam, ex animi sententia loquor: & *Φορπὸς* imo *Φορπώπαι* Ⓞ esset mihi, qui in talibus peteret advocacyem. *Versus Enni gravitate minores*. Nondum satis intelligo quid velis: & licebat utique Horatio & Satirico ridere quod alii probarent. De hoc ergo, quando placebit tibi, silentium caste & juratus servabo. Vale, quam optime, cum tuis, o unicum *ἰαῦμα* meum, & me ama. Hagae. a. d. xviii. Kal. Febr. A. c1515cxxxviii.

Memineris, cum in Galliam scribes, petere epistolas *Casauboni* ad *Rigaltium*, nisi grave est.

¹ Respondet *Salmasius* Epist. cxxiv.

² *Anre Diem*.

JOH. FRID. GRONOVIIUS

Claudio Salmasio.

Leidam.

ME vero incredibili voluptate affecit doctissima & Accurata epistola tua, Nobilissime Domine, qua & meam conjecturam discutere, & tuam proponere dignatus es. Lecta tamen illa, visus sum mihi invertere posse verum verbum tuum: hoc est visus es elegantius & fortius tuam munivisse opinionem, quam meam confutasse. Non igitur illam culpabo; sed (quod fiat sine offensione magni animi tui, quem si cujusquam mortalium semper mihi adjunctissimum cupio ut qui maxime) quibus mea redarguis, ea paucis aggrediar. Ita sentiebam: *Ante diem III. Kal. Jan.* concisum esse pro *die ante diem tertium ab hoc, quo sunt Kalendae Januarii.* Reprehendis, quod dixeram, *Kalendas* adjungi ad *tertium diem* per Adpositionem. Nam quae ita dicuntur casus etiam sequi in omnibus ejus vocis, cui adponuntur. Sic vero dici quidem *ante diem tertium Kalendas*: sed & *dies tertio Kalendas*. Quidni etiam *dies tertius Kalendas*? ita ponis pro principio eandem esse rationem illius, *a. d. III. Kal. Jan.*: & illius, *die III. Kalendas Jan.* quae ego toto genere differre puto, etsi idem significant. *Die tertio Kalendas* sine adpositione dicitur & per Ellipsin *τῆ ante*, quae Ellipsis locum non habet in altero. *A die tertio Kalendas* recte etiam dicitur *dies tertius Kalendas* in Nominativo, eadem Ellipsi: at *ante diem III.* si pro Nominativo debeat poni, eadem terminatione manet. Nam qui dies est tertius Kalendas vel ante Kalendas, idem est *ante diem tertium Kal.* sine ulla variatione. Quaeris quomodo nunc in hac, quam dixi, adpositione adpositum sequatur casum verbi, cui adponitur? nihil demonstratu facilius: Nam & *tertius dies Kalendae* potest dici, & *tertiaei diei Kalendarum*, & sic deinceps. At ecce puta me pro pridie Kal. Februarias scribere: *hodie Amsterodami manebo, cras Leidae: dies tertius Kalendae reducet me Hagam.* Sic in Genitivo: *Primo actionis die, hoc III. Kal. Febr. negotium bene processit*; item altero; *tertiaei diei Kalendarum Febr.* semper meminero, ita alia tum omnia atque putarent evenerunt. Et sic per omnes casus. At in ablativo, cum adpositio est, *tertio die Kalendis*, ipse Kalendarum dies significatur: cum vero dicitur, *tertio die Kalendas*, intelligitur tertius ante Kalendas. Denique in illo: *ante diem tertium Kalendas*, prout ego explico, primus dies hujus numeri intelligitur ipse, qui sic vocatur, tertius vero ipsae Kalendae: at in illo *die tertio Kal.* incipit numeratio a die Kalendarum, isque primus est, qui sic dicitur, *tertius*. Negas dein subaudiri posse *die*: idque confirmas, quod sic etiam subaudiendum esset verbum *die* in illo *die tertio Kal.* dicereturque integrum ridicule: *die die tertio Kal.* Ad hanc ἐννοίαν similis responsio est, nempe duas illas locutiones habere quidem voces quasdam & significationem communem, sed ratio-

tionem esse diversissimas. Jam vero subaudiri debere τὸ die argumento, ut adhuc existimo, apodictico vincam. Scis multas esse orationes infinitas, quae quia unam vocem, seu partem cui accedit casus, ut loquuntur technographi, circumscribunt, in omni casu fere quem adjunctum verbum requirit, sine variatione ponuntur. Qualia sunt: *a pedibus, ab Epistolis, ad Cyathos, pro Praetore, supra velarios, unde petitur.* Et innumera ejusmodi. Sub hanc seriem pertinet illud: *ante diem tertium Kal.* quod non dico in omni casu, sed certe in Nominativo, Accusativo, Ablativo reperitur. Non enim negabis latine dici: *duplici clade insignis dies est a. d. xv. Kal. Sextiles.* Hic nominativus est. In accusativo ut apud Gellium: *ante d. iv. Kalend. vitant, ut ominalem.* In ablativo: *accepi tuas a. d. iiii. Kal.* diceretur enim alias. *die tertio Kal.* Si mihi potes ullum exemplum dare orationis istiusmodi, in qua non intelligatur casus nominis, vel saltem articuli (hujus enim defectus obscuritatem gignit: quae apud Graecos non est, nam hi articulum omisso nomine praeponunt) viceris. Nam cum dico, *a pedibus, ad Cyathos, subaudio, servus, aut simile. Pro Praetore, pro Consule,* intelligo, *praefectus vel regens pro Praetore, pro Consule. Unde petitur, scilicet, reus vel pars litigans.* Cum ergo *ante diem iiii. Kal.* Nominativi vi ponitur, subintelligendum est τὸ dies; ut *Dies a. d. xv. Kal. est dies insignis duplici clade.* Cum Accusativi, τὸ diem, ut *diem a. d. iv. Kal. vitant ut diem ominalem.* Cum in ablativo τὸ die, ut ubique. Jam alterum argumentum accipe. Dixeram, male viros doctos una voce legere *in ante diem iiii. Kalend.* Idque ideo, quod inter *in* & *ante* alia vox, nempe *diem* subaudienda sit. Tu conclusionem largiris mihi, argumentum, quo concludebam, tollis, falsumque ais esse. Nunc ergo ex conclusione argumentabor ad assertionem antecedentis; adeo haec duo mihi cohaerere videntur. *In ante diem iiii. Kal.* idem est quod *in diem tertium Kal.* & *ex ante diem tert. Kal.* est idem quod *ex die tertio Kal.* Potesne vero ullum exemplum dare mihi orationis, in qua praepositiones duae conjunguntur, & se mutuo videantur regere, ut non subintelligatur intermedium nomen? Ego certe nullum memini. Dicis hujus locutionis eandem rationem esse debere, quam in *pridie & postridie Kalendas.* Ego vero haec non subterfugio: sed imo ut dicitur *dies tertius Kalendas,* ita ubi haec vox non exprimitur, ibi intelligitur, quasi scriptum esset: *dies pridie Kalendas & die tertio Kalend.* ita integre accipio: *die pridie Kalend.* Cum enim Cicero dicit: *Exspectabo te in Forniario duntaxat ad pridie Nonas:* an inter *ad* & *pridie* non subaudies *diem*? Ego certe, nec hoc mihi quisquam eripiet: nisi qui ostenderit praepositionem vel particulam ab alia praepositione regi sine subintellecto casu nominis. Denique ais, *nunquam diem tertium post Kalendas ipsis Kalendis nominarunt post tertium diem Kalendas,* sed semper *ante diem tertium Nonas.* Atqui si *diem ante d. xix. Kal. Febr.* licuit dicere: *post diem tertium Idus Jan.* cur non illud: *post diem iiii. Kalend.* Dein expressum ejus rei exemplum est in l. 233. §. 1. D. de V. S. ubi sic ait JC. *Post Kalendas Januarias die tertio pro salute principis vota suscipiuntur.* Notum vero id esse factum a. d. iiii. Nonas. Velim te haec ad obrussam applicare: haec enim aequè

dubius sum, licet alias minime pertinax in somniis meis defendendis. Quare & ista ut dubia accipere te cupio, quae me exercent, non ut argumenta tuae sententiae refutandae. Nec hanc libertatem usurparem, nisi jussu tuo. In Epigrammate risi satis. Utinam migrare posses morem tuum, & hoc saltem concederes pullatae plebis, in quo ordine me ipsum trado, consuetudini! Vides enim non deesse falem qui multorum oculos urat. Duo tamen postrema disticha non intellexisse me fateor. Vale, Vir maxime, & me ama qui te sine pari venëror. Hagae a. d. vi. Kal. Febr. A. cio io cxxxviii.

Respondet *Salmasius* Epist. cxxv. quae ultima est ex editis.

EPISTOLA CCCXIV.

JOH. FRID. GRONOVIIUS

Claudio Salmasio.

Leidam.

Nobilissime Domine. Quod paulo occupatior hos aliquot dies essem, ferius ad gratissimas tuas respondeo. Nescio vero quid in prioribus exciderit mihi, ut suspicari offensus me libertate obelorum tuorum. Non sum offensus, non per fidem: quamvis sententiam tibi meam probari initio maluissem. Neque enim adeo *μελωτής* aut *αὐθαδής* sum, ut omnia persuadere velim omnibus; ne dum tibi oculatiori, quam ut fucum facere audeam tibi vel in minutissimis. Quod & scio & confiteor, & in laudibus tuis ferre apud amicos soleo. Egone igitur irascerer tibi? cui? quis? cur vero tandem? an quod docere me & quarumdam vanarum, ut existimabas, opinionum sentes evellere pectore meo, quod meliore fruge confereres, fueras conatus? Non ita obliviscar mei, non absurda adeo gestabit pectora cliens tuus. Si tenax meorum errorum defensor essem, & revincerer, succenserem fortassis, & sine arte aut lege luctae repugnarem, nec concederem more illorum, quos pudet homines deprehendi. His vero quomodo poteram similis esse, quamdiu esse putarem abunde mihi, quod tuis objectionibus responderem? Nec enim convictus tantisper, sed confirmator redditus forem. Ego vero facilis & *δευρ* non amo qui vincit, sed qui succumbere nolit: disputavi autem non quasi brachiis niterer contra torrentem, & indignatus a te in viam reduci (testor iterum fidem) sed quod ita crederem & sentire verum me arbitrarer. Atque erravi in hoc fortasse: judicium enim modo requirebam tuum: idque sufficere mihi debuerat, etsi ejus nonnulla non caperem, forte iterata lectio & volvenda dies id mihi approbasset. Quare libens herbam porrigo tibi & deludia posco prior, ut ex his tricis & argutiis exeamus. Tu quidem, nisi grave est, repete Horatianum pensum: ego vero alia alias, nunc quasdam conjecturas ad Thebaïda Statii mei apud te proferam, non alia expectatione, quam ut liberrimi monitoris hîc quoque mihi officium praestes. Lib. iv. vs. 49.

Jun-

¹ Hinc deficient *Salmasii* Epistolae, quibus respondit Gronovianis, quas obtinere non potui ab illis, quos eas possidere noveram.

*Junguntur memores transmissi ab origine reges,
Qui Drepani scopulos & oliviferae Sicyonis
Culta ferunt.*

Ita omnes Edit. & Scripti Codices. Qui vero *reges* illi? puto legendum esse *regis* id est Adraſti, quem Achaia & ſingulariter Sicyon Argis dederant. Lib.

11. *Quis te ſolio Sicyonis avitae Excitum in fraenos compeſcere legibus Argos Neſciat?* Lib. 1v. vſ. 57.

Seu Thracum vertere domos, ſeu teſta Mycenis.

Impia Cadmaeumve Larem.

Scribendum puto *Myccenes* pro Mycenarum. Ita enim Homerus, Statius, Silius, alii. vſ. 167. *erepta Juvencis terga.* perſpicuum mendum eſſe puto pro *derepta.* vſ. 176. *galeaeque coruſca prominet arce gigas.* An *galeae arcem* legiſti? Ego non memini, & interim ſcribam: *galeaeque coruſco prominet aere gigas.* Ut ſupra de alio: *capiti tremiſt aerea caſſis.* vſ. 183.

— — *hic fretus doctas anteire canendo*

Aonidas, multos Thamiris damnatus in annos,

Ore ſimul citharaque (quis obvia numina temnat?)

Conticuit.

Scribendum: *mutos.* Sic eleganter dixit vitam ſine cantu. In ea voce & olim Apuleium correximus in Floridis, ubi *multorum animalium ſonores* pro *mutorum* & Valerium Catonem; *muta prius fuerit, quam non mea libera Muſa.* Quod tamen vix perſuaſiſſem Satiricorum minorum editori, niſi ille, qui te nuper cecinit, ita ſibi quoque ante probatum affirmaveſſet. Vale, primarium decus meum, & me ama Hagae. a. d. 1v. Non. Februar. A. c1c1ccxxxviii. Miror in *Caſaubonianis* Epiſtolis nullas comparere ad τὸν πᾶν, Socerum tuum. Rogo, ut ſi illarum nanciſcendarum ulla ſit copia, hanc utrique operam naves, quo eae ad nos veniant. Nec de illis ad *Nic. Rigaltium* velim te obliviſci.

EPISTOLA CCCXV.

JOH. FRID. GRONOVIVS

Claudio Salmaſio.

Leidam.

Nobiliffime Domine. Ingenti me pudore ſuffudit Reverendus Dominus *Rivet*, poſtquam epiſtolam tuam a me delatam legerat. Narrabat enim nunciante invaletudinem ſuam eo te non credidiſſe, quod ego in meis de illa nihil ſcripiſſem. At ego laevus, qui tot nugis ſaepe onerare te ſoleo, de periculo amiciffimi tibi capitis monere neglexeram: ſive quia in remiſſione erat morbus, ſive quia ab ipſo ſub primum tenorem edoctum te de ea re eſſe cogitabam. Quare ſero quid officii fuiſſet mei recordatus, non deſtiti petere a venerando viro, priuſquam ſtatim ſe reſponſurum ad tuas promitteret mihi, idque ipſum reſponſum ad me miſſurum. Quod hinc habes, ſic ut opus non

Cccc 3

ſic

sit me quicquam addere, nisi quod in dies major spes appareat, quando & febricula emanfit, ut aures defluxu catharri obturati paullatim usum recipiunt. Congressum vestrum illum miror. Iste nihil scire in Politicis, neque vertisse Aristotelem, neque minari regnum (ut loquitur) posse suum in examinando *Balsaci* principe se putaret, nisi tam pulchris involucris nigrum celare didicisset animum. sed quid si metus homini injectus esset, & parcere in posterum constituisset tibi, ut tu scripta ejus omitteres? Non audeo tamen hoc suspicari, cum cogito quantum quisque de se sentiat, quantum se scire opinetur qui multa nescire profiteatur, quantum denique famae incumbat. Vellem tamen fieri posse ut ad sanitatem rediret, nec semper lateat anguis in herba. De Theocrito post Flaccum placet omnino conditio, nec omittam te quin promissa, quod tamen commodo fiat tuo, ut repraesententur, appellem. De Epistolis *Casauboni*, gratum est quod dubitationem mihi sustulisti. Nunc morari te non audeo, qui scio absolutum fortassis nunc ipsum (quod absolutum ex animo tibi & Reipublicae gratulor literariae) opus tuum vindicare tempora tua. Vale, vir maxime, & me ama. Hagae a. d. viii. Id. Febr. Anno CIOIOXXXVIII.

EPISTOLA CCCXVI.

JOH. FRID. GRONOVIIUS

Claudio Salmasio.

Leidam.

Nobilissime Domine. Quia Heusdanus ille morabatur responsum, aliam ingressus sum viam, scripsi ad amiculum quendam, Ultrajecti commorantem, ut quacunque ratione manum illius sibi compararet. Is continuo album suum ad τ δέῖνα detulit, quod hac ipsa hora mihi redditum ad te mitto, poterisque eo ad satietatem uti. Quo magis scripturam illam inspicio, eo magis admiror εὐχαρίαν tuam, vir maxime, quae non tantum in literis aut quocunque doctrinae genere omnia διωξερέυνηται tibi facit pervia, sed & tantum adjumentum est ad vitae prudentiam & distinguendum amicorum nomen. Si quippiam reminiscor, plane hi sunt isti apices, quales in inscriptione comparent. Mihi vero & nuper admodum alia suspicandi ansa praebita est. Quaesivi ex *Heilerfichio* praeceptore principis, cui nihil solet habere secretum amicus ille tuus; numquid vidisset epistolam istam. Respondit se non vidisse: sed de ea ex sermonibus ejus cognovisse. filui illico, & cogitavi nihil aliud causae esse, quam quod ille juvenis aliquandiu haesit Ultrajecti, & *Voetium* familiariter novit. Quod cum sciret ille, veritus ne fraudem deprehenderet, ostendendo abstinuit. Multum tibi debeo, quod enarrasti mihi declamatiunculam jejuni senecionis & historiam simul conflictus tui cum illo, quem ut unicum Ecclesiasticae Antiquitatis ταμείον nunc ibi miratur vulgus. miseret me in-

infelicitatis saeculi, quod adversus apertam veritatem tam pertinaciter oculos claudit. Sed hoc est illud, quod semper magni viri sunt conquesti, nec tibi adeo novum accidit. Spero tamen, ubi deferbuerit paululum recens haec tempestas, pudorem eos habituros, praesertim si conquiescent flabra illa, quae in suis latebris tam sagaciter deprehendis. De loco Ausonii cognosce quid mihi evenit. Eopse die quo ad te scripseram venit ad me *Graswinckelius*, & affert missas ad se a *Scriverio*² paginas, quae erant excusae ut illas inspiceret, patereturque suo nomini eum librum inscribi. Percurri avide, incidi in locum illum, & paenituit me conijcere esse ausum. Tantum vero abest, ut ille in verissima emendatione tua conquieverit, ut non modo suas aliquot nugacissimas conjecturas protulerit: verum etiam ausus sit *Boxhornii* quandam addita ingenii laude cum hac tua comparare, recensere certe. Itaque non mentitus est ille, qui narraverat mihi disputatum inter illos eo de loco fuisse. Sed de tota illa scriptione expecto judicium tuum, ubi prodierit: O miserum senem vel miserum potius ocium, quod sic excrucietur. Scripseram tibi monuisse me virum illum optimum, quod librum Galilaei stigmatem nominis *Queriani* inussit. Id quomodo ille acceperit, agnosces, si manum agnoscis, ex inclusa schedula: quam nisi grave est, cum rescribes, inclusam tuae remittes. Vale, unicum *Θάυμα* meum, & sapientis saeculi, & me ama. Scripsi raptissime, ne tuos oculos morarer, Hagae prid. Non. Maji A°. c1515cxxxviii.

² Intelligit *Baudii* amores, qui inscripti sunt *Th. Graswinckelio*: & ubi in notis *Scriverii* ad Ausonii Cupidinem p. 492. *Boxhornii* acerrimi conjectura festiva post *Salmasianam* proponitur, quo respicere hic *Gronovium* puto.

EPISTOLA CCCXVII.

JOH. FRID. GRONOVIVS

*Claudio Salmasio.**Leidam.*

Nobilissime Domine; Dum quot diebus hîc affuturum te speramus, scriptionem distuli, quandoquidem ipse in extrema epistola tua quaedam ad sermones *σὺν αὐτῷ σόφῳ* rejeceras: tandem laesisse te nescio quo casu pedem, & Museo alligari. Precor Deum immortalem, ut non animi modo vires tibi conservet integras, sed & tanti hospitis *ξενῶνα* corpus sanum & salvum in Nestoreos annos tibi largiatur, hoc etiam quicquid molestiae est sine cicatrice debeat, quo utroque ad ipsius gloriam & Reip. Literariae grande incrementum commodissime & diutissime utaris. De libro tuo, miror unde tam laeva mens cuiquam mortalium, nedum istius professionis, & quem tanto merito devinxeris (inaudivi enim aliquid) ut ultro sine mercede malus & ingratus esse cupiat. Certe ipsi hostes tui, quorum oculos malignos & nigrum pectus & decora tua, & quod nihili eos te facere ostendis, sauciant exasperantque, res ipsas solidas & copiosissimam doctrinam ingratis, si non depraedicant, ta-

men

men fatentur. Nam prolixitatem, ut appellant, carpere ignavorum partim ventosorumque ingeniorum est, quae laborem lectionemque multam aspernantur, fere autem ex indicibus sapiunt, cujusmodi multos hîc novi, partim illorum, qui uber illud & fructu refertissimum scribendi genus, quo aspirare potuerunt, nunquam improbant: sed conceptis hinc inde notularum frustis (ut ita loquar) ad singulas periodos aucupantur plausum. Mihi quidem nihil tuorum satis est longum, qui certus sum, quo plures implebis paginas, eo docturum plura: Nec inficiabimur hanc laudem tibi omnes boni & discendi cupidi, ut quae imitari per tenuitatem nostram moremve insitum (nam de aliis iudicium ferre non est meum) nescimus, ea in te admirari & amare nolumus. Quae sequuntur in epistola tua, mirifice animum mihi commoverunt. Nemini jurato id credidissem: tibi experto credo invitus, quia sic esse nollem, & demiror unde tanta prudentiae fama aut quomodo vivere in tali domo & potuerit olim & nunc possit. Tibi vero gratias ago, qui tanti arcani me fecisti participem. Cautior ero in posterum, & uti hoc tu fidei meae commisisti, sancte id servaturum polliceor. Cum otii paululum erit tibi, velim absolvere pergas Horatium & progredi ad alia ejusmodi, Theocritum primo, quando liberaliter satis cupido & memori ita promisisti. Addam levissimum unum, ut exprimam meliora tua. lib. 1. sat. vi. vs. 53. *felicem dicere non hoc me possum casu.* paratragaediatur in hoc loco & magni quid se praestare putat, quod scribit, *non hic.* Puerile est non videre, τὸ hoc minime conjungendum esse cum τῷ casu. *felicem hoc, quod te sortitus sum amicum, non possum casu me dicere.* Sic supra: *hoc tibi Paullus & Messala videris.* Vale, vir maxime & me ama. a. d. 111. Eid. Mart. A. c1010cxxxviii. Hagae.

EPISTOLA CCCXVIII.

JOH. FRID. GRONOVII

Claudio Salmasio.

Leidam.

CUM praeter opinionem longius detinuisset me prolixa humanitas magni & optimi viri, res exigit, ut postquam gratissimis vinculis sum exsolutus, continuato itinere ad gurgustiolum meum redirem. In quo nihil magis dividiae mihi fuit, quam quod videre te, vir maxime, ac servire tibi in perferendis libellis concessum mihi non fuit. Quod potui tamen summis precibus ab *Isaaco* contendere, ut expectationem tuam ne moraretur. Ac fortassis ille jam misit, sin, scito Stobaeum MSC. cujus quandam contulerat *Dionysius* ὁ μακαρίτης cum diu quaestioni fuisset, reperiri nequivisse. Aderat tamen *Epictetus*, *Scaligeri* olim κτῆμα, & ἐκλογαὶ quaedam Stobaei, quibus posse te uti opinabamur. Dum ibi haesi, obiter inspexi Codinum, qui libro Anglicano, quem *Isaaco* utendum dederas, erat insertus. Miratus sum integras in eo paginas haberi, quae in edito non comparerent, praecipue vero, quod longe
alius

alius libri ipsius esset, & auctior finis, si inspexisti, aveo scire iudicium tuum: sin: rogo, ubi receperis, tantum ocii gravissimis detrahas occupationibus tuis, ut recognoscere & me desiderii compotire digneris. *Graswinckelius* noster te salutat plurimum, & magnopere sibi in affectu tuo gratulatur. Librum, quem vides, dedit mihi ut ad te curarem, si forte usui esse posset tibi in illa materia, quam nunc versas. Ait se communicasse tecum consilium suum scribendi de protectione: enarrasse etiam descriptionem operis, ut animo illam conceperit: petitque ut quid videatur tibi, quae conferre ad hoc institutum velis, significare ne graveris. Audivisse se ex Clarissimo *Rivetio*, difficilem tibi, quando Bibliotheca publica velis uti, esse ejus praefectum, teque majoris esse animi, quam ut eas molestias perferre possis. Rogat ergo, sicubi sit quod ex ea desideres, velis id vel mihi vel ipsi indicare. se curaturum, ut sine ulla mora aut suspicione nanciscamur, & ad te destinemus. Prorsus est vir animi in amicos proni, & qui nullis officiis, quae grata esse noverit, parcat. Hoc in aurem dicam tibi, Vir maxime, quando soli sumus: famae paullo cupidior est, & dum omnibus patet, multa facit obiter, ac est dissolutus. Loquor ut soliti veteres, negligens volui dicere, si sic satis ea vox exprimitur, (ociosus enim nunquam est) & non satis distinguit ordines officiorum. Quem vero perfectum invenias, aut cui non aliquid adsit vanitatis? Ego quum parum in publico vixi, & rerum humanarum peritus sum, facile hoc vitii condonare possum; modo malignitas absit & arrogantia intolerabilis. Cum ad hanc partem respondebis, velim, nisi grave est, stilum sic temperes, ut praelegere eam illi possim. Quando revertemur ad Horatium? Ego certe, si moraberis, mox ipse eum resumam; & obtundam te nugis, si alio pretio verum elicere non possum. Vale, Unicum decus nostrum & me ama. Hagae iv. Non. April. A°. c1515 cxxxviii.

EPISTOLA CCCXIX.

JOH. FRID. GRONOVIIUS

*Claudio Salmasio.**Leidam.*

Nobilissime Domine, *Graswinckelius*, etsi maluisset subsidiis tuis conatus suos adjuvari; tamen & in iudicio tuo triumphat, & gravissimas occupationes tuas libens reveretur. Rogat, ne ulla in re operae ejus aut officiis parcas: Et ipse recipio tibi sincerissimo cum animo facere quicquid tibi offert. Vellet si memoriae etiamnum sunt tibi sermones tunc inter vos habiti, significare te, quid de ipso ordine & descriptione operis, quam enarravit tibi, sentias. Vidi (& haud dubio turba vidit) epistolam furoris plenam scriptam a Satageo Ultrajectino ad amicum tuum. Miratus sum singularem temeritatem hominis prorsus infruniti, qui tanto cum supercilio audet de opere, ut ipse fatetur, inviso pronunciare ineptissimum iudicium. Et allegat auctoritatem

Tom. II.

Dddd

col-

collegae sui, qui quidem summos plausus in dies de Cathedra inter cirratos excitat. Caeterum novi nihil sapere supra scholam, & ne minimam quidem partem admirandi illius scripti capere. Ei sacrilegium committit, qui dicit Tribonianum alicubi in compilatione juris errasse. Ex uno disce omnia. Nam hoc etiam lepidum, quod iste Ardelio allegat theses suas magnis plaulibus (at quorum?) exceptas. Itaque expectabam an juberet te inter adolescentes auditores suos confidere, & ea scribere, quae tantus magister dictaret. Miseror vicem tuam, Vir maxime, si cum ejusmodi mortalibus res futura tibi est. Nam quos haecenus adversarios habuisti, etsi malignissimi essent, non tamen adeo erant stupidi, ut cum in paucis habere se putarent, quo tibi insultarent, de pluribus tamen non concederent, & silentio aut transcurso convictos se faterentur. Crede mihi, isti hoc facient nunquam, si mappa missa fuerit. Nihil intelligent, nihil intactum praetermittent, immanibusque voluminibus bibliopolia implebunt, tempora tua, quae melius collocari poterant, misere excruciant. Itaque etsi consilio meo non indigeas, & profecto ne deceat quidem me consilium tibi dare; tamen *κέλεται με θυμὸς*, optem ita te stilum temperare in posteriore parte, ne omnino eos contemnere videare. Ignosce, vir maxime, sollicitudini meae: pecco sciens & invitus: sed jubet insita *καὶ ἐρρίσσωμεν* mea erga te observantia, quam simul cum spiritum dimittam, non ante: ita sit mihi mens sana in corpore sano. Nec enim levis haec res est, aut quam oculis connivis transeant alii inimici tui. Adde quod non unum aut alterum habebis, qui occentabunt tibi, sed greges advolabunt & pecora imperitissima, & quicumque volent se commendare magistris ad famelicam aliquam stationem in illo ordine nanciscendam, quaestionem istam agitabunt. Talis ista Natio, ista secta est. sed de hoc tu videbis, vir divine, & mihi insolitam hanc libertatem condonabis. Haec scribentem interpellavit ¹ cognatus & popularis meus, juvenis pereruditus, quicum fortassis propediem coram te salutavero. Is a longo tempore non visus mihi, dum Basileae, Genevae, Aureliae aliisque in Galliarum urbibus peregrinatur & nunc ex patria urbe recens, varia, quorum avidissimus eram, narrando integrum hoc biduum vacillas aures meas tenuit, & nunc vix finit ad hoc intermissum officium reverti. Quae ad Horatium notas, pepo sim, si verbum in iis ullum mihi displicuerit. Nec dubito quin geminum germanum sit, ² *splendide*. Quae mox laudat in Torquato, sunt ea ipsa, quibus ut plurimum splendor a Latinis tribuitur, ut *λαμπρότης* a Graecis. Prorsus nihil est, cur huic indubitandum, aut locus ullus relinquendus *splendidis illis arbitriis*. Itaque hoc quoque nomine gratias tibi ago, & hoc novo gustu sitim meam denuo accensam fateor. Vale, primum seculi decus & me ama, qui te sine pari observo aeternumque observabo. Hagae. a. d. xv. Kal. Majas. Anno cio io cxxxviii.

¹ Vide Epistol. Gronov. ad Heins. xlvi. intelligi vero credo Joachimum Hagmejerum. de quo ad Gronovii Ep. lxi. actum.

² Quod legisse Salmasium hinc discimus in Horatium iv. Od. vii. 21.

EPISTOLA CCCXX.

JOH. FRID. GRONOVIIUS

*Claudio Salmasio.**Leidam.*

Nobilissime Domine. Speraveram facilius fore mihi invenire manum illius ' terrae filii ac nunc re ipsa experior. Omnes excussi angulos, omnes adii, quos ex sermonibus antehac cognoveram unice illum admirari. Nihil reperi quod tibi satisfacere posset. Una spes restat, quam tentavi, cujus propediem videro effectum. Est Heusdae rector scholae homo Germanus, nomine *Theodorus Simon*. Is non ita pridem hîc fuit, meque ut popularem nosse concupivit. Ostendebat autem librum Theologicum scriptum, & nunc Leidae operas fatigantem contra *Jansenium* Episcopum ni fallor. Quem librum cum isti aliisque Theologis dedicaverit, non dubito litteras aliquas penes illum esse. Scripsi ad eum per ordinarias vecturas die Lunae praeterito, & nunc exspecto in dies responsum. Audi nunc aliam fabellam lepidam. Erasmus in convivio nuper apud magnatem quendam: N. & alii. Ille cum multa magnifica de opere quod sub manu habet praedicaret & elevaret auctoritatem magni² Editoris Genevensis, audiebat ex quodam: Quid vero si mox idem eveniat tibi, quod tu nunc facis illi: & praesto sit, qui commentationes tuas refutet? suscipiebat ille: ego de hoc sum securus, & neminem metuo: nam qui id maxime est minatus, eo redigitur cum maxime ut liber ejus de usuris factus sit fabula e suggestu concionantium. N. postea narrabat mihi causam huic responso dedisse virum alias mansuetissimum & a litigiis intempestivis aversum P. Item narrabat nuper apud *Boxhornium* praesente se actum a *Scriverio* esse de verbis Aufonii in cupidine crucifixo:

*Fulmineos Semele decepta puerpera partus
Deflet, & ambustas lacerans per inania cunas,
Ventilat ignavum simulati fulminis ignem.*

Varieque illos conjecisse. Dicebam dudum visum mihi scribendum: *jaetans per inania cunas*. hoc enim requirit τὸ *ventilat*. tibi quid videtur? sed in Mosella vs. 32. *& bivio refluxus munimine pontus*. Quid illud *bivium munimen*? neque enim intelligo, nec aliud excogitare possum quod placeat. In aliquot Epistolis *Casauboni* ad *Scaligerum* mentio *Pseudogorionidae*, qui nescio ubi quaedam

Dddd 2

ex

¹ *Gisbertum Voetium* intelligi puto, qui contra *Salmasium* insurrexit, propter rem foenebrem & trapeziticam. ille vero cum Heusdae olim pastorem egisset, ejus Autographum & manum hac via consequi voluit *Gronovius*. liber vero *Simonis* titulum praefert de *statu & religione propria contra Jansenium* Leidae hoc anno editus in 8°. Quis qualisve fuerit hic *Simon* ignoro, nisi quod ex libro, qui sub ejusdem nomine laudatur a *Lypenio* videatur a Lutheranis transiisse ad Pontificios, & deinde rediisse ad priorem sectam. nam titulus est *Th. Simonis retractatio causarum propter quas a Pontificiis ad Lutheranos iterum* (vel denuo) *transiit* A 1630. si vero idem sit, a Lutheranis ad nostros transfugisse debuit, & Heusdanae scholae praefecturam obtinuisse.

² *Th. Bezae*.

ex Callisthene de Vita Alexandri alleget. Quis ille sit, nostin? simul responsum habuero Heufda, faciam te ut scias. Vale, Vir maxime, & me ama. Hagae prid. Kal. Majas. A. CIO IO CXXXVIII.

EPISTOLA CCCXXI.

JOH. FRID. GRONOVIVS

*Claudio Salmasio.**Leidam.*

NE vero assem posce tibi pro tam lepida ac inaudita fabella, Vir Nobilissime, sed aureum, sed mercedem quantam vis. Quamquam me magis etiam duplex *Ἰπποθίων* delectat: habet enim exemplum confirmatae tuae ac certissimae opinionis de utroque prorsus palpabile. O facinora! o flagitia! Quid illo laudatore sui ineptius? quando tanta vanitas luculentius patuit? quid est herbam parietariam non fieri aut arte quadam moliri ut fias, sed ultro se facere & palam luce clara, si hoc non est? De ambitione hominis profunda atque insatiabili nunquam dubitavi: sed tam *ἀφελῶς καὶ ἀκαίρως* eam publicare nescio sitne incuriae ac stolidae fiduciae, quod neminem inquisitum ipsumque authorem mussaturum credidit, an roboratae ac summae *κακότητος*, quae ad extremum infamia ac turpitudine gaudet, an denique *θηλάτῃ πνὸς μανίας*, quae artificia quibus famam & opiniones hominum invasit, sic sero punire debuit. Quid autem de monitore illo dicam, qui toties *ἐπ' αὐτοφώρῳ* deprehensus nondum bona fide poenitentiam toties professus emendat? Et tamen ut saepe succensui, cum secreta tua prodita agnoscerem; ita jam nimio libens ei ignosco, efficienti ut sentiret alter patere vulnera sua, manifestiusque teneatur, & extricando acrius se irretiret. Ago itaque maximas tibi gratias, quod & historiam istam communicasti mecum adeo raram & chartam ista parte aureis conscribellandam litteris. Erit hoc apud me duraturum monumentum candoris, modestiae, sapientiae ejus, qui nihil in vita excusandum habet. Proximas ad te meas recte curatas opinor. Magno sum in metu, quoties apud te, Vir maxime, prisca libertate ex animi sententia garrio. Nullo enim praetio vellem Schedion aliquando tale meum in scelestas incidere manus. Qui ista audent, quomodo familiari epistolae parcerent? signum immo curarent tantum, quantum aut numerum Lupus, aut discursus Editor oculos auctoris: Et prope est, cum eorum indigebo gratia, quando cis paucas tempestates ibi doctorale birretum petere constitui. Quod me paene apud te profiteri pudet, qui me credo, juris peritum malles, quam doctorem, qualia nunc corpora producunt Academiae. Ipseque averissimus sum a stultitia illorum, qui istiusmodi titulis dignitatem suam metiuntur. sed Hamburgenses mei, supra quos sapere mihi non licet, nisi infeliciter nato, hoc postulant, flagitant: me revocant, & videre dedignantur, nisi cum isto candidato nomine. Itaque jam dudum in tricis apinisque molestissimis exerceor. Nam cordate jus civile tra-

cta-

etare, quod decebat & pro captu meo institueram, non permittit nunc mihi brevitatis temporis: ne dicam nulli usui fore mihi apud magistros, si quid sciam praeter caeteros, cum ipsis quisque eo doctior, quo magis communium opinionum: Igitur de eo alias cogitabo. De Epistola Advocati Hagienfis nihil dum potui subodorare. Quin erat amicus, qui rogatus super ea re, quomodo potest, aiebat, ex omni grege nostro vix tres novi, qui theoriae seriam operam impenderunt, ii vero aut amici tui sunt, aut certe, etiam familiariter non noti observantes. Nec ὁ δῖωνος noster ὁ ῥήτορ interea hinc fuit, saltem me non vidit: ut cognoscerem quod monstrum in libro tuo e lectulo suo fuisset speculatus. Etsi vero nunc non tam legum, quam legulejorum aenigmata evolvam, vaco tamen Horatianis tuis. An placet illud lib. i. od. vi. *praelia virginum sectis in juvenes unguibus acrium*: Qui dicunt, sectos ungues esse acriores, eos alium sensum habere oportet ac me. Neque allubescit acumen eorum, qui volunt ideo *sectis*, quia pugnent non laesurae, tanquam quae vincere nolint. Notum est enim ex amatoriis scriptoribus, luctas istiusmodi irasque amantium veras notas impressisse. Quare an non potius: *sectos in juvenes*: Nescio cur noster ille lib. i. sat. ii. *Sententia dia Catonis*, *sententiam* mentem ac rationem interpretetur. Quin simpliciter, ut *sententiam* rogari & dicere & ferre dicimus, Catonis, inquit, *sententia* etiam laudabatur ille, qui in lupanar descendisset. Taciti verba sunt lib. xvi. ann. c. 24. *Eos codicillos Nero properanter accepit, spe exterritum Thraseam sensisse, per quae claritudinem principis extolleret, suamque famam debonestaret*. Ita legebatur olim. Lipsius pro *sensisse* coniecit *scripsisse*. Id in textum recepit, & secutus eum optimus noster Berneggerus, meo iudicio pessime. *Sententiae, sensus* propria sunt Rhetorum verba, & proinde omnium, qui orationem componunt. Sic Tacitus lib. xv. *ipsa retuli verba, quia non ut Senecae vulgata erant*. Nec minus nosci decebat *militaris viri sensus incompertos sed validos*. Quasi ergo diceret, exterritum Thraseam ejusmodi sensibus codicillos adornasse & composuisse, τὸ *sensisse* accipiendum. Saepe ita Cicero. & quis non? Igitur illi quidem in re levi errarunt, sed tu non eras mihi in re tam levi detinendus, Vir maxime; Vale igitur, & fac promissa appareant. Hagae a. d. viii. Eid. Jul. A. ciccxxxviii.

EPISTOLA CCCXXII.

JOH. FRID. GRONOVIIUS

Claudio Salmasio.

Leidam.

DUm uni alterive amicorum operam do, effluxerunt aliquot dies mihi & caeterorum & mei incuria. Accesserat optimus *Peiraredus*, in quo cum alia sum miratus; tum quod sua poemata & observationes criticas legendo, si patientes nancisceretur aures, totum diem non delassaretur. Is nuper in castra abiit, sed ne tu, Nobilissime Domine, putes vacivas tibi aures eum etiam ab-

Dddd 3

scn-

sentem relinquere, tradidit hoc mihi carmen, quod ad te mitterem. Imposuit etiam hoc negotii, ut epigramma, quod libro ejus praefigendum ipsi promiseras, si vacares forte, te poscerem. Sperat enim impensio- rem fore illum laudationibus, quam supplementis Virgilianis, emblematis & hujusmodi caeteris. Atque hoc quando expedivi, ingenue fateor tibi & insolens & dividiae mihi esse, quod tantum temporis sine venula aliqua ex humanitatis doctrinaeque tuae uberrimo fonte in me derivata abire passus sum. Recte aestimanti id omne periit, nisi tu morae hujus gratuitam usuram debere velis. In postrema tua merito risisti illud: Horat. 11. Ep. 11. 70. *intervalla vides, humane, commoda.* quod perfecto incommodum & inhumanum est. Ea occasione tum statim ad lectas tuas caepi expendere transpositionem tot versuum ejusdem Epistolae, in qua tot verbis paratragaediare, eamque deprehendi ineptissimam esse. Omnia enim bene cohaerent, ut vulgata sunt, & observatum jam interpretibus ibi, *Frater erat Romae*: incipere novum argumentum, quo Poëseos excusat omissionem. Nimirum ne necesse sit sibi, si ipse probari suos versus velit, aliorum malos laudare. Aliquot vero hujusmodi partes per historiolum orditur, ut de Luculli milite & statim in principio de Mangone. Sed haec ipsa tu jam vidisti melius, ut longo mihi esse hîc non liceat. πόλεμον ἔκ εὐμυσίαν indubitatum est. Quid enim εὐμυσία πολέμων sed & caetera aptissime a te ordinata, nescio tamen quo tibicine. Nam duo versus apud ipsum:

Ἄσκει καὶ ἄσκει ὁππόθεν δόξεις φρονεῖν

&

Τοιαῦτ' αἰδε δόξεις φρονεῖν μέγα.

Non video quomodo in unum coeant: ἄσκει τοιαῦτα θ' ὁππόθεν δόξεις φρονεῖν. nisi apparet hoc ex ipsius Platonis verbis, qui ad manum mihi nunc non est: aut ille, quo jure alibi in Aristotelem, eodem hîc in Platonem liberalis fuit, & addidit quae nec decuit, nec debuit. sed & hoc volebam quaerere in Isocratis πρὸς Νικοκλέα paucis post principium: ταυτῆς δὲ τῆς ἀνωμαλίας ἢ τῆς παραχῆς αὐτῶν ἐστίν, ὅτι τὴν βασιλείαν ὥσπερ ἱεροσύνην παντὸς ἀνδρός εἶναι νομίζουσιν. ὃ τῷ ἀνθρώπινων πραγμάτων μέγιστον ἐστὶν ἢ πλείονος πρηνείας δέομενον. ' Quid sit ἱεροσύνη παντὸς ἀνδρός nunquam intellexi, & nuper adeo id me torfit, ut ad te appellandum cogitarem. Nisi vererem me *Peiraredo* similem fore praeter istud carmen mitterem ad te elegantissimum Jambum vindemialem nuper ad me scriptum, in quo satis lepide in istum, quem dicebas aliquando oecumenicum Criticum, lusit *Fabricius* noster. Si tamen salivam movi tibi, mittam proxime. Vale, Vir maxime, & me ama. Hagae a. d. 14. Non. Jun. Anno MDCCXXXVIIII.

Quid agunt belli censores usurarum; quia enim his proximis hebdomadibus nemo Leida venit, nihil eorum rescisco.

I Vid. ad Nic. Heinsum Epist. XLV.

EPISTOLA CCCXXIII.

JOH. FRID. GRONOVIIUS

*Claudio Salmasio.**Leidam.*

Quod posterior tua me occupavit, antequam priori responderem, est quidem, ita uti scribis: minima pars temporis mei mea est, & id quod meum est, per varia ac diltracta studia ita consumitur, ut vero aestimatori nihil ad ociandum superfit: nunquam tamen vel aliis vel animo meo sic parebo, ut in officiis erga te, nobilissime Domine, omissior queam reperiri. Quid ergo causae est, inquis? nempe quod primum a *Graſwinckelio*, cui perquam jucunda comitas tua fuit, etsi vix putabat ulteriori inquisitione opus esse, cum tu breviter quidem, sed vere in fine rem decidisses, (dedi tum ei partem istam epistolae tuae descriptam, & se cogitaturum dixit) responsum expectarem: dein quoniam ille morabatur, Ultrajectum perpauca dies ad visitandum *Fabricium* nostrum, qui eo advenit, excurreram. Unde reversus hodie offendi alteram tuam, juxta gratam mihi cum priore, nisi qua narrabant homines improbos & maleferiatos suae calumniandi libidini nondum fibulam imposuisse, non quasi nolim partiri te mecum curas tuas (quo ut sum indignus, ita nihil gloriosius contingere mihi fateor, nec facio quicquam lubentius, quam ut tua causa corruptissimis moribus succenseam) sed quod aegre feram adeo ingratos esse adversum te, qui tuis muneribus toties profecerunt, aut nisi stupor livore obstitisset, proficere certe potuerunt. Si vere dixit Tacitus, consilium fuisse Neroni in Thrasea non Senatorem & Philosophum, sed ipsam virtutem excindere: Nemo eripiet mihi quin vere dixerim tot conscelerata capita in infamiam jurasse, non magni & singularis viri, sed ipsius eruditionis, quam unus mortalium possedisti. Atque hoc non auribus tuis dare me, sed proferre ex animi sententia fidem meam testor, & norunt communes amici, quoties super his, ut saepissime, sermo incidit. Itaque nullo modo nullius affectus humani praetextu excusare malitiam possunt, tot argumentis convicti, tot exemplis certissimae & spectatissimae virtutis tuae in sua ipsorum conscientia confutati. Anni complures exceſſerunt, ex quo ipsi eorumque *γενήματα* pudendis chartis Librarias oppleverunt: & videtur omnes impudenti inscitia superare voluisse ille² Quaestionum editor, cui ipsum quaerere, non modo respondere, prohiberi publice intererat. Nemo verbum prolocutus est, nemo nutu significavit haec ludibria an flagitia, sibi displicere. Postquam tandem unus processit, qui brevi charta plura docuerat, quam sciri a quoquam isti *δοκίμοι* cogitarant, convolare omnes undique fuci & muscae, & in eum fingere aculeos hac solum de causa, quod similis ipsis non est. Hoc me cruciat

fae-

¹ Hic adhiberi debet & inseri Epistola Gronovii ad Salmasium scripta prid. Eid. Jun. hujus anni, quam exhibui inter Gudianas cclviii.

² Boxhornius, qui quaestiones Romanas Plutarchi edidit.

saepe, hoc cor meum exedit. Nec tamen est quicquam, quod tanto cordo-lio opponam, nisi ut tu constantiam, sic ego patientiam: teque, vir maxime, si licet, ut ultimorum unus horter oremque pergas gnaviter, ut haecenus, bene rem gerendo prodesse bonis, oculos eorum urere, & stimulos contemptus hebetare. Quod a me requiris, ne dubita summa opum vi annisurum, ut effectum tibi reddam; si poterō. Verum quod de epistola nunc primum ex te rescivi, vellem si nomen istius *μορμῆς* ad te pervenit id non siluisse te, aut cum rescribes non celare. Quod ubi novero, recipio nihil fore facilius, quam rem totam velligare: nec ignoras nusquam ita apertos esse hoc natorum genus, ac ubi gloriationes suas ac pugnas umbratiles publicari rogentur. Interim cras simul prodiero, captabo omnes rumusculos subbasilicanos, si quid odorari de autore & epistola possim. Nec *κερικέρως* ille abibit *ἀπείραστ*; quamquam vear ne adversus me obscurior sit, quem quasi per ludum Salmasianum vocare solet. Ego ex diverforum sermonibus nihil admodum hujusmodi audiui, quod referri ad te dignum esset. Erat non nemo, qui tot autoritatibus convictus libenter manum daret iis, quae disputas de differentia foenoris & usurae: putabat tamen obstare Leg. 4. princ. de Nautico faenore ibi: *utrobique igitur major legitima usura foenus non debetur*. Respondi non negare te foenus quandoque pro usura accipi. Immo diserte id notasse pag. 32. tamen nec id proprie foenus esse, nec in plurimis aliis locis, quos allegasses, ita posse accipi. Nec tanti igitur hoc fuerat, quod referretur? Sed fortasse & aliud quid annotasti in lege illa, quae *Cujacium* occupatum habuit. Quod si ita est, scire velim illius, qui audit alpha leguleiorum, *ἀπὸ σκυθῶν ῥήσιν*. De homine ignoto, & juvene & ejus nationis minus miror. Sed hoc fastidium nemo melius ulciscetur, quam qui se diligentiolem, immo curionem, in eorum scriptis fuisse ostenderit: hoc enim prohibere non possunt. Decies ab illo petii, quas ad se se scriptas servare aiebat *Casauboni* Epistolas. Respondebat primum Religioni sibi esse publicare eas, quae non ea fine ad se datae essent. ut nimirum plus sapere videretur tot bonis & praestantibus viris, qui sine fraude manes summi viri hac editione ornatum iri putastis. His exemplis cum eum urgerem, missurum se promisit. Quid facturum sit nescio: ante duas hebdomades admodum humaniter eas petenti, quia series admonebat, nihil respondit. Nec operas moratus sum. In loco Isocratis verissima interpretatio tua & elegantissima, quam frigidi sensus antea putabam: Statim cum legerem tuas, veniebant in mentem quae de Sacerdotibus illis notare solent, Jcti nostri. Postea incidi in verba Isocratis *ἐν τῷ περὶ ἀντιδόσεως ᾧ ῥαίνῳ τῷ Νικόκλει μὴδ' ὥσπερ ἱεροσύνην εἰληφότες τὴν βασιλείαν ἀμελῶς ἔστω τὴν γνώμην ἔχειν*. In lepidissima Parodia Catulliana & risi & ingemui. Vale, vir maxime & me ama. Hagae a.d. prid. Kal. Jul. A°. ciorcxxxviii.

EPISTOLA CCCXXIV.

JOH. FRID. GRONOVII

*Claudio Salmasio.**Leidam.*

EN tibi iterum aliquot paginas nugarum nostrarum. Appello generosum & simplicem animum tuum, vir maxime, ut qua comitate solitus es, errores meos redarguere velis. Et si enim conjectanea haec sint, tamen scopum praefixum habent veritatem: & optem feliciter conjicere; quam ratiocinatur noster Caussarius. Ingenii & doctrinae laudem non adfecto: sufficit si ad intelligendos veteres nonnihil contulerim, idque in levibus, quae tu tuique similes, cum non ignoretis, praeteritis & mediocribus relinques. Nam a literis renatis vix quidem quatuor aut quinque tellus tulit, qui tecum vere docti exsistere: plures mimum illorum ingenio egerunt, sic tamen ut tandem deprehenderentur. Ac mihi praecipuus studiorum fructus est, non quod doctus sim, quod nunquam efficiam, sed quod cognoscere queam, quam longe ab illa meta absim, & scriptorum genium distinguere. In quo quantum divina monumenta tua, quantum amicitia me juverit, aestimare magis possum, quam fateri. Hic tamen animus satis erit tibi, si recte novi τὴν Ὀγέειαν τὴν σὴν, ut discipulum ἐρμώμενον πρὸς τὴν σὴν διδασχὴν ne spernas. Meministi datas tibi a *Vossio Casauboni* quasdam ad *Neranum* epistolas, quae operi nostro infererentur. Eas ego accepisse me a *Riveto* putavi, & in utraque securus scilicet dormiebam, donec tempus esset eas operis dandi. Cum vero inter Schedas editioni paratas non reperirentur mihi, excussi omnes angulos gurgustiolii mei: & ne sic quidem inventis, tristis passus sum, absolvi que volumen hac accessione fraudatum. Idque excusavi nuper *Gerhardo Vossio*, cum ante paucos dies hic esset, ne forte illi consulto consilio omissa crederent: Ille nudius tertius significavit mihi per litteras frustra me operam quaerendi insumpsisse, cum tu dudum illas *Elichmanno*, *Elichmannus Nerano* reddiderit. Obstupui sane ad tuum nuncium, & miror, si unquam illas habui (nam haesitat hic memoria mea) quomodo ad te pervenerint, aut quomodo nos apographas servare putaveris. Nam *Riveto* quidem quoties hac de re sum conquestus, nihil ille aliud respondit, quam ut me diligentius inquirere juberet. Cum ultimas ad te darem, oblitus eram *Carrionem* & *Giffanum* inspicere, hic quoque fallaci memoriae confusus. At post inspectis illis deprehendi, *non Durica*, quae emendatio Politiani, non explicatio veteris lectionis est. sed plane *Dorica* in omnibus MS. repertum esse. Amicus tuus hodie apud me gloriabatur redditam sibi a te A. suam cum eximio elogio. Simplicius ad *Graswinckelium* & me missus est.

Tom. II.

Eccc

Va-

I Editae sunt tres ad *Neranum* Epistolae in ultima editione, sed quae nihil continent, propter quod minus edi vellent aemuli; nisi quod de *Arminio* aequius censeat *Causaubonus* in ultima n. DCLXXVII.

Vale, Vir maxime, & me ama: scripsi dormituriens sera nocte Kalend. Octob.
Anno CIOIOXXXVIII.

Hodie ultima manus Ep. *Casauboni* imposita est, a quo molestissimo labore me liberatum admodum laetor. Si eris occupatior, non est quod nimis festines affanias meas recognoscere. satis tempori recepero, si intra sextum diem. Credo scire te Notas *Heinsii* ad Novum Testamentum absolutas esse, neque restare quicquam, nisi ut adjiciatur *Aristarchus*. Iterum Vale.

EPISTOLA CCCXXV.

JOH. FRID. GRONOVIVS

Claudio Salmasio.

Leidam.

C Eras tuas miniatulas accepi, Vir maxime, quas equidem malo prae infanis aliorum plausibus, laudantium quod aut non intelligunt, aut non legerunt: tantum abest, ut ingratae illae fuerint mihi. Videbis ipso opere, quam earum rationem habuerim. Scripsissem etiam citius, nisi sperassem eadem via folia aliquot sequentia me posse a te censenda mittere, sed moratur me ille, cui describenda dedi, Itaque has praemisi, ne suspicionem gignerem tibi, quasi simplicitas tua mihi displicuisset. Serio enim confirmo tibi nunquam adeo me insubidum aut mei amantem fore. De loco *Valerii Flacci* ita se res habet. In *MSC.* legebatur: *manet immotis nox Durica lustris*. Id retinere voluit *Politianus*, eo sensu quo tum *Duria*. Sed opposuit se illi *Giffanius* in *Indice Lucretiano*, duobus nifus argumentis, altero quidem, quod *Duricus* *Graccum* non esset: altero quod si esset *Graecum*, Latine sonaret *Ligneus*. Quem vero dicturum illam noctem *ligneam*? Itaque emendavit, *Nox Dorica*. Idque dictum putabat, ut *dies Alliensis*, & similia. Idque confirmavit *Gevartius* ad *Tiburtinum Vopisci*, & ego alicubi pluribus exemplis in *Diatribis*, quum *Gevartium* autorem ejus lectionis crederem. Nam quod tu affers ex *Hesychio*, sane *Equus* ille dicebatur κατ' ἐξοχήν, δέρεται ἵπῳ. Non mirum igitur si ejus effigies aerea quoque sic dicta fuerit, cum translaticium sit signo attribui rei signatae vocabula. Velim igitur denuo hoc consideres. De *Maniliano* loco lib. v. 263. quid dicam? Utinam eam conjecturam persuaderem tibi. Nescio quomodo jam ab aliquot annis factum est, ut cuicunque eam nar-raverim, facile in eam sententiam induxerim. sed tuum judicium magis vereor, magis ambio, quam caeterorum omnium. Unum tamen repetam. dicis σεφαινοπλόκον non posse dici effingere suum, similes flores, sed potius eum, qui acu aut penicillo eos pingit, si suum pro *Nativo* sumatur. Et vere dicis, neque ita loquitur *Manilius*, aut ego sic loquentem intelligerem. Nempe semper omittis Epitheton illud, *varios*, quod non potest nec debet in hoc filorationis omitti. *Varios* flores nectendo & fertis locando effugit similes suum, id est unius naturae, quasi non arte nexi, sed sic nati essent. Profecto non pos-

possum videre hîc ullam absurditatem. sed semel rogavi te, ut in hoc uno stupiditati meae ignosceres: nec tu gravatim id fecisti, quae humanitas tua est. Quare si aliter fieri non potest, liceat semel nunc dissentire, & concede mihi, uti quidem toto pectore, sed tamen liber, te amem & venerer. Quod certe facio & facturum sum, quandiu mihi sana mens. At scin! quomodo? sic quidem, ut a nemine mortalium magis id fieri tu ipse exposceres. Vale, Vir maxime, καὶ ὁ δίαγες ut inimici tui doleant. Hagae a. d. vii. Kal. Octobr. A°. cico cxxxviii.

EPISTOLA CCCXXVI.

JOH. FRID. GRONOVII

*Claudio Salmasio.**Leidam.*

R Ifi sane, quum legi quem sequestrum & medium vir optimus, haud dubie id facere occulte jussus & monitus, vobis commendaret. Ille vero per *Onjeian* suam de homine, quem nulla magis, quam pia prudentiae laude pol- lere existimat, ista nequaquam crederet, quae nos scimus, & est aliquando incautior. Narro tibi, Vir maxime, cum ante mensem fere Leidae essem, venit ad me N. gratias agit, sic quasi expostulando, quod adeo simpliciter, honeste tamen de virtutibus vitiisque suis apud *Vossium* essem locutus. Ego quum quicquam scire me negarem, subiciebat, ut noscas verba tua: quaesi- vit ex te *Vossius* an etiam essem maledicus? tum tu respondisti nondum: sed vereor ut a vicino adverso suo, quo nimis utitur familiariter, corrumpatur. Nescio sane utrum mea fuerint verba ista, an *Vossii* ipsius, cum ego indolem ejus cautus & tutus laudarem. Sed quicumque sic sensit, nimium vere veritus est, quod eventus comprobatur in dies. Interim inficiabar ego, ut profecto in- certus sum. Ille se didicisse haec ajebat ex viro optimo & clarissimo. Cum ante paucos dies se, ut frequens adesset vicino illi, unde multum proficere pos- set (vide judicium optimi & clarissimi viri: sic enim iste hunc appellabat) se- rio adhortatus esset: non diu post cecinisse palinodiam, idemque vehemen- ter dehortatum fuisse, quod ita *Vossius*, ita ego censuissemus. Scripsi illico Amsterodamum, rogavi, ne fidendo nimium amicis ambiguis me in invidiae, quam haecenus vix cavi, flammam conjiceret. Illorum hominum iras esse re- dintegrationem scelesti amoris, qui plerumque concilietur per commune bo- norum odium. Ille respondit, quod facere solet rarissime: negat tale quid ex ore suo profectum: audivisse alios ita de isto juvene judicantes, imprimis quos- dam nunc in oras profectos exteras (*Bodecherum* intelligit) etsi ex me idem co- gnovisset, consueisse se aut filere, quae crederentur, aut saltem authores cela- re. haud dubie id ipsos inter se commentos, ut me callide explorarent. Equi- dem passus sum ita mihi fatisferi: non credo tamen merum id figmentum esse. cum igitur denuo scriberem ad illum, adjeci de Epistolis *Casauboni* ad N. quae

ex te didiceram, & rogavi ut *Gerbardo* suo id negotium daret, quamprimum respondendi. Nihil factum est. Scripsi bis postea ad *Gerbardum*, ne verbulo reddidit vicem. Rogavi maximum natu *Franciscum*, qui interea Amsterodami fuerat. Ait se nihil ea de re nec ex parente, nec ex fratribus cognovisse. Plane ita est, ut suspicamur: deprehenderunt machinam & volunt dissimulare artificem. Cum nuper ad te scriberem, oblitus sum gratias agere tibi de duobus Senecae locis. In priore quidem, Cyrneae puto, nescio quomodo manus mea erravit, nam mens idem, quod tu monueras, voluerat. Me fane poenitet in arcto ocio rem tanti negotii suscepisse. Sed vel sic probabimus, quam male ocio suo abutantur, qui, cum id largum habeant & pingue, tantasque occasiones bene de antiquis authoribus merendi, malunt nomine suo inscripto fallere emptorem, quam serio bonum publicum juvare. In tua enim solius correctione fiducia mihi, & erratis meis emendatio. Vidi codicem Graecum Novi Foederis, quem Egregius *Elickmannus* tibi procuravit. Scire cupiam cujus ille sit aetatis & notae, tantum ut discam indolem scripturae antiquae noscere, & uberiores habeam materiam expectationis amicorum de notis tuis ad N. T. accendendae. De *Nexis* quod observasti, plane mihi novum, & gestio accuratissimam haud dubie illam observationem discere. Rogo quaecunque in Seneca refinges, de iis me moneas, nec docendo reprehensioni parcas, uti & in his postremis foliis libelli nostri. Aegre est, quod nondum exemplar Epistolarum *Casauboni* ad te missum est, sed testor fidem nondum me ei, cui inscripsi, dedisse. Tali cum non bibliopola & typographo, sed Hydra nobis coluctandum fuit. Vult autem amicus tuus gratiam hujus doni inire. Quem tamen hodie monebo, ut festinet. Vale, Vir maxime, & haec ubi perlegeris, remitte. Hagae. a. d. iv. Kal. Novemb. Anno c1o1ocxxxviii.

Audisti puto *Ultrajecti* denuo scelestum & maledicentissimum librum prodiiisse 'G. V. suballione, cujus nullum est aliud argumentum quam ut doctos bonosque viros impie traduceret. Imprimis magnum *Grotium*, de cujus haeresibus author integrum volumen minatur. Ipsi qui ex magistratu (nam cum uno locutus sum) censura sua licentiam publicandi dederunt, vehementer displicuit: sed non ausi sunt nec potuerunt obsistere ambitioni & studiis Demagogorum. Et haec est via ad honores grassandi. Nam author post editum illum partum statim *Daventriam* ad Professoratum vocatus est. Agnosce miseriam saeculi & iterum vale.

¹ *M. Schoockio*, qui pro *Gisberto Voetio* calamus strinxit, & in fine hujus anni vocatus ad Professionem Historiarum & Eloquentiae fuit.

EPISTOLA CCCXXVII.

JOH. FRID. GRONOVIIUS

Claudio Salmasio.

Leidam.

SI librum illum, quem petieras, Vir Nobilissime, undecunque potuisssem nancisci, dudum ad te scripsissem post acceptas postremas. sed me scrutantem
ami-

amicorum bibliothecas spes illa & frustrata est, & tardius tibi fecit respondere. *Graswinckelius* te salutat humanissime. *Muretum* non habet: habet vero *Lambinum* in *Eth.* & *Pol.* Aristotelis cum *Zwingeri* & *Canteri* nonnullis; est editio illa, quam haud dubie vidisti: Hoc volumen si inspicere cupis, verbo impetra & mittemus. Authorem technae illius, de qua ex *J. V.* litteris, sane feliciter per te indagatum tenemus: in ministro aqua haeret. Nam illius, quem suspicamini, confirmare possum ibi nullas partes fuisse. Ipsi septem menses sunt & ultra, quod ille *Vossium* Amsterodami vidit: & fallitur in designatione temporis *Isaacus*. Ego eum intus & in cute novi, nec apud me quicquam secreti habet. Putes in duobus corporibus unum animum esse divisum. Nec igitur hoc me celasset, nec celaret nunc, si ipse intervenisset huic negotio. Illum etiam sui muneris authorem habet optime cognitum; sed qua probitate & prudentia est, vitia ejus dissimulat, ne ingratus videatur. Narrabat iste nuper mihi te non posse concoquere, quod illae litterae *Vossio* redditae essent, antequam aut excuderentur aut apographa earum apud nos manerent. se vero omnino putare, me inscium libro ad *Vossium* misso eas inclusisse. Hoc ipsi placebat commentum falsissimum, cum integro anno nullum eo librum destina-verim, praeter Justinum in minuta forma, quem *Piraredus* apud me deposuerat. Is liber cum admodum sit parvus, ut dixi, non potuerunt ei imprudente me quatuor folia includi. Non tamen ego valde repugnabam, ne viderer aliquid aut scire aut suspicari. Vidi nuper apud *Petrum Grotium* epistolam parentis ex Gallia, in qua honestissime loquebatur de usuris tuis, & desiderium partium sequentium significabat. In primis laudat opinionem Aristotelis solidissimis a te rationibus confutatam. se olim eadem de re cogitasse: nunc gaudere quod a te potissimum illa provincia esset occupata. Si commode fieri potest, cupiam inspicere Anglum illum in Apologiam Appuleji, teque rogem, ut in unum biduum ejus usuram mihi concedas. Vale, Vir maxime, & me ama. Hagae a. d. vi. Eid. Novemb. A°. c15 15 cxxxviii.

Nobilissime Domine, hanc heri scripseram circa meridiem. Intervenit *Scriverius*, ita hanc aliasque chartas seposui. Cumque garrivissemus aliquandiu, instaretque hora prandii, ad quod *Graswinckelio* promiseram, cum *Scriverio* domo exivi, nec ante serum redii. Ita heri non potui hanc mittere. *Scriverius* aiebat habere se *Muretum*, & ad te missurum. Habeo etiam pretium morae: Reversus enim reperi has a¹ professore juris Altorphino, clarissimi & optimi viri filio litteras. Quas cum ob alia tibi offerendas putavi, tum ut recognosceres, qua cum observantia de te apud populares meos loquar. Quod non imputo tibi: nec enim id facio ut tibi placeam, sed quia sic sentio. Ita salvus sim, & tu salveas. Inclusam ad *Fabricium* rogo ut per famulum cures deferendam ad nautas. Interest ejus ut illam habeat. hinc vero ante diem Jovis nulli nautae Ultrajectum proficiscantur.

¹ Nicolao Cunradi filio Ritturshusio Vid: Heinsii ad Gronovium Epist. lxi.

EPISTOLA CCCXXVIII.

JOH. FRID. GRONOVIIUS

*Claudio Salmasio.**Leidam.*

L *Ambinum* ante dies paucos accepisse te puto. Nunc en promissam partem miscellorum, quae utinam placeat palato tuo, & praelis digna videatur. Hoc biduum jam moror flagitantem typographum. Itaque jussi ut sub vespere chartas a te accipiat. Ea tamen conditione, nisi insit, quod omnino debeat corrigi. Tum redire illas prius ad me velim, & unum adhuc diem feriatum operis dabo. Brevior hîc sum, quia tot quasi paginis tecum loquor, & tum tibi, credo, tum mihi plus deficit temporis, quam superest. Vale, vir maxime, & quae non approbabo tibi, de illis sententiam tuam ne me, quaeso, celes. Hagae. a. d. ix. Kal. Decembr. A. c1515 cxxxviii.

EPISTOLA CCCXXIX.

JOH. FRID. GRONOVIIUS

*Claudio Salmasio.**Leidam.*

L ibenter legi, quae de studiis tuis scribis, Vir nobilissime. Equidem quoties de te cogito, tacite apud me gratias ago supremo Numini, quod te hoc potissimum seculo nasci voluerit in exemplum quousque humanum pertinere possit ingenium, & quid sit vere esse doctum. Nam id nomen cum vindicent omnes, rem habent paucissimi. Precor tibi annos longissimos, ut tot nobilia incepta, quae a nemine expectari possunt, jucunde & cum tranquillitate animi tui fructuque tantorum meritorum perficias. Si tantum licet tibi per occupationes ingentes, velim paucis significes quomodo Romani togam amicerent. Legi quae de ea *Aldus Manutius* in quaesitis per epistolam: quae tu accuratissime ad Pallium Tertulliani: adhibui etiam Quintiliani locum; nec dum tamen satis me explico, cum dicis rotundam fuisse togam & undique clausam, an putas nec in pectore apertam habuisse? an veterrimo vestiendi more clausisse convolutum undique corpus? Sinus vero an fuit lacinia extrema dexteræ partis aperta? an vero clausa? an vero undique attexta vel assuta fimbria? Si clausa undique fuit, quomodo dextrum brachium ex ea exferi potuit? & an etiam habuit sinum non exserto brachio? Non opus, ut testimoniis authorum utare, si id late ostendere non permittent aliae curae tibi, sententiam modo tuam indica. Habes etiam hîc particulam nugarum nostrarum. Cap. xi. an recte intellexi Plinium? Nam *Dalecampius* de marmore coloribus picto interpretatur, quod displicere tibi alias me docuisti. Ut dubitem, facit,

cit, quod Claudianus alicubi dicat, *purpureis Synnada venis*. Hae si naturales sunt, non opus de porphyretico interferto suspicari: cum vero Plinius ait: *qualiter nasci illos optarent deliciae*: Satis indicat synnadicum purpura distinctum non nasci. *Graswinckelio* gratissima fuit salutatio tua. Is salutat vicissim te, & omnes opes suas cupit esse tuas. Vale, vir maxime; & te bene gere. Hagae III. Kal. Decemb. A. MDCCXXXVIII.

EPISTOLA CCCXXX.

JOH. FRID. GRONOVII

*Claudio Salmasio.**Leidam.*

Nobilissime Domine. Seculum videtur esse mihi, quod litterarum tuarum melle deficior. Et tamen omnem fateor in mea ignavia esse culpam. Primum quidem dum Alcinoum requiro, quod jusseras, mente scriptionem eoque distuli, dum eum tibi mitterem. Frustra fui vero, & sic aliquot elapsis diebus partim a variis negotiis direptus, partim segnitie languescens, silentium continuavi. Nunc vero alium accipe librum, qui ex Germania ad me missus est, ut munus traderetur tibi. Author vir optimus tuique observantissimus Consiliarius ille Noricus, cujus litteras aliquando ad te miseram, excusat sane apud me tenuitatem scripti oculis indigni tuis, idemque suo nomine penes te contestari me jubet: Sperat tamen devoti animi hoc testimonium acceptum tibi fore. Meus sequenti puto hebdomade ab operis absolvetur. Tuae vero usurae quid agunt? quid dissertationes ad Simplicium? Cum postremo Leidae essem, hoc est cum te vidissem, in Museo τὸ κρίν interrogabar, quid jam in publicum molireris. Respondebam melius hoc ipsos scire, qui in urbe essent, in quam ego venirem peregrinus, & typographia quotidie visiterent. Itaque incipiebat iste numerare, Usuras, Achillem Tatium: & nihil ne praeterea? subiciebam: id me ex vobis rogare oportebat. Immo inquit fieri poterat, ut inter Sermones aliquid de caeteris curis suis tibi enuntiaret. Atqui, aiebam, cum ego video *Salmasium*, ea temporis angustia concludimur, ut otiosis confabulationibus vacare minime liceat. Sufficit mihi, si quaestiunculis meis impetrem responsum. Ita finiebantur istae insidiae. Nihil enim agebat aliud, quam ut aut me detegeret, aut ipse occasionem haberet judicandi de Simplicianis, praesente editoris filio. Tuus ille *ἐγὼν* librum his diebus edit contra histrionales ludos. Quidam inter ἀγύρας eruditulus, & nostram Religionem professus parat apologiam, jamque multis ostendit, nec dubitavit publicare. En par bene compositum! Legistine *Petiti* conjecturam de loco Statii in Soteriis Rutilii:

— — *Legesque urbesque ubicunque togatae,
Quae tua longinquis implorant jura querelis.*

EPISTOLA CCCXXXII.

J O H. F R I D. G R O N O V I U S

Leidam.

Tom. II.

F fff

fu-

futurum arbitror, ut eam. Gaudebo quidem ab tot nequissimis ac fatue ambiciosius hominibus me separari: a te vero remotum fore longius id mihi erit instar mortis. Nunc igitur quibus possum modis itineri me paro, & praeter caetera, quia Senecam corrigendum suscepi, id ago, ut si non totum, certe maximam partem operum ejus, antequam vasa collegero, perlegisse queam. Secevi aliquot locos stigmatis, de quibus, nisi tu suppetias veneris, nihil mihi superest spei. Dum ista mecum repetita meditatione expendo, ecce redditur mihi tua brevis, & istam tetricam Musam discussit. Mire narras; me adversariis tuis tela suggerere, atque ex libris tuis venena colligere, quae illis in tuam invidiam subministrem. Mentiar ego, immo impostor omnium sum maximus, nisi mentiuntur Nebulones, qui hoc confinxerunt. Nam qui ad te retulerunt, fortasse sunt homines minime mali. In me vero nihil magis apud istos odio fuit, quam hoc ipsum, cum illi e scriptis tuis commotius dicta excerpserint & jactarent, quod omnia ego benigne interpretarer, & concedendum hoc magnis viris dicerem, quorum vehementiores essent motus, si vitium omnino vellent esse, at non malitiae, sed ingenii esse calidioris, at infinitis immensisque meritis compensari, aliaque ejusmodi: denique *Scaligeri*, quem laudavi semper, at te minus, ipsis exemplum objicerem. Sic memini narrasse mihi N, monstratum a *Boxhornio* N. locum e Solinianis tuis, ubi refutas de pulla myrto, quod ipse & nolle se factum ajebat, & ego detestatus sum, nequissimeque factum videri, non dissimulavi. Ne dicam millies contentiones mihi cum illis fuisse acerrimas, cum observationes tuas, quas non assequerantur, inepte & inimice exagitant. In quo fuit, quod apud Ovidium, *tenenda, maleviva, perfidiae pretio nece*, apud Arnobium *Colium*, apud Petronium *Cocios Cociaria* restituiisti, & innumera talia, quae nunc non incidunt. Jam de *terrenis bestiis*, possem negare, si simulate agere vellem tecum, quando id ipse credere non fateris. Non inficiabor tamen aliquando dixisse me, *Junium* ejus opinionis esse, quam terrenis bestiis adscribis: joco qui tam facile pennae volanti excidit, quam malitiose ab istis traducitur. Cognosce autem quid rei sit. Mortua ac sepulta illi revocant, omniaque miscent, ut aut hostes acquirant tibi, aut quos amicos habes, eos in suspicionem apud te adducant, eaque te cura inquietent. Id manifestissime ex hoc crimine apparet. Jam quadriennium pene est, cum illud de *terrena bestia*, N. (neque quisquam alius mortalium, quod sciam,) ex ore meo audivit. Tu in Gallia eras, nos una Leidae. Ille accusare tuam *δοκησιουργίαν*, solum te putare aliquid scire, in opinionibus tuis defendendis esse pertinacissimum, nec omnino pati, ut quis tibi contradicat: Omnia denique quae in unum magis hominem, quem ille bene novit, quam aut in te aut quemvis alium convenirent. Ego multa contra & inter caetera (si male, Deum testor,) sine fraude subitoque & inter conflictum dum argumenta peto, quaecunque incidunt, hoc jeci: exemplum esse me simplicitatis & candoris tui, qui cum conjecturam meam in Tertulliano timide ad te perscripserissem, cum alia tua publice extaret, meam lau-

laudavisse. Cupiit videre locum: prolatus est liber ex editione tua: legimus verba authoris, & pleraque tua ex commentariis. Cum ille legisset: *Qui Vedium intelligunt plane terrenae bestiae sunt*; Arridens, quis hîc designatur, ait. Ego nihil suspicans aut cogitans mali, nescio, aiebam, sed hanc opinionem apud *Junium* legisse memini. Hoc tantum abest, ut ille in calumniam rapuerit tunc, ut ostenderit ex occasione mihi *Junianam* editionem, qua *Scaliger* usus est, obelis ejus confixam, ubi *Pecoritas*, *Afinitas*, *Bestia*, *Cujon*, & istis acerbiora per totum librum marginibus apparebant allita. Nunc id reducunt, nunc apud amicos tuos narrant, me interprete *Salmasium* tale scommma *Junio* impigisse. Fateor quidem summae cautionis fuisse futurum, si tale quid mihi non excidisset: sed vides tamen, vir maxime, quam innocenter fuerim nocens, & simplex, ac sine ulla suspitione invidiae post tot annos secuturae prolatus dictum dolosissimo captatori objecerim. sed agnosco artificium, postquam me frustra aggressi sunt, nec sive blanditiis, sive beneficiis a tui observantia avertent, ac in partes trahere nequiverunt, te tentant, ac suspectum saltem fieri me cupiunt tibi. Itaque non dubito, quin ab hoc principio profecti ejusmodi plura aut commenturi, aut a me dicta in alium longissime sensum fraudulentissime contra me interpretaturi, eademque per eos, quos credunt tibi non adversos, ad te delaturi sint. Equidem quantum in me erit, operam dabo, ut huic sceleratae molitioni fibulam imponam: scribam de eodem oleo ad N. cumque eo hanc injuriam serio expostulabo, quia nemo est, nemo, apud quem ista protuleram, alius. Caeterum si ille ingenio utetur suo, & magis postquam ego digressus fuero, si deo placebit, te oro atque obtestor, vir *σεβασμιώτατε*, ne illis potius, quos scis omnia conari ac turbare, ut te vel leviter commoveant, quam tibi de animo meo credas. Contestatus sum toties tibi, & contestor etiam nunc, & Deo teste dico, me animum apud te semper in labris gessisse, atque promptum apertumque habuisse, nec unquam aliter de te, ac tua in literas meque merita, ac amicitiae nostrae postulabat sanctitas, aut re aut ore sensisse, quod non illi modo non ignorant, apud quos esse libero licet mihi, quique judicia mea secretiora norunt, sed ipsos quoque istos, qui nunc frigus inter nos contractum vellent, sua docet conscientia. Facile tu quidem amico tali carere potes. Quid enim sum ego? aut quid in me tantum, cur unquam meum tibi cultum imputare potuerim? aut ornamento tibi magis quam oneri fuerim. Certe novi me, & scio, quam illa benevolentia, qua ad hoc usque me persecutus es, sim indignus, ut postremissimus omnium, qui per te profecisse confitentur. Noli tamen spernere atque abjicere hominem, qui uti amari abs te se existimat, ita id totum soli atque uni bonitati adscribit tuae: neque unquam commissurus est, ut, quum nullo merito affectum tuum pigneret, sua culpa, scelere immo ac flagitio suo, tanto se bono privarit. Haec raptim ad tuas hesternas. Pulcherrimum epitaphium tuum nemo vidit intellexitque, qui non vestra satis laudavit. Sunt qui id petierint, ut describi liceret sibi, nec negare potui. Vale, maxime virorum, nec si qua re aggredientur illi porro mihi apud te frigidam suffundere, ne me caelatum

habe, aut certe ne id ad animum tuum demitte. Hagae a. d. v. Eid Feb. A. MDCCCXXXIX. Nunc recordor, quia scripturum me ad N. dixi, fortasse id tibi non placiturum, quia illum, qui id retulit tibi, prodi nolis. Si id periculum non times, & is sermo per plurium manavit ora, verbulo fac sciam.

EPISTOLA CCCXXXIII.

JOH. FRID. GRONOVIIUS

Claudio Salmasio.

Leidam.

Nobilissime Domine. Vellem quidem parcis verbis majorem fiduciam in conscientia mea tuaque prudentia contra impunissimorum istorum *Ἀλαβόλας* nuper ostendisse me: sed commotiorem non adeo res ipsa, quam exemplum rei reddiderat. Prorsus ex fraudibus & dolis confuti sunt homines isti, ut nec ubi velint maxime, nihilque interest, verum possint dicere. Ego & *Vincentius* quotidie conferendo, quae ad utrumque & singulos dicta sunt, innumera mendacia detegimus, ridentes quaedam, alia detestati. Nam quod de subditiis epistola scribis, esset id quidem facinus palmarium, nisi in turba tot falsorum lateret. Gestio tamen, ubi illuc venero, (siquidem penes te exemplum est, ut esse opinor) id quicquid est lepidi scripti videre, & sycophantae insciti totiesque deprehensi misereri. Consilium meum visendi Gallias stabile est. Quod probari tibi laetor, sed admiratus profecto sum insignem comitatem tuam, qui quod ego precibus a te contendere non fastidirem, id ultro promittis. Accipio vero avido sinu conditionem, tuisque hortationibus quam cujusquam mortalium, accessum ad tot insignia hujus aevi decora, quibus omnes terrarum oras hodie vincit Gallia, libentius debebo. Eo namque redactus sum, ut infinitis tuis in me beneficiis, non aliter quam oblata etiam ambiendo & accipiendo, atque aestimando respondere queam. Fui per hos dies in Seneca diligentior: deprehendi minuta quaedam, in quibus editores connaverunt, plura quibus nec ab ipsis nec a me ullam remedii spem invenio. Ex quo numero est quod legitur de vita beata c. 11. *Vulgum autem tam chlamydatus quam coronam voco.* MSC. Pall. & Erasmi Edit. *coronatos*. Praeterea ex MSC. unus: *clamidatus*. unus: *Clamitatos*. Lipsius: *tam candidatos quam coloratos*. Probat Gruterus *coloratos*, quod etiam extare ait in antiquissima editione Veneta: *Chlamydatus* retinet: non explicat tamen, sed relegat nos ad suas suspiciones. Conjungendum ex eodem libro c. xxv. *Malo quid mihi sit ostendere praetextatus & candidatus, quam scapulis nudis ac faetentibus.* Ubi etiam MSC. *praetaxatus & catus, camisatus, causatus, gausapatus, chlamydatus, causeatus*. Muretus: *Camisatus*. Lipsius dubitat an pro *praetextatus* debeat scribi *pexatus*. Sed & *faetentibus* non est in pluribus MSC. In quibus: *Scapulis aut sententiis omnes mihi ex voto decident: aut assentientes omnis mihi ex voto discedat: scapulis aut funi. Omnis mihi ex noto decident.* Portenta sunt ista. Nihil video, nihil fa-

sapio, nihil sentio. Nisi tu suppetias veneris locis aegerrimis, actum est, illicet ad tibicines mittemus. Narrabat heri mihi nobilissimus *Boswellus* nescio quem Sallustium de mundo, scriptorem bonum & frugi, Roma ad te missum, ejusque editionem parare *Elzevirios*: id se accepisse ex amico tuo, qui tuarum curarum nihil obscurum finit. Possumne bona cum tua venia id requirere, quid rei sit? *Grotius* Advocatus me rogavit ut liceret sibi Epicedion tuum ad fratrem mittere. Descriptum mea manu ipsi dedi. Fatuus forem, si id, quod mones, accepissem aliter, quam festinationis indicium. *Vincentius Fabricius* & ego eruditissimam tuam ad eum epistolam libenter legimus? Is te salutat observantissime, & scripturum ait propediem. Vale, unicum decus nostrum. Hagae. a. d. v. Kal. Mart. Anno c1010 cxxxix.

EPISTOLA CCCXXXIV.

JOH. FRID. GRONOVIVS

*Claudio Salmasio.**Leidam.*

Nobilissime Domine. Et initium epistolae tuae non mediocrem mihi attulit dolorem, & clausula inopinatum risum movit. Precor Deum ut sospitet te, ac ista corpusculi stipendia remittat, viresque sufficiat ad praeclara animi tui cogitata non abrumpenda. Sed illud pugilis os validi antagonistae manus merebatur, nisi quia τ'αὐτόματον ipsi melius consuluit, malimus vel sic habere eum, quod tibi imputet. Ante triduum sermo iterum fuit mihi cum nobilissimo *Boswello*. agebat vidisse se scriptum *Petavii* contra libellum de Caena Domini: audisseque in animo esse tibi progredi in campum istum, & illud refutare. Itaque multis rationibus agebat mecum, ut persuaderem tibi atque hoc consilium darem, ne id negotium capefceres. Tu nosti eas melius, quare narrandis supersedeo. Mirabar unde is rumor: cumque suspicarer facile, quae-rebam an mihi copia fieri posset scripti Petaviani inspiciundi. Respondebat jam reddidisse ei, a quo acceperat, nempe qui textis maternis mensas sternit. Videram penes eundem ante mensem tuas unas, quibus scriberes mitti tibi illud opusculum; jamque Caletum esse perlatum: promittebas etiam nihil magni tibi de authore, & nisi fallor, narrabas, te primum monuisse amicos de fraude Tertulliano facta. Scis autem non posse illius ordinis hominibus placere sententiam prioris tractatus, praesertim in posteriori parte: qui etsi totum illud privilegium, quod sacrificuli vindicant sibi, non approbant, tantum tamen, quantum ipsis doctores nostri & vulgatus mos Ecclesiarum permisit, retinent mordicus. Cui ne tu aliquomodo intercederes, veritus, rumorem illum seminando apud optimum ac tui amantissimum virum, ejus autoritate & consilio destinationem tuam frangere se posse credidit. sed haec ego ex suspitione: qui nec de instituto tuo quicquam scio, nec mandatum ejus omnino insuper habere debui. Repetebat etiam sermonem de Sallustio

Ffff 3
tuo,

tuo, & (eramus una matutino tempore, cum tuae nondum fuissent mihi red-
ditae, nesciremusque adeo editionem jam spectare ad umbilicum) putabat
commode ei posse adjungi Ocelli Lucani libellum, qui jam rarius reperiretur
in bibliopoliis, nolletque id opusculum perire. Denique tradebat mihi literas
ab illo juvene, cui tuas ad *Patr. Junium* in Angliam eunti commendaveras, *Ber-
neggeri* discipulo, in quibus nuntiare tibi jubet, prima quaque occasione habi-
turum te aliquot authores de re militari cum excerptis ex Nicephori Cod.
MSC. haec haecenus. De Senecae locis gratias ago maximas. Plane satisfac-
cisti mihi: nec commodius quicquam explicatione prioris loci, nec emenda-
tione posterioris verisimilius: *semitectis*, dico, *pexatus* (id enim malo) & *gau-
sapatus*. praesertim cum postremum totidem apicibus in uno *Gruteri*, quem
Colonensem vocant, deprehensum sit, & non semel illum praestare aliis ani-
madverterim. Nunc quaeso liceat mihi redire, ut in proverbio est, ad armil-
lum. De tranquillitate animi c. 11. *multos ex his, quos forum, curia, sermo
mecum contraxerat, non abstulit, & vincas ad sodalium manus copulatas intercidit.*
Videtur hic quoque parum adjumenti esse ex MSS. & *vincas ad sodalium ma-
nus copulatas intercidit. e vincas ad sodalium. & vincas ad sodaliam. & junctas so-
daliū manus copulatasque.* Postremum quidem solum tolerabilem sensum ha-
bet. Tentabam tamen: & *juncta ad sodalium manus copulam intercidit.* Ut
de Societate datis dextris contracta intelligeret: Ut lib. 111. de ira c. 8. *diffi-
cile erat illi in copulam conjecto rixam ejus, cum quo haerebat, effugere.* Hic quo-
que de sodalibus coenae agitur, ut & simpliciter, non de societate, sed sodali-
tio possit illud accipi. De vita beata c. 6. *Non video quomodo ista tam diversa
in eandem copulam conjiciantur.* Haereo tamen & sententiam tuam expecto. lib.
1. de Clementia. c. 5. *magnam fortunam magnus animus decet. qui nisi se ad illam
extulit, & altior stetit, illam quoque infra terram deducit.* Quid est infra terram
deducere? cap. 11. *Haec est in maxima potestate verissima animi temperantia &
humani generis incomprehensibilis amor non temeritate aliqua incendi, non priorum
principum exemplis corruptum, quantum in cives suos liceat, experiendo tentare, sed
hebetare aciem imperii sui.* MSS. tres: & *humani generis comprehendit te sibi
amor.* Optimus ille *Nazar. comprandit te sibi mor.* Latet aliquid. Editum
est a conjectura Agricola: ante cum vulgo, *comprehensibilis.* Fabricius te fa-
lutat observantissime, & respondebit propediem. Usuras tuas quando expe-
ctabimus? Vale, maxime virorum, & me ama. Hagae. Non. Mart. A°.
CIC IO CXXXIX.

EPISTOLA CCCXXXV.

JOH. FRID. GRONOVIVS

Claudio Salmasio.

Leidam.

Nobilissime Domine. Postremas tuas accepi. Nunc raptim narro tibi ve-
nisse ad me heri *Vorstium*. Ajebat se accepisse ex certis hominibus, com-
mu-

munibus amicis, esse penes me Epicedium tuum. Id cupere se videre & rogare pro amicitia, ut ostendere vellem. Cum praetexerem, jacere inter chartas & difficili nunc quaestioni fore; non dimissurum me ajebat, antequam id legisset. Vidit, laudavit. Postea mirari se dixit, mihi potius, quam sibi id missum esse. Respondebam causas me ignarum, nisi quod significasses in tuis, eum postquam rogasset, ad te postea non accessisse. Petebat exemplum: ut videbat me cunctari, non id futurum apud se, nisi cum honore tuo pollicebatur sancte. Vos omnino amicos esse, seque, ex quo primum in Hollandiam venisset, magnopere te coluisse. Esse sane quasdam opiniones, in quibus abiretis ab invicem diversi: caeterum amicitiam eas non disfluere. Cogitavi, quoniam Senatori *Schotto*, *Grotio*, aliisque indulgissem, si huic negarem, posse eum facile id ab istis nancisci: & me totius vestrae controversiae nescium gerebam. Descriptum ergo tradidi, id conferre ipse voluit cum autographo tuo, & ita sollicitè, immo pueriliter, singulos apices meos cum tuis comparabat, ut monstrasse, nedum tradidisse exemplum, me illi poeniteret. Praeferebat id facere, ut de accentibus, spiritu, distinctionibus recte a te positis testimonium perhibere posset. Epistolam non inspexit, neque passus sum manui meae autographum tuum unquam extorqueri. Mox non ita obscurus, ut ante, sine circuitione quaesivit, nunquid de litigio vestro rescissem: & quia negabam, caepit ingentes oras evolvere belli. multa *καυχήματα* Thraonica. Provocatum utique a te esse. Causam dedisse nullam, nisi quod interdum non probari sibi sententiam tuam apud amicos non siluisset. Id homini libero non posse eripi. Alias neminem laborasse magis, ut te & Aristarchum conciliaret. Esse domi suae folium usurarii operis, ubi *ἀσώπως* aliquid ab Aristarcho proditum, qualia infinita in illis exercitationibus, esse scribas. Id constituisse tecum agere communis pacis causa, ut diffingi cures. Quamquam hinc dudum sit mos tuus, nec uni id te facere, sed omnibus. fore ergo tandem, ut totus mundus tecum consistat. Ideo se infelicitatem tuam miserari. Animadvertisse etiam nescio quid frigoris inter te & ¹ R. scribunt inter se literis mordacibus, ajebat. Cum hinc demum credere id me posse, negarem, addebat. hoc quoque argumento esse sibi, quod roganti aliquando, num quid ad eum velles, ne salutationem quidem translatitiam commendasses. (vereor autem ne quaerelas suas illi conjunxerint, & alter nimis jam gravetur secretis illis continendis.) haec provenire bonam partem ex ingenio tuo suspicaci, partim quod veros amicos, qui recte consultum cuperent tibi, ipsum nempe & collegas, sperneres; aliis deterioribus semper obsequerere, inter quos jaetabat se aperte quondam te monuisse, quomodo reputare posses ² eum, cujus in socerum olim sic lussisses. Ego mirari omnia, nihil istorum scire: doctrinam tuam immensam & affectum erga me, quae sola comperta haberem, extollere: caetera, quae inter ipsos intervenissent, si qua eorum cognoscerem, non nisi ex incertis rumoribus didicisse. Itaque nec scire me illa, neque ut sciam laborare. Tandem

¹ Rivetum credo.

² Credo Ger. *Vossium* intelligi, cujus Socer *Fr. Junius*, quem terrenam bestiam *Salmasius* vocaverat.

de instituto suo orsus, etsi consuetis aculeis in epistola ipsum tetigisses, non tamen jure pari acturum tecum: nec directe contra te scripturum. sed in animo esse sibi integrum opus de Saccharo commentari. in eo sane unum caput oppositum iri tibi, sed sic, ut cum maximo viro disceptationem sibi esse meminere. Nec festinaturum se, quoniam omnia cupiat quam exactissima esse, & sic ut potius rei ipsius, quam vestrae dissentionis causa ad scribendum actus videri possit. Itaque ex ultima usque Hispania per amicum Amstelodamensem petere pictas dulcis arundinis formas, & mandasse ne in ea re quam subtilissime perficienda sumptui ulli parcerent. Ita lente perfectum iri suum opus, se Hollandum esse, nec fervore nec impetu Gallicano impelli. Et, si revinceretur, libenter herbam tibi porrecturum. Haec fere observavi, quae ad te deferrem ex sermone odiosissimo, quo dum ille *μακρὰν ἱλιάδα* continuat, nec morantis mei rationem habent sodales, parte prandii pene carui. quae tamen ex me rescivisse te aut omnino rescivisse, nisi ansa aliunde data fuerit, pro prudentia tua, ac amore in me celabis. Ut purgatus essem tibi, si forte de congressu nostro inaudires alibi, & carmen tuum, quod haud dubie facient cercopes illi, illudant, neque aliter facere omnibus, quae a te publice vel privatim exeunt, jurarunt. Illudant sane dum refutare argumentis nihil possint, ipsique omnibus occasionibus vapulent. Vale, maxime virorum, & me ama. Hagae a. d. III. Eid. Mart. A. CIOIOXXXIX.

EPISTOLA CCCXXXVI.

JOH. FRID. GRONOVIIUS

*Claudio Salmasio.**Leidam.*

Nobilissime Domine. Pauculas horas, quas nuper in regressu Leidae exegi, ita vindicarunt sibi, apud quos diversari soleo, ut nullam elabendi, tuique conveniendi copiam haberem. Id etsi divitiae mihi esset, ferebam tamen patienter, quod & ante valere tibi dixeram, nec hunc transitum finistre te interpretaturum verebar. At postquam nudius quintus ex *Elichmanno* discursanti mihi obvius intellexi de litteris, quas Lutetia a Puteano accepisti, & miris novis, vehementissime condolui & succensui mihi, qui ab isto consortio non ingratis ipsorum tantisper me divelli, dum nuntiis jucundis bibulas aures opplerem. Et cogitabam statim ad te scribere ac rogare, ut quae per transennam ex amico illo optimo addidiceram, de iis accurate me edoceres. Sed directus undique & circumlatus quamdiu Hagae fui, aut solus esse aut sedere, nisi forte in prandio vel caena, non potui. Nunc sedemus satis, & ventos occasionesque elabi patimur, jussi per nimiam formidinem eorum, qui arbitrium habent itineris nostri, non conscendere prius, quam Ammiralius classem ad Duynkerkam advexerit. Itaque cupidus cognoscendi quaecunque sint ea, magnopere oro, ut, si commode fieri possit, cras unas a te accipiam, in quibus

his horrendum carmen de antagonista meo celatum me non habeas, & si in promptu sint cuicunque excerpta illa Statiana mittas. Nihil fieri potest nunc mihi gratius, & desiderio contabescam, dum tuas videro. Proximo tri- duo nondum puto nos soluturos. Vale, vir maxime, & importunas preces meas fer benigne. Rotterodami a. d. x. Kal. Majas. A. cico cxxxix.

I Em. Cruces.

EPISTOLA CCCXXXVII.

JOH. FRID. GRONOVIIUS

Claudio Salmasio.

Leidam.

Quas e Navi ad te dedi, Nobilissime Domine, ad ipsum Oceani ostium fixis anchoris spero diligenter ad te curatas. vi. Non. Majas nausae plenus & satur mari multam dixi salutem, & attigi tandem toto divisos orbe Britannos, post diem tertium ingentem & regiam Londinum intravi. Aliquantum temporis absumptum in spectandis & audiendis illis, quibus peregrinantium curiosum otium solet occupari, parum mihi profuturis, ideoque comitum potius, quam animi mei gratia admissis. Respirare visus sum mihi, postquam denique libros & doctos viros salutavi. Quos quidem reperi effusissima humanitate, ac neminem illorum, siue clari esset, siue nullius nominis, qui de te scriptisque tuis non summa cum reverentia loqueretur, & me loquentem hilari & benevola attentione audiret. Non excipiam nebulonem frondatorem, (ei enim frequens quoque adfui partim in mari, etsi altera esset nausae, partim hîc) Nam illum in numero doctorum habere non possum. Nulla in eo lectio veterum, judicium nullum aut peritia litteras tractandi, malitia & fatuitas insignis, ut miror quomodo adhuc tam Grammaticè loquatur. Crucior abesse me a libellis meis, praesertim exemplari Diatribes, quod variis locis auxi, interpolavi. Constitui autem simul venero Oxonium, ubi bibliotheca in promptu erit, fatuo secundum stultitiam suam respondere: non tamen ita, ut solum ipsum confutem, quod esset chartam maculare & imperitis scribere: sed ut subinde alias quasdam observatiunculas meas intermiscam, & isti Elencho textum silvarum adjungam recensitum, quod plurimis locis fieri posse sine periculo satis nosti. *Patritius Junius* Tacticos omnes, qui in bibliotheca Bodleiana adservantur, aut ipse descripsit, aut aliorum opera descriptos habet. Egi cum eo strenue ut illos tecum communicaret. Et promisit haud gravatim, est enim vir humanissimus & candidissimus. Est etiam penes illum Achilles Tatius cum duobus, ni fallor, aut tribus MSS. collatus, ac multis locis auctior. quem si desiderabis, habebis quoque. Ipse totus est in conferendo antiquissimo exemplari Lxx. Interpretum, quod a Patriarcha *Cyrillo* in Angliam missum est. Et vulgaris opinio obtinet, ut ipse Pa-

Tom. II.

Gggg

triar-

I Hae defuerunt nobis literae.

triarcha *ὁ παναρχὴς* in prima pagina notatum reliquit, scriptum manu Teclae. Eadem manu adjunctum habet novum foedus. Arbitrare quid faciendum tibi sit. Nam *Fabricio* ultro obtulit *Junius*, quoniam *Grotius* suas notas adornaret, se variantes lectiones, si peteret eas *Grotius*, libenter ipsi transmissurum. Si tu praevenieris, certus sum nihil tibi negaturum. De iis, quae jam cum septuaginta Interpretum versione vulgata collata sunt, affirmare possum quod vidi, nullam lineam aliqua varietate vacare. De specimine linguae Aegyptiacae, quod hîc proxime Anglus quidam publicavit, nihil addo, quoniam amicus librum ipsum ad Cl. *Elichmannum* misit. Usuras tuas expecto impatienter si absolutae sunt; sin, literas, quas tuto ad Nobilissimum *Borwellum* destinabis. Eidem etiam liber committi potest, persolvit enim annum stipendium curatoribus literarum, ut perinde sit ipsi, litteras mittat, an ingentes fasciculos. Vale, vir maxime, & me ama. Londini. a. d. xvii. Kal. Jul. Julian. A. ciciocxxxix.

EPISTOLA CCCXXXVIII.

JOH. FRID. GRONOVIVS

Claudio Salmasio.

Leidam.

Quas Londino ad te dedi, Nobilissime virorum, recte existimo curatas. Responsum *Patricius Junius* egoque avidissime expectamus. Scito illo viro non reperiri humaniorem, aut qui sincerius studia literarum juvare cupiat, aut qui magnitudinem tuam intelligat. Ille & duo praeterea forsan sunt, non certe plures, quare pedem intulisse his terris non paeniteat. Nam quid ego narrem tibi, quam vana spe lactati fuerimus. Quid tu mandabas mihi, ut in Tacitis quaerendis tui meminissim? Qui in decantata illa bibliotheca Bodleiana, ne Martialem quidem, aut Statium aut vulgatissimam quamque chartam MSC. inspicere possum. Prorsus hîc peregrini sunt, ut vocantur a vulgo, *Frencs dogs*, id est, Gallici canes. Statutum habent, ne cuiquam peregrino uti ullo MSC. Codice liceat, nisi adstante magistro aut Baccalaureo artium. Ubi reperiam ego homines, qui ita male perdere tempus velint, ut mihi per tres quatuor horas conferenti adsideant, & ungues meos observent? Frustra igitur huc veni. Bene sit Comiti *Arondeilio*, cujus libros MSC. licet optimo *Fr. Junio* commodare etiam extra domum amicis. Itaque nisi *Patricius* ex bibliothecis collegiorum, quarum tamen MSS. ita sunt obserati, ut ne fociis quidem ad eos liber accessus pateat, per amicos nancisceretur, quod mihi furtim utendum daret, merus hic essem Tantalus inter undas. Mirum genus: ipsi thesaurorum suorum pretium ignorant, nec unquam quicquam, praeter scholasticas tricas, aut loquuntur aut somniant: Interim iis, qui cupiunt uti, eas obijciunt moras, ut melius sit non desiderasse, quam indignitates ferre. Quatuordecim hîc exierunt dies, antequam ullum librum publicum

EPISTOLA CCCXXXIX.

JOH. FRID. GRONOVIVS

Claudio Salmasio.

Leidam.

Quas *Heilerfigio* tradideras, nudius tertius reddidit mihi amplissimus *Boswellus*. Gaudeo apparuisse fictitium *Alexium*, si nihil aliud, fidei meae causa, & ne in posterum expectationem tuam deludat. Cum *Patritio Junio* locutus sum de iis, quae Oxonia statim post acceptas priores tuas ad ipsum scripseram. Achilles Statius paratus est, itemque Tactici & singulis horis mitti possunt. Jamque egeram cum juvene quodam honesto, qui isthuc tendebat, ut ista sarcinula se tibi commendaret. sed invasit omnes Panicus terror a Duynkerkanis, & ipse Legatus Belgicus subesse quid periculi non negat. Itaque quoniam illi, quos novi illuc praefecturos, aut navem aliquam bellicam, aut regressum *Borwelli* expectant, autor fui *Junio*, ut huic potius suum thesaurum committeret. Ea tamen conditione, quoniam majore festinatione in Achille opus, quam in Tacticis, ut siquam haberet ipse *Boswellius* tutam occasionem tibi quid mittendi, istam non in suum discessum differret. De N. T. Collatione nondum promittere possum. Caussatur & vere *Junius* labores suos & curam in LXX. caretque jam amanuensi, quem doctum & diligentem nuperrime per fonticum & desperatum morbum amisit. Interim quoscunque designaveris ipsi difficiliores locos, jusserisque inspicere, libenter lectionem codicis perscripturum ad te offert. Ego vero aliud etiam quid molior. Habes hîc amicum, virum bonum & eruditum, qui hîc me in confe-

rendis quibusdam codicibus juit. Cum illo egi & pene suscepit, se in Junianis aedibus, si locus ipsi detur, collaturum, & excerpta *Junio* relicturum uti ad te mittat. Heri cum varia agitarem, quomodo voluntati tuae obsecundare possem, hoc mihi commodum in mentem venit, heri illum allocutus sum. Et spero optimum *Junium* haud gravatim id nobis indulturum. Matthaei paucissima supersunt in codice isto: Epistolarum quarundam varias ad *Grotium Junius* per *Fr. Junium* misit. Si consilium hoc exitum habuerit, ut nullus dubito, faxo propediem specimen habeas. Utinam, vir maxime, haec conditio esset mea, ut ipse ministeriis tuis locare operam meam possem! sed nec illis sufficio, in quibus me servire mihi necessitas praesens cogit. Et in dies singulos profectioem meditor. Nec nunc haereremus hîc, nisi adventus Regis in hanc urbem nos moraretur. Frondatori respondimus pro modulo nostro accurate; & saevis cum jocis, ut ipse merebatur. Faxo ne numeret hallucinationes, quas in me deprehendisse gloriatur, & erroris conscientia de pluribus me tacuisse dicat. Nihil enim intactum reliquimus. Quomodo autem praedicem liberalissimam tuam humanitatem offerentis ultro beneficium, propter quod solum frivola nostra legentur. Accipio vero, & ambabus amplector ulnis, nec quicquam erit longius mihi quam dum *τερόντητον* illam epistolam teneam. Adventu, ut dixi, regio profectio nostra dilata est, & pauculos dies Cantuariæ *Merico Casaubono* promissimus. Non dubito tamen, cum Deo intra tertiam hebdomadem nos in Gallia futuros. Si expectabis adventum meum, simul atque Rothomagi fuero (nec ibi ultra quatrimum haerebimus) significabo, ad quem destinare tuas debeas. Nam mercatorem, cui commendati sumus, non nisi de nomine novimus; ubi habitet, ex fratre Rothomagi discemus. Sin, non fallet me, si ad *Puteanum* eam miseris, ubi me expectat. Non quievero enim, ubi Parisios venero, priusquam rem illam habeam pertractatam. Oxoniae incidi in codicem pervetustum & optimae Notae Aldhelmi de Virginitate. Profam ejus legeram olim. hoc scripti non noveram, nisi ex tuis scriptis. Itaque honorem hunc ei habui, ut cum editione Canisiana conferrem. Inveni omnes tuas emendationes probatas, omnes lacunas suppletas, & multa verba peregrina, quae editor non intellexit. Inter ea vox *bargina*. p. 841. *septuaginta duos reclaudens bargina biblos*. cum gloss. i. peregrinus. & pag. 855. *thesaurosque simul librorum forte pelasgos Edidit in lucem, quos bargina texerat umbra*. glossa, id est *peregrina*. Sensu sane perspicuo. Nam *Canisius* utroque *pagina* edidit, quamvis priore loco codicem sum *bargina* habuisse fateatur. Tamen originem nullam nec analogiam utcunque parum probabilem video, eamque a te cupio doceri. Praefationem usurarum videre gestio, aequè ac totum opus. Vale, unicum *ἄνμα* meum, & me ama. Londini Non. Sextil. Jul. A. c1616xxxix.

EPISTOLA CCCXL.

JOH. FRID. GRONOVIIUS

*Claudio Salmasio.**Leidam.*

Non ita diu est, Nobilissime Domine, cum postremis tuis respondi. Eas Dano cuidam iter ad vos affectanti dedi, & tamen forte eadem navi cum his demum ex Anglia solvent. Has ut subjungerem, fecit inquires desiderium meum ea procurandi, quae tibi non ingrata esse scire possim. Accipe igitur Achillem una cum litteris Junianis, partim amici alterius, partim mea manu descriptis, quod ipse aegre haberet, & ut illa traderet mihi, e lectulo, cui adsidebat uxor, excitatus est. Noluit tamen mori, quod hunc diem constituisset nobis nobilissimus *Boswellius*. Idem *Tactica* quoque illa in reditu suo non in longum, ut audio, differendo, afferet tibi. Adduxi etiam ad *Junium* amicum illum meum, qui collationem N. T. in se recepit. Cui me coram respondit, se libenter locum daturum ipsi, modo ad se post dies aliquot, ubi paullo esset valentior, rediret. taediosus enim magis & piger ex defluxione, quam metu idus morbus est, quo vir humanissimus attentatur. Ego etiam, cum abero, non desinam, & *Junium* & amicum illum meum crebris stimulare literis, donec omnia ex voluntate tua perfecta fuerint. Epistolam, quam promissisti, magna cum siti in Gallia expectabo. Illud rogo, ne ipsum nomen hominis uspiam ponas. Nam nec ego illud feci. Quia insolenter eo gloriatur p. 108. gaudium illud dare ei nolui. *Mercurium fraudatorem* ubique appellavi. Tu imponas ei quodcunque, modo proprio non voces. *Elsevirii* rogaverunt, ut in Seneca pergerem, de quo hic nequidem cogitare potui. si tamen posset fieri sine illorum detrimento, vellem ut sustinerent paullulum. Habeo nunc mecum ex bibliotheca Regia Codicem Nat. Quaest. quo meliorem vix unquam contulisse memini. adeo plurimas elegantissimas suppeditat variationes, quas tamen, quia in promptu non est, an occupaverit *Gruterus*, nescio. Accedet in Gallia, credo, quem laudavisti mihi, epistolarum apud *Puteanos* codex. Unde gemulae multae reddi poterunt auctori, & mora quidem dignum est ornamentum, quod editionem augebit: An vero spes & odor lucri eam patiatur, ipsi deliberabunt. Simul Parisiis ero, saltim notulas, si nec expectare poterunt, aut otii tantum mihi non erit, aliquot in secundum tomum mittam. Plura alias. Vale, maxime vir & me ama. Londini. x. Kal. Septemb. stilo vestrate. A. c1010cxxxix.

JOH. FRID. GRONOVIIUS

*Claudio Salmasio.**Leidam.*

ROthomago adventum in Galliam meum tibi significavi, vir maxime, atque a primo ingressu meo in hanc urbem impatienter expectavi tuas. Neque etiam necessarium putabam aliis tunc datis eundem tibi ferre nuntium, quandoquidem non ignorabas, quot millibus ista urbs ab hac distet, & in illa non diu moraturum me facile conjicio: etiam συγκατάς tuas, quas dederas mihi, curare ante cupii: quae, quid effecerint singulae dicere non possum, quia omnes eam erga me pepererunt benignitatem amicorum tuorum, ut parem in vita nullam adhuc cognoverim. De Elencho meo jam cum typographo, penes quem degit *Elzevirius* adolescens, locutus sum: quamvis *Sarravius* ὁ πάλιν vellet hoc quoque doloris addi furcifero Parricidae filio, (nam pater ejus fuit ex sedecim *Brissonii* carnificibus) ut idem *Du Puis*, qui frondationem excudit, Elenchum etiam meum publicaret. Sed hoc mihi perinde: alteruter faciet certe & propediem. Iterum ergo de epistola tua, quod promississe te scit jam *Sarravius* & typographus, aurem vellere tibi venio. Omnes tui in maxima expectatione sunt N. in N. T. & partis II. de usuris. Narratur etiam jucunda historia de postremo motu & molitione inhibendae praefationis. sed quod fulmen tibi & litteris obitus optimi heu quondam nostri *Elichmanni*? Quem huic sufficies? quis tantae spei succenturiabitur? o lugubrem casum, quo nescio an quisquam, dum a vobis absum, magis mihi cor peredit? Sed instat tempus tradendi litteras tabellario. Vale, vir maxime, & Epistolam tuam τειρόμενον ad nos quam citissimè. Lutetiae Parisiorum. Postridie Id: Octob. A. CIPIOCXXXIX.

JOH. FRID. GRONOVIIUS

*Claudio Salmasio.**Leidam.*

Ternas tuas, vir maxime, recte accepi: in iis illam contra furciferum meum, pro qua gratias immensas ago, & quantumvis tibi me debere profiteor. Exstabit hoc monumentum aere perennius, & me apud posteritatem quoque vivere faciet, illum quotidie mori, nec superesse nisi in paenam. In tempore advenit sane: nam praefatio mea jam parabatur, & folia omnia *Pelaeo* tradideram, quae tamen antequam excuderentur, visis tuis opus mihi erat. Nam & ego aliquid de locis, de quibus tu egregie, aliquid, inquam, frigidum in tuorum comparatione dixi. Bene autem cecidit ut de iisdem alia fere & inter se

se diversa, nullo autem modo pugnantia nobis in mentem venerint. Descripsi statim & operis dedi: post praefationem meam (nolui enim cuiquam tam leve opusculum inscribere, cum textus Silvarum adjunctus non sit. quem additurum se quidem sed ἀκοντα agebat *Pelaeus*, egoque deinde lubens id onus a me devolvi) locum habet. Audiveram infelicem illum filium esse unius ex fedecim magni *Brissonii* carnificibus & senatorum aliquot id plurimi hinc mihi confirmarunt, & imprimis optimus *Cordesius*, qui & τὸ κακὸν νόημα & τὴ κακὴ νόημα κακὸν ἄνδρα olim novit. Rogarunt tamen iidem, ne cicatricem istam refricarem. Equidem mirabar tam stupidum hominem esse tam malum, nec poterat esse, nisi domesticis furiis ageretur praeceptis. Vidimus tandem tuum de modo usurarum vere tuum, & priori geminum Germanum. Qui cum plurima inaudita & insperata nos docuerit, tamen laudandi ejus rationem a te ipso nobis video ereptam. Cum enim ita eminenter omnes scriptores anteibas, ut cum nemine amplius, nisi tecum & ipso debeas comparari: ita quoque scribitur, ut si tua conferantur cum aliis, laudari mereantur sola, si cum tuis, quod maxime laudandum sit, difficile judicium faciat, & unumquodque sibi αἰετία tribuat. Tot antiqua sepulta in illa materia, quae inscribit librum, eruiisti; tot diverticulis abundantiam litterarum, quae in te est, diffundis: Cognoscere libet singula, & ordo legendi turbatus esset, nisi differre posteriora doceret, qui omnium oculos praecipue advehit ac traxit, ingressus ipse operis, non eruditus modo aut copiosus, sed omnino ex omni parte Rhetorum. Nescio an ibi sine numero sint, quibus confecisse Hellenisticum monstrum videre: hinc quidem consensus communis tropaeum erigit tibi. Audio nihil responsurum, ut tu vere auguraris, sed quod mentiri quosdam & falso blandientes sibi jactare puto, delegaturum tibi duos; qui in consilium & quasi partem adhibitus est, ejus nescio utrum socerum an affinem. Idem enim utriusque nomen. Et mentio facta est denuo quorundam lenonum, ut cum Justino loquar, seu conciliatorum inter vos. Quos tamen non admissurum dicit se, nisi omnes autores simultatum satoresque rumorum nominaveris. Idque jam caepisse te facere, ut non abrumperes plane negotiationem, caeterum *exteros illos esse*, dixisse, nominare voluisse neminem. Inde itum in conjecturas & hario-lationes, & me denuo inter satores satoresque istos velut per transfennam visum. Quia quaedam ferrentur publice, quae non nisi ego ad mensam audiverim. Ita ego tentor. Interim omnia ista prae aegrorum habeo somniis. Nulla in re coram me tectus fuit & ambiguus, nisi cum de te loqueretur, Et id vix ter in praesentia mea factum esse liquido jurare possim. Caetera eadem apud me erant, quae apud omnes, quorum frustra disseminator quaeritur unus, cum tot esse potuerint, quot quibus unquam locutus est. Illud etiam mone-re debui. Indicavit mihi Amplissimus *Sarravius* audivisse se commendatum quemdam esse JC. hic Parisiis degentem praecipue *Riveto τῷ πᾶντι*, ut ipsius studio & gratia Leidam vocaretur. Eum amicum suum esse & notum sibi intime, ac se quod ad alia optime ipsi velle: sed praeter rabulariam, quam adol-lescentes aliquos advocatos hinc docet, nihil doctum; sic ut sine rubore suo sum-

victoria. Arguunt haec falsitatis, quae in MSS. Veneto habentur: *de asacrari Cymero, Gaisique supplicio.* Quae quomodo constituenda sint, tu nos docebis. apud Manilium lib. 1. 221. ubi colligit argumentis rotunditatem terrae:

*Te testem dat Luna sui glomerabilis orbis,
Quae cum mersa nigris per noctem deficiis umbris,
Non omnes pariter confundis fidere gentes:*

Sed prius Eoae quaerunt tua lumina gentes &c.

Non dubito *glomeraminis* esse scribendum. Te luna orbis terrarum testem dat sui *glomeraminis*, id est rotunditatis. Uti & lib. 1v. 540. *Pleiadum parvo referens glomeramine fidus.* Ubi vulgo eodem errore *glomerabile.* Quid est autem *res parvo glomerabilis*? Sed vehementius me torquent illa: *confundis fidere gentes:* & vellem explicatione digna duxisset *Scaliger.* Aut τὸ *confundis*, aut τὸ *fidere* mendosum. Si illud servemus, ἀντὶ τῆς in tristitiam conjicis, alia vox pro *fidere* quaerenda: nec enim *fidere*, sed ἀφανισμῶν terrebat gentes auxiliaria crepantes aera. Si τὸ *fidere* movere non libet, pro *confundis* aliud verbum excogitandum, quod significet, privas, defraudas. Id quod tamen nullus invenio. Ante mensē excurreram in Patriam, sed nihil ibi quod mentione apud te dignum sit, nisi quod *Lindenbrogius* & *Fabricius* te plurimum saluent. Ego quoque & precor ex animo, ut salvus ad nos incolumisque cum tuis redeas. Vale, maxime virorum & me ama: Daventriae a. d. Idus Januar. A°. ciccxcxliiii.

Ampliss. *Dumaeum* plurimum, ni grave est, per te saluto. Literas ejus tardissime accepi, & rescriberem ni jam delassatus essem scribendo. faciam proxime.

EPISTOLA CCCXLIV.

JOH. FRID. GRONOVIIUS

Claudio Salmasio.

Parifios.

Nobilissime & maxime vir, Meministin' me mittere aliquando tibi officiosissimam salutem, & munusculum a V. A. Consiliario Reipublicae Noricae *Georgio Richtero*? & utraque tibi admodum fuisse grata? Ejus ecce filium patre praeclaro dignissimum & politissimum adolescentem, quem & Lugduni dudum fastidium caepit, quod te videre, adire, admirari praesentem illic non potuit, & nunc tenet incredibile desiderium Lutetiae tanta fortuna perfruenti, sive igitur illius studium cogito, qui ut commodiorem haberet hujus voti viam, iter ad me Daventriam facere gravatus non est, sive adfectum, quem tum propter parentem, tum propter optimam indolem, egregios profectus & modestiam singularem ipsi debeo, non potui non eum tibi summopere commendare: etsi omnia illum abs tua humanitate expectare jusserim, quae cum suaviter omnes recipiat bonos; eminenter tamen explicare erga eos se solet, quos ut accuratissimus ingeniorum aestimator habere in sese, cur amentur, fa-

Tom. II.

Hhhh

cil.

causam nequaquam tibi esse vel te iudice evincam, cum non ignores & abs quovis homine, vel sit ille meus frondator, aut tuus Cercops, discere me gaudere, & hanc mihi legem dixisse, ut omnia Tibi in me liceant. Scribe igitur, nec ut laudes flagito (non est meae frontis hoc ambire, nec tu is es, a quo id debeat peti) sed ut cognoscam, falsane sint omnia, quae proprie nostra sunt, an vera falsis mixta, & quae falsa maxime tibi videantur. Habeo permulta, de quibus in Livio a te cupio edoceri, siquidem, ut quondam, id non erit tibi molestum. Atque utinam codicem illum, cui excerpta ex Puteaneo adscripta a te sunt, sive illa sunt chartae singulares, paululum mihi utendum dares, quod *Isaaco Vossio* aliquando fecisti. Sed de hoc arbitrato fiat tuo, in illo non deero mihi, si id per te licere intellexero. Vale, virorum summe & me ama. Daventriae a. d. VII. Kal. Februar. CIOIOCXIV.

EPISTOLA CCCXLVI.

JOH. FRID. GRONOVIIUS

*Claudio Salmasio.**Leidam.*

Mirifice exhilararunt me litterae tuae non modo, quia tam honeste de nupero facto meo sentis, sed vel praecipue quia vanam fuisse suspicionem meam & ipse ais, & argumento certissimo, tibi forsan ipsi incognito, confirmas. Vehementer etiam atque etiam oro, ignoscas sollicitudini meae: quanto enim laboro magis, ut abs te amer, tanto magis vereor, ne id minime omnium merear, aut adeptus citra meritum meum levissima culpa perdam. Nec negabo admodum me delectatum, quod rudimentum nostrum tantopere tibi placuit. Ego enim, quicquid alii mihi gratularentur, solido gaudio me pascere non poteram, dum tuam sententiam anxius & pendens animi expecto. Videbar subinde dicere libello meo: salvum te spero quidem. Sed ille qui oculos centum habet, dum te videt, magno in periculo vita vertitur tua. Quem designem ex animi sententia nosti, & cum sint paucissimi dignissimique, quorum litteratum plausum ambio, illorum tamen quoque omnium, quam unius in tuis conatibus studio carere malim: adeo solum hoc verae & prudentis industriae praemium puto. Nec ideo tamen capere illos animos me finit conscientia, quos tam dulcia ac magnifica verba homini non se ipsum spernenti facile subderent. Utinam sperare liceat, quod posse adfirmas! Certe si auderem, hinc praecipua mihi fiducia esset, tum quod tu viam illam in postremis scriptis tuis multifariam munivisti, tum quod tam liberaliter porro viaticum & commendatitias promittis. Quam conditionem uti nondum accipere me confiteor, ne vires meas nosse non videar; ita nec omnino adspernari ausim, ne tantum auctorem sequi detrectem. Discipulus prioris posterior dies forte aliquid certius de his statuere dabit. Nunc ablego ad te *Octavium*, qui quidem

H h h h 2
dem

dem de judicio, quod primo adspectu abstulerat mihi, postquam se familiarius noscendum praebuit, immane quantum decoxit. Primum certe volumen pauca habet capita, in quibus non aliquid desiderem, & gravitate tua minorem deprehendam. Sed tuum judicium discere malo. Interim non potui, quin una mitterem schedam, in qua duxi lineamenta observationis de toga, valde quidem rudia, sed tamen quibus, si vera sunt, prolixam habeo addendi & rudia elaborandi materiam, maxime contra *Ferrarium*. Nondum redegei caetera in mundum: secus misissem omnia: sed satius est haec prius aleam subire, ut si forte parum probentur, minus me deridendum tibi propinem. Volo autem tuo arbitrio stentve, cadantve; eoque rogo attendere paullulum, & cum ocii fuerit aliquantulum, rescribere ne graveris. Pacis illius legem sane quam miror. Aut valde fallor, aut exemplum est transductum ab nova Academia ex eo, quod in popularem tuum statuit, quem olim ajebant doluisse, quod thesium ejus majestatem parum comiter observasset. Haec est libertas! sed tamen expecto quam mox faedus iterum rumpatur. Vale, vir maxime, & me ama. Daventriae. priore bessenti. A. CIΩICXLIV.

EPISTOLA CCCXLVII.

JOH. FRID. GRONOVII

*Claudio Salmasio.**Leidam.*

A Bit ad vos negotii sui causa *J. Christenius* Il. noster, vir perhumanus, Collega mihi amicissimus, tibi quoque, ut puto, non ignotus, certe nominis tui observantissimus. Is quia adire te & salutare constituit, salutationem quoque a me delegari sibi & epistolam committi voluit. Quamquam autem habeam dudum non pauca coacervata, de quibus tecum agere velim, tamen adhuc dividere eadem & repetere otium non fuit, nec nunc est, ita distringor publicis privatisque recitationibus, quae jam ad finem hujus semestris spectant, & quod superest temporis, recensione Livianae datur. Eam autem merito reverentiam tibi debeo, ut nihil serium ad te scribere ausim, quod non sit aliquantulum meditatam: nam vel sic oculis tuis ut dignum sit vereor. *Ferrarium* accepisse te puto, cum chartula nugarum plena. Scio jam quid sit opusculi, quod Parisiis pro censura *Balzacii* nuper editum innuebas. Rogo ejus copiam facias mihi, si non potest aliter, ad paucos dies. Mentio fit apud Stephanum loci in agro Stratonicensi, cui nomen *Tendebe*. Nescio an id singulariter genere faeminino, an *πληθυντικῶς* genere neutro declinetur. Bis restituit *εὐσόχως*, ut videtur, apud Livium lib. xxxiiii. *Freinshemius*. Id me doceas velim, & latorem harum more tuo humaniter excipias. Vale, Vir Nobilissime, cum tuis & me ama. Daventriae a. d. v. Kal. April. A. CIΩICXLIV.

JOH. FRID. GRONOVIIUS

*Claudio Salmasio.**Leidam.*

Nobilissime Domine. Quod duplex occupationum genus aliquandiu at-
tinuisse te scribis, altero, quod facere circumscriptorem doloris tui ap-
pellas, levatum te ex animo cupio, alterum feliciter procedere opto. De
petitione non magna, nec tamen adhuc impetrabili, & credo, quae scribis,
& vel cogitatae humanitati tuae gratias ago: ita tamen ut pollicitationem tuam
ratam velim, ne ab iis, qui te non sinunt esse negligentem, & exposita habe-
re, quae mihi destinasti, secundam injuriam feram. *Ferrarius*, ut dicit, ca-
ptavit omnes occasiones, non tam novi aliquid pangendi, quam aliud a te di-
cendi, quae tamen malignitas nemini magis fraudi fuit, quam ipsi. Utinam
autem & animus tibi rediret perficiendi Commentarii de re vestiaria, & tan-
tum ocii patereris aliis tuis curis decerpi. Vides enim, quales id argumen-
tum, dum tu cunctaris, invadant, quid facturi, si plane id deseruisse te per
hanc tentationem cognoverint. Innumera sunt, quae rectius tradere poteras,
si tantum, quae sparsim & aliud agendo tibi exciderunt, colligere & compo-
nere maluisses. at bene positis, quod facile esset homini ingenioso & industrio,
alia superstruere, etiam egregium fuisset: nunc satius habuit alia dissimulare,
alia sinistre accepta imperite vellicare. Equidem fieri non potest, quin diver-
forum hominum diversae sint sententiae de multis: sed tamen facile apparet, quid
interfit inter diffensionem & detractionem: cum illam vel plane explorata, vel
non satis explorata veritas gignat, hanc, animi pravitas, quae quos transversos a-
git, nec in aliis quidquam pulchri vident, & in se nihil non esse pulchrum pu-
tant. De fasciculo Divionensi, & tibi pro opera, & mittentibus pro animo & ad-
fectu gratias debui. *Elzevirii*, acceptis recisis meis contractisque notis ad primam
Livii partem, tamen eas judicant prolixiores, quam ut illi volumini commode
adjiciantur; scribunt autem tuo aliorumque amicorum suorum consilio Nota-
rum se quartum tomum facturos. Non repugno, & scis quam sit difficile vel
ex solo Puteanorum codice ad bellum Annibalicum breve emendationum scri-
ptum facere, nisi quis varias tantum lectiones dare velit: sed vereor, ne ab-
soluto Livii contextu notas jubeant ἀνάλειν, & contenti praesente lucro sum-
ptum ultra facere graventur. Quod non fieret sine magno qualiscunque no-
strae existimationis periculo, cum infinita in contextu mutarim, & nemo bo-
nus tantam licentiam interpolandi probare possit, nisi aliquas rationes muta-
tionum videat. Et jam nunc igitur, (si ita est ut scribunt, teque auctore hanc
mentem ceperunt) interponi auctoritatem tuam velim, ut se non frustraturos
spem meam promittant, & postea verecundia tui ad praestandum promissum
adigi. Multum deberem tibi, vir maxime, si callidius eos tentares, an vere
sit hic ipsis animus, & stipulareris ab illis, quod mihi per ultimas suas promi-

serunt sine dolo facturos, nempe perfecto Livio, notas tomo singulari edere non cessaturos. Accepi nuper litteras Patavio ab *J. Rodio* Dano, qui commentatus est aliquid de *Acia Cornelii Celsi*: cupit autem commendari tibi, & resciscere an librum suum, quem ad te misit, acceperis. Locus est Livii lib. *xxiii. c. 9. Tu patriae ferrum, quo pro te armatus hanc arcem defendere volebam, hosti minime parcens, quando parens extorquet, recipe.* MS. *Hanc arcem hostrimini quoniam parens ext.* Caetera desunt. Quid censes? Vale, maxime virorum cum tuis & me ama. Daventriae *viii. Id. Jun. Julian.* *ciciccxlii.*

Quid audio te scribere de *Coma*? & hîc habemus, qui negat quemquam posse bene sperare de salute aeterna, qui non habeat eam recisissimam. Itaque ut primum hîc admissus sum ad sacram synaxin recens ex Gallia redux, eoque quem illic sumpseram habitum, & privatim & in Consistorio excepi graviter intentatas fraternas, an fratrales admonitiones de *Thracica* putatione. filii. per honestatem licuit: sed quia non sunt omnes aequae faciles, identidem trepidant rostra, subsellia, tectaue clamore convicioque rumpuntur.

E P I S T O L A CCCXLIX.

J O H. F R I D. G R O N O V I U S

*Claudio Salmasio.**Leidam.*

SI vales, bene est: ego valeo, & hoc omne Livio proficit, qui quidem ipso brumae fidere sudantem me concinnat, etsi nec camino admodum luculento utar. Spero tamen fore aliquid in ea opera, cur nos ames, & aliquando non nugari existimes: hac certe spe & fallo & consolor saepe laborem meum. Schedas tuas ab *Isaaco* nostro accepi, illisque pro reverentia, quam tibi etiam pro tuis erga me meritis debeo, & mea simplicitate sic utor. Quidquid est invisum mihi, in quo ut olim jocabaris suppus fuerim, (sunt autem non pauca) id omne sine ulla malignitate tibi rescripti. Nusquam captavi occasionem dissentendi: immo si quid occurreret, quod persuadere mihi & capere non possem, ut quisque suos patimur manes (quamquam id rarius factum) filii, transivi, integrumque reliqui tibi, si id affirmatum argumentis ita, ut dubitationis causam eripias nobis, docere aliquando nos in mentem veniat tibi. Caeterum non sunt ibi totius *Puteanaci* codicis excerpta, sed tantum pertinent ad librum usque vigesimum sextum. Quid causae? non habes plura? an distulisti dare? an seposueras, ut quaestioni essent? Rogo per Deum, siquidem habes, ne me illis carere sinas. hoc beneficium, si ullum unquam, sine repulsae metu & peto a te & expecto. Intellexisti forte *Heinsium* filium rediisse ad lares: is, quibus reditum suum nuntiabat mihi, poscebat suum *Ferrarium*. Quare si commodum tuo fieri potest, eum ut remittas rogo, una cum illa scheda, quam adjunxeram: quam si legisti, quae vitia ejus deprehenderis, cognoscere cupio. Si nondum satis usus es *Ferrario*, facile copiam ejus faciet tibi *Isaacus*:

cus:

cus: nam & ipse eum secum attulit. Interroga, quaeso, memoriam tuam, si possis deprehendere, ubi extent verba Plinii & Lactantii de ' *incedere summoto*. Aveo quoque scire, quid factum de litteris & negotiatione illa, quae tanto nisu Belgis adimere te velle minabatur, paucis, siquidem vacat. Vale cum tuis, vir divine, & me ama. quod te facere inprimis credam, si reliqua Liviana mecum communicaveris. Iterum vale. Daventriae. post diem quintum Eid. Decemb. Julian. *CIÖIOCXIV*. quem feliciter exire in novum annum tibi tuisque cupio.

I Vid. *Gronovium* ad Liv. xxv. 3. & xxviii. 27.

EPISTOLA CCCLI.

JOH. FRID. GRONOVIVS

Claudio Salmasio.

Leidam.

Scripseram nuper verbo de petulantia istius ' Argentoratensis, ut a cognato meo Hamburgo acceperam. Est Osnabruggae *Joannes Adamus Schragius*, Agens in rebus Comitis Nassavii Sarbruscentis, qui ante aliquot annos in Belgio vixit mihi familiarissimus, amator bonarum litterarum & tui observantissimus. Is commodum ad me misit folium infame, quod vides: quod quia fortasse vidisse non nolles, quamquam ut cognoscas vix dignum est, statim ad te misi, vir nobilissime. Tales homines, vel pecora potius talia, si in posterum ulla mentione digna judicas, ignosce si libere dicam, ignoras magnitudinem tuam, quam inscitia tam barbara & asinina capere non potest. Pudet me tanti pudoris & seculi nostri & Nationis meae. Et vellem alia tibi nuntiasse. Sed putavi sic quoque curiositati tuae satisfacturum. Vale, vir maxime, & terrae filios patere terrae filios esse, & obtreptione tui non inclarescere. Daventriae xi. Kalend. Januar. Julian. *CIÖIOCXV*. quem felicissime inieris.

I *Freinsheimii*. vid. ad *Gronovii* Epistol. ad *Heinsium* LXXXVII.

EPISTOLA CCCLI.

JOH. FRID. GRONOVIVS

Claudio Salmasio.

Leidam.

Nobilissime & Maxime virorum. Qui has ad te defert *Laurentius Langermannus*, egregiae spei adolescens, consobrinus est meus, avunculi mei magnae dignitatis viri filius. Is annum vertentem in contubernio meo exegit, neque hortanti ad praeclara studia industria sua mihi defuit. Nunc cum

ma-

maxime ad suos reverfurus aliquot Hollandiae urbes tranfcurfu perluftrare conftituit. Quum autem femper de te, ut unico omnis eruditionis principe me loquentem audiverit, quum ex tuis potiffimum immortalibus fcriptis multa egregia ad doctrinam adminicula a me tradita acceperit, fummi honoris loco fe habiturum mihi conteftatus eft, fi te falutare, alloqui, verbaque, quorum meminiffet aeternum, e facrato tuo ore pauca excipere poffet. Eamque in rem me voluit parario uti, etfi promitterem ei, folum amorem ftudiorum fufficientem effe tefleram, per quam cultores tui ad te admittantur. Hoc igitur rogo per breve difpendium pretiofi temporis tui adfcribas fummis tuis erga me meritis, juvenemque ferena fronte accipias, faciasque ut femper eum jucunda hujus diei fubeat memoria. Adde quod nulla opera alia praeter obviam illam humanitatem tuam exigitur. Itaque neque ego hoc follicite peto, quia opus ita effe judicem, fed ut illi fatisfaciam non alia lege me dimittenti. Locutus Livii, quem nuper quaerebamus, eft lib: xxiii. cap. 29. in pugna Publii & Cnaei Scipionum cum Afdrubale: *Triplex ftetit Romana acies. Peditum pars ante figna locata, pars poft figna accepta: Equites cornua cinxere.* Hic promifcui MSS. Libri omnes: *peditum pars inter ante figna locata.* Sed Put. clare: *velitatum pars inter antefignatos locata.* Manus fecunda virgulis confixerat *τὸ τος.* Quae cauffa fuit cur fubfequuti librarii, eas litteras omitterent. De observationibus ad jus Atticum & Romanum tuis expecto, quam mox fim nuntios accepturus. Vale & me ama. Daventriae. raptim. vii. Id. Mart. ciccxcxlv.

EPISTOLA CCCLII.

JOH. FRID. GRONOVIIUS

*Claudio Salmafio.**Leidam.*

Nobiliffime Domine. Fateor vix ullum fatis honeftum praetextum inveniri poffe, quo tam ingrata mea tarditas, tam luculentis praefertim muneribus tuis honorata, graviffimae culpae infamiam effugiat. Itaque a primo ftatim jus omne meum & cauffaria praefidia remitto: veniam peto, oroque ut hoc peccatum fupplici condones, & fine ulla finiftra fufpicionem meam accipias. Non enim negligens fui, aut de religione illa, qua te femper veneratus fum, quicquam imminutum eft: fed profecto praeter quotidianas occupationes extraordinariis intervenientibus auctas, ita me tenuit tenetque diftrictum penfum Livianum, ut nifi fummus pudor inftaret imperaretque, ne nunc quidem prolatare refponfum defifterem. Cupio enim nimis effe aliquid in ea opella, quod tibi probetur. haec me follicitudo ufque adeo urget, ut pene nihil aliud cogitem, & quoties aliud agere cogor, faepe quid agam aut quo me vertam, nesciam. Major in dies exoritur labor, & fentio me negotio fufcepto imparem: non ingenium refpondet, non adest eruditio, quam in alio ad eam rem requirerem: non praefidia veterum librorum, in qua par-

parte nunc laboro, nancisci potui: desunt & multi editi alioque loco paratu faciles: contentione & diligentia, ut possum, tantos defectus supplere conor; dissimulare tamen apud claros oculos, quales inprimis tui sunt, non potero. Inter tantas tamen temporis angustias animique curas nihil mihi fuit antiquius quam noscere statim inclita tua dona: Itaque ¹ librum utrumque non ante deposui, quam totos non persalutassem, sed studiose, sic ut apex me nullus effugeret, perlegissem? Quid dicam? Tu quidem ubique tuus es, & ingratisissimi inscitissimique mortalium erunt adversarii tui, si non ingratis debere tibi se fateantur, quod tam multa eos docuisti, etiam ubi stultitiae suae ignorantiaeque poenas se persolvere dolent. Alii vero nos, illis forte non multo doctiores, modestiores tamen & minus temerarii, atque ad discendum quam contradicendum proniores, quidni faveamus vapulantibus, tibi vero laeti triumphum, cujus honor tuus, utilitas nostra est, destinemus? Ego quidem apud me hanc illis obrussam constitui: si tacebunt, aliquo eos numero habebo, ut non in primis, serius tamen sapientium; si redibunt, velut anus ad armillum, mentis illos desipuisse, & omne iudicium decoxisse jurabo. Cupio tamen scire quid de Mutio an Lucimone Parisiensi tibi nuntient amici, an supercilium posuerit, an vero adhuc *Σκύθης τον ὄνον*. quod quidem libenter usurpo unum ex festivissimis tuis, quibus non minus capior, quam feriis pascor. Puto autem plus hunc habere nasi, eoque difficilius illi fore contra intellectam veritatem niti: nisi forte ad rabulariam confugiat, atque inde frontem obfirmet, linguae & stylo pro litigatoribus contra animi mentem loqui solitis errores suos colorandos deleget. Quamquam enim ista, ut ait leno Plautinus, latrocinentur, & argentum poscant praesentarium, nec nisi sonantibus locellis servire soleant, vereor ne vel domino gratuitam operam negent. Alterum genus, etsi supra sensum communem, quem verissime allegas tot evidentissima argumenta aeterno silentio damnare deberent, tamen haud scio an agnoscere illos pudorem suum patiatur extrema barbaries, & studiorum infelicitas. Summa est, dolerem te illis quamvis illaetabilem famam dedisse, nisi melioris doctrinae capacibus tantum profuisses. Nam quod me jubes fateri, siquid offenderis; ego vero nihil, quod quidem intellexerim, non cum summo applausu percepi. Quod ut scias me ex animo dicere, non celabo quid mihi dubii occurrerit? Non persuasus sum plane ² de *paëtibus conventis* apud Plautum: *jaëcturas* vero apud Caesarem & Hirtium mutari non debuisse propemodum credo. Non enim ignoras apud Ciceronem pro lege Manilia. cap. 22. *qua cupiditate homines in provincias, quibus jaëcturis, quibus conditionibus proficiscantur*. Pro Cluentio: c. 8. *primum illum indicem pecunia corrumpit: deinde ipsum Aurium non magna jaëctura facta, tollendum, interficiendumque curavit*. Pro Flacco. cap. 5. *Qui comitatus in inquirendo? Comitatum dico? immo vero quantus exercitus? quae jaëctura? qui sumtus*. Pro Caelio c. 16. *Nulli sumtus, nulla jaëctura, nulla ver-*

Tom. II.

Iiii

su-

¹ Intelligit Observationes *Salmasii* ad Jus Atticum & Romanum, contra *Heraldum*; & Dialogum de Coma, inter Caesarium & Curtium, utrumque opus hoc anno editum.

² Vid. Observ. ad Jus Att. p. 803. 804.

sura. Pro Rabirio Posthumo c. 16. *Non turpibus impensis cupiditatum atque ja-*
Eturis. Quae³ olim congeffi ad defendendum illum ex orat. pro L. Manilia
 locum contra *Andream Scottum*. Propemodum tamen dico. Nam expecta-
 bo quid responsurus sis. Omnibus aliis libens manum dedi: neque ambigo
 quin quod mones, apud Livium rectius sit *peditum* quam *velitum*: Malloto-
 rum & Psilonum elegantissimam fabulam in Curtii & Caesarii dialogo nuper
 quoque hîc cognovimus: placuit permultis, sed auctorem solus ego & statim
 deprehendi. Audio typographo Servium Danielis una cum Virgilio edere pa-
 ranti dedisse te exemplar tua manu olim emendatum: Velim scire an verum
 sit, & quam mox speretur opus perfectum fore. Vale vir divine, cum tuis,
 & ut tunc erat, cum tuae darentur (quod opto nunc aliter se habere) pedibus
 te tuis jucunde porta. Daventriae. v. Kal. Jul. c1c1ccxlv.

3 In libro de sestertiis, quae nunc leguntur lib. iv. de Pecunia veteri cap. 4. in fine.

EPISTOLA CCCLIV.

JOH. FRID. GRONOVIIUS

Claudio Salmasio.

Leidam.

Nobilissime Domine. Ante paucos dies prolixè ad te scripsi. Eas litteras
 ad *Elzevirios* curandas misi, a quibus peti jubere potes, si ipsi, ut so-
 lent in hujusmodi officiis, lentiores fuerint. Haec non tam mea causa, quam
 illius, qui tradidit tibi, *Nicolai Frisii* Dani, juvenis honesti & bonarum ar-
 tium perstudiosi, qui vidisse te & alloqui sibi magno honori existimat fore, &
 quia iter in Galliam adornat, si qua habes mandata & libenter suscepturus,
 & diligenter curaturus est. Id ego de illo recipio tibi, oroque, quamvis ora-
 re non esse sciam necesse, ut brevem humanitatis tuae ei copiam facias. Va-
 le & me ama. Daventriae v. Non. Jul. c1c1ccxlv.

EPISTOLA CCCLV.

JOH. FRID. GRONOVIIUS

Claudio Salmasio.

Leidam.

Nobilissime Domine. Qui has tradidit tibi, *Lucas Langermannus*, frater
 est illius, quem ante hos sex menses allegavi tibi, cognati mei, adole-
 scens egregius, & multo majore, quam frater, in litteris profectu: cui in-
 primis imputare soleo, quod tui tuorumque prae omnibus aliis scriptorum re-
 verentiam imbibit. Ergo revocatus a parente priusquam redeat in patriam,
 Leidam hac praecipue de causa excurrit, ut cujus e scriptis, adhuc tamen me
 interprete, plurimum profecit, longe plus autem lectione profecturum se pro-

vectiorem sperat, ejusvisi salutatique ad suos referat gloriam. Dabis igitur hoc illius studio, dabis spei, quam de illo maximam concepi, dabis denique meae commendationi, ut tantulum temporis, quo sacri oris tui effigiem animo figere, & verba paucula pro profectu ex oraculo servanda excipere posset, eripi sanctis studiis tuis non indigneris. Augusto munere tuo (quia nauta, cui fasciculum librorum huc vehendum Amsterodami tradidi nondum appulit) necdum sum usus: itaque necdum scribo, quid tibi debeam, aut inde profecerim. Vale cum tuis, & secundos semper nuntios a sanctissima conjuge, donec ipsam salvam, accipe. Daventriae a. d. vi. Kal. Octob. Jul. cicoxcxlv.

EPISTOLA CCCLVI.

JOH. FRID. GRONOVIVS

*Claudio Salmasio.**Leidam.*

LAudo vocem excelso animo dignam, nec convitiis deprimi, nec laudibus extolli: sic decet, qui omnia in se & vera virtute posuit. sed utinam hoc eo usque diceres tibi, donec animum induceres tandem omnes illos minutos oblatratores silentio & neglectu punire. Neque enim aliud agunt, quam ut vel de foricina naenia confessionibus dicat posteritas, ausos tamen adversarium *Salmasium* mereri. Et magis sunt tum stupidi tum pertinaces, quam ut ratione possint convinci. At muscae comedent istos, si tu exerere adversus eos manum defines. Doleo & excrucior in pinnigero non corpore exerceri illa tela, abjecta gloria. Quantum interim vitae aufertur, quod prodendis praeclaris illis & magnis, quae abs te uno expectamus, vindicare & proferre poteris? Neque ego negem, ista quoque, quae inter paedagogos istos municipales nos doces, eximia esse & te digna. Tamen multa fortasse non diceres, nisi contra tales; & sunt alia, tua quoque confessione majora, quae jamdudum tempora tua exposcunt. Fuerint ergo necessaria illa, quae praecesserunt. In posterum certe, qui discere nolent, inscitiae suae relinquantur; & maledictionem vel ob id, quod contemptui est, paenitentia puniant. Neque facile quidquam ultra proferent, quod ex illis, quae antea monuisti, non possit redargui. Ita mihi certe visum in vero illo, tandem non amplius asino, Lucio, quem nuper huc attulit quidam collega meus. sed velim scire qui sint isti fidi amici tui ostentatores tuarum litterarum? Hunc potius instructum credam ab eo, quem designas, quam istum Germanum: etenim si vellet ei placere, saltem uno convitio futilissimus homo abstinuisset, equitis puta *Calamaris*, quod in eum & illos nuper nobilitatos longe aptius quadrare novit. sed, per fidem! de illo ipso cymbalo quid sentis? Ego certe longe pluris hoc in genere certe facio tuum foederatum, aut ille etiam, de quo elegantissime Simplicius Verinus, quam hunc, qui nunc solus placet. An unquam bene Latinum, & non aut soloecismi aut prodigiosi sermonis plenum carmen scripsit? Illud ipsum,

cui pagina scripta Solini est, quid vult, aut quis sic loquutus? Jam *circulus orbis laudari* si in Gallico aut Italico carmine legeret. sed quis sic Latinorum? Audio tibi responsum esse: nondum vidi. an potuit salvo foedere vestro tangi chorda de hellenistica. Ego cum proximis feriis de Tragoediis Senecae cogitarem, denuo perlegendis philosophicis ejusdem auctoris stylo me familiarem reddere volui. Memini dixisse te mihi Nazarianum Codicem quorundam librorum longe omnibus caeteris praestitisse. Id nunc maxime verum deprehendi, & quam vane conjectent doctissimi viri, dum nulla illius ratione habita librorum jam depravatorum in lectionibus emendandis sunt. Cupio in posterum frequentiores & dare ad te & accipere abs te, Vir maxime, si id a te impetrare possum, ut spero: nam cum tanta tempora improbis hominibus concedas, quare non aliquid vere tibi amico concederes? habeo coacervata multa nimis, de quibus consulere te volo, neque alium possum. Et nunc quoque aliquid adderem, nisi instaret importune, cui has sim daturus. Unum tamen me doce. Cujacius lib. XXI. c. 29. Observ. notat *permittere* esse interdum *remittere* & vicissim: habetque ejus rei complura exempla. Equidem ut de verbo *remittere* concedere possum, id interdum poni, ubi alterum locum haberet. Ita non possum persuadere mihi, *permitteri accusationem*, pro perimi vel remitti, *permitto jus jurandum* vel *pecuniam*, pro remitti Latinum esse: & potius credo omnia ea loca ab librariis esse vitata. Quin & apud Ovidium lib. XI. malim. *sed mora damnosa est, & res dubitare remittit*. Rogo fac sciam quamprimum quid tibi videatur & vale, cum tuis, Nobilissime & venerandissime Domine. Daventriae festo Ascensionis. CIOICXLVI.

Lacera multis partibus haec Epistola erat, itaque verba quaedam deerant, quae, ut sensus constaret, supplere tentavimus.

E P I S T O L A CCCLVII.

J O H. F R I D. G R O N O V I U S

Claudio Salmasio.

Leidam.

Nobilissime Domine. Raboldus Hermannus de Schele, cum nudius tertius hac transiret, has uti ad te curarem, mihi mandavit. Is juvenis est Graecas Latinasque literas & universam antiquitatem ad miraculum doctus: eoque illorum, qui serio literas colunt & coluere, tui vero ante quotquot hos, quoque observantissimus: ea praeterea morum elegantia ac simplicitate, sermonum ac familiaris usus suavitate, animi magnitudine, judicii acrimonia, ingenii vivacitate, styli venustate, pondere, acumine, ut ego in tota nobilitate Germanica (est autem non ut illi, quos nuper risimus, sed ab omni memoria nobilissimae sine controversia gentis) par exemplum, neque viderim neque audiverim. Et quamvis illa, ex quibus praecipue ipse se aestimandum censet ille, tu quoque satis ex uno colloquio deprehenderis, tamen ego, diuturni-
ta-

tate consuetudinis nostrae certius horum testimonium perhibere possum. Ita quoties in hanc urbem venit, totos dies una sumus, neque unquam conspectu aut garritu alterno exsatiamur. Id eo potissimum accidit, quod & ille & ego vitam inter eos agimus pleramque, apud quos de secretis studiis nostris verbum facere non audemus, nisi aut data opera inepti omnem aetatem haberi, aut ut mitius plectamur, peregrina loqui videri velimus. Ergo quoties hoc magnum bonum a superis datur, ut jungamur, rapimus gaudia pariter & effundimus, & unicum certamen est uter altero magis fruatur. Nihil illic simulatum, nihil compositum, & hoc potissimum placemus, quod utrimque patemur, nec quo probemur mutuo, aliunde quam a nobis petimus. Quoties vero & tu deliciarum nostrarum consummatio fuisti, & cum gloriari libebat, jactantiae argumentum erat, quis plura ex tuis scriptis didicisset, quis diligentius te magistro uteretur. Itaque etsi ipsius satis acre desiderium esset, tamen meam adhortationem vel praecipuam causam fuisse certum habeto, cur abs te ignorari diutius nollet. Quod quidem ut ille summo honori sibi ducit, ita mihi credas velim, vir maxime, te cognoscere jam & acquisivisse unum virtutum tuarum intelligentissimum & studiosissimum cultorem. Rogoque etiam atque etiam, ut quamprimum tua commoditas feret, responsione, quae mea de tua humanitate promissa confirmet, digneris, easque litteras ad me mittas. Cum postremum scriberem, constitueram quasdam in Seneca observatiunculas facere judicii tui, quasdam etiam quaestiunculas proponere: sed finire coge-
bat tabellarius. lib. vi. de benef. c. 31. *tantas minas belli & pene totius generis humani ruentis impetum paucissimi sustinebunt.* Gruterus notat in tribus MSS. esse *sustinent.* Et sic emendatum in Naz. cum a manu prima fuisset: *paucissimis stent.* Vides optimum librum velle: *paucissimi sistent?* Eodem lib. cap. 35. invehens in eos qui amicis imprecantur aliquid adversi, in quo se memores beneficii approbent: *Nemo, ut existimo, de immanitate animi tui dubitaret, si aperte illi paupertatem, si captivitatem, si famem ac metum imprecareris. At quid interest, utrum vox ista tua sit, an votum?* variant codices: variant editores: sed Naz. *Aliquid interest utrum vox ista sit voti tui.* Recte, modo subjiciatur nota interrogationis, & aliquid accipiatur pro *an aliquid* vel *aliquidne.* Vox voti est conceptio & formula. Sermo praegnans & brevis: an interest aliquid, utrum isto modo concipias votum de amico: nempe ut ei aliquid eveniat adversi: an hoc proximo, nempe aperte, ut ei paupertas, captivitas &c. eveniant. cap. 36. *Nihil debet Scipioni Roma, si Punicum bellum ut finiret, perseverare maluit.* Rem magnam docet Lipsius, *perseverare*, esse durare. At Gruterus ita esse in uno tantum scripto: in duobus: *perseveravit.* quod fere probat. Naz. hic esse mancum, nam loco duarum illarum ultimarum vocum habere tantum *aliud.* Ego malo hunc mancum, quam tres mangonizatos. docet enim me scripsisse Senecam: *Si Punicum bellum ut finiret, aluit:* cap. 37. *Non servat grati hominis affectum, qui bene de se merentem difficultatibus vult opprimi, quas ipse submoveat.* Dictio, *opprimi* exulat Nazar. cod. extat tamen, uti debet, in aliis MSS. sic Gruterus. Immo non debet: plus credo Naz. quam aliis viginti. Innuit au-

tem ille scripſiſſe Senecam: *qui bene de ſe merentem in difficultatibus vult, quas* Per ellipſin verbi ſubſtantivi. cap. 38. *Agricolam annonae caritas erigit: eloquentiae exoptat pretium litium numerus.* Quid non hic conjectant. At ego cum Naz. probo: *exceptat.* quod & Codex Eraſmi Long. & Pal. alius habuiſſe dicitur. *Excipere vel exceptare* interdum eſt obſequi. Quid ergo difficile? Litium numerus ſubſequitur honorem eloquentiae: ubi in pretio homines diſerti, ibi multae lites: nemo enim, tum certe, cauſarum patronis eloquentiam magis exercebat. Non pauca ſunt ſimilia: ſed haec ſi probaveris, laetabor. ſin minus, laetabor ſimul & docebor. Sunt etiam in quibus nihil video, niſi oculos tu mihi aperias: ſed differo, ne te onerem, atque eo citius binis meis & unici mei *Schelii* literis respondeas. Vale, vir incomparabilis & de tuis rebus ac ſtudiis fac quaero quamprimum cognoscam. Daventriae. a. d. 111. Kal. Jul. Julian. *cicidcxlvi.*

EPISTOLA CCCLVIII.

JOH. FRID. GRONOVIVS

*Claudio Salmaſio.**Leidam.*

Nobiliffime ac maxime virorum. Ita me attinuit proximos hos meſes ſubceſſiva illa opera, quam me exorſum haud ignoras, ut perpetuo meditando & ſcribendo feſſus in litteris dandis omiſſior eſſem. Neque enim oportet te meam impotentiam ex tua facilitate & indefatigabili alacritate metiri, qui quanto minus ſum inſtructus ad ea, quae amore potius ſtudioſorum & impetu quodam inconfulto quam peritia ſubinde molior, tanto plus temporis impendo & lentius ad omnia progredior. Perveniri tamen aliquando ad umbilicum & ſchedas miſi ad amicum, qui primum cum typographo egit, & cum futurum in officio pollicetur. Etſi cum iſe ipſe ſit, a quo ante aliquot annos me deſtitutum ſcis, cujus arte, adhuc dubius expectem, quid ſit eventurum. Nunc reverſus ſum ad Senecam & ſpicilegium meum compono, quod certiore ſpe *Hackio* & *Ludovico Elzevirio* promiſi. Atque adeo nudius tertius immiſcebam meis obſervationem tuam elegantiffimam & veriſſimam de *Chlamydatiſ* & *Coronatiſ*. Si vicinioreſ eſſemus, id potius agerem, ut plura talia abs te elicerem, & propriis tuis ac graviffimis curis ſuffurarer, quam in me ipſo aliquam ſpem haberem. Nec dubito ſic me melius de auctore tanto meriturum. Quod quando non licet, haecenus indulgebis mihi, ut de nonnullis certe, quae literis exquiram, me erudias, & hanc ſolam venerem doctrinarum tuarum lucubratiunculae noſtrae largiari, quin nunquam me, ubi te produxero, tanquam Hylam Alcidae litigantem ponam. Conſolatione ad Marciam cap. 20. *Ad breviffimum tempus editi, cito ceſſuri loco, venienti in paſtum hoc proſpicimus hoſpitium.* Quid illud venienti? quid proſpicimus? nihil differunt codices Gruteri. Eodem capite: *Fixus eſt cuique terminus: manebit ſemper ubi poſitus eſt: nec illum*

*ulterius diligentia aut gratia promovebit: scit libenter illum ulterius diligentiam ex consilio perdidisse. Erasmus addidit: scit illum libenter ex consilio perdidisse. Duo Pall. positus est; nec illum ulterius diligentiam ex consilio perdidisse, omissis mediis. Alius: scit libenter illum ulterius diligentia consilio perdidisse. Unus: sic habent illum ulterius diligentiam ex con. perd. Quid hoc monstrorum? lib. 1 de Clementia cap. 4. Cum ille (animus) imperavit, sive avarus Dominus est, mare lucri causa scrutamur, sive ambitiosus, jamdudum dextram flammis objecimus, aut voluntarie subfiluimus. Naz. voluntariam. quasi ad dextram referatur, sed quid est tamen? Relegi & nuper ea consideravi, quae de lecto summo, medio, imo, praeclare & primus nos docuisti in Plinianis. Omnia capio egregie & assentior, & Plutarchi Sallustiique loca explicari aliter nec posse, nec debere, certum habeo. sed non possum cum illis conciliare locum Ciceronis lib. ix. famil. Epist. 26. & Horatii in caena Nasidieni: Idque te mihi facere pro magno aestimarem. si desideras dubitationes meas, quamquam non opus est, & inspectis verbis satis apparebit, quid mihi aut alii incidere possit, proximis eas proponam. Tuas ad *Schelium* domum redux una cum illis, quas ad me scripseras, statim misi, fane longe illi gratissimas: nec adhuc alteras recepi: nam cum hîc esset, oblitum se eas dicebat. De cruce prodiitne? & quid nunc maxime moliris? Vale, vir divine, cum omnibus tuis, & recordare nostri. Daventriae. a. d. viii. Kal. Februar. Jul. ciciocxlvii.*

Sarravius an redierit Lutetiam scire aveo: habeo unas ad illum a *Fabricio*.

EPISTOLA CCCLIX.

JOH. FRID. GRONOVIIUS

Claudio Salmasio.

Leidam.

Nobilissime Domine. Jamdudum in mora sum tibi, cujus causarum ut singularum pulchre mihi constare ratio visa est, ita nunc universarum minime constare videtur, quod de diebus fieri Romae queritur alicubi Plinius. Itaque exponendis iis non te tenebo, quando ne nunc quidem multum otii superest: spero autem pro cognita tibi mea erga te observantia non te dubitaturum, satis fuisse graves, quae effecerint, ut tua mandata tardius habere curae potuerim. habes hîc libellum amici nostri, cujus lectionem aliquid voluptatis allaturum tibi spero. Atque etsi de optimo genere dicendi (nam & me diversum non nihil sentire non ignorat auctor) forsan aliter sentias, tamen egregii sensus & quae placent in partibus, etsi filum totum corporis minus placeat, iudicium tuum supplantabunt. Quis enim hodie praesertim istas materias tractantium, sic scribit? aut sermonem habet, si non liberae, at certe non diu regnatae Romae, tam adpropinquantem. Nec repugnant tua illis, quae nunc disputantur. Scripta sunt enim, quo tempore nonnulli majore specie quam animo rem incaeptare videbantur: nunc haec concessa sunt & consensa utrimque:

que, citius an tardius, nisi maturius mavis, salubria sint, quaeritur. Et est ille tam magno animo, ut etiam in hac quaestione, & amicos & bonos cives diversum sentire illibata amicitia salvoque amore utrorumque in Rempublicam posse existimet. Sed haec ingerentem me paene fastidis: Itaque desino. Significavit mihi *Isaacus* noster cupere te videre Collationes Manilianas, quas e Venetis membranis non malae, ut videbatur, notae excerpsti. Itaque libellum mitto, sed quando ipse quoque videre illas desiderabat, non inclusum huic fasciculo, hac tamen conditione ut quamprimum eum ad te destinaret. Utinam, Vir maxime, esset aliquid in potestate mea, quod te juvaret! Scires nihil esse mihi tam carum, ut id tibi debere gravarer. Abstuli Amsterodamo mecum MS. chartaceum Suasoriarum & Controversiarum M. Senecae, & in conferendo caepi singula attentius excutere. Succurrerunt non pauca, quae belle emendare visus: sed de toto libro quid dicam? O stabulum Augiae! atque utinam suppeditare velles, quae ipse forsitan per lectionem in eo notasti. Nam ut expectes quaestiunculas meas, frustra es. ubi inciperem? ubi desinerem? Liber scribendus esset, non epistola: adeo passim ubique sentes, ubique scrupuli. Gustum tamen habe nugarum mearum. Controv. xxxiv. non longe a fine: *Non minus stulte Aemilianus quidam Graecus Rhetor, quod genus stultorum amabilissimum est. Hexarida fatuus dixit &c.* Tacent diligenter Commentatores: bonus etiam *Schottus* in indiculo Rhetorum fecit quendam *Hexaridam*. Sed an non verum est: *amabilissimum est ex arido fatuus*. Saepe meminit aridorum declamatorum: quae exempla tibi subicere non est opus. Sed neque *ex arido fatuus* esse dictum, ut paullo ante: *ex captivo cocus, ex coco leeticarius*. Significat enim hominem aridum & jejunum, quum superare se ipsum vellet & aliquid eximium dicere, in aliud vitium fatui sermonis delapsus. Mox: *Hispo rideon honeste. Romanus fecit: multo enim vehementius insanit quam nostri fanatici*. Magnus *Nic. Faber* legit, *Spiridion honeste minus fecit*. Saltem recte quod *Spiridion*: fuit enim Rhetor Glycon, cui id cognomen: confirmantque verba paulo post sequentia. Pejus *Schottus* eo quod hoc non intellexit & de Hispone Romano dictum putat. Sed superabo ipsum *Spiridionem* conjectura (liceat apud te) fanatica: *Rideon* dictum esse graeca figura pro ridendum est, quasi γελασέον. O stuporem! scribendum: *Spiridion iste Romanos vicit*, scilicet declamatores stupida & absurda sententia. Vel isto nisi mavis stupore: nam de his apicibus haereo, cum caetera sint certa. Est enim post paucos versus ubi significat nihilo melius *Murrhedium* dixisse: *Sed nolo Romanos in ulla re vinci. Restituet aciem Murrhedi, qui dixit &c.* Quamquam quae mox sequuntur, aut defecta aut vitiata existimo, nec curationem invenio. Utinam posses induci, ut totidem tuas aut plures mihi redderes. Vale, vir incomparabilis, & si mora mea bilem tibi concivit, placare & ignosce. Daventriae. III. Kal. Jun. CIOIOCXLVII.

JOH. FRID. GRONOVIIUS.

Leidam.

Augustini librum si mittes, poteris Amsterodamum destinare ad *Ludovicum Elzevirium*, ut ille ad me porro curet. Utinam impetrem! si tamen non potest commodo tuo, nihilo me devotiorem habebis. Ita valde volo quod volo, ut nihil amicorum incommodo velim. Iterum vale.

A. COLVIUS

Leidam.

Tom. II.

Kk k k

adeo

adeo mihi non favere videris; quasi ipsorum proprium sit ineptire, quod illos putant, qui ad illum gradum criseos aut literaturae non pervenerunt, quo ascenderunt illustres illae animae, quas heroas vocant, solos aeternis laudibus dignos. In praefatione ais, *Quis hoc credat, exceptis Theologis?* Qua phrasi etiam videris uti, ubi de D. Heinsio loqueris, *Quis hoc posset dicere, nisi hic?* p. 157. tanquam de futilissimo mortalium. *Quis dubitare posset, praeter Theologum?* p. 284. *Illud impertinens etsi Latinum non sit, nisi sit Theologicum.* p. 372. Ego non existimo te ita judicare, quod esse Theologum & literatorem sint dicendum. Omitto Patres, Hieronymum, Cyprianum, &, in quem ipse scripsisti, Tertullianum, &, quem prae manibus habes, Arnobium: an non Erasmus, Melanchthon, aliaeque illustres animae istius saeculi fuisse literatores? Certe male habet communem nostrum amicum D. Vossium, quod focerunt ejus D. Junium Theologum Gallum, olim vocaveris *terrenam bestiam*, qui a multis habetur aquila in nubibus. certe subtilitate ingenii multis non cedit. Et ut mortuos praeteream, an non, quem jam nominavi, Vossius, Theologus? Grotius, etiamsi summus Jurisconsultus & literator, D. Spanheimius, D. Petitus, an non Theologi & Critici? Subordinata ergo haec sunt, aut saltem esse debent, non pugnancia. Haec obiter, quae facile condonabis Batavo, amico, &, si ita licet addere, Theologo, scribenti Salmafio, qui ut liberrime aliorum annotavit errores, ita & sibi fieri ab amicis vult & petit. Nosti dictum Sapientis, *Meliora esse vulnera amici, quam fraudulenta blandientis oscula.* imo ipse tanquam viles animas rejicis adulatorem. Quod ad ipsum opus attinet, in eo multa praeclara invenio; & libens fateor me non videre, quid responderi possit argumentis tuis e Scriptura, Patribus, Conciliis, jure civili, & rectis rationibus petitis: per quae omnia, luculenter ostendis, quod Trapezitae, modo intra cancellos a Magistratibus positos maneant, ad Sacram synaxim admitti debeant. Obiter etiam multa S. Scripturae loca difficilia, & haecenus non bene intellecta, explicasti. Sed non omnes faventes habebis in eo, quod sub finem tractas de pane *ἄρτος*. Quod si interpretandus, ut putas, tunc certe multi male oraverunt, orant & orabunt. Magna pietatis portio est, victum corporis solida fide a coelesti Patre orare. Hoc Jacob fecit Gen. 28. Salomon Prov. pen. Quod si omnes essent sine cura corporis, tunc omnes essent spirituales. Tales autem omnes nec possunt esse, nec debent; ut loqueris p. 339. Nec puto te sentire orationem hanc tantum praescriptam Discipulis, ut de sermone habito in monte videris affirmare p. 309. Nam tunc caeteri non deberent quotidie fundere has preces ad Deum Patrem ipsorum. Non video quomodo conciliari possint quae scribis p. 337. 338. Omnes ad perfectionem teneri. Utinam, possent. & in seqq. dicis non omnes posse esse spirituales, nec debere. Quicquid sit, charitati omnes debemus studere, quae est vinculum perfectionis. haec nos facit filios Dei, & discipulos Christi: sine ea sumus *σαῖντοι*, qui sunt rixosi, pessimi, & nomine tenus Christiani, ut ipse fateris. Christi dictum Matt. 5. omnes tangit: *Qui dixerit fratri suo Raca, obnoxius erit concilio: quisquis autem dixerit, Fatue, obnoxius erit*

incendio gehennae. Illa sententia est terribilis. Christianorum est diligere inimicos. Omnibus dictum, *Quod tibi nos vis fieri, alteri ne feceris:* ut ostendis p. 463. Petrus alloquitur omnes fideles, omnes unanimes illos esse vult, fraternitatis amatores, non reddentes malum pro malo, nec maledictum pro maledicto. Magnus est Theologus coram Deo; non qui docuerit tantum, sed & fecerit Matt. 5. Criticorum est explicare sed Theologorum applicare. Dicam libere & amice cur pro uno maledicto *Sycophantae*, quod in genere prolatum, tot reponis? Cur clavum clavo vis retundere, si hoc Magister noster non vult? Christianorum non est delectari erroribus fratris, sed potius condolere, & revocare eum in viam per spiritum dulcedinis: Risum tibi movet Criticus, p. 460. Volupe fuit videre monstruosam interpretationem p. 662. Ubi ergo illa charitas, quae non irritatur, non cogitat malum, non gaudet de injustitia, sed congaudet veritati? Interdum doctum, acutum, interdum fatuum & ineptum, ad delirium usque vocas Criticum. Et si summi Critici tam saepe & tam crasse impingunt in propria, quid mirum Theologos interdum labi circa aliena? Circa finem objicis illi corporis exiguum staturam, nominando illum *ἀνθρωπίκουον*, quasi vero in potestate nostra sit aliquid addere corpori nostro. hoc est accusare eum, qui fecit nos. Haec sunt Theologica. nam praestat unum mandatum adimplere, quam omnia recte interpretari. Ego malim sanus esse sine cognitione morborum, quam omnes morbos nosse sine sanitate. Augustinus ait. *Veniunt indocti & rapiunt regnum coelorum, nos autem cum eruditione nostra mergimur in infernum.* Scribendo in proximum plus peccamus, quam maledicendo, quia scripta ad plures pertinent, & ad posteros transmittuntur. Deinde & risui exponitur apud vulgus ipsa eruditio, ubi tot dissidia inter doctos esse animadvertunt. & ita perit praecclarum illud nomen & gloria, quam Critici tantopere affectant. Sperandum, ut a D. Riveto intellexi, in posterum vos firma amicitia unanimes futuros. Quod faxit Deus pacis: Certus sum, si bene perspexi heroicum illum tuum animum, a me divulgum non iri, quia liberrime protuli animi mentem, sed majori in posterum vinculo conjuncturum cum eo, qui te intime colit, & summopere aestimat. Precor Deum, ut te per longos annos nobis & Reip. literariae incolumem servet. Dordrecht, 19. Julii, 1640.

E P I S T O L A CCCLXII.

J O A N N E S S E L D E N U S

Claudio Salmasio S. P. D.

Leidam.

PEr incerta, quibus adeo passim distrahimur, temporum, aut nescio unde accidisse videtur, (hujusmodi per plurima jam accidunt) meas sub initium Julii nostri datas ad manus tuas, Vir Amplissime, non pervenisse. Summas tibi agebant illae gratias ob munus praestantissimum de Annis Climactericis.

K k k k 2

Opus

Opus fane, quod antiquae in universum Astrologiae praemissum est uberri-
 mum. ut ignoscas etiam obsecrabant, quod non tempestivius, quantum ad
 editionem illam, ad te allatus fuerit Vettius Valens noster. Causam jam ante
 retuli, quae inevitabilis erat. sed spero, ita operi tuo alteri Astrologico, quod
 ut quantivis pretii merces avidissime exspectamus, ex eo quamplurima etiam
 & de Climacteribus nonnulla subministranda fore, ut quidquid in edito locum
 habere potuisset ullum, etiam in hoc admodum satis potuerit fortiri. Quod
 ad Talmudis Hierosolymitani in bibliotheca Leideni exemplar attinet; imma-
 ne quantum angor animi cruciorque (quod & in illis significavi) quod aut a
 te aut ab Viro eximio, multisque mihi nominibus colendo *Constantino L' Em-
 pereur* credi videretur ea de re, me ante certiore factum & jam velut osci-
 tanter immemorem importunius aut petulantius, ne dicam impudentius mole-
 stiam tantis viris denuo faceffisse. hujusmodi quid meum non est, esse nequit.
 Deum testor, nunquam ante quidquam ea de re ad me relatum, licet aliquo-
 ties ab Viris nonnullis Leidam hinc abiturientibus id sollicitius sed frustra, ali-
 terque etiam poposcissem: sed jam abunde mihi de primo satisfactum est. &
 maximas vestrum utrique eo nomine gratias habeo. Impense autem doleo
 chiragram adeo infestasse dextram illam, cui tantum, quotquot literis nomina
 dedimus, debemus, indiesque magis magisque bono nostro incomparabili admi-
 ramur. Deus faxit, ut animo revertendi abacta caveat, & salus ipsa nobis te
 salvum praestet. de Vitruvii exemplari illo ante mensem, aut circiter, rogatus
 eram heic ab Viro Cl. *Joanne Morricio* nomine V. Cl. *Joannis de Laet*, cui li-
 bentissime illud communicassem ipse, si tunc omnino potuisssem. post acceptas
 jam de eo tuas aliquamdiu de eo ullo modo acquirendo (etiamsi solus ipse uti
 heic voluisssem) desperabam. sed tandem haud exigua fane cum difficultate,
 nec tamen sine nobilissimi bibliothecae illius Domini indultu pronissimo, na-
 ctus sum. & ne quid, quod conatibus vestris ibi praeclaris conducere omnino
 possit, in libraria apud nos suppellectile segniter delitesceret, cum his trans-
 mittitur; fidejussore me, tempestive restituendum. Vetus quidem est exem-
 plar, sed figuris caret. maxime autem gratulor operam tuam ita editioni adhi-
 beri, cum Architectum illum, maximorum virorum cura dignissimum, etiam
 jam olim summo studioforum commodo in Plinianis tuis toties ac feliciter,
 ut soles, refeceris. Vale, Nobilissime Vir, & amicitia tua me adeo beatum
 indulgenter sustine. Londini. Augusti xx. 1648.

EPISTOLA CCCLXIII.

NICOLAUS BLANCARDUS

*Claudio Salmasio, Equiti &c.**Leidam.*

Octavus mensis est, Nobilissime Salmasi, postquam Lugduno decedens in
 hanc provinciam veni. Peccavi largiter fateor, quod usque in hoc tem-
 pus

pus nihil datum fuerit litterarum. Non tamen ignoro, quantis nominibus tibi sim obstrictus, nec immemor quam non ingratum futurum officium in hac parte nostrum. Sed ut eloquar apud te plenum humanitate, multum temporis eripuerunt studia, & publicae privataeque curae, nec non morbus, & dolor, quem ex morte *Erpenii* gravissimum cepi. Quae causae fuere, cur animum componere haud potuerim ad compellendos amicos, in quibus tu tuo merito principem locum obtinebas. Nec ut me tui oblitum existimes, magnam partem hyemis in scriptis tuis velut imagine tua exegi, ex quibus quam multa & varia percipiose didicerim, jucundum est reminisci. Rogo autem, mi Domine, ut salva amplitudine tua descendas ad curas meas, quae bono publico litterarum impenduntur. Jus etiam benigne data dextera concessisti, referendi ea ad te, de quibus dubito. Ad quem vero potius referrem, nisi eum, qui cum optimus doctissimusque, ac inter praecipua seculi ornamenta numerandus, etiam studiorum senescentium solers reductor est ac reformator? Toga Romana olim me involutum tenuit, nunc dubitandi materiem postquam in multis exemere Veteres nummi, non potui quorundam sententiis accedere. Eam Romanorum proprium tegmen aut gestamen fuisse, sciunt omnes, qui litteras sciunt. At Etymologus *τήκενον* regium gestamen appellavit. Quomodo regibus in usu, si communis Romanorum civium vestis? neque exterarum gentium principes toga vulgo amictos ulla ratione aut colore dici potest. Eidem non infirmi auctores Romani, & inter Graecos Suidas, Artemidorus, alique non pauci refragantur. Quid mirum, si haec insolenter in aures meas cadant. De forma togae scrupulum iniecit *Aldus Manutius* in Epistola ad Superantium, qui a summo ad imum integram, nulla scissura, nullis manicis fuisse, multis argumentis adducitur ut credat. An ergo per totum clausa? an cervici ita adstricta, ut nusquam pateret? an si aperta sit, patere pectus, indecorum videtur? Atqui constat ex Plutarcho, magistratum petentes togis in comitiis sine tunicis amictos, sive quo magis ea specie se submitterent ad petitionem, sive quo subjicerent oculis, qui cicatrices habebant, perspicuas Virtutis notas. Verba ejus sunt in Marcio Coriolano; καὶ γὰρ ἔθελον τοῖς μετῖσι τὴν ἀρχὴν παρακαλεῖν, καὶ δεξιῶς τὰς πόλιν ἐν ἡμέτρῳ καπνίζοντας εἰς τὴν ἀγορὰν ἀνευ χιτῶν, εἴτε μᾶλλον ἐκτεταμένους εἰς αὐτὰς τὸ σχῆμα πρὸς τὴν δέξιν, εἴτε δεικνύντες, οἷς ἢ συμπτωταί, περὶ τὴν τὰ σύμβολα ἀνδρείας, cum hoc loco non satis convenit, quod Manutius adseruit. Nam qui potuere cicatrices, quas pro Republica militantes acceperant, populo patefacere, si a summo ad imum clausa, sine scissura, ac cervicibus adstricta? firmat & ille togae gestandae modus, qua dextera libera relinquebatur, & exerebatur. Aliam viam ingressus *Sigonius*, a *Manutio* discedit, togamque apertam quadratamque fuisse contendit. Locus, in quo arx Sigoniana causae, reperitur apud Athenacum lib. 5. cujus verba sunt. τῶν δὲ ἄλλων Ῥωμαίων οἱ μὲν θείων ἀγάλμασι προσπεκνῶνται, οἱ δὲ λοιπὸν μεταμφιεσμένοι πετράγωνα ἡμάτια τὰς ἐξ ἀρχῆς πατρίδας πάλιν ὀνομάζουσι. Per πετράγωνα ἡμάτια togas intelligit. Ego, qui haecenus graeco exemplari usus sum, nec versionem *Casauboni* inspexi, existimo Romanos deposita toga quadratum pal-

lium induisse, non vero quadratis vestimentis abjectis ad togas rediisse. consilium quippe Romanorum fuit, habitu mutato Mithridatis tunc temporis in Asia grassantis crudelitatem declinare. Idem *Sigonius* apertam ea de causa dixit, quod non aliter semicircularis esse posset. At *Dionysius* togam ἡμικύκλιον τῷ σχήματι, seu figura semicircularem fuisse scribit. Quomodo semicircularis esse poterit, eademque vestimentum Quadratum? Quadratum enim quattuor angulos, semicirculus duos tantum habet. Mirari libet politicissimi Viri μετῴριαν καὶ ἀβελήαν. Quid igitur, togane semicircularis dicitur, quia laciniosa circa oras circulum imperfectum efficit? ita mihi videtur, neque vanae, aut lubricae conjecturae praesidium ex nummis, quorum uberem copiam lustravi in cimeliis *Knotterorum*. Quadratum vestimentum apertum melius dixisset *Sigonius*, quale est pallium. Sed an omne vestimentum apertum Quadratum intelligi debet? illud constat, Festo ricinium, pallium muliebri quadratum vocari. Sic & Enothea apud Petronium sacris operatura, *incincta* dicitur *quadrato pallio cucumam ingentem foco apposuisse*; *Linnae* Gallorum veterum vestes *saga quadra* vocantur *Isidoro* lib. xiiii. 23. Idem pallam *quadrum pallium* muliebris vestis asseruit, illud ergo doceri velim, cur haec *quadrata* dicantur si communiter hac forma. An toga rotunda nominabitur, si vulgo talis? Quod autem toga Romanorum *pallium teres* dicatur *Tertulliano*, factum puto ad discrimen pallii Graecanici quod *πετράγωνον*. nec me movet *Dionysius*, cui toga *περιβόλαιον κυκλοτερές*. illud *κυκλοτερές* additum, quod *περιβόλαιον* commune nimis, & generale nomen, ac simpliciter amictum, seu *περιβόλαιον καὶ εἶδυμα* significat, auctore *Suida*. praeterea si omnia pallia quadrata, an pallia vulgaria eadem dicemus cum philosophicis? an judicabimus sola materia differre, si forma, convenient? inter haec tamen discrimen fuisse, non dubito. Haec tibi nobiliss. Domine, judicanda cum reliquis permitto, cujus subtili iudicio aut stare aut cadere paratus sum. Percupio autem videre litteras tuas melle eruditissimi pectoris oblitus. Nec id mei tantum, sed boni publici causa, quia libros de re vestiaria responsis tuis firmare non utile modo omnibus litteratis, sed & mihi gloriosum, ac honorificum duco. Vale, Vir incomparabilis, ac languentes musas fove, & me amare perge: datum Middelburgi Zeelandorum. 1653. Idibus Aprilis.

EPISTOLA CCCLXIV.

GERARDUS VOSSIUS

Jacobo Wittio S. P. D.

VIr Amplissime, cognate dilectissime. Retulit mihi D. *Polyander*, ut a Synodo Gallica quatuor hi, *Revrius* Delphenfis Ecclesiastes, *Dulcieri*us Amstelodamensis, *Pourti*us Medioburgensis, & senior quidam Amsteledamensis deputati sint ad agendum cum magistratu Dordrechtano, idque lege ea, ut si pos-

possint, permoveant eum ad novam electionem. sin cum videant in Colviana vocatione persistere, non pertendant, sed cedere sint parati, ne quid majoris mali causare ea res possit. Itaque idem arbitratur, utcumque deputati illi animose primitus rem agere videbuntur, coque magis, quia unus & alter e vestris Ecclesiasten quemvis potius e peregrinis, quam indigenam ullum malit (cujus rei causas per te vides) tamen nihil esse, quod a Synodo metuatis, cum certo futurum sit, ut deputati desinant urgere, si viderint se non evasuros hoc pacto superiores. Idem agebat, utcumque deputati detrectarent *Colvium* confirmare publice in vocatione sua, non id tanti fore, ut propterea resiliendum sit a proposito: quia sic quoque trimestri, atque semestri non concionari modo, sed & reliqua Ecclesiastae munia obire possit. ut qui tot annos jam pastor fuerit. ac propterea subsequatur confirmationem, ubi maxime commodum videbitur. quod si maligniores aliqui duri esse capitones perseverent, praesertim e pullato grege, quales aliquot se concionanti subduxisse intelligo; ne hoc quidem tanti esse arbitratur, ut dimovere de statu debeat. sese enim uti diffidio, unde gravis erat metus, aliquam, cum adesset, vobis medicinam fecit, ita si opus videatur reditu altero omne illud malum facile persanaturum. Ac proinde magistratui in omni hoc negotio tantum animis opus esse. Equidem saepe indignor mecum, quando video nullos aeque indigenis ob stare, quam externos, qui solis sibi in alieno sole bene esse volunt. nec concoquere illud cum animo meo possum, quod qui omni vita virtutem & eruditionem sociarunt, ab his aperte, ab aliis vero cuniculis oppugnentur, non alia de causa, quam quia tales vel virtute, vel doctrina, vel utraque sint inferiores. Atqui si in quoquam hoc vituperatione dignum est, sane in iis, qui pietatis ac virtutis ut praecones, ita antistites esse debent. Non potui committere, quin & de istis te certiore facerem, & simul querelam meam in sinu tuo deponerem. Filius hodie in Zelandiam abiit primo vento inde in Angliam abiturus, quod Deus fortunare illi, & omnibus nobis velit. Plurimam salutem a me uxoreque conjugii tuae lectissimae: item socru tuae, foeminarum prudentissimae, si bene sexum illum novi. Adhaec Blyenburgio praetori, Consuli Beaumontio, Secretario Berkio, affini etiam meo Corputio, eruditissimo & amicissimo Colvio, & omnibus, quibus nostri memoriam gratam putabis. Lugd. Bat. c1010cxxxviii. xxv. Sept. raptim pacne nocte intempesta. tuus Vossius.

¹ *Joannes*, quem commendat Anglis Epist: xci. & sequentibus, & de qua vid. ad Epistol. *Cunaei* c1111.

EPISTOLA CCCLXV.

JOHANNES WEVELINCHOVIUS.

Claudio Salmasio.

Nobilissime, Clarissime & Doctissime Vir. Ea est eruditionis tuae fama & nominis celebritas, tot lucubrationibus primae notae contestata, ut ne-

nemo sit paullo humanior, cui ignotum sit, quantum haec de Republica literaria meritis fueris, & quam multa a subactis tuo ingenio sint deinceps expectanda, si magnis dotibus tuis accedat etiam & locus commodus ea disponendi & evulgandi, quae jam habes affecta, & porro, Deo tibi vitam (quod omnes docti & pii in votis habent) prorogante, in bonum Ecclesiae paranda. Ea praesertim consideratio, quod donis spiritus Dei perfusus abunde, non solum eruditione summa inclarueris, sed cum ea veritatis, quae est secundum pietatem, amorem, & professionem constanter conjunxeris, te apud ejusdem Religionis consecratos, supra alios commendat, qui *τῆς ἐξωθεν* tantum *παρδείας* studio incumbentes, primum illum scopum negligunt, illam ad Dei gloriam & Ecclesiae aedificationem dirigendi. cum alium tibi plane animum esse nobis indicassent, quibus mentem tuam plenius aperuisti, & musaei tui paenetralia refoverasti, re apud nos deliberata, communi omnium nostrum, qui Illustrium Hollandiae Ordinum nomine huic Academiae invigilamus, consilio & suffragio visum est, rogare te, ut non dedigneris musis tuis sedem in ea eligere, eamque tua praesentia, collationibus cum viris doctis, & cum iisdem conversatione, scriptisque tuis aeternum victuris, condecorare. In eum finem has ad te litteras damus, tibi quoque offerimus omnium nostrum animum in te propensum, quo excipieris, non tanquam hospes, sed tanquam civis honoratissimus, & ne tuis impensis apud nos vivas, quod incivile esset a te petere, ne dum exigere, numerabuntur tibi e publico singulis trimestribus floreni nostrates quingenti, id est, singulis annis bis mille librae Gallicae. Habebitur insuper ratio impensarum, migrationis tuae, ad quam designatae sunt sexcentae ejusmodi librae, ut plenius etiam id tibi indicabitur ab iis, qui has nostras tibi tradendas curabunt, significabuntque quanto studio teneamur, ut quamprimum cum tuis te viae committas, ut ipsa incunte hyeme colligere possimus laborum tuorum fructus uberrimos ex omnigena qua polles eruditione. Sed ea maxime, quae ad antiquitatem Ecclesiasticam illustrandam spectat, & Strophas Cardinalis *Baronii* & aliorum detegendas, qui amplis suis voluminibus fucum facere conantur, & quamvis e propinquo veniant, mucido pane, & calceis detritis se remotissimos mentiuntur. In his & talibus pro tua prudentia apud nos versaberis, ut speramus, in honesto otio, & quiete, nemine studia tua interturbante, cum plena libertate, ut tua exarandi, sic eadem evulgandi. Quam ut tibi plenam apud nos cupimus, sic etiam a te id stipulari, ne postquam nobis semel tui usuram feceris, postea alio in has provincias velis migrare, aut de alia vocatione agere, nisi prius re communicata nobiscum, qui quem semel obtinuerimus, non facile patiemur a nobis avelli, sed omnibus benevolentiae vinculis alligatum retinebimus. Accede ergo cum bono Deo, ad eos, apud quod absens merito tuo magnus es, qui praesentem amplectentur & fovebunt, & eo prosequantur honore, quem virtus, & eruditio tua jamdiu apud animos nostros concitavit praesenti deferendum, cum omnibus

hu-

¹ *Johanni Walaeo* hanc provinciam mandatam, ut praesens praesenti lautissimas & Heroicas conditiones offerret, refert *Clementius* in *vita Salmasii* pag. xli.

humanitatis officiis. Interea dum illucescat dies illa, quae te nobis sistet, Deum precamur, ut tibi & tuis viam facilem, & inoffensam praestet, teque diu magno Ecclesiae, & Reip. literariae bono incolumem servet. Vale. Lugduni Batavorum. xviii. Kalendas Septembris 1631. Stilo Gregoriano.

EPISTOLA CCCLXVI.

J. ERPENIUS

Nicolao Blancardo Amico Optimo.

CLarissime & Doctissime. Rogatus fui heri a Germano quodam, noto meo, quodnam hic doctorum judicium fuisset de methodo docendi discendique J. A. Comenii, cum is in his terris ante annos complures degeret, & num quos nossem, qui ea methodo, aut etiam ipso tum Comenio usi essent, exquirere id principem suum Saxoniae Gothanum, qui methodum istam in scholas ditionis suae, si satis ipsi probaretur, introducere cogitaret. In mentem tum mihi veniebat tui, amicissime Blancarde, qui aliquando, si recte memini, narraisti mihi, Comenium, cum Leidae ageret, notum tibi fuisse, eo-que etiam methodum ejus fortasse penitus perspectam tibi & cognitam esse, id itaque significavi Germano isti, recepique me quoque primo die hac de re per litteras ex te sciscitaturum. Rogo itaque, mi Blancarde, ut si quid ejus rei propius noris, quodque tuum de methodo ejus judicium sit, & si quae praeterea Doctorum de ea Judicia scias, quam primum poteris, ad me perscribas, rem mihi multo gratissimam factururus. Ajebat Germanus iste differri Comenium rumoribus, ut Apostatam Relligionis, quodque apud Polonos semet in monasterium abdidisset, quod vix inducor ut credam. Non possum autem non occasione hujusce scriptionis te monere, amicissime Blancarde, Cl. Salmasium questum amico cuidam nostro, qui ad eum visum ierat, quod tanto temporis spatio, neque coram, neque per litteras eum compellasset, id volebam ne nescius esses. De rebus Anglicis, quod te ignorare putem nihil est, cum ibi propius mare, unde ista advehuntur, degas. Leonem nostrum usque adeo omnem injuriarum sensum amisisse videri, quis non indigne-
tur? Vale, Doctissime Blancarde, meque ama. Hagae Com. 1v. Julii 1652.

EPISTOLA CCCLXVII.

JOH. FRID. GRONOVIIUS

*Nicolao Blancardo S. P. D.**Leidam.*

ORnatissime juvenis, non ignotus appellas eum, qui omnium praeclare aliquid in litteris conantium studiis ac famae mirifice favet. Tu vide, ne

Tom. II.

L111

ego

ego tibi sim ignotus, a quo nescio quae magnifica & tuis curis laudem additura exspectes. Utcumque sit tamen, quaecumque a me proficisci officia erga te possunt, omnia tibi semper salva constabunt. Itaque habe iterum quaedam, sed abrupta partim intervenientibus occupationibus, partim occasione hac, quae mihi offertur fasciculum ad te mittendi. Tu iis utere pro arbitrio tuo, & si qua de re dubitabis, aut me temere quid scripsisse existimabis, nihil gratius erit mihi, quam abs te moneri, ut vel ego tibi persuadeam, vel tu mihi, vel si hoc fieri non possit, cognitis rationibus alter alteri ignoscamus, quod sponfam utervis suam maxime amet. Amicitiam, quam offers, accipio cupidissime, & magno honori mihi duco, ejusque tesseram ac pignus libellos, quos vides, ad te mitto. Alterum, vel potius utrumque, sed praecipue majorem habeo paratum multis detractis, pluribus locupletatum ad aliam, si Deus dederit, editionem. Et sunt ibi nonnulla mihi postea deprehensa festinantis calami vestigia. Itaque si quando illo utere in scriptis tuis, si me amas, facies me consulto, neque tamen libertatem sentiendi tibi praecidere velim. Tu vero proba, refuta, quicquid & quantum velis. Malo ab amico emendari, quam ab inimico traduci. Itaque de his statues, prout tibi videbitur officio congruere. De aetate Curtii, ego vero summis viris assentior, qui Plinio minori non valde distantem ponunt, & in utroque aliquid simile aut propinquum observasse me memini. Nam de aevo Theodosiano, *ποῖον δ' ἐστὶν*? quid est iudicii ludibrium debere, si hoc non est? Male meritus est de amico suo, qui hanc sententiam ejus in acta retulit. Ego non magis Curtium aevi Theodosiani esse credo, quam scriptorem Belli Trojani, Dictys Cretensis nomine, esse Tulliani, atque adeo Cornelii Nepotis, quod alius est viri docti iudicium. Sed haec tu melius, qui si ter, quater, quinquies Curtium legeris, ut decet, quem quis edere vult, sensus communis dictabit tibi, quid de tanto scriptore sentiendum sit. Vale, mi Blancarde, & memento *ἀγαπᾶν*, me vero ama, meoque nomine magnum nostrum *Boxhornium* saluta. Daventriae Kal. April. Julian. ciccxcxlviii. Non placent mihi illa grandia capita, in quae Curtium distinxerunt. Omnem enim usum hujus sectionis tollunt, qui est facilitas quaerendi & enotandi, & necessarias tradunt illas minutas ineptias versiculorum, quae vehementer displicent, & putidae diligentiae hominumque otio suo, quod tanto melius collocari poterat, abutentium videntur. Quid igitur an facienda alia? si res integra est, suaserim, necdum enim serum esset, cum perpauci illis capitibus in citando sint usi, & habeo librum, in quo *Gruterus* sua manu multo breviora & commodiora fecit. Exempli gratia hujus libri quinti capita sunt 63. Sed si jam incepta est editio tua, hoc frustra monuero, cogitabis.

EPISTOLA CCCLXVIII.

JOH. FRID. GRONOVIIUS.

Nicolao Blancardo S. P. D.

Leidam.

Fasciculum, quem ad te misi, quin accēperis, non dubitō, Vir doctissime: adeo fido homini eum commisi: id tamen ex te cuperem cognoscere, & num pergeres in apparando munere Curtiano. Ego variis de transverso incurrentibus impeditus sum, ut non potuerim ita pergere in spicilegio, quod adornabam. Sed nec minutis observantiunculis tibi opus est. De uno insigni loco, non possum te celare sententiam meam, lib. vi. extremo in confessione Philotae. *Festinaſſe ergo ſe, dum praemium in manibus haberet. Repraesentasse consilium, cujus patrem fuiſſe auctorem ſi crederent, tormenta, quanquam jam tolerare non poſſet, tamen non recuſare.* Freinshemius hic repraesentare consilium interpretatur exponere, & quaſi re figurare, in rem praesentem deducere, dein quia libris quibusdam abest τὸ auctorem, patrem consilio dixiſſe putat Curtium pro auctore. Ego ut de posteriore valde dubito, an Curtius ita fuerit locuturus, ita priorem illam interpretationem hīc non competere ſcio. *Repraesentare consilium*, eſt exequi, in opus & effectum adducere. Caesar. lib. i. Gall. itaque ſe, quod in longiorem diem collocaturus eſſet, repraesentaturum, & proxima nocte, de quarta vigilia caſtra moturum. Cicero v. Fam. Neque expectare temporis medicinam, quam repraesentare ratione poſſimus. & lib. xvi. Dies promissorum adest, quem etiam repraesentabo, si adveneris, id eſt, non exspectabo, ſed praeveniam, & habebo quaſi ille ſit, quo aderis. Seneca. Epist. x. c. i. *Petis a me, ut id, quod in diem ſuum dixeram debere differri, repraesentem.* Sic & repraesentare supplicia apud hunc Curtium. Porro meliores codices habent repraesentare, non repraesentasse: atque haec vera lectio eſt, diſtinctione mutata: *Festinaſſe ergo ſe, dum praemium in manibus haberet, repraesentare consilium.* hoc eſt voluiſſe properare ſcelus, & exſequi deſtinata, dum pater viveret. Quae ſequuntur fortassis non tam ingenium, quam librum aliquem meliorem deſiderant: verum eſt enim abeſſe fere a ſcriptis τὸ auctorem. Duo Grutero viſi codices, cujus patrem non fuiſſe niſi crederent. Alius, quem Pal. i. appellat: *consilium patrem, non fuiſſet niſi.* Duo praeterea. *fuiſſe niſi cred.* Vide an fuerit: *conſcium patrem non fuiſſe* (nempe huius poſtremae conjurationis) *niſi crederent, tormenta, quanquam jam tolerare non poſſet, tamen non recuſare.* Videbis an hoc ſit tanti. Caeterum auctor tibi ſum, ut quandoque literis tuiſ nos inviſere ne pigreris, neque enim id fraudi futurum tibi iudico. Vale, mi Blancarde, & memento ἀνὰ δὲ πρὸς αὐτὸν. Daventriae a. d. iv. Eid. Jun. cρiθcxlviij.

JOH. FRID. GRONOVIIUS

*Nicolao Blancardo S. P. D.**Leidam.*

DEcidamus igitur, hoc est, & ego silentii tui, quod mirabar, justas fuisse causas agnoscam, & tu, quod nunc ego tardior fui, non negligentia tui, sed occupationibus meis effectum esse mihi crede. Nam quae una nobis occasio est hinc ad vos aliquid dandi, eam bis, imo ter prehensuro, & jam calamum chartae admoventi, intervenit aliquid, quo diffindere illum diem juberet: ut autem in antecessum litteras parem, quae postea, cum praesto fuerit occasio, mittantur, vix a me impetro, cum vacui temporis parum aut habeam, aut mihi ipse concedam. In locum *Isendornii* duo sunt surrogati, unus Medicus, qui extraordinarius Medicinae erat jam antea, itaque ei adjuncta est Philosophia Naturalis, alter praestans juvenis *Loënius*, civis hinc & honorati, seu Scabini filius. Quod quaeris de extraordinario eloquentiae Professore, non possum ullam tibi spem facere. Nemini extra ordinem nostrates Professoris titulum dedere praeterquam Medico: nam quia studiosorum ejus scientiae justus hinc munus nunquam fuit, neque ordinarius Professor fuit: Huic autem petenti, cum pater ejus stipendiolo a senatu conductus esset, ut civibus inserviret & Praxin hinc exerceret, facile in eo gratificati sunt. At dum *Christenius* etiamnum hinc fuit, vir quidam bonus & peregrinus quidem, sed tamen primariis civibus adfinitate junctus, multo ambitu desideravit extraordinariam juris professionem; sed nihil impetravit. Nihil hinc magni geritur: omnium, qui in hoc gymnasio quibuscunque artibus student, vix est ad triginta numerus: itaque si privatim te exercere velis illic, certus sum te plures habiturum, qui te audiant in museo tuo, quam vel tu habiturus sis vel ego habeo hinc, cum doceo publice. Si lubet excurre ad nos, & vera, quae dixi, ipse deprehendes. Noli contemnere conditionem, de qua scribis, si honesta est, si salarii justi certus es. Nihilo peiori conditione eris, quam ego hinc sum. An tu putas hinc degere ullum mortalium, cui emendationem aliquam in Curtio tuo sine derisu & traductione praelegere ausim? Denique nisi acquisitissimus ego essem, & patientissimus, & loci, quemcunque cepi, tenax, & aversus tum ab ambitu, tum a querelis, jam locum hunc tibi, si appeteres, vacuum cecissem. Non possum omnia exprimere, quae volo, sed si quando huc excurreris, plura cognosces. Vale, mi Blancarde, & me ama. Daventriae. Nonis Sextil. CXCXLVIII.

Illustri *Salmasio* & Cl. *Boxhornio* officiosam salutem. Valde desidero videre *Jac. Capelli* librum de ponderibus & nummis. Eum si alicunde excutere poteris, & usum ejus mihi concedere, gratissimum mihi feceris. Mitte meo sumtu per ordinarios nautas. Nec diu detinebo; dum haec scribo redduntur mihi literae Hanovia a curatoribus Testamenti *Philippi Parei τῶ μακαρίτῃ*, qui

qui me librorum MSS. splendido legato honoravit. Vellem hîc essent, sed spero fore; nam cum bonis viris, ut video, mihi negotium est. Iterum Vale.

EPISTOLA CCCLXX.

JOH. FRID. GRONOVIVS

Nicolao Blancardo S. P. D.

Leidam.

FActum est, quod imperasti, Blancarde praestantissime, nam & quas Benthemium destinaveras, per certos homines misi, & quae de loco Hardervicano spes esset, exploravi. Egi autem cum ipso *Tollio* (eâ enim nobis amicitia intercedit, ut nolim quicquam adversus voluntatem ejus suscipere, simulque ea illius penes plerosque Curatores est auctoritas, ut invito illo frustra contenderemus) tuo nomine nec omnino dissimulato, nec plane professo. Responsum ejus hoc fuit. *Pro fratre meo Alexandro scripsi in iis, quas pridie ad me per occasionem dederat, me enisurum, ut detur illi vel spe sola honorarii lectio extra ordinem in Graecis. Nam quando iterum futura est occasio tam capillata fronte promovendi illum, qui me patremque, ut solet in domo plena liberorum, sollicitos diu habuit? Nosti verbum omnes sibi malle melius esse quam alteri: & quanto id quidem aequius, non pro se modo, sed pro fratre, sed pro familia sua, laboranti? Ego ut Hornio sufficiar, & utramque & Eloq. & Hist. professionem sustineam, omnia faciam etiam pertinaciter, quia jure possum: Hoc si impetro, nec tamen fratrem fratri sufficere dignantur proceres, sciat optimus Blancardus, sive quisquis alius sit, quem tu aestimas, necessario bonum, me ipsi ante alios omnes candidatos, manum meam libentissime polliceri. Sic ille. in Curtium habeo non pauca, quae otiosior descripta ad te mittam, sed ante omnia velim in editione tua quaedam aboleri, quae adolescenti mihi elapsa, & e Freinshemio a te relata invitus video. Ut pag. 352. deleri potest. Pulcherrime alter MS. &c. usque ad τὸ reperitur. Pag. 445. ista, sed defendit receptam &c. usque ad interponere. Si quid ibi de me vis potius hoc sit. Videtur legendum abstinere, & τὸ suis non ad Macedonas, sed ad τὸ corporibus referendum. Sua corpora, sunt ingenua, non serva, quae sui juris sunt. Verbum Jctorum. Horatius Vindicta postquam meus &c. id est, liber. Pag. 457. Cujus autem gentis nobilitatem &c. usque ad τὸ suis ederet. Pag. 571. quam pro vera lectione habeas &c. usque ad τὸ at hîc. Potes autem iterum concinnare. Armigeri. Totam hanc observationem cancellare potes. Nam illud vera, hîc non est nauci. Ego autem ambiguis notis ejus, qui MSS. Pall. excerpserat, deceptus sum. Haec inter occupationes plurimas. Si qua in re vicissim tibi tuisque studiis servire potero, confidenter opera mea utere. Vale, politissime vir, cum omni domo tua & me ama. a. d. xii. Kal. Jun. Julian. anni cicioccliv. quem tibi auspiciatissimum precor.*

EPISTOLA CCCLXXI.

JOH. FRID. GRONOVIIUS

Nicolao Blancardo S. P. D.

Leidam.

QUas nobili adolescenti dedisse ais, sive ferendas ad me, sive curandas, accepi nullus. In illum, quem rivalem tuum fuisse ais, indignationem pone. Qui solus palam de illo factum esse nescis, audi rem acerbissimam. καται Πατρικλος. ille qui literas, modo ad invidiam usque per omne liberum Belgium florentes, nunc prorsus occisas atque eradicatas nunc resuscitaturus videbatur. Ille alter, quicum agi debuisset ajebas, adeo non plus valet apud τῶν Ἀθησέων, ut invitissimo eo atque omnibus collegis, vix elato altero, interceperit locum ejus homo mihi familiaris, sed quem valde vellem, si non primoribus labris, saltem extremis digitulis literas & veteres unquam attigisset. Hoc fatum est, ex quo Palladia curant, qui egent ipsi a praetore dato. Itaque feramus publicam insaniam, tanquam unum ex praeceptis Epicteti τὸ ἐν ἡμῶν, quae ad nos non pertinent. In Curtium erant nonnulla: sed non vacat nunc scrutari meas schedas. Quae in promptu erant, misi, opinor. Et tamen etiam nescio, si quae nunc addam, an non crambem tibi repetam. Nondum me dimisit Livius: vellunt aurem quotidie de festertiis, sive Subsecivorum Pecuniae veteris Graecae & Romanae lib. III. cis paucos dies praelo dandi. circumstant adolescentes publice privatimque audiendi cupidi. Tamen paulo liberior eruam chartas. & ne nunc frustra appellaveris. lib. x. cap. VII. *intrupit regiam clamitans, suffragari Reip., de novo rege paullo ante concepto robur aetatis experirentur.* Meministi, quae ibi Acidalius, quae Cl. Freinshemius de amici sui conjectura. At vide num verius sit. *Clamitans suffragari spei de novo rege paullo ante conceptae robur aetatis. experirentur stirpem Philippi, & filium ac fratrem regum suorum: sibi met ipsi potissimum crederent.* Sed de hoc alias. nunc interpellor. De pacto cum Typographis, nolo te imitari exemplum meum. nini lenis sum: agunt mecum, prout volunt. Livii & Senecae exemplaria duodecim, notarum ad eos mearum viginti mihi dederunt *Elzevirii*. Hoc omne, quod ab illis habui, praemium. Itaque praeter ista, CL floreni persolvendi mihi fuerunt pro alterius exemplaribus, quae donavi, pro alterius, paulo minus. Haec est lucri cupidissimorum hominum benignitas. Itaque tu illis, qui te ultro requirunt, & egent opera tua, minime parce. Ditescunt vigiliis nostris, nec per ipsos stat, quo minus pauperie contabescamus. Vale, mi Blancarde. Daventriae a. d. XI. Kal. Octobr. Jul. Anno Christi MDCLIV.

EPISTOLA CCCLXXII.

NICOLAUS BLANCARDUS

V. C. Joh. Frid. Gronovio S. P. D.

Leidam.

Aliquamdiu me sustinui a scribendo, etsi animus & causae paene publicae impellebant. tamen locus ubi esses, dehortabatur. Audiebam te in Germaniam vitandae luis gratia profectum, & verebar tibi in communi luctu, & a libris diffito molestus esse. Sperabam etiam brevi te ad tuos reversurum: & tunc abrupto silentio gratulaturum, & recepti muneris, & incolūmitatis. liceat ergo tibi gratulari, qui amicis redditus placide quiescis; & urbi, quam consilio juvas & scholae Academicae, quam voce pariter, & scriptis sic ornas, ut nihil tamen ad ostentationem, omnia ad conscientiam referas, recteque factorum, non ex vanis superstitionum Iudiciis mercedem, sed ex facto petas. Haec facere pro parte, etiam nos conamur, atque isti consentientes sensus firmiter nos jungunt. Audi igitur ea, quorum causa te interpellandum duxi. Quinque anni sunt, ex quo Arrianum veri diligentem historicum, coepi recensere, & cum Diodoro, Curtio, Justinoque, & Plutarcho conferre. Subsidio fuerunt primum excerpta e libro manuario *H. Stephani*, quae *Vulcanius* editioni suae praefixit. Accessere dein expressi Basilienfes, quorum copiam fecit humanissimus patriaeque antiquitatis cornu copiae *Cornelius Boot*, senator Traiectinus, publicaeque bibliothecae praefectus. Sed cum nonnulla fortis essent deploratae, coepi undique inquirere in codices manu exaratos. At suppeditavit quidem unum ex Richelii Cardinalis bibliotheca *Petrus Gassendus*, princeps aevi sui Philosophus; alterum exhibuit reverendus *Antonius Tryst* Episcopus Gandensis; tertii Codicis spem fecit *Isacus Vossius*. Nonnihil etiam profuerunt, excerpta Photii, Suidas, Stephanus, & Eustatii ad Dionysium, *Ἐπομνήματα*, in quibus varia Arriani loca citantur. Ipsi auctori comitem dabo *Vulcanii* versionem, sed centenis aliquot locis modeste interpolatam. Nondum tamen videre contigit *Pauli Vergerii* interpretationem; quam ut barbaram, Germanis incultioribus relinquere se praedicat *Bartholomaeus Facius*, cujus fatuum caput sale nigro lepide defricavit *Bonaventura Brugenfis*. *Vergerium* primo in Flandria Brabantiaque, mox Parisiis, & Londini, tandem in Francofurtensibus nundinis quaeri jussi. Sed nusquam comparuit. Eam tamen olim extitisse, fidem facit *Aeneas Piccolominaeus*, Senensis Cardinalis, Commentario de his, quae Frederico III. imperante in Germania, & per Europam gesta sunt. Hunc ego codicem, si penes te sit, aut alicubi excutere possis, rogo ut transmittas; ne si forte minus germanae lectiones aut obscurius reddita compareant, nostra id culpa accidisse videri possit. omnem quippe lapidem moveo, ut tantus Scriptor non modo elegantioribus typis exprimatur, sed quod potissimum est, a sordibus purgatus studiosorum manibus inferi possit. Quod si a negotiis liberior sis, erue chartas & dispice sollicitius,

nunq

num sciolorum *παρεχρημάτα* per te tolli, num distorta sanari, num Cimmeriis tenebris involuta face & luce tua illustrari possint. Jam diu Syllabum praecipuarum emendationum misissem, ut ex Veterum consuetudine & legeres, & corrigeres, si ratio rerum tuarum perspecta fuisset. Tuae partes erunt indicare, quo loco sint, ut obtinere fortassis queam, quod impetratum a te maxime cupio. De notis perpetuis, quibus scriptorem illustravi, nihil nunc dicam. Videbis in tempore ubi & ipsae lucem viderint. Sed de Arriano haecenus, & quae praestiti, habes: sequitur, ut quae in re dispari, domesticane dicam an publica, a te fieri velim paucis aperiam. Atque utinam ora videre fas! Voces accipere, & interponere! sed regionum abjunctio, & magis honesti Juvenes vetant. ut audiui igitur, mi Gronovi, te designatum a Curatoribus Athenarum Leidenium, qui Graeci Professoris munus obires, fa-
 teor ex intimo animi sensu me gavisum. Age, aggredere, exsequere, quo Deus & virtus ducunt, & afflictæ Graeciae pro virili medere: qua occasione non potui non refricare memoriam commendationis veteris, etsi verecundia, & paene religio est, interpellare te pluribus. Sed affectus in me tuus impellit ut consortem, imo arbitrum, & adiutorem te habeam consilii, quod res meas tangit. Non dissimulo post obitum *Apollonii*, sperasse me, ut duo Professores adjungerentur. At nihil factum est, temporumne an hominum culpa, quid attinet dicere. Itaque in pejus abeuntibus rebus (ut qui solus relictus sim) neque impudentem me putabis, opinor, aut intempestivum, si de negotiis meis ad te referam, & serio petam, ut post discessum tuum professio, quam nunc sustines, mihi permittatur. si ex re Gymnasii Daventriensis & juventutis censes, hunc hominem per te promoveri. tum illud pro beneficio adde, ut ne diu anceps & incertus tuae sententiae haereat. Ne occasiones profectionis (quae praecipites esse solent) elabantur. Addo etiam verecunde, ut si commendationem susceperis, ea absque literarum, & voluntatis meae significatione fiat. Nam & munus Historici, ante biennium ab Comitatus Ordinibus sponte delatum, & publica professio tot per annos expleta, clamant a pusillo animo fore, si quae virtuti & eruditioni praemia debentur, multo ambitu emendicatisque precibus peterentur. Sed quid ego haec tibi? cujus prudentiae & benevolentiae tota res gubernanda permittitur. Vale Vir. Clarissime, & me amare perge. Middelburgi Zelandorum. 1658. Prid. Id. Jun.

E P I S T O L A CCCLXXIII.

J O H. F R I D. G R O N O V I U S

V. C. Nicolao Blancardo S. P. D.

Medioburgum.

DE Arriano sane quam gratum quod polliceris, nec ad literas quidem juvandas, quod possum, exposces opis, *ὅποιας ἐξαφιστάμην ἐγὼ*, haud scio an tu me ferre possis simpliciter agentem tecum, ut & aetas mea, & hîc locus,

cus, & mutuus amor mihi videntur imperare. Dicam tamen quia *ἱερὸν βελή*. Velim in eo, quod in manibus habes, opere spectare te solidam laudem, non adumbratam & parietariam illam, quam nuper exorti repentini auctorum editores, quod a Variis promittunt, domi non esse sibi sponte facti, cumque omnia adepti sunt, nihil ulterius promeriti quam hunc titulum *Sarcinatores esse probos, suere centonem optime*. Officinis illi quidem gratificantur & oculifera mercemque imperitos pecunia emuncturam adornant: ipsi quod inde existimationis apud vere bonos doctosque auferant, non habent: nisi forte laboris miseri derisum, ne dicam ingrati & impii invidiam. Quid enim ingratum vel impium, si hoc non est, praestantissimorum ingeniorum monumenta, quae non tam ipsorum, quam posterorum interest, salva & honesta esse, ut ipsi statuerunt, mutilari & truncari ab homine nequaquam ejus profectus, ut de his recte judicare possit, cum aperto praejudicio tamen, quasi nihil in istis sit sani, nisi quod eclogarius iste excrevit, quasi nihil damni sit caeteris carere? & sic quum a legendo studiosorum, tum a repetendis editionibus typographorum cupiditatem averti? Quid se futurum sperare ille potest apud posteritatem, aut quamdiu sua salva fore, qui hoc facinus in sanctas animas, quas inter majores nostros ducere debemus, quicumque imitatur, ediderit? Quam facile est turbare istam congeriem, paullo aliter disponere, & aliis quaeque reddere locis, dein suum nomen praeponere? Quod quidem in Curtio tibi, tibi inquam, munusculum jam deferre aliquis parabat, & peregisset, nisi ego inhibuissem, & verecundiam tui homini fecissem. Mihi nunquam meum nomen tam vile fuit: quamvis admodum adolescens animum ad scribendum appellerem, jam tum tamen mihi volebam concipi & nasci, quod tollerem, non adoptione aut plagio ad me venire. Non poteram ferre conscientiam illius. *Proh Deum atque hominum fidem!* Quid? ego lenocinium facio, qui habeam alienos domi? Semper ante oculos erat, non quid potissimum exerceret forum, aut diriperet vulgi licitantis, quod nec legit nec intelligit, infania, sed quid *Camerarius, Victorius, Turnebus, Scaliger, Casaubonus, Lipsius*, & horum proximi annotassent, hos ut quantumvis e longinquo sequeretur: quid, ubi legisent, quae scriberem, dicturi essent *Grotius, Salmasius, Heinsius, Vossius, Scrivenerius*, & horum aequales, his ut operam approbarem. Neque enim videbatur pretium prodire in scenam, nisi sub talibus spectatoribus. Ita excussi animo illam & vitae & stylo pessimam *Caji ἀλγίστην*, meque coëgi habere reverentiam famae, quam inter bonos, non in turba, quaerebam. Tempus est te suscipere similes cogitationes, & conari, ut imaginem ingenii duraturam ad posteros transmittas. Quod antehac multorum circa te exempla abripuerunt *Συνασφῆν πῶς μὴ σφοῖς*, potest aetati & consuetudini condonari. haec dies aliam vitam, alios mores postulat. Neque monerem, nisi optime & de indole tua & studiis sentirem, certumque haberem, modo intendas nervos, fore ut industria tua nitare

Avia Pieridum peragrans loca, nullius ante trita solo.

Nec dubito, quin largam materiam praebeat ille minor Xenophon, quem

suscepisti, praesertim istis praesidiis instructus. Age, mi Blancarde, aggredere rem, incipe de te ipse petere ac promere, quo enitescas; sperne alienas exuvias: dedignare bajulus esse vasorum & ornamentorum triumphi non tui; ipse tua opima porta. Plus laudis habebis ex una pagina observationum, quas eruit tua sagacitas, quam ex ingenti volumine istius undique emendicatae stipsis. Haec unde profecta sunt, eo accipe, oro te, vero & benevolo animo, & vel ob id me ama, quod de fama tua sollicitus sum. Si peccasse censes, ne tamen me oderis, sed tuo quidem consilio utere, mea vero nihilominus officia tibi constare in reliquum puta. Unum non possum pati, quin etiam addam. Notae perpetuae, si sunt ad exemplum illorum, quos supra nominavi, si obscura illustrant, difficilia & confragosa complanant, dubia confirmant, errores notant, corrupta emendant, & quidem ita, ut primo tibi visum inventumque est, nullum illis modum definitio, & quam prolixissimas esse cupio; sin sarcinas onerant alienas, & centies dicta tantummodo referunt, quanto pauciores erunt; tanto minus poenitebit homines nummorum expensorum pro scriptis nova cura mangonizatis; quae toties antea & integriora jamdudum in bibliotheca habebant. *Vergerii* editionem ignoro praeterquam ex Basiliensi, qua sola utor, & praefatione *Facii*. Excerptas e MSS. varias, & si quid tu ad illos primus vel contra alios vel pro illis, quod utile & animadversum non sit, si communicabis mecum, libenter de illis sententiam meam perscribam, & quibus potero rebus te juvabo. De discessu meo in hunc diem tantumdem scio, quantum tu. Si quid fiet tamen, & audiar (solent enim plerumque graviter irasci deferentibus, neque ab illis consilium admittere) tui non immemor ero. Vale, Blancarde humanissime, & cura, ut velis non nisi ἀεὶ σέβειν. Daventriae. a. d. iv. Idus Junias Julianas. ciciocclviii.

Spectabilem illum virum, Decurionem patriae suae, mone, si dignitati suae consultum velit, ut consilium de epistolis abjiciat. Quid? an non orbis terrarum gemit sub tot futilium verborum plenis, rerum inanibus ponderibus? satis indulgit sibi amicus noster ὁ μακάριος, dum viveret, nec paulo melius consulisset nomini suo, si multo minus scripsisset. Quid enim nunc quiescentem & beatum sero ludos facere volumus? Memini me aliquando vidisse apud te excerptum e *Seldeno* de aurea vite apud *Florum*: si ea scheda tibi superest, vel ipsam, vel exemplum ejus fac, quaeso, habeam. Iterum vale.

EPISTOLA CCCLXXIV.

NICOLAUS BLANCARDUS

V. C. *Joh. Frid. Gronovio* S. P. D.*Leidam.*

Tibi vero, Gronovi, rectum iter, quod mature cognovisti, non solum amanter, sed etiam liberaliter monstranti, irascerer? μὴ γένοιτο ὦ Ζεῦ Φίλιε. Itaque cum ante ex litteris scriptisque diligerem te, nunc caepi etiam amare plu-

plurimum, salutaesque admonitiones serio admittere. O raram curam & sollicitudinem! qua me non quidem penitus bonarum artium rudem, sed nutantem adhuc, ab tramite devio ad lucem, ab inepta persuasione ad veritatem revocasti. ut, quod res est, dicam, ante videbar habere multos amicos, sed meo malo expertus, hujus generis, cujus & ipse quaero, & studia exigunt, praeter te esse neminem, sunt enim omnes incauti, & nimium officiosi. Litterarum vero tractatio poscit durum aliquem, & castigatorem, cui ut consilia in promptu, sic omnis adulatio & servilis & noxia videatur. Proinde si quas ad me deinceps epistolas mittes, memento stimulum adhibere, non qui aures blandicri sono permulceat, sed animum praeclara meditantem erigat, ac inflammet. Nunc si vacat, amicissime Gronovi, velim hos Arriani locos a te diligenter examinari. Libro Ἀναβάσεως secundo, obsidione Tyri: καὶ ἦ μὲν μία μὲν τῶν νεῶν οἱ ὑπασπισαὶ ἔλαβον, ἡ ἐπετέτακτο Ἀδμητῷ. τὸ ἐπὶ τὴν δὲ, ἡ κοῖνη τάξις οἱ ἀσθενέστεροι καλούμενοι. Vulcanus vertit: atque alteram quidem navium scutati occupant, Admeto duce: alteram Coeni cohors e militibus, qui infirmiores dicuntur, constans: offendit me vox ἀσθενέστεροι. Nam si Macedones a Graecis aut ab Alexandro infirmiores vocati, id sine ignominia fieri non potuit. Scriptus liber Stephani heic legit ἀσθενέστεροι, & interdum ἀσθενέστεροι. nostri codices constanter scribunt, ἀσθενέστεροι. Expressi Basilienenses nonnunquam habent τῶν ἀσθενέστερων καλεσμένων τὰς τάξεις, velut lib. vi. interdum τὰς τῶν ἀσθενέστερων τάξεις, ut lib. v. aliis in locis τῶν ἀσθενέστερων καλεσμένων τὰς τάξεις. sicut lib. i. v. omnino videntur syllabae posteriores corruptae, & pro ἑτέρω, aut ἑτέρων, scribendum ἑταῖροι & ἑταίρων. nam simplicem vocem consimiliter fuisse deformatam observavi. libro i. v. in vulgatis Basilienensibus: τῶν δὲ Μακεδόνων τὸ εἶναι, καὶ ἑτέρων βασιλέων, scripti & editi Vulcanii rectius, ἑταίρων. Aliud exemplum in Photio, num. 91. Ὁπτελεῖ δὲ καὶ γάρ τε αὐτῶν καὶ τῶν ἑτέρων λαμπρῶν. Lego, ἑταίρων, quod de Hephaestione, Cratere, Ptolemaeo, Eumene, Nearcho, & Seleuco, qui mox subiunguntur, sermo sit. Adhaec post recensita noviter nuptarum nomina addit, καὶ τοῖς ἄλλοις ἑταίροις τὰς δοκιματίας τῶν Περσῶν καὶ Μήδων παῖδας. ut certum sit, intelligi debere amicos, qui erant ex turma regia, ex τῇ βασιλικῇ ἰλῇ, cujus praeter nostrum, ut Vellejum Pliniumque omittam, meminit etiam Diodorus in octavo decimo. Nunc ἀσθενέστεροι, vocem a nomine intellectam expediamus. Wolfio valde probatur Gulielmi Canteri, cum honoris praefatione ab illo nominati conjectura, sic dictos τῶν ἀσθενέστερων τὸ ἄστυ τῶν ὁβ ἐσπι- ratam in θ mutato, ut ἀσθενέστεροι dicantur, sicut ἀσθενέστεροι. Hoc est aliquid quod dici, quod defendi possit, sed καθάρματα non solvit. Germana lectio πε- ζεταίρων, scilicet in Macedonica militia fuisse amici regis, ex praestantissimis electi, inque unum σύστημα contributi. & hoc non minus de equitibus, quam de peditibus capiendum. certe Arrianus noster fere conjungit. Libro 4. Ἀλέξανδρος δὲ ἄγων τῶν ὑπασπιστῶν, καὶ τῶν ἑταίρων ἰππέων, ὅσοι μὴ ζὺν Ἡφαιστίωνι ἐτετάχατο, καὶ τῶν ἀσθενέστερων καλεσμένων τὰς τάξεις. Libro 6. ἐκείθεν δὲ ἀναλαβὼν τῶν ὑπασπιστῶν τε καὶ τῶν τοξοτῶν τῶν ἡμίσεως, καὶ τῶν ἀσθενέστερων καλεσμένων τὰς τάξεις, καὶ τῆς ἰπποσύνης τῆς ἑταίρικῆς τὸ τε ἄστυ καὶ ἰλῶν ἀφ' ἐκάστης ἰπποσύ- χίας.

χίας. Quod de Syſtemate amicorum dixi, id ἀντιρρήτως evincitur ex ſequentibus verbis Harpocratonis. ΠεζαίτερΘ, Δημοσθένης Φιλιππικοῖς. Ἀναξιμένης ἐν πρώτῳ Φιλιππικῶν περὶ Ἀλεξάνδρου λέγων Φησὶν. Ἐπειτα τὰς μὲν ἐνδοξοτάτας ἱππεύειν συνεθίσας, ἑταίρους προσηγόρευσε. τὰς ᾗ πλείους, καὶ τὰς πεζὰς, εἰς λόχους, καὶ δεκάδας, καὶ τὰς ἄλλας ἀρχὰς διελών, πεζαστέρους ὠνόμασεν. ὅπως ἑκάτεροι (notabis) μετέχοντες τῇ βασιλικῇ ἑταιρίᾳ, προθυμότετοι διατελῶσιν ὄντες. Haec prave in Graeco, nec Maufacus expedit, ſcribe vero πεζέταιρος, & mox πεζεταίρους. nam πεζέταιρΘ formatum a πεζός & ἑταῖρΘ, quis non videt? idem mendum adhaesit Suidae, ex cujus verbis de ἀδελείοις caepi ſubdubitare. Interpres ſimpliciter vertit, *pedes, qui pedibus iter facit*, debuiffet *pedes amicus*, aut *sodalis*, quia hi non minus, quam turmae equitum amicorum μετέχοντες τῆς βασιλικῆς ἑταιρίας, ut loquitur Anaximenes. Sed emendationem noſtram mire juvat Demosthenes Olynthiaca 11. Οἱ ᾗ δὴ περὶ αὐτὸν ὄντες ξένοι, καὶ πεζέταιροι, δόξαν μὲν ἔχουσιν, ὡς εἰπὶ θαυμαστοῖ, καὶ συγκεκροτημένοι τῷ ὁ πολέμῳ. Imo etiam in editione Baſil. 496. & Vulcani 156. & V. Pol-luc. 52. 35. Etymologus in voce πεζέτεροι in fine literae Π. Huic denique ac-cedat unicus Arriani locus, qui inter tot alios incorruptus permanſit. Li-bro 1. in editis Baſileenſibus ſic leges. ὅτι μὲν τῷ δεξιῷ κέρως ἵνα καὶ αὐτὸς ἐπε-τέτακτο τὰς ὑπασινας εἶχεν. ἐχομένων (Vulcanii editio legit ἐχομένους) ᾗ τῶν τὰς πεζεταίρους. unde colligere datur ex πεζεταίρους primo factum πεζαιτέρους, dein ἀδελταίρους, vel ἀσσετέρους, mox ἀδελτέρους, & omnium peſſime ἀδελνεατέρους, qui haecenus pro infirmioribus habiti ſunt. Libro 5. Εἴη ἂν οὖν ἐκ τῶν δε τῶν λό-γῳ ξυμπθέντι τεκμηριοῦναι, ὅτι οὐ πόρῳ τῷ ἀληθῆς ἀναγέγραπται ὁ Ἰνδὸς ποταμὸς τὸ μέγεθος, ὅσοις ἐς τεσσαράκοντα σταδίους δοκεῖ τῷ Ἰνδῷ εἶναι τὸ εὖρος, ἵνα μείσως ἔχει αὐτὸς αὐτῷ ὁ Ἰνδός. ἵνα ᾗ γενώτατός τε καὶ διὰ γενότητα βαθύτατος, ἐς τὰς πεντεκαίδεκα ξυνάγειται. Aut haec inſigniter vitioſa ſunt, aut Arrianus a ſe ipſo diſſentit, aut ego rudis profecto & aure agreſti homo. Cur enim aliud potius ſupra dixerit, haud equidem intelligo. Κτησίας, inquit (εἰδήτω ἱκανός καὶ κτη-σίας ἐς τεκμηρίωσιν) ἵνα μὲν γενώτατος αὐτῷ ὁ Ἰνδός ἐπὶ, τεσσαράκοντα σταδίους ὅτι διέχουσιν, αὐτῷ ἢ ὀχθαί. ἵνα δὲ πλατύτατος, ἢ ἑκατὸν τὸ πολὺ δ' εἶναι αὐτῷ τὸ μέσον πύπιν. Penſicula utrumque, & reperies ſuo quodque in loco ſonare diver-ſiſſime. Forte dicis contra, & hanc Cteſiae ſententiam eſſe, illam Arriani. nos autem alibi quoque poſtea conſimiliter in noſtro ſcriptum invenimus. In-tende ad haec animum ex libro ſexto. Οἱ Ἰνδός, πρὶν ἐς τὸ δελτὰ χωρῆναι, οὐκ ἀπὸ τοῦ ὅτι καὶ ἐς ἐκατὸν σταδίους ἔρχεται, ἢ ὑπὲρ τὰς ἐκατὸν τυχόν, ἵνα περιλιμνά-ζει μᾶλλον. Quis aliud putet in hiſce verbis ab Arriano, aliud in ſuperioribus ſi-gnificari a Cteſia? mihi videtur ex Ptolemaeo Indi fluminis latitudinem inepte colligi: nam is de Aceſine ſenſit, cujus partem latiffimam ad transmittendas copias regem delegiſſe, auctor deinde ſignificat. Locum quidem, ut vitii ac-cuſemus, neque eruditi forte patientur, neque omnium librorum parilis con-ſenſus. Codex Stephani legit quidem ἵνα ἀμέτῳς, ſed ibi prior litera vocis po-ſterioris adhaeſit ex ἵνα, vitio librariis familiariffimo. ſi vero mei arbitrii res foret, primo & ſecundo loco ſcribi debuiffet cenſerem non Ἰνδὸς, ſed Ἀκεσίνας,

at tertio ὁ Ἀκεσίνης. Nec dubito coarctandam fluminis latitudinem, & pro illis πεσάρκοντα σταδία, emendandum τεράκοντα. prius rationi consentaneum est, ne Ptolemaei & Arriani de Acesine narrationem interrumpat Indi mentio: alterum clarissime evincitur ex libro Indicarum, ubi ait Acesinem Nilum & Istrum magnitudine superare, quando Hydaspe, Hyaeraole, & Hyphati in suum alveum receptis, Indo committitur, adeo ut ejus latitudo triginta stadia efficiat. Atqui neque τεράκοντα, neque πεσάρκοντα σταδία, & quod amplius, ne si uterque numerus jungatur, Indi latitudinem aequabit. Noster lib. 6. ὡς δὲ ἡ κονίνα περ ἀναχῆται ἐς εὐρὺ ὁ ποταμός, ὡς καὶ Διακοσίους ταύτη σταδίους ἐπέχειν, ἥ περ εὐρυτάτη αὐτῆς ὡς. In has rationes subtiliter inquirenti, vel prope modum res erat de Acesine amne capienda videbantur. Habes Cl. *Seldeni*, veram, nisi fallor, de aurea vite sententiam ex libris de Jure naturali, gentium, & civili noviter descriptum & simul pauculas in Arrianum observationes, quae si forte placere poterunt, non displiciturae utique aliae sunt, quae ad eundem gustum exactae. Quanti certe faciendae sint, inter omnes si investigassem, in neminem incidere potuissem, qui rectiore judicio quam tu, valeret aestimare, illud iterum unice a te rogo, ut quoniam es.

— *rigidi servator honesti,*
In commune bonus.

Privatim etiam in me bonus sis, & trepido, atque apud indoctos haerenti manum porrigas. Qua de re quum ex nuperis etiam litteris, & benevolo animo scriptis, nihil ambigam, non possum adduci ut credam (quamvis unus e Leidenfibus Professoribus significavit) te recepisse alium in fidem tuam, eumque Daventriensi magistratui commendasse. Vale, Gronovi amantissime, & me virtuti tuae addictum, beneficio etiam obstringe. Middelburgi Zelandorum. Id. Aug. 1658.

EPISTOLA CCCLXXV.

JOH. FRID. GRONOVIIUS

V. C. Nicolao Blancardo S. P. D.

Medioburgum.

GAudeo admonitionem meam molliter exceptam tibi, non quod apud te valuerit auctoritas mea, sed quod te, quem bonum & consilii patientem putabam, meliorem, & quod suaderi debebat, ultro occupantem intellexerim. Ego enim te de medio illo genere esse libens credebam, οἷς τῶν λεγόντων εὐκαλὸν τὸ μάθάνειν. Tu vero.

Ὅτι καὶ πανάρετος ὃς αὐτῷ πάντα νοήσει
φρασσάμεν πᾶς ἐπεὶ καὶ ἐς τέλος ἦσαν αἰεῖναι.

Sic igitur age, ut specimen ostendit illud, quod tuis literis inclusisti: nec de grata fama & posteritate dubita. De περὶ εἰρήνης praeclare mihi observatum videtur. Lib. enim v. merito offenderis de Indo dici, quae de Acesine vera sunt.

M m m m 3

Sed

Sed admittis etiam τὴν ἀφ' ἑσέως μοί; Ἐνδοῦ & Ἰνδοί imperiti librarii addita-
 menta esse videntur, & reliquisse auctorem. ὅτι & πρῶτον τῆ ἀληθείας ἀναγέγραπ-
 ται τῆ πλάμῃ τὸ μέγεθος, ὅσοις ἐς πεσσεράκοντα σελίδας δοκεῖ εἶναι τὸ εὖρος. ἵνα
 μέσως ἔχει αὐτὸς αὐτῷ. ἵνα δὲ γενόταται τε καὶ ἀπὸ γενότητος. &c. Nihil enim hic ob-
 scuri, nec fallere quenquam potest ex præcedentibus τὴ πλάμην, de quo loqui-
 tur, Acesinem esse. Apud Curtium *Smaragdo* & gemmis, vide an tolerari de-
 beat, non dispari sensu, quam id est, quod substituis: quemadmodum Ζεὺ καὶ
 θεοὶ cujus generis non pauca apud veteres occurrunt. Lugdunenses sane voca-
 rant; sed frigide, nullis certis constitutis συνθήξεσι. Fuit igitur & responsum
 meum ambiguum, quod tamen satis indicarat, non abhorreere, si non deterio-
 ra fierent vectigalia. Mox abeunt menses duo, nec ad me ille quicquam pu-
 blice, nec erat quem privatim tentare auderem. Jactabantur etenim rumores
 varii. quidam palam dicere, rem decolasse, & ridere alii vocantes, alii me.
 Ego incertus omnium animique pendens, quantum poteram, de negotio ser-
 mones vitabam aut præcidebam, ne plus minusve dicerem quam par esset,
 quodque longa dies coargueret. Et sic quoque adfectus eram, quum proxi-
 mas ad te darem, iterum deinde tertioque cum syndici tum ipsorum Curatorum
 literis edoctus ferio rem agi, flectere coepi animum, & quum per ferias rei
 familiaris causa in Hollandiam percurrissem, ita præsentem aggressi sunt, ut
 res conveniret. De commendatione quod scribis, miror quis ille sit, qui me-
 lius sciat, quid hîc geratur, aut amplius, quam nos ipsi. Sane post primam
 appellationem Lugdunensium (priusquam mora refrigerescere res inciperet) ut
 meum, si forte contingeret, discessum hîc molliorem redderem, habui in ser-
 monibus aliquos, quos facile dicebam locum hunc impleturos veteres & hîc
 notos discipulos meos (nec pudebit nomina addere) *Schultingium* Noviomagi,
Graevium Teutoburgi, *Holtermannum* Steinfurti Professores, *Munkerum* Are-
 naci, *Coccium* Swollae, Rectores, *Balenium* Zuollanum, juvenes omnes egre-
 gios & studii perpolitos, & grassaturos ea via, quam a me acceperunt: ho-
 rum quemcunque optarent, non erraturos. Addideram, nemine omnium
 inferiorem esse *Graevium*, & facillime posse haberi tum propter exiguitatem
 stipendii, quo nunc fruitur, tum propter metum armorum in his locis. To-
 tum hoc diu antequam acciperem tuas, aut de Lugdunensium erga me ani-
 mo ex mora dubitarem. Post tuas traditas, ne tui quidem mentionem hone-
 stam facere destiti. Sed neque certum ego, & unum publicis commendavi,
 neque ullam adhuc commendationem nostri aut exegerunt a me, aut admitte-
 re voluerunt. Quin pridie illius diei, quo mihi posteriores tradebantur tuæ,
 primo in scholastico senatu, deinde inter scyphos omnibus machinis tentato,
 an retinere me possent, quum inter alia jacerem, me, ut Gallia apud Tacitum
 dicat, non posse plus illis conferre quam bonum successorem, palam nega-
 runt, se ad illam rem consilium meum requirere. Itaque non video quam
 honeste aut verècunde posthac isti negotio interponere me possim: præsertim
 quum manet ad aures susurrus propendere favorem in quendam aliquot proce-
 rum hujus urbis cognatum satis propinquum, juvenem etiam non indoctum,
 &

& mihi amicum, Stenovicenum. Quod si est, frustra omnis alia suscipitur suffragatio. Prorsus ita se parant, quasi me ab illa deliberatione remotum velint, & abitum meum expectent: neque enim ignorant vi. idus Septembr. Julianum inaugurando mihi dictum esse, eoque jam vasa colligo. immo & de domo publica, quam incolo, vendenda, jam decretum fecerunt. At de successore neque appellat me quisquam, & ego quoties istius sermonis initium pepuli, haud agnosco me valde propitiis auribus accipi. Habes totam scenam, & faciem rei, in qua quid ego tibi servire possim prospicio parum. quicquid autem potero, id sine fuco libens praeestabo. Utinam scissem sensum tuum ante triennium, quum Franequerana statio mihi deferebatur. Sed nec tunc, nec nunc ante tuas literas in mentem mihi venit tui, quem meliori loco, quam aut illic, aut hîc futurus esses, agere putabam. Memor te appetitam aliquando apud Hardebones conditionem, postea consilio mutato, longe inferiorem tua duxisse, & vehementer contempsisse. Haec copiosius quam ab initio constitueram, ne quid de fide & veritate mea dubitares. Tu interim exsequere fortiter, quod praeclare instituisti, & si qua illic sunt insuavia, sustine confisus Deo & tuae virtuti. Vides ut fastiditi aliquando postea requirantur, ut insperata citius speratis eveniant. Ne hic quidem ignotus es, & si adhibebor, introspectique Procerum animi aliquid spei dederint, meum utique habebis, quamvis, secundum testimonium. Vale, doctissime Blancarde, & me ama: Daventriae. Idibus Sextil. cicioclviii.

EPISTOLA CCCLXXVI.

NICOLAUS BLANCARDUS

Isaaco Grutero S. P. D.

SI quando Medioburgum politis ingeniis floruit, Grutere praestantissime, nunc maxime floret. Quod tamen vulgo non auderem, eloquar apud te, plenum humanitate, quam nuperis ad me litteris expressisti. Reperti apud nos homines oppido pauci, sed iniquissimi, quibus volupe fuit illustre procerum institutum, nosque adeo in contemptum adducere. Et quo id impetrent, non verentur calumnias aliasque peiores artes, in subsidium vocare. Eorum tamen tecta impietas est, & quantum mihi cernere datur, fronte praeferunt amicum vultum, ut dissimulatis inimiciis gravius ex occulto ferirent: sed ego, mi Grutere, fatuus, qui litigo cum istis, quorum vitae sanctitas summa, multa severitas tonsum caput apud vulgum in pretio. Me potius sequere, qui dulçe otium nactus inanem strepitum relinquo, dumque iudicia mortalium non virtutibus tantum inimica sunt, verum etiam literis ad haec confugio, quae affecto animo mederi possunt, non tantum delectare. Acris enim esse, non mollis cupio, qui edere quidquam ac excudere paro quod aliorum limam, tuto ferre possit. Cum nupere in vicinam insulam excurissem (quo animus agitatione corporis excitaretur) meditabar aliquid notabamque ad bellum

lum Mithridaticum Annaei Flori, quem scriptorem diligenter emendatum in lucem dedi. In eo tamen sponte quaedam praetermissa, quae tunc temporis excutere haud vacabat, praesertim magnorum hominum judiciis probata. Locutus est lib. 3. cap. 5. de Victoriis Pompejanis. *Nec non in meridiem verso agmine, Libanum Syriae Damascumque transgressus, per nemora illa odorata, per turis, & balsami silvas, Romana circumtulit signa: Arabes, si quid imperaret, praesto fuisse: Hierosolymam defendere tentavere Judaei: verum hanc quoque intravit, & vidit illud grande impiae gentis arcanum patens sub aureo uti caelo.* Priora sana sunt, aut grande illud arcanum felici augurio aperiendum. Codex Nazarianus unica tantum littera distat a vulgata, cum pro *uti caelo*, habeat, *uti Scaelo*, ex quo Salmasius, *vitis caelo*, I. Lipsius flos literarum, 11. Elect. cap. 5. vere & cum historiae momento emendasse se opinatur, *sub aureo Vitem caelo*. Ego autem (qui in Veterum scriptura sollicitanda religiosior esse consuevi) veritati rerum gestarum interesse existimo, *Lipsii* emendationem non admittere. Loca quaedam enotabo, quo res tota melius pateat. Josephus lib. Antiquit. 14. cap. 5. ubi de disceptatione Aristobuli & Hyrcani apud Pompejum. Πομπηίς ἦ εἰς Δαμασκὸν ἀφικόμενος, ἦκον παρ' αὐτὸν πρέσβεις ἐξ ὅλης Συρίας, καὶ Αἰγύπτου, καὶ ἐκ τῆς Ἰουδαίας. ἐπεμψε γὰρ αὐτῷ μέγα δῶρον χρυσῶν τετρακισχιλίων, καὶ πεντακοσίων ταλάντων. μέμνηται ὅτι δῶρον, καὶ Στραβὼν ὁ Καππαδόξ, λέγων ἕτως. ἦλθε ἦ καὶ ἐξ Αἰγύπτου πρεσβεία, καὶ σέφανος ἐκ χρυσῶν τετρακισχιλίων, καὶ ἀπὸ τῆς Ἰουδαίας εἴτε ἀμπελῶν, εἴτε κῆπων. τερπολίω ὀνόμαζε τὸ δημιέργημα. τῷτο μέντοι τὸ δῶρον ἰσορήκαμεν, καὶ ἡμεῖς ἀνακέμενον ἐν Ῥώμῃ ἐν τῷ ἱερῷ Διὸς ἔκ Καπιτολίνου, ἐπιγραφῶν ἔχον Ἀλεξάνδρου καὶ Ἰουδαίων βασιλέως. ἐλημήθη ὅτι εἶναι πεντακοσίων ταλάντων. id est. *Pompejus autem, cum Damascum venisset, legati ad eum venere ex omni Syria, Aegypto, Judaea. Misit & illi insigne donum Aristobulus vitem auream pretii quingentorum talentorum; cujus doni Strabo etiam Cappadox meminit, his verbis. venit & ex Aegypto legatio, & corona aureorum quater mille, & ex Judaea, sive Vitis, sive Hortus Terpolen, id est, delectamentum, vocabant id opus. quod vidimus nos etiam Romae dedicatum in templo Jovis Capitolini, ex inscriptione Alexandri (Jannaei) Judaeorum regis, aestimabaturque quingentis talentis.* Idem ex Josepho habet Zonaras, qui nobilem hanc vitem ab eodem visam adserit, quod tamen aequè ad Strabonem referri potest, & video cuidam erudito sic placuisse. Huc facit Plinii locus in lib. 37. in cap. 11. ubi de Triumpho Pompeji, quem de piratis, Asia, Ponto, gentibusque & Regibus egit. ipse enim ex triumphorum actis refert. *Montem aureum quadratum, cum cervis & leonibus, & pomis omnis generis, circumdata vite aurea una cum aliis cimeliis fuisse translatum.* Neque omittendus Tacitus, qui in lib. 5. Histor. ubi de famosae urbis supremo die. *Sed quia Sacerdotes, Judaeorum tibia tympanisque concinebant, hedera vinciebantur, vitisque aurea templo reperta, Liberum patrem coli domitorem Orientis quidam arbitrati sunt.* Ita res est, inquit *Lipsius*. Vitis aurea magnae artis, & pretii in Judaeorum templo fuit, quam Pompejus illic, sive repperit, ut Florus, & Tacitus volunt, sive oblatam ab Aristobulo recepit, ut Josephus & Zonaras narrant. Huic vero sententiae cum applaudat sibi, non est committendum mihi, ut

tam

tam plausibilem errorem non refellisse videar. Quae enim, quaelo, vitis a Pompejo repperiri potuit, quae ante ejus tempora nunquam fuit, neque etiam cum in Hierosolymam admissus, aedem sacram oppugnaret. An scriptura vel veterum quisquam Graecorum aut Latinorum, Salomonis templum, vel, eo per Nabuchodonosarum incenso, Zorobabelis, hac vite fuisse decoratum, meminit? Quis credat, nisi cui obstipum caput, spiritum Dei ollarum, forcipum, fuscinarum, quin etiam mensurae minimarum rerum mentionem injicere, hujus autem inclitae, & mirandae vitis dememiniſci velle? Accedit Aristobuli donarium Hasmoneae domus cimelium exstitisse, eo plane more, qui orientis Regibus usitatus. Non enim sacrum, aut templi adytis a Judaeis caelatum cultumve. Quid enim? nullane in templo vitis? Nulla me hercule ante Herodem, qui decimo & octavo regni sui anno rerum varietate ac divitiis affluens, post Caesaream conditam, ad sempiternam posteritatis memoriam illud quoque eximium animo concepit, Dei templum renovare. Josephus in lib. xv. Antiq. c. 14. Θύρας ἧ ἐπὶ τοῖς εἰσόδοις σὺν τοῖς ὑπερθυραίοις ἴσον ἐχέσας τῷ ναῷ, ποικίλοις ἐμπελάσμασι κεκόσμητο, τὰ μὲν ἄνθη ἀλεργῇσι, κίονας δὲ ἐνυφασμένοις. καθύπερθεν δ' αὐτῶν ὑπὸ τοῖς τοιχοῖς, ἀμπελὶ διετέτατο χερυῇ, τοὺς βότρυς ἀπεωρημένους ἐχέσας, θαῦμα ἢ τῷ μεγέθει, ἢ τῇ τέχνῃ τοῖς ἰδῶσιν, οἷον ἐν πολυτελείᾳ τῷ ὕλῃς τὸ καλὸν εὐαθεῖν ἰῶ. Vides superliminare aulaeis variegatis floribus purpureis, columnis intentis ornatum fuisse, sub harum vero capitibus vitem auream dependentibus botryonibus se expendisse. Quae si quis Pompejanis temporibus applicare velit, nactus in gravi errore & temporum ignoratione versatur. Neque mirum C. Tacitum vitis repertae meminisse, quoniam ea aetate vixit, qua templum Herodianum totamque ejus magnificentiam per Romanum Principem diruere statuerat supremi numinis providentia. si tamen *Lipsio* concedam, auream hanc vitem potuisse a Pompejo videri longeque adeo ante Herodem exstitisse, momenta rerum diligenter circumspicienti nulla idonea ratio succurrit, cur Romanus auctor eandem *grande* Judaicae gentis *Arcaenum patens* appellaret. Mirum igitur *Janum Gruterum* τὸν πανάρετον ἢ πάνσοφον *Lipsianam* conjecturam pro certissima depraedicasse. Neque *Joannes Camers*, Franciscanae familiae sodalis, probandus nobis, qua templum, sive aedem sacram interpretatur. Quis igitur *Flori* sensus sit, Josephi malo quam propriis verbis adstruere. Is igitur in lib. xiv. c. 8. Πάρενομήθη ἧ ἡ μικρὴ πρὸ τοῦ ναοῦ ἀβατόν τε ὄντα ἐν τῷ πρὶν χρόνῳ, ἢ ἀόρατον, παρῆλθε γὰρ εἰς τὸ ἐντὸς ὁ Πομπήιος ἢ τῷ πρὸ αὐτῶν ἐκ ὁλίγοι, ἢ εἶδον, ὅσα μὴ θεμιτὸν ἦν τοῖς ἄλλοις ἀνθρώποις, ἢ μόνοις τοῖς ἀρχιερεῦσιν. *Laesa est etiam non mediocriter templi religio humanis ante nec vestigiis penetrati, nec oculis. Introgressus est enim in illud Pompejus, & una cum eo non pauci alii, & inspexerunt quod nefas est videre nisi solis (melius Pontificibus) sacerdotibus.* Idem *Flavius* in primo αἰλώσεως, in capite quinto. Vides Pompejum non devotione supplicis, ut *Augustinus* loquitur, sed jure victoris templum reserasse, & ad Sancta Sanctorum, ut profanatorem accessisse. Hoc autem sub concameratione caelo haud absimili se magnifice oculis ingerebat ut non immerito auctor: *subaureo uti caelo*, quo sic adyti veneranda majestas quadantenus adum-

braretur. Sacerdotibus quippe inaccessum, caelum Dei quodammodo repraesentabat. ubi & Arca foederis Jehovae, ex qua ceu Throno Oracula fundebantur, & ex cujus sanctitate atrium tabernaculumque sanctitatem participabant. Formam igitur sanctuarii tentorio caelove aureo, (licet in hoc ludat, maledicumque dentem stringat Florus) apposite assimulavit, five totius operis faciem, aut singularum partium majestatem velumque praetensum respexeris. Unum addo, in Josepho minime tolerandum, adyta a profanis ante Pompejum non fuisse adita, si quis Nabuchodonosaris everfionem, praecipue autem Epiphanem, ambitiosum, avarissimumque principem cogitaverit. Sed de his in animadversionibus nostris ad Severum aut in Aristarcho sacro in Flavium. Vale, mi Grutere, & si quid hic rectius nosti, ne desine impertiri. Malo enim ab amico emendari, quam ab inimico traduci.

EPISTOLA CCCLXXVII.

GULIELMUS ANSLAER

Nicolao Blancardo S. P. D.

Litteris tuis humanissimis quanta sim laetitia affectus, Cl. Vir, verbis haud facile exprefferim: in iis summam tuam modestiam, aut earum humanitatem magis admirer, valde ambigo. itaque quam tua humanitas mihi concessit veniam, ita propenso, ac laeto animo exosculatus sum, ut non dubitaverim statim ad te litteras dare, quin ex candido pectore illa proveniat, nullus dubitans: tu modo, eruditissime ac celeberrime vir, hanc meam *παρρησίαν* aequi bonique consule, utpote ab animo tibi *μαθητέειν* quam cupidissimo profectam; temporis mei partem aliquam, inter reliqua quae tracto studia, praefertim orientalia, etiam sibi vindicat Lingua Graeca: cum autem a viris doctis non semel acceperim inter Graecae Linguae auctores classicos nullum alium propius ad N. T. stilum accedere, quam Polybium, ideo ante tempus aliquod per subcissivas horas me ad ejus lectionem accinxi, & quidem eorum librorum, qui selecta de legationibus inscribuntur, editique sunt ex Fulvii Ursini bibliotheca Antverpiae per Christ. Plantinum A°. 1582. tum quod reliqui ejus libri ad manus non essent, tum etiam ut ingenioli mei vires, utut exiguas, in libro versione Latina destituto experirer: ex iis quum quaedam, praeter multas phrasas N. T. stilo lucem, affundentes ad antiquitatem pertinentia in Adversaria mea *ἐν παρόδῳ* conjecerim, alio forsan tempore ad te referenda, placuit in praesentiarum hanc meam qualemcunque dubitationem ad te perscribere. Festus de verborum significatione describit *Caduceatores legatos pacem petentes*, eumque secutus ipse Cl. Vir in eruditis suis ad Curtium adnotationibus p. 125. *Caduceatores* per legatos exponit: At loca Polybii, quae adferam, docere videntur, Caducatores non esse ipsos legatos pacem petentes, sed alios quosdam *προδρομους*, qui ante legatos mittuntur, ut pro iis *ἀσφάλειαν* petant, viam-

viamque muniant : locus autem habetur. cap. 24. p. m. 41. quem adscribam integrum : ὅτι μετὰ νύκτωρ, οἱ Ῥωμαῖοι τὴν αὐτῶν πρὸς Ἀντίοχον παρεληφότες καὶ τὰς Σάρδεας καὶ τὰς Ἀκροπόλεις ἄρτι, ἦκε Μισσαῖος Ὀπικηρυκδύμῳ παρ' Ἀντιόχου. καὶ ὅτι πρὸς Πόπλιον Φιλανθρωπῶς προσδεξαμένων αὐτὸν, ἔφη βέλεσθαι τὸν Ἀντιόχον ἐξαποσαλῆναι πρεσβευτῶν, τὴν Διφραχθισομένην ὑπὲρ τῶν ὅλων. διόπερ ἀσφάλειαν ἤξις δοῦναι τοῖς πρεσβυνομένοις. καὶ ὅτι συγχωρησάντων, οὗτος μὲν ἐπανῆλθεν. μετὰ δὲ ἡμέρας ἦγον πρέσβεις πρὸς τὸν βασιλέως &c. sic &c cap. 4. p. 8. eos a legatis distinguere videtur. ὅτι καθ' ὃν χρόνον οἱ τῶν Ῥωμαίων πρέσβεις ἐν ταῖς Ἀθήναις, ἐποιῶντο τὴν Διφραχθισομένην Νικάνορος, καὶ πρὸς Φιλίππου κατὰ τρέχοντα τὴν Ἀθηναίων ἕως τῆς Ἀκαδημίας, προδιφραχθεύοντες πρὸς αὐτὸν οἱ Ῥωμαῖοι κήρυκας. συνέμιζαν αὐτῷ, &c. quos & σαλπικτην, penes sese habuisse testatur idem cap. 9. p. 19. πρεσβυτῶν ὁ κήρυξ καὶ σιωπησάμενος τὰ πλήθη διὰ τῶν σαλπικτῶν &c. per κήρυκας autem intelligi Caduceatores dubitare nos non finit Livii locus eandem hanc historiam narrantis lib. xxxvii. (prout adfertur ab Urfino in notis suis ad hunc Polybii locum) *sub idem fere tempus caduceator ab Antiocho per P. Scipionem a Consule petiit, impetravitque, ut Oratores mittere liceret regi*; haec, nisi dicamus nomen legatorum late sumi, quomodo conciliari possint non video. Sed est adhuc aliud, de quo tuam vellem scire sententiam, quamvis sit μετέβασις εἰς ἄλλο γένος. nempe de Evangelio S. Matthei, qua lingua sit exaratum primitus, Hebraicane an Graeca, ego enim perpensis utrimque auctoritatibus & rationibus ob periculosas consequentias, ἐπέχω. Haec & alia sequutura forsitan, si me docere volueris, immortalis me afficies beneficio. Vale Vir Cl. Deum supplex veneror te diu florentem & incolumem Reipub. litterariae conservet. Scribebam Traj. ad Rhenum A°. 1654. ipsis Idibus Februarii. Styl. Vet.

EPISTOLA CCCLXXVIII.

GULIELMUS ANSLAER

Cl. V. Nicolao Blancardo S. P. D.

Quotiescunque recordor Cl. Vir, istius temporis, quo proxime una fuimus, quod saepius facio, facturusque sum, non possum non identidem tuam exoptare praesentiam, quod dum hoc tempore frustra facio, nihil mihi restat, quam ut isto utar medio, quod absentes praesentes facit, Epistola enim sola res est, quae absentes praesentes facit. Etsi vero hoc tempore nihil habeam, quod tua studia morari posset, summus tamen in te amor meus me ad scribendum impulit, cui eo facilius obsecutus sum, quod me nihil tibi ingratum facere confidam : familiariter hic utor Viro Cl. D. Coccejo, qui ut est ex humanitate totus compositus, quotidie ipsum adeundi veniam mihi concessit, quod profecto avidissime arripui, non possit enim mihi exoptatior ad ulterius in Hebraicis proficiendum offerri occasio. quare pro tempore adhuc aliquo

Me sibi totum tenent

Hebri nepotum scripta.

Verum non ita totum, ut non aliquid quotidie temporis, quamvis id sit satis exiguum, impendam litteris Graecis & Latinis. legeram nuper in Polybio *πρὸς πρεσβυτέρων* c. 13. p. m. 27. *ταῦτα λέγων φέρειν ἄλυσιν ἐκέλευσε καὶ σκύλακα σιδηρῶν ἐκάστω περιφέρειν πρὸς τὸ τεράχηνον.* Quid sit σκύλαξ σιδηρῶς nusquam me legisse memini, nisi quod generaliter sciam, esse quandam catenae speciem, itaque peto abs te ut hoc latius, nisi molestum sit, mihi explices. memini me aliquando ex te audivisse, cum pro summa tua humanitate nomen tuum Albo meo inscribere dignatus es, cum morem jam a Ciceronis omnino, ni fallor, temporibus invaluisse, qua de re vellem mihi aliquod ex antiquitate exhiberi testimonium. propediem ex officina Hackii prodibit Homerus cum scholiaste Graeco, sive is Didymus sit, sive alius, paucula quaedam adhuc tantum restant folia imprimenda. molitur etiam editionem Polybii cum notis ineditis *Casauboni*, habet omnino multa MSS. a *Merico Casaubono*, sed plura adhuc desiderat, quae ubi acceperit, statim prelo subjiciet. Elzevirii edunt Herodotum, Gr. & Lat. in fol. cum commentario *Georgii Hornii*, cujus etiam dissertationes historico-politicae excuduntur. Sed detineo te, quare finio. Deum supplex venerans, te diu incolumem Reipubl. litterariae conservet. Lugduni Batavorum. 5. Calend. Novembris A°. 1654.

EPISTOLA CCCLXXIX.

NICOLAUS BLANCARDUS

*Reverendo Doctissimoque viro. D. Jacobo Lydio, Dordrechtanae Ecclesiae
Pastori fidelissimo, S. P. D.*

Dordracum.

PErgratae fuerunt Hermetis nostri literae, quibus veterem amicitiam, & qualiacunque in eum studia, quando hic fuit, nimio opere laudasse visus, simul desiderium tuum noscendi Nehalenniam, singulare Francorum numen, significavit. Gaudeo occasionem datam breviter explicandi, de quibus adhuc velut de incerta re, omnes ambigunt. Atque utinam superessent expressae olim litteris meditationes, quas amici mei semel acceptas nunquam remis-
erunt! Quantum tamen memoria teneo, & inscriptiones juvabunt, communi-
care consilium est. Neque advocabo probandis singulis antiquorum testimo-
nia, nisi obvia, & quae requirenti mihi sponte in manus venient. Inprimis
peto tarditatem responsi molliter interpreteris. Nam conjugis gravidæ mor-
bus pene capitalis (febrem continuam loquor, atroces artuum dolores, & post
ista variolas) per duo & triginta dies sollicitum habuit: ac nunc ipse vigiliis
fractus, animo quoque langueo & torpeo, *Pocula lethaeos ut si ducentia somnos,
Arente fauce traxerim.* Nihilominus commasculavi frontem: utcunque res ca-
det ἐπιφθὲν καὶ βῆμα statuae, quas quidem videre ac dimetiri contigit. fuere in
uni-

universum octodecim : Arae quattuor. Ex illis una Jovi; duas Neptuno, reliquae omnes Nehalenniae consecratas. Undecim sedentem praeferunt Deam, quattuor stantem. Sed in his quaedam variant. Nam sex sedentem sic expriment, ut sinu calathum teneat horariis fructibus repletum, & praeter ista, tres calathum humi sinistrorsum adpositum, una corbem manu laeva suspendat. Ad haec in tribus Deae sinus vacuus: in duabus quidem corbis unus, in tertia duo, pedes juxta hinc & hinc positi. Quin etiam sex (quod de omnibus stantibus simul adverti velim) canem venaticum; una proram navis rostratam, sinistro pede pressam, repraesentant. jam in erectis imaginibus vix digna memoratu diversitas recurrit, nisi excipias singulare monumentum, in quo Nehalenniam accedit *Δρύας*, seu sacerdos Gallica, cum flamine, cui ad latus sacrificulus, fragmini columnae insistent. Latera statuarum ornant plerumque cornucopiae, aut opus *ἐγκαρπν*. frequenter etiam Dii, velut Hercules nudus, clavam tenens, & exuvias leonis indutus. Neptunus pariter nudus, barba undatim fluente, cum gubernaculo, tridente ac Delphino. Lapis, e quo statuas dedolavit artificum industria, subcinericius est, scaber & fabulosus natura, facileque in arenam resolvitur: illi opinor haud dissimilis, qui ex candidis Britanniae montibus eruitur, nisi is ipse sit. Certe in columna, Nehalenniae dicata, mentio cretarii Britannici, de quo infra. Quin ipsum sacellum ex parili materia structum fuisse, firmat alia columna, non semel a me lustrata apud *Samuelem Episcopum*, societatis Indiae Asiaticae, dum superstes, praefectum. Idem adstruunt lapides majores, quibus universa aedis moles, ceu fundamento, innixa. Sin vehementior Euris mari incumbat, tunc arenis disjectis, rudera murorum aperiunt se, non sine fructu Romanae suppellectilis studiosorum, qui inde, precium operae, vasa Samia, Lemnia, fibulas, urnas, nummos veteres, hisque confimilia, identidem referunt. Formam monumentorum facile conceperis, si subjicias animo portas splendidiore operis fornicati, quae palatiis regum praestruuntur: aut arcus triumphales urbis, ac praecipue post Judaeos devictos positum Tito Vespasiano. Nam e basi adsurgunt columnae, modo quattuor, saepius binae, eaeque vel planae (figura parallelogrammi rectanguli.) vel cylindratae, rarius striatae. Atque his dein arcuata fere moles superinducitur. Sedes illa, cui Nehalennia insidere deprehenditur, non uniformis est. In duobus monumentis id sellae genus videtur, quod scriptoribus antiquis *SELIQVASTRUM* dicitur. Marcus Terentius Varro libro IV. de lingua Latina, §. XXVIII. *Ab sedendo appellantur sedes, sedile, sedum, sellae, seliquastrum.* sed longe clarius incognitae vocis originem, & notionem explicat Festus: *Seliquastra sedilia antiqui generis appellantur, D litera in E conversa, ut etiam in sella factum est, & subsellio, & solio, quae non minus a sedendo dicta sunt.* Fuit autem seliquastrum cathedrae genus priscis regibus usitatum, ad commodiorem usum ita effectum, ut dorsum reclinatum recumbere in eam posset, *σὺν ἀνακλιτηρίῳ*. Hesychius: *Θρόνον, ἀνάκλιτον δίφρον*. sic enim Graeci vocant sedes vel cathedras, quae *ἀνακλισμὸν* sive recubitorium habebant. Ea forte ratione *mollis cathedra* Juvenali, satyra sexta, qua in sequioris sexus scelera invehitur:

— — *famam contempserat olim:*

Cujus apud molles minima est jactura cathedras.

De Hippiā loquitur Satyricus, quae cum senatori nupta esset, cum Sergio tamen gladiatore moechno suo in Aegyptum profugerat. Siliquastrum in prima syllaba Varroni, & Festo per vocalium secundam scribitur. Hygino duobus in locis, & Arnobio per tertiam. Illi in Astronomico: *Cassiopeia inter sidera sedens in siliquaastro constituta est.* Et rursum: *Cassiopeja sedens in siliquaastro collocata est.* Arnobius libro 11. *Quid arquata sellula, acus, strigilis, polubrum, siliquastrum?* Sic legit codex vetustus Francisci Sabaei Brixiani, qui Romae vulgatus anno seculi praeteriti quadragesimo secundo. Non spernam tamen priorem scripturam, ob solemnem vocalium E & I inter se commutationem. Sic *speculator* pro *spiculatore*, & similia, de quibus nos alibi. Errant qui *siliquastrum* de mendo suspectum habent, & inter herbas referunt, quibus nullus locus est inter instrumenta. Nec ignoro plantae genus esse, *piperitis* etiam a Plinio, in libro xx. in cap. 17. ast non ea Afri mens. Notabile est, Paulo Jureconsulto in lege iv. Digest. de supellect. leg. id sedis genus non incognitum. *Rhedae, & siliquastra* (inquit) *supellectili annumerari solent.* Sic ante *Antonium Augustinum* legebatur, & probat *Haloander.* sed ille emend. iv. ex libris Florentinis, reclamante licet exemplari Norico, stylum vertit, & substituit *sedularia*, interpretatusque ea, quae in rheda sedenti subjiuntur. *sedularia* legisse quoque videtur Hadrianus Turnebus, lib. Advers. viii. cap. 9. *Quae in sedilibus, ut cathedraria in cathedris numerantur,* de quibus lex quinta Dig. eodem. Idem Turnebus lib. xviii. cap. 23. *Ut rosaria rosae, sedularia tanquam sedillaria.* Porro siliquastrum ἀμφικέφαλον καθέδρα Synesio, Cyrenes episcopo, in cujus generis sede collocata Cassiopea. Hinc eam *Scaliger* in Mapis كوسى ذاك hoc est mulierem siliquastrum dici testatur. Vide imagines siderum Germanici Caesaris, ex Manuscripto desumptas, & observa duas earum stellarum quae in forma sunt collocari ἐν τῇ κεφαλῇ τῆ καθέδρας, hoc est in sedis extremitate. Figura talis est, ut partes singillatim consideratae parallelo-grammon rectangulum efficiant. Omnes tamen eas cathedras non fuisse ἀμφικέφαλες, ex veterum monumentis hodieque varie videmus. In marmore quod reperitur Romae ad Lateranum, adest convivantibus musicarius, in sella semiotunda constitutus, sed pone & ad latera undique clausa. Eum *Fulvii Ursini* appendicem ad librum Ciacconii de Triclinio. Alias in marmoribus sunt apertae, etiam quorundam Graecorum. Exstat Mettii Epaphroditi cathedra in lapide Bertoniano simili figura, quam cum Grammatici illius imagine artificiose ex archetypo delineavit Theodorus Gallaeus. Habet porro una Deae sedes ὑποπόδιον, aut scabellum, quod, auctore Clemente Alexandrino, Persae primi reppererunt, sed aliis quoque gentibus post usitatum, satis adstruunt imagines Mettii Epaphroditi, Moschionis, & Pythae, apud Fulvium Ursinum, ut de aliis nihil dicam. Notissimus tibi locus instrumenti Novi, μήτε ἐν τῷ ἔργῳ, ὅτι θρόνον ἐστὶ τὸ θεῖον, μήτε ἐν τῇ γῇ, ὅτι ὑποπόδιον ἐστὶ τὸ ποδῶν αὐτοῦ. In canticis Davidis, id quod Hebraice דַּבָּר & Graecis ὑποπόδιον, Lactantius vertit *suppedaneum.* Tale Christi pedibus, in cruce pen-

pendentis, subjectum fuisse, multi credunt, nummi adstruunt, Gregorius, etiam Turonensis palam clamat. Sed omnium pace, si transcribendam vulgo fabulam, & ἀνιστορησίαν dicerem, nihil erravero. Quamvis pater Annalium alta intonet voce, rumpantur ut ilia, quid effecerit? omnes antiqui Christiani arrectario crucis ligno aliud minus adfixum fuisse tradunt, ἐφ' ᾧ ἐπερῆνται οἱ περσέμενοι, ut loquitur Justinus Martyr. De suppedaneo ἡ δὲ γῆ. Caeterum ista non sunt hujus loci: hoc te magis scire expedit, cujus credo causa appellatus, quae fuerit Nehalennia, quae nominis ratio, & cur divinis culta honoribus. Eam rem, tui Celossique nostri intuitu, facile suscepi, id vel in primis praefatus, nolle in demonstrationibus haberi, quae probabili solum conjectura nituntur. Quin Nehalennia maritimae gentis nostrae, vicinorumque tractuum, singulare numen fuerit, & quidam velut genius loci, nihil ambigo. Inde est, quod nullus veterum, seu Graecos spectes, seu Latinos, vel nominis ejus meminerit. Dicta etiam loca Saliis, & primis Francis habitata, ex memoriis rerum claret. Primos voco, ut secernam a secundis seu transrhenanis, qui cum mediterranea occupassent, simul eandem religionem, a maritimis Francis cultam, secum devexere. Inscriptio Divitensis, prope Coloniam Agrippinam. DEAE NEHALENNIAE ERIATTIVS IVCVNDI PRO SE ET SVIS VSLM. Perperam Gruterus edidit, NEHAEE. Marcellinus de Juliano in XVI. *Agrippinam ingressus, non ante motus est exinde, quam Francorum regibus, furore mitescente, perterritis, pacem Reip. firmaret, interim profuturam & urbem reciperet munitissimam.* Franci igitur ad Rhenum, seu in Germania secunda, & ab iis, mutato nomine, Francia secunda deinceps audit. Ex veteris linguae Gallicae & Graecae cognatione, hujusque cum Latina, Nehalennia omnino videtur esse crescens, seu nova Luna. νέα ἐλήνη, aut σελήνη. Sic ex Graecorum ἡμί, ἑξ, ἑπτα, ὑπέρ, ὕς, ἑρπω, ἑδο, ὕλη. Latini fabricarunt. *Semi, sex, septem, super, sus, serpo, sedes, sylva.* Ac in plerisque his verbis πρὸς in spiritum mutare sustinuerunt. Origo vocis ac rei a Druidibus, qui in omnibus fere rebus publicis, privatisque rationibus, Graecis literis utebantur, prout Caesar Julius scripsit in Belli Gallici commentario sexto. Insula nostra Walacra, (quae in manuscriptis saepe *Gualacra*) quid est nisi extrema Gallia? Literarum V & G facilis transmutatio. Ita *Walia* pro *Gallia*, & hodiernum *Walo* pro *Gallus*. Taciti quoque aevo exstabant Graecarum reliquiarum sparsa per Galliam Germaniamque vestigia. Hinc in ripa Rheni Ἀσκιπύργιον, ara ibidem consecrata, & tumuli Graecis litteris inscripti, in confinio Rhetiae & Germaniae. Esto igitur Nehalennia, Nova Luna; Cur eam praecipue coluerint, nonne quod opibus ejus juvarentur? Solis Lunaeque tempora observabant, cum fererent & conderent. Videsis Horatii Oden. 24. lib. III. *Coelo supinas si tuleris manus Crescente Luna* &c. Huc faciunt calathi fructibus pleni in monumentis. Praeterea Franci, maxime Salii, aestibus marinis obnoxii, quorum accessus & reciprocratio ab Luna. Idem sydus, dum crescit, mitius judicabant pleno, quod aestus violentes efficere consuevit. Unde cum incremento tutiores navigationes, & fausta praelia, mentibus augurabantur. Exempla

pla obvia: illius in Caesare, comment. iv. B. G. cap. 29, hujus apud Frontinum lib. Stratag. ii. cap. i. Graeci quoque Lunam & colebant & observabant, sed ex legibus Lycurgi, μηδὲ εἰς πόλεμον προχωρεῖν πρὶν τὴν σεληναίην πλήρεια γενέσθαι, ut loquitur Lucianus. Sed omisissis praeliis, si navigationes spectes, monumenta nonnunquam Nehalenniae vovebantur in itineris procinctu: DEAE NEHALENNIAE M. TARINVS EX VOTO SVSCEPTO L. M. Frequentissime autem emenso oceani periculo. In lapide, cujus ἐπιγραφὴν Celossius noster petit, legitur. DEAE NEHALENNIAE IANVARIVS AMBACTHIVS PRO SE ET SVIS V. R. L. M. id est *Votum reddit libens merito*. In aliis omnibus v. s. l. m. *Votum solvit*. Juvabit unam caeteris nobiliorem subjicere inscriptionem, quam repperi in columna. DEAE NEHALENNIAE OB MERCES RECTE CONSERVATAS M. SECVNDO SILVANVS NEGOTOR (id est *negotiorum gestor*) CRETARIVS BRITTANNICIANVS VSLM. Portus, quem Romani Francique advehebantur, *Tabuda* erat, seu novus Scaldis (vetus enim Mosam influebat) Augusti Caesaris aevo ductus: servatque hodie memoriam originis vocabulo *Roompot* (malum *Room port*, Romanorum portus) inter Scaldiam & Wallachriam, nobilissimas gentis nostrae insulas. Illic appulsi, in templo Nehalenniae, quia non aliud portui vicinius, vota sua solvebant reddebantque. Sed de cane venatico omisi dicere, qui assiduus fere Deae comes. Vidi aram subrubram, cujus frons insigniter deformata, verum latere illaeso. Huic insculptus servus tunicatus, capite detonso, dextra baculum tenens, & leporem alteri baculo appensum, laevo humero gestans. Vidi praeterea vasculum terra samia, referebatque cervum, cum binis canibus persequentibus. Haec in honorem Dianae, quae eadem cum Nehalennia, Hecate & Proserpina. Virg. *Tergeminamque Hecaten, tria Virginis ora Dianae*. Servius alibi. *Hecate trium potestatum numen est, ipsa est enim Luna, Diana, Proserpina*. Horatius, *nox, & Diana, quae silentium regis, Arcana cum fiunt sacra*. Atque haec mihi, reverende Lydi, visa semper cultus Novae Lunae simplicissima interpretatio, quam ante quatuordecim annos κατὰ πλάτῃ praeivi² Olivario Vredio, consuli Brugenfi, neque, cur ejus adhuc pigeat, obstare quidquam haecenus reperio. Illud rogo, postea quam nostra ad lapidem Lydium exegeris, simul ipse quid conjectes, ad me perscribas. Adde pro munere sententiam super cap. xv. comma 20. Actorum Apostolicorum, ἀλλὰ ὁπισθῆναι αὐτοῖς ἔμπροσθεν ἀπὸ τῶν ἀλισγημάτων τῶν εἰδώλων καὶ τῆς πορνείας, καὶ ἔμπροσθεν, καὶ τῶν αἵματων. Item cap. xix. comma- te xxxv. πῶς γὰρ ἐστὶν ἄνθρωπος ὃς οὐκ ἐκινώσκει τὴν ἐφεσίων πόλιν νεωκόρον ἔσται τῆς Μεγάλης Θεᾶς Ἀρτέμιδος καὶ τῆς Διοπετῆς. De Neωκόροις seu ἱεροδούλοις veterum, res necdum satis explicata ab iis, qui principem in Sacris Literis locum tenent. Vale, Vir Doctissime, meoque nomine Hermetem Celossium, qui semper visus mihi ὁ πανάρετος, officiose saluta. Middelburgi Zelandiae MDCLXIII. VIIII. Eid. Octobr.

¹ Immo *Negotiator* ut centies in lapidibus veteribus, vid. Indices Gruteri & Reinesii. quem vid. ad cl. i. 184.

² Vide additiones ad veteris Flandr. lib. prodromum ii. ad cap. xxii. fol. xliv. An vero *Vredio* praeierit *Blancardus*, an illi sua sublegerit, aliorum judicio relinquo.

EPISTOLA CCCLXXX.

NICOLAUS BLANCARDUS

*Nobilissimo A. P. Jongestall.**Leopardia.*

M Eministi opinor, Domine, quum novissime Jcti sacris interessēs, brevibus me insinuasse tibi, quid adversum sparsos falsosque rumores moli-
rer, nec aliud justius prae manibus esse praesidium, quam ut totum negotium
ad Illustrium Academiae Curatorum cognitionem referretur. Nam & causae
innocentia, & honesti nominis existimatio, tum male feriatorum hominum
iniquitas, ipsiusque adeo splendor Principis, id uti facerem, suadere videba-
tur. Nunquam veritus sum eos, qui meam indolem, & in melioribus literis
scientiam satis perspexerunt, me plagii reum insimulatu-
ros. Constans etiam nos ambitio tenuit, per quos doctiores melioresque facti essemus, eorum me-
rita candide profiteri. Sed hi scurrae tam latenter struxere dolos, ut me
omnium ignarum citius confecisse videri possint, quam nostra allocutio ad
proceres provinciae fuerit transmissa. Hujus exemplar unum a fine atque ini-
tio (erant paginae quinque) varie conscribillum, invidaeque manu perstrictum,
in privato locatur auditorio, juxta positis *Boxhornii* orationibus. Nec mora,
accedunt ad conditum tempus adolescentuli, ac, uti fit, caperata fronte Pro-
fessor fabulantibus interveniens, velut nescius suscitatur. Quid novae rei? O
divinam Schedam? sed ut aureum vellus raptum magis, alienisque ex parte
laciniis circumdatum. Egone haec audire, mi patrone, haec post terga jaci
mea, famamque trahi, vexari, scindi crudelissime paterer, sustinerem? Addi-
tur ex orco splendidum mendacium fuisse in adversariis oratiunculam *Zuerii*
manuscriptam: nec enim tam vesanum, tam impudentem fore aestimabant,
ut typis expressam, & quae in omnium notitiam venisset, transcribere aude-
rem. Nescimus, utrumne istud serio, atque ex rei compertae faciant fide,
an fictionibus cassis ludentes, ingenii quadam protervia lasciviant. Nam ma-
nuscriptum nec habere, nec ullo tempore habuisse, & meam conscientiam, &
quod longe majus, numen testor sanctissimum. Adhaec orationum exemplar
vulgatum, sola comparandi nostra cum illis voluntate, septimo demum hujus
Novembris die per *Arcerium* redemi. Tantum abest, ut quae Majo mense scri-
beremus, ex alterius scriniis partem aliquam furtim mutuati fuerimus. At tu
forte cum istis dices, mi Patrone, fieri haud posse, ut alter alterius ignarus, ea-
dem & dixerit & scripserit. Dicam igitur quod res est, & Herculeum tibi ar-
gumentum opponam, quod neque illi de catasta scurrae, nec arietes ratiocina-
tionum, aut si quid his validius, possint ludificari. Anno hujus seculi octavo
& quadragesimo, reversus Monasterio Paderbornam (designatus paulo ante eam
Professor Steinfurtenensis) dum ob stabilitam pacem Hispanos inter & Belgas,
universa exultat Europa, neque plebs & honore usi sua capiunt gaudia, scripsi

Panegyricum inclytis Legatis, *Mathenesio* & *Pavio*, sacratum. Constans fama erat eos salutaturos *Ernestum Guilelmum* Comitem Bentheimii, transituosque Steinfurtum aut Scuttorpum. Egoque tunc juvenis, vivacisque ingenii, & honestae ambitionis, captabam occasiones, dicta oratione eorundem in patriam studia amplissime gratulari. Sed comperi secus Neohusium flexisse iter Oldensaliam, indeque per Transifalanos Hagam meditari; postquam Lugdunum Batavorum apud consanguineos veni, eorum suasu an auctoritate, typis describi passus sum. Nec multo post eadem non modo Legatis, sed patriae Urbis Magistratui, omnibusque Professoribus, & si quos alibi caros habebam, donata. Ejusdem scripti exemplaris bona pars a typographis plumbagine distincta apud me servatur, mei candoris, innocentiae, ac veracitatis testis locupletissimus. Tu si quidem, Patrone, juris & prudentiae consulte, facile judicabis rei dominum & auctorem re sua uti pro arbitrio ac voluntate posse. si in illis quaedam laudabiliter inventa, acute disposita, stylo vere Romano enuntiata, quis aegre ferat ista abs domino usurpari? quod si deinceps alius post triennium (nam oratio quam compilasse differor, 1651. expressa) meis utitur; ut suis, an aliena usurpasse dicendus sum ut meis? Absit, absit a vere bonis tam mala & ficulnea ratiocinatio. Quae omnia fidis coram testibus, nostrique Lycei praepositis, ostendere sedet sententia: nam quum videam nec modestia, nec patientia quicquam profici, & maledicus rumor crescit eundo, silentium pro crimine habetur. Idcirco nec abs re fore, opinor, judicabis, si coronide apologetica meque & adlocutionem adversus tot viperas in angulis vel circulis sibilantes defendam. Sed istius invidiae Theoniacae causas in unum si contraham, prima occurrit titulus Historiae Graecae Professoris, qui dudum ussit germanum Ononymum. Accedit prolixus tui, mi Patrone, & tuorum erga me favor: quem ego, si vir sum, quousque licet, aeternum demerebor; nec faxim ut ingratus, dum vivam, inveniar, paratus deinceps erga filium, modo patiens esse consiliorum, & solutos mores desuescere velit, reapse qui sim per omnia & in omnibus manifestum dare. Nec sine piaculo transeunda Illustrissimae Principis *Albertinae* benevolentia, per te etiam & vere nobilem *Harenium* conciliata. Hujus occasione nec silebo in dubium vocata Principis iussa, ac si multo ambitu, nec illius sponte, factum foret, ut filii adventum publice gratularer, ejusdem studia urgerem, illiusque curam, absente matre, susciperem. Quae cuncta falsissima esse, teque & adfinem, ipsumque Principem modestiae meae veros fidosque testes invoco. Nec verebor subjicere, quantos motus, quot bombos ediderit Adlocutionis dedicatio, praesertim unius Olcosunianardi, qui Academiae dignitatem his consiliis violari rabie plusquam Scythica clamitabat. Sed fruantur sensu suo, mihi satis erit, post fidem Principi vobisque debitam, veritati litasse. Plura adderem si non urceus dum coepit institui, rota currente, amphora exiret. Vale, Vir illustris, ac patrone incomparabilis, cui cum omnia mea deberi gratus profitear, hoc insuper gratissimum accidit, quod me tanto praeside possim tueri. Deus te tueatur, ac justitiae bonorumque omnium bono diu servet, sospitet salutem conjugii le-

etissi-

ctissimae, florenti liberum gregi, ac Nobilissimo *Harenio* abs me & uxore dicto plurimam. Franekeræ 1671. 15. Novemb.

EPISTOLA CCCLXXXI.

ABRAHAMUS BERKELIUS

Nicolao Blancardo S. P. D.

Franekeram.

Non abs re metuo, doctissime *Blancarde*, ne tu me hominem plane illiberalem existimes atque ingratum, quod aut nullo munusculo tuæ liberalitati responderim, aut quod nunc demum tanto tempore post pro insigni tuo congiario, quo me hominem nullius famæ & immerentem prosequutus sis, gratias agam, verum si quid mihi apud te fidei est, hoc credas velim neque mea inurbanitate neque ingratitude, sed afflictissimo Foederati Belgii statu, & tympanorum ac tubarum undique sonantium clangore factum, ut serius quam decuerit, calamum strinxerim: existimabam enim cum aliis non amplius in litteris sed in armis, quæ Batavi hætenus infelicissimis auspiciis gestarunt, omne Reip. praesidium esse quaerendum. Fateor equidem me ex *Frisiorum* finibus tam præstantissimum donum exspectasse nunquam, nam cum nemine mihi isthoc sub sole, præsertim *Franequeræ*, hujusmodi amicitiae necessitudo intercedebat; quare maximas tibi habeo gratias, quod me talibus principiis ad te pellexeris, imo necessitate quadam eo adegeris, ut sincerum tecum amicitiae foedus ineam. Dederam *Bibliopolæ* in mandatis, ut mihi mea pecunia ex auctione quadam *Charisium Sospitrum* compararet, sed clarissimo tuo nomine alium tradidit, passim a viro docto emendatum atque suppletum. Quid multis opus est? agnosco eximium tuum erga me immerentem beneficium, quia sic voluisti, data occasione par pari relaturus. Sed ex *Geldero* etiam recognovi, te novam *Harpocratonis* editionem parare, nuper mihi ostendente *Maussaci* notas, hunc in finem tua opera interpolatas, atque ad eum transmissas: has cum obiter in officina percurrerem, mihi in mentem incidit (ignoscas, quaeso, tam libere & candide agenti apud ignotum, si famam excipias) superesse addenda quaedam ad notas in *Harpocratonem*, quæ *Maussacus* post *Plutarchum* de fluminibus *Tolosæ* MDCXV publici juris fecerat, & *Salmasio* dedicaverat. Hæc nusquam inserta animadvertens, manibus pedibusque apud *Gelderum* instabam, ut te de hisce minutis admoneret; quod ille quodammodo subterfugiebat: suppeditavi tamen ipsi libellum, quem post crebras admonitiones describendum curavit, & uti ex ore ejus percipio, ad te misit. Verum hoc obiter addam, nonnullas mihi esse difficultates in *Harpocratone* ipso, atque scrupulos, quorum unicum duntaxat monebo, in voce *Ἀρασιλῆς* latentem, ibi enim sic excusum est. *Γέγραπται καὶ Δεινάρχῳ λόγῳ κατ' αὐτῶ ξενίας, ἐν ᾧ δεδήλωται, ὅτι Ἀλιμυρίσις συνεδίκασε* &c. Omnino hic subest aliquid portenti, quod nemo, nisi periti cerebri, ferre posset. An

Dinarchus conscripsit orationem contra suam peregrinationem? Nusquam mihi hoc apparet, illum fuisse τὸ ξενίας Διωκόμενον. Sine dubio verior erit nostra conjectura, scilicet hoc loco debere rescribi: Γέγραπται καὶ Δεινάρχῳ λόγῳ κατὰ πῦθες ξενίας. Tempus non teram in asserenda hac lectione, tantum Stephani mei verba apponam, quae id evincunt manifestissime; ita enim ille in voce Αἰγναι. Καὶ γυνὴ Αἰγναία, ὡς Δεινάρχῳ ἐν τῷ κατὰ πῦθες (male in vulgatis πῦθες) ξενίας. Possem hanc veritatem plurimis & minime dubiis argumentis ex Demosthene, Dionysio Hallicarnassico, aliisque confirmare, sed illud acerrimo tuo iudicio atque diligentiae committo. Quin in Bibliotheca Vossiana codex Harpocratonis M. S. exstet, nullus dubito, nam glossariis, lexicis, & aliis istius generis libris instructissima est, verum ea de re certus esse non possum, quia *Vossius* ante biennium ad Anglos enavigavit. Tu interea temporis quod potes perge, ut brevi hunc auctorem emaculatiorem, tuisque doctissimis annotationibus magis illustratum habeamus. Proxima septimana negotiorum meorum causa Hagam Comitum excurram, ex *Vossii* amicis simul expiscaturus, an aliquid in novam Harpocratonis editionem conferre possint, qua de re te posthac certiore reddam. Ad catalogum scriptorum Historiae Byzantinae quod attinet, nemo tibi illius copiam faciet, nisi instructus sit vere regio illo opere, quod privatas Bibliothecas non capit. In auctione Gronoviana immensi hujus operis tomus primus jam venalis prostat, huic *Philippus Labbe* praestantissimum indicem auctorum editorum & edendorum praefixit, quanquam non ignoro plurimos etiamnum hodie latere, & nuper post *Labbaei* mortem alios detectos esse: hinc si auxilium in proposito exspectes tuo, *Gelderus* tibi istum tomum fortassis vili pretio comparare posset. Pergimus jam pedetentim in Stephano nostro, qui anno praeterito sub praelo non sudavit, sed friguit, quod profecto non mihi, non typographo, verum potius publicis calamitatibus est imputandum. Vale, vir doctissime, mihi que hoc tributum velis, ut me e tuis unum possim dicere. Scribebam Lugduni in Batavis ante diem Septimum Decimum Kal Maj. Anno c1c1cclxxiii.

EPISTOLA CCCLXXXII.

ABRAHAMUS BERKELIUS

V. Cl. Nicolao Blancardo.

Franequera.

NUnquam profecto *Gelderus* ex Frisiorum finibus rediit, quin me tuo nomine salutaverit, & de insigni tua erga me humanitate certiore fecerit. Quid mei officii sit, & jam dudum fuerit, probe agnosco. Sed occupationes circum caput & latus salientes me ita districtum tenent, ut vix stylum in manus sumere & viris doctis & amicis mea officia offerre valeam. Ergo post longam cunctationem occasione ex ludicris meis, atque affaniis in publicam lucem emissis, nimis ambitiose quaesita, & affectata, animum has confingen-

di

di litterulas cupido incessabat. Etenim cum ante aliquot menses versioni & animadversionibus in gemina Stephani fragmenta finem imposuisset, non poteram quin potissimo tuo iudicio exemplar exponerem; quod si tibi & paucis aliis non fuerit improbatum, erit, cur me non male tempus & otium in comune rei litterariae bonum collocasse existimem. Fateor perexiguum esse congiarium quo te prosequor, & tuo adspectu vix dignum, spero tamen tibi ob venerandam maxime musarum κοινωνίαν, non ingratum futurum. Quamquam ut olim Lucilius a Persio sua poemata, ita & ego, quae de Graecis Latina feci, quibusque Stephani Fragmenta illustravi, a te legi reformidem: novi ingenioli mei modum, & quam exiguas & εδενοςώρως in litterarum pulvere progressus fecerim. Haecenus mecum alii tuam Harpocratonis versionem expectarunt, cujus partem typographus oculis subiecit: nae multum tibi meliores literae debent, qui ipsarum illustrationi tantum operae impendas. Utinam ita res ferrent tuae, ut alios ejus generis criticos beneficio tuo haberemus! Nuperime N. ex Italia redux, quid tunc temporis, cum de ipso apud Gelderum verba faceres, contra te, *Heinsium*, *Spanhemium*, & alios rei litterariae Atlantes machinatus fuerit, jamjam ex supplementis lacunarum in Aenea Taëtico, Dione Cassio, & Arriano lecturus es? non ita N. cum *Gervartio*, & aliis viris doctis egit; quos semper, si quid humani irrepsit, humanissime admonuit. Haecenus cum N. amicissime vixi, tuaque admonitio, pro qua tibi grates habeo, agoque maximas, non duntaxat hunc Juvenem apud me suspectum reddidit, verum aliae machinationes & fraudes, de quibus praestat filere, quam pauca dicere. Videtur ille jam omnem eruditionem, & quidquid in bibliothecis rarum & magnificum, Italiae subduxisse, ut in hisce regionibus solus in literas & literatos dictaturam exerceret. Rogabis quid Stephanus meus agat. Tandem fiet surculus arbor. Quod lucem nondum videat, mihi non est imputandum, sed typographi culpa, quotidie temporum diritatem, papyri Gallicae inopiam, & nescio quid nugarum praetexentis. Interim si in edendo Harpocratone, qui fortassis nunc brevi prelo subjicietur, tibi inservire mea opera queat, ea utere, & abutere pro arbitrato tuo. Vale, Vir Clarissime, & hominem tui amantem ama. Dabam Lugduni in Batavis ante Diem x. Kal. Jun. 1675.

EPISTOLA CCCLXXXIII.

NICOLAUS BLANCARDUS

Abrahamo Berckelio.

Leidam.

ACcepi nuper, Clarissime Berckeli, & quod Gelderus misit, Harpocratonis folium, cum fragmento Stephani tui, & quas huic comites dedisti literas. hae quod erant candoris modestiae, amoris & doctrinae notis perfusae, me μαλακῶς ἔχοντα ἐν τῇς ἀσθενείας exhilararunt aliquantulum. Illud,
Oooo 3 quod

quod fiduciam darent properae editionis scriptoris ejus, in quo tot soles condidi, non mediocri gaudio affecit. Gratissimum pariter venit in emendandis operis tam liberaliter oblatum mihi studium tuum, eoque nomine quantum tibi debeam, facile intelligo. ut nihil dixerim interesse posteritatis, tantum auctorem, & τὸ λεξικογράφων vetustissimum ab naevis prorsus omnibus, quantum humana ope provideri potest, vindicari. Itaque jure amicitiae postulo, ut exemplar Graccum, quod est multo unguium morfu correctum & distinctum, sic exprimendum annitaris, nihil ut in eo alieni visatur. quod ipsum si in nostra versione consequor, gratias pro tanto beneficio acturus sum maximas. de Forma operis quid decreverim, ex epistola ad Gelderum cognosces. Voce Αἰγίς ad oram codicis, quo hîc utor, pauca notaveram e Nymphiodoro, ubi cum Θάωρα legi videam, mutabis in Θάερα, nisi forte in chartis transmissis a me sit occupatum. Stephani ἀποσπασμάτια, pro quîs grates ago meritissimas, arrepta ex templo devoravi. atque utinam caetera ejusdem tuis vigiliis habere-mus, quae non dubie ad eundum gustum exacta. non ego is, qui solitus sim cuidam mortalium, nedum viris sagacibus, & de literis bene merentibus, ancillari. Sed animum testor, eumque, qui mediis cogitationibus intervenit, ubi locos tentatos emendatosve inspexi, perpendi, suis cum auctoribus contuli, statim pro studiorum tuorum ἐμπροσθέν me precatum, ut tam feliciter incepta benignus Deus secundaret. Si quae alia de hoc genere prae manibus habes, aut luce donasti, indicabis, paratus ero τὴν χάριν τῷ ἔργῳ ἀμείβεσθαι: nec enim me tuorum operum quicquam, praeter τὰ ἐπιτηδεύματα vidisse memini. De Lucio isto, cujus supplementa in tribus scriptoribus percurri, dicendum ἐν πῶς λεγομένοις Arrianaei voluminis secundi. Isti, quia Vir bonae fidei sum, & tamen ὑπὸ τῶν χρεῶν δακνύμενος, sortem cum usuris dependam. Vale & feliciter vive. Franekerae, ex arce fiarda MDCLXXV. a. d. XII. Kal. Jun.

EPISTOLA CCCLXXXIV.

ABRAHAMUS BERKELIUS

V. Cl. Nicolao Blancardo S. P. D.

Quia ex tuis anno praeterito ad me datis intellexi, animadversiones meas ad Stephani fragmenta tibi non ingratas accidisse, nunc per fratrem Leovardiam commigrantem de mittenda ad te Ant. Liberalis Metamorphoseon congerie, notulis & quibusdam emendationibus a me illustrata, consilium formavi. Anni duo sunt, cum in officina libraria inter colloquendum forte fortuna dixeram fabulatorem hunc nitidissimum ac non passim obvium ab eruditis desiderari, & operae pretium fore, si a quoquam prelo subjiceretur. Typographus non improbens consilium exemplar meum petiit, quod ei utendum exhibui: illud cum ad me referret, obnixe rogavit, ut novam hanc editionem aliqua observatiuncula correctione ve augerem. Aegerrime aliquid

a me impetravit; tandem crebris sollicitationibus defatigatus expugnatusque, exhibui, quod tertia diei parte chartis alleveram. proverbium illud ah demens! de cane festinante in memoriam non revocans. Ingenue fateor aliquid commisi quod humanum est, & documentum unum, atque alterum dedi, quamvis origine natus; Vix suspicans aliquem repertum iri, qui illas nugas theonino dente arroderet. Quippe per annum lucem publicam non viderat, quin nostram exceperit alia editio Amstelodami excusa, & Delphis, non illis Phocicis, sed ad fossam Corbulonis in pulvere scholastico nata, in qua aliquando sine ulla aequitatis specie perverse nostra traducuntur, atque detorquentur. Hoc minime ferendum existimans, tandem decrevi istius hominis *σκαλαθυσμάρια* novo commentario refellere, eumque docere, si nesciat, quod plurima commiserit a veri rectique norma longissime remota, ut tibi aequissimo harum rerum arbitro evolventi patebit. Sed mi Blancarde, quid tandem fiet de Harpocrate, quem omnes docti a te emendatum tantopere desiderant? Si Leidenses Typographi recusent, invenies procul dubio Amstelodami ejusdem artis peritos, qui scriptis tuis faveant, & excudere non subterfugiant. memini me aliquando apud te mentionem fecisse de loco quodam in sapientissimo illo Lexicographo, *γέγραπται δὲ Δανάρχω λόγῳ κατ' αὐτῆς ξενίας*, ubi aliquid conjectabam tam pulchre ad rem faciens, quam Butubata Naevii. deinde locum, pensiore examine consideravi, sed reperiēbam, me oculis meis non recte usum fuisse. properantiae hoc condonabis & homini aliis rebus intento, quod ita tamen facias oro, ut ipsas literas, in quibus tam infauſtam conjecturam exaraverim, aut flammis tradas, aut quod illarum meritum est, multo pejus perdas: sed aliam tibi istius loco, musis, ut spero, melius faventibus, indicabo, quanquam vix dubitem quin mendam subolfeceris, qui multo unguium morsu totum Harpocratem correxeris. locus est in voce *ξυεῖς*: *ἔστι δὲ ἡ ἰπτικὸν ἔνδυμα ὡς Ἀριστοφάνης ἐν Φιάλαις*. An alibi citantur Aristophanis Phialae? Ego semper corrigendum existimaui, *ὡς Ἀριστοφ. ἐν Νεφέλαις*, vel *Ἀριστοφ. νεφέλαις*. locus de Xuthide apud Comicum isthac in fabula, hodie legitur Act. I. Scen. I.

Ὅταν σὺ, μέγας ὢν, ἀρμ' ἐλάυνης πρὸς πόλιν.
Ὡς περ Μεγακλῆης ξυσιδ' ἔχων.

Haec verba interpretes, ut ipse videbis, pessime acceperunt. Telam meam in Stephano nondum detexui, quam si tam longam & tam molestam futuram praesentiscere potuissem, dubito vehementer, an unquam fuisset exorsus. Vale, & pancratice vive. Dabam Lugduni in Batav. a. d. v. Id. Novemb. A. 1676.

*Nicolao Blancardo S. P. D.**Frankera.*

TAndem aliquando redit ad te Hyginus olim Salmasianus; pro cuius usu benignitati tuae gratias memini gratissimas. Comitem illi dedi recentem ejus editionem Cl. *Schefferi* cura, & meis aliquot notulis illustratam. Rogo levidense munusculum aequi boni facias? εἰ πλέον εἶχον, πλέον ἐδίδων, ceterum quicquid in scriptore isto perfecit *Micyllus*, & *Barthius*, & *Schefferus*, quicquid nos tentaverimus reliquimus tamen etiam ipsum Augiae stabulum. Quod si me ὁ κρείττων tamdiu superesse voluerit, donec δευτέρως dein edidero *Φροντίδας*, spero fore ut melius litem. Nam primum ipsum conatum damno ipse & despicio. deproperata enim pleraque in eo, & minus exacta. Hac hyeme fui omnis in Antonino Liberali, cui excudendo cum non parvo simul commentario quaero typographum, ubi prodibit aliquando, majori, ut mihi quidem videtur, fiducia ferre possit oculos tuos, quam Hyginus. Vale multum, Vir clarissime, & studiis nostris fave. Delphis. a. d. x. Cal. Martias Anno CXCICLXXXV.

*Thomae Munckero S. D.**Delphos Batavam.*

DE Hygino, quem *Schefferi* tuisque notis emendatum ad me misisti, & ago & habeo gratiam, Munckere praestantissime. Ex his ego praecipue sensi, quanta abs te in posterum exspectanda, & hae litterae tibi debiturae sint. Magnam ex earum lectione cepimus voluptatem, estque ἐκ τῆς κρασπέδος τὸ λοιπὸν ἰμάτιον aestimare. itaque optamus caetera, quorum spem facis, videre. Constitueram Antoninum Liberalem cum nostris animadversionibus transmittere: sed codicem dum requiro, dum forulos bibliothecae perscrutor, nusquam comparuit. Utrumne in migratione, an sublesta manu perierit, non habeo dicere. breviter, hoc velim tibi persuadeas, nihil optatius accidere potuisse, quam ut aliena e nostris, aut haec ex alienis emendarentur. ut defectum libri οἴκοθεν facile suppleveris. Venit nuper ad nos *Theodoricus* J. F. filius *Gronovius*, qui die crastini futurus jurium doctor, theses asseruit de Testamentis. Illum & merito parentis, & suo excepi humanissime. Visus enim est τὰ γράμματα ὅν ἐν παρέργῳ ἀσκήσας. Huic remeanti domum in manus dedi Thomam Magistrum, caeterosque Eclogarios, quos tam benigne transmissos gratus restituo. De meis autem studiis quid dicam? nisi de me, qui ipse langueo &

tor-

torpeo. Nam post obitum *Mariae* conjugis, cui parem haec aetas non tulit, ardor iste vetus deferbuit, armaque sapientiae de manibus excussa sunt & fracta. Thucydides tamen longo intervallo repetitus lente procedit: nec satis scio, utrum perveniet ad metam. Ingens certe *περίκειναι δόλιχος*, & currentem turbant difficilia minusque expedita. De Philippo Cyprio, quem *Laevinus Warnerus*, Belgarum apud Turcas legatus, donavit, facilior res videtur. Expectavi haecenus expressa typis *Aurati* poemata, quae descripta manu *Canteri* me habere tibi professus sum. sed frustra. Vale, & me ama Franequerae a. d. x. Kal. Apriles cııııclxxv.

EPISTOLA CCCLXXXVII.

THOMAS MUNCKERUS

V. C. Nicolao Blancardo S. P. D.

Franekeram.

TAndem aliquando venit ad te Antoninus meus, Vir clarissime. An aliquod operae fecerim pretium eum denuo publicando, ubi hanc editionem cum illis, quae antehac prodierunt, contuleris, tu judicabis, populum & suffenos, qui hoc tantum, quod ipsi faciunt, rectum putant, nihil moror. Tibi & tui similibus modo placeam sat habeo. esse apud Leideneses, qui graviter nimis iteratam hujus libelli editionem ferat, jam puto audisse. In omnibus tabernis uti mihi fama narravit, tanquam ad publicum judicium subscriptores conquirat. Quae haec iniquitas? imo quae tyrannis est? Ergo nemini licet ullum attingere scriptorem, licet id modestissime fiat, ad quem alter aliquid sit commentatus? Sed gloriatur dente suo Theonino, dummodo mihi pudoris constet fama. Nolim ego me conviciando vincere. *Aurati* poemata, de quibus scripseras, frustra mihi haecenus quaesita sunt. Quod serius libellum hunc, quam debueram, ad te mittam, rogo occupationibus meis, quae vix unquam respirare me sinunt, imputes. Vale multum Vir Clarissime, & misere hujus asini, qui tam misere vapulabit. jam scapulae mihi pruriunt. scripsi Delphis Batavis a. d. iv. Cal. Januarias anni 1676. qui tibi & tuis feliciter exoriat & decurrat.

EPISTOLA CCCLXXXVIII.

THOMAS MUNCKERUS

Nicolao Blancardo S. P. D.

Franekeram.

FRatrem meum, qui ex negotio has oras petierat, sine ullis ad te litteris domum redire ut sinerem, facere non potui. Ut vales, Vir Clarissime? ut nostri es memor? Nihil prorsus a te litterarum, quod vehementer miror, ex quo Antoninum meum ire in Frisiam jussi accepi. fraus heic aliqua an ta-

Tom. II.

P p p p

bel-

bellarii negligentia latet? fac oro ni grave est, quamprimum ista me sollicitudine liberes. Harpocratonis lexicon, quod tuis curis ornatius exercere jam operas Typographicas audiui, mirum quantum videre gestio. Non dubito enim, quin utilissimam operam in opere tam eleganti collocaveris. in paucis diebus prodibit Leidae ἐς φάτις ἡελιοιο horribilis libellus, qui me dedocebit criticam, meum Antoninum, dico, Liberalem antagonista mei. In eo conspicietur, ut fama narrat, Epistola N. in qua emendationes ullas Antoninianas sibi subiectas queritur, communicatas enim illas quondam cum *Gipfone*, meo olim collega, & ab eo mihi acceptas. Nequissimum ergo, inquires, tu caput es, qui, quod alium capere oporteat, intercipias. imo ego peream, quantum qui pote plurimum perire, si vel unquam de ullo Antonini loco apud me verbum fecerit *Gipson* ille. Has querelas in sinum tuum ideo effundo, quod & tu maledicum ejus os nuper adeo expertus es plus satis in supplementis istis maledicentia omni refertis. scilicet Heroum filios noxas esse, ut est in vetere verbo. ut pater Orbis amor, ita filius, si sic perexerit, evadet odium. Curis secundis emendatiorem publicabo brevi Hyginum, cui comitem adjungam Lactantium, an Luctantium? qui argumentis Ovidii metamorphoses illustravit, sed multo quam ante hac editus est ex MS. limatiorem. Vale multum, vir optime, & conatibus nostris fave, qui omnes nisi qui te & tua nimium, studiorum amantes, amamus Delph. Bat. a. d. xiiii. Cal. Majas A°. 1676.

EPISTOLA CCCLXXXIX.

DAVID GIFFENIUS

Nicolao Blancardo S. P. D.

Franekeram.

Audet, praestantissime Blancarde, ad te dare literas D. *Giffenius*, ante annum & quod excurrit, tam in privatis, quam publicis exercitationibus tuis ad varios & Latinos & Graecos scriptores, auditor perpetuus, nunc vero in obscuro pago delitescit, rem sacram faciens inter simplices homunciones

— *qui procul negotiis,
Ut prisca gens mortalium,
Paterna rura bobus exercent suis.*

Didici ego ex doctissima tua in Arrianum tuum praefatione nihil innocentius eo vitae genere, musis & Phoebis sacratos cum lucis ac fontibus colles, quorum heic nobis est copia. Solitudo haec mihi foret gratissima, si tui cendum non esset, si aliquando suavissimis tuis ac doctissimis colloquiis interesse daretur. Dici non potest, quanta in te mea sit pietas ac veneratio, ob singularem tuam erga me benevolentiam, & in humanioribus institutionem. O felicem Academiam vestram! (si satis sua bona norit) quamdiu te habet superstitem. Tu enim, me hercle, Musas ex Frisia fugientes; cum paucissimis ad-

adhuc moraris; imo tu solus ferme divina veterum monumenta; alioquin mox casura, Atlantis instar, perpetuis lucubrationibus tuis & curis fulcire satagis. Vereor equidem te in os laudare, sed ipsa fatebitur invidia, Graecarum litterarum causa, tanto restauratore opus esse. Hi sunt dies, quibus secundum laudabilem Ecclesiae usum Historia passionis Dominicae coram populo exponi consuevit. Habebis a me quaedam, quae publice ex suggestu coram populo recitavimus ad caput Evang. Lucae. xxi. κόμμη 44. ubi de agone Servatoris Jesu in horto, & de sudore ejus sanguineo. En habe, quae ex Evangelistis tribus congeessimus, quaeque ad lucem eorum ex doctissimorum virorum commentariis, & propriis meditationibus nostris addidimus. Tuum erit, si legisti, vir accurati atque animosi judicii, de quibus monendum me putes, sine furo libere ac candide admonere. Historia exstat apud D. Matth. xxvi. 36—46. Marc. xiv. 32—42. Luc. xxii. 40—46. Haec est summa. Juebat Dominus octo discipulos subsistere ante ingressum horti, tribus Petro, & filiis Zebedaei assumptis intra hortum. Ingressus coepit animo angi, & summis terroribus affligi; monet istos tres ut illic loci subsistant & secum vigilent in precibus. Animam enim suam undequaque tristem esse usque ad mortem: se ad preces secedere. Hac, tanquam excussus tormento, rapitur ad jactum ferme lapidis: primo in genua se dat: hinc prolapsus in faciem ac humi stratus orabat, *mi pater, si fieri possit, transeat a me calix iste; attamen non ut ego volo, sed ut tu vis.* Primo isto certamine defunctus redit ad discipulos, quos invenit oppressos somno, quem labores diurni, profunda nox & moeror creabant. Dicit igitur ad Petrum: *Sic nec ad horam unam mecum potestis vigilare. Vigilate & orate, ne incidatis in tentationem. Spiritus promptus est, at caro infirma.* Inde in secunda & tertia conflictatione, divulsus a discipulis, quanto vehementius premeretur, tanto ardentius precabatur. *Mi pater, si non possit iste calix a me transire, voluntas tua fiat.* Ita se jam composuerat ad patientiam & obsequium. Finito quolibet certamine ad discipulos revertebatur, eosque inveniebat dormientes. A secundo rediens non compellavit eos, sed permisit somno. post tertium monuit proditorem in propinquo esse. Scribit Lucas in aestu conflictationis visum ipsi angelum esse, qui eum confirmabat. Angelus internum robur sufficere non potuit, verba tantum suggestit, ut turbato in promptu essent. Idem Evangelista notat sudorem ab eo instar sanguinis, grandibus guttis in terram destillasse, Beza. *Alioqui nolim Agyrtas illos imitari, quos non pudet multa comminisci, ut mulierculas non tam ad resipescientiam, quam ad mollem & inanem commiserationem commoveant, id est, ut Pilatum ac Judaeos potius, quam sua peccata discant execrari. Sed vicissim digni sunt reprehensione, qui ne videantur Christo tribuere tam insignia humanae infirmitatis argumenta, partim ista extenuant, in quibus tamen posita est nostrae pacis & cum Deo reconciliationis summa: partim etiam eo impudentiae proveci sunt, ut nonnulla tanquam ab Haereticis insarta expunxerint. Si quidem (ut est ab Erasmo annotatum) Hieronymus contra Pelagium. lib. ii. & Hilarius lib. de Trinitate. x. indicant, in plerisque Graecorum & Latinorum Codicibus non fieri mentionem, neque de sudore, neque de angelo confor-*

tante: at ego sacrilegam eorum audaciam execror, qui haec deleverunt. Monarcha Sapientiae & eruditionis Hugo Grotius in illa verba (ἀγγελῶ ἀπ' ἑαυτῶ) Il-
laudabilis fuit ἔ superstitio ἔ temeritas eorum, qui hanc particulam ἔ sequentem
de sudore deleverunt, nihilo graviore de causa, quam illud, quod supra (cap. XIX.
41.) est de fletu, deletum diximus. Christus enim destitutus Divinitatis in se habi-
tantis virtute, humanaeque naturae relictus, ac proinde ἐλαττωθεὶς βραχὺ ἢ παρ'
ἀγγέλων opus habuit angelorum solatio &c. Grotius existimavit sanguinem non
fluxisse, sed verum sudorem, qui in grumos concrevit, ut solet sanguis con-
crescere. Καταβαίνοντι ita legit Latinus; ἔ sensus videtur esse apertior, nam san-
guis maxime cum in terram cadit conspicitur θρόμβος. Est enim θρόμβος Galeno
etiam in lib. 1. de Semine τὸ αἷμα πεπηγός. Syrus quoque sic legisse videtur, sed sic
ut subintelligeret vocem ἰδρώτος, quod loquendi genus exemplo non caret. Docet Ari-
stoteles IIII. de Historia Animalium accidere nonnullis ἰδρῶσαι αἱματώδες πρὸς τὸ αἷμα
πὶ Διὰ καχεξίαν καὶ Διὰ τὴν τ' θερμότητος ὀλιγότητα. attamen hoc loco nihil est, un-
de certo colligas sudori huic sanguinem fuisse permixtum. nam ἔ Theophylactus ἔ Eu-
thymius notant, non dictum est ἐγένετο ἰδρῶς αἷματι, sed ἐγένετο ὁ ἰδρῶς ὡσεὶ θρόμ-
βοι αἱματι. quae verba indicant verum fuisse sudorem, qui emanavit, non tenuem
tamen, sed crassum, quales esse solent grumi sanguinis, quum sudor vix soleat θρομ-
βῆσαι, non aliter certe intellexit Justinus colloquio cum Tryphone, qui omissa sangui-
nis mentione, satis habuit grumos dixisse ἰδρῶς ὡσεὶ θρόμβοι κατεχετο αὐτῶ ἐυχόμε-
ν. tale illud. Salsusque per artus Sudor iit. Theophylactum in suam sententiam
allegat, cum audiamus. Ὅτι γὰρ ἀπ' ἀνθρωπίνης φύσεως ἦν τὸ πρὸς αἷματι, κατὰ
τὴν ἀνάγκην παχέως τὸ κοινὸν πάθος τ' φιλοζωίας, ἀλλ' ὅτι ἀπὸ τ' θεότητος ὡς
Φασι οἱ κατὰ τοὺς Αἰρετικοὺς δὴλον ὅτι ἔ καὶ ἰδρῶσαι καὶ ἔτως ἐναγώνιον γενέσθαι ὡς
τε τὸ δὴ τῆς παροιμίας καὶ θρόμβος αἱματος ἀπ' αὐτῶ πεσεῖν. Παροιμία γὰρ ἐστὶ
ὅτι τ' σφόδρα κοπιῶντων ὅτι αἷμα ἰδρῶσεν. ὡς περ καὶ ὅτι τ' παρῶς ὀδυρομένων αἱ-
ματα κλαίει. τὸ πῶς δὴ δεικνύται καὶ ὁ εὐαγγελιστὴς ὅτι ἔχει λέπειν τίσι νόοις καὶ
οἷον ἐνδείξας χάριν ἐμφαινομένης ἀλλὰ σαφὲς ἀδράως ἰδρώτων πρὸς τὸ αἷμα
αἱμάτων θρόμβος εἰς εἰκόνα ἔ γενομένης παρέληφεν. Quod autem ab humana natura
fuerit orare, quae juxta permissionem patiebatur communem affectionem, qua amamus
vitam, ἔ non a Deitate sicut dicunt maledicti Arriani, manifestum est ex hoc quod
sudavit, idque cum tanta anxietate, ita ut plane juxta paraemiam sanguinis guttae
ab eo ceciderint. Paraemia enim est de valde laborantibus, sanguinem sudavit.
Sicut ἔ de his, qui amare flent, dicimus quod sanguinem fleant. Hoc igitur
voluit manifestare Evangelista, quod non tenuibus quibusdam humoribus ἔ velut
indicii gratia apparentibus, sed magnis guttis sudorem stillarent, sanguinis gut-
tas, ut id quod gerebatur, repraesentaret, assumpsit. Plane igitur sentit cum
Grotio Theophylactus: sed fieri posse, ut sanguis fudetur, docet Aristoteles
IIII. de part. animal. 5. Ἐκ μεγάλων δ' εἰς ἐλάσσους αἱ φλέβες αἰεὶ πρὸς τὸν ἑαυτοῦ
γενέσθαι τὰς πρὸς ἐλάσσους &c. Quae sic Latine Sonant. E majoribus in minores
continuo abeunt venae, donec meatus minores fiant, quam pro sanguinis crassitie: per
quos sanguini transitus non datur, sed excremento humidae rorationis (quam vocamus
sudorem) idque percalefacto corpore, ἔ venulis apertis. Jam vero quibusdam conti-
gūt

git sudare sanguinolento excremento propter malehabentiam corpore fluido & raro, sanguine autem humefacto, quod coctum non sit, quia calor in venulis ob exiguitatem concoquere non potest. Drexelius Pius & Doctus Jesuita, Christi Morientis cap. 11. feminam fuisse affirmat non e plebe testis, quae mariti sui mortem eo lacrimarum imbre profecuta est, ut lacrymis deficientibus guttas sanguineas oculi stillaverint; at vero qui sanguinem toto corpore, tanta copia, tali ratione sudaverit, nemo mortalium ullis retro seculis est visus. Jacob Patriarcham cerno, cum Angelo luctantem, sed sine sanguine; Jonam Prophetam video precantem & laborantem, sudantem & aestuantem sed sine sanguine &c. Johannes Maldonatus tomo. 1. Euang. cap. xxvi. Com. 37. Matth. Audio, inquit, ex his qui viderunt aut cognoverunt, ante annos duos Lutetiae Parisiorum hominem robustum ac bene valentem, audita in se capitali sententia, sudore sanguineo fuisse perfusum. Fieri posse, ut sudorem sanguineum sudet homo, testatur experientia, quamvis alienum sit quod contingit ictis a serpente haemorrhaeo testatur in exemplis quibusdam, licet paucis. Paroemia adducta a Theophylacto non ita Hyperbolica, ut exeat extra limites & δυναῖς. Potest id evenire ex nimia animi pressura & angore. Lucam velle quod in Christo factum sit, docet locutio & res. Locutio ὡσεὶ ita sumi solet Act. 11. 13. ὡσεὶ πυρὸς: ubi extra controversiam, ignis exprimitur. Dicit Lucas ἐγένετο δὲ ἰδρῶς αὐτοῦ ὡσεὶ θρόμβοι αἱμαῖοι κατεβαίνοντες ἐπὶ τὴν γῆν, id est loco sudoris grumi sanguinis descendebant in terram. Sudor ipsius nihil erat nisi grumi sanguinis. Antiqua lectio expressius ἰδρώσε καὶ ἐγένετο δὲ ἰδρῶς &c. sudavit, sed sudor ipsius plane grumi sanguinis. Res docet. i. sudor tam copiosus & crassus non effluit apertis venularum ostiis, nisi sanguineus. non concrevit in terra, sed inter manandum crassus & coagulatus erat. ii. Tantus animi angor & horror erat, & ex illo ita corpus conturbatum, ut sanguinem non exprimere non potuerit. Si enim in ullo mortalium sanguinem horror expellere potuit, id debuit fieri in maximo illo, quem Dominus sensit, qui strangulasset eum, nisi humana natura sustentata fuisset robore Deitatis. iii. Si sanguis non fuisset, sed sudor tantum copiosus, cum eum potius sanguini, quam pituitae, aut alii humori crasso Spiritus Sanctis assimilasset. nempe sanguis fuit rubore & substantia. iv. Typus juvencae rufae mactatae, cujus cinis ad purificationem, sine fuso sanguine impleri non potuit. Observatu dignissimum est, quod doctus pariter ac sedulus Rabbiorum illustrator *Constantinus l'Empereur* observavit in codice Middoth. cap. 1. T. 5. scribitur in templi ambitu quinque portas fuisse, duas a meridie, unam ab occidente, unam ab aquilone. De porta quinta orientali ita loquitur. שע' המזרחי ששן חבירה צוקה שמו רוצה בהן גרול שדרך אה הפרה וכל מסעריה יוצאים להר הקשקרה: Portae orientali figura erat civitatis Susan, per quam intuebatur Pontifex, cum comburebat vaccam. Etiam operis instrumenta egrediebantur in montem olivarum. Fuit communis traditio eodem referente, qua traditum iussos fuisse Judaeos e Perfide reduces, struere januam, quae civitatis Susan formam referret, ut reverentia regis Persarum semper oculis animisque obversaretur. Quidam referunt circa portam fuisse aedificium, ad effigiem arcis Susorum. Rubrae vaccae cerimonia nota est ex Num. xix. &

Codice פיה. Vacca rubra debuit ad Pontificem adduci, quam educebant per pontem ingentis operis in montem olivarium, ut mactaretur & combureretur. E cujus cinere conficiebatur aqua lustralis, qua aspergebantur, qui cada-veris contactu immundi erant. Praeceperat Deus, ut Pontifex Vaccae sangui-nem spargeret versus partem templi anteriorem. Num. xix. 4. והוא אל נכהפניו וזה אל נכהפניו Καὶ παρέειπεν αὐτῷ ὁ θεὸς λέγων τῇ σκηνῇ καὶ μαρβριεῖς ἀνὰ τὴν εἰσόδον αὐτοῦ ἐπ' αὐτόν. Misna dicit. שְׂכוּ רֹאשׁ כַהֵן id exponit Aben-Esdras הכהן השורף את הפרה עומד בהר המושחה ומחכן וראה בנגד פתחו של היכל בשעה הויית הקרבן Sacerdos comburens vaccam stabat in monte olivarum, intendens & videns in ostium aedis, hora aspersiois sanguinis. Intuebatur januam aedis, collimando per ambitum templi portam orientalem. His expositis vir doctus ita concludit. Hinc patet cur servator noster voluerit etiam pati in monte olivarum, emis-so, antequam caperetur, cruento sudore ex animi illo angore piis omnibus venerando. causa fuit Dei quae typum antitypo per omnia respondere voluit. Quemadmodum in monte olivarum e Juvenca rufa pharmacum confectum fuit; ita in eodem ex sanguine illo Christi ruto, & exsudante confectum nobis vi-tale medicamen fuit.

Atque haec quidem sunt, Clarissime Blancardè, quae in praesens ad te scribere habui. Mature respondebis, si hae qualescunque meae literae, tibi gratæ acceptaeque fuerint. Vale, magnè vir, & Harpocratonis pene mortui Esculapi. Dabam in Wrikkel, prope urbem Slooten, in Regno nostro, puto Musarum, cui nemo, quod sciam, hætenus invidet, nemo inhiat. III. Cal. Mart. Anno Christi CIOIOCLXXV. Aet. XXI. & Dim. Quid de Harpocratore tuo fiat, paucis quoque significa.

EPISTOLA CCCXC.

N I C O L A U S B L A N C A R D U S

Davidi Giffanio.

Stotam.

PER mihi gratæ fuerunt literæ, quas à te nuper accepi. nam & nostri memoriam servant, & divina loquuntur. Utinam alii, de quibus haud male meriti sumus, possent adduci, ut suæ ingratitude eos serio pueret. Sed non ita hîc vivitur, ut sperare hoc liceat. tu beasti me rara confessione pietatis, cui tempore omni ac loco, nisi ipse ingratus sim, faxo respondeam. Nostra vero cave putes esse τὰ ἄρτια καὶ ὁλόκληρα, sed neque τὰ ἔχρηστὰ γένεας λείψανα, quamvis fugientes literas lacinia teneamus; si nihil aliud, id certe effecerim, ut exstet apud posteros hujusce honestissimi studii testimonium. Quam vellem tamen non deferbuisset ardor, flebili morte *Mariæ* conjugis, cui parem sanctitate hæc ætas vix tulit, extinctus. agnosco humanis in rebus πᾶσι αἰέβαιον, quum exultationi successit luctus, gaudio planctus & lacrimæ. Itaque ex eo tempore τῷ ἐξωθεν σοφῶν monumenta parce attingi, frequentius eorum, quibus immissa vis spiritus τῷ ὁλοκλήρῳ, & quos ad omne virtutis genus ducet

ces doctoresque solos habemus. Nihilominus hoc δυσβάστακτον φορτίον, quo voluit ὁ ἐπ' ἐξ' ἡμῶν πατήρ pietatem experiri, & patientiam probare, viriliter fero, nec me ejulamentis dedi, Πιστῆσιν κακοῖς. Dabit, spero, his quoque finem ὁ Θεὸς πάνσι, & lucem affulsuram rebus necdum desperatis. Hac cogitatione, quum jacentem erexi animum, offertur abs te mihi patiens Christus, post ἀγωνίαν non simplici morte periturus. Quod sudorem spectat, cuius Divus Lucas meminit, ἐγένετο δὲ ὁ ἰδρῶς αὐτοῦ ὡς εἰς θρόμβους αἵματος καταβαίνοντες ἐς τὴν γλῶττιν, legi super hoc Justini, Theophylacti, aliorumque veterum sententias, ut omittam Juniores, Grotium, Cl. Pricaeum, qui eorum vestigia sequuntur, vel dicta repetunt, aut suis quisque argumentis stabiliunt. Ego, licet, παλαιόφιλος, cogor discedere. Nam ἰδρῶτος θύμασιν ὅσον. neque aliud Lucam voluisse quam sudoris copiam ex animi summa perturbatione obortam, haud crediderim. in his παροιμιώδεις πᾶσι agnoscit Theophylactus, ut in illis, αἵματι κλαίειν, & αἵματι ἰδρῶν ἐπὶ τῇ σφόδρᾳ ἀγωνιῶντων: Quod e Zenodoto & Diogeniano notavit etiam Photius Epistola 138. θρόμβους in glossis Grummi. hoc loco, guttae spissi & concreti sanguinis. sudor iste cruentus super omnem naturae rationem fuit, & cui similis non exstat in memoriis veterum, nec deinceps memorabitur, sola materies κατὰ φύσιν, cetera ὡς κατὰ φύσιν omnia. si advertis hominum inde ab Adamo peccata; si irae divinae sensum, ὡς περ φθείρονται φλογός, si propositum ei certamen cum principe seculi, cum Gehenna & morte, καὶ φόβος ἀλαπίσεως ἢ γὰρ ἀποτυχίας, ut loquitur Damascenus; si denique placandum patrem, & humani generis ἀπολύτρωσιν: quid tandem simile in sudoribus καχεκτικῶν, quos descripsit Aristoteles, & medicos versantibus sunt notissimi. De Haemorrhoo, aspide Lybica miranda leges apud Nicandrum, Dioscoridem, Galenum, & Aelianum: sed tu Lucanum vides lib. ix. ubi de Tullo, est enim prae manibus. Omnis scrupulus, quo magni viri sudorem sanguineum exauctorare nituntur, est in Lucae ὡς εἰς, quae particula si tantum valeat, ut excluso vero solam similitudinem servet, facile vicerint. Sed qui expedient ista Mathaei cap. 3. τὸ πνεῦμα τοῦ Θεοῦ καταβαῖνον ὡς εἰς περιστερὰν, ubi Lucas habet σωματικῶς εἶδει, specie corporali, quin veram fuisse columbam adstruit Tertullianus libro de carne Christi, plerique speciem agnoscunt, nonnunquam igneam, quod de linguis scripsit quoque Lucas Actorum secundo. Verum de his alias fortasse plura: nunc enim in senatum vocor. Vale, ac me amare perge, καὶ ἐν ἡμετέροις ἀγατέλει. Franekeræ Idibus Martiis. 1675.

EPISTOLA CCCXCI.

HENR. CHR. HENNINIUS

Nicolao Blancardo.

Franekeram.

NUllus dubitavi, Vir celeberrime, has litteras ad te exarare, atque una carmen quoddam nostrum, quod nuper in laudem novellae Academiae Mu-

Mutinensis cecinimus, in animi tibi devoti notam transmittere; quandoquidem humanitas illa insignis & eruditio celeberrima me securum reddunt, uti haec qualiacunque serena fronte sis accepturus. Sed ne jejuna nimis sit Epistola, bona tua, Cl. V. cum venia, Divino Platoni suppetias feram. is in pulcerrimo dialogo, qui Phaedon inscribitur, quaestionem de αὐτοχειρία excutiens, Cebetem sic interloquentem inducit. καὶ ὁ Κέβης ἡρέμα Πηγάλαους, ἴτω Ζεὺς, ἔφη, τῇ αὐτῇ Φωνῇ εἰπων. illud ἴτω Ζεὺς. in Epist. 7. ad Dionis propinquos etiam occurrit: εἰ μὲν ἔν, inquit, ἐκ τῆς μιᾶς συγχσίας τῷτο γέρονε, πάχα ἂν εἴη, γέρονε δ' ἔν ὅπως, ἴτω Ζεὺς, Φησὶν ὁ Θεβαῖος. Ficinus, optimus Platonis interpres, priore loco reddit, *Ittio Jupiter*; male. nam in Graeco ἴτω exstat, non ἰτῶ, & forsan Ficinus putabat esse cognomen Jovis; altero loco reddit, *Proh Jupiter*? tanquam si esset interjectio. & hoc male. ut brevis sim τὸ ἴτω Ζεὺς vertendum, *Sciat Jupiter*. nam ἴτω Thebanorum dialecto est *sciat*, pro ἴσω, a verbo ἴσκει scio. atqui Cebes Thebanus erat. Facetiarum Pater Aristophanes, in Acharn. Thebanum mercatorem, sic loquentem inducit, ἴτω Ἡρακλῆς: & alibi etiam: sed nunc non vacat inquirere. vult autem illa formula illud, quod in Belgarum ore frequens est. *God weet het*! haec cum ita sint, verbum non amplius addam. Princeps etiam Philosophorum Aristoteles nostram operam desiderat; lib. de mot. animal. Postquam enim dixisset, in omni motu opus esse corpore stabili, extra illud corpus, quod movendum est, cui movens insistat; subjicit confirmationis ergo. μαρτύριον ὃ τῷτο τὸ ἀπορούμενον διὰ τὴν πῶς τὸ πλοῖον μὲν ἔξωθεν ἂν πῶς ὡθῇ τῷ κοντῷ τ' ἴσόν, ἢ τι ἄλλο περισβάλλων μόριον, κινεῖ ἐξάδιως. εἰ δ' ἐν αὐτῷ τις ὦν τῷ πλοῖῳ τῷτο περιῆται περὶ τῆς, ἐκ ἂν κινήσειεν, οὐτ' ἂν ὁ τιτύος, οὐθ' ὁ βορέας πνέωσιν ἔσωθεν ἐκ τῶ πλοίου, εἰ τύχοι τις πνέων τ' τρόπον τῷτον, οὐπερ οἱ θεαφεῖς ποῖσιν. ἐξ αὐτῶ γὰρ τὸ πνεῦμα ἀφέντα θεάφει. quae linea subduxi, mirum facessunt negotium. Vidit ante me hanc difficultatem Niphus, celebris superiori seculo Peripateticus, & pro τιτύος rescribit εὐρύος, nam τὸ πνέωσιν refertur ad τιτύος, οὐθ' ὁ βορέας, tanquam duos ventos; sed nullus mihi ventus, ut verum fatear, usquam compertus, quem Graecorum Physici, quos quidem legi τιτύον appellarent. & licet omnes libri MSS. prae se ferant constanter τιτύος, ut ex commentatoribus constat, tamen incredibile mihi videtur, Aristotelem voluisse Gigantem Tityon pro vento ponere. Itaque cum loci hujus explicandi ergo, & intelligendi, ut fit, plusculos interpretes consularem, incidi in scholia Michaëlis Ephesii ad hunc locum, quae ita habent. ἔπε ἂν ὁ τιτύος ἢ ὁ κινῶν. & mox de Borea, ἔπε ὁ βορέως ἦν ἐν αὐτῷ τῷ πλοῖῳ, καὶ ἐπει ἀπ' αὐτῶ, ἐκίνησιν ἂν αὐτό. Ex quibus scholiis & Aristotelis veram lectionem mihi videor restituere posse talem: εὐκ ἂν κινήσειεν, ἔτ ἂν ὁ τιτύος ἢ ὁ κινῶν. hoc sensu. non moturum fore navem, si vel ipse Tityos immanis gigas suis viribus omnibus id conetur. & sequentia sic supplerem, ἔθ' ὁ βορέας (καὶ ἔρ) πνέωσιν ἔσωθεν planus ita est commodus sensus. tum etiam ex scholiis illis videor mihi notasse morem veterum Graecorum, qui in aliqua navis parte, puta puppe, aut aliis, ventos humana facie inflantes

vela

vela navis pingerent, ornamenti ergo, ut hodieque nostri pictores ventos solent depingere. bene hunc digitum intendit Aristoteles istis verbis, ἐξ αὐτῶν γὰρ (sc. πλοίων) τὸ πνεῦμα ἀφίεντα χράσσει, ubi pro ἀφίεντα, ἀφίεντας legendum jam nemo non videbit. Sed ignosce temeritati, Vir celeberrime, quod γλαῦκ' ἐς Ἀθήνας: & crede nulla alia ratione factum, quam ut tibi Doctori Græcarum Literarum doctissimo hac occasione nostram in istis literis diligentiam probem: quam si placuisse tibi viro humanissimo intellexero, audacior ero in transmittendis data occasione pluribus ejus notae nostris observationibus, quas lubens tuæ in istis literis eruditioni ac censurae submitto. Vale, celeberrime Vir, & fave. Rheno-Trajecti, ubi commoror medicinae exercendae ego, ipsis Kal. Octob. 1681. αὐτοχεδίασι.

P. S. Nobiliss. Nic. Heinsius. Dan: Filius, noster Fautor insignis, ante hos iv. dies Hagae Comitum summum diem obiit.

EPISTOLA CCCXCII.

GISBERTUS CUPERUS

Nicolao Heinsio S. P. D.

Hagam.

NI noſſem humanitatem tuam, animumque omnibus amiciffimum, qui ſe-
verae artis amant effectus, illaque ſe conantur tollere humo, vix eſt,
credas velim, ut te gravioribus publicisque negotiis & curis diſtriſtum inter-
pellare auderem; ſed perſpecta, cum horam tecum ponerem, doctiſſimoque
colloquio fruerer, moderatione ſingulari, exquisita doctrina, ingenio excel-
lenti, animoque pleno officii atque aperto, non potui amplius officio meo
deſſe. Mitto igitur obſervationes in Auctores nonnullos; tuoque judicio
omne hoc, quicquid eſt, relinquo, iſta tamen lege, ut ſi quae ſint, ut erunt,
noſtris vitioſa libellis, canente divino & tuo beneficio reſtituto Sulmonenſe
Vate, ea ætati dones, cogiteſque homini imperito, nec ſubactò ſatis in ſtu-
diis ingenio, facile quid potuiſſe excidere, quod viris omni Eruditione clariſ
non probatur. Adjicio præterea huic munuſculo nonnullas inſcriptiones,
quae Noviomagi inventae ſunt, quarum mentionem injeci, cum me dulciſſi-
mo alloquio Hagae Comitum foveres.

I. O M
E T. G E N I O
L O C I
C. C A N D I D I N I U S
S A N C T V S S I G N
L E G. X X X. V. V.
P R O S E E T S V I S
L. M

M. TERNO. ET AT † CO. CO.

M A T R I B V S
M O P A T R I B V S
S V I S
M. L I B E R I V S
V I C T O R
C I V E S
N E R V I V S
N E G. F R V
V. S. L. M.

M A T R O N I S
A V F A N I A B V S
T. A L D I N I V S
I A N V A R I V S

I. O. M
D O M E S
T I C O
B R A T O
V E T E R A
N V S. L. N.

Vale Vir Nobilissime. Daventriae 11. Id. Sept. M D C L X X I.

Hae inscriptiones in antiquitatibus Neomagensibus a *J. Smerio* editae fuerunt, & inde partim a *Sponio*, partim a *Reinesio* publicatae, praeter primam, quam nondum reperi.

EPISTOLA CCCXCIII.

NICOLAUS HEINSIUS

Gisberto Cupero.

Daventriam.

HUMANIORI litteratura, cui exornandae totum te feliciter dedisti, Cupe-
re politissime, injurius profecto sum in memet ipsum, si eam inficias ve-
hementer me capi; si hoc occulto quodam naturae sit instinctu, si ve-
ficientibus nobis vix displicere possunt aut procul haberi ea, quibus tenero ab
ungue delectabamur. Jam olim Observationes tuas *Graevii* nostri beneficio vi-
deram, ac majori ex parte perlectitaram, quas munus vere eximium proxi-
mis diebus ad me misisti. Perlegam illas nunc denuo otii nonnihil nactus; ne
tuae munificentiae ac benignitati, qua immerentem cumulasti, minus tribuif-
se videor, quam commendationi Graevianae. Praesertim cum sum certus, ex
ea lectione perventuros ad studia mea profectus haud mediocres. In transcur-
su agnovi unum alterumque Valerii Flacci locum prorsus restitutos abs te eo
modo, quo in scriniis meis eos castigatos jam pridem asservo. Sed est profe-
cto is auctor foedissimum in modum etiamnum depravatus, cui nos medelae
nonnihil ferre conabamur olim, in qua tamen vix satisfaciam mihimet ipsi,
etsi restitutis in integrum locis haud paucis, quibus manum temere admorant
ho-

homines litterati. sed quidquid nos perfunctorio conatu molimur, alio frequenter advocati, id tuum tuique similiū est solide effectum dare. Quo impensius velim maturari abs te editionem eorum, de quibus coram proxime spem luce publica donandis faciebas: erint enim tua non minus cum gloria, quam cum publico emolumento, si quid augurari fas est, conjuncta. Est præterea, quod pro vetustis inscriptionibus, Noviomagi nuper effossis, me debere tibi profiteri. In quarum prima sub finem vide, ne scribendum sit

MATERNŌ ET ATTICO COSS.

quod tamen par consulare an in Fastis alibi occurrat vix dixerim, cum libri non sint ad manum, quorum auctoritate nitar. DOMESTICVS IVPITER in ultima inscriptione commune nihil habet cum *Hercaeo* Graecove *Jove*, ni fallor. Sed de his meliori occasione. Ampliss. *Hogersium* salvere plurimum jubeo, cui me cum aliis nominibus non paucis arctissime obstrictum agnosco, tum ob Scheliana lucubrationis munus aureum, proxime mei juris illo mittente factum. Jubeo & aliis viris litterarum apud vos studiosis salutem meis abs te verbis dici. Vale. Hagae Comitum xxvi. Sept. Gregor. 1671.

EPISTOLA CCCXCIV.

GISBERTUS CUPERUS

Nicolao Heinsio S. P. D.

Hagam.

Non sine ingenti animi gaudio te valere, & propediem emendatum Val. Flaccum in lucem daturum a Clarissimo *Terburchio* accepi. Quo nuntio ita affectus fui, ut vix ulla major & sincerior laetitia mihi objici vel obvenire possit, cum Auctor ille, si quis alius, medica manu indigeat, & non nisi a te, Vir magne, vel emendari vel illustrari possit. Cumque ultro citroque, ut fit amici ubi adsunt, multa verba haberemus, diesque nobis consumeretur, venit in eum tandem sermonem, ut diceret, se Plinii Epistolas cum MS. collatas mittere, & interrogaret; ecquid & ego ad te? Annuī: noluique occasionem ostentatam tantam, tam bellam, tamque optatam amittere: sed decrevi breviter (occupationis enim tuae, temporis & laboris rationem habeo) ad te scribere, quid me male habeat. Silius Italicus est, cujus versus, quibus Homerum in campis Elysiis oberrantem lib. xiiii. vers. 778, describit, mihi crucem figunt.

Atque hic Elysio tendentem limite cernens

Effigiem juvenis castae, cui vitta ligabat

Purpurea effusos per colla nitentia crines.

Dausquejus emendabat recte, si quid video, *casti*: quomodo autem Homerus *juvenis* vocari possit, non satis perspicio, cum senex fuerit, talisque in nummis Chiorum & Amastrianorum, imo etiam in marmore Homeri Consecrationem exhibente videatur. Nec aliter a Luciano, & poëta anonymo lib. v.

Qqqq 2

Ant.

Antholog. describitur. Et hunc locum laudans *Kircherus* pag. 86. Latii Antiqui fingit.

Numinis effigiem, casta cui vitta ligabat.

Qui quā id auctoritate, sive MSS. sive ingenii, faciat ignoro: illud scio *casta* tolerari non posse. *Numen* autem vocatur recte, quia *Homerus* a plurimis populis Dei honore cultus fuit, & apud *Silium* paulo post *Deus* vocatur, *Numenque* ipsi tribuitur. sequitur apud eundem

Atque haec cuncta prius quam cerneret, ordine terris

Prodidit. — — —

Apud *Kircherum* pessime legitur *terras*: eorum autem verborum sensum hunc esse puto simplicissimum: *Homerum* terram & mare descripsisse, antequam illas lustraret ipse & obiret. Haec enim erat nota illum Deum esse, hocque erat non parvum Numen in tanto pectore. Patris viri celeberrimi editionem nullus habeo, ut quid ille hoc de loco judicet, nesciam; quare ad te decurro, cui sine dubio multa exemplaria manu exarata versata sunt, quique certissimus poetarum iudex es. Hoc autem eo magis feci, quia mihi hic locus inservit exornando commentario in Apotheosin *Homeri*, quem tuo nomini (si patearis,) inscribere animus est. Cum enim consilium esset, illum dedicare homini Erudito & Belgae, quem potius eligerem, quam eum, cui *Musae* & *Charites* exornando operam ad certamen contulerunt? Scis quid in eo argumento praestiterit *Kircherus*, & quam jejuna (ne quid gravius dicam) sint omnia ista viri in aliis rebus satis exercitati. Ego conatus sum singula explicare, vestitus, montem, antrum, insignia *Homeri*, ornamenta capitis tam mulierum, quam Tragoediae, *Εὐμέλιαν*, *Κηρονον* sive *Χρονον*, bovem, aram, omnia denique; rationesque non in cerebro meo natas, sed auctoritate veterum fultas & firmatas adduxi, insertis pluribus nummis, quibus res vestitaria & praecipue ornatus muliebris illustratur. Sed rem ipsam loqui malo, quam singula enumerare: speroque illam operam Eruditum placitum, quam & maximus *Gronovius* ὁ μακαρίτης probavit. Commentarius iste in justam excrevit molem, brevique illi ultimam manum impositurus sum, si modo *Deus* mihi otium, & patriae carissimae pacem concesserit, quam hinc turbatam tumultu (si modo illo defunctum sit) Gallico iri quotidie haud injuria veremur. Scis, vir Clarissime, quam male *Musis* & *Bellonae* conveniat, & quanto divortio sejuncti sint *Mars* & *Apollo*. Sed *Deus* his quoque finem. Hoc peto mihi, id est tuarum virtutum admiratori, des, ut quid de hoc *Silii* loco sentias, ne me celes; Vale vir Maxime. Davent. xvii. Kal. Februar. MDCLXXII.

EPISTOLA CCCXCV.

NICOLAUS HEINSIUS

Gisberto Cupero S. P. D.

Daventriam.

AGitari abs te consilium de illustrando marmore antiquo, apotheosin *Homeri* complexo, non possum non vehementer approbare: etsi enim

vix

vix in transcurso inspectum a me, tot jam annos ab omni litterarum elegantia excluso, visum est tamen illustratorem mereri, ab antiquitatis reconditae cognitione haud perfunctoria instructum. Huic autem lucubrationi tuae, Vir Clarissime, quod me patronum destinari ais, neque is sum ego, qui ad invidendos honores ambitiosus aspirem, & tibi longe quaerendi non sunt, auctoritate gratiaque in publico pollentes viri, qui pro munere pulcherrimo, uti par est, fortunas tuas in majus augendas fovendasque, quam a me confieri possit, conatu certiore suscipiant, Habebis vel sic me studiis tuis vigiliisque bono publico praeclare consulentibus succenturiatorem haud malignum, quotiescunque ad opem meam non gravaberis decurrere. De Sili loco paucis accipe, quem membranae complures a me adhibitae ita prorsus exhibent, ut in libris vulgatis circumfertur. Nam quod in Latio antiquo castigandum eum suscepit, mendosum haud dubie, *Athanasius Kircherus*, Vir celeberrimus, ingenii vires advocavit in partes, non auctoritatem membranarum, quas ab antiquitate commendandas in urbe nullas exstare sum certus. Nec *Dausqueio* subscribendum, qui frustra tentavit locum. Homerum vocari *Senem* ab aliis poetis frequenter, juvenem haud umquam, senili etiam forma referri in marmoribus ac numismatibus antiquis recte observasti. sic Statius Epicedio Glau-
ciae: *Maenium sive ille senem Trojaeque labores Disceret*. Quid ergo? juvenis Silio non est Homerus, sed Scipio, qui aliis etiam compluribus locis in hoc ipso libro sic appellatur. versum vel ultimum vide,

Tum laetos socios juvenis portumque revisit.

Supra, sic juvenis prior: & *Oscula vana petens juvenis*. & *Contra quae juvenis turbato fletibus ore*.

Plura loca proferri possent. Scribendum igitur in Silio.

Atque hic Elysio tendentem limite cernens

Effigiem juvenis castam.

Castae effigies, effigies sacerdotis, sive vatis, quod tantundem. Apud Maronem Aeneid. vi.

Quique sacerdotes casti, dum vita manebat.

Idque perpetuum sacerdotibus epitheton adjunctum. Sic apud Nasonem Metamorph. xv.

— — — *Castos,*

Evinctus vitta crines albente sacerdos.

Sed haec protrita sunt: & Silius ipse sibi pro interprete est in proxime subsequentibus. Nam de castitate Homeri ex Suida locus aliquanto longius petitus videri possit. *effigiem* pro umbra poni ne hoc quidem novum est aut insolens. noster paullo post:

Sed quae tanta adeo gratantum turba requirens

Heroum effigies majoresque accipit umbras.

Plinius Secundus lib. iii. ep. v. *adstitit ei quiescenti Drusi Neronis Effigies*. Virgilius in Culice, pastori quoque culicis extincti *effigiem* in somnis oblatam testatur. Ita & Plinius avunculus Lib. Nat. Hist. vii. Cap. xxvii. Atque haec

ad priorem Sili locum. In altero nihil omnino immutandum.

*Atque haec cuncta prius, quam cerneret, ordine terris
Prodidit.*

Haec cuncta, quae Scipioni a Sibylla apud inferos exhibentur. Ipsos etiam inferos accurate Homerus descripsit, antequam vidisset, utpote in vivis adhuc, nec morti obnoxius. Et hoc divinitatis ejus argumentum. Et sane in descriptione inferorum Homeri vestigia legerunt Maro ac Silius. Vult igitur Sibylla, sic descriptos ad Homero inferos, quales revera erant. Et haec quidem haecenus. Scribendae mihi propediem sunt literae ad amicos in Italiam, quos instituti tui de illustrando marmore antiquo certiores faciam: nec dubito, quin hunc nuntium perquam acceptum sint habituri. Mittam & mari aperto libellos nonnullos, in hoc terrarum tractu nuper admodum editos, aut mox edendos. Eaque occasione *Octavium Falconerium* ac *Carolum Datum* rogabo, si quibus aut numismatis aut alia quacunque re propositum tuum ornare possint, ne nobis hîc desint. De tuo additum si quid cupis, fac ad me ante Apriles Kalendas perferatur. Amplissimo *Hogërsio*, ac reliquis apud vos viris praestantibus salutem dico plurimam. Vale, Vir praestantissime. *Hagae Comitum. A. CIICICLXXII. a. d. XIII. Febr. Greg.*

In nummo Homérico Amastrianorum, quantum licet meminisse, fluvius agri Smyrnaei Meles citharam manu tenet seu lyram, cum alii in nummis marmoribusque antiquis fluvii urnis innitantur. Nisi quod in nummis Hadriani Nilus quoque sistrum quatiens exprimitur, Isiaci sacri emblemata. Ceterum Meletem cum lyra apud veteres solitum exprimi in Homeri laudem existimo, quamquam Smyrna aliorum quoque poetarum fecunda mater. Atque eo trahebam illud Moschi, in Bionis epicedio, ubi Meletem vocat *παμῶν λιγυρώτατον*.

Τῷ τοι, ὦ παμῶν λιγυρώτατε, δεύτερον ἄλγος

Τῷ τοι, Μέλη, νέον ἄλγος; ἀπώλετο πρῶτον τοι Ὀμήρῳ.

Apud Nasonem, quod in observatis monere neglexi, *Metam. l. i. vs. 247.* scribendum *Meles* pro *Melas*.

Mygdoniusque Meles, & Taenarius Eurotas.

Quod refer ad Meletem nostrum. Unde Homerus *Μελησιγενὴς*. Meleager in Epigrammatis *Μεληταίης χαρίτας* pro Musis Homericis dixit, & pro scriptis Homericis *chartas Meleteas* Tibullus: Iterum vale. Valerius Flaccus, cujus editionem ante hosce ternos menses *Plumerus* urgebat, jacet. immo ne manus quidem ab operis Typographicis haecenus est admota, procrastinante rem *Plumero*. Jacere igitur nunc perget; quando impetus ille in me refrixit, & ad alia cogitationem converti.

GISBERTUS CUPERUS

Nicolao Heinsio S. P. D.

Hagam.

MUltum, imo plurimum, tibi debeo pro elucidatis & docte non minus quam eleganter explicatis Sili locis, in cujus tamen ultimo, *Haec cuncta*, non ad solos inferos, sed ad terram, mare, sidera, retulerim, quae versibus praecedentibus, quibus etiam *Manium*, id est inferorum mentio fit, carmine complexus esse dicitur. Haec enim nonnullorum opinio, quam respexisse puto Silium, Homerum terram, mare descripsisse, nunquam autem lustrasse, vel peragrasse: Maximus Tyrius initio Dissertationis xvi. narrat terram inhospitalem, & mare infestum non peragrasse Homerum, sed animo illa, ut & sidera, aliaque lustrasse: $\Psi\upsilon\chi\eta$, inquit, $\pi\alpha\nu\tau\epsilon\chi\epsilon\varsigma\ \omega\epsilon\iota\epsilon\phi\acute{\epsilon}\rho\epsilon\tau\omicron$, $\pi\acute{\alpha}\nu\tau\epsilon\ \epsilon\sigma\kappa\acute{o}\pi\epsilon\iota$. &c. quo pertinet illud Eustathii, sive istius, quem compilavit, notantis poetam per suum $\text{Α}^{\prime}\epsilon\iota\delta\epsilon\ \theta\epsilon\alpha$ intelligere mentem suam, vel animae cognitionem pag. 9. Edit. Romanæ. Sed de his latius ad ipsum Marmor, & tu, vir Magne, optime judicabis. Quod de Italis mittis, laetor; quos nullus dubito, quin multa, Marmoru illustrando inservientia, suppeditaturi sint, cum & illustres Abbas *Severolus*, teste *Kirchero*, constituerit diatribam de eo conscribere, Clarissimusque *Falconierus*, ut me docuit *Ezechiel Spanhemius*, vir celeberrimus, voluerit illud notis illustrare? Sed cum nemo horum, *Spanhemium*, ad quem ante aliquot menses litteras dedi, si excipias, mihi cognitus sit, nolui illis $\pi\epsilon\acute{\alpha}\gamma\mu\alpha\tau\epsilon\ \pi\alpha\rho\acute{\epsilon}\chi\epsilon\iota\nu$, nec oneris quicquam imponere, & rogare super dubiis nonnullis, quae etiamnum restant, ut sunt, Vir, quem Reverendus *Kircherus* Flaminem esse putat, basi juxta antrum insitens, character, ut idem vocat, Tauticus, Arcus, Pharetra, Pileus, (is enim mihi esse videtur) quae in ore antri ad pedes duarum Virginum jacent. Haec omnia dubitanter exposui, licet non defint conjecturae, quas mittere nimis longum esset, auctoritate Veterum fultae & firmatae, quae rem, nisi mihi ipse nimis placeo, satis clare explicant. In his si me juvare possis rem gratissimam feceris, beaverisque si *Carolus Datum*, cujus eruditionis sponsores habeo librum de vita pictorum, vel *Falconierum*, aliumve meo nomine rogaveris, ad quos tamen decurrere causae nihil erit, si tu aciem ingenii advocare, & symbolam conferre volueris. Scripsi hac super re ad Clarissimum *Laurentium Pantiaticum*, ad quem litteras haec, ut cures, etiam atque etiam rogo, qui fidem enim dedit, se omnia mea causa facturum. Mitto simul ad eum Inscriptiones nonnullas ineditas, & Noviomagi repertas, quarum corpus novum *Falconierum* adornare dixerat. Harum tibi quoque, ni temporis angustiis excluderem, fecissem copiam: sed interim fer a me lapidem in ripa Gallica prope Noviomagum ante paucos menses repertum. Forma ejus est quadrata, & quasi ad amussim ducta: in medio protuberans, & in quatuor partes aequales divisa, & in circuitu vel ambitu litterae

le-

leguntur inversae, ubi puncta ponuntur, ibi eadem litterae ab omnibus lateribus leguntur WATJH. &c. Hic lapis quid sibi velit fateor me cum ignarissimis scire, nisi quod nonnulla ita legenda videantur. SIGNARIVM ADIMIT TALASSEROS STRATIOTICVM: quid autem reliqua sibi velint ignoro. Vale, vir magne, & me amare perge. Davent. iv. Nonas Mart. MDCLXXII.

Lapillus ille viridis politus & quadratus exhibetur apud *Joh. Smetium* in Antiquit. Neomagensibus pag. 98. ideoque hinc eam exprimere necessarium non putavi.

EPISTOLA CCCXCVII.

NICOLAUS HEINSIUS

V. Cl. Gisberto Cupero S. P. D.

Quas fidei meae concreditas ad *Laurentium Panciatichum* ire voluisti, Cupere doctissime, eas jam in Tuscos per tabellarium misi. Intempestivum enim videbatur opperiri responsum ab amico nostro ad eas, quibus illi reditum ad lares patrios, mense proxime decurso, eram gratulatus. Obsecravi igitur & hunc & *Octavium Falconerium*, pro ea, quae cum utroque intercedit mihi, necessitudine haud perfunctoria, studiis tuis egregiis, pulcherrimoque Apotheoseos Homericæ illustrandæ proposito ne suffragari graventur. Spero augurorque non tam precibus id meis, quam sibimet ipsis hoc daturus viros praestantes humanitate non minus quam eruditione: quorum officia aliis in rebus haud paucis habeo jam pridem perspecta. Haec cuncta apud Silium sic esse capienda omnino, ut tu arbitraris, tecum plane sentio. Quapropter veniam mihi dabis, & exfulanti jam pridem a libris minus praemeditate rescribenti ad ea, quae proponebas. Marmor ipsum vix in transcurso consului, & tum quidem arcus ac pharetra in vestibulo antri, uti & lyra pro Apollinis insignibus a me capiebantur. Virum basi superstantem proxime antrum, Maronem esse colligebam, quod vestitus ac tonsura capitis Romano potius, quam Grajo videretur mori respondere. Is autem Homeri cultor praecipuus. Consulam diligentius aliquanto ectypum marmoris, & si quid enucleatius possum, ejus te ignarum esse haudquaquam patiar. A *Carolo Dato* in dies litteras exspecto: quibus ad me perlatis, non intermittam illum quoque exhortari, ut institutum tuum pro virili foveat ornetque. Amplissimum *Ter Borchium*, qui multis officiis me complexus est, dum reipublicae admotus nuper apud nos vivebat, reditum sunt qui negent. Id quod permolestum omnino ac inique fero. Erat enim in illo candor plurimus, pari cum morum urbanitate ac eruditione haudquaquam protrita conjunctus. Salveat is, quaeso, a me multum. Salveat & *Hogerfius* & alii apud vos viri, litterarum cognitione praestantes. Tu vale. Exarabam manu properante Hagae Comitum. A°. ciciocLXXII ad xxiv. Martii Gregoriani.

Pro lapidis quadrati inscriptione communicata mecum gratias ingentes ago:
de

de qua amplius erit deliberandum. Vidi inscriptiones Magicas huic non omnino dissimiles. Iterum vale.

EPISTOLA CCCXCVIII.

GISBERTUS CUPERUS

Nicolao Heinsio S. P. D.

Hagam.

R Eccepi ab *Elzevirio* MONUMENTA PADERBORNENSIA; quae te distribuere viris Eruditis, quorum tamen me numero eximo, voluit Celsissimus princeps. Delectavit me jam olim prima elegantissimi operis editio, quando aeger licet morboque fere confectus, facere tamen non potui, quin doctissimum volumen, rebusque eruditissimis refertum evolverem. At nunc nova illa & longe augustior facies tantum iniecit desiderium, ut ad praeclara Monumenta summo animi gaudio, veluti ad res novas accesserim & delicatissimas, recesserimque non sine magna eruditionis usura. Quid multis? placent omnia: admiror Illustrissimi principis singularem Eruditionem, Romanae, Francicae, Sclavonicae Historiae accuratissimam cognitionem, & puram pudicamque orationem, ac condendi carminis elegantiam. Hunc Phoebus didicisse magistro, *Αντιδιδάκτον*, & *πλυφώνοτατον* esse. ἢ ποιητῶν recte facit, qui credit. Quae enim carminis vis & majestas? quae artificiosa & blanda verborum constructio? quis dulcis sonus? quae magniloquentia? quae perspicuitas? optime sane actum esset cum genere humano, si talium principum & Antistitum esset copia; quod ne sperare quidem, ea nunc natura rerum & is temporum cursus est, licet, cum undique omnium aures personent, NON EST VTILE. Fatearis tamen, Clarissime Heinsi, necesse est nihil majus huic saeculo, quo vix privatus litteras a limine salutat, obvenire posse, quam principem, talibus ingenii dotibus proditum; qui cum tot & tanta, qua divina, qua humana negotia sustineat, animum non tantum humanioribus studiis laxat, sed iis plane immergit. Gratulor temporibus nostris, quod tali fidere illustrari meruerint; gratulor mihi ipse, quod ejusmodi ingenium admirari queam; gratulor denique Eruditis omnibus, quod hunc Celsissimum principem habeant ducem & hortatorem. Quem enim non inflammet Antistes iste? cujus dum depictum vultum cerno, cum auctore carminis ad Pisonem cano,

*Sed super ista movet plenus gravitate serena
Vultus, & insigni praestringit imagine visus:
Talis inest habitus, qualem nec dicere maestum,
Nec fluidum, laeta sed tetricitate decorum
Possumus: ingenitae stat nobilitatis in illo
Pulcher honos, & digna suis natalibus ora.*

Sed hoc mihi non sumo, ut Principis panegyricum conscribam, cujus laudes superant vires ingenii, quasque recensere & enumerare non opis est nostrae.

Tom. II.

R r r r

Ti-

Tibi, Vir Clarissime, mirificas pro tuo beneficio & misso exemplari gratias ago habeoque, ut & Amplissimus *Terborchius*, cui alterum tradendum curavi, a quo, cum haec scriberem, poëmata septem Clarissimorum Virorum, munus tuum, accepi; quibus nihil elegantius fingi potest, cum cernere detur vere Romanam & minime fucatam venam, illaque redoleant fragrantissimas veterum *μυροθήκας*; quae tamen omnibus numeris fuissent absoluta, si & tua, non minoris spiritus poëmata iis accederent. Sed haec hactenus. Commentario in Apotheosin Homeri, tuo nomini inscribendo, ultima fere manus est imposita: eum se praelo subicere velle fidem fecerunt *Andreas Frisius*, & *Waesbergius*; sed, ut nunc est, diritatem temporis accusant, quae simul abierit, pransos se dicunt & paratos operi manus admoveere; quod antequam typis describeretur, curabo ad te deferendum, ut, sicubi forte humani quid passus sim, tu admonere, qua es humanitate, possis. Speroque Italos, viros celeberrimos tantum tua causa facturos, mihi que daturos, ut symbolas conlaturi sint. Vale. Daventriae: a. d. xiv. Kal. Jun. MDCLXXII.

EPISTOLA CCCXCIX.

GISBERTUS CUPERUS

Nicolao Heinsio S. P. D.

Hagam.

CUM jam te Laribus & penatibus redditum (nam ex *Graevii* nostri, quas nuper dedit, litteris, intellexi te redditum in patriam adornare) credam, non potui non facere quin tibi gratularer, quia de salute tua propter infestas vias non leviter fui anxius & sollicitus. Te enim salvo, salva in patria nostra res litteraria, quae, si quid tibi accidisset, maximam & non pensandam jacturam fecisset, ut unusquisque confiteri necesse habet, qui raras ingenii dotes, humanitatem, benevolentiam, eruditionemque, qua fulges, non ignorat. Haecque etiametsi praecipua institutae hujus scriptionis causa, haud sola tamen est. Nam & cupio scire, quod commodo tuo fiat, num quid ab Italīs, viris doctissimis, apud quos tuas litteras maximum pondus habituras spero, elegantissimi Marmoris illustrationi inserviens receperis. Opus enim illud ad umbilicum perductum est, & in non poenitendam excrevit molem; quamvis nullus dubitem, quin Itali, qui in majori talium rerum luce versantur, multa suppeditare possent. Dubia enim nonnulla supersunt, quae ut paucis, sola conjectura fretus, explicavi, ita illos veriora certioraque daturos confido. Nulli tamen editionem morabuntur, si modo candidior patriae affulserit dies, & pax cum Galliarum, Britanniarumque Regibus, nec non Germaniae Principibus fundata sit. Illa nobis, illa, Magne Heinsi, opus est: bellorum enim tempestates, fulmina & procellae Musis inimica sunt, nec in una sede morantur Mars & Apollo. Spero Deum Opt. Max. patriam tandem nostram, tot acerbitatibus vexatam, respecturum, sublaturumque miserias, quae non mi-

EPISTOLA CCCC.

Nicolao Heinsio S. P. D.

Amplissimo *Terborchio* in Batavos iter adornanti non potui non facere, quin litteras comites darem; quibus & gratias agerem, quas possum, maximas pro incredibili erga me voluntate, humanitate ac benevolentia, & significarem me non mediocriter laetatum, ubi ex ultimis illis, papavere & sesamo sparsis, intellexi, cum Eruditissimo te, celeberrime *Heinsi*, *Ostavio Falconerio* de conatu meo sermonem (μέγα κλέος) habuisse. Et quanquam de instituto illo promovendo vix spei quid reliquum fecerit, tantum tamen tua causa facturum spero, ut vel se illustraturum etiam (quod docet *Spanhemius*) elegantissimum Antiquitatis depositum affirmet, vel tandem aliquid conferat, quo *Commentarius*, in quo sine ulla interpellatione versor, ornatior, venustiorque exire possit. Sed tibi haec, quemadmodum non obscure ostendis, curae erunt; multumque mihi a viri magni humanitate, qua fulget, promitto & spondeo. Litteras, quas ad Clariss. *Pantiatichi* dederam, non vana conjectura ductus credo oscitantia tabellarii interciderit. Adjeceram enim illis Inscriptiones aliquot in agro Noviomagensi ante biennium repertas, quas non sibi, quanquam nec ita repulsam tulisset, sed Illustriss. *Falconerio*, in novum Inscriptionum, ut narrabat, corpus adornanti, petebat. Mirum ni has se recepisse Apostolicus Internuntius dixisset, si epistola ab hemerodromo (nam de amici

fide nihil est quod dubitem) recte curata foret. Quare in hoc omne, quod commodo fieri possit, inquiras rogo, credasque velim, rem te, cui tamen tantum oneris vix imponere nec audeo nec debeo, mihi gratissimam facturum. Sed libertati, importunae forte, veniam da; habeasque excusatum, si paulo prolixior sim, & adjiciam loca aliquot Auctoris Consolat. ad Liviam, quae a me emendata iudicio plane tuo permitto. vs. 103.

Te queritur, casusque malos, irrifaeque tales

Accusatque annos, ut diuturna, suos.

Minima mutatione lego *tabet*: id est; mater lamentatur propter te, & miserimos, Druse, casus tuos; ideoque tabescit irrisa & elusa a Fortuna, quae te abstulit, cum sperasset a te sibi ultimum officium redditum iri: hinc ait, *Accusat annos*, quia scil. nimis diu superstes fuit, maluissetque ante te obiisse, ut lumina claudi a Druso fratreque potuissent. quo respicit vs. 159.

Atque utinam Drusi manus altera, & altera fratris

Formarent oculos comprimerentque meos!

Irrisaeque merito dici potest, quia fortuna blanda, postquam summis filium honoribus affecerat, ipsum florentissimae aetatis & felicissimo rerum cursu abstulit. Huc spectant illa, quae canit. vs. 30. & sequentibus, ut & quod vs. 51. in *Fortunam* invehitur: denique hoc illud est, quod vs. praecedente canit:

Liquitur: ut quondam, Zephyris & solibus ietae

Solvuntur tenerae, vere tepente, nives.

Quod idem est ac si dicas *tabescit*, vel *antique tabet*: qua voce utitur etiam Cicero in Catil. cum dixit, *desiderio alicujus tabere*, & Ovidius lib. VII. *Metam.* vs. 540.

Lanigeris gregibus balatus dantibus aegros

Sponte sua lanaeque cadunt, & corpora tabent.

vs. 234.

Iste meus periit: periit arma inter & enses

Et dux pro patria: funere causa latet.

legendum omnino censeo *patet*. alloquitur Mars Tyberinum, Drusumque sibi vindicat: unde ait, *Iste meus periit*: quia scilicet in bello, cujus praeses, dux pro patria periit; causamque non longe arcessendam esse ait, sed *patere ex funere*, quod erat Triumphale, nec nisi illis dabatur, qui caesis hostibus triumphum meruerant, & antequam eum agere possent in bello obierant, quo de funere haud protrita, ni otii tui rationem haberem, monere possem. vs. 402.

Juppiter ante dedit fati mala signa cruenti,

Flammifera petiit cum tria templa manu:

Junonisque gravi nocte imparidaeque Minervae,

Sanctaeque & immensi Caesaris ieta domus.

Distichon ultimum aut adulterinum aut pro declamato censet habendum, Clarissime Heinsi. sed si tanti, considera, quaeso, quid mihi in mentem venerit. Hujus prodigii etiam meminit Dio lib. LV. initio, aitque templa nonnulla tempestate & fulmine χαμῶν & κτεχνυοῖς perdita esse, & inter alia, τὸ τοῦ Διὸς τοῦ

τοῦ Καπιτωλίνου, ἃ τε σύνναον αὐτοῦ κακωθῆναι. *ipsius Jovis Capitolini, & huic adjunctum*, ut vertunt, *fanum*. mirorque valde Auctorem consolationis, templi, quod praecipuum erat; non meminisse: quare parum abest, quin refingam.

Flammifera petiit cum sua templa manu.

Junonisque gravis, doctae impavidaeque Minervae,

Sanctaque divini Caesaris icta domus.

Sic singula erunt clarissima & historiae consona: *Juno gravis* vocatur propter incestum, *Minerva docta & impavida*, quia & studia & bella amat. Illud autem *tria* irrepsit, propter versum sequentem, ubi Junonis, & Minervae, templi, & Augusti domus, quod & templum vocatur, fit mentio. Sed ecquid placet Dionis locus? ego fane quod sit illud *adjunctum fanum* quaero. *Συννάους θεούς* scio significare Deos, qui eodem templo, eadem cella colebantur, quos & *συνθερόους* & *παρέδρους* vocabant; docerique velim quis veterum *σύνναον* pro adjuncto templo dixerit: quare puto legendum; ἃ τε συννάων αὐτοῦ, id est *Junonis & Minervae*, ut Auctor Consolationis narrat, quasque constat ibidem cultas esse.

Et haec quidem haecenus; sed, pace quod fiat tua, Ovidium etiam & Plinium ad partes vocabo. Is ita canit lib. III. Amor. El. 9. vs. 43.

Aurea Sanctorum potuissent templa Deorum

Urere, quae tantum sustinere nefas.

Legendum omnino *qui*: neque enim templa, sed Dii nefas fieri patiebantur, ut est notissimum; unde & iis non autem templis invidiam faciebant. Alterum leviusculum mendum apud eundem est lib. I. Artis Am. vs. 141.

Et bene, quod cogit, si nolis, linea jungi.

Scribendum enim, ut arbitror, *nolit*. id est, si puella nolit bene jungere latus suum tuo, dic lineam cogere, & te debere lege loci puellam tangere; quod & poscere videtur explicatio tua doctissima τοῦ *lineae*, quam cum Hagae Comitii tecum essem, pro solita humanitate & benevolentia impertiebas; sed, ut est τὸ λεγόμενον, numeros teneo, non verba. Agmen claudet Plinius, qui lib. XIV. cap. 7. vina transmarina recensens, inter ea commemorat *praeparentium*: pro quo MS. CH. legit *peparethium*, MS. Regius unus *perperentium*: unde *Claudius Sarravius* Epist. cci. faciebat *perperennium* laudatum Galeno vinum. Sed ego *peparethium* veram lectionem arbitror; quod vinum etiam laudat Demetrius Troezenius ἐν πάσι δευτέραις Θεσμοφοριαζούσαις apud Athenaeum lib. I. cap. 23. & *Peparethum* insulam veteres a vini copia laudarunt; Αὕτη ἡ νῆσος, ait Heraclides in Excerptis, εὖοινός ἐστι, καὶ εὐδενδρὸς, καὶ σῖτον φέρει. Sed ohe nugarum jam satis est, & patientia tua nimis diu abutor: & ut verum fatear, video me juxta Ciceronem eos imitari, qui cum semel verecundiae limites transgressi sunt, gnaviter sunt impudentes. Quare veniam πολυλογίῃ dabis, & si tantum horis tuis, vir Magne, abire vis, erranti comiter viam monstrabis. Vale Clarissime Heinſi, & Cuperum tuum amare perge. Davent. a. d. VIIII. Id. Julias, CIOICLXXIII.

Vide Cuperi Observ. IV. 3. ubi & Heinſii Epistolae, qua respondit, pars legitur.

GISBERTUS CUPERUS

Nicolao Heinsio S. P. D.

Hagam.

Quas ad me pridie Kal. Sextiles dedisti epistolas, ab amica manu recepi; gaudeoque tibi, Virorum Maxime, & studia mea probari, & emendationes non plane displicere, nec ἀποόσους videri. Glorior sane tali teste; & licet pudor paene subrusticus ejusmodi saepius coram te agere conantem deterreat, quia tamen ipse auctor es, & admissio equo, ut cum Ovidio tuo, praefiscine tamen loquar, calcar subdis, aequi bonique consules, si iterum adsim & publicorum negotiorum & studiorum interpellator; atque alias conjecturas tuo, id est, acutissimo judicio vel improbari vel firmari desiderem. Epistola Heroidum III. vs. 115.

Et si quis quaerat, quare pugnare recuses,

Pugna nocet: citharae noxque Venusque juvant.

Nulla in praecedentibus noctis mentio, sed tantum Veneris & citharae; ut hoc versu: *At Danaï moerere putant: & Tutius est.* &c. Unde legerem; *Citharae voxque Venusque.* Nosti elegantissime vocem citharae tribui, & significare sonum. Sic praeterea locutus est Virgilius VI. Aen. vs. 646. & Homerus II. Σ. vs. 495. Βοήν, & vs. 571. Φώνην illi tribuit. Epist. VII. vs. 597.

Exige laese pudor poenas, violate Sichaeo;

Ad quas (me miseram!) plena pudoris eo.

Puto scribendum esse; *ad quem*; nimirum Sichaeum, vel ejus statuam: subjicit enim sibi esse ejus statuam marmorea in aede sacratam, seque quater esse invocatam & venisse, sed tarde propter pudorem: *Sed tamen admissi tarda pudore mei.* Ep. XII. vs. 84.

Sed mihi tam faciles unde meosque Deos!

Lego; *meisque*; nempe fociis vel Argonautis, quibus ex hac re magnum commodum non secus ac Jasoni erat eventurum. Sabinus Ep. III. vs. 67.

Anchisen propter voluit formosa videri,

Visaque post latam jacuit ulta deam.

Locus, si quis alius in his Epistolis, corruptus; sed sanitati suae restituetur, si legamus: *Visaque post propalam jacuit ulta Deum.* id est, Venus in adulterio a Vulcano deprehensa, & visa ab aliis postea liberior facta est, nec furta uti solebat, tegebat, sed palam jacebat, atque ita Deum, id est, Vulcanum ulciscabatur. Sic jacere usurpatur Metam. III. vs. 363. Quinimo idem canit poeta lib. II. Artis vs. 590.

Hoc tibi profectum, Vulcane: quod ante tegebant;

Liberius faciunt, ut pudor omnis abest.

Et simile quid etiam scribit Julius Firmicus de E. P. R. *Venus in adulterio deprehensa detegitur; & post Dei nuptias, Anchisae hominis cubile sectatur.* Tu autem,

tem, vir Clarissime, me doce qui sint *arrecti currus* apud Virgil. lib. ix. Aen. 317. Nam quae Donatus notat, nequaquam difficultatem tollunt. Et nescio quare currus arrederint vel in altum sustulerint, nisi hic solitus fuerit mos, & currus per posteriorem partem deprefferint, ita ut temo in altum erigeretur, quale quid observo in tracto agitatore apud *Joh. Rhodium* ad Scribonium Largum. praeterea aveo scire, quid sit illud, quod in colloquio Scholastico apud *Vulcanium* uni homini tribuitur *χιτὼν πρὸς τὸ σῶμα* cincta; *πρὸς τὸ τεράχην* *ἀναβόλαιον*: *ἐπενδύτης λεύκῃ* & *Φαινόλῃ*. Malo enim haec a te certissime discere, quam variis, quae mihi natae sunt, conjecturis, indulgere, easque chartae illinendo patientia tua abuti. Vale, Clarissime Heinfi, & me amare, studiisque meis favere perge. Amplissimus *Terborchius* tibi salutem adscribit. Dav. ipfis Kal. Januariis *CIOSICLXXIV*. qui tibi, patriaeque felix ut sit, multa Deum Opt. Max. veneror.

EPISTOLA CCCCII.

GISBERTUS CUPERUS

Nicolao Heinfi S. P. D.

Hagae,

DUm singulis diebus me certiore fore a Clarissimo *Graevio* spero, te in agro Trajectino versari, ecce juvenis modestissimus, & litteris interioribus haud mediocriter imbutus *Jacobus*, quem tibi majorem in modum commendo, *Perizonius*, mittit te Hagae-Comitis etiamnum haerere. Nihil tam praeter opinionem accidere potuit, causamque morae diuturnae statim litibus, quae te nullo tuo merito tam longo tempore exercitum habuerunt, adscripsi. Damnavi quoque consilium meum, quod commentarium in Homeri Apotheosin conscriptum apud te non reliquerim, ut in quibus a vero aberrassem moneres, & si quae addenda forent, pari facilitate atque humanite, quam semper maximam esse cognovi, impartires. Sed hoc idem praestare te velle, quando a *Graevio* librum accipis, etiam atque etiam rogo, ut dignus tuo, id est, nobilissimo & celeberrimo, quod praefereat, nomine exeat. Neque enim lucem sine judicio tuo aspiciet, quod si tulero, satis magnam laboris mercedem me consecutum esse arbitror. Typographi, quos & Lugduni & Amstelodami conveni, diritatem temporis, & papyri inopiam, quam nisi nitidissimam adhiberi volo, una omnes accusant. *Graevius* promisit se cum *Zyllo* acturum, si forte ille operas suas addicere vellet. Tu, quaeso, idem mihi, quod commodo fieri potest, officium praesta, cum non tam mea, quam Homeri causa qualemcunque Marmoris explicationem exire summo opere desiderem. Non dubito haec a te per litteras petere, & viro occupatissimo *πράγματα παρέχειν*, quia certo persuasus sum, te mea causa velle. Cum autem priores litterae male curatae sint, veniam dabis, si quae loca in iis examinavi, breviter habitaque ratione otii tui proponam. Apud *Hesychium Milesium* Libello, quem de rebus

bus patriis Constant. conscripsit, dicuntur Μεγαρεῖς ἀπὸ νήσῃ γένος κατὰγοντες Byzantium condidisse. Scio *Megarenses* fuisse in Sicilia, & videri posse ἀπὸ νήσῃ addi ad differentiam aliorum. sed tamen puto legi debere ἀπὸ Νήσῃ Nisum intellige, qui Megaris, urbs Atticae est, imperavit, teste Pausania libro primo. Hujus progenies, Byzantium videtur migrasse, urbemque condidisse vel restaurasse; quod Megarenses fecisse memoriae etiam mandarunt Philostratus & Constantinus Imperator in Thematibus. Apud Curtium libro iv. 14. in oratione Darii, pro, *Duces vestros, Regum instar, vinctos habet*, scribo, *reorum instar*: & *Duces* non de satrapis cum Freinshemio V. Cl. interpretor, sed per appositionem dictum puto, & ad matrem, filias, filiumque *Darii* refero; quasi dicat, qui sunt duces vestri. Illos autem *principes*, id est, primas dignitate vocat, hunc vero *subolem regiae stirpis*, quia hic a Dario Rege susceptus, filiae vero antequam regno admotus esset, ipsi natae sunt, nec mater ex regia familia oriunda foret. Eadem occasione emendaveram Justinum lib. xi. ubi narrat Alexandro semel tantum uxorem Darii visam, *cum matrem filiasque ejus parvulas frequenter consolaretur*. Neque enim videntur filiae Alexandri parvulae esse, quas Curtius *adultas*, Plutarch, *ἑταίρας παρθένους*, Diodorus *ἑταίρους* vocant, quasque ipse Justinus Alexandro in uxores oblatas dicit. unde scribebam, *matrem, filias, filiumque ejus parvulum frequenter consolaretur*. Curtianam autem emendationem firmant, *vincula, carcer, servitus, compedes*, & alia quae sequuntur. Sed cum de his ut & aliis multis locis agam in Observationum affecto opere, quod apud Graevium quoque reperias, pluribus sententiam firmare supervacuum existimavi. Geographus a Gothofredo editus, Indiam in majorem, minorem & minimam, ἐλαχίστη enim pro ἐλάσσων ultimo loco videtur legendum, monente viro Clarissimo, dividit; cujus divisionis auctorem, & num alibi existent exempla quaeso me doce. Haitho quidem Armenus cap. viii. *Indiam majorem* memorat, & M. Paulus Venetus cap. 23, 34, & 43. Indiam in majorem, minorem & intermediam, sed nescio quo auctore, dividit. Majorem interpretabar extra Gangem, ita ut Seres ea non comprehendantur, Minorem intra Gangem, Minimam intra Indum, ubi Indi Littorales, qui fuere Persicae ditionis, a Justino collocantur. Sed haec omnia tu melius elucidabis, acerrimique vi ingenii omnem dubitandi ansam auferes. Quotidie expecto Inscriptiones ineditas in Hispania repertas, quas ubi accepero, statim ad te mittam. Vale, virorum Maxime, & Cuperum, ut soles, amare perge. Davent. ipsis Id. Jan. cicioclxv. qui annus tibi felix & a litibus vacuus sit, multa Deum Opt. Maximum veneror.

EPISTOLA CCCCIII.

NICOLAUS HEINSIUS

*Gisberto Cupero S. P. D.**Daventriam.*

Nihil equidem magis me invito fieri potuit, mi Cupere, quam quod post secessionem in agrum Trajectinum, quam studiorum praesertim causa eram meditatus, ante Januarias Kalendas proximas, adeo nihil horum perficere licuerit, quae agenda mihi illic proposueram, idque ob crebras interpellationes molestissimae valetudinis, ut nec ordinandae bibliothecae satis vacarim, nec perlegendo tuo super Apotheosi Homerica commentario me dederim, quod maxime voluissem tamen. Torpor enim lethalis quidam dejectas vires adeo non finit eniti haecenus in pristinum vigorem, ut animum pene dispendeam de salute recuperanda, nisi ab aura benigniore verni temporis, & thermis Germanicis, praesidium adfulget. Interim tricae forenses huc me de novo evocarunt, e quibus laqueis si mature detur expediri, rus ut quam primum recurram mea interest: quo & res privatae ante Germanicam profectioem componantur, & studiis, si possim, non nihil vacem. ablaturus tunc a nostro *Graevio* lucubrationes tuas, quas emigrans rure vicino apud illum deposui nuper, ne quid iis inter tumultuarias istas discursationes in via forte incommodi superveniret. Typographum jam circumspexissem tibi, si quis indagari potest, nisi quod adstrictus tenaci compede valetudinis diuturnae vix de huo efferre pedem potui jam pridem. Nam *Elzevirius* noster in Britannias profectus, vix videtur reversurus inde ante Apriles Kalendas. Utinam haec bella, quae nos miserrimis affligunt modis, amoveantur tandem, ac litterariae rei decus pristinum aliquando instauretur? Nunc inter tantas fluctuationes nec ipsi praestare quicquam possumus, nec quae peregre praestentur ab hominibus bonarum artium studiosis, satis edocemur, sublato paene omni cum Gallis Italisque commercio. *Henricum* tamen *Valesium*, post editos Ecclesiasticae historiae scriptores, manum admovisse Libanii Rhetoris opusculis compluribus luce donandis, quae in publicum haecenus non prodire, audio, *Johannes Schefferus* ad me perscribit, habere se paratas in Justinum Juliumque Obsequentem animadversiones. Observationes adhaec Academicas typis Hamburgensibus describendas in Germaniam pridem abs se missas. Nunc commentariis in officia Ciceroniana elucubrandis se studere. Ceterum cum & is de valetudine magis ac magis ingravescente conqueratur, virum optimum haud fore vitalem est cur jure optimo subvereamur. Ad Hesychium, Milesium, Q. Curtium ac Justinum, quae mihi communicasti abs te observata, praesertim ad Hesychium veris veriora mihi videntur, pluribusque tecum agerem de re tota, si ipsi codices nunc essent ad manum. Sed librariam suppellectilem omnem etsi indigestam plane, reliqui in villa. Apud Propertium locus est, in lib. iv. illa elegia, qua lusus suos nocturnos cum Phyllide & Teja describit.

Tom. II.

Ssss

Lam.

Lanuvii ad portas hei mihi solus eram.

Quae interpretes illic argutantur, frivola sunt plane & nulla nituntur auctoritate, sed ut demus Lanuvium sic capi posse, ut capiendum illi sentiunt, vix video, quid commodi sensus inde eliciatur, & ad rem praesentem pertinentis. An nescivit esse se solum, quando puellam utramque ad se evocavit? quid opus ergo exclamatione illa? Sed aliter persuaderi non possum, quam ut credam, locum esse mendosum? de quo sententiam tuam docebor libentissime, ubi commodum id tibi erit. Amicos communes jubeo plurimum salvere, atque in hisce Amplissimum *Ter Borchi*um. Vale, Belgicae nostrae ac rei litterariae lumen certissimum. Hagae Comitum MDCCCLXXV. XXVII. Febr.

EPISTOLA CCCCIV.

GISBERTUS CUPERUS

Nicolao Heinio S. P. D.

Hagam.

SImul a singularis indolis juvene *Jacobo Perizonio* certior factus sum, quas ad te dedi litteras male curatas esse, aliquantulum commotus sum. Nam cum doctissimas accepissem, cumque mihi singulari humanitate novum honorem gratulatus esses, accusari utroque nomine videbar jure posse, quod nec illis quicquam reponerem, nec gratulationem acceptam esse significarem. Scilicet antequam ultimae, quae mihi fuerunt gratissimae, redditae sunt, divinationes in locum Propertii miseram, simulque quid accidisset indicaveram, ne ex aliis prius, quam ex me disceres, quomodo rerum scena non sine fragore & strepitu in Transilulano agro conversa sit. Sed cum epistolae exemplar apud me sit, totam eam ad te mittere volui, ut & officii mei ratio constet, & quod consilium ceperim, prospicere possis.

Quamvis non dubitem famam ad te attulisse novorum Magistratuum creationem, faciundum tamen mihi putavi, ut & eam mea opera ex parte cognoscas. Factio, quae Principi adversata ferociter tam diu est, tota naufragium honorum fecit, & cum ea *Hogersius* noster, quem vellem multas ob causas non tam pertinaciter novis & re & nomine hominibus adhaesisse, vel virulenter adeo in Optimum Principem, Serenissimamque domum debacchatum esse. Amplissimus *Ter Borchi*us omnibus dignitatibus cum suis est redditus, illoque multum in constituendis Rectoribus usus est LIBERTATIS RESTITUTOR. Dignus sane is est, qui hoc virtutis & sanctissime administratae provinciae testimonium habeat, indignus qui famosis, quos te non sine detestatione legisse audio, libellis destringatur. Me quoque Celsissimus Princeps consulem creavit, ita ut priori dignitati nuncium remittere non cogar, quam ut relinquam, nondum induci potui. Amicae enim hae res sunt, & quam aegritudinem tricae & rabulae forenses mihi dabunt, eam studia, & docendi publice, quo maxime delector, munus exhaurient. Parum, fateor, aberat, quin cum Na-

fo-

sone tuo cecinissem, *Curia restabat*, sed amicis, quorum in potestate sum, illud denegare sine impietate quadam non potui; licet, ut ingenue loquar, si alterutrum eligendi imponeretur necessitas, mallem me honesto otio, quam splendidis negotiis oblectare. Vides, Virorum Maxime, quam altas radices in me egerit Eruditionis amor, & novam dignitatem non tam desidia, ut fieri fere amat, quam diligentiae incitamentum fore, ut, quae premo, opera absolvere, & ad nova animum adjicere queam. Quae de litibus scribis ex animo doleo, speroque te tandem illis molestis liberatum iri, ut amplius de literis, quod toties fecisti, scribendo bene mereri, & quietam senectam post exercitam juventutem transigere possis. Mire placent quae de Viris Clarissimis *Valesio & Scheffero*, cui summo opere innotescere cupio, scribis. Nam in Justinii libros priores XII. etiam observationes paratas habeo, quas, ni diritas temporis obstaret, luce publica donarem. Te si parario uti licet ad tanti viri se in amicitiam insinuandum, quaeso, quod commodo fiat, rescribe. Quod quae ad Hesychium Milesium aliosque auctores notavi, probas, multis etiam de causis gaudeo; & nunc demum video me aliquid in hocce studiorum genere proficere, cum a laudatissimo viro non illaudatus abeo. Sed, Nobilissime Heinſi, quae in me obsecro eruditio, ut quid de Propertii loco intricato sentiam, doceri cupias? non adeo mihi placeo, ut credam me aliquid conari posse in iis verbis, in quibus ipse, si ita loqui fas est, haeres. Vis tamen, & voluntas tua mihi lex erit. Recte igitur hoc epigramma cum priore jungitur, & pessime in editione Wechelii A. 1621. separatur. Cohærent enim, & non nisi detrimento sensus possunt divelli. Cynthia Propertii amica Lanuvium petit, non Junonis, quae ibi superstitione colebatur, causa, nec sola, sed Veneris, & comitata Volſo, vel Vulſo nepote. Hac injuria tactus poëta voluit castra mutare, & vocatis Phyllide atque Teja Romae noctem lenire. Sed haec gaudia mala omina minuebant, ut lucerna moriens, mensa cadens, & damnosæ canes; quibus accidebat, quod cantilenis muliercularum non attendebat, *Cantabant surdo*, quodque etiam *caeco pectora nudabant*, id est, quod non spectabat pulchritudinem pectorum Tejae & Phyllidis, quae illae in gratiam poëtae nudaverant: & quare? quia mente Lanuvii erat, & Cinthiam vel proficiscentem, vel jam in urbe illa quiescentem sequebatur, nec rebus, quae in illo consortio agebantur, intentus erat. Vel igitur *solus erat ad portas Lanuvii*, quia Phyllis & Teja, nec non reliquae Personae se bona fide oblectabant, nec alibi animum occupatum habebant; vel legendum, si hoc durius videtur, sensu elegantissimo,

Lanuvii ad portas (hei mihi) totus eram.

Id est, Nihil aliud quam Cinthiam Lanuvium profectam meditabar, omnesque adeo cogitationes circa eam versabantur, adeo ut se, quemadmodum proposuerat, cum Phyllide & socia oblectare, etiam si cuperet, nos posset. Haec erant, vir magne, quae tunc scribebam, quaeque aequi bonique consulas rogo. Caeterum novos Lares, quos Viae figes, gratulor, venerorque Deum Ter Opt. & Ter Maximum, ut tibi illo in secessu omnia ex voto procedant.

Cum autem *Graevio* nostro propius hac habitatione jungaris, Apotheosin cum observationibus ab eo petas rogo, ut eam tandem una cum notis tuis, quas te adjecturum sponforem habeo humanitatem illam singularem, ad me communis amicus remittere possit. Vale, & Cuperi etiam Vianae memor vive. Dav. a. d. ix. Kal. Jun. ciciocLXXV.

EPISTOLA CCCC.V.

NICOLAUS HEINSIUS

Gisberto Cupero S. P. D.

Daventriam.

JUre merito bilem mihi concitat insignis illa tabellariorum supinitas, quae literis tuis, hoc est luculento eruditionis reconditae ac pulcherrimo Thefauro, non semel jam me fraudatum voluit. sed bene habet, quod tua diligentia abunde compensatum proxime agnovi, quicquid detrimenti ac jacturae hac supinitate ad me nuperrime redundabat. Amplissimi *Terborchii* diuturnam hanc absentiam aegerrime, medius Fidius fero, cujuse consuetudine ut voluptatis longe plurimum capiebam, ita is adminiculo suo res meas protegebat ac tuebatur laudabilem prorsus in modum. Mirifice enim gestio ardeoque post superatas tandem forensium tricarum molestias illas annosas ac ingratas, in sinu Musarum consenescere. Quo votis flagrantioribus maturum ejus redditum exopto voveoque, qui consilio suo ac patrocinio unice provehebat huc contendentem. Alias ex aliis lucas perire nihil agenti frequenter ingemisco, post totum ferme quadriennium curis publicis jam subductum hoc potissimum consilio, ut meus essem, ac bonarum artium candidatus; non quod tam magnifice de me sentiam, ut opiner utilitatis nonnihil ad rem literariam exornandam meorum a fonte studiorum posse derivari, sed quia in tanta calamitate patriae communis praesentius solatium vix aliunde videar mutuaturus, quam e contubernio Musarum, quo tempus inauspicatum certe fallatur, ac sensus ingentium mihi malorum obtorpescat; si consuli per me nihil jam possit in bonum publicum. Te vero, a quo praeclarum quidvis disciplinae sibi liberaliores non promittunt solum, sed jam prorsus obtinuerunt, sic curare rem patriam, ut privatis nihil studiis inde decedat, id sane pulcherrimi ducendum est instituti. Veniet, mihi crede, aliquando tempus, quo per hominum gratorum ora te laudes istae, uti mereris, ferant, posterisque conspicuum reddant. Locum *Propertii*, qui me & alios non parum exercuit, sic enodasti, ut nihil jam in illo supersit difficultatis. Irascor equidem torpori meo, qui non viderim, unam esse faciendam Elegiam e duabus; quamquam dormitarunt hîc mecum viri multo me praestantiores: nam qui sub *Lanuvii portis* obscaenae quid latere significationis censuere, nugas egerunt. sed quando *Delium* te nobis hîc exhibuisti natatorem, age & alterum ejusdem Poëtae locum expedi, quaeso, nobis, ex ultima libri iv. Elegia. is sic se habet,

*Aut si quis posita judex sedet Aeacus urna,
In mea sortita judicet ossa pila.*

EPISTOLA CCCCVI.

G I S B E R T U S C U P E R U S

Hagam.

S fff 3

l. viii. c. 10. Nam Hefychius *ἡμερόν*, per quem calculum jaciebant, ait similem fuisse *χώνη* *infundibulo*, quod proculdubio rotundum erat. pila igitur sive calculus judicet ossa mea, id est, condemnet. Nam *judicare* cum sit verbum medium, tam absolvere quam damnare significat: sic Plaut. Men. 1, 1, 2. *quo jam diu sum judicatus*, id est, quo ut eam sum condemnatus. En autem confidentiam, quae ex bona Corneliae conscientiae oritur, notat, & frequentissime poëtis usurpatur. Quod autem *Passeratius*, *judicare in ossa*, e Cicerone conatur probare, nihil agit. Nam ille c. 29. pro Domo, dixit: *sacramentum in libertatem injustum judicare*, quia causae liberales, ut nosti, solebant fere rejurando decidi: nec hîc, ut ibi, accusativus adjicitur. Male praeterea *sortita* ad *pilam* refert, quia peccatur in syllabarum rationem, nisi sequens *in* praecedentem brevem longam facere putavit. Tandem male etiam *sortiri pilam* putat esse educere nomen judicis ex urna in pila scriptum, quod ante eum amplexus est *Beroaldus*. Nam judex hîc certus erat, & calculus vel condemnans vel absolvens ex urna educi debebat. Caeterum vide num illud *in* retineri possit, & pro *sortita* legi *sortito*, ita ut *insortito* sit una vox, per mea divisa, ut saepe fieri solet: *pila judicet ossa mea insortito*. Qua re confidentia Corneliae mirum quantum augetur: dicit enim; si urna posita & fors subeunda est, per me licet hac praerogativa caream, & non sortita urna condemner. Nam ut consulto, inconsulto; honorato, inhonorato; audito, inaudito; ita & *sortito* & *insortito* usurpasse veteres videntur. *pilam* autem postea *tabellam* vocat; *Quaelibet austeras de me ferat urna tabellas*, quia tabellae, & pilae sive calculi eundem usum praebabant. Vides, vir insignis, egregie me & patientia tua abuti, & hariolari posse. Num tamen alius sensus elici possit dubito; nisi tu tot MSS. & tanta doctrina instructus, certiora, ut facies proculdubio, nos doceas. Amplissimus *Ter Borchius*, cui litteras, ut soleo, legendas dedi, nescit quando iter in Batavos suscepturus sit; & forte republ. ita exigente paucis, forte plusculis diebus elapsis, illi sese accinget. Ubicunque tamen est singularem tui memoriam servat, & si praesens res tuas juvare nequit, illis absens quam maxime favet, quantumque humana industria fieri potest, ubi ad vos redierit, promovebit. Sed, vir Nobilissime, me quaeso doce, num stilius, quem elegantem judico, induxerit *Job. Gerb. Vossium*, ut Sabini epistolas recentes faceret, quas tu sine Notarum A. Sabino adscribis. Haereo etiam in illo versu Propertii *Affideant fratres*. puto scribendum: *Affideant fratres* (Rhadamantus & Minos.) *juxta Minoida sellam Eumen.* & juxta sellam Minois Furiae. In *generosis vestis honoribus* interpretandis non satisfaciunt interpretes. Et denique dubito num verba Statii lib. 4. Silv. — *omniumque late praefecit stationibus viarum* recte *Lipsius* ad Tac. interpretetur de *viarum cura*. Nam aliud videtur, *praefici viis*, aliud *stationibus viarum*: quae mihi sunt mansiones, in quas provinciales frumentum convehere debebant, uti ex variis locis patet. Quadrat id quidem valde cum praecedente versu, quo a Caesare *arbiter sequenti annonae*, id est, anni sequentis, *datus* dicitur, sed num Domitiani aevo usitatum fuerit in Mansiones frumentum comportare, ut & num alii mansiones vocaverint *stationibus*

tiones, non secus ac Graeci *σάβηρος*, fateor me ea, qua par est, ingenuitate ignorare. Tu erranti comiter viam monstra, & quid de his locis sentiendum sit libere imperti. Vale, vir Maxime, & me amare perge. Davent. a. d. III. Kal. Jul. 1675.

EPISTOLA CCCCVII.

NICOLAUS HEINSIUS

Gisberto Cupero.

Daventriam.

CAveto opineris, quaeso, quicquam perferri ad me posse, quod prius habeam acceptiusque suavissimis tuis literis. Quamquam non diffiteor causas haud longe quaerendas tibi esse, cur aliter suspiceris, si ex responsi hac mei tarditate metiaris ipsa studia, ipsumque animi adfectum. Sed nuper in eo unice occupatum, Vir Ampliss. ut ex tricis permolestis, qua rei familiaris, qua fori, quamprimum memet expedirem, totumque transferrem ad Musarum castra, sacramentum religiose dicturus de deferenda nunquam statione, tot tantisque votis ac suspiriis desiderata pridem, ecce dum in portu navigare videor, oppressit me repentinus morbus, ac lecto diuturno adfixum praeclaris cogitationibus inopinato dejecit. Quapropter quod in rebus privatis ante Eidus Septembris nihil posse promoveri comperissem, sub quod tempus Procures Hollandiae Hagam denuo sunt conventuri, consilium cepi de transferendo interea corpusculo, etsi satis etiam infirmo, in agrum Trajectinum, a coeli mitioris aura atque ipsa solitudine solatium ac fomenta valetudini, si possim, quaesiturus. Ubi locorum nunc positus scripta tua omni eruditionis ac leporis fruge cumulata, vir longe doctissimus ac utriusque nostrum perquam studiosus, *Job. Geor. Graevius* diebus proximus in manus mihi tradebat. Jamque quos ex iis profectus cepissem haec epistola ubertim te doceret, si Bibliothecae in ordinem redigendae facultas mihi fuisset haecenus. Est enim opus inspectis libris compluribus, inter latebras cistarum adhuc reconditis, ut quae per nubem animo obversanter parum liquide, defecatum in modum tibi a me proponantur: cum tot jam per annos ab omni penore praestantium Scriptorum contingat excludi. A *Carolo Dato*, viro longe praestantissimo, ex Etruria literas habui proximis diebus, quae multae sunt in observationibus tuis collaudandis, quas tum primum ad se perlatas ille testetur. Si quid ad illum perlatum voles, ut & ad *Emericum Bigotium* in Gallias, tui aeque studiosum, opera mea quo minus utaris nihil impedit, quando ad utrumque ante hibernam tempestatem fasciculi nonnihil erit a me parandum. De Propertii loco sic habe, quem tu erudite, ut omnia, illustras. sed quam diu liquebit parum, urnam sive Aeaci hanc, aut etiam quamcumque, aut calculos etiam fortientes sive *ῥήφον*, pilam a Latinis dici, haerebit mihi scrupulus, fateor. Video in codicibus nonnullis *vin-dicet ossa*, non *judicet* legi. Et sane *judex judicet* Propertiano genio parum vide-

dētur respondere, itaque alterum malo. sed sic, ut totus minima mutatione sic restituatur

*Aut si quis posita iudex sedet Aeacus urna,
In mea sortitam vindicet ossa piram.*

Aeacus iudex vindicet ac animadvertat in piram, sortitam ossa mea, hoc est in me mortuam. Confidentiam hanc ab innocentiae suae conscientia mutuatur. Sic *rogos* pro mortuis etiam ponit initio Elegiae hujus

Obserrat umbrosas lurida porta rogos.

Paucis tibi sententiam meam aperiendam duxi, ut eligas ipse quid malis. Fuerunt mihi super hoc loco, aliisque ejusdem Elegiae versibus, (est enim infinitis naevis aspersa passim) velitationes amicae per literas jam olim cum nostro *Graevio*, quando illi alias proponebam conjecturas, in quibus minus nunc mihi satisfacio. Torquebat etiam tum me versus ultimus ejusdem Elegiae, quem sic nunc scribo,

*Moribus & coelum patuit: sim digna merendo,
Cujus honoratis ossa fruuntur avis.*

Scriptum fuit *fruantur*, vel *ruantur* una omissa litera, unde fecerunt *vebantur*. de *Honoratis equis* non persuadent interpretes. *Honorati* enim viri aut triumphales, aut certe primis in republica honoribus, ut consulari vel praetorio puta, perfuncti. ominatur Cornelia ob illibatos mores animam suam caelo deberi, ossa autem monumento Corneliorum inferenda, utroque autem loco majoribus suis fruituram. De Scipionibus ob merita caelo illatis vide vel Tullianum illud Scipionis somnium. Alterum locum ex MSS. sic in adversaria dudum redigere, ac *Graevio* nostro approbanti memini praeponere:

*Affideant fratres juxta Minoida sellam, &
Eumenidum intento turba severa foro.*

Illaque quoque me torserant, de *generosis vestis honoribus*. & fuit cum castigarem, & *tanti emerui generosos testis honores*, ut ab Augusto sellam datam innuat pro funere, ac simul ad Scriboniam alludat matrem, quae Augusto fuerit nupta. sed de vestibus feminarum post duplicem partum aliquid videor legisse. Papinii locum de re annonaria videris recte cepisse. Vale, Vir eruditione praesignis. Vianae XIX. Aug. CIOICLXXV.

EPISTOLA CCCCVIII.

GISBERTUS CUPERUS

Nicolao Heinsio S P D.

Vianam.

HARPOCRATEM commentario illustratum ad te, Vir Amplissime, qui aliquid meas esse putas nugas, ea lege atque omine mitto, ut quae occurrerent vitiosa, emendes atque excusata habeas. *Carolus Datum & Emericum Bigotium*, Viros in Gallis & Etruscis praestantissimos, mei studiosos esse non si-

ne summa voluptate & incredibili gaudio intellexi. Fecit eorum humanitas & eruditio, quam non solum a te, verum & aliis accepi, atque adeo ex libris hausi, ut aulus sim ad eos, & Clarissimum *Schefferum*, ac *Spanhemium*, cum quo mihi familiaritas intercedit, litteras, unaque cum iis Harpocratem mittere. Fasciculos rogo, quia hanc provinciam suscepisti, recte deferendos cures, certioresque Viros praestantissimos facias, me eorum cultorem praecipuum esse, nec, nisi perspectam habuissem omnium humanitatem, illam *παρρησία* mihi fuisse sumpturum. Est & aliud exemplar, quod si Celsissimo Paderbornensium Principi, Litterarum unico Maecenati, vel alii, si votum illud majus est, quam quod in privatum cadere possit, mittere volueris, rem mihi facies gratissimam. Quae servas opuscula, lege, & emenda, atque, ubi commodum erit, non sine notis, quae mihi erunt gratissimae, remitte. In interiorum enim amicitiam admissum me esse censebo, ubi videro multa in iis inesse, quae tibi displicent. Quibus Propertium illustras mirifice placent, nisi quod *pila*, vide quam *Φιλαυθής* sim, arridet: sed alios eodem sensu voce ea usos esse adhuc quaero, nec quicquam certi statuo. *Honoratos avos* omnino amplector; de *generosis testis honoribus* dubito, quia sequens versus, *nec mea de sterili* .. respicit liberos, & veluti causam reddat, quare meruerit generosos vestis honores. Sed tu haec omnia, vir Maxime, elucidabis; & si quid de vestibus matronarum illustrium ob faecunditatem mutatis in mentem veniat, quaeso mecum communices. Vale. Id. Octob. cicioclxv. Etiam atque etiam rogo, Commentarium in Apotheosin & Observationum libellos, non tamen sine notis, remittas, ea absolvere, atque ita hyemis taedia fallere constitui; poteris *Graepii* nostri opera uti, qui omnia recte ut curentur, providebit. Vale iterum, a. d. x. Kal. Nov.

EPISTOLA CCCCIX.

G I S B E R T U S C U P E R U S

Nicolao Heinso S. P. D.

Vianam.

Industriae meae, quantula ea cunque est, fructum HARPOCRATEM non modo ad te, verum etiam ad alios viros praestantissimos, quibus summo opere innotescere, cum nemine enim, nisi cum *Spanhemio* amicitia intercedit, cupio, ante aliquot dies misi. Haec namque mea sola & praecipua voluptas, eumque studiorum, quae ab Humanitate nomen habent, fructum esse uberimum & jucundissimum statuo, si detur absentes litteris adire, atque cum iis dulce commercium exercere. Quod si cura illa levis nimis & jejuna est, nec digna, quae gratissimo *ἀντιδωρῶ* pensetur, tu, quaeso, Maxime Heinsi, pro mea erga te summa observantia, & nostra amicitia adjice verborum honorem, & quo in viros eximios animo sim, quibusque artibus a primis temporibus aetatis studium dederim, significa. Verbum hac de re non addam, ne videar vo-

Tom. II.

T t t t

lun.

luntatem tuam in dubium vocare. Sed quid censes de verbis Herodoti lib. III. c. 130. *ὑποκύνουσι δὲ αὐτῶν ἐκάστη, Φιάλην τοῦ χρυσοῦ σὺν θήκῃ ἐδώρετό τ' Δημολήδεα*: id est, interprete Valla: *Tunc earum singulae auream phialae thecam suffringentes Democedem donaverant tam amplo munere* &c. Mihi equidem glaucoma oculis offusum est, nec illud vel Valla, vel Portus, vel Palmerius tollunt. Sed quid in mentem venerit, cognosce. Lego una voce *συνθήκη*, ex *composito*, neque enim quid *theca* hîc faciat video. deinde *ὑποκύνουσι*, *caput submittens*, *caput inclinans*, quod vel reverentiae causa, unde *ὑποκύψας* apud Lucianum pro venerans ponitur: vel forte metu faciebant, ne praesentibus Eunuchis alium virum a rege petulanter aspexisse possent accusari. *Φιάλην* autem *τοῦ χρυσοῦ* dicit, quia aureos stateres continebat, quamvis sensus longe clarissimus foret, si legatur, *Φιάλην πλείην τοῦ χρυσοῦ*, possetque videri vox illa a praecedentibus litteris extrita esse.

In Fragmento Nemesciani, quod *Janus Vlietius* ex Longolio & Gesnero editioni Auctorum rei Venaticae adjunxit

*Saepe ego nutantem sub iniquo pondere vidi
Mazonomi puerum, portat cum prandia cirro,
Quae consul praetorve novus construxit ovanti.*

Quaero quid sibi veit *cirro*: putoque legendum *circo*. Nam consul & praetor novus videntur illo tempore in circo epulas dedisse: docet hoc elegans locus in epistola Valeriani ad Aelium Xifidium praefectum aerarii apud Vopiscum in vita Aureliani cap. 12. idque plane probat. *puer* autem *Mazonomi* erit Maurus vel certe Afer, quia Mazices & similia gentium nomina ibi frequentia, & quia ejusmodi servos in deliciis non modo ex Suetonio, sed & aliis fuisse constat. Apud Frontinum, vide quam desultorius sim, lib. 1. cap. 5. ex. 24. pro *castra fecit*, nescio an scribendum sit, *castra cepit*. Nam parte exercitus hostes cecidit, parte altera eorundem castra, quae reliquerant, occupavit. Apud Stephanum in v. *Ερμιοτυμβιῆς*, pro *οἱ αὐτοὶ ἢ Λαβαρεῖς*, legerem: *οἱ αὐτοὶ ἢ Καλασπεῖς*. Nam ita apud Herodotum lib. IX. cap. 31. cujus verba etiam distinctione sananda sunt, vocantur. Et ipse Stephanus *καλάσιον* ait partem esse Aegypti, sed hujus ethnici non meminit; quod tamen & exstat apud Herod. lib. 11. cap. 164. ubi non secus ac altero loco, *Ερμιότιβιες*, non autem *Ερμιοτυμβιῆς* legitur. In v. *Ανοχίται* lego, *ὑπερ Βάρκης*, pro *ὑπερβαίνης*, auctoritate Herodoti lib. IV. cap. 171. qui gentem eam *Αυσχίσας* vocat. In v. *Κρότων*, legitur *ἢ τείτη Ἰταλίας*: Atqui jam Italiae Crotonem laudavit: fallor aut legi debet *Ἰλλυρίαι*; Nam in ea regione Crotonem etiam sitam esse docet Procopius libro 1. H. Gothicae. Sed nimis diu otio tuo & patientia, vir eximie, abutor, mihique dies aliquot vel hebdomades potius consumendae forent, si quae in Stephano ejusque Fragmento, quod nuper a viris eruditissimis editum est, notata sunt, describere animus foret. Tu, quod commodo fiat, erranti comiter viam ostende, & Apotheosin, Observationesque, quas absolvere vehementer desidero, non sine censura, quae mihi erit gratissima, & notis remitte. Vale. Day. a. d. VII. Id. Nov. C1C1CCLXXV.

EPISTOLA CCCCX.

NICOLAUS HEINSIUS

Gisberto Cupero S. P. D.

Daventriam.

C Olores mihi, fateor, defunt, quibus procrastinationem litterarii officii apud te excusam, Cupere elegantissime. Adeo credibili majora sunt avocamenta, quibus debeo, ne epistolaris commercii partibus defungar apud te tanto tempore. Quid enim exoptatius contingat mihi, quid aut voluptatem aut fructum luculentiorum ferat, quam per litteras tecum colloqui de studiis communibus, quae ut amantur a me tenerrime, utcumque delibata leviter, sic tu regnum in iis possides, & late dominaris, ut certissimos profectus atque emolumentum grande possim mihi hinc polliceri jure optimo. Sed nescio quae fati malignitas tantum in rebus meis potest, ut cum videar supremam quodammodo manum diuturnis hisce, qua rei familiaris, qua fori molestiis jam imposuisse, aliae ex aliis tricae emergant praeter expectationem, ac repentinae suboriantur, cui Hydrae profligandae nec Hercules ipse, credo, suffecerit. Verum desino querelarum, ne qui silentii diuturni culpam deprecari sine ulla circumtione debebam, ad ea confugiam, quae tibi fortasse parum ad rem videantur pertinere, ac longius quaesita esse. Apud me quidem certe eo virtutes tuae sunt loco, ut circumspicienti nihil causae satis legitimae occurrat, ad obtinendam a te veniam delatae scriptionis. Sed omnem negotii odiosi Iliada coram malo ex me intelligas aliquando. Nunc ad Harpocratem tuum venio, quem tuum vere appello. Adeo concinne, erudite, feliciterque omni ex parte in hoc antiquitatis monumento enodando versatus illic appares. Et hoc quoque sensum calamitatis meae auget mihi, quod in ejus lectione non illam exhibere detur animi attentionem, quam scripto eruditionis reconditae perquam pleno debebam. Exemplaria libelli ipsius, cum ad Principem Paderbornensem, tum ad *Carolus Datum*, *Ezech. Spanhemium*, ac *Emericum Bigotium* quae mitti volebas, jam misi: addidi & exemplar de meo, quod *Octavio Falconerio Datus* curaret tradendum. *Scheffero* destinatum exemplar penes me haerere etiamnum pergit, interclusis ob haec bella itineribus terra marique in Septentrionem. Penes me igitur libellus erit asservandus, dum major opportunitas adfulgeat. nam ne Tabellariis quidem nunc satis integrum est ultro citroque commeare. Porro ad Apotheosin Homericam quae annotasti perlegi satis diligenter Vianae nuper, nec quicquam offendi, praeter pauca rei minoris, de quibus aut coram, aut per litteras proxime tecum. Nam meae laudes, quod toto in libro frequentes occurrunt, agnosco beneficentiam tuam singularem, non meum meritum. Caeterum locus ille Statianus de Domitiano *olim dolet altera vinci*, nihil ironicum praese fert, nec credibile laceffitum illum a Papinio Tyrannum

Qui se tam bene vindicare posset.

Capio itaque simpliciter, lauream Poëticam Domitiani lauro Imperatoriae victam concessisse. Tale illud Nasonis in Fastis,

Victaque concessit prisca moneta novae.

Domitianum in juventute studio Poëtico se dedisse complures testantur: hinc illud Martialis ad eundem de Poëtis,

Nos tua cura prior deliciaeque sumus.

Plura conferrem hujus argumenti, si libri essent ad manum. in Petronii loco videri scribendum, *per Mysteria deorum*, non *ministeria* puto significavi jam pridem. Epici enim Poëtae frequentes sunt in consiliis Deorum convocandis, & iis enarrandis, quae Junoni in aurem dicuntur a Jove. Haec Deorum *mysteria* ingens epico carmini ornamentum ferunt, ut & fabulae. Adeo quidem ut Plutarcho Poësis ἀμύθη dicatur ἄψυχον. quare vide ne & in eodem Petronii loco castigandum sit, *per fabulosum sententiarum ornamentum*. Ornamentum contracte festinans scripserat librarius. inde tormentum factum, quod si toleremus nec humane, nec Poëtice sit locutus Arbitrator. Sed de hisce, ut dicebam modo, alias. Imago etiam prope antrum Apollinis, quae basi insistit & manu codicem versat, in Apotheoseos Homericae marmore, quemvis potuis alium, quam Virgilium designat. Itaque delendum id omne, quod aliud agens olim de Marone suggereram. Alibi contextum Graecum allegas libelli a *Jacobo Gothofredo* editi, quem veterem orbis descriptionem ipse nuncupavit. cujus tamen contextus auctoritas est nulla, quod ipsum *Gothofredum* habeat auctorem, qui cum animadvertisset Latina ex *Jureti* membranis a *Salmasio* descripta, e Graeco videri translata, eadem Graece denuo convertit. In eodem marmore virgo illa, quae digitum globo intendit, Uranie videtur. qualis etiam exprimitur apud *Fulvium Ursinum*, in Familiis Romanis gente, quantum recordeor, Pomponia: ubi Musarum omnium habitum, ut ab antiquis est expressus, agnoscas licet. Exstat & penes me magna pars horum gentis Pompejæ numismatum, etiam plura quam exhibentur ab *Ursino*. Sed totam discrepantiam nummorum, puto, etiam *Gorlaeus* in supplemento ad *Ursinum* sic designavit. In statuis denique porticus Justinianæ, praelo jam pridem Typographico descriptis, Musarum imagines occurrunt non paucae. In Propertium quod ausus sum nonnulla a me animadversa tui facere arbitrii, isti confidentiae ut benigniter ignoscas, enixum te in modum obsecro. Tot enim jam annis exulo ab omni lectione veterum scriptorum, ut instituti sit non nisi temerarii atque inconsulti, si velim in hisce litteris supra vulgus infimum me efferre. In explicatione loci illius de *honoratis avis* plus aequo indulgebam mihi, non enim coelum sibi patere voluit Cornelia, quod nimiae esset in femina fiducia, sed eo & perveniri posse ingenti morum merito innuit. Quicquid sit, se dignam tamen statuit, cujus ossa majorum monumento inferri mereantur. Hoc certe voluisse Propertium sum certus, atque eo referendos esse *honoratos avos*. pro *Fruendi* verbo fortassis aliud quid ille dederat, quod quale sit, vix possum nunc divinare. De *pila* non obnitor, uti nec de *generosa veste*. In Herodoto, Nemefiano, Frontino,

tino, Stephano, quae observas litteris posterioribus perplacent omnia, quibus ut reponam non nihil, en Epigramma apud Sueton. Augusto cap. LXX. cujus versum ego primum numquam potui concoquere,

Cum primum istorum conduxit mensa choragum.

Istorum, inquam, hoc loco prorsus inficete, quare opinabar *Histrorum* pro *histrionum*. Hinc *Juppiter Histricus* & similia. *Istorum* primo erat exaratum. Forte & scribendum

Cum mimum Histrorum conduxit mensa chorago:

Octavianus enim Choragus hujus mimi. *Conduxit* ambigue dictum; nam mimi & Histriones conducebantur. sed hîc voluit in unum esse conductos & congregatos. secundus versus videtur referendus ad Legem Malliam, nobis ignotam, ut alias plurimas, per quam frenabatur Histrionum licentia, ne deos ludicris obscoenioribus, praesertim mimis, immiscerent; quod id faceret ad contemptum religionis ac ludibrium. In alia omnia hîc loci interpretes. Versu ultimo malim etiam *tholos* quam *thronos*, quod vocabulum aevo meliore insolentius apud Prudentium demum ac aetatis ejus scriptores est in usu. Per *auratos tholos* Capitolium intellige auratis templorum tholis conspicuum, ut ex omni liquet antiquitate. ipse Capitolinus sedes suas reliquit, conspecto impio illo ludicro. Haec pluribus, non quod pro certis habeam, quae produxi, sed ut veriora abs te eliciam. Hisce jam exaratis, tertias tuas ab apparitore vestro accipio, quando Viana proxime huc contendebam, Observationes & Apotheosim (hanc enim solam per angustias temporis perlegeram) Graevio reddidi. Vale, Hagae. x. Decemb. 1675.

EPISTOLA CCCCXI.

GISBERTUS CUPERUS.

Nicolao Heinsio S. P. D.

Hagam.

Carolum Datum, virum in Etruscis praestantissimum, fato functum esse ex litteris, quas Antonius Magliabequius ad Gronovium dedit, non sine singulari animi maerore intellexi. perspiciebam enim magnum inde graveque damnum ad Remp. Litterariam manare, & dolebam Harpocratem meum, quem tu, Vir Maxime, curaveras, Viro tam diligenter in Antiquitatis studio versanti, redditum non fuisse. Est tamen quod ultimum vulnus leniat, quodque nullam aliam ob causam, ne forte censeas me laudis avidum esse, mitto, quam quia aliquid meas soles esse putare nugas. Scribit idem ille Magliabequius, vir, quantum ex Gronovianis elogiis perspicio, eruditissimus, Magnum Etruriae Ducem, ubi ad eum delatus est, libellum tradidisse sibi perlegendum: ut de eo judicium ferret; seque curas meas probasse, & multis laudibus apud Serenissimum Ducem prosecutum esse. Hanc fortunam expertus est Harpocrates, mihi que illa calcar currenti subdet, ad alia luce donanda, & praecipue,

Tttt 3

Apo-

Apotheosin Homeri; cuius molem cum Typographi caudentur, animus est, simul eam vel a te vel a Clarissimo Graevio recepero, recidendi, quae sine fraude abesse, & in alium librum transferri possunt. Crucem mihi figunt versus Virgiliani *πολυθρύλλητοι*, *Incipe parve puer risu cognoscere matrem* &c. Quae viri praestantissimi, Bembi, Nannii, Josephi & Julii Scaligeri, Turnebi, Politiani, Tristani, & denique Laboratores notant, mihi nondum satisfacere potuerunt. Suspicabar nonnunquam hanc Virgilii mentem esse: *Incipe p. p. risu cognoscere matrem*, id est, ridentem, vel simul ac tibi arridet, quod matres facere solere, ut videant, num infans eas agnoscat, notissimum est, praecipue cum forma insigniores liberi sunt. Sic Juno Vulcano non arrisit, quia erat deformis, uti observat Servius: Incipe igitur puer matrem tuam ex ipso risu, quo tibi blanditur, cognoscere: Nam cum cui parentes non arrisere, vel qui formosus non est, nec Deus dignatus est mensa, nec Dea cubili, id est, non intererit Deorum consortio, ut Ganymedes, quem Jupiter mensae adhibuit, & Adonis, quem Venus cubili dignata est. Sed tu, Vir Magne, qui omnium poetarum genium perspexisti, quid tibi hoc de loco videatur, quaeso doce. Adderem alia, nisi valetudinis tuae curam haberem, cui te restitutum tamen esse gratulor: Vale Davent. a. d. 5. Kal. Apr. *MDCLXXVI*.

E P I S T O L A CCCCXII.

N I C O L A U S H E I N S I U S

Gisberto Cupero.

Daventriam.

IN iis, quas Decembri mense ad te exarabam, si tamen in manus tuas eae pervenerunt, nonnullas eram complexus super locis Petronii Suetoniique obscurioribus observationes, non quod eas ipse calculo meo possim approbare, sed ut a te certiora elicerem, Vir Amplissime. De *mysteriis Deorum* rem suspensam teneamus praestat. Videtur enim & vulgata scriptura posse defendi. *Histrors* lingua Etrusca dictos histriones etiam Livius testatur. *Throni* vocabulum non memini occurrere apud Poetas aevi melioris: vel sic tamen nimium fortassis sim delicatus, qui in *tholos* id mutandum censuerim. In Apotheosi Homeri statuam basi insistentem ante antrum Apollinis opinor esse Pisistrati, optime de Homero meriti, cuius scripta in unum corpus collegit, quod per codicem illum, quem manu tenet, videtur indicari: non enim volumen est, quale in statuis oratorum exhibetur, quo breviora scripta comprehendebantur. Sed haec in transcurso. Super Virgiliano loco, quem postremae tuae tangunt, quid in scriniis meis adnotaverim non satis recordor. Domum reversus excutiam, & si quid conferre possum lucis loco perplexo, non intermittam tuis desideriis id dare. Harpocratis exemplar *Cl. Bigotius* accepit, meque serium rogavit in modum, ne quid intermitterem tibi testatum facere, munus illud fuisse sibi longe acceptissimum. Destinatum etiam *Scheffero* exemplar amico in

in Sueciam perferendum tradidi: quod *Spanhemio* debebatur, missum a me quidem in Britanniam est, sed ipso *Spanhemio* inde profecto, cum Londinum pervenisset, inter domesticos Oratoris nostri direptum esse videtur. Certe ab illo quaesitum inveniri non potest. Quotiescumque compellare me tuis litteris non habebis molestum, Vir Amplissime, eas aut *Graevio* nostro, aut *Elzevirio* curandae permittantur, praesertim absente Illustri viro *Henrico Ter Borghio*: cum enim compellationes tuas & perhonorificas habeam & longe jucundissimas, fraudari me iis tabellariorum incuria, quod non semel jam evenit, ferro molestissime. Vale, & me tui inprimis studiosum solito adfectu complecti, si mereor, perge. Hagae Com. 22. Maji. Gregor. 1676.

EPISTOLA CCCCXIII.

GISBERTUS CUPERUS

Nicolao Heinsio S. P. D.

Hagam.

Vix dici potest, quantopere gavissus sim, postquam ex Amplissimo *Ter Borchio* te, Litterarum fugientium unicum columen, non modo *ἐν περὶ τῆς* intellexi, verum etiam litteras ad me dedisse, quas maximi semper facio, tum quia singulari eruditione semper refertae sunt, egoque nunquam ad eas legendas accedo, quin abeam doctior. Harpocratem sedulo & diligenter curatum esse, habeo gratias, quas possum, maximas, & multis nominibus laetor eum *Bigotio*, viro summo, non displicuisse. Ad Amplissimum *Spanhemium*, simul Noviomagi, quo ex toto nostro orbe Legati confluunt ad pocem inter tot & armis & animis infestis depugnantes Principes fundandam, intellexero esse, aliud exemplar vel mittam, vel ipse feram. *Deorum ministeria* apud Petronium interpretabar de Diis, qui gravibus rebus intervenire & fingebantur & putabantur, qui vel consilia hominibus dabant, vel iis auxilio erant, vel poenas ab iis sumebant &c. quales in carmine Petroniano, quod ad formam praescriptam compositum est, Pluto, Fortuna, Venus, Pallas, Mars, Phoebus, Diana, Hercules, Discordia. *Tormentum sententiarum* non video, quomodo commode explicari possit, quare facile amplector tuum illud *ornamentum*. Versus Anonymi apud Suetonium obscuri semper mihi visi sunt: placet *mimus Histrorum* (quam vocem Valerio Maximo etiam recte restituit Pighius lib. 11. cap. 4.) & vulgatum *istorum* nimis frigidum videtur, ut vel patet ex verbis *coenat adulteria*, quod pantomimorum, uti nosti, vel Histrionum proprium est. pro *Mallia* nonnunquam putavi refingi debere *Manlia*, & referebam ad legem, quam apud Liv. lib. xxxiii. cap. 42. ex emendatione *Sigonii*, cui adsentitur *Gronovius*, tulit P. Manlius de *Epulonibus* creandis. Cum enim Epulones facerent epulare ludorum sacrificium, & coenas proculdubio Diis, qua erant superstitione, apponerent, videri posset & alia huc pertinentia eandem per legem statuta esse; sed nihil certi definitio, in poemate praesertim, ut recte judicas, a non mag-

gni-

gni nominis poëta factō; *tholos* tamen pro *thronos* non displicet, Si quid de intricatis Virgilii versibus certi statuas, communices mecum rogo. Clarissimum *Ryccium* lactor Servio, Grammaticorum facile principi, medicas manus admove, & virum tam eruditum hoc Augeae stabulum purgare animum induxisse. In Bibliotheca hujus urbis publica exstat vulgatus MS. quem prope diem Amplissimus *Ter Borchius*, prout recepit, ad eum mittet. *Gronovius* Priscianum cum perantiquo Codice confert; *Perizonius* aliquid de prænominibus, nominibus, & cognominibus Romanorum molitur, nosti juvenis ingenium, & quam vere eo discipulo gloriari possim. Ego Observationum quinque libros, uti nec paenitendam sexti partem absolvi, qui, ubi ultimam manum recepit, Dissertationem de Actibus & Scenis Terentianis, nec non alias aggregat. Sed cum mihi in Observationibus interdum cum Viris Eruditissimis res sit, unicum locum arbitrii judicique tui faciam. Ex Capite 6. Lib. III. Pomponii Melae Vir Magnus probare conatur *Vectis* insulam etiam in sinu Codano fuisse. Nunquam ego illi sententiae manus dare potui, & neminem Geographorum, quos equidem vidi, veterum inveni, qui idem memoriae mandaverit. Rescribo igitur apud Melam: *Septem Aemodae. contra Germaniam Vecta. In illo sinu, quem Codanum diximus, ex insulis Scandinovia, quam adhuc Teutoni tenent, ut magnitudine alias, ita faecunditate antestat.* Levis tantum additur distinctio, & pro *ex iis* feci *ex insulis*, quod, quia librarii voces fere contrahebant, per *iūs* vel *isls* videtur scriptum, & inde factum esse *iis*. Sed illud *ex iis* si retinemus, sententia erit manca & hiulca. Nam nihil praecedit, ad quod referri possit. Nulla igitur *Vectis* in sinu Codano. Adducitur tamen Ptolemaeus, & pro *Οὔκτις* apud ipsum scribitur *Οὐίκτις*; sed, si dem locum corruptum & ita emendandum esse, nulla tamen ex mente Ptolemaei, erit *Vectis* in sinu Codano. Nam illi haec insula describitur inter *Orcada* promuntorium Scotiae vel Albionis, & insulas *Orcadas*. Vide loca, & si tanti, judica. Alia firmandae opinioni meae addere possem, sed temporis tui rationem habeo. Illud tamen addam, non displicere veterem scripturam, si distinguas: *Septem Aemodae contra Germaniam projectae. & deinde legas. In illo sinu ex insulis Scandinovia.* Rationes reddo in Observationibus, in quibus & aliorum hoc de loco opiniones examino. Vale, Vir Maxime, & me non modo solito amore complecteris, sed saepissime tuis, id est eruditissimis litteris convenias, etiam atque etiam rogo. Dav. pr. Id. Jun. cīcīcclxxvi.

EPISTOLA CCCCXIV.

NICOLAUS HEINSIUS

Gisberto Cupero.

Daventriam.

E Pistolis meis qui pretium abs te nonnullum poni testeris, quas hīc locorum, omni praesidio librorum, omni Musarum contubernio destitutus, so-

solitus sum familiariter atque aliud agendo exarare, nulla eruditionis fruge spectandus, prodis tu quidem, ut semper, cum facilitatem summam, tum singulare mei studium, Vir Amplissime. Nec tamen ita mihi blandior, ut qui in aliis omnibus tibi libentissimus subscribo, hîc manum porrigam. Intellego enim ac capio, mihi crede, quam iners mihi vita fluxerit a prima jam adolescentia, dum aut valetudo interpellans identidem studiis incumbentem, aut peregrinationes assiduæ cum vita aulica ac publicis negotiis concurrentes, aut denique lites annosæ tricaeque forenses cum curis rei familiaris permixtæ, me totum alio convertunt, ac ingratis occupationibus oppressum tenent. Sed isthaec querela non est hujus loci. Cl. Virum *Ezechielem Spanhemium* concilio oratorum apud Noviomagos interfuturum vix est ut rear. Ita quidem fixum sedebat pridem Electori Palatino, verum is sententiam mutasse postmodo ferebatur, nescio quam vere; quo magis indignor Harpocratem tibi atque illi in itinere Britannico periisse. De *Deorum mysteriis* apud Petronium nulla nobis erit disceptatio, cum & ipse de iis dubitem. Suetonium amici nostri dum forte non ita nuper evolvo, epigramma se ingessit mihi, quo coena illa Augusti δωδεκάδεσσι perstringitur. Ejus complura, ipsum praesertim initium obscurum atque mendosum mihi videbatur. nunc gaudeo opinionem meam tuo judicio confirmatam esse. de *Mallia* sive *Manlia*, quod ibi occurrit, (nam haec in codicibus vetustis promiscue, ut scis, confunduntur) subodoratus sum, praeter mentem interpretum, de lege aliqua, in quam convictu illo esset peccatum, intelligi debere. Quid tamen legis hoc esset, omni scriptorum, quos consulerem, copia defectus, haud satis perspiciebam. Tu nunc haerentem hoc in vado expediisti feliciter, dum ostendis ad legem P. Manlii de Epulonibus id esse referendum, ut illius epigrammatis nunc plana ac perspicua sint omnia. *Manliam* pro lege *Manlia* dici non est sine exemplo: sic apud Papinium in Silvis lib. v. protreptico Crispini, ni fallor,

— — Succinctaque judice multo

Surgeret, & castum vibraret Julia fulmen;

legem Juliam de adulteriis designat. In Pompeji loco perdifficili rem acu tetigisse mihi visus es. plura volebam, sed spe per *Graevium* nostrum facta, mox fore, ut ad nos excurras, in congressum nostrum quicquid restabit confabulationis differemus. Vale, 20. Jun. 1676.

EPISTOLA CCCCXV.

G I S B E R T U S C U P E R U S

Nicolao Heinsio S. P. D.

Hagae.

PRaeclantissimus juvenis *Jacobus Perizonius* fidei meae commisit libellos, quos ex bibliotheca Amplissimi *Hogerfii* tibi, Vir Maxime, comparavit. Ceperam initio consilium eos ad te deferendi, sed cum in Aquilonarem, quaeque minis Boreae venti exposita est, Hollandiam excurrere debuerim, ab ea sen-

Tom. II.

V v v v

ten-

tentia depulsus perquam invito sum. Veniam tamen, si modo potero, in complexus tuos; & quia librorum desiderio te suspicabar teneri, omnes *Elzevirio*, quod te iussisse *Perizonius* affirmavit, tradidi, qui recepit se diligenter & summa cum fide eos curaturum. parvo pretio destinavi mihi Onuphrium de R. R. in quo P. Victor & S. Rufus de regionibus Urbis *Scrivarii* manu multis locis correcti & illustrati sunt, ut & C. Plinii Epistolas cum binis MSS. iisque optimis, Oxoniensis Bibliothecae collatas. Auctorem legis Malliae vel Manliae tibi placuisse gaudeo. Sed dum per steriles Velaviae arenas & damnatum erica solum vehor, variaque, ut fieri amat, putarem, Cynthus aurem vellit & admonuit, me nonnulla de Nemesiani fragmento ad te olim misisse. Rescribebam recte, vel te iudice, *circo* pro *cirro*: Verum in explicatione τῷ *Mazonomi* haerebam. Nunc mihi nullum dubium, quin *Mazonomus* sit lancis capacioris genus, in qua escae deferebantur; quo sensu Horatio lib. II. Sat. ult. Varroni lib. de R. R. & Polluci usurpatur; per *ovantem circum* insuper intelligo populum laetum & hilarem, propter epulas a novo Consule vel Praetore illi in Circo sedenti more usitato exhibitas: Vale plurimum, raptim Hor-
nae a. d. xv. Kal. Sept. c1510CLXXVI.

EPISTOLA CCCCXVI.

G I S B E R T U S C U P E R U S

Nicolao Heinſio S. P. D.

Hagam.

EO ipso, quo Amplissimus *Ter Borchius* decessit, die, litteras plenas humanitatis & summae erga me benevolentiae a Clarissimo *Scheffero* accepi, una cum nitido & eleganti libello, *De Tribus Orbibus aureis in Scania repertis*, quo praeter Antiquitates patrias, varia Auctorum loca, in quibus explicandis aqua haeret Eruditis, illustrat. Rogat me iis majorem in modum, ut verbis suis amantissimis te, Vir Maxime, salutarem, & licet post non unas suas (reddo tibi verba ejus) nullum habuerit a te responsum, illud tamen calamitati temporum, & infestis a milite viis adscribit. Provinciam suscepi perlibenter, tum quia commode sese offerebant Legati Ordinum nostrorum, interque eos Amplissimus *Steenbergius*, qui ut intersint digerendis sumptibus belli, Hagam proficiscuntur, tum quia facere non poteram, quin tibi gratias agerem, quod tam diligenter Harpocratem curaveris, eaque opera mihi virum Doctissimum & Borealis plagae decus conciliaveris. Aderat autem epistola pusilla *Rumphii* cujusdam Lingua Belgica exarata, qui me rogat, ut quicquid *Scheffero*, amico communi, destino, ad ipsum mittere velim. Sed cum dubitem, num. hic Ordinum Foederatae Belgicae nomine Holmiae rempublicam curet, numque idem sit, qui Lutetiae Parisiorum Oratori *Borelio* a secretis sit (nam eodem ille nomine erat) doceas me quaeso, commodo quod fiat tuo, quis hic Vir sit, quam personam tueatur, & qua via litterae ad eum tuto deferri possint. Vale,
Dav.

Dav. Kal. Nov. $\epsilon\iota\omicron\iota\epsilon\text{CLXXVI}$. Amplissimum *Ter Borchium* alteras meas tibi reddidisse puto. Vale iterum, Vir maxime, & Cuperum, quod facis, amare perge.

EPISTOLA CCCCXVII.

GISBERTUS CUPERUS

Nicolao Heinsio S. P. D.

Hagam.

Cum pedem domo extuli, & in Batavos profectus sum, nihil quicquam antiquius habebam, quam ut Hagam Comitum excurrerem, & te convenirem. Sed partim amicorum, quorum in potestate eram, agmen, partim *Pluymerus*, qui fidem faciebat te nescio quo profectum esse, me ab hac sententia perquam invitum dejecerunt. Vix dici potest, quam aegre tulerim hominem eum, uti arbitror, deceptum mihi imposuisse, & quanto desiderio expetiverim congressionem nostram. Proponebam mihi ob oculos singularem illam benevolentiam, & non obscura in me studia, eximiam eruditionem, & te facillime varia Apotheoseos loca, in quibus ipse haereo, nova luce perfusurum, meque maximos doctrinae tuae fructus praesentem capturum perspiciebam. Legisti eam, quantum video, Vir Summe, sed quod restat, $\sigma\phi\alpha\lambda\mu\alpha\pi\iota$ mone audacter, & quae punctum tuum ferre non possunt annotata. Caeterum cum soleam aliquid $\phi\iota\lambda\omicron\lambda\omicron\gamma\iota\kappa\omicron\nu$ litteris semper miscere, & auctorum loca ad amicos perscribere, de quorum sensu dubito, veniam dabis, si cum Terentiano Critone antiquum obtineam. Pace igitur quod fiat tua, Ovidii loca aliquot, quae mihi semper obscuriora visa sunt, in medium afferam. Epist. vi. Heroid. vi. 601.

Per tumulos errat passis discincta capillis,

Certaque de tepidis colligit ossa regis.

Vir Magnus rescribit, *curtaque*; sed ego puto vulgatam optimam esse, & veneficas non promiscue omnia cadaverum ossa collegisse, sed habuisse eorum delectum, & elegisse *certa*, quae sc. arbitrabantur plus artem adjuvare potuisse: cur enim non idem in hominibus, quam animalibus observaverint? Medea apud Ovid. lib. vii. Metam. multis rebus, *insuper addit Ora caputque novem cornicis saecula passae*. Epist. xii. vi. 84.

Sed mihi tam faciles unde meosque Deos?

Rescribo, *meisque*, nimirum comitibus, pro quorum salute paulo ante Medeam etiam rogat,

O Virgo, miserere mei, miserere meorum.

Epist. xvi. vi. 25.

Perstet, & ut pelagi, sic pectoris adjuvet aestum;

Deferat in portus & mea vota suos.

Elegantiori sensu videbatur scribendum; *praestet*; ita Epist. praeced. extrema:

Vvvv 2

Sol-

Solve ratem : Venus orta mari mare praestet eunti ; & lib. xi. Metam. vs. 748. praestatque nepotibus aequor. Ep. xx. vs. 206.

Sacra pharetratae cum facis ipsa Deae.

Dicit Ovidius eam non modo adlituisse sacrificio, sed etiam sacrificasse; vel lego; *dum facit ipsa Deae. ipsa enim mater, cui omnia ut narret, paulo ante rogat; matri licet omnia narres; & eam sacrificasse patet ex vs. 93. Epistolae sequentis,*

Dumque parens aras votivo sanguine tingit;

Festaque fumosis ingerit exta focis.

Ead. Epist. vs. 235.

Quod si contigerit, cum jam data signa sonabunt,

Tinctaque votivo —

Conjiciebam rata; non secus ac Ep. xvi. vs. 90. *Regius agnoscor per rata signa puer.* Ead. Ep. vs. 12.

Invenies illic id te spondere, quod opto,

Te potius, Virgo, quam meminisse Deam.

Suspisor scribendum pepigisse; altera lectio fabricata videtur ex vs. 224. Epistolae sequentis; *Et cupies illud non meminisse Deam: sane meminisse in priore versu, qua sum oscitantia, vix capio.* Epist. xxi. vs. 205.

Si mihi lingua foret; tu nostra justius ira,

Qui mihi tendebas retia, dignus eras.

Vir Doctissimus emendat, *si me digna forem*; sed ego arbitror scribendum; *Si mihi digna foret*; nimirum ira. Lib. iii. Amor. Eleg. vi. vs. 103.

Nescio quid spectans, Acheloon & Inachon amnes,

Et potui nomen, Nile, referre tuum.

Sensum horum verborum esse arbitror. Nescio ubi mens mea fuerit occupata, vel quid in animo habuerim, quod tibi, qui es ignobilis & hibernis collectus aquis, narrarem amores Acheloi, Inachi, & Nili fluviorum celeberrimorum, hinc est quod paulo ante dicit:

Factasse indigno nomina tanta pudet.

Vide, Maxime Heinfi, quam egregius ariolator sim, & quam vere illud Ciceronis in me quadret, Qui semel verecundiae fines transgressus est, eum naviter oportere esse impudentem. Neque enim satis habeo epistolam scribere, ejusque lectione seria tua negotia impedire, sed & tot dubia (ni meus mihi stupor imponat) moveo, ut rubore suffundar, quod tibi onus imponere audeam ea examinandi. Sed hos fers benevolentiae, humanitatis & voluntatis, qua Cuperum amplecteris, fructus. Vale, Vir Nobilissime & me amare perge; Davent. a. d. vi. Id. Nov. cicioclxvi.

EPISTOLA CCCCXVIII.

NICOLAUS HEINSIUS

Gisberto Cupero.

Daventriam.

Constantius Rumpsius, de quo scire nonnihil cupis, Vir Amplissime, is ipse est, quem tu suspicaris, mihi a proceribus nostris in aula Suecana successor datus, & per me conciliatus Scheffero. Caeterum voluptate multa me perfudit nuntius perlatus ad hunc ipsum Schefferum libelli tui, quem in Sueciam perferendum Mortanio tradideram. Ad ipsum Schefferum scripsi non semel, quodque misi etiam animadversa magni Scaligeri & mea in Julium Obsequentem jam poene annus est, quae periisse in via invitatus audio; cum ad Rumpsium tamen perlata esse sim certus. Pari fato libellus Viri Clarissimi de tribus orbibus est functus, quem cum ab eo Rumpsius, si quid ipsi credimus, ad me mittendum acceperit jamdudum, miseritque, tamen mihi haud quaquam est redditus. Litteras Scheffero destinatas, si ad me miseris, meis additis explorabo viam, qua Upsaliam perferantur, etsi haud ullam novi fatis certam, nisi forte per fratrem ipsius Rumpsii, qui Principi Arausionensi est a medicina. nec Schefferi Observationes Academicas, aut Lappóniam, aut Obsequentem Julium vidi hactenus. quod si ex te rescierit, multum equidem tibi sum debiturus. In Petroniano loco, pro illis *fabulosum sententiarum ornamentum*, vide ne Arbiter ipse dederit potius, *fabulosum commentum*. Tormentum certe absolum hîc loci videtur. Pro tuis ad Nasonem Observationibus gratias ingentes uti par est, ago. mihi enim inter tricas domesticas jactato jampridem insolitae coeperunt esse hae deliciae. Pleraque certe placuerunt mirifice, quo magis te exhortor, ut saepe mihi laetitias similes apponas. Epistola Acontii vs. 12. *meminisse in pepigisse* ut mutetur parum videtur necesse. volebat enim credi Acontius perjurii poenas Dianam memorem ab illa exigere: hinc ipsa Cydippe initio Epistolae, *utque jubes credi memori te vindicat ira*. sed nec vs. 23. *data signa* videntur sollicitanda. nam tubae usus in sacris: ut Metam. fabula Atalantae, *signa tubae dederant*. Vale. Hagae Com. 22. Novemb. 1676.

EPISTOLA CCCCXIX.

GISBERTUS CUPERUS

Nicolao Heinsio S. P. D.

Hagam.

Est quod serio gaudeam, plerasque conjecturas meas placuisse: explicationem tuam *datorum signorum*, ut & τοῦ meminisse ambabus, quod ajunt, manibus amplector, & irascor mihi ipse, quod verum verborum eorum sensum nullus viderim, quem vel τὸ sonabant, & quod opto me docere potuissent, sed

homo sum. Sunt & alia mihi in Ovidio tuo notata, quae, quia intelligo qualemcunque meam diligentiam tibi non displicere, alio tempore mittam. Nunc ecce tibi quaestionem, ex qua me vix extrico: Notum est temporibus Alexandri Severi Mammaeae filii, floruisse Pisandrum Larandensem. Hic historiam versibus conscripsit libris sex, quibus titulus fuit, *Ἡρακλῶν Ἰστορικῶν Βιβλία* ἕξ, vel *Ἡρακλῆ Ἰστορικά*, non quia Jovis & Junonis tantum nuptias celebrabat, ut video censere *Aemilium Portum* & *Gerbardum Vossium*, sed quia a nuptiis illis incipiebat, & ad suum usque tempus historiam, quae maximam partem fabularis erat, deducebat. Locus hanc in rem elegantissimus & Viris Eruditis omissus, exstat apud Macrobius Lib. v. Sat. Serm. cap. 2. quo docet, quae Virgilius in Aeneidem suam e Graecis transtulerit: *Vel quod eversionem Trojae, cum Sinone suo & equo ligneo caeterisque omnibus, quae librum secundum faciunt, a Pisandro paene ad verbum transcripserit? Qui inter Graecos poetas eminet opere, quod à nuptiis Jovis & Junonis incipiens, universas historias, quae mediis omnibus saeculis, usque ad aetatem ipsius Pisandri contigerunt, in unam seriem coactas redegerit, & unum ex diversis hiatibus temporum corpus effecerit? in quo opere inter historias caeteras interitus quoque Trojae in hunc modum relatus est. Quae fideliter Maro interpretando, fabricatus sibi est Iliacae urbis ruinam.* Vides procul dubio, Amplissime Vir, quid me male habeat; nam si Pisander hic vixit Alexandri Severi tempore, nullo modo Virgilius ex eo libri secundi argumentum sumere potuit. Nec alii tempori hunc auctorem adscribendum esse docebit non modo Suidas in v. *Πείσανδρος*, sed & altero, quo tradit Nestorem patrem ejus sub eodem Impp. floruisse, & scripsisse *Ἰλιάδα λαιπεγάμματος*. Quid igitur dicemus, an Macrobius tam turpiter errasse, & cum ille a Virgilio sua mutuatus sit, putasse Virgilium ab hoc desumpsisse, vel potius Suidam satis oscitanter Larandensi Pisandro tribuisse, quae sunt vel Camiraei, vel alterius incogniti? Extrices me ex hoc aestu, & si quid tibi praeter haec de Pisandro Larandensi, cujus nescio an fragmenta exstant apud Scholiastem Apollonii, compertum sit, significes rogo. Gronovius litteras accepit ab *Anton. Magliabequio*, quibus nomine *Stephani Cosmi* Generalis patrum, vel De' Padri Somaſchi (qualis hic ordo sit ignoro) & Oratoris Serenissimae Venetorum Reip. invitatur ad Litteras nostras publice Patavii docendas, & Clarissimi *Ferrarii*, qui emeritus est, provinciam suscipiendam. Quid decreturus sit nondum satis constat; auguror tamen eum patriam praelaturum Italiae, & gratias acturum illis, qui propensa adeo in eum sunt voluntate. Quas ad *Rumphium* dedi, cures peto. Inclusae illis aliae sunt ad *Schefferum*, cujus Lapponiam, & Lectiones Academicas Amstelodami mihi comparavi, quo magis miror illa te nondum vidisse. Vale, Vir Magne. Dav. Kal. Dec. cicioclxvi.

1 Idem censet Kusterus ad Suidam. vid. & Hygin. Astron. Poët. i. 1. 24.

EPISTOLA CCCCXX.

NICOLAUS HEINSIUS

Gisberto Cupero S. P. D.

Daventriam.

Quas tu ad *Rumpfium* ac *Schefferum* in Sueciam mittendas mihi commisisti, eas ego *Rumphii* ipsius fratri quam primum tradam, ut cum in promptu habebit occasionem opportunam, qua tuto perferantur eae, quo destinatae sunt, hanc ne quid negligat. Nodus ille, quem mihi proponis extricandum plus quam Gordius ac Herculeus videtur. Locum Macrobiani de Pisandro singularem mirum equidem est fuisse neglectum praeteritumque ab iis, qui de Poëtis Graecis ex professo aetate nostra egerunt. Ex eo colligas licet, plures fuisse Pisandros, quorum scripta videantur confundi. Nec credibile est, Macrobianum, qui sua paene omnia transcripsit & mutuatus est a viris sese doctioribus, tam turpiter lapsus esse, ut Pisandrum Larandensem, quem alii omnes Alexandro Severo coetaneum faciunt, Virgilio velit vetustiore. Nec fieri potuit ut is ipse Larandensis, si poema suum exorsus a nuptiis Jovis & Junonis, omnes historias, quae mediis saeculis usque in aetatem suam contigerunt, uno eodemque complexu, tam diffusi argumenti opus, sex libris absolverit. Nam ut Troica omittamus, a nuptiis Veneris & Anchisae, Hesionis & Telamonis, ut Thebaica a Cadmi & Harmoniae copulatu, ut quae Argis ac Sparta perque omnem Achaia gesta sunt ab Inachi temporibus, quaeque Attica in ditione post Aegei & Aethrae nuptias, ne quid altius adscendamus, quam multa gesta sunt alias per civitates perque insulas Graeciae, quorum singula iusto poemati argumentum dederunt. Solas metamorphoses vix xv. voluminibus complexus est Naso. Ut demus tamen numerum esse augendum in libris *Ἡρακλέωνος Περικλέωνος* Pisandri, haerebit tamen difficultas, quâ Maro excidium Trojanum mutuari potuerit e scriptis illius, qui vixit sub tempore Severi Alexandri. Itaque reprimo me. Tu vero, Vir Celeberrime, me doceas velim, qui sint *Apri gausapati* in fragmento coenae Trimalchionis, apud Petronium. *obsonabat apros gausapatos tanquam rex*: cur non apros praetextatos idem nobis apponat? Apud Leidenenses occupantur typographi in describenda Graecia Palmerii. Roma accepi nuper elegantissimam orationem Steph. Gradii, qua parentavit Rasponio Cardinali, ejus denique poema exquisitum, quo eadem patriae suae describit. De *Perizonio* nostro diu est, quod nihil audio. Salveant amici, quaeso, ac in his amplissimus Terborchius, si vobis adest. Hagae Comitum 15. Jan. Grego. 1677.

EPISTOLA CCCCXXI.

GISBERTUS CUPERUS

Nicolao Heinſio S. P. D.

Hagam.

Perlectis ultimis, quas mihi Ampliſſimus *Steenbergius* tradidit, litteris tuis, laetabar nonnullas ſententias meas & emendationes a te probari, eoque magis, quod ostendebas haud ingratum tibi fore, ſi plura Sulmonenſis vatis loca mitterem, de quorum explicatione vel dubitarem, vel quae emendanda cenſerem. Non potui tibi, Vir Maxime, hoc negare, tum quia animus mirabiliter hoc ſtudiorum genere recreatur & refocillatur, tum quia lite vacant aures, & lingua publico docendi munere. Accipe igitur, quae, abitum adornante Ampliſſimo *Ter Borchio*, prout in mentem venerant; chartae illevi. Epist. Heroi. XXI. vſ. 165.

*Projicit ipſe ſuas deduſta fronte coronas,
Spiffaque de nitidis tergit amoma comis.*

Suſpicabar ſcribendum eſſe,

Projicit ipſe ſua deduſtas fronte coronas.

Nam *deducere* eſt aliquid aliunde avellere, quomodo *deducere veſtem* legimus lib. III. vſ. 479. *Metam.* & *deducere corpore febres* apud Horatium lib. I. Ep. 2. Lib. I. Am. El. VIII. vſ. 28.

*Stella tibi oppoſiti nocuit contraria Martis,
Mars abiit: ſigno Venus nunc apta tuo.*

Aliae Editiones exhibent *ſuo*, quod mihi ſolum verum videtur, ut ſenſus ſit; Venus nunc ſtella ſua tibi proſpera praedicat, ſpondetque ex ſententia tibi omnia eventura; & ita *ſigna* pro ſtellis initio Faſtor. libri primi, Lucretii, cui & aether propterea *ſignifer* vocatur, & alibi. Eleg. XIV.

Non anus Aemonia perfida lavit aqua.

Suſpicabar nonnunquam veneficas non modo herbis Theſſalicis, verum etiam ejuſdem regionis aqua uſas eſſe ad veneficia, atque hinc hunc locum eſſe interpretandum. Eleg. IX. lib. II. vſ. 35.

*Fige puer, poſitis nudus tibi praebeor armis,
Hic tibi ſint vires, hic tua dextra facit.*

Cupidinem advocat poëta, eumque audacter hortatur ut feriat: ſed illud *facit* hortantis nequaquam eſt, verum frigidum plane; arbitror ſcribi oportere, *face*, id eſt, fac, ut tibi in meo corpore &c. ſint vires, fac hic ſit tua dextra & fortiter feriat; ita Ep. XII. vſ. 44.

*Producetque virum; dabit & mandata reverti:
Et dicet, Referas iſta face arma Jovi.*

Lib. III. Amor. El. 7.

Aut te trajeſtis Aeaea venefica lanis.

Interpretes, quos vidi, explicant de lanca imagine; ſed mihi videntur *licia* de-

be-

bere intelligi, quorum in incantationibus multus usus, uti patet ex hoc Virgilii Ecl. 8.

*Terna tibi haec primum triplici diversa colore
Licia circumdo.*

Nec non Petroniano isto: *illa de sinu licium protulit varii coloris filis intortum: & trajecta lana mihi est eadem, quae intorta, quia intorquendo trajiciuntur, & sibi invicem junguntur.* Sabinus Ep. 11. vs. 74.

Si modo mens eadem, nec quod sit jam mihi dives

Regia Cecropia non minor arce, movet.

Demophon sibi ait esse regiam non minorem arce Cecropia, quam tamen ipse obtinebat, uti ex epistolae initio patet; deinde Phyllida alloquitur; quare rescribo, *tibi dives* id est, Tu Phyllis es unicum mihi auxilium, si modo eadem tibi, quae olim mens & eadem voluntas, nec te retrahit regia dives, quaeque non minor est Acropoli Athenarum, quam ego teneo. Quid de his minutiis, ut & quaestione nuper posita, unde me vix extrico, vel Pisandro Larrandensi Suidaeque & Macrobiani verbis videatur tibi, Vir Eximie, majorem in modum rogo significes. Arbitror enim ad te meas, quibus junctae erant ad *Rumphium* & *Schefferum* litterae, Clarissimum *Ter Borchium*, cui redditae sunt in itinere & domum reduci, recte, prout affirmavit, curasse, Vale Dav. a. d. xi. Kal. Feb. c1515CLXXVII.

EPISTOLA CCCCXXII.

NICOLAUS HEINSIUS

Gisberto Cupero.

Daventriam.

Proxime copiosas ad te dabam super locis nonnullis Arbitri Petronii male adfectis, Vir Amplissime, nunc ad eas rescribo, quas *Henricus Terborchius*, vir ornatissimus, ex illo mihi tradebat. *Deducta fronte* apud Nasonem Epist. XXI. vs. 165, contrarium videbatur τῶ *subducta fronte, subducto vultu*. postea opinatus sum legi oportere, *adducta fronte*, quae aliis est *frons adstricta*. Nec propterea tamen rejiciendam cenfeo tuam conjecturam de *deductis coronis*. Amoris vii. 28. *signo nunc Venus apta tuo*, pro suo, errorem reor esse typographicum. Eleg. XIV. de *Haemonia aqua* locus est subobscurus, ad quem nonnihil curis secundis annotavi, cujus nunc non recordor, qui ne Nasonem quidem habeo in promptu, adeo primus studiorum impetus in me refrixit. lib. 11. El. ix. 35. legendum, *huc tua dextra facit*. lib. 111. El. vii. in illis verbis, *Aut te trajectis Aeaea Venefica lanis*, multum discrepant vetusta exemplaria, ut in annotatis meis sum testatus, sic tamen ut castigatiora, aut vulgatum tueantur, aut *ranis* agnoscant pro *lanis*. Licia illa, quorum Maro & Petronius meminerunt, ad Magicum Rhombum sunt referenda, nec locum hic habent, deinde *trajectas lanas* pro *intortis* dici posse vix est, ut opiner. Duplex erat defixio magica apud Vete-

Tom. II.

Xxxx

tes,

rēs, unde postea *defigere* pro devovere usurpari coepit. Aut enim acu pungebant imagines laneas cereasve, aut e lino formatas eorum, quas devovendos sibi proponebant, additis incantamentis: aut nomina eorundem descripta nunc in pugillaribus tabellis, nunc in membranis vel laminis plumbeis stilo atroci confodiebant. Atque eo referendus videtur hic Nasonis locus, ac propterea legendum una addita littera, *trajectis lamnis*. nonnunquam & incondita ipsarum devotionem carmina his laminis inscribebant. Quo trahebam ista Apuleji Metam. 111. de *laminis ignorabiliter litteratis*. sed quod praecipue ad rem facit, *Germanici nomen plumbeis tabulis cum insculptum* narrat Tacitus 11. Ann. c. 69. de hac magica defixione est capiendum, quod & ipsum Dio confirmat, ubi Germanici mortem describit, cui sunt *ἐλασμοὶ μολυβδῖνοι ἄρας τίνας μετὰ τῶν ὀνόματ' αὐτῶν ἔχοντες*. verum illic devotiones nominis additae, non defixiones. est & locus Divi Hieronymi de his laminis plumbeis in re magica usitatis, quem in adversariis annotavi. ad defixiones nominis ejusdem Taciti. trahebam *notas atroces* eodem Ann. libro c. 30. *Uni tamen libello, manu Libonis, nominibus Caesarum aut Senatorum additas atroces vel occultas notas accusator arguebat*. nam *occultae* notae ad devotiones videntur esse referendae. vides praecipuum Libonis crimen, de magicis defixionibus devotionibusque, quod pluribus debebant illustrasse interpretes. haec cum ita sint, miror alterum Nasonis locum eadem elegia a *Salmasio* in Solinianis tentatum,

Sagave punicea defixit nomina cera,

Et medium tenues in jecur egit acus.

legit is, inquam, *defixit numina cera*. At Naso uno eodemque disticho defixionem & nominum & imaginum conjunxit. Nam illud *punicea cera* ad pugillares haec esse referenda demonstrat, quae cera rubra ut plurimum illinebantur, ipse noster lib. 1. Eleg. 12.

At tamquam minio penitus medicata rubebas;

Iste color vere sanguinolentus erat.

Sed haec pluribus quam par erat. Sabini Epist. 11. vs. 73. opinor curis secundis a me castigatur, *nec quod sit tam tibi dives Regia*. Vale, Virorum praestantissime, & mihi, ut haecenus, si mereor, favere perge. Hagae Comit. xvi. Febr. Greg. 1677.

P. S. *Trajecta lamna* acui vel stilo nimirum, sic Celsus lib. 14. 14. a quibusdam ad imum acu *trajectum*.

EPISTOLA CCCCXXIII.

G I S B E R T U S C U P E R U S

Nicolao Heinsio S. P. D.

Hagam.

MUltis nominibus me devinctum esse sentio tibi, Vir Amplissime, quod binis iisque longe acceptissimis litteris, quarum alteras *Ter Borchius*, alte-

te-

teras Graevius, licet tardiuscule, curavit, tot praeclaras res ignarum docere, difficillimaque Ovidii, Petronii, Taciti, nec non aliorum Auctorum verba enodare tam εὐσέχως animum induxeris. Perplacent sane omnes conjecturae, & ne quid me vel gratiae vel favori dare putes, liquido jurare possem, nullas unquam me doctiores elegantioresve vidisse. Sed tamen meum illud *deducere fronte coronas* firmat locus elegans apud Petronium, qui *deducere vertice canos* parili ratione dixit;

Haec ait, & tremulo deduxit vertice canos,

Consecuitque genas —

In Petroniano fragmento legebam olim: *hos suum propitiassē dicebat*, nimirum vinum, quo verbo indicare Trimalchionem putabam, se ea liberalitate esse, ut & latraliptae vinum dominicum, id est, optimum biberent & effunderent, at tuum illud, *genium propitiassē*, vix dici potest, quantopere nunc arrideat, maxime quia aliquoties arroganti hac formula Trimalchio utitur. Caeterum cum videam *Rhombum* Radero aliisque exemplo Propertii *rotam* vocari, & orbicularem instar ἐκάπικου fere τροφάλου describi, interrogare libet, nonne mecum, Vir Eximie, sentias, eam *rotam* a Propertio vocari, quia instar rotae circumagebatur, & quadrata non orbiculari forma fuisse. Nam id quod *Rhombus* vocatur proculdubio *Rhombi* vel *Scutulae* figuram habuit, quae qualis fuerit docet nos Fragmenti, quod Censorino additur, Auctor cap. 7. *Scutula id est rhombus, quod latera paria habet, nec angulos rectos similes scutulae*: qualem rhombum manu tenet, si Eruditis Antiquariis credendum, Nemesis in Numismate Juliae Soaemiae a Byzantinis percusso. Dubito etiam num recte alii dicant esse instrumentum Magicum, ex liciis tortis ad conciliandum amorem. Arbitror enim ex aere, cujus plurimus in Magicis usus fuisse, id quod clare docet Theocritus in Pharmaceutria, & eo licia torta, quibus deinde devinciebant homines, uti anus Poliaenum apud Petronium, & maga Daphnidis imaginem apud Virgilium. Apud Arbitrum Petronium legitur vulgo: *Nunc nec quid nec quare in caelum abiit, & Trimalcionis topanta est*. Locus hic admodum vexatus, & Freherus in Parergis scribit, *nescio quem Trimalcioni τὰ πάντα esse: Pontanus ad Macrobiū Hierophanta est; Scioppius in verisimil. Sycophanta est*. Sed quid si reponamus *holopanta*, vel *holophanta*, id est omnia mentiens? Hanc vocem, uti non ignoras, multi Plauto reddunt, eamque ante oculos videtur habuisse Festus, quando *Halopanta* exponit *omnia mentientem*, licet, uti recte Scaligerum & Canterum puto docere, ea vox potius a Plauto propter marinum habitum ficta sit. Quadrat sane valde ὀλοφάντης, quia mox insigne Fortunatae mendacium sequitur. Alibi exstat hic versus,

Divitis haec magni facies erit, omnia cernens

Qui timet, & sicco concoquit ore famem.

Nunquam illa, *omnia cernens qui timet*, concoquere potui, semperque suspicatus sum nihil haec πρὸς Διόνυσον; & longe praeferendam esse lectionem, quae exstat apud Fulgentium lib. 2. Myth. extremo;

— — — *omnia late*

Qui tenet, & sicco.

XXXX 2

Id

Id est, qui amplos agros tenet, & tamen avaritia conflictatur, ita ut nunquam sibi bene esse velit; & elegans est illud *late tenere*; ita *late ingredi* dixit Ovidius Ep. ix. vs. 127. & *late movere sceptrum* lib. iii. Am. El. i. Ibidem praeterea in praecedente versu pro *poma aut pendentia carpit*, scribitur, *nec poma patentia carpit* elegantissimo sensu, quia *res patere* dicuntur, quae obviae & captu faciles sunt, quod miror tot Petronii editores non observasse. *Fabulosum sententiarum tormentum*, de quo olim agere te memini, nescio an defendat *contorta oratio*, *contortiones orationis*, & *Demosthenis fulmina numeris contorta* apud Cicero- nem, Graecorumque oratio κατεσκευαμένη, quae ἐν τοῖς περὶ ὁδοῦ vel *sententiis* cernitur. Epistola iii. Sabini vocula exstat, quae mihi sensum turbare videtur;

Nondum Tyndaridos nomen mihi sederat aure,

Nec cecinit Grajos illa vocare viros.

Antea canit sororem Cassandram, futurorum praesciam, vidisse vel praedixisse amorem Paridis & Helenae;

Adde quod hic satis amor est adjutus, & illum

Praescia venturi viderat ante soror.

Hinc addit illud factum esse, cum nondum Helenae nomen sibi esset cognitum, unde scriberem

Et cecinit Grajos —

Id est, cum nunquam Helenae nomen audivissem, cecinit tamen illa convo- cari Graecos ad repetendam Helenam; inde sequitur, *omnia vera vides*, quod alioquin locum habere nequit, videtur etiam pro illa commodiore sensu posse scribi *bella*. Celeberrimus *Reinesius* pag. 603. Variarum Lect. *Ebonem* numen tutelare Neapolitanorum barbatum humana specie taurino corpore exhiberi in Nummis tradit. Apud *Macrob.* lib. i. cap. 18. Sat. invenio eum barbata spe- cie senilique cultum fuisse, sed ne γὰρ quidem de Tauro. Tu qui plurima in Gallicis, & Italia alibi cimeliarchia lustrasti, quid hujus rei sit doce, & vide nonne potius *Reinesius*, vel *Minotaurum* vel *Fluvium*, qui ita depingi fere solent testibus *Numismatis* apud *Spanhemium*, crediderit esse *Ebonem*. Vale, Vir praestantissime: Dav. a. d. xiv. Kal. Apr. cccclxxvii. Amp'issimus *Ter Borchius* & σεβασμιώτατ. Vogelsangius te amantissimis verbis salutant.

EPISTOLA CCCCXXIV.

GISBERTUS CUPERUS

Nicolao Heinsio S. P. D.

Hagam.

Litteras refertas quaestiunculis minutis etsi non ita pridem ad te, Vir Orna- tissime, dederim, tua tamen summa erga me benevolentia, cujus perpe- tuam memoriam servo, me hortata est, ne amitterem occasionem commodam atque idoneam, & nova σημειώματα, quae felicissime a te interpretando expla- nari posse semper existimavi, ponerem. Cum autem consilium sit, quae de

Re

Re vestiaria, materie, uti nosti, admodum intricata; cum in Apotheosi, tum Observationibus qua editis, qua ineditis, aliisque curis sparsa sunt, in breve corpusculum redigere, specimen & cognoscendi & emendandi causa, ut cum Justino loquar, transmittere volui. Luciani haec verba sunt pag. 699. Editionis Bourdelotianae, in Jove Tragoedo: καὶ πὺς ἐμβάδας, καὶ τοὺς ποδήρεις, χιτῶνας, καὶ χλαμύδας, καὶ χειρίδας; καὶ πορρασερίδια, καὶ σωμαπία: id est, Interprete Vincentio Obsopoeo: *calceos & tunicas ad pedes usque porrectas, & chlamydes & chirothecas, & ventriculos & corpuscula.* Eadem ornamenta Trägica exceptis πορρασερίδις recenset quoque Julius Pollux lib. iv. cap. 18. Onomastici: verum σωματίον vel σωμαπίον ipsi non exponitur *corpusculum*, sed *stola*; καὶ σκευὴ μὲν ἢ τῷ ὑποκριτῶν στολή, ἢ δ' αὐτὴ καὶ σωματεῖον ἐκαλεῖτο: & iterum libro ii. extremo: σωμαπὸν ἢ τῷ ὑποκριτῶν σκευή: videturque ita haec vestis dicta esse, quia totum corpus cingebat & involvebat: πορρασερίδια redduntur *ventriculi*, Minerva itidem, uti arbitror, invita, quia potius fuere ventralia, vel vestimenta brevia, quae ad instar thoracis muniendo ventri tunicae subiciebantur, uti interpretatus *Ferrarius* lib. i. cap. 18. part. i. de Re Vestiaria. Sed quod idem Vir Doctissimus interpretem carpit, quia χειρίδας *chirothecas* vertit, exponitque ipse transposita voce, *tunicas talares manuleatas* lib. iii. cap. 13. part. ii. operis ejusdem, necdum approbare potui. Quin potius suspicor inter tragicum vel scenicum apparatus *chirothecas* etiam fuisse. Sane Semus Eleus Grammaticus apud Suidam in v. Σῆμῳ, *Ithyphallis* tribuit *chirothecas* floridas: οἱ δὲ Ἰθύφαλλοι πορρωπεία μεθυόντων εἶχον, καὶ χειρίδας αἰθινὰς καὶ χιτῶνα μετὰ τῷ σφυρῶν, quod & idem Lexicographus sine nomine auctoris tradit in v. Φαλλοφόροι. Omnibus Tragoedis D. Chrysosthomus Homilia vii. in Epistolam priorem ad Timotheum: πᾶς δὲ χεῖρας καθάπερ οἱ τραγωδοὶ, οὕτω μετ' ἀκρεβείας ἐνδιδύσκουσι, ὥστε νομίζειν πορρωπεφυκέναι μᾶλλον αὐταῖς; *Manus vero sicut Tragoedi tam accurate chirothecis muniunt, (virgines sacrae) ut natura annexas iis existimes.* Nec dubito idem tradere Pollucem loco admodum eleganti, sed Viris Eruditissimis κατὰ τὴν ἐμὴν κρίσιν parum intellecto. Nam postquam loco laudato varia ornamenta Trägica, & cum iis chlamydem chlaenamque recensuisset, addit: Εφαπίς συσσεμμάτιον τι φοινικεὺν ἢ πορρωρεῶν; ὃ περὶ τῶν χεῖρας εἶχον οἱ θηροῦντες: *velamen quoddam phaeniceum purpureumve, quo manibus involvebant milites vel venatores.* Vlietius ad Nemesianum arbitratur ἐφαπίδα fuisse insigne histrionum, quo persona bellica vel venantis agnoscebatur, quale hodie fere milites in brachio etiam alligant: *Scaliger* in Conjectaneis ad Varronem interpretatur chlamydem, quam brachiis circumvolvebant milites, cum scuto carerent. Sed hos refellit ipse Pollux; illum, ne dicam morem hunc apud neminem veterum reperiri, quia non *brachium*, sed χεῖρας vel *manus* nominat; hunc vero, quia Chlamydis & chlaenae jam meminit, nec de iis, tanquam de re parvula, ut indicat συσσεμμάτιον τι, loqui censendus est. Neque tamen ignoro ἐφαπίδα *chlamydem* vel *paludamentum* significare; Nam, ne alios adducam, ita loquitur Eustath. ad Iliad. π. pag. 1056. Ed. Rom. οὐ μὴν δηλαδὴ καὶ καὶ χλαμύδες, αἷς ἐφαπίδας. Φασὶν εἰρηστὴς ὡδὲ τῶν εἰπόντι, οἱ εἶχον πορρωρεῶς ἐφαπ-

πῶς πολλοὶ ἢ καὶ Διαχρύσους ζώνας: Auctor fragmenti, quod laudat anonymus, est Athenaeus, qui libro quinto his verbis utitur in describenda pompa Antiochi regis, & ex quo constat apud Eustathium scribendum esse; Διαχρύσους καὶ ζωαῖς, id est, *paludamenta auro texta, & animalium imaginibus variegata*. Quid igitur? puto ἐφαπῖδα Pollucis fuisse chirothecas, non tales, qualibus hodie politiores vel rustici utuntur, sed fascias & lintea, quibus rota manus, & forte singuli digiti seorsim involvebantur, quaeque chirothecarum loco usurpabantur. Atque hoc est, quod tradit Mulonius apud Stobaeum Sermone primo: Δια' τοῦτο οὐδαμῶς καλὸν οὔτε ἐσθῆσιν πολλαῖς καὶ ασκέπειν τὸ σῶμα, οὔτε ταινίαις καὶ εἰλῇν, οὔτε χεῖρας τε καὶ πόδας περιδέσει πύλων ἢ ὑφασμάων πνῶν μαλακύνει πόδες μὴ νοσοῦντες: *Quare minime honestum est vestitu nimio operire corpus, aut fasciis involvere, aut manus pedesque circumligatis pannis ac linteis quibusdam molles ac languidos reddere, cum morbo non sunt impliciti*. Ut enim ad Pollucem συστρέμματιον, ita apud Stobaeum περιδέσεις, id est, *circumligatio* occurrit, utque pedes fasciis, quas *pedules*, & περιελήμια ποδῶν vocant, involverunt, ita & aliis manus, & quemadmodum dixi, forte digitos singulos. Sed otio & patientia tua, Vir Amplissime, abutor; Vale quapropter quamplurimum, & me, ut facis, amare perge, Dav. Kal. Maji. ciciocclxxvii.

Cum Apparitoris nostri iter nimis diu differatur, hasce commisi tabellario publico. A. D. xv. Kal. Jun. Vale iterum a me & Amplissimo Ter Borchio.

EPISTOLA CCCCXXV.

NICOLAUS HEINSIUS

Gisberto Cupero.

Daventriam.

IN perditis numero illa tempora, quae tibi me subducunt, Gisb. Cupere, Vir eximie, adeo libenter absens utcumque tecum loquor. neque avelli me abs te paterer per ulla occupationes aut curas, nisi jactarer inter eas tricas, quae me ab omni studiorum voluptate nolentem avertunt. Habes & Petronii auctoritatem, fateor, quo tuearis egregie *deductas fronte coronas*. In eodem Petronio quod tibi videantur non infeliciter versari conjecturae meae, quas nuperius proponebam, est sane cur non modice gaudeam. Illud tamen, *in tantum repente risum effusa est, ut timeremus*, non videtur in *Thymelicam* mutandum. Luxatus tamen est locus, ut apud Arbitrum complures, descriptoris vitio, qui dum excerpit inde ea tantummodo, quae ad gustum suum faciunt, truncavit hîc illic sententias ac mutilas reliquit. etiam hîc videtur excidisse *ne rumperetur*, post τὸ *ut timeremus*. de Rhombi forma quadrata ad Theocritum viri eruditi. In altero Petronii loco videtur castigandum. *Nunc haec quid? ne quaere, in coelum abiit, & Trimalchoni τὰ πάντα est. ne quaere* vetus formula, cum caussam rei abs se ignorari testarentur; sic apud Maronem, *ne quaere doceri*. Trimalchioni τὰ πάντα est. sed postea vidi id occupatum a Lipsio 111. Epist. quæst. 2. viden-

dus

us idem ad Vellej. 11. cap. 103. ubi recte reponit loco luxato, *qua ille omnibus omnia fuerit.* Medea apud Nasonem

Deferor amisso regno, patriaque, domoque,

Conjuge, qui nobis omnia solus erat.

in Arbitri versu de divite pridem legebam, *omnia spernens qui timet.* scis Tyrannicum illud, *oderint dum metuant.* poma patentia eleganter legi in Fulgentio pridem observavi. de Tormento statues ut libebit. propono enim tibi conjecturas meas non pro oraculis, sed ut docear meliora. in Sabini Epist. putabam,

Nondum Tyndaridos nomen, mihi sederat aure

Ut cecinit Grajos illa vocare toros.

vocare verbum in vaticiniis frequentissimum apud veteres. hinc toties in Poëtis occurrit *Fata vocant.* Eboris effigies, qualis a *Reinesio* describitur, in nummis antiquis frequens occurrit. apud *Capacium* Historia Neapolitana, quales & ego nonnullos possideo, ni fallor. Ceterum ab humanissimo *Bigotio* litteras habui non ita nuper, qui te salute plurima impertit, cupitque, si fiet quandoque, ut dissertationem de Deo Harpocrate tuam juris facias publici auctiorem, & indagari abs te, cur & quinam *Harpocratiani* dicti a Ptolemaeo de Astrologia lib. 111. cap. 124. *Ερμαφρόδιτοι καὶ οἱ καλεσμένοι Αρποκρατιανοὶ.* Proclus pag. 177. paraphrasi sua eandem scripturam agnoscit, nec interpretatur *Haly* Arabs, & *Cardanus* commentariis suis de hominibus praesagis praesagioque capiunt. sed hi non monstrorum loco haberi possunt, ut, Hermaphroditi. aliis duobus locis idem Ptolemaeus *Ερμαφρόδιτοι καὶ ἄτρητοι.* ubi Proclus explicat, qui sint *ἄτρητοι.* pag. 212. nempe *οἱ μὴ ἔχοντες τρυπήματα καὶ διεξόδους.* pag. 261. eidem *ἀτρυπάνητοι* sunt. *ἄτρητοι* medicis dicuntur, quibus membri virilis non est pervius meatus: pariter idem de feminis. *Ἀρποκρατιανοὶ* igitur censente *Bigotio*, sunt Ptolemaeo dicti, quibus omnis meatus est obstructus, qualem fuisse natum celeberrimum *Fracastorium* ferunt, ita & *Menagius* sentit: *Petitus* vero medicus Parisinus haud incelebris, de iis intelligit, qui pedibus sunt imperfectis mutilisque, qualem Harpocratem fuisse Plutarchus in libello de Iside testatur & Osiride. Vale. Hagae Comit. 16. Maj. 1677.

EPISTOLA CCCCXXVI.

GISBERTUS CUPERUS

Nicolao Heinsio S. P. D.

Hagam.

Quemadmodum & quod judicium meum tibi placuit, & quod tot praeclaras res litteris, quas a. d. xvi. Maji dedisti, doces, serium in modum gaudeo, ita irascor occupationi tuae, quae nos frui non patitur tot doctis eximiisque curis, quas partim, Vir Amplissime, mente reconditas, partim litteris consignatas habes. *Petronianum ne timeremus* olim & mihi placebat, pu-

tabanque commode ea, quae addis vel similia subaudiri, praecipue cum ab ea loquendi ratione nec noster sermo abhorreat; sed tuum illud *ne thymelem crederemus*; ita sensibus meis aridebat, ut probare coactus fuerim. *Ne quaere, τὰ πᾶντα* & reliqua, quae felicissime enodas, perplacent, nisi quod *omnia late qui tenet* videatur efflagitare, & *sicco concoquit ore famem*. Neque enim magis apte divitem avarum describere potuit, neque aliud comparationi Tantali aequae convenit, quia ut ille, licet cibo *pomis*, & potu *aqua*, abundaret, fugacibus cibis eludebatur, quemadmodum loquitur Quintilianus Declam. xii. extrema, ita dives avarus, cujus typus erat, jejuno ore famem tolerare & pati cogebatur, quamvis latissimos ditissimosque fundos teneret. Quin & τὸ *cernens*, id quod postea in mentem venit, non omnino a re, quae agitur, alienum videtur. Nam *Περβολικῶς* divitem describit, qui quocunque oculos flectebat, agros suos possessionesque videbat. In Sabini versu gaudeo & me vidisse illud *nec* otiosum esse. Caesaris Capacii Historia Neapolitana careo, adeo ut eam consulere non potuerim, frustra quoque opinatus sim Eruditissimum *Reinesium* errasse. Quae autem praestantissimus *Bigotius* misit, vix dici potest quantum arrideant. Sed quod existimare videris me viro tam diligenter in Antiquitatis studio versato perspicaciorem esse, aut quid ulterius conari posse, erras, Maxime Heinzi. Nihil enim verius divina ipsius interpretatione, longeque alteri, quam *Petitus* dedit, praefenda. Fateor quidem & doceo in libello meo, ex Plutarchi libro de Iside & Osiride, *Harpocratem* pedibus debilem fuisse, sed quia os occlusum Deus ille habere fingitur, crediderim *Harpocratianos* optimo jure vocari eos, qui ita nati sunt, idque eo magis, quia debilitas pedum inter partus monstrosos, de quibus agunt Ptolomaeus & Proclus, quod equidem sciam, non numeratur. Verum en tibi monstrum vocabuli, quod exstat in Interpretatione Ptolomaei Latina, quae Julio Firmico subjungitur. *Si Jupiter aut Venus testificetur, nati proprietas, quo fuerit illa mutatio, erit ut honoretur & sublimetur*, eo quod ex hoc illa figura *Armasorodhotis* (in Margine, ut vulgo vocant, *Hermaphroditus*) continget, id est figura ex *Venere* & *Mercurio* denominata, nec non figura, quae nuncupatur *Arfocarazietu*, & his similia. Haec vox proculdubio eisdem designat, quos Ptolemaeus *Ἀρποκραπιανούς*, & paullo aliter Proclus *Ἀρποκραπικους* appellant, sed quæ interpreti in mentem venire potuerit etiamnum quaero. Praeterea in editione mea Procli (est autem *Leonis Allatii*) ii, quibus virile vel muliebre membrum non est pervium (qualem describit Jul. Obsequens, *Puer ex ancilla natus sine foramine naturae, qua humor emittitur*.) non ἀτρυπάνητι, verum ἀτρυπητι, licet res eodem recidat, vocantur. Sed age quoniam in eo sumus, ut Harpocrates meus illustretur, locum rogo Arnobii, qui commodissime interferi potest, expendas. Exstat is lib. vi. *Inter Deos videmus vestros Leonis torvissimam faciem mero oblitam minio, & de nomine Frugiferi nuncupari*. Laurentius Pignorius & Elmenhorstius arbitrantur auctorem loqui de Deo, qui capite leonino, qualem exhibet Tabula Isiaca, describuntque Minutius Felix, & Tertullianus, colebatur. Damnat hoc, modo in hanc, modo in illam partem sese torquens, nihilque certi statuens *Desiderius*
He-

Heraldus, & tandem pro *Frugiferi* (quod nec alii exponunt) rescribit, *truci feræ*. Rationes Viri Doctissimi non examinabo, ne videar aliorum erroribus operose redarguendis gloriam aucupari, iisque similis existimer, qui nomen sibi acquirunt aliena de eruditione delibando. Vel igitur describitur homo facie leonina, vel leo animal, quo Solem Graeci, Romani, Aegyptii, alique, licet male neget *Heraldus*, exprimebant; atque ex ea superstitione totus locus interpretandus est. Hinc puto faciem ejus *minio* impleri solere, ut rubrum Solis colorem igneosque radios referret, & eandem ob causam apud Achaeos Bacchi statuam Cinnabari inunctam fuisse teste Pausania lib. vii. Hinc & *frugiferum* nominari, quia Sol frugum parens, fecunditatisque praecipua causa & scaturigo est. Atque ita in Albinum Numismatis Mercurius radiatus, Solis insigne, occurrit cum Inscriptione *Saeculo Frugifero*: & Statius lib. i. Thebaidos Osirim, sive Solem, *Frugiferum* nominat. Verum quod caput epistolae esse debuerat, quodque pene praeterieram, gratias & tibi & Amplissimo *Bigotio*, quem rogo meis verbis & peramanter & perofficiose salutes, ago habeoque maximas, quod tam erudita me docueritis, enixeque rogo, ut conatus meos semper juvare velit. Litteras, quas ipsis Kal. Maji scripsi, quibusque Luciani verba & rem vestiariam illustrare conor, tibi redditas esse confido: Vale plurimum, virorum & amicorum summe, atque ab Amplissimo *Ter Borchio* salve. Dav. a. d. iiii. Id. Jul. cicioclxvii.

EPISTOLA CCCCXXVII.

NICOLAUS HEINSIUS

*Gisberto Cupero.**Daventriam.*

Non satis habeo compertum, Vir Amplissime, idemque eruditissime, sintne perlatae in manus tuas, quas Majo mense, non ita nuper decurso, exarare memini, quamquam perlatas esse augurari licet. Nec multo post tradebantur mihi, quas ipsis ejusdem mensis Kalendis ad me dederas, multa arcanæ reconditæque antiquitatis fruge instructas luculentis modis. quibus etsi nihil poteram reponere opportunius, quam assensum tacitum ac religiosam industriæ tuæ admirationem, ipsa tamen humanitatis lex postulabat, ne ad eas tanta provocatus eruditione tantaque elegantia inurbanum prorsus in modum tanto silerem tempore. Sed is rerum mearum status fuit hac aestate, idque vitae fluctuantis genus instabile, ut, mutata frequenter sede nullas admiserim occupationes, nisi quae ab oblectamenti litterariis me removerent. In posterum dabitur meliora forsân sperare, cum molestiarum partem potissimam jam profligarim, quae res etsi desideriis meis plenius respondebit, dubitare non debes, quin litterae frequentiores tibi a me sint expectandae, & commercium mutuae scriptionis epistolicum inter nos frigere non sinant. Nunc hîc a *Rumpfio* habes, qui tuas, quas per me ad Cl. *Schefferum* curatas voluisti, Holmiam

Tom. II.

Yyy

re-

recte perlatas esse nuntiat. Vale cum Amplissime *Borchio*, *Perizonioque*, ac amicis caeteris. Hagae Comit. 1677. xxi. Septembris Gregor.

EPISTOLA CCCCXXVIII.

NICOLAUS HEINSIUS

Gisberto Cupero S. P. D.

Daventriam.

Quas Quinctili mense perferendas ad me dedisti Leidensi via, earum Octobri demum proximo compos sum factus, nulla *Ryckii* nostri culpa, sed illius, cui eas permisisti curandas. Ex illo morbus habuit me exercitum, qui cum ne nunc quidem prorsus abigi se patiatur, haud inique, spero, feres, pro caetera tua indulgentia ac morum facilitate, si breviter tecum agam. de loco Petroniano, *omnia late qui tenet* amplius a me cogitabitur. De *Harporatiacis* sententiam tuam diu est, quod aperui Cl. *Bigotio*. sed is pridem non scribit, totus in moerore ob ereptum fratrem, quem luget inconsolabiliter, ut colligo ex Menagianis litteris. Locus Arnobii lib. vi. plurimum me exercuit aliquando, quem membranae regiae sic exhibent. *Inter Deos videmus vestros Leones novissimam faciem mero oblita minio. Et de nomine frug. . . serio nuncupari.* ita, inquam, codex Regius, qui unicus Arnobium conservavit. Ejus enim excerpta cum editione Heraldina accurate collata a *Salmasio* penes me sunt. Hinc aliquando videbatur scribi debere. *Inter Deos videmus vestros leones torvissimam faciem mero oblitos minio, Deae nomine Frugiae fere nuncupari. Vel, de Dominae Frugiae imperio nuncupari. Leones mutari in leonis nil necesse.* nam Cybele aut Leoni insidens, aut curru binis juncto leonibus insidens exprimitur in nummis & marmoribus antiquis. *Dea Frugia* Cybele per Archaismum Arnobio familiarem, ut *Dea Suria* Venus in antiquis marmoribus. sic & *Aegyptus* in nummis Augusti. *Frugia* pro *Phrygia* etiam in veterrimis Maronis membranis offendi, ut *cumba* pro *cymba*, & *Cumaea* proles &c. *Frugiferio* pro *Phrygio imperio* ita codex illic peccat non semper. *Ferio* pro *perio*, id pro *imperio*. Vale. Kal. Decemb. 1677. Hagae Comit.

EPISTOLA CCCCXXIX.

GISBERTUS CUPERUS

Nicolao Heinsio S. P. D.

Hagam.

Nihil est, Virorum Maxime, quod literarum tuarum, quae mihi semper sunt acceptissimae, moram excuses; cum quia certior factus eram tarde admodum Juvenem, quas ipsius fidei commiseram, ad praestantissimum *Ryckium* curasse, tum quia ex *Gronovio* non sine singulari animi dolore intellexeram,

ram, te difficillimo corporis morbo laborare, & occupatam tricis molestiisque forensibus vitam agere. Sed est quod serium in modum & meo & Reipublicae literariae, quae tot praeclaros ex te percipit quotidie fructus, nomine laeter, sanitati te & integritati restitui, speroque *δωτῆρα εἶδον* eam propediem incorruptam largiturum. Valde me oblectavit Illustrissimi pariter & Doctissimi Avunculi tui imago, eaque vehementissime ad Eruditionem accensus fui. Et veniebant commode in mentem, quae τὸ ἐν αἰγίοις Gronovium memini familiari colloquio mihi narrare; Nobilissimum scilicet Transilvaniae decus *Schelium*, cum, postquam ex ephebis excesserat, haereret quam viam in evolvendis antiquis auctoribus sequeretur, perlectis diligenter *Variis* & tanta doctrina refertis Avunculi tui *Lectiōibus*, eam instituisse, qua in magnum virum evasit, & ad summum Eruditionis culmen, ni morte acerba ereptus nobis foret, pervenisset. Recte igitur facis, si persuasissimum habes, admodum gratum & acceptum munus fuisse, meque illud dum una cum Epigrammate inspicio & admirror, nihil aliud optare, quam ut & tuos, Nobilissime Heinsi, vultus aeri incidi jubeas, ut ea via cum libris Europam peragrarē, atque in bibliothecis juxta avunculum dedicari possint. Quas ad me dedit Doctissimus *Schefferus*, diligenter curatae sunt, sed cum eas, simul recepi, petierit legendas *Ter Borchius*, & adhuc servet, nondum respondere potui. Scilicet affligitur magnus ille vir mortifero & desperato fere morbo, nique Deus benignus adsit, conclamatum est de columine Patriae, legum, libertatis. Quid quaeris? Aquae intercutis metus, sine lacrymis haec non scribo, intestini dolores & cruciatus, continuata per plusquam x. hebdomadas, nisi quod brevissima nonnunquam requie refocilletur, insomnia parum nobis spei reliquae, & quae ratio ineunda sit ut nesciamus faciunt. Si superstes, quod utinam faxit ὁ κύριος! manet, non nisi longinquitate grave hoc malum removeri atque depelli posse οἱ ἰατροὶ πείθονται, qui non desperant, uno ore affirmant. Quartum mearum Observationum librum, simul exierit, ad te deferendum curabo; inde Apotheosi novas quasi manus adhibebo, atque ad eam non modo ut alienum opus accedam, sed ex parente fiam Areopagita. Gratias habeo quod miseris excerpta Salmasiana, & locus ille forte majorem requirit, licet non displiceant conjecturae tuae, medicinam. Nunc, qua es facilitate, doce me, quid sibi velit, *aris altaria imponere*, cujus phraeos mentio apud Quintil. Decl. xii. *Transseo tormenta nostrae inopiae, maciem corporis, vulsos terra destriictosque ramis cibos, quod aris altaria non imposuimus, quod populus corporibus suis vias stravit, quod mendicus quem roga- ret non habuit*: An intelligit partem arae, quam Scaliger ad Manilium scribit vocari altare, quaeque arae imponebatur, & a Graecis Ἰνσάρμενς exponitur; qualia etiam his verbis prodit Turnebus in Adv. *Ejus superficies, in qua prunae collocantur, dicitur καυτήρ. Basis altaris τὸ Ἰνίμπορον, supra καυτῆρα est βασις*, id est, *Altar, locus ipse prunarum*? an vero ipsa libamina, vel, quae ab altaribus continentur, vel, quae in altaria funduntur, uti ad Ecl. v. viii. & lib. xii. Aen. ubi poeta canit, *paterisque altaria libant*, observat Servius? adeo ut significant cives Legatum apud Quintilianum accusantes, tantam fuisse inopiam, ut nihil

esset, quod aris imponere & diis sacrificare possent. Nam & eo sensu usurpare videtur Lucanus lib. III. vf. 404.

Hunc non ruricolae Panes, nemorumque potentes

Silvani, Nymphaeque tenent, sed barbara ritu

Sacra Deum, structae Diris altaribus arae.

Grotiana tamen editio nescio quibus auctoribus MSS. *structae sacris feralibus arae* exhibet; sed altera lectio nihil difficultatis in se involvit, si per *altaria* intelligere licet res illas, quae aris imponuntur, quibusque struuntur, id est, altiores fiunt, quomodo *struere mensas* & similia dicimus. Me, quaeso, his difficultatibus libera, & quis sensus verborum Quintiliani, Virgilii, Lucani sit, edoce; Vir Magne; Davent. a. d. IV. Non. Decemb. CIOIOCLXXVII. *Ter Borchius* melius se habere incipit, & nocte, quae diem Martis excepit, placide quievit. Morbum celatum cupit, rogoque ne eum divulges: Valciterum a. d. VIII. Id. Decemb. CIOIOCLXXVII.

EPISTOLA CCCCXXX.

NICOLAUS HEINSIUS

Gisberto Cupero..

Daventriam.

DEcembri mense relictis turbis aulicis ac forensibus castra huc transtuli, valetudini prostratae levamen hîc quaesiturus a solitudine. sed praeter animi sententiam spemque conceptam ratio instituti hujus me immane quantum est frustrata. Vides silentii diuturnioris causas, eo molestiores mihi, quod literis tuis longe facundissimis ut tempestive responderem haud quaquam permiserunt. Has constitutus inter angustias, nihil curas meas aequè intendit, ac morbus optimi ac humanissimi *Terborchii*, quem tamen nunc evasisse discrimen omne vitae fert noster *Graevius*, identidem super capitis tam cari rebus ac statu dubio a me consultus. Hirundinum proximarum adventum illi salutarem fore confido, ac si quid residet mali profligaturum. Distinxisse veteres inter *aras* & *altaria* recte vidisti, emendato & Lucani hanc in rem feliciter loco ad Apotheosim Homeri, quem & ego pari modo e membranarum antiquissimis asserere memini ad illa Maronis in *Bucolicis*,

— — *En quattuor aras*

Ecce tuas tibi Daphni, duas altaria Phoebò:

Haec enim vera illius loci scriptura est, quam meliores membranae illic adstruunt, & ego compluribus veterum Poëtarum exemplis confirmavi in observationibus ad Maronem meis. Maroniani loci castigationem etiam a Servio cognitam ex interpretamento ejus satis apparet, etsi locus illè est interpolatus. Idem Servius nos docet *aras* & *altaria* dici solere, quae diis superis dedicabantur, *aras* tantum, quae Diis inferis erant sacrae. Ergo *Altaria* pro superficie ararum. nam diis inferis fiebat in depressa scrobe, quae tamen *ara* diceretur. *Aras* & *altaria*

taria Maronis & Lucani exemplo, conjungunt Lucretius, Prudentius, Plinius in naturali Historia non semel, quorum loca longum sit huc transferre. Arnobianum locum, de quo nuperius inter nos actum est, a *Salmasio* quoque ad Historiam Augustam tentari video. librum quartum Observationum tuarum jam prolatum in lucem, ut ferunt, percipio excutere. Vale, vir Celeberrime cum amicis communibus. Vianae 23. Febr. 1678.

EPISTOLA CCCCXXXI.

GISBERTUS CUPERUS

Nicolao Heinſio S. P. D.

Vianam.

Quam elapſi anni menſe ultimo dedi, recte curatam eſſe, atque inde te intellexiſſe quas menti meae tenebras offuderint *ſuſtae diris altaribus arae*, nec non *aris altaria imponere*, credo, Ampliſſime Heinſi. Has rogo, namque potes, nebulas pelle; & quid ſibi inſolitae plane oratoris diſerti, & Poëtae numeroſi loquendi formulae velint, quod commodo fiat, doce. Nunc mitto novum Observationum corpusculum, quod vix dubito quin ſtomachi tui futurum ſit, quia omnia mea, qua es humanitate, probare ſoles. Inſerui literas, quibus loca nonnulla Conſolationis ad Liviam explicavi, illudque meum conſilium te probaturum conſido. Exemplaria deſtinata Nobiliſſimis viris *Bigotio*, *Huetio*, *Menagio*, *Magliabequio*, *Rumphio* & *Scheffero*, ſerium in modum rogo, ut, ſi patitur bellorum tempeſtas, ſimulque ac *δύναλον* erit, curare velis. Ampliſſimus *Ter Borchius* valetudinem experitur proſperam, & ſanitati atque integritati redditus eſt, nihilque exitum ejus moratur, niſi pedum levis imbecillitas; Deus faxit, ut ſuperſtes diu patriae, amicis, tibi mihiſque ſit: Vale, Dav. a. d. ix. Kal. Mart. ciciocclxxviii.

Literas has cum Hagam mittere vellem, ecce mihi peropportune tuae redduntur; atque ex illis intelligo, te Vianae ad Leccam agere, & doccor *ararum* & *altarium* diſtinctionem, quae & mihi ad Apotheoſin obſervata, quamque, vel ſacra *Ἱερὸθεῖα*, ut Graeci loquuntur, potius pluribus illuſtro in retractatis Observationibus; ſed male me habebat praecipue Quintiliani illud, *Aris altaria imponere*; quod, ut verum fatear, necdum ſatis capio. Accipe nunc mendum, niſi me plane fallò, ex Juliano, quem hoc ipſo tempore obiter inſpiciebam, ſublatus: ita loquitur Orat. v. p. 315. *Τέμνεσθαι γὰρ Φασὶ τὸ ἱερὸν δένδρον καθ' ἣν ἡμέραν ὁ Ἡλιος ἐπὶ τὸ ἄκρον τῆς ἰσημερίας ἀΐδεται ἔρχεται. εἴθ' ἐξῆς. περικταλισμὸς ἐξυλασβάνεται. τῇ τελευτῇ δὲ τέμνεται τὸ ἱερὸν καὶ ἀπορρήιον θείον τοῦ Θεοῦ Γάλλου*: id eſt, Interprete Petavio: *Etenim ſacram arborem ſuccidi illo ipſo die ferunt, quo Sol ſupremam aequinoctiorum apſidem attigit. Altero die tubarum clangore perſtrepunt. Tertio ſacra & arcana Dei Galli meſſis putatur*: Sed ego reſcribo *μέμβρον*, quomodo membrum, quo viri ſumus, Graeci vocabant, cujuſque exciſionem eo die ante Hilaria celebratam fuiſſe non modo ex pag. 317.

sed etiam ex Calendario a Lambecio in Bibliotheca Vindebonensi edito constat: xi. Kal. Apr. Arbor. intrat. x. Tubilustrium: ix. Sanguen, Dies Aegyptiacus: viii. Hilaria vii. Requietio: vi. Lavatio. Quae optime cum Juliani verbis conveniunt, in quibus & mox *Hilariorum* mentio occurrit. per *sanguen* autem intelligo abscissionem, quae sine sanguinis missione fieri non poterat; sed quis sit *Dies Aegyptiacus* plane ignoro; & tu proculdubio, praestantissime Virorum, optime docebis: Vale iterum; a. d. v. Kal. Apr. Sed, quod pene praeterieram, ita est, *Salmasius* ad Flavium Vopiscum vulgatam Arnobii lectionem retinet, & parum vel nihil abit a mea interpretatione, nisi quod Mithram describi putet, cujus simulacrum facie leonina effingebant, cum tiara: at jurato crede, me te monitore hoc primum discere, nec ante scivisse *Salmasianam* explicationem,

Exemplaria mittenda *Huetio* & *Scheffero*, continentur fasciculis destinatis *Bigotio* & *Rumphio*. Mitto simul binos libellos, quibus barbaries Philosophi nostri impugnatur.

EPISTOLA CCCCXXXII.

NICOLAUS HEINSIUS

Gisberto Cupero S. P. D.

Daventriam.

Quamquam debita gratiarum actione serius apud te nunc defungar, promisso non ita nuper Observationum tuarum musteo atque exquisitissimo libello, non intermisi tamen, Cupere Clarissime, oculis haurire totum avidissimis, simul is ad me perlatus est. nam dilati hactenus officii partim valetudo est in causa, partim & spes, quae adfulgebat, quando libelli facta mihi primum est copia, mox fore ut lucubratiuncula mea, etsi pertenuis nec ad tuae munificentiae splendorem accedente, te remunerarem. Verum subitanea *Elzevirii* profectio in Britannos, quae praeter expectationem intervenit, opusculi editionem moratur, publico exhibendam tamen, si quid augurari licet, ante decursum mensis proximi. Eidem profectioni refero acceptum, quod exemplaria libelli in Galliam atque in Sueciam abs te destinata, eo mitti nondum potuere, quod *Elzevirii* opera hinc mihi imploranda, quae in hisce talibus adhiberi a me soleat, quod alium non habeam Amstelodami majori familiarite mihi conjunctum. Quid vero nunc dicam de singulari voluptate, qua perfusum me sensi evoluta Observationum tuarum volumine. Eam certe si coner verbis adaequare, oratio & dies me deficient. Atque utinam ejusdem argumenti reliqua, quae in scriniis tuis delitescunt, publice donata quamprimum videam. Neque enim dubitari potest, quin gloriae plurimum inde accessurum sit tibi. De aris, & altaribus si vera sunt, quae Servius prodit, superorum tantum esse, aras & inferorum, videtur inde colligi posse, aras nunquam poni pro sacrificii solo sive fundo, altaria pro superficie aris imposita,

sita, five ea ex cespite strueretur, five e lapide. *Solum* autem si in scrobem efoderetur, ut in sacris inferis solebat, nihilominus retinuisse nomen *arae*, quam sic *altare* non potuisse dici, originatio vocum tibi satis evincet. in Juliano pulcherrime μέγ@ restituisti. Vale, 18. April. 1678.

EPISTOLA CCCCXXXIII.

GISBERTUS CUPERUS

Nicolao Heinſio S. P. D.

Vianam.

NEc tui mandati, nec officii fui oblitus est *Elzevirius*, misitque ante sex vel septem hebdomadas una cum litteris tuis Virgilium a mendis, quibus defoedatus erat, repurgatum, ornatumque eruditissimo pariter & elegantissimo carmine, quod cum omni antiquitate certare si affirmo, cave existimes me auribus dare quicquam; quodque Christianissimo Rege dignum est, quia ut Maximus ille Regibus, ita tu poëtis reliquis facile praeripis palmam, Heinſi Nobilissime. Utinam cum valetudine bona fide in gratiam redeas, animumque Eruditorum omnium expleas notis Virgilianis, & tot doctas res, quas ejusmodi cura secum trahit, doceas nos ignaros tandem aliquando! Votis meis, spero, Deus annuet, tibi que viridem vegetamque tribuet senectutem, nec patietur, qua est pietate, Virum, a quo tot praeclara in Rempública Litterariam commoda profecta sunt, & quotidie proficiscuntur, perpetuo quasi morbo conflictari. Sed tamen *Elzevirius* unum tantum ad me misit exemplar, parsque mandati ejus videtur excidisse memoria; unde etiam factum est, ut eruditissimus *Perizonius*, cujus tres dissertationes, quarum una ritus Judaeae gentis, altera legem Voconiam, ultima nummos illustrat, hîc describuntur typis, illud a me nondum tulerit. Quod autem non responderim continuo, tibi que meritas pro munere gratias egerim, fecit patris mei matura quidem, erat enim septuagenario major, attamen acerba mors; meque illa coëgit per tres fere menses abesse domo, atque in agro Batavo, cui Superiori nomen, vitam transigere. Nosti alioquin me exercere commercia litterarum libentissime & nihil habere prius, quam officiose colere eruditos, eorumque & praecipue ad tuas explicationes, Heinſi Amplissime, veluti totidem, absit dicto invidia, oracula decurrere. Et fane, ut nunc est, multa mihi suppetunt, de quibus tecum confabulari cupio vehementer; sed cum valetudinis tuae habeam rationem, mittam tantummodo quae mea sit sententia de *interiore*, id est sinisteriore, rota Circi, & *interiore* id est dexteriore homine ambulante; quae omnia quamquam nec tu ignores, vel sic juvabit intelligere, te vel idem mecum sentire, vel docere, namque potes, velle meliora. Igitur *interior*, qui incedit ad dextram est, *exterior* ad sinistram manum, uti ex Ovidii Fastis, Horatiique Satyris recte docuerunt *Lipſius*, *Torrentius*, & *Caſtalius*. At in circo aliter se res habet, ibique *interior* rota est sinistra, *interius* flectere ad sinistram; putoque male

male *Turnebum* & *Lipsum* commentari dextrum equum interiore gyro flexisse, laevum exteriore, equumque sinistram ampliorem lustrasse orbem, quam dextrum, cum omnia potius contraria sint. Nam quia incipiebant a circi dextra parte committere ludos, necessario sequitur, sinistram currus rotam propiorem fuisse metae, quae ad sinistram erat aurigantis, simulque sinistram equum non tantum spatii in flectendo fecisse circa metas, quam dextrum. Hoc est quod Ovidius tuus canit lib. III. Amor. El. 2.

Et modo lora dabo; modo verberare terga notabo:

Et stringam metas interiore rota.

Silius Italicus lib. XVI.

Sed laevo interior stringebat tramite metam.

Et ad Circi ludos clare respiciens Maro itidem tuus Lib. v. Aeneidos,

Ille inter navemque Gyae, scopulosque sonantes

Radit iter laevum interior —

Rurfus vs. 202.

Namque furens animi, dum proram ad saxa suburget

Interior, spatioque subit Sergestus iniquo.

id est, Sinisterior, uti recte explicat Servius, quanquam *Lipsius*, & *Vossius* in Harmonia Evangelica culpent eum, quia omnino interior est dexterior. Scilicet Viri Eruditione praestantes confundunt circum & homines, nec animum advorterunt aliam rationem esse aurigantium, aliam deambulantium; cuius meae opinionis rationes dare conabor. Illa proculdubio res dicitur interior prima significatione, quae est inter duas, vel certe aliis undique inclusa; cum igitur equus sinister medius fuerit inter metas vel spinam circi & equum dextrum, non secus ac rota sinistra media inter easdem metas & rotam alteram, recte & equus & rota interior vocatur, quippe qui ambo inter duo erant constituti. Firmat hanc meam conjecturam mirum quantum Virgilius, quando canit Cloanthi navem inter navem Gyae. (finge fuisse equum dextrum) & scopulos (fuerint illi metae) interior, id est sinisteriorem, rasisse iter laevum. Atque inde extra circum in jungendis equis aliisve animalibus non aliter locuti sunt: Varro lib. IV. de L. L. *Oppida condebant in Latium Etrusco ritu multa, id est, junctis bobus, tauro & vacca interiore*, id est, sinisteriore: nam dextrum latus tauro tribuit diserte Servius, vaccamque intrinsecus similiter junctam scribit, ad Lib. v. Aen. *Condituri enim civitates, taurum in dextra, Vaccam intrinsecus* jungebant. Imo ad alia quoque transfertur haec loquendi forma, & intus canere dicuntur citharistae, id est manu sinistra: Ascon. Act. III. in Verrem: *Cum canunt citharistae utriusque manus funguntur officio. dextra plectro utitur: & hoc est foris canere. sinistra digitis chordas carpit, & hoc est intus canere: mox; Difficile autem quod Aspendius citharista faciebat, ut non uteretur cantu* (id est inter canendum) *utraque manu, sed omnia, id est universam cantionem, intus & sinistra tantum manu complecteretur.* Sed quae tandem erit ratio cur homo, qui ad dextram est, interior contrario plane sensu vocetur? tacent Viri eruditi & fluctuant, ego autem sic existimo. Tribus ambulantiis, medius proculdubio erat inter duos at-

que

que adeo *interior*; eo, qui ad medii dextram erat, abeunte, qui medius fuerat fiebat dexter, nomenque *interioris* usu loquendi ipsi haerebat; sique tertius accederet dignitate minor, ad dextrum ejus latus incedebat. Sinistro trium discedente, medius quidem fiebat sinister, sed quia dexter locus erat honoratior, is qui absente tertio ad dextram medii erat, locum, quod inter moratiores gentes hodie etiam fieri amat, sinisterioris videtur occupasse, & clausisse latus ei, qui fuerat medius; qua ratione ille qui, cum tres ambulabant, fuerat medius proprieque *interior*, incedet a dextra, veterique nomine *interior* vocabitur. Haec, Vir Amplissime, mea est sententia, quam tamen meliori submittere praefero, quod ajunt, & paratus sum: Vale plurimum a me & Amplissimo Ter Borchio; Dav. a. d. Id. Jul. cīcīcclxxix.

EPISTOLA CCCCXXXIV.

GISBERTUS CUPERUS

Nicolao Heinſio S. P. D.

Vianam.

Quam velim literas recte curatas, quas ad me ante aliquot tempus datas a te esse ex *Perizonio* nostro intellexi non ita pridem, Heinſi Clarissime. Invenissent enim me lectulo affixum, & cum quartana, qua necdum bona fide liberatus sum, conflictantem febri; illique non minorem, quam ῥῆμα venis concepta pharmaca fecissent medicinam. Si enim verum Quintiliani verbum, *Non quod datur, sed quod sanat medicina est*, nihil revera melius animum ex morbo interdum aegrum recreasset, corpusque debilitatum refocillasset, quam epistola, cujus auctorem singulis diebus cogito & admiror. Iniquo quapropter animo fero jacturam, & si quid preces meae valent, eam refarcias, novisque litteris vetera & recentia dubia tollas serium in modum rogo. Nam nuper publice triumphi pompam explicans incidi in Livii locum, quem non tantum notabilem existimo, quia equorum alborum originem nos docet in triumphis, sed etiam quia servat elegantem, ita sim felix, comparisonem, & si quid video, homini Romano indignam. Camillus nempe Vejentium victor, & triumphans confertur animalibus sive equis, Lib. v. cap. 23. *Maxime conspectus ipse est curru equis albis juncto urbem invehens: parumque id non civile modo & humanum etiam visum. Jovis Solisque equis aequiparari Dictatorem in religionem etiam trahabant.* Sed ego, nisi plane fallor, Livium scripsisse existimo; *Jovi Solique equis id est, per equos albos, vel quia currum equis albis junxerat Dictator, cum aequari Jovi & Soli, quibus itidem nivei equi, uti de Jove testatur Plut. in Camillo, tribuebantur.* Atque Camilli triumphus mihi simul revocavit in memoriam Suetonii verba, quibus tradit Octavium per quietem vidisse filium, *mortali specie ampliore cum fulmine & sceptro exuviisque Jovis Opt. Max. ac radiata corona super laureatum currum, bis senis equis candore eximio trahentibus; c. 94.* Lectus mihi quidem *deauratus, aureus, & ebore constans currus*, sed nunquam

laureatus; & bona fide ignoro, num unquam ipsi triumphantium currus laureis fertis fuerint ornati; cumque in Codd. Fulvii Urfini legatur *deauratum*, suspicabar unam vocem propter similitudinem litterarum alteram absorpsisse, & scribendum esse; ac *radiata corona super laureatam, deauratum currum*; vel *super lauream*. Sane sic sensus longe clarior, & verba sibi melius cohaerent, quia hiulcum nescio quid sonabant absolute posita, *bis senis equis trahentibus*. Et ejusmodi corona, sive radiis & lauru ornatus occurrit Cajus Caesar in nummo Smyrnaeorum apud Trifan. Tom. 1. & Rhodiorum Nero apud Patinum cap. 6. Thesauri; Vale plurimum; Dav. a. d. v. Kal. Mart. cīcīcclxxix.

EPISTOLA CCCCXXXV.

NICOLAUS HEINSIUS

Gisberto Cupero.

Daventriam.

UTinam minus bene consentiret astrum nostrum, quod de valetudine intelligi velim, quae cum te nuper habuerit exercitum, me quoque ea exercuit multo tempore, & etiamnum, quamquam remittens nonnihil a solita inclementia, habet exercitum. Te quartana, tertiana me plurimum infestavit. nunc a Typographo Virgilii mei exemplar accipies Regi Christianissimo inscripti, quod officium veteris debiti juxta ac promissi religio a me expressit, vellentibus praesertim aurem amicis Gallicanis. Addendum & exemplar curassem, quod Amplissimo *Ter Borchio* destinatum est, si certo scirem, ubinam is locorum nunc esset quaerendus nobis. Quare tutiori viae me crediturum sum arbitratus, si illud apud *Graevium* nostrum deponeretur Trajecti, cum eam per urbem amicus noster frequenter, aut Haganam aditurus aulam, aut inde ad vos recurrens, iter moliatur. In Taciti & Suetonii locis feliciter tibi omnino conjectura cessit. Apud Suetonium tamen malim ut ingrati soni vitium caveatur, *Radiata corona super laureatam. Currum bis senis equis*. Nam cum currum designet triumphalem, non potuit nisi deauratus intelligi. Habeo nummos argenteos, in quibus Augustus exprimitur in corona radiata, sed post mortem ejus cufos, quod titulus DIVI AVGVSTI indicat, sic etiam exhibetur thensa per circumvectus e nummo veteri ab Onuphrio Panvino de ludis Circensibus. Haec in lectulo exarabam decumbens, quo magis & brevitati harum; & festinationi venia a te danda. Vale. 12. Maji. 1679.

EPISTOLA CCCCXXXVI.

NICOLAUS HEINSIUS

Gisberto Cupero.

Daventriam.

MARONIS mei bina exemplaria ut ad te mitterentur, quorum alterum *Perizonius* noster sibi ferret, in mandatis a me accepisse non diffiteatur *Elzevirius*, idque religiose praestitum adfirmare pergit, pertinacem in.

in modum. sed videor posse suspicari quid hîc lateat culpa. Ex uno nimirum fasciculo bini sunt confecti ab ejus famulis (iis enim horum talium curam solet demandare) quorum alter tibi, alter *Perizonio* inscriptus, additis litteris, quas satis verbosas super variis Velleji Paterculi locis ad illum eodem tempore exararam. Nautam vero, quod explorare non posset in qua urbis regione *Perizonius* esset adeundus, pertaesum molestae inquisitionis projecisse curam fasciculi, cum ego pari de causa, quod *Perizonianas* aedes non haberem compertas, ad te librum cum litteris mittendum *Elzevirio* injunxissem. Epistolae jacturam praecipue deploro, quod non sine aliquo valetudinis incommodo scribendis litteris utcumque properatis sine multa contentione animi incumbam. De *Interiore & exterior* inter ambulandum loco, etsi non satis meminerim, quid *Lipsius*, quid cum *Castalione Torrentius* tradiderint, quae arbitratus sum ipse ante perlatus ad me tuas litteras, accipe. Cum coeni luti-que apud veteres colluvies vergeret in mediam plerumque platearum partem, utpote depressam ac lacunosam, honoratiorem locum fuisse habitum, qui aedificiis magis vicinus esset, quod Londini in Britannis, atque alibi terrarum adhuc videmus obtinere. Itaque sive laevum latus clauderet comitis sive dextrum, qui mundiora & aedificiis proximiora occupabat inter deambulandum, *interior* ire dicebatur, ac honoratiorem locum occupabat. In circo autem rotam laevam semper *interiorem* dictam, quod illa necessariis de causis proxima metam accederet, cum intra septem spatia a dextro cursum auspicarentur, non a sinistro. Parem loquendi modum a circo mutuatus est in descriptione navali Maro Aeneid. v. ubi cum Gyas a laeva scopulos praeterveheretur, Cloanthus, qui navem ejus per viarum compendia occupat ac transit scopulis proximior, *iter laevum interior radere* est dictus. Eodem Varronis loca sunt trahenda, de vacca inter arandum *interiore*, sive sinisteriore, & Servii de vacca *intrinsecus juncta*; tum *intus canere*, & *intus sinistra manu complecti* apud Asconium. Tribus una deambulantibus *interiorem* vero dictum hunc, qui medius incedebat, legere haud memini. & dissentire in Fastis videtur Naso lib. v. 67. Ubi de reverentia senibus praestita,

Et medius juvenum, non indignantibus ipsis

Ibat, & interior, si comes unus erat.

Ubi frustra sunt, qui malunt *anterior*, e codicibus parum castigatis. Et haec quidem haecenus super argumento, ad quod cum tu praemeditatus accedas, facile mihi imparato, si aberrem, quae tua est animi benignitas, ignosces. Parentis tui excessum vel tua causa indigne tuli & poteram adhibere solatium huic vulneri, nisi omne fomentum in tua sapientia & temporis mora collocatum haberes. Vale, & Amplissimo *Ter Borchio*, si vobis adest, salutem plurimam meis verbis, uti & suavissimo *Perizonio* dicas, rogo. Vianae ad Leccam. Kal. Septemb. Greg. 1679.

EPISTOLA CCCCXXXVII.

GISBERTUS CUPERUS

Nicolao Heinſio S. P. D.

Vianam.

IN rationem, cur ſiniſter equus in circo vocatus *interior*, & idem nomen datum ſit contrario ſenſu alteri ambulantium, inquirebam ultimis literis meis, Vir Ampliſſime. Et ſane tu quoque elegantem reddis atque politam admodum; ſed & ſic mihi quodammodo accedis, quia qui propior murum ambulat, ἀναμφιλόγως medius eſt inter murum & eum, qui latus ipſi claudit, ut equus in circo inter alterum equum & metas. Si tamen ratio tua vera, uti arbitror omnino, eſt, pro diverſo inceſſu *interior* modo erit ſiniſter, modo dexter; quique nunc dexter eſt, ubi ſe cum ſocio vertit, & ab eadem plateae parte manet, erit ſiniſter, etſi digniorem locum obtineat; nec proprie ita vocari poterit is, qui ad dextram alterius ambulat; niſi dicamus uſu obtinuiſſe, quia illi, qui *interior* vel prope domus incedebat, ſive dexter ſive ſiniſter foret, honor habebatur; & dexter locus in foro vel locis vacuis incedentibus erat dignior, ut homo a dextra alterius ambulans, & ſic honoratiorem locum tenens, vocatus itidem *interior* ſit. Doleo jaſturam epistolae ad *Perizonium* datae, cum tua, tum Velleji, quem ea poſt doctiſſimam curam illuſtras, cauſa; ſperoque illam poſtliminio quaſi redditum iri. Sed age, quoniam *Paterculi* mentio incidit, quid tibi videtur de emendatione Doctiſſimi *Lambecii*. Vellejus l. ii. c. 70. & Val. Maximus l. i. c. 7. celebrant *Artorium* medicum; *Lambecius* l. ii. p. 591. Bibl. Vindob. reſcribit apud ambos *Antonium*; intelligitque *Antonium Muſam*, medicum Auguſti celeberrimum, & *Artorium* illis tantum, ut videtur putare, memoratum e numero hominum tollit. Sed *Eufebius* narrat, quibus viri opinionem labefactare queam; *Artorium* nimirum Medicum poſt pugnam Actiacam, quae incidit in annum U. C. 722. periſſe naufragio; at *Antonius Muſa* vixit adhuc A. U. C. 730. quo Auguſtum periculoſiſſime aegrotantem ſanavit, teſte Dione Lib. liii. Vale, Dav. Kal. Octob. ciciocclxxix. Occupatio facit, ut plura non mittam.

EPISTOLA CCCCXXXVIII.

NICOLAUS HEINSIUS

Gisberto Cuperio.

Daventriam.

MUltus, ut ſolet, de te ſermo mihi fuit diebus proximis apud illuſtrem & utriuſque noſtrum amicum *Terborchium*, quando Graevianis in aedibus una epulabamur. Nondum nos jubet is deſperare de videndis in publico tuis ad Apotheoſin Homericam pereruditis animadverſionibus, quod omen utinam eventus quam

quamprimum comprobet ac ratum efficiat. *Interiorem* de tribus una deambulanti-
bus non dici, locus, puto, Nafonis manifeste convincit. nec habeo quod iis,
quae de circensi certamine jam dixi, superaddam. *Jacobi Perizonii* librum musteum
atque eruditione multa refertum accepi, legique plurima sane cum voluptate.
In suis, quae librum comitabantur, cum excuset comem in modum, quod ad
ultimas meas nihil responderit tanto tempore, videtur inde colligi posse, non
vanis argumentis, meas, quas Maroni addendas in se receperat *Elzevirius*, illi
redditas, atque adeo Maronem quoque ipsum. Etsi parum aperte de hac re
agat in suis litteris. Vellejanum locum adversus *Lambecii* conjecturam pulchre
vindicasti, & sane *Artorii* nomen non minus Romanum est, quam *Antonii*. *Ar-*
torii hujus medici etiam Dio libro 48. meminit. Velim id genus complura mi-
hi suppeditentur, in quibus alii Vellejum aut frustra aut feliciter castigare sunt
aggredi, ut inde animadversis ad illam meis, quae curis secundis multum adau-
xi, cumulus atque ornatus qualiscumque accedat. Glossaria antiqua *Labbaei*,
quae nuper in Galliis prodire, nescio an usurparis oculo: qui ea publicavit,
Cangius Lexicon quoque suum Latino Barbarum multae & eruditae molis in
tria digestum volumina absolvit. Nunc post Meursium Rigaltiumque de vo-
cabulis Graeco-Barbaris opus luculentum meditatur. *Emericus Bigotius* Col-
lectanea veterum scriptorum, quorum indicem hîc mitto, quae diu sub prae-
lo defudarunt, ante Kalendas Januarias, ut spero, in publicum dabit. Vale,
xxv. Octobr. 1679. Vianae.

EPISTOLA CCCCXXXIX.

GISBERTUS CUPERUS

Nicolao Heinsio S. P. D.

Vianam.

Licet nihil antiquius, postquam in amicitiam tuam admissus sum, habuerim
quam frequentes literas, quas tibi non displicere saepe significasti, mit-
tere; occupatione tamen mea factum est, ut nunc primum excutere obstina-
tum quasi silentium, epistolaeque tuae, quam xxv. Octobris proximi anni de-
disti, longe acceptissimae respondere possim, Amplissime idemque praestantis-
sime Heinsi. De *interiore* autem (licet nullus mihi praeter Terentium And.
4, 4, 38. in mentem veniat auctor, qui docet coeni lutique colluviem in me-
diam vergere platearum partem) ut plane tibi assentior, ita laetor pla-
cuisset quae inservire putabam destruendae opinioni *Lambecii*; & mecum te
statuere, alium *Artorium* (cujus de *Hydrophobia* Caelium 3. Acut. 14. & τὸ πρὸς
μαρξοβίου Clemensem Alexandrinum laudare arbitratur in epistolis *Reinesius*)
& alium *Antonium Musam* esse. Et licet arrogantiae quodammodo περὶ
sit manus Vellejo post elimatissimas curas tuas admove, tamen, quia id te
desiderare scribis, mitto, quid mihi de uno aut altero loco videatur; & si ni-
hil aliud, occasionem certe dabo, si modo valetudo tua patitur, in dubia mea

Zzzz 3

in-

inquirendi. Lib. 11, cap. 6. *Longe majora & acriora repetens*; diductis literis formabam *re petens*; uti nonnunquam suspicatus sum cap. 30. etiam scribi oportere, *inter coenam & Oscae*, ut servetur fides historiae & constans codicum lectio. *Re* autem est, *re ipsa*, *re vera*; quia civitatem dare omnibus Italicis &c. clare ostendebant cum majora atque acria *re ipsa* petere. Cic. IV. Fam. 11. *re praestare aliquid*, IV. Verr. 172. *Re ac ratione cum aliquo esse conjunctum*; III. Nat. Deor. *in caelum translato non re, sed opinione esse*, & denique in Catil. *majora omnia re, quam fama esse dixit*. Atque ita ipse alibi auctor noster loquitur; ut in loco satis vexato & obscuro cap. 125. *prisca antiquaque* (ita Cicero alicubi *veteres & priscos viros* conjunxit; & alibi dixit *priscae vetustatem*) *severitate usus, ancipitia sibi tam re quam exemplo perniciose &c.* quae erat, cum ita distinguerem, *usus, ancipitia, sibi . . . perniciose*, & ita ut conjunctio more satis frequenti sit omissa, idemque foret ac si dixisset; coërcuit militum gladiis, quibus obsessus erat, *ancipitia*, id est res ancipites, dubias, incertas; & sibi tam *re ipsa* quam exemplo perniciosas, quia revera erat Druso admodum hoc periculofum, & alii exercitus inde exemplum capere possent. Cap. 52. *Quam in omnes partes (ut militari verbo & consuetudine utar) dimitteret*: Videtur dimittere fuisse vox militiae usitata, quando aliqui aliquo ablegabantur; ita cap. 70. *Dimisisset evocatum, jussissetque nuntiare sibi*: Sallust. Catil. cap. 42. *Namque illi, quos Catilina dimiserat*, id est, in varias partes ad milites & arma paranda miserat: Sen. l. III. de Ira c. 20. *Adjicere his longum est, quod patres quoque occisorum eadem nocte dimissis per domos centurionibus confecit*. Verbum igitur recte militare dicitur, quia cui Impp. mandata dabant ad aliquid faciendum, dicitur *dimitti*, & consuetudo militaris etiam, quia iidem, si satis sanguinis effusum, hostesque victi forent, in omnes partes praelii certos homines mittere saepe solent, qui juberent caedibus victores abstinere. Cap. 116. *Nam & Sejanus vir antiquissimi moris*. Tu, Vir Clarissime, recte haec ad Apronium deleta *Sejani* nomine refers; & male puto *Lipsum* scribere, *Nam & Junius*; atque *Vossium*, *Nam & Blaesus etiam*; quod magis patebit, si ostendero, rationem, quam afferunt, plane nullam esse; cap. 125. scribit Vellejus, *Junium Blaesium Hispanias exercitumque virtutibus celeberrimae in Illyrico militia, ut praediximus, cum imperio obtinuisse*. Nusquam, ajunt viri doctissimi, nisi hoc loco, ita scil. emendato, tradit auctor Blaesium celebrem in Illyrico militia fuisse. Verum ex mea opinione, *ut praediximus*, non refertur ad Blaesium, sed ad exercitum, de quo egerat c. 112. & seqq. Illi, qui de jure Pontificio scripserunt, quaerunt num Pontifex Max. *privatus* sit; multusque est in hoc explicando Muretus ad 1. Catilinariam, in qua Cicero ita loquitur; *An vero Vir Amplissimus P. Scipio Pontifex Max. Tib. Gracchum mediocriter labefactantem statum Reip. privatus interfecit?* Ego ut quaestionem Gutheriis & Bosis relinquam, arbitror Muretum frustra fluctuare, & Ciceroni nunquam venisse in mentem dicere hoc loco Pontif. Max. esse privatum; sed P. Scipionem, qui postea factus est Pont. Maximus, cum adhuc privatus foret eam seditionem compescuisse. Sic clare eum & absque ambagibus privatum facit, lib. 1. de offic. *Nec plus Africanus singularis & vir*
&

Ἐν Imp. in excidenda Numantia Reip. profuit, quam eodem tempore P. Nasica privatus, cum Tiberium Gracchum interemit: Et licet Appianus lib. i. Bell. Civil. scribat Romanis ducem fuisse Scipionem Pontificem Maximum; καὶ πρῶτον αὐτοῖς ὁ μέγιστος ἀρχιερεὺς λεγόμενος ἐξῆρχε τῆς ὁδοῦ Κορνήλιου Σκιπίωνος Νασικᾶς; togae laciniam in humeros & caput rejecisse, vel ut pugnae signum, vel θεοῦς ἐγκαλυπτόμενον ὡς ἐμελλεν δράσειν, & Gracchanos cecidisse tanto viro, vel κατ' ἀξιώσιν ἀνδρὲς ἀρίστους; mihi tamen longe secus videtur, & major est Velleji tui auctoritas; qui l. ii. c. 3. scribit P. Scipionem Nasicam privatum ἔν τῳ togatum haec fecisse, atque ob eas virtutes primum omnium Pontificem Max. absentem esse factum. Compescuit igitur seditionem privatus, & propter tam egregium facinus Pontificatum Maximum meruit; quod quia non ita multo post factum, auctores tempora non satis rite distinguentes, eum, cum Pontifex Max. esset, Gracchum occidisse scripserunt. Nam P. Licinius Crassus Dives Pontifex Max. bello contra Aristonicum gesto periit; Epitome lib. LIX. P. Licinius Crassus Coss. quum idem Pontifex Max. esset (quod nunquam antea factum erat) extra Italiam profectus, praelio victus & interemptus est; & quidem Coss. Appio Claudio & M. Perpenna, teste Julio Obsequente c. 87. five A. U. C. DCXXIII. Nullo igitur pacto potuit Scipio seditione Gracchana, quae repressa est A. U. C. DCXXI. Pontificatum Maximum gerere, sed occiso Licinio Crasso is honor primus ipsi delatus est, & quidem absenti; quippe qui, ut invidiae subtraheretur per speciem legationis in Asiam ablegatus erat, uti testatur auctor de Viris illustribus. Sed nimis diu seria tua naeniis meis interpello, & finem facerem, nisi doceri cuperem, num alia loca testentur, patres infantes abluisse modo natos, eosque fasciis involvisse, praeter eum, qui exstat in Ins. antiqua, quam descriptioni aedium Barberinarum ad Quirinalem adjecit Hieronymus Tretius,

Ἐκ γαίης με πατὴρ ἐμὸς εἴλατο χερσὶ γεγηθῶς

καὶ μ' ἀπέλουσε λυθροῦ, καὶ εἰς σπαργάνα μ' αὐτὸς ἔθηκεν.

Vale plurimum, Vir Nobilissime, & me amare, ut facis, perge; Dav. a. d. IV. Id. Mart. CIOICLXXX.

EPISTOLA CCCCXL.

GISBERTUS CUPERUS

Nicolao Heinsio S. D.

Vianam.

FRequenter mihi ante oculos versatur exquisitissima tua bibliotheca, & splendidissimum τῶν Μουσῶν revera καπαγώγιον. vixque dies abit, quin vel aliis narrem, vel certe revolvam mecum ipse & humanitatem, qua me exce-pisti, singularem, & doctas confabulationes, certissimasque emendationes; quibus qui artus meos regit spiritum exhilarasti. Memini autem me inspexisse librum Italicum in folio, ut vocant; cujus auctor inter ceteros exhibet Domitiani Imperatoris nummum, in cujus una area cernitur ἀρσενική muliebris; in al-

altera corvus ramo insidens. Quid ille de eo sentiat, non reddit mala memoriae fides; teque serium in modum rogo, ut verba ejus ad me mittere velis, quia forte ansam praebebunt diligentius in similem, quem servat illustris *Hugenius*, inquirendi. Hic jam serio consilia ponimus de eligendo professore Theologo, sed qui Spartam illam exornare possit, vix invenimus. Laudantur varii, ut *Clingerus* Hanoviensis, *Andre* Marpurgensis professor, & quidam *van Haelen* Ecclesiastes Ultrajectinus. Tu quaeso da hoc amicitiae nostrae & meae erga te observantiae, ut, si modo num atrii an albi sint nosti, quibus ingenii dotibus commendentur homines, scribas; meque quamprimum certiore facias, num ultimus, illum enim te ignorare vix patitur locorum vicinitas, literarum, in quibus tecum absque interpellatione versor, amans; & Theologiae solidae veraeque cognitione imbutus sit. Si quem praeterea alium, cui tuto tanti momenti provincia mandari potest, cognosti, ut es natus ad rem publicam literariam juvandam, eum ne celes; & judicium tuum non apud me solum, verum etiam apud alios magni erit ponderis, ac nescio qua permotus animi divinatione spero nos tua opera dignum ἱεροφάντην vel μυσαγωγόν, fas sit a tacita Eleusi voces petere, adepturos: Vale plurimum; Davent. a. d. VI. Id. Aug. ciciocLxxx.

EPISTOLA CCCCXLI.

GISBERTUS CUPERUS

Nicolao Heinſio S. P. D.

Vianam.

Litteras haec ad *Emericum Bigotium* ut cures, & quae de Theologis, quorum dotes me vehementer velle cognoscere proximis significavi, comperita habes, mittas, quod commodo fiat, quamprimum, rogo serium in modum, Heinſi Amplissime. Ceterum cum nuper tecum & apud te essem, varias emendationes explicationesque auctorum summa cum voluptate ex ore tuo hausi; verum quae de *Astyriis*, vel *Asteriis*, ut & *Aradio Rufino* monebas, utpote longiuscula, exciderunt plane, cumque forent eruditissima atque certissima, maximo me beneficio afficies, si quae de iis observasti, nec non Virgilii membranarum vetustis additam epigraphen mittere velis. Cumulabis sic tua in me merita, faciesque ut quotidie nanciscar occasionem laudandi & eruditionem immensam, & humanitatem, qua praeditus es, singularis exempli. Quae in litteris a. d. $\frac{viii}{xviii}$. Cal. Junii ad me datis notas ad Vellejum Paterculum, placent valde; nisi quod illud *exemplo pernicioſa* mutandum esse nequaquam censeam; quare alio tempore pluribus tecum agam. Nunc accipe conjecturam unam aut alteram, & si tibi quid oneris impono, des hoc, quaeso, amoris extendendae eruditionis: Latinus Pacatus cap. xli. *Vel longior poena ferro incumbere, & corpore vulnus onerare*; fluctuat hic valde Clarissimus *Schefferus*, nec satis capit, quid sibi velit *corpore vulnus onerare*: mihi illi hoc facere videntur, qui, ut an-

te dixi, ferro incumbunt; qui se dum ipsi occidunt, inclinando corpus in ensem, onus quasi vulnere vel gladio, quo vulnus infligitur, cuiusque capulus in terra positus, imponunt; & ut eleganter aeque Seneca loquitur, *instant ferro & tela corpore urgent*: Cap. 46. *Vidisti civile bellum hostium caede, militum pace, Italiae recuperatione, tua libertate finitum*: valde & hinc se cruciat vir Doctissimus, & quo sensu Theodosius *liber* possit dici, inquit: at ut mihi videtur, alloquitur adhuc Romam Pacatus, eamque ait vidisse bellum civile *finitum libertate sua*; quia Maximo tyranno, qui Italiam occupaverat, victo, libera quasi facta erat. Sed quod me magis cruciat est Graeca inscriptio apud *Jacobum Sponium* in indice populorum Atticae Num. xxxii.

TON TION MYΘENTA

ΑΦ ΕΣΤΙΑΣ ΤΑΙΝ ΘΕ

ΑΙΝ. ΑΝΕΘΗΚΑΝ

Nec non alia Num. cxli.

ΟΥΓΑΤΕΡΑ ΜΥΘΕΙΣΑΝ

ΑΦ ΕΣΤΙΑΣ ΔΗΜΗΤΡΙ ΚΑΙ

ΚΟΡΗ ΑΝΕΘΗΚΕ.

Illam vertit vir Doctus, *initie au foyer sacré des Deesses*; hanc similiter, *initiatam mysteriis sacri foci Cereris & Proserpinae*. Verum uti ex secunda inscriptione patet, ταιν θεαιν non est genitivi, sed dativi casus, adeo ut jungi debeant, ἀνέθηκαν ταιν θεαιν, & ἀνέθηκε Δήμητρι καὶ Κόρη; atque in ambabus μυηθέντα ἀφ' ἐστίας. Hoc quid sit, ut verum fatear, mihi perobscurum est, arbitratus tamen nonnunquam sum Atheniensium pueros dici μυηθέντας ἀφ' ἐστίας, quia illi tales mysteriis Cereris initiare solebant, ut ex Terentio & Donato observavit *Meursius* c. 16. Eleusin. Quo proculdubio pertinet Suidam scribere illum, qui ἀφ' ἐστίας initiabatur, Atheniensem fuisse; ἀφ' ἐστίας μυεῖσθαι, ἀφ' ἐστίας μουόμενθαι Αθηναίῳ ἦν; quia scilicet non nisi Atheniensium liberi ea aetate initiabantur. Et ita forte Graeci loquuntur; quia id primum videtur esse factum, postquam puerum natum curriculo circa focum, ὡς δὲ τὴν ἐστίαν, sacris, quae αὐφιδρόμια vocantur, uti *Hesychius*, *Harpocration*, *Auctor M. Etymol.* aliisque docent, tulissent; vel quia ἀφ' ἐστίας, propter Vestam, cui primum sacrificabatur, proverbii vicem obtinet, significatque nihil aliud, quam *ab initio*; & in illis inscriptionibus, *a prima pueritia, a prima infantia*. Exstat & haec loquendi forma apud Aristidem T. i. Orat. in Herculem: Ἀρχάμενθαι ἢ ἀφ' ἐστίας ἐκάρθησε τὴν Ἑλλάδα, id est, vertente Cantero: *A Vesta deinde exorsus*; at ego malim; *a lare, a patria, a Thebis*; quia Heros ille primo patriam liberavit, fecitque ne amplius Orchomeniis tributum penderent Thebani; inde Graecos & tandem alias gentes adiit. Idem Orat. πρῶτον μὲν ἀφ' ἐστίας ἀρχάμενοι τὴν ὁμόνοιαν ἐνδείξεσθε; *primum a Vesta concordiam vos ostendetis auspiciatos esse*; imo dicit Orator, Graecos primum a se ipsis incipere, vel primum debere esse concordantes inter se; quomodo *Eustathius* ad Odyss. η. hoc proverbium explicat; ἐκ τῶν κρειττόνων id est, *a diis*; ἢ ἐκ τῶν οἰκείων i. *a propriis, a sese*. Rursus T. iii. p. 690. τὴν δ' οὖν ἀρ-

Tom. II.

Aaaaa

χην

χὴν ἀφ' ἑσίας ἀναμμοί, καὶ πείθειν ἑμαυτὸν πρῶτον; ita tamen ut initium a Vesta sumerem, ac mihi primum ipse persuaderem: cum sensus flagitet; ita tamen ut a me ipse inciperem: quae loca vel ideo adduxi, ut clare pateat ἀφ' ἑσίας significare tempus, vel aliud quid, a quo res quaequam incipit, nec posse verti in laudatis inscriptionibus, initiare mysteriis sacri foci: Tu, Vir Maxime, Vale; & mihi favere, ut facis, perge: Daventr. a. d. ix. Cal. Sept. cııııııclxxx.

EPISTOLA CCCCXLII.

GISBERTUS CUPERUS

Nicolao Heinſio S. P. D.

Vianam.

BInae, quas ad me pr. Non. & $\frac{vii}{xvii}$. Sept. die dedisti, literae probe curatae sunt; quodque iis non ante, ut aequum erat, responderim, occupatione mea factum est. Gratias autem habeo maximas de missa explicatione numismatis Domitiani, versibus vetustissimo Maronis Codici adscriptis, *Q. Aradio Rufino*, *Asteriis*, nec non novis Paterculi emendationibus, quae una cum aliis omnibus ἀρίστου κόμματος sunt. Illud autem Vellejanum, *Et re Et exemplo*, ita putabam nonnunquam posse defendi; quia haec ipsa rebellio exercitus erat periculosa Druso re vera, utpote qui a militibus tumultuantibus occidi poterat, & apud Tiberium accusari, tanquam dux inexpertus, & nescius tractandi militum animos, quod magis credidisset suspicax Imperator, si alii apud Rhenum exercitus idem tentassent; adeo ut & exemplum Druso nocuisset; cum invidia fere in eum redundet, cujus culpa, ut non desunt optimos etiam accusandi causae, primus tumultus exoritur. Apud eundem Paterc. l. i. c. iiii. *Urbis Romanae* putabam sanum esse; quia non aliter loquitur ipse lib. i. cap. 6. Justin. lib. vi. cap. 6. Florus lib. iiii. cap. 20. & quia *civitas Spartana* pro Sparta apud Val. Max. iiii, 3, 5. Extern. & *urbs Attica* pro Athenis apud Vellejum lib. i. cap. ult. occurrunt. Sed, virorum ἀρίστε καὶ πολυμαθέστε, quid est τὸ κορυδαίνων χρησμὸς apud Diod. Siculum lib. xix. pag. 697. Ed. Rhodom. an locus fuit in Graecia, ubi corvi oracula dabant; an intelligendum oraculum Dodōnaeum, de quo huc pertinentia narrat Strabo lib. ix. pag. 401. an Delphici Apollinis, cum ejus tripodibus frequenter corvus addatur; & Statio vocetur, *comes obscurus tripodum*; an vero tandem omen, quod ex volatu vel garritu corvorum ceperant Thebani? Praeterea aveo cognoscere, quis ex veteribus praeter Hyginum *Boëtiam* in Propontide ponat: ita enim ille loquitur Fab. 186. *Qui in Propontide ex suo nomine condiderunt, Boëtus Boëtiam, Aeolus Aeoliam*. Alii Graeciae regionem ab eodem Boeotio Melanippes & Neptuni filio nomen accepisse scribunt; uti videre licet apud Diodor. Pausan. & Strabonem; sed quis *Boëtiam*, sive *Boeotiam*, uti apud Hyginum scribi oportere judicant eruditi, Propontidi adscribat adhuc quaero. Suspicio tamen oborta Hy-

Hygino designari Βοιωτίαν ἐν Θράκη, uti urbs quaedam Stephano, quem male mutat vir doctus, appellatur; & quia Aeolia Asiae regio mari Aegaeo adjacet, scribi mox debere *Aeolium*, quo nomine urbs fuit Chersonesi Thracicae; teste Stephano & Theopompo lib. XXI II. Philipp. apud quem forte pro Ἀφικῆς legendum Θράκης, Cum autem pars Chersonesi septentrionalis fuerit Propontidi proxima, binae hae urbes potuerunt hoc in tractu fuisse; ita ut recte Huginus *Boeotiam* Thraciae attribuerit. Tandem quae *Icaria* fuit, cujus rex vocatur fab. laudata *Metapontus*? neque enim insula Aegaei maris videtur posse intelligi; imo scribi debere *Italiae*, quia *Dianae Metapontinae* mentio fit; quam a Metapontinis Italiae incolis cultam fuisse verosimile admodum est; maxime quia *Metapontus* Metaponti conditor a Barbaris, teste Stephano, *Metabus* appellatur: & Strabo lib. VI. tradit illi loco fabulas, Metapontum & Melanippem, hujusque filium Boeotium tribuere. Sed nimius sum; tu, Vir Clarissime, nisi morbus articularis, quem te exercere serium in modum doleo, obstat, facem, ut soles, his tenebris praefer; & quid de splendidissima provincia futurum sit, si tanti, ex literis ad praestantissimum *Graevium* datis a me cognosce. Vale plurimum; Davent. a. d. x. Kal. Dec. CIOIOCLXXX.

EPISTOLA CCCCXLIII.

GISBERTUS CUPERUS

Nicolao Heinio S. P. D.

Vianam.

Postquam litteras a. d. x. Cal. Dec. & cum iis varia *σπορήματα* misi, coepi diligentius paulo in vocem *penaces*, quae in Turcii Rufii Aproniani Asterii carmine occurrit, inquirere; videorque si non veram, at saltem verisimilem ejus significationem invenisse. Celebrat igitur Asterius tria ludorum genera nimirum ludos scenicos, agitationes bigarum & quadrigarum in circo, & feras in eodem depugnantes, vel inter se, vel cum bestiariis, uti patet ex hoc disticho;

Ut ludos, currusque simul, variumque ferarum

Certamen junctim Roma teneret ovans.

Inde & mox canit se *ternum* *sofos* meruisse, *terna* *populi* *agmina* ipsius in honorem plausus edidisse; ac tandem uno die *tria festa* fuisse exhibita. Ad unum horum spectaculorum, me iudice, pertinent *penaces*; &, nisi plane fallor, ad scenam referri debent, cujus eodem versu mentio occurrit;

Tempore, quo penaces circo subjunximus, atque

Scenam Euripo extulimus subitam.

Id est, cum subitario opere in ultimo circo super Euripum exstruxi ex tabulis theatrum vel scenam, atque in ea ludos scenicos exhibui. Nam *penaces* sunt Graecorum *πίνακες* vel *tabulae* mutato I. in E. Et ne gratis hoc videar adfirmasse, audi *Carolus de Fresne* in Glossario suo Doctissimo ita commentantem

Aaaaa 2

[pe-

[PENAX. Codex Croylandiae sub Joffrido Abbate apud Spelmannum: *pulcher-
 rimumque penacem per incendium illuc tunc perdidimus*, & *valde sumptuosum de
 omni genere metalli pro varietate siderum & signorum mirabiliter fabrefactum*. Sa-
 turnus enim (videtur aliquid & forte aereus excidisse) Jupiter autem aureus, Mars
 vero ferrugineus, sol de auricalcio &c. Ubi *penax* est pro *πινὰξ* tabula, hîc autem
 pro sphaera coeli] Hucusque ille; qui si veram vidit loci illius explicationem,
 proculdubio & nostra a vero non erit aliena. His adde scenicos ludos in circo
 nonnunquam fuisse exhibitos, uti docet Suetonius Aug. cap. 43. si optimum
Torrentii Codicem sequimur. Hujus autem, nec non quod *Sedulii* codicibus
 adjicitur, quodque etiam edidit *Labbeus* part. 1. Bibl. Novae pag. 23. carmi-
 nis, eundem *Asterium* esse auctorem tecum sentio, suadentque plane eodem spi-
 ritu animati versus; nec dubito quin *Onophrius*, *Turcium Rufum Apronianum*
Asterium, & *Asterium Secundum* confuderit. Sed doce me, amabo, quae mar-
 mora testentur hunc consulem suffectum fuisse; nam quod *Onophrius* fastis in-
 feruit, atque ex iis edidit *Gruterus* pag. 92. nihil tale videtur tradere; cum
Turcius Secundus Asterius. V. C. Pontius Atticus & Servilius Aedius V. C. P.
P. Hierof. Hec. possint diu aliquid vel erexisse vel fecisse, quod injuria tem-
 poris ex marmore erasit, *Coss. Valente v. & Valentiniano, sive A. U. C.*
mcxxviii. & Turcius Secundus consul; celebratus in *Inf. 7. p. cccclxxvii.* alius, nec
 hujus temporis est. Praeterea, quod commodò fiat, mitte, quae urbs fuerit
Crema nomine; *Goltzius & Ortelius* ex antiqua inscriptione faciunt *Cremam* pro-
 vinciam; verum jam vidit *Scaliger* in *Indice Gruteri* scribendum esse *Cretae*, quia
Creta & Cyrenaica una provincia erat, & ab uno *Procos.* regebatur. At idem
Vir Illustis Cremam vel similem vocem, uti ex ordine literarum patet, videtur
 repperisse in *Inf. 10. pag. lxxxii. & 1. pag. dlxx.* in quibus tamen *Crem.* signi-
 ficat *Cremonensem*, vel *Cremona* domo fuisse *M. Cassium & M. Volumnium*; ad-
 haec *Cremates* populum ex *Inf. 9. pag. dcxxxix.* laudat; quae vox quid ibi signifi-
 cet, tu optime expedies; cum etiam si ea absit, salvus sit sensus; ut, *Fourius*
A. L. Fouria. A. L. Seleucus Mag. Quinque Conlegi Aurificum; nisi potius
 ita digerenda sit; *Fourius A. L. Seleucus. Mag. Quinquè Conl. Aurif.* ita ut
Seleucus non sit persona tertia, sed cognomen *Furii*. Tandem doce, quid sibi
 haec *Macrobii* verba lib. v. *Sat. cap. 17.* velint. *Ut pictores fictoresque, & qui*
figmentis (al. filamentis) liciorum contextas imitantur effigies; & num quis alius
 narret effigies hominum ex liciis contextis, ut hoc loco *Didonis & Aeneae*,
 factas fuisse; numque huc pertineant ad fingendi modum *laneae effigies*, quas
 memorat *Horat. lib. 1. Sat. 8.* & *Festus* in voce *Pilae & Laneae*; quia ex laneis
 vittis possunt videri factae esse, Vale, a. d. xli. Cal. Jan. cicoclxxxi.

EPISTOLA CCCCXLIV.

GISBERTUS CUPERUS

Nicolao Heinsio S. D.

Vianam.

Licet quae accessiones factae sunt meae dignitatis ex fama proculdubio intellexeris; tamen non potui non eas ad te mittere, & significare, me successorem τῷ μακαρίῃ Ter-Borchio datum, atque summis patribus patriae adscriptum esse. Peccarem enim in amicitiam nostram, si operas meas tibi non offerrem, teque certiore facerem tunc primum fructus me percepturum Amplissimi honoris bona fide, si qua re commodis tuis inservire poterō; cujus meae perpetuae erga te voluntatis has litteras veluti obsides mitto. Quas a. d. x. Cal. Dec. & a. d. xii. Cal. Jan. posui quaestiones, velim quod commodo fiat, illustres; neque enim mihi vel in emendando Hygino, vel explicatione vocis *Penaces* satisfacere possum, nisi tuum accedat suffragium. Non ignoras I. saepe in E. mutari, & *Pinacothecam* occurrere apud Petronium, *Pinacem* apud Tertull. libro de Praef. Adv. Haereticos; *Meus quidem propinquus ex eodem poeta, inter cetera stili otia Pinacem Ceбетis explicuit.* adeo ut mirum nihil sit, posterioris aetatis scriptores ea voce usos esse. Sed ut *Penaces* Turcii me diu torserunt; ita non minus male habent *Cadalistae* Prospero, utor editione Colonienfi A. 1540. laudati in peroratione Libelli de Gloria Sanctorum: *Habes quoque, ait, in sancto spectulo non mimicas turpitudines, sed Christo sacratas Virgines. Habes Cadalistarum loco, Rebecca geminos mystice ludentes.* Videntur quidem operae theatrales esse, sed qualis vox sit, quave origine descendat juxta cum ignarissimis scio. Amicus mecum communicavit Alexandri Lycopoli-tae librum adversus Manichaeum, quem ex Bibliotheca Medicea descriptum testamento ipsi reliquit *Rulaeus*, verbi quondam Divini prope Harlemum interpres. Titulus operis hic est: Αλεξάνδρου Λυκοπολίτου ὁπισρέψαντος ἐξ ἐθνῶν πρὸς τὰς Μανιχαίου δόξας; & initium, Ἡ Χριστιανῶν Φιλοσοφία ἀπλή καλεῖται; αὐτὴ δὲ ὅτι τὴν τῆς ἡθικῆς κατασκευὴν τὴν πλείστην ὁπμιέλειαν πιεῖται. Hic auctor num editus sit velim me doceas: fieri enim posset, ut eum, si non est vulgaris, Latinitate donatum & notis illustratum luce publica donem: litteras hasce ad *Magliabequium* cures rogo: Vale, Daventr. pr. Cal. Apr. cicioclxxxii.

EPISTOLA CCCCXLV.

GISBERTUS CUPERUS

Nicolao Heinsio S. P. D.

Vianam.

Devinxisti me plurimum, quod horas aliquot, quas tam feliciter illustrandis & emendandis veteribus auctoribus impendis, dederis curae meae,

Aaaaa. 3

ma-

magne Heinſi: ſed, quod reſtat, rogo vehementem in modum; ne me celes quae *πνηροῦ κόμματ* eſſe, & limam doctrina praeſtantium virorum non ſuſtinere poſſe viſa tibi ſunt. Paginas nonnullas animadverto notari; ſed quid monſtri alant juxta cum ignariſſimis, ita ſcilicet foetibus noſtris blandiri ſolemus, ſcio. Recte igitur mihiſque gratiſſimum facies; ſi docueris, quid emendandum vel addendum ſit locis, quibus ago de *Furiarum* vel *Eumenidum* aliſ; de *corona civica* & verſibus Ovidii tui, *Augeat imperium* &c. de *Matronis Veditantibus*, & *Fano Herarum Auſcarum*; de *Diana Maga*, *Artibusque Dardaniis*; de *Cultris Lampſaciiſ* & *viſtimâ Priapo* oblata. Ea enim omnia video te *ἰβελίζεν*; & ut optimus Ariſtarchus eſ, ita nullus dubito, quin merito haec vel eliminanda vel mutanda judices; quod te ſignificaturum fidem facit ſingularis illa, qua me complexus jam dudum fuiſti, benevolentia. Quid, quaefo, ſentis de Gemmis imagine Socratiſ ſignatiſ, quas edidit *Chifletius*? an haec omnes ad eum, qui Deorum hominumque judicio ſapientiſſimus eſt judicatus, poſſunt referri? an ſerio ſculptae; an potius Comicae perſonae ſunt, & Socratem deridendum propinant? an tandem nonnullae ad Baſilidianorum figmenta & nugae meliori jure poſſunt referi? *Bomius* jam Apotheoſi manus admovet; ſpero illam brevi abſolutum iri. Vale plurimum; Hagae-Com. Cal. Jul. St. Gr. *ciōiōclxxxī*.

EPISTOLA CCCXLVI.

GISBERTUS CUPERUS

Nicolao Heinſio.

Vianam.

NOn in hunc uſque diem rejeciſſem reſponſum, quod literiſ tuiſ debeo, niſi interveniſſent negotia, quae, cum fuerint alicujus momenti, me in Gelriſ longiuſcule agere, inde Hagam excurrere, pariliſque feſtinatione exactiſ ibi diebus *xii*. redire coëgerunt, Heinſi Illuſtriſ. Te autem mihi gratulari ſplendidam provinciam habeo gratiaſ, & voluptatem ex ea magnam capere gaudeo ſerium in modum. Quae de *Aſteriſ* miſiſti erudiſſima perplacent; *Penaceſ* pro *Pinaceſ* poni, donec, qua vales ingenii felicitate; certiora doceas, perſuaſuſ ſum. De *Boeotia* & *Aeolio* nihil monet *Munckeruſ*, & eſt quod lacter, non plane tibi diſplicere conjecturaſ meaſ. Alteriſ *Bomiorum* moſ Apotheoſeoſ editionem moratur; ſed tamen propediem praelo ſubjicietur. Junxi illi varia monumenta antiqua; quibuſ illuſtrandis cum valde inſerviturum ſit marmor, quod in libriſ Roma ad te paucos ante annos miſſiſ exſtat, & in quo Hercules ſagittis aveſ, ut reor, *Stymphalidaſ* petit, rogo, ut ecſtypum ejus una cum *Saliſ* in iſſdem voluminibuſ, quae nihil niſi marmora continent, & una tecum tabulae in inſtruſtiſſima bibliotheca adſidens evolvi, ancilia portantibuſ mittere, quod commodo fiat, veliſ: Vale plurimum, Vir magne, & me amare perge: Dav. ipſiſ Cal. Juliſ, *ciōiōclxxxī*.

EPISTOLA CCCCXLVII.

GISBERTUS CUPERUS

Stephano le Moyne S. D.

Leidam.

V Erbis vix exprimere possum, quam incredibilem voluptatem ceperim in legenda magna Variorum Sacrorum parte, quae hoc anno juris publici fecisti. Delectarunt me certe immensum cum Antiquitates ecclesiasticae & profanae eleganter adeo & praeclare explicatae; tum utriusque generis auctores, qui eas memoriae & posteritati consecrarunt, emendati tam feliciter. Et cum animadverterem in prolegomenis ad examen revocari Themistii intricatissima verba, facere non potui, quin ad te mitterem, quae mea de iis sit sententia. *Joh. Harduinus* in nova Oratoris illius editione, putat illa inutile glossema esse, & nullo modo cohaerere cum loquentibus; verum ego, οὐ μὰ Διὰ, ἐκείνου τοῦ παλαιῦ liberali assero causa manu. Neque tamen existimo Themistium vel ad Christum cum *Petavio*, vel ad Peregrinum cum *Petito*, vel ad Polycarpum, vel denique ad Juniolem aliquem & novum Empedoclem respexisse, sed solum sibi ante oculos habuisse veterem illum philosophum, cujus vitam Laërtius nobis conservavit. Vertunt quidem Graeca Eruditi interpretes, *non veterem illum Empedoclem intelligo*, & ita videntur alios induxisse, ut crederent novum vel juniolem Empedoclem celebrari, cujus exemplum imitabatur Jovianus Imp. Sed eos falli plane persuasus sum, & particula etiam negativa retenta arbitror longe alium horum verborum sensum esse. Scilicet post ultimum οὐ repetendum Φαῦλόπερον ἐξηγείται, & Graeca verti debent, *Sed & ipsorum jura non deterius Empedocle explicat; non, per Jovem, deterius explicat Empedocle illo vetere*. Adjicit admirandi & affirmandi formulam Themistius, ut magis imperatorem extolleret, nec respicit mea equidem sententia ad alium juniolem, verum Empedoclem παλαιὸν appellat, quia revera talis erat; quomodo apud Catullum occurrit, *Batti veteris sacrum sepulchrum*; & priscorum hominum eruditio praecipue admirationi est. Quid autem olim quoad religionem vel superstitionem gentilium constituerit Empedocles, mihi equidem latet; & quamvis huc quodammodo referri possit ἰσότης πολιτικὴ, quam ille Agrigentinis suavit, aliud tamen quid significare Themistium voluisse ut credam facit cultus, de quo loquitur, divinus. Ex Suida quidem notat *Harduinus* Empedoclem consuetudine Deorum esse usum, & iis didicisse, ὅπη τοῖς ἀνθρώποις χαίρουσι, καὶ ὅπη ἀχθονται, quibus ritibus & obsequiis placare Deos homines possent, quibus offendant; cum ceteri mortales in explicanda Deorum natura & cultu conjectura solummodo & opinione aut omnino errore ducantur: sed Suidas Viro Doctissimo imposuit. Exstant quidem illa in voce ἐμπεδοκλή, sed non referenda sunt ad Empedoclem, verum ad Pythagoram, uti satis superque patet ex lib. 1. cap. 1. Philostrati de vita Apollonii, ex quo haec verba desumpta sunt, & unde constat pro Ἀπολλωνίῳ ᾗ, rescribi apud Suidam debere, ἑαυτῷ δὲ, uti etiam:

etiam ad Pythagoram referatur. Veniam, Vir Magne, dabis spero libertati, quam mihi non sumpsissem, nisi cognitum haberem & perspectum, te libentissime eos docere velle, qui ejusmodi sunt mentis caligine, ut luce, quam huic loco affudisti, necdum frui possunt: Vale plurimum: Hagae-Com. Cal. Aug. 1674.

E P I S T O L A, CCCCXLVIII.

RADBODUS HERMANNUS SCHELIUS

*Nicolao Heinsio S. D.**Holmiam.*

QUOD Claudianum tuum nobis dedisti, vir nobilissime, multum tibi debeo publico nomine, multum meo: cum enim tantus Poëta purus, incorruptus, & jam sui similis, ingens beneficium, tum tuis hoc erga me meritis adjiciendo, & me tam egregio opere donando effecisti, ut ego quidem quidquid in Claudiano intelligerem, & proficerem, hoc omne ut muneris tui agnoscere debeam. Cum tamen te dignum, quo tibi gratias agam, praeter gratam voluntatem, nunc nihil inveniam, parum abest, quin plebis more faciam, quae solet a bene de se meritis nova munera postulare. Oportet enim vos paucos, qui hodie sustinetis labantes litteras, illustrare hoc nostrum seculum, tum similibus scriptis, tum vestris meditationibus, quibus etiam antiquos redditis, aut actum erit de literis. Nec vero sinit illa divina vestra Princeps (sed cur non & nostra, cum in literis etiam regnet, & ab omnibus, qui eas amant, merito adoretur) ne illa inquam sinit, ut beatos & caelestes illos Spiritus, quos quotidie a sacro ejus ore hauritis, & vobis jucundissima vestra pectora subjiciunt, nobis invideatis: sed tu, quidem scio, nos jubes securos esse; *Vossius*, quid rerum agat plane ignoramus: confido tamen fore, ut brevi ostendat nobis scriptis suis, maximam Reginam non relegasse beneficiis suis ad septentrionem eruditionem & ingenium ejus. Saluta eum quaeso meis verbis. Vale, vir eximie, & me ama. Zwollae XVIII. Decemb. CIOICL.

E P I S T O L A, CCCCXLIX.

R. H. SCHELIUS

*Nicolao Heinsio S. D.**Hagam.*

CUM alia ex aliis mihi hinc nascantur negotiola, quae me adhuc tenent districtum, & ut nunc se res dant, ad Idus usque Jan. retentura, illud certe effectura videntur, ut meum mihi in Hollandiam iter in longiorem, quam velim, diem sit conferendum; volui has ad te dare, quo abs te peterem, ut me de tuo itinere, si tibi illud brevi suscipiendum sit, faceres certiore.

In-

Intellexi enim nuper, quamvis non satis certo auctore, te praemissis bibliotheca & impedimentis media hac anni hyeme in Sueciam properare, & ad viam jam accinctum esse; nolim hoc quidem verum esse, si tuae tamen publicaeque res ita jubent, illud te etiam atque etiam rogo, ut tuum hac transeuntis complexum nobis ne inideas. Quando enim erit deinde ut te videam, quem nobis ultimi septentriones jam poene eripient, dividant certe cum patria. Nescio an tanti sint, quae illic geruntur. Quod si mihi ratio itinerum atque dierum tuorum nota esset, Zwollae certe, qua tibi est transeundum, te viderem: nam totum jam mensem Januarium in illo tractu mihi agendum, deinde in Hollandiam est excurrendum. Sed res tuae, uti spero, lentiores erunt, tuo tamen commodo. Princeps hujus ditionis urbs etiam nunc obsidione premitur, magnis etiam operibus circumplexi sunt obsidentes, multis aggeribus, quo hiberno amnis torrente inundetur, sed commeant ultro citroque nuncii, & jam spargitur iterum aliquid de conditionibus: Hic populus collationibus, & tributis attritus, interim luit hujus furoris poenas, unde nec ordo, nec poene homo quisquam causae huic favit, praeter satellites, & Lojolitas paucos, quos ajunt strenue clamare, non Rempublicam tantum, sed summam religionem agi. Nubem illam seditionum gravidam haeresim parturire, ac brevi, ni obviam eatur, parituram, & similia, quae apud paucos fidem invenient. Dum haec scribo nuntiatur mihi Monasterienses heri tres legatos Coesveldium ad Episcopum misisse, qui de pace agant, sub illis conditionibus, ut putant, quae antea Hagae scriptae fuerunt. *Wilachius* legatus, qui praest exereitui, comitatur eos. Vale, Vir eximie, meque amare perge. Ante diem iv. Kal. Jauuar. MDC LX. Si quid ad me litterarum dare volueris curabit plurimum bibliopola, ut recte perferantur.

EPISTOLA CCCCL.

R. H. SCHELIUS

*Nicolao Heinsio S. D.**Hagam.*

BInas abs te accepi literas, quibus adhuc respondere superfedi, non solum quod ipse ad vos cogitarem, sed etiam ea de causa, quae me maxime ad respondendum poterat impellere: videbam enim te paulo amantius; quam par est, de nugis meis sentire, eaque abste extolli, quae corrigi mallet & emendari, quamvis enim a te laudato viro probari gauderem sane; & paene triumpharem, non is tamen ego sum, qui adeo mihi placeam, ut non intelligam, quid inter judicium & benignitatem tuam intersit: utinam ista vestris paucorum oculis digna essent, caeterorum ego judicia haud magnopere timerem. Sunt autem talia, tum librarii tum typographi, tum etiam mea negligentia, ut multis in locis eorum me pigeat pudeatque: sed haec omittamus; illud gaudeo, & jam gratulor Reipublicae literariae, quod brevi intelligo fore, ut tuas in ingeniosissimum Poëtarum curas videamus. Et tu hinc excusas μικρολο-

Tom. II.

B b b b b

γίας,

yas, & in tenui laborem, quasi illa parva sint, quae quia recondita sunt, nec cuivis obvia, vulgo videntur, nos certe eo plus tibi debemus, quod non perfunctorie hoc egisti, quodque ea etiam sanasti vulnera, quae quia cicatricem duxerunt, abscondunt deformitatem suam & fallunt eos, qui oculos non habent, quibus veram Scriptorum pulchritudinem sanitatemque intueantur. De Urbicio, quod ad amicos scripsisti; multum tibi debeo. quamvis enim non levi conjectura ductus eum Africani, Mauricii, Leonis, quam veterum Romanorum similiorem esse, omnino mihi persuadeam, nec quicquam expectem miri ab istis Graeculis, quibus ut plurimum extera placuisse, ne minus disciplinae, quam linguae Romanae pertaesum fuisse, comperior, attamen, quum haud paulo plenior illis alteris esse, & magnum nomen, Hadriani Imperatoris praeferre intellexerim, vellem sane videre mihi eum contingeret, priusquam ea, quae in hoc genere habeo annotata, digeram ipse, aut librario tradam describenda. Quod si *Schefferus* jussu Reginae editionem hanc suscepit, nolin amicis in Italia ultra molestus sis. Tibi autem pro tuo illo erga me meaque animo etiam atque etiam gratias ago. Munus Residentis apud Suedos, quamvis novum non sit, quia tamen iterum suscepisti, tibi patriaeque faustum, & felix esse volo. Equidem mallet patriam aliter agnoscere bona sua, & hoc rerum tempore domi potius quam foris virtute & consilio tuo uti, quia tamen neque aliter illa sapit, neque res tuae ab illo honore videntur alienae, feremus sane. De consensu deputatorum nostrorum noli dubitare, siquidem, ut spero, res per absentiam illorum nondum peracta est: non enim novo honore augeris, sed pridem tibi delato munere fungi juberis. Si quid interea ope vel opera mea tibi utilis esse ulla in re possum, fac illud, quaeso, ne ignorem, novo beneficio me tibi obstringes. Vale, nobilissime & celeberrime Vir, meque amare perge, raptim Amstelodami 19. Novemb. 1660. Volebam sane Hagam venire, sed jam susipientem hoc iter revocant, ecce domestica quaedam negotia, a quibus ubi me expedivero, ad vos, ut spero, recurram: Iterum Vale.

E P I S T O L A CCCCLI.

R. H. SCHEL I U S

*Nicolao Heinsio S. P. D.**Holmiam.*

CUM te nuper ad iter Suecicum parares, jamjamque a nobis discessurus, non potui non irasci tum molestissimis occupationibus tuis, tum meis, quorum dies adveniebat, negotiis, quod neque tu eo, quo constitueras die Amstelodamum venire, neque ego ibi diutius commorari & adventum tuum praestolari possem, haesi quidem quantum licuit moras usque nectens, & sperans fore, ut mihi unum illic atque alterum diem tecum ponere, aut saltem videre te iterum & intelligere contingeret, si qua in re tibi absenti utilis esse aut gratum facere possem: sed utrumque frustra, non licuit tum mihi tam beato esse:

se: Tu tamen tantis districtus negotiis mei non fuisti immemor, & cum ipse adesse non posses; egregium ingenii tui foetum nobis dedisti; misit enim ad me tuo nomine *Elzevirius* incomparabiles istas tuas in Ovidium curas, nondum quidem perlegi totum opus (nam paucis ante diebus, quam in Hollandiam navigarem acceperam) legi tamen ex parte, nam & antea inspexeram, & nunc est mihi assiduus in itinere comes, in cubiculo contubernalis, nec mihi ullus fere dies abit, ut non abs te multa discam. Putidiusculus tibi viderer, quae tua est modestia, si quod res postulat hîc dicerem, neque sane opus est; dicet hoc melius literatus orbis, dicet grata posteritas, quando tuum nomen ita cum Ovidiano conjunxisti, ut alter sine altero celebrari non possit. Christinam Reginam te in itinere vidisse intellexi, addunt, quod verum nolim, nihil illam praeter verba blanda & magnifica dedisse. Legatio ex Britannia domum revocata, per causam itineris, quod Rex suscepturus est, sed nihil est actum, videtur istuc genus more suo superbum & intractabile, & jam novo connubio insolentius: ferunt enim praeter ea, quae praestare Lusitanus debet, esse in pactis dotalibus, ingentem belli cum vicinis populis materiam, Africae, imo Occidentis & Orientis portus non paucos alienae plerosque ditionis, & vana alia, nisi armis quaerantur. *Tanaquillum Fabrum* diem suum obiisse credo te jam accepisse, si quid hîc in opera aut re mea est, quod pro te possem; fac, id ne ignorem, mihi nihil certe gratius facere poteris, quam si libere & antiquo more amicitiae jure utaris. Vale; & me, ut amas, ama, Amstelodami 2. Julii 1661.

EPISTOLA CCCCLII.

NICOLAUS HEINSIUS

Radbodo Hermanno Schele, Viro Illustrissimo S. P. D.

NAsonem meum, perillustris & Nobilissime Vir, sicut jusseram a bibliopola *Elzevirio* tibi traditum fuisse, laetor, ut qui maxime: non quod aliquam lucubrationibus istis gloriam captem, praesertim apud te; cui imponi non potest, sed quia affectum meum unice probatum tibi ac perspectum esse cupio. Satis enim magnum laboris praemium videor tulisse, si tersissimum scriptorem locis nonnullis castigatiorem emendatioremque, quam haecenus est circumlatus, erudito orbi sisto. Auguror fore, ut ejus aliquando praestantiora exemplaria inveniam, quorum ope primam editionem secundae tertiaeque curae plenius exornent. Hoc si non succedit, attentius certe perpendam atque accuratius, quae nunc properanter & tumultuaria opera chartis illevis. Urgent interim Claudianum *Elzevirii*, quem typis majoribus nunc edant. Recensebo igitur scriptorem non inelegantem, & si potero, notis meis hîc illic intexam, quae ex Vaticanis exemplaribus post primam editionem observavi. Utinam noster *Graevius* ex Germania copias auxiliares mihi, quas promisit, addu-

Bbbbb 2

cat.

cat. Sed opinor illum a nugis meis nuper adeo nauseabundum discessisse, ut malit ineptiarum me tandem desinere. Promiserat, inquam, membranas Claudiani haud contemnendas ex Erfartana bibliotheca, quas an impetrarit mihi non scio. Quicquid sit, mos gerendus erit flagitatori *Elzevirio*, quem totos quatuor jam annos traho, & vana expectatione Claudiani jacto. In itinere Suecico ne opineris otiosum me fuisse, Lucanum cum satis multis scriptis codicibus commisi, qui quanquam speratam opem non ferrent, sunt enim in eo scriptore naevi plerique admodum inveterati, nonnulla tamen post magnum *Grotium* restituisse mihi visus sum, quae tibi fortasse non inprobabuntur. Atque hoc Serenissimo Electori Palatino a me datum est. Post Claudianum editum, Valerio Flacco & Silio Italico, poetis minime contemnendis, manum admovebo. Ubi solis fere conjecturis locus erit, cum scripta horum exemplaria nulla aut rara admodum inveniantur. Habes de quisquiliis meis, plura etiam, ni fallor, quam velles. Praeclarus ille tuus de Re militari veterum commentarius jam Thrafonicas manus hîc perambulat, ne tu opineris, solis illum viris eruditis notum esse. Exemplar, quod tua munificentia possidebam, prae dae cessit summis imperatoribus, ut sibi videntur, & Pyrgopolinicae Plautini aemulis, nec retrahi hactenus ex fuga potest. Sed ut joculari desinam, *Wurtzius* peditatui regis nuper praefectus, qui Cracoviam & Stetinum adversus hostiles insultus egregie defendit, literarum minime rudis, legit & laudat commentarios istos tuos, quos me suggerente nosse primum coepit. De republica ut aliquid addam, videntur Sueci ab amicitia foederatorum Belgarum nequaquam nunc abhorrere. Arctioris etiam foederis ineundi spes non vana affulget. Sed nostri homines, quam illud e re sua arbitrentur esse haud scio. Doleo vehementer non licuisse mihi statim die apud Amstelodamenses tibi occurrere. Sed quibus tricis laqueisque tunc circumventus atque implicatus essem non ignoras: veniam itaque dabis, quod promissis defuerim. De studiorum tuorum ratione ac instituto doceri nonnihil cupio. Scio enim otiosum te nunquam esse. Proximis meis aliquid criticarum fortassis nugarum, quod aut Lucanum spectet, aut Valerium, aut Silium (nam recens sum ab illis perlegendis) tibi obtrudam. Vale, Vir Perillustris, & *Graevio* nostro absentium amicorum lentulo salutatori, plurimam, ni molestum est, meis verbis dic salutem, si quando hominem habebis obvium. Dabam Holmiae Suecorum A^o. CIOICLXII. a. d. XVII. Augusti Juliani.

Morte *Tanaquilli Fabri* multum rixarum ac jurgiorum compendium erit: quo nomine quanquam gaudeo, sum enim litium fugitans omnino, ac putidas ejusmodi contentiones odi vehementer, est tamen quod eo e vivis sublato doleam, idque literarum nomine, quas ornare potuisset, atque augere, homo tersus ac politus.

EPISTOLA CCCCLIII.

R. H. SCHELIUS

*Nicolao Heinſio S. D.**Holmiam.*

ET ſi moleſte fero te tanto terrarum mariumque ſpatio a nobis diſjunctum, in extremo ſeptentrione vitam agere, teque hîc deſidero quam qui vehementiſſime, tuo tamen & literarum nomine non poſſum non gaudere. quod illic in libera propemodum legatione, & a conſpectu iſtorum malorum averſus, quibuſcum hîc tibi erat conſictandum, certiſſimam nobis ſpem facias, fore brevi, ut videamus lucubrationes eas, quas & promiſiſti literato orbi, & jam debes. Nos certe jam omnia de te exſpectamus. Claudianum *Elzeviriiſ*, Lucanum Electori Palatino debes. Valerium, Silium, alios nos amici petemus, & ſi ita neceſſe ſit, frequenti potius convicio flagitabimus, quam Muſas Heinſianas ſilere patiamur. Nam Ovidius quidem hîc nos adeo non ſatiet, ut quotidie ſalivam moveat & concitet ad plura poſtulandum ejus generis. Vide, quas gratias tibi agamus, de meis autem ineptiis, quid eſt quod quaeras? ſeculum eſt cum literam nullam facio, non tam quod occupationibus aliis fuerim diſtictus, quamvis fuerim interdum diſtictus, quam quod ſpecie libertatis ſubeat deſidia quaedam dulcedo, & nescio quomodo jam me juvet nihil agere; ne tamen putes plane me deſiſſe nugari, dedi nuper librario deſcribendas conjecturas aliquot meas in Tacitum & dialogum de Oratoribus, non illas quidem pleraſque veſtris dignas oculis, ſed quaſdam tamen, niſi me mea fallunt, veri non abſimiles. De meis commentariis quod ſcribis mihi jam non eſt novum, perſuaſiſti jam pridem Gallis aliisque hominibus doctis eſſe aliquid nugae noſtras, quin illic invenias quoque, quibus imponere poſſes, nullus dubito, praefertim cum jam iterum in ordinem illorum hominum adlectus ſis, qui quaeſcunque cauſas & agere & obtinere ſoleatis. Tu tamen deinde ex Thraſonibus indoctiſſimos quosdam potius legas ſuadeo, nam quo quiſque minus haec intelliget, eo facilius tibi credet. Sed omiſſo joco, agnoſco hîc iterum illam jam toties perſpectam mihi benevolentiam, qua non me tantum, ſed etiam mea complecteris. *Tanaquillus Faber* revixeritne, an diem ſuum obierit illic, dubitamus. *Graevium* tuis verbis & amico illo convitio ſalutavi, agnoſcit culpam & emendaturum ſe promiſit. Is jam eſt Profeſſor Ultrajectinus, paucos intra dies Daventria diſceſſurus. Urbicius Chriſtinae in quas terrarum oras, & in quas manus ſit delatus, & an brevi proditurus ſit velim ſcire: conjecturas tuas, quas promittis, avide expecto, Vale, decus noſtrum Zwollae 30 Septemb. 1661.

Perillustri Viro. Radbodo Hermanno Schele S. P. D.

Cum tenerrimo semper affectu me profecutus sis, Vir Perillustri, otii negotique omnis ni rationem exacte tibi reddam, injurius omnino sim in singularia illa monita, quorum nodo arctissimo me jampridem adstrinctum tenes. Quapropter quod postremis tuis in occupationes meas, quo loco essent & quid potissimum molirentur, inquirebas, id in eo curiositati tuae respondebo primum, mox ad alia sermonum translaturus sum. Claudianum scis me promississe *Elzevirii*. Quo tamen invitus curas confero, quod frustra speravi hactenus subsidia veterum librorum in promptu futura novam scriptoris elegantis editionem molienti, quae pro expectatione mea nulla omnino adsunt. Nisi quod optimum codicem Vaticanum mihi contigit evolvere, cum secundo Italianam perlustrabam. Quem quoties in notis meis testem appello, quod facio frequenter, toties *Livineio* credendum fuit, qui eo usus erat satis negligenter. Commisi praeterea quinos ejusdem bibliothecae aut senos codices cum vulgatis libris. *Pricaei* quoque & Farnesianas membranas excussi. denique collationes Pulmannianas Belgicorum codicum, quas in vasto commentario tanto opere crepat *Barthius*, *Langermannus* a *Barthio* redemptas mihi tradidit utendas, additis scripturae discrepantiis ex Helmstädiensi libro collectis. Sed in his nihil fere, quod primam Claudiani editionem longe ornatiorē possit reddere: speraveram a *Gudio* excepta ex optimo Cujaciano libro, quod ea apud Bituriges dicerentur extare, quo ille itineris cursum praeterito vere sese directurum pollicebatur, sed cum nullis ille literis me postea convenerit, vana spe lactatum me fuisse opinor. Quare cunctationem abrumpam, meque typographorum desiderii commodum tandem praestabo. Interim L. Apulei Metamorphosesolvebam nuper, scriptum sane perquam ingeniosum, sed Deus bone? quam mendosa omnia, quam foede depravata? idque eo magis mirandum censeo, quod summo ingenio summaque eruditione viri in eo scriptore castigando jampridem desudarunt. Ducenta plus minus loca emendavi in transcurso, & aliud agens. Sed solis conjecturis indulgendum fuit, rei, ut scis, parum certae, etiam cum videtur certissima! Si membranae veteres ac fidae se offerent mihi, auderem post plurimos aliorum conatus ego quoque fortassis in hac palæstra luctari. Verum nullas vidisse me recordor, praeter Mediceas, quibus *Lindenbrogius* est usus, sed ni fallor, minime diligenter. Post Claudianum tamen absolutum de Valerio Flacco Silioque cogitabitur. Nam ad Lucanum etsi satis multa observavi, consultum tamen minime videtur, ut eo manus admoveam, ne Spanhemianam messem involasse videar. Cui tam observata mea libens committam, sive ea in lucem proferenda, sive supprimenda arbitrabitur. Nasonem e manibus necdum possum deponere. Offerebat se mihi nuper locus ille Fast. 1. vf. 452. qui curis prioribus me fugit.

Er-

*Ergo saepe suo conjux abducta marito
Uritur in calidis alba columba focis.*

Est enim scribendum, quamquam membranis omnibus invitis,

Uritur Idaliis alba columba focis.

Sequentia confirmant: quibus anserem Ifidi, Deae nocti Gallum immolatos fuisse innuit. Cur hoc loco praetereat, quibus avis columba consecratur? Possit etiam legi, si vestigiis Mazariniani codicis insistamus, in quo *ignitis focis* exaratum erat,

Uritur in Gnidiis alba columba focis.

Veneri enim caedebatur columba. Scis illa Propertiana,

Nunc cape torquatae, Venus o Regina, columbae,

Ob meritum, ante tuos guttura secta focos.

Addam alterum locum Trist. i. eleg. ii. vs. 102.

Si satis Augusti publica iussa mihi.

Monui notis in vetusto codice *visa* extare scriptum. in nonnullis etiam *tuli pro mihi*. Opinor antiquitus exaratum fuisse, *publica visa lus*. unde *tuli & mihi* factum sit, cum *salus* fieri debuerit, pro *satis* etiam *laris* ex pari conjectura repono, *Si laris Augusti publica visa salus*. Si salutem domus Augustae cum salute publica censui conjunctam esse. In antiquis inscriptionibus ista formula non semel occurrit, SALUTI DOMUS AUGUSTAE. in vulgata scriptura nihil commodae sententiae aut sensus est. Plura in Nasone poteram, quibus nunc congerendis supersedeo. Tertius tamen Claudiani locus, sed levioris momenti huic cumulo accedat. is est libro primo in Eutrop. vs. 140.

— — — *pro quisquis Olympi*

Summa tenes, tantone libet mortalia risu

Vertere?

Durum & insolens videtur, *risu mortalia vertere*. quare minimum abest, quin pronuntiem scribendum esse, *tantone libet mortalia risu vertere?* quomodo apud Luc: *tantisne evertere dixit, Me superis labor est*. Sed desino ineptiarum. De meis in Silium & Valerium conjecturis alias a me agetur. Tuas in Tacitum avide videre desidero. Accepi proximo diebus a Johan. Scheffero viro doctissimo epistolam, in qua cum aliis in Cornelium Nepotem & Apulejum has in Tacitum mihi proponit, quas tui facio arbitrii, necdum enim licuit attentius loca examinare. Vita Agricolae cap. xii. *patiens frugum, fecundum*. Vocem *fecundum* glossema esse censet, quod sequens suadeat *mitescunt*. Ibid. cap. xxiii. *inventus in ipsa Britannia terminus*. legit, *in ipsa Brittaniae*. Ib. cap. xxxi. *Neque enim arva nobis, aut metalla, aut portus sunt*. legit aut *pastus sunt*. Cum de portibus & eorum exercitio nil legerit; de pecore vero ex Brittania copiose misso doceat Caesar v. Belli Gallici cxli. Mox, *Et libertatem non in praesentia latu-ri*. Vetusti libri Rhenano laudati, *& in libertatem non in praesentiam latu-ri*. Scribit, *& in libertatem, non in praesentia mala duri*. *Duri in mala*, pro ad mala. Cap. xxxiii. *& vix monitis coercitum militem adhuc ratus*. Urfini liber vetus, *& vix minimentis coercitum militem accendendum adhuc ratus*. Scribit

&c.

Et vix munimentis coercitum militem adhortatus. nam accendendum natum ex proximis adhuc ratus existimat. male; Urfiniani libri proba lectio. Sic martem accendere cantu Virgilio: reddidi id verbum semel iterumque Silio, pari significatione: militi sponte in pugnam prono stimulos addidit oratione hortatoria. Cap. xxxvi. & in aperto pugnam, legit in aperta. & exponit de Brittannis inermibus nec satis munitis propter breves cetras. cap. xlii. paratus simulatione. mallet parata. Prandebat nuper mecum vir optimus, quando aurem illi velli de edendo Urbicio. At ille videbatur malle de Philosophia Pythagorica prius publico committere, & Phaedri fabulas. Non desinam tamen instigare vel tua causa, cujus doctissimas de Re militari veterum observationes apud me vidit primum, & valde laudavit. A Graevio & Gronovio diu est, quod nullam vidi litteram, Hujus occupationibus ignosco facile, illius non possum. Gratulor tamen fortunis, quas jam secundas nuper expertus est. Vossium nostrum de Luce commentarios praelo commisisse intelligo. Mathematicos ne hoc scripto, irritet valde metuo, cui multa paradoxa inferuit, quantum audio. Vale, Vir perillustis, decus ac delictum Musarum. Dabam Holmiae Suecorum A°. cicioclxr. a. d. ^{viii} _{xviii} Novemb.

EPISTOLA CCCCLV.

NICOLAUS HEINSIUS

V. Cl. Radbodo Hermannno Schele S. P. D.

EXortae nuper inter Suecos ac nostrates mercatores turbae in Africano litore, (quibus componendis totum me diem oportet.) ut curam Musarum procul nunc habeam, effecere. Lectione tamen literarum tuarum respirare mihi visus sum, post summas animi angustias, & revixisse quodammodo; tantum leporis ac suavitatis ille conjunctum cum plurima doctrina prae se ferunt. Claudianus meus jacet interruptus, ob causas, quas jam narravi. Auguror tamen fore, ut inchoatum pensum mox detexam, ad Valerium Flaccum inde transiturus, quem cum codicibus Vaticanis a *Langermanno* in dies expecto collatum. Non quod praesidii multum inde lucubrationibus meis sperandum sit, est enim Vaticanus liber ut veterrimus, sic mendosus valde, & ex quo editiones Flacci nostri conflatae videantur, caeteris duobus aut tribus ejusdem bibliothecae exemplaribus vix duorum saeculorum senium ostentantibus, sed quia cum Carrionis libro in plurimis consentit, operae pretium fore indicavi, ejus quoque auctoritatem si nonnunquam adhiberem. Ad Tacitum quae observasti longe eruditissima ac ingeniosissima esse censeo, quaeque de caeteris conjecturis salivam mihi moveant plurimam. Utinam sit, qui Mediceas ac Vaticanas scriptoris prudentissimi membranas de novo evolvat: quae si manibus peritis terantur, fore certus sum, ut eruantur multa, quae Pichenam aliosque latuerunt. Quod mihi usu venit in evolvendo Puteaneo Heroidum Nasonianarum codice, quem cum & Scaliger & Salmasius, & Puteanus ipse Claudius, & Johannes Wouwerius alique viri minime indocti ante me trivissent, quorum schedae ex illo exemplari excerptae in manus meas pervenere,

non

non pauca tamen inde deprompsi, quae sagacissimas horum omnium nares praeteriere non animadversa. *Salinerium* Taciti interpretem an videris haud scio, cujus conjecturas *Gronovius* a me utendas accepit. De *Moro* quae nuncias festiva sunt, nec haec mihi intellecta. invideo felicitati toties impune peccantis, nobis tam beatis esse non licuit, etsi nec Theologis, & Venerem adversam quidem, sed nusquam tamen averfam, expertis; cum ille ea secunda praepostere utatur. Si cathedra Parisina excidit, Lampasum vasa transferat suadeo, ubi mutoniatam Theologiam istam cum laude exercent ac profiteatur. Ad Nasonem rarius devertō. Nunquam tamen elegantissimum poetam in manus fumo, quin observationibus meis aliquid de novo accedat. Ut hesterno die, cum in locum illum incidissem Met. xii. vs. 466. quem intactum reliquerant castigationes meae, quod nihil succurreret, quamvis de menda certo, quo ulcus sanare possem:

*Qui clypeo, galeaque Macedoniae sarissa
Conspicuis.*

Macedonia syllabam secundam corripiat necesse est. Quare poetae *Macetarum*, si-
ve *Macetum* nomen pro nomine Macedonum passim adhibuerunt. Nec verisimile est doctissimum scriptorem in contraria solum ivisse: quid ergo? scribendum opinor

Qui clypeo & galea, Lacedaemoniae sarissa.

Sarissae quidem proprium Macedonum telum, unde *Pelleas sarissas* dixit *Lucanus*, sed tamen in usu aliis quoque gentibus fuere. *Bistonias sarissas* apud Nasonem habes in *Tristibus*. Utebantur iis & *Lacedaemonii*. *Plutarchus* in vita *Cleomenis*, Ἰδοῦσας αὐτὰς ἀπὸ δόξης & χεῖρας σαρίσσης δι' ἀμφοτέρων. Recordor & alia huc facientia me legisse, quae nunc non sunt in promptu. In *Statii* *Silvis* nuper eram illud agens, & miratus sum, post accuratam amici nostri diligentiam tam multa castiganda superesse. Adhibebam nonnullis in locis vetustam editionem *Parmae* proCUSAM A°. MCCCCLXXIII. quam aut ab aliis omnibus sub id tempus in lucem prolatis discrepare multum oportet, aut alias ab amico nostro ac caeteris *Statii* interpretibus non satis diligenter consultas esse. Ipso statim *Sylvarum* initio, *Equo Domitiani* vs. 18.

— *Exhaustis Martem non amplior annis*

Bistonius portat sonipes.

Vide quam putida sit comparatio, qua contendit generosum *Germanici* sui equum scriptor accuratissimus cum *Cantherio Martis* fatigato. Deinde si exhausti Martio equo armis, cur addit non tardo cursu illum rapi prope *Strymona*? vetus, quam dixi editio, non altius. Omnino scribendum videtur,

— *Exutis Martem non altius armis*

Bistonius portat sonipes.

Describitur toto hoc carmine *Domitiani* statua inermis ac pacata, & solo gladio accincta, atque illo quidem quieto, ut appellat ipse, hoc est in vagina condito. non procedet igitur comparatio, nisi & Martem exhibeat nobis haud armatum. Tò non altius quadrat optime & respondet sequentibus, praesertim iis, quae

Tom. II.

Ccccc

ver.

versu 48. de Germanici equo

At sonipes habitus animosque imitatus equestres

Acrius attollit vultus.

Vf. 66. *Septem per culmina montes It fragor.* vetustae editiones *montis*, unde *Martis* amicus noster. Ego *molis*, qui has duas voces pari modo confundi frequenter in membranis meminerim. *molem geminatam* versu primo hanc ipsam statuat equestrem nominarat. vf. 75. *terque ardua mersit Colla lacu trepidus, laetus mox praeside viso.* ingratus sonus vocum concurrentium *trepidus, laetus*, & quem poëtae limatiores diligenter soleant vitare, scribo, *mersit Colla lacu trepidum.* pro trepide. Pleni horum Statius ac Claudianus. Sic *laetum rubere, fictum videre* & mille talia. Sed apage hasce minutias. Epithalamio Stellae vf. 8.

Quas inter vultu petulans Elegia propinquat

Celsior assueto, divasque hortatur & ambit,

Alternum factura pedem:

τὸ *factura pedem* ut conetur interpretari vir summus, amicus noster, non ignore; sed vix persuadet. Opinor a Statii manu esse, *Alternum tractura pedem: trahere pedem*, claudicare, quod alibi Naso de Elegia dixit *subfidere*,

Clauda quod alterno subsidunt carmina versu,

Vel pedis hoc ratio, vel via longa facit.

Sed & *trahere pedem* idem

Liber in adversos hostes stringatur Iambus,

Seu celer, extremum seu trahat ille pedem.

Deinde vehementer metuo ne τὸ *celsior assueto* mutandum sit in *laetior assueto*, tum quod elegia carmen flebile, tum quod iis versibus partim amores suos deplorarat Stella, partim columbam Violantillae, quod Martialis docet, & noster hoc ipso carmine vf. 102. Mox vf. 13.

Ipsa toros & sacra parat.

Malim & *fulcra.* ut vf. 54.

Fulcra toro que deae.

Vf. 32.

— *adhuc optas, promissaque numine dextro.*

Vota paves. Immo *permissaque.* jam enim annuerant Dî votis Stellae. unde subiungit, *Pone, tua est.* Sic *permissi felix injuria voti* apud Claudianum. In Achilleidos libro 11. vf. 265. pari modo scribendum; *eripitur miserae permissus Achilles.* Vf. 41.

Hanc propter tutum Pisea lege trementem

Currere.

Nihili est τὸ *tutum.* amicus noster curis secundis *justum*, optimo sensu, sed minus poëtice: vetus editio *licuit.* Credo *libeat* a Statii manu esse. Vf. 61.

— *Cui plurimus ignis Ore.*

Cur vero *ore*, cum de facibus Cupidinis videatur agere, fortassis *Torre* scribendum, ex ligno enim faces fiebant. Vf. 80.

— — — *Summa*

Lampade parcentes & inermi strinximus arcu.

Imo

Imo *inerti*. Arcus inermis, cui sagitta deest. *iners arcus*, cui leviter excutitur sagitta, quod τὸ *stringere* confirmat. Naso, *nec mea sunt summa leviter destrieta sagitta Pectora: descendit vulnus ad ossa meum*. Met. XII. 361. *Nec tamen arbor iners cecidit: sed Crantoris alti Abscidit jugulo pectusque humerumque sinistrum*. VI. 89. *saepe natanti praelusi*: malim *praeluxi*, ut ad lumen illud alludat, quod Hero ex turri suspendebat. VI. 100. *Hic juvenum lapsus*. Non satis assequor, forte, *Hinc juvenum plausus*, & paulo ante, *Sed tibi pleetra dedit*, non *Hinc*, nam vetus editio sic. VI. 91. eadem, *tantos durasse per aestus*, non *supereffe*. quod Statianum libro v. Abascantii pietate vs. 136. *tecum omnes animo durata per aestus*, & saepe alibi. In sequentibus plurima sunt longe majoris momenti. Sed nondum te dimitto quanquam charta deficit. Versus enim nativitati Delphini Gallici a me datos perlegas necesse est. Locus in Demosthene felicissime a te castigatus est. Vale, vir illustris. Holmiae CIOICLXII. a. d. XXVII. Januarii.

EPISTOLA CCCCLVI.

R. H. SCHELIUS

*Nicolao Heinsio S. D.**Holmiam.*

Mihi quoque Welburgii mei requies & altum illud otium, quod pridem mihi praedestinaveram, & tandem tenere videbar, cito fuit e manibus extortum. Quum enim secessissem jamque in libros & literas conditus, tum alia nonnulla, tum quae rei militari veterum Romanorum illustrandae annotata passim & in schedis sparsa habeo, colligerem, cogeremque mox daturus describenda, intervenere statim amicorum & cognationum id genus negotia, quae salva officii religione non liceret praetermittere. Haec me a studiis abstractum exercuerunt in hoc tractu aliquandiu. Inde in Hollandiam fuit excurrendum, adeo quidem festinanter, ut nec spatii satis fuerit ad invisendos amicos. Gronovium tamen vidi, is nunc in eo totus est, ut Observationum suarum *Δευτέρως Φροντίδας* in lucem emittat. Livium cum ejusdem & selectis aliorum notis promittunt *Elzevirii*. Tuli & hoc molestissimi itineris (tempestatibus enim valde jactabamur) & inter hanc festinationem solatium, quod litteras tuas accepi illas doctissimas & elegantissimas cum istis versibus, teque & Delphino suo dignissimis. Hoc pretio proposito iterum adverso austro navigem. nunc reducem me exceperunt provincialia aliquot negotiola, ut instante jam Ordinum conventu solemni, eo peracto decrevi bona fide literis me reddere, & meum tandem agere negotium. In Frisiis discidii non nihil obortum est. Advocatus fisci (Procuratorem vocant generalem) magno animo opponere se dicitur pesti publicae illic jam pridem grassanti; munerum nunditationi: in eamque rem Haibosium & Scheltingam agit reos; procerum quidem non paucis invitis, quippe qui se peti per alienum latus videant, cum praeda jam parta simul & sperata; sed plebe valde secunda. Foris nihildum quod sciam peractum.

Hagae tamen ante paucos dies de selectis iudicibus, ad controversias inter Belgos & Britannos finiendas, quae res foedus Brittanicum morari imprimis videbatur, cum *Downingio* convenit. Conditiones in Angliam transmissae. Theologo isti nostro gratulemur potius, quod ad puellas, si vera est fama, rediit. Paucis quidem post diebus, siue quod ita jam ante constituerat, siue quo subtraheret se recenti famae, nec praesens in ore hominum abiret pro fabula, in Britanniam concessit. ibi jam favor Regis, plausus aulae, moresque gentis, & presbyteri verecundia fortassis non tantum vindicet eum a sinistris ejusmodi rumusculis, sed hoc etiam praestent, ne deinde pro crimine sit puellas paulo liberior salutasse. Ferent esse ibi sectam quandam hominum, summam religionem in maiestate sacerdotii & sanctitate ponentium, qui pleraque sacerdotum vitia facile excusent, nonnulla etiam tueantur, tanquam caerimonias divinas. Ista vero ineptias minime omnium vitio vertere hominibus, haud dubie castissimis & sanctissimis; sed vero omnem culpam conferre in puellas, profanum hoc genus, quod eo nequitiae venerit & improbitatis, ut tam chara Deo capitae turbare, & de statu animi deicere queat, nec in noxias tantum saevire, sed vel ob unius tam capitale noxam saepe quicquid est muliebris sexus a sacris & caetu piorum remove, & ut loquuntur, excommunicare. In hanc nationem si incidat iste noster, Lampfacum, opinor, pro sua modestia non desiderabit. Valerio Flacco quod scribis manum te brevi admoturum valde gaudeo. Est enim Poëta meo sensu haudquaquam spernendus, tum eget praecipue medica ope. De hisce ejus tibi quod videatur scire velim lib. III. vs. 143.

Has precor exuvias, o prima cadavera nostro

Linquite, ait, ferro. potius mihi dextra ferro

Gnavet opus.

Verba haec mihi videbantur imperfecto sensu abrupta ab homine sese subito corrigente & castigante, quod in mediae pugnae mole recurrit ad inertia vota, ideo eandem repetente vocem, quamvis sic quoque ibidem fortassis supersit quod offendat: sic autem distinguebam.

Has precor exuvias, o prima cadavera, nostro

Linquite, ait. Ferro potius, mihi dextera ferro

Gnavet opus:

Libro ni fallor, (non enim est ad manum) VIII.

Nec dare permissae, quamvis jubet, ora quieti:

Quamvis juvet: levi, aut verius nulla mutatione; quando haec veterum librorum scriptura est. Eodem libro non procul a fine.

— — *seque externa pro Virgine clausa Objiciat.*

scribe, *Classi objiciat.* Sed ego noctuas Athenas. Tuae in Papinium castigationes, quamvis nunc tam doctae & probabiles videantur, ut eum vel ita scripsisse, vel ita scribere debuisse pene dixerim, tamen, quia ipsum inspicere (neque enim habebam) nondum licuit, sustinebo tantisper assensionem meam: invidens enim nonnihil felicitati conjecturarum tuarum decrevi eas paulo malignius examinare. Vale, Musarum Decus. Zwollae die ^{II}₂₁ Martii 1662.

EPI-

EPISTOLA CCCCLVII.

ALBERTUS RUBENS

*Nicolao Heinsio S. D.**Leidam.*

Litteras tuas accepi, quae mihi gratissimae fuerunt, quia ex illis vidi adfectum meum erga litteratos laudari, quo uno me censeo tibi placuisse; utinam tibi illum plenius testari potuissem, tot praesertim nominibus patri tuo obstrictus, quem ut litterarum Antistitem veneror, ut patris mei amicum colo. Et enim & amicitiae in haeredes transeunt. Accedunt merita tua & variarum rerum scientia, qua parentem sequeris passibus acquis. Petri a D. *Chiffletio* catalogum scriptorum Tacticorum, quos penes se MSS. habet; causatur filii sui *Julii* absentiam, ut ex litteris ejus videbis, quas tibi mitto, ne me negligentiae reum agas. Syntagma meum de Lato Clavo pene ad calcem deductum est:

*Sed nos congeries obnubit turbida rerum,**Causidici tundunt, latrant fora, classica turbant.*

Itaque fere ab hoc amaeniori studiorum genere abhorreo, & quoniam in ea tempora incidi, quibus expediat firmare animum constantibus exemplis & praeceptis, ad Senecam saepius diverto. Sed non is sum, qui post tot Roscios hoc theatrum ascendere praesumam; Interim tamen si quid apud vos est, quod me hac in re juvare possit, candidus imperti; Parentis etiam tui sententiam de Lato Clavo scire aveo; sed haec minuta sunt; illud praecipuum, ut me tibi, Patrique tuo, quam devotissimum pari adfectu prosequaris. Vale, Vir Doctissime. Bruxellis postridie Kal. Februar. Anni *MDCCXLV*.

EPISTOLA CCCCLVIII.

ALBERTUS RUBENS

*Nicolao Heinsio S. D.**Leidam.*

Statueram non ante politissimis litteris tuis rescribere, quam indicem Tacticorum a Cl. *Chiffletio* impetrassem, sed quia ille me in dies frustratur, officii mei judico non diutius cessare. Gaudeo te novam Claudiani editionem adornare, nam cultissimus ille auctor tot adhuc mendis scatet, ut a nulla, nisi a tua manu salutem sperare possit. Est penes me exemplar Editionis Planinianae ex *Pulmanni* recensione, ad quod patruus meus, *Philippus Rubens*, Variantes Lectiones annotavit ex Codice quodam, quem P. L. litteris signat. sane in Electis suis se Claudianum cum MSS. Bibliothecae Vaticanae libris contulisse profitetur. Si tanti videtur, hasce Lectiones, aut ipsum exemplar mitam. Interim speciminis loco, en tibi ea, quae ad Gildonicum bellum notata

Ccccc 3

sunt.

sunt. A te postulo ut si quid Gruterianus tuus Senecae codex habet operae pretium, me participem facias. Vale, Clarissime Domine, & Parentem tuum meo nomine saluta. Bruxellis pridie Kal. April. Anno 1645.

Ad Claudianum de Bello Gildonico Variarum Lectiones.

Vs. 21. *Tardique gradus oculique jacentes.* L. P. L. *Latentes.* vs. 22. *Interius fugere genae. sedere legunt alii & mavult* Lipsius. vs. 31. *Non ut proculcet Oaxem.* ita P. L. vs. 112. *Patriaeque petenti.* ita P. L. vs. 115. *Quae terras humeris Pontumque subegi.* P. L. *armis. ego numeris corrigo.* ita legendum censuit Philippus Rubenius in Electis suis, cui non accedo; probo magis τὸ armis. vel etiam τὸ Humeris, ut Gronovius explicat in Statium. vs. 138. *Et fractum pendebat Ebur.* P. L. *stratum.* vs. 185. *Pubemque canoram. decoram lib. quidam.* vs. 202. *Iret adhuc in verba dolor. Isset.* P. L. vs. 220. *Undarum verberè motat. nutat.* P. L. vs. 221. *Descensura ratis. decessura.* vs. 236. *Hoc erat in fratres.* P. L. *in fatis.* vs. 238. *Tanti fit causa furoris.* P. L. *fit.* vs. 240. *Pietas infracta recedat. in fratre.* P. L. a fratre. vs. 245. *Venere Geloni. fovere.* P. L. vs. 246. *Solus at hic.* L. 4. *adhuc.* vs. 252. *Fortuna simul cum Marte pependit. mente* P. L. vs. 255. *Aptarem membra quadrigis. raptarem* L. P. L. vs. 279. *Australes Gildo condonat.* P. L. *Gildon.* vs. 282. *Refluumque malignus. malignis* P. L. vs. 287. *Deprecor haec trucibus. ne precor.* P. L. vs. 290. *An quisquam nobis devinctior. nodis* P. L. vs. 297. *Nedum puero rectore quiescet. lego, quiesset.* vs. 327. *Tyrio quo fusus Honorius ostro. fortis Honorius* L. P. L. vs. 352. *Tunc jubet acciri socerum. Tum* P. L. vs. P. L. 382 *Decurret Honorius inde.* P. L. *decernet.* vs. 389. *Est illi paribus. patribus* L. P. L. vs. 390. *Macezer fugiens. Mascezel effugiens.* vs. 408. *Si maestus squallore comas. maestae squallore comae* P. L. vs. 413. *Nunc praeceps fugiat. Hunc* P. L. vs. 418. *Heracleam suus Alcides. Herculeam* P. L. vs. 428. *Si quid pro me meruistis. doluistis* P. L. vs. 429. *Ostentate mihi. nihil* P. L. vs. 430. *Civiles abolete notas. imbelles* L. P. L. vs. 434. *Umbonum. umbone* L. P. L. vs. 469. *Armiger ad liquidam cunctis spectantibus Aethram. ab liquida c. s. Aethra* P. L. vs. 469. *Pedibus curvis innexuit Hydrum. intexuit* P. L. *Finis desideratur* P. L.

EPISTOLA CCCCLIX.

ALBERTUS RUBENUS

Nicolao Heinsio S. D.

Leidam.

GAudeo fane penes me aliquid esse, quod studiis tuis profuturum credas; Claudianum itaque quem poscis mittam, quamprimum se aliquis obtulerit, qui ad vos excurrat; aut si hoc longum & incertum tibi videtur, tabelario committam, nec enim magnae molis est. Hisce feriis Paschalibus Libros in Eutropium relegi, in quibus versus ille lib. 11. 451.

Contextit varius penetrans &c.

Diu

Diu multumque me torfit; nec expedire me potui. Itaque ad Pythium tripodem confugio, & te, Doctissime Vir, oro, ut tuam hoc de loco sententiam mihi perscribere velis; & ut facilius hoc extorqueam, stipem adfero, sed, quae mea est tenuitas plane aeream, & quidem paracharaximam. Cum illos Claudiani libros revolverem, feci quod scioli fere solent, quaedam quae non capiebam correxi; has ariolationes meas tibi mitto; quamvis satis sciam, quam non dignae sint, quae oculos tuos morentur; cum etiam si quid forte aptius exiit, id non dubitem jam ab aliis occupatum esse. Nec enim ad manum est editio huius poëtae Claveriana recentior. Tu tamen boni consule & adfectum, ut soles, aestima. Vale, Doctissime Domine. Bruxellis VIII. Kal. Majas Anni MDCCXLV.

In librum I. Claudiani in Eutropium.

Vf. 43. *Nec destitit umquam, coepit saepe tamen.* interpungendum censeo hoc modo,

— — *Nec destitit umquam,*
Coepit saepe, tamen cunabula prima cruentis
Dedita suppliciis — —

Id est non destitit umquam, sed coepit saepe servire Dominos mutans; quamvis castratus esset &c.

Vf. 61. *Miles stabulis Ptolemaeus in illis notior.* quae sint *stabula illa*, juxta cum ignarissimis scio; an forte legendum? *tabulis Ptolemaeus in illis*, ut de tabulis loquatur Claudianus, de quibus ante

— — *Quot jura, quot ille*
Mutavit tabulas — —

An potius

— — *Miles stabuli Ptolemaeus in illis*
Notior. — —

Id est, in illis nominibus; sive inter illa nomina Dominorum, notior Ptolemaeus miles stabuli. Milites stabuli, sunt Hippocomi, qui militabant sub praefecto aut Comite stabuli. ita apud Symmachum saepe occurrit, *Miles sacri aerarii, miles privati aerarii, miles vicariae potestatis* &c. Ptolemaeum autem militem stabuli fuisse etiam ille versus indicat

Et ducti toties inter praesepia somni.

Vf. 65. — *Cum fastiditus abiret.*

Quae genuit quanto planxit divortia luctu? ita duae editiones meae, sed errore, ut existimo, typographico, nam cuius apparet legendum esse,

— *Cum fastiditus abiret*
Quae genuit; quanto &c.

Vf. 77. *Sic fatus acutum, aggreditur Lenonis opus; ita distinguo, fatus acutum,* ut Eunuchus, ita paullo post

— — *Né vocis acutae*
Mollities. — —

Vf. 133. *Sic Pastor obesum Lacte canem.* Varro de re rustica lib. 2. cap. 9. de Ca-

Canibus, nec non ita panem hordeaceum dandum, ut non potius eum in lacte des intritum; quod eo consueti cibo uti a pecore non cito desciscunt.

Vf. 162. *Et cecidit saevi quo dixerat hostia sacri.* Existimo legendum cum MSS. quibusdam, qui dixerat; id est, qui ipse hoc oraculum protulerat; τὸ dicere proprie convenit Prophetis & vatibus. Hinc dictio Oraculum, ἡρησμός. Accius: aperte fatur dictio.

Vf. 194. — *Neglectaque sueverat arte*

Claustra remoliri. ita corrigit Delrius, quem sequitur Claverius; mihi magis placet

— — *Neglectaque sueverat arcae*

Claustra remoliri. — —

Vf. 201. *Suffixa patenti Vestibulo pretiis distinguit regula gentes.* Quid si tegula legis? ut Claudianus alludat ad laterculum honorum, de quo Cedrenus, Η παρ' Ἑλλήσιν ὁππῇ πλίνθ' Θ, λατέρκυλλον πρὸς Ῥωμαίοις λέγεται. ἣν ὁ πλίνθ' Θ δημοσία ἐφ' ἧς τὰ περὶ βουλευτῶν, καὶ τὰ τῶν στρατομαχῶν ὀνόματα ἀπεγράφετο. Nihil tamen mutandum censeo; *Regula* enim hîc est catalogus, κανὼν.

Vf. 210. *Non pudet, heu superi, populos venisse sub hasta Vendentis? certe pudeat.* Haec ita distingo, *non pudet, heu superi, populos venisse sub hasta? Vendentis certe pudeat, qui jure sepultum Mancipium tot regna tenet, tot distrahit urbes.*

Vf. 308. *Candida pollutos comitatur Curia fasces*

Forsitan & Dominus. praebet &c.

Ita locus hic distinguendus, ut censet H. Valesius ad lib. xxii. Ammiani.

Vf. 310. *Libertatemque daturus &c.*

Multa de hoc ritu P. Faber lib. i i. Semestrium. egregius etiam hac de re Ammiani locus lib. xxii. sed insigniter corruptus, *Dein, Mamertino ludos edente Circenses, manumittendis ex more inductis per admissionum proximum, ipse lege agi dixerat, ut solebat, statimque admonitus jurisdictionem eo die ad alterum pertinere, ut errato obnoxiam Decembris auroram & ipse mutavit.* Ita edidit novissime H. Valesius, qui testatur in antiquis libris legi, *ut errato obnoxium Decembris auro rem & ipse mutavit.* ex quo divino, *ut errato obnoxium decem libris auri semet ipse mutavit.*

Vf. 317. *Exhorruit annus Nomen.* quia scilicet annus nomen a Consulibus sumebat. Pacatus in panegyrico. *Consul creatur, habiturus est nomen annus.* Claudianus, *felicemque uterum qui nomina parturit annis.* adde Salvianum lib. vi. Ennodium lib. i. epist. 5. & alios.

Vf. 356. — *Et quidquid inane*

Nutrit Judaicis quae pingitur India velis.

Nescio quae sint haec *Judaica vela*, nec interpretes me adjuvant. Itaque fere adducor ut credam Claudianum scripsisse,

Nutrit in Attalicis quae pingitur India velis.

Prona est mutatio & Ju in In, & & tt. in d. per Attalica vela intelligo Aulaea, quae ignotorum signis animalium variegari solebant, unde *belluata* a Plauto vocantur; quin & Claudiani aetate portabant tunicas & pallia Attalicâ

arte pictas, in quibus Gryphes, dracones, & alia monstra Indica figurata erant. Asterius in homilia de divite & Lazaro. ἀλλά πῶς κενὴν ὑφαντικὴν ἐξευρόντες καὶ ποιεῖον, ἢ πῶς τῇ πλοκῇ τῶ σήμονι πρὸς τὴν κρόκην τὴ γραφικὴν μιμῆται τὴν διώαριν, καὶ πάντων ζώων τοῖς πέπλοις τὰς μορφὰς ἐνσημαίνεται τὴν ἀνδρῶν καὶ μυρίοις εἰδώλοις πεποικιλμένῃ φιλοτεχνῶσιν ἐδῆται &c. Ammianus lib. xiv. ut longiores fimbriae tunicaeque perspicua luceant varietate liciorum effigiatae in species animalium multiformes. Philostratus lib. ii. Iconum. εἰ πάραν καλῶς μεμιμηται καὶ καλὰσιεν, ἢ κἀνδυν, ἢ θηρίων περατώδεις μορφὰς, οἷα πικίλλας βαρβαροί. Apulejus lib. xi. Metam. Ἐπὶ humeris dependebat pone tergum talorum tenuis pretiosa chlamyda; quaque tamen viseres colore vario circumnotatis insignibat animalibus, hinc dracones Indici, inde Gryphes hyperborei, quos in speciem pinnatae alitis generat mundus alter. An haec ζῶα vestibus & aulaeis intexta sint τὰ Theraphim Hebraeorum, ejus linguae peritis dijudicandum relinquo; certe aliquid hac de re me legisse memini apud D. Hieronymum.

Vf. 369. Hoc quoque consiliis peperit. Lego conciliis, ut supra

*Te magis ab demens, veterem si respicis artem;
Conciliare decet — —*

Vf. 411. Ut pereat quicumque tuis &c.

Ὡς δὲ πόλοιτο καὶ ἄλλοι ὅπως τοιαῦτά γε ῥέζοι.

In lib. 2. in Eutropium.

Vf. 68. Genitorque vocatur principis. Philostorgius lib. xi. cap. 4. de Eutropio, καὶ ὡς λοιπὸν πατήρ ὁ Εὐνῆχος βασιλέως, ὁ μὲν δὲ τὸν τυχόντα παῖδα Φωῖαν δίδωμεν.

Vf. 155. Sic erat; in nostro quando &c. ita de bello Gildonico

*Hoc erat? in fratres medio discordia Mauro
Nascitur &c.*

Vf. 175. Geticae dux Improbus aulae. omnino legendum, Geticae dux Improbus Alae. Zosimus de Targibilo, five Trigibildo, ut ipse appellat; ἦρχε δὲ ἡ Ρωμαϊκῶν ἰλῶν, ἀλλὰ βαρβάρων ἐνιδρυμένων τῇ Φρυγίᾳ πρὸς βασιλέως τὴν τέτων λαβῶν ἐπιμέλειαν.

Vf. 358. Quis melius vibrata puer &c. S. P. Chrysostomus Homil. 19. ad populum Antioch. Quid enim quaeso difficilius sit, quam cum quispiam juvenis volentibus se emollire, ἔνεμβρα sua torquere, seipsum tradens, sedulo contendat rotarum more totum flectere corpus, ἔν περὶ πρὸς οὐκ ὡς, ἔν περὶ μακρὸν περιδύομενον ἔν ἄλλαν περιστροφήν ἐν γυναικίᾳ γενεῇ μεταστῆναι.

Vf. 449. Quantoque cutem distendat Echino. Echinus Hosychio σκευὸς μαγειρῶν. ut & Polluci lib. 10. cap. 24. Idem lib. 6. cap. 13. καὶ ἔχινος δὲ χύτρας εἶδος ἦν.

Vf. 450. Contextit varius. versus sine dubio corruptus, quem depono.

Vf. 459. Et matutinis pellebas frigora mensis. malim, pellebas frigora pensis.

Tom. II.

D d d d d

Vf.

Vf. 481. *Socium nobis fidumque sodalem.* Longè melior mihi videtur lectio, quem e veteri Cod. adscribit patrius meus *Philippus Rubens*,

Socium nobis, fidumque Saporem.

nam de Sapore Rege Persarum Claudianus hîc agit.

EPISTOLA CCCCLX.

ALBERTUS RUBENS

V. Cl. Nicolao Heinsio S.

Leidam.

Litterae tuae Nonis Januariis scriptae. x. Kal. Mart. demum ad me pervenere, quae sane pluribus nominibus mihi fuere acceptissimae, potissimum quia te salvum & fospitem ad patriam rediisse retulerunt, qua de causa omnes Musarum cultores Fortunae Reduci gratias debent. Mihi quidem (quamvis inter illos locum non vindicem) nihil optatius potuit nuntiari: nam de valetudine tua tristiores huc rumores allati erant, qui me diu & admodum suspensum tenuere. Claudiano a te manum admoveri lubens audio, nam Poëta ille non tam facilis & sanus, ut plerique existimant, ab illustri & docto ingenio tuo medicinam flagitat. In Ovidio expurgando minus tibi laboris erit. Quidni enim Authorem illum prisco nitori facillime restituas, cujus genius & stylus planissime in te immigravit, ut testantur politissimae tuae Elegiae, quae pro Ovidianis censi possent; nisi tu maluisses facilitatem Nasonis Tibulliano cultu temperare. Ego (ut tibi otii mei rationem reddam) in Seneca haectenus fui, sed actum egi, ut video; etenim post Clarissimi Gronovii operam Philosophus ille non aliam admittet curationem. *Moretus* noster mihi retulit, se accepisse a *Boxhornio*, priscum & optimae notae exemplar Senecae, a nobili Batavo ex Italia Lugdunum allatum esse: qua de re, oro te, me fac certiores. Te numismatum studio delectari gaudeo, & in eodem mecum valetudinario cubare. Vale; Vir Clarissime & me ama. Bruxellae prid. Kal. Mart. Anni MDCCXLIX.

Claudianum meum tibi mitto. Dum hisce diebus panegyricum Manlio Theodoro dictum percurrerem, haesi ad versum 200.

— *Lydos, Poenosque secunda*

Temperat — —

Tuam de illo sententiam scire haveo. contuli hac aestate, dum ruri agerem, libros de arte Ovidii cum MS. D. *Moreti*; excutiam schedas meas, & si quid aptius exiit, ad te mittam.

EPISTOLA CCCCLXI.

NICOLAUS HEINSIUS

Alberto Rubenio S. P. D.

Non possum non indignari, politissime Rubeni, quoties mecum reputo, geminis istis in Sueciam nuper susceptis itineribus fieri, ut commercia; quae tecum solebant mihi esse, literaria nunc interrupta cessent. Quid enim tua consuetudine mihi optatius offerri posset? quid epistolis jucundius? Sed quia sic in fatis fuit, ut avelleremur, graviter in id incumbendum nobis omni cura existimo, ne quid locorum, quibus distinemur, intervallis in amicitiam nostram licuisse videatur. His quidem ad te exarandis occasionem opportunam Claudianus meus suggestit, qui anno fere toto cum typographorum insigni sapinitate conflictatus negligentissimeque habitus, & quod aegerrime fero, naevis post tot veteres sublatos novis non paucis aspersus, lucem nunc tandem videt; adeo arduum illi fuit, tam lentis maxillis subduci. Qua de re monendum te duxi, ne arbitreris, mea oscitantia factum, quod auctore illo jamdudum tibi promisso hactenus fraudatus sis. Si tanti erunt notae, ut a te perlegantur, indulgenter omnino excipiendae sunt, ut quas festinans & aeger & libris destitutus effuderim; ne Suecico itineri consuetudinis tuae solam jacturam imputare me existimes. Inter legendum quae observabis mecum ut communices rogo, sive in quibus lapsus videbor, quod non raro contigit, sat scio, sive quae me fugerint; maximi id beneficii loco duxero. Diadema capiti regio imponendum avide hîc expectamus: quae solennia ante hyemem fore celebranda, certa spes est, nec transibunt, ut existimo, sine carminis & quidem satis prolixi tributo. nam ne renunciare sacris istis possim, quanquam velim, Reginae propensissimus erga Musas nostras affectus facit. Si quid parturiero, ad te ut veniat, cura erit. Ovidio emendando hyemem proximam destinavi. Utinam subsidia meliora ad manum sint? Vale, vir elegantissime, & me tui studiosissimum mutuo affectu dignare: Holmiae. cicioccl. Pridie nonas Septembr. Gregor. Si quid ad me voles Leidam mitte.

EPISTOLA CCCCLXII.

ALBERTUS RUBENS

V. Cl. Nicolao Heinsio S. P. D.

Nisi humanitas tua non minor quam eruditio tua, mihi comperta esset, vereretur ne ingenti rusticae ingratitude criminis apud te laborarem, qui cessavi tam diu a gratiis agendis pro suavissimis litteris tuis, & Claudiani castigatissimo exemplari. Sed me uxoris carissimae continua per aliquot men-

ses invaletudo totum sibi avocavit, & ab omnibus aliis officiis ac studiis abduxit. Nunc demum, ad meliorem spem, Dei benignitate, erectus, Poëtam a te sanatum evolvere coepi. & opportune eodem fere tempore *Gasparis Barthii* ebrius veratro commentarius in meas manus venit. Expectasne meam de illo sententiam? certe (ut mitissime dicam) si umquam nunc verum est vetus proverbium, *magnus liber, magnum malum*. At in tuis notis Deus bone! quantum ubique felicitis ingenii elucet! quantum siccae ac sobriae doctrinae! quantum acris & castigati iudicii! Quod vero nomen meum in hoc tam perfecto opere memorari video, sane non minus glorior, quam si Aristotelico peplo intextus essem. Versus lib. 1, 155. in Eutropium, quem in MSS. ita legi testaris

— — — *ab imis*

Ejectus stabulis summos invasit honores.

Me magis magisque confirmat in veteri mea opinione, qua Ptolemaeum Dominum Eutropii, militem stabuli fuisse putabam & vs. 61. emendabam

Miles stabuli Ptolemaeus, in illis notior.

Nam Eutropium in stabulis cum Ptolemaeo vixisse arguit versus 68.

Et ducti toties inter praesepia somni.

In laudibus Serenae vs. 18. ne *fune* pro *crine* substituamus, prohibet Sidonius carm. 24.

*Qualis nec Phrygiae dicata Vestae,
Quae contra satis Albulam tumentem
Duxit Virgineo ratem capillo.*

Ibid. vs. 25. non displicet, quod in plerisque MSS. exstat

*Penelopae (aut Penenelopes) decus est, atque uni tanta paratur
Scaena pudicitiae.*

Nunc Ovidium tuum avide expectabimus. cujus de arte & Amorum libros MSS. unum *Moreti*, alterum *Claudii de Doresmieux* Atrebatensis, contuli superioribus annis cum editione Plantiniana. Ea, quae tunc annotavi, tibi mitterem, ni probe scirem a te, (qui codicem *Moreti* Antverpiae videri) aut aliis pleraque jam animadversa esse. tamen specimina aliqua addam lib. 1. de arte. *At cum Pompa frequens caelestibus ibit Eburnis. Quare age ne dubita cunctas sperare puellas. Hac magis est una fraude pudenda fides. lib. II. cum magicis Marfa venena sonis. res sibi semper agi. Numidasque Leones. partes illa potentis agat. Neve cibos prohibe. Vateis ille videndus, adit. Marte palam simulat Vulcanum Famaque non tacto corpore. Et albatas jam legit illa comas. & caetera.* Vale, Vir Clarissime, & me studiosissimum virtutum tuarum cultorem pari affectu complectere. Bruxellis XI. Kal. Febr. anni MDCCCLII. aerae nostrae. *Joachimus. Tortorius* familiaris, ut praedicat, tuus & Clarissimi *Vossii*, hisce diebus opinionem Lutheri ejeravit hinc publice. an religione impulsus, an spe optimioris fortunae fuerit, dubitant quidam. Clarissimo *Vossio* salutem meo nomine dicas oro.

EPISTOLA CCCCLXIII.

ALBERTUS RUBENS

*Nicolao Heinsio S. P. D.**Leidam.*

Semper quidem litterae tuae gaudio quodam ac dulcedine permulcere me solent, numquam tamen sinceriores sensu laetitiam, quam ex ultimis, quae te longo molestoque itinere defunctum reducem in patriam venisse nuntiarunt. Etenim & tam carum caput maris ac inclementioris caeli injuriis subductum esse gaudeo, & mihi ipsi hanc e litteris tuis voluptatem, nunc frequentius obventuram spondeo. Immo te coram videre & alloqui videor, dum cogito tam modico te intervallo a nobis disjunctum esse, ut sexto aut septimo die responsum habere possim, quando de dubiis Ovidii, Claudiani aliorumque authorum locis, tripos mihi tuus contulendus erit. Et ut incipiam reditus tui fructum jam nunc percipere, En versum Ovidii, qui me diu torfit, lib. II. de Arte

*Effugere hinc non est, quare tibi possit amica**Dicere, non omni tempore sensus abest, aut adest.*

Quocumque me verto, nullum idoneum sensum, ex sensu illo assequi possum. Tu, rogo, facem admove. Exemplar *Claudi de Doresmieux* nec a vetustate, nec ab ulla alia dote commendandum est. Ovidium emendatum, quo nimis diu caremus, a te avidè expectamus. De lectione in Claudiano lib. I. in Eutropium temerarius sum, si tecum contendere velim, quem non mirum est unum omnium optime poetam hunc intelligere & emendare, cum omnem ipsius spiritum ac mentem possideas, prout e Christina tua vere Augusta apparet, quam si dico absolutissimis Claudiani operibus parem esse, Claudiano, non tibi adulator. quidam censent hinc, nonnulla mitius contra Austriacos dici potuisse, praesertim pace jam composita. Sed & ille, in Honorii & Stilichonis gratiam, Alaricum Gothosque plus aequo proterit. Vale, Vir Clarissime & me Illustri D. Parenti tuo commenda, illius tuarumque virtutum cultorem devotissimum. Bruxellis a. d. VIIII. Kal. Majas, Aerae Christianae. CIOICCLI.

EPISTOLA CCCCLXIV.

ALBERTUS RUBENS

*Nicolao Heinsio.**Leidam.*

Quod respondendi officium tardius exsequor noli, oro, aut negligenti, aut parum grato animo adscribere, sed Panaegyri nostrae anniversariae, quae plures e consanguineis & familiaribus meis huc evocavit, & omne scribendi tempus, jam per tres hebdomadas praeripuit. Post mensem (si Deo visum)

D d d d d 3

Ant-

Antverpiam cogito, & nescio, an non me aestus inde in Bataviam deferet, quo me rapiunt non tam insignia Naturae Fortunaeque dona, quibus vestra regio ornata est, quam Illustris Parens tuus cum suo Diomede, & elegantissimus Gronovius, quae Musarum decora coram videre & complecti aveo. *Ge-vartium* nostrum non reor tam delicati esse stomachi, ut quae a te acrius in Austriacos dicta esse existimat, concoquere non possit. Non enim tam adducte regnamur, ut aliorum nobis libertas gravis esse debeat. Locus Ovidii, de quo te consulueram, etiam nunc me torquet, quamvis non displiceat emendatio tua,

Non omni tempore sensus adest.

Nempe ut nos in idiomate nostro dicimus: *men is niet altijd wel gesint*. Cogitabam aliquando an non ita distingui possit:

Effugere hinc (vel hunc) non est: quare tibi possit amica

Dicere. non omni tempore. sensus abest.

Quare tibi possit amica dicere: *non est hunc effugere. non omni tempore*, scilicet tibi vacare possum. *sensus abest*. i.e. sensu cares. quod in odiose importunos jactari solebat, ut scis, Horatius,

*Simplicior si quis, qualem me saepe libenter
Obtulerim tibi, Maecenas, ut sorte legentem
Aut tacitum impellat, quovis sermone molestus,
Communi sensu plane caret, inquit.*

& iterum

— — num sine sensu,

Tempore num faciunt alieno. — —

In altero: *neve domi praesume dapes adhuc haereo*. Illa: *castaneas non amat illa nuces*. *Mars Threcen occupat*. *Ad medicas artes*. indubitata sunt, & hoc postremum etiam observaveram ex MS. *Moreti*, in quo ita plane perscriptum. eadem membranae lib. III. de arte praeferunt

— *Rusticus alter*

Motus, & incessus mollior alter erit.

Quod non rejiculum videtur, nam *incessus* de molliori gradu dicitur. Seneca Rhetor: *non ambulamus, sed incedimus*. Lib. II. Eleg. 7.

Ecce tuum solers caput exornare Cypassis.

MS. ille longe aliter

Ecce novum crimen, solers ornare Cypassis.

Solers ornare, Id est, ornatrix.

Lib. III. eleg. 6.

At qualem vidi, qualem tetigique puellam.

MS.

At qualem vidi tantum, tetigique.

In Epistola Deianirae

Ingreditur late multo spectabilis auro.

MS.

Ingreditur late lato spectabilis auro.

ut in Metamorphosi

— *Velamina Procne*

Diripit ex humeris auro fulgentia lato.

& Juvenalis

Et latum pictae vestis considerat aurum.

Sunt & alia nonnulla, de quibus proximis litteris. Vale, Vir Clarissime, & Illustri parenti tuo multum meo nomine salutem apprecare. Bruxellae xiv. Kal. Julias Anni cicioccli.

EPISTOLA CCCCLXV.

ALBERTUS RUBENS

Nicolao Heinsio S. D.

Leidam.

Tardius rescribo ad suavissimas tuas litteras, quia ipse in Bataviam venire, teque coram amplecti destinaveram. Quae enim me hîc detinent negotia, intra mensem profligata fore speraveram. sed illa non tam magna sunt, quam faecunda, multumque negotiorum ferunt, adeoque nova & multiplici occupatione me distrahunt, ut omnem ad vos excursum hoc anno praecclusum mihi certe videam. Interim oro ut litterarum saltem opera te mihi saepe ostendas. Numquam enim epistolam tuam accipio, ut non protinus una simus. Ovidiana tua, *Jamque ferendo vixerat. Raditur haec Elegis. poliuntur lege mariti.* certissima sunt, sed supra omnia ceminet illud.

*Carmina Laiades, non intellecta priorum
Solverat ingeniis —*

qua una conjectura omnem Laiadae ἐνδοχίαν superas. de loco lib. ii. de arte plane tibi acquiesco & legendum existimo

*Effugere hunc non est, quare tibi possit amica
Dicere, non omni tempore sensus adest.*

Scire aveo si quid in versum 277. lib. iii.

Conveniunt tenues scapulis ameletides altis.

annotaris, nec enim Scaligeri conjectura placet. Sed pluribus propediem, nunc enim interpellor: inclusam paginam si quid in ea, quod Clarissimo Gronovio usui esse possit, inveneris, transmittas illi rogo. si tanti non videtur, tradere Veneris marito. Gronovium litteris meis obtundere, & a bono publico avocare metuo. Vale, Vir Incomparande, meque ama & Parentem tuum salvere jube. Bruxellae Idibus Juliis anni cicioccli.

ALBERTUS RUBENS

Nicolao Heinsio S. D.

Hagam.

Resuscitarunt me litterae tuae, quibus te saluum sospitemque, post magnos terraque marique labores Musis nobisque restitutum esse intellexi. Priores tuas Holmiae xv. Julii scriptas, eo fere tempore recepi per *Silvercronium*, quo *Vossius* noster indicavit, navim, qua patriam petebas, tempestate in portum Gedanensem ejectam, teque ibi ingenti & periculoso morbo detineri. Et quamquam ab amicis per litteras diligenter de salute tua exquisierim, nihil tamen certi relatum est. Tandem me tuae exceptatissimae litterae hac sollicitudine liberarunt, quas xv. Januarii datas, xx. ejusdem mensis recepi. Nam quas eruditissimus *Gronovius*, politissimusque *Graevius* ad me dederunt exeunte Novembri, quibus te Hagam redisse significant, Kalendis Februariis demum ad me pervenerunt. Atrebatensem Codicem Amorum contuli ante aliquot annos, sed nullum operae pretium repperi. Liber Metamorphoseon MS. quem *Graevius* se apud me vidisse rettulit, est ille ipse *Moreti*, quo usus est. Locus in libr. de arte

Effugere hunc non est quare tibi possit amica

Dicere —

divinitus a te restitutus est, meo judicio. In Claudiano lib. i. ad Eutropium, malle

Miles stabuli, Ptolemaeus, in illis

Notior —

quam *miles tabulis*. ut olim censebam. sed ut ad Ovidium revertar, locum lib. iv. de Ponto

Esse pudicarum te Vestam Livia matrum

sincerum esse existimo, nec medicina, quam adhibet Doctissimus *Gronovius*, indigere: in Augustarum enim numismatis saepe inscriptum. VESTA AVG, nec a tempore Augustaeo abhorret adulatio illa, Liviam esse Vestam pudicarum matrum, id est a pudicis matronis adorari, ut Vestam. de quibusdam etiam aliis locis Ovidii, quos Vir ille magnus emendat, lib. iv. Emendat. amplius quaerendum censeo. De numismatis tuis quod scribis, Serenissimus Archidux numismatum conquisitione mire delectatur, aerea tamen & aurea pluris aestimat, quam argentea, quamvis nec ab his alienus sit. Si verno tempore ad nos excurris, & antiquariam tuam supellectilem adfers, credo te inventurum emptorem, qualem desideras, non prodigum, sed nec nimis parum. Vale, decus meum, & me solito tuo affectu complectere. Bruxellae prid. Kal. Martias Christianae aerae c1616clvi.

EPISTOLA CCCCLXVII.

ALBERTUS RUBENS

Nicolao Heinsio S.

Amstelodami.

DUlcissimis litteris tuis Augusto mense scriptis, a tribus hinc mensibus jam responsum pararam, & tantum non tabellario tradi curaveram, cum inopinatus casus omnium mihi officiorum memoriam excussit. Filius etenim unicuique optimae spei puer, exeunte Julio, canino morfu leviter violatus, quinquagesimo post die ὑδρεφοβία primum, deinde Lymphaticis timoribus agitatus, intra paucarum horarum spatium mihi raptus est. Quo quidem vulnere adeo consternatus sum, ut vix adhuc ad me redierim. Noli, quaeso irridere imbecillitatem animi mei, cum & Seneca (cujus me lectione satis munitum adversus omnes ictus existimabam) fateatur se Annaeum Serenum tam immodice flevisse, ut inter exempla fuerit eorum, quos dolor vicit. Sed filius meus

— κείται μοι ἐν δὴ τῷ θανάτῳ,

οὐκ ἦν γὰρ ζῶειν καλὸν αὐτῷ ἢ τε γονεῦσι.

Gronovium nostrum, melius contra omnes fortunae insultus a Philosophia instructum, majori animo calamitatem domesticam pertulisse arbitror. promiseram illi ante novem circiter menses lectiones varias, quas ex MS. Serenissimae Reginae Sueciae, ad bellum Hannibalicum Livii annotaram. quia nescio an Daventriam redierit, eas tibi committo, ut, si modo tanti esse tibi videntur, ad illum perferendas cures. Adjunxi & paginam observationum ad fastos Ovidii, in qua tamen vix aliquid bonae frugis esse video, & si quid sit, jam a te praevisum esse reor in editione tua, quam nondum vidi. De loco 11. Tristium vs. 312.

Nec Domino poenae res ea causa fuit.

dubito. ego explicabam *Dominum*, Lenonem, qui nudas in pergulis aut cellis meretrices, etiam oculis transenntium Vestalium exponit; aut, si mavis editorem ludorum, in quibus meretrices nudantur spectantibus Vestalibus. ita Plautus in prologo *Afinariae*

Gregique huic & Dominis atque conductoribus.

Lib. 1. Trist. eleg. 2. haereo

*Quod licet e minimis domui si favimus isti,**Si satis Augusti publica iussa mihi.*

Tu, oro, tuam de hoc versu sententiam perscribe. Legatione Suecica exsolutum te esse, & Secretarii munere a Coss. Amsterodamensibus ornatum, gaudeo & exulto. a vicino enim crebrius litterarum commercium exspecto. *Gevarcius* & *Chiffletius* pugnam sine missione *Tristano Sanctamantio* indixere, qui libello nupero de Liliis Francicis contra *Chiffletium* edito, non hunc modo irritavit, sed omnes etiam Belgas, quos *Visionarios* appellat, & ut crasso sub aëre natos traducit. Ego occasione veteris picturae, quae Romae reperta,

Tom. II.

Eeeee

deam

deam Romam exhibet, lato clavo ornatam, syntagma de lato clavo adornare statui. Graevio nostro inclusas litteras ut mittas rogo. Scripserat ille ante quatuor menses, se Duysburgum Cliviae a Serenissimo Electore Brandenburgico ad cathedram professoriam evocatum esse. Vale, decus meum, &

Inter opes & me, rem parvam, pone paternas.

Dabam Bruxellae prid. Kal. Januarias Anni aerae Christianae cıııııııııı. quem tibi tuisque prosperum felicemque auguror.

EPISTOLA CCCCLXVIII.

CASP. GEVARTIUS

Nicolao Heinsio, Dan. Fil. S.

Leidam.

GRatissima mihi fuere litterae tuae, ex quibus salvum atque incolumem Te ex Italia in patriam reversum esse, summo cum gaudio intellexi. Pro adjuncto Elegiarum munere gratias maximas ago. Merito sane *Italiae* nomen illis inscripsisti: quippe quae Italiam, sed illam priscam, ejusque alumnos, Nasones & Propertios, ityli elegantia & nitore provocent. Nec mirum; cum ab Apolline Genitore in Helicone educatus, incomparabilem ejus Genium repraesentantes. De ejus invaletudine grave mihi fuit intelligere. Sed tuus longa *ὑποθυμία* reditus illi pro panacea est futurus. Cum Papinio meo merito exclamem:

— *Quod subdere robur*

Illā dies, quantum potuit dempsisse senectae!

Claudiano gratulor, qui ingenio & singulari diligentiae tuae *παλιγγενεσία* est debiturus. Poëta ille perfamiliaris olim mihi Juveni fuit: nec pauca in illum observaram & adnotaram. Sed forenses occupationes mox alio mentem avocarunt. Prae caeteris autem ejus Auctoris opusculis mihi semper arrisit divina in *Fl. Manlii Theodori* Consulatum Panegyris, quae viri politici, *ὡς ἐπὶ πάντεσσιν παιδευμένοις*, absolutam Ideam exhibet. Atque in eam olim non exiguum Commentarium conscripsi, quem ubi primum per negocia licuerit, praelo dare constitui. Viro summo, Parenti tuo, officiosam meo nomine salutem dicas, cultumque & obsequium offeras rogo. Inexhaustum ejus ingenii vigorem e praecleara de Pace nostra Oratione, cum maximo applausu nuper agnovi. Mitto Inscriptiones nostras *Theatri Pacis* in hac urbe erecti. Intestini Gallorum motus non vanos vates nos fuisse probant in ista Epigraphe:

Effera barbarici stimulatix terra Gradivi

Secum bella geret.

At Pacem universalem Orbi, spero, tumultus illi mox dabunt. In quo omne finio. Vale, Vir Clarissime, nosque amare perge: longior mea ab urbe absentia causam dedit quod tardius ad tuas responderim. Inclusas ad *Rubenium* cum libro recte curavi. Scribebam Antverpiae Idibus Februarii, cıııııııııı.

EPI-

EPISTOLA CCCCLXIX.

CASP. GEVARTIUS

Nic. Heinsio S. P. D.

Leidam.

Claudianum notis tuis illustratum sub praelo *Elzeviriano* jam sudare c nuperis litteris tuis lubens intellexi, & avide ejus editionem exspecto. *Casparis Barthii* Commentarium novum in eundem Poëtam, cum xvii. (ut jactat) MS. collatum, Hamburgi hoc anno editum, jam credo; vidisti. Sed non est cur ob editionem istam vadimonium deferas. Commentarius enim ille multae lectionis est, sed exigui judicii, ut & vastum ejus Adversariorum opus. *Moreto* litteras tuas exhibui, & num Codices suos manuscriptos certo pretio Tibi addicere vellet petii. Ille vero negat ullo modo velle se Membras illas vetustissimas abalienare, e quibus velut e Jovis *διφθέρας*, tot luculentas praestantissimorum Auctorum editiones, publico Reipublicae Litterariae commodo, Proavus ejus *Plantinus* concinnavit. Quinimo, codices istos membranaceos, ut aurea Colchorum vellera, in Musaeo suo se asservare, mihi dixit. Tuum ad Reginam, Germaniae Pacatricem, Epigramma magna cum voluptate & applausu legi. De illius Heroinae ingenio, & in bonas litteras affectu & studio, Fama hîc & ubique personat. Prorsus ut laudatissima illa Gothorum olim Regina, *Amalasunta*, Theodorici Regis Filia, Graece & Latine eruditissima, a Cassiodoro & Procopio commemorata in hac jam renata esse videatur. Clarissimis Viris Parenti tuo & *Golio* multam meo nomine salutem dicas rogo: ut & eruditissimo *Vossio*: cui etiam significes velim, magno me desiderio teneri videndae primigeniae editionis Manlii mei, cujus ante duos annos spem mihi fecit. Vale, Vir Clarissime. scribebam Antverpiae Idibus Junii, ciciocri. Litteras ad R. P. *Ottone* *Zylium* recte curavi: & *Rubenius* Te resalutat.

EPISTOLA CCCCLXX.

NICOLAUS HEINSIUS

Gasperi Gevartio S. P. D.

Antverpiam.

Lucem tandem videt Claudianus meus, Vir Amplissime, postquam anno fere toto cum operis typographicis conflictatur: quas impensiori cura refarcituras opinabar, quicquid cunctatione tanti temporis deliquissent. Sed magno meo cum dolore deprehendo ex iis, quae ad manum sunt, pari oscitantia ac supinitate mecum actum. Spero apud aequos tuique similes lectores absentiam meam pro excusatione justa fore: quanquam non dubito in notis mihi multa excidisse, quae nimiam festinationem arguant, quaeque typographis nullo jure imputari possint. Aeger eram & libris destitutus, cum eas effunderem:

accedebant interpellationes, quae in hac aula frequentissimae. Instabant interim typographi, qui Claudiano ipsi manus jam admoverant, pensum urgentes. Haec si tibi non satisfaciunt, secunda editione diligentior me praestabo, praesertim ubi novis subsidiis instructus ero; schedasque meas accuratius tum excutiam. Te interim elegantissimumque *Rubenium*, ad quem epistolum hîc habes, rogatos vehementer cupio, ut si quid inter legendum observaveritis, id ut mecum communicare ne gravemini. Vobis vestra, qua par est, fide abscribentur. *Barthii* immensum commentarium nuperrime demum accipi, nec vacavit haecenus evolvere. Ex paucis tamen, quae inspexi, satis colligo, scriptis exemplaribus non optimis usum. Festi regii solemnia indies differuntur. Dubium tamen non est, fore ut brevi celebrentur. Dederunt ea mihi materiem luculenti carminis, sed quod inter scrinia necdum limatum haereat. Lucem an visurum sit nescio. Nam si modestiam Reginae novi, vix impetrabo editionem; cum laudes latura non sit, quanquam veras & meritis suis inferiores. Si prodibit, exemplar ad te veniat operam dabo. Tu vicissim censuras in Claudianum meum tuas mecum communica. *Elzevirio* in mandatis dedi, quatuor exemplaria ad *Moretum* nostrum uti mitteret; quorum primum tibi offerendum sit, secundum *Rubenio*, tertium *Patri Bollando*, quartum *Moretus* ipse servaret sibi, cujus comitati non parum Claudianus debet. Si quid ad me vultis, Leidam mittite: curabit Pater, ut huc perferatur per tabellarios. *Vossium* ex Gallia Bataviaque reducem brevi hîc exspectamus, ubi venerit, de prima Manlii tui editione, quam promiserat, monebitur. *Salmasius* ante dies octo huc appulit, correptus statim sub adventum defluxione, quae humeros illi invasit: ita fit, ut lectulo affixus Reginam haecenus compellare non potuerit, melius tamen nunc habere dicitur. Tu quid moliaris, quid Antonino Manlioque tuis fiat fac sciam, & feliciter rem gere. Holmiae Kalend. Septembr. Gregor. Anno Christi c1515CL.

EPISTOLA CCCCLXXI.

CASP. GEVARTIUS

V. Cl. Nicolao Heinſio S. P. D.

Holmiam.

TUam Claudiani operum luculentissimam editionem nuper a *Moreto* cum humanissimis litteris tuis accepi. Tardius iis respondeo, quod per otium Poëtam istum jam renatum denuo evolvere, & notas tuas pensiculatius expendere decrevissem. Sed tot occupationibus obrutus fui, ut ad amoeniores hasce litteras respicere vix licuerit. Itaque tantum *ὁλοχρεῶς* & saltuatim curas tuas percurri. Inveni autem editionem hanc longe absolutissimam esse, & observationes tuas accuratas, nec publici saporis. Volupe mihi fuit etiam nominis nostri honorificam mentionem factam legere. Non dissimulabo interim, occurrisse nonnulla in textu (ut vocant) quae sollicitata & mutata nollem.

tem. Sed alias de illis sententiam nostram proferemus. Vindicias Manlianas nunc adorno, mox etiam Commentarium in Manlii Consulatum editurus. Clarissimo D. *Vossio* Salutem meo nomine dicas velim, & desiderare me videre primigeniam Manlii editionem, cujus spem ante hos tres annos mihi fecit. Quae *P. Bollandus* & *D. Rubenius* miseras exemplaria, recte curata sunt. Vale, Vir Clarissime. Praefestine Antverpiae xv. Calend. Februarii c1515c1i.

EPISTOLA CCCCLXXII.

CASP. GEVARTIUS

*Nicolao Heinsio Dan. Fil. S. P. D.**Leidam.*

Quod serius litteris tuis respondeam, Vir Clarissime, occupationibus forensibus, quibus assidue premimur, imputabit veniamque dabit, scio, perspecta mihi pridem humanitas tua. Interim saluum atque incolumem te in Bataviam reversum esse, plurimum gaudeo & gratulor. Panegyricum tuum cum adjunctis Poëmatibus, a D. *Wallio* nuper recepi, ingentis spiritus opus, & quod recentem te a Claudiano ista luisse, evincit. Vindiciarum Manliianarum editionem varia impedimenta haëtenus sufflaminarunt. Sed moras abrumpam ubi primigeniam Manlii Editionem a D. *Vossio* promissam inspexero. Itaque avide eam expectabo. Centuriam Urbium Belgicarum a D. *Jacobo Eyckio*, amico meo, editam ad Te mitto. Rogo alterum Exemplar ad D. *Wallium*, una cum adjuncta Oratione Funebris, perveniat. Vale, Vir Clarissime, nosque amare perge. Viro summo Parenti Tuo multam meo nomine salutem dicas precor. Scribebam praefestine Antverpiae, vi. Junii, c1515c1i.

EPISTOLA CCCCLXXIII.

CASP. GEVARTIUS

*Nicolao Heinsio S. D.**Leidam.*

Salvum atque incolumem e Suecia in Bataviam Te reversum esse, post gravissima Tempestatis morbique discrimina, & Patriae tuae & bonis litteris gratulor. Claudiani novam recensionem a Te susceptam gaudeo. In Serenissimae Reginae *Christinae* Bibliotheca, Claudiani (ni memoria me fallat) bina exstant exemplaria MS. in pergameno, quorum alterum existimo esse e Codicibus Petavianis, idque bonae notae. Primo loco sunt libri in Rufinum. Forma est in 4°. Alterum in manus meas nondum incidit. Nam MS. necdum in classes sunt redacti. De Nasonis codicibus membranaceis inquirendis cura mihi erit. Ex litteris D. *Pimentellii*, Legati Regii, Romae exaratis, intelligimus Serenissimam Regiam Romae stabilem & mansuram sedem collocasse. Ita-

Eeeee 3

que

que existimo ipsam brevi Bibliothecam suam & praesertim MS. Romam ad-
 vehi jussuram. Quod autem petis, ut, si quid a me in Claudiano observatum
 sit, id Tecum communicarem; sane accuratissimae & nitidissimae editioni Tuae
 nihil adjici posse videtur. Nihilominus tamen, post uberrimam emendationum
 pulcherrimarum segetem a Te relatum, spicas aliquot a me lectas conferam.
 In Panegyrico Manlii nostri, Consulis, observavi postliminio a Te restitutum
 Claudiano versum istum: vs. 278. *Notior est Stilicone Domus. Gestare curules &c.*
 sed quid? ut Manlium Consulem attollat, Stiliconem, supremum Militiae Prae-
 fectum, Honorii Aug. Tutorem & Socerum, cujus favori Manlius Consula-
 tum suum debebat, unicumque Patronum suum Poëta deprimat? Nunquam
 factum. Omnis comparatio odiosa est, ut vulgo dicitur. Movit hoc (ut vi-
 deo) Cl. Gronovium, qui in Diatriba sua Statiana ad Libr. iv. Sylvarum istum
 Claudiani versum in Leideni codice MS. a vobis repertum, primus edidit, ut
 in omiſſis suis ad eundem libellum dicat: *Susplicari quidem se, Claudiani esse ver-
 sum, sed ab illo postea deletum, in quibusdam exemplaribus remansisse.* Quare, ob-
 servandum eum potius, quam in Textum recipiendum censet. At patiamini quaeso,
 me quoque in mustaceo isto laureolam quaerere, & in partem laudis, loci-
 que restituti vobiscum venire. Recipiendus omnino in Textum est iste versus,
 quem & in Vaticano codice exſtare ipse observasti, & ego in Moreti nostri
 membranis reperi, sed & ibi, ut in omnibus aliis MS. codicibus, ab imperi-
 tis hominibus deformatum. Ex correctione nostra, ἀναμφισβήτητος legen-
 dum est:

Notior est Helicone domus.

Nihil certius est hac nostra emendatione. Vocum, *Heliconis* & *Steliconis* (sic
 a Zosimo, aliisque Graecis semper appellatur) affinitas errorem hunc peperit.
 Et ex praecedenti vocula est, litterae binae, *St, eliconi* ad haeserunt. Quod &
 facile fieri potuit, dum ante natam Typographiam libri e dictantium Mona-
 chorum ore describerentur. Paulo ante, Versu 272. Claudianus dixerat:

Concinuit felix Helicon.

Et scribarum auribus *Stiliconis* nomen adhuc insonabat: nam hoc eodem Pane-
 gyrico versu 162. Poëta dixerat:

— *Quis demens adeo, qui jungere sensus
 Cum Stilicone neget?*

Et versu 265.

Nil licet Invidiae, Stilico dum prospicit Urbi, &c.

In Epithalamio Honorii Aug. versu 324. ubi Stiliconem Mariae Aug. paren-
 tem Poëta alloquitur, sic vulgo legitur:

— *Vultusque auctura verendos
 Canices festina venit consorte remota.
 Contingit Gravitasque seni. &c.*

Consortem bonus Claverius hinc Aegritudinem, Tristitiam aut Languorem vocat.
 Qua

Qua interpretatione nihil tristius, languidius aut frigidius excogitari potest. Nec tibi assentiri queo, *Caniciem senii consortem* a Poëta appellari. Barthius legit:

— *Cui sorte remota,*

Ego non dubito litterulae mutatione, legendum esse, & interpungendum:

Canities festina venit. Consorte remoto,

Contingit senii gravitas, viresque juventae.

Consortem vocat Rufinum, qui se Arcadio Aug. Tutorem relictum a Theodosio Aug. credi volebat, ut Honorio Aug. Tutor datus erat Stilico. Idemque Rufinus Imperii administrandi *Consortem* sese Stiliconi affirmabat. Sed Stilico dedignatus Rufinum, soli sibi utriusque Principis minorennis regimen, supremamque & absolutam exercitus & Imperii administrandi curam relictam contendebat. Hinc Claudianus, initio Libri 11. in Rufinum, ita Stiliconem affatur:

— *Tibi credita Fratrum*

Utraque majestas, geminaeque exercitus Aulae.

Idem testatur Zosimus lib. v. de Stilicone agens: *His ita constitutis, cum Rufino succenseret, qui potestatem suae parem per Orientem habere vellet, ad Arcadium proficisci cogitabat, cupiens & illius res pro libitu suo disponere. Quippe dicebat ab Theodosio morituro sibi datum in mandatis, ut omni cura Principem utrumque complecteretur. Quin & paucis post Theodosii excessum mensibus, Rufinum ab exercitu caedi & discerpi curavit Stilico, ut testatur idem Zosimus lib. v. quo Auctore nullus ad Claudianum, illiusque temporis historiam illustrandam aptior. Respexit Claudianus ad illud Papinii lib. 1. Thebaidos, de Etheocle, qui, Polynice exule, insolescebat:*

Saevior adsurgens, dempto consorte, Potestas.

Ipsa Claudianus in laude Serenae, de Alceſtide sic loquitur:

— *Consorte redempto,*

Caſta maritali ſucceſſit Theſſala Fato.

ut quidem ipse restituiſti. Ne longius abeam, in laude Serenae, verſu 48. ſic vulgo legitur, ubi de ejus Natali agit:

— *Necdum moderamina mundi*

Sumpſerat illa Domus, cum te Lucina beatis

Adderet aſtorum radiis.

Scaliger in libris de Emendatione (ni fallor) aut certe ad Euſebium hunc locum non ſatis cepit. Vita functi ſideribus addi dicuntur, non recens nati. Unde Claudian. initio lib. 11. in Ruſin. de Theodoſii obitu:

— *merita complexus ſede Parentem*

Auctior adjecto fulgebat ſidere mundus.

Haud dubie legendum:

— *cum te Lucina beatis,*

Ederet, aſtorum radiis.

Sic

Sic Papinius, in Coma Earini:

— *ô fidere dextro*

Edite! Multa tibi Divum Indulgentia favit.

Vulgatae Claudiani editionis loca nonnulla, quae in Tua editione mutata nollem, in schedula adjuncta obiter annotavi. Et patiare quaeso, me in paucis istis a Te dissentire, qui infinitis locis a Te felicissime restitutis calculum meum adjicio. Libros in altera Scheda notatos, in Auctione luculentissimae Bibliothecae paternae mihi coëmi optarem. Pretium ubi resciero, mox sum missurus. Vale, vir Amplissime. Quod autem tardius humanissimis litteris Tuis responderim, gravissimis occupationibus nostris imputabis. Amplissimo D. Vossio officiosam salutem adscribo. Scribebam ista praefestine Antverpiae, Calend. Martii. CXCICLVI.

P. S. Claudianus lib. I. de Laudibus Stiliconis, Versu 158.

Hic Rhodani procera cohors, hic miles alumnus

Oceani. Ductor Stilico &c. (Alanus, non recte.)

Militem Gallum & Hispanum hoc loco designat Poëta. *Oceanus* hic Atlanticus est, qui Hispaniam alluit. Sic in Panegyrico de quarto Consulatu Honorii Aug. de Natalibus Theodosii Aug. Hispanis Versu 22.

— *Cunabula fovit*

Oceanus.

Itaque nihil mutandum. Lib. II. in Rufin. Versu 84.

Insignemque habitum Latii mutare, togaeque. sic recte (Coactae perperam.)

De IV. Consulatu Honorii Aug. Versu 439.

Hunc tamen in primis populos lenire (levitate.) feroces,

Et Rhenum pacare jubes. Vulgata lectio se recte habet.

De Bello Getico. Versu 175.

— *per devia rerum*

Praecipites, per claustra (clausa.) ruunt.

Sic *Regni claustra* Livius, *Imperii claustra* M. Tullius. Epigramma de Theodoro Manlio & Hadriano dubitandum non est quin sit Claudiani. De illo latius egi in meo ad Panegyrium Manlii Commentario, quem non leves remorae hactenus sufflaminarunt. Quia autem in litteris tuis, spem facis hoc vere adventus ad nos tui, tum opportunius & copiosius coram de his aliisque locis agere dabitur.

EPISTOLA CCCCLXXIV.

CASP. GEVARTIUS

*Nicolao Heinsio Dan. Fil. S. P. D.**Amstelodamum.*

Quod Serenissima D. *Christina*, Suecorum Regina ante aliquot menses Manuscriptos codices, qui in Bibliotheca ejus servabantur, Romam mitti jussit, factum est, ut Claudiani & Nasonis membranacea exemplaria tecum communicari non potuerint. Claudiani exemplar non magnae vetustatis esse deprehendi: neque ullum ad curas tuas operae precium ex illo accedere posse existimo. Dictam Heroïnam initio praesentis mensis Massiliam appulisse, & intra paucas septimanas in hanc Urbem venturam esse, e Gallia scribitur, & hinc Stetinum profecturam. Familiae *Fulvii Ursini*, quae in Bibliopolio fori ovorum venales exstiterant, pridem divenditae sunt. *Goltzii* opera omnia nuperae editionis Plantinianae veneunt LXX. florenis. De *Possini* adversus sententiam meam Dissertatione quod me monueris gratias tibi maximas ago. Ego in Vindiciis Manlianis abunde illi respondebo. Gavissus fui e D. *Wallio* intelligere, Te Suecica Delegatione abdicata, Reipub. Amsterodamensi operam Tuam addixisse: eoque nomine Tibi Urbique plurimum gratulor. Vale, Vir Amplissime. Scribebam praefestine. Antverpiae XIII. Calend. Septembr. CIOICLVI.

EPISTOLA CCCCLXXV.

CASP. GEVARTIUS

*Nicolao Heinsio S. P. D.**Amstelodamum.*

Cum praestantissimus *Moretus* noster ad nos properaret, committere non potui, quin gravissimum, quem ex communis Amici obitu concepi, dolorem in sinum tuum effunderem, atque ita levare paullulum & levire eundem conarer. Heri, ipsis Kalend. Octobr. Bruxellis ex lenta febricula decessit D. *Albert. Rubenius*, *Pet. Paulli*, Apellis nostri, Fil. Regi nostro in sanctiore Concilio a secretis. Incredibilem ex immatura ejus morte jacturam fecere bonae litterae, & Seneca inprimis, variis locis ab illo illustratus. De Lato clavo, universaeque re vestiaria accuratissimos commentarios editioni adornabat. Praecedenti anno Filius ejus unicus, *Λυσόδηκτος*, a cane, inquam, rabido morsus obiit duodecennis. Atque acerbissimum istud vulnus animum ejus graviter exulceravit. Quanti Te, & eximiam eruditionem tuam semper fecerit, testis ego. Quocirca etiam atque etiam Te rogo, ut ejus Memoriae, brevi aliqua Elegia, (in quo genere Regnum obtines) parentare ne graveris. V. Cl. Pater tuus, ejus parenti amicissimus fuit, atque elegantissimo Epithalamio

Tom. II. Fffff cun-

eundem honoravit. Tu Manibus ejus id praesta. Et (ut cum Papinio meo Te compellem)

— *Confer gemitus, pariterque fleamus.*

Sed plura adjungere dolor prohibet. Vale, Vir Amplissime, nosque amare perge. Scribebam Antverpiae, vi. Nonas Octobr. cicioclviii.

EPISTOLA CCCCXXVI.

CASP. GEVARTIUS

Nicolao Heinsio S. P. D.

Amstelodamum.

Litteras tuas & elegantissimam in *Alberti Rubenii* V. Cl. obitum Elegiam his diebus accepi: pro qua mecum gratias tibi immortales agit *Ἐμμαναεῖς* ex Patruo Agnatus, *Philippus Rubenius*, Urbis nostrae secretarius, qui filius est *Philippi Rubenii*, cujus exstant Electa & Asterius. Epicedium istud omnibus numeris absolutissimum est & cum Nasone tuo certat: tuaeque in *Rubenianum* Nomen & erga me benevolentiae & affectus perpetuum monumentum. Curae mihi erit, si quae sint adfecta Amici nostri opuscula, illa in lucem prodeant. Interim Achatem Tiberianum sive Gemmam Caesaream, quae Divi Augusti Apotheosin & Imp. Caes. Tiberii, Augustaeque Domus procerum seriem & iconas complectitur, cum Peireskiana & Rubeniana Interpretatione, brevi edere decrevi. Exstat Achates iste incomparabilis in Gazophylacio Regis Galliarum, estque plusquam pedalis magnitudinis & figurae ovalis, aeo Tiberiano caelatus. Nullum pulchrius aut praestantius *κειμήλιον* ex tota Antiquitate ad nos pervenit. Quod tardius humanissimis litteris tuis respondeo, causa est quod occasione itineris Bruxellensis, Excerpta cod. Atrebatensis ex Ovidio, (de quibus ad me scripseras) a vidua petere, & ad te mittere constituiissem. Sed, ecce fragilitatem & incertitudinem rerum humanarum: Viduam nudiustertius ex variolis decessisse, ex *Philippo Rubenio*, Urbis nostrae secretario, hodie intellexi. Auctio Bibliothecae instituetur. Catalogum, ubi impressus fuerit, ad Te mittam. Manuscripta & Observationes in hanc Urbem deferentur: & quamprimum de Excerptis illis inquiram. Claudianum tuum sub praelo esse, gaudeo. Ego *Vindicias Manlianas* nundinis proximis, (nisi inopinae occupationes publicae remoram injiciant) luci dare institui. Pro Appiani Illyricis ad me missis maximas tibi gratias ago. *Moretus* noster, altero post reditum e Batavia die gravissima febris laboravit. Sed (laus superis) modo convaluit, tibi quoque officiosam salutem adscribi jussit. Vale, Vir Amplissime & eruditissime, scribebam praefestine Antverpiae, v. Kalend. Decembris cicioclviii.

EPISTOLA CCCCLXXVII.

CASP. GEVARTIUS

Nicolao Heinsio Dan. Fil. S. P. D.

Amstelodamum.

Philippus Rubenius, Phil. F. Urbis nostrae Secretarius, inter schedas agnati sui Alberti cognominis reperisse se mihi dixit *Variantes Lectiones* in Ovidii lib. III. de Arte Amatoria: in lib. III. Amorum, in lib. I. Fastor. Has *Variantes Lectiones* ex manuscripto codice Moreti nostri se desumpsisse, in fronte exceptorum istorum manu sua adscripserat ὁ μακρέρτης. Is Moreti codex, si, dum ante annos aliquot in hac urbe ageres, a Te inspectus & collatus non fuerit, excerpta illius a pupillarum Tutoribus in manus meas consignata, bona illorum venia ad Te transmittam, ut si quid operae pretium in illis lateat, a te cum honorifica Amici nostri mentione evulgetur. An dictus Moreti codex idem sit cum Atrebatensi, collatis per otium cum Autographo Excerptis apud Moretum videbo, quem his diebus bis domi quaesitum non inveni. Quod scribis Lib. I. Fastorum, istum de Pompejo versum in libris priscis sic legi:

Magne, tuum Nomen rerum mensura tuarum est.

Sed qui te vicit, te quoque major erat.

Acuta est conjectura tua:

— *Se quoque major erat.*

Sed patere ut & meam adjungam. Puto legendum:

— *Re quoque major erat.*

Nomen & *Re* inter se opponit Poëta. Et Pompejum quidem Magnum *Nomine*, sed *Re* majorem Pompejo Caesarem fuisse asserit. De *dentoso buxo* conjectura tua ingeniosa est. Sed voculam (*dentosus*) apud priscos auctores legisse me non memini. Vale, Vir Amplissime. & eruditissime scribebam praefestine Antverpiae III. Nonas Februarii CIOIOCLVIII.

P. S. Auctionis Bibliothecae Rubenianae indicta est in diem XI. praesentis mensis. Rescire ex te uno verbo velim, an Eusebius Scaligeri cum postumis ejus commentariis apud vos sub praelo sit, ut hîc rumor est. Alias enim primam Editionem in auctione Rubeniana mihi compararem.

EPISTOLA CCCCLXXVIII.

NICOLAUS HEINSIUS

Gaspari Gevartio S. P. D.

Antverpiam.

Quanquam remotissimus a te & in ultimo septentrione positus, cogitationibus tamen frequenter tibi adsum, Vir Amplissime. Quin *Elzevirii* nostris, ut Nasonis mei recens editi exemplaria ad te simul & Cl. Moretum

Fffff 2

mit-

mitterent in mandatis dedi. quanquam editio tumultuaria terfissimis manibus tuis indigna videbatur, volui tamen observantiae meae tesseram hanc apud vos exstare. Curis secundis lucubrationes istas jam percensere coepi, omnia & limatiora & auctiora publico daturus, simulatque subsidia nova, quae hinc inde ab amicis exteris sperare iussus sum, comparebant. Interim secundam Claudiani editionem hortatu *Elzeviriorum* adorno, qui typis maioribus elegantissimum scriptorem edendum sibi proposuere. Castigationes duas tresve, felices illas & ingeniosas, quas post primam editionem suggestisti, notis insertas videbis. Si quid praeterea conferre potes, ut tempestive facias, etiam atque etiam adhortor. Tum ne verbis vel tribus docere me graveris, quid de Antonio ac Manilio tuis, quid de aliis operibus, quae premis haecenus praelo parata, sit expectandum. Inter maximam enim hominum eruditorum solitudinem hic degenti nihil acceptius hisce compellationibus potest obtingere. Ante meam ex patria profectionem Haga Comitum ad te scripsi semel iterumque, sed nullo impetrato responso, quare minimum abest, quin pro re certa ducam literas illas non curatas esse. Ad Statii tui Silvas amoenissimas devertebar nuper, sed alibi occupatus. Vel sic tamen subnatae mihi conjecturae sunt complures, quas fortasse non improbes, si legas. Epicedio in Patrem vs. 38.

— — ubi post *Aeneia fata*
Solatus latius ingessit montibus Albam
Ascanius.

Cur vero *solatus fata Aeneia ob Albam conditam*? Editio Parmensis A°. MCCCCLXXIII. procusa, & quae membranarum veterum vicem praestet, *Stellatus* agnoscit, non *solatus*. nec dubito quin vere. *Stellatum* enim *Ascanium* in statuis ac picturis exprimi solitum opinor. quod ut credam nummus antiquus facit in gente Tarquinia a Fulvio Ursino editus, qui caput Augusti Caesaris ab una parte, ab alia imaginem stellatam refert, quam Ascanii esse gentis Juliae conditoris, cum alii alia inter antiquarios commenti sint, persuasum habeo ut credam. Exstant ejusmodi numismata tria quatuorve apud me, probe conservata atque illaesa, ex quibus liquido apparet juvenilem esse vultum. Nam in opere *Ursini* parum fideliter nummus est expressus. Huc accedunt, quae de flamma in Juli capite visa Virgilius, Claudianus & Sidonius Apollinaris narrant. Plura volebam, sed omnino incertus, an haec ad te perventurae sint, abrumpo scriptionem. Si quid literarum ad me perlatum cupis, *Ludovico* ac *Danieli Elzevirii* librariis Amstelaedamensibus curandum mitte. Curae illis erit ut ad me perveniat, quicquid miseris. Vale, Vir Celeberrime, Belgii nostri decus eximium. Exarabam Holmiae Succorum A°. CIÖICLXII. a. d. XXVII. Januarii Gregoriani.

Has ad Patrem *Wallium*, ut puer tuus perferat, vehementer te rogo.

EPISTOLA CCCCLXXIX.

GODEFRIDUS HENSCHENIUS

*Nicolao Heinſio.**Leidam.*

JAm pridem accepi humanissimas mihi missas litteras, quibus distuli responsum, variis distractus occupationibus, potissimum quod codicem exaratum manu, de quo hîc egeram, nescirem reperire. Gaudeo Claudianum nostrum profuisse; utinam reliqui aliquam antiquitati lucem præferant, eos, ubi otio abundabis, cupio tantum conferri. Sufficit usui posse esse bonum studiis commune promoveri, neque, quod verebar, dum hi in Bataviam ferrentur, γλαῦκας eis Ἀθῆνας mitti. Adventus tuus proximo vere gratissimus accidet, tum quos absolveris referri sufficiet. Plurimum nos tibi obstrinxisti, quod ad Acta Sanctorum illustranda varias bibliothecas excusseris, & catalogum miseris in summo frigore descriptum ex volumine doctissimi Domini *Isaaci Vossii*, cui hinc statuimus scribere, seu *P. Joannes Bollandus*, seu ego. Inter Poëtas Graecos collati sunt Oppianus, Sophocles, Theocritus, Hesiodus, quos illi accuratius exponemus. Graecus codex manu exaratus in Taceticis est Onofander ille idem, qui a *Nicolao Rigaltio* illustratus prodit anno cıııııı. in officina Commeliana, ut ex quatuor exemplaribus, quibus usus *Rigaltius*, magis convenire videtur cum codice *Fed. Morelli*, de quo agit pagina 83. in Variis Lectionibus, quarum aliquas ab aliis istic observatis discrepantes notavi. Ὁρεξιν in hoc studio movisti, audeoque petere, quinam ex illis, quos idem *Rigaltius* in Notis suis post Praefationem ἀνεκδότας refert, editi sint. Heronis βελοπικηὰ a *Bernardino Baldo* illustrata habemus typis Augustanis *Davidis Franci* anni cıııııııı. an aliqua ejusdem Heronis ab aliis eruta extant? Offertur subinde occasio lustrandi bibliothecas in antiquis coenobiis, in quibus similes subinde thesauri latent, eosque quasi πρᾶκτὸν ἄξοντες negligimus. Confidenter haec propono, non inscius mutuum animum hisce reculis foveri, & propensiores reddi. Vale, Vir Clarissime, & amore coepto perge nos complecti. *P. Joannes Bollandus* officiosissimam adscribit salutem. Antverpia. pridie Nonas Februar. cıııııııııııı.

EPISTOLA CCCCLXXX.

JO. BAPT. VAN STEENBERGEN

Nicolao Heinſio.

DOmne per me non stetit, quod saluti, quam tuis ad Dn. *Huylenbroek* communem amicum adscripseras, hætenus non rependi vices. Nam literae meae verecundatae sunt adire te absque admissionali. Tentavi nonnumquam,

Fffff 3

an

an poëtico sermone amorem erga te meum exprimerem, sed obtorpuerant Musae meae per forenses tricas, aliaque negocia procul ablegatae. Itaque in styli pedestris humilitatem revolutus sum, quem & ipsum excusabis desuetudine silvescentem. Verum & blaesis & balbis venia datur suo more verba conantibus, & affectui non a lingua, sed ab opera & fide testimonium est. Tu experire, & reipsa comperies, an quis te vel studio propensiore, vel res tuas maiore diligentia sit observaturus. Adde & animum, ut fugitivas Deas sollicitem redire mecum in gratiam. Impetrabo, sat scio, si minus deprecationibus meis, at meritis tuis. nec enim, credo, invidebunt mihi guttulam, laudibus tuis impendendam, cui totam indulserunt Hippocrenen. audeon quiddam? sed quid ni, cum apud amicum garriam ipse amicus, & apud filium de parente concivi meo? Veniet in partes favor domestici Apollinis tui, Patris tui, inquam, viri supra seculum suum; qui nulli Veterum cedit, & cui Veterum plurimi cum recentioribus cunctis. Nisi quod, cum tua video, excidit mihi Vatis Umbri exclamatio, Cedite Romani scriptores, cedite Graji. cetera non adscribo, ne offendam modestiam tuam. Interim persuade tibi non esse hoc affectus mei iudicium, sed iudicii affectum. nec meum duntaxat iudicium, sed omnium, qui (licet in aliis castris) vestra candide aestimant. Evenit adeo nuper mihi cum patre quodam Jesuita sermocinanti de poematis tuis, ut ille enixissimo impetu in laudes tuas erumperet, & scripta tua collegis suis in summo esse pretio testaretur. Quod in homine, qui Te ne vel facie tenus novisse aiebat, & ex illa cohorte, quae in ἐπεροδόγων scriptis censuram non satis aequam exercere sese postulat, visum est admirabile. Non dicam, quam id mihi perplacuerit. permittam hoc cogitationi tuae. Enimvero jam pudore suffundor loquacitatis. Frontem tamen perfricabo, nec desinam, nisi obtestatus fuero, ut Patri tuo, cui meis literis meliora studia interpolare ducerem religioni, quemque numinum instar sacro devenerari silentio potius esse reor, novum me clientem devoveas, tanto in cultu ipsius futurum ardentior, quanto se ipsum meritorum penuria agnoscit, & fatetur aliis inferiorem. Precor etiam, ne si quid rei literariae heroës moliantur novi, me nescire velis. item ecquid, & quousque promoveris in crisi Ovidiana. Vidimus hîc *Salmafii* diatribam de annis κλιμάκτηρικῶς, maximam de nihilo historiam. cognatus vester *Judocus Wastelius* hodie fato concessit. Plus temporis hac vice non audeo tibi subducere. & vero, *Pagina iudicium docti subitura veretur Heinsidae, ut Clario mssa legenda Deo.* capis parodiam e poëta tuo. Vale, & crede serio te amari ab eo, qui in summa felicitatis parte collocat, licere sibi pae se ferre, quod sit tuus. Gand. XIX. Octob. CICI^oCXLIX.

Hic *Steenbergius* vir Doctissimus, & Parlamenti Mechliniensis Aëssor & fisci patronus postea fuit. vid. Epist. *Hadr. Wallii* ad *Heinsium* t. III. pag. 887. & multa ejus mentio in *Graevii* ad *Heinsium* epistolis, ubi *Gevartii* Antoninum editurum promississe scribit *Graevius*, qui & Epist. LVII. eum in periculo (forte muneris amittendi) versatum esse, sed decessu Praefecti liberatum indicat.

EPISTOLA CCCCLXXXI.

JO. BAPT. VAN STEENBERGEN

*Nicolao Heinſio meo. S. D.**Leidam.*

Nihil opus erat, ſuaviſſime Heinſi, ſilentio tuo ſemeſtri excuſando obtinere profectionem & aulam Suecicam: praefertim apud me, qui vel e negociolis meis facile metior, quantum temporis Regia familiaritas debeat ſubducere. Enimvero Muſas tuas cordi eſſe Reginae tam eruditae idipſum gratulor plurimum. Felicem te, cujus verſibus capitur illa ſupra ſexum, aetatem, imo ſaeculum ſuum heroina! qui in auguſtiſſima luce fama collocatus ſtudiis dignitatem, literis potes conciliare ſplendorem! quam diſpar fors eſt noſtratum aularum! ubi nullus ingenuae eruditioni jam honos, nulla bonae menti praemia: ubi nihil in pretio praeter pretium. Me *ἀντίκιστα* jamdiu poſſidet, phaleras, & caecae fortunae munera non ambientem, nec aeque habentem in votis, ac doctorum amicitiam & conſuetudinem, quibus ego ſupra humanae vanitatis ſaltigia evectis ne vel comparare magnates ſuſtineo. Tuam comiter mihi conſervari peto, ſpondens meis me partibus non defuturum. Hendecasyllabis tuis minime Septentrionalibus quod reponam, paupertina arcuſa mea non ſuppeditat impraeſentiarum: niſi vis hoſce loripedes, qui ſub manu excidere.

¹ *Heinſi, paternam cui Novenſiles Divae &c.*

Videbo an foetura proxima quid feret terſius. interim haec habe, quae voluiſti, & quod intriſti, exede. Quod ſi venam mihi commoveris, cave me clamarere quondam neceſſe ſit, Ohe: ſed cur ad amantiſſimum utriuſque noſtrum *Huylenbroekium*, non item ad me ſcripſiſti? Veriſimilium *Schoppii* libri IV. & commentarius de arte Critica, cum *Franciſci Robertelli*, & *Frederici Sylburgii* gemini argumenti lucubrationibus, edita Noribergae anno *MDCCXCV*, & *MDCCXCVI*. apud me ſunt. *Suſpectas Lectiones* ibidem a te editas ipſe teſtatur in *Paedia*, anno *MDCCXCVII*. ſed illas mihi haecenus videre non contigit. omnia Antverpiae conquiri juſſi, oppeririſque indies, an illic exſtent. quae ſi naſtus fuero, Lugdunum curabo: ſin minus, Veriſimilia & Commentariolum de Criſi tantum, quibus (ut & quibusvis aliis) in tui gratiam carere, lucro apponam. ſignifica, amabo, ſi quid illic in re literaria prodeat novi. Vale, deliciae meae, & Dn. parentem meo nomine plurimum ſalvere jube. Scribebam ſumma feſtinatione Gandavi xxvi. Maji ipſo Adſcenſionis Domini *MDCCCL*.

Obſignaturuseram hanc epiſtolam, cum nunciatur Antverpia nihil Schoppiani illic eſſe. quare, ut dixi, tantum Veriſimilia, & quae adhaerent, ad te eunt. Iterum vale. xxvii. Maji.

¹ Hi verſus leguntur in Heinſii Carmin. Adopt. lib. II. pag. 73. Ideoque huc iterare non placuit.

J. O. BAPT. STEENBERGIUS

*Nicolao Heinſio S. P. D.**Leidam.*

MIraberis forſitan, Heinſi amiciffime, moram in ſcribendo me traxiſſe tam longam, cum Tuis Holmia datis ¹⁵ Aug. 1650. jamprimum reſpon-
 deo. Sed ſi credis eas ipſas a me primitus receptas ¹⁵ Octobris, & quidem (neſcio quo fato) reſignatas, & me poſtea tam mole negotiorum, quam titu-
 banti nonnunquam, & non firmiſſima valetudine languentem, adde & comi-
 tes *Huylenbrouquii* noſtri literas aſſidue expectantem, nec per ipſius nunc in Ba-
 taviam veſtram, nunc in aulam noſtram excuſantis abſentiam ante hunc diem
 impetrantem officium diſtuliffe, non vereor, ut legitima excuſatione diluere
 me hanc incuriae ſuſpicionem iudex non ſeveriſſimus facile patiaris. Hoc, ne
 exemplo peccaſſe videar, & ſilentium Tuum diutinum reciproca taciturnitate
 retaliare voluiſſe. Ingratiſſimus ſane merito meo audirem id agens, qui occupa-
 tiones meas Claudianeis Tuis lucubrationibus potiores cenſerem, quod, quaeſo,
 munus cur malo nomini, Scioppianis (inquam) grandi verborum cortice caſ-
 ſam nucem recelantibus Veriſimilibus *ἐντιδωρ* vicem obtinere voluiſti? Fa-
 teor, haec eſt permutatio Diomedis & Glauci. eoque magis, quod *ἡρωικὸν*
 doni Tui nunc temporis haud poſſum, niſi ſola grati animi ſignificatione repen-
 ſare. Quare ampliſſimas habeo gratias, & in aere tuo eſſe profiteor ob poë-
 tam tam elegantem, tam doctum. Ita Tecum & Scaligero ſentio. *Lipſius*
 (non ille quondam Rex literarum, ſed hypobolimaeus ille noſtras) cenſet an-
 guſti ſpiritus vatem, minorum gentium, & (ut loquitur) plebejum. Tuam
 fidem, Heinſi! nempe ille ipſe Ovidium Tuum naſceat, & quidquid non ſa-
 pit Lucretianum. eadem porro ſententia veſcamur glandibus, reperta fruge Ce-
 reris. De Notis quod obtendis, non video quibus illae diſplicere poſſint, niſi
 forte quibus exoſum eſt nomen Heinſianum. Perge, perge, clariſſime ami-
 ce, in Criſi iſta, unice mihi olim, dum ſtudiis florebam ignobilis otii, dea-
 mata, nunc per alias res prorſus e manibus abrepta. quin nec indulgere illi poſ-
 ſum a libris calamo deſcriptis, aliisque eimodi adminiculis, quibus Tu abun-
 das, plane deſtitutus. quod Muſas, & carmen ingeris, admitto id quidem,
 ſed indies mihi vena non concuſſa magis magisque exareſcit. nec unquam ad-
 eo *ἐνθουſιάζουαι*, ut aliquam juſti operis telam detexere queam, animi calore
 per inſilientes quoque momento opellae noſtrae flagitationes evaporante. nec
 vero deeſſe convenit Spartae, quae mihi obvenit, ſive delecta eſt. quod & Tu
 ſtrenue facis, ſed in anguſtiore fortuna, quam ex animo aggratulor, & fla-
 grantiſſimam Heroidis Suecicae gratiam ſtabilem apprecor, aequae ut amicitiam
 erga me Tuam. Vale, praetantiſſime Heinſi, Gandavi ¹¹ Januarii 1651.

EPISTOLA CCCCLXXXIII.

J O . B A P T . S T E E N B E R G I U S

*Nicolao Heinſio S. P. D.**Leidam.*

Chriftinam Auguſtam Tuam cum Tuis Lugduno datis xiv. Kal. Junias primitus accepi. cujus poëmatibus cum mihi guſtus jamdiu motus eſſet variorum deprædicationibus, ſaturavi me lectione illius, eaque repetita, & ἀπνευſί. Fruſtra deſideras applauſum meum, naſtus omnium. Nam quæ ſubindicas de quibuſdam delicatulis, qui nonnulla de Auſtriacis malint non ſcripta; nihil eſt. Sane videntur ignorare illi, cui & in quibus oris ſcriptum ſit carmen iſtud, quidve conveniat in Regno, cui potentia Auſtriadarum (ut & Francis) unica belli cauſa. peccaſſes in τὸ πρέπον, ſi Batavus in Suecia aliter de re vulgo illic recepta vel ſentire vel ſcribere viſus eſſes. Non Te latet quidem ſummum virum parentem Tuum in ſcriptis ſuis ἀλαφορίαν ubique ſervaviſſe, an quo ubique & citra offenſionem legerentur? Sed Reſpublica veſtra tum temporis necdum adeo ſtabilita erat. Alia ætas alios mores patitur. Sed parum eſt quibuſdam non ſatisfacere, cum arrisit labor Tuus illi Heroinae, cui ſumtus eſt. Et quomodo non placuiſſet Epos plane Heroicum, Auguſtum, denique Heinſianum? quanquam poſſides, & in elegiis exprimis genium Naſonis, opus iſtud Te manifeſte prodiit incaluiſſe a lucubrationibus Claudianeis. Quare, præſtantiffime amice, munus iſtud exoſculor, & repono inter κειμήλια. Solpitet Te Deus, & quemadmodum ſortem Tuam hæcenus provexit, ita cumulare laudibus & honoribus vitam Tuam deſultoriam, quam ominaris, porro pergat. Ego Polypus ſum, & ſaxo meo inſidens neutiquam divagor, illud meditans, λάτρε βιώſας, & in privata fortuna ſtrepitus Aularum & Magnatum vanitates fortiter contemno. Vale Φίλιππον καίρα cum Nobiliſſimo patre Tuo, cui manus quanta poſſum animi ſubmiſſione deveneror. Gand. viii. Kal. Jun. cicioccli.

EPISTOLA CCCCLXXXIV.

J O A N N E S B O L L A N D U S

*Nicolao Heinſio.**Leidam.*

PAx Chriſti. Quas Holmia ad me nonis Septembris dedisti humaniſſimas litteras, eas ante plures hebdomadas a Caſperio Gevartio Viro Cl. accepi. Diſtuli tantisper reſponſum, dum allatus eſſet Leida Claudianus Tuus; Tuus, inquam, qui plus a Te accepit ſplendoris, quam ab Stilicone olim, vel Olibrio ac Honorio ipſo & aliis, quos coluit. Semper me quidem Poëta ille delectavit; at nunc multo eum legam libentius, tanto a Te, Eruditiffime Heinſi, ſtudio recenſitum. Tuas certe quidem in eum notas (ignosce candori meo)

Tom. II.

Ggggg

ne-

nemo leget, qui non sublimem quamdam de Te concipiat animo opinionem. Dixi jam saepius *Henschenio* nostro: Qui in re tantilla eam adhibuit industriam ac iudicium, nae ille, si unquam ad Rempublicam accesserit, illustre quiddam effecturus est. Neque minora auguratos alios, & verissime, autumo. De Actis Sanctorum quod quaeris, spero me ante finem hyemis subjecturum prae-lo Februarium. Nullane vero in istis provinciis de iis, qui primi fidem invexerunt, aut vitae sanctitate olim claruerunt, scripta extant? Habemus quae *Joannes Vastovius* edidit, titulo *Vitis Aquiloniae*; item *Joannis Magni* historiam, & *Olai* admiranda. Vix de Suedicis antiquitatibus alii nobis noti scriptores. Si quid praeter hos extat historicum, Latina aut communi Germanorum lingua, libenter intelligemus, & qua ratione devehit in Belgium possit, pretium repraesentaturi. Si quid item editum typis in sapientissimae (ut vere eam appellasti) Reginae inauguratione, quam longe magnificentissimam fuisse accepimus. Vale, Eruditissime *Heinsi*, & qui tam longinquo loco dignatus es nostri memor esse, quo Tibi officio gratificari vicissim possimus praescribe. Ero certe, una cum *Godefrido Henschenio* nostro, in perpetuum ex voto debitoque, Nobilis ac Eruditissime D. T. D. servus in Christo. *Isacio Vossio*, si e Gallia rediit, salutem plurimam uterque adprecamur. Antverpia III. Id. Decemb. MDCL.

I Hanc, qua vitae Sanctorum regni Sueco-Gothici enarrantur, emendavit & illustravit notis eruditissimis Vir praeclarus, & magnum hodie literarum apud Upsalienses ornamentum, *Ericus Benzeli*us filius, Upsaliae MDCCCVIII.

EPISTOLA CCCCLXXXV.

JACOBUS VAN DE WALLE

Nicolao Heinsio S. D.

Leidam.

Clarissime Domine. Quando te feliciter e Suecia rediisse, & eandem te rursus cogitare intelligo, vario affectu animum mihi diffundi quoque sentio. Nam & longum iter incolumem te confecisse laetor, & ut prospere idem relegas, quoniam ita tibi constitutum est, precor. Difficilis viae molestias solari certe potest, & omnino debet serenissima illa Regina, cujus conspectus & contemplatio venerabundum te nuper suspensumque tenuit, atque iterum ad se rapit. Quae cum, ut ex te audio, non tantum litteras studiaque illa nostra complectatur & foveat; sed, quod in summa illa auctoritate rarissimi exempli est, iisdem erudita etiam sit, siquid illis dignum oculis scripseris, leget, & aestimabit. Ergo quam in Italia *Medicaci*, *Valesii* in Gallia de erectis ingeniis ac litteris sibi pepererunt gloriam, eam nunc in extremo Septemtrione rursus videbimus efflorescere. Quid autem, quando Musarum conatus attollit ac provehit tantarum Heroidum singularis favor, non aggrediantur & possint? Itaque cum praeclara sint omnia, quae haecenus ab ingenio tuo profecta sunt, necessitatem hanc tibi impositam gratulor, qua ipse te posthac debes vincere, hoc

hoc est, parenti tuo, viro incomparabili, propius accedere. De numismatis illis, quae Bruxellis prostant, simul atque *Hadriani Wallii* ad me litterae pervenere, ad *Ottonem Zylium* scripsi. Nam ego nunc Gandavum, quo *Sidronius* noster anno superiore concefferat, commigravi, ut ne scilicet suavissima illa destitueremur consuetudine & libertate, qua ex Horatii praescripto, siquid inter alias, quibus distinemur, occupationes interdum scribimus, alter alterius auribus iudicioque subicimus. Atque hîc dum ad Scaldis aut Lizae ripam strati subinde aliquid legimus, qua nos voluptate perfundi credis? An tu hanc nobis oblectationem intercipies & invidabis, ut si quo te spiritu Reginae illius majestas veneratioque afflaverit, illum itidem ex te non hauriamus? Equidem sic Cl. Parentis tui poemata nos interdum afficiunt, ut non modo a Caesareis cunis, sed ab ejusdem ingenio immortale huic urbi nomen certo auguremur.

Sed nomen. ipse abivi, abibit hoc quoque,

ajebat de se sapienter in epitaphio suo *Lipsius*. Quare cum Deo placere, in quo sita sunt omnia, nemo possit, qui depravato in religionis rebus sensu ac iudicio abduci se sinat, hoc te per Deum rogo, ut de re tanta deliberare serio tecum ac mature velis. Et quoniam te antiquitatum cultorem esse video, si antiquitatem relegas, nonne ipsa nobis suffragatur universa? Primi illi Caesares, quorum vultus in nummis expressos vides, quam trecentis illis annis infectati sunt Ecclesiam? illam nostram, in qua & sacerdotes, & sacra nostra. *Constantinus Magnus* cui Ecclesiae pacem attulit? illi, quam *Silvester Romanus Pontifex* rexit. A quo institutus? ab eodem, quem in Soracte monte delitescens ad se evocavit. Quo auspicio ad pontem *Milvium* *Maxentii* tyrannidem fregit? signo crucis. Cujus se precibus commendavit? *Antonii*, monasticam vitam professi. Quem *Nicaeno* in Concilio sibi sumpsit locum? *Episcoporum* & sacerdotum auctoritatem reveritus, postremum. Atque haec, quae tu, scio, boni consules, ut hisce litteris adderem, fecit partim amor in te meus, & ingenii tui atque eruditionis aestimatio, partim aeternitatis, quae nos manet, immensitas, & felicitatis illius, qua nunc *Kinschotium* nostrum frui spero, magnitudo. Ceterum quia poëtis jucundius accidere nihil potest, quam in tanta eorum, qui rem penitus introspiciunt, paucitate, ab iis, qui id consecuti sunt, legi, his adjungo 1 poemation, cui jam nunc postremam manum adhibui. in quo quid parenti tuo debeam, ipse facile per te assequere. Ut mi-

Ggggg 2

nu-

1 Legitur in *Jac. Wallii Heroic. Lib. II. pag. 89.* in opusculum postumum *Leon. Lessii* de quinquaginta Dei nominibus. Ceterum ex hac epistola apparet, quam Jesuitae semper conentur mentes eorum, qui cum illis commercia instituunt, depravare, & videtur hic *Jac. Wallius* cum ejus cognomine, nescio an consanguineo, *Hadriano Wallio*, collatis operis id egisse, ut *Kinschotium*, *Heinsium* & alia seculi proximi divina ingenia a verae religionis professione deducerent. de *Kinschotio* vidimus *Tom. III. pag. 883.* ad *Had. Wallii Epist. xxv.* Oppugnantem in *Epist. 496.* *Heinsii* constantiam videbimus, etiam *Papebrochium*. Utinam quid illis responderit *Heinius* sciremus, sed defuerunt nobis priorum annorum Epistolae pleraeque, quas ad amicos misit, fere ad Annum *MDCLXI.* Non magnifice autem de *Heinsii* eruditione & studiis sacris sensisse debuit *Wallius*, qui obsoletis illis, & centies falsi convictis de *Constantino* & *Silvestro* fabulis, fidem habiturum virum doctissimum, animum inducere potuit. Publice vero prodest tales epistolas edi, ut videant juvenes, quo in periculo versentur, qui hoc hominum genere familiariter utuntur.

nutiora omittam, in illa comparatione, quae sub finem lib. i. de Cont. mort. legitur, *Ut cum flumina vasta*, &c. conatus sum cum illo contendere. Scripsit idem *Lessius*, cujus opusculum postumum hîc laudo, Consultationem, quae fides & religio sit capienda, qua multorum animi ad sanctiora traducti sunt. Tu, quaeso, libellum illum, qui obvius est, (neque enim diffiteri potes, quin tanti id sit) inspice, & expende. Vale, & a me & *Sidronio* parentem tuum V. C. quem suspicimus, saluta. Gandavi. Kal. Junii, MDCL.

EPISTOLA CCCCLXXXVI.

JACOBUS VAN DE WALLE

*Nicolaus Heinſio S. D.**Leidam.*

Clarissime Domine. Litterarum commercium, & cum eo amicitiae fructum, nuper tanto locorum intervallo nobis ereptum, nunc restitutum laetor. Quare ut primum de tuo e Suecia reditu factus sum certior, meum esse duxi ad te scribere, tum ut de fama, quam tuae tibi Musae non in Italia & Gallia tantum, amoenissimis Europae regnis, sed etiam in Arctoo frigore pepererunt, tibi gratularer; tum ut gratias agerem de Poëmate, quo me & *Sidronium* nostrum donasti. In eo uterque laudavimus magnificum & robustum scribendi genus, quale plerumque affectat animus, cum se ipso major ad paeſyricos aſſurgit, urgetque praesentius aliquod Phoebus

*Numen, & incurſu mentem graviore fatigat,
Attonitoſque ſui perſultat imagine ſenſus.*

De verſiculo uno alterove, in quo nimium ſibi Muſa permittit, nihil dico, propterea quod id aulae, in qua verſabar, moribus potius tributum, quam ex animo profectum eſſe credam. Mihi ſane placuit ſemper ille perennis & innoxius Ovidii candor, quo nulli, niſi ſibi, nocuiſſe Muſas ſuas proſitetur. adeoque ſcribere ego ſemper velim, quae legere omnes itidem velint, & ut velint, amorem omnium benevolentiamque mereantur. Tu modo perge, ut Parentem tuum Virum incomparabilem proxime conſequaris, &, quod, ut ait Poëta tuus,

— *magis eſt optabile, vincas.*

parentis imitatione, quam Reginae gratia futurus illuſtrior. Sed & in illa ſatis admirari non poſſumus, quod etiam in Regibus rarum omnino eſt & ſingulare, eam & eleganter ſcripta intelligere, & aeſtimare, & honeſtiſſimis praemiis munerari. Cujus exemplo ſi ii, qui rerum alibi potiuntur, ingeniis ignes ſubderent, melius cum Muſis ageretur. Verum numquam non cum voluptate mecum ipſe reſcolo jocum illum plane ſativum, quo Parens tuus V. C. uni tantum rei a natura diligentius proſpectum eſſe voluit, ut quemadmodum cicadae, ita ſolo quoque rore victitarent poëtae. De opere poſtumo *Kinſchotii* quo loco ſit, ipſe nunc coram vides: neque, quod me nuper monebas, quin

quin per te nunc editionem urgeas, dubito. Age videamus brevi delicias nobilissimi Juvenis, tibi nobisque amicissimi, & erepti desiderium hac saltem parte solemur. Verumne est, iterum te Galliam, iterum Italiam meditari? Quid Ovidio tuo fiet? priusne ille, quam iter longinquum suscipias, subjiciendus praelo? *Sidronius* notam unam alteramve non malam suggeret: tu opus aggredere. Cum nuper Antverpiae essem, diligentiam plane accuratam apud me inter alios complures laudavit *Bollandus* noster, quam in Claudiano recognoscendo notae tuae demonstrant, ex eaque facile conjecit, si ad majus aliquod opus eadem conferatur, fore ut nihil lector in eo desideret. Tanta etiam contingit gratia operae curaeque non maximae. Quamquam quid ego illam extenuo? cum curiose, & feliciter, & ex vero multa in priscis bonisque auctoribus emendare, requirat expoliti limarique judicii acrimoniam, qua sibi nomen fecerunt, ex quo coeperunt renasci litterae, tot eruditi viri. Solido enim ista investigari ac detegi nequeunt, nisi ab eo, qui proprietatem linguae, latentium sensorum vim, artem, decorum penitissime introspexerit. Quare cum id quod a te profectum fuit, magni semper pro eo ac par est duxerim, tibi de illustrato Claudiano gratulor, majori id sensu facturum, si illum, qui nobis frequentius in manibus est, emendando interpungendove restitueris sibi, aut juveris. Et quidem nisi ante iter Italicum opus istud absolveris, nae tu frustra tibi a Romanis Musis civicam coronam ob creditam tibi Nasonis tui vitam promiseris. Irrito, certe in longum diem rejecto, promisso, tuum istud usurpare quâ poteris?

Tu quoque Taenariis, Ovidi, laetare sub umbris:

Hospes, barbariem qui tibi tollat, adest.

Te testor, nec parva tuos mihi numina Manes,

Officium cura nil caruisse sua.

fidem igitur tuere & actutum solve, priusquam hinc evoles. Clarissimum Parentem tuum avide hîc exspectamus: pietati defueris, nisi illi in patriam venienti comitem te adjunxeris. *Hadrianum Wallium*, ubi videris, a me & *Sidronio* saluta. Vale. Gandavi, XIII. Junii, 1651.

EPISTOLA CCCCLXXXVII.

JACOBUS WALLIUS

Nicolao Heinsio S. D.

Leidam.

Clarissime Domine. Amicitiae, quae inter nos coire nuper coepit, fructum nobis suavissimum jam diu ademit itinerum tuorum ratio, quibus & Suecia & Italia secundo a te perlustratae sunt. Nunc dum, ut opinor, natali in urbe tibi & studiis vacas, ut, quam eruditissimus parens tuus necessitatem tibi honestissimam imposuit, ejusdem famam pari laude tuearis, laetor esse mihi ad manum aliquid, quo intermissum consuetudinis nostrae commer-

Ggggg 3

cium

cium instaurem. Munusculum quippe a me habes literarium, quod, ubi auguror, aestimabis, propterea quod in practantibus rebus magna quoque sunt ea, quae sunt optimis proxima. Ego certe ad me pertinere illud credidi, quo parens tuus, cum Virgilium emendatiorem a se factum tibi inscriberet, exemplo tibi fuit, quantum ad iudicium interfit, ut qui maxima affectant, paucis ac praecipuis assuecant. Illis assuefacti, ad hunc, quem in his libellis animadvertes, pervenimus scribendi cultum. Siquid tamen fuerit, quod aut tuo aut aliorum iudicio fieri melius possit, id indicando & amicitiae nostrae integritatem probaveris, & me beneficio non vulgari obstrinxeris. Optassem Serenissimae Christinae laudes, quarum materiam ipsa mihi, quam tibi, uberiores nunc dedit, libello meo inferere: sed hoc alterius erit temporis. Illa sane, quam prudentissimam esse nosti, hanc tibi, hanc omnibus, qui tecum de religione sentiunt, mentem injiciat necesse est, ut saltem deliberandum putetis, num quod illa nunc profitetur, profitendum & vobis sit. Vale, & me sana suadentem ama. Antverpiae, 21. Martii, 1656.

i Credo Poëmata sua misisse, quae hoc anno ex officina Plantiniana Balthas. Moreti prodierunt Antverpiae.

E P I S T O L A CCCCLXXXVIII.

J A C O B U S W A L L I U S

Nic. Heinsio S. D.

Amstelædamum.

A Mplissime & Clarissime Domine. In benevolo illo tuo de libellis meis iudicio te valde amo, non quod nesciam, quantum ipse diligentiae praestiterim, ut tibi tuique similibus, quorum exiguus nunc est numerus, placeam, sed quod ipse mihi facilius persuadeam fore, ut nostra ab iis expetantur, qui veterum & tuo exemplo scribunt. Neque enim aut amori tantum, aut studiorum similitudini acceptum refero, quod ita sentias. Est illa in te eruditio cum ingenuo candore conjuncta, ut de aliorum iudiciis securus esse posse videar, qui laudatus fuerim tuo. Ut autem ad amicitiam nostram aliqua fiat accessio, novo te munusculo prosequor, quo, si viveret, auctor te donaret. Ego illius mentem probe affecutus, & ut ita loquar, testamenti exsequendi curator te hoc legato muneror, in quo defuncti benevolentiam & eruditionem, & meum adhuc superstitis in te amorem ut praecipue aestimes, rogo. Neque accidere opportunius potuit, quam ut id amica Cl. V. *Hadriani Wallii* manu tibi traderetur, qui quod huic epistolae deest, sua comitate & affabilitate sermonis, cum te redux salutaverit, cumulate supplebit. Cum autem sic nostra laudaveris, Ovidianum illud in rem nostram verbo unico leviter immutato accommodabo:

*Quam mihi das, Heinsi, laudem, partire duobus:
Dimidium toto munere majus erit.*

fuit

fuit enim *Sidronius* mihi, quod Polluci Castor, cui & natura me, & voluntas, & consuetudo, & religiosi instituti amor assuefecerat, intimeque conjunxerat. Qui quo in honore ac Pretio parentis tui viri clarissimi lucubrationes una mecum habuerit, ipse testis sum: nunc cum uterque vita cesserit, an pariter in illo beatorum domicilio laudes Deo concinant, tuum est attente cogitare. Ignosce (nam aliter amare non novi) commonitioni meae, in qua aeternitatis propediem nobis imminens res agitur. Interea tibi gratulor, & mihi gaudeo, quod Resp. Amstelodamensis te scribam nacta sit, qui non, ut quidam, forenses tantum & capitales causas scripto consignaturus sit usitatis ac vernaculis formulis, sed ad ingenii cultum etiam ea, quae erudita posteritas excipiet, & laudabit. Quamquam, ut sensum meum eloquar, metuo, ne hoc munere districtus illud mihi occinas:

Nos alio mentes, alio divisimus aures.

At tu te respice, & otio literato interdum te involve, coque perfructu, & a tot viris amplissimis, qui Remp. sic tractarunt, ut Musas non negligerent, tibi exemplum cape. Age, videamus post illas, quibus interdum pascimur, ingenii tui primitias aliquid, quo publicis negotiis implicitus te tibi imperare, & ad pristinas amaenitates secedere potuisse testeris. Porro quanta tibi, cum Romam perlustrares, amicitia cum Illustrissimo *Furstenbergio* fuerit, e libellis tuis animadverto, quam mihi tecum communem esse non e meis tantum deprehendes, sed multo etiam magis ex insigni benevolentiae significatione, qua mihi aditum ad Pontificem Maximum aperuit, fratrisque mei filio opulentum ab eo sacerdotium impetravit. Tu vero usus illo es valde familiariter.

*Una domus, mens una duos sociavit amantes,
Et chelys alternam non semel una manum.*

Testantur id praeterea Estenses horti, qui eleganti sane & amoeno epigrammati materiam prae-buerunt. Quod si igitur mihi, qui amicissimum vultum numquam vidi, perscribere digneris aliquid, quod meam in illum benevolentiam studiumque augere possit, facere mihi gratius nihil poteris. Scis ipse quam juvet eorum, quos diligimus, & staturam, & vultum, & colorem, & multo magis ingenii suavitates virtutesque cognoscere. Quare per amicitiae sacra te rogo, ut mihi de illo scribas aliquid, & me, quod facis, amore pergas. Antverpiae, 21. Aug. 1656. Salutant te plurimum PP. *Bollandus* & *Henschenius*. P. *Otho Zylius*, quem, ut puto, Bruxellis aliquando in bibliotheca nostra videris, abhinc dies paucos naturae concessit.

¹ Est ex N. Heinsii Elegia ad Ferdin. Furstenbergium, quae lib. II. El. IX. legitur. de Estensibus hortis, quos simul cum Furstenbergio perlustrabat, est carmen lib. III. Silvar. pag. 199.

NICOLAUS HEINSIUS

*Jocabo van der Walle S. J. T. S. P. D.**Antverpiam.*

PRaeterita aestate post meam ex patria profectiōem, cum manus suprema edendo Nasoni a typographis esset imposita, quem notis meis illustratum ex fide veterum membranarum plurimis in locis correctum *Elzevirii* Amsteladamenſes typis suis descripserant, injunxi illis, ut quatuor exemplaria mitterent Antverpiam, quorum bina tibi ac R. P. *Johanni Bolland* cederent, bina *Gevartius* ac *Moretus* Viri Clarissimi auferrent. Libellos vobis oblatos esse ne dubitem explorata mihi multis argumentis *Elzeviriorum* fides ac sedulitas facit. Ut dubitem vestra taciturnitate adducor; si mandato fideliter perfuncti sunt, fac, quaeso, verbis vel tribus id ex te intelligam. Omnia curis secundis ad limam revocare coepi. Multa subnascuntur de novo haecenus mihi non animadversa, sed otium votis meis non respondet. Miratus es sine dubio audaciam meam & temeritatem, qui versus frigidos ac jejunos maximi poetae scriptis praefigere plus uno loco non erubuerim, sed jacta alea est. Poemata tua luculentissimum ac tersissimum opus mecum ubique circumfero, & manibus assiduis tero volumen, quod tua munificentia possideo. quo magis videre exopto, si quid novi iis accessit. ita enim intellexisse, nescio unde videor, nec credibile fit secundum illud ingenium tuum post tam felices successus cessare. Pluribus te compellabo, si has tibi redditas esse intellexero. Vale, Vir summe, & me, quod facis, nominis tui studiosissimum amare perge. Si quid litterarum ad me dabis, id Amsteladamum perferri ac D. *Ludovico Danielique Elzevirii* tradendum cura. Operam dabunt illi, ut fasciculus haec in terras tuto ad me perveniat. Exarabam festiva manu Holmiae Suecorum. Anno MDCLXII. a. d. xxvii. Januarii Gregoriani.

EPISTOLA CCCXC.

JOHANNES BOLLANDUS

*Nicolao Heinsio.**Hagam.*

Pax Christi. Nihil mihi potest jucundius accidere, quam ut Clarissimae Dominationi Tuae quacumque in re deserviam. Cum igitur heri epistolam Tuam accepissem, qua significat se post varias peregrinationes quieti tandem redditum, denuo admove manu recensendis edendisque veteribus poetis; inque eam rem commodari sibi ad tempus cupere Sili Italici, quod habemus, exemplar, olim a *Gryphio* excusum, cui additae ad marginem cujuspian viri docti manu variae lectiones; illud mox charta involvendum accepi in manus,

mis-

missurus prima opportunitate vel amici Hagam proficiscentis, vel sarcinae librorum a quopiam bibliopola isthuc destinandae. *P. Jacobum Wallium* vestro nomine salutabo, cum occasio feret, ut vel ego ad eum ad collegium Convictorum, in quo degit, vel ipse ad hanc domum veniat. *P. Godefridus Henschenius* profectus nuper est Romam, ut bibliothecam Vaticanam aliasque perlustret, & quae de actis SS. nos hactenus fugerunt, eruere possit, tum Latina, tum Graeca. Invitatus ego illuc fui ante annos complures ab aliquot Praepositis Generalibus Societatis nostrae, sed ut venirem, cum mihi opportunum videretur. Dum in annos differo, ut aliquot meditati operis tomos protruderem in lucem, interea sic afflicta valetudo mea est, ut omnino tam longinquo itineri ferendo non sim. Obtinui igitur ab admodum Reverendo Patre Generali nostro, ut *P. Henschenio* cum alio comite venire illuc liceret. Idque eo celerius fieri volui, quod *D. Lucae Holstenii* saepius jam gravi morbo tentata valetudo sit, cujus tamen favore, dum licet, utendum, ne quis ei submorosus ac difficilis in praefecturam bibliothecae Vaticanae succedat. Scripsit mihi postremo *P. Henschenius* Francofurto xxviii. Augusti: sategit enim delibare, si quae in itinere occurrant scripta antiqua. Cum ei scribam multam verbis vestris salutem nuntiabo: & ero quo ad vivam, Servus in Christo. Antverpia Nonis Septembribus MDCLX.

EPISTOLA CCCCXCI.

DANIEL PAPEBROCHIUS

*Nicolao Heinsio.**Hagam.*

CLarissime Domine. Accepimus Prudentium tuum, gratissimum munus; in quo quod excusaremus invenimus nihil, praeter sollicitam excusationem tardius exolutae promissionis: quae ut minime apud amicos necessaria fuit, expressionem tamen continebat affectus, & animi officiosissimi. Ego observationes vestras ad Hymnum iv. *ὡς εἰς Θεοῦ* statim consului, quo ipsum ad xvi. Aprilis correctionem ederem: neque id frustra fuit. Quod si Dominario Tua praeter istuc notata etiam invenit, quo meam in versu 46. correctionem seu potius conjecturam fulciam, gratum erit subsidium.

*Ingeret Tingis sua Cassianum**Festa Massylum monumenta Regum.*

Quid si pro *feſta* legatur *Fessa*, urbs Regia in mediterraneis Tingitanae provinciae? si ibi sepulti credantur Massylitani Martyres, quorum memoria agitur 9. Aprilis, quique Regiae stirpis fuerint, ut propterea etiam Reges vocentur? Correctione certe aliqua videtur opus esse, quia nullum commodum sensum alias assequor, nisi eum me doceas. Aprilis noster ad praelum hinc Antverpiae datus est mense Majo: & progreditur tam celeriter, ut cum jam nunc 150. folia habeantur impressa, certo sperari possit finis in autumno sequentis

Tom. II.

H h h h

anni.

anni. Mihi incumbit praeparare materiam, supplere deficientia, emaculare typos, impressa recognoscere, conficere indices, ut a spinosioribus minusque amoenis liber senior magister meus componendo Majore jucundius occupetur. Istis ergo occupatus, & ultra non inveniens quod hisce addam, finio cum voto publicae privataeque quietis, tum meo, tum P. *Henschenii* nomine, qui pridem litterarum scribendarum partes in me transtulit. Antverpiae 14. Augusti 1673.

EPISTOLA CCCCXCII.

DANIEL PAPEBROCHIUS

*Nicolao Heinsio.**Hagam.*

Amplissime Domine. Praesentia Domini *Anselmi* nostri, admonet me officii diu dilati, quo volui cum Amplitudine Tua communicare Soteria Furstenbergica, simulque indicare, quo in statu sit opus nostrum. Ea igitur vel ferro nunc mitto, cum appreciatione felicissimi anni; significo etiam Majum nostrum quinque tomos impleturum, jam ab anno versari sub praelo, unde exiturum spero anno 1680 aut sequenti. Valet ad studia aeque ac alias P. *Henschenius*, quamvis annos cum seculo numeret: ne tamen eo citius fortasse quam optemus eripiendo, solitarium me destitui contingat in molitione tam vasta, provisum a superioribus nostris est adjunctione P. *Danielis Cardoni*, perquam idonei ad haec studia & optime animati. Itaque jam tertium famulum tuum Antverpiae habes communi nobiscum vinculo adstrictum tibi, quod protestor hac 28. Januarii 1678.

EPISTOLA CCCCXCIII.

DANIEL PAPEBROCHIUS S. J.

*Nicolao Heinsio S. P. D.**Vianam.*

MEas, quamvis tarde, perlatas gaudeo: elegantissimis tamen munusculis Tuis quod reponam suppetit nihil, praeter hoc tenue Eucharisticon: cui accedit specimen Kalendarii Muscovitici, paulo elegantius, quam ex Muscovia informi plane celatura expressum in ligno allatum est, repraesentati, ad ornamentum Maji: cui hujusmodi duodecim tabulae, cum sua explicatione & collatione ad fastos Graecorum, praeludent. Sed bene! quod cum propria deficient, gratificari possim de alienis, mittendo *Wilthemii* Annotationes ad diptycha & horum appendicem, nec non dissertatiunculam de Iconibus Constantini Imp. & Helenae matris. Haec ergo accipe, quo mittuntur affectu. Mora in Silio Italico remittendo nobis nequiquam fuit incommoda; quare nec de-

debut excusari. Majus noster procedit sub praelo, ad quod hoc autumno vel saltem hieme adducetur quartus ejus tomus, duobus primis jam fere absolutis, tertio aliquatenus progresso. Valet optimus senex *Henschenius*, & senis adhuc horis studet quotidie, Junio eminus praeparando vacans: *Danielem Cardonum*, quem toto triennio jam formaveramus in spem successionis, abstulit feralis anni superioris Autumnus, qui ex hac una nostra domo intra dies octodecim sustulit Evangelicos operarios quatuordecim, dum diu noctuque, requie nulla indulta, ipse aequae ac ceteri assistit aegris moribundisque: quae res etiam mihi altera jam vice morbum letalem attulit. Quod considerantes Superiores, exemerunt me a communi ceteris onere audiendarum statim in loco festis Dominicisque diebus confessionum, eo quod huic curae inseparabiliter connexa sint impendenda sanis consilia, aegris solatia, auxilia morientibus, cum grandi impendio temporis, nec non vitae periculo quotidiano, quoties solito gravior mortalitas ingruit. Ego huic Superiorum voluntati eatenus acquiesco, quatenus meliorem victimis obedientiam esse intelligo: alias quis deses in Musaeo, in ejusmodi publica calamitate (quam utinam diu avertat ab hac urbe Deus!) residere possit, neque malit pro fratribus, extremae opis indigis, animam exponere, & si vocaverit Deus, ponere? Sed quo ego? pene oblitus me epistolam scribere. Verbum igitur addo, & finio. Queris de contumacia valetudinis? doceat haec terrena despicere quae praetereunt, & amare coelestia quae durant aeternum. Huc dum mea pro Te amicisque omnibus vota fero, non desinam interim praestare obsequia, etiam in levioribus rebus, quoties occasionem dederis. Nunc vale. Antverpiae v. Kal. Septembr. 1679.

EPISTOLA CCCCXCIV.

NICOLAUS HEINSIUS

*Danieli Papebrochio.**Antverpiam.*

MUnuscula tu vocas, quae luculenta ac plane aurea plumbeis meis reposita sunt dona, ne quid pluribus excurram in eorum commendationem. Certe delector immane quantum ejusmodi antiquitatibus. Diptycha etiam Wilthemia praeter oblectationem non parum emolumenti studiis meis ferunt. quo impensius optem copiam mihi fieri, si sine ullo vestro incommodo confieri queat, ectypi illius, quod Aprili vestro, si quid *Wilthemio* credimus, a se supeditatum vos inseruistis: id enim in suis hujus argumenti commentariis ille non expressit, & pagella, qua id exhibetur, vestris in scriniis alicubi fortassis otiosa & a magno opere divulsa oberret. Haec enim tres tantum primos menses operis vestri in armariis meis possideo. Aprilem unde mutuari datur, notus est hic terrarum mihi nemo. Causam curiositatis hujus audi. *Wilthemius* prolato Diptycho *Flavii Astyrii* Consulis ordinarii; cum bini in fastis Romanis Consules *Asterii* occurrunt, priorem *Astyrium* sive *Asturium*, posterior-

riorem *Asterium* esse dicendum contendit, adversus virum summum *Jac. Sirmondum*. Ego posteriorem fuisse *Astyrii* nomine insignitum ex ipso Diptycho convinci posse opinor, quod volebat *Sirmondus*. Priori nomen fuit *Turcio Rufio Asterio Aproniano*. Id me docuit vetustissimus omnium, quotquot exstant hodie, Maronianus Codex Mediceae Bibliothecae, qui hunc ipsum *Asterium* possessorem quondam habuit, eundem plane, cujus beneficio *Sedulii* poemata sunt conservata & ad posteros pervenere. Qua de re ad ipsum *Maronem* pluribus. R. P. *Henschenio* crudam viridemque apprecor senectutem, & vitis sanctorum pertexendis parem. Vale, mi pater, & inanem frugis epistolam boni consule. Vianae XVI II. Octob. CIOICLXXIX.

EPISTOLA CCCCXCV.

DANIELI PAPEBROCHUS

*Nicolao Heinſio.**Vianam.*

AMplissime atque Eruditissime Domine. Pax Christi. Mitto prompte, quod poscor San. Maximianaei diptychi ectypon, obligatus novo beneficio, quo fecisti, ne circa *Asterios* omnia crederem *Wiltbemio* nostro, libenter postea intellecturus, quomodo *Sirmondi* sententia ex ipso *Wilthemiano* Diptycho probetur: huic interim epistolam vestram jungo, ut semper ad manum sit, siquando usus aliquis ejus erit. Significo praeterea quod *Parisiensium* plerorumque *Eruditorum* concordia suasionem persuasi sumus partiri editionem nostri *Maji*, atque primos tres tomos luci publicae dare statim, ac potuerint impressi haberi, poterunt autem *Majo* proximo: aliorum vero trium tomorum non prius inchoabimus impressionem, quam plene perfecta sit compositio; atque ita postea constituimus pergere; ne evenire possit, quod nuper fere accidit, ut mortis aut alio casu superveniente, vel nos vel typographus incurrat grandis jacturae damnum, propter moram coeptae semel impressioni fortassis interponendam. Salutem his addit ὁ πανεπιστομῶν noster senex, cum quo maneo. Antverpiae 30. Octobris 1679.

EPISTOLA CCCCXCVI.

DANIEL PAPEBROCHIUS

*Viro D. Nicolao Heinſio S. P. D.**Vianam.*

VEstas quidem *Vianae* datas Kal. Octobr. reperi *Antverpiae* illuc initio *Novembris* revertense *Westphalia*: sed respondere distuli, cum quia ipsae responsoriae erant, & non habebam circa *Asterios* quod addere possem praeter nudum assensum, tum quia accumulata per absentiam negotia urgentiora, & in-

invaletudo *P. Henschenii* jam octogenarii, suadebant in aliam occasionem differre scriptionem. Nunc a nostro *P. Engelberto* postulatus certusque Dominationem Tuam adhuc Viane reperiendam breviter rescribo: vestram de *Asteriis* sententiam mihi placere, circa Epigramma vero illius occurrit dubitare, an in pentametro ultimo non melius legeretur *partas opes*, quam *parcas*. Doleo interim per vestram invaletudinem praescindi spem colloquii & conspectus mutui; interim opto ut dum corpus infirmatur convalescat spiritus ad abrumpenda ea vincula, quae Te fortassis adhuc retinent, ad Catholicam fidem, quam unice salvificam esse non puto quod possis ignorare, publice profitendam: atque huc lubens vota & preces addam salutis & prosperitatis tuae praesertim aeternae cupientissimus. Antverpiae 17. Februarii 1681.

EPISTOLA CCCCXCVII.

ADOLFUS VORSTIUS

Nicolao Heinsio.

ἐν πρῶτῳ.

Holmiam.

Nobilissime & amicissime Heinsi. Cum spem nobis feceris tui videndi intra paucas hebdomadas, tribus modo lineis in praesens te compellabo. Scripsi ante mensem unum atque alterum ad cognatum *Moucheronem*, tuisque inclusas meas transmissi. Nullus dubito quin optima fide illi fuerint per te traditae Responsum haecenus accepi nullum; quamvis inprimis id desiderarem. More suo Lentulus est. quaeso velle ei aurem, ut torporem istum excutiat. Pro exemplari tuorum Poëmatum gratias tibi & debeo, & habeo maximas, relaturus ubi occasio se obtulerit. Pergis poëta esse insignis ac patrissare. Nolim tamen semper, hoc est tota vita, poëtam te agere. Causas praesenti exponam, si Deus volet. Orationis funebris in Illustris *Salmasii* excessum exemplar una mitto. tui id facio juris. si legere nolis, abjice mox, aut Coripedi Deo ustulendum trade. Nisi forsitan malis cognato *Moucheroni* donare. *Vossio* ut des veto, nimis enim male de me & defuncto *Salmasio* meritis est. Ea est hominis maledicentia, ut ante annum praeter propter in aedibus meis, praesente *Holstio*, cum verba inter nos commutarem, & querelam meo etiam nomine contra illum instituerem, non veritus fuerit tantum virum, cui plurimum obstrictus erat, vocare mendacem, scelestum & nebulonem. Vide hominis impudentiam & malam linguam ac effrenem. Notum illud Euripideum; Ἀχαλίνων σομάτων καὶ ἀνόμῃ ἀφροσύνης τὸ τέλος δυστυχία. Dolet ex animo quod tanti patris mihiq̃ue amicissimi sit degener filius. Sed mitto ingrata ista, & te salvere iubeo cum cognato, uxore ejus ac Doctore *Wullenio*. Deus bone! in quae tempora nati sumus. Regibus cum sceptro vita eripitur a subditis. Reginae sponte sceptrum deponunt, ac privatae esse volunt sibi ac Musis vivere. Cujus rei Carolus V. poenituit, eodem quo id fecerat die. Meum non est eorum arcana curiosius inquirere. Non desinam interim Reginarum maximam sive

imperet, five non, venerari ac colere, cum omnia in illa sint summa & captum nostrum excedentia. Iterum Vale, & Illustrissimum Comitem *Bannirium* meo nomine officiosissime saluta, cui opto prospera omnia cum matrimonio nuper, ut audio, inito. Raptissime & stans pede in uno. Lugd. Bat. A°. CIOIOCLIV. IX. Maji.

EPISTOLA CCCCXCVIII.

ADOLFUS VORSTIUS

Acad. in praesens Rector,

Nicolao Heinsio F. S.

Hagam.

Vixit *Scriverius* noster, exacto aetatis anno octuagesimo & quarto, parentis tui, τῷ πατρίτῳ, amicus olim summus, crastina die efferendus. Feci equidem ego officium hodie meum una cum Cl. *Golio* in domo demortui. Filii autem de patris optimi honore solliciti, sero licet, desiderant id unice, uti versus nonnulli hominum eruditorum in exequiis, & post ductum funus, compareant, atque defuncti amicos inter distribuuntur: succurrebas unus tu, vir doctissime amicissimeque, inter alios & quidem praecipuus, qui praestare id poterat quam cumulatissime. Sed quid faciam, dicamve? obstare temporis videtur angustia. Attamen quae ingenii tui industriaeque est tum magnitudo, tum promptitudo, qui amor in *Scriverium* τὸν ἐν ἀγίοις, dubito nullus, quin tu, promptus qui es ad extemporalitatem usque, defuturus neutiquam sis tanti viri haeredum desiderio. Si cras circa meridiem ad me miseris tuarum aliquid cogitationum, tempestivum adhuc satis erit, uti, me procurante, id imprimatur, & post ductum ad sepulchrum cadaver, exhibeatur iis, qui pompae funebri interfuerunt. Nihil impero, aut imperare possum, mi Heinsi, verum rogo ut amicus tuus ac paternus, tum beati *Scriverii* nostri, quem ad plures abiisse multorum constat testimonio, suffecerint haec ipsa viro sapienti ac cordato, hoc est tibi. Nec dubitandum est mihi, quin expectationi meae ac filiorum optimorum *Scriverii*, lubens, nisi vis quaedam major interveniat, sis satisfactorius. Itaque aut epicedium aliquod eruditum, aut responsum saltem tuum expectabo in crastinum. Vale & Salve, virorum amicissime, & me tuum ex asse eo, quo te prosequor, affectu identidem prosequere. Cl. *Vossii* & *Wallii* nostri Musam, si potes, excita. Iterum vale amice magne. Lugd. Bat. Anni CIOIOCLX. v. Maji.

Scripsit *Heinsius* Epitaphium *Scriverio*, quod legitur libr. III. Silvarum pag. 203.

EPISTOLA CCCCXCIX.

ADOLFUS VORSTIUS

*Nicolao Heinsio.**Hagam.*

CLarissime & amicissime Vir. Ignosce, quaeso, feni mihi, quod hesternae nocte quietem inturbaverim tuam intempestivis, aut potius importunis meis literis. Accepi hodie mensae accumbens egregium Epitaphium tuum, cum epistolio opistographo elegantissimo. Placuit illud, placuit & hoc: quin imo ingentes tuae humanitati debeo gratias, quod tanta promptitudine, non dico mandatis meis, quae nulla dedi, sed rogatui feceris satis. vivat Heinsius meus, & cum illo quidquid est politioris literaturae, ac verae genuinaeque Poësis. Imprimi Epitaphium tuum non potuit, quod tempus destitueret typothetas. Interim non privaberis honore tibi debito, cum Clarissimus Gronovius noster orationem funebrem in obitum communis amici nostri, *Scriverii*, τῷ ἐν ἀγίοις, habuerit. Recepit enim in se id onus, ubi exactis hisce feriis, Daventria ad nos redierit. Uxor ejus, quae uti nosti, νεόχαμⓈ est, cum istic praestolatur, jam ab aliquot septimanis secubantem. Deus bone! quam acris futura est prima illa coitio. Noli dubitare quin acerrima erit. nam succi plenus noster est, & antehac in castris Veneris militavit miles haud instrenuus. *Baudius*, ut eleganter pater tuus scripsit olim, post ductum uxoris funus, vinum gustare voluit, aut si id mavis, Rhenense nectar, cui illo seculo tribuebat plurimum eruditorum natio. ego a funere b. m. *Scriverii* redux, accepto calamo nugari tecum cepi, quo animi mei moestitudinem abstergerem. De filiis defuncti quid dicturus sim, nescio. Rusticis satis moribus eos esse comperio, neque ad paternas accedere virtutes. Cum Collegium Professorum ad exequias solenniter vocassent, post Magistratum civicum, e quibus nullus ibi comparuit, & Doctorculos nonnullos, voce praeconis, aut Nomenclatoris citati sumus. Generoso tamen stomacho concoxi ista, & contemptu solo illatae injuriae me vindicavi, ordinemque nostrum. Mitto ad te carmina, quae a ducto funere nobis fuerunt obtrusa. Agnosces me quoque principibus permistum Achivis, sed Poëtam diobolarem, & archaicum, prisca scilicet moris ac aevi. Belgicum, quod vides carmen, Satyricum plane ac Scriverianum *Vondelii*, quantum ego quidem conjicere aut subodorari possum, foetus esse videtur γνήσιονⓈ. Adderem plura, nisi hora quae instat semi septima; qua navis abiturus solvitur, me moneret brevitatis. Salve igitur ac vale, delitium meum, & credo nihil esse mihi prius, quam uti abs te amer, qui te amo sine fraude doloque, aut ut vetere graeca utar formula, quae *Baudio* familiaris erat, ἀνδρόλου καὶ ἀπάτης. Lugd. Bat. A°. cicioclx. vi. Maji. Si quid me amas, me filiumque meum Illustriss. Galliarum Regis Legato J. A. *Thuano*, commendabis, eique salutem a me dices officiosissimam plurimamque.

EPI-

EPISTOLA D.

ADOLFUS VORSTIUS

*Nicolao Heinſio.**Holmiam.*

Nobilissime & amplissime Vir. Quantam ex literis tuis ceperim voluptatem, vix est ut verbis ullis exprimam. Constantem enim animum tuum in nos amando, nostrisque rebus bene cupiendo, sicuti iis testatum voluisti luculentur, ita mihi eo nomine gratulor serio. Facis, mi Heinſi, quod pectus tuum generosum candidumque decet, cum parentis tui, τῇ πάλῳ καὶ ἐν ἀγίοις, amicos veteres tam impense diligis ac religiose colis. Utinam ego aliquid adferre possem ad te ex virtutibus tuis ac meritis ornandum. Non enim nescis quanti te faciam, quamque tuis gaudeam commodis. Doleo familiaritati, quae tibi jam multis ab annis cum *Moucherone* nostro fuit, nubeculam intercessisse aliquam, e publicis exortam litibus inter Suecorum & nostrae gentis mercatores. quarum cura cum ad utrumque vestrum spectet, contrariis tamen id agitur partium studiis. Interim erigis me iterum, cum spem facis, compositis hisce diffidiis, ad pristinae consuetudinis usum vos redituros. Quod, nisi jam factum, ut propediem fiat opto magnopere, qui familiae isti ex animo bene volo. Perculit me nuper haud leviter optimae sororis tuae, matronae suavissimae, repentinus obitus. Novi ego quid sit tam cari capitis amissio, utpote anno proxime elapso simile expertus damnum. Solatia hoc tristi in casu vera is tibi largiatur, cujus nutu ac voluntate haec nobis eveniunt. Domi meae salvae nunc res sunt, supremi Numinis favore. verum a quatuor fere mensibus exercuit me gravissimus morbus filiae meae nati minimae, atque ejus etiam, quae hanc ipsam aetate antecedit. Quin me quoque invisere voluit invisa & ingrata hospes, Diva Podagra, sed ad breve tempus. Si mei voti res esset, juberem illam in perpetuum res suas sibi habere & Domo nostra exulare. Clarissimo *Golio*, qui cum adversa luctatur valetudine, de libello Arabico, Pythagorica complectente dogmata, aurem vulsi, & a te salutavi. Verum responsum tuli ejusmodi esse id scriptum, ut neque transcriptionis, neque translationis, mereatur laborem. Tam variis, vir amari dignissimus, distractus haecenus fuit negotiis, ut vix cogitandi ea de re habuerit otium. Scis quam soleat esse occupatus. Resalutat interim te quam officiosissime. Gaudeo *Meursii* nostri τῇ μακαρίῳν opuscula varia in optimas, hoc est tuas incidisse manus. Te etenim procurante, quae edita nondum sunt, tum quae relicta auctiora, lucem, ut spero, videbunt aliquando in commune orbis literati bonum. Vale & salve, Vir Nobilissime, a me meisque & *Ferrerio* itidem Doctore, qui jam secundo experiri voluit manum ophthalmici, cum de visu in totum periclitaretur. Dabam Lugd. Bat. A°. cīcīoclxīī. xxvīī. Julii.

EPI-

EPISTOLA DI.

NICOLAUS HEINSIUS

*Adolfo Vorstio.**Leidam.*

Responderi jampridem a me oportuit ad suavissimam Epistolam, quae venire te in partem doloris, quem ex morte intempestiva optimae unicaeque Sororis haud modicum contraxi, peramanter testatus es. Nec defuissem sane officio huic, nisi occupatum me tenuisset aestivis feriis divinus scriptor P. Virgilius Maro. Quippe dum fomenta ac solatium acerbo moerori circumspicio, rogatu Typographorum, quae ad maximum Poëtam jam olim annotaram, coepi paulo diligentius perpendere, adhibitis in hanc rem cum aliis vetustis codicibus, tum schedis luculentis, quas Florentiae ex Mediceis membranis omnium antiquissimis optimisque consarcinaram. Huc ut curas converterem impulit me praesertim Christina Alexandra, cum in itinere anni proxime elapsi mihi occurrebat, pristinamque pollicitationem ut praestarem tandem aliquando operose flagitavit, oblata hanc in rem omni veterum Maronis exemplarium suppellectile, qua bibliothecam suam ubertim instructam esse asseverabat. Feci quod voluit, & ducentis ad minimum locis Poëtarum principem meliorem feci, quam haecenus circumfertur, etiam in castigatissimis editionibus, talemque ad *Elzevirios* jam ablegavi, typis describendum. Observationes ipsas premendas adhuc duco, dum membranae cum aliae, quas ab amicis sperare jussus sum, tum a Regina promissae comparent. Miraberis Criticos nostros tanta animi contentione desudare in Scriptoribus obscuris perpurgandis, praecipuorum principumque quorumvis securos esse, nec iis manum admoveere. Solus enim post renatas literas *Johannes Pierius Valerianus* centum & quadraginta propemodum abhinc annis operae pretium se facturum esse credidit, si vetustos Maronis codices evolveret. Qui conatus etsi viro doctissimo non infeliciter cessit, aliorum tamen diligentiae spicilegium reliquit longe uberrimum. Atque haec verbosius enarravi, quam fortasse velles: sed diuturni silentii rationem a te ignorari nolebam. Finem, ut auguror, jam spectat lis illa, quae negotiatores nostros collisit cum Suecis in Africa. Quidvis rerum novarum pariat per me licet regio monstrorum ferax, dum negotium mihi ne exhibeat in posterum ob ejusmodi contentiones, quarum sum fugitans, sic ut nemo magis. *Moucheronem* cum tota familia valere ac salvum esse nuntio. si valere dicendus est, quem stipendio pacto jam multos annos Sueci proceres inique defraudant. Auguror arrisuram illi esse meliorem aliquando fortunam, & parem viri virtutibus. *Golii* nostri viri praestantissimi profecto me miseret, cui per occupationes nescio quas haud vacat de amicis bene mereri. Itaque novis in posterum flagitationibus hominem alibi occupatum non obtundam. Vellem tamen aut ipse operam hinc suam non obtulisset, aut ignorarent Itali libellum de dogmatis Pythagoris Arabicum in Bibliotheca Leiden-

sis Academiae publica asservari. Opuscula *Meursii* postuma divulgari omnino rei literariae interest. Hic terrarum tamen ut id fiat, minime sperandum est, ubi typographum nequicquam quaeras. Si sunt apud vos, qui pollicentur huc curas a se convertendas esse, non erit arduum libellos ipsos ab *Edmundo Figrello*, Regiae bibliothecae custode, impetrare. Est nunc in hac civitate *Nicolaus Witte*, patria Livonus, medicus apud suos magni nominis, quem olim, si quid memini, discipulum habuisti. Is de lare in Batavos iterum transferendo cogitat, quamquam & uxore & dote luculenta auctus praxin feliciter Rigae exerceat, non sine multo emolumento. Studiis hoc a se dari affirmat, & literarum amori, quas in ultimo Barbariae angulo non nisi eminus colere & venerari potest. Vellet tamen conditionem qualemcumque offerri, ne privatam vitam cogeretur sequi, & artis medicae professionem abrumpere per in-tempestivum otium: videsis, quaeso, si quid hominis multa rerum cognitione instructi commodis invigilare potes. Quo officio & me & illum egregie demereberis. De Theologo, quem a vobis discedens domesticum mihi adscisci flagitabam, nec obtinebam, solis Hollandiae Provinciae rectoribus voto meo refragantibus, nunc res est in proclivi, quando manum illos hic dedisse repetitis precibus intelligo. Si quem novisti ergo virum dotibus facundiae & doctrinae non vulgariter instructum, eum ut *Beuningio* aut *Wittio* heroibus commendes peto. Qui reformatam religionem hic terrarum profitentur, stipendium, illi a Patribus offerendum, altera parte sese aucturos, atque adeo geminatos esse pollicentur, si quem dotibus, quas dixi, egregie instructum consequantur. Cui si sermonis Gallici accesserit cognitio tanta, ut hac lingua ad populum perorare possit, florenos 250 aut 300 praeter haec annuos Galli in hac civitate habitantes se numeraturos illi promittunt. Vale, vir Amplissime, & amicos communes meis verbis officiose saluta. Holmiae xviii. Octobris MDCLXXII.

EPISTOLA DII.

JANUS DELLY

Cl. V. Nicolao Heinſio S. P. D.

Leidam.

EGregium vero Philosophum, Clarissime Heinſi, Pſoraleon istum Scribonium, qui dum reges, id est generis humani genios, (ſi reges τῶ ὄντι forent) tuendos ſuſcipit, meros tyrannos, & alaſtoras finxit; Buſiridas ſcilicet, Antaeos, Phalaridas, Dionyſios, & quae alia portenta olim fuere. *Regi*, inquit gravis auctor, *quidquid lubet, illud & licet*; &, *Perjurium eſt quodammodo legitimum*. Itaque adeo rex iſte Salmaſianus, aequum anne iniquum imperet non cogitabit; & hydriſ in ranas licebit uſque & uſque ſaevire. Quam male cum rebus humanis ageretur, ſi huiuſmodi mancipia ſibi παραδρεύοντα haberent reges? Quod utinam, mi Heinſi, optimo principi liberet, aut certe ſimula-

reg.

ret velle sese, auri talentum Scribonio imperare! mihi quidem dubium non fit quin jam-jam integrum librum retexeret. Sane eum librum cum video, non possum non exclamare, *δὲ τε μοι λενδύλω*. si vacat, audi, & compone togam.

Dii magni, horribilem, & sacrum libellum,

Quem pro purpureis, pudor! tyrannis

Scripsisti! interea Britannus ardens

Invernos premit & quatit duello,

Cui favent superi, vagaque victor

Fertur classe furens, libellulorum

Securus, mihi crede, vel tuorum,

Vel quotquot similes erunt. Sed, heus tu,

Vulgi cymbalon oscitantis, heus tu,

Ob librum horribilem atque pestilentem,

Quodnam sit pretium tibi apprecari,

Nisi ut quos dominos probas, haberes?

Addam amplius; Scin' tu esse quosdam palato adeo fastidioso, & tanta judicii morositate, ut & Latinitatem in eo desiderent, & ei cum ratione male convenire praedicent?

Si vel Latine sciret hic Scribonius,

Quem literarum Principem fatui ferunt,

Aut si vel una judicii mica huic foret,

Non inficete scriberet Scribonius,

Quis hoc negare possit aut contra hiscere?

Sed quia Latine nescit, & collutulat

Miseram papyrum, nec solidum huic caput crepat,

Ineptiarum plenus est Scribonius;

Quis hoc negare possit aut contra hiscere?

Quis autem credat debere ipsum magistrallis risum & quidem *ἀσβέστον*? nondum edidit Maronem. nescit ille, mi Heinfi, (ut patet ex notis illius ad Plaut. p. 81. edit. Hakianae anno MDCXLV.) quid sit, *Dic mihi, Damoeta, cujum pecus*. Quanto consultius fecisset, si politicas tractationes, & studia ista graviora, vel patri tuo, qui in iis literis subactus est, vel tot aliis clarissimis doctissimisque viris, quibus Gallia nostra Bataviaque nunc florent, reliquisset?

Scriboni mihi crede, disce quid sit,

[Dic cujum pecus] hocce nam fugit te,

Te hoc, inquam fugit; inde si tuendis

Te locare operam juvet tyrannis,

Saltem dicere Livor hoc nequibit:

Scriboni, mihi crede, disce quid sit

[Dic cujum pecus] hocce nam fugit te.

Magna nos spes tenet fore, Cl. Heinfi, ut insolentem hominis audaciam frigida perfundas. ea certe provincia tua est sine sorte. Si quid a te ad nos allatum fuerit cum libris Elzevirianis, quos advehi curat *Lerpinerius* bibliopola Sal-

muriensis, polliceor tibi plausus plusquam Neronianos, cirratos equites, imbrices, testas, nosti cetera. Scripsit ad me nuperrime *Burdelotius*, quem, ut opinor, probe nosti, ingentem Lutetiae Nasonis tui expectationem esse. Per ego te Camoenas oro, ut columbuli illius Dionaci delicias, si per te eum nitorem cultumque sunt consecutae, quem illis olim afflaverat Venus, tandem publici juris facias, ut ejus scriptoris opera discant omnes, quanta a te in posterum par sit expectari. Vale, &, quamvis audaciusculum sit, nos ama. Sal-
muri apud D. Lerpinerium bibliopolam, viii. Kal. Jul.

EPISTOLA DIII.

SAMUEL TENNULIUS

Nicolao Heinsio S. D.

Hagam.

Viro bono, & magno homini, multaque humanitate temperato in summa animi magnitudine, *Capellano* sic me placere studui, ut hunc usque diem illius aedes librique pateant, commendatio, quae multum ponderis habet, pro me apud claros intercedat, unde illum & fronte & mente (si quid odorari possum) mihi studere collegi, non quia merui, sed quod ille nisi bene velle omnibus non potest; quamquam mehercule non minus amarer ei, si minus essem commendatus. Quae res quam grata externo contingat, nosti expertus peregrinantium incommoda & solitudines. Natura *πολιτικός*, dum illi (videtur enim cum Socrate coelo in mores philosophiam deducere) conor *ἐμφιλοσοφῆσαι*, hortatus est iussitque, ut has quascunque quisquilias transmitterem, illa tamen lege, ut nec bonam voluntatem a te reprehendi, nec reprehensionem semper iudicium putari promitteret. In oceanum igitur rivi cecidere minores, dum morosi iudicis obrussae subijci *ὁ πάνυ* voluit etiam has nugas, in quibus nihil mihi permiseram, verum apposueram, transposueram, descripseram, induxeram fideliter omnia, ut Segueriani Codicis differentia constaret. Cuperem vultum tuum videre, cum leges: amorem sperare si est nimis superbum, irae tamen causam dare nugae non possunt: sin cum ludibrio (quod Ithacus velit) fastidis, scito tuum amicum illiusque in me benevolentiam esse tanti; nec me tam molliter a meis habitum, ut nullam contumeliam ferre & concoquere scirem. At, inquit, quare non cum alia editione contulistis? intra constitutum aliam non inveni, & maturandum erat, ne, qui se capitis periculo commodasse affirmabat, cum Cancellario, qui proscribere potest, lussisse videretur. D. *Mentelius*, quod de munere conditionem non acceperis, sibi gratulatur, &, quemadmodum ab aegrotis diripitur, sic suae in remittendo morae culpam ad negotia transfert; quia tamen te suae gloriæ *συμφιλοδοξῆσαι* sperat, spem magnam fecit multa a se iri adliue subministratum, dum circumrodas quod erit tandem devorandum. Clarissimus & elegantissimus *H. Valesius* tibi vobisque omnibus multum salutis dicit. Si Demosthenes fabri digito demonstrarier non male.

male tulerit, ipse quoque a peregrinante adorari te patiaris precor. Lutetiae Parisiorum, A.º. cxciclx. a. d. j. Idus Decembres.

EPISTOLA DIV.

SAMUEL TENNULIUS

Nicolao Heinſio S. D.

Hagam.

Quisquillas placituras magis optaveram quam speraveram; jam tua consilii summaeque & benevolentiae & prudentiae plena epistola triumpho. Lumen enim tuo accendi de lumine, quo erranti via monstratur, verissimaque de Manuscriptorum notis monentur. Menteliani codicis, quem a te visum negant, specimen solum mitto, non quia laborem, qui nullus hic est, subterfugiam, sed ne legentem nequicquam onerem. Cum tua editione sunt haec commissa. Epist. Penel.

Trepidaeque puellae: Timideque puellae. Atque aliquis: Jamque aliquis. Hic est Sigeia: Hac est fingeima. Hic lacer admissos: hic alacer missos. At ille mihi: & ipse mihi. Rhesum: Resum. Cautus eras: Captus. Micuere: metuere. Diruta sunt: obruta. Morandi: morandi est. Puppim: Pupen. Lentus abes: lentus abesset eras. Vanescat in auras: marcescat in aures. Increpet: increpat. Frangitur: Flebitur. Ipse: ille. Zacyntos: Jacintos. Pisandrum Palybumque Medontaque: Pissandrum Polidumque Meduntaque. Antinoi: Antonoi. Melanthius: Melancius. Pene est mihi: dele τὸ est. Invitis: invictis. Hoc jubeant: Haec faciant. Ara tuis: Ara mihi. Lumina condas: Claudas.

Epist. 2.

Demophoon: Demorphum. Aetaeas Sithonis: ataeas Simoys. Invita n. e. a. nocent: Invieta n. e. amente nocet. Hebri: ebri. Cana: liquida. Sum p. thuricremis de. v.: cum p. turmonis sum v. Faventes: Secundos. Per mare quod totum: per tumidum. Fictus: Falsus. At Laceras: ha L. Nominibus: Numinibus. Quo j. t. p. nobis: Quid j. t. p. profunt. Parte s. p. q. inde: Per te s. p. q. arte. Ante suis: tuis. Scyron: Chiron. Et finis: & senis. Post illum: P. illos. Armiferam Thracen: Armig. Tracem. Notanda: Notata. Pbylli fac: Filli face. Demophoonta: Demorphunta. Sit solo: s. longo. Excidimus: excedimus. Satis apta: satis al. valet a. Ad Aemum: ad Hebrum. Frigida l. fid.: sidera lucent F. Intumulata: Intumulanda. F. ut superes: Ferrum superas d. ut. Libet: juvat. Ipsa: illa.

Codex antiquior & melioris, quam Seguerianus, notae videtur. sed *Tuus. o Regina*, caetera nosti. millies D. *Gudius* ad vos se daturum dixit. Illorum, quae margini annexueras, alterum praestiti (multam quoque salutem remittunt illi par nobile fratrum) alterum non intellexi, cum illud sperare nefas esse huic putem aetati. Non committes, credo, ut velis infanti aptari cothurnos: Quid, quaeso, dicturum putas Roscium, si se spectante in theatrum (licet non suum) prodirem, cum ab Hortensii foro prius petitos gestus in

hanc scenam se retulisse fuerit oblitus? Quid si olim fallerem iudicium tuum? non illi certe, sed meae ignosceretur infirmitati. Indignus ergo illa haecenus benevolentia videor, nisi cum tuo Nasone decentiorem faciem judicaveris, cui naevus adest aliquis. Visum est Domino meo Jamblichum de vita Pythagorae componi: *H. Valesius*, cujus interposita fides in codicis MS. ex Memmiana bibliotheca deprompti possessionem me misit, illum & conferendum & reliqua describenda censuit. In λόγῳ ejus τέτρω περὶ τῆς κοινῆς μαθηματικῆς ὁπισθμῆς sum plurimus: Posset ille ingenii & virtutis excercendae materiam praebere, imo prodire; elegantissime enim de animo & mente ab ipsis rebus abstrahenda disputat; Verborum translatio expedita; sensus autem difficilis, & molesta argumentatio. Quomodo enim omnia in numeris (quod autor docet) consistere, ipsamque adeo virtutem numerum esse populo probabitur? Non liquet. te rogo sententiam, secundum illam dabitur, & certe vel aliud agenti spes temere concepta concidet, vel in diligentiam animus addetur. In Frontini strategematibus a me aliquid praestari posse ut credam, adducunt quatuor MSS. Regii. Luparam forte adornari audisti, quam ipsi coelo minaturam & octavo inter orbis miracula nomine gavisuram dicebant. Die Sabbathi, dum in illa ornanda pictores contendunt, operae illorum quatiendo candelam, scintillam jecerunt in tabulatum. Haec, nescio quo casu, corripuens ceram, qua inductae sunt tabulae, deinde materiam & omnia sui alimenta, quintam fere Palatii partem in cinerem misit: diei dominicae hora quarta sopitus ignis, sed sub cinere doloso latens, & vespertino vento motus flammam reddidit civium sanguine exstinguendam. Ridentem vidi reginam, cum ruinam contempleretur. Hoc autem refero, quia illuc transferenda est Bibliotheca R. Deum T. M. veneror, ut quam diutissime in patriae decus & gloriam, reipublicaeque literariae ornamentum incolumis serveris, meque in tuorum clientum numero latere finas, & in *Capellani* (cujus inter insignes urbis ab arte viros vestigia adoro) gratia confirmes. Dabam statim post tuas. Lutet. Paris. cicioclx. Id. Febr. Reverendus Pater *Cossartius* & elegans *Mentelius* plurima te salute impertiunt.

EPISTOLA DV.

SAMUEL TENNULIUS

Nicolao Heinio S. P. D.

Hazam.

C Eleberrimi *Capellani* aedes, quanquam sint aditu facillimae, verecundia tamen impeditus, septimo decimo post tuas in urbem allatas die intravi; ibique inveni meas delicias, tuaeque erga me mihi perspectissimae benevolentiae argumenta, quibus ad properatas, ne pigri nomen subirem, has quisquillas extemplo remittendas impellebar. Tuo de Nasonianis Codd. iudicio subscribunt omnes: τὸ *aura* est in Menteliano & Jesuitarum; quia autem interpres

1 Vid. Ovid. Heroid. 1. 110.

pres ejusdem manus apposuerat τῷ αὐτῷ τὸ σόλατιον (quae est explicatio τῷ ἀρῇ) & lectionem tuam hanc in Gallia passim laudari audiveram, hanc differentiam neglexi & discrepantiam τῶν mihi & tuis notare volui. Meae oscitantiae ignoscas, nec illa Segueriana tam negligenter quoque collata inde colliges. Aliud, mihi crede, agebam, cum codicis specimen dabam; quem ante mensem transmissum videbam; nunc bonum nomen, quod secus fieret malum, ita compellabo, ut ille proxima septima ad te perferendus curetur; dignus est quem inspicias. Tibi enim post versum duodecimum Cydippes, haec

Si tamen ut perhibes, fugerem perjuriam vitae

Mittis adhuc dubie perceret illa mihi,

Nec dea nec precibus potuit nec vulnere flecti,

Utque quae medear est mihi sola salus.

Hoc etiam victem tamen est quandoque¹ neganda,

Ut juvis impertum ponere ventris bonus.

Audiet & quaeret, de quo sim conjuge praegrans,

Et nisi sim de te jure negabit opem.

Hic est finis totius codicis, forte aliqua pagina abrupta est; solum ad te transferendum curabo, quoniam ex agro Turonensi codex alter nondum est allatus, ut mihi heri Menagius narrabat, qui te Diogeni Laertio Roma sibi misso donabit. Societatis Jesu codex est nitidus & perelegans, aetatemque aliquam prae se fert, quod ex his concludes, quae praesente R. V. D. Ph. Labbaeo (nam illi Conscripti patres graeca mercantur fide) notavi. Epist. v. Oenone Paridi.

Mycenaea: Miceneae. Phrygiis: Phrygiis. Laesa: lesa. Indigno poena: indigne pena. Contenta: contempta. Nympha: nimpha. Defensa est: Depressa est. Consita ripa: consita rivus. Surgite rite: S. recta. hoc a. distichon erat in margine in fine positum post τὸ populus. Dixit ab illa: duxit. Ossā tremor: timor. Esse nefas: nephas. Caesa abies, fractaeque: caesaeque. Caerula ceratas: cadis. Et flecti, & nostros: madidos. Ab quoties: ha & sic infra. Cum te vento: vento cum te. Linthea: Linthea. Nereidas oro: Nereides. Rediture redisti: dedisti. Pellice. pelice. Terrasque cita: Terraque. Non satis: hoc & seq. distichon non sunt in MSS. textu, sed in extrema pagina sola ponuntur. Implevique sacram: implevi sacram. Idem: Idem. Ipsa ferat: luat. Tibi conveniunt: tecum veniunt. Sequantur: secuntur. Destituantque: destituuntque. Non tamen aut: ut. Decere manus: tenere. Nec me: non me. Apta toro: thoro. Tibi nulla: mihi. Tyndaris: Tindaris. Deiphobo Polydamanta: Deiphebo Polidamanta. Antenor: Anthenor. Facta cadunt: volant. Nam recolo: refero. Perdat io: Perdet yo. Quamvis insignis: praesignis. Hospite capta: Hospita. Ante sua: arce. Nomine veles: alii celes, veles. Sylvis ego: ego silvis. Tumet. Ida: Patet yda. Meas — manus: manus — meas. Medicabilis: Sanabilis. Deficior: Destituor. Pheraeas: perhebas. Υψιφύλλε Ιάσωνι vi. Fulva manu: Frā, vel fulva. Re-

¹ Superscriptum roganda.

² Laudabat Cossartius repetitionem τῷ Caesa, negabatque dici, frangi trabes, in hac materia, sed caedi vel dolarī: haec Tennulius margini adscripserat.

Recepta tori: futura thori. Haemoniis: emoniis. Mibi jurare: eum. Vix mihi: vix bene. Ut rediit: utque. redit. Abenipedes: a euripides. Populos civili: homines. Devicto serpente: devictus serpens. Vivat: vivit. Facta tuo: tecta suo. Heu ubi: Heu mihi. Adfuit: affuit. Quid tibi: mihi. Tiphy: Tiphi. Nec s. Aeetae: non Oete senis. Sed me mea fata: sin me madata. Castra manu: rasa. Urbe virum: plane ut in tua editione. Sed dent: si dent. Conscendis in argo: Argon. Addo preces: adde. Vota timori: verba timore. Quod Iasona perdo: quid I. perdam. Concidat: Concidet. Argolidas: Argolicas. Abdere solis: addere. Passis: sparsis.

Haec cum tua editione accurate composui, plura notavissem, si per tempus licuisset, quod a Patre omnia ad Dei gloriam & Domus nostrae conservationem faciente concedebatur. Elegantissimus *Vavasser* se aliquas scedulas paratas, quae tibi inservirent, habere mihi perferendas traditurum dicebat: Colligam quae potero. Doctissimi & reverendissimi *Dallaei* de pseudepigraphis liber modo prodiit: non omnia in illo Clarissimo *Vossio* arridebunt. Hominis, cui bellum indixisti, poenae multi favent, gloriae invident: Casurus enim dicitur Aeneae magni dextra, dum silentium ipsa fecit expectatio. Certe non iniquum judicem tibi promitto illum, qui in opere a te laudato verba illa Josephi ante Eusebium a patribus citari tam feliciter probarat. Nil illo viro justius, nihil benignius: sed

Τὸν μὲν ἐγὼν ὡς ζῆναι καὶ ἐκέτ' ὁρῶντ' ὀνομαζέειν
Αἰδέεμαι, περὶ γὰρ μ' ἐφίλει καὶ ἐκήδετο λίαν.

D. *Gudius* ante tres septimanas discessit, postquam orationem Hippolyti sine interpretatione typis mandasset. faciam cum proxima occasione certiorum illorum, quorum moneri volebas. Quod de Porphyrio scribis, de Jamblichio intelligendum, illius libros duos ab *Arcerio* editos cum Memmio & Regio Cod. composui, librum tertium περὶ κοινῆς μαθηματικῆς ὁπισθήμης, & quartum περὶ ἀριθμητικῆς Νικομάχης ex Memmiana bibl. descripsi, & cum Regia contuli. nunc tertio omnes quatuor cum Jesuitarum codice committam, quod ut liceret, maxima ambitione contendi. Animum enim mihi addiderat aliquis amicus, licet olim meus Ajax in spongiam. summa votorum meorum, vir celeberrime, est tua salus. raptim, Lutetiae Parisiorum cccclxii. iiii. Cal. April. dabam. omnes ad unum amici te salvere jubent.

EPISTOLA DVI.

SAMUEL TENNULIUS

Nicolao Heinio S. P.

Hagam.

QUorundam in Hieroclem notatorum usum mihi concesserat Cl. *Menagii* benignitas; quae dum hodie reddo, extemplo meae liberandae fidei nata est occasio. Transmittendos enim accepi hos duos Virgilii, unum Lucani MSS. Codices, cum Romana D. Laertii editione, quos omnes volentibus cum

cum magnis Diis tibi dono dedit. Ego vero non tacita voluptatis (mihi enim bene est, quum amicis & patronis bene fit) conscientia contentus transvolo ad carissimum *Mentelium*, qui, dum amici tui benevolentiam & magnanimitatem ostento, a verecundia non impetravit, ut dictis non maneret. Igitur hos Lucani & Ovidii de Tristibus, de Fastis, Pontoque & Heroidum codices manu exaratos simul huic fasciculo includendos permisit. De praesentibus quaeso gaude, & in lucro pone, quod posthac mittetur: Illustrissimus *Beuningius* pridie Regiae Bibliothecae aderat, atque ipse in superiori tabulato aliquid nugarum mearum committebam; sed deterruit me splendoris praesentia, quo minus descenderem, officioque occurrerem: credo visum ab illo Codicem, qui *Puteani* haereditate ad Regem venit; specimen codicis in Societatis Jesu domo servati a me missum te accepisse quoque reor. Jamblichum, vel potius Porphyrium de mysteriis Aegyptiorum censese dignum, qui describatur? Ex epistolae de temporis brevitate judica: Vale & ama. Lutetiae Paris. cicioclxii. iiii. Non. April.

EPISTOLA DVII.

SAMUEL TENNULIUS

*Nicolao Heinsio S. P. D.**Holmiam.*

M Andata tua, Domine, peregi, ut potui & debui. Nam xviii. Cal. Majas isti juveni, qui tibi quondam operam dederat, jam a manibus illustrissimi *Beuningii*, dedi *Jacobo van Campen* omnia, quae Parisiis convasare potueram, octo nimirum MSS. cod. Lucani, Virgilii & Ovidii, & Romanam Laërtii editionem: in quibus te monitum volui, Lucani codicum alterum oblongum esse τὸ πᾶν *Menagii*, alterum quadratum barbaro charactere exaratum pertinere ad amicissimum *Mentelium*, cujus notae sex reliquorum Cod. possessores distinguunt. Admonitionis hujus oblivisci me cogebat colligendorum vasorum festinatio. Ante enim Syrium aestum cogitabam intrare Italiam; & intravi per mare Tyrrhenum πύχην ἀγασθῆναι. Reverendi patres *Possinus* & *Fabius*, qui me, ut Homerici baccharum suavitate Lothophagi, multiformibus humanitatis officiis retentabant, ut & *Leo Allatius*, cujus latus tegere solebam, plurimum te salvere jubent. Vidistin' unquam Theodori Antiocheni fragmentum in prophetam Oseam? in Latio mihi descripsi. Patrono meo Parisiensi attuli Theodori Lectoris tripartitam historiam, quod exemplum mea manu consecutus. Salvus per omnem Pannoniam superiorem divagatus, intra vi gaudia meorum. Quae res quanquam magis voti quam spei mihi fuerit, maturati tamen itineris temeritate damnor ab illo, qui si mecum eadem ratione & sumptu iter idem habuisset, a pediculis dudum esset devoratus. Sed haec lapidi. Secundo Maeno dum devehimur Moguntiam, incidi in hujus ornatissimi *Moscherosch* colloquium, cujus literas vides, a consiliis Comitum Hannoviae

Tom. II.

K k k k k

&

& Electoris Moguntiae, qui gloriatus familiaritatem tuam & *Boecleri*, sibi quondam Argentorati concessam, cum rogaret an te quoque novissem: amari me a te probavi. vocavit ilico ad caenam, promisi; post in domo sua me dormire iussit, parui: poltero die ad prandium me revocavit, non negavi. Tantorum beneficiorum pondere cum me tandem suffunderet verecunda memoria, discessi cum omnibus bonis verbis. Tua sunt ista beneficia, vir clarissime, quae augebis, si ignoveris liberaliter accipienti: Maximi autem, facio illam, quam per te nactus sum, nobilissimum virum familiarius colendi occasionem. *Arnoldus* pastor disertissimus Norimbergae profert integrum librum de solo testimonio, quod Iosephus perhibet de Christo. Pater & mater, ambo. Septuagenarii, vigent florentque ad invidiam inimicorum, omniaque maxima observantia obsequia tibi deferunt. Vale, ornamentum patriae, & me ama. Daventriae ccccclxi. xv. Cal. Octob.

EPISTOLA DVIII.

S A M U E L T E N N U L I U S

*Nicolao Heinio S. P. D.**Hagam.*

HActenus mihi inter ludibria, verbera, incendia, caedes & cadavera ver-
fato nihil minus vacabat, quam sequi Musas minus severiores, satis habe-
bam, quomodocunque addiscere, quas dedidiceram, majorum meorum artes,
paupertatis tolerantiam & mortis contentum. verum ubi affulsit melior patriae
spes, coepi redire ad sacra nostra, & ubique adorare eorum sacerdotes; quo-
rum tu, virorum elegantissime, Pontifex cum hic adesse dicereris, religio
fuit, non occurrere officio. Bis tibi adfui, bis mihi peccavi. Et me peccas-
se docuit ditissimi viri filius, cujus studia ad tempus rego, & spem foveo in
solatium mei exsilii. Sustinui temerarius terfissimis auribus offerre Julianum.
Peccavi, inquam, ignosce. Exemplum enim (ut ab adolescente accepi) da-
tum non correctum: pag. 18. *Iustino Martyri* habetur non inductum, quod
ἀπεσοδίουσον, contra meam mentem sponte correctoris, inter tumultus belli,
longe a domo irrepsit. Quod per te ego Charitas nostras oro deleatur, ne
mihi imputetur, plurimum sollicito, dum se undique pandit series malarum
artium, & impudentium animorum conscientiae denudantur. Quid enim fa-
cient me absente? cum tibi palmarias emendationes recitanti & divina docenti
respondebam, *τὰ αὐρὸν ἐκ στερκοῦ ἐρῶ*, homo meus est interpretatus, *stercoream*
emendationem a me vocari; quanquam verborum sensus secundum *ἀλήθειαν τῆς*
ὁντος non possit esse alius, quam *auream emendationem elici ex stercore*, hoc est,
parte puerili. Quod erat alterum peccatum: En ego liber, ille ferox tacui,
ad ea, quae nunquam aequis locis alioque sub iudice, cui verecundia minor
deberetur, ausus fuisset. Tu mihi si veniam dederis, in sinu gaudebo: &
veniam spero, quod centenis suis epistolis *ὁ δὲ ἵνα μακαρίτης* de tuo in me amo-

re.

re reddiderit certiore. Illa venia tanto laetior erit, quanto magis Vir summus mihi misero, innocuo & optime de se merito in Anglis ad Jamblichum, Leidae ad Stephani fragmentum hostes quaerit & jam immisit. Si Juliano candidum calculum adjeceris, triumphabo etiam, & efficiam ut propediem videas meliora, quanquam nihil ad decora illa ingenia & habentia latitudinem Platoniam. Verum tu pro singulari humanitate, qua omne hominum genus complecteris, me licet ignobilem inter cultores tuos admittes, exemplo Principum Romanorum, qui etiam homines municipales in tutela sua toleraverunt animo non imbecillo. Caeterum Valerii M. editionem nil aequè moratur: quam avunculi tui verba Lib. 6. Var. 1. *Legebam his diebus Val. Max. Non est mihi unquam verius dixisse visus Jos. Scaliger, quam cum eum ineptum verborum & sententiarum affectatorem appellat.* Ecquid nosti, quo minus in ea discessionem facias? sin autem fuerit ipse auctor ineptus, quanto ineptior ego commentator? *Jacobus Lydius*, quem octo annos jam experior disertissimum, hoc est, innocentissimum (nam eloquentia Statio Caecilio nihil aliud quam innocentia) ad me mandavit lib. 1. cap. 1. §. 9. pro *futura regimen* legendum: *Ita se humanarum rerum futura regimen* sensu satis aperto. sed novem codd. habent *τὸ futura*, minus uno, qui dat *habere*. Non audeo numerum & consensum codd. posthabere auctoritati viri. In prologo. *Populi Romani*, decem codd. habent *Urbis Romae*. hoc insolitum, sed frequens alterum & placens *Pigbio*. Praeter collationes MSS. adsunt mihi Patroni Parisiensis curae apud me commendatae. Nobile ingenium, *Joannes Ortwynius*, effert caput *Bomelliae Salinarum* (ubi Rectorem agit) & mihi MS. lectionem ad Frontinum, quem edam, lib. 11. cap. 3. n. 9. *Novissime sic castra meditabatur*. cum vulgo & quinque codd. offerant *metabatur*. suam lectionem asserere nititur ex Plinii pagnyrice. *cum in illa meditatione campestri militaribus turmis imperatorium pulverem sudoremque misceres.* Ut haec jejuna & macra transcriberem, impulit tua facilitas, qua prodesse omnibus, obitare nulli studes: In antecessum tibi omnium nostri nomine gratias ago immortales pro cura tua, ad quam pertinuit ὁ χαρίεστος & *Jacobus* noster; Deumque precor, Vir emendatissime, ut pedum dolor minuatur, sufficiens vigori animi compages reddatur, diutissime nobis adsis, posteritati intersis, patriam florentem videas, gratamque sentias. Tantum quod volebam obsignare literas, nuncius a nostris, me propediem pristinae dignitati redditum iri. Amstelodami cicioclxiv. a. d. 111. Non. Februarias.

EPISTOLA DIX.

NICOLAUS HEINSIUS

Samueli Tennulio S. P. D.

Non sine tacito rubore te convenio, Tennuli Clarissime, qui & compellatus per te nuper officiosum plane in modum cum ad Amstelaedamios

fortuito me contuliffem, & postea litteris, comitate ac doctrina cumulatis, uberrime ad epistolare provocatus commercium, per tricas forenses & rabularias occupationes abductus a meis partibus, conticescam haftenus agrestem in modum. Omitto alia complura, quae jam olim tibi debeo, quando & Lute-tiae Seguirianum Nafonis codicem membranaceum cum libris editis conferre meos in usus non es gravatus, & monumentis ingenii tui exquisitis non semel ex illo donatum me voluisti. Ea cum tantum merito apud me possint, ut intelligam pulcherrime, quid in rem vicissim a me tuam praestari oporteat, intervenit tamen, nolente me prorsus, ac perquam invito malignior fortuna, ac saepius parantem litteras ad te debitas alio avocavit. Ita dum dies diem ducit, & ego majus otium praestolor, totum poene mensem hac procrastinatione nobis interceptum serus nunc agnosco, ac cum maxime indignor. Nam quod videris subvereri, ne quid in familiari nuper colloquio exciderit tibi, quod acceperim ego sequiorem in partem, ac sinistre sim interpretatus, nolim profecto credas eum esse me; cujus aures amicorum sermonibus, utcumque liberrimis, quos tu tamen non permisisti apud me tibi, cum posses, insidientur aut maligne occurrant, praesertim cum & ego soleam nonnunquam jocari exporrecta fronte, quo nubem animo detergeam, & a curis defaecatum me praestem: quos innocentes risus si quis in partem malam voluerit detorquere, nae is profecto me ac mores meos parum intelligit: hos enim ut omni ex parte emendatos non vendito, infirmitati, tanquam homo, plus satis obnoxius, ita caveo tamen, ne obrepat illis malignitatis naevus ac invidiae. Julianus tuus mihi perlegenti adeo placuit, ut gestiam plura lucubrationis tuae specimina videre. Quin tu igitur Valerium Maximum nobis ocius, ad veterum membranarum fidem abs te castigatum, largiris. Plurimum sane illo in scriptore permiserunt sibi oscitantes librarii, dum acute & breviter in eo non pauca dicta minus capiunt, ac pro libitu intervertunt. In quibus argutiis etsi ludit frequentissimus, sic ut nimius quandoque videatur, tamen historias non paucas vindicavit, asseruitque ab injuria temporum, ut mereatur omnino legi. Nam quod *Josephus Scaliger* acerrimi, ut minime ignoras, vir judicii, & illum secutus *Johannes Rutgersius* meus avunculus, ineptum sententiarum affectatorem appellabant hunc Valerium, metuo ego ne illius potius ista sint vitia, qui Valerium nobis contractum dedit, quam Valerii ipsius. Habeo enim persuasum, ut credam in compendium redacta exemplorum pleraque, quae Valerius aliquanto fusius enarrarat; sive a Julio Paride, sive ab alio quocumque, Annaei Flori tempora propius accedente, quia non dissimile scribendi genus proficitur in Historiae Romanae compendio. Sed tu, qui scriptorem illum lectione continua jam trivisti, melius ista nos docebis. Potuit genus dicendi secutus esse Valerius non optimum, vel si mavis inepte affectatum nonnunquam, unde tamen non sequatur totum id scriptum pro inepto esse habendum. Quid affectatius Appuleji Milefiacis. Adsunt tamen adfectioni suae Veneres & Genius, qui lectorem invitent. Quod ais *Jacobum Lydium* lib. 1. cap. 1. apud Valerium legere rerum humanarum futura regimen, affirmo sancte mihi quoque id

id ipsum venisse in mentem, quando in Germania nuper auctorem illum a *Joanne Vorstio* recens editum perlegebam, quomodo *imperium benevolentia fulcire*, si recorder probe, *Tullius Officiorum* tertio dixit: erant alia quoque quorum non satis memini. conquiram schedas & videbo, si quid lateat in iis, quod editionem tuam possit adornare. Vidi & Trajecti ad Rhenum codicem nuperius chartaceum in Museo *Goyeri*, hunc credo jam sibi vindicavit noster *Graevius*, audio enim *Goyeri* libros esse distractos. Consensus codicum scriptorum sicubi pro vulgata stat pertinacius, quam tamen ipsa ratio reddat suspectam, nolim nimium iis a te tribui: sunt enim recentioris notae plerique, & qui ad unum puto omnes profluxerint ex eodem exemplari. Mihi certe pervetustum exemplar nullum *Maximi Valerii* haecenus videre contigit. *Castra meditari* nescio an vere, ingeniose profecto est excogitatum. Sic in *Silio*, *Lenti meditamina belli Cautus ama*. *Jacobo Gronovio* stipendium annuum est assignatum ducatonum, ut utar voce barbara, quadringentorum praeter liberam habitationem & alia emolumenta. Vale, mi *Tennuli*. Hagae Com. A°. *MDCLXXIV*. XIII. Martii.

EPISTOLA DX.

JOANNES COLINUS

Nicolao Heinsio D. F. S. P. D.

Holmiam.

EX Anglia redux lubentissime ex *Plumario* intellexi salvum te in Sueciam advenisse, quanquam dolebam vehementer, non licuisse viro, apud me maximo, dicere ultimum vale: crevitque etiam tui desiderium, ex quo a te *Elzevirius* mihi tradidit exemplar *Ovidii*, quem & usu & correctione plane fecisti tuum. Ille mihi nunc saepe in manibus est, quem antea negligebam, tanquam non intellectum multis in locis, interdum etiam vix Latine loquentem. Ergo tibi ego, amice, & privato meo & publico nomine gratias habeo maximas, ob restitutum sibi, mihi, publico *Nasonem*. At dum ego etiam mihi hac de causa valde gratulor, corripuit me tertia febris, quae in me per septem hebdomadas tyrannidem exercuit reddiditque tam ignavum, uti nec libuerit nec licuerit manum tabulae admove. Nisi quod una nocte, quam insomnem ducere jussu ejus debebam, illa *sustoles* & *diaesthes* interturbatrix, mihi hosce versiculos dictavit, quos ego lecto exiliens, in pugillares recepi, & tibi qualescumque nunc reddo, quos etiam sic claudere jussit.

*Hos si frigidulos censes, ut sunt mihi, versus,
In promptu causa est, quam tibi nosse licet:
Grata superveniant, quae nec sperare licebat,
Febre calent sola, Musaque febris erat.
Grande mihi dederas munus, Nicolae, recoctum
Nasonem, qualis cum loqueretur erat,*

K k k k k 3.

Gul-

*Cultor & antistes pereuntis docte Poetae,
 Cujus ab ingenio redditus ipse sibi est.
 Fatali natusque loco, rursusque renatus,
 Qua propius terris Maenalis urfa patet.
 Causa prope est eadem, cur alter & alter hic esset,
 Viderat hic aliquid, fenserat ille aliquid:
 Ast huic nec visus, nec tactus noxius illi,
 Lingua utriusque fuit, causa utriusque mali.
 Hoc modo dissimiles, nimium quod fidus amator
 Hic fuit, ast illi garrula lingua fuit.
 Ab male fidus amor! qui sub lodice relictum
 Ludumque atque jocum jusserat esse ratos;
 Septima quam sextae propior cum luna renascens
 Non custodito ludere nempe dedit.
 Ludere nempe dedit ventri, mollique avidoque,
 Qui non sic meritum perdidit Heinsiadem.
 Quodsi non alia potuisset sorte renasci
 Quin elegi vatis, quin epos intereat,
 Parce precor, Nicolae, tuo damnoque maloque
 Atque labore tuo, si fruor ipse dolens.*

xxv. Novembr. cicioclxvi.

EPISTOLA DXI.

NICOLAUS HEINSIUS D. F.

V. Cl. Johanni Colinio S. P. D.

Amstelodamum.

Nihil molestius accidisse poterat in Septentrionem hunc abituro, quam quod
 accidit, nimirum ut complexu tuo fraudarer, hominis longe mihi ami-
 cissimi, & cui res meae tantum deberent, quantum mortalium vix ulli. In
 procinctu cum jam starem, anxia sedulitate ad aedes tuas me contuli, Tibi va-
 le dicturus: inter prima quippe officia hoc praecipue agendum mihi intellige-
 bam. Sed ex familiaribus tuis animo sane perquam invito edoctus sum, in
 Britannias profectionem subitariam Te instituisse, ut Regis illic terrarum inau-
 gurandi solemnibus spectator interesses. Mente igitur dejecta viam ingressus
 sum, de cujus successu pessime, fateor, ominabar, quod prima ejus auspicia
 praeter spem ac votum cessissent. Eluctatus tamen sum per itinerum mole-
 stias, quae a latronibus ubique infesta plurimum infestabantur. Post instaura-
 tas utcunque vires, & refotam lassitudinem, quam ex longinqua via & diu-
 turna equitatione haud modicam contraxeram, arripui non semel calamum, ut
 absens saltem, quod praesenti non licuisset, de illibata atque integerrima affe-
 ctus mei constantia securum te redderem: Sed nescio quo calu factum est, ut
 cum

cum identidem jam totus essem in hoc officio, intempestivae & inopinae amicorum interpellationes inchoatam scriptionem mihi abruperint ac procrastinarint. Voluere nimirum fata, ut hîc quoque solida comitatis laude Tibi cederem, quem in eadem palestra toties jam ante victum meminissent. Praeventus igitur sum; nec salutatrici tantum epistola, quod plus satis erat, sed disertissimis quoque, quod omnium minime expectabam, versibus. Nam quamquam de ingenio tuo quaevis summa mihi promittebam, hominem tamen curis forensibus immane quantum distractum, ac densissimis circumventum negotiis, Musis feriantibus tam indulgentem se praestare quî crederem? Reponerem jam nunc nonnihil ineptiarum mearum tuis elegantis, sed quamvis ad occupationes tuas meae non accedunt, tamen toto vix anno Deas Parnassias in contubernium admisi, sive quod post infelicem rei amatoriae successum facinas ac sequiorem sexum minus faventes experior, sive quod ingenium caeli hujus frigore adstrictum obtorpescit. Ulciscar nihilominus me aliquando, & cum delicias tuorum carminum pari urbanitate aequare non possim, multa loquacitate, quae mea laus est, contendam praevertere. Interim versiculos nonnullos mitto, quos nuper admodum sub primum nuntium, qui de Nativitate Delphini Gallici huc advolabat, effudi, non bonos quidem illos, sed paucis ineptientes. Eos, ubi commodum erit, Amplissimo *Grotio* legendos trades: Solet enim ille nugis meis poëticis aliquid deferre. Sed heu funestum rivalibus meis annum proxime elapsus! qui *Vincentium Genegium*, *Erwoldum Vossium*, & alium praeterea extulerit, quem nominare nolo, fortassis & plures, sed mihi hactenus ignotos, ut nosti praeclara ingenia in occulto saepe numero latere. Superest tamen etiamnum *Margaridi* tam larga Venereorum nepotulorum messis, ut neque illi a viduitate ullum imminet periculum, nec mihi metuentum sit, ne rivalibus meis supervivam, aut cum solitudine horum mortalium aliquando conflicter. Quo loco res Gothicae sint, si quaeris: faeminas etiam hîc imperare scito, minus tamen impotentes quam apud vos. Nam una *Horiana*, ut scis, multarum instar Reginarum habet; Gothos quae moderatur, virilibus consiliis adeo totam se permittit, ut consularem credas. *Christinam* Heroinam in itinere ipso obviam habui, quare coactus sum relegere mea vestigia, & illam comitari ad sextum miliare, quod sic postularet. Comitantes curru, quo vehebatur ipsa, excepit, mensae etiam suae admovit, multisque profusae comitatis argumentis est prosecuta abeuntem, denique promissit fore, ut ex aere meo quamprimum sese expediret, iterata postmodum per literas pollicitatione, ac strenae loco missa imagine sua vivis expressa coloribus. De lite coram me percunctabatur, si tertium quartumque vinceret bis jam victus, manumne judici daturus essem. Cum negarem, laudavit consilium; mihiq; & hospitium apud se & stipendium, quale nunc a Patribus obtigisset, paratum semper fore asseveravit. Haec in sinum tuum effundo non jactabundus aut ostentator, sed ut mecum mireris inventam esse faeminam, cui causam meam probarim, in qua talpae iudices tam parum videre. *Piso* frugi noster quid rerum moliatur, & ecquid aurum ex sepulchretis pergat eruere, faciam.

sciam. Tum *Laminius* ac caeteri amici, ut valeant. *Moucheronius* cum omni familia commode se habet: nisi quod deprehensus in negotio Africano Geriis operam reipublicae nostrae minus utilem navasse, ignorari a Collegio rerum Indicarum nostrate id mallet. Vale, amicorum optime.

Exarabam Holmiae Suecor. A°. cıııııııııı. a. d. xxvııı. Jan. Gregor.

EPISTOLA DXII.

JOANNES COLINUS

Nicolao Heinſio D. F. S. P. D.

Holmiana

AT, at, quam male cecidit, quod, purgando bilem pridie, quam litterae tuae mihi sunt redditae, liberatus sum febre, quae iterum me bis corripuerat. nam si encomium suorum versuum in his legisset febris, proculdubio mihi luculentiores dictasset. itaque ex eo tempore eam ego, non tantum minore sum odio prosequutus, sed & eam atque eos amare coepi, qui deam illam fecerant. Nunc subsedit furor atque ad me redii, & hoc ambitiose doleo: his enim passibus spes erat magna, futurum ut nomen famamque poëtae nancisceremur, praesertim vere tam propinquo. Quas ineptias tuas vocas, pergratae mihi fuerunt, earum ego tamen participem facere amplissimum *Grotium* non potui, propter ejus discessum Hagam, ad comitia DD. Ordin. Pie tu quidem doles, quod rivalium tuorum memoria propediem sit interitura. sed tamen in tua manu est positum, ut eos ab oblivione vindices, sin minus, procul dubio eodem erunt fato, quo fuisset *Ulysses* ille, *multorum qui hominum mores cognovit & urbes, Ilias aeternum si latuisset opus*. Recte tamen atque ordine factum est, quod principem eorum praevit sociorum agmen levis armaturae equitatus, non tantum ut viam parent, impedimenta omnia tollant, sed & ut equestrem pompam adornent, venientemque novum & egregium civem magnifice excipiat Regina *Cytheres*. Quid enim nunc minus illi praestet dea, quam nuper praestitit magistratus noster Domino *Marsevenio* redeunti ex *Hanonia*, cum Principi eorum sacro fonte lavato adstitisset? Et hoc anno uno memini in chronico annotatum, qui post calendarium edebatur ab *Ottbone Bernardi Smient*, poëta parietario, cujus hymni atque odae solent in pontibus, triviis atque quadriviis cani, magna stipante caterva, sed habebat etiam ille praetorium in campis martiis. &c. si tibi fortasse id carmine facere nimis molestum est futurum, adversis praesertim Sicelidibus, sicut eas tibi esse narras, posset eodem etiam modo celebrari memori Dominae *Margaretae*, quando certum erit, quot illa, nunquam nupta, viros tulerit, aut post ipsius obitum, aut cum lenae vel perductricis honorem detrata meruerit. Neque id fane sine exemplo futurum est, nam sic aeternitati donata est mulier *Sloterdicana*, quae maritos (si bene memini) viginti quatuor tulerat extuleratque. De *Christina* heroina, quod tibi bona verba praesenti, ore suo, & absenti per litteras dedit,

dit, gaudeo. gauderem magis si argentum dedisset, eoque magis, quam promissis, onustum dimisisset. Recte tamen reputanti, tu jam dives es, si verum cecinit tuus poeta: *Promissis dives quilibet esse potest*. Sed hoc male profecto, mi Nicolae, quod excusatione opus credidisti, scilicet ut ne apud me pro jactabundo habereris. Quippe hoc argumento ego collegi non esse tibi perspectum ingenium meum, neque credere te, quam bene ego te, amice, norim. Interim ego haec, & quaecunque apud me secreto deponere dignaberis, in sinu meo geram, neque discingar unquam, nisi cum bona venia tua. Absit tamen omen, ut tibi ab Heroinae stipendio ulla sit salus expectanda. quin potius auguror secundum te judicaturos supremi Consilii Senatores, quos *Rebuffus* in tractatu suo de Litter. civilibus dicit esse sacrosanctos, neque fallere neque falli, nec aliter propter singularem eorum industriam judicare, quam ipse Princeps judicaturus esset. *Piso* atque *la Minius*, uterque per aliquot dies adversa usi sunt valetudine. de *la Minio* nihil habeo quod suspicer. *Piso* dubium est bona fide aegrotaverit an non: puto prudentem ejus animum metuisse, si ille semper vegetus valensque audiret, fore uti tot medici uno anno enascerentur, quod fungi una pluvia, & sic fortassis ipsius luminibus officeretur. nempe etiam publice claudicavit, & traha vectus est per urbem. Illud certe verum est, quod eorum uterque totus est in corradendo argento: credo, hereditatis summam curabunt incidi sepulcris suis, tam obnixè rem faciunt. Si apud *Moucheronium* aliqua adhuc superest nostri nominis memoria, oro ut eum a me officiose salutes. Amstelodami prid. Cal. April. A°. 1662.

EPISTOLA DXIII.

J O H. C O C C I U S

Rector Scholae Zuollanae,

Nicolao Heinio S. P. D.

Holmiam.

SCio tibi summam amicitiae conjunctionem esse cum nobilissimo *R. Hermannino Schelio*, eoque acerbiora futura, quae sum narraturus. Et licet ipse sine vellicatione & exulceratione mei vulneris non possim eorum meminisse; tamen & lex humanitatis, & aestimatio tui, me non patiuntur filere. Fuit *Schelius* cis hebdomadas decem Iffelmudensis Satrapa creatus cum summo plausu bonorum; qui considerantes hominis sapientiam & eximias virtutes, optabant terris nostris perennare illud excellens decus, & praesidium unicum. Verum, quam misere hi de spe deciderunt, & ipse *Schelius* sua destinatione! Quid enim magis ei in votis fuit, animoque agitavit, quam patriae suae quaecunque posset ratione commodare, aliamque dare formam? Jamque cum dotes ejus apud omnes coepissent innotescere, eripuit eum nobis, qui supra nos negotium curat; adeo ut dicere possimus, hunc tantum terris ostendisse fata. Na-

Etus est ante diēs circiter decem febrim, quam ardentem vulgo vocant. Non tamen decubuit ex morbo, nisi biduo ante fatalem diem. Tum vero invasit eum febris ea vi, ut corpus labefactaret penitus, & plurimum infirmaret mentem. Excessit autem e vita Zwollae, in diversorio publico Henrici Mensingii, hora undecima noctis, nonis Juliis, inter solis & lunae diem. Priusquam perseveraret cubare in morbo, dissimulavit eum ut potuit, adeo ut pridie etiam interfuerit consilio nostrorum nobilium. Post, cum tam vehemens esse coepisset febris, nec mente, nec lingua satis uti potuit: adeo ut nihil ipse, quod noverim, constituerit in rebus suis; nec ego, quia serius de morbo ejus rescivi, interrogare potuerim, quid fieri vellet de Dissertationibus reliquis, quas prelo paratas dixit ante, modo describerentur. Egi cum fratris ejus filio, ne scripta illa sine dubio rei literariae utilissima futura pereant, sed ut edantur; ad quam rem & obtulimus omnem operam nostram. Ille autem promisit omnia benigne. Tua interesse putavi, Nobilissime Heinsi; ne nescius esses casus amici veteris; quicum plurimus tibi fuit usus, quique plurimis flebilis occidit, ut singulare decus Transisalanicae nostrae, & omnis Belgii. Vererer alioquin ad te, virum ejus amplitudinis & dignitatis scribere. Si quid ultra petis de excessu Nobilissimi *Schelii*, scribam per otium prolixiore manu, & cum fide. Et digna sane est ejus vita & obitus, quae tanquam exemplum proponantur omnibus. Vellemque existeret aliquis, cui familiarius innotuit, qui vitam ejus viri latius nobis explicaret. Vale, Vir Nobilissime, & si quid per festinationem commisimus, boni consule. Sum enim occupatior. Editionem etiam Virgilii matures, quaeso, quam te adornare ex compluribus manuscriptis codicibus nuntiat per literas *Graevius*. Dabam Zwollae a. d. vii. Idus. Julias, anni cicioclxii.

EPISTOLA DXIV.

NICOLAUS HEINSIUS

*Johanni Coccio.**Zwollam.*

IGnoscas peto pro cetera tua comitate atque indulgentia, quod literis a te provocatus suavissimis nihil haecenus repono praeter intempestivam silentii diuturni contumaciam. Fateor ingenue post acceptos de morte *Schelii* mei nuntios longe funestissimos multo tempore me meum haud fuisse, & invisum habuisse odioque persecutum esse omnem vocis dolori tanto imparis usum.

Curae leves loquuntur, ingentes stupent.

Fuit tamen pro solatio, quod ex cinere amici incomparabilis alius repente emerfit, qui ejus vices suppleret, & jacturam maximam mihi redderet levio-rem. De Te loquor, vir humanissime, quem vivente *Schelia* cum ignoraverim mei studiosum esse, nunc amicitiae Scheliana postumum hunc fructum fero, ut, quod superstiti beneficium acceptum referre maluissem, eo concilian-

EPISTOLA DXV.

Nicolao Heinsio S. P. D.

Protrahimur tandem e latebris, in quibus perpetuum delitescere cupiebamus, ne quid ex opinione nostri apud te minuatur. Fatemur equidem saepius nos optavisse inter cultores tuos admitti. Sed postquam in rem praesentem venimus, & tua singularis humanitas tam prolixè se offert obviamque praebet, ac naturali quodam & inimitabili candore pulchritudineque scriptio-
nis nos invitat ad amicitiam mutuam; praestincta est acies nostrae mentis, quae se non dignatur hoc honore, ac ne familiarius cognosceres, quantum mea tenuitas infantiaque subsidat infra sublimes tuas dotes, ambitiose tacui; satis astute cogitans interim frui amore, quo nos per errorem complecteris. Nunc cum Plumerus bibliopola tuo jussu per literas, & praesens etiam hîc de responso nos monuerit, cogimur ad te scribere, quod ad alios nobis facilius, ut non temere quisquam de tarditate scriptio-
nis nostrae conqueratur. Accipe tamen, quo colore responsionis inertiam defendere simus meditati. Dicere possumus,
Lllll 2
ni-

nihil habuisse nos, quod tua scire interesset, nec decere vacuas literas mittere in terras tam longinquas. Officii quoque nostri rationem non negleximus, ut adipisceremur tibi Valerium Flaccum, cujus margini *Schelius*, jam beatus, emendationes suas adnotavit. Eaque de causa bis ad *Carolus Othonem*, fratris τὸ μακαρίτη filium scripsimus. Is vero occupatus in haereditate sibi vindicanda & acquirendo rerum dominio, nostras interpellationes facile contempsit, nec quidquam responsi dedit: & nosti quid esse soleat ὁ σχολαστικός, τὸ ζῶν scilicet, & πάντες καταγελῶσι. Ad viduam deinde *Lintelii*, sororem beati *Schelii*, cum dedissem literas, rescripsit illa satis humaniter. Sed quia tam infestis animis diffidebant haeredes, & vi, hominibus armatis se invicem de *Wenbergae* possessione deturbabant, interposuit se Episcopus *Monasteriensis* disceptatorem, causam eam ad se pertinere praedicans, quod regno suo subesset hoc praetorium: eoque nomine custodia sua obsedit, nec quidquam exportari patitur. Ibi & servari credo eum Valerium Flaccum, cui *Schelius* noster inscripserit suas notas. Est ergo τὸ ἀδυνατών librum illum, ut nunc est, consequi: & vides quid ex parte scriptionem ad te meam remoratum sit, spes nempe brevi adfuturæ quietis pacisque inter haeredes. Id quoniam longius jam trahit negotium, vereor ne serius adipiscar Valerium. Audio enim te jamjam eum editurire. Quam autem primum nactus ero, ocissime ad te transmittam. Scripsit & *Gronovius*, noster praeceptor, de emendationibus *Livianis*, quas complures habuisse τὸ μακαρίτη *Schelum* noverat. Sed non nisi sex septem missi acceptas a *Vollenbovio*, qui eas apud *Lintelii* viduam inter alia quaedam scripta repererat. Idem accepturus etiam est alteras dissertationes de castris, quod jam factum oportuit. Nam ecclesiastes *Haxbergensis*, quem penes est is liber scriptus, affirmavit utrique nostrum sancte ante bimestre circiter spatium, se, cum domum reversus foret, eum librum quantum posset ad *Vollenbovium* missurum. Nondum liberavit eam fidem, qua se obstrinxit: at brevi tamen nos nacturos spero, & ejusmodi reperturos ea scripta, ut sine magno negotio typis mandari queant. Audivimus id ab ipso *Schelio* paullo ante excessum: licet pejus ominetur ille *Haxbergensis*, & pleraque confusa dicat, ut saepe nec caput, nec pedes. Ubi comparebit liber, videbimus. Ante viginti hosce dies Trajecti ad Rhenum fuimus; ubi cum *Graevium* non inveniremus profectum Hagam, domi ejus reliquimus elegantem libellum *Everardi Feithii* Elburgo Gelri, quem inscripsit auctor *Antiquitates Homericas*. Praeterea & unum librum de *Antiquitatibus Atticis*, cui materiae sex vel octo libros destinarat *Feithius*. Est autem hic scriptor eruditus & tersus. Docuit publice literas Graecas *Rupellae* circa annum sextum vel octavum hujus seculi; & triginta plus minus annorum cum esset, putatur clam caesus ob consuetudinem cum nobiliori femina. Miramur nullam nos reperisse mentionem de hoc auctore in *Scaligeri*, *Cassauboni* aliorumque ejus temporis scriptis, iis dico quae legimus: nec videtur tantum ingenium in occulto potuisse latere. Sed promisit *Henricus Brumanus* adolescens ex inferioribus meis collegis, cujus fuit avunculus magnus hic *Feithius*, & a quo accepimus hos libellos, se curaturum nobis Elburgo scrinium.

ple-

plenum epistolis aliisque scriptis, unde spero compleri posse libros Atticarum Antiquitatum, & reperientur quoque forsân eruditissimorum ejus aetatis viro- rum epistolae. Hosce, inquam, libellos reliqui apud *Graevium*, ut edat, si probet, typographumque ei rei nancisci possit. Quem *Graevium* quod domi non invenerimus, etiam eo nomine nobis dolet, quia carmen videre non po- tuimus, quo te prosequutum audio *Scheliu* manes. Apparebunt in eo tua Ve- nus & dotes, cum naturam etiam, credo, excitaverit desiderium amorque de- functi. Nos Musarum cultores ex infima plebe, & solo capite censendi, quod potuimus quoque fecimus, magis adeo ne pictas nostra desideraretur, quam ut haec quidquam collatura putaremus ad tanti viri ornamentum. Carmen Epicedium autem est imperfectum & impoliturum, propterea quod cum ali- quamdiu meditando satis amplam concepissemus materiam sine ullis dum versi- bus, intervenienti cesserimus *Vollenbovio*, qui posterius apud typographum, quem hîc habemus unicum, suum carmen imprimi voluit. Ita plus quam tri- duum mihi ablatum, & praecipitare meum carmen coactus sum. Ac dum pango hoc epicedium, trado edendam Gratulationem, quam animi causa fe- ceram, cum *Schelius* esset Satrapa creatus, quamquam ipse nunquam vidit: ma- luimusque intempestivi, quam non officiosi videri, cum hîc eum heroa laudi- bus percurrere sumus conati. Correctiones, quas vides, fuerunt ita in auto- grapho nostro: nam dum festinantius describitur, vox pro voce fuit sumpta perperam. *Vollenbovii* carmen etiam hîc admirati sunt homines, nec quisquam horum poëtarum fuit, qui ad summam ejus potuerit adspirare. Quam vel- lem ut pro concione dicentem audivisses eum virum: laudares eloquentiam, quam ille alit ac robustam facit sapientissimorum scriptorum lectione, purpu- ram quaerens e Tullio, Seneca, Plutarcho aliisque veterum, quam adsuat sim- plici ac triltiori sacrae scripturae panno. *Schelius* cum ut fratrem amavit, cui in supremis adfuit, & ante per morbum prope assiduus. Plura de hoc ne scri- bam, verecundia retineor, quia, quae comitas est hominis, ab eo quo prae- fuit ecclesiae nostrae, (annus is jam nonus agitur) nemo nobis vivit animo & familiaritate conjunctior. Salutat autem te *Vollenbovius* quam officiosissime, & quam diutissime commodo rei literariae servire posse mecum optat. Virgi- lium tuum tandem accepimus missum cis paucos dies a *Plumero*, cum semel & iterum ante per bibliopolas nostros Amstelodamo petissemus frustra. Vidi- mus erranti oculo aliqua optime a te restituta. Laudabimus rectius, ubi per- legerimus totum; si tali auxilio vel defensoribus istis eges. Vale, vir nobilif- sime, & perge nos amare, qui te veneramur & colimus ut ipsas Musas. Da- bam Zwollae a. d. vii. Idus Quintiles, stylo Juliano, anni ciciocclxiv.

EPISTOLA DXVI.

NICOLAUS HEINSIUS

*Johanni Coccio.**Zwollam.*

Ignoscas aequum est, & in bonam partem interpretere, si parum seduli aut minus diligentes videmur esse, mi Cocci, in exercendo mutuae scriptio-
nis, & alloqui alterni commercio. Ex quo enim apparuere publico scintil-
lae qualescumque incendio illi praeviae, quod nobis bellum Britannicum mi-
nabatur, alia ex aliis mandata, quasi concatenata a Proceribus Belgarum Foe-
deratorum supervenere, per quae de studiis atque amicitiiis privatis cogitare
vix permittebatur. Dum meliora spero, & votis ardentissimis Deos posco ne-
quicquam, multum temporis effluxisse serus agnovi. Arrepto igitur stylo non
potui a me impetrare ut salutationis debitae ac procrastinati haecenus responsi
officio diutius deessem. Tu si paucioribus verbis, quam humanitatis leges
postulabant, apud te nunc videbor defungi, id omne temporibus difficillimis
acceptum refer, per quae mihi verboso non licet esse. Virgilium, fateor, lo-
cis plurimis castigaveram, vocata ad partes Elzeviriana editione, quam a pa-
rente meo recensitum meminissem omniumque emendatissimam esse opinarer.
Sed adeo in plurimis operas typographicas a mente ac manu Senis nostri di-
versas abiisse invitatus deprehendi, ut absit minimum, quin omnium mendosis-
simam Maronis editionem nobis dederint. Multa irrepsere nimirum, non
tantum adversus publicam veterum membranarum, sed etiam contra editionum
typis exemplarium auctoritatem, quae legentes sub umbra specieque scripturae
genuinae turpiter fallant. Horum quidquid restabat in nostra illa, quam lau-
das tanto opere, editione, restabat autem non parum, id omne curis poste-
rioribus, quas in promptu habemus, amotum sublatum nunc esse speramus &
confidimus, modo fideliter ab operis Typographicis exprimatur. Poëmatibus
meis, altera propemodum parte nunc auctioribus, diu est, quod manum abs
se fore admovendam Bibliopola Elzevirius pollicetur, cujus cunctationis me
jam taedet. In Valerium Flaccum & Silium Italicum annotata percenseri a
nobis par est, priusquam praelo Typographico committantur. Quod ut cum
cura fiat, otio majore mihi est opus. Ea res & Maronem differt ac moratur.
De postumis *Schelii* nostri operibus edendis Te & *Vollenhovium* serio cogitare
cupiam. Quando nec ab haeredibus τῶ μακαρίτη id sperari potest, nec a
Graevio, cui si militia amici nostri administranda permittetur, Fabium cun-
ctatorem reperiret. Nam qui in suis proferendis tam lentae tamque ignavae
est operae, quid in alienis sit praestiturus divinato non est arduum. Quae
tu manibus Schelianis dedisti, ea mire polita mihi visa sunt. *Everardum Fei-
thium* ne ex fama quidem compertum habebam. Hoc igitur age ut memoriam
doctissimi Viri ab oblivione vindices, & eruditus ejus scriptis posteros deme-
rearis. Vale Exarabam Holmiae Suecorum Eid. Febr. cııııcclxv.

EPI-

EPISTOLA DXVII.

THOMAS BARTHOLINUS CASP. F.

Nicolao Heinsio Dan. Fil. S. P. D.

Lutetiam.

Quamquam gratissima mihi semper visa sit Lutetia, nuper tamen solito magis placuit. Non quod rerum fuerit mutata facies, & aedium superbarum additamentum, sed quod magnis Viris, quibus urbs abundat, tu quoque accesseris, mihi ex aequo addictus. In quo sane, ne alias attingam dotes, quibus Parentem felicissime exprimis, admiratus sum eruditionem magnam pari candore junctam, tanto in te eminentiora, quanto seculo nostro invidiae pleno & fucatae doctrinae, videntur rariora. Gratulabar saepius Belgio vestro ingeniorum feracissimo, quod te in spem maximam genuerit, nec minus orbi nostro literato, quem feliciter adeo illustrare coepisti. Parenti quoque inter summa famae dudum collocato aeternitatem augurabar, quam dudum meruit, non solum quod divinis scriptis orbem impleverit, sed potius quod in te expressam magnarum virtutum imaginem transtulerit & perfectum summi animi exemplar, quod sibi, parente olim inter sidera relato, aevum servet sequuturum. Inprimis autem meam amicitiam optime sperare jussi, cui tu accessisti non uno nomine charissimus. Nolo in laudes tuas ire, quas mecum recolo non tacenda veneratione. Novi enim genium tuum, amicos magis amare, quam laudatores, quibus subinde nefandum adulationis crimen conjungitur. sat erit ad laudem tuam, si te Heinsium dixerim. Quid huic subsit nomini, me tacente, loquuntur omnes, quibus literae innotuerunt. Tuae tamen laudi & hoc accedit, quod connatam famam & eruditionis majestatem haereditario quasi jure a parente traductam, majori exemplo juves. Perge igitur de Nasone tuo, ut coepisti, porro bene mereri, nec diuturniori mora spem nostram illude. Pro Claudiano digno tuae industriae Heroe, pariter intercedo, & Aurelio Prudentio, quo aurei tui ingenii prudentia elucescat. Locus apud hunc dubius mihi occurrit, de quo judicium tuum exspecto. Is est de Hippolyti Martyris Passione: in Hym: xi. vf. 65.

— — *crux istum tollat in auras**Viventesque oculos offerat alitibus.*

Quid in auras tolli sit, mihi cum Lippio non convenit, qui lib. i. de Cruce cap. 4. alluisse arbitratur Poëtam ad ethymon τῆς σταυρῆς ab Hesychio traditum. Hesychius autem vocat σταυρῆς, ἐκ τῆς εἰς τὴν αὐραν ἵστασθαι, quod ad auram consistant. Verum meo judicio diverso sensu ab utroque dicitur, tollere in auras, & consistere in aura. Stauri enim ad auram consistunt a nullo vicini fulcri ligno sustentati, secus quam patibula seu furcae, quae adpositis lignis ad latus fulciuntur. Crux autem nisi quod in terra haereat fixa, ad auram libera consistit, nullo ambiente corpore. Cujus contrarium, quae in aura non consistunt

sunt forsan trabes censentur, quibus verberandi flagellandique suspendebantur apud Romanos pariter Graecosque usitato supplicii genere. Unde *in auras tolli* Prudentio forsan dicitur is, qui supra hominum regionem crucis altitudine sublatus omnibus, quibus exemplum est, sit conspicuus. Ut crucis altitudinem designet, a qua ὑψωσις illa apud Joannem sacrum Vatem, & *crucifalus* apud festivissimum Plautum. Μεπάρεος quoque, hoc est sublimes, eleganti joco *Casaubonus* tales vocat, & *cruce sublimem spectare ab alta* Regulum Poeni Silius decantat. Lignum sane crucis notione pressa ἑρυνόδρομον ξύλον ab Auctore Tragoediae, quae inscribitur Christus patiens, venit, nec abludit Nonnus Johannis Interpres;

Εἰς δόρυ περὶ πλεῦρον, ἐπήρεον, ὑψόθεν γαίης

Ὁρθιον ἐξεπένυσαν. — —

Et *excelsa crux* Tertulliano, Lactantio de Vera sapientia *exaltari* dicuntur rei ex sacri textus mente. De quibus data indultoria egi fusius in ¹ Dissertatione mea de Latere Christi aperto, brevi lucem visura, si tuam symbolam contuleris. Apud eundem Prudentium *Lanciniatores* maximorum gregum nescio an dicantur Medicorum filii, quorum manus *lanienam Hippocraticam* ibidem Hymn. x. vs. 498. appellare amat. Alii apud eundem legunt *Laniantes*, alii *lancinantes*, quod ex Celsi praefatione mutuati sunt, in qua Herophilus veteresque vivorum prosectores *Latrocinantes* audiunt. Idem sane Herophilus Tertulliano *prosector*, & *Lanio* nuncupatur, Asclepiades *tortor* Celso, & Medicus Archagathus *carnifex* Plinio. Tu de loco Prudentii quaeso aliquid mone, dum ego Medicorum incumbo defensionem. Verum nimis in otium Tuum forsan pecco, quod aliis destinasti. Amicitiae id condonabis fiduciae & Prudentii amoris, cui curas tuas partitus es. Ex Claudiano tuo pauca delibarem, si epistolii angustiae permitterent. Unum tantum de Phoenice decerpo, cui vs. 17.

Arcanum radiant oculi jubar.

Radios hos non oculis, sed temporibus contribuit Aufonius:

Ales cinnameo radiatus tempora nido,

Seu *nimbo*, ut Scaligero placuit. Lactantius in Elegia Phoenicis toto capiti applicat: vs. 139.

Aequatur toto capiti radiata corona.

Ubi membranae meae MS. habent: *Aequataque noto capiti radicata corona*, qua veri specie, per otium indicabis. Nescio an huc respexerit Solinus: *Capite honorato in conum plumis exstantibus*. Quid si *capite coronato* reponamus ad Lactantii imitationem? quanquam & *honoratum* caput dici possit, ut apud Claudianum tuum

— — — igneus ora

Cingit bonos rutilo cognatum vertice fidus &c.

Sed haec cum aliis hujus commatis fusiori calamo persequor in Commentariis ² de Luce Animantium, ad proclum paratis, & in publicum orbis conspectum

¹ Cap. vii. pag. 69.

² Vid. lib. ii. cap. xiv. pag. 220.

Etum prodituris, si, quid tibi super loco Claudiani sit animi, perscripseris & epigrammate felicissimae tuae Musae, opus lucidum prosequutus fueris. Cae-
terum iter, quod magno animo in Latium suscepisti, ut ex voto succedat,
votorum meorum est summa. Ego patriam meditor diu desideratam. Tu,
quaeso, bonas aves precare & amorem mihi perenna. Vale, amicorum decus,
& publicum bonum, ut coepisti, promove. Scripsi Lugd. Bat. 18. Mart. 1646.

EPISTOLA DXVIII.

MARCUS MEIBOMIUS

Nicolao Heinsio.

Leidam.

Clarissime ac Eruditissime Domine. *Caroli Sprotii*, reverendi ac doctissimi
viri, litteras magna nuper cum voluptate accepi, perlegi. Illas secum attu-
lerat Reverendissimus item ac Doctissimus Doctor *Broun*, Regiae principi a Sa-
cris privatis. Tua vero, Eruditissime Heinsi, merita, ut priora sunt, ita & an-
tiquiora mihi esse debent. Certe abs Te fuisset, nunquam his in terris, vel Pto-
lemaei nomen Graecis litteris exaratum, vel Bryennii monumenta videre licuif-
set. Etsi enim, ex litteris ad te, ante novem ferme menses scriptis, quas hu-
manissime tum inspiciendas dabas, cognoveram, codices illos esse mutilos, fore
tamen rebar, ut, ubi Galliam aliasque provincias adirem, major antiquos li-
bros, manu praesertim scriptos, inspiciendi facultas daretur. posse me illa oc-
casione facilius, quae his in libris desunt, supplere, quam ut denuo integros
exscriberem. Ptolemaei tertius deest totus; nec bini priores satis integri.
Bryennii aliquot *τμήματα* in principio desiderantur. Quod non admodum in
ejusmodi scriptis mirum esse debet. quippe quae Latinorum adhuc in hac disci-
plina barbarie latius grassante, meliori dicam fateri, an ingeniis diviniorebus
vitam omnem ac sui conservationem se debere fatentur. Horum Tu, Claris-
sime Heinsi, vestigiis insistis, qui veteribus Codicibus, magna diligentia col-
latis, uberem ejus curae fructum litterato orbi promittis. A quo ut immor-
talem tibi gloriam spondere debes, ita, quod possum ac debeo, summas Tibi
pro hoc in me officio gratias ago; ea me cogitatione oblectans, quod, quam
in Summo Viro, Patre tuo, in me benevolentiam eadem in re sum expertus,
eam a Te, nobilissimo illius filio, continuatam videam. Vale, Clarissime Domi-
ne, meque Patri amplissimo ac Tibi habe. Anno *MDCLXIX*. III. Idus Octo-
bris.

P. S. Litteras hisce inclusas ab Amico habes *Carolo Sprotio*, quas ut a D.
Broun accepi, Tibi mitto. Prima quaque occasione gratias pro commodatis
libris perscribemus, omnibus officiis nostram gratitudinem declaraturi. Libros
Musicos prelo jam fatigant Typographi, qui, ubi illorum curis fuerint libera-
ti, ad Te, tuumque *Sprotium*, atque alios amicos convolabunt. Iterum Va-
le, atque hisce festinatis ignosce.

Tom. II.

M m m m m

EPI-

MARCUS MEIBOMIUS

*Nicolao Heinsio.**Holmiam.*

L iteras tuas, quas xvi. Cal. Junii ad me dedisti, recte quidem accepi, sed qua via ad me pervenirent, divinare tum non potui. Nuper huc advenit Nobilissimus atque Amplissimus Vir, *Jacobus le Maire*, ablegatus Ordinarius Ordin. Generalium Helsenorae, uti nosti, habitans, qui de literis tuis, a se Helsenora ad me missis per amicum, interrogavit, num illas recepisssem; simulque tuas ad se nuper scriptas literas ostendit. Dixi, non solum recte me illas accepisse, maximaque laetitia earum lectione fuisse perfusum, ut quae a veteri amico, celeberrimoque in literis viro, & quod caput est, candidissimo virtutis omnis aestimatore, scriptae essent; sed & statim responsurum fuisse, si mittendi literas viam certam scivisssem. Metui enim, ne forte literae in aliorum manus pervenirent. De negotio autem illo quid statuere possem, ipse pro tua prudentia facile perspexisti. Quod si propositum est, certam vivendi rationem, & habitationis locum tandem eligere, certe apud Reginam Suediae, optimam quidem sapientissimamque Principem, sed pro negotiorum incidentium varietate locum commorationis saepius mutantem, pingue illud studiis meis, valetudinique conveniens otium non sum inventurus. Jam vero Romae in bibliotheca consenescere quis possit, absque religionis mutatione? de qua vir constans, rerumque humanarum non omnino imperitus, quidquam audire nolit, cum nunquam ferme sine famae aliqua labe a doctis viris sit admissa. Interim, quemadmodum coram tibi multis exposui, commodam quandam viam ac rationem hinc discedendi mihi oblatam vellem. Et video metuendum esse, ne difficilius, quod volo, impetrem, si Serenissimae Reginae auctoritas interponatur, praesertim quod Serenissimus Rex Daniae, Dominus meus Clementissimus, Reginam, cum hac transitura esset, excipiendam non curarit. Hoc tandem consilii mihi capiendum video, ut absque dimissionis literis hinc discedam. Neque enim salva conscientia diutius hinc haerere possum, ut qui nec Deo nec hominibus ulla hinc re inserviam. Nunc in bibliotheca Excellentissimi quondam *Gersdorffii*, quam vivus Regi suo legavit, ad praescriptum catalogi ordinem recensenda & Serenissimi Regis nomine recipienda, horas bonas perdo & me macero, sine ulla tanti laboris mercede, quam quidem certo sperare possim. MSS. Hispanicos & Italicos, paucos quidem sed egregios, heri ex bibliotheca illa Serenissimo Regi obtuli. Si catalogum illorum videre cuperes, quem notatis libri seu voluminis cujusque singulis tractatibus satis accuratum confeci, eo tibi gratificari sum paratissimus. Haec in hospitio Amplissimi Domini Ablegati scripsi. Vale, vir Amplissime, & rebus meis favere perge. Hafniae Nonis Augusti, anno ciciocclxi.

EPISTOLA DXX.

MARCUS MEIBOMIUS

*Nicolao Heinsio S. D.**Hagam.*

Tardius, fateor, scribendi officio, quo tu non semel me ornaſti, defungor. neque id factum, aut literarum faſtidio, quas me deamare non ignoras; aut ſocordia quadam, qui me ad hujusmodi labores ſuſcipiendos impigrum fuiſſe teſtes ſedulitatis producere poſſim; ſed nescio quo ſemper praesentem rerum mearum ſtatum dedignante animo. Non facile dixero, quam tu me hujus anni initio ſermonibus de literariae reipublicae ſtatu hoc tempore recrearis. qui non tantum quid in Belgio agant eruditi viri ſcias, ſed literarum commercio Galliae & Italiae doctos viros tibi devinxeris. Vitae quidem meae ratio ea fuit haecenus, ut literarum oſoribus oſtenderem, non temperantis vitae inſtitutum, aut Sapientiae amorem impedimento eſſe, quo minus publico munere cum probitatis laude bene functi videri poſſimus; nec everti poſſe debitum literis honorem, niſi omni honeſtati ſimul nuncium remittere velint: hanc tamen laudem invidiae virus ac calumnia paulatim depaſcere atque abſumere tentant. Caeterum de edendis reliquis Muſicis quod mones, eo ſum animo, ut, niſi majus quoddam impedimentum Deus objecerit, hac aetate deſcribendis iis inſudare velim. Manuel Bryennius, facilis, ſed egregius, ſcriptor vix interpretem requirit. Ptolemaeus majores conatus deſiderat, ſi nativum eruditionis decorem lectorum oculis oſtendere velimus. Huic accedet commentator Porphyrius, candidus variae eruditionis amator, ſed ſtylo obſcurus. De typographo, qui haec edere velit, diſpiciendum. Quod ſi in Belgio honeſtior vivendi conditio mihi offerretur, parvo labore in procurandis editionibus deſungerer: nunc bis ſunt omnia ſcribenda, ne, ſi exemplar pereat, idem labor denuo ſit ſuſcipiendus. quae quidem potiffima cauſſa eſt, cur quaedam mea, Muſica praefertim, lucem nondum viderint, ut quae accuratiſſimam diligentiam deſiderent. Exemplaria MSS. eorundem auctorum inſpicere velim, quae tua auctoritate obtinere poſſem, uti nuper ſua liberaliter promiſit *Marquardus Gudius*, vir erudiſſimus, qui cum eximio ſuo comite me inviſere dignatus eſt. Manethonem Graccum poëtam inſpicere vellem, quem tu mihi diebus aliquot utendum procurare facile poſſes. Porro ſi quid librorum nuper editum eſt, quod lectionem mereatur, de iis quaefo me moneas. praeterea quot Muſicorum meorum exemplaria reliqua habeat *Elzevirius*, quem, & praefertim magna nomina, *Voffium*, *Gronovium*, *Golium*, meo nomine ſalutare velis. Vale & me ama. Haſniae die 27. April. A°. 1667.

EPISTOLA DXXI.

MARCUS MEIBOMIUS

Nicolao Heinsio S. D.

Hagae.

Nuper hîc a professore quodam humanioris literaturae utendum accepi utrumque epistolarum volumen *Tanaquilli Fabri*. legi nonnulla. placuere quaedam. nec pauca sunt praecipitantis ingenii indicia. Modus ille condendi varias lectiones, auctorumque emendationes non placet. praesertim stylo adeo inaequali & invenuto. *Muretos*, *Victorios*, alios, gratiam scriptis suis conciliasse videmus. Vidi quid in Ovidio tuo, temere saepius, tentet. Sed temeritasne magis an impietas sit nominanda; prurigo ista emendandi sacros codices, alii dubio procul accurate jam expenderunt. si mihi hîc typorum facultas esset, quae mihi & forsan etiam aliis merito displiceant, monstrare possem. In Hefychio emendando non parum saepius hallucinatur. uno capite XIV, si recte memini, loca emendasse gloriatur; omnia, quod mirum, conatu irritò. quae, cum ad nos veneris, monstraturus sum. In explicando Ovidii disticho admodum laboravit; quod ita scribo.

Inter tot populi, quot scripti millia nostri

Quem mea Calliope laeferit unus ego.

Inter tot millia populi Romani, quot millia literarum (haec vox praecedente versu legitur) scriptum nostrum de arte amandi habet, unicus ero, quem versus illi lasciviores laeferint. Post discessum tuum praeterito anno Ovidium tuum in manus sumsi, & quaedam notavi. nec dubito quin verissimam hanc emendationem sis judicaturus. Saepius signate *Scriptum* vocat illos de arte libros. De Clarissimo viro *Marquardo Gudio* quid factum sit coram ex te audire aveo. Si Hagae moratur, meo nomine quaeso salvere jubeas. Manethonis versus. Astronomicos scriptos aut impressos libenter viderem. Sed hîc abruptendum, quod tardius ad scribendum calamum arriperem. Vale, & domum meam praesentia tua dignare, cum huc es transiturus. Hafniae d. 14. Mart. 1668.

EPISTOLA DXXII.

MARCUS MEIBOMIUS

Nicolao Heinsio S. D.

Vianam.

LAngui per hos dies, aëris foetidi contagio. Praecipua enim grassantium febrium causa in his locis est fossarum foetor. Nec remedium ejus mali, quamvis aequissima conditione a me oblatum, scire valde desiderant plerarumque urbium magistratus. Mira enim importunitate exceptus sum a Leiden-
sium, *δημάρχου* dicam an *δημοβόρου*, *Burgersdicio*. Neque enim Consules, quod
mi-

mirum mihi valde accidit, hujusmodi publica urbis negotia curant. Ad Pensionarium suum ea remittunt. qui, tanquam urbis regulus, aut dictator, pro animi lubitu ea acceptat, aut rejicit. Nisi multitudinis miseratio justam indignationem minuisset, loqui amplius hujusmodi hominibus detrectassem. Indigni enim sunt, qui procurandae rei bonae manus adhibuisse dicantur. Misera certe vitae meae conditio est, qui ab hujus urbis potentibus, iis, qui factioni consulis *Gillis Valckenier* adhaerent, hinc premor. Coeptis meis omnibus se opponunt. Scripsi super hoc sacro Bibliorum negotio multas literas ad Archiepiscopum Cantuariensem. nihil unquam responsi tuli. Scripsi etiam aliis; & exemplaria misi; pereunt ea omnia, quae ad me redire deberent. Enimvero intercipiuntur literae. forsitan etiam in Angliam eas ire non patiuntur. Annon summa haec miseria est, impeditum se sentire ab iis, qui summam justitiam administrare videri volunt. Quotidie enecor. etiam calumniis, & malefanorum juvenum convitiis, quod ex *Gronovii* libello jamdudum cognovisti. Quaesivi, per amicum, librarium; qui responsioni meae imprimendae sumtus faceret. inveniri nequit. Haec certe & alia multa adversa, etiam animi languorem inducunt. Tu, clarissime vir, tranquillius vivis, & ut diu vivas, opto. Multa sunt, quae accurate a te in hoc libello examinari vellem. sed unum praesertim, de pardi se erigentis consuetudine, quam Prophetam notare voluisse existimo. & juvat Juvenalis locus. Num plures loci apud veteres auctores exstent, dicere nequeo. Leges hoc, si placet, specim. tertii pag. 10. Pauci nunc sunt, qui recte de hujusmodi quaestionibus judicare valeant. Certe nobis juvenibus majori in aestimatione erant hae literae. Si tale quid aliquis promississet, omnium in se oculos & studia convertisset. Omnium enim veterum aequae ac recentium interpretum curas in difficilibus V. Testamenti locis, vanas esse demonstrare possum. Totam S. Hieronymi explanationem capitis 31. Ezechielis frivolum esse, adeoque delendam, promisi me ostensurum, si subscriptores, uti vocant, studiis suis me juvare vellent. Sed in his terris paucissimos sacrarum rerum amatores deprehendo. Deus tamen excitare aliquos in aliis terris posset. Vale, vir clarissime & me ama. Amsterdami die v. Cal. Novemb. 1672.

EPISTOLA DXXIII.

NICOLAUS HEINSIUS

*Marco Meibomo.**Amstelodami.*

ET accepi proximis diebus munus lautissimum, specimen, inquam, tuarum in Vetus Testamentum observationum, & vix acceptum intente avidaque perlegendo exhausti. Transpositio tua in Jobo, ut perquam ingeniosa est, ita locum omnem ex obscuro luce meridiana liquidiorum ac egregie perspicuum reddit. Utinam sint, qui operi huic edendo impensas sufficiant pares,

M m m m m 3 ut

ut aliquando plenius tot tantisque deliciis atque ad satietatem nos ingurgitemus! e tribus, quae misisti exemplaribus, uno in usus meos seposito, sic enim te velle arbitrabar, duorum reliquorum alterum in Gallias V. Cl. *Emerico Bigotio*, sacrarum litterarum mire, ut scis, studio destinavi: alterum in Germaniam *Benedicto Friderico Carpzovio*, qui fratrem habet orientalium linguarum cognitione praestantem, nec ipsum earum prorsus ignarum. Princeps ille Monasteriensis, ut sunt tempora, nova dignitate auctus, in rebus suis constituendis atque ordinando reipub. statu, quem decessor ejus turbatissimum reliquit, est occupatissimus. praeterquam quod illi (quod neutiquam te fugit) qui Romanae Ecclesiae decretis sacramentum dixerunt, vulgatae Bibliorum versionis adhaereant aliquanto pertinacius. Jacere studia bonarum artium negligique hac tempestate, praesertim apud nos, jure expostulas, atque indignaris: neque hinc perniciēs illa stabit: plenis velis properamus ad profundam ignorantiae noctem, quam cladem amoliri quando non est in nobis, ab ipsis studiis solatium petamus, ac tranquillo toleremus animo, quod averti non potest, est necesse. Ad Livium quod paratum habes scripti apologetici, apud Leideneses puto facilius, quam vestra in urbe typographum invenerit, praesertim si illuc loca nonnulla ex illustrioribus, quae in auctore illo castigasti plurima, congesseris. In Juvenalis loco de *hiatu pardi* etiam feliciter es versatus; *latos* tamen *orbes*, non pro patinis aut lancibus capiebam, sed ipsas mensas, quae orbiculatae ut plurimum, interpretabar. Praecipuus Romanorum luxus in mensis Citreis versabatur, quos fulcra ut plurimum sustinebant eburna. hae autem mensae cum non e ligni citrei coagmentatis aut conglutinis tabulis, sed ex solidis constarent citri orbibus, quo latiores erant ac maculis interstinctiores, sive nodosiores, ut alii loquuntur, eo pluris aestimabantur, utpote quibus ab ipsa arboris in latum mensura pretium accresceret. *Orbes* autem pro mensis poni nihil novum. En apud eundem Juvenalem *latos orbes* denuo commendatos Satyra 1.

*Nam de tot pulchris, & latis orbibus, & tam
Antiquis una comedunt patrimonia mensa.*

de fulcris mensarum eburnis habes apud Martialem lib. 11. ep. 44.

*Tu Libycos Indis suspendis dentibus orbes:
Fulcitur testa fagina mensa mihi.*

per *Libycos orbes*, mensas Citreas innuit haud dubie. sic Tertullianus de Pallio, *adigo cauterem ambitioni, qua M. Tullius quingentis millibus non unum orbem citri emit, qua bis tantum Asinius Gallus pro mensa ejusdem Mauritanis numerat.* Nec aliter capiendus locus longe vexatissimus. sic Juvenalis Sat. xi. 173. loco vexatissimo, cum *Lacedaemonium orbem* dixit, mensam e marmore Lacedaemonio factam designavit, ut puto,

Qui Lacedaemonium pitifmate lubricat orbem.

Lauti enim nepotes illi interdum jam saturi pitifando, aut etiam Diis libando, nonnihil vini effundebant in mensam. docet Naso Epistola Helenes,

Or-

Orbe quoque in mensae legi sub nomine nostro,

Quod deducta mero littera fecit, Amo.

Multa ex Athenaeo atque aliis ad hanc rem illustrandam proferri possent, sed doctum non doceo. Apud Martialem quoque lib. 111. ep. 31. puto legendum

Et servit dominae numerosus debitor arcae,

Sustentatque tuas citrea mensa dapes.

Non aurea; de aureis mensis nihil lectum mihi memini, sed de argenteis Lamprius de Heliogabalo. *Primus mensas & capsas argenteas habuit.* Vale. Vianae ad Leccam Octob. 1679.

EPISTOLA DXXIV.

THEOPHILUS HOGERSIUS

Nicolao Heinio Dan. Fil. S. P. D.

B Imestri meo consulatu; hoc est illo tempore, quo meae in senatu praesidendi vices fuerunt, quoque, ut facile cogitare potes, Vir illustris, tot negotiis obrutus fui, ut nullam omnino Musis operam dare potuerim, exacto, ad vitam, quae maxime est ad naturam, ut Cicero loquitur, & literas & studia nostra, quantum per occupationes licuit, me retuli; statimque carmine, quod inchoatum & interruptum deposueram, resumpto ut paulum expolirem, denique perficerem, materia sub manu in tantum excrevit, praesertim mutato rerum statu & pace prorogata, ut non modo aliam inscriptionem adjungere, sed ipsum opus in libros, uti vides, dividere decentius existimaverim. Omnia autem iudicio tuo permitto; ure, seca ad arbitrium. Sed te, ut amicorum optimum atque unicum patronum, etiam atque etiam rogo, ut de tota cura & singulis membris quae sentias libere mihi quamprimum significes. Quantopere semper sim perosus domestica nostra jurgia novit Deus ille *κακοδωμῶν*. Sed quid facias? Improbi illi homines, qui antehac omnia ambitioni suae dando, vel rempublicam praedae habendo civitatem nostram miserandum in modum divexaverunt atque perturbaverunt, nec dum quiescere possunt: sed sive dolentes adhuc se consensu bonorum civium a gubernaculis ejus nuper fuisse exclusos, sive verentes ne sibi eripiantur ditia rapinarum suarum emolumenta, non desinunt praestantissimos & reipublicae amantissimos viros mille mendaciis & calumniis proscindere, odium tam Principis, quam procerum & vulgi in illos concitare, immo illorum bona, famam, vitam denique ipsam in extremum discrimen adducere. O fortunatam rempublicam! libet mihi exclamare cum disertissimo & optimo Romanorum, si hanc sentinam hujus urbis ejecerit. Neque enim illa olim Romae hac perniciosior extitit. nam Catilinam & Catiliniana prodigia

Nostro etiam in populo videas nostroque sub axe.

Hi aut in ordinem redigendi, vel de civitatis administratione submovendi, aut
ab

ab omnibus bonis necessario prodenda est respublica. Nam citius quis

Caelum terris permisceat & mare caelo.

quam illa animorum diffidia componat. Nos quod attinet, nullius nobis criminis conscii sumus, amore & studio in patriam nulli mortalium cedimus, debitum Principibus honorem & reverentiam lubentissime praestamus, nunquam tamen illorum favori damno & pernicië reipublicae velificaturi. Sancte autem (ut omnis calumniae occasio praecidatur) adjurare possumus, illos, qui nuper clavum reipublicae Batavicae tenuerunt, & nunc vel extra patriam degunt, vel miserrima morte occubuerunt, nec beneficiis nec injuriis nobis unquam cognitos fuisse. Quod restat, cum Venusino vate, fortunam

Laudo manentem: si celeres quatit

Pennas, resigno quae dedit, & mea

Virtute me involvo.

Vale, mearum Grande decus columenque rerum.

Daventrïae a. d. IV. Novemb. CIOICLXXIII.

EPISTOLA DXXV.

ANTONIUS BYNÆUS

Nicolao Heinsio S. D.

Hagam.

Facit singularis illa tua & admirabilis humanitas, Virorum Praestantissime, ut audeam iterum ad te scribere, & immensum indicare gaudium, quo perfusus fui lectis tuis ad me literis, quas mihi reddidit vir eximiae & multiplicis eruditionis *Joh. Georg. Graevius*. Cum enim ex iis cognoscerem, te in eorum album me recipere, quos amicitia tua dignaris, & constantissimum tuum erga me amorem futurum, gaudio, mihi crede, triumphabam. Ubi vero ad illam tuarum literarum partem veni, in qua judicium tuum de nostris observatiunculis promisi, & ad aliquid audendum hortaris, tum stupere coepi ac mirari, & agnoscere candorem animi tui, qui tantus est, ut cum omnium consensu mortalium sis *κεμπύτατος*, in aestimandis illis plus *χρηστότης*, quam *κρίσεως* adhibuisse videaris. Ita tamen accipio & mihi persuadeo, voluisse te hac ratione animos facere dubitanti, & specie laudationis hortari ad majora. Sequerer libenter & parerem, meique specimen in publicum darem, nisi talia essent mea, ut tutius latere videantur intra privatos parietes, quam protrudi foras. Fateor quidem perprurire mihi quandoque digitos, & imbecillem aetatem ambitione corruptam teneri, attamen dum accurato judicio perpendo & considero singula, animum plane despondeo, & si umquam aliquis scribendi ineptias odi. Nam ut nostro judicio placeat & faciat satis, necesse est habeat omnes aut plerosque perfectionis numeros, quod publicae a me luci dabitur, & ab ingenio politum sit oportet, ab arte limatum, ab industria elaboratum, denique profuturum publico, quod a me vulgabitur. Hinc cum non
illa

illa sim ingenii praestantia, neque ad eam iudicii maturitatem venerim, neque iis praesidiis instructus sim, ut ita, quae observavi, quae perficere, praestare visum est abortivos meos partus domi liberali custodia servare, quam eruditis obtrudere. id tamen illa adhortatione effecisti, ut auctoritate tua fultus, aucturus sim deinceps ea, quae, absque te fuisset, nunquam aggressurus fuisset. Quem enim reformidabo, cum Heinſius meas esse aliquid putat nugas, cui uni probari malim quam aliis omnibus? Atque utinam, ut errare in iudicando de meis dissertatiunculis coepisti, decipi porro te ac errare sic patereris? Quod cum futurum persuadeat tuus mihi notus amor & perspecta facilitas, audebo quasdam ad te mittere conjecturas, quamvis Heinſio aliquid legendum obtrudere, plus aliquanto semper putavi, quam publice edere. Apud Ovidium (cujus restitutione quantum cultioris literaturae studiosos demerueris, vix dici potest) lib. v. Metamorph. vs. 13.

— quae te, germane, furentem

Mens agit in facinus. —

vel invitis membranarum legendum censes, quod te. At sat sana mihi vulgata lectio videtur, & ab Ovidio dictum, quae mens te agit in facinus. Ita loquuntur praestantissimi Poetae. Virgil. v. Aeneid. vs. 519.

— quae mens tam dira, miserrime conjux,

Impulit his cingi telis. —

Catull. carm. xli.

Quaenam te mala mens, miselle Ravide,

Agit praecipitem in meos jambos.

Nescio an his addi possit Florus lib. ii. cap. 6. aut ipsius mens mala & averſa Carthagine Dii, in diversum abstulerunt. Et Ennius

Quo vobis mentes, rectae quae stare solebant

Antehac, dementes sese flexere via.

Apud eundem ii. Fast. vs. 651.

Inde ubi ter fruges medios immisit in ignes;

Porrigit incisos filia parva favos.

pro porrigit legendum puto porricit. Non hic addam quae Macrobius, Turnebus, Brissotius, Sigonius, Gronovius aliique de hoc verbo monuerunt, cum ea tibi ignota esse minime queant, solum iudicandum relinquam, utrum hoc loco porrigit, an porricit legendum sit. Locum Curtii lib. iii. cap. 3. Contra si quis aciem Macedonum intueretur, dispar acies erat, miror tam secure praeteriisse Curtii commentatores, nullique eorum de mendo suspectum fuisse. Non dicam jam de inepta & taediosa repetitione vocis acies, quae quandam latere corruptionem posset indicare, cum sensus jejunos admodum & insulsus sit; itaque pro acies unica addita literula lege facies. Contra si quis aciem Macedonum intueretur, dispar facies erat: equis virisque non auro, non discolori veste, sed ferro atque aere fulgentibus. Juvat conjecturam praecedens intueri, tum verba sequentia. Facies eo sensu existat etiam lib. iv. cap. 13. Haec dextri cornu facies

Tom. II.

Nnnnn

erat.

* Haec etiam emendatio Scheffero ad Curtii verba, & ad Phaedr. iv. 5. in mentem venit.

erat. Nescio cur multo suavius haec lectio meas aures feriat, magisque placeat, quam vulgata.

Versus 42. in Octavia Senecae manifeste corruptus legitur;

En qui ora Tanais primus imposuit jugo.

Josephus Scaliger, miraculum illud & portentum eruditionis, in Castigat. ad Tibullum pag. 159. legendum docuit,

En qui Britannis primus imposuit juga.

cujus conjecturae subscribunt viri Cl. Gruterus & Commelinus in notis ad h. l. Ego vero ex veteris scripturae vestigiis lego.

En qui orae Tanaësis primus imposuit juga.

Habes conjecturas quasdam, Vir illustris, quas audacius quam par est, ad te mitto. Te tamen boni consulturum, & me, ut coepisti, porro amaturum, humanitas tua dubitare non finit. Vale, flos eruditorum, lumen ac columen omnigenae doctrinae. Trajecti ad Rhenum. XI. April. A°. MDCLXXIV.

EPISTOLA DXXVI.

NICOLAUS HEINSIUS.

Antonio Bynaeo suo S.

Ultrajecti.

Cum plurimum voluptatis mihi ferre soleant tuae litterae, multo melle conditae, multa refertae artium bonarum fruge, Bynaeae suavissime, non indigne, ut spero, feres si ad illas oppido venustas brevius, quandoque rescribo, quam aut comitatis lex, aut tuus erga me adfectus singularis, quo triumpho, unice videntur flagitare. *Augur* enim quodammodo reddit calamitas temporum, si publica spectamus, si privata, lites domesticae, parum convenientes ingenio meo, & ab omni disciplina liberali prorsus alienae. Meam in Nasone castigationem Metamorphoseon quinto improbas jure optimo, & alia tibi sentienti subscribo haudquaquam invitus. Sed utinam id unum illic peccassem. Novit Graevius noster, noverunt alii ex amicis, cum agitare istam Nasonis editionem, alio me per familiares molestias & calumniam forenses advocatum, ut huic cogitationi, quae hominem requirebat totum, minus vacare, ac omnem me tradere potuerim. Postmodum attentiore cura complura ad limam revocavi in prioribus observatis ac correxi, quibus insuper habitis, ac me ne consulto quidam boni Leidenenses secundam tertiamque Nasonis editiones in publicum protrudere. De *Porriciendi* verbo, quod ad sola profecta referri credebam, amplius dispiciendum. In Curtio ante hoc biennium idem mendum observavi peregrinatione Germanica, uti ex schedis meis liquebit tibi aliquando. Miror profecto, tantillum mendum tot interpretum diligentiam tanto tempore frustrari potuisse. Apud auctorem Octaviae v. 42. *En qui orae Tanais primus imposuit jugo*, recte vidisti locum esse mendosum, sed quod reponis *orae Tamefis primus imposuit juga*, ut de Tamefi assensum praebere possim, ita alterum legis me-

metricae ratio haudquaquam permittit, ut *orae Tamesis* reponatur: cum pes Spondaeus loco secundo non sit adhibendus. Refingendum fortasse.

En qui arta Tamesi primus imposuit juga,

Arta, non *arcta* scribebant veteres, quod in *ora* mutari non magno negotio potuit. Verum haec tu perpendes diligentius. Vale, vir praestantissime, meque in tuis, ut coepisti, numerare perge. Hagae Com. ciciocLXXIV. XVIII. Maji.

EPISTOLA DXXVII.

JACOBUS EMMENESSIUS

Nicolao Heinsio.

Vianam.

Pace id fiat tua, quod confidenter fatis, Te, Tuasque serenas meditationes interpellare sustineo. Utinam ita tibi consent vires, ne tibi his meis naevis molestus sim, vel incommodem. Haeret aqua. Errore me extricare non valeo. Ad te, tanquam ad oraculum confugiendum est; quem in reconditis literis fugit nihil. Locus, qui mihi crucem figit, est in Virgilii Eccl. IV. vs. 62.

— — *Cui non risere parentes,*

Nec Deus hunc mensa, Dea nec dignata cubili est.

Ea itaque lege, si nempe sine incommodo valetudinis fieri queat (cujus, si nos amas, cura erit tibi prima) dabis explanatum Maronis locum, qui, cum mirum in modum torquet eruditos, a tuo divino judicio, & summo ingenii acumine, medelam flagitat, & non dubium est fore, quin si tanti sim tibi, consequatur. Unde Musae praesidium sperare habent, quam a suo Apolline? Pro eadem sententia faciunt Quintilianus l. IX. c. 3. Politianus Misc. c. 89. Turnebus Advers. l. XVI. c. 12. & l. XVIII. c. 34. Legentes, *qui*. Pierius vero ex collatis antiquissimis Codicibus, *cui*, legendum censet in dativo, quod *Nannius* nominativi casus vult, autoritate forte *Dausquii*, qui in orthographicis, *cui*, pro, *qui*, inveniri probat in veteribus Catulli libris. Quid *Pimponius*, *Vives*, aliique, quorum curae in hunc autorem extant, sentiant, pro explorato habes. Tui etiam muneris ero totus, & beneficii, si pro humanitate tua suggereris, an hic sermo de *Vulcano*, de *Salonino* Pollionis filio, an de *omnibus aliis*. Ubi otium erit rescribas oro, & facies rem pergratam. Liberrimis hisce postulatis dederis veniam. Vale, vir Praestantissime, Decus & Ornamentum Musarum. Iterum Vale, & me ama. Lugd. Bat. a. d. v. Id. Sept. A°. Aerae Christ. ciciocLXXV.

EPISTOLA DXXVIII.

JOHANNES BOSCHIUS

Nicolao Heinſio Dan. Fil. S. D. P.

Hagam.

Nullus univerſa in vita mihi dies illuxit unquam laetior, quam ea cum amabilis veſtra humanitas atque gravitas mihi tuam gratiam impartiri non ſit gravata, quanta ab illa uſque a Te redierunt in me bona? tanta mediusfidius ut pro meritis laudare non poſſet infirmus mentis noſtræ conatus: idonea quoniam animus non ſuppetit verba; calamum quoniam ſupra meum ſunt, ut ſupra ventos & nubes omnes Atlantis vertices. Accipe ergo immortales gratias, dum mei memor, ſemper agendas. Emendaſti ita, Nobilium eruditiffime, in tuis ad Naſonem Notis hoc Petronii diſtichon:

Dum ſumit creteam faciem Sertoria, cretam.
Perdidit illa, ſimul perdidit & faciem.

Doctiſſimus Thomas noſter Munckerus monuit, primum verſum claudicare, unde & mecum a Typographo male deſcriptum eſſe verebatur. nonnulli ſcripti habent: *Dum creteam ſumit faciem Sertoria &c. Dum ſumit cretam in faciem Sertoria &c.* vulgatae editiones. Pace quod fiat tua, quaero, quomodo ſcripſiſti? In Addendis noſtris ad Cap. xxviii. notavimus, & quidem ad ea verba: *Quum ergo adferretur, ad caput ejus cum minimis Symphoniacus tibiis acceſſit &c.* probam forſan Memmianae codicis ſcripturam eſſe, exhibentem, *efferreretur*, ex balneo ſcilicet. Seneca Libro de Brevit. Vitae cap. xii. *Audire quendam ex delicatis. (ſi modo deliciae vocandae ſunt, vitam & conſuetudinem humanam dediscere) cum ex balneo inter manus elatus, & in Sella poſitus eſſet, dixiſſe interrogando, jam ſedeo?* Cap. lvii. Ubi Encolpius Gitoni imperat, ut raptim grabatum ſubiret, & pedes manusque inſtitis annecteret, puto legendum: *sicut olim Ulyx ad arietem adhaeſiſſet*, pro eo, quod in vulgatis, *pro ariete*. Hyginus huic conjecturae occaſionem praebuit, idem inter alia de Ulyxe ſcribens Fab. cxxv. *At Ulyſes ſocios ſuos ad pecora alligavit, & ipſe ſe ad arietem, & ita exierunt ad Aeolum Hellenis filium, cui ab Jove ventorum poteſtas fuit tradita.* Quia ad vos tranſcurrere noſtra non ſinebat valetudo, & quia futura Martis die Notarum paginam una cum Dedicatione &c. mihi tunc pro ultima vice corrigendam, exſpecto: hac animi audacia uſus ſum, quam ut aequi bonique conſulas Te per communia Muſarum ſacra rogo, & ita ut quem maxime. Qua in re ars noſtra unquam Tibi quicquam poteſt, ea modo utare precor, ſic comperies factis, quod polliceor verbis. Vale, Vir Illuſtris & me amore tuo honeſtare perſevera, qui Deum t. o. m. veneror & obteſtor, ut Te ſub remigio alarum ſuae potentiae protegat, animi corporisque vires fulciat, conſilia dirigat, conatus ſecundet, & diu incolumen ſervet. Vale ter & amplius,

— — Maecenas, mearum.

Grande decus, columenque rerum.

Scribebam Delphis Batavorum die iv. Kalend. Decemb. A. C. S. cııııclxxvi.

EPI.

EPISTOLA DXXIX.

NICOLAUS HEINSIUS

Joh. Boschio.

Delphos.

IN catalectis Petronianis olim castigabam, *dum sumit creteam faciem Sertoria*, vel quod tantumdem est, *creteam sumit faciem*, cum id multo Latinus videatur; quam *sumit cretam in faciem*, ut vulgo circumfertur. Neque est quod te syllaba offendat, cum spondaeus contractione fiat τῆ *creteam*, quomodo & in Nasonis loco, quem pariter restitui, & in illo Maronis, *ferreique Eumenidum thalami*. sed modus exemplorum non esset: nihil enim protritius, praesertim apud hunc ipsum Maronem. In altero Petronii loco forte corrigendum *aveberetur*: nam *efferendi* verbum est ominosum, praesertim cum agitur de homine: nam Seneca cum *hominem elatum* dixit, *ex balneo* addit, quod ex superioribus in Arbitri loco intelligendum, nescio an concinne satis. Cap. LVII. *pro Ariete adhaesisse*, omnino mendosum est. Putabam aliquando exaratum fuisse *ero arietis*, vel *arietino*, absorpta nimirum priore Syllaba a praecedenti *sicut*, & Petronium dedisse *utero arietis*, vel *arietino*. quod historiae ab Homero narratae congruit. Vale, mi Boschi, & valetudinem cura diligenter. Hagae Kal. Decemb. CXCICLXXVI.

EPISTOLA DXXX.

NICOLAUS HEINSIUS

Johanni Phorbaeo.

Habitam tui rationem a Goudanis, cum per literas *Thomae Munckeri*, viri praestantissimi, nuper sum edoctus, vix est ut verbis abunde faciam testatum, quam vehementer sim gavisus. Nec multo post epistolam accepi a te peramanter scriptam, & orationem disertissimam, quam ut sine procraftinatione ulla avidus perlegi, ita animum meum amoris tuo ac benevolentiae singulari respondendi tanto tempore dissimulatum minime fateor oportuit. Neque dubitandum est, quin, si jure tuo mecum agis, graviter succenseas siue rusticitati huic meae, siue socordiae, quae te literis meis debitaque gratiarum actione tamdiu fraudatum finit. Quod si, cum nuper in vicinia eras apud Trajectinos, pedem ad nos promovere sustinuisses, & mihi fecisses profecto rem perquam gratam, & coram valetudinis meae, quam solam diuturno silentio possum praetexere, adflictum contemplatus esses statum. De Hesychio parentis quoque mei, quod valde cupiebam, sermonem contulissemus, cujus lucubrationis quod describendae ac publico dandae onus in te recepisti, heredes τῆ *μαναεῖτος*, me praesertim immensi beneficio cumulatum reddidisti. Volui qui-

dem non semel de tota re tecum agere, cum Delphis nondum emigrasses, sed pedum continua debilitate a proposito sum revocatus. Assiduae peregrinationes, & anni proximi viceni publicis negotiis ac litibus domesticis dati, adeo me mihi excusserunt totum, ut ab hoc studiorum genere alienior sim factus. Quid, quod futurum vix videtur, ut propriis lucubrationibus supremam manum imponam; adeo me premit, & quotannis in pejora vergit valetudo. Interim te enixum in modum rogo quaesoque, ne suscepti laboris taedium obreptare patiaris: si de tuo addideris, quae ipsemet observasti ad hunc scriptorem, quaeque Philologorum eruditissimi scriptis suis inseruerunt, in unum colliges, habebimus tuo beneficio scriptorem utilissimum omni ex parte castigatum. Vale. Vianae. Idibus Nov. cicciclxxviii.

Phorbaeus hic patrio nomine *Verwey*, Gymnasii Goudani & deinde Hagani rector, *Graevii* discipulus, Vir Graece doctissimus, ut Grammatica ejus sive *Via nova* docendi Graeca ostendit, *Dan. Heinsii* notas ad *Hesychium* descripserat, & suis additis editioni paraverat, cujus specimen etiam prodiderat. sed immatura morte interrupto opere, chartae illae post ejus fata oberrarunt: speramus tamen ejus Heredem brevi rationem inventurum, qua illis frui possimus.

EPISTOLA DXXXI.

JOANNES PHORBAEUS

*Nicolao Heinsio.**Vianam.*

BEasti me Tuis, Heinsi Nobilissime, quas mihi una cum suis misit *Joannes Georgius Graevius*, vir celeberrimus, omni bono de me studiisque meis meritis annos jam plurimos. Apollinem mehercules, cum tuum resignavi libellum, non Hesiodi tantum, sed alterius quoque Ascraei villam fumantem forte aliquando respexisse credidi. Has litteras vidisse, legisse, relegisse magnificum mihi duxi, Heinsi decus politiorum Musarum: sunt enim insignes notae cum amoris tui & studii erga me incredibilis, tum humanitatis tuae admirabiles: quae ut omnibus jucunda est quovis loco, ita mihi multis partibus gratior & illustrior videtur, si quis comiter & benigne accipiatur ab eo, qui ornat & celebrat usum omnis humanitatis. Quod me crevisse laetaris, totusque exsultas, ut es animo generoso, id mihi dubium fuit nusquam gentium: at orationem cum laudas, mones pariterque stimulum subdis, ut me diligentius exerceam in hoc genere. Cum nuper in vicinia vestra ad Rhenum fui, urbe exiveram in agrum Sicambrorum pietatis causa, ut una cum conjuge viserem ad parentes imbecillos annisque graves, quibus culpam meam condonabis, spero: dum enim illic haereo diutius praeter spem meam, ad scholas nostras redauspicandas recurrere coactus fui. Nunquam itaque posthac committam, ut pudor me vel subrusticus, vel vecordia nescio quae deterruisse videatur ab colloquio, quod tibi pergratum futurum esse intelligo, & mihi honorificum: quare primo quoque tempore, cum res nobis fuerint prolatae, Vianam excurram. Deum quaeso ter O. M. ut vires tuas, quas meo dolore ani-

mi

mi bene magno adfectas & debilitatas esse disco, recreet ac refocillet, Teque ad summam senectutem optima valetudine bono publico pervenire sinat. Hesychium, nisi Delphis huc demigrassem, jam pene totum descripseram, & plura observaram: aut sedibus hinc fixis profligatos quosdam & perditos offendi adolescentes, quos ne nervum mihi disciplinae eliderent, gregemque reliquum corrumpere, publico exegi auditorio: exactos vero privatim instituere cogor, senis horis quotidie scholas publicas aperiens, domesticas vero ternis, aut interdum quaternis. Istud ver sacrum vere novo procul a me amandabo: interim, quantumcunque possum, operam Tibi surripiam libentissime, manibus clarissimi tui parentis cum primulo diluculo parentaturus. Rogo igitur etiam atque etiam, ut causam mirari desinas meae tarditatis, jure enim indignari potes, quod neque ocius moveam, neque saepius ad te mittam. Verebar homo denso obsitus pulvere me in foro ostentare Criticorum, imprimis coram eo, cui omnes ultro principatum deferunt. Tamen aliquando fortunam periclitabor. Nunc de Hesychii editione Leidenensi novissima sic velim existimes, esse omnino vitiosissimam. Quam est illud flagris prorsus dignum? Ε'λέγχειν, ὀνειδῶ. Scrib. Ε'λεγχῶ ὀνειδῶ, &c. neutro genere. Iliad. B. vi. 235. Ω' πέπνες κακ' ἐλέγχεα. Anonym. κακὰ ὀνειδῶ. cum enim est ἀρσενικόν, aliud signat. Etym. ἐλεγχῶ δὲ ἐστὶν ὁ τὸ πρᾶγμα σαφηνίζων. Et paulo post, ὁ γὰρ ἐλεγχῶ εἰς Φῶς ἄγει τὰ πρᾶγματα. Ecce alium locum. Φθειρῶν, ὅρῳ πτυῶδες, ὅρος διὰ τὸ πληθύνειν ἐν αὐτῷ πίτυσι. & sic deinceps. Ubi leges ὀρθογραφίας καὶ συντάξεως turpiter violantur. Ego sic distinguo & refingo, Φθειρῶν ὅρῳ, πτυῶδες ὅρῳ, διὰ τὸ πληθύνειν ἐν αὐτῷ πίτυσι; τὰ γὰρ ἐντὸς τῆ σροβίλων Φθεῖραι καλεῖται. Audi paucis amabo brevem illum Homeri interpretem, qui totus hic noster est. Φθειρῶν ὅρῳ. Τῆς Καρίας περὶ Μίλητον. Διὰ τὸ πλῆθος ἔχειν πίτυς. οἱ ἦ τόποι τῶν πτύων Φθεῖραι παρονομαζέονται, καὶ τὰ τῆ πτύων μικρὰ σροβίλια ἕτως λέγονται, ὡς καὶ πτυοκάμπας Φασιν. Ἡ, ἀπὸ Φθειρῶν τῶ ἐνδυμίων. ἢ ὅτι τὰ ἀνθήματα τῆ πτύων ὁμοιά ἐσι Φθειρῶν. Si tamen Etymologum sequaris legendum erit, Φθεῖρες. Ejus autem locus subobscurus & corruptus hoc loco cum illustrandus, tum emendandus praetereunti. Sic ait, Φθειρῶν τ' ὅρῳ ἀκροτόφυλλον ὁ μὲν πεχνικός διὰ τὸ ἰσχυρῶς λέγειν ὅτι παρὰ τὸ Φθεῖρ γέρονε τὸ ὅτι ἢ ἐνδυμίων. ἔπειτα ἦ διὰ διφθόγγου λέγουσιν. Hoc dicit, τὸ πεχνικόν, hoc est, Herodianum sine Diphthongo scribere Φθειρῶν, caeteros vero cum Diphthongo Φθειρῶν. Rationem suae sententiae adferebat Herodianus, quod nomen proprium Φθειρῶν non esset desumptum ἀπὸ τῆ Φθειρῶν a pinis, sed a monte, qui Φθῖρ vocaretur nomine proprio, cujus cultores dicti Φθῖρες. Scripsit ergo Etym. ὅτι παρὰ τὸ Φθῖρ γέρονε κύριον τὸ ὅτι ἢ τῶ ἐνδυμίων. Sic enim Eustath. circa finem τῆ βραχυδίας. Postero tempore plura, & forsitan meliora dabo: cursor autem mihi vellit aurem, ut desinam. At quia apertae sunt Musarum januae, scias velim Optimum Graevium me commendasse Leidenibus, apud quos Rectoris statio vacat: id si negotium urgere potes apud amicos tuos, gratum memoremque cognosces, nihil enim ipse tento διὰ τὰς ἐν πέλει ἡμετέρας. Vale, Poëtarum Homere, & me ama. Gouda Nov. cicioclxviii.

JOANNES PHORBAEUS

*Nicolao Heinſio τῷ πανυ χαίρειν.**Vianam.*

Rationes, cur Tibi per ceram & linum salutem mittere me postulem, nunc habeo bene multas, Vir nobilissime. Primum enim omnium, cum me nuperrime τοῖς ἀθηναίοις bona fide, ut ex Graevianis didici, magno studio & summa diligentia commendaveris, sic velim existimes, eam operam, istuc, inquam, Tibi beneficium a me esse gratissimum. Sic semper enim mihi visus sum me Deorum vitam esse nacturum, si viris tantummodo honestioribus & eruditioribus, qui famam suis Scriptis ac meritis condidissent immortalem, quique exacte de rebus Musicis judicare possent, aut placerem aliquando, aut certe innotescerem. Solum Tuum judicium, amoremque candidissimum, quo complecteris immerentem, pluris facio, quam quodvis opum incrementum. Sic sum, Heinſi Optime: una illa voluptas, quam capio ex clarissimorum hominum testimoniis, animum meum explere potis est. Quare, ut ad summum caput hujus libelli transiliam, neque nocte neque die mens consistet aut acquiescet, nisi si quotidie hoc hiberno fidere per duas horas subsecivas, quam legem mihi tuli, Patris Tui celeberrimi τῷ μακαρίτῃ emendationes Helychii emendatissimas diligenter, quod facio, exsequar describere. Quaedam, etsi pauciora, sunt in illis, quae vix assequor: quaedam lineolis subductis notata, quae vir diligentissimus suspecta habuisse videtur, de quibus in utroque codice nihil adnotatum ostendo: quod genus μερῶν ἐργάζεσθαι in voce Θῆς. Hoc ego, fateor, nullus intelligo. nonnullis per me ipse locis video plagam esse impostam luculentam; nisi male metuo, ut judicium meum non satis acre, eam hinc illic curare queat, ut nihil nunc dicam de subsidiis, quae maximo meo dolore nequicquam conquiro. In coelo sum, Heinſi Nobilissime, si cum Clarissimo *Graevio*, viro itidem mei studiosissimo, quoniam Te Trajectum venturum fore accepi, Goudam excurreris. Quovis tempore mihi & conjugii carissimae hospes venies gratissimus: quod ut primo quoque tempore facias, Te precibus uterque curatissimis oramus. Non minus Te, mi Apollo, videre ardeo, quam Parens olim Tuus divinum *Scaligerum*, cum *Scaligeri* monumenta quaedam studiose lectitasset, nunquam autem suis oculis ἰσόθεον φῶτι intuitus fuisset. Alias de ineptiis meis, ad Musicam spectantibus, garrire, nisi tibi molestae sunt, occipiam. Antequam manum de tabula tollo, precor Deum immortalem, ut, cum tot annos vitam videris minime ingloriam, plurimi deinceps bono publico Tibi defluant anni laetissimi sine omni taedio, molestia & acerbitate. Tantum est. Nunc vale, Poëtarum Homere, & me, ut coepisti, amare pergito. Mea Tibi salutem adscribit solidam verbis amantissimis. Iterum vale, Decus meum, & litterarum omnium praesidium. Idibus Januariis anni Gregor. CIOICLXXIX. Ex Gouda.

EPISTOLA DXXXIII.

NICOLAUS HEINSIUS

*Joh. Phorbaeo.**Goudam.*

Gavisus equidem sum haud leviter oblata mihi non ita nuper, ut tum videbatur, tibi gratificandi opportunitate nonnulla, Phorbaee doctissime; sed quod literae tuae tardius aliquanto ad me pervenissent, ut causam tuam coepi agere, invitus intellexi & Consules Leidenfes, & illos, quos fautores hîc mihi fore promiseram, pro Rectoris defuncti optione fidem obligasse. Quod & ipsum ex me cognovisse pridem debueras, nisi res familiaris domo me pridem evocasset proximis diebus vix tandem reducem. Adfulgebunt, uti confido, quandocumque tempora desideriiis meis minus inopportuna, quaeque pleniore argumento successum officii nostri & adfectus tibi testentur. Nam cum eruditioni tuae aliisque, quae in te resplendent adfatim, virtutibus, ut studeatur, non mearum tantum esse partium, sed id ab omnibus praestari oportere, qui liberales artes cum interitu jam luctantes tenere foveant ac salvas cupiunt, aequum ac par judico; tum privatim est, quo nomine me meosque omnes tibi plurimum debere ultro agnoscam, quod famae parentis mei postumae, describendis ejus in Hesychium doctissimum grammaticum lucubrationibus plurimum per te accedit, quas utinam tuo beneficio in lucem proferri aliquando videamus. Nec dubito magnum iis incrementum addi posse ex iis, quae *Scaliger, Casaubonus, Salinasius, Meursius* aliique ex hominibus literatis aetate nostra ad eundem scriptorem observarunt. nam qui ea proxime castigare est aggressus, operi par non erat. Sed hac de re confabulabimur uberius, quandoque ad nos excurrēs, vel solus, vel cum nostro *Graevio*: nam te ut domi tuae conveniam, cum velim maxime, praesertim officiosum in modum a te invitatus, metuo ut per valetudinem detur. Vale. xxv. Jan. cicioclxix.

EPISTOLA DXXXIV.

NICOLAUS HEINSIUS

Joh. Phorbaeo.

Hesychium Parentis mei tua industria ac lucubratione tandem eo perductum esse, ut cum publica utilitate proferri in lucem possit, Phorbaee praestantissime, equidem immane quantum, plus etiam quam quod credas, laetor & exulto, eoque nomine nos τῶν μακαρίων heredes animum tibi gratum ac devotum praestare semper erimus parati. Ego praesertim, quem proxime ea tangebatur cura, ut scriniis defuncti postumis iretur consultum. Sed facultatis meae non erat, id effectum dare, quod tu felicem in modum praestitisti, cum

Tom. II.

Ooooo

nulla

nulla orientalium litterarum, quam tamen hîc unice requiri videbam, cognitione instructus essem; ne quid dicam de valetudine, quae non permittit, ut propriis lucubrationibus supremam manum imponam, nedum ut alienis, si tamen paternae pro alienis habendae, publicandis possim vacare. de *Scaligeri* Hefychio te spei tuae falsum esse, vehementer equidem doleo. paullo ante mortem paternam codicem hunc integrum atque illaesum vidi. De ceteris in congressum nostrum proximum sermones differemus. Vale, Vir praestantissime, & mihi ac paternae memoriae, sic ut coepisti, velle in posterum perge. Vianae III. Sept. CIOICLXXIX.

EPISTOLA DXXXV.

JOANNES PHORBAEUS

Nicolao Heinsio τῷ πάντῳ S. P. D.

Vianam.]

NEc opinanti tuum non munusculum, ὃ κεφαλὴ πμωτάτη, sed munus adfertur, elegantissimus Casa: quem pluris facio, quod Poëtam esse video. Hoc studium cum mirifice mihi puero placuerit olim in artium trivio cognoscendo, non possum dicere, quam poeniteat has meditationes postea, quae & animum recreant, & ad divina quaeque & excelsa mentem elevant, quod Philosophari mallet, plane neglexisse & abjecisse. Suspirat quidem animus in illud curriculum, non ut repuerascam, sed cum viris sapientissimis resipiscam, redire aliquando: verum liber animus requiritur & vacuus. Remitto vilissimum ἀντίδωρον, lusus meos Fescenninos, & jam diu misissem ante, sed extimui rubricas Tuas, Vir Nobilissime: solus enim vides omnia acutissime, & carmina pangis polita, tersa, erudita, & jucunda. Liceat enim mihi dicere quod & orbis litteratus omnis tuas virtutes praedicat, & ipsa laudabit aeternitas. Sed ista haecenus. Copiam mihi aliquot librorum, qui serviant nobis in proferendo Hefychio, facere pollicetur auctio Wevelinkhoviana: illa hasta posita omni impetu revocamur ad opus, quod nobis accurandum mandasti, quadrandum. Interea loci, ne desideremus, in usum nostrarum Scholarum edere instituimus *Scioppii* nostri Mercurium; quem ex barbaro Latipum feci, pro Italico sermone nostro subjecto. Huic addo aliquid de meo, Grammaticen scilicet, a qua aberunt vitia, spero, *Lithocomi*, *Vossii* prolixitas, & *Scioppii*, si qua est, obscuritas. Si qua re nostros conatus adjuvare potes, senties hunc hominem tibi per omnem vitam fore obnoxium. Nemo natus cum diligentius cognoverit antiquos Codices manu exaratos, & veterrima monumenta quaeque, id te, Vir Nobilissime, per tuam divinam humanitatem obsecro, & ita rogo, ut mihi rescribere non dedigneris, si forsan opinio mihi mea mutanda, quid existimes de discrimine *i* & *u* vocalium & consonantium, de majusculis & minusculis vel in propriis & appellativis, vel dignitatum nominibus similibusque distinguendis. In nummis & lapidibus certo scio non observari vul-

vulgares distinctiones. Vocor in auditorium meum. Vale, Decus nostrum & totius Europae, & me ama, Gaudae. xv. Nov. cCiCiCLXXIX. Salutat Virum Nobilissimum conjux mea. *Conprobo*, *inprimo* atque id genus alia per n in Virg. Tuo V. N. An etiam in MSS. solutae orationis? quanquam hoc nihil ad metri rationem. *Quodcumque* & *quodcunque* an utrumque rectum? Extra compositionem & in ea dicitur & cum & con. An *author* in vetustis membranis? Ignosce quaeso, Vir Maxime, cum istiusmodi quæstiunculis molestus fio.

EPISTOLA DXXXVI.

E V A L D U S R U L A E U S

Nicolao Heinsio S. D.

Vianam.

Quaquam faucium dolor, quo aliquot diebus laboravi, nondum plane resedit, etsi jam de acerbitate nonnihil remisisse videatur, medicamentumque hoc ipso die sumpsi, ut intestina purgarem, ita ut ob corporis afflictionem animo etiam non satis valeam, tamen cum cogito magnitudinem & vim tuae erga me benevolentiae, qua etiam antequam rogareris, commendandum me sumpstisti viro humanissimo & doctissimo *Emerico Bigotio*, ne statim Tibi gratias agerem; nec ipso morbo sum deterritus, nec singulari tuo iudicio elegantiaque in scribendo, quae debent iis, qui ad Te literas mittunt, timorem incutere; ne quid incultum aut alienum a proprietate Latini sermonis scribant; ego certe non leviter commoveor, qui sciam quam nihil dignum auribus tuis afferre queam. Itaque & gratias Tibi ago, quas possim, maximas, &, si quid sit, quod Tibi hinc confectum velles, omnem meam operam industriamque Tibi defero: cum enim Tu me ornandi, commendandi, tuamque erga me voluntatem ostendendi nullum tempus praetermittis, acquum est Te etiam aliquem ex me fructum percipere, quaquam probe sciam nullis meis officiis tuorum in me meritorum magnitudini aliqua ex parte responderi posse. Etsi autem in me ingenii facultas nulla sit, opum autem exigua, ita ut multum Tibi de me polliceri non possim, ea tamen in me est observantia tui, & studium gratum quid Tibi faciendi, ut diligentia & fide sperem me adsequuturum, ne ullum in me hominis, quem plane Tibi beneficiis devinxisti, officium desideres. Itaque, si quid sit, fac me ejus, quaeso, certiore, & commendare me viris doctis pergas. *Gradius* ex Italia, ut accepi, Lutetiam venit, & moratur apud *Menagium*. Scripsi heri ad *Cl. Graevium*, ut veniam a Te impetrare vellet, quod ad Te, vir nobilissime, nondum scripseram, eas literas *Boschius* imprudens suis, quas ad Te dederat, incluserat, itaque, si modo ante hac Tibi tradantur, rogo, ut eas perlegas prius, ne ipse iterum forte ad Te mittat, deinde mittas ipsi, & ipse etiam meam causam agas, ut ad tuae commendationis auctoritatem ab ipso etiam aliquod pondus accedat. Hoc autem inprimis velim, ut si quid noveris esse, aut hinc, aut aliis in regionibus, ex quo laboris & itineris maxime fructus constare mihi possit, quid

autem tu non noveris? hoc ut docere me velis. Vale, Vir humanitatis & eruditionis gloria praestantissime, & me ama. Dabam Lutetiae Parisiorum a. d. vi. Non. Octobr. ciciocclxxix.

EPISTOLA DXXXVII.

EVALDUS RULAEUS

Nicolao Heinsio S. D.

Vianam.

PUdore suffundor, nobilissime Vir, quoties cogitor, quod certe saepissime facio, tuae erga me benevolentiae & humanitatis magnitudinem, qua Tu unus effecisti, ut me suscepti in Galliam itineris non poeniteat, quod tuis beneficiis nondum ullis ipse officiis responderim: nam quanquam non is sim ego, a quo Tibi pares magnitudine aut numero fructus exspectare debeas, quod unum tamen potui, ut saltem literis Tibi gratum meum animum testarer, in hoc me intelligo non nimis fuisse diligentem, quod Te rogo, ut adscribere velis itineribus & negotiis, quibus occupatus fui. Caeterum ita, velim, existimes gratias me Tibi, quas possum, maximas agere, studiaque, observantiam, industriam, operam meam in omnibus tuis rebus semper fore paratam, gratissimumque hoc mihi fore, si illa aliqua in re tua uti velis. Omnino autem vellem posse me loca quaedam ad Te perscribere veterum auctorum MSSorum codicum ope correctâ, quo & gratum Tibi facerem, & probarem constare mihi quodammodo fructus mei itineris; sed & ego tam brevi tempore vix quicquam praestare potui, & Tu is es, qui diligentissime scriptos libros pervolvisti, variantesque lectiones omnes probe cognitâs & perspectas habes, ut dici Tibi nihil possit, quod novum aut inauditum Tibi accidat. Hoc autem visum est non praetermittere, quod scripserit Pater tuus, vir doctissimus, Oden Horatii, *Laudabunt alii claram Rhodon*, in duas dividi in duobus, quibus usus est, codicibus, alteramque Oden incipere ab illis; *Albus ut obscuro*, &c. itaque fieri debere censere, me hoc etiam in MSS. Thuan. aliisque deprehendisse, atque ita & in quodam veteri MSto Graevii esse memini, & in meo libro, qui cum quatuor vetustis codicibus est collatus, ita distingui in illis quatuor notari in margine libri video, ita ut de eo vix amplius dubitari sinat hic librorum scriptorum consensus. Cum autem & Justini quaedam loca, quae suspecta mihi semper fuerunt, inspexerim, eorum quaedam ad Te perscribere volui, ut aliquando, si tanti videatur, quid Tu de hisce sentias, ostendas. Lib. ix. c. 5. §. 7. *Et confinis domitarum gentium barbaries*. Hoc nunquam placuit. MSS. Vict. & Thuan. duo habent. *barbararum*, alter Th. *barbaria*, unde aut *barbariae*, aut *barbarie* legendum sum suspicatus. Lib. xii. c. 8. in fin. *in eadem reverterunt*. Voss. corrigit *indidem*, Sebis. *via eadem*, sed cum Thuan. unus omittat *in*, ita forte recte legeretur; nam *via* per ellipsin saepe omittitur; aut forte est aliquid, quod in Th. duobus legitur, *eadem die*. Lib. xv. c. 3. per *immensas harenarum moles cursus comes fuit*, Puto legendum, *cursu*: Lib. xix. c. 1. *mortuorumque corpora cre-*

ma-

mare potius &c. in MSS. Viët. & tribus Thuan. erat, *mortuorum quoque*, & in MSS. Viët. fuerat aliquando, *vetabantur*, sed mutatum erat in *jubebantur*, quod verbum si reducamus, rem confectam dabit, quae nunc torquet viros doctos. Lib. XXI. c. 5. *Nam licet tyrannicis vitiis semper abundaret.* Certe haud frustra videtur, quod in MSS. Viët. & Th. duobus legitur: *Nam licet tyrannus semper viciis abundet*, & in Th. tertio; *tyrannis semper vicia abundant*, sed correctum fuerat ab alio, ita ut esset, quemadmodum in aliis Th. & S. Viët. Plura sunt, de quibus cupide intelligerem tuum iudicium, sed nec temporis angustia finit, & vereor ne hisce jam nimium molestus Tibi fuerim. Quod si ita sit ejus veniam des quaeso. Si quid autem Tibi a me vel. hîc, vel Hagae Comitum, quo proficisci intra paucos dies cogito, effectum velis, ejus me, quaeso, fac certiore, literas autem mitte vel Harlemum, vel Hagam Comitum. Vale, Vir Nobilissime, decus & ornamentum saeculi nostri, & me ama. Optimo Graevio, ubi ita occasio ferat, meo nomine salutem aut mittas, aut dicas, rogo. Dabam Harlemi a. d. xv. Kal. Jul. c. i. c. i. c. lxxx.

EPISTOLA DXXXVIII.

EVALDUS RULAEUS

Nicolao Heinsio S. P. D.

Vianam.

Cum essem Hagae Comitum, qua hodie domum redii, *Leerfius* Bibliopola homo probus, & magis in literis nostris versatus, quam quisquam talium hominum, praesertim postquam obiit *Elzevirius*, retulit mihi magnam spem esse, Te adduci posse, ut illa, quae in Petronium es commentatus, in lucem edi pateris, quare, cum meum non sit ostendere Tibi homini sapientissimo, quantos ex ea re fructus possis capere, esseque Te adversus Te ipsum non solum non indulgentem, sed ne aequum quidem, quod Te defraudes ea voluptate, quam ex gloria tam praeclari operis vivus posses percipere, quaque lenire aliquo modo molestias infirmioris tuae valetudinis posses, tantum Te oro, ut hoc doctis omnibus, omnibusque, qui a literis non abhorrent, quos hoc a Te flagitare existimare debes, largiri velis, & si ita videbitur, *Leerfio* etiam nostro, ut ejus potissimum typis imprimatur: cui si quid in ejus libri editione aut consilio, aut opera, aut industria mea prodesse poterit, id praestabo libenter quantum valetudo mea, quam quartana febris frangit, quotidie magis feret. Idem *Leerfius* tradidit mihi literas *Huetii* elegantissimas & humanissimas, quas, quod adeo fideliter ad me perferendas curasti, gratias Tibi magnas ago. *Petrus Re-titus* vir doctissimus scripsit ad me se Miscellaneas Observationes tuae fidei & curae commendasse, quare non dubito, quin & illis propediem homines humaniorum literarum amantes beabis, quod tamen ut tuis potius operibus facere velis, obsecro Te vehementer: quanquam enim meas preces pondus non magnum apud Te habere existimem, tamen Te a me rogari non inique Te ferre puto. Vale, Heinsii hominum doctissime, & me ama. Dabam Harlemi pridie Non. Decembr. c. i. c. i. c. lxxx.

EINIS TOMI SECUNDI.

ERRATA IN TOMO II.

pag. lin.	lege	pag. lin.	lege
23 in fin.	illae	511 11	emendandi & re- ponendi
24 in fin.	χεράειν	514 33	mitio
30 in fin.	scriptos	514 13	doctissimus
49 25	ineditorum	29	optima
68 8	διακνήτεται	538 26	fessus
125 18	διγούστοι	561 13	ἀντάξιαν
141 7	vestrae	567 16	Queriani
160 13	affecta	580 27	suballione
28	ceteras	595 24	Staius
170 3 & 4	Vellerio	28	praefecturos
173 15	servato	599 17	ἀεσία
202 ult.	ad me illum	600 4	puta
206 9	possit	9	quam
216 23	Renicum	622 15	linnae
223 14	fui	23	δύδυμα
233 26	septingentibus	924 39	quod
279 antep.	quas	635 32	nomine
280 29	Migrationem ibi	636 1	ἀντιρρήτως
282 2	demum	637 13	descriptum
286 not. 5.	antistibus	648 34	πνίατε
291 10	freudent	660 21	πάσθ
309 12	narravi	26	πιαρῶς
312 27	medicinos	664 42	Βόεας καὶ ἐρῶ
330 ult.	suslinerit	673 17	ἀποδιδάκτον
340 15	eos	680 11	primas
18	sospitabor	681 20	denuo
348 8	ᾠδὰ φρονῶν	688 8	Umbrosas
349 5	ᾠδολοδάμεν	690 18	Pompejæ
354 20	ζὺν θεῶ	697 30	Pompeji
355 11	ᾠδὰ δειγματίσει	699 18	annotata
357 12	lesum	707 22	rhombem
358 37	demtii	708 9	τοῖς
402 21	at te,	709 22	ἀνδρῶς
409 23	admovit	729 21	Λήμντες
415 5	poëmatur	740 5	jaſto
422 7	egeras	742 6	morita
445 10	notas	743 32	proximo
452 8	Domino	744 22	diem
453 15	alia	760 10	exceptatissimae
459 9	confudit	772 5	comparebant
482 29	permittendam	776 28	ὑπεροχὴν
489 28	detenere	782 1	ubi
496 25	opas	789 26	Coripedi
498 30	licet	814 21	editionum
508 ult.	διδασκαλεῖν		editorum
509 35	quo		

